

New Testament

Yanomamö Language

Yanomamö - Bible - New Testament

San Mateo	3	
San Marcos	92	
San Lucas	145	
San Juan	234	
Hechos	299	
Romanos	381	
1 Corintios	417	
2 Corintios	453	
Galatas	476	
Efesios	490	
Filipenses	503	
Colosenses	513	
1 Thessalonians	522	
2 Thessalonians	530	
1 Timoteo	534	
2 Timoteo	544	
Tito	551	
Filemon	555	
Hebreos	557	
Santiago	585	
1 San Pedro	595	
2 San Pedro	606	
1 San Juan	613	
2 San Juan	622	
3 San Juan	624	
Judas	626	
Apocalipsis	629	

Yanomamö - Bible - New Testament

San Mateo

San Mateo 1

¹Jesucristo a yanowamöblou showao mlao däjä, bada ebä cuo lä balöono wei, ei lä tä a. Jesucristo a lä cui, David e li nodiwä cuoma, Ablaamö nodiwä e çai.

²Ablaamö bä ijilubö, Isaacö e cuoma. Isaacö bä ijilubö, Jacobo e cuoma. Jacobo bä ijilubö, Judawä ebä mashi çai cuoma.

³Judawä bä ijilubö, Fale e cuoma, Sala e çai, Damala nija cäcöbö lä taqueno wei cäcöbö lä cui. Fale bä ijilubö, Esomo e cuoma. Esomo bä ijilubö, Alamö e cuoma.

⁴Alamö bä ijilubö, Aminadaba e cuoma. Aminadaba bä ijilubö, Naasono e cuoma. Naasono bä ijilubö, Samono e cuoma.

⁵Samono bä ijilubö, Booso e cuoma, Laaba nija a lä taqueno wei a lä cui. Booso bä ijilubö, Obede e cuoma, Ludi nija a lä taqueno wei a lä cui. Obede bä ijilubö, Isai e cuoma.

⁶Isai bä ijilubö, David e cuoma, a bada bälöo lä dodijiono wei a lä cui. David bä ijilubö, Salomo e cuoma, Ulia bä suwäbö e nija a lä taqueno wei a lä cui.

⁷Salomo bä ijilubö, Loboama e cuoma. Loboama bä ijilubö, Abiasi e cuoma. Abiasi bä ijilubö, Asa e cuoma.

⁸Asa bä ijilubö, Josafada e cuoma. Josafada bä ijilubö, Jolamö e cuoma. Jolamö bä ijilubö, Usia e cuoma.

⁹Usia bä ijilubö, Jodamö e cuoma. Jodamö bä ijilubö, Acasa e cuoma. Acasa bä ijilubö, Esequia e cuoma.

¹⁰Esequia bä ijilubö, Manasesi e cuoma. Manasesi bä ijilubö, Amono e cuoma. Amono bä ijilubö, Josia e cuoma.

¹¹Josia bä ijilubö, Jeconia ebä çai mashi cuoma. Babilonia jamö bä çai jubeje, Isaeli ebä lä dälalefälöno wejei däjä, öjö bä li bälöo balöoma.

¹²Babilonia jamö bä çai jubeje, Isaeli ebä dää waiquialalefälöno wejei ja, ei bä lä cui bä bälöo nodiablalou juoma. Jeconia bä ijilubö, Saladiele e cuoma. Saladiele bä ijilubö, Solobabele e cuoma.

¹³Solobabele bä ijilubö, Abiudu e cuoma. Abiudu bä ijilubö, Eliaquimi e cuoma. Eliaquimi bä ijilubö, Asolo e cuoma.

¹⁴Asolo bä ijilubö, Sadocu e cuoma. Sadocu bä ijilubö, Aquimi e cuoma. Aquimi bä ijilubö, Eliudu e cuoma.

¹⁵Eliudu bä ijilubö, Eleasala e cuoma. Eleasala bä ijilubö, Madana e cuoma. Madana bä ijilubö, Jacobo e cuoma.

¹⁶Jacobo bä ijilubö, José e cuoma. Öjö a José bä suwäbö e nija, Jesús a oshe wawäblaliyoma, Cristo a wafa lä jilabou wejei a lä cui.

¹⁷¿Öjö tawä? Ablaamö nodiwä bä bälöablalou fa cuanö, cuanö, cuanö, yacumö David a bälöo nodioma. Öjö däjä, David nodiwä ebä bälöablalou cuaaö fa nomöjöofälönö, yacumö Jeconia a bälöo nodio nomöjöoma. Öjö a lä bälöono wei däjä, Babilonia jamö bä çai jubeje, wayu bänö Isaeli ebä dälalefälömaje. Öjö bä bälöablalou nomöjöo fa cuanö, cuanö, yacumö Cristo a oshe wawäa nomöjöa nodilayoma, Yai Bada tänö a shömabä a lä yaileno wei a lä cui.

¹⁸Jesucristo a oshe lä wawäblaliyono wei däjä, abinaja tä cublaliyoma. Bä nöö María e lä cui, Josénö a wafa boma ma cui, a quilii showao däjä, Yai Bada a Bui lojodenö, a shöbönabölayoma. A shöbönabö fa damolalunö,

¹⁹bä feyalobö Josénö a nia däänomi majöwä. ¿Öjö tawä? José showadi a dodijama. A nö quilili bleaamaö bufionomi. Öjö cudeenö, a wafafujou mlai ja, mamicai a nia daaö bädaoma.

²⁰Öjö ma cui, a nia lä joyaö wei tä ja, a bufi dayäo showao däjä, Bada etä ajele majali damolaliyoma. José abinaja a nowa majali tama. —David nodiwä José wa e lä cuinö, suwäböfä María a daaö quilii dicoo dijä. Bä ijilubö e lä didibole, Yai Bada tä Bufinö a li fa dobälönö, a li shöbönabö.

²¹Ijilu walo a nia tablaö. Cama ebä lä cui, bä doblou ma mlai ma cui, etä nowa nia mladamaö. ¿Öjö tawä? Etä nowa nia mladamaö cudeenö, Jesús wa wafa nia jilaö —a nowa majali tama.

²²Yai Bada a wano wäyälwä a nija, Bada tä jaba cuu lä balöono wei etä a bejedi wawäblobä, inaja tä bluca cublaliyoma. Abinaja Yai Bada tä a cuu balöo showaoma.

²³Moco a jubamou dao lä mlai, a nia shibönabölayou. Bä ijilubö e nia tablaö. Emawe e afa nia jilabouje. Einaja tä a cuu. ¿Öjö tawä? “Emawe”, bä cuu ja, “Yai Bada tänö bämalecö çai cua”, bei bä cuu.

²⁴Öjö däjä, José a jocäblou fa fenalonö, bä suwäbö e naca fenalema, Bada etä ajelenö a nowa lä tano weinaja showawä.

²⁵Öjö ma cui, Maríanö bä ijilubö e tablaö showao mlao däjä, a jubaö mlai ja a tabou balöoma. ¿Öjö tawä? Bä ijilubö e fa tablalönö, Josénö a wafa Jesús jilaquema.

San Mateo 2

¹Judea tä ulifi jamö, Lomateli bänö Elode a bada lä lämabono wejei däjä, Belena jamö Jesús a oshe cublaliyoma. A oshe cublaliyono wei ja, motoca a lä faö wei jamö bä lä

bälöono wei, ai bä bufi daolewä waloqueyoluma. Tä nia lä cublou wei tä daö showadaobeje, shidicali bä shino mödimaje. Jelusale jamö öjö bä fa yafilionö, abinaja bä cuma.

²—Judio bä nija a Bada läobä a oshe nofi da wawäblalui, ¿wedi jamö bei a? Shidicali a ja, yama a mayo dalalema, motoca a lä faimaö wei jamö. Öjö nija yamacö möfe bolanö, yama a wafa Bada doblao tabä yamacö juma —bä cuma.

³Öjö bä a fa jililänö, bada tä Elode lä cui, a bufi shifilimou showadaoma. Jelusaleteli bluca bä ma cui, bä bufi çai shifilimoa mö fedulayoma.

⁴Elode a lä cuinö täbä bada yododoblamaö showadalayoma. Nofi bäyäälewä blowäjawä bä ma cui, Moisesi tä a ja täbä lä damaö wejei bä ma cui, öjö bä fa çocamomalönö, bä wälili cadidioma. Abinaja a cuma. —Yai Bada tänö a shömabä a lä yaileno wei a lä cui, ¿wedi jamö bei a oshe nia jowa li cubloma? —a cuma.

⁵Abinaja a nowa taö mö feduomaje. —Judea tä ulifi jamö, a oshe nia jowa wawäbloma, Belenateli bä shabonobö jamö. Inaja Yai Bada a wano wäyälwä ai a cuu balöo showaoma. Abinaja tä a cuu.

⁶Judawä ebä ulifibö jamö, Belenateli wamacö lä bälöle, wamacö nofi yai tabobeje wamacö. Judawä ai ebä bada cublawä bawä ma cui, iba Isaeli ebä nija a Bada nia yai lä läo wei, çafä Belenateli wamacö nija ya nia wawäblamaö. 'Einaja tä a cuu —Elode a nowa tamaje.

⁷Öjö däjä, Elode a lä cuinö, bufi daolewä bä naca çö fa jätolanö, shidicali a wälima. —¿Wedi tä dodijiwä däjä, bei e li shidicali wawäblaliyoma? —a cuma. Öjö bä a fa jililänö, a ijilu lä badaö wei etä dalalema.

⁸Öjö däjä, Belena jamö bä shömalanö, abinaja a jole cuma. —Belena jamö bä aa da showadaalu. Ijilu wama a fa dayäblalönö, wama a dalalei yalo wamale yömölaa mö yabaa çöliyo. ¿Öjö tawä? Wamale yömölalei ja, camiyänö ya çai möö nomöjööbä. Öjö nija ya möfe bolanö, camiyänö ya wafa Bada çai doblao taö mö feduobä —a jole cuma.

⁹Bufi daolewä bänö bada a wä fa jililäjenö, bä alayoma. Motoca a lä faö wei jamö a shidicali jaba lä möno wejei a lä cui, a balöao çofälöma. Ijilu a çai lä cuböono wei a yafi fedubö jamö, a yanöcöbalejayoma.

¹⁰¿Öjö tawä? Shidicali a lä dalaleno wejei däjä, jbejedi lä bä bufi yai doblalou fe balojooma!

¹¹Öjamö bä fa çöblalunö, Maríanö bä ijilubö e çai cuobä jamö, a ijilu dalalemaje. A fa dalalöjenö, mashita jamö bä möfe fa boolalunö, a wafa Bada doblao tamaje. Öjö däjä, bä çai madofibö lä juno wejei, bä fa wawämamalalöjenö, a dobämaje. Olo bä ma cui ja, täbä wäqueshi ni çledeli lä uçucamamou wei täbä ma cui ja, fii defibä shuu nö lä çledeli wei defibä çai shuu ma cui ja, öjö täbä bluca ja, a dobämaje.

¹²Bada tä Elode nijamö bä jayuaö çofälöö mlaobä, majali tänö bä fa wasölönö, shomi yo jamö bä çö yacläa çölayofälöma.

13Öjö bufi daolewä bä çolayono wei ja, Yai Bada tänö ajele e shömöa jälema. José nija a majali fa wawälönö, abinaja e majali cuyoluma. —A da jocäblalu. Ejido jamö suwäböfä sho, ijilu wafä a çai docufälöbä. Bäfä nacaö showao mlao däjä, öjamö lä wamacö yanöcöo cudio balöobä. Bada tä Elode lä cuinö, fei däjä ijilu a nia jädäaö, a nia fa shänö —e majali cuma.

14Öjö tä mö didi showawä ja, a laa fa showadaalunö, Ejido jamö bä suwäbö e sho, ijilu a çai docua fe jalua showalayofälöma.

15Bada tä Elode a nomaö showao mlao däjä, öjamö lä bä cudio balöoma. ¿Öjö tawä? Yai Bada a wano wäyälwä nija, Bada a lä cuno wei tä a bejedi cublobä, öjö tä li cublaliyoma. Abinaja tä a cuu. Ejido jamö, Ijiluyä a faö çofälöbä, ya nacalema. Einaja tä a cuu.

16¿Öjö tawä? Bufi daolewä bänö bada tä Elode a mölamalemaje yalo, a nö bada walowä jushudou fe balojoa jälayoma. A nö walowä jushudou fa dodijilonö, Belenateli bä shabonobö jamö ma cui, öjamö bä bälöa fe lä fayoono wei bä nijamö ma cui, ijilu walo bä bluca shäa showadaamalalema, lasha bolacabö a famaö showaa lä mlajei bä lä cui. Bufi daolewä bä wälili malä waiquiono wei. “Ei tä lä cui däjä, inaja ijilu a bada cua waiquile dao”, a bufi cuma yalo, öjö bä nabä bluca shömöquema. Ijilu bä bluca shäbeje jamö, bada a nia yai lä läo wei a çai ijilu shämou coyocoo showadaobä.

17Ijilu bä bluca lä shämaleno wei tänö, Yai Bada a wano wäyälwä Jelemia a lä cuno wei tä a bejedi cublaliyoma. Abinaja tä a cuu.

18Lamaa tä ulifi jamö, bä a nö dedeblaloma. Bä öcöma. Bä a nacli jilioma. Laquela nodiwä ebä suwä lä cuinö, bä ijilubö ebä nomöa bomaje. Ebä cuonomi waiquiwä cudeenö, bä bufi nia lojodomabou lä çono wejei bä nija bä noshi umlaoma. Einaja tä a cuu.

19Öjö ma cui, bada tä Elode a nomalayono wei ja, Ejido jamö Bada tänö ajele e shömöa fa çolunö, José nija a majali wawäa çomalema. Abinaja e majali cuma.

20—A da jocäblalu. Isaeli ebä ulifibö jamö suwäböfä sho, ijilufä wafä a çai çojamöö çobä. Ijilu a shäo bufi lä doblaono wejei bä lä cui, bä nomaa waiquilaliyoma —e majali cuma.

21Öjö däjä, José a fa jocäblalunö, Isaeli ebä ulifibö jamö, bä suwäbö sho, bä ijilubö a çai çoa çolayofälöma.

22Öjö ma cui, Judea jamö, Elode bä ijilubö Aquelao e a bada läo juo fa jililänö, öjamö José a juu quilima. Öjö däjä a majali wasömamou fa çonö, Calilea jamö bä aa yacläa majölayofälöma.

23Nasale tä afa shabono lä jilaö wejei jamö, bä yai bälöaliyoma. Inaja Yai Bada tänö bä taamama, cama a wano wäyälwä bä lä cuno wei tä a bejedi cublobä. Yai Bada tänö a shömabä a lä yaileno wei a lä cui, öjö a wafa wäyämamou ja abinaja tä a cuu. Nasaleteli a wafa nia jilabouje. Einaja tä a cuu.

San Mateo 3

- ¹Bei. Jesús a bälöo waiquio däjä, Judea tä ulifi bloque jamö fe ojomalewä Juan a wawälâyoma. Öjamö lä a fa wawälönö, täbä yömölama. Abinaja bä nowa tama.
- ²—Wälidiwä tä ja, ¡bä bufi da lädalu! Yai Bada tänö cama ebä çai nia lä cuo wei tä ajedou waiquia lä cuimi —bä nowa tama.
- ³¿Öjö tawä? Juan a cuo showao mlao däjä, Yai Bada a wano wäyälwä Isaia a lä cuinö, yedu jamö a wafa wäyää balöo showaoma. Abinaja tä a cuu. Ulifi bloque jamö bä yömöläö ja, a wä nia lojodoaö. “¡Bada tä juu lä cuimi!”, a nia cuu. Abinaja bä nowa nia taö, a wä Bada jiliaö cadidio showadaobeje. “A nia lä juu wei jamö, bei wama e yo wawämaö fa cuaaimadunö, e yo shalilibläö da balöloje”, bä nowa nia taö. Einaja tä a cuu, Juan a wafa wäyää lä balöono wei tä a lä cui.
- ⁴Juan a lä cui, yalo cameyo çicö ja a didioma. Yalo si çai acadafu yaboma. Cösö cösöma bä waama, buu ubä çai.
- ⁵Öjö däjä, Juan nija Jelusaleteli bä bluca walobaleyoluma, Judea jamö bä bluca lä bälöblai bä çai. Jodana u sibo jamö bä lä bälöjömono wei bä çai.
- ⁶Bä doblono lä mlai tä ja bä a nö wäolanö, Jodana u jamö cama nija bä fe ojoblamolâyoma.
- ⁷Faliseo bä bada ma cui, öjö bä fe çai nia fa ojoblamonö bä walobaleyoluma. Saduseo bä bada çai. Juannö öjö bä bluca fa dalalönö, bä afa taö ja abinaja bä nowa tama. — ¡Olu bä wayu lä culenaja wamacö lä cui! Wamacö jolemou. Wamacö fe ojoblamou lä buo wei tänö, ¿wamacö nia nowamamou daanö? Ma, Yai Bada a ishoo däjä, wamacö nia nowamamoimi.
- ⁸Wamacö bufi lädou dablamobä, bä bejedimou da wawädo, öjö lä.
- ⁹“Ablaamö nodiwä yama ecö li cudeenö, yamacö doblou fe yadio weicätä”, bä bufi çai cuu dicoo dijä. Öjö tä nowa cuami. Bamacö nowa malä tale. Yai Bada tänö Ablaamö ebä nodiwä tabou bufi doblao fa cunoja, fei maa mabä ma cui ja, bä nö tablamalebö wei.
- ¹⁰¿Öjö tawä? ¿Yai Bada a nia ishooimi daanö? Fii fibä nasöcö jamö a fayocola yalejebou waiquia lä cule. Öjö cudeenö, nii dodijiwä bä lalou lä mlai fibä nia diyämamou. Cowa wacö jamö fibä nia shäyäblamou —Juannö bä nowa tama.
- ¹¹Abinaja Juan a cuma. —Camiyänö bamacö fe ojoblaö däjä, mau u ja bamacö jödödöblamaö, wälidiwä tä ja wamacö bufi lädou dablamobä. Inaja camiyä ya cuaaö ma balöo wei ma cui, camiyä ya nodi jamö, a nö yai lä walojaö wei a nia waloo nomöjöoyoluu. Öjö a shino yai doblaa ayaa cudeenö, ya bayelibläö bädaobä tä ma cui ja, ya nö quilibö wei. Bei mamicö lä didio wei ecö bädawä ma cui, ya etäbä nö yefibou quilibö wei. Öjö a lä cuinö, bejedi lä wamacö nia yai jödödöblaö. Mau unö mlai, Yai Bada a Bufinö wamacö nia jödödöblaö. Cowa wacönö täbä çai nia jödödöblaö.

12' ¿Öjö tawä? —a cuma—. Nii bä tamou däjä, mobä yaiblamou lä culenaja a nia cuaaö. Mobä fa yaiblälöjenö, tä ulifi aublaö çoje. ¿Öjö tawä? Shode walalawä fe çai bada juu waiquia lä cuimi, tesibä fa joyalönö mobä feiblamabä. Mobä nia lä cuo wei jamö, mobä taablabä. Öjö ma cui, cowa wacö ludalou dao lä mlai jamö, bei tesibä nia yablaö —Juan a cuma.

13Öjö däjä, Calilea tä ulifi jamö a culanö, Jodana u jamö Jesús a walobaledayoma, Juan nija a fe ojoblamobä.

14Öjö ma cui, Juan a wä lämou ja abinaja e cuma. —Shädayai. Cafä nija camiyä ya fe yai ojoblamobä ya ma cui, camiyä nija, ¿inaja bei wa li cuaaö cuboyoi?

15Einaja Juan a ma cuno wei ma cui, abinaja Jesús e cuu mö feduoma. —Fei däjä, inaja lä tä yai cuo balöobä. Yai Bada tänö tä tamaö lä bufii wei bäfä tä bluca tabä bäfäcö malä cui —e cuma. Einaja e fa cunö, Juannö a wä julema.

16Jesús a fe fa ojoblamolunö, lobe a washölöblou ço däjä, judu mösö ca jolablalajelayoma. Möso ca fa jolablalujulunö, Yai Bada a Bufi, jai joledo a cuwä, Jesúsno a itou dalalema. Cama nija a loquema.

17Öjö däjä, fedu jamö tä a fa bädaludunö, abinaja Yai Bada a cuma. —Ijluyä ya nofimaö lä dodijile, miji a. Cama nija bejedi lä ya bufi yai doblalou dodijio —a cuma.

San Mateo 4

1Inaja tä cublou fa waiquilonö, ulifi bloque jamö Yai Bada a Bufinö Jesús a lululema, fecula bada nija a yabäcamobä.

2Öjamö a iyaö wasöo showao däjä, 40 tä mö didi fa tablamalönö a ofäo dodijio.

3Öjö däjä, yabäcalewä e waloqueyoluma, fecula bada a lä cui. Abinaja e cuma. —Yai Bada wa Ijlubö ja lä, ei maa mabä da nosiema, nii bä cublobä —e cuma.

4Öjö ma cui, abinaja Jesús e cuu mö feduoma. —Ma. Abinaja Yai Bada tä a oni cuu. Nii bä ma waö wejei ma cui, öjö tä bädawänö täbä nia demi cudiomi. Yai Bada tä lä cuu wei tä a blucanö, täbä yai nia shino cudio. 'Einaja tä a oni cuu —Jesús e cuma.

5Öjö däjä, Jelusale jamö, fecula bada anö Jesús a lulua taa majölefälöma, Yai Bada e shabono lä yaile jamö. Yai Bada etä yafi feyaca jamö a fa ublamabajalunö,

6abinaja a nowa tama. —Bei. Yai Bada wa Ijlubö ja lä, a da quelufälö. Abinaja tä a oni malä cuu wei. Cafä nija ajele etäbä nia läamaö. 'Einaja tä a oni cuu. Abinaja çai. Dodijidawä wa nia yaçaaöje, maa mabä ja wa mamicö shäo mlaobä. 'Einaja tä a cuu —fecula badanö a nowa tama.

7Jesús abinaja e cuu nomöjööma. —Abinaja tä a çai cuu. Cafä wamacö nija Yai Bada ya lä bufiblamou wei ya Bada lä cui, wamale bejedimou nia wabaimi. 'Einaja tä a cuu —a Jesús cuma.

⁸Öjö dāja, tä jefu ösöwä lä dodijii jamö, fecula badanö Jesús a bälabeledayoma. Öjamö cäcöbö culanö, Jesús nija, bita jamö täbä jödödöwä bälöblawä lä yaiblai täbä jömaö cuaama, täbä madofibö nowa lä bluca wei bä çai.

⁹Abinaja a nowa tama. —Camiyä ya cotä jamö wa möfe bolanö wale afa bada doblao taö ja, ei täbä bluca lä cublai täbä ja, bäfä dobäo weicätä —a nowa tama.

¹⁰Öjö dāja, Jesús abinaja a cuu mö feduoma. —Bei, Sadanasi. ¡Shomi jamö a da culufälö! Abinaja tä a oni cuu. Cafä wamacö nija Yai Bada ya lä bufiblamou wei ya. Wamacö möfe bolanö, camiyä Bada ya lä cui wamale afa nia shino Bada doblao taö. Camiyä wamale a nia shino yai juaö. 'Einaja tä a cuu —a Jesús cuma.

¹¹Öjö dāja, fecula badanö a fa dacöfälönö, ajele bänö a bayelibläo juoyolumaje.

¹²Bei. Juan a lä juwäleno wejei tä a fa jililänö, Calilea jamö Jesús a aa majölayofälöma.

¹³Nasaleteli bä shabonobö fa dacöfälönö, Cabenao jamö a bälöblaa majöquema, modu u casö jamö. Öjamö lä, Sabulono ebä nodiwä bälöoma, Nefitali ebä çai nodiwä.

¹⁴¿Öjö tawä? Yai Bada a wano wäyälöwä Isaia a wä bejedi cublobä, öjamö lä a bälöa majöquema. Abinaja tä a cuu.

¹⁵Sabulono nodiwä ya ebä afa ulifibö wäyäo lä cule, Nefitali nodiwä bä çai lä bälöle jamö, modu u ja yo lä itobe jamö, Jodana ai u mashi jamö. Öjö Calilea tä afa ulifi lä jilabolajei jamö, judio bä lä mlai bä bälöjowä.

¹⁶Öjamö lä bä lä bälöle bänö, bä bufi nia lä wacacao wei tä shi bada dalalemaje. Tä mö dödöobä jamö bä ma cuono wei ma cui, bä nö bleaaö shi wälibä bä çai ma cuono wei ma cui, öjö bä nijamö tä shi çai çöblaliyoma. Einaja tä a cuu.

¹⁷Öjö lä dāja, Jesúsno täbä jaba yömöläo cuaaö ja, abinaja bä nowa tama. —¡Fei dāja waiquiwä! ¡Wäliwä tä ja, bä bufi da lädalü! Yai Bada tänö cama ebä çai nia lä cuo wei tä ajeou waiquia lä cuimi—bä nowa tama.

¹⁸Modu Calilea u casö jamö Jesús a diquecou cuaafälölanö, Simón a dalalema, bä fäähä Andrés e çai. Öjö a Simón lä cui, Pedro a wäfa çai cua. Yuli bä lä yacamou wei täcö walalawä queamabö dāja, cäcöbö dalalema. ¿Öjö tawä? Yuli yäcalewä cäcöbö cuoma.

¹⁹Abinaja Jesúsno cäcöbö nowa tama. —Jabo. Cäcöbö da yaiquiyö. Yuli bä bädawä mlai, yanowamö wafä täbä nabä shino yai jubä, bäfäcö nia tablamaö —cäcöbö nowa tama.

²⁰A wä fa jilibölänö, täcö walalawä daböa fa showadacöfälönö, öjö nijamö cäcöbö yaua showadalayoma.

²¹Öjö tä fe dolejdale ja, Sebedeo bä ijilubö Santiago e daa majölalema, bä fäähä Juan e çai. Canawä a jamö, bä föö Sebedeo a lä cuinö cäcöbö çai döcäcäoma. Bä befi çai çalanö, yuli bä lä yacamou wei täcö walalawä idudamaje. Cäcöbö fa dalalönö, cäcöbö nacalema.

²²Cäcöbö fa nacalänö, canawä a jamö bä föö Sebedeo e befi çai daböa fa showadacöfälönö, cäcöbö yaua showalayofälöma.

²³Calilea jamö Jesús a juu cuaalanö, judio bä yododabä yafi bä jamö, täbä yömöläö cuaama. Yai Badanö cama ebä çai nia lä cuo wei tä ą dodijidawä wäyöö cuaafälöma. Bluca tä wayu shomitawänö täbä lä jaliliono wei, täbä bluca jalomaö cuaama. Täbä lä wälıdiono wei bä çai.

²⁴Inaja a cuaaö cudeenö, Silia jamö a wäfa jıliaö blaucou cuaamaje. A wäfa jılilemaje yalo, bä jalili bluca çai waloblaamaje. Bluca tä wayu shomitawänö täbä lä jaliliono wei bä ma cui, bä nö ninili lä bleaano wei bä ma cui, öjö bä bluca jalomalalema. Bä lä feculaböono wei bä ma cui, bä çai cofibö lä cashähäoblono wei bä ma cui, bä lä yaıoliböono wei bä ma cui, öjö bä bluca çai jaloa showamalalema.

²⁵Öjö däjä, Calilea jamö bä lä bälöle bä ma cui, Judea jamö bä lä bälöle bä ma cui, Jesús nija bluca dodijiwä bä yaulayofälöma. Decaboli jamö bä lä bälöle bä ma cui, Jelusale jamö bä lä bälöle bä ma cui, Jodana ai u mashi jamö bä lä bälöle bä ma cui, öjö bä bluca çai yaulayofälöma.

San Mateo 5

¹Bluca täbä çocamou fa dalalönö, jefu tä balöcö jamö Jesús a dolequebefälöma. Öjamö lä a lä lole jamö, cama ebä lä nocamabono wei bä loo ajededou showalayoma.

²Bä yömöläö ja abinaja bä nowa tama.

³—Yai Bada nija bä jömöo lä mlai bä lä cui, öjö bä bufi yai doblalobä cäbä. Yai Bada tänö bä çai malä cule.

⁴Bä lä öcöö wei bä lä cui, öjö bä bufi yai doblalobä cäbä. Yai Bada tänö bä bufi nia lojodomabou fe malä yadio wei.

⁵Bä bufi lä oquei bä lä cui, öjö bä bufi yai doblalobä cäbä. Yai Bada tänö dodijidawä bä nia malä tabou wei, tä ą wäa lä taqueno weinaja showawä.

⁶Yai Bada nija bä cadidou bufi lä doblao wei bä lä cui, öjö bä bufi yai doblalobä cäbä. Yai Bada tänö bä bufi nia malä doblamabou wei.

⁷Täbä nofi lä ojodabou wejei bä lä cui, öjö bä bufi yai doblalobä cäbä. Yai Bada tänö cama bä nofi nia çai ojodabou mö malä feduo wei.

⁸Yai Bada nija täbä bufi mö yai lä bluca wei bä lä cui, öjö bä bufi yai doblalobä cäbä. Wawädowä Yai Bada a nia malä dablao wejei.

⁹Täbä bufi lä yanöcömabou wejei bä lä cui, öjö bä bufi yai doblalobä cäbä. Yai Bada ijilubö ebä ąfa nia malä jilamou wei.

¹⁰Täbä dodijaö yalo, bä nö lä bleaamamou wei bä lä cui, öjö bä bufi yai doblalobä cäbä. Yai Bada tänö dodijidawä bä nia çai malä bälöö wei, öjö tawä?

11' Camiyä wamale bufii yalo, wamacö ɤfa ma lafumaöje dǎjä ma cui, wamacö bufi doblalobä wamacö. Wamacö nö ma bleaamaöje dǎjä ma cui, wɔlidiwä tä bluca ja wamacö ɤfa jole ɕai ma taö wejei ma cui, wamacö bufi doblalobä wamacö.

12' Inaja wamacö taamaöje dǎjä, bä bufi shino da doblalo. ;Bä bufi doblalou da dodijio! ǎÖjö tawä? Fedu fedole jamö wamacö nia dobämou fe malä balojoo wei. Cama bä nö badabö ma cuinö, inaja showawä Yai Bada a wano wäyäléwä bä nö bleaamaö malä balöono wejei. Öjö bä owäbou nodia dicoa lä culajei.

13' Bei —Jesús a cuma—. Cafä wamacö lä dodijaö wei tänö, jai sayu wamacö cuwä, wama täbä dodijidawä tamabobä. ǎÖjö tawä? Öjö ma cui, bä sayu oquediblou dicoo ja, bä nia mödadiblou lä ɕo wei etä cuami waiquiwä. Bä oquediwä waiquiwä yalo, bä nia bufiblamou ɕoɕaaimi. Sibö jamö bä fa joyalöjenö, bä nia cadicaö buoje. ǎÖjö tawä? Inaja wamacö cublou dicoo ja, wamacö nofi nia tamamoimi majöo.

14' Abinaja Jesús e cuma. —Bitä jamö täbä bluca lä bälöblai wama täbä wacacamabobä wamacö shi, Yai Bada nija bä cadidofälöbä. ǎÖjö tawä? Jefu tä bololo jamö a shabono cuo ja, a nia joyao malä mlai. Inaja showawä, iba wamacö nia wawädowä lä dablamous wei wamacö.

15' Cowa wacö ömöamaöje dǎjä, wöö anö wacö fe nia yojobou majöo malä mlajei. Ma, wacö ɔtaobä jamö wacö nia yai ɔtabouje, yafi jamö bä lä cule bänö täbä dablabeje.

16' Inaja showawä, shi wacacawä wamacö lä cui, wawädowä bä da damolalu. Wamacö dodijaö fa dalalöjenö, Faafä a lä culadi a wafa doblao tabeje —a cuma.

17' Abinaja Jesús e cuma. —Moisesi ya etä ɤ joyamabä, ya walonomi. Yai Bada a wano wäyäléwä bänö tä ɤ jaba lä wäyano wejei tä ɤ ma cui, öjö ya tä ɤ ɕai joyamaimi. Ma. Ya tä ɤ joyamaö mlai ja, ya tä ɤ nia shino yai fa wawämanö ya waloqueyoluma, öjö tä ɤ ja wamacö bufi yai jaducublobä.

18' Cafä wamacö nija ei ya wɔ lä cui, bejedi lä ya wɔ. Judu mösö ma cui, bita a ma cui, öjö tä bluca cuo showao dǎjä, Moisesi tä ɤ oni nia joyamou balöomi. Moli tä mamö wai lä onile ma cui, tä nia oni joyamoimi. Moisesi etä ɤ lä cuo wei tä ɤ bejedi cublou showao mlao dǎjä, tä ɤ nia oni mladou bädaomi.

19' ǎÖjö tawä? —a cuma—. Moisesinö tä ɤ bluca lä wäyano wei tä ɤ lä cui, wama tä ɤ bluca juabä tä ɤ. Moisesi ai etä ɤ nofi tabou lä mlajei bä lä cuinö, ai bä nija tä ɤ ɕai mashi juamaimi dicoweje ja, cama bä ma cui bä nofi nia ɕai tamamoimi mö feduo. Yai Bada tänö cama ebä ɕai cuobä jamö, öjö bä nö nia öjöböamaimi. Öjö ma cui, Moisesi etä ɤ yai lä juaö wejei bä lä cuinö, ai bä nija tä ɤ ɕai bluca juamaö mö feduoje ja, Yai Bada tänö öjö bä nofi nia shino yai tabou ayao. Yai Bada tänö cama ebä ɕai lä cuo wei jamö, wawädowä öjö bä nö nia shino öjöböamaö.

20' Bamacö nowa taö malä waiquio wei —a cuma—. Moisesi tä ɤ ja täbä lä damaö wejei bä lä cui, yanowamö täbä nija bä nia cadidou fa dablamonö bä ma cuaablalou wei ma cui, bä jolemou. Yai Bada a bufi doblamaboimije. Faliseo bä bada ma cui, inaja showawä bä jolemou cuwä. Wamacö yai cadidou mlai ja, öjö bä lä cuaö

weinaja wamacö cuaaö dicoo ja, Yai Bada tänö cama ebä çai cuobä jamö wamacö nia cuomi waiquiwä —a cuma.

21 Jesúsno tä ʔ wawämaö ja, abinaja a cuma. —Judio wamacö nö badabö nija tä ʔ jaba wäyämou lä balöono wei, wama tä ʔ daö waiquia. Abinaja Moisesinö bä nowa tama. Yanowamö wama täbä nia shäimi. Wama täbä shäö dicoo ja, bä dobloimi lä jömaö wejei bä bada lä cuinö wamacö nabä nia shömöaöje. 'Einaja bä nowa tama —a cuma—.

22 Öjö ma cui, abinaja bamacö nowa taö lä cule. Aifä wa shäö ma mlai ma cui, wa nofi wälibou dicoo ja, wa nö bleaamabä wa waiquiwä. Aifä wa shäö ma mlai ma cui, öjö nija wa jushudou dicoo ja, wa jömamobä wa waiquiwä. Wa nö waiblaö dicoo ja, bä dobloimi lä jömaö wejei bä bada nija wa çai jubeje wa. ¿Öjö tawä? “¡Wa bufi jaducäwämi nö lä beblalole!”, aifä wa nowa taö dicoo ja, çafä shobali wacö jamö wa jubä wa.

23 ¿Öjö tawä? —Jesús a cuma—. Öjö cudeenö abinaja ya cuu. Yai Bada wa dobäbä, yalo bä lä dodoblamou wei bä maqueblamobä täcö jamö wa icuolanö, aifä a lä cuinö, çafä nija tä nowa lä tablete tä ja wa bufi jaducublou yalo, abinaja wa nia cuaaö.

24 Yalo bä lä dodoblamou täcö cotä jamö, Yai Bada nija wa tä nia lä dodobou wei wa tä nia blaaö balöo. Aifä a sho, dodijidawä wafäcö ʔ nia wayou ço balöödayou, çafä nija tä nowa lä cule tä nowa mladamabä. Öjö däjä, yalo bä lä dodoblamou wei täcö jamö wa juu mö yabamou fa çöimanö, afä wa tä lämabou mlai ja, Yai Bada wa tä nia shino yai dobäyoluu.

25 'Wa wäfa dobloimi nia lä wäyäo wei a lä cuinö, bada nijamö wa çai juu showaofälöö däjä, lobe a nofia da çolä —Jesús a cuma—. Bada a nija wa juwäamaö fa dicoonö, wa nö bleaamaö mlaobä. ¿Öjö tawä? Täbä fe lä lamaö wei a nija wa juwäa majöa fa dicoblamalänö, wa fe laamaö dicoo mlaobä.

26 Çafä nija ei ya wä lä cui, bejedi lä ya wä. Tä nowa lä cule, wa tä nowa bluca çöamaö showao mlao däjä, wa nia famaö ço buomije —a cuma.

27 Abinaja Jesús a cuma. —Tä ʔ jaba wäyämou lä balöono wei, wama tä ʔ daö waiquiwä. Abinaja Moisesinö bä nowa tama. Wamacö nia joleblaloimi. 'Einaja bä nowa tama —a cuma—.

28 Öjö ma cui, abinaja bamacö nowa taö lä cule. Suwä bä nijamö täbä mamö beshili lä showablalou wei bä lä cui, bei bä bufi jamö bä joleblalou waiquia lä cule.

29 ¿Öjö tawä? Wamacö noshi umlaobä wamacö. Jayu wa boco jamö wa mamö lä cuinö wa wälidiaamaö dicoo ja, wa mamö fa ucäblamolunö mamö da joyamolu, öjö lä. Wa lä bayucui wa ma joyamolayou wei ma cui, inaja buo. Shobali wacö jamö wa mamocu befi çai demi shäyäblamou dicoo ja, bei wa nö shino bleaaö yaiquei.

30 Jayu wa boco jamö wa imicö lä cuinö, öjönö wa wälidiaamaö dicoo ja, inaja showawä. Wa imicö fa bäblamolunö imicö da joyamolu, öjö lä. Wa lä bayucui wa ma

joyamolayou wei ma cui, inaja buo. Shobali wacö jamö wa imicö befi çai demi juu dicoo ja, bei wa nö shino bleaaö yaiquei.

31' ǃǃǃ tawä? —Jesús a cuma—. Abinaja täbä nowa çai jaba taö balöomaje. Bä suwäbö bä joyaö cadidiobeje, bä feyalobö bä lä cuinö tä ǃ oni fa tablajenö, bä suwäbö bä nija tä ǃ oni nia jöböaöje, etä ǃ çai oni shömamou çobä. 'Einaja bä nowa jaba ma tano wejei ma cui,

32' abinaja bämacö nowa taö lä cule —a cuma—. Bä suwäbö a nofi beshili jushuaö ma mlai ma cui a joyaö dicoo ja, a doblamaimi. Shinoco a nö cuo majöobimi ja, ai a walo ja a yabäcäo lä majöle, bä feyalobö e li mayo. Inaja showawä, ai a walo lä cuinö, suwä joyano a däaö majöo ja, öjö a çai dobloimi mö feduwä. “Bä feyalobö enö a malä joyaleno wei”, a bufi cuu ma bäle ma cui, inaja Yai Bada a bufi cuu mlaicätä. Ma. “A lä joleblalou wei a”, Yai Badanö öjö a nofi tabou.

33' Abinaja çai —Jesús a cuma—. Tä ǃ jaba wäyämou lä balöono wei, wama tä ǃ daö waiquiwä. Yai Bada nija wama tä ǃ lä wäaö wei tä ǃ ja, wamacö nia jolemoimi. Bada tä nija wamacö ǃ nö lä wäo weinaja, wamacö nia cuaaö shalilio showao.

34' Einaja bä nowa jaba ma tano wejei ma cui, abinaja camiyänö bämacö nowa taö lä cule —a cuma—. Wamacö bejedimou dablamobä, Yai Bada a wafa jayumaö buo dijejä. “Ya jolemoimi, Yai Bada a malä cule”, wamacö nia cuimi. Judu mösö ma cui, wama mösö ǃfa nia jayumaö buomi. Öjamö Yai Bada a malä läladi.

35' Wamacö nia bejedimou fa dablamonö, bita a ma cui a wafa çai jayuma dijejä. Jai Yai Bada mamicö maquedalobä, a bita cuwä malä cui. Jelusale a wafa shabono çai jayuma dijejä. Bada tä yai lä cui, öjamö a nia lä bälödalou wei a shabono malä cui.

36' Bei wamacö fe ma cui, wamacö bejedimou dablamobä, bä fe ǃfa jayumamou bädao dijejä. Wamacö fe lä au wei tä ma cui, wamacö fe lä ushujui tä ma cui, çafä wamacö lojodenö wamacö fe tablamobä wamacö malä mlai.

37' ǃǃǃ tawä? “Awei”, wamacö nia lä cuu wei, bä ǃ nö bejediaö da showadao. “Ma”, wamacö nia lä cuu wei, inaja showawä. Wamacö bejedimou dablamobä, ai wama tä ǃfa jayumaö lä bashiblaö wei tä lä cui, öjö fecula bada bei mayo li waiquiwä, a yai lä wälidii a lä cui —Jesús a cuma.

38' Abinaja Jesús a cuma. —Ei tä ǃ jaba wäyämou lä balöono wei, wama tä ǃ daö waiquiwä. Ai mamö wäliaö lä dicoo wei a lä cui, inaja showawä, cama mamö çai nia tablamamou mö feduo. Ai nacö wäliaö ja, cama nacö çai nia wäliamamou mö feduo. 'Einaja bä nowa jaba ma tano wejei ma cui,

39' abinaja bämacö nowa taö lä cule —a cuma—. Wälidiwä talewänö wa taamaö bädao ja, a nö yuo dijejä. Jayu wa boco jamö wa mamoca lä cui, wa mamoca baiaö ja, wa nö yuo mlai ja, ai mamoca mashi lädou da çolo.

40' Inaja showawä, wa cö lä feyacabole cäcö nia jöböamaö fa bufinö, bada bä nija ai a wä nö wäo ja, cäcö noshi umabo dijejä. Wa cö lä ǃeshibole cäcö ma cui, cäcö çai jöböa yädäa da showadacö.

⁴¹Ai a bada lä cui, cafä nija a madofibö yefimamou fe yadio ja, a madofibö blajamamou bufio lä culenaja mlai, wa ebä çai madofi yefibou showale, wa ebä çai blajaaö cuaaö fe yadiofälöbä.

⁴²Cafä nija a lä nacou wei a lä cui, a da dobälö. Tübä majöbou bufi lä doblao wei a lä cui nija tübä noshi umabo dijä —Jesús a cuma.

⁴³Abinaja Jesús a cuma. —Ei tä ʘ jaba wäyämou lä balöono wei, wama tä ʘ daö waiquiwä. Aifä wama bä nia nofimaö. Wamacö nofi lä wʘlibou wejei bä lä cui, öjö wama bä nofi nia çai wʘlibou mö feduo.

⁴⁴Einaja bä jaba ma cuno wei ma cui, abinaja bämacö nowa taö lä cule —a cuma—. Wamacö nofi lä wʘlibou wejei bä ma cui, bä da nofimaje. Wamacö nö lä bleaamaö wejei bä ma cui, Yai Bada nija bä nö bayeli da nacaje,

⁴⁵Faafä a lä culadi wama a yai owäbobä. ¿Öjö tawä? Wʘlidiwä talewä bä ma cui, dodijidawä tä jamö bä lä cuo wei bä ma cui, motoca shʘinö öjö bä bluca wacacamabou fe usucuwä malä cui. Tübä lä dodijaö wei tübä nijamö ma cui, tübä dodijaö lä mlai tübä nijamö ma cui, maa a malä shömaö wei.

⁴⁶Cafä wamacö lä nofimaö wejei, wama bä nofimaö mö feduo yalo, ¿Yai Bada tänö wamacö nia dobädayou daanö? —a cuma—. Ma. Lomateli bada bä befi bä blada lä doaö wejei bä ma cuinö, cama bä lä nofimaö wejei, showadi bä nofimaö mö malä feduo wejei.

⁴⁷Afä wama bä nofimaö mö bao yalo, “Camiyä yamacö shino dodijaö ayao”, ¿wamacö bufi nia cuu daanö? Ma. Showadi tübä taamayou lä buo weinaja, wamacö cuaaö bädao malä cui. Yai Bada a daö lä mlajei bä ma cui, inaja tübä çai cuaaö talei.

⁴⁸Ma. Faafä a lä culadi a doblaa lä culenaja, wamacö cuo mö feduobä wama ecö.

San Mateo 6

¹Bä da moyaweicu —Jesús a cuma—. Yai Bada tänö tä tamaö lä buffi wei wama tä taö däjä, yanowamö tübä nija wamacö dodijidawä mömobä wama tä nia taimi. Inaja wamacö cuaaö dicoo ja, Faafä Yai Bada a lä culadi nija wamacö nia dobämamoimi.

²¿Öjö tawä? —a cuma—. Bä lä jöli wei wama bä dobäö däjä, wamacö jömöo mlalanö bä da bayeliblaje, bä jole jole lä dodijaö wei bä lä cuaaö weinaja mlai ja. Judio bä yododabä yafi bä jamö ma cui, sibo jamö bä bluca lä juaaö wei jamö ma cui, öjö bä shi öjöde dablamou bufi doblao talei, yanowamö tübä nija bä nofi doablamobä. Inaja bä cuaaö lä dicoo wei bä lä cui, Yai Bada nija bä nia dobämoimi. Yanowamö tübä nija bä nofi doablamobä, öjö cama etä li waiquiwä.

³Bä lä jöli wei wama bä dobäö däjä, ai wama bä mojudumabolanö bä yai da dobäje.

⁴Wama bä bayelibläö ma jätöo wei ma cui, Faafä a lä culadinö wamacö daö weicätä, wamacö dobäö mö feduodayobä —a cuma.

⁵Abinaja Jesús a cuma. —Wa nö bayeli nacao dǎjä, bä jole jole lä dodijaö wei bä lä cuaaö weinaja, a cuaa dijä. Judio bä yododabä yafi bä jamö ma cui, sibo jamö bä bluca lä juaaö wei jamö ma cui, öjö bä lä cui, Yai Bada nija wawädowä bä ʾ shino faö bufi doblao talei, yanowamö täbä nija bä nia dodijaö fa dablamonö. Cafä nija ei ya wä lä cui, bejedi lä ya wä. Inaja bä lä cuaaö wei bä lä cui, Yai Bada nija bä nia dobämoimi. Yanowamö täbä nija bä dodijaö dablambö, öjö cama etä li waiquiwä.

⁶Ma, Yai Bada nija wa nö bayeli nacao bufio ja, afä yano jamö wa fa lucälönö, wa yoca fa lacönö, Faafä nija a wä faö da jatoo. Wa wä faö ma jatoo wei ma cui, Faafä a lä culadinö wa wä jǎliaö fe yadio wä, wa dobäbä.

⁷Abinaja çai —Jesúsnö bä nowa tama—. Yai Bada nija wamacö nö bayeli nacao ja, Yai Bada a daö lä mlajei bä lä cuaaö weinaja, bä cuaa dijä. Öjö bä lä cui, bä aca jayuaö buo talei. “Inaja ya wä labaaö cuaaö ja, wale ʾ yai nia jǎliadayou”, bä bufi jole cuu dicoo talei.

⁸Öjö bä lä cuaaö weinaja, bä cuaa dijä. Wamacö lä jöli wei, Faafä a lä culadinö wamacö daö waiquiwä. Wamacö nö bayeli nacao showao mlao dǎjä ma cui, wamacö daö malä waiquile.

⁹¿Öjö tawä? —a cuma—. Yai Bada nija wamacö nö bayeli nacao ja, abinaja wamacö yai cubä. “Fabe, yamacö lä Föömou wei wa lä culadi, cafä wa wäfa shino doblao wäyämöbä wa. Wa wäfa jole jole jayumamou buobä wami.

¹⁰Eja yamalecö çai cua da dodijiquiyo. Fedu jamö wa wä juamou lä culadinaja, ei bita jamö ma cui, inaja showawä wa wä çai juamou cuo mö feduobä.

¹¹Yamacö nia lä iyaö wei täbä ja, showadi yamalecö da dobä.

¹²Yamacö doblou lä mlai, tä nowa çai da mladamalö, camiyä yamalecö lä yabäcaö wejei bä nija, yama tä nowa bluca mladamaö lä cuaaö weinaja showawä.

¹³Yamacö nö doblobö lä mlai jamö, yamalecö çai da wasö. Tä lä wǎlidii tä ja, yamalecö da nowamöbo.” Einaja Yai Bada nija wamacö cubä.

¹⁴ʾAi täbä nija wamacö nowa lä cule wama tä nowa mladamalei ja, inaja showawä Faafä a lä culadinö wamacö nia taamaö mö feduo malä cui.

¹⁵Öjö ma cui, täbä doblou lä mlai täbä nija wamacö nowa lä cuo wei, wama tä nowa mladamaimi dicowä ja, cafä wamacö ma cui nija, Faafänö tä nowa lä taboladi tä nia çai mladamaö ayaomi.

¹⁶Abinaja Jesús a cuma. —Yabäcou mlai ja, Yai Bada nija wamacö nö bayeli nia fa nacaodinö wamacö iyaö wasöo ja, dodijidawä bä mömou fe da yadio, bä jole jole lä dodijaö wei bä lä cuaaö weinaja mlai. Öjö bä lä cui bä iyaö wasöo dǎjä, Yai Bada nija bä dobämöbä bä li cuaaimi. Yanowamö täbä nija bä nö nia fa öjöböamonö, bä li cuaaö buo. ¿Öjö tawä? Bä nö nia fa öjöböamonö, bä mö yǎlömou mlai ja bä fe shaclacawä bufi çai wǎlidiwä juadalou. Cafä wamacö nija ei ya wä lä cui, bejedi lä ya wä. Yai Bada nija öjö bä lä cui bä nia dobämoimi. Yanowamö täbä nija bä nö öjöböamöbä, öjö cama etä li waiquiwä.

17' Ma, cafä wamacö iyaö wasöo däjä, bä mö da yaölömolu —a cuma—. Bä feta ucu çai da yacäcäblamolou, dodijidawä wamacö dablamou showao fe yadiobä.

18 Wamacö nia iyaö lä wasöo wei wamacö lä cui, yanowamö täbä nija wamacö nö öjöböamamobä wamacö nia cuaaimi. Jätowä täbä iyaö ma wasöo wei ma cui, Faafä a lä culadinö täbä malä daö wei. ¿Öjö tawä? Wamacö iyaö wasöo ma jätöo wei ma cui, Faafänö wamacö dabraö fe yadio wä, wamacö dobäbä.

19' ¿Öjö tawä? —Jesús a cuma—. Bitä jamö täbä madofi shimoma dijejä. Wama täbä ma shimomaö wei ma cui, wamacö camishibö nia wädömamou. Wamacö madofibö nia çai amu ushiböaö. Yanowamö täbä lucäo fa jätöonö, täbä nia çai tomöablaöje.

20 Ma, fedu jamö afä täbä nowa yai lä bluca wei täbä shino yai shimomaö da balöodu. Öjamö lä camishifä bä nia wädömamoimi. Wamacö madofibö nia çai amu ushiböaö buomi. Täbä nia çai tomöaimije.

21 ¿Öjö tawä? Afä wama täbä yai lä bufibou wei täbä lä cule jamö, öjamö lä wamacö bufi nia malä cadididalou wei —a cuma.

22 Abinaja Jesús a cuma. —Cowa wacö lä culenaja bei wamacö mamocu cuwä, wawädowä wama täbä dablabä. Öjö cudeenö, wamacö mamocu demi ja, wama täbä bluca wawädoablaö cuquei.

23 Öjö ma cui, wamacö mamocu wälidiwä dicowä ja, wama täbä nia dablaimi. ¿Öjö tawä? “Tä shi lä cule jamö camiyä ya cua waiquia lä cule”, wamacö bufi jole cuu bädao ja, wamacö bufi mö didi fe balojowä —Jesús a cuma.

24 Abinaja Jesús a cuu çoma. —A lä ojodamou wei a lä cuinö, moli a nosie nia shino juaö cadidio. Ai a wä ma fale ma cui, bolacabö cäcöbö nosie nö juamamou doblobimi waiquiwä. Ai a nosie juaö mlai ja, ai a nosie nia shino yai juaö ayao. Ai a wä shino juaö bufi doblao waiquiwä cudeenö, ai a wä nia waii. Inaja showawä, madofi wama bä nofi yaibou dicoo ja, Yai Bada wama tä nofi nö yaibobimi waiquiwä, wama a nosie juabä —Jesús a cuma.

25 Abinaja Jesús e cuma. —Öjö cudeenö bämacö nowa taö lä cule. Eja dodijidawä wamacö nia lä bälöo wei tä ja, bä bufi jölijo dijä. ¿Öjö tawä? Nii bä ma cui jamö, camishi bä ma cui jamö, bä bufi cuaablalo dijä. Wamacö demi lä cuo wei tä nowa yai bluca, nii wama bä lä waö wei bä nowa lä culenaja mlai. ¿Öjö tawä? Bei wamacö nowa çai bluca, camishi bä nowa lä culenaja mlai.

26' Biyomö bä ja bä bufi da jaducublalu —a cuma—. Mobä döaö ma mlajei ma cui, bä iyaö. Nii bä taö ma mlajei ma cui, mobä shiliqui shimomaö ma mlajei ma cui, Faafä a lä culadinö bä malä iyamaö wei. Öjö bä nowa ma table ma cui, çafä wamacö nowa shino yai blucabou fe balojowä!

27 Wamacö demi nia lä cuo wei, Yai Bada tänö tä daö fe wädöa waiquia. Wamacö bufi lä jalujublalou wei tänö, wiisibö ma cui wamacö nö nia dedejedou majöomi.

28' ¿Wedi tabä camishi bä ja wamacö bufi nia li jalujublalou dicoo? —a cuma—. Jole jole bä bäwä ma cui ja, öjö bä ja bä bufi da jaducublalu. Bä badaö. Bä ojomou ma mlai ma cui, shinalu ubä juducaö ma mlajei ma cui,

29'bä liyäjäwä. ¿Öjö tawä? Bamacö nowa taö lä cule. Bada tä Salomo a nö ma madofiböono wei ma cui, camishi ebä ma dodijidaono wei ma cui, ei jole jole bä lä cui, ;bä shino yai mömou liyäjäwä dodijiwä!

30'Caje caje bä cudio ma mlai ma cui, bä öshömaö ma nocamou wejei ma cui, bei bä jole fa fanö, bä mömou dodijidaobä, Yai Bada tänö bä bayelibläö. Öjö bä ma bayelibläö wei ma cui, camishi bä ja ¿cafä bei wamacö nia shino bayeliblamou ayaomi daanö? Yai Bada wama a nofi bejedi mölaboimi showawä.

31' ¿Öjö tawä? —Jesús a cuma—. Öjö cudeenö, wamacö nia lä iyaö wei tä ma cui ja, wama toubä nia lä coaö wei toubä ma cui ja, camishi bä ma cui ja, bä bufi cuaablalo dijä. Wamacö bufi jalujou dodijio mlai.

32'Yai Bada a daö lä mlajei bä lä cui, inaja cama bä bufi li bluca cuaablalou. Öjö ma cui, wamacö lä jöli wei, Faafä a lä culadinö wamacö li daö waiquia.

33'Öjö täbä ja wamacö bufi cuaablalou mlai ja, Yai Bada tänö cama ebä nia çai lä cuo wei tä ja, bä bufi shino yai dayäo da shalilio. Öjö wama a bufi nia lä doblamabou wei tä çai ja. Inaja wamacö bufi shaliliwä cudio ja, öjö täbä çai bluca showawä ma cui ja, wamacö nia dobäö.

34'Öjö cudeenö abinaja ya cuu —a cuma—. Fei däjä tä lä cuaale tä ja, bä bufi shino yai da dayäo, fena ja tä nia cublou lä majöo wei tä ja mlai. Fei däjä wamacö nia lä cuaaö wei tä cua ma waiquile ma cui, ¿wedi tabä fena ja wamacö nia lä cuaaö wei, wama tä afa wayoaö li yädäablalou ça majöquei? Tä obi nia lä cublou wei tä ja, bä bufi jalujou dodijio dijä. Tä yai lä cublale däjä, öjö däjä wamacö bufi shino yai dayäobä.

San Mateo 7

1'Abinaja Jesús a cuma. —Yanowamö bä dabloimi jöma dijejä, Yai Bada tänö cafä wamacö jömaö mö feduo mlaobä.

2'Wama bä jömaö si lä ijejeo weinaja, inaja showawä Yai Bada tänö wamacö nia jömaö cuo mö malä feduo wei. Bufi lämou mlai ja ai wama bä jömaö dicoo ja, inaja showawä cafä wamacö ma cui, bufi lämou mlai ja Yai Bada tänö wamacö nia jömaö mö feduo.

3'Aifä a mamö jamö libu libu wa ma möö wei, cafä wa mamö jamö fii wa fi bada lä çäbole, ¿wa nö öjöböamoimi tawä? —a cuma—.

4'Cafä nija fii fi bada ma läo däjä ma cui, ¿aifä nija bei wa wä nia li faö? ¿Aifä mamö jamö libu libu e wai lä çale, öjö bei wa e nia li joyaö?

⁵Jole jole wa lä dodijaö wei! Cafä wa mamö jamö fi bada lä çale, fi joya da balölö. Öjö däjä wa tä möö fa wacacablalunö, aifä mamö jamö libu libu e wai lä çale, wa e joyaö dodijidaobä —Jesús a cuma.

⁶Öjö däjä, Yai Bada etä a jiliaö lä moji wejei bä afa wayoaö ja, Jesúsnö jïima bä afa jayumaö yacläablaloma. Abinaja a cuma. —Afä täbä dodijidawä lä yaile, jïima bä nija täbä dodobou dicoo dijejä, wamacö nabä läläo mö yabamou cuqueije. Afä maa mabä baushi nowa wai lä bluca wei mabä ma cui, coshino bä nija mabä jöböaö dicoo dijejä, mabä cadicaöje ja, mabä shamiamäo bädao mlaobeje.

⁷Abinaja Jesús a cuma. —Yai Bada nija bä da naco, wamacö dobäo cuquei. Dodijidawä tä da dayäaje, wama tä dabläo weicätä. Bei yoca da cloocaje, yoca calobläo wä. ¿Öjö tawä?

⁸Bä lä nacou wei bä bluca lä cui, bä malä dobämou wei. Inaja showawä, tä dodijidawä lä dayäaö wejei bä nija tä dodijidawä dablamou. Bei yoca lä cloocaö wejei bä ma cui, öjö bä nija yoca caloblamou.

⁹Cafä wamacö ijilubö lä cuinö, nii a nacaöje ja, ¿maa wama ema nia jöböaö yacläo tawä? —a cuma—.

¹⁰Yuli a nacaöje ja, ¿olu wama ecö nia jöböaö buo daanö?

¹¹Wälidiwä talewä wamacö ma cui, dodijidawä ijilufä wama bä dobäo daö waiquiwä ja lä, Faafä fedu jamö a lä culadi, öjö bei a nia shino yai dodijaö fe balojoo. Dodijidawä tä ja bä lä nacou wei bä nija tä jöböaö wä.

¹²¿Öjö tawä? —a cuma—. Ai täbä nija cafä wamacö nofimamou bufi lä doblao weinaja, inaja showawä ai wama täbä yai nofimaö cuobä. Inaja wamacö cuaaö ja, Moisesi wama etä a nofi cadidibou waiquiwä. Yai Bada a wano wäyäléwä bä ma cui, inaja wamacö cuaaö ja, öjö wama bä a nofi çai cadidibou mö feduwä.

¹³Abinaja Jesús a cuma. —Täbä balimi nia lä cuo wei yo jamö wamacö jubä, wajaquemi yoca jamö bä faö fe da yadiofälö. ¿Öjö tawä? Shobali wacö nö mayo yoca shino blaucuwä. Öjö yo çai wawädowä. Öjamö lä bä lä juu wei, bä bluca fe balojowä.

¹⁴Öjö ma cui, täbä balimi cuobä yo jamö täbä jubä, yoca wajaquemi. Öjö yo jamö täbä juu si ijejewämi. Öjö yo yai lä dabläo wejei bä lä cui, bä bolacami —a cuma.

¹⁵Abinaja Jesús a cuma. —Yai Bada a wano wäyäléwä bä afa jole lä jilou wei bä nija bä da moyaweicu. Cafä wamacö fe walooje däjä, oweja bä nö ishobimi lä culenaja bä mömou ma cuablalou wei ma cui, bä möla dijä. Jïima bä yai lä waitelimou wei bänö täbä nabä queo si ijejewä lä culajeinaja, inaja bä bufi lä cui cäbä.

¹⁶Nii bä lalou däjä defibä nö öjöböamou lä culenaja, inaja showawä cama bä ma cui wama bä nö çai nia öjöböaö cuo. 'Mösöcö bä jamö, nii bä jucamou dao malä mlai —a cuma—. Ico bä ma cui, uba bä ma cui, öjamö lä bä nia yädäomi.

¹⁷Fii fibä lä dodijidai fibä jamö, nii wälidiwä cäcö nia lalou buomi. Inaja showawä, fii wälidii fibä jamö, nii dodijidawä bä nia çai laloimi mö feduo.

¹⁸Fii fibä lä dodijidai fibä jamö, nii wälidiwä bä nö lalobimi waiquiwä. Fii wälidii fibä ma cui jamö, nii dodijidawä bä nö çai lalobimi mö feduwä.

¹⁹¿Öjö tawä? Nii dodijiwä bä lalou lä mlai fibä fa diyälalöjenö, fibä nia yablaöje.

²⁰¿Öjö tawä? —a cuma—. Nii wälidiwä bä lä lalou wei däjä, wama defi nö wälidiwä öjöböaö lä cuaaö weinaja, inaja showawä Yai Bada a wano wäyälwä bä afa jole lä jilou wei bä lä cui, bä doblou lä mlai tänö, wama bä nö nia çai öjöböaö cuo mö feduo —a Jesús cuma.

²¹Abinaja Jesús a cuma. —Camiyä nija, “¿Bada tä, Bada tä!”, ai bä cuu ma buo wei ma cui, Yai Bada tänö öjö bä çai nia cuomi. Fayä a lä culadinö tä tamaö lä bufii wei tä lä taö wejei bä lä cui, öjö bä çai nia shino yai cuo dodijio.

²²Fayänö täbä yanowamö nia lä jömaö wei etä cublou däjä, abinaja bluca täbä nia cublaloyoluu. “¿Bada tä, Bada tä! Cafä wa wano, ¿Yai Bada yama tä a wäyänomi daanö? ¿Fecula yama bä çai yashunomi? Tä nö lä quilijii, ¿yama tä bluca çai wawämanomi?”, bä nia cublaloyoluu.

²³Öjö däjä, öjö bä nija ya wä nö wäo ja, abinaja ya nia cuu. “Bamacö daimi. Shomi wamacö. Bä da alufälö, wälidiwä talewä wamacö lä cui”, ya nia cuu. ¿Öjö tawä? —Jesús a cuma.

²⁴Abinaja Jesús a cuma. —Camiyä ei wale a lä jiliaö wejei däjä, wale a juaö lä showadao wejei bä lä cui, abinaja öjö bä li cuwä. Bui moyawälänö cama e yafi lä itamano wei a lä culenaja, öjö bä li cuwä. Öjö a lä cuinö täca fa blajamalönö, bei masi blaa lä çojomole jamö e defibä colo fa itaolalönö, e yafi itao lojodooma.

²⁵Maa a fa quenö, yafi e jamö u caläo lojodooma ma cui, e yafi lojodoo showaoma. Wadolinö e yafi ma jawedano wei ma cui, bei masi blaobä jamö defibö itatao lojodeoma cudeenö, e yafi çai wäcäo buonomi.

²⁶Ai bä lä cuinö, camiyä ei wale a ma jiliaö wejei ma cui, wale a juaimije —a cuma—. Öjö bä lä cui, abinaja bä cuwä mö feduwä. Ai a lä cui, a bufi dao mlalanö cama e yafi itamaö lä bädaono wei a lä culenaja, öjö bä cuwä mö feduwä. A bufi dao fa mlacunö, cama e yafi itamama ma cui, mlaca mlaca bä cuobä jamö e defibä itaa bäaquema.

²⁷Maa a fa quenö, yafi a jamö u caläo fa lojodoanö, wadolinö a yafi çai fa jawedeblalönö, e yafi wäcäluyoma. E yafi lä wäcäluyono wei däjä, e yafi bada wälioblou showadaluyoma —Jesús a cuma.

²⁸Jesúsnö bä damaö jödödu däjä, a wä lä shalialiablalono wei tä ja, bä bufi möaaö dodijio.

²⁹Moisesi etä a ja bä showadi damaö lä cuaano wejeinaja, a wä jilimamou cuono malä mlai. Jai tä a yai daö shalilio showadaoma, a wä jiliaö malä cuaano wejei.

San Mateo 8

- ¹Jefu balöcö jamö bä culanö, Jesúsno bä çai dömöa çobaliyofälöma. A lä juu wei jamö, täbä bluca yaua showaquema.
- ²Öjö däjä, täbä sicö lä jodemaö wei tä wayunö a nö lä bleaano wei, a jalili waloquema. Jesús nija a fa dijoafälönö, abinaja e cuma. —Bada tä. Wale bayelibläö ojode ja wale jalomalei dao, ya dodijidablou çobä —e cuma.
- ³Jesús boco fa dododalunö, a jubädalema. Abinaja e cuma. —Ya ojode lä. A da jalolu, öjö lä, wa dodijidablou çobä —e cuma. Täbä sicö lä jodemaö wei etä wayu mladou fa showadalonö, a dodijidablou çolayoma.
- ⁴Öjö däjä, abinaja Jesús e cuma. —Ei bäfä lä jalomalöfe, yanowamö täbä nija wa tä afa nia wäaimi. Nofi bäyäälewä nija a yai da mömodu. Moisesinö tä jöböamaö lä bufino wei, tä da dodobodu. Inaja wa cuaaö ja, bluca täbä nija wa nia demi dablamous wawädo —a cuma.
- ⁵Cabenaö jamö Jesús a fa çöblalunö, cama nija Lomateli bada a waloquema. Sodado 100 bä çai lä cuono wei a bada cuoma. A wä fe blacäjou ja
- ⁶abinaja e cuma. —Bada tä. Ya nosie juamobä a lä cui, a fa yaçolibölönö a nö bleaaö feyaa —e cuma.
- ⁷Öjö nija abinaja Jesús e cuu nomöjöoma. —Bei. A da cuaafälö, ya jalomabä —e cuma.
- ⁸Öjö ma cui, Lomateli a bada lä cui, abinaja Jesús nija a cuma. —Bada tä. Bäfä nö yafimabimi camiyänö. Ya quili. Wale bayeliblabä yami, judio ya malä mlai. Eja culanö ma cui wa wä blajawä faö ja, ya nosie juamobä a lä cui, a nia jalou showadao.
- ⁹Öjö tawä? —a cuma—. Täbä nosie lä juaö wejei, ya tä malä dale. Iba bada bä lä cui ya bä a juaö. Inaja showawä, camiyä ya nosiemou ja, iba sodado ya bä çai lä cule bänö wale a çai juaöje. Ai ya shömaö ma cui, ai ya nacaö ma cui, wale a juaö si ijejejeje. Ya nosie juamobä ya lä tabolenö, wale nosie çai juaö showadao malä cui — Jesús nija e cuma.
- ¹⁰Öjö a wä ja, bejedi lä Jesús a bufi doblaloma. Bä lä nocaono wei bä nija abinaja a cuma. —Cafä wamacö nija ei ya wä lä cui, bejedi lä ya wä. Ei Lomateli a lä cuinö wale nofi mölabou lä culenaja, Isaeli wama ecö nija, moli ma cui ya dablao bädaami.
- ¹¹Öjö tawä? Bamacö nowa taö a lä cule. Yai Bada tänö cama ebä çai cuobä jamö, shomi täbä lä bälöblai täbä nia waloblayoluu. Motoca a lä faö wei jamö ma cui, a lä queo wei jamö ma cui, öjamö bä culanö bä bluca fa çocamolionö, bä nia iyaö çai loo. Ablaamö a ma cui, Isaacö a ma cui, Jacobo a ma cui, öjö bä iyaö çai loobä jamö bä nia yädäoyoluu.
- ¹²Öjö bä nia ma yädäo wei ma cui, Isaeli ebä nodiwä lä cui, öjamö bä nia cuomi. Sibö jamö bä nia shäyäblaamou, tä mö dödüobä jamö. Öjamö bä nia öcö. Bä nö beblalou yalo, bä nia lalöö —Jesús a cuma.

- 13** Öjö dájä, sodado bä çai lä cuono wei a lä cui nija, abinaja Jesús a cuu nomöjöoma. —A da çolufälö. Wale nofi mölaboma yalo, wa wə juamobä a lä cui, a jaloa waiquilyoma —a cuma. Öjö lä dájä showadawä a jalolayoma.
- 14** Simón e yafi jamö Jesús a fa lucälönö, Simón bä yesi e jalili blaa dalalema. A yoblaoma.
- 15** Imicö fa jubädalönö, etä yobli mladamaö showadalayoma. Öjö dájä a fa jocädalunö, bä fama iyaa showamalema.
- 16** Motoca a lä queo wei dájä, bä lä feculaböono wei bä çai waloblayolumaje. Jesús a wəno ebä fecula yashublaö showadalayoma. Bä lä jaliliono wei bä ma cui, bä çai jaloa showadamalalema.
- 17** ¿Öjö tawä? Jesús a nia lä cuaano wei, Yai Bada a wəno wäyäləwä Isaia a lä cuinö tä a wäyö showao balöoma. Öjö tä a bejedi wawäblobä, Jesúsno täbä bayeliblaö cuaama. Abinaja tä a cuu. Camiyä bamacö bufi nö yai bleaabä tä ma cuono wei ma cui, camanö tä bluca däa majölema. Camiyä bamacö nö ninili bleaabä tä ma cuono wei ma cui, öjönö tä däa fa majölönö, a nö bleaaö läoma. Einaja tä a cuu.
- 18** Täbä bluca lä çocamoyoluno wei täbä fa dalalönö, cama ebä nija Jesús a wə fama, bä çai bucaduobä.
- 19** Öjö dájä, Moisesi tä a ja täbä lä damaö wejei ai a lä cui, Jesús nija abinaja e cuyoluma. —Tä a wäyäle. Wa juu lä bädao wei jamö ma cui, öjamö ya nia noca —a cuma.
- 20** Abinaja Jesús e cuu mö feduoma. —A möla dijä, ya yafibö cuami. Yalo bä bācabö cublawä. Biyomö bä ma cui, bä yabācabö cublawä mö feduwä. Öjö ma cui, camiyä ya lä yanowamöblaleyoluno wei ya lä cui, ya yanobö cuami —e cuma.
- 21** Ai a noca mö lä feduono wei a lä cui, a nia yauo showadao fa mlacunö, abinaja e cuma. —Bada tä. Fayä a lä ujudule etä cublou dájä, ya nomawä didiaö balöobä, ¿öjö tawä? —a cuma.
- 22** Öjö ma cui, abinaja Jesús e cuma. —Bufi nomawä, cama bä li nomawä didiayobä. Camiyä nija a noca da showadaiquiyo —e cuma.
- 23** Canawä ajamö Jesús a fa döcäbalunö, cama ebä lä nocamabono wei bä çai döcäcou mö feduo showadaobaliyoma.
- 24** Öjö dájä, bä befi çai caläfalöbä jamö wadoli a lojode fa cublalunö, canawä a jamö mau u bada lä shäyäjou wei ubä fe lajoaö waiquioma ma cui, Jesús a midio fe yadio dicooma.
- 25** A jushulajenö, abinaja a nowa tamaje. —¿Bada tä! ¿Yamalecö da bayeliblalö! ¿Bamacö mishi duo a lä cube!
- 26** Abinaja Jesús e cuma. —¿Wedi tä tabä wamacö li quili? ¿Yai Bada wama tä nofi li mölaboimi dicoo tawä? —e cuma. Öjö dájä, a fa jocädalunö, wadoli a wasöa

showadalema, u çai bada lä shäyäjono wei u çai. Öjö a wänö tä bluca ononodou showadalayoma.

²⁷Bä bufi yai shädayaimolanö bä wəliyoma. —¿Ei wedi bei a li dodijiwä? Wadoli a bada ma cui, mau u bada lä shäyäjou wei u ma cui, cama a wänö täbä nofi mladou si ijejewä yai —bä cuma.

²⁸Öjö dājā, Cadalатели bä ulifibö jamö Jesús a befi çai waloquema, modu ai u mashi jamö. Jesús a fa itoblalufälönö, bolacabö cäcöbö lä feculaböono wei cäcöbönö a mö bamaböleyoluma. Nomawä täbä didiblaaö lä yaimou wejei jamö cäcöbö lä cuono wei, cäcöbö cuoma. Cäcöbö showadi waitelimou läoma yalo, öjamö lä täbä jayuaö doblonomi.

²⁹Jesús nija bä a çali falayoma. —Yai Bada wa Ijilubö lä cuinö, ¿wedinaja yamalecö taamabä, bei wa li waloo cuboyoi? Yamalecö nabä jubä tä cubloimi ma showai, ¿wedi tä tabä yamalecö nö nia bleaamaö dicoa cule? —bä fecula cudaliyoma.

³⁰Bei. Öjö jefu tä balöcö jamö, yalo coshino bluca bä iyaö bayäcäojolayoma.

³¹Jesús nija fecula bä a fe blacäjou ja, abinaja bä cuma. —Yamalecö nia yashuu ja lä, coshino bä nija yamalecö yai da shömöcö —bä cuma.

³²—¿Öjamö lä bä da alufälö, öjö lä! —bä nowa tama. Öjö cudeenö, cäcöbö shi lä wəlıno wei cäcöbö fa dacöfälöjenö, coshino bä nija fecula bä bluca lucäa nomöjölaliyoma. Bä fa lucäolalunö, tä mö wädājāa lä dodijibe jamö coshino bä shi jalijiwä çai fa yəbalufälönö, mau u jamö bä mishi bluca duobaliyoma.

³³Coshino bä nofi lä tabono wejei bä lä cui, öjö tä fa dalalöjenö, bä quilili doculayoma. Jesús a lä cuaano wei, shabono jamö tä a bluca wäyää çojolayomaje. Cäcöbö lä feculaböono wei cäcöbö jaloa lä çomaleno wei tä a çai.

³⁴Öjö tä a fa jililäjenö, shabono jamö bä lä bälöle bä bluca aa showalayoma, Jesús a möbeje. A fa dalalöjenö, bä nö quilili bleaama yalo, a shömöa çölemaje.

San Mateo 9

¹Canawä ajamö a döcäa fa çəbalunö, camатели ebä nijamö Jesús a bucadua çəbaliyoma.

²Öjö dājā, Jesús nija a lä yətoliböono wei a befi çai cadömaboimamaje. A nofi lä mölabou wejei etä fa dalalönö, abinaja Jesús a cuma, a lä yətoliböono wei a nija. —Uasi. A bufi da lojododalu. Wa doblou lä mlai, afä ya tä nowa bluca mladamaö lä cule —e cuma.

³Moisesi etä a ja bä lä damaö wejei ai bä lä cui, abinaja ebä bufi cudaliyoma. “Feinö Yai Bada a nö waiblaö lä cule”, bä bufi cudaliyoma.

⁴Bä bufi cuu lä jətoono wei, Jesúsnö bä daö fa showadaonö, a wə fama. —¿Wedi tä tabä, wəlidiwä tä ja wamacö bufi li cuaablalou dicoo?

⁵Ei a lä cui, camiyä bei ya wänö ya jalomaö lä dalenaja, inaja showawä ya etä nowa çai mladamaö si ijejewä cuwä. Ya nowa tabä ya waiquiwä malä cui, a fa jocädalunö a cojamöö çobä. ¿Öjö tawä?

⁶Camiyä ya lä yanowamöblaleyoluno wei ya lä cui, eja bita jamö ya lä cule däjä, bä doblou lä mlai bä nija ya etä nowa mladamabä ya waiquiwä. Wama tä möbä, öjö lä — a cuma. Einaja a fa cunö, öjö däjä a wä wawäa showaquema, a lä yätoliböono wei a lä cui nija. —Bei. A da ubladalu. Wa lä maquele wa täcö fa jocälänö, täcö çai cojamöö da ço—a cuma.

⁷A lä yätoliböono wei a fa ubladalunö, täcö çai ço showadalayofälöma.

⁸¿Öjö tawä? A jalomaö fa dalalöjenö, bä bluca lä çocamono wei bä quilia fe balojolaliyoma. Yai Bada tänö Jesús a nö yai wəlojomabou dodijioma yalo, tä nofi doabläö fe balojoomaje.

⁹Öjö däjä, Jesús a juu lä cuaano wei jamö, Mateo a wəfa lä cule a loa dalalema. Lomateli bada bä befi bä blada lä doaö wei a Mateo cuoma. Blada bä doabä jamö a läa fa dalalönö, abinaja e cuma. —Camiyä nija a da nocaiquiyo —e cuma. A ubladou fa showadalonö, Jesús nijamö a yaua showadalayofälöma.

¹⁰Mateo e yafi jamö Jesús a iyama, cama ebä lä nocamabono wei bä sho. Bä iyaö çai lä loono wei däjä, Lomateli bada bä befi bä blada lä doaö wejei bä ma cui, ai bä əfa çai wəlidiwä talewä lä jilaö wejei bä ma cui, öjö bä bluca loaleyoluma.

¹¹Faliseo bä bada lä cuinö, Jesús nija öjö bä çai iyaö fa dalalöjenö bä jushuoma. Öjö däjä, Jesúsno bä lä nocamabono wei bä nija abinaja bä cuma. —Cafä wamacö nija tä ə lä wəyää wei a lä cui, ¿wedi tabä inaja a li cuaaö dicoo? Lomateli bada bä befi bä blada lä doaö wejei bä ma cui, wəlidiwä talewä ai bä ma cui, ¿wedi tabä öjö bä çai li iyaö dicoo? —bä nowa tamaje.

¹²Jesúsno öjö bä ə fa jililänö, abinaja bä nowa taö əalooma. —Bä jalobä, bä lä demi wei bä nia icuomi. Bä lä jalili wei bä lä cui, öjö bä nia shino yai icuo. ¿Öjö tawä?

¹³Yai Bada etä ə lä cuu wei tä ə ja, bä bufi da dayäo, wamacö bufi jaducublä. Abinaja tä ə cuu —a cuma. Yalo wama bä öshö lä dodobou wei, öjö ya tä bufiboimi. Yanowamö wama täbä nofi nia lä ojobou wei, öjö ya tä shino yai bufi. 'Einaja Yai Bada tä ə cuu —a cuma—. Bä dodijidawä lä jömöo wei, ya bä nabä juno malä mlai. Wəlidiwä talewä ya bä nabä yai li juma.

¹⁴Öjö däjä, Juannö bä lä nocamabono wei bä lä cui, Jesús nija bä fa waloiquiyonö, abinaja ebä cuma. —Camiyä yamacö iyaö wasöo si ijejewä, yamacö iyaö yabäcou mlai ja, Yai Bada nija yamacö nö bayeli nacaodibä. Faliseo bä bada ma cui, inaja showawä bä li cuaaö mö feduwä. Öjö ma cui, cafänö wa bä lä nocamabole bä lä cui, inaja bä li cuaaimi. ¿Wedi tabä afä bä çai iyaö wasöomi dicowä? —bä cuma.

¹⁵Abinaja Jesús e cuu yacläoma. —Fiya anö a suwä dääö däjä, ¿cäcöbö nofi çocamoabeje jamö täbä wajäaö daanö? Ma. Öjö ma cui, tä nö fa dedelönö a fiya fa

çolunö, öjö dāja bā fa wajāanö, bā nia shino iyaö juomi. ¿Öjö tawä? —cama a wāfa tao ja, a cuma.

16Öjö dāja, shomi tā ʔ coyocomabou bufio fa mlacunö, camishi bā ʔfa wayoaö yaclāmou nomöjöoma. —Abinaja çai —Jesús a cuma—. Camishi jode cäcö lebesi ja, ai cäcö acadafu läabeje, dude cäcö cacaaimije. Inaja bā cuaaö fa cunoja, cäcö yaluuje dāja, dude cäcö fa busudublalunö, täca jädödou nö blaucublaliyobö wei. ¿Öjö tawä?

17Inaja showawä, yalo wejediwä sibä ja, nashiwä dude toubä löaimije —a cuma—. Inaja bā cuaaö fa cunoja, ubä lä juluu wei ubänö sibä fa jädölönö, sibä nö wāliolaliyobö wei. Toubä nö çai blāshāblaliyobö wei. Wejediwä sibä uduo malä mlai. Ma, yalo dude sibä ja, nashiwä dude toubä nia yai löaöje. Öjö dāja, sibä nia dodijidawä cuo fe yadio. Nashiwä toubä ma cui, inaja showawä toubä nia dodijidawä cuo —Jesús a cuma.

18Jesúsinö Juan ebä yömöläö showao dāja, judio bā yododabä yafi jamö a bada lä läo wei a lä cui, a walobaleyoluma. Jesús a cotä jamö a möfe bolanö, abinaja e cuma. —Täyā a lä cui, a nomaa dicolayou culei. Öjö ma cui, a möblaaö fe da yadioyo. Wa imicö fa maqueicunö, a demi cuo çobä —e cuma.

19Inaja a cuu ja, bada a nija Jesús a nocaa showalayofälöma, cama ebä lä nocamabono wei bā lä cui sho.

20¿Öjö tawä? Jesús nija suwä a jalili yauaö ajedou juofälöma. A nö iyä bleaaö showai ja, lasha 12 a faa waiquimalema. A ajedou fa juofälönö, Jesús camishi ecö casö jubāa fe yadia yaulema.

21Abinaja a bufi suwä cuma. “Ya ecö casö jubādaö ma bālayou wei ma cui, ya jalou weicätä”, a bufi cuma.

22Jesús a mö fa yabadalunö, a dalalema. Abinaja e cuma. —A bufi da lojododalu, Ami. Wale nofi mölaboma yalo, wa jalolayou lä cufe —e cuma. Öjö dāja showawä, yedu a suwä jaloa showadalayoma.

23Bada e yafi jamö Jesús a fa çoblalunö, bā ʔ nö bleaaö dalalema. Tābā öcöbä jamö, showadi madofi bā ʔ lä jolaö wejei, bā ʔ çai jolamaje. Bā lä çocamono wei bā çai öcöma. Öjö dāja, abinaja bā nowa tama.

24—Bä siboa da çolufälö. Wama a moco nomöa lä bole, a nomaö cadidio malä mlai. A mia bädaa lä cule. Inaja bā nowa tama ma cui, a lä nomalayono wei tā daö waiquiomaje yalo, a noca çablalamaje.

25Öjö ma cui, bā lä çocamono wei bā bluca siboa fa çomalöjenö, a moco nomawä maqueobä jamö Jesús a lucālayoma. Bei boco fa dälönö, a jocādou çolayoma.

26¿Öjö tawä? Öjamö bā bluca lä bälöjono wei bā lä cui nijamö, Jesúsno a demi jocādamaö lä çono wei tā ʔfa jilimou blaucublaliyoma.

²⁷Jesús a jayuaö lä çöle jamö, bolacabö cäcöbö jubäbö yauaö juofälöma. Cäcöbö comöö yauaö jäafälölanö, abinaja cäcöbö cuu jäafälöma. —David nodiwä wa e lä cui! ;Yafälecö nofi da ojodadaliyo!—cäcöbö cuma.

²⁸Öjö däjä, yafi jamö a lä lucälayono wei jamö cäcöbö lucäa yaua jäa fe yadilayofälöma. Jesús nija cäcöbö fa ajedeicunö, cäcöbö wälima. —“Feinö yafälecö jalomaö wei dao”, ;bei wafäle nofi tabou? —Jesús a cuma. —Awei, Bada tä. Inaja bäfä nofi tabou dodijia lä cule —a nowa taböma.

²⁹Öjö däjä, cäcöbö mamocu jubälalema. —Bäfacö mamocu jalomaö a lä cule, yafäle nofi mölabou yalo yafäle nofi lä tabono weinaja showawä —a cuma. Inaja a cuolanö

³⁰cäcöbö mamocu jaloa showalayoma. Öjö däjä, Jesúsno cäcöbö a nö wäo wasöö dodijiomä. —Bäfacö mamocu lä jalomalöfe tä ja, ai wafä täbä yömöläö mlai —cäcöbö nowa tama.

³¹Öjö ma cui, cäcöbö fa alunö, öjamö bä bluca lä bälöblai bä nijamö, tä a wäyäbö blaucou showao fe yadio dicooma.

³²Cäcöbö juu ajedeo showao däjä, fecula anö aca lä bolebömabono wei a lä cui, Jesús nija a çai walobeyolumaje.

³³Öjö däjä, fecula e fa yashulunö, aca lä boleböono wei a wä faö liyäjäblou çölayoma. Inaja a cuaaö ja, bä lä çocamono wei bä lä cui, bä bufi bluca shädayaimoma. Abinaja bä cuma. —Yedu ja ma cui, Israeli bäma ecö nijamö, ei a jaloa lä tamalufenaja, ;moli ma cui tä çai jaba dablamos bädaonomi! —bä cuma.

³⁴Öjö ma cui, faliseo bä bada lä cui, abinaja öjö bä cuma. —Ma. Fecula bada tä lojodenö bä li fecula yashuu buo —bä cuma.

³⁵Öjö däjä, ai täbä bälöblawä mö lä fedui jamö, shabono bada bä jamö ma cui, wajaquemi bä wai shabono jamö ma cui, öjamö lä Jesús a juu fa cuaanö, täbä yömöläö cuama. Judio bä yododabä yafi bä jamö, Yai Bada tänö cama ebä nia çai lä cuo wei tä a wäyäö cuama. Shomitawä bluca tä wayunö täbä lä jaliliano wei bä lä cui, bä bluca jalomaö cuaaö showaoma. Täbä lä wälidiono wei bä çai.

³⁶Täbä bluca lä mashicou wei täbä fa dalalönö, Jesús a bufi wajäblaliyoma. Oweja bä lä nowamaö wei a cuami däjä, bä nö yamili beblalou lä culenaja, bä nofi tadalema.

³⁷Öjö däjä, cama ebä lä nocamabono wei bä nija abinaja a cuu yacläoma. —Wale nia lä bufibläö wejei bä bluca cublawä. Nii bä tamobä bä bada lä waiquijnaja bä cuwä ma cui, bä nii nia lä taö wejei bä bolacami dicowä.

³⁸Wale nofi mölabobeje, ;wedi bänö bä nia li yömöläöje? Yai Bada nija bä a da fa, öjö lä. Cama etäca ficali lä cule a Bada lä cui nija wamacö a fa fanö, bä ojodamobä öjönö bä yai shömabä —bä nowa tama.

San Mateo 10

- ¹Öjö däjä, cama 12 ebä lä nocamabono wei bä lä cui, Jesúsno bä naca fa ajedealalönö, fecula bä yashubeje bä tablamalema. Bluca tä wayunö täbä lä jaliliaö wei bä ma cui, täbä bluca lä wəlidii bä ma cui, öjö bä çai jalomaö cuaabeje bä tablamalema.
- ²Jesucristonö bä lä shömöleno wei, ei bä li cuoma. Simón balöwä, Pedro a wəfa çai lä cule. Bä fäähä Andrés e çai. Sebedeo bä ijilubö Santiago e çai, öjö bä fäähä Juan e çai.
- ³Felipe a çai, Badolomei a çai. Tomás a çai. Mateo a çai, Lomateli bada bä befi bä blada lä doano wei a lä cui. Afeo bä ijilubö Santiago e çai. Tadeo a çai.
- ⁴Simón a çai, cama bä ulifibö jamö täbä shomi lämabou nofi lä wəlibono wei a Simón lä cui. Juda Icaliode a çai, Jesús a nia lä nomojoliano wei a lä cui.
- ⁵Jesús ebä 12 lä cui, abinaja ebä nowa talanö ebä shömölema. —Judio bä lä mlai bä nijamö wamacö nia juimi. Samaliateli bä lä bälöle jamö çai mlai.
- ⁶Isaeli ebä nodiwä nijamö bä shino da jufälö, iba oweja bä nö yamili lä beblalole bä nijamö.
- ⁷Wamacö juu cuaalanö, täbä yömöläö da cuaafälöje. “Yai Bada tänö cama ebä çai nia lä cuo wei, etä ajedou waiquia lä cuimi”, wama bä nowa taö cuaabä.
- ⁸Bä lä jalili wei wama bä nia jalomaö cuaaö. Täbä lä nomaö wei wama bä demi nia çai jocädamaö. Bä sicö lä jodei wei wama bä çai nia dodijidablamaö çoo. Fecula wama bä nia çai yashuu. No mlai ja wamacö lä bayeliblamono weinaja, inaja showawä, no mlai ja wama bä nia bayelibläö cuo.
- ⁹Olo bä ma cui, blada bä ma cui, täbä madofi luluamobä ai bä mö feduwä ma cui, öjö wama bä befi çai nia yaçoimi —a cuma—.
- ¹⁰Wamacö lä jublole däjä, shinoco wamacö nia juu. Wama täbä didibofälöbä, wama täbä nia däboimi. Camishi wama bä nia bolacafälöimi. Wamacö mamicö didiobä täbä ma cui, inaja showawä. Fii wama defibä nia çai bofälöimi. ¿Öjö tawä? Shinoco täbä ma juu wei ma cui, bä ojodamou yalo, bä iyamabeje bä li waiquiwä malä cui.
- ¹¹Ai täbä shabonobö jamö wamacö çoblaliyou ja, wamacö bälömabou lä ojode wejei bä lä cui nijamö, öjamö bä da yanöcücu —a cuma—. Wamacö juu çofälöö ja, öjamö lä culanö wamacö nia jocäö çoo.
- ¹²Wamacö yafii däjä, öjamö bä lä bälöle wama bä nia bayelimaö showadao, bä bufi çai yanöcüwä cuobä.
- ¹³Dodijidawä wamacö waloamaöje ja, Yai Bada tänö bä bufi nia yanöcümabou. Öjö ma cui, dodijidawä wamacö waloamaimi dicooje ja, bä nia bayeliblamoiimi. Bä bufi yanöcümabobä bämi.
- ¹⁴¿Öjö tawä? —a cuma—. Ai bänö wamacö bälömabou bufiomije ja, wamacö a çai jiliaö bufiomi dicoweje ja, abinaja wamacö nia cuaaö. Öjö wama bä tabi feiaö yalo

wamacö sibolanö, bei wamacö mamicö busi jamö bä libu libu lä sudile, wama ebä nia yaösöblalefälöö. Öjö lä tänö, bä nö nia lä bleaaö wei wama tä nia jömaö.

15 Cafä wamacö nija ei ya wə lä cui, bejedi lä ya wə. Yai Bada tänö täbä jömabä etä cublou dājä, Sodomateli bä nö nia ma bleaaö wei ma cui, Comolateli bä nö nia çai ma bleaaö wei ma cui, öjö lä bä nö nia shino yai bleaaö dodijio.

16 Bamacö shömaö lä cule —Jesús a cuma—. Jjima bä waiteli lä läle jamö, oweja bä shäablamousi ijejewä lä cuo weinaja, wamacö nia cuo. Olu bä moyawe lä culenaja, bä moyawäa da cuicu. Joledo bä ʔ jilimamou oquejewä lä culenaja, bä ʔ çai oquewä cuo mö da feduo.

17 Yanowamö täbä nija bä da moyaweicu. Judio bä bada lä yododoblai bä nijamö wamacö noshi nia öjödabouje, wamacö nö bleamabeje. Judio bä yododabä yafi bä jamö wamacö si nia çai yafelimaöje.

18 Iba wamacö yalo, bada bä yai bälöo lä dodijio wei bä nijamö wamacö nia lulubou fe yadioje. Bada bänö cama ebä lämabou mö lä feduo wejei bä ma cui nijamö, inaja showawä. Judio bä ma cui nija, judio bä lä mlai bä ma cui nija, öjö bä nija wamale ʔfa wäyäbä, öjö tä çai nia cuo.

19 Bada bä nija wamacö noshi öjödabouje dājä, wamacö nofi nia lä bəyāo wei tä ʔ ja, bä bufi jəlijou dicoo dijä —a cuma—. Wamacö wəliije dājä wamacö ʔ moyawe juobä, öjö dājä showawä, wamacö ʔ nia bayeliblamou.

20 Cafä wamacö ʔ mlai, Faafä a lä culadi bei Bufinö wamacö ʔ nia macocamaö.

21 Tä nia wəlidiblou —a cuma—. Cama bä mashi ma cuinö bä noshi nia öjödabouje, bä shäbeje. Bä föö bä ma cuinö, bä ijilubö ebä noshi nia öjödabouje. Bä ijilubö ebä ma cuinö, bä föö, bä nöö ebä nabä nia shömaöje, bä shäbeje.

22 Iba wamacö yalo, bluca bänö wamacö nofi nia wəlibouje. Öjö ma cui, a shämobä etä ma cuo dājä ma cui, a nö wəlojaö fe lä yadio wei a lä cui, öjö a nia jucāamou fe yadio.

23 Ai täbä shabonobö jamö wamacö nö bleaamaöje ja, ai lä täbä shabonobö nomöjowä jamö, bä docua cuablalou da majöofälö —a cuma—. Cafä wamacö nija ei ya wə lä cui, bejedi lä ya wə. Israeli ebä nodiwä lä bälöblai jamö wamale ʔfa wäyāo jödödu cuaaö showao mlao dājä, camiyä ya lä yanowamöblaleyoluno wei ya lä cui, ya nia waloo çoyoluu.

24 Tä ʔ lä wäyāo wei a wə jiliaö mlaoje dājä, cama ebä lä nocale bä ʔ nia jiliaö ayaomije —a cuma—. Inaja showawä, bada a lä cui a nofi tabou mlaoje dājä, cama ebä nofi tabou ayao mlajeicätä.

25 Tä ʔ lä wäyāo wei a wə jiliaö lä mlajeinaja, inaja showawä cama ebä lä nocao wei bä ʔ nia jiliaimi cuo mö feduoje. Bada a nofi tabou lä mlajeinaja, inaja showawä cama ebä nofi nia taboimi cuo mö feduoje. Inaja lä waiquiwä. Bä çai lä cule a bada lä cui, a wəfa Sadanasi taö waiquiweje yalo, cama ebä lä cule bei ebä ʔfa wayobou dodijia yaiqueije.

26'Yanowamö täbä nö quili ta dijejä, öjö lä —Jesús a cuma—. Tä ʘ fei dǎjä wǎyǎmamou lä ʘatoo wei, wawǎdowǎ tä ʘ nia wǎyǎmamou malǎ nomöjöö wei. Tä ʘ lä ʘoyabou wejei, tä ʘ nia ʘödödöwǎ wawǎblamou malǎ cui.

27'Caǎ wamacö nija ya tä ʘ wǎyǎö lä ʘatoo wei tä ʘ lä cui, wawǎdowǎ tä ʘ da wǎyǎje. Wajado wama tä ʘ lä ʘiliablaö wei tä ʘ lä cui, wamacö ʘ naclǎalanö tä ʘ fe da dolemaje.

28'Yanowamö täbä nö quili ta dijejä. Bei wamacö shǎö ma cujei, bei wamacö bufi nia nomamaimije. Ma, Yai Bada a nö quili yai shino da taje. Öjönö täbä shǎö dǎjä, bei täbä ma cui, bei täbä bufi ma cui, shobali wacö jamö täbä nö yai bleaamaö lä daö wei, öjö a.

29'Blada moli a wai ja, biyomö bolacabö cǎcöbö wai dǎamamou talei. ¿Öjö tawǎ? —a cuma—. Biyomö bǎ nowa bluca ma mlai ma cui, Faafǎ a lä culadinö bǎ nofi bluca jaducubou. Bǎ lä nomablou wei bǎ çai daö.

30'Bǎ nofi ʘolio dijejä. Bei wamacö feta ʘcu ma cui, Yai Bada tänö wamacö feta ʘcu bluca daö.

31'Bǎ quili dijejä, öjö lä. Biyomö bǎ nowa lä culenaja mlai, Yai Bada tänö caǎ wamacö nowa yai blucabou —a cuma.

32'Abinaja Jesús a cuma. —Yanowamö täbä nija, quili mlai ja iba bǎ ʘfa wǎamou lä wawǎdoo wei bǎ lä cui, iba ya bǎ ʘfa nia çai wawǎdowǎ wǎyǎö mö feduo. Camiyǎ ya lä yanowamöblaleyoluno wei ya lä cuinö, Fayǎ a lä culadi jamö iba ya bǎ ʘfa nia çai wawǎdowǎ wǎadayou.

33'Öjö ma cui, yanowamö täbä nija iba bǎ ʘfa wǎamou lä quili wei bǎ lä cui, Fayǎ a lä culadi jamö öjö ya bǎ ʘfa nia çai wǎyǎimi mö feduo.

34'Jesús abinaja a cuma. —Bita jamö yanowamö ya täbä yanöcömabobǎ, ya junomi. ¿Öjö tawǎ? Inaja bǎ bufi cu dijejä. Ma, ya täbä shino yai sheleleblamabǎ, ya juma.

35'Bǎ föö nija bǎ ijilubö e ʘ nia läblou. Bǎ nöö nija bǎ tää e ʘ çai nia läo mö feduo. Bǎ yesi nija bǎ tatǎ e ʘ çai nia läo mö feduo.

36'Iba wamacö yalo, afǎ bǎ mashi cadidiwǎ ma cuinö wamacö nofi nia yai wǎlibouje.

37'Wale ʘowa ma bufi wejei ma cui, bǎ föö ebǎ nija bǎ bufi mö blucao dicoo ja, bǎ nöö ebǎ nija bǎ bufi mö çai blucao dicoo ja, iba bǎ cuobǎ bǎmi waiquiwǎ. Bǎ ijilubö ebǎ ma cui, bǎ tää ebǎ ma cui, inaja showawǎ. Öjö bǎ nija bǎ bufi mö blucao dicoo ja, iba bǎ nia cuomi.

38'Camiyǎ nija bǎ nia lä nocao wei bǎ lä cui, bǎ cuaaö bufi lä doblao wei tä ja, bǎ yai nia wasöo. Wale bufiije yalo bǎ ma shǎö wejei ma cui, bǎ nia ojode cudio fe yadio. Bǎ nia nocao fe yadio.

39'Eja bǎ demi nia lä cudio wei tä ja bǎ bufi mö lä blucao wei bǎ lä cui, bǎ bǎlimi nia cuoimi. Öjö ma cui, camiyǎ ya nowa ja bǎ shǎmou lä ojodao wei bǎ lä cui, öjö bǎ nia shino bǎlimi cuo ayao.

⁴⁰Abinaja Jesús a cuma. —Cafä dodijidawä wamacö çoblamaöje ja, camiyä ma cui wale dodijidawä çoblamaö mö feduoje. Inaja showawä, dodijidawä wale lä çoblamaö wejei bä lä cuinö, wale lä shömöleno wei a ma cui, öjö a çai dodijidawä çoblamaö mö feduoje.

⁴¹'Yai Bada a wano wäyääo yalo a dodijidawä lä çoblamaö wejei bä lä cui, Yai Bada a wano wäyäléwä bä nia dobämou lä culenaja, öjö bä nia çai dobämou cuo mö feduodayou. ¿Öjö tawä? —a cuma—. A cadidou yalo a dodijidawä lä çoblamaö wejei bä lä cui, bä lä cadidou wei bä nia dobämou lä culenaja, inaja showawä öjö bä nia çai dobämou cuo mö feduodayou.

⁴²'Iba ai a wai bädawä ma cui, camiyä nija a nocaio yalo a lä dobäo wejei bä lä cui, inaja showawä öjö bä nia çai dobämou cuo mö feduodayou. Cafä wamacö nija ei ya wä lä cui, bejedi lä ya wä. Mau si ajiwä u ja a dobäo bädäo ma cujei, bä nia dobämodayou —a cuma.

San Mateo 11

¹Cama 12 ebä lä nocamabono wei bä yömölaa fa jödödöblalönö, Jesúsno bä çai aa çolayofälöma. Täbä bälöa lä ajedeblai täbä shabonobö jamö bä çai juu cuaama, öjamö lä tä a çai wäyääo cuaafälöbä.

²A fe lä lale jamö Juan a yömöladayomaje, Cristo a lä cuaano wei tä ja. Öjö däjä, Jesús nija Juan a wano wäyadayobeje, cama ebä lä nocamabono wei ai ebä shömölema.

³Jesús a wälüije ja, abinaja ebä cuyoluma. —A jowa nia lä junö wei, ¿öjö cafä wa waiquiwä tawä? Ma, cafä mlai, çai a nia yai lä juu wei yama a nö dabou showaobä daanö? —bä cuma.

⁴Abinaja Jesúsno bä nowa tama. —Wama tä a lä jüliaö wei tä a ma cui, wama tä lä dablao wei tä ma cui, Juan nija tä afa bluca da wäyäduje.

⁵Bä lä jubäbö wei bä lä cui, bä mamocu dodijidablou çö. Bä juu dao lä mlai bä lä cui, bä jublou. Täbä sicö lä jodemaö wei tä wayunö bä nö lä bleaaö wei bä lä cui, bä dodijidablou çö. Bä yömöca lä comi wei bä lä cui, bä yömöca walalablou çö. Bä lä nomaö wei bä lä cui, bä demi jocädou çö. Bä lä jöli wei bä lä cui, dodijidawä tä a ja bä yömölamou.

⁶¿Öjö tawä? Camiyä wale nofi mölabou fe lä yadio wei a lä cui, öjö a bufi nia yai doblalou —bä nowa tama.

⁷Öjö däjä, Juannö bä lä shömöleno wei bä aa fa çolufälönö, bluca bä lä çocamono wei bä nija, Jesúsno Juan a wäfa wayoaö juoma. —Ulifi bloque a jamö, ¿wedi wama tä möbä wamacö li juma? ¿Wadoli anö cau cau bä lä yalälao wei wama bä möö bädäobä daanö? Mlaicätä. Wamacö juu buonomi.

⁸Jao. ¿Wedi wama tä yai nia fa mönö, wamacö li juma, öjö lä? —a cuma—. Camishi dodijidawä bä ja a yai lä didio wei wama a möbä, çbei wamacö juma? Ma, camishi

dodijidawä bä ja bä lä didio wei bä lä cui, ulifi bloque a jamö, öjö bä nia cuomi. Bada bä bälöo lä dodijio wei bä nija, öjö bä li bälöo.

⁹¿Wedinaja a walo cuwä wama a yai nia fa mönö, bei wamacö juma, öjö lä? —a cuma—. ¿Yai Bada a wano wäyälwä wama a möö mlaobä daanö? Awei. Öjö wama a möbä lä. Cafä bamacö nowa taö lä cule. Juan a lä cui, Yai Bada a wano wäyälwä ai a badawä mlai, öjö bei a shino yai bada dodijiwä.

¹⁰Yai Bada tä a oni jamö, Juan a wafa çai wäyämou balöoma. Abinaja tä a cuu. Bei. Wa nia juu lä cuaafälöo wei jamö wa wano taö balöafälöbä, iba ya nia shömaö balöo, wa wä jiliaö dodijidaobeje. 'Einaja tä a cuu —a cuma—.

¹¹¿Öjö tawä? Cafä wamacö nija ei ya wä lä cui, bejedi lä ya wä. Bluca bä lä bälöblai bä ma cui nija, bä jaba lä bälöjono wei bä ma cui nija, Juan nija a bada fe biyäjäobä a cuami. ¿Öjö tawä? Öjö ma cui, Yai Bada tänö cama ebä çai lä cuo wei bä lä cui, öjö bä nofi shino yai tabobeje cäbä. Öjö bä nijamö a cua lä bälö a ma cui nija Juan a nojablaliyo.

¹²¿Öjö tawä? —a cuma—. Yai Bada tänö cama ebä nia çai lä cuo wei tä a ja, ai täbä a läblou. Tä a çai waibouje. Juannö täbä lä yömölano wei däjä, bä a jaba wawäblaliyoma. Fei däjä showawä ma cui, bä a lojodoaö showawä.

¹³Cama ebä çai nia lä cuo wei, Yai Bada a wano wäyälwä bä bluca lä cuinö tä afa wäyäo balöblaomaje, Juan a cublou showao mlao däjä. Moisesi tä a jamö ma cui, öjö tä afa çai wäyämou showao balöoma.

¹⁴Öjö wama tä a bejedi bufibou ja, Juan wama a nö nia öjöböaö showao. Elia a nia jowa juu lä çono wei, öjö a cuoma.

¹⁵Wamacö yömöcacö lä walalai, bä yömöca daa da dodijicu.

¹⁶Wamacö fei däjä lä bälöblai wamacö lä cui, ¿wedi tä cuwä lä dodijinaja, bei wamacö cuwä dodijiwä? —a cuma—. Wamacö a juomi fe balojowä. Ijilu bä iliyamobä jamö, bä a juayou lä mlainaja showawä. Nii bä lulabeje jamö ijilu bä iliyamou däjä, abinaja bä cuaaö. Ai bä mashi iliyamou fa shomitaicunö, abinaja bä nowa taöje.

¹⁷“Uo. ¿Wedi tabä yamalecö a li juaimi dicowä? Amowa yama fi jolaö däjä ma cui, wamacö li blaö blaömoimi. Jole jole yamacö ma öcöo däjä ma cui, wamalecö a çai bayeliblaimi”, bä nowa taöje. Ijilu bä iliyamobä jamö, showadi einaja bä li taamayou.

¹⁸¿Öjö tawä? —Jesús a cuma—. Cafä wamacö ma cui, inaja showawä wamacö cuaaö. Wamacö a juomi fe balojowä. Fe ojomalewä Juan a lä cui, öjö wama a wä juano malä mlai. Öjö a fa waloiquiyonö, a iyaö wasöoma. Nashiwä toubä çai coanomi. A waiyoma cudeenö, “A li feculabö”, wama a nofi li taboma.

¹⁹¿Öjö tawä? Juan a lä cuaano weinaja, ya cuaaö ma mlai ma cui, inaja showawä camiyä ya lä yanowamöblaleyoluno wei ya lä cui, wamale a çai jiliblaimi cuwä mö feduwä. Camiyä ya fa waloiquiyonö, ya çai waiyo mlai ja ya iyaö showawä. Bei ya toubä çai coaö. Öjö ma cui, wamale afa çai wayoaö mö feduwä showawä. “Showadi a

iyadii”, wamacö cuu. “A shi walıi bufi fa doblaonö, toubä coadii”, wamacö cuu. “Lomateli bada bä befi, bä blada lä doaö wejei bä ma cui, walıdiwä talewä ai bä ma cui, bä shino nofimadii”, wamacö cuu. ¿Öjö tawä? Inaja wamacö ma cuu däjä ma cui, Yai Bada a wə moyawe. Öjö a wə lä cadidibou wejei bä bluca lä cuinö a bejedi dablamaöje—Jesús a cuma.

²⁰Öjö däjä, Jesúsnö ai bä lä bälöblai bä nowa blajawä tama. Öjö bä yafibö jamö, tä nö lä quilijii showadi tä bluca ma wawämano wei ma cui, walıdiwä tä ja bä bufi lädonomi cudeenö, bä nowa li tamoma.

²¹Bä nowa blajawä taö ja, abinaja a cuma. —Colasiniteli wamacö, Besaidateli wamacö, wamacö nö bleaaö fe balojoobä wamacö. Yai Bada wama a lojode dablabä, cafä wamacö nijamö tä nö lä quilijii, bluca ya tä wawämama. Diloteli bä nijamö, inaja ya cuaaö mö feduo fa cunoja, Sidonoteli bä nijamö, ya inaja cuaaö mö feduo fa cunoja, walıdiwä tä ja yedu bä bufi nö lädaliobö wei. Bä doblou lä mlai tä ja, yubu ushibö ja yedu bä nö looquebö wei. Camishi ɔloqui bä ja yedu bä nö didiobö wei, bä bufi nö walıdiwä öjöböamobä.

²²Abinaja bamacö nowa taö lä cule. Yai Bada tänö täbä obi nia lä jömadayou wei jamö, Diloteli bä nö nia ma bleaaö wei ma cui, Sidonoteli bä nö çai nia ma bleaaö wei ma cui, cafä bei wamacö nö nia shino yai bleaaö fe balojo.

²³Cabenaoteli wamacö —a cuu nomöjöoma—. ¿Fedu jamö, Yai Bada tänö cafä dodijidawä wamacö nia tabodayou daanö? Mlaicätä. Bä lä nomaö wei bä cuobä jamö wamacö nia shäyääabodayou, täca nö quiliwä lä cubodi jamö. Yai Bada wama tä lojode dablabä, cafä wamacö nijamö tä nö lä quilijii ya tä bluca malä wawämano wei. Sodomateli bä nijamö, inaja ya çai cuaaö fa cunoja, fei däjä ma cui bä nö yafibö cuo showaobö wei.

²⁴Abinaja bamacö nowa taö lä cule. Yai Bada tänö täbä obi nia lä jömadayou wei jamö, Sodomateli bä nö nia ma bleaaö wei ma cui, cafä bei wamacö nö nia shino yai bleaaö fe balojo —a cuma.

²⁵Öjö däjä, abinaja Jesús a cuma, Yai Bada nija. —Fabe. Fedu jamö ma cui, bita jamö ma cui, cafä lä wa shino Bada cua ayaa. Ei ya tä ɔ lä wäyäfe, bä bufi ɔfa moyawä lä taö wejei bä nija wa tä ɔ nofi mojudumabou. Bä bufi ɔfa dao lä taö wejei bä ma cui nija, inaja showawä. Inaja öjö wa bä ma taamabou däjä ma cui, jai ijilu täbä lä cule bä nija wa tä ɔ yai wawäblamalema.

²⁶Awei, Fabe. No mlai ja, inaja wa bä taamaö bufi malä doblaono wei.

²⁷Jödödöwä täbä nija ya Bada läobä, Fayänö wale tablamalema —a cuu nomöjöoma—. ¿Öjö tawä? Yanowamö täbänö wale daimije. Fayä a lä culadinö, bä Ijilubö ya e lä cui wale shino daö ayawä. Inaja showawä, Fayä a daö ma mlajei ma cui, camiyä bä Ijilubö ya enö ya shino daö ayawä. Fayä ya dablamaö bufi lä doblao wei bä lä cui nija ya fa damalalönö, öjö bä ma cuinö a daö mö feduweje.

²⁸Wamacö bufi nö modawä lä bleaale wamacö lä cui, wamacö bufi nö wälidiwä çai lä beblalou wei wamacö lä cui, camiyä nijamö ;bä da juima! Camiyä nija wamacö fa waloboyonö, bamacö bufi nia yanöcömabou.

²⁹Bamacö nosiemaö ja wamale a da julä, camiyä nija wamacö damamobä. Ya wä oquewä malä cui. Ya çai nofi. Camiyä nija wamacö bufi nia shino yanöcöwä çai cuo.

³⁰Bä dodijidawä cuobä, ya bä li nosiemaö malä cui. Ya bä lä taamaö wei tänö ya bä bufi nö bleaamaö malä mlai —Jesús a cuma.

San Mateo 12

¹Sábado däjä, ficali ca jamö Jesúsnö cama ebä çai jayuafälöma, täbä yanöcöobä tä mö jalu lä cui däjä. Bä lä nocamabono wei bä ofälayofälöma yalo, mobä jucäa jayualalefälömaje, mobä owafälöbeje.

²Öjö ma cui, faliseo bä bada lä cuinö, öjö bä fa dalalöjenö abinaja Jesús nija bä cuma. —Quiji afä wabä lä nocamabole, bä da mö. Täbä yanöcöobä tä mö jalu ja, inaja bä cuaaö mlaobä tä a ma läle ma cui, bä cuaaö fe yadio —bä cuma.

³Jesúsnö abinaja bä nowa tama. —David a bada lä cuaano wei, ¿bei wama tä a oni daö mlaa cule? Cama a ma cui, cama ebä lä nocaono wei bä ma cui, bä ofäö yalo,

⁴Yai Bada etä yano jamö a lucäa fa jayulofälönö, Yai Bada ebä nii lä yaimabou wejei bä nii ja, a iyalayofälöma. ¿Öjö tawä? Öjö bä nii ja, nofi bäyäälewä bä iyabä bä nii yaiona. David a iyabä bä nii cuonomi. Cama ebä lä nocamabono wei bä ma cui, inaja showawä. Bä iyaö mlaobä, Moisesi etä a läoma. Öjö ma cui, inaja David a ma cuaano wei ma cui, a jömamonomi. ¿Öjö tawä?

⁵¿Moisesi bei wama etä a oni çai daö mlaa cule? —a cuma—. Täbä yanöcöobä tä mö jalu ja, täbä ojodamou mlaobä tä a ma läle ma cui, Yai Bada etä yafi jamö nofi bäyäälewä showadi bä ojodamou fe malä yadio wei. Inaja bä ma cuaaö wei ma cui, bä jömamobä bämi.

⁶Yai Bada cama etä yafi li cudeenö, täbä yanöcöobä tä ma cui ja, bä li ojodamou fe yadio. ¿Öjö tawä? Yai Bada etä nofi yafi tabobeje etä yafi malä cui. Öjö ma cui, a nofi nia yai tabou lä dodijio wejei a lä cui, fei däjä a cua lä cule.

⁷¿Öjö tawä? —a cuma—. Iba wama bä jömabä bä ma mlai ma cui, Yai Bada ei wama etä a jiliaö walalao dicoo fa mlacunö, wama bä li jömaö yacläoma. Ei tä a ja wamacö bufi yai jaducuo fa cunoja, wamacö a nö fabö mlai. Abinaja tä a cuu. Yalo wama bä öshö lä dodobou wei, öjö ya tä bufiboimi. Yanowamö wama täbä nofi nia lä ojodabou wei, öjö ya tä shino yai bufii.

⁸Einaja tä a cuu —a cuma—. ¿Öjö tawä? Täbä yanöcöobä tä mö jalu jamö täbä nia lä cuaaö wei tä ma cui ja, täbä nia cuaaö lä mlai tä ma cui ja, camiyä ya wä fabä ei Bada ya waiquiwä, ya lä yanowamöblaleyoluno wei ya lä cui.

⁹Öjamö Jesús a çai fa jayuicunö, judio bä yododabä yafi jamö, a lucäa nomöjölâyoma.

- 10** Öjamö lä imicö lä cofeono wei a cuoma. ¿Öjö tawä? A nia dobroimi fa jömajenö, Jesús a wəlimaje. —Sábado dájä tábä nia lä jalomaö wejei, ¿bei tä ʔ läami daanö, tábä yanöcöobä tä mö jalu ja? —bä cuma.
- 11** Abinaja Jesúsnö bä nowa tama. —Ai wa lä cuinö, täca täca aca jamö moli wa oweja lä tabole a quequei ja, tábä yanöcöobä tä mö jalu ma cui ja, ¿wa nia yäbäaö cəomi daanö? ¿Öjö tawä?
- 12** Oweja bä nowa ma cua wei ma cui, yanowamö tábä nowa shino yai bluca dodijiwä. Tábä yanöcöobä tä mö jalu jamö bamacö dodijaö mlaobä, tä ʔ läami.
- 13** Inaja a fa culunö, imicö lä cofeono wei a nija abinaja e cuma. —Boco da dodoiquiyo. Boco fa dododalunö, imicö cushähshäblou showadalayoma. Ai imicö mashi dodijidawä lä culenaja, imicö cublou çəlayoma.
- 14** Öjö ma cui, faliseo bä bada faa fa çəlufälönö, Jesús a nabä queobeje a nofi washuaö showadaomaje.
- 15** Jesús a nofi lä washuaö wejei tä daö fa waiquionö, shomi jamö a aa majölayofälöma. Cama nija bluca bä nocao fa showaofälönö, bä bluca jalomama.
- 16** Bä fa jalomanö, bä ʔ wasödaö showaoma, a nö öjöböamaö mlaobeje.
- 17** Inaja a lä cuaano wei, Yai Bada a wəno wäyäləwä Isaia a lä cuinö tä ʔ wäyöö showao balöoma. Öjö etä ʔ bejedi wawäblobä, inaja Jesús a li cuaafälöma. Abinaja tä ʔ cuu.
- 18** Bei. Ya wə juamobä, ei ya yailema. Ya nofimaö fe balojowä. Cama nija ya bufi yai doblalou. Bei ya Bufi fa lucälönö, judio bä lä mlai bä nia bluca yömöläö cuaaö. Camiyä nija bä nia dodijidawä cuo fe lä yadio wei tä ʔ nia wäyöö.
- 19** A wə nia lafujoiimi. Tábä lä juaaö wei jamö, bä ʔfa lä taö wei a wə nia jilimamou bädaomi.
- 20** Bä lä ujudi wei bä lä cui, bä nö nia bleaamaimi. Bä ujudiblou fe balojowä ma cui, dodijidawä bä nia çai cuo fe yadio. Inaja a cuaaö showao dájä, camiyä nija bä dodijidawä cuo fe yadiobä, a nö yai nia wəlojaö ayao.
- 21** Judio bä lä mlai bä lä cuinö a nia bufiblaöje. Einaja tä ʔ cuu.
- 22** Öjö dájä, fecula anö aca lä bolebömabono wei a lä cui, Jesús nija a çai walobeyolumaje. A çai jubäböoma. Jesúsnö a fa jalomalönö, aca lä boleböono wei a wə faö liyäjäblou çəlayoma. Tábä çai möö cəoma.
- 23** Öjö tä fa dalalöjenö, bä bufi bluca shädəyaimoma. —Jo yai! —bä cuma—. David nodiwä e nia jəwa lä waloono wei, ¿fei öjö lä a waiquiwämi daanö?
- 24** Öjö ma cui, faliseo bä bada lä cuinö, öjö bä ʔ fa jililäjenö abinaja bä cuma. —Ma. Fecula bada Sadanasi tä lojodenö bä li fecula yashuu buo, Yai Bada tä lojodenö mlai —bä cuma.

25 Bā bufi lä cuno wei tä daö waiquioma yalo, abinaja Jesús a cuma. —Bä bälöa lä yaile bä nofi wāliayou dājā, bä nia bälöo dobroimi majöo. Cama bä shabonobö jamö bä lä cule bä ma cui, cama bä mashi ma cui, inaja showawä. Bä nofi wāliayou dājā, bä nia bälöo lojodoo majöomi.

26 Ma, Sadanasi nija ya cuo fa cunoja, iba ya bä nö yashublabö mlai. ¿Wedinaja cama Sadanasi a yashublamou li cuobä, öjö lä? Ma, Sadanasi ebä lä cui, cama bä nofi wāliayou dicolayou ja, ¿wedi jamö tänö bei ebä çai li lojodoa nomöjöquei?

27 “Sadanasi a lojodenö bä li fecula yashublaö”, wamale nofi tabou ja lä, ¿inaja showawä afä wama bä nofi çai tabou da culanö, fecula bä lä yashuu wejei bä lä cui? Mlaicätä. Inaja wamacö cuu dicoo ja, afä bä showawä lä cuinö wamacö jolemou jömaö cuqueije —a cuma—.

28 Öjö ma cui, Yai Bada a Bufi lojodenö öjö ya bä li yashuu, Yai Bada tänö cama ebä çai lä cuo wei wama tä dablaö fe yadiobä.

29 A lä waiteli wei a lä cuinö, cama madofi ebä nofi läbou dājā etäbä nia yabäcamaimi —a cuma—. Shomi täbä nia lucämaimi. ¿Öjö tawä? Öjö ma cui, a nö yai lä wālojaö wei a lä cuinö a nabä fa waloicunö, a fa qcablalönö, öjö dājā cama etäbä bluca lä table etäbä nia shino yai dälalei —cama a wāfa tao ja, a cuma.

30 —Camiyä wale bayeliblaö lä mlai a lä cuinö, Sadanasi a li bayeliblaö waiquiwä —Jesús a cuma—. Iba ya bä çabä jamö bä çao mö feduo lä mlai a lä cuinö, bä yai sheleleblamaö.

31 Öjö cudeenö bämacö nowa taö lä cule. Yanowamö täbä nijamö tä nowa wālidiwä bluca lä cule etä nowa mladou dao. Yai Bada a nö waiblaöje ja, tä nowa çai mladamaö dao. Öjö ma cui, Yai Bada a Bufi nö lä waiblaö wejei bä lä cui, etä nia mladoimi waiquiwä.

32 ¿Öjö tawä? Camiyä ya lä yanowamöblaleyoluno wei, wale nö ma waiblaö wejei ma cui, tä nowa nia mladou. Öjö ma cui, Yai Bada a Bufi nö waiblaöje ja bä a wālidiwä lä faö wei bä lä cui, öjö etä nia mladoimi waiquiwä. Fei dājā ma cui, obi ma cui, etä nowa nia shino cudio shi wālii showao.

33 Bā bufi yai da shaliliblalu —Jesús a cuma—. Defi dodijidawä waiquiwä ja, öjö defi jamö dodijidawä täcö nia dablamou. Defi wālidiwä ja, wālidiwä täcö nia çai dablamou mö feduo. Täbä nii lä lalou wei täbä ja, defibä nö malä öjöböamou wei.

34 Cafä jolu bä wayu lä culenaja, wamacö cuwä! —a cuma—. Wamacö jolemou. Wamacö wālidiwä waiquiwä yalo, ¿wedinaja wamacö a li dodijidawä faö cuo majöobä? Bei täbä bufi jamö tä lä didile etä a shino malä wawāblou wei.

35 A lä dodijaö wei a wā faö dājā, bei bufi jamö tä dodijidawä lä didile etä a nia wawāblou. Inaja showawä, wālidiwä talewä a lä cui a wā faö dājā, bei bufi jamö tä wālidiwä lä didile etä a nia çai wālidiwä wawāblou mö feduo.

36 Bāmacö nowa taö lä cule —a cuma—. Yai Bada tänö täbä bluca jömaö dājā, yanowamö täbä a faö lä bädao wei tä a ma cui ja, bä a nia wāamadayou.

37Bä ʔ dodijidawä lä fano wei bä lä cui, bä nia dodijidawä jömamou. Bä ʔ wʔlidiwä lä fano wei bä lä cui, bä wʔlidiwä fa jömamönö, bä nö bleaaö cuquei—a cuma.

38Öjö dǎjä, Moisesi tä ʔ ja täbä lä damaö wejei bä bada ma cui, faliseo bä ʔai bada ma cui, abinaja Jesús nija bä cuma. —Tä ʔ wäyäle. Yai Bada wa e nö öjöböamöbä, tä nö lä quiliiji tä da wawämalö, yama tä möbä —bä cuma.

39Öjö ma cui, abinaja Jesús e cuma. —Wamacö fei dǎjä lä bälöblai, wamacö bluca dobroimi fe balojowä. Yai Bada wama a wʔ juaimi dodijiwä. Yai Bada ya e nö öjöböamöbä, tä nö lä quiliiji wama tä wawämaö bufi ma doblao wei ma cui, bamacö ʔ nia juaimi. Wama tä nia lä möö wei, Yai Bada a wʔno wäyälwä Jonasi a lä taamano weinaja, inaja tä cuwä, wama tä nia shino möö.

40¿Öjö tawä? Yuli busi jamö, Jonasi a didio dǎjä, bolacabö a fe didi lä cublaliyono weinaja, camiyä ya lä yanowamöblaleyoluno wei ya lä cui, inaja showawä ya fe nia didi cublou, mashita a cojomö jamö.

41'Wamacö fei dǎjä lä bälöblai wamacö jömadayobä jamö, Ninibeteli bä nia ʔai ublao yädäo mö feduo —a cuma—. Öjö bä ma cuinö wamacö nia ʔai jömaöje. Wamacö ʔai nia waimaö bufiije. Jonasi nija Yai Bada etä ʔ fa jililäjenö, wʔlidiwä tä ja bä bufi lädou malä showadalayono wei. ¿Öjö tawä? Jonasi a bada ma cui, camiyä bei ya yai bada dodijiwä. Fei dǎjä, ʔafä wamacö nijamö camiyä ya yai cua ma cule, wamale ʔ jiliblaimi.

42'Wamacö fei dǎjä lä bälöblai wamacö jömadayobä jamö, Sabaateliyoma a bada bälöo lä dodijiono wei a suwä nia ʔai ublao yädäo mö feduo —a cuma—. Öjö a ma cuinö wamacö nia dobroimi jömaö. Wamacö nia waimaö bufii. ¿Öjö tawä? Bada tä Salomo a wʔ jiliabä, öjö a li suwä blajawä walöa fe malä yadiqueno wei. Salomo a bada ma cui, camiyä bei ya yai bada dodijiwä. Fei dǎjä, ʔafä wamacö nijamö camiyä ya yai cua ma cule, wamale ʔ jiliblaimi —Jesús a cuma.

43Jesús a wʔ faö ʔo ja, abinaja a cuma. —Fecula a yashublamou dǎjä, a lä tabou wei a daquefälöo. Öjö dǎjä, tä ulifi bloque lä wejedii jamö, a shoqueadii cuaaö bäa. A yanöcöobä, tä ma dayäo wei ma cui, tä dablaimi.

44Öjö dǎjä, abinaja a fecula cuu. “Ya da dacöi nija ya yai nia bälöo ʔo”, a cuu. Öjö dǎjä, a lä daquefälöno wei a lä cui nija a walöa fa ʔoiquiyonö, yafi bloque a dalalei. A yafi wawädowä. A yafi dodijidabläo jälalayoma.

45Öjö dǎjä, ai bä ʔabläo aa fa ʔolunö,7 bä ʔai fecula walöa ʔoqueyoluu. Cama a wʔlidiwä ma waiquii ma cui, bä yai wʔlidiwä fe lä balojoi bä ʔai walöa majöqueyoluu. Öjö nija bä fa lucälönö bä bälöaliyo. Bä lä tabou wei a lä cui, a nö jaba ma bleaano wei ma cui, öjö lä dǎjä, a nö yai bleaaö dodijiquei. Inaja showawä wamacö fei dǎjä lä bälöle wamacö nia taamamou —a Jesús cuma.

46Täbä yömöläo showao dǎjä, Jesús bä nöo, bä fäähä ebä walobeyoluma. Sibö jamö bä ublalanö a nacamaö bufimaje.

⁴⁷Jesús nija abinaja ai e cuma. —Naafä a ma cui, fäähäfä bä ma cui, bä ublaa siboa lä cubiyedi. Wa wə jəwa wayomaö bufi doblaoje —a cuma.

⁴⁸Öjö ma cui, a lä yömölano wei a lä cui nija abinaja Jesús e cuma. —¿Wedi nija bei ya yai li nöömou, öjö lä? ¿Wedi jamö bä nija bei ya yai li fäähämou? —a cuma.

⁴⁹Öjö dájä, cama nija bä lä nocaono wei bä jömaö fa cuaanö, abinaja a cuu nomöjöoma. —Ei bä lä cui, iba nayä bä waiquiwä. Iba mashi öjö bä çai li showawä.

⁵⁰Fayä Yai Bada a lä culadinö tä tamaö lä bufii wei tä lä taö wejei bä lä cui, öjö iba lä bä mashi malä waiquii. Öjö nayä bä waiquiwä —a cuma.

San Mateo 13

¹Öjö tä mö jalu showawä ja, yafi jamö Jesús a faa fa çolufälönö, modu u casö jamö a loalecölöma.

²Cama nija bluca täbä fa çocamoliyolunö, täbä mashicou dodijioma. Öjö dájä, a bacäjamaö mlaobeje, canawä a jamö Jesús a döcäbaliyoma. ¿Öjö tawä? Modu u casö jamö bä bluca lä çocamolayono wei bä cuo dájä, ajede jamö a befi çai çalanö

³bä yömölama. Bä yömöläö ja, shominaja tä ą bluca wäyäö yacläablalou ja, bä bufi dayäamama. Abinaja a cuma. —Ai anö mobä shäyäjäö mö alayoma.

⁴Mobä shäyäjäö cuaafälöö dájä, bei yo jamö ai mobä fa blälälalunö, biyomö bänö mobä owa nocaa jäalalemaje.

⁵Bei masi blaobä jamö ai mobä blälälaliyoma, mashita a bluca cuono lä mlai jamö. Mashita a fa maquedionö, mobä lobe caua showadalaliyoma ma cui,

⁶motoca a ösöblou dájä mosibä shīliquia nocalayoma. Nasöcö daloblou fa mlacunö, mosibä fälaliyoma.

⁷Tä mösöcöböobä jamö ai mobä fa blälälalunö, mobä caua ma bälayono wei ma cui, mösöcö bä caua mö fa fedulalunö mosibä baömölayoma.

⁸Mashita a lä dodijidai jamö ai mobä fa blälälalunö, mobä caua fa liyäjälalunö mosibä badalayoma. Ai mosibä jamö, moli mosi ma cui ja, 30 mobä cublou majölayoma. Ai mosibä jamö, 60. Ai mosibä jamö, 100.

⁹¿Öjö tawä? —a cuma—. Wamacö yömöcacö lä walalai, bä yömöca daa da dodijiicu.

¹⁰Cama ebä lä nocamabono wei bä lä cui, Jesús nija bä icua ajedea fa jäicunö, a wālii juomaje. —Wa täbä yömöläö dájä, ¿wedi tabä bei wa wə li faö yacläablalou? —bä cuma.

¹¹Abinaja Jesúsnö bä nowa tama. —Yai Bada tänö cama ebä çai lä cuo wei tä ą lä cui ja, çafä wamacö bufi jaducumabou. Tä ą jīlimamou walalao showadao ma mlai ma cui, dodijidawä wama tä ą bluca jīliaö fe yadiobä, wamacö bufi damaö. Öjö ma cui, ai bä mö feduwä lä cui, bä bufi jaducumaboimi.

23'Öjö ma cui, a mashita lä dodijidai jamö ai mobä bläläa lä culayono weinaja, ai bä ma cuinö tä ą jĵiliaö cuwä mö feduweje —a cuma—. Tä ą fa jĵilajenö, tä ą nofi jaducubou dodijioje. Tä lä dodijidai öjö bei etä shino li yai wawäblou. Ai mosibä jamö, 30 mobä faa lä culayono weinaja, ai bä nija inaja etä dodijidawä cublou. Ai mosibä jamö, 60 mobä faa lä culayono weinaja, inaja showawä ai bä nija etä cublou mö feduo. Ai mosibä jamö, 100 mobä faa lä culayono weinaja, inaja showawä ai bä nija etä yai dodijidawä cublaliyo—Jesús a cuma.

24Jesúsnö täbä yömöläö ço ja, jolemolewä bä showadi lä coyocoblai, bei tä ąfa wawämaö nomöjööma. Ficali täca ąfa wäyää yäclämou ja, abinaja a cuma. —Yai Bada tänö cama ebä çai lä cuo wei tä lä cui, abinaja tä çai cuwä. Ai a lä cui, a ficalimou ja, dodijidawä mobä döalema.

25Öjö ma cui, cama ebä mio däjä, ai a juu fa jatoimanö, dodijidawä mobä lä döaleno wei jamö, wăłidiwä mobä döa coyocoa jăalema. Mobä fa döalönö a alayoma.

26'Mosibä fa badalönö, mobä yädăcămou waiquio däjä, wăłidiwä mosibä çai bluca dablamo a coyocoa showalaliyoma —a cuma—.

27Ficali etăca lä cule a nija cama ebä ą fayoluma. “Bada tä”, bä cuma. “Ficalifă ca jamö, ĵdodijidawä wa mobä döa yai ale nowa tawă? ĵWedinaja tä li fa cublalunö, wăłidiwä bei mosibă dablamo coyocoa dicoa cule?”, bä cuma.

28'Abinaja bada e cuma. “A nö lä nabămou wei anö, mobä döa coyocoa jăalema”, a cuma. Inaja a fa cunö, abinaja cama ebä cuu nomöjööma. “Jăo. ĵWedinaja wa bufi yai cuu? ĵWăłidiwä yama mosibă joyaö showadaobă daanö?”, bä cuma ma cui,

29bä wasöma. “Ma, wăłidiwä wama mosibă ucăo däjä, dodijidawä wama mosibă nia befi çai joyaö dicoo.

30Nii băma bä tabă tä cublou showao mlao däjä, bä bluca cublao balöobă. Nii băma bä yai taö däjä, iba bä nija ya wă faö weicătă, wăłidiwä mosibă doaö balöafălöbeje. Mosibă fa manöłalöjenö, mosibă băshăcu fa ọcalalöjenö, mosibă ọcama nia yablaöje. Dodijidawä mosibö manöa fa nomöjölalöjenö, ya mobä shĵliqui lä nowamaö wei jamö mobă nia cuo”, a cuma. ĵÖjö tawă? —Jesús a cuma.

31Jesúsnö tä ą wăablalaö yaclăablalou ja, ei tä ą çai wäyăma. —Yai Bada tänö cama ebä çai lä cuo wei tä lä cui, nana shimono wai lä culenaja tä cuwä. Ficali ca jamö ai anö nana shimono wai döquei.

32Ai mobă wai cublawä ma cui, öjö nana shimono yai wiisibö dodijiwä. Shimono fa dömoicunö, shimono fa caulunö, bei shifi cublaliyou. Shifi fa badalönö, shifi yai ösölayou. Öjö däjä, öjö shifi bococu jamö, biyomö bä yabăcabö nia tamoyoluu —a cuma.

33Abinaja Jesús a çai cuu yaclăo çooma. —Yai Bada tänö cama ebä çai lä cuo wei, suwă anö nii bä lä julumano weinaja tä cuwä. Nii bä lä julumaö wei tä lä cui, nii 3 jĵibă jamö, wiisibö tä wai coyocoa ma băqueno wei ma cui, öjö tä wai bădawănö bä bluca julumalema —a cuma.

34 Tábä bluca lä çocamono wei tábä nija, Jesúsno ei tä ʘ bluca wäyää yacläoma. A wʘ ʘaloablalou mlai ja, tábä yömölanomi.

35 Yai Bada a wʘno wäyälwä a cuu lä balöono wei tä ʘ bejedi cublobä, inaja a li cuaama. Abinaja tä ʘ cuu. Ya bä yömöläö ja, ya wʘ nia faö yacläablalou. Yedu ja, bita tä jaba colo lä lojodoblmaleno wei däjä, tä ʘ ʘoyao lä showaono wei ya tä ʘ nia wawäblamaö. Einaja tä ʘ cuu.

36 Öjö däjä, bä lä çocamono wei bä fa dacöfälönö, yafi a jamö Jesús a lucäa çolayoma. Öjamö lä, cama ebä lä nocamabono wei bä lucäa fa yaulunö, abinaja bä cuma. — Wʘlidiwä wa mobä ʘfa wayoaö lä yacläoblei, tä ʘ yai da wawämalö. ¿Wedinaja bei wa cuu da cufanö? —bä cuma.

37 Abinaja a cuma. —Dodijidawä mobä lä döaö wei a lä cui, öjö camiyä bei ya waiquiwä, ya lä yanowamöblaleyoluno wei ya lä cui.

38 Ficali ya täca ʘfa wäyää lä yacläoblei, ei bita a lä blaucui, öjö lä täca. Dodijidawä mobä lä cui, Yai Bada tänö cama ebä nia çai lä cuo wei, öjö mobä li. ¿Öjö tawä? Wʘlidiwä mosibä lä cui, tä yai lä wʘlidii öjö bä ijilubö ebä.

39 A nö lä nabämou wei a lä cui, fecula bada cätä, wʘlidiwä mobä döa coyocoa lä ʘatoaleno wei a lä cui. Nii bä nia obi lä tamou wei tä ʘ mö feduwä lä cui, Yai Bada tänö obi tábä bluca nia lä jömadayou wei, öjö tä ʘ. Nii bä nia lä taö wejei bä lä cui, ʘjele cäbä.

40 ¿Öjö tawä? —a cuma—. Wʘlidiwä mosibä yaabeje mosibä çoaö lä culajeinaja, Yai Bada tänö tábä jödödöwä jömadayobä jamö, inaja tä çai nia cuo.

41 Ya lä yanowamöblaleyoluno wei ya lä cuinö, iba ʘjele ya bä nia shömaö. Yai Bada ebä nijamö bä wʘlidiwä talewä lä coyocole bä nia çoaöje, tábä lä wʘlidiaamaö wejei bä çai.

42 Cowa wacö bada jamö bä nia shäyäblaaöje. Öjamö lä bä nia öcöö. Bä nö beblalou yalo, bä nia lalöö.

43 Öjö däjä, bä lä cadidou wei bä lä cui, Fayänö bä nia çai lä cuo wei jamö, bä nia dodijaö dablamous, motoca a wawädwä lä dablamous weinaja showawä. Wamacö yömöcacö lä walalai, bä yömöca daa da dodijicu.

44 Yai Bada tänö cama ebä çai lä cuo wei tä lä cui, abinaja tä çai cuwä —Jesús a cuma—. Ficali ca jamö tä nowa yai lä bluca wei, tä ʘoyao balöoma. Öjö täca jamö ai a ojodamous ja, tä daa bädalalema. Tä daa fa bädalalönö, tä tabou bufi ma doblaono wei ma cui, shomi tábä ulifibö cuoma cudeenö, tä däanomi. Lobe tä batelia çoquema, ai bänö tä dablao mlaobeje. Öjö lä däjä, cama etä ulifi yai däabä, a bufi fa dayäonö, abinaja a bufi doblao çai cuaama. Cama ebä madofi bluca jöböaquema, blada bä ja. Öjö däjä, öjö lä bä blada ja, täca befi çai lulua showadalema —Jesús a cuma. Yai Bada nija bä nia lä cuo wei tä ja bä bufi mö blucaobä, a wʘ li cuoma.

45—Yai Bada tänö cama ebä çai lä cuo wei tä lä cui, abinaja tä çai cuwä mö feduwä —Jesús a cuma—. Madofi bä lä nomöjööblaö wei, ai a walo cuoma. Dobä bä nowa au lä bluca wei bä showadi dayäaö cuaadima.

46Yaçumö, a nowa yai lä bluca wei, moli a wai dobä dalalema. Öjö a wai luluaö bufi fa doblaonö, jödödöwä a madofibö jöbömoquema, blada bä ja. Öjö lä bä blada ja, a wai dobä lulua showadalema —a cuma. Yai Bada nija bä nia lä cuo wei tä ja bä bufi mö blucaobä, a wä li cuoma.

47—Yai Bada tänö cama ebä çai lä cuo wei tä lä cui, abinaja tä çai cuwä mö feduwä —Jesús a cuma—. Yuli bä lä yaçamou wei täcö lä culenaja tä cuwä. Modu u jamö täcö fa quemabalöjenö, bluca bä yuli shomitawä lucälayoma.

48Yuli bä cublou jödödölayono wei ja, bä befi çai shaimamaje, bä washölöblamabeje. Öjö däjä, mau u casö jamö bä fa loicunö, bä yuli yai majöomaje. Bä lä dodijidai bä tablamaje, bä lä wälidii bä queamaö mö yabao çomaje.

49'¿Öjö tawä? —a cuma—. Yai Bada tänö täbä jödödöwä jömabä jamö, inaja showawä tä çai nia cuo. Ajele bä fa wawälönö, yanowamö täbä nia yai cuaaöje. Bä lä cadidou wei bä nijamö, bä wälidiwä lä coyocoblai bä fa yailalöjenö,

50cowa wacö bada jamö bä nia shäyäblaaöje. ¿Öjö tawä? Öjamö lä bä nia öcöö. Bä nö beblalou yalo bä nia lalöö—a cuma.

51Öjö däjä, Jesúsnö cama ebä wälima. —Ei ya tä a bluca lä wäyäfe tä a ja, ¿wamacö bufi jaducublou cule? —a cuma. —Awei —ebä cuma.

52Abinaja a cuu nomöjööma. —Jao. Öjö cudeenö, abinaja ya nia cuu ço. Moisesi etä a lä cui, yedu ja etä a li cuo balöoma tä a li. Yai Bada tänö cama ebä çai lä cuo wei tä a lä cui, fei däjä dude ya tä a lä wawämale tä a. ¿Öjö tawä? Jaba tä a ja bä bufi lä jaducuo wei bä lä cui, dude tä a ma cui ja, bä bufi jaducuo mö feduo ja, inaja yai. Abinaja öjö bä cuwä. Cama ebä çai lä cuo wei a walo lä culenaja, öjö bä cuwä mö feduwä. Cama etäbä bluca lä nowamaö wei täbä ja, dude täbä wawäblamaö. Yedu ja täbä tabou lä balöono wei täbä çai. ¿Öjö tawä? —a cuma.

53Jesúsnö tä a wäyäö lä yacläablalono wei tä a ja a fa waiquidonö, a ço çolayoma.

54Cama etä ulifi jamö a waloa çaliyoma, a oshe lä cuono wei jamö. Öjamö a fa waloicunö, judio bä yododabä yafi jamö täbä yömölama. A wä lä jilino wejei bä lä cui, bä bufi bluca shädayaimolanö, abinaja bä nowa tayoma. —Fei a lä cui, ¿wedi nija a bufi li jaducublamolayoma tawä? ¿Wedinaja a li fa taamamonö, tä nö lä quilijii bei tä wawämaö majöa cule?

55Fii fibä ja täbä showadi madofi lä taö wei, ¿fei bä ijilubö emi daanö? ¿Bä nöö e lä cui, öjö María emi? Santiago, José, Juda, Simón bä lä cui, öjö bä aiyobö e nofi showawä lä cui.

56Camiyä bämacönö ¿fei bä yaö bäma ebä çai nofi lä bälöle! ¿Wedinaja a li fa taamamonö, bei a li shomiblou nomöjölaloma? —bä nowa tayoma.

⁵⁷Einaja a nofi tabomaje yalo, a wə wailemaje. Öjö ma cui, abinaja Jesúsnö bä nowa tama. —Yai Bada a wəno wäyäləwä bä lä cui, shomi täbä ulifibö jamö bä ʔ jiliaö bufi ma doblao wejei ma cui, cama bä ulifibö yai ja showadi bä ʔ jiliblaimije. Cama e yafi jamö bä lä bälöle bä ma cuinö, showadi bä ʔ waibouje —bä nowa tama.

⁵⁸A nofi mölabonomije yalo, a nia yai lojode lä dablamous wei tä bluca wawämanomi.

San Mateo 14

¹Öjö dāja, Jesús a wəfa wäyämou blaucublaliyoma yalo, bada tä Elode a ma cuinö a wəfa çai jilia mö fedulema.

²A wə fa jililänö, a nosie lä juaö wejei bä nija abinaja bada a cuma. —Fe ojomalewä Juan a demi jocädou fa çonö, ei öjö a çodawä. A demi jocädou fa çolonö, a lojode dablamous dodijia malä cule —a cuma.

³¿Öjö tawä? Elode a lä cuinö Juan a malä juwämaleno wei. Bococu fa ʔcablamalönö, a fe lamaboma. Wedi tä ja mlai. Suwä a ja Juannö a wasöma cudeenö a fe lamaboma. ¿Öjö tawä? Bada anö, cama mashi Felipe bei suwäbö e lälema, Elodia a wəfa suwä lä cui.

⁴Öjö tä nowa ja, abinaja Juan a malä cuno wei, Elode nija. —Ma, Felipe bä suwäbö wa e taabä wami, tä ʔ läa —a malä cuno wei.

⁵Bada tä Elode lä cuinö, Juan a shämaö bufi doblao ma showadaono wei ma cui, yanowamö täbä nö quili tama. “Yai Bada a wəno wäyäləwä a”, a nofi tabomaje yalo, bä jushudamaö bufinomi.

⁶Öjö ma cui, lasha ai a faa çomalema yalo, Elode a nofi çocamoaoje dāja, abinaja tä cublou dicolayoma. Elodia bä tää e lä cui, a wawäblaliyoma, a blaöabä. A blaöao dodijialloma yalo, bada tä Elode a bufi doblaloma.

⁷A bufi doblamaboma yalo, a nia lä dobäno wei tä ʔfa wäquema. Abinaja Elodia bä tää e nowa tama. —Wa tä lä bufii wei tä ʔfa da yubo. Ya tä nia jöböao dodijio —a nowa tama.

⁸Bä nöö e ʔ fa jililädunö, abinaja bada a nija e cuu çoyoluma. —Bei. Juan fe ojomalewä ya fe bufii. Wa fe fa bäblamalönö, madofi a jamö wa fe fa döcämacönö, camiyä nija wa fe befi çai jöböayolubä —e cuma.

⁹Elodia bä tää e ʔ ja, bada a bufi wajäblaliyoma. Öjö ma cui, wawädowä a wə nö wäo waiquioma yalo, a wə julema. Bä lä nacaleno wei bä badanö, a wə çai malä jilileno wejei.

¹⁰Öjö cudeenö, ai e shömöa fa showadalönö, täbä fe lä labono wejei jamö Juan a fa juwälönö, öjamö lä showawä a fe bäblalema.

¹¹Madofi a jamö fe fa döcämacönö, fe befi çai waloa çoqueyoluma. Elodia bä tää e nija fe befi çai fa jöböcönö, öjö länö bä nöö e nija fe befi çai jöböa nomöjöquema.

- 12 Juan nija bä lä nocaono wei bä lä cuinö tä ʔ fa j̄liläjenö, a femata çölemaje. A femata fa çölöjenö, a didiquemaje. Öjö däjä, Jesús a yömöladayomaje.
- 13 Öjö däjä, Juan a lä shämolayono wei tä ʔ fa j̄lilänö, Jesúsno cama ebä çai nia yamili cublao fa balöönö, ulifi bloque jamö bä befi çai caläläyofälöma. Öjö ma cui, öjamö lä bä lä bälöblamono wei bänö, Jesús a wafa juu fa j̄liläjenö, a nosi bou showaobeje, washölö jamö bä fe difeliläyofälöma.
- 14 Jesús a washölöblou däjä, täbä bluca lä çocamono wei bä dalalema. Bä nofi ojobadaö fa showadalonö, bä jalili çai bluca lä cuono wejei bä bluca jalomalalema.
- 15 Tä mö weyaö däjä, Jesús nija cama ebä lä nocamabono wei bä fa icuicunö, abinaja a nowa tamaje. —Ei tä ulifi bloque dodijiwä. Tä mö çai weyaö waiquia lä cule. Fei bä bluca lä çocamole bä shömöa da çolu, bä lä bälöblai bä nija bä nii fa lulualalöjenö, bä iyabä —a nowa tamaje.
- 16 Jesús a wə läöma. —Bä shomi jamö juu majöobä tä cuami. Cafä wamacönö wama bä yai iyamabä.
- 17 Abinaja bä cuu nomöjöoma. —¿Wedinaja yamacö yai fa cuanö, yama bä li iyamabä? Nii 5 yama bä tabou bädaa lä cule, yuli bolacabö cäcö çai —bä cuma.
- 18 —Fäyämö bä da jöböbayo —a cuma.
- 19 Öjö däjä, moimoima a jamö bä bluca lä çocamono wei bä loamaö fa bufinö, nii 5 bä lä cuono wei bä dälema, yuli bolacabö cäcö çai. Öjö bä fa dälönö, fedu jamö a mö fa nonoicunö, bä nia lä iyano wei tä ja, Yai Bada nija a bufi ʔfa doblalou wäyämoma. Öjö däjä, nii bä fa cälälönö, cama ebä lä nocamabono wei bä nija bä jöböquema. Öjö däjä, cama ebä lä cuinö, bä lä çocamono wei bä nija bä jöböaö cuaaö nomöjöomaje.
- 20 ¿Öjö tawä? Bä bluca fa iyaolalunö, bä bädöolaliyoma. Öjö däjä, Jesús ebä lä cuinö bä nii sheje çə fa çəbodujenö, wöö 12 bä jamö bä fe nii shee lajomalalemaje.
- 21 ¿Öjö tawä? Bä lä iyano wei, jai 5.000 bä wəlo cuoma. Suwä bä çai, ijilu bä çai.
- 22 Öjö däjä, cama ebä lä nocamabono wei bä lä cui, canawä a jamö Jesúsno bä dökäcäa showadaamabalema. Bä lä çocamono wei bä shömaö çə juo däjä, bä bucaduamaö balöo bufima.
- 23 Täbä shömöa fa çəbodunö, jefu a balöcö jamö Jesús a yami dolequea jäbefälöma, Yai Bada nija a wə fabä. Tä mö dödöfälöö däjä, washölö jamö Jesús a yami cuo juo däjä,
- 24 modu u möamo jamö cama ebä befi çai caläo lä blajalayofälöö wei ja, wadoli a läadalou fe fa jalunö, bä jamaboma. Modu u bada shäyä shäyämou nö quiliama.
- 25 Öjö däjä, tä mö jalufälöö däjä, cama ebä nija, modu u jamö Jesús a jelejewä juu yaua jälayofälöma.

²⁶Cama ebä lä nocamabono wei bä lä cuinö, modu u feyaca jamö a jelejewä juu fa dalalöjenö, bejedi lä bä nö wəlowä quilia dodijilaliyoma. Bolebole a fa bufijenö, bä quilili şılalamolayoma.

²⁷Bä ma quililaliyono wei ma cui, lobe bä quili wasöblalema. —Bä bufi da lojododalu. Ei camiyä cä ya. Bä quili dijä —bä nowa tama.

²⁸Pedro a wə jua showalayoma. —Bada tä. Cafä wa ja lä, mau u feyaca jamö ma cui, wale çai da nacalä —e cuma.

²⁹Jesús lobe a wə nocalayoma. —A da jabo, öjö lä. Inaja Jesús e cuma yalo, mau u feyaca jamö Pedro a fa itoblalunö, Jesús a lä ublale jamö a jelejewä çai icua ajedequema.

³⁰Öjö ma cui, wadoli a bada lä cuaano wei tä fa mödalönö, lobe a bufi quilia fa dicolalunö, a queofälöma. A queofälöö ja, a ıçali comölayoma. —ıBada tä! ıWale da bayeliblalö!

³¹Jesús lobe boco fa dododalunö, imicö yaçalema. —Wale nofi yai mölaboimi —e cuma—. ıWedi tä tabä, wa bufi li ujudublou cufe?

³²Öjö däjä, canawä a jamö cäcöbö fa döcäicunö, a wadoli mladou showadalayoma.

³³Canawä a jamö cama ebä lä cuono wei bänö, bä möfe bolanö a wəfa Bada doblao tamaje. Abinaja bä cuma. —Bejedi lä, Yai Bada wa etä İjilubö dodijiwä —bä cuma.

³⁴Bä befi çai fa bucadubalunö, Jenesale tä ulifi jamö bä waloquema.

³⁵Öjöteli bänö Jesús a nö fa öjöbölöjenö, öjamö bä bluca lä bälöblai bä nijamö täbä şhömölemaje, bä jalili çöblaö cuaabeje.

³⁶Jesús camishi ecö casö ma cui, ecö jubädaö bufi fa doblaojenö, bä ą fe blacäjoma, bä nia fa jalonö. ıÖjö tawä? Ecö casö lä jubädano wejei bä lä cui, bä bluca jaloblou showaoma.

San Mateo 15

¹Öjö däjä, Jelusale jamö culanö, Jesús nijamö judio bada bä çöcablaleyoluma. ıÖjö tawä? Faliseo bä bada ma cui, Moisesi etä ą ja täbä lä damaö wejei bä ma cui, öjö bä bada fa çöcablaleyolunö, abinaja ebä cuma.

²—Judio bamacö nö badabö lä cuaano wei, bāma bä owābou nodiablalaö showaobä tä ma cule ma cui, ıwedi tabä afä wa bä lä nocamabole bä lä cui, inaja bei bä li cuaaimi dicowä? Bä imicö yälömu mlai ja, bei bä li iyaö dicoo —ebä cuma.

³Jesúsno cama bä wəlii nomöjöoma. —Cafä wamacö ma cui, ıwedi tabä nö badabö tä ą ja wamacö bufi mö şhino blucao fa dicoonö, Yai Bada tänö tä nabä yai lä şhömaö wei wama tä taimi?

⁴Yai Bada wama tä ą juaö malä mlai. ıÖjö tawä? Jaba däjä, abinaja Yai Bada tänö bä nowa tama. Faafä a ma cui, naafä a ma cui, dodijidawä wama bä çai fa cuonö, wama

bä a nia juaö. 'Einaja bä nowa tama. Abinaja çai. Bä föö e nija a wä wäliwä faö ja, a shämobä öjö a waiquiwä. Bä nöö e ma cui nija a wä çai wäliwä faö dicoo ja, inaja showawä. '¿Öjö tawä? Einaja bä nowa tama —Jesús a cuma—.

⁵Öjö ma cui, judio wamacö bada lä cui, abinaja çafä wamacö li cuu. “Ma. Faafä, naafä, wama bä bayeliblabä bä ma cule, wama täbä lä table, Yai Bada nija wama täbä afa yaia wäyäö ja, faafä nija täbä nö jöbämobimi lä waiquii täbä”, wamacö cuu dicoo.

⁶¿Öjö tawä? Yai Bada tä a juamobä tä a waiquiwä ma cui, wamacö nö badabö lä cuaano wei tä ja, wamacö bufi mö shino blucäo fa dicoonö, öjö wama tä a li läablalaö, Yai Bada tä a juaö mlaobeje.

⁷Yai Bada a wäno wäyälwä Isaia a lä cuinö, çafä wamacö afa wäyäö balöo ja, a bejedimoma —a cuma—. Jole jole wamacö dodijaö buo. Isaia etä a oni jamö, abinaja tä a cuu.

⁸Fei bä lä cuinö, bei bä çaficönö wale nofi doablaö ma buo wejei ma cui, çamiyä nija bei bä bufi yai cuami.

⁹Çamiyä wale afa Bada doblao ma taö wejei ma cui, bä jolemou dicoo ja, bä a nö bleo bädao. Iba tä a jowa ma wäyäö wejei ma cui, öjö iba tä ami. Cama yanowamö täbä a li bädawä. 'Einaja tä a cuu —Jesús a cuma.

¹⁰Öjö däjä, Jesúsnö täbä fa nacaalalönö, abinaja bä nowa tama. —Bei. Wamale a da jiliyo. Bä bufi da jaducuicu.

¹¹Täbä lä waö wejei täbänö, täbä bufi shamiblou daomi. ¿Öjö tawä? Täbä lä cublai täbänö mlai, bei täbä çaficö jamö tä a wäliwä lä wawäblou wei tänö, öjö tänö täbä bufi yai shamiblamou —bä nowa tama.

¹²Öjö däjä, Jesúsnö bä lä nocamabono wei bä lä cui, abinaja bä cuyoluma. —Wa tä a lä wäyäblei tä a ja, faliseo wa bä bufi bada jushudamalema. ¿Wa tä daö cule? —bä cuma.

¹³Abinaja Jesús a cuu nomöjöoma. —Fayä a lä culadinö fibä döano lä mlai, fibä nia bluca uçäblamou majöo.

¹⁴Öjö bä bada lä cui, bä a faö buo. Täbä lulubobeje, öjö bä waiquiwä ma cui bä jubäbö. ¿Öjö tawä? Jubäbö a lä cui, ai a jubäbö mö feduwänö a lulubou dicoo ja, täca täca aca jamö çäcöbö nia queo bolacäo showadao —a cuma.

¹⁵Öjö däjä, abinaja Pedro e cuma. —Nii wa bä afa wayoaö lä yacläofe, ¿wedinaja bei wa cuu da cufanö? —e cuma.

¹⁶Abinaja Jesús a cuu nomöjöoma. —Uo. Çafä wamacö ma cui, ¿wamacö bufi çai jaducuwämi tawä?

¹⁷Bei wamacö bufi jamö bä nii didio malä mlai, wamacö bufi shamiamabä. Bei wamacö busi jamö bä nii li didio fa balöonö, bä li faoblou çöo malä cui.

- 18Bei täbä bufi jamö tä wəḷidiwä lä didile tä lä cui, bei täbä caficö jamö öjö tä ʔ yai wəḷidiwä wawəblou. Öjö lä tänö täbä bufi yai shamiblou.
- 19Bei täbä bufi jamö tä wəḷidiwä didia yalo, wəḷidiwä tä jamö bä bufi shino dayäo. Öjö dǎjä, täbä yanowamö shäöje. Bä joleblalou. Bä nofi beshili jushuaö. Shomi täbä madofi çai lämaöje. Täbä ʔfa jole jole çai wäyäöje. Täbä ʔfa çai wayoaöje.
- 20Öjö tä wəḷidiwä bluca lä cui, yanowamö täbä bufi jamö tä fa didionö, tä wawəblou. Öjö tänö täbä bufi yai shamiblou, imicö shaminö täbä lä iyaö wei tänö mlai —a cuma.
- 21Öjamö a jocäa fa çolunö, Diloteli bä lä bälöle jamö a alayoma, Sidonoteli bä bälöa mö lä fedule jamö.
- 22Öjamö lä, Canaanateliyoma a suwä lä bälöono wei a fa waloicunö, Jesús nija a wə ʔcali fama. —ʔBada tä! ʔDavid nodiwä wa lä cui! Wale nofi da ojodadalö. Fecula anö täyä a nö bleamaö dodijia lä cule —e cuma.
- 23Öjö ma cui, Jesús a wə juonomi. ʔÖjö tawä? A wə juono ma mlai ma cui, a wə suwä faö fe yadiblou showawä ja, Jesús nijamö bä lä nocaono wei bä ʔ fayoluma. Bä ʔ fe blacäjou ja, abinaja bä cuma. —ʔEi shomiteliyoma a suwä shömöa da çölö! ʔA wə waidaloimi! —bä cuma.
- 24Öjö dǎjä, abinaja suwä nija Jesús e cuma. —Isaeli ebä nodiwä nija Yai Bada tänö wale yai shömölema, cama oweja ebä nö yamili lä beblalole bä lä cui bä nija. Cafä shomi wamacö nija mlai —e cuma.
- 25Öjö ma cui, Canaanateliyoma a suwä fa ajedeblaliyolunö, a möfe bolanö abinaja e cuma. —ʔBada tä! ʔWale da bayeliblalö!
- 26A wə juo ja, a wə faö yacläablaloma. Shomiteliyoma a cuoma cudeenö, abinaja Jesús a cuma. —ʔJilu bä nia lä iyaö wei bä nii lä cui, jïima bä nija bä jöböamou bashiblaou ja, tä dodijidawämi —a cuma.
- 27Öjö ma cui, a nia bayeliblamou fe fa yadionö, abinaja a suwä cuu nomöjööma. —Awei, Bada tä. Wa bejedimou. Öjö ma cui, bä shöo ebä iyabä jamö, täbä läçashi lä bläläo wei täbä ja, jïima bä ma cui bä çai malä iyaö wei —a suwä cuma.
- 28Öjö dǎjä, abinaja Jesús e cuma. —ʔJo. ʔBejedi lä wale nofi yai mölabou! Öjö cudeenö, bǎfä bayeliblaö weicätä, wa lä cufenaja showawä —e cuma. Öjö dǎjä, lobe bä tää e jaloa showadalayoma.
- 29Jesús a aa fa çolufälönö, modu Calilea u casö jamö a juu cuaama. Jefu tä balöcö jamö a fa dolequebofälönö, a lobejelayoma.
- 30Cama nija bluca täbä waloa jebejelayoma. Bä juu lä wəḷidiono wei bä ma cui, ai bä lä wəḷidiono wei bä ma cui, bä lä jubäböono wei bä ma cui, bä aca lä boleböono wei bä ma cui, ai bä çai bluca ma cui, Jesús nija bä çai waloa fa jäbojolujenö, bä bluca jaloa showadamalalejelayoma.
- 31ʔÖjö tawä? Bä aca lä boleböono wei bä ʔ dodijidawä fablamalema. Bä lä wəḷidiono wei bä çai dodijidablalema. Bä junu lä mlai bä çai jublamalema. Bä lä jubäböono wei

bä mamocu çai dodijidablalema. Öjö bä bluca lä jalole bä fa dalalöjenö, täbä lä çoçamono wei täbä a fejelou fe balojooma. Yai Bada a nofi doablaö fe balojoomaje, Isaeli ebä nija a bufiblamobä a lä cui.

³²Bä lä çoçamono wei bä niibö cuo fa mlacunö, cama ebä lä nocamabono wei Jesúsno bä nacaajedelema. Abinaja bä nowa tama. —Ei bä lä çoçamole bä nija ya bufi wajaaö a lä cule. Camiyä nijamö bä lä çoçale, bolacabö tä mö didi tabou waiquijaje. Bä iyabä täbä çai cuami. Bä ofäö cudeenö ya bä shömaö moji, bä ofili wäcäcou dicoo mlaobä —bä nowa tama.

³³Bä lä nocamabono wei bä lä cui, abinaja bä cuma. —Ei tä ulifi bloque dodijiwä. ¿Wedi jamö täbä nii ja yama bä li iyamabä? Bä bluca fe balojowä —bä cuma.

³⁴Abinaja Jesús a cuma. —¿Wedinaja bä nii cudale, wama bä tabou culawä? —Nii7 yama bä tabou bädaa lä cule —bä cuma—. Yuli bolacadabö cäcö çai wai.

³⁵Öjö däjä, bä lä çoçamono wei bä lä cui, mashita a jamö bä loamaö bufima.

³⁶Nii 7 bä lä tabono wejei bä fa dälönö, yuli cäcö çai wai fa dälönö, Yai Bada nija, öjö bä ja a bufi afa doblalou wäyämoma. Öjö däjä, bä nii cäa fa nomöjölalönö, cama ebä lä nocamabono wei bä nija bä jöböquema. Öjö bä lä cuinö, täbä lä çoçamono wei täbä dobäö cuaaö nomöjöomaje.

³⁷Bä bluca fa iyaolalunö, bä bädöolaliyoma. Öjö däjä, cama ebä lä cuinö, nii bä sheje çoçablaö fa cuaajenö, wöo 7 bä jamö bä nii sheje fe lajomalalemaje.

³⁸Bä lä iyano wei bä walo lä cui, jai 4.000 bä cuoma, suwä bä çai, ijilu bä çai.

³⁹Öjö däjä, Jesúsno bä shömöa fa çoçabodunö, canawä a jamö cama ebä çai döcäcäo fa çoçalunö, Macadana tä ulifi jamö bä befi çai caläa nomöjölayofälöma.

San Mateo 16

¹Öjö däjä, faliseo bä bada ma cui, saduseo bä çai bada ma cui, Jesús nija bä walooquema. A wä nia bejedi fa wabajenö, abinaja bä cuma. —Yai Bada wa e nö öjöböamobä, tä nö lä quilijii tä da wawämalö —bä cuma.

²Öjö bä nija abinaja Jesús e cuma. —Motoca a queofälöö däjä, judu wama mösö fa mönö, abinaja wamacö cuu. “Fena ja, motoca shi nia cuo, mösö malä wacämole”, wamacö cuu.

³Fena däjä ma cui, abinaja wamacö çai cudou. “Maa a nö quelayobö, mösö malä fläle wei”, wamacö çai cuu. ¿Öjö tawä? Judu mösö ja, wamacö moyawä ma waiquii, camiyä fei däjä ya lä cuaale tä ja, wamacö bufi jaducuwämi dicowä.

⁴Wamacö fei däjä lä bälöblai, wamacö bluca dobroimi fe balojowä —a cuma—. Yai Bada wama a wä juaimi dodijiwä. Yai Bada ya e nö öjöböamobä, tä nö lä quilijii wama tä wawämaö bufi ma doblao wei ma cui, bamacö a nia juaimi. Wama tä nia lä möö wei, Jonasi a lä taamano weinaja, inaja tä cuwä wama tä nia shino dablaö — Jesús a cuma. Öjö däjä, bä fa dacöfälönö, a alayoma.

⁵Jesúsnö bã lä nocamabono wei bã fa bucadubalunö, nii bã ja bã bufi möblaliyoma, bã nofi mojuduquemaje yalo.

⁶Öjö dájä, bã moyawämabobä, Jesúsnö nii julumamodima tä ʼafa wäyö yaclämoma. Abinaja bã nowa tama. —Bã da moyaweicu. Faliseo bã bada lä cui etä julumamodima wayu. Saduseo bã bada ma cui, inaja showawä cama etä çai wayu cuwä mö feduwä — bã nowa tama.

⁷Jesús a wä ja bã bufi wedinajamolanö, abinaja bã nowa tayoma. —Nii bãma bã çai juu fa mlacunö, nii bã lä juluu wei tä ʼafa taö —bã nowa tayoma.

⁸Bã bufi lä cuno wei tä daö waiquioma yalo, abinaja Jesús a cuma. —¿Wedi tabä “Nii bãma bã tabou lä mlai tä ʼafa li wayoaö”, wamacö nowa li tayou dicoblaa cule? ¿Wamale nofi mölaboimi showawä tawä?

⁹¿Bei wamacö bufi çai möbloimi showawä? Ya bã da iyamablei, ¿wama tä nofi çai jaducuboimi? Nii 5 ya bã da cleyablei dájä, 5.000 ya bã iyamalema. Nii bluca wama bã sheje çablaö cuaama.

¹⁰¿Öjö tawä? —a cuma—. Nii 7 ya bã da cleyablei dájä, 4.000 ya bã çai iyamalema. Öjamö lä nii wama bã sheje bluca çai çablaö da cuaablei, ¿bei wama tä nofi çai jaducuboimi?

¹¹Nii bã ja ya bufi jölijobä ya malä mlai. ¿Wedi tabä “Nii bei bã ʼafa wayoaö”, wamale nofi tabou dicoa cule? Faliseo bã bada lä cui, öjö etä julumamodima wayu cudeenö ya wä. Saduseo bã bada ma cui, inaja showawä cama etä çai wayu cuwä mö feduwä —a cuma.

¹²Öjö dájä, bã bufi yai jaducublaliyoma. Nii julumamodima bã ʼafa yai tanomi. Faliseo bã bada lä cui, öjö bã ʼafa shino yai wayoama, saduseo bã çai bada. Öjö bã ʼa wayu cudeenö, bã moyawämabou bufima.

¹³Jesúsnö bã lä nocamabono wei, Filibo jamö bã çai aa nomöjölaiyoma, Sesaleateli bã shabonobö lä cublai jamö. Öja bã çai wawäblolanö bã wälma. —Camiyä ya lä yanowamöblaleyoluno wei ya lä cui, ¿wedinaja bei wale nofi yai li tabou dodijiaje? ¿Camiyä wedi bei ya jowa? —a cuma.

¹⁴Abinaja bã cuma. —Fe ojomalewä Juan bei wa jowa fa talei. Ai bã mö feduwänö, Yai Bada a wano wäyälwä Elia a cuo lä balöono wei, öjö wa jowa bufidaö talajei. Ai bã mö feduwä lä cuinö, Jelemia wa bufiije. Ai bã ʼa showawä ja, Yai Bada a wano wäyälwä ai a demi jocädou fa çolonö, öjö bei wa jowa çodawä fa talei —bã cuma.

¹⁵—Öjö ma cui, cafä wamacö lä cuinö, ¿wedinaja bei wamale nofi li tabou dodijia cule?—a cuma.

¹⁶Pedro a wä juoma. —Yai Bada tänö a shömabä a lä yaileno wei, öjö cafä bei wa dodijiwä. Yai Bada a demi cua shi lä wälile, öjö bei wa Ijilubö —bei e cuma.

17 Abinaja Jesús e cuu nomöjööma. —Jonasi bä ijilubö Simón wa lä cui, ¡bejedi lä wa bufi doblalobä wa! Wale nö öjöböaö cadidiobä, yanowamö täbä a ja, wa bufi jaducublono malä mlai. Fayä a lä culadinö wa bufi yai jaducublamalema.

18 ¿Öjö tawä? Bäfä nowa taö a lä cule. Maa ma lojode lä culenaja wa cuwä yalo, Pedro bäfä afa jilabou. Jai maa bei wa ma. Maa ei ma lä cui jamö, iba ya bä fa çocablamalönö, yafi bä colo lojodomabou lä culajeinaja, iba ya bä nia lojodomabou cuo. Nomaö tä ma cui ja, bä nö nia walojaö fe yadio.

19 Yai Bada tänö cama ebä çai lä cuo wei yoca lä cui jamö, çafä bäfä nia lämabou. Çafänö wa yoca caloblabä, ya tä nia jöböaö, wa bä famabä. Äyamö, bita jamö wa bä wasöö ja, Yai Bada a lä culadinö tä tamaö nofi lä walıbole tä shino ja, wa bä nia wasöö. Wa tä tamaö lä bufio wei tä ma cui ja, inaja showawä —Jesús e cuma.

20 Öjö däjä, bä lä nocamabono wei, ıçali bä a wasöma, Yai Bada tänö a shömabä a lä yaileno wei a nö öjöböamaö showadao mlaobeje.

21 Öjö däjä, Jelusale jamö a nö nia lä bleaamano wejei tä a ja, Jesúsno bä lä nocamabono wei bä jaba yömölaö cuaama. Judio bada bä ma cuinö, nofi bäyäälewä bä blowäjawä ma cuinö, Moisesi etä a ja täbä lä damaö wejei bä ma cuinö, öjö bänö a nö nia jowa bleaamaö fe balojoomaje. A nia shämou cadidioma. Inaja a taamamobä, a cuo waiquioma. Öjö ma cui, bolacabö tä mö fa dödölönö, a demi nia jowa jocädou çoma.

22 Öjö däjä, Jesús a wä fa wämoicunö, Pedronö a çai fa casöblalunö a wä wasöma. — ¡Ma, Bada tä! Inaja Yai Bada nija wa taamamobä wa malä mlai —e cuma.

23 Öjö ma cui, Jesús a mö fa jadublalunö, Pedro nija a wä fama. — ¡Sadanası! ¡A da blajalö! —e cuma—. Wale yabäcaö dicoa lä cule. Yai Bada nija wa bufi taamamou fa mlacunö, yanowamö täbä bufi showadi lä cuu weinaja, wa bufi cuablalou malä dicole —e cuma.

24 Öjö däjä, bä lä nocamabono wei bä lä cui, abinaja Jesúsno bä nowa tama. —Camiyä nija bä nia lä nocaö wei bä lä cui, cama bä cuaaö bufi lä doblao wei tä ja, bä nia yai wasöö. Wale bufiije yalo, bä ma shäöje däjä bä nia ojode cuo fe yadio. Bä nia nocaö fe yadio.

25 Eja bä demi cudiobä wale nofi jole lä mojudoubou wejei bä lä cui, bä bälimi nia cuodayou malä mlai. Öjö ma cui, camiyä ya nowa ja bä shämou lä ojodao wei bä lä cui, öjö bä nia shino bälimi cuo ayao.

26 ¿Öjö tawä? Bita jamö bä madofi bluca lä cublai bä madofi ma däamou wei ma cui, bä nia yai lä bälimiblou wei tä joyamou dicoo ja, ¿wedi tänö bä yai nia li bayeliblamou majöo, öjö lä? Bä nia bälimi lä cuo wei, öjö lä bä madofi ja, tä nowa çamamou dao malä mlai.

27 Camiyä ya lä yanowamöblaleyoluno wei ya lä cuinö, Fayä tä shıjı jilajawä ja, iba ajele ya bä çai nia itou malä ço wei —a cuma—. Öjö däjä, walıdiwä tä lä tano wejei

bä nija ya tä nowa nia çamaö. Dodijidawä tä lä tano wejei bä ma cui nija, öjö ya tä nowa nia çai çamaö shalilio mö feduo.

²⁸Cafä wamacö nija ei ya wä lä cui, bejedi lä ya wä. Ai wamacö lä ublale, wamacö nomaö showaono mlai ja, camiyä ya lä yanowamöblaleyoluno wei wamale nia Bada itou dabraö—Jesús a cuma.

San Mateo 17

¹Öjö tä a wäyäo fa balöonö,

⁶tä mö didi fa cublalunö, Jesúsnö cama ai ebä nacalema. Pedro a nacalema, Santiago a çai, öjö bä fäashä Juan e çai. Bä fa nacalänö, jefu balöcö ösöwä jamö, öjö bä çai yami dolequebefälöma.

²Öjamö, bä mamö mötale däjä, Jesús a mömou shomiblaliyoma. Motoca shiji lä culenaja, wäyacu cublaliyoma. Camishi ecö ma cui, ecö shiji çai wacalamiblaliyoma.

³Öjö däjä, ai täcöbö fa bädalunö, Jesús sho bä a wayoma. Moisesi, Elia sho cäcöbö cuoma.

⁴Jesús nija abinaja Pedro a cuma. —Bada tä. Eja bamacö lä cule, tä dodijidawä waiquiwä. Yano 3 ya bä nia wai itamaö, ¿öjö tawä? Afä a, Moisesi e, Elia e, einaja ya bä nia wai yano tabläo, ¿öjö tawä? —a cuma.

⁵A wä faö showai ja, öljashi a bada au fa itolunö, bä jöyablalema. Öjö däjä, öljashi jamö culanö a wä bädaliyoma. —Ei Ijluyä a, ya lä nofimaö wei. Wale bufi lä doblamabou wei a. A wä da jililäje —a cuma.

⁶Bä lä nocamabono wei bä lä cuinö a wä fa jililäjenö, bä quilili fa dijoblaicunö, bä möfe quilili boblaquema. Bä quilia fe balojolaliyoma.

⁷Öjö ma cui, Jesús a fa ajedeicunö, bä jubama. Bä jubalanö abinaja bä nowa tama. —Bä ublao da çolalu —bä nowa tama—. Bä quili dijä.

⁸Öjö däjä, tä möö cuaaö fa çojenö, Jesús a yami ublaa daa çö majölälemaje, ai täcöbö cuonomi.

⁹Jefu a jamö bä dömöo fa çöimanö, Jesúsnö bä wasölefälöma. Abinaja a cuma. —Wama tä lä dalalöfe, wama tä afa wäyäo showadao mlai. Camiyä ya lä yanowamöblaleyoluno wei ya lä cui, ya demi jocädou showao mlao däjä, tä afa wäyäo balöo dijejä —a cuma.

¹⁰Öjö däjä, Jesúsnö bä lä nocamabono wei bä lä cui, abinaja cama nija bä cuma. —Moisesi tä a ja täbä lä damaö wejei bä lä cuinö, ¿wedi tabä Elia a wäfa li juu çö wäyäöje? Yai Bada tänö a shömabä a lä yaileno wei, a juu showao mlao däjä, ¿wedi tä tabä öjö bei a nia jöwa li juu balöblao? —bä cuma.

¹¹—Awei —Jesús a cuma—. Inaja tä a malä cuu wei. Tä bluca dodijidabraö çöbä, Elia a nia jöwa juu çö balöoma.

- 12**Öjö ma cui, abinaja ya cuu. Elia a nia jowa juu lä çono wei, a wawäblou waiquilayou cublei. A nö öjöböanomije. A taamaö bufi lä doblaono wejeinaja, a taamamaje. Inaja showawä, camiyä ya lä yanowamöblaleyoluno wei ya ma cui, wale nö nia çai bleaamaö cuo nomöjooje —bä nowa tama.
- 13**Öjö däjä, cama ebä lä nocamabono wei bä lä cui, Jesús a wä ja bä bufi yai jaducublaliyoma. Elia a wäfa lä jayumano wei a lä cui, Juan a wäfa yai li wayoama, bä fe lä ojomano wei a lä cui.
- 14**Täbä bluca çocamoä lä jälayono wei täbä nija, Jesúsino cama ai ebä çai waloo fa çobalöcölönö, ai a wälo lä cui, a dijoo mö baa showadaquema. A möfe deilanö abinaja e cuma.
- 15**—Bada tä. Ijiluyä a nofi da ojadadaliyo. A fa queoblonö, showadi caficö moshi boyacaoblou, nacö çai wäsönöoblou. Einaja a fa cuanö, a nö yai bleaaö dodijio. Cowa wacö ma cui jamö, mau u ma cui jamö, a shino queoblou cudeenö a nö bleaaö.
- 16**Wa bä lä nocamabou wei bä nija ya çai juma ma cui, a jalomaö doblonomije —e cuma.
- 17**Abinaja Jesús e cuma. —¡Uo! Äyämö ya nö dedeaö ma waiquile, Yai Bada wama tä nofi nö mölabobimi waiquiwä. Bejedi lä wamacö dobloimi. Wama tä nofi mölabou shalilibä bämacö nö dabou ja, ya modaaö waiquiwä. Bei. Bä ijilubö e da bälabayaöje —e cuma.
- 18**Öjö däjä, Jesúsno fecula e bälöo fa wasönö, e faa çä showadalayofälöma. Fiya a lä cui, a jaloa showadalayoma.
- 19**Öjö däjä, Jesús a yami cuo däjä, cama ebä lä nocamabono wei bä fa icuicunö, abinaja ebä cuma. —¿Wedinaja yamacö li cuaaö dicoo ja, yama e li yashuu doblonomi dicowä tawä? —bä cuma.
- 20**Abinaja Jesúsno bä nowa tama. —Yai Bada wama a nofi lä mölabole, jai wamacö ujudi wamacö cuaaö fa dicoonö, wamacö nö wäloblonomi. Cafä wamacö nija ei ya wä lä cui, bejedi lä ya wä. Yai Bada wama a nofi lä mölabole, wamacö bufi nö wiisibö wälojolanö wama a nofi bejedi mölajadaö bädao ja, cafä wamacö ma cui nija tä nia cublou. Nana shimono wai wiisibö ma cui, shifibä malä badaö wei. Öjö däjä, quiji lä jefu ma cui, Yai Bada wama a nofi yai mölabolanö wama a nowa taö ja, a nia majöblou. Inaja Yai Bada wama a nofi mölabou cuo ja, wamacö doblou mlaobä tä nia cuomi.
- 21**Öjö ma cui, ei bä fecula mö feduwä lä cui, bä yashublamou si ijejewämi talei. Wamacö iyaö wasöolanö, Yai Bada nija wamacö nö bayeli lä nacao wei tänö, ei bä shino yashublamou, öjö tä shinonö —bä nowa tama.
- 22**Calilea jamö Jesúsno bä çai yododaö däjä, abinaja bä nowa tama. —Ya lä yanowamöblaleyoluno wei ya lä cui, yanowamö täbä nija ya nia jöböamou.

²³Wale ma shälei wejei ma cui, bolacabö tä mö didi fa cublalunö, demi ya nia jocädou ço —bä nowa tama. Einaja a lä cuu wei a wə fa jililäjenö, ebä bufi nö bleaaö dodijioma.

²⁴Cabenaö jamö Jesúsno cama ebä çai fa waloicunö, Yai Bada etä yafi dodijidabobeje bä blada lä nacaö wejei bä lä cuinö, Pedro a wəliyolumaje. —Yai Bada bäma etä yafi dodijidabobä, çafä nija tä ʔ lä wäyää wei a lä cuinö, ʔblada a çai jöböquei daanö?

²⁵—Jö —Pedro a cuma—. Bä çai jöböaö talei. Yafi jamö a waloo ço dajā, Pedro a wə faö showaa mlai dajā, Jesúsno cama a wəlii mö baoma. —Simón, ʔwedinaja bei wa bufi cuu? Bada bä yai bälöo lä dodijii bä lä cublai bänö, ʔwedi jamö täbä nija blada bä li nacaöje? ʔCama ebä nija bä li nacaö sijewä? Ma, ʔshomi täbä nija daanö? —a cuma.

²⁶—Shomi täbä nija —Pedro a fa cunö, abinaja Jesús e cuu nomöjöoma. —Bejedi lä wa wə. Cama ebä nija bä blada nacaimije.

²⁷ʔÖjö tawä? Camiyä bämacö nija bä blada nacabeje bämacö ma mlai ma cui, bä jushuo mlaobä, blada bäma bä nia jöböaö fe yadio. 'Modu u jamö, ufeya a da çabalöcölö, öjö lä —a cuma—. Yuli wa jaba lä yocäblale, wa çaficö fa caloblalönö, blada wa nia didia dablaö. Blada bä lä nacaö wejei bä nija, öjö a blada da jöböbadu. Çafä nija a nia blada lä nacaö wejei a ma cui, camiyä nija a nia nacaö mö lä feduo wejei a ma cui, öjö moli a ma cui ja, bäfäcö nowa nia cuo —Jesús a cuma.

San Mateo 18

¹Öjö lä dajā showawä, cama ebä lä nocamabono wei bänö, Jesús a wəlimaje. Abinaja bä cuma. —Yai Badanö cama ebä çai nia lä cuo wei ebä nija, ʔwedi bei a nia yai bada cuo?

²Inaja bä cuu ja, ijilu a fa nacalänö, cama bä nijamö a fa möamoblamalönö, abinaja bä nowa tama.

³—Çafä wamacö nija ei ya wə lä cui, bejedi lä ya wə. Ijilu bä ʔ juo si ijejeoblou lä culenaja wamacö cubloimi ja, Yai Bada tänö cama ebä çai nia lä cuo wei jamö, wamacö nia cuomi waiquiwä.

⁴Ei a wai ijilu jömöo lä mlainaja a lä cuaaö wei a lä cui, Yai Bada tänö cama ebä çai lä cuo wei dajā, öjö a nia shino yai bada cuo.

⁵'Ei a lä culenaja a wai ijilu lä cui, a shomi ma cui, camiyä ya wənö a wai nofimaö fe yadioje ja, camiyä ma cui wale nofimaö mö feduoje —a cuma—.

⁶Öjö ma cui, camiya wale bejedi lä bufi wejei bä wai lä cui, wəlidiwä tä jamö öjö iba ai a wai luluaö lä dicoo wei tä wayu. Yanowamö a ja, bei olafi jamö maa ma bada fa jalemacöjenö, modu u jamö a befi çai fa queamajenö, a mishi duamaöje ja, öjö a nö bleaaö ma cuquei wei ma cui, iba ai a wai lä wəlidiamale a lä cui, öjö bei a nö shino yai bleaaö cuquei —Jesús a cuma.

⁷Abinaja Jesús a cuma. —Wəḷidiwä tä jamö täbä yabäcamobä, showadi tä cublawä yalo, bita jamö bä yanowamö lä bälöblai bä nö bleaaö lä cudi. Tä cua ma cule, täbä yai lä yabäcaö wejei bä lä cui, täbä wəḷidiblamaöje yalo, öjö bä nö nia shino yai bleaaö dodijio.

⁸Abinaja çai —a cuma—. Bei wa imicönö wa wəḷiamou dicoo ja, wa imicö fa bäblamolunö, imicö da joyamolu. Wa imicö bäblamou ja, wa nö nia ma bleaaö wei ma cui, wa demi nia lä cudio wei, öjö bei tä shino yai dodijidawä. Shobali wacö jamö wa imicö demi befi çai shäyäblamou ja, wacö lublou dao lä mlai jamö, öjö däjä wa nö shino yai bleaaö cuquei. 'Bei wa mamicö ma cui, inaja showawä —a cuma—. Bei wa mamicönö wa wəḷiamou dicoo ja, wa mamicö fa bäblamolunö, mamicö da joyamolu. Wa mamicö bäblamou ja, wa nö nia ma bleaaö wei ma cui, shobali wacö jamö wa mamicö demi befi çai shäyäblamou dicoo ja, öjö däjä wa nö shino yai bleaaö cuquei.

⁹Bei wa mamonö wa wəḷiamou dicoo ja, wa mamö fa ucäblamolunö, mamö da joyamolu —a cuma—. Wa mamö ma ucäblamolayou wei ma cui, Yai Bada tänö cama ebä çai cuobä jamö, wa waloo fe lä yadio wei, öjö bei tä shino yai dodijidawä. Shobali wacö jamö, wa mamocu demi befi çai shäyäblamou dicoo ja, öjö däjä wa nö shino yai bleaaö cuquei.

¹⁰⁻¹¹Abinaja Jesús a cuma. —Ei iba ai a wai lä cui, a nofi wəḷibo dijejä. Bamacö nowa taö lä cule. Öjö bä nija Yai Bada tänö ajele ebä malä lämabole. Öjö bä ajele lä cui bä a nö wäobä, Fayä a lä culadi nija bä malä ajedeladi.

¹²'¿Wedinaja wamacö bufi yai cuu dodijio? —a cuma—. Ai a lä cuinö, yalo 100 bä oweja tabou ja, moli e mojolua dicolayou ja, a nia dayäaö, ¿öjö tawä? Jefu tä balöcö jamö, 99 bä lä jäle bä fa dacödunö, moli e lä mojolulayono wei a nia dayäo cuaaö.

¹³A daa çolalei ja, a bufi nia doblalou ço. '¿Öjö tawä? —a cuma—. Cafä wamacö nija ei ya wə lä cui, bejedi lä ya wə. Bä mojoluu lä mlaono wei bä 99 lä cui nija a bufi doblao çai ma cuo wei ma cui, a lä mojolulayono wei a lä cui nija a bufi nia shino yai doblalou fe baloo, a daa ço fe yadilalema cudeenö.

¹⁴Inaja showawä, yanowamö täbänö ei bä nofi wai tabou ma mlajei ma cui, Fayä a lä culadinö bä nofi li yai tabou. Moli a ma cui, a mojolumaö bufiomi waiquiwä —a cuma.

¹⁵Abinaja Jesús a cuma. —Aifä anö wa yabäcaö ja, cama nija wa fa junö, yami wafäcö culanö, a doblou lä mlaono wei wa etä a nia wäaö. Wa wə jiliaö ja, dodijidawä wafäcö nofi nia tamayou ço.

¹⁶Öjö ma cui, wa wə jiliaö bufiomi waiquiwä ja, aifä wa nia nacaö. Bolacabö ma cui, wa cöbö nacaö dao. Öjö wa cöbö çai fa junö, wa wasöo lä çole däjä, öjö cäcöbö lä cuinö wa wə nia bayeliblebö, Moisesi tä a lä cuu weinaja showawä. ¿Öjö tawä? Bä dobloimi jömamou ja, moli a wəno bä nia jömamou malä mlai. Bolacabö cäcöbö a ma cuinö, 3 bä a ma cuinö, bä a faö fe lä usucui bä anö bä nia shino yai jömamou.

¹⁷Öjö ma cui, öjö bä a çai jiliaö bufiomi showawä ja, iba bä lä yododaö wei bä bluca nija a wəfa da wäcö —a cuma—. Iba bä lä cuinö a ma wasöo wejei ma cui, bä a jiliaö

bufiomi showawä dicowä ja, Yai Bada a daö lä mlajei, wa bä nofi nö lä tabobö weinaja, wa nofi nia çai tabou, Lomateli bada bä befi, bä blada lä doaö wejei, wa bä nofi nö lä tabobö weinaja showawä.

18' Cafä wamacö nija ei ya wä lä cui, bejedi lä ya wä —a cuma—. Äyämö, bita jamö culanö wa bä wasöö ja, Yai Bada a lä culadinö tä tamaö nofi lä wälibole tä shino ja, wa bä nia wasöö. Wa tä tamaö lä bufio wei tä ma cui ja, inaja showawä.

19' Bamacö nowa taö çoa lä cule —a cuma—. Bolacabö ai wafäcö bädawä lä cui, wafäcö bufi shalililanö Yai Bada nija wafäcö nacou ja, wafä tä tamaö lä bufii wei tä lä cui, Fayä a lä culadinö tä taö wä.

20 Camiyä ya wä ja, bolacadabö wamacö lä yododaö wei jamö, öjamö lä camiyänö bamacö nia çai cuo. Bolacabö wafäcö bädawä ma cui, inaja showawä —Jesús a cuma.

21 Öjö däjä, Jesús nija Pedro a icua fa ajedeicunö, abinaja e cuma. —Bada tä. Iba ai anö, showadi wale yabäcadii dicoo ja, ¿wedinaja ya yai li cuaabä? ¿Wedinaja tä cudale, ya etä mladamaö cuobä? 7 wale yabäcaö cua ma waiquile ma cui, ¿ya etä nowa mladamaö fe yadiobä tawä? —Pedro e cuma.

22 Abinaja Jesús e cuu nomöjöoma. —Aifä anö 7 wa yabäcaö ma cule, wa etä nowa nia mladamaö. Aifä nija tä nowa lä cule, wa etä nia wabaimi.

23 Öjö cudeenö, Yai Bada tänö cama ebä çai lä cuo wei tä lä cui, abinaja tä yai cuwä. A bälöo lä dodijio wei a bada cuoma. A nosie lä juamou wei bä nija bä nowa blada taboma. ¿Öjö tawä? Bä nowa lä table bä blada çamaö çobeje, bä naca çamalalema.

24' ¿Öjö tawä? —a cuma—. Öjö bä wälii showao däjä, a nosie juamobä ai a lä cui, a çai waloqueyolumaje. Öjö a lä cui nija blada 10.000 tä nowa bada cuoma.

25 Tä nowa cuoma ma cui, blada bä nia lä çamaö wei bei etä cuonomi dicowä. Tä nowa nö çamabimi yalo, shomi täbä nija bada anö a jöböamaö bufima. Cama a ma cui, bä suwäbö e ma cui, bä ijilubö ebä ma cui, täbä bluca lä tabono wei täbä ma cui, blada bä ja bada anö bä nia bluca nomöjöamama, tä nowa çamamou fe yadiobä.

26' Inaja a nia taamama yalo, a nosie juamobä a lä cui, bada nija a quilili fa dijoblaiacunö, a möfe boblaquema, a nofi nia ojode fa tablamonö. Abinaja a cuma. “Bada tä. A shi jalimou dicoo dijä. Ya tä nowa bluca çamaö weicätä”, a cuma.

27 Einaja e cuma yalo, bada a lä cuinö a nofi ojodaboma. A fa jujeblamalönö, etä nowa jödödöwä lä cuono wei etä mladamaö showadalayoma.

28' ¿Öjö tawä? —Jesús a cuma—. Öjö ma cui, bada a nosie juamobä öjö a showawä lä cui, abinaja cama a cuaaö dicooma. Sibö jamö a faö çoa däjä, bada a nosie juamobä ai a mö feduwä lä cui, a dalalema. Öjö nija bä nowa blada taboma. Bluca mlai, 100 bä nowa wai blada tabou bädaoma. Öjö ma cui, bä blada çamaö showao fe yadiobä, bei olami ja imicö waliblaa showadaquema. “¿Iba blada 100 bä da çomaba!”, a nowa tadalema.

²⁹Inaja a nowa tama yalo, bada a nosie juamobä a mö feduwä lä cui, a nofi nia ojode fa tablamonö, a quilili fa dijolaicunö, a möfe boblaquema. A wä fe blacäjolanö abinaja e cuma. “A shi jalimou dicoo dijä. Ya bä çamaö wä”, e cuma.

³⁰Einaja a ma cuno wei ma cui, a nofi ojodabou mlai ja, a fe shino yai laa dicomaquema. Bä blada çamaö showao mlao däjä, a nia famaö çonomi.

³¹¿Öjö tawä? —Jesús a cuma—. Bada a nosie juamobä bä mö feduwä lä cuinö, öjö tä fa dalalöjenö bä bufi bluca wälidiblaliyoma. Öjö däjä, bada nijamö bä juu fa showadaonö, tä bluca lä cublaliyono wei tä a wäyää çojolomaje.

³²Bada anö cama bä a fa jililänö, a doblono lä mlai a naca çomalema. A waloo däjä, abinaja a nowa tama. “Wale nosie juabä cafä wa lä cui, wa yai dobloimi fe balojowä. Camiyä nija wa nofi ojode tablamobä wa wä lä fano wei däjä, afä ya tä nowa bluca mladamalema.

³³¿Öjö tawä? Cafä bäfä nofi ojodadaö lä culayono weinaja, ¿wedi tabä inaja showawä aifä wa nofi ojode tablanomi dicowä?”, a nowa tama.

³⁴Bada a fa jushudalunö, a fe laa showadamaquema. Tä nowa bluca çamaö showao mlao däjä, a nia famaö çodaanomi.

³⁵¿Öjö tawä? —Jesús a cuma—. Einaja showawä, bei wamacö bufi cadidiwänö aifä wama etä nowa mladamaö cuomi dicowä ja, Fayä a lä culadinö afä tä nowa nia çai mladamaö ayaomi.

San Mateo 19

¹Öjö tä a ja Jesúsnö täbä yömölaö fa waiconö, Calilea tä ulifi fa dacöfälönö, Judea jamö a aa majölayoma, Jodana u mashi bucadu jamö.

²Jesús nija täbä bluca yauoma. Öjamö lä jalili bä çai lä yauono wejei, bä bluca jalomalalema.

³Öjö däjä, Jesús nija faliseo bä bada fa icuicunö, a wälimaje. A wä bejedi nia fa wabajenö, abinaja bä cuma. —Täbä suwäbö joyao bädao mlaobä, ¿tä a läa tawä? —bä cuma.

⁴Abinaja Jesús a cuma. —¿Moisesi bei wama etä a oni daö mlaa cule? Yanowamö täbä lä tablaleno wei a lä cuinö täbä jaba lä tablaleno wei däjä, wälo a, suwä a, cäcöbö tablalema.

⁵Abinaja a çai cuu showaoma. Öjö cudeenö, täbä doayou däjä, täbä shelelou nodiablalou showawä. Bä föö nijamö, bä nöö nijamö bä jaba ma cublamou wei ma cui, bei suwäbö bä nia fa ajedemabojenö, bä sheleleblou majöö,moli bä cublou majööbä. 'Einaja a cuu showaoma —Jesús a cuma—.

⁶¿Öjö tawä? Yai Bada tänö moli cäcöbö tablamaö waiquilayoma ja lä, yanowamö täbänö cäcöbö sheleleblamaö majööbeje, etä cuami waiquiwä —Jesús a cuma.

⁷Judio bä bada lä cui, abinaja bä cuu nomöjööma. —Jao. Bä suwäbö bä joyabeje etä cuami waiquiwä ja lä, ¿wedi tä tabä Moisesinö bä joyaö li wasönomi, öjö lä? Bä suwäbö bä joyaö cadidiobeje, tä a oniblamaö malä bufino wei. Bä feyalobö bänö tä a oni fa tablajenö, bä suwäbö bä nija tä a oni nia jöböamaje, etä a çai oni shömamou çobä —bä cuma.

⁸Jesús abinaja a cuma. —Wamacö bufi jifuwä waiquioma yalo, Moisesinö öjö tä a li oniblalema. Öjö ma cui, Yai Bada tänö täbä jaba lä tablaleno wei däjä, inaja cama a bufi cunomi.

⁹Abinaja bämacö nowa taö lä cule. Ai a lä cuinö, bä suwäbö e nofi beshili jushuaö ma mlai ma cui bä suwäbö e fa joyalönö, ai a suwä dääö majöo ja, a dobroimi. “Iba ya dää majölei lä cufe”, cama a bufi cuu ma bale ma cui, inaja Yai Bada a bufi cuimi. Ma. “A lä joleblalou wei a”, Yai Badanö a nofi li tabou —a cuma.

¹⁰Bä lä nocamabono wei bä lä cui, abinaja bä cuma. —Shädayai. Inaja lä tä cua ja lä, bä suwä doamou mlai ja bämacö cuo showadao fa cunoja, tä nö shino doblaobö wei —bä cuma.

¹¹Einaja bä cuma ma cui, abinaja Jesús a cuu nomöjööma. —Täbä nia shinoco lä cuo wei tä ja, ya wä fe blacäjoimi. Ai bä lä cui, bä shinoco cuo nö doblobimi waiquiwä. Öjö ma cui, ai bä mö feduwä lä cui, Yai Bada tänö inaja bä bufi li taamaö yalo, bä shinoco li cualiyou.

¹²¿Öjö tawä? —Jesús a cuma—. Walo ai bä lä cui, bä natecö oshe çai li wälidiwä cublou fa showadaonö, bä suwä li jubaö daomije. Ai bä mö feduwä lä cui, yanowamö täbänö bä natecö li fa joyajenö, bä li yanöcöwä cudio. Ai bä showawä lä cuinö, yabäcäa mlai ja Yai Bada etä a juaö bufi doblaöje yalo, suwä bä tabou bufiomije. ¿Öjö tawä? “Inaja lä ya yamili cuobä ya waiquiwä”, wamacö bufi cuu waiquiwä ja, ei ya wä lä cui wamale a jiliabä —a cuma.

¹³Ijilu bä wai oshe lä cui bä çai waloblaayolumaje, Jesús imicö maquelanö Yai Bada nija bä bayeliblamabä. Cama ebä lä nocamabono wei bä lä cuinö, öjö bä çai juu fa dalalöjenö, bä ma wasöno wejei ma cui,

¹⁴abinaja Jesúsno bä nowa tama. —Wamacö a läablalou dicoo mlai. Camiyä nija ijilu wama bä yai jumabä bä li. Ijilu bä a juo si ijejewä lä culenaja bä lä cui, Yai Bada tänö öjö bä çai cuobä bä malä cui —bä nowa tama.

¹⁵Öjö däjä, ijilu bä nija imicö maquedou fa cuaanö, bä bayeliblamaö bufima. Inaja bä bayeliblamaö fa bufinö, a aa nomöjölayoma.

¹⁶Ai däjä, Jesús nija a fiya fa icuicunö, a wälima. —Tä a wäyäle —a cuma—. ¿Wedinaja ya li dodijaö cuaaö fa dodijionö, ya li balimi cuobä?

¹⁷Abinaja Jesúsno a nowa tama. —Wa nia lä dodijaö wei, ¿wedi tabä camiyä nija bei wa tä li wälii? A yai lä dodijaö wei a lä cui, moli a shilo yai cuadayoa. Wa balimi cuo bufi doblaö ja lä, Yai Badanö tä tamaö lä bufii wei, tä a nofi bluca da cadidilä, öjö lä —a nowa tama.

18—Jao. ¿Wedi jamö tä a dodijiwä lä cui, bei ya tä a nofi yai li cadidilei, öjö lä? —e cuu nomöjöoma. Öjö däjä, Yai Bada etä a wawämaö ja, abinaja Jesúsno a nowa tama. Yanowamö wama täbä nia shäimi. Wamacö nia joleblaloimi. Wamacö nia tomömoimi. Ai wama täbä afa nia jole jole wäyäimi.

19Faafä a ma cui, naafä a ma cui, dodijidawä wama bä çai fa cuonö, wama bä a nia juaö. 'Einaja tä a cuu. Abinaja çai. Cafä wa nofi jolio lä culenaja, inaja showawä aifä wa bä nofi tabolanö wa bä nofimabä. 'Einaja tä a cuu —Jesúsno a nowa tama.

20Öjö a fiya lä cui, abinaja e cuu nomöjöoma. —Jao. Öjö lä ya täbä a bluca nofi cadidibou waiquia lä cule —a cuma—. ¿Wedi ya tä yai taö nomöjöobä?

21Jesúsno abinaja a nowa tama. —Dodijidawä wa yai cuobä, abinaja wa nia yai cuaaö. Wa täbä bluca lä tabole, blada bä ja wa täbä fa nomöjöacönö, öjö lä bä blada ja, täbä nö jolili lä bleaaö wei täbä da dobälälö. Inaja wa yai cuaaö ja, afä täbä nowa lä bluca wei wa täbä nia tabodayou. Öjö däjä, camiyä nija a nocaa da showadaiquiyo —a nowa tama.

22Fiya a lä cuinö, Jesús a wä fa jililänö, a bufi çai wajäwä çolayoma, madofi bä bluca tabou dodijioma cudeenö.

23Cama ebä lä nocamabou wei bä nija abinaja Jesús a cuu juoma. —Cafä wamacö nija ei ya wä lä cui, bejedi lä ya wä. Bä nö lä madofibö wei bä lä cui, Yai Bada tänö cama ebä çai cuobä jamö, öjö bä nia juu si ijejeomi.

24Mösöcö aca jamö cameyo bä lucäo si ijejewä malä mlai. Bä nö lucäbimi waiquiwä. ¿Öjö tawä? Bamacö nowa taö çoa lä cule. Mösöcö aca jamö cameyo bä lucäimi ma waiquii, bä nö lä madofibö wei bä lä cui, Yai Bada tänö cama ebä çai cuobä jamö öjö bei bä lucäimi yaiquei —a cuma.

25Jesús a wä fa jililäjenö, cama ebä lä nocamabono wei bä lä cui, bä bufi yai shädayaimou dodijioma. Abinaja bä cudaliyoma. —Jao. Yai Bada nija öjö lä bä nö cuobimi waiquiwä ja, ¿wedi jamö bä lä cui, bei bä nia shino yai jucäamou, öjö lä? —bä cudaliyoma.

26Jesúsno bä möö cuaalanö, abinaja bä nowa tama. —Ma. Cama yanowamö täbä jucäamou buobä, tä cuami waiquiwä. Öjö ma cui, Yai Bada tänö jödödöwä tä tamabä, öjö a —a cuma.

27Öjö däjä, abinaja Pedro a cudaliyoma. —Öjö ma cui, camiyä yamacö lä cuinö, yama täbä bluca lä tabono wei yama täbä fa daacönö, cafä nija yamacö nocaa lä cule. ¿Öjö tawä? ¿Wedi täbä ja, yamacö yai nia li dobämamou nomöjöo? —a cuma.

28Jesúsno abinaja bä nowa tama. —Cafä wamacö nija ei ya wä lä cui, bejedi lä ya wä. Bita dude a tablamou çoa däjä, camiyä ya lä yanowamöblaleyoluno wei ya lä cui, ya döcäobä täcö lä doblale jamö, camiyä ya nia döcäo. Öjamö lä ya döcäo däjä, camiyä nija wamacö lä nocaono wei wamacö lä cui, afä 12 täbä ja, wamacö nia döcäcou yädäo mö feduo. Öjamö lä wamacö döcäcälanö, Isaeli bä ijilubö 12 ebä nodiwä lä yaiablalou wei bä nija wamacö nia bada läo.

²⁹Camiyä nija wamacö bufi mö blucao yalo afä wama täbä daaö ja, wamacö nö bleaaö mlaicätä —a cuma—. Wamacö yafibö ma daamamou wei ma cui, wamacö mashi ma damoquei wei ma cui, faafä, naafä wama bä bluca ma daquei wei ma cui, ijilufä wama bä ma daaö wei ma cui, wamacö ulifibö ma daamamole ma cui, öjö lä täbä bluca showawä ja, wamacö nia dobämamou mö yabao ço. Afä wama täbä daa lä tacöfenaja bädawä mlai, bluca täbä ja wamacö nia yai dobämamou fe biyäjäo majöo. Wamacö nia çai balimiblamaö.

³⁰Öjö ma cui, “Camiyä balöwä”, täbä nofi lä tamamou wei bä bluca mö feduwä lä cui, öjö lä bä nia nojablou —a cuma—. Inaja showawä, äyämö bä nojablou si lä ijejei bä lä cui, öjö lä bä nia shino balöblou nomöjödoyou.

San Mateo 20

¹Jesúsnö ei tä çai wäyäo yaclämoma. —Yai Bada tänö cama ebä çai lä cuo wei tä lä cui, abinaja tä çai cuwä. Ficali etäca jamö bä shömabä, bada anö bä dayäaö cuaaö fenaoma.

²Bä ç wayou balöo ja, blada a nia lä dääö wejei tä ja, bä bufi bluca shaliblou balölayoma. Öjö däjä, cama etäca jamö bä shömöa showadalema.

³Motoca a ösöblojolayou däjä, bada a aa fa çolufälönö, nii bä showadi lä lulublaaö wejei jamö, ai bä ublao lä bädano wei bä dalalema.

⁴Öjö bä lä cui, abinaja bä nowa tama. “Iba täca jamö, bä juu da juofälö. Dodijidawä bamacö nowa çamaö wä”, bä nowa tama. Öjö a wä fa jililäjenö, bä aa showadalayoma.

⁵Motoca a yololoblou däjä ma cui, a itou ma yajadodoafälöö däjä ma cui, inaja showawä a cuaaö çoma —Jesús a cuma—.

⁶Tä mö weyaö ma waiquio däjä ma cui, a juu fa çonö, ai bä ublaa daa çolalema. Abinaja bä nowa tama. “¿Wedi tä tabä, eja bei wamacö li juaadii buo?”, bä nowa tama.

⁷Abinaja bä cuma. “Yamalecö nosiemaö dicoo fa mlacujenö, eja yamacö li cua bädäa lä cule”, bä cuma. Öjö däjä, abinaja bada a cuma. “Jäo. Iba täca jamö bä juu da juofälö”, a cuma.

⁸Tä mö dödöjöblou däjä, abinaja bada e cuma, cama a lä lämabono wei a lä cui nija. “Bei. Bä lä ojodamole bä da nacadu, wa bä nowa çamabä. Jödödö ya bä lä shömölöi bä lä cui, öjö bä nowa çamaö da balöo. Öjö däjä, motoca a itou yajadodoafälöö däjä ya bä lä shömölöi bä lä cui, öjö bä nowa çoa da nomöjömacö. Inaja wa bä nowa çamaö fa cuaimadunö, fena däjä ya bä shömöa lä bälölöi bä lä cui, öjö bä nowa çai çoa da nomöjömacö”, e cuma.

⁹¿Öjö tawä? —Jesús a cuma—. Jödödö bä lä shömöleno wei bä ajedebalamaö fa balölonö, täbä lä balölayono wei täbä nija a wäfa blada wayoaö lä fenaono wei a ja, bä dobälalema.

10' Jaba bä shömöa lä balöleno wei bä ma cui, yaçumö bä nacaajede nomöjölema. Abinaja öjö bä bufi cublaloma. “Bä weyade lä queono wei bä lä cui bä nija, blada a wafa wäyää lä fenaoblei a ja bä dobämamou waiquiwä yalo, camiyä yamacö queo lä fenablaqueno wei yamacö lä cui nija, blada ai bä yädäamaö ço weicätä”, bä bufi cublaloma. Inaja bä bufi cublalou ma buono wei ma cui, inaja showawä bä blada fe usucuwä jöböaquema.

11' ¿Öjö tawä? —Jesús a cuma—. Öjö a blada dääöje dāja, bada a nija bä nacömoma.

12 Abinaja bä cuma. “Fei bä lä cui, bä li weyade waloquema ma cui, ¿yamalecö dobäa fe li usucua dicolei tawä? Motoca ma yoblaodāja ma cui, yamacö ojodamou nö lä bleaano wei, ¿tä nowa yai cuami tawä?”, bä cuma ma cui,

13 abinaja bada a cuu nomöjöoma, ai a nija. “Ma, Nofi. Bäfä mölamaö malä mlaofe. Blada wa lä dälöfe, öjö wa nowa nia ojode malä tano wei. ‘Öjö waiquiwä’, ¿wa cunomi daanö?”

14 Afä ya wafa blada wäyää lä fenaoblei wa fa dälönö, a çai da çojamö. Cafä bäfä dobäa lä talöfenaja, inaja showawä, fei bä weyade waloa lä jäqueno wei bä ma cui ya bä dobäo cuo mö feduobä, ya bufi shalilia lä cule.

15 Iba ya bä sheleleblamaö cuo bufi lä doblaoweinaja, ya bä sheleleblamaö cuobä, ¿öjö yami daanö? ¿Öjö tawä? Camiyä inaja ya shi öjöde cuwä ja, ¿cafä bei wa bufi li jushujuablalobä, bei wa?” a bada cuma.

16' ¿Öjö tawä? —Jesús a cuma—. “Camiyä balöwä”, täbä nofi lä tamamou wei bä lä cui, öjö lä bä nia nojablou majöo. Inaja showawä, äyämö bä nojablou si lä ijejei bä lä cui, öjö lä bä nia shino balöblou nomöjöo.

17 Jelusale yo jamö Jesúsnö cama ebä çai ayofälöma. Bä jufälöbä jamö, cama 12 ebä lä nocamabono wei bä çai fa bayäcäblaludunö, bä yömölafälöma. Abinaja bä nowa tama.

18 —Bei. Jelusale jamö bamacö juu lä cuimadi. ¿Öjö tawä? Ya lä yanowamöblaleyoluno wei ya lä cui, bada täbä nija wale nia jöböaöje. Nofi bäyäälewä blowäjäwä bä ma cui, Moisesi tä a ja täbä lä damaö wejei bä ma cui, öjö bä nija ya fa jöbömoicunö, wale shämabeje wale nia jömaöje.

19 Öjö dāja, judio bä lä mlai bä nija wale noshi nia öjödabou majöoje, wale nö bleaamabeje. Wale nö nia waiblaöje. Wale si çai nia yafelimaöje. Fii balitama defi ja, wale çai nia basuaöje. ¿Öjö tawä? Wale nomawä fa didicöjenö, bolacabö tä mö didi fa cublalunö, ya demi nia jocädou ço —bä nowa tama.

20 Öjö dāja, Sebedeo bä ijilubö ecöbö lä cui bei bä nöönö, Jesús nija cäcöbö çai icua ajedequema. A fa dijoafälönö, a möfe bolanö, Jesús nija a nacoma.

21 —¿Wedi wa tä yai bufii? —Jesús e cuma. Abinaja a suwä cuma. —Afä wa bä nia çai lä cuo wei ja, ijiluyä wa cöbö bada lomabou ajedeobä ya wä. ¿Öjö tawä? Jayu wa boco mashi jamö ai a, acasi wa boco mashi jamö ai a, wa cöbö döcamabou mö feduduobä —e cuma.

22 Öjö ma cui, abinaja Jesús a cuma, öjö suwä a lä cui bä ijilubö ecöbö nija. —Wafä tä lä nacaö wei wafä tä daimi dicowä. Wale nö nia lä bleaamaö wejei däjä, ¿wafäcö nö bleaaö mö feduobä wafäcö daanö?—a cuma. —Awei, inaja lä yafäcö çai tablamamobä yafäcö waiquiwä —cäcöbö cuma.

23 Öjö däjä, abinaja Jesúsno cäcöbö nowa tama. —Bejedi lä wafäcö a. Wafäcö nö nia bleaaö mö feduo. Öjö ma cui, jayu ya boco mashi jamö a nia lä döcäo wei a lä cui, camiyänö ya tä daimi. Acasi ya boco mashi jamö ma cui, inaja showawä. Cäcöbö nia lä döcämabou wei, Fayänö öjö tä shino daö waiquia —cäcöbö nowa tama.

24 Jesús ai 10 ebä lä cuinö, öjö cäcöbö a fa jililäjenö, Santiago, Juan sho cäcöbö noshi wälidaö dicolayomaje.

25 Inaja bä bufi cudaliyoma yalo, Jesúsno bä bluca fa nacalänö, abinaja bä nowa tama. —Shomi bä lä bälöblai bä nijamö bä bada lä läblai, cama bä a shino jiliamou bufi doblao talei. Cama bä bada lä cuinö bä shino shömaö fe blacäjouje.

26 Öjö ma cui, inaja çafä wamacö nofi tamamobä wamacömi. Ma. Çafä wamacö nija a nosiemou bufi lä doblao wei a lä cuinö, bä nosiemaö fe balojoo mlai, bä shino yai bayeliblabä. ¿Öjö tawä?

27 “Camiyä ya shino yai bada cuobä”, wa nofi lä tamamou wei wa lä cui, aifä showadi wa bä bayelibladibä wa e nia shino yai cuo,

28 camiyä ya lä cuaaö weinaja showawä. Camiyä ya lä yanowamöblaleyoluno wei ya ma cui, ya nosiemobä ya junomi. Ya bä yai bayeliblabä, ya li waloqueyoluma. Yanowamö ai ya bä nowa çai bluca çamabä, ya jöböamou mö juma —bä nowa tama.

29 Jelico jamö Jesúsno cama ebä çai jayuabä jamö, bluca täbä nocaquema.

30 ¿Öjö tawä? Bei yo casö jamö bolacabö cäcöbö jubäbö loo mö baoma. Jesús a lä jayuale a wafa fa jilibölänö, çali cäcöbö comöo läoma. —¿David nodiwä wa e lä cui! ¿Yafälecö nofi da ojodadaliyo!

31 Mamicai cäcöbö nia fa lomabojenö, bluca bänö cäcöbö a ma wasöno wejei ma cui, cäcöbö a yai nacläa majöa dicolayoma. —¿Bada tä! ¿David nodiwä wa e lä cui! ¿Yafälecö nofi da ojodadaliyo!

32 Jesús a ublaa fa yanöcödalunö, cäcöbö lä jubäböono wei cäcöbö nacalanö, abinaja e cuma. —¿Wedinaja bafäcö li taamabä, bei wafäle li nacaä lälei? —e cuma.

33 Cäcöbö lä jubäböono wei, abinaja cäcöbö cuma. —Bada tä. Yafä täbä möbä, wafäle mamocu da dodijidablaliyo —cäcöbö cuma.

34 Jesúsno cäcöbö nofi fa ojodadalönö, cäcöbö mamocu jubälalema. Öjö däjä, cäcöbö mamocu dodijidablou fa showadalonö, Jesús nijamö cäcöbö yaua showaquema.

San Mateo 21

- ¹Jelusale jamö, Jesúsno cama ebä çai ajedebalayoma. Oliba tä balöcö jamö bä waloquema, Befajeiteli bä lä bälöle jamö. Öjö däjä, öjamö culanö, bä lä nocamabono wei ai cäcöbö shömöa balölema.
- ²Abinaja cäcöbö nowa tama. —Wafäcö juu fa shaliloimadunö, quiiji a shabono jamö cäcöbö da yafilujulu. Wafäcö lä çoblöle jamö, yalo bulo a nata lä cule wafä a nia dablajalayu, ijilubö a çai. Öjö wafä cöbö nata fa cushälänö, äyämö wafä cöbö nia çai juu çimaö.
- ³Ai anö wafäcö wälili bädao ja, abinaja wafäcö cuu. “Bada anö cäcöbö majöamaö bufii cublei. Lobe cäcöbö nia çamaö ço cublei”, wafäcö cubä —Jesúsno cäcöbö nowa tama.
- ⁴Yai Bada a wano wäyälöwä a lä cuno wei tä a bejedi wawäblobä, öjö tä cublaliyoma. Abinaja tä a cuu.
- ⁵Sionoteli bä da yömöla. Cama e Bada juu lä cuimi. A çai Bada jömamou buomi. Yalo bulo a ja a döcälänö, a befi çai juu lä cuimi. Bulo bä ijilubö a ma cui ja, a çai döcäa. Einaja tä a cuu.
- ⁶Öjö däjä, Jesúsno cäcöbö lä nocamabono wei cäcöbö aa fa showalöfälönö, cäcöbö nowa lä tano weinaja, inaja showawä cäcöbö cuaaö cadidioma.
- ⁷Jesús nijamö bulo a çai waloböa çoqueyoluma, ijilubö a çai. Cäcöbö çai waloböa fa çoiquiyonö, yalo cäcöbö mabucabö ja, cäcöbö camishibö maquea fa balöaböcönö, öjamö lä Jesús a döcäquema.
- ⁸Jesús a befi çai jubä jamö, bufi doblalolanö a befi çai jayuamamaje. A befi çai nia lä jayuono wei yo jamö bä lä çocamono wei, ai bä bluca mö feduwä lä cui bä camishibö jilablaamou läafälöma. Ai bä mö feduwä lä cuinö, dejenabä befi çai fa bafedialalöjenö, dejenabä jilamaö cuaaö balöablalou mö feduofälömaje.
- ⁹Bä lä balöfälöno wei bä ma cui, bä lä nojaono wei bä ma cui, öjö bä a noshi fa jalilaimadunö, abinaja bä cufälöma. —¡Bada tä David nodiwä e nofi shino yai da doablaje! Yai Bada a wano a lä juimi, ¡öjö lä a shino yai bayeliblamobä a! ¡Bada tä lä culadi a nofi shino yai doablamobä! —bä cufälöma.
- ¹⁰Jelusale jamö Jesús a yafii däjä, öjamö bä lä bälöle bä shi bluca jalimoma. —¿Fei, wedi bei a çai li juu cuimajei? —bä cuma.
- ¹¹Öjö däjä, bä bluca lä çocamono wei bä a nocalayoma. —¡Yai Bada a wano wäyälöwä, Nasaleteli fei Jesús öjö lä a, Calilea tä ulifi jamö a lä bälöle! —bä cuma.
- ¹²Yai Bada etä yafi sibo lä jicöloi jamö Jesús a fa lucälönö, blada bä ja täbä madofi lä jöbäö wejei bä lä cui, bä yashublalema, täbä madofi lä lulaö wejei bä çai. Bä blada lä nomöjano wejei bä ma cui, bä bladabö lä maquecono wei täbä çai jocäabodayoma. Joledo bä lä nomöjöano wejei bä ma cui, bä lä döcäcäono wei täbä çai bluca jaiyabodayoma.

13 Abinaja bä nowa tama. —Bei. Abinaja Yai Bada etä ʔ oni cuu. Iba yafi a lä cui, Tübä nö bayeli nacaobä, a wəfa yafi nia shino yai jilamou. ʔÖjö tawä? Einaja tä ʔ cuu ma cui, tübä lä tomömou wei bei wama tä yafi li tabläö bashiblalayoma —bä nowa tama.

14 Yai Bada etä yafi jamö Jesús a cuo showao dājä, bä lä jubäböono wei bä ma cui, bä juno lä mlai bä ma cui, cama nija öjö bä çai bluca fa icuicujenö, bä jalomalalema.

15 Tä nö lä quilijii Jesúsno tä bluca wawämalema yalo, ijilu bä shi bluca jalimoma. — ʔBada tä David nodiwä etä nofi yai doablamobä! —bä shi jaliwä cuma. ʔÖjö tawä? Jesús a lä cuaano wei tä fa dalalöjenö, ijilu bä ʔ çai fa jililäjenö, nofi bäyälewä blowäjäwä bä bada jushudaliyoma, Moisesi etä ʔ ja tübä lä damaö wejei bä çai.

16 Ijilu bä ʔ wasöö fa mlacunö, Jesús nija abinaja öjö bä cuma. —ʔEi wa bä ʔ jiliaimi daanö? —ebä cuma. —Jiliaö lä —Jesús e cuma—. Yai Bada etä ʔ oni jamö, ʔei wama tä ʔ doaö daimi tawä? Abinaja tä ʔ cuu. Ijilu oshe bä ma cui, bä lä shadimabou wejei bä ma cui, wa nofi doalajenö bä ʔ dodijiablalobä, cafänö bei wa bä yai taamama. ʔEinaja tä ʔ cuu —Jesús e cuma.

17 Inaja bä nowa fa talöfälönö, shabono jamö a faa çolayofälöma. Bedania jamö a fe jalulayoma.

18 Öjö tä fena ja, Jelusale jamö Jesús a aa mö yabaa fa çolufälönö, a ofälalayoma.

19 Bei yo casö jamö ico fi fa dalalönö, a ajedofälöma. A fa blacälönö, fi bloque dalalema. Fi jenabä shino shico buoma. Öjö dājä, fi wafäbläö ja, abinaja a cudaliyoma. —Cafä ico wa fi lä cui ja tübä iyabä, ʔwa defi nia bufiblamou çodaaimi! —a cudaliyoma. Öjö dājä, defi fäa showadalayoma.

20 Ico fi fäö fa dalalöjenö, Jesúsno bä lä nocamabono wei bä bufi shädayaimou dodijioma. Abinaja Jesús nija bä cuma. —ʔWedinaja tä li fa cublalunö, fi li fäa showadalayou cufe?

21 Abinaja Jesús a cuma. —Wedinaja mlai. Yai Bada a nofi yai shino da mölaboje, öjö lä. Cafä wamacö nija ei ya wə lä cui, bejedi lä ya wə. Wamacö bufi ujudublou mlai ja, Yai Bada wama a nofi mölabolanö wamacö ʔ faö dājä, tä nia cublou. Ico ya fi lä tablamalufenaja bädawä mlai, quiji a jefu ma cui, wama a nowa taö ja, a nia majöblou. “ʔJefu a da ucäblalufälö! ʔModu u jamö, a da shäyablamobalu!”, wama a nowa taö dājä, a nia jefu queamamou.

22 Yai Bada nija wamacö nacou dājä, wama a nofi mölabou cadidilanö wamacö ʔ faö ja, wama tä nacaö lä bädale tä ma cui, wama tä nia dääö —a cuma.

23 Yai Bada etä yafi jamö Jesús a lucäa fa çolunö, tübä yömölabä jamö bada bänö a nabä icuquemaje. Nofi bäyälewä blowäjäwä bä ma cuinö, judio ai bä çai bada ma cuinö, abinaja a nowa tayolumaje. —Bei. Einaja wa cuaabä, ʔcafä bada bei wa tawä? ʔWedinö bada bei wa tablamalema, öjö lä? —a nowa tamaje.

24Jesúsinö abinaja bä nowa taö nomöjööma. —Cafä wamacö ma cui, bamacö çai nia wãlii mö feduo. Cafä wamacönö wamale a julei ja, wale Bada lä tablamaleno wei ya wãfa nia wawãmaö nomöjöö.

25Jao. ¿Wedinö Juan a shömölema, täbä fe ojomabä? ¿Yai Bada tänö a shömölema tawä? Ma, ¿yanowamö täbänö a shömölema sijewä? —Jesúsnö bä nowa tama. Bä nowa nia lä juo wei tä afa wayoaö balöoje ja, bä a shino läablalodii buoma. Abinaja bä nowa tayoma. —“Juan a lä cui, Yai Bada tänö a shömölema”, bamacö cuu dicoo ja, “Inaja lä wama a nofi ma table ma cui, ¿wedi tä tabä wama a wã bejedi li bufinomi, öjö lä?”, a nia cuu majöö dicoo.

26Öjö ma cui, “Yanowamö täbä nija a shömamoma”, bamacö cuu dicoo ja, ei bä lä çocamole bä fa jushudalunö, bä a nö nia quiliaö. “Yai Bada a wãno wãyãlewä Juan a cuoma”, a nofi malä tabolajei —bä nowa tayoma.

27Öjö cudeenö, abinaja bä shino cuma, Jesús nija. —Cuwi. “Öjönö Juan a shömölema a”, yama a nofi çai taboimi —bä cuma. —Jao —Jesús e cuma—. Camiyä ya ma cui, cafä wamacö nija, “Öjönö wale shömölema ya”, ya çai nia cuu ayaomi —a cuma.

28Nofi bäyãalewä bada bä ma cui nija, judio ai bä bada ma cui nija, abinaja Jesús a cuma. —Ei tä a ja, wamacö bufi dayãobä. Bä ijilubö ecöbö lä bolacaono wei a wãlo cuoma. Ai e nija a icua fa balöicunö, abinaja a nowa tama. “Uasi. Ficali ca jamö, a da ojodamodu”, e cuma ma cui,

29“Ma, ya nö jubimi”, e cuu dicooma. Inaja a ma cuno wei ma cui, a bufi läblou fa çolonö, a aa fe yadia majölayoma.

30Bä ijilubö ai e mö feduwä nija a icua fa nomöjöicunö, inaja showawä a nowa çai tama. Öjö a lä cui, bä föö e a ja a wã dodijidawä juoma. “Awei, Fabe. Ya juu weicätä” a cuma ma cui, a junomi.

31¿Öjö tawä? —Jesús a cuma—. ¿Wedi jamö a dodijiwä lä cuinö, bä föö e nosie yai shino julema? —a cuma. —Bä ijilubö jaba e shömaö lä balöblaono wei a lä cuinö —bä cuma—. A bufi mö lä yabajadaliyono wei a lä cuinö. Öjö däjä, abinaja Jesúsnö bä nowa tama. —Cafä wamacö nija ei ya wã lä cui, bejedi lä ya wã. Inaja showawä, Yai Bada tänö cafä wamacö çai cuobä wamacö waiquiwä ma cui, wamacö çai nia cuomi. Öjö a ijilubö lä culenaja wamacö cuwä dicowä. “¿Ei!”, wamacö cuu ma buo wei ma cui, wama a nosie yai juaimi. Lomateli bada bä befi bä blada lä doaö wejei bä ma cui, bä suwä lä dodoo wei bä ma cui, öjö lä bä çai nia shino cuo ayao. Bä doblou ma mlai lä ma cui, bä bufi lä läblou wei tänö a wã shino yai juaö ayaaje.

32’Dodijidawä wamacö cuobä, fe ojomalewä Juan a lä cuinö wamacö yömölayoluma ma cui, wama a wã bejedi bufiblanomi. Lomateli bada bä befi bä blada lä doaö wejei bänö, a wã bejedi shino yai bufia ayalemaje, bä suwä lä dodoo wei bä çainö. Öjö lä bänö a wã bejedi lä bufileno wejei, wama tä ma dalaleno wei ma cui, wamacö bufi läblonomi showawä, wama a wã bejedi yai bufibobä —bä nowa tama.

33Nofi bäyãalewä bada bä ma cui nija, judio ai bä bada ma cui nija, abinaja Jesús a cuma. —Ei ya tä a wãyãö lä yaclão wei tä a çai da jililäje. Ai anö uba totobä bluca fa

döalalönö, tä jicoloblalema. Öjö dāja, uba bä nia wacä lä cadicaö wejei, täca çai tablaö nomöjölâyoma. Tä möö cuaabeje, yafi ösöwä a çai tablaö fa nomöjölönö, cama ficali ca jamö shomi täbä bälömaquefälöma, etäca nowamaö juobeje. Öjö dāja, shomi täbä ulifibö jamö a aa nomöjölâyoma.

34'Uba a fabä tä cublou dāja, ficali ca ja bä lä bälöblamabole bä nija, a nosie lä juaö wejei ai ebä fa shömölönö, uba bä yefiamaö ço bufima.

35'Öjö ma cui, bä lä bälöblamabole bä lä cuinö, ai a nabä quea mö fa baicujenö, a si yafelilalemaje. Ai a shäa cadidilemaje. Maa mabänö ai a shäyälalemaje.

36'Cama ai ebä shömöa ma çleno wei ma cui, ai bä jaba tablaö lä balölayono wejeinaja, inaja showawä öjö bä çai tablaö çlayomaje.

37'Bada a lä cuinö, yacumö bä ijilubö e shömöa cadidilema. ¿Öjö tawä? —Jesús a cuma—. “Ijluyä ei a cadidiwä lä cui, a nofi yai tabobeje”, a bufi cuma yalo, a shömöa nomöjölema.

38'Öjö ma cui, bä lä bälöblamabole bä lä cuinö, bada tä ijilubö e cadidiwä fa dalalöjenö abinaja bä nowa tayolâyoma. “Ei bada tä ijilubö cadidiwä, ficali ca nia obi tabou lä juo wei. Fei dāja, bäma a shäa fa showadalönö, camiyä bamacönö bäma täca yai ficali tabou juo nomöjöobä”, bä nowa tayolâyoma.

39'Öjö dāja, a juwäa mö fa balöjenö, ficali ca sibo jamö a shäyää fa majölöjenö, a shälemaje.

40'¿Öjö tawä? —Jesús a cuma—. ¿Wedinaja wamacö bufi yai cuu dodijia cule? Cama a ficalibö ca lä cui a waloqueyoluu dāja, ¿wedinaja bä nia yai taamayoluu, öjö lä? —a cuma.

41—¿Wedinaja mlai! —Jesús nija bä cuma—. Öjö bä nö wälidiwä lä beblalole, bä yai nö nia bleamayoluu. Bä nia waicaö. Shomi täbä nija täca nia jöböaö majöo, uba a lalou dāja bä mashi nia lä jöböaö wejei bä lä cui bä nija —bä cuma.

42'Öjö dāja, abinaja Jesús e cuma. —Bejedi lä wamacö a. Yai Bada etä a oni jamö, ¿ei bei wama tä a oni daö mlaa cule? Abinaja tä a cuu. Maa mabä ja a yafi nia lä itamaö wejei bä lä cuinö, ma wailemaje. Öjö ma cui, ma lä waileno wejei ma lä cui, a yafi colo lojodoobä ma yai li cublaliyoma. Bada tänö inaja tä taamama. Öjö yama tä dablö ja, yamacö bufi yai shädayaimou. 'Einaja tä a cuu —Jesús a cuma—.

43'Öjö cudeenö, bamacö nowa taö lä cule. Yai Bada tänö wamacö çai cuobä, Isaeli wama ecö ma cule ma cui, wamacö nia çai cuomi dicoo. Shomi täbä çai nia cuo majöo, a wä nia yai lä juaö wejei bä lä cui.

44'Öjö ma jamö bä fa yudublaicunö, bä lä quelayou wei bä lä cui, bä nö nia bleaaö fe balojoo. Öjö bä nö nia ma bleaaö wei ma cui, ai bä lä cui, öjö ma showawänö bä fe yai shäo dāja, öjö bä nia yai cobequeblou fe balojoo —a cuma.

⁴⁵Jesúsnö shominaja tä ʔ wäyääo yacläablalou ja, bada bänö a wə jīliamaje. ¿Öjö tawä? Nofi bāyāalewä bā blowājāwä ma cui, faliseo bā çai bada ma cui, Jesús a wə ja bā jushudaliyoma. Cama bā ʔfa yai lä wäyāmono wei, tä daö showaomaje.

⁴⁶Öjö ma cui, a nia juwääo ma showadaono wejei ma cui, yanowamö tábä nija bā quilima. “Yai Bada a wəno wäyālewä, öjö a dodijiwä”, a nofi tabomaje yalo, cama bā mamö mötāle dājā, a juwääo quilimaje.

San Mateo 22

¹Shominaja tä ʔ wäyääo yaclämolanö Jesúsnö bā yömöläo çoma. Abinaja a cuma.

²—Yai Bada tänö cama ebä çai lä cuo wei tä lä cui, abinaja tä çai cuwä. Bada a yai bälöo lä dodijio wei a wəlo cuoma. Bā ijilubö e lä cuinö, suwä a nia dāama yalo, a nofi nia çocamoamama.

³A nofi çocamoamaö showadaobä, a nosie lä juaö wejei bā fa shömölönö, bā yömöläa lä balöqueno wei bā nacaamaö bufima. Öjö ma cui, bā junomi dicowä.

⁴Bada a lä cuinö, a nosie juamobä ai bā shömaö ço ja, abinaja bā nowa tama. “Ya bā yömöläa lä balöqueno wei bā nija, wamale wəno da wäyāduje. ¿Öjö tawä? Nii ya bā bluca tablaö waiquilayou lä cufe. Iba baca ya bā shāa waiquiamalalema, yama bā ocalo blewä lä tabono wei bā çai. Öjö ya bā bluca babou waiquia lä cule. Fei dājā, ijiluyänö suwä a nia lä dāaö wei bāma cäcöbö nofi nia yai çocamoao”, bā nowa tama.

⁵Öjö ma cui, bada a wəno lä wäyāno wejei a wəno juanomije —Jesús a cuma—. Bā noca flecaöje ja, shomi jamö bā shino jublou yaclämou dicooma. Ai a lä cui, ficali etäca ja a ayoma. Ai a mö feduwä lä cui, a showadi lä läono wei jamö a ojodamou mö juma.

⁶Ai bā mö feduwä lä cuinö, bada a nosie juamobä ebä li juwää dicoalalemaje. Bā nö fa waiblälöjenö, bā shäalalemaje.

⁷¿Öjö tawä? —Jesús e cuma—. Inaja bā cuaaö dicoo ja, bada a lä cui a jushudaliyoma. Sodado ebä shömöa fa showadalönö, cama ebä lä shäalaleno wejei bā mö watäblamalema. Bā çai shabonobö öshömalalema.

⁸Öjö dājā, a nosie juamobä ebä lä cui nija abinaja a cuma. “Ijiluyänö suwä a dāaö ja, bāma cäcöbö nofi çocamoabä ya bā bluca babou ma waiquio dājā ma cui, ya bā yömöläa lä balöqueno wei bā lä cui, ‘Öjö ya bā çocamabobä’, ya bā nofi taboimi majöa.”

⁹“Bei”, bada a cuma. “Tábä lä bälöblai yobö jamö, bā jublou cuaaö da showadao, öjö lä. Wama bā bluca fa dayāanö, wama bā nacabou fe blacäjoimabä, ijiluyänö suwä a nia lä dāaö wei bāma cäcöbö nofi çocamoao fe yadiobä”, e bada cuma.

¹⁰¿Öjö tawä? A nosie juamobä ebä lä cuinö, tábä lä jubläaö wei yobä jamö bā fa juomobodunö, bā bluca naca fe yadialalemaje. Dodijidawä bā ma cui, wəlidawä bā ma cui, bā bluca çalalemaje. Inaja bā cuaaö fe yadioma cudeenö, cäcöbö lä doayono wei cäcöbö nofi çocamoabeje jamö, tábä ou fe yadioyoluma.

- 11' ¿Öjö tawä? —Jesús a cuma—. Öjöma cui bada a lä cuinö, bä iyaö lä çocamou wei bä möö ja a fa lucälönö, ai a walo dalalema, camishi dodijidawä cäcö ja a didia lä mlai. Cäcöbö nofi çocamoabeje jamö ma cui, dodijidawä cäcö ja a didio fa mlacunö,
- 12a wälima. “Nofi”, a cuma. “¿Wedinaja wa bufi li fa cunö, dodijidawä cäcö mlai ja bei wa li lucäa bädalayou cufe?”, a cuma. E a juo mlai ja, mamicai e looma.
- 13' Öjö däjä, cama ai ebä lä lämabou wei ebä nija abinaja bada e cudaliyoma, “Quiji a lä cui, bococu da ocablalöje. Bei matakö çai. Sibö jamö tä mö lä didi wei jamö, a da shäyäblabaduje. Öjamö bä nia öcöö. Bä nö beblalou yalo, bä nia lalöö”, a bada cudaliyoma.
- 14' ¿Öjö tawä? —Jesús e cuma—. Bluca täbä ma nacaablamou wei ma cui, bolacadabö täbä shino yaïamou.
- 15' Öjö däjä, Jesús a wä nia dobloimi jömaö fe fa yadiojenö, faliseo bä a bada wayoa balölayoma. Cama ai ebä lä cuinö, a jole jole nofimalajenö a wä nia jilimaje, a wano wäyöö çojolobeje.
- 16' ¿Öjö tawä? Öjö bä bada nija bä lä nocaono wei, ai ebä shömölemaje, bada tä Elode ai ebä çai mö feduwä. Jesús nija abinaja ebä cuyoluma. —Tä a wäyäle. Wa lä bejedimou wei bäfä daö. Yanowamö wa bä nö quili taimi. Bada bä ma cui, bada bä lä mlai bä ma cui, wa bä nofi tabou fe usucuo fa showaonö, Yai Bada tänö bämalecö taamaö lä bufii wei, quili mlai ja wa tä a shino yai wäyöö shalilou.
- 17' Öjö cudeenö bäfä wälilä lä cule. Lomateli bada Sesa a lä cui, öjö befi bä blada lä nacaö wejei, judio bämäcö ma cuinö, ¿bäma bä blada jöböabä tawä? ¿Tä a läami daanö? Ma, ¿tä a läa tawä? —bä cuma.
- 18' Öjö ma cui, bä bufi wälidiwä daö waiquilanö, abinaja Jesús e cuma. —Jole jole wamacö lä dodijidai, ¿wedi tabä wamale a bejedi wabaö?
- 19' Jao. Bada tä Sesa befi bä blada lä nacalajei a blada da jöböbaje, ya möblaabä —a cuma. Öjö däjä, blada a jöböquemaje.
- 20' Öjö däjä, a blada mömalanö Jesúsnö bä wälima. —Ei ¿wedi bei fe nö ele? ¿Wedi bei a wafa oni cua cule? —a cuma.
- 21' —Lomateli bada tä Sesa —bä cuu mö feduoma. —Jao —Jesús a cuma—. Sesa cama etäbä ja, wama a li dobäbä, öjö lä. Yai Bada cama etäbä mö feduwä lä cui täbä ja, cama wama a li dobäö mö feduobä —a Jesús cuma.
- 22' Jesús a wä ja, bä bufi yai shädayaimolayoma. Öjö däjä, a fa dacöfälöjenö bä jua çolayoma.
- 23' Öjö tä mö jalu showawä ja, saduseo bä bada lä cuinö, Jesús a nabä icua nomöjöquemaje. Öjö bä saduseo lä cui, abinaja bä bufi shino cuu. “Täbä lä nomaö wei bä demi jocädou çö mlaicätä”, bä bufi shino cuu. Inaja bä bufi cuu waiquiwä cudeenö, a wä nia fa yaclämajenö a wälimaje.

24Jesús nija abinaja ebä cuma. —Tä ʼa wäyäle. Abinaja Moisesinö judio bämalecö nowa tama. A ijilubö cuo showao mlao dǎjä, ai e mashi nomaö dicoo ja, bä suwäbö e lä feiblou wei a nia dǎäö nomöjöö. Öjö a suwä nija bä ijilubö ebä fa tacönö, a lä nomalayono wei a lä cui, öjö bä ijilubö ebä ʼafa nia jilabou nodio juoje. ¿Öjö tawä?

25'Bei —bada bä cuu çoma, Jesús nija—. Camiyä yamacö nijamö, cama cǎbä mashi 7 cuoma. Jaba a lä cui, a suwä lä dǎleno wei a ijilubö cua showaa mlai ja, a mladaliyoma. Öjö a mashinö e dǎa nomöjöloma.

26Öjö ma cui, bei ijilubö e cuo showao mlao dǎjä, cama ma cui a çai nomaa majölayoma. Cama a mashinö e dǎa ma nomöjölono wei ma cui, inaja showawä. ¿Öjö tawä? Jödödöwä bä 7 lä cuinö a suwä dǎa ma nodiadalano wejei ma cui, bä ijilubö cublou showao mlao dǎjä, bä bluca nomalaliyoma.

27Yaçumö, suwä a ma cui, a çai mladaliyoma.

28'¿Öjö tawä? —ebä cuma—. Inaja tä cuoma cudeenö, bǎfǎ wǎlii lä cule. Yai Bada tänö tǎbä demi nia jowa jocädamaö lä ço wei dǎjä, ¿wedi jamö a lä cui bei a suwäbö yai nia cuodayou, öjö lä? Bluca bä 7 wǎlo lä cuinö, a dǎadalaö malä cuaano wejei —ebä cuma.

29Abinaja Jesúsno bä nowa taö nomöjööma. —Yai Bada wama etä ʼa daimi yalo, wama etä lojode çai daimi cudeenö, wamacö ʼa yacǎblalodii lä cule.

30Yai Bada tänö tǎbä demi jocädamaö ço dǎjä, tǎbä nia doayou malä mlai. Tǎbä nia çai suwäbö jöböamou çodaaime. Ajele tǎbä doayou lä mlainaja tǎbä li cublou showadalayou —Jesúsno bä nowa tama.

31Abinaja Jesúsno bä nowa taö çoma. —Tǎbä demi nia jocädou lä ço wei, Yai Bada tänö wamacö nowa jaba lä tano wei, ¿bei wama tä ʼa oni daö mlaa cule?

32Yai Bada a wǎfa wǎamamou dǎjä, abinaja Moisesi nija a malä cuno wei. Ablaamö a ma cui nija, Isaacö a ma cui nija, Jacobo a ma cui nija, öjö bä nija ya lä bufiblamou wei ya. 'Einaja Yai Bada a cuma. ¿Öjö tawä? —bä nowa tama—. Bä demi cua showaa yalo, öjö bä nija a jowa bufiblamou showawä malä cui. Nomawä tǎbä nija a bufiblamou dao malä mlai.

33Bä lä çocamono wei bä lä cuinö, öjö a wǎ fa jililǎjenö, bä bufi yai shädayaimoma.

34Inaja Jesús a cuu ja, saduseo bä ʼa nö bada wǎloblamanomi. Faliseo bä bada lä cuinö, öjö tä ʼa fa jililǎjenö, Jesús nijamö öjö bä çocamou nomöjööyoloma.

35Ai a lä cui, Moisesi tä ʼa ja tǎbä lä damaö wei bei a cuoma. Öjönö Jesús a wǎ nia bejedi fa mönö, a wǎlima.

36—Tä ʼa wäyäle —e cuma—. Moisesinö tä tamaö lä bufino wei tä ʼa bluca ja, ¿wedi jamö bei tä ʼa shino yai lojode dodijiwä?

37Abinaja Jesús e cuu nomöjööma. —Tä ʼa shino yai lä lojode wei, ei lä tä ʼa waiquiwä. Bada wama tä yai nia nofimaö, çafǎ wamacö nija a bufiblamobä a lä cui. Bufi

jaduculanö wama a nia nofimaö, bei wamacö bufi yainö. Wamacö bufi lä cuaablalou wei tä ma cuinö, wama a nia çai nofimaö fe balojoo.

³⁸’¿Öjö tawä? —Jesús e cuma—. Öjö tä ą shino yai lojode dodijiwä.

³⁹Ei tä ą çai lojode cua mö fedua. Cafä wa nofi jolio lä culenaja, inaja showawä aifä wa bä nofi tabolanö wa bä nofimabä. ’¿Öjö tawä? —Jesús e cuma—.

⁴⁰Einaja wamacö cuaaö däjä, Moisesi wama etä ą nofi bluca cadidibou waiquiwä. Yai Bada a wano wäyälewä bä ma cui, öjö wama bä ą nofi çai cadidibou mö feduwä showawä.

⁴¹Faliseo bä bada yododoo showao däjä, Jesúsnö bä walıma. Abinaja e cuma.

⁴²—A shömabä, Yai Bada tänö a lä yaileno wei a lä cui, ¿wedinaja wama a nofi yai tabou? ¿Wedi bei e li nodiwä? —e cuma. —Bada tä David e nodiwä —ebä cuma.

⁴³Abinaja Jesúsnö bä nowa taö nomöjöoma. —Yai Bada bei tä Bufinö a wą famaö cadidou ja, David cama a showawä ma cui, a nö malä wäono wei. A nofi badabolanö abinaja a cuma.

⁴⁴Iba Badayä a nija, abinaja Bada tä yai lä cui a cuma. “Bä nö lä nabämou wei bä lä cui, cafä nija ya bä möfe quilili bomabou showao mlao däjä, äyämö, camiyä jayu ya boco mashi jamö a döcäa da balöiquiyo.” ’Einaja David a cuma.

⁴⁵¿Öjö tawä? —Jesús a cuma—. Bada tä David a lä cuinö a nofi badabou waiquiwä ja lä, ¿bei e jowa nia li nodiblou majöo tawä? Bä bufi da dayäo, öjö lä —a cuma.

⁴⁶Moli ma cui, Jesús a wą ja bä ą çai juo doblonomi. Öjö däjä, bä ą fablamaimi waiquiwä yalo, bä ą wabäo quili showadaoma. A walıi çodaanomije.

San Mateo 23

¹Öjö däjä, täbä lä çocamono wei täbä nija Jesús a wą fama, cama ebä lä nocamabono wei ebä nija çai. Abinaja bä nowa tama.

²—Moisesi tä ą ja täbä lä damaö wejei bä lä cuinö wamacö damabeje cäbä. Faliseo bä bada lä cui, inaja showawä. Moisesi etä ą ja wamacö yömölabeje bä li bluca.

³Bä bada läblawä cudeenö, wama bä ą nia jiliaö. Wama bä ą fa jililänö, Moisesi etä anö wamacö taamaö lä bufii weinaja, wamacö nia cuaaö. Öjö ma cui, tä ą lä wawämaö wejei bä bada lä cui, öjö bä yai owämaö dicoo dijejä. Tä ą ma wäyäo wejei ma cui, cama bei bä dodijaö malä mlai.

⁴’Yai Bada nija täbä dodijidawä cuobä, öjö bä bada lä cuinö tä nabä bluca shömadii talajei —a cuma—. Öjö ma cui, bä doblamaö mlajei, bä modaablamaö buoje. Jai jude tä bälamaö bädaoje. Bä doblou fe yadiobä, moli ma cui, bä çai bayelibläo buomije.

⁵’Öjö bä lä cui, yanowamö täbä nija bä dodijidawä dablamobä, bä jole jole li dodijaö bää —a cuma—. Bä bufi nia cadidou fa dablamonö, bei wäyacu jamö ma cui, bei efetacö jamö ma cui, Yai Bada etä ą lä onibolajei täbä shino oni blebou talajei. Bä nö

dodijidawä öjöböamamobä, camishi cäcö lä feyacabou wejei cäcö casö febalashi malä lababou wejei.

⁶Täbä iyaö çai çocamobä jamö, bada bä nijamö bä loo coyocaö bufi doblao talei. Judio bamacö yododabä jamö ma cui, bada bä lä döcäo wei jamö bä döcäo yaimou mö feduo talei.

⁷Nii bä lä lulaö wejei jamö, bä nö bada çai öjöböamou bufi doblao. “Tä ą wäyäle”, bä nowa tamamou bufi çai doblao.

⁸¿Öjö tawä? —a cuma—. Öjö ma cui, çafä wamacö lä cui, “Tä ą wäyäle”, bä nowa tamamou bufio dijä. Çafä wamacö nija ya tä ą lä wäyäo wei, ei öjö moli lä ya waiquiwä malä cui. Çafä wamacö lä cui, moli wamacö çai mashi.

⁹Inaja showawä, bita jamö ai wama a nofi nia föömaimi. Fedu jamö, Faafä moli a cua malä waiquiladi.

¹⁰Inaja showawä, bä ąfa bada jilamamou bufio dijä. Yai Bada tänö wale shömabä wale lä yaileno wei ya lä cui, camiyä wamale nofi yai lä Badabou wei, ei lä ya waiquiwä malä cui.

¹¹Çafä wamacö nija bä nia bada lä cuo wei bä lä cuinö, wamacö nosiemaö mlajei ja, wamacö yai nia shino bayeliblaöje —a cuma—.

¹²¿Öjö tawä? Cama bä lä jömamou wei bä lä cui, Yai Bada tänö bä nia quilimaö nomöjoo. Bä jömamou lä mlai bä lä cui, wawadowä bä nofi nia shino yai tamabou.

¹³Abinaja Jesúsnö bä nowa taö nomöjöoma. —Öjö ma cui, Moisesi tä ą ja wama täbä lä damaö wei wamacö lä cui, faliseo wamacö çai lä cui, wamacö nö bluca bleaaö dodijobä wamacö. Jole jole wamacö dodijaö bäa. Yanowamö bä nija Yai Bada a dablomou bufi ma doblao wei ma cui, wama bä bufi jaducublamaimi. Yai Bada çafä wamacönö wama a daimi waiquiwä. Ai bänö a daö bufi ma doblao wejei ma cui, çafä wamacö ąnö wama bä doblamaimi.

¹⁴Moisesi tä ą ja wama täbä lä damaö wei wamacö lä cui, faliseo wamacö çai lä cui, wamacö nö bluca bleaaö dodijobä wamacö —a cuma—. Jole jole wamacö dodijaö bäa. Suwä bä lä feiblou wei wama bä fa mölamanö, wama bä madofibö bluca däablaö malä läo wei. Öjö dąjä, wamacö mömou nia liyąjäo fe fa yadionö, Yai Bada nija wamacö nö bayeli nacao ja, wamacö ą jole jole labaaö bädao. Öjö cudeenö, Yai Bada tänö wamacö nö nia shino yai bleaamaö fe balojoo.

¹⁵Moisesi tä ą ja wama täbä lä damaö wei wamacö lä cui, faliseo wamacö çai lä cui, wamacö nö bluca bleaaö dodijobä wamacö —a cuma—. Jole jole wamacö dodijaö bäa. Judio bä lä mlai wama täbä yömöläo bufi doblao, çafä wamacö lä culenaja bä cublou mö feduobä. Moli a ma cui, judio wama a tablamaö fe yadiobä, modu u ma cui jamö, ulifi a ma cui jamö, wamacö aa blajalayou. Öjö dąjä wamacö fa alunö, judio wama a tablamalei ma cui, wama a walıdiblamabä wama a tablamalei. Shobali wacö jamö çafä wamacö jubä wamacö waiquiwä ma cui, öjö wama a lä tablamale a lä cui, shobali wacö jamö a nö shino yai bleaaö majöobä, bei wama a li tablamalei.

16' Wamacö nö bluca bleaaö dodijjobä wamacö —a cuma—. Jai jubäbö wamacö ma cuwä wei ma cui, bei wama täbä li jole jole lulublalaö buo. Täbä ʘ nö wäo däjä täbä nia bejedimou fa dablamonö, Yai Bada etä yafi ʘfa ma jayublaö wejei ma cui, wamacö ʘ li läblou. Yai Bada etä yafi lä cui, ʘwedi tabä wama etä nofi yafi taboimi? Öjamö lä bä olo lä yaile wama bä ʘfa shino jayublamaö bufi doblao. Öjö olo bä lä yaile bä ʘfa jayumaöje däjä, “Awei, fei däjä wamacö nia lä bejedimou wei tä cublou lä cule. Fei däjä wamacö ʘ shominajaö majöobä tä cuami”, wama bä nowa li taö.

17' ʘWamacö bufi jaducäwämi nö beblalou! Bejedi lä wamacö yai jubäbö. ʘEtä yafi nowa cua lä! Öjö lä a yafi nowa yai cua cudeenö, bä li olo yaia lä cule.

18' ʘÖjö tawä? —a cuma—. Täbä ʘ nö wäo däjä täbä nia bejedimou fa dablamonö, Yai Bada nija täbä nia lä dodoblamou wei bä maqueblamobä täcö ʘfa ma jayublaö wejei ma cui, wamacö ʘ çai läo. Wama täcö nofi taboimi dicowä. Öjö täcö jamö täbä lä maquele wama täbä ʘfa shino yai jayublamaö bufi doblao. Öjö täbä ʘfa yai jayumaöje däjä, “Awei, fei däjä wamacö nia lä bejedimou wei tä cublou lä cule. Fei däjä wamacö ʘ shominajaö majöobä tä cuami”, wama bä nowa li taö.

19' ʘBejedi lä wamacö yai jubäbö! Täbä nia lä dodoblamou wei bä maqueblamobä täcö lä cui, ʘtäcö nowa cua lä! Öjö täcö nowa yai cua cudeenö, täbä lä maquele täbä li yaia malä cule.

20' ʘÖjö tawä? —a cuma—. Täbä ʘ nö wäo däjä bä bejedimou dablambö, Yai Bada nija täbä dodoblamobä täcö ʘfa lä jayumaö wejei bä lä cuinö, maloco täcö ʘfa jayumamou buo malä mlai. Öjamö lä täbä lä maqueo wei täbä ʘfa befi çai jayumamou malä cui.

21' Inaja showawä, bä nia bejedimou fa dablamonö, Yai Bada etä yafi ʘfa lä jayumaö wejei bä ma cuinö, öjamö lä Yai Bada a lä bälöle tä ʘfa çai jayumaö yädämou showadaoje.

22' Bä ʘ nia shominajaimi waiquiwä yalo, judu mösö ʘfa çai lä jayumaö wejei bä ma cuinö, Yai Bada a döcöadayobä etäcö ʘfa çai jayumaö yädämou mö feduo showadaoje, tä lä döcäladi tä çai.

23' Moisesi tä ʘ ja wama täbä lä damaö wei wamacö lä cui, faliseo wamacö çai lä cui, wamacö nö bluca bleaaö dodijjobä wamacö —a cuma—. Jole jole wamacö dodijaö bäa. Afä nii wama bä bluca lä doaö wei, wajaquemi jenabä wai bädawä ma cui, fe usucuwä 10 wama jenabä fa shedequeblalönö, ai moli jenabä wai ja, Yai Bada showadi wama a dobäö. Öjö ma cui, wamacö yai dodijaö mlai ja, wama a jole jole dobäö waiyoblalou bädao dicoo. Wama täbä nofi ojodabou mlalanö, Yai Bada wama a nofi çai mölabou mlalanö, wama a li dobäblalaö buo. 'Wamacö dodijalanö wama a dobäö fa cunoja, wama täbä nofi ojodabolanö wama a dobäö fa cunoja, tä nö shino doblaobö wei. Yai Bada wama a nofi mölabolanö wama a dobäö fa cunoja, tä nö shino dodijidaobö wei —a cuma—.

24 Bejedi lä wamacö yai jubäbö. Jole jole wama täbä li lulublalaö buo. Tä ʘ nowa wai lä wiisibö wei tä ʘ ja, wamacö ma cuablalou wei ma cui, ʘ wedi tabä tä ʘ nowa yai lä lojode wei, wama tä ʘ nofi li mojudoubou dicoo?

25 ʘ Öjö tawä? —a cuma—. Moisesi tä ʘ ja wama täbä lä damaö wei wamacö lä cui, faliseo wamacö çai lä cui, wamacö nö bluca bleaaö dodijjobä, wamacö. Jole jole wamacö dodijaö bäa. Jışhima bä ma cui, çäo fesibä ma cui, fesibä sibosi aumaö lä culajeinaja wamacö sibosi ma taamamou wei ma cui, bei wamacö ʘeshi shami fe balojowä. Madofi bä ja wamacö bufi shino yaimodii. Wamacö shino nabämou.

26 Faliseo wamacö. ʘ Cafä wamacö yai jubäbö! ʘ Jışhima a mö yalublaö da balöloje! ʘ Çäo fesi çai! Öjö däjä, dodijidawä wamacö yai nia shino auo.

27 Moisesi tä ʘ ja wama täbä lä damaö wei wamacö lä cui, faliseo wamacö çai lä cui, ʘ wamacö nö bluca bleaaö dodijjobä wamacö! —a cuma—. Jole jole wamacö dodijaö bäa. Nomawä bä lä didile täcabä lä culenaja wamacö cuwä bäwä. Maa liyäjäwä mabänö täcabä fe ma labou wejei ma cui, bei täcabä ʘeshi lä cui jamö, nomawä bei tä ubä jilawä. Nomawä bä jodenö täcabä nö shami quiliwä.

28 Inaja showawä, yanowamö täbä nija jai wamacö cadidou wamacö mömou ma cuablalou wei ma cui, bei wamacö bufi wälidiwä fe balojowä. Jole jole wamacö dodijaö buo.

29 Moisesi tä ʘ ja wama täbä lä damaö wei wamacö lä cui, faliseo wamacö çai lä cui, ʘ wamacö nö bluca bleaaö dodijjobä wamacö! —a cuma—. Jole jole wamacö dodijaö bäa. Yai Bada a wano wäyälwä bä lä cuono wei bä lä cui, öjö wama bä ʘ nofi jaducubou ma mlai, wama bä dodijidawä didimabou bufi doblaa bädaa lä cule. Bä jaba cadidou lä balöono wei bä lä cui, öjö lä bä nomawä lä didile jamö wama täcabä baushibou bufi doblao bädao.

30 Abinaja wamacö cuu. “Bämacö nö badabö lä bälöono wei däjä, ya bälöo mö feduo showao fa cunoja, Yai Bada a wano wäyälwä bä shäbeje jamö ya wä nö yädäobö mlai”, wamacö cuu.

31 ʘ Öjö tawä? Cama wama ecö ʘafa nodiwä jilamou ja, çafä wamacö jömamou waiquiwä. Yai Bada a wano wäyälwä bä lä shälenu wejei bä lä cui, öjö lä wama ecö nodiwä waiquiwä malä cui.

32 Jao. Wamacö nö badabö lä cuinö, öjö täbä lä taamano wejeinaja, wamale taamaö nodiaö da showao, öjö lä.

33 ʘ Olu bä wayu lä culenaja, wamacö lä cuwä wei wamacö! —a cuma—. Wamacö jolemou. Yai Bada tänö täbä jömaö däjä, shobali wacö jamö wamacö shömaö dodijjo wä.

34 Öjö cudeenö, abinaja ya cuu. Cafä wamacö nija Yai Bada a wano nia lä wäyäö wejei ya bä nia shömaö, bä bufi yai lä jaducui bä çai, wamacö nia lä damaö wejei bä çai. Öjö ya bä nia shömaö ma cui, ai wama bä nia shäö. Ai bä mö feduwä lä cui, fii balitama defii ja wama bä nia basuaö. Ai bä showawä lä cui, judio wamacö yododabä

jamö wama bä si çai nia yafelimaö. Wama bä nö bleaamaö yalo, ai bä shabonobö nomöjowä jamö bä nia docuu ma cuaafälöö däjä ma cui, wama bä nosi nia bou yauafälöö. '¿Öjö tawä? —a cuma—. Einaja wama bä taamabä ya bä nia shömaö,

³⁵bä lä cadidou wei bä yanöcö shäö lä cuaano wejei bä lä cui, cafä wamacö nija bä nowa bluca çocablobä. ¿Öjö tawä? Abele a jaba shämolayoma. Öjö däjä, Yai Bada ai ebä bluca yanöcöwä shäa jaa fa nomöjöabodujenö, yaçumö nofi bäyäälewä Sacalia a shäa nomöjölemaje, Belequia bä ijilubö e lä cui. Yai Bada etä yano jefa jamö a nabä quequemaje. Yalo bä öshö lä maqueblaao wejei täcö ajede ja, Yai Bada etä yano sibo mötale jamö, a shälemaje. ¿Öjö tawä? Cafä wamacö bälöö lä nodiablalou wei wamacö nija, öjö lä bä nowa nia bluca bähälö tablaö.

³⁶Cafä wamacö nija ei ya wä lä cui, bejedi lä ya wä. Cafä wamacö fei däjä lä bälöle wamacö nija, öjö tä nowa nia bluca jödödöwä cuo —a cuma.

³⁷Jesús a wä blajawä faö ja, abinaja Jelusaleteli bä nowa tama. —¡Shädayai, Jelusaleteli wamacö! Yai Bada a wano wäyälewä wama bä lä shäö wei wamacö. Cafä wamacö nija Yai Bada tänö bä lä shömaö wei, maa mabänö wama bä lä shäyö wei wamacö. Cadala bänö bä ijilubö ebä fe yojoubou lä cuaao wejeinaja, inaja showawä cafä showadi bamacö tabou bufi ma doblaono wei ma cui, camiyä nija wamacö nowamamou bufionomi dicowä.

³⁸Jao. Inaja lä waiquiwä. Fei däjä bamacö nia daao. Wamacö yafibö nia blocoaö.

³⁹Abinaja bamacö nowa çai taö showadao. Wamale nofi doaö mö bao showao mlao däjä, wamale nia dabraö çadaaimi. Abinaja wamacö cuolanö wamale nia shino yai dabraö ço. “Yai Bada a wano a lä juimi a lä cui, Yai Bada nija, ¿jö lä a shino yai bayeliblamobä a!” ¿Öjö tawä? Einaja wamacö cuolanö wamale nia shino yai dabraö ço —bä nowa tama.

San Mateo 24

¹Yai Bada etä yafi jamö Jesús a faa fa çolufälönö, a jaba jufälöö däjä, cama ebä lä nocamabono wei bä fa ajedeblalunö, Yai Bada etä yafi jömamaje. Bä yafi liyäjawä jömamaje.

²Öjö ma cui, abinaja Jesús a cuma. —Jö. Ei wa bä yafi bluca dabraö, ¿jö tawä? Öjö ma cui, cafä wamacö nija ei ya wä lä cui, ya wä bejedi. Ei wama bä yafi bada lä möle, wama bä nofi dobou ma bäle ma cui, bä nia obi wäliaoje. Öjö däjä, ai ma jamö, moli ma cui ma nia maqueo feibloimi —a cuma.

³Oliba tä balöcö jamö Jesús a dolequea fa majöbofälönö, öjamö a yami loo däjä, cama ebä lä nocamabono wei bänö a wälimaje. Abinaja bä cuma. —Wa tä afa lä wäyablei, ¿wedinaja tä nö yai fa cublalunö, bei tä nia yai wawäblou? Wa juu ço lä bufiöle däjä, ¿wedi tä dodijiwänö yamacö li moyawäobä, tä nia lä jödödöblou wei tä lä cui tä ja? —bä cuma.

⁴Abinaja Jesúsnö bä nowa tama. —Bä da moyaweicu, öjö lä, wamacö yaclämaö mlaobeje.

- ⁵Obi, bluca bä nia wawäblou. Camiyä ya wäfa nia ma wäyämou wei ma cui, bä möla dijä. Abinaja bä nia jole cuu. “Yai Bada tänö wale shömabä wale lä yaileno wei, ǐǒǒ lä ei ya e waiquiwä!”, bä jole fa cunö, bluca täbä nia lulubouje.
- ⁶Ai bä lä bälöblai ba nabä nia queayou —a cuma—. Inaja showawä, ai bä wano çai nia jiliamou cuo mö feduo. Ǫǒ wama bä wano nia ma jiliaö wei ma cui, bä quili dijä. Ǫǒ tämi. Ǫǒ tä nia bluca ma cublou wei ma cui, tä nia bluca waicou showadaomi.
- ⁷Bä shomi lä cublai bä nabä nia queayou balöo. Bä bälöblawä lä yaiblai bä çai. Bluca täbä ulifibö lä cublai jamö, ofi tä nia blaucublou. Mashita a çai nia bada quida quidamou nö quiliaö.
- ⁸Ijilu bä nini jaba cuo dǎjä bä nö bleaaö lä culenaja, inaja showawä bä nö nia jaba bleaaö cuo. Ǫǒ jaba cätä bädawä.
- ⁹Ǫǒ dǎjä, tä nia wǎlidiblou —a cuma—. Wamacö noshi nia ǒǒdabouje, wamacö nö bleaamabeje. Wamacö nia shäöje. Iba wamacö yalo, bluca bä bälöjowä lä yaiblai bä ma cuinö wamacö nofi nia wǎlibouje.
- ¹⁰Wale jaba bufibou ma balöo wejei ma cui, tä wǎlidiblou yalo, bluca bä mö feduwä lä cui bä nia waicou. Cama bä ma cui bä nia nomojolimayou. Bä nofi nia wǎliayou.
- ¹¹Yai Bada a wano jole jole lä wäyäö wejei bä lä cui bä fa wawäolalunö, bluca täbä nia yaclämaöje.
- ¹²Ǫǒ tawä? Wǎliwä tä balablou yalo, ai bä bluca mö feduwä lä cui bä nia nofimayou mlaafälöo.
- ¹³Ǫǒ ma cui, a shämobä etä ma cuo dǎjä ma cui, a nö wǎlojaö fe lä yadio wei a lä cui, ǒǒ a nia jucäamou fe yadio.
- ¹⁴Yai Bada tänö cama ebä çai nia lä cuo wei tä ǎ lä cui, bita jödödowä a jamö tä ǎ nia wäyämamou blaucou cuaaö —a cuma—. Täbä jödödowä bälöjowä lä yaiblai täbä yömölamou cuaaö balöono wei ja, Yai Bada tänö täbä nia jödödowä waicaö.
- ¹⁵Ǫǒ tawä? —a cuma—. Tä yai lä wǎlidii tä lä cui, tä nö cuobö lä mlai jamö tä nia ublamabou fe yadioje, Yai Bada etä yafi jamö. Täbä bluca nia yai lä wǎlidiblamaö wei, ǒǒ bei tä. Yai Bada a wano wäyälwä Daniel a bälöo lä balöono wei a lä cuinö, ǒǒnö tä ǎ wäyäö balöoma. Ǫǒ tawä? Ei ya wǎ ja, wamacö bufi çai jaducuwä cuobä wamacö. Ǫǒjamö lä täbä lä wǎlidiblamaö wei, wama tä ublaa dabläö dǎjä,
- ¹⁶Judea jamö wamacö lä bälöle wamacö lä cui, tä lä jefubö wei jamö bä docuo cuo da showadaomobodu.
- ¹⁷Wamacö siboa waiquilayou ja, yafi jamö bä lucäö çadaa dijä. Madofi wama bä çablaö mlai ja, bä docua cua da showaolalu.
- ¹⁸Ficali ca jamö wamacö juu lä waiquile dǎjä, camishifä wama bä çablaö mö yabao mlai ja, ǒǒjamö lä showawä wamacö nia docublou cuaaö.

- 19' Bä lä shöbönabö wei, ꞑbejedi lä öjö bä nö nia bleaaö fe balojoo —a cuma—. Ijilu bä lä shadimabou wejei, inaja showawä bä nö nia bleaaö cuo.
- 20' Maa däjä tä cublou mlaobä, Yai Bada nija bä da naco, öjö lä. Täbä yanöcöobä tä mö jalu ma cui jamö, tä cublou mlaobä bä ꞑ da fa.
- 21' Täbä nö nia yai malä bleaaö wei. Yedu ja Yai Bada tänö täbä bluca lä tablano wei däjä, täbä nö bleaaö ma showaono wei ma cui, öjö tä lä cublole däjä bä nö nia shino yai bleaaö. Inaja täbä nia çai cuaaö ço ma mlai ma cui, öjö lä däjä moli bei bä nö nia shino yai bleaaö dodijio.
- 22' Öjö tä lä cublole däjä, Bada tänö tä jamabou bufio mlao fa cunoja, moli ma cui täbä nö demi feio buobö mlai. Öjö ma cui, cama ebä lä yaimabole bä feimabou fe yadiobä, tä nö nia dedejblamaimi.
- 23' Ai bä ꞑ ja, bä möla dijä —a cuma—. “ꞑBei, bei! ꞑYai Bada tänö a shömabä a lä yaileno wei a lä cui, ꞑquijamö a wawälayou lä cufe!”, ai bä ma cuu wei ma cui, “ꞑBei, bei! ꞑÄyämö a waloqueyoluu lä cufe!”, ai bä ma cuu wei ma cui, öjö bä ꞑ bejedi bufibla dijejä.
- 24' Bä lä jolemou wei bä nia malä wawäblou wei. Abinaja bä nia jole cuu. “Yai Bada tänö wale shömabä, camiyä wale yailema”, bä nia jole cuu. Yai Bada a wano jole jole lä wäyö wejei bä ma cui, öjö bä nia çai wawäö mö feduo. Yai Bada a mayo nia jole wawämaöje. Tä nö lä quilijii tä nia çai bluca wawämaö fe yadioje, täbä bufi fa taamajenö, täbä yaclämabeje. Yai Bada ebä lä yaimabole bä ma cui, öjö bä bufi taamaö fe yadiobeje bä nia wabäodii.
- 25' ꞑÖjö tawä? Tä nia lä cublou wei tä ja, bamacö yömölaö waiquia lä cule.
- 26' Wamacö nowa jole taöje ja, bä möla dijä, öjö lä —a cuma—. “ꞑBei, bei! ꞑUlifi bloque a jamö a wawälayou lä cufe!”, ai bä ma cuu wei ma cui, öjamö bä ju dijä. “ꞑBei, bei! ꞑQuijamö lä a lucälayou lä cufe!”, ai bä ma cuu wei ma cui, öjö bä ꞑ bejedi bufi dijejä.
- 27' Camiyä ya lä yanowamöblaleyoluno wei ya juu ço däjä ya nia juu jatoomi. Tä wacö ije ijemou däjä, mösö wawädblou lä culenaja ya nia wawadowä dablamous.
- 28' Wamacö bufi jaducublobä tä cuo weicätä. Ai bei tä jode blaobä jamö waduba bä lä çocamous wei tä malä wawädole —a cuma.
- 29' Abinaja Jesús a cuma. —Einaja täbä nö nia yai bleaaö lä cuo wei tä jödödöblou fa balölonö, motoca a shi nia luaaö majöo. Belibo a ma cui, inaja showawä a shi nia cuomi majöo. Shidicali bä ma cui, bä nia bläläo. ꞑÖjö tawä? Judu mösö jamö bä lä shadiladi bä nia layäcäbladayou.
- 30' Öjö lä däjä camiyä ya lä yanowamöblaleyoluno wei ya lä cui, wale nia itou lä jomadayou wei, judu mösö jamö tä nia bädodayou. Öjö däjä, jödödöwä bä lä bälöblai bä nia quilili şilalamoblalou cuaaö. 'Öjö däjä, camiyä ya lä yanowamöblaleyoluno wei ya nia shino yai bädoyoluu —a cuma—. Öläjashi a jamö ya shi çai bada fa itoimadunö, wale nia lojode dablaoje.

- 31 Öjö dǎjä, tä ʘ bada jolamou dǎjä, iba ʘjele bä lä cui ya bä nia shömaö cuaaö. Jödödöwä bä lä bälöblai jamö, iba ya bä lä yaileno wei bä nia çöblaö cuaaöje.
- 32 Ico fibä ja, showadi wamacö bufi dao talei —Jesús a cuma—. Defi jenabä ducuu dǎjä, “Fei dǎjä motoca shi ʘjeo çö nö culai”, wamacö bufi shino cuu.
- 33 Inaja showawä, ei ya tä ʘ bluca lä wäyafe tä wawäblou dǎjä, wamacö bufi daobä cätä. “Fei dǎjä, a itou ajedewä”, wamale nofi tabobä.
- 34 Cafä wamacö nija ei ya wä lä cui, bejedi lä ya wä. Wamacö fei dǎjä lä bälöblai wamacö bluca nomaö showaono mlai ja, öjö tä nia bluca wawäblou balöo.
- 35 Judu mösö ma cui, bita a ma cui, öjö bä bluca ma mlaolaliyo wei ma cui, camiyä ya wä nia mladoimi.
- 36 Öjö ma cui, ya tä ʘ lä wäyafe tä nia yai lä cubloyoluu wei, yanowamö täbänö öjö lä tä yai daimije —a cuma—. Yai Bada ʘjele bä lä culadi bä ma cuinö, inaja showawä tä çai daimi cuweje. Yai Bada bei Ijilubö ya e ma cuinö, inaja showawä ya tä çai daimi cuwä. Fayänö öjö tä shino yai daö ayawä.
- 37 Noewä dǎjä, bä yanowamö lä cuaano weinaja, inaja showawä, camiyä ya lä yanowamöblaleyoluno wei ya juu çö lä bufiöle dǎjä bä nia cuaaö çö —a cuma—.
- 38 Bä showadi iyaö çai çöcamou lä cuadino weinaja, bä çai doayou lä cuadino weinaja, inaja bä cuaaö showao dǎjä, bä nö dao mlai ja, canawä a bada jamö Noewä a lucälayoma.
- 39 Bä bufi mojodi li çai cublalodii showao dǎjä, tä ulifi fe bada fa baoblalunö, bä bluca waiquiblaö showadalayoma. ¿Öjö tawä? Camiyä ya lä yanowamöblaleyoluno wei ya juu çö dǎjä, inaja showawä, tä daö mlaoje dǎjä ya nia itou.
- 40 Öjö dǎjä, ficali ca jamö bolacabö cäcöbö nia ma ojodamou wei, ai a nia çöamou ayao, ai a nia daamou —a cuma—.
- 41 Nii bä jölöcaböbä jamö, suwä bolacabö cäcöbö nia ma ojodamou wei, ai a nia çöamou ayao, ai a nia daamou.
- 42 Bä nö da daicu, öjö lä. “Öjö dǎjä Bada a yai nia wawäö”, wama a nofi tabou malä mlai.
- 43 ¿Öjö tawä? —a cuma—. Cama e yano jamö a lä cule a moyawä çai cuo fa cunoja, a tomömu lä juimi a nö famaö fe jalubö mlai. “Öjö dǎjä a juimaö”, a bufi cuu fa cunoja, a nö lucämabö mlai.
- 44 Öjö cudeenö, cafä wamacö ma cui, showadi wamacö nö daobä, öjö lä. Wamacö bufi cuu mlao dǎjä, camiyä ya lä yanowamöblaleyoluno wei ya nia malä bädou wei —a cuma.
- 45 Abinaja Jesús a cuma. —Camiyä wamale nosie lä juaö wei wamacö lä cui, ¿wedi jamö wa lä cui, wa shino yai dodijaö daanö? Abinaja tä cuwä. Shomi jamö a bada nia lä juno wei a bada cuoma. A lä dodijaö wei a läo juobä, a nosiemafälöma. Abinaja a

nowa talemälöma. “Dodijidawä iba bä çai cua da jeicu. Bä iyabä tä cuo däjä, dodijidawä wa bä iyamabä”, a nowa talemälöma.

⁴⁶Öjö tawä? Bada e lä nosiemofälöno weinaja a cuaaö showao däjä, e bada waloamaö ço ja, a bufi doblalolanö e nia çoblamaö ço.

⁴⁷Cafä wamacö nija ei ya wä lä cui, bejedi lä ya wä —a cuma—. A nosie juaö cadidioma yalo, öjö bada a lä cuinö a nia bada läamaö nomöjöö, cama etäbä bluca lä tabou wei etäbä nofi tabobä.

⁴⁸Öjö ma cui, ai a lä cui, bada a nosie juabä a ma cui a dodijaimi ja, abinaja a bufi nia cuu dicoo. “Cuo buo. Bada tä ço jaöo malä mlai”, a bufi nia cuu dicoo.

⁴⁹Bada a nosie juamobä ebä mö feduwä lä cui, bä si nia shino yafelimaö juo dicoo. Täbä iyaö lä çocamou wei jamö a nia shino judii, bä shi wälii bufi lä doblao wei bä nijamö.

⁵⁰Inaja a cuaaö showao däjä, a nofi lä badabou wei e nia çoblou ço jätoyoluu. “Fei däjä a çobei”, a bufi cuu mlao däjä, a nia çoblou ço jätolayou.

⁵¹A lä shominajaano wei etä fa dalalönö, bada anö a nö nia bleamaö. Bä jole jole lä dodijaö wei bä nija a nia coyocomabou. Öjamö lä bä nia öcöö. Bä nö beblalou yalo, bä nia lalöö —a cuma.

San Mateo 25

¹Abinaja Jesús a cuma. —Yai Bada tänö cama ebä çai lä cuo wei tä lä cui, abinaja tä çai cuwä. Ai däjä, cäcöbö nia lä doayou wei cäcöbö nofi nia çocamoamaje. Suwä a nia lä dääö wei a nö wälo dabobeje jamö, bä moco 10 alayoma. Didi däjä a wälo nia jowa yafima yalo, cowa wacöbä shi cuobä täbä showabolajenö bä juoquema.

²Öjö bä suwä lä cui, ai 5 bä bufi mojodi cuoma —a cuma—. Ai bä 5 mö feduwä lä cui, bä bufi shino moyawäo ayaoma.

³Bä suwä bufi lä mojodi wei bä lä cuinö, cowa wacöbä shi didibobeje täbä tabou ma buono wejei ma cui, wacöbä nia lä ömöamaö wejei toubä dabö tabonomije.

⁴Öjö ma cui, bä bufi moco lä moyawäono wei bä lä cuinö, wacöbä shi didibobeje täbä fa showaalalöjenö, wacöbä nia lä ömöamaö wejei toubä çai dabö yefibou ayaomaje.

⁵Öjö tawä? —a cuma—. Suwä a nia lä dääno wei a lä cui, a çodalou jaöo fa mlacunö, suwä bä fa malishalönö, bä bluca miolaliyoma.

⁶Öjö ma cui, bähäcuoladi a wä bädaliyoma. “¡Bei, bei, bei! ¡Bä suwäbö e çobä, a jowa juu lä cuimi! ¡A mö da baamaduje!” a cuma.

⁷Öjö däjä, bä moco fa jocäcädalunö, cowa wacöbä lä ömöamaö wejei täbä febalashi wai janölemaje.

8' Bā bufi suwā moco lä mojuduono wei bā lä cuinö, bā bufi lä moyawä wei abinaja bā nowa tamaje. “Cowa yama wacöbä ömöamaö mö feduobä, toubä dabö mashi da löabayaje. Yamacö luwämoblalou dicoa lä cule”, bā nowa tamaje.

9' Öjö ma cui, bā bufi lä moyawäono wei bā lä cui, abinaja ebä cuma. “Ma, cafä wamacö nija yama toubä mashi löa dicoaquei ja, bamacö bluca jödödöwä nia luwämolayou. Toubä dabö lä jöbäö wejei bā jamö wamacö fa alufälönö, afä toubä shino yai da luluaje”, ebä cuma.

10' Toubä dabö doabeje bā suwä ayono wei ja, bā suwäbö e nia lä däano wei a wəlo çoblou nodia jəlayoma. Öjö dāja, toubä dabö tabou lä ayaono wejei bā suwä lä cui, öjö nijamö bā nocao feyaa ayalayoma, cəcöbö nofi nia lä çəcamoano wejei jamö. Bā bluca fa falalunö, yoca laquemaje.

11' Tä nö fa dedejedalönö, bā lä yododale jamö ai bā moco waloa jäquema. Sibö jamö bā culanö bā comöma. “;Bada tä! ;Bada tä! ;Yamalecö da famaliyo!”, bā cuma ma cui,

12' a wə lämoma. “Ma”, a cuma. “Cafä wamacö nija ei ya wə lä cui, bejedi lä ya wə. Bamacö daimi”, a cuma.

13' ;Öjö tawä? —Jesús a cuma—. Bā nö da daicu, öjö lä. Wamacö bufi cuu mlao dāja, camiyä ya lä yanowamöblaleyoluno wei ya nia malä bädou wei —a cuma.

14' Abinaja Jesús a cuu nomöjöoma. —Yai Bada tänö cama ebä çai nia lä cuo wei, abinaja tä çai cuwä. Bada a lä cui, shomi jamö a nia juu yalo, cama a nosie lä juamou wei ebä nacalema, bā nosiemafälöbä. Bafi jaduculanö ebä blada fa nomöjöajenö, ebä blada omaö juobeje.

15' ;Öjö tawä? “Ei a lä cuinö 5 bā julii daö”, a nofi lä tabono wei a nija, 5 ebä jöböquema. “Ei a lä cuinö bolacabö cəcöbö”, a nofi tabou mö lä feduono wei a nija, bolacabö cəcöbö jöböa mö feduquema. Inaja showawä, ai a nija moli a jöböaquefälöma. Öjö dāja, a alayofälöma.

16' Cama bada e nija 5 bā blada lä däleno wei a lä cuinö, bufi jaduculanö bā blada nomöjöaö fa showadaonö, 5 ai ebä blada çəcablamaö çəlayoma.

17' Inaja showawä, bolacabö cəcöbö blada lä däleno wei a lä cuinö, cama ebä çai nomöjöa mö fedua fa showalänö, bolacabö ai ecöbö çəcablamaö çə mö fedulayoma.

18' Inaja cama bā ma cuaano wei ma cui, blada moli a lä däleno wei a lä cui, a wabäonomi. Mashita jamö täca fa diyäcönö, bada blada e fa didicönö e bateliquema.

19' ;Öjö tawä? —Jesús a cuma—. Tä nö fa dedelönö, bada a çoblou çəlayoma. A nosie juamobä ebä lä cui bā nacalema, cama ebä blada nomöjöaö lä juono wejei tä ja, bā a nö wäamabä.

20' Ai e lä cuinö, 5 ebä lä jämaqueno wei e lä cuinö, blada 10 ebä çai icua balöblaquema. Abinaja a cuma. “Bada tä. Camiyä nija afä 5 wa bā blada da jöböbai, dodijidawä ya bā nomöjöaö fa juonö, aifä 5 ya bā yädäblamaö çəlayoma”, a cuma.

- 21**Bada abinaja e cuma. “iWa dodijaö juo waiquioma lä! Wale nosie juaö si ijejewä waiquiwä. Ya bä blada wai da jöböaquii, cäcö ma bolacamiono wei ma cui, wa dodijaö juo fe yadioma yalo, cafä bada bäfä nia tablamaö. Camiyä nijamö a cua da showadaiquiyo, camiyä sho bäfäcö bufi doblalou çai cuobä”, e cuma.
- 22**’Blada bolacabö ecöbö lä jämaqueno wei e lä cui, öjö a icua nomöjöküema. Abinaja a cuma. “Bada tä. Camiyä nija afä bolacabö wa cöbö blada da jöböbai, dodijidawä ya bä nomöjööaö fa juonö, aifä bolacabö ya cö yädäblamaö çolayoma”, a cuma.
- 23**Bada abinaja e cuma. “iWa dodijaö juo waiquioma lä! Wale nosie juaö si ijejewä waiquiwä. Ya bä blada wai da jöböaquii, cäcö ma bolacamiono wei ma cui, wa dodijaö juo fe yadioma yalo, cafä bada bäfä nia çai tablamaö mö feduo. Camiyä nijamö a cua da showadaiquiyo, camiyä sho bäfäcö bufi doblalou çai cuobä”, e cuma.
- 24**’¿Öjö tawä? —Jesús a cuma—. Blada moli e lä jämaqueno wei a ma cui, öjö a icua nomöjöküema. Abinaja a cuma. “Bada tä. Afä wa bä fe blacäjamaö talei. Ai bä lä ojodamou wei jamö, showadi cafä wa shino bayeliblamou talei.
- 25**’¿Öjö tawä? Bäfä daö waiquia cudeenö ya quilima. Mashita jamö, afä ya blada jöyaboma. Bei. Afä wa blada da jöböbai, eifä a çodawä”, a cuma.
- 26**Öjö ma cui, abinaja bada e cuma. “Bejedi lä wa dobloimi. Wale a juaö dobloimi waiquiwä. Cafä wa wä faö ja, iba ya bä fe jowa lä blacäjamaö wei wa tä dama. Ai bä ojodamobä jamö camiyä ya jowa shino lä bayeliblamou wei, wa tä çai jowa dama.
- 27**Inaja ya jowa cuaaö waiquiwä ja lä, ¿wedi tä tabä, bei wa li wabäonomi, öjö lä? Bä blada lä nomöjööaö wejei bä nija wa blada majöaö fa cunoja, iba ai wa bä nö shino wai çocablamalebö wei”, e cuma.
- 28**’Öjö däjä, ai ebä nija bada a wä fama. “Quijinö moli a blada lä table, a da çoleje. 10 bä lä table nija a jöböa da majöcöje”, a cuma.
- 29**“Bä li dodijaö yalo, bä lä tabolajei bä nija ai bä nia jöböamou malä ço wei. Inaja bä lä cuaaö wei bänö, bä nia shino yai blucablamaö majöoje”, a cuma. “Öjö ma cui, bä tabou lä mlajei bä nija, wiisibö a tabou ma bälajei ma cui a nia çamou, bä li dodijaimi waiquiwä cudeenö”, a cuma.
- 30**“Ya nosie juamobä ei a doblou lä mlai a lä cui, sibo jamö a da shäyäblacöje, tä mö dödüobä jamö. Öjamö bä nia öcöö. Bä nö beblalou yalo, bä nia lalöö”, bada a cuma. ¿Öjö tawä? —Jesús a cuma.
- 31**Abinaja Jesús a cuma. —Camiyä ya lä yanowamöblaleyoluno wei ya lä cui, ya shiji wacacawä jamö ajele ya bä çai lä itole däjä, ya döcäobä täcö lä doblale jamö ya nia döcäo.
- 32**Öjamö, camiyä nija bluca täbä bälöjowä lä yaiblai bä fa yododoblaliyonö, ya bä nia yaii cuaaö. Yalo shibo bä nijamö oweja ebä lä coyocoblai, bä yaiblamaö lä culajainaja, ya bä nia tablamaö.

- 33 Jayu ya boco mashi jamö, oweja ya bä nia li yaiblamaö. Ai ya boco mashi lä cui jamö, shibo ya bä nia ayabou.
- 34'Öjö däjä, bada ya yai lä cuinö, jayu ya boco mashi jamö bä lä cule, abinaja ya bä nowa nia taö. "Fayänö wamacö lä bayelibou wei wamacö lä cui, äyämö bämacö nia ajedemabou, camiyä nija wamacö dodijidawä cuobä. Bitä tä colo jaba lojodobou showao mlao däjä, bämacö çai nia lä cuo wei, Fayänö tä daö showaoma.
- 35 Ya ofäö däjä, wamale malä iyamano wei", ya bä nowa nia taö. "Ya çai amishaö däjä, wamale amishi çai malä çamano wei. Wamale daö ma mlai ma cui, dodijidawä wamale çai malä bälömabono wei.
- 36 Ya shinoco cuo däjä, camishi cäcö ja wamale çai malä lucämano wei. Ya jalilio däjä, wamale jalili çai malä loono wei. Ya fe ma lao däjä ma cui, wamale fe çai malä waloono wei." Einaja ya bä nowa nia taö.
- 37'Öjö däjä, öjö bä lä cadidou wei bä lä cui, camiyä nija abinaja bä nia cuu. "Bada tä. ¿Wedi däjä bäfä ofäö li fa dalalönö, bäfä li iyamama? ¿Wedi däjä bäfä amishaö li fa dalalönö, bäfä amishi li çamama?
- 38 ¿Wedi däjä bäfä daö ma mlai ma cui, bei bäfä li dodijidawä bälömaboma? ¿Wedi däjä bei bäfä li shinoco fa dalalönö, camishi cäcö ja bei bäfä li lucämalema?
- 39 ¿Wedi däjä bei bäfä jalili li çai looma? ¿Wedi jamö wa fe lao däjä, bei bäfä fe li walooma?" bä nia cuu.
- 40'¿Öjö tawä? —Jesús a cuma—. Öjö lä däjä, Bada ya yai lä cui, abinaja ya nia cudou. "Cafä wamacö nija ei ya wä lä cui, bejedi lä ya wä. Iba ai bä wai cua lä bädale bä ma cui, öjö wama bä lä bayeliblaö wei däjä, jai camiyä wamale bayeliblama, bämacö nofi tabou showadaoma", ya nia cudou.
- 41'Öjö däjä, ai ya boco mashi jamö bä lä cule bä nija ya wä nia faö nomöjöö. Abinaja ya e nia cudou. "Bei. Bä da alufälö. Yai Badanö wamacö nö nia jowa lä bleamano wei wamacö lä cui, shobali wacö jamö bä da culu, fecula bada a nö bleaaö shi wäliblobä wacö lä tablamolayono wei jamö, cama ajele ebä wälidawä çai nia lä cuo wei jamö.
- 42 Ya ma ofäö däjä ma cui, wamale iyamaö malä mlaono wei. Ya amishaö däjä, wamale amishi çai çamaö malä mlaono wei.
- 43 Wamale daö lä mlai ya waloo däjä, wamale çai bälömabou malä mlaono wei. Shinoco ya lä cuono wei däjä, camishi cäcö ja wamale çai lucämaö malä mlaono wei. Ya lä jaliliono wei däjä, ya fe çai lä laono wei däjä, wamacö çai juu malä mlaono wei", ya e nia cudou.
- 44'¿Öjö tawä? —Jesús a cuma—. Öjö däjä, abinaja cama bä nia cuu. "Bada tä. Wa lä ofäno wei däjä, wa çai lä amishano wei däjä, bäfä çai danomi. Bäfä daö mlao däjä, bäfä çai waloo dabanomi. Wa lä shinocono wei däjä ma cui, wa lä jaliliono wei däjä ma cui, wa fe lä laono wei däjä ma cui, ¿wedi jamö bei bäfä li dalalema, bei bäfä li bayeliblanomi?", bä nia cuu.

⁴⁵Öjö dǎjä, abinaja ya bä nowa nia taö. “Cafä wamacö nija ei ya wǎ lä cui, bejedi lä ya wǎ. Iba ai bä wai cua lä bǎdale bä ma cui, öjö wama bä bayeliblaö lä mlaono wei dǎjä, jai camiyä wamale bayeliblanomi wamacö cuoma”, ya bä nowa nia taö.

⁴⁶Öjö dǎjä, bä nö bleaaö shi wǎlibä, bä nia alayofälöö. Öjö ma cui, bä lä cadidou wei bä lä cui, bǎlimi bä nia lä cudio wei jamö öjö bä nia juu ayao —Jesús a cuma.

San Mateo 26

¹Jesúsnö tǎbä damaö fa waiconö, cama ebä lä nocamabono wei bä nija abinaja e cuu nomöjöoma.

²—Bolacabö tä mö didi fa cublalunö, Yai Bada a waiteli lä jayvano wei a nofi nia çocamoao çoje. Wama tä daö waiquiwä. Camiyä ya lä yanowamöblaleyoluno wei ya lä cui, wale nia jöböaöje, fii balitama defi ja wale basuabeje —e cuma.

³Öjö dǎjä showadawä, nofi bäyäälewä bada e yafi jamö, bada bä çocamolayoma, Caifasi a wǎfa lä cule e yafi ja. Öjamö lä judio bä bada çocamolayoma, nofi bäyäälewä bä blowǎjawä sho.

⁴Öjamö bä ǎ bluca wayoma. Bä bufi moyawǎlanö Jesús a nia juwäämaje, a shäbeje.

⁵Öjö ma cui, abinaja bä cuma. —Tǎbä iyaö çai çocamou showaono mlai ja, bäma a yai shäö showadaobä, tǎbä nia lä çocamou wei tǎbä shifilimoblalou dicoo wei —bä cuma.

⁶Bedaniateli Simón e yafi jamö, Jesús a cuoma. Öjö a Simón lä cui, tǎbä sicö lä jodemaö wei tä wayunö a lä jaliliono wei, bei a li cuoma.

⁷Öjö dǎjä, suwä anö toubä nö lä clēdeli wei toubä besi çai waloqueyoluma, toubä nowa bluca lä dodijii. Toubä fe fa caloblalönö, Jesús a iyaö çai loo dǎjä, a fe löblalema.

⁸Öjö ma cui, Jesúsnö bä lä nocamabono wei bä lä cuinö, öjö tä mööje ja, bä bufi jushujudou dicolayoma. Bä bufi jushudou fa dicolonö, abinaja bä bufi cudaliyoma. “Toubä nowa ma bluca wei ma cui, ¿wedi tabä toubä li wǎlia bälei?”

⁹Öjö lä toubä ja, ¿wedi tabä blada bä bluca li dǎanomi, bä lä jöli wei bä yai bayeliblamobä?”, bä bufi cudaliyoma.

¹⁰Öjö ma cui, Jesúsnö bä bufi daö fa showadaonö, abinaja bä nowa tama. —¿Wedi tabä bei wama a bufi li suwä yabäcaö dicoblaa cule? Wale fe lä löblalöfe, tä dodijidawä waiquiwä.

¹¹Bä lä jöli wei bä lä cui, cafä wamacö nijamö showadi bä nia malä cudio wei, wama bä bayeliblabä. Öjö ma cui, camiyä ya yai nia cudiomi.

¹²Toubä nö lä clēdeli wei toubänö, showadi tǎbä nomawä lä jölöcaö wejeinaja, bei wale taamaö balöa lä cule.

13' Cafä wamacö nija ei ya wä lä cui, bejedi lä ya wä —a cuma—. Jödödöwä tä jamö ma cui, iba dodijidawä tä ʼ wäyämamou cuaabä jamö, ei a suwänö wale fe lä löblalöfe, tä ʼ afa nia cai wäyämamou cuaaö mö feduo, a lä dodijano wei tä nofi jaducubou nodiablalobeje —bä nowa tama.

14 Öjö däjä, Jesúsno bä 12 lä nocamabono wei a Juda Icaliode lä cui, nofi bäyäälewä blowäjäwä bä nijamö a fa alufälönö,

15 abinaja a cuma. —Cafä wamacö nija Jesús ya jömöaö ja, ʼ wedi täbä ja, bei wamale dobälei? —a cuma. Einaja a cuu ja, a nia lä nomojoliano wei tä nowa ja, blada 30 ebä jöböquemaje.

16 Öjö däjä, a nia lä nomojoliano wei tä dayäaö showadaoma.

17 Nii bä juluu lä mlai bä ja, bä jaba iyaö cai çocamou ço däjä, cama ebä lä nocamabono wei bä lä cui, abinaja Jesús nija bä cuyoluma. —ʼ Wedinaja wa bufi cuu? Yai Bada a waiteli lä jayuno wei bäma a nofi çocamoä çobä, ʼ wedi jamö yafi lä cui jamö yama bä nii baabä? —bä cuma.

18 Abinaja Jesúsno bä nowa tama. —Bei. Shabono jamö wamacö çoblou ja, wamale wano nia lä wäyää wei, wama a nia dabraö. “Tä ʼ lä wäyää wei, yama a wano wäyää lä cule”, wama ecö cuu ja, wamacö ʼ nia jiliaö. Ya nia lä taamamou wei tä ajedewä waiquiwä cudeenö, öjö lä e yano jamö, cafä bämacö lä nocamabole wamacö sho, bämacö nia iyaö —Jesúsno bä nowa tama.

19 Jesúsno bä nowa lä tano weinaja, inaja showawä cama ebä lä nocamabono wei bä cuaama. Yai Bada a waiteli lä jayuno wei a nofi çocamoä çobeje, öjö a yafi jamö täbä nii baquemaje.

20 Tä mö weyaaö däjä, Jesúsno cama 12 ebä lä nocamabono wei bä cai looma, bä iyabä.

21 Bä iyaö däjä, abinaja Jesús a cuma. —Cafä wamacö nija ei ya wä lä cui, bejedi lä ya wä. Cafä wamacö ai a lä cuinö wale nia nomojoliaö —a cuma.

22 Cama a wä ja bä nofi fa jalujublamolunö, abinaja bä cudaliyoma. —Bada tä. ʼ Camiyä inaja ya nia cuaaö tawä? —bä cudou nocalayoma.

23 Abinaja Jesús a cuma. —Ei nii ya lä ödäale jamö a nii cai ödäaö lä yädämofe a lä cuinö, öjönö wale nia nomojoliaö.

24 ʼ Öjö tawä? —a cuma—. Camiyä ya lä yanowamöblaleyoluno wei ya lä cui, bejedi wale nia nomamaöje, Yai Bada etä ʼ oni jamö ya wäfa lä wäyämamou weinaja showawä. Öjö ma cui, wale yai nia lä nomojoliaö wei a lä cui, öjö a nö nia shino yai bleaaö dodijio. Bä nöönö a lä didibole jamö, a oshe wai mojudi nomaö showadao fa cunoja, etä nö shino yai doblaobö wei —a cuma.

25 A nia lä nomojoliaö wei Juda a ma cui, abinaja e cuu mö feduoma. —Bada tä. ʼ Camiyä inaja ya nia cuaao tawä? —e cuma. Abinaja Jesús e cuu nomöjöoma. —Jöö. Wa lä cufenaja waiquiwä —e cuma.

- 26**Bä iyaö showao däjä, nii a fa dälänö, Yai Bada nija a bufi ʔafa doblalou wäyämoma. Öjö däjä, a fa joyolalönö, cama ebä lä nocamabono wei bä nija bä jöbäö cuaama. Bä jöbälänö abinaja a cuma. —Ei nii a da dälöje. Bä da walöje. Ei nii a lä cui, camiyä ei bei ya yaji nö owä —a cuma.
- 27**Öjö däjä, jishima a ja, nashiwä toubä befi çai dää nomöjölema. Yai Bada nija a bufi ʔafa doblalou wäyämou fa balöonö, cama ebä lä nocamabono wei bä nija ubä befi çai fa jöbäcönö, abinaja bä nowa tama. —Bluca wamacönö ei ubä codaö da cuaaje.
- 28**Yai Bada tänö tä ʔafa lä wäqueno wei tä ʔa bejedi cublobä, öjö bei lä ya iyäbö nö owä malä cui. Bluca täbä bayeliblamobä ya iyäbö läblalio, täbä doblou lä mlai etä nowa mladobä.
- 29**Cafä wamacö nija abinaja ya cuu. Ei uba bäma nashiwä toubä lä coale, ya toubä nia coaö ço jaöomi. ¿Öjö tawä? Obi, Fayänö bämalecö çai cuobä jamö, cafä wamacö sho, bäma toubä nia shino coaö ço —bä nowa tama.
- 30**Öjö däjä, bä amowamoa fa balölönö, Oliba tä balöcö jamö, Jesúsnö cama ebä çai aa çolayofälöma.
- 31**Öjamö lä bä çai jufälölanö, abinaja Jesúsnö bä nowa tafälöma. —Waija, didi däjä, wamacö bluca fa quililalunö, yamale nia daa dicoquei. ¿Öjö tawä? Abinaja Yai Bada etä ʔa oni malä cuu wei. Iba oweja bä çai lä cule a lä cui, öjö ya fa shämälönö, cama ebä nia sheleleblamodayou. 'Einaja tä ʔa oni cuu.
- 32**Öjö ma cui, ya demi jocädou fa çolonö, Calilea tä ulifi jamö bamacö möyou çobä, ya nia balölayofälöö —Jesús a cuma.
- 33**Pedro a nö wäo ja, abinaja e cuma. —Ei bä lä cui bä fa quililalunö, wa ma daquei wejei däjä, camiyä ya inaja cuaaö mlaicätä. Camiyänö bäfä daaö mlaicätä —a cuma.
- 34**Jesúsnö abinaja Pedro a nowa tama. —Cafä nija ei ya wä lä cui, bejedi lä ya wä. Ei tä didi showawä ja, cadala a wä faö showao mlao däjä, cafänö 3 wale nofi nia jole jole mojudoubou —a nowa tama.
- 35**Öjö ma cui, abinaja Pedro e cuu fe yadioma. —Ma. Cafä bäfä bayeliblaö ja, ya shämou mö feduobä tä ma cublole ma cui, bäfä nofi nia jole jole mojuduboimi —e cuma. Inaja showawä, cama ai ebä lä nocamabono wei bä bluca cublalou mö feduo showaoma.
- 36**Öjö däjä, Jesemani tä ʔafa ulifi lä jilabou wejei jamö, Jesúsnö cama ebä çai alayofälöma. Öjamö bä çai fa waloalunö, cama ebä lä nocamabono wei bä nija abinaja Jesús e cuma. —Yai Bada nija ya nö bayeli nacaodayou däjä, eja bä loa jää da balöicu —a cuma.
- 37**Pedro a lä cui, Sebedeo bä ijilubö ecöbö çai lä cui, öjö bä shino nacefälöma. Öjö bä çai fa bayäcäblaludunö, a bufi jalujublou dodijilayoma. A bufi çai wajäblaliyoma.

³⁸Abinaja e cuma. —Bufi jalujou tänö jai ya nö nomaa showadalayobö ya bufi cuaaö dicoa lä cuimadi. Eja bä jilaa da jeicu, camiyä ya nö dao däjä, cafä wamacö nö dao mö feduobä —bä nowa tama.

³⁹Jesús a bayäcäblou fa çolodunö, a blaaledayoma. Yai Bada nija a nö bayeli nacao ja, abinaja a cuma. —¡Fabe! Fei däjä wale nö yai nia lä bleaamaö wejei tä lä cui, wa tä blajamabä tä cua ja, tä da blajamalö. Öjö ma cui, wa tä nö blajamabimi waiquiwä ja, öjö waiquiwä. Camiyä ya cuaaö bufi lä doblao weinaja mlai, cafänö wale taamaö bufi lä doblao weinaja, wale da taama —a cuma.

⁴⁰Öjö däjä, cama ebä lä nocamabono wei bä jilaa lä jäle jamö a waloo fa çoiquiyonö, bä mia dalalema. Pedro nija abinaja e cudaleyoluma. —Wa nö nia lä dao wei, wa nö dedejbloimi waiquiwä.

⁴¹Bä nö shino da daicu. Yai Bada nija bä nö çai bayeli da nacao, Sadanasinö wamacö yabäcäblaö däjä, wama a wä juaö yacläo dicoo mlaobä. Wamacö cadidou bufi ma doblao wei ma cui, wamacö ujuduu si ijejewä waiquiwä—Jesús e cuma.

⁴²Öjamö lä a aa mö yabaa fa çolunö, a nö bayeli nacao çodayoma. Abinaja e cuma. —¡Fabe! Fei däjä ya yai nö nia lä bleaaö wei tä lä cui, tä nö jaamodobimi waiquiwä ja, inaja lä waiquiwä. Ya yai taamamobä tä cua ja, öjö tä çai waiquiwä. Cafänö wa tä yai taamaö lä buffi weinaja, tä shino cublobä —e cuma.

⁴³Öjö däjä, cama ebä jilaa lä juono wei jamö a waloo fa çoiquiyonö, bä mia daa çolaleyoluma. Bä malishama yalo, bä laðiobä bä cuonomi.

⁴⁴Inaja bä cuaaö dicooma cudeenö, bä daa fa çoçufälönö, a aa mö yabaa çolayoma. Yai Bada nija 3 a nö bayeli nacao ço ja, a jaba lä cuno weinaja, inaja showawä a cuu çoma.

⁴⁵Öjö däjä, cama ebä lä nocamabono wei bä nija a waloo lä çole däjä, abinaja bä nowa tadaleyoluma. —¡Uo! ¿Wamacö midia showaa cule? ¿Bei wamacö washimi jolou showawä tawä? Bei. Fei däjä, tä cublou waiquia lä cule. Ya lä yanowamöblaleyoluno wei wale nia nomojoliaö, täbä doblou lä mlai bä nija wale jöböabä.

⁴⁶¿Öjö tawä? Bei. Bä da jocäcadalu. ¡Bamacö da jufälö! ¡Quiji, quiji, tä da möje! Wale nia lä nomojoliaö wei a lä cuinö bä çai juu waiquia lä cuimi —bä nowa tama.

⁴⁷Jesúsnö inaja bä nowa taö showao däjä, bä lä toujublaliyono wei bä lä cui, yedu Judanö bä çai blacädaleyoluma. Sibala bä showabomaje, nablushi bä çai. ¿Öjö tawä? Öjö Juda a lä cui, Jesúsnö cama 12 ebä lä nocamabono wei ai e cuoma. Nofi bäyäälewä blowäjäwä bä ma cuinö, judio ai bä bada ma cuinö, öjö bänö bä wayu shömölemaje.

⁴⁸¿Öjö tawä? Jesús a nia lä nomojoliaö wei a lä cuinö, abinaja bä nowa taö balöoma. —Ya mamocacö nia lä buyucaö wei, öjö bei a waiquiwä, wama a juwäabä —bä nowa taö balöoma.

⁴⁹¿Öjö tawä? Jesús a nabä cadidio showadaolanö, abinaja e cuma. —¡Bada tä! —e fa cudalunö, mamocacö buyucaö showadaoma.

- 50** Abinaja Jesús e cuma. —Nofi. Wa tä nia lä taö wei tä taö da showadao —e cuma. Öjö däjä, Jesús a nabä quea fa showadaicujenö, a juwälemaje.
- 51** ¿Öjö tawä? Jesúsno ai e çai lä cuono wei a lä cuinö, sibala a fa ucädalönö a ishoa mö balayoma. Nofi bäyäalewä bada a wä juamobä e nabä fa queicunö, e yömöca baquequeblalema.
- 52** Öjö däjä, abinaja Jesús e cuma. —Sibalafä a taa da çocu. Sibala bänö täbä nofi lä bäyao wei täbä lä cui, sibala bä showawänö täbä çai nia malä shämou wei.
- 53** “A nö bayeliblamobimi waiquiwä”, ¿bei wale nofi tabou dicoa da culanö? Ma. Fayä nija ya nö bayeli nacao fa cunoja, ajele bluca fe balojowä bä lä yododoladi, bä nö shömöa showadalebö wei.
- 54** Öjö ma cui, inaja ya cuaaö dicoo ja, Yai Bada etä a bejedi wawäblou mlaicätä. Ei wale lä taamalajei, Yai Bada etä a bejedi yai cublobä, öjö lä tä waiquiwä —a cuma.
- 55** Öjö däjä, a nabä lä toujono wei bä nija abinaja a Jesús cuma. —Tomömolewä bä nabä juu lä culajeinaja, ¿wedi tä tabä bei wamale nabä li juu cuaaö dicoo cufe? ¿Wedi tä tabä shocobi, nablushi wama bä çai fa juimanö, bei wamale li juwämaö cuboyoi? Yai Bada etä yafi jamö showadi ya lolanö ya täbä yömölama ma cui, wamale juwäano malä mlai.
- 56** Öjö ma cui, Yai Bada etä a oni jamö tä a lä cuu weinaja tä a bejedi cublobä, ei tä waiquiwä —a cuma. Öjö däjä, cama ebä lä nocamabono wei bä lä cuinö, Jesús a fa dacöfälöjenö, bä bluca docuolaliyoma.
- 57** Öjö däjä, Jesús a lä juwälenu wejei bä lä cuinö, Caifasi nijamö a öbölefälömaje, nofi bäyäalewä a bada nijamö. Öjamö lä Moisesi etä a ja täbä lä damaö wejei bä bluca çocamou waiquioma, judio ai bä bada sho.
- 58** Öjö ma cui, Pedro a jäwäjawä fa yauicunö, nofi bäyäalewä bada e yafi sibo lä jicoloji jamö a lucäa jälayofälöma. Öjamö, Yai Bada tä yafi lä nowamano wejei bä lä loono wei jamö, a çai loa mö fedualiyoma, Jesús a nia lä taamano wejei tä nö daabä.
- 59** Bei. Nofi bäyäalewä blowäjawä bä ma cuinö, ai bä bada yododaö mö lä feduono wei bä ma cuinö, Jesús a wäfa jole wäyäbeje bä dayäamaje, öjö lä bä a ja, a shämaö showadaobeje.
- 60** Bä ma dayäano wejei ma cui, bä cuonomi. A wäfa nia jole lä wäyao wejei bä a bluca faö ma buono wei ma cui, bä a jilimamou bejedionomi. Yaçumö, bolacabö cäcöbö ublaa möamoblaliyoma.
- 61** Abinaja cäcöbö cuma. —Ei a lä cui, abinaja a cuma. “Ei Yai Bada etä yafi lä cui, ya etä yafi fa wälialönö, bolacabö tä mö didi cublou fa çolonö, ya etä yafi itabou çoquei.” Einaja a cuu cublelei —cäcöbö cuma.
- 62** Öjö däjä, nofi bäyäalewä bada a fa ubladalunö, Jesús a wä nia fa wäamanö, a wälili cadidioma. —¿Wa wä nia juomi tawä? Wa wäfa lä wäyäböfe, ¿cäcöbö a bejedi tawä? —e cuma ma cui,

⁶³Jesús a wə juo mlai ja, mamicaí a ubladioma. Öjö dǎjá, nofi bǎyǎalewǎ bada a lá cui, abinaja a cuu nomöjööma. —A wə nö da wǎicu, Yai Bada a demi shi lá wǎlile a malǎ cule. Yai Bada tǎnö a shömabǎ a lá yaileno wei, ¿Öjö lá cafǎ bei wa e waiquiwǎ tawǎ? ¿Yai Bada wa etǎ Ijilubö dodijiwǎ tawǎ? A wə nö da wǎbo —a cuma.

⁶⁴—Awei. Öjö lá ya e —Jesús e cuma—. Ya lá yanowamöblaleyoluno wei ya lá cui, Yai Bada a nö wǎlojaö lá ayao wei boco jayu mashi jamö, wamale nia çai dödǎa dabladayou. Ölajashi a jamö, wamale çai nia itou dablaö —a cuma.

⁶⁵Öjö a wə ja, nofi bǎyǎalewǎ bada a lá cui, a nö wǎlowǎ jushudaliyoma yalo, a camishibö cacablamolayoma. Abinaja bǎ nowa bluca tama. —¿Öjö tawǎ? Yai Bada a nö waiblaö lá cufe. ¿Wedi tǎ tabǎ ai bǎma bǎ ǎ li jǎliaa çolei? Yai Bada a nö lá waiblafe, fei dǎjá wama a wə jǎliaa waiquilei lá cufe. Yanowamö a ma cui, ¿Yai Bada a wǎfa jilou!

⁶⁶Fei dǎjá ¿wedinaja wamacö bufi cuu dodijio? —bǎ nowa tama. Abinaja bǎ cuma. —A shǎmobǎ a waiquiwǎ —bǎ cuma.

⁶⁷⁻⁶⁸Öjö dǎjá, a mö clǎshamaje. A çai shǎdaamaje. Ai bǎ mö feduwǎ lá cuinö a si çai baidamaje. Mamocu fa joyabojenö, a nö waiblaöje ja, a çai wǎlimaje. —Yai Bada tǎnö wa shömabǎ wa jowa lá yaileno wei wa lá cui, tǎ ǎfa wǎa da cadidiba. ¿Wedinö bei wa shǎlei cufe? —a nowa tamaje.

⁶⁹Yafi sibo lá jǎcoloi jamö, Pedro a loo showaoma. Öjamö a loo dǎjá, moco a icua fa ajedeicunö, abinaja a cuma. —Calileateli Jesús a lá cui nija cafǎ wa çai cuoma —a cuma.

⁷⁰Öjö ma cui, cama nija bǎ mamö bluca lá showale dǎjá, a wə jole mojudumoma. Abinaja a Pedro cuma. —Cuwí. Camiyǎ nija wa lá cufe, ya tǎ daimi —suwǎ nija a cuma.

⁷¹Yoca lá joleono wei jamö a icua cublou dǎjá, suwǎ ai anö a daa fa nomöjölalönö, a wə faö çö nomöjööma, ai bǎ ublao lá ajedeono wei bǎ nija. —Nasaleteli Jesús a lá cui nija fei a çai cuoma —a cuma.

⁷²Öjö ma cui, a wə lojodoaö ja, a wə jole mojudumou çöma. Abinaja a cuma. —Öjö a wǎlo lá cui, ya daimi —a jole cuma.

⁷³Tǎ nö dedejedou fa çolonö, bǎ ublao lá ajedeono wei bǎ lá cui, abinaja Pedro nija ebǎ cuu çöma. —Bejedi lá, öjö bǎ nija cafǎ wa çai çöcaoma. Calileateli bǎ ǎ faö lá culenaja, wa wə faö malǎ cui —bǎ cuma.

⁷⁴Öjö ma cui, Pedro a wə jole mojudumou çö ja, a wǎfa wǎamoma. Yai Bada a wǎfa çai jayumama, a jolemou bǎdao ja, a nö bleaamamou showadaobǎ. —Öjö a wǎlo lá cui, ya daimi —a jole cuma. Inaja Pedro a lá cuno wei dǎjá, yedu cadala a wə nocablaliyoma.

⁷⁵A wə cadala falayoma yalo, Jesúsnö a nowa lá tano wei Pedronö tǎ nofi jaducudalema. “Cadala a wə faö showao mlao dǎjá, 3 wale nofi nia jole mojudoubou”,

a nowa malä tano wei. Öjö däjä a bufi fa wajäblalunö, a siboa fa showadalunö a öcöma.

San Mateo 27

¹Tä mö jaba jaluimaö däjä, nofi bäyäälewä blowäjäwä bä ma cui, judio bada ai bä ma cui, öjö bä bluca fa yododoblalunö, bä ą wayolayoma, Jesús a shäbeje.

²Öjö däjä, bococu fa ęcacöjenö, Bilado nijamö a öbölefälömaje, Lomateli bänö Bilado a bada lä lämabono wejei a nijamö.

³Cama a wəno Jesús a nia shäö lä showadao wejei tä fa dalalönö, Juda a bufi wəlidiblaliyoma, a lä nomojoliano wei a lä cui. A bufi wəlidiblaliyoma yalo, bä blada ęa ęomaquema. ¿Öjö tawä? Nofi bäyäälewä blowäjäwä bä ma cuinö, judio bada ai bä ma cuinö, Jesús a jömöabä bä blada 30 lä jöböqueno wejei, cama bä nija bä ęa ęomaquema.

⁴Blada bä ęamalanö abinaja e cuma. —Jesús a wəfa tamobä tä cua ma mlai ma cui, ya nomojolia fa dicolunö ya doblou mlaa lä cule —a cuma. Abinaja bada ebä cuu nomöjöoma. —Cafä wa li dobloimi. Yamalecö yabäca dijä —bä cuma.

⁵Öjamö lä, Yai Bada etä yafi jamö, blada bä fa shäyāblacöfälönö, a faa ęolayofälöma. A fa alufälönö, cama a olami shjamolayoma.

⁶Nofi bäyäälewä bä blowäjäwä lä cuinö bä blada doa fa jälälöjenö, abinaja bä nowa tayou juoma. —Eja, Yai Bada etä yafi jamö, yama bä blada lä nowamale jamö, ei bä blada nö didiobimi. Tä ą läa. Unocaye cäbä —bä nowa tayoma.

⁷Öjö cudeenö, bä ą bluca wayoa fa balölönö, ulifi a nowa ęa balömaquemaje, jaboca talewä nija. Öjö tä ulifi jamö, shomi bä lä nomaoblou wei bä nia dodijidawä didiblaamaje.

⁸Öjö cudeenö, fei däjä ma cui, öjö tä ulifi unocaye waiquiwä ja, tä ąfa ulifi iyäbö wei jilaöje.

⁹¿Öjö tawä? Inaja bä fa cuanö, tä ą wäyāmou lä balöono wei tä ą bejedi cublaliyoma. Yai Bada a wəno wäyālewä a Jelemia lä cui, cama etä ą oni jamö, abinaja tä ą oni cuu. Öjö blada 30 bä dälemaje, Isaeli ebä nodiwänö bä ąfa blada lä wäyāno wejei, yanowamö a nowa ęamabeje.

¹⁰Öjö bä blada ja, jaboca talewänö tä ulifi nofi lä table tä ulifi nowa ęomaquemaje. Bada tänö wale nosiemaö ja, a lä cuno weinaja showawä. ¿Öjö tawä? Einaja tä ą oni cuu balöo showaoma.

¹¹Öjö däjä, Bilado nija Jesús a icumaquemaje, Lomateli bänö a bada lä lämaqueno wei a lä cui nija. Bada anö a wəlii ja, abinaja a cuma. —Cafä ¿judio bada bei wa? —a cuma. —Awei. Wa wə cadidou —Jesús a cuma.

¹²Öjö ma cui, nofi bäyäälewä blowäjäwä bä ma cuinö, judio ai bä bada mö feduwä ma cuinö, öjö bänö a wəfa ma taöje däjä ma cui, a wə juo ęodaanomi.

13 Öjö dǎjä, Biladonö a wǎlii çöma. —¿Wa wǎfa lä talajei, wa täbä ǎ bluca jǎliaö mlaa cule? —e cuma. Inaja a cuma ma cui

14 e ǎ juonomi showawä. A wǎfa lä tano wejei, moli tä ǎ ma cui ja, a wǎ juo bǎdaonomi. A wǎ juono lä mlai tä ja, Bilado a bufi shino yai wedinajamao dodijilayoma.

15 Bei. Bada tä Bilado lä cui, abinaja a showadi cuaama. Judio bǎnö Yai Bada a waiteli lä jayuano wei a nofi çöcamoaö çöje dǎjä, judio bǎ fe lä labou wei, ai moli a shino fadamaö çöma, judio bǎnö a wǎfa yubou lä cadidiono wejei a lä cui.

16 Öjö tä lä cuono wei dǎjä, Balabasi a wǎfa lä cui, a fe çai labou mö feduomaje. Öjö a nofi shino jushuama yalo, showadi a wǎfa jǎlimamoma.

17 Öjö cudeenö, judio bǎ bluca fa çöcamolionö, Biladonö bǎ wǎlima. —Fei dǎjä ¿wedi jamö a lä cui, bei wama a jujeblamaö bufii cule? ¿Balabasi ya famaö çöbä tawä? Ma, öjö mlai, ¿Jesús a shino daanö, Yai Bada tänö a shömabä a jöwa lä yaileno wei? —a bada cuma.

18 Einaja Bilado a cuma. Nofi bǎyǎalewä bǎ daö malä waiquiono wei. “Jesús a dodijaö ayao cudeenö, a shämaö bufi doblaoje”, bǎ nofi tabou waiquioma.

19 Abinaja Bilado etä çai cublaliyoma. Jesús a jömabä a döçao waiquio dǎjä, bǎ suwäbö e wǎno wǎyǎyolumaje. Abinaja Bilado bǎ suwäbö e jöwa cuma. —Miji a lä cui a cadidou. A nö bleaama dijä. Cama a nowa ja, ¿bejedi ya nö majali bleaö dodijio bǎ lä cublei! —bǎ suwäbö e jöwa cuma.

20 ¿Öjö tawä? Nofi bǎyǎalewä blowǎjǎwä bǎ ma cuinö, judio ai bǎ bada ma cuinö, täbä shi domaö waiquia dicoaje ja, Balabasi a wǎfa shino yai yubomaje. Jesús a shämaö bufimaje.

21 Öjö dǎjä, bada tä Bilado a wǎ wabäo çö ja, abinaja a cuma. —Bei. Bolacabö ya cöbö tabou. Cafä wamacö nija ya nia moli çöamaö lä çö wei, ¿wedi jamö a lä cui, bei wama a yai jujeblamaö bufi doblao? —¿Balabasi! —ebä cuma.

22 Abinaja Bilado e cuu nomöjööma. —Jǎo. Inaja wamacö cuu ja, ¿wedinaja Jesús ya yai li taamabä, Yai Bada tänö a shömabä a jöwa lä yaileno wei? —¿Fii balitama defi jamö, a shino da basumacö! —ebä bluca cublaloma.

23 —¿Wedi tabä fii balitama defi jamö ya li basua bǎdamaquei? ¿Wedi bei tä li taö dodijio? —a Bilado cuma ma cui, öjö a wǎ ja, bǎ ǎ yai balaa dicolayoma. —¿Fii balitama defi jamö, a da basumacö! —bǎ cublaloma.

24 ¿Öjö tawä? Bilado a wǎ faa doblamanomije. Tä shino yai wǎlidiblou nomöjölaloma. Öjö cudeenö, mau ubä fa nacalänö, bǎ lä çöcamole bǎ mamo mötale jamö, Bilado imicö yǎlömolayoma. ¿Öjö tawä? Jesús a shämaö bufiono lä mlai a nö yai öjöböamobä, wawädowä imicö li yǎlömoma. Abinaja e cuma. —Camiyä ya mayonö ei a nia shämoimi. Cafä wamacö cuaaö bufi lä doblao weinaja, cafä wamacö li cuaabä —e cuma.

- 25**—;Camiyä yamacönö lä! —bä bluca cublaloma—. Camiyä yamacö ma cui nija, yamacö ijilubö nodiwä ma cui nija, inaja lä tä nowa cuo nodiablalou showaobä lä cätä —bä cublaloma.
- 26**Öjö däjä, Balabasi e faa çomalema, bä lä cuno weinaja showawä. Jesús a si fa yafelimalalönö, fii balitama defî jamö a basuabeje, a jöböa majöquema.
- 27**Öjö däjä, bada tä yafibö sibo lä jïcoloi jamö, sodado bänö Jesús a öböbou çai sibo majöa çolayofälömaje. Öjamö lä cama ai bä çai sodado mashi bluca nacaalalemaje.
- 28**Öjamö lä Jesús camishi ecö fa jayublalöjenö, wacä labe cäcö ja a jole jole lucäa nomöjömalemaje, bä nö bada öjöböamobä, bä showadi lä didio wei cäcö lä culenaja cäcö ja.
- 29**Too totocö çai mösöcöbö fa motoleblalöjenö, Jesús nija totocö yojoquemaje, bada bänö olo bä showadi yojobou lä cuaaö wejeinaja showawä. Bada bänö fii fibä däbou lä culajeinaja, jayu boco jamö ujudidiwä desi çai dämaquemaje. Öjö däjä, bä möfe çai jole deidolanö, a nofi jole jole badamoamaje. A nö waiblalajenö abinaja a nowa tamaje. —;Bada tä! Judio bä nija wa bada lä läle, ;dodijidawä wa bälödiobä! —a nowa tamaje.
- 30**A çai cläshamaje. Desi däa fa çölöjenö, a fe çai shäbemaje.
- 31**Inaja a nö waibläö cuaaö fa balölojenö, labe cäcö jayua fa çolujenö, cama ecö ja a didia çomaquemaje. Öjö däjä, fii balitama defî jamö a basuabeje, sibo jamö a öböa taa majölefälömaje.
- 32**Jesús a öböbou çai lä juimadujei jamö, Sileneteli a mö bamalefälömaje. Simón a wafa cuoma. A mö fa bamalöjenö, öjö nija fii defî nia lä blilio wei defî yalucua nomöjöa fe yadimaquemaje, edefî çai nojaobä.
- 33**Cocoda tä afa ulifi lä jilabou wejei jamö, a çai waloquemaje. ;Öjö tawä? “Cocoda”, täbä caficö lä cudou wei, Felosi blaobä tä afa ulifi taöje. Öjamö a çai fa walobojolujenö,
- 34**nashiwä toubä ja, çowami täbä fa coyocoblalöjenö, a fe nia fa coamajenö e toubä dodoquemaje. Öjö ma cui, toubä wabaö fa balöonö, toubä wailema.
- 35**Fii balitama defî ja, a fa basucöjenö, Jesús camishi ebä nia fa sheleleablajenö, jimamodima ebä wai ja, bä wabäoma, camishi bä nia tabou mö lä feduo wejei, bä jömamobä.
- 36**Öjö däjä, öjamö lä bä lodou showalayoma, Jesús a nö nia nomaö fa daajenö.
- 37**Jesús a feduböcö jamö etä a oni çai basuquemaje, cama nija tä nowa lä cuono wei tä dablamobä. Abinaja etä a oni cuma. “Judio bä nija a bada cuobä, ei Jesús a”, etä a oni cuma.
- 38**Fii balitama defî ja, Jesús a basua fa möamobalöjenö, cäcöbö doblou lä mlai cäcöbö çai basua lülocuaquemaje. Acasi boco mashi jamö ai a, jayu boco mashi jamö ai a, cäcöbö basua taaquemaje.

³⁹Ai bä lä cui, bä jayuafälölanö a jömamaje. A nö çai waiblamaje.

⁴⁰Abinaja ebä cuma. —;Bei tawä! ;Wa nö nia jowa lä walojano wei! Yai Bada wa etä yafi fa wälälönö, bolacabö tä mö didi fa cublalunö, ;wa etä yafi nia itamaö lä çono wei, wa nofi lä cui! ;Cafä a yai da bayeliblamolu, öjö lä! Yai Bada wa Ijilubö waiquiwä ja, wa ma basule ma cui, ;a da itolu! —ebä cuma.

⁴¹Inaja showawä, judio bada bä ma cuinö a nö çai waiblaö cuo mö feduomaje. Nofi báyäalewä blowäjäwä bä ma cui, Moisesi etä a ja täbä lä damaö wejei bä ma cui, judio ai bä bada ma cui, abinaja bä cuma.

⁴²—Ai täbä jowa bayeliblaö ma cuaano wei ma cui, ;wedi tä tabä cama bei a li bayeliblamou mlaa cule? Judio bä nija a bada cuobä a waiquiwä ja, fii balitama defi jamö a basudio dicoo mlai ja, a yai itou showadaobä. Bäma a itou fa dalalönö, öjö däjä bäma a wä bejedi yai bufiblaö showadaobä, ;öjö tawä?

⁴³Yai Bada a jowa bufiblaö. Yai Bada tänö a bufii ja lä, fei däjä a noshi yai umabobä, öjö lä. “Yai Bada bei Ijilubö ya e”, a mada cublei —bä cuma.

⁴⁴Fii balitama ai deficö jamö, tomömolewä cäcöbö basua mö lä fedule cäcöbö ma cuinö a nö çai waiblaböma.

⁴⁵Bei. Motoca a yoloblojolayou däjä, tä jödödöwa dödöblaliyoma. Motoca a itou bähäcuaö däjä tä shi jomoblou çolayoma.

⁴⁶;Öjö tawä? Tä shi jomoblou ço lä bufiole däjä, Jesús a wä ;çali fa falönö, cama bä caficö a ja abinaja a cudaliyoma. —;Eli, Eli, lema sabadani? Inaja a lä cuobojoli, abinaja a yai cuma. “;Yai Bada bäfä lä bufiblale! ;Yai Bada bäfä lä bufiblale! ;Wedi tä tabä, bei wale li daa dicofälöö cufe?” ;Öjö tawä? Einaja a yai cudaliyoma.

⁴⁷Bä ublao lä ajedeono wei ai bä lä cuinö a wä fa jililäjenö, abinaja bä cuma. —;Bei, bei! Fei a lä cuinö, Elia a jowa nacaö lä cule, Yai Bada a wäno wäyälwä a jaba Elia lä cuono wei —bä cuma.

⁴⁸Öjö däjä, nashiwä toubä befi çai lä itaono wei jamö, lobe ai a fa läläicunö, öjö toubä ja tä madofi wai fa çadalönö, fii fi ja tä fa jibanö, Jesús caficö ja toubä befi çai dodobou ajedeojolayoma.

⁴⁹Öjö ma cui, abinaja ai bä cuma. —;Waija, waija! Bamacö nö daablalou da balöo, ;öjö tawä? Elia bäma a waloo fa mönö, öjönö bäma a bayeliblaö möbä —bä cuma.

⁵⁰Öjö däjä, Jesús a ;çali fa lamolunö, a möshöa jawäa fa showadaicunö, a nomalayoma.

⁵¹Öjö däjä showawä, Yai Bada etä yafi jamö, camishi cäcö bada acadafu lä läono wei cäcö cacablou wädätefälöma. Mashita a ma cui, a bada blösö blösömolayoma. Maa mabä ma cui, mabä jafatolaliyoma.

⁵²Nomawä bä lä didibono wejei macabä ma cui, macabä aca calolaliyoma. Yai Bada ebä nomablou lä balöono wei bä ma cui, ai ebä demi jocäcäa fa çolalunö

- 53 maa macabä jamö, bä fao çolaliyoma. Jesús a demi jocäblou waiquilayono wei ja, Jelusale jamö öjö bä fa alufälönö, bluca täbä nija bä wawälaliyoma.
- 54 Jesús a nofi lä läbono wejei bä sodado lä cuinö, mashita a bada blösö blösömou fa dalalöjenö, bä quilia fe balojolaliyoma. ¿Öjö tawä? Sodado 100 bä çai lä cuono wei a bada ma cuinö, cama ebä ma cuinö, tä bluca lä cublaliyono wei tä dalalemaje. Öjö tä ja, bä quilia fe fa balojolalunö, abinaja bä cudaliyoma. —Bejedi lä, quiji a lä cui, ¡Yai Bada tä Ijilubö e cuo dodijioma!
- 55 Öjamö lä suwä bä çai bluca cuoma, Calilea jamö culanö Jesús nija bä fa nocaofälönö, a lä bayeliblafälönö wejei bä lä cui. Bä jäwäjäwä çai fa ublajaonö, bä nö çai labajami dablalou mö feduo showaoma.
- 56 Öjö bä nijamö Madalateliyoma a María coyocooma. Santiago bä nöö e çai, José bä nöö e showawä lä cui. María öjö a wafa çai cuo mö feduoma. Sebedeo bä ijilubö ecöbö lä cui, öjö bei bä nöö e çai cuoma.
- 57 Tä mö weyaö däjä, Alimadeateli a nö lä madofibö wei a waloquema, José a wafa lä cule. Jesús nija a nocaomö lä feduono wei, a cuoma.
- 58 Bilado nija a fa icuicunö, Jesús a wafa nomawä boma. Öjö däjä Bilado a nosiemou showaoma, a çamabeje.
- 59 Josénö a nomawä fa çolönö, camishi acadafu au cäcönö a jaoblalema.
- 60 Maa maca jamö, cama a nia obi nomawä lä didiano wejei maca jamö, Jesús a nomawä maquequema. ¿Öjö tawä? Jesús a nomawä fa didicöfälönö, maca fe laobä, maa ma bada jiluluquefälöma. Öjö däjä José a çolayoma.
- 61 ¿Öjö tawä? Maa maca casö jamö, Madalateliyoma a María lä cui, a looma. Ai a wafa María cuo mö lä feduono wei sho, cäcöbö looma.
- 62 Öjö tä fena ja, täbä yanöcöobä tä mö jalu cublou däjä, Bilado nija judio bada bä juma. Nofi bäyäälewä blowäjäwä bä ma cui, faliseo bä çai bada ma cui, Bilado nija öjö bä bluca fa icuicunö,
- 63 abinaja ebä cuma. —Bada tä. Quiji a lä jolemono wei a lä cui, a demöo showao däjä, abinaja a cuu dicoo cublelei. “Bolacabö tä mö didi fa cublalunö, ya nia jocädou ço”, a cuma.
- 64 ¿Öjö tawä? Öjö cudeenö, bolacabö tä mö didi cublou showao mlao däjä, a nomawä lä didile maca jamö, sodado bä da lämacö, cama ebä lä nocamabono wei bä lä cui, öjamö bä lucäo jato mlaobä. Bä lucäa fa dicolunö, a nomawä fa dälöfälöjenö, shomi jamö a taaö nomöjöö mlaobeje. Inaja bä cuaaö dicoo ja, täbä mölaa dicomaleije. Cama jolemou a wänö täbä mölamaö ma waiquiono wei ma cui, “A demi jocädou çolayoma tai”, cama ebä cuu dicoo ja, öjö däjä täbä nia yai mölalayou —ebä cuma.
- 65 —Jaö —Bilado e cuma—. Sodado wama bä lämabobä, fei bä da lululöfälöje. Ma yai da lojodocöje —a cuma.

⁶⁶Inaja a cuma yalo, sodado bä çai fa alufälöjenö, maa ma bada lä läono wei ma tamaö mlaobeje, öjamö bada etä oni sudimaquemaje. Öjö däjä, bä läo juobä, bä sodado lämaquefälömaje.

San Mateo 28

¹Täbä lä yanöcöo wei tä mö jalu jayublou waiquilayono wei ja, domingo tä mö jalu lä cublole däjä, Jesús a nomawä lä didiono wei maca nia fa möbönö, suwä cäcöbö aa fenalayoma. Madalatelyoma María a cuoma, ai a wafa María cuo mö lä feduono wei a çai.

²Yedu Bada tänö ajele a fa shömölödunö, Jesús a nomawä didiobä maca fe lä lale ma jilulaö däjä, tä ulifi blösö blösomou fe balojolayoma. Ma fa jilublälönö, öjö ma feyaca jamö a döcäa showadaquema.

³Madula a mömou lä culenaja, a mömou cuoma. A lä didio wei ecö au shij wacalamioma.

⁴A mömou nö quilijoma yalo, bä sodado lä läono wei bä lä cui, bä quilili fa blösö blösomonö, jai nomawä bä bläläa culaliyoma.

⁵Suwä cäcöbö nija abinaja ajele e cuma. —Cäcöbö quilili dijä. Jesús wafä a lä dayäboyoi bäfäcö daö, fii balitama defii jamö a lä basuono wei a lä cui.

⁶Eja a cuami. A demi jocädou waiquilayoma tai, cama a lä cuno weinaja showawä. Jabo, öjö lä, a nomawä lä maqueono wei wafä tä möblaaö balöobä.

⁷Wafä tä möblaaö fa balöonö, cama ebä lä nocamabono wei bä lä cui, lobe wafä bä yömölajalayobä. A demi lä jocädaliyono wei, wafä tä a nia wäyäjelayou. Calilea jamö a dabraö çobeje, a nia balöfälöö. ¿Öjö tawä? Einaja bäfäcö nowa nia fa tanö, ya waloquei lä cufe —a ajele cuma.

⁸Ajele a wä fa jilibölänö, maa maca jamö lobe cäcöbö quilili faa çolayofälöma. Cäcöbö bufi çai doblalou fe balojooma. Jesúsno cama ebä lä nocamabono wei bä yömölaböbä, lobe cäcöbö läläa showalayofälöma.

⁹Cäcöbö läläafälöbä jamö, yedu Jesús a bädaliyoma. A fa bädalunö, a wä faa mö balayoma. Cäcöbö quilili fa dijoblaicunö, Jesús mamicö ja, cäcöbö imicö waliblaquema. Cäcöbö möfe bolanö a wafa Bada doblao taböma.

¹⁰Öjö däjä, abinaja Jesús e cuma. —Cäcöbö quilili dicoo dijä. Fäähäyä wafä bä nia yömölajalayou, Calilea jamö bä jufälöbä. Öjamö lä wale nia möö çoje —e cuma.

¹¹Suwä cäcöbö jufälöö däjä, maa maca jamö bä sodado lä läono wei ai bä mö feduwä lä cuinö, Jelusale jamö, tä a çai aa mö fedulayofälömaje. Tä bluca lä cublaliyono wei, nofi bäyäälewä blowäjawä bä nija tä a wäyää çojolomaje.

¹²Öjö bä bada lä cuinö, judio ai bä bada fa yododoblamalöjenö, bä a bluca wayolayoma. Öjö däjä, tä lä cublaliyono wei tä a wäaö dicoo mlaobeje, sodado bä nija blada bä jöböquemaje.

- 13** Abinaja bä nowa tamaje. —Bei. Tä lä cublalufe, wama tä ʔ yai wäyää mlai ja, abinaja wamacö shino cubä. “Jesúsnö bä lä nocamabono wei bä lä cuinö, bä nofi didi waloa fa ʔatoicunö, yamacö mio dǎjä a nomawä ʔa ʔatolefälöma sijej”, wamacö cubä. Einaja wamacö shino cubä, ʔjö lä.
- 14** Biladonö tä ʔ jǎliaö bádao ja, yamacö ʔ läblou weicätä, wamacö nö bleaamaö dicoo mlaobä —bä nowa tama.
- 15** Einaja bä cuu ja, sodado bǎnö bä blada dǎlemaje. Bä nowa lä tano wejeinaja tä ʔ jole wäyää cuaadayomaje. Judio bä nija ʔjö tä ʔ blaucublou fa showadalonö, tä ʔ tabou showaa lä cudujei.
- 16** Bei. Jesúsnö cama ebä lä nocamabono wei bä 11 lä cui, Calilea jamö bä fa alufälönö, Jesúsnö tä balöcö ʔafa lä wäyāno wei jamö bä juu showadaoma.
- 17** ʔjamö lä Jesús a daa fa ʔalalöjenö, bä möfe fa boblaicunö, a wǎfa Bada doblao tamaje. ʔjö ma cui, cama ai ebä mö feduwä lä cui bä bufi wedinajamou showaoma. “ʔjö lä a waiquiwä daanö”, a nofi tabou cadidionomije.
- 18** Abinaja Jesúsnö bä nowa tama. —Fedu jamö ma cui, bita jamö ma cui, bluca täbä lä cublai täbä ja ya Bada cuobä, camiyä Yai Bada tänö wale tablamalema.
- 19** ʔjö cudeenö, camiyä ya wǎnö bä juu da cuaafälö. Bluca bä bälöjowä lä yaiblai bä da yömöladuje, camiyä nija bä nocao mö feduobä. Fayä a wǎ ma cuinö, bä Ijilubö ya e ʔ ma cuinö, Yai Bada bei Bufen a wǎ ma cuinö, ʔjö yamacö ʔnö wama bä fe ojomaö cuaabä.
- 20** Cafä wamacö nija ya tä tamaö lä bufino weinaja bä cuaaö mö feduo showaobä, bä damaö da cuaaje. ʔjö tawä? Yai Bada tänö täbä jödödowä waicaö showao mlao dǎjä, showadi bamacö ʔai nia cudio —bä nowa tama.

San Marcos

San Marcos 1

- ¹Ei Jesucristo dodijidawä etä ʼcolo, Yai Bada bei Ijilubö e lä cui.
- ²Juan a cuo showao mlao dǎjä, Yai Bada a wʼano wäyälwä Isaia a lä cuinö, yedu jamö a wʼafa wäyää lä balöono wei etä ʼbejedi cublaliyoma. Abinaja tä ʼcuu. Bei. Wa nia juu lä cuaafälöö wei jamö, wa wʼano taö balöafälöbä, iba ya nia shömaö balöö, wa wʼa jiliaö dodijidaobeje.
- ³Ulifi bloque jamö bä yömöläö ja, a wʼa nia lojodoaö. “;Bada tä juu lä cuimi!”, a nia cuu. Abinaja bä nowa nia taö, a wʼa Bada jiliaö cadidio showadaobeje. “A nia lä juu wei jamö, bei wama e yo wawämaö fa cuaaimadunö, e yo shalilibläö da balöloje”, bä nowa nia taö. Einaja tä ʼcuu, Juan a wʼafa wäyää lä balöono wei tä ʼlä cui.
- ⁴Bei. Ulifi bloque jamö, yacumö, fe ojomalewä Juan a wawälayoma. Bä yömöläö ja, wʼalidiwä tä ja bä bufi lädamaö bufima, cama nija bä fe ojoblamobä. Bä doblou lä mlai tä ma cule ma cui, Yai Bada tänö tä nowa mladamabä.
- ⁵Öjö dǎjä, Judea jamö bä bluca lä bälöblai, Juan nija bä walobaleyoluma, Jelusaleteli bä çai bluca. Bä doblono lä mlai tä ja, bä ʼnö wäolanö, Jodana u jamö cama nija bä fe ojoblamolayoma.
- ⁶Öjö tawä? Yalo cameyo çöicö ja, Juan a didioma. Yalo si çai acadafu yʼaboma. Cösö cösöma bä waama, buu ubä çai.
- ⁷Täbä yömöläö ja, abinaja a cuma. —Inaja camiyä ya cuaaö ma balöö wei ma cui, camiyä ya nodi jamö a nö yai lä wʼalojaö wei a nia waloo nomöjööyoluu. Öjö a shino yai doblaa ayaa cudeenö, ya bayelibläö bädaobä tä ma cui ja, ya nö quilibö wei. Bei mamicö lä didio wei ya etäcö nata cushaö ja, ya loquei ma cui ya nö quilibö wei.
- ⁸Camianö bamacö fe ojobläö dǎjä, mau u ja bamacö jödödöblamaö ma cui, öjö a lä cuinö, mau unö mlai, Yai Bada a Bufinö wamacö nia jödödöbläö.
- ⁹Inaja Juan a cuaaö showao dǎjä, Calilea tä ulifi jamö Jesús a cuoma. Nasaleteli bä lä bälöle jamö a culanö Jodana u jamö a fa walobaliyonö, Juan nija a fe ojoblamolayoma.
- ¹⁰A fe fa ojoblamolunö a washölöblou çö dǎjä, lobe judu mösö ca jolaa dalalema. Yai Bada a Bufi, jai joledo a cuwä, a itou çai daa showaadalalema.
- ¹¹Öjö dǎjä, fedu jamö tä ʼfa bädaludunö, abinaja Yai Bada a cuma. —Ijluyä bǎfä nofimaö lä dodijile, çafä wa. Çafä nija bejedi lä ya bufi yai doblalou dodijio —a cuma.
- ¹²Öjö dǎjä showawä, ulifi bloque jamö, lobe Yai Bada tä Bufinö Jesús a shömölema.
- ¹³Öjamö lä yalo bä lä juole jamö Jesús a juu showao dǎjä, 40 tä mö didi tablamaö dǎjä, Sadanasinö a yabäcäblalama ma cui, ʼajele bänö a bayeliblamaje.

- 14**Bei. Bada bänö Juan a juwäa waiquimaleno wejei ja, Calilea jamö Jesús a cua çolayoma. Yai Bada dodijidawä tä ą ja, bä yömölaö cuaaimalanö, a waloa çoquema.
- 15**Abinaja bä nowa taö cuaama. —;Fei dąjä waiquiwä! ;Walıdiwä tä ja, bä bufi da lädalü! Yai Bada tänö cama ebä çai nia lä cuo wei, tä ajedou waiquia lä cuimi. Yai Bada dodijidawä tä ą bejedi çai da bufije —bä nowa taö cuaama.
- 16**Modu Calilea u casö jamö Jesús a diquecou cuaafälölanö, Simón a dalalema, bä fäähä Andrés e çai. Yuli bä lä yaçamou wei täcö walalawä queamaböö dąjä, cęcöbö dalalema. ;Öjö tawä? Yuli yaçalewä cęcöbä cuoma.
- 17**Abinaja Jesúsnö cęcöbö nowa tama. —Jabo. Cęcöbö da yauiquiyo. Yuli bä bädawä mlai, yanowamö wafä täbä nabä shino yai lä juu wei wafäcö cublobä bäfäcö nia tablamaö —cęcöbö nowa tama.
- 18**Öjö dąjä, a wą fa jilibölänö, täcö walalawä daböa fa showadacöfälönö, öjö nijamö cęcöbö yaua showadalayoma.
- 19**Öjö tä fe dolejdale ja, Sebedeo bä ijilubö Santiago e daa majölälema, bä fäähä Juan e çai. Cama bä canawäbö ja cęcöbö befi çai çalanö, yuli bä lä yaçamou wei täcö walalawä idudaböma.
- 20**Cęcöbö çai naca fa showadaalänö, cęcöbö yaua showaquema. ;Öjö tawä? Canawä a jamö, bä föö Sebedeo e daböquefälöma, cama a nosie lä juano wejei bä çai.
- 21**Cabenaoteli bä shabonobö jamö, Jesúsnö cama ebä çai waloa nomöjöquema. Sábado dąjä, judio bä yododabä yafi jamö Jesús a lucäa fa showadalunö, Yai Bada etä ą ja, bä damama, täbä yanöcöobä tä mö jalu ja.
- 22**Bä damaö dąjä, a wą lä shaliliablalou wei a wą ja, bä bufi möaaö dodijioma. Moisesi etä ą ja bä showadi damaö lä cuaano wejeinaja, a wą jilimamou cuono malä mlai. Jai tä ą yai daö shalilio showadaoma, a wą jiliaö malä cuaano wejei.
- 23**Öjamö lä, judio bä yododabä yafi jamö, a lä feculaböono wei a çai wąlo coyocooma.
- 24**A wą icalı fecula fa falönö, a wą quilili läblaliyoma. —;Ma! Nasaleteli Jesús wa lä cuinö, ;wedınaja yamalecö nia fa taamanö, bei wa li waloo cuboyoi? ;Bei yamalecö nabä juu waiquio cufe? Bäfä daö. Yai Bada tänö wa lä yaileno wei wa e —a cuma.
- 25**Öjö ma cui, Jesúsnö a wą wasöblalema. —;A wą fa dijä. E faa da çolufälö! —a cuma.
- 26**Öjö dąjä, fecula anö a wąlo icalı fa yabolemomalönö, a icalı şilalamolanö a daa showaquefälöma.
- 27**Öjö tä fa dalalöjenö, bä bluca shädayaimou dodijioma. Abinaja bä nowa tayou ja, bä cuma. —;Ei wedi bei tä ą majöwä? ;Tä ą nofi yai lä shomi wei! A wą fa shalilonö, ;fecula bä ma cuinö a wą nofi lä juaö wejei! —bä cuma.
- 28**Öjö dąjä, Jesús a wąfa wäyäö cuaaö fa showadalujenö, Calilea tä ulifi fe lä fayoi jamö ma cui, a wąfa jilimou blaucuomobodayoma.

- 29 Öjö dāja, judio bä yododabä yafi jamö a faa fa çolufälönö, Simón, Andrés cäcöbö yafibö jamö, Santiago, Juan sho cäcöbö çai lucäa majölayoma.
- 30 ¿Öjö tawä? Öjamö Simón bä yesi e lä cui, a fa yoblaonö, e jalili blaoma. Jesús nija a wafa wäyöö showadaomaje.
- 31 A jalili blaobä jamö a fa icuicunö, boco fa dälönö, a jocädamalema. A lä yoblaono wei etä mladou fa showadalonö, bä fama iyaa showadamalema.
- 32 Bei. Motoca a lä queo wei dāja, bä çai jalili lä cublamono wejei bä çai bluca waloblayolumaje. Bä lä feculaböono wei bä çai.
- 33 Bä lä fablaao wei yoca jamö, Cabenaoteli bä shabonobö jamö bä bluca lä bälöle bä bluca yododablayoluma.
- 34 Bluca tä wayu shomitawänö bä nö jalili lä bleaano wei bä jalomalalema. Fecula bä bluca çai yashuu showadaoma. ¿Öjö tawä? A nö öjöböamaje yalo, bä ç fablamanomi.
- 35 Tä mö didi sublao showao dāja, Jesús a jocäblou fa jalulonö, täbä bälöa lä mlale jamö a aa fe jalulayoma. Öjamö Yai Bada nija a wä fama.
- 36 Simónnö bä çai lä cuono wei bä sho, a dayäao fa juojenö,
- 37 bä waloa jäqueyoluma. Abinaja ebä cuyoluma. —Bluca täbä jödödöwä lä cuinö wa dayäo jaafe —ebä cuma.
- 38 Öjö ma cui, Jesús a wä läblaliyoma. Abinaja bä nowa tama. —Ma. Ai bä shabonobö nomöjowä jamö bämacö nia jayublou nomöjoo, öjamö lä ya tä ç çai wäyäbä. Öjö lä ya bä bluca yömölabä, ya malä waloqueyoluno wei —a cuma.
- 39 Öjö dāja, Calilea jamö Jesús a juu cuaalanö, judio bä yododabä yafi bä jamö, bä yömölaö cuaama. Fecula bä çai yashuu cuaama.
- 40 Täbä sicö lä jodemaö wei tä wayunö a nö lä bleaano wei a jalili waloquema. Jesús nija a fa dijoafälönö, a nofi nia ojode fa tablamonö, a wä fama. Abinaja e cuma. —Wale bayelibläo ojode ja, wale jalomalei dao, ya dodijidablou çobä —e cuma.
- 41 Jesúsno a nofi ojodadaö ja, boco fa dododalunö a jubädalema. Abinaja e cuma. —Ya ojode lä. A da jalolu, öjö lä, wa dodijidablou çobä —e cuma.
- 42 Öjö dāja, etä wayu mladou fa showadalonö a dodijidablou çolayoma.
- 43 Öjö dāja, a shömaö çolanö, a wä nö wäo wasöö dodijioma.
- 44 Abinaja e cuma. —Ei bäfä lä jalomalöfe, yanowamö moli ma cui nija wa tä çfa nia wäaimi. Nofi bäyäalewä nija a yai da mömodu. Wa dodijidablou lä çolufe tä nowa ja, Moisesinö tä jöböamaö lä bufino wei etä da dodobodu. Inaja wa cuao ja, bluca täbä nija wa nia demi dablamous wawädo —a cuma.
- 45 Öjö ma cui, bluca täbä nijamö Jesús a wafa wäyöö fa showadaonö, tä ç yai balamaö cuaama. Inaja a cuaama yalo, bä lä lulono wei bänö Jesús a doblamanomije. Täbä

shabonobö jamö, wawadowä a juu doblonomi majöwä. Ulifi jamö a shino yai cua fa majöalunö, öjamö lä jödödöwä bä lä bälöblai ebä waloblaaö majöoyoluma.

San Marcos 2

- ¹Tä fa weyajadalunö, Cabenao jamö Jesús a waloa fa çöalunö, a çöblou jililemaje.
- ²Öjö däjä, bluca bä fa yododoblaliyonö, jëfa tä jödödöblou fa waiquilonö, ai bä ublao yädäobä etä cuonomi. Inaja tä mashiquio cuo showao däjä, Yai Bada etä a ja, Jesúsno bä bluca yömölama.
- ³Öjö däjä, Jesús nija a mömabeje, a lä yätoliböono wei a lä cui,
- ⁴täbänö a befi çai cadömaboimamaje.
- ⁴Öjö ma cui, bä lä çöcamono wei bänö a yafi jëfa mashiquiwä ja, a çai faö doblonomije. Öjö cudeenö, yafi feyaca sibo jamö a çai dubefälömaje. A çai fa dubofälöjenö, Jesús a fedüböcö jamö tä fa jocäblalujulujenö, a lä yätoliböono wei a befi çai itomalejelayomaje.
- ⁵A nofi lä mölabou wejei etä fa dalalönö, abinaja Jesús a cuma, a lä yätoliböono wei a nija. —Uasi. Wa doblou lä mlai afä ya tä nowa bluca mladamaö lä cule —e cuma.
- ⁶Moisesi etä a ja bä lä damaö wejei ai bä lä cui, öjamö bä çai fa loonö, bä bufi jöjöjomoma. Abinaja bä bufi cudaliyoma.
- ⁷“¿Ei wedi a wä bashiwä? Yai Bada a nö waiblaö lä cule. Täbä doblou lä mlai, Yai Bada tänö etä nowa shino mladamaö dao, yanowamö a bashiwänö mlai”, bä bufi cudaliyoma.
- ⁸Einaja bä bufi cuu lä jatoono wei Jesúsno bä daö fa showadaonö, a wä fama. — ¿Wedi tä tabä, wamacö bufi li jöjöjomou dicoa cube?
- ⁹Ei a lä yätolibö wei a lä cui, camiyä bei ya wänö ya jalomaö lä dalenaja, inaja showawä, ya etä nowa çai mladamaö si ijejewä cuwä. Ya nowa tabä ya waiquiwä malä cui, a lä maquele a fa jocälänö, täcö çai çöjamö çöbä. ¿Öjö tawä?
- ¹⁰Camiyä ya lä yanowamöblaleyoluno wei ya lä cui, eja, bita jamö ya lä cule däjä, täbä doblou lä mlai ya täbä nowa mladamabä ya waiquiwä. Wama tä möbä, öjö lä —a cuma. Einaja a fa cunö, a wä wawäa showaquema, a lä yätoliböono wei nija.
- ¹¹—Bei. A da ubladalu. Wa lä maquele wa täcö fa jocälänö, täcö çai çöjamö da çö —a cuma.
- ¹²Öjö däjä, bä bluca lä çöcamono wei bä mamö showao däjä, a lä yätoliböono wei a ubladaliyoma. A lä maqueono wei täcö fa jocädalönö, täcö çai çö showadalayofälöma. Inaja a cuaama yalo, bä bluca lä çöcamono wei bä bufi fejeleo dodijioma. Yai Bada a nofi doablalajenö abinaja bä nowa tayoma. —Fei a lä cuaafenaja, bäma tä jaba dablalajenö dodijiwä. Ei tä nö yai quilijiwä fe balojowä —bä nowa tayoma.

13Mau u casö jamö Jesús a juu fa cõonö, cama nija bä bluca fa cõcamolijonö, Yai Bada etä a ja, bä damama.

14Öjö däjä, a juu lä cuaano wei jamö, Afeo bä ijilubö Lewi a loa dalalema, Mateo a wafa çai lä cule. Lomateli bada bä befi bä blada lä doaö wei a Lewi cuoma. Blada bä doabä jamö a läa fa dalalönö, abinaja e cuma. —Camiyä nija a da nocaiquiyo —e cuma. Lewi a ubladou fa showadalonö, Jesús nijamö a yaua showadalayofälöma.

15Mateo e yafi jamö Jesús a iyama, cama ebä lä nocamabono wei bä sho. Bä iyaö çai lä loono wei däjä, Lomateli bada bä befi bä blada lä doaö wejei bä ma cui, ai bä afa çai wäliwä talewä lä jilaö wejei bä ma cui, öjö bä bluca loo mö feduoma. Showadi cama nija öjö bä bluca malä yauono wei.

16¿Öjö tawä? Lomateli bada bä befi bä blada lä doaö wejei bä ma cui, ai bä afa çai wäliwä talewä lä jilaö wejei bä ma cui, Jesúsnö öjö bä çai lä iyale tä dalalemaje yalo, ai bä bufi bada jushujuoma, Moisesi etä a ja täbä lä damaö wejei bä lä cui. Faliseo bä bada nija öjö bä yädäoma. Öjö däjä, Jesúsnö bä lä nocamabono wei abinaja bä nowa tamaje. —¿Wedi tabä inaja a li cuaaö dicoo? Lomateli bada bä befi bä blada lä doaö wejei bä ma cui, ai bä çai wäliwä talewä ma cui, ¿wedi tabä öjö bä çai li iyaö dicoo? —bä nowa tamaje.

17Jesúsnö öjö bä a fa jililänö, abinaja bä nowa taö jalooma. —Bä jalobä, bä lä demi wei bä nia icuomi. Bä lä jalili wei bä lä cui, öjö bä nia shino yai icuo. ¿Öjö tawä? Bä dodijidawä lä jömöo wei ya bä nabä juno malä mlai. Wäliwä talewä ya bä nabä yai li juma —bä nowa tama.

18Ai däjä, Juannö bä lä nocamabono wei bä lä cui, bä iyaö wasöoma. Faliseo bä bada ma cui, inaja showawä, cama bä çai cuaaö mö feduoma. Yai Bada nija bä nö bayeli nacaodii däjä, bä iyaö yabäcou mlaobä, bä iyaö wasöoma. Inaja bä cuaama cudeenö, Jesús nija ai täbä fa waloiqiyonö, abinaja bä cuma. —Juan a lä cuinö bä lä nocamabole, bä iyaö wasöo si ijejewä, bä iyaö yabäcou mlai ja, Yai Bada nija bä nö bayeli nacaodibä. Faliseo bä bada nija bä lä nocao wei bä ma cui, inaja showawä bä çai cuaaö mö feduo talei. Öjö ma cui, afä wa bä lä nocamabole bä lä cui, inaja bä li cuaaimi. ¿Wedi tabä afä bä çai iyaö wasöomi dicowä? —bä cuma.

19Öjö bä nija abinaja Jesús a cuu yacläoma. —Fiya anö a suwä dääö däjä, cäcöbö nofi cõcamoabeje jamö, ¿täbä iyaö wasöo daanö? Ma, öjö a fiyanö bä çai cuo showao däjä, täbä çai nö iyaö wasöobimi.

20Öjö ma cui, tä nö fa dedelönö, a fiya fa çolunö, öjö däjä bä fa wajäanö, bä nia shino iyaö juomi. ¿Öjö tawä? —cama a wafa tao ja, a cuma.

21Öjö däjä, shomi tä a coyocomabou bufio fa mlacunö, camishi bä afa wäyäo yaclämoma. —Camishi jode cäcö lebesi ja, ai cäcö acadafu läabeje, dude cäcö cacaaimije. Inaja bä cuaaö fa cunoja, cäcö yaluuje däjä, dude cäcö fa busudublalunö, täca jädödou nö blaucublaliyobö wei. ¿Öjö tawä? —Jesús a cuma—.

22Inaja showawä, yalo wejediwä sibä ja, nashiwä dude toubä löaimije. Inaja bä cuaaö fa cunoja, ubä lä juluu wei ubänö sibä fa jädölönö, sibä nö wäliolaliyobö wei. Toubä

nö çai bläshäblaliyobö wei. Wejediwä sibä uduo malä mlai. Ma, yalo dude sibä ja, nashiwä dude toubä nia yai löaöje. ¿Öjö tawä? —a cuma.

²³Sábado ai tä mö jalu jamö, ficali ca jamö Jesúsno cama ebä çai jayuafälöma, täbä yanöcöobä tä mö jalu lä cui däjä. Bä lä nocamabono wei bä lä cuinö, mobä jucäa jayualalefälömaje, mobä owafälöbeje.

²⁴Öjö däjä, faliseo bä bada lä cui, abinaja Jesús nija bä cuma. —Afä wa bä lä nocamabole, quiiji bä da mö. Täbä yanöcöobä tä mö jalu ja, inaja bä cuaaö mlaobä tä a ma läle ma cui, ¿wedi tabä inaja bä li cuaaö fe yadio? —bä cuma.

²⁵Jesús abinaja a cudaliyoma. —David a bada lä cuaano wei, ¿bei wama tä a daö mlaa cule? Cama a ma cui, cama ebä lä nocaono wei bä ma cui, bä nö ofili bleafälöma yalo,

²⁶Yai Bada etä yano jamö a lucäa fa jayulofälönö, Yai Bada ebä nii lä yaimabou wejei bä nii ja, a iyalayofälöma. ¿Öjö tawä? Öjö bä nii ja, nofi bäyäälewä bä iyabä bä nii yaimoma. Bä nofi bäyäälewä lä mlai bä iyabä, bä nii cuonomi. Bä iyaö mlaobä, Moisesi etä a läoma. Öjö ma cui, öjö bä nii ja David a iyama. Bä çai lä juno wei bä ma cui, öjö bä dobäa mö fedua showalalema. Öjö ma cui, inaja David a ma cuaano wei ma cui, a jömamonomi. ¿Öjö tawä? Nofi bäyäälewä bada a lä läono wei, Abiadala a cuoma, öjö däjä —Jesús a cuma.

²⁷Abinaja a cuma. —Täbä lä yanöcöo wei, yanowamö täbänö tä nofi jalu bäyäbobeje tämi. Yai Bada tänö tä afa jalu shomi lä wäqueno wei tä jalu lä cui, täbä bayeliblamobä, tä li jalu.

²⁸Öjö cudeenö, täbä yanöcöobä tä mö jalu jamö täbä nia lä cuaaö wei tä ma cui ja, täbä nia cuaaö lä mlai tä ma cui ja, camiyä ya wä fabä ei bada ya waiquiwä, ya lä yanowamöblaleyoluno wei ya lä cui —a cuma.

San Marcos 3

¹Judio bä yododabä yafi jamö Jesús a lucäa fa çolunö, imicö lä cofeono wei a cuoma.

²Täbä nia lä yanöcöono wei tä mö jalu sábado cuoma cudeenö, Jesús nijamö bä mamoluca showajaoma. Imicö lä cofeono wei a jalomaö fe yadio ja, a wäfa nia dobroimi wäyämaje.

³Imicö lä cofeono wei abinaja Jesúsno a nowa tama. —Eja a da ajedeiquiyo —a nowa tama.

⁴Öjö däjä, bä mamoluca lä showajaono wei bä nija abinaja Jesús a cuma. —Täbä yanöcöobä tä mö jalu jamö bamacö dodijaö mlaobä, ¿tä a läa daanö? Ma, wäliwä bäma tä taö mlaobä, tä a shino läa. ¿Öjö daanö? Täbä shäo mlaobeje tä a läa ma cui, täbä jalomabeje tä a läami —a cuma. Inaja a cuma ma cui, bä a junomi.

⁵Öjö däjä, bä bufi jifuwä yalo, a bufi jushuolanö Jesúsno täbä möö shoqueaö cuaama. Imicö lä cofeono wei a nija abinaja e cuma. —Boco da dodoiquiyo. Boco fa dododalunö, imicö cushähäblou showadalayoma.

- ⁶Öjö däjä, faliseo bä bada faa fa çolufälönö, Elode ebä fa çocablamalöjenö, Jesús a nabä queobeje, lobe a nofi washuaö showadaomaje.
- ⁷Öjö däjä, modu u casö jamö, Jesúsno bä lä nocamabono wei bä çai aa fa majölönö, bluca dodijiwä bä yaulayofälöma. Calilea jamö bä lä bälöle bä ma cui, Judea jamö bä lä bälöle bä ma cui,
- ⁸Jelusaleteli bä ma cui, Idumea jamö bä lä bälöle bä ma cui, Jesús a lä cuaano wei tä a fa jililäjenö, öjö bä sho bä bluca çocamolayoyoluma. Jodana ai u mashi jamö bä lä bälöle bä ma cui, Dilo tä ulifi jamö bä lä bälöblai bä ma cui, Sidono jamö bä lä bälöblai bä ma cui, öjö bä bluca waloqueyoluma.
- ⁹Täbä bluca shulilobä jamö a bacäjou mlaobä, bä lä nocamabono wei bä nija, modu u casö jamö canawä a çamaö bufima, öjamö culanö bä yömölabä.
- ¹⁰Bluca täbä jaloa waiquimalalema yalo, ai bä bluca jalili lä cuinö tä mashiquiblamaleyolumaje. Bä bayeliblamobä, a jubaö bufi doblaomaje.
- ¹¹Fecula bänö Jesús a dabraöje ja, öjö a cotä jamö bä fa wäcäblaoyonö, bä a çali fama. Abinaja bä cuma. —;Cafä Yai Bada wa tä Ijilubö! —bä cuma.
- ¹²Öjö däjä, Jesúsno çali bä a wasödaö showaoma, a nö öjöböamaö mlaobeje.
- ¹³Öjö däjä, jefu a jamö Jesús a dolequea fa balöbofälönö, cama ebä lä bufino wei bä nacalema. Bä fa nacalänö, cama nija bä waloa jebejelayoma.
- ¹⁴Öjö bä nijamö 12 bä yailema, bä çai cuobä. Täbä yömölabeye, bä nia shömaö nomöjöoma.
- ¹⁵Fecula bä çai yashubeje, bä nia çai tablamama.
- ¹⁶Bä lä shömöleno wei, ei bä li cuoma. Simón a cuoma, Jesúsno Pedro a wafa çai jilaa lä yädäqueno wei a lä cui.
- ¹⁷Sebedeo bä ijilubö ecöbö çai cuoma, Santiago a wafa lä cuono wei, öjö bä fäashä Juan e çai. Öjö cäcöbö a lojodoaö dodijioma yalo, Boaneje cäcöbö afa çai jilaquema. ¿Öjö tawä? Boaneje tä a lä cui, “Yalu a ijilubö”, tä a li cuu.
- ¹⁸Andrés a çai cuoma, Felipe a çai, Badolomei a çai. Mateo a çai cuoma, Tomás a çai, Afeo bä ijilubö Santiago e çai, Tadeo a çai. Simón a çai, cama bä ulifibö jamö täbä shomi lämabou nofi lä wälibono wei a Simón lä cui.
- ¹⁹Juda Icaliode a çai, Jesús a nia lä nomojoliano wei a lä cui.
- ²⁰A çoa fa çolunö, bluca täbä çocamou çoyoluma. Bä bluca mashicou dodijioma yalo, Jesúsno cama ebä çai iyabä tä ma cui ja, bä doblamanomije.
- ²¹Cama ebä mashinö, öjö tä a fa jililäjenö, a çabeje ebä waloquema. A shi afa wälii malä wäyano wejei.

²²Jelusale jamö Moisesi etä ʔ ja täbä lä damaö wejei bä ma cui, öjamö bä fa waloiquiyonö, abinaja bä çai cuyoluma. —Fecula bada Sadanasi a tabou lä cule. Fecula bada tä lojodenö bä li fecula yashuu buo —bä cuma.

²³Öjö bä naca fa showadaalälönö, bä bufi dayäamabä tä ʔ bluca wäyöö yacläablaloma. Abinaja bä nowa tama. —Sadanasi cama a showawä lä cui, ¿wedinaja a nia joyamamou li cuaaö?

²⁴Bä bälöa lä yaile bä nofi wəliayou däjä, bä nia bälöo lojodoo majöomi.

²⁵Cama bä mashi ma cui, bä nofi wəliayou dicoo ja, bä bälöo lojodoo mlaicätä.

²⁶Cama Sadanasi a nofi wəlimamou ja, a nia bälöo lojodoomi. Ma, cama ebä nofi wəliayou ja, bä mö nia yai watäblamolayou.

²⁷A lä waiteli wei a lä cuinö, cama madofi ebä nofi läbou däjä etäbä nia yabäcamaimi. Shomi täbä nia lucämaimi. Öjö ma cui, a nö yai lä wəlojaö wei a lä cuinö a nabä fa waloicunö, a fa ʔcablälönö, öjö däjä cama etäbä bluca lä tabole etäbä nia shino yai dälalei —cama a wəfa tao ja, a cuma—.

²⁸Abinaja a cuu çöma. —Cafä wamacö nija ei ya wə lä cui, bejedi lä ya wə —a cuma—. Yanowamö täbä nijamö tä nowa wəlidiwä bluca lä cule, etä nowa mladou dao. Yai Bada a nö waibläöje ja, tä nowa çai mladamaö dao.

²⁹Öjö ma cui, Yai Bada a Bufenö nö lä waibläö wejei bä lä cui, etä nia mladoimi waiquiwä. Obi ma cui, etä nowa nia cuo shi wəlii —a cuma.

³⁰Yai Bada a Bufinö bä fecula ma yashublano wei ma cui, a wəfa feculabö tamaje yalo, einaja bä nowa li tama.

³¹Öjö däjä, Jesús bä nöö, bä fäähä ebä walobeyoluma. Sibö jamö bä ublalanö, a nacamaö bufimaje.

³²Jesús nija bä loo fe lä fəyoono wei bä lä cuinö a yömölamaje. —Naafä a ma cui, fäähäfä bä ma cui, bä ublaa siböa lä cubiyedi. Wa wəliije —bä cuma.

³³Jesús abinaja a cuma. —¿Wedi nija bei ya yai li nöömou, öjö lä? ¿Wedi jamö bä nija bei ya yai li fäähämou? —a cuma.

³⁴Öjö däjä, bä loo fe lä fəyoono wei bä möö shoqueaö fa cuanö, abinaja a cuu nomöjöoma. —Ei bä lä cui, iba nayä bä waiquiwä. Iba mashi, öjö bä çai li showawä.

³⁵Yai Bada tänö tä tamaö lä bufii wei tä lä taö wejei bä lä cui, öjö iba lä bä mashi waiquiwä. Öjö nayä bä waiquiwä —a cuma.

San Marcos 4

¹Modu u casö jamö Jesúsno täbä yömöläö çöma. Täbä yömöläö däjä, cama nija bluca täbä fa çöcamoliyolunö, täbä mashicou dodijioma. Öjö däjä, a bacäjamaö mlaobeje, canawä a jamö Jesús a dökäbaliyoma. ¿Öjö tawä? Modu u casö jamö bä bluca lä çöcamolayono wei bä cuo däjä, ajede jamö a befi çai çalanö

²bä yömölama. Bä yömölaö ja, shominaja tä ʘ bluca wäyää yacläablalou ja, bä bufi dayäämama. Abinaja a cuma.

³—Ei tä ʘ da j̄ililäje. Ai anö mobä shäyājaö mö alayoma.

⁴Mobä shäyājaö cuaafälöö dājä, bei yo jamö ai mobä fa blälälalunö, biyomö bänö mobä owa nocaa j̄älalemaje.

⁵Bei masi blaobä jamö ai mobä blälälaliyoma, mashita a bluca cuono lä mlai jamö. Mashita a fa maquedionö, mobä lobe caua showadalaliyoma ma cui,

⁶motoca a ösöblou dājä, mosibä sh̄iliquia nocalayoma. Nasöcö daloblou fa mlacunö, mosibä fälaliyoma.

⁷Tä mösöcöböobä jamö ai mobä fa blälälalunö, mobä caua ma bälayono wei ma cui, mösöcö bä caua mö fa fedulalunö, mosibä baömölayoma. Mosibä fa baömölönö, mobä fanomi.

⁸Mashita a lä dodijidai jamö ai mobä fa blälälalunö, mobä caua fa liyäjälalunö, mosibä badalayoma. Öjö dājä, mobä shino blucablou majölayoma. Ai mosibä jamö, moli mosi ma cui ja, 30 mobä cublou majölayoma. Ai mosibä jamö, 60. Ai mosibä jamö, 100.

⁹¿Öjö tawä? —a cuma—. Wamacö yömöcacö lä walalai, bä yömöca daa da dodijiicu.

¹⁰Jesúsnö cama ebä çai yami cuo juo dājä, a w̄alii juomaje. Cama 12 ebä ma cui, ai bä cuo lä showaono wei bä ma cui, tä ʘfa shino wäyää lä j̄aloablalono wei tä ja, a w̄alimaje.

¹¹Abinaja Jesúsnö bä nowa tama. —Iba wamacö lä cui, Yai Bada tänö cama ebä çai lä cuo wei tä ʘ lä cui ja, wamacö bufi jaducumabou. Tä ʘ j̄ilimamou walalao showadao ma mlai ma cui, dodijidawä wama tä ʘ bluca j̄iliaö fe yadiobä, wamacö bufi damaö. Öjö ma cui, iba bä lä mlai bä nija, shominaja ya tä ʘ li showadi wäyää yacläo,

¹²bä bufi li jaducublou mlaobä. Ya lä cuaaö wei tä ja, bä mamö ma showao wei ma cui, bä bufi möblou mlaobä. Bä yömöca ma dao wei ma cui, wale ʘ j̄iliaö walalao mlaobeje. ¿Öjö tawä? Öjö bä lä cui, Yai Bada nija bä bufi mö yabajadou mlaobä, ya w̄a yacläo, bä doblou lä mlai etä nowa mladamaö mlaobä —bä nowa tama.

¹³Abinaja Jesús a cuma. —Ya tä ʘ wäyää lä yacläofe tä ʘ ja, ¿bei wamacö bufi jaducuwämi tawä? Ei tä ʘ ja, wamacö bufi jaducuwämi waiquiwä ja, ai ya tä ʘ bluca lädaö lä majöle tä ʘ ma cui ja, wamacö bufi nia jaducubloimi.

¹⁴’Mobä lä shäyājaö wei a lä cuinö, Yai Bada etä ʘ lä wäyää wei, öjö ya tä ʘfa yai taö lä cufe.

¹⁵Bei yo jamö ai mobä bläläa lä culaliyono weinaja, ai bänö Yai Bada etä ʘ j̄iliaö cuaaöje. Tä ʘ j̄iliaöje dājä, Sadanasi a walöa fa showadaicunö, bei bä bufi jamö etä ʘ lä didile etä ʘ dää nocalei.

- 16'Bei masi blaobä jamö ai mobä bläläa lä culaliyono weinaja, ai bä mö feduwänö tä ʘ çai jiliaö cuaaöje —a cuma—. Tä ʘ jiliaöje dāja, bufi doblalolanö tä ʘ dääöje.
- 17'Öjö ma cui, mobä nasöcö daloblou fa mlacunö, mosibä nö dedejbloimi. Öjö mosibä lä culenaja bä lä cui, bä nö jaba walojaö ma bäquei wei ma cui, bä yabacamou dāja, yedu bä waiquidou. Tä ʘ lä dääö wejei tä ʘ nowa ja bä nö bleaamaöje dāja, inaja showawä bä waicou.
- 18'Tä mösöcöböobä jamö mobä bläläa lä culaliyono weinaja, ai bä ma cuinö tä ʘ jiliaö cuwä mö feduweje —a cuma—. Tä ʘ ma jiliablaö wejei ma cui,
- 19'täbä showadi lä yabäcäblou wei tä ja, bä yabäcäablalou majöblao dicoo. Blada bä ma cui, madofi bä ma cui, öjö bä tabou bufi doblaöje. Öjö dāja, Yai Bada nija bä bufi badadalou fa mlacunö, tä lä dodijidai etä wawädaloimi.
- 20'Öjö ma cui, mashita a lä dodijidai jamö mobä bläläa lä culaliyono weinaja, ai bä ma cuinö tä ʘ jiliaö cuwä mö feduweje. Tä ʘ fa jiliajenö, tä ʘ dää showadaleje. Tä lä dodijidai, öjö bei etä wawäblou. Ai mosibä jamö, 30 mobä faa lä culayono weinaja, ai bä nija inaja etä dodijidawä cublou. Ai mosibä jamö, 60 mobä faa lä culayono weinaja, inaja showawä, ai bä nija etä cublou mö feduo. Ai mosibä jamö, 100 mobä faa lä culayono weinaja, inaja showawä, ai bä nija etä yai dodijidawä cublaliyo —a cuma.
- 21'Abinaja Jesús a cuma. —Cowa wacö ömööamaöje dāja, ¿wöö anö wacö fe yojobobeje, wacö nia ömööamaöje daanö? ¿A lä mio wei tä bäfätä jamö wacö jöyabobeje wacö daanö? Ma. Wacö itaobä jamö wacö itabobeje wacö malä cui, tä jödödöwä wawädoobä.
- 22'Tä ʘ lä jöyabou wejei, wawädowä tä ʘ wäyämamou nomöjöobä tä ʘ. Tä ʘ fei dāja wäyämamou lä jatoö wei, tä ʘ jödödöwä wawäblamobä tä ʘ waiquiwä.
- 23'Wamacö yömöcacö lä walalai, bä yömöca daa da dodijiicu —e cuma.
- 24'Abinaja bä nowa çai tama. —Bä da moyaweicu, ya wä lä faö wei wamale ʘ yai jiliabä. Dodijidawä wamacö yömöca dao ja, dodijidawä wamacö bufi nia yai jaducublou. Öjö dāja, wamacö bufi nia shino yai balaö.
- 25'¿Öjö tawä? Bä bufi jaducuwä lä waiquii, öjö bei bä bufi jamö tä lä didile, Yai Bada tänö etä nia balamafälöö. Öjö ma cui, bä bufi jaducudalou lä mlai bä lä cui, öjö etä wai wiisibö daö lä bädale etä nia çaoö, tä ʘ nofi mojudubou majöobeje —Jesúsnö bä nowa tama.
- 26'Abinaja Jesús a çai cuma. —Yai Bada tänö cama ebä çai lä cuo wei tä lä cui, abinaja tä cuwä. Ficali ca jamö ai anö mobä shäyājaö cuaaö.
- 27'Mobä shäyājaö fa cuaanö, a çolayou. Öjö dāja, a ma mio wei ma cui, a çai ma juadalou wei ma cui, cama mobä cabudu faa jaa bälayou. Mosibä badaö. A mojuduo showao dāja, inaja mobä cublou jätolayou.

28 Cama mashita anö mobä cabudu fa famalönö, mosibä badaö. Bei mobä jaba yädäcou fa nomöjööno, mobä badalaliyo.

29 Öjö ma cui, mobä shīliquilayono wei ja, mobä lä shäyājano wei anö, shocobi a çai aa çolayou, mobä tamobä tä cua waiquia cudeenö —a cuma.

30 Abinaja Jesús a cuu yacläoma. —Yai Bada tänö cama ebä çai lä cuo wei tä lä cui, ¿wedi tä cuwä lä dodijiinaja, bei tä li cuwä? Ya wə faö yacläobä, ¿wedinaja ya yai cubä?

31 Abinaja. Nana shimono wai lä culenaja tä cuwä. Ficali ca jamö, ai anö nana shimono wai döquei. Ai mobä wai cublawä ma cui, öjö nana shimono yai wiisibö dodijiwä.

32 Öjö ma cui, shimono wai fa dömoicunö, shimono fa caulunö, bei shifi cublaliyou. Shifi fa badalönö, shifi yai ösölayou. Shifi bococu fa blaucublalunö, öjö shifi bococu si ajiwä jamö, biyomö bä yabäcabö nia tamoyoluu —a cuma.

33 Jesúsno tä ə wäyää ja, inaja a cuablalou fa yacläablalonö, tä ə nö nia jīliaö cuo fe lä yadiobö wejeinaja, tä ə li wäyää cuaama.

34 ¿Öjö tawä? A wə jəloablalou mlai ja, bä yömölanomi dodijiwä. Öjö ma cui, cama ebä lä nocamabono wei bä çai yamio dājä, cama bä nija tä ə bluca wawämama.

35 Öjö dājä, tä fa weyadalunö, abinaja Jesúsno bä nowa tama. —Bei. Bamacö da bucaduo —bä nowa tama.

36 Öjö dājä, täbä lä çocamono wei bä fa dacöfälöjenö, canawä a jamö Jesús a lä döcäono wei jamö, bä çai fa döcäcöbalunö, a befi çai calälayofälömaje. Canawä ai bä jamö, ai bä befi çai caläö yädaaö mö feduo showaofälöma.

37 Öjö dājä, wadoli a lojode fa cublalunö, mau u bada lä shäyājou wei ubä fe lajoaö waiquioma.

38 Öjö ma cui, madofi a ja, Jesús a fe fa maquealunö, canawä colo ajamö a mio dicooma. A jushuje ja, abinaja a nowa tamaje. —¿Tä ə wäyäle! Bamacö mishi lä duobe tä ja, ¿yamalecö nofi jolijiboimi tawä? —a nowa tamaje.

39 Öjö dājä, a fa jocädalunö, wadoli a wasöa showadalema. U çai bada lä shäyājono wei u çai wasöo ja, abinaja a cuma. —¿U da yanöcöicu! ¿U cuaa dijä! —a cuma. Öjö a wənö wadoli a çai mladou fa showadalonö, tä bluca ononodou showadalayoma.

40 Öjö dājä, abinaja cama ebä nowa tama. —¿Wedi tä tabä wamacö li quilii? ¿Wamale nofi li mölaboimi dicoo tawä? —bä nowa tama.

41 Bä quilii fe balojooma. Bä bufi yai shädayaimou ja, bä wəliyoma. —¿Ei wedi bei a li dodijiwä? Wadoli a bada ma cui, mau u bada lä shäyā shäyämou wei u ma cui, cama a wənö täbä nofi mladou si ijejewä yai —bä cuma.

San Marcos 5

- ¹Öjö dǎjä, Jelasateli bä ulifibö jamö bä befi çai waloquema, modu ai u mashi jamö.
- ²Jesús a fa itoblalunö, Jelasateli a lä feculaböono wei anö a mö bamaleyoluma. Nomawä täbä didiblaaö lä yaimou wejei jamö a lä cuono wei a cuoma.
- ³¿Öjö tawä? Yafi jamö mlai, nomawä täbä didiblaaö lä yaimou wejei jamö a bälöoma. A jaba ma çabono wejei ma cui, a shino cushäblou nocamoma. Duo shibä ma cuinö a çabou doblonomi majöoje.
- ⁴¿Öjö tawä? Matacö badädäbobeje bä ma wabäodino wei ma cui, duo shibä çai ma wabäablalano wejei ma cui, bä doblonomi. Duo shibä jifedimaö nocamoma. Matacö lä badädäbono wejei tä madofi ma cui, showadi täbä çai wǎliaö nocamodima. A nia juwäbou ma lojodobono wejei ma cui, bä nö wǎlojamanomi.
- ⁵Jalu dǎjä ma cui, didi dǎjä ma cui, nomawä täbä lä didiblaaö wejei jamö culanö, a wǎ nö shino quiliaö jaludima. Tä ulifi lä jefubö wei jamö ma cui, inaja showawä. Maa ma bänö cama a si çai shino yacäcamodima.
- ⁶Jesús a blajawä fa dalalönö, a läläa mö baquema. A läläa mö fa baicunö, Jesús a cotä jamö a möfe fa boblaicunö, a wǎfa Bada doblao tama.
- ⁷Öjö dǎjä, a wǎ çali falayoma. —¡Jesús! Yai Bada a Bada lä ayai wa e Ijilubö lä cuinö, ¿wedinaja wale nia fa taamanö, wale nabä li waloo cuboyoi? ¡Wale nö bleaama dijä! ¡Wale a da jililä, Yai Bada a malä cule! —a cudaliyoma.
- ⁸Jesúsnö fecula a lä didile a nowa taö waiquia yalo, e a cuoma. Abinaja a nowa tama. —Fecula wa lä didile, ¡a faa da çolufälö! —a nowa tama.
- ⁹Jesúsnö a wǎfa wǎlima. —Yajalawä ya wǎfa jilou. Yamacö malä bluca wei —e cuma.
- ¹⁰Öjö dǎjä, a lä feculaböono wei a lä cui, Jesús nija a wǎ fe blacäjoma, fecula ebä shomi jamö shömaö mlaobä.
- ¹¹Bei. Öjamö yalo coshino bluca bä iyama, öjö jefu tä balöcö showawä jamö.
- ¹²¿Öjö tawä? Jesús nija fecula bä a fe blacäjou ja, abinaja bä cuma. —Coshino bä nija yamalecö yai da shömöcö—bä cuma.
- ¹³Öjö cudeenö, öjö bä nija bä shömöa yacläquema. Öjö dǎjä, a shi lä wǎlino wei a fa dacöfälöjenö, coshino bä nija, fecula bä bluca lucäa nomöjölaliyoma. Bä fa lucäolalunö, tä mö wädäjäa lä dodijibe jamö, coshino bä shi jalijiwä çai fa yöbalufälönö, modu u jamö bä mishi bluca dubaliyoma. ¿Öjö tawä? Coshino jai 2.000 bä cuoma.
- ¹⁴Coshino bä nofi lä tabono wejei bä lä cui, öjö tä fa dalalöjenö, bä quilili doculayoma. Shabono jamö bä lä bälöle bä ma cui nijamö, bä bälöo lä siboblai bä ma cui nijamö, tä a wǎyäo cuaamaje. Tä a fa jililäjenö, öjamö lä bä bluca aa showalayofälöma, tä möbeje.

¹⁵Jesús nija bä fa waloicunö, fecula bänö a lä daqueno wejei a demi dalalemaje. Jesús a cotä jamö a bufi demi çai looma. Camishi cäcö ja a didioma. Öjö tä bluca fa dalalöjenö, bä quilia fe balojolaliyoma.

¹⁶Öjö däjä, bä mamö lä showaono wei bä lä cuinö tä ɸafa bluca wäyämaje. A lä feculaböono wei a ma cui, coshino bä ma cui, Jesúsno öjö bä bluca lä taamano wei tä ɸafa bluca wäyämaje.

¹⁷Öjö däjä, bä nö quilili bleaama yalo, Jesús a shömöa çölemaje.

¹⁸Öjö däjä, a shömaö çöje ja, canawä a jamö cama ebä çai dökäcäo fa çöbalunö, fecula bänö a lä daqueno wejei a lä cui, Jesús nija a nocao bufi fa doblaonö, a wɸa fe blacäjoma.

¹⁹Öjö ma cui, Jesúsno a shömöa çölema. Abinaja e cuma. —Ma, a çöjamö da çö. Bada tänö wa bayelibläö lä dodijilofe, afä bä nija tä ɸafa shino da wäyäjälu. Wa nofi lä ojadadalufe tä ja, bä da yömölajalu—a cuma.

²⁰Inaja Jesús a cuma yalo, a çöa fa showadalufälönö, Decaboli jamö bä lä bälöle bä bluca nija, Jesúsno a bayelibläö lä dodijilayono wei, bei tä ɸafa wäyää cuaaö showaoma. A wɸa fa jililäjenö, bä bufi möaaö dodijioma.

²¹Bei. Jesús a befi çai caläa fa çölnö, a bucadubaliyoma. Modu u casö jamö a fa itöblalunö, cama nija täbä bluca çöcamolayoyoluma.

²²Öjö däjä, Jailo a wɸafa bada lä cule a walobaleyoluma, judio bä yododabä yafi jamö ai a bada lä läono wei a lä cui. Jesús a fa dalalönö, öjö a cotä jamö a mö fe bolanö

²³a wɸa fama. A wɸa faö ja, a wɸa fe blacäjoma. Abinaja e cuma. —Täyää a nö bleaaö lä cule. A dobloimi waiquiwä tai. Lobe a da jabo, cama nija wa imicö fa maqueicunö wa jalomabä, a demi cuo çöobä —e cuma.

²⁴Jailo nija Jesús a nocaa showalayofälöma. Täbä bluca lä çöcamono wei bä mashicou fa dodijionö, a juu cuaabä jamö a bacäjamamaje.

²⁵A bacäjou cuaafälöbä jamö, suwä a nö jalili bleaaö nö lä dedeano wei a lä cui, a çai cuoma. A nö iyä bleaaö showai ja, lasha 12 a faa waiquimalema.

²⁶A jalomabeje, bluca täbä nija a jublou cuaaö bädaoma ma cui, a jalomaö doblonomije. A jalomaö lä wabano wejei tä nowa ja, blada ebä jödödöwä shino waicaö buomaje. Öjö ma cui, a wanoblou mlai ja, a shino yai balaa dicolayoma.

²⁷¿Öjö tawä? Jesús a wɸafa jililema yalo, a lä bacäjamafälöno wejei jamö, a yauaö ajedou juofälöma. A ajedou fa juofälönö, Jesús camishi ecö jubäa fe yadia yaulalema.

²⁸Abinaja a bufi suwä cuma. “Ya ecö casö jubäa ma bälei wei ma cui, ya jalou weicätä”, a bufi cuma.

²⁹Ecö casö fa jubädalönö, a iyä mladou showadalayoma. “¿Fei däjä, ya nofi lä jalolufe!”, a bufi cudou showadalayoma.

- 30**Jesús a lojodenö a jalou yalo, tä daö showadaoma. Täbä mashicobä jamö Jesús a mö fa yabädalunö, a wə falayoma. —¿Wedinö bei wale jubädalei cufe? —a cuma.
- 31**Bä lä nocamabono wei bänö abinaja a nowa tamaje. —Bada tä. Täbä lä mashicole wa täbä daö ma cule, ¿wedi tabä “wedinö bei wale jubädalei cufe”, bei wa li cuu dicoo? —a nowa tamaje.
- 32**A lä jalolayono wei a dabraö fe yadiobä, täbä lä mashicole täbä möö cuaama.
- 33**Öjö däjä, a suwä ma quililanö ma cui, a wawäblou fe yadilayoma. A quilili blösö blösomolanö, a ajedequema. Jesús cotä jamö a möfe fa deialunö, a wə nö wäquema.
- 34**Öjö däjä, abinaja Jesúsnö a nowa tama. —Ami. Wale nofi mölaboma yalo, wa jalolayou a lä cufe. A bufi yanöcöwä çai da çojamö. Wa nö lä bleano wei tä nia wayu cublou çödaaimi —a nowa tama.
- 35**A wə faö showao däjä, bada e yafi jamö ai ebä cuo lä jäono wei ebä waloa mö baquema. Jailo a bada nija abinaja bä cuma. —Bei. Inaja lä waiquiwä. Tääfä a waicou waiquio cublei. Tä ą lä wäyää wei, ¿wedi tabä wa nia yabäcaö fe yadio? —bä cuma.
- 36**Öjö ma cui, jai bä ą jilianomi, Jesús a mojodi li cuablalou fe yadio showaoma. Judio bä yododabä yafi jamö a lä läono wei a bada lä cui, abinaja a nowa shino tama. —A bufi jalujo dijä. Wale ą bejedi shino bufibou fe da yadio —a nowa tama.
- 37**Öjö däjä, cama ai ebä mö feduwä lä cui, ebä yauo wasöblalema. Pedro a shino nacalema, Santiago a çai. Santiago bä fääshä Juan e çai.
- 38**Judio bä yododabä yafi jamö a lä läono wei a lä cui, öjö e yafi jamö, Jesúsnö bä çai fa çöblalunö, bä ą nö bleaaö dalalema. Bä öcöma. Jailo bä tää e nomöa bouje ja, bä ą nacläama.
- 39**Yafi jamö a fa lucälönö, abinaja bä nowa tama. —¿Wedi tabä wamacö ą nö li bleaaö cule? Wama a moco nomöa lä bole, a nomaö cadidionomi. A mia bädaa lä cule —bä nowa tama.
- 40**A lä nomalayono wei etä daö waiquiomaje yalo, a noca ıcablalamaje. Öjö ma cui, bä bluca sibomalema. Öjö däjä, moco a nomawä lä maqueono wei jamö bä çai lucäbä, öjö bä fçö e nacalema, bä nöö e çai, cama ebä lä nacaleno wei bä çai.
- 41**A lä nomalayono wei, Jesúsnö boco fa dälänö, cama bä caficö ą ja, abinaja e cudaliyoma. —ıDalida, cumi! Einaja a lä cuole, abinaja a yai cuma. “Uçasi, cafä nija ya wə faö lä cule. A da jocädalu.” Einaja a yai cuma.
- 42**Einaja a nowa fa tadalönö, a juu lojode showai, a jocäblou çölayoma. Öjö däjä, täbä bluca shädayaimou dodijioma. Jesús a lä cuaano wei tänö bä bufi mlaaö dodijioma. ¿Öjö tawä? Öjö a moco lä cuinö, lasha 12 a faa waiquimalema a moco cuoma.
- 43**A moco iyamaö showadao bufima. ¿Öjö tawä? Jesús a lä cuaano wei tä ą wäyää mlaobeje, bä ą çai wasöa dodijilema.

San Marcos 6

- ¹Öjö dájä, Jesús a fa alufälönö, cama etä ulifi jamö a çə çəlayoma, a oshe lä cuono wei jamö. Cama ebä lä nocamabono wei bä yauo showaoma.
- ²Täbä lä yanöcöo wei, sábado tä mö jalu ja, judio bä yododabä yafi jamö täbä yömölama. A wə lä jilino wejei ai bä lä cui, bä bufi bluca shädayaimolanö abinaja bä nowa tayoma. —Fei a lä cui, çwedinaja a li fa taamamonö, a li inaja cuaaö? çWedi nija a bufi li jaducublamolayoma tawä? Tä nö lä quiliiji, çbejedi lä tä wawämaö fe balojowä!
- ³Fii fibä ja, täbä showadi madofi lä taö wei, çfei ami daanö? çBä nöö e lä cui, öjö María emi? Santiago, José, Juda, Simón bä lä cui, öjö bä çiyobö e nofi showawä lä cui. Camiyä bämacönö, çfei bä yaö bäma ebä çai nofi lä bälöle! —bä nowa tayoma. Inaja a nofi tabomaje yalo, a wə wailemaje.
- ⁴Abinaja Jesúsnö bä nowa tama. —Yai Bada a wəno wäyäləwä bä lä cui, shomi täbä ulifibö jamö bä ç jiliaö bufi ma doblao wejei ma cui, cama bä ulifibö yai ja, showadi bä ç jiliblaimije. Cama ebä mashi ma cuinö, cama e yafi jamö bä yai lä bälöle bä ma cuinö, showadi bä ç waibouje —bä nowa tama.
- ⁵çÖjö tawä? Jesús imicö fa maqueicunö, ai bolacadabö bəwä bä jalili jalomalalema ma cui, a nia yai lojode lä dablamos wei tä ja, a doblamanomije.
- ⁶A nofi mölabou lä mlaono wejei tä ja, Jesús a bufi shädayaimou dodijioma. Ai täbä bälöblawä mö lä fedui jamö, Yai Bada etä ç wäyäö cuaama.
- ⁷Öjö dájä, cama 12 ebä lä nocamabono wei bä lä cui, Jesúsnö bä naca fa ajedealalönö, bä shömaö bolacadou showadaoma. Fecula bä yashubeje bä tablamalema.
- ⁸Bä nia lä jublölə dájä, shinoco bä jubä, bä nowa talema. Fii defibä nia lä bou wejei, defibä nia shino showabomaje. Bä iyafälöbä, nii bä nia yefibonomije. Täbä didibofälöbeje, täbä nia çai däbonomije. Täbä lulafälöbeje, bä befi çai nia blada yəbonomije.
- ⁹Bä mamicö nia shino didio showaoma. Camishi moli cäcö ja bä nia shino didioma, ai cäcö feyacabou mlajei ja.
- ¹⁰Abinaja bä nowa çai tama. —Wamacö shifilimou mlai ja, wamacö nia lä cuo wei a yafi ja, bä da yanöcöicu. Wamacö juu çofälöo ja, öjamö lä culanö wamacö nia jocäo ço.
- ¹¹Wamacö juu lä cuaaimadi jamö, ai bänö wamacö bälömabou bufiomije ja, wamacö ç çai jiliaö bufiomi dicoweje ja, abinaja wamacö nia cuaaö. Öjö wama bä tabi feiaö yalo wamacö sibolanö, bei wamacö mamicö busi jamö bä libu libu lä sudile, wama ebä nia yaösöblalefälöo. Öjö lä tänö bä nö nia lä bleaaö wei wama tä nia jömaö —bä nowa tama.
- ¹²Inaja bä nowa tama yalo, bä aa fa showalönö, tä ç wäyäö cuaamaje. Wəlidiwä tä ja bä bufi lädobä, täbä yömölaö cuaamaje.

13Fecula bluca bä çai yashuu cuaamaje. Täbä lä jölöcamou wei toubä dabönö, jalili bluca täbä fa jölöçödajenö, bä çai jalomamaje.

14Jesús a wafa wäyämamou blaucublaliyoma yalo, bada tä Elode a ma cuinö, a wafa çai jilia mö fedulema. Ai bä wano lä jilileno wei, abinaja bä jowa cuma. —Fe ojomalewä Juan a demi jocädou fa çonö, öjö a çodawä. A demi jocädou fa çolonö, a lojode dablamous dodijia malä cule —bä jowa cuma.

15Ai täbä mö feduwä lä cuinö, Yai Bada a wano wäyälwä a Elia lä cui, öjö a bufibläö mö fedulayomaje. Ai täbä showawä lä cui, abinaja öjö bä jowa cuu mö feduoma. —Yai Bada a wano wäyälwä a. A wano wäyälwä bä jaba lä bälöono wei bä lä cui, öjö bä owäbou majöa lä cule —bä cuu mö feduoma.

16Öjö ma cui, Jesús a wafa jiliaö däjä, bada tä Elode lä cui, abinaja cama a cuma. —Juan ya fe da bäblamalii, öjö a demi jocäblou fa çolonö, öjö a çodawä —a cuma.

17¿Öjö tawä? Elode a lä cuinö, cama ai e fa shömölönö, Juan a malä juwämaleno wei. Bococu fa çablamalönö, a fe lamaboma. Wedi tä ja mlai. Suwä a ja, Juannö a wasöma cudeenö, a fe lamaboma. ¿Öjö tawä? Bada anö, cama mashi Felipe bei suwäbö e lälema, Elodia a wafa suwä lä cui.

18Öjö tä nowa ja, abinaja Juan a cuma, Elode nija. —Ma, Felipe bä suwäbö wa e taabä wami, tä a läa —a cuma.

19Juan a wä läoma yalo, a suwä jushudaliyoma, Elodia a lä cui. Juan a shämaö showadao bufi ma doblaono wei ma cui, a shämaö doblonomi.

20Bada tä Elode lä cuinö, Juan a nö quili tama yalo, a nowamaö fe malä yadiono wei. Juan a bejedimou daö waiquioma. Yai Bada e lä cuono wei, a çai dama. Juan a wä jilii däjä, a bufi shino ma wedinajamono wei ma cui, a wä jilii bufi doblao fe yadioma.

21Öjö ma cui, Elodia a suwä lä cuinö, Juan a shämaö fe yadiobä, yacumö etä cublaliyoma. Bada tä Elode a lä cuinö, lasha ai a faa çomalema yalo cama ebä nacaalalema, bä iyabä. Cama nija bä bada lä yädäono wei bä ma cui, cama sodado ebä çai lä cuono wejei bä bada ma cui, Calileateli ai bä bada ma cui, öjö lä bä bluca çocamomalema.

22Bä çocamobä jamö, Elodia bä täa e lä cui, a wawäblaliyoma, e blaöabä. A blaöaö dodijiablaloma yalo, bada tä Elode ma cui, cama ebä lä nacaalaleno wei bä ma cui, bä bufi bluca doblaloma. Bada a lä cuinö, abinaja Elodia bä täa e nowa taö showadaoma. —Wa tä lä bufii wei tä afa da yubo. Ya tä nia jöböaö dodijio—a nowa tama.

23A wä nö wäo cadidia fa showadaicunö, abinaja bada a cuma. —Wa tä bufii lä bädao wei tä ma cui ja, bäfä nia dobäö. Ya bada lä läle tä ulifi ma blaucui ma cui, öjö lä wa tä mashi ulifi ma bufii wei ma cui, ya tä nia jöböaö —a cuma.

24Öjö däjä, bä nöö e nijamö a moco faa çolayofälöma, a wälibä. —Nabe. ¿Wedi ya tä yai li nacabä? —e cuma. Abinaja bä nöö e cuu showadaoma. —Wedi mlai. Fe ojomalewä Juan a lä cui, wa fe nacabä, öjö lä —a cuma.

- 25**Bada tä nijamö lobe a mö yabadou fa çolofälönö, a wə shi jaliwä faö showadaoma. Abinaja a cuma. —Bei. Juan fe ojomalewä ya fe bufii. Wa fe fa bäblamalönö, madofi a jamö wa fe fa döcämacönö, camiyä nija wa fe befi çai jöböaö showadaobä —e cuma.
- 26**Elodia bä tää e ʔ ja, bada a bufi wajäblou dodijilayoma. Öjö ma cui, wawädwä a wə nö wäo waiquioma yalo, a wə shominajaaö majöo bufionomi. Bä lä nacaalaleno wei bä ma cuinö, a wə çai malä jilileno wejei.
- 27**Öjö cudeenö, a nowamabeje ai a sodado lämabou lä ajedeono wei, a shömöa fa showadalönö, Juan fe çai ço çoimabä, a wə faö showadaoma. A lä shömöleno wei a aa fa showadalunö, täbä fe lä labono wejei jamö Juan a fa juwälönö, öjamö lä showawä a fe bäblalema.
- 28**Madofi a jamö fe fa döcämacönö, fe befi çai waloa çoqueyoluma. Elodia bä tää e nija fe befi çai fa jöböcönö, öjö länö bä nö e nija fe befi çai jöböa nomöjöquema.
- 29**Juan nija bä lä nocaono wei bä lä cuinö tä ʔ fa jililäjenö, a femata çolemaje. A femata fa çölöjenö, a didiquemaje.
- 30**Jesúsnö bä lä shömöleno wei bä çoblou fa çolonö, bä lä cuaano wei tä ʔfa bluca wäyäo çojolomaje, tä ʔ wäyäo lä cuaano wejei tä ʔfa çai.
- 31**Öjö däjä, abinaja Jesúsnö bä nowa tama. —Bämacö yamili cublao balöodayobä, bämacö befi çai da caläfälö, wamacö washimi çai joloo balöobä —bä nowa tama. Täbä bluca juu nomöjodima yalo bä malä yabäcamono wei. Bä iyabä tä ma cui ja, bä çai yanöcöblamanomije.
- 32**Öjö cudeenö, Jesúsnö cama ebä çai nia yamili cublao fa balöonö, ulifi bloque jamö bä befi çai calälayofälöma.
- 33**Öjö ma cui, bä befi çai caläo fa dalalöjenö, bä çai nö öjöböa fa showadalöjenö, bluca täbä lä bälöblai bä lä cui, washölö jamö bä läläa fe difeliblaliyofälöma. Bä befi çai washölöblou showao mlao däjä, öjö bä waloa balöblaquema.
- 34**Jesús a washölöblou däjä, täbä bluca lä çocamono wei bä dalalema. Oweja bä lä nowamaö wei a cuami däjä, bä nö yamili bleaaö lä culenaja, bä nofi tadalema. Bä nofi ojadadaö fa showadalonö, bluca bä yömölaö cuaama.
- 35**Tä mö weyaö däjä, cama ebä lä nocamabono wei bä fa icuicunö, abinaja a nowa tamaje. —Bei. Ei tä ulifi bloque dodijiwä. Tä mö çai weyaö waiquia lä cule.
- 36**Fei bä shömöa da çolu, bä bälöblawä fe lä fayoblai bä nija bä nii fa lulualalöjenö, bä iyabä —a nowa tamaje.
- 37**Öjö ma cui, Jesús a wə läoma. —Ma, cafä wamacönö wama bä yai iyamabä. Abinaja cama bä cuu nomöjöoma. —¿Wedinaja yamacö fa cuanö, yama bä li iyamalei? ¿Blada 200 wa bä joyaö bufi doblao tawä, yama bä iyamabä? —bä cuma.

- 38 Abinaja Jesús e cuu nomöjöoma. —¿Wedinaja bä nii cudale wama bä tabou cule? Bä möö da balöoje —a cuma. Bä nii wabaö fa cuaajenö, abinaja ebä cuu çoyoluma. —Nii 5 yama bä tabou bädaa lä cule, yuli bolacabö cäcö çai —bä cuma.
- 39 ¿Öjö däjä, moimoima a jamö bä loo toujamaö bufima.
- 40 Bä loamaö cuaaö lä bufino wejeinaja, inaja showawä bä loo cuolaliyoma. Ai bä nijamö 50 bä cuoma, ai bä mö feduwä ja 100 bä cuo mö feduoma.
- 41 Öjö däjä, nii 5 bä lä cuono wei bä dälema, yuli bolacabö cäcö çai. Öjö bä fa dälönö, fedu jamö a mö fa nonoicunö, bä nia lä iyano wei tä ja, Yai Bada nija a bufi ąfa doblalou wäyämoma. Öjö däjä, nii bä fa cälälönö, cama ebä lä nocamabono wei bä nija bä jöböquema, bä lä çocamono wei bä nija bä jöböaö cuaaö nomöjöobeje. Yuli bolacabö cäcö ma cui ja, inaja showawä, bä bluca iyabä, bä omalema.
- 42 ¿Öjö tawä? Bä bluca fa iyaolalunö, bä bädöolaliyoma.
- 43 Öjö däjä, Jesús ebä lä cuinö bä nii sheje çoa fa çabodujenö, yuli bä çai sheje çoçablaö mö fa feduojenö, wöö 12 bä jamö bä fe nii shee lajomalalemaje.
- 44 ¿Öjö tawä? Nii bä ja bä lä iyano wei bä lä cui, 5.000 bä wålo cuoma.
- 45 Öjö däjä, cama ebä lä nocamabono wei bä lä cui, canawä a jamö lobe Jesúsno bä döcäca showadaamabalema. Bä lä çocamono wei bä shömaö çoa juo däjä, Besaida jamö bä bucaduamaö balöo bufima.
- 46 Täbä shömöa fa çabodunö, jefu a balöcö jamö Jesús a dolequea jäbefälöma, Yai Bada nija a wå fabä.
- 47 Tä mö dödüfälöö däjä, modu u möamo jamö cama ebä befi çai caläo showaofälöö däjä, washölö jamö Jesús a yami cuo juoma.
- 48 Öjamö culanö bä nö bleaaö daa fe jalulalema. Wadoli a läadalou fe fa jalunö, bä jamaboma. Öjö däjä, tä mö jalufälöö däjä, cama ebä nija, modu u jamö Jesús a jelejewä juu yaua jälayofälöma. A nia ma jayuono wei ma cui,
- 49 modu u feyaca jamö a jelejewä juu fa dalalöjenö, bejedi lä bä nö wålowä quilia dodijilaliyoma. Bolebole a fa bufijenö, bä quilili şilalamolayoma.
- 50 Cama ebä blucanö a dalalemaje yalo, bä malä quililaliyono wei. Öjö ma cui, lobe bä quilii wasöblalema. —Bä bufi da lojododalu. Ei camiyä cä ya. Bä quili dijä —bä nowa tama.
- 51 Öjö däjä, canawä a jamö a döcäca mö fa fedubalunö, a wadoli mladou showadalayoma. ¿Öjö tawä? Bejedi lä, bä bufi mlaa dodijilayoma.
- 52 Bä bufi jaducublonomi showawä yalo, bä quilima. Nii 5 bä ja, täbä bluca ma iyamaleno wei ma cui, bä bufi yai jifuwä showao dicooma.
- 53 Bä befi çai fa bucadubalunö, Jenesale tä ulifi jamö bä waloquema. Canawä a nata yaquemaje.

⁵⁴Bä itoblou dajā, Jesús a nö öjöböa showadalemaje.

⁵⁵Öjö dajā, cama ebä lä bälöle jamö bä läläblalou cuaaö showadaliyoma, bä jalili çöablabeje. Jesús a wə juu jiliaö ma bädao wejei jamö ma cui, öjamö lä jalili täbä befi çai cadömabolajenö, bä juu läläablalou cuaama.

⁵⁶Shabono wai wajaquemi bä jamö ma cui, shabono bada bä jamö ma cui, bä yami lä bälöono wei bä nijamö ma cui, Jesús a juu lä bädaono wei jamö ma cui, jalili täbä çai waloomaje. Nii bä showadi lä lulaö wejei jamö bä jalili befi çai blaquemaje. Jesús camishi ecö casö ma cui, ecö casö jubädaö bufi fa doblaonjenö bä ʔ fe blacäjoma, bä nia fa jalonö. ¿Öjö tawä? Ecö casö lä jubädano wejei bä lä cui, bä bluca jaloblou showadaoma.

San Marcos 7

¹Bei. Jesús nijamö faliseo bä bada çöablale yoluma, Moisesi etä ʔ ja täbä lä damaö wejei ai bä lä cui bä çai, Jelusale jamö bä lä cuono wei bä lä cui. Öjamö bä cuo dajā,

²Jesúsnö bä lä nocamabono wei ai ebä iyaö dalalemaje. Bä imicö ʔalömonomi cudeenö, judio bänö bä nofi shamibomaje.

³¿Öjö tawä? Faliseo bä bada lä cui, bä imicö ʔalöμου mlai ja, bä iyaö malä mlai. Judio ai bä jödödöwä ma cui, bä imicö ʔalöμου mlai ja, bä iyaimi. Inaja bä nö jaba badabö cuaaö fa balönonö, bä cuaaö nodiablalou showawä.

⁴Nii bä showadi lä lulaö wejei jamö bä juu ja, bä çə fa çəbonö, yedu bä shino ʔalöμου cublaojolou, bä dodijidablou çəbä. Bä dodijidablou çəbä, bä cuaaö showao mlao dajā, bä iyaimi. Bä cuaaö lä nodiablalou wei, ai bluca tä çai tabou mö feduoje. Toubä lä coaö wejei täbä madofi ma cui, jaboca bä ma cui, showadi täbä shino yaluuje. Täbä didibobeje, duo shibä ja täbä lä tablamou wei täbä ma cui, inaja showawä täbä shino yaluu cuaaöje.

⁵Öjö cudeenö, faliseo bä bada ma cuinö, Moisesi etä ʔ ja täbä lä damaö wejei bä ma cuinö, Jesús a ʔalimaje. —Judio bamacö nö badabö lä cuaano wei, bäma bä owäbou nodiablalaö showaobä tä ma cule ma cui, ¿wedi tabä afä wa bä lä nocamabole bä lä cui, inaja bei bä li cuaaimi dicoo? ¿Wedi tabä bä imicö ma shami wei ma cui, bei bä li iyaö dicoo? —a nowa tamaje.

⁶Abinaja Jesús e cuma. —Yai Bada a ʔano wäyäləwä Isaia a lä cuinö, çafä wamacö ʔafa wäyäö balöo ja, a bejedimoma. Jole jole wamacö dodijaö buo. Abinaja tä ʔ cuu. Fei bä lä cuinö, bei bä çaficönö wale nofi doablaö ma buo wejei ma cui, çamiyā nija bei bä bufi yayi cuami.

⁷Çamiyā wale ʔafa Bada doblao ma taö wejei ma cui, bä joleμου dicoo ja, bä ʔ nö bleo bädao. Iba tä ʔ çəwa ma wäyäö wejei ma cui, öjö iba tä ʔami. Cama yanowamö täbä ʔ li bädawä. 'Einaja tä ʔ cuu —Jesús a cuma—.

⁸¿Öjö tawä? Yai Bada tänö tä nabä yayi lä shömaö wei wama tä taö mlai ja, wamacö nö badabö lä cuaano wei wama bä shino owäbou bufi doblao dicoo.

9’Jole jole wamacö li dodijaö —a cuma—. Wamacö nö badabö lä cuaano wei wama bä owäbou fe yadiobä, Yai Bada tänö tä nabä yai lä shömaö wei tä ma cui, wama tä a li waibou.

10Yai Bada wama tä a juaö malä mlai. ¿Öjö tawä? Jaba däjä, abinaja Moisesinö bä nowa tama. Faafä a ma cui, naafä a ma cui, dodijidawä wama bä çai fa cuonö, wama bä a nia juaö. ’Einaja bä nowa tama. Abinaja çai. Bä fjö e nija a wä wäliwä faö ja, a shämobä öjö a waiquiwä. Bä nöö e ma cui nija a wä wäliwä faö dicoo ja, inaja showawä. ’¿Öjö tawä? Einaja bä nowa tama —Jesús a cuma—.

11Öjö ma cui, judio wamacö bada lä cui, abinaja çafä wamacö li cuu. “Faafä, naafä wama bä bayelibläbä bä ma cule, wama täbä lä table, Yai Bada nija wama täbä afa yaia wäyäö ja, täbä nö jöböamobimi lä waiquii täbä”, wamacö cuu dicoo.

12Inaja wamacö cuu yalo, bä fjö, bä nöö, wama bä bayeliblamaimi.

13¿Öjö tawä? Yai Bada tä a juamobä tä a waiquiwä ma cui, wamacö nö badabö lä cuaano wei tä ja, wamacö bufi mö shino blucäo fa dicoonö, öjö wama tä a li läablaläö. Inaja çafä wamacö lä cuaaö weinaja, ai wama bä çai taamaö mö feduo dicoo, Yai Bada tä a juaö mlaobeje. ¿Öjö tawä? Çafä wamacö lä cuaaö wei, bluca tä cua showaa —Jesús a cuma.

14Öjö däjä, Jesúsnö täbä naca fa çalälönö, abinaja bä nowa tama. —Bei. Bluca wamacö lä cuinö wamale a da jliyo. Bä bufi da jaducuicu.

15Täbä lä waö wejei täbänö täbä bufi shamiblou daomi. ¿Öjö tawä? Täbä lä cublai täbänö mlai, bei täbä bufi jamö tä lä didilenö, öjö tänö täbä bufi yai shamiblamou —bä nowa tama.

16-17Öjö däjä, täbä lä çocamono wei täbä fa dacöfälönö, yafi jamö a lucäa fa çölunö, cama ebä lä nocamabono wei bä ajedebalayoluma. A wä faö lä yacläablalono wei, tä a jiliaö cadidio fa mlacujenö, tä a wälimaje.

18Abinaja Jesúsnö bä nowa tama. —Uo. Çafä wamacö ma cui, ¿wamacö bufi çai jaducuwämi tawä? Täbä lä cublai täbänö täbä bufi shamiblou malä mlai. Nii bänö mlai.

19Bei wamacö bufi jamö bä nii didio malä mlai, wamacö bufi shamiamabä. Bei wamacö busi jamö bä nii didio fa balöonö, bä li faoblou ço malä cui —bä nowa tama. Inaja a lä cuno wei tänö, täbä nii afa bluca au taö showadaoma.

20Abinaja a cuma. —Bei täbä bufi jamö tä wäliwä lä didile, öjö tä wawäblou däjä, öjö lä tänö täbä bufi yai shamiblou.

21Bei täbä bufi jamö tä wäliwä didia yalo, wäliwä tä jamö bä bufi shino dayäo. Öjö däjä, bä nofi beshili jushuaö. Shomi täbä madofi çai lämaöje. Täbä çai yanowamö shäöje. Bä çai joleblalou.

22Bä bufi çai waiyou. Waḷidiwä tä çai taöje. Bä çai jolemou. Waḷidiwä tä taö bufi çai doblaoje. Ai täbä dodijaö ayao ja, täbä nofi çai waḷibouje. Täbä afa çai wayoaöje. Cama bä nofi çai yaimamou. Bä bufi dao mlalanö bä çai cuaaö buo.

23Öjö tä waḷidiwä bluca lä cui, yanowamö täbä bufi jamö tä fa didionö, tä wawäblou. Öjö tänö täbä bufi yai shamiblou.

24Öjamö a jocäa fa çolunö, Diloteli bä lä bälöle jamö a alayoma, Sidonoteli bä bälöa mö lä fedule jamö. Öjamö a fa waloicunö, ai bä nijamö a çoblaliyoma. A lä çoblaliyono wei a yami cuo balöo jaatoobä, a nofi ma tamamono wei ma cui etä daö showadaomaje.

25Ai a suwänö a waḷa bälöo fa jililänö, a nabä yai walöa showadaquema. Fecula anö bä tää e nö wai bleaamaö dodijioma. A fa waloicunö, Jesús a cotä jamö a mö fe boblaquema.

26Öjö a suwä lä cui, judio a suwä cuonomi. Silofenisiateli bä nijamö a oshe cublaliyoma. Öjö ma cui, a ma shomiono wei ma cui, Jesús nija a waḷ fe blacäjoma. Bä tää e nija a fecula lä didile e nia fa yashublamanö, a waḷ fe yadibloma.

27A waḷ juo ja, a waḷ faö yacläablaloma. Shomiteliyoma a cuoma cudeenö, abinaja Jesús a cuma. —Ijilu bä iyaö balöobä. ¿Öjö tawä? Ijilu bä nia lä iyaö wei bä nii lä cui, jjiima bä nija bä jöböamou bashiblaö ja, tä dodijidawä malä mlai —a cuma.

28Öjö ma cui, a nia bayeliblamou fe fa yadionö, abinaja a suwä cuo nomöjööma. —Awei, Bada tä. Wa bejedimou. Öjö ma cui, bä shöo e lä cui, öjö bä ijilubö ebänö täbä läcashilä lä blälämaö wejei täbä ja, jjiima bä ma cui, bä çai malä iyaö wei —a cuma.

29Abinaja Jesús e cuma. —Inaja wale nofi taboma yalo, a dodijidawä da çoçamö. Fecula a lä cui, tääfä nija e faa waiquilyoma —e cuma.

30A suwä çoa fa çolufälönö, bä tää demi e bälöa dalalejeloma. Fecula a lä didiono wei e docua waiquilyoma.

31Diloteli bä nijamö a cuoma, modu Calilea u jamö Jesús a aa nomöjölafälöma. Sidonoteli bä lä bälöle jamö a jayublaliyoma, Decaboli tä afa ulifi lä jilabolajei jamö.

32Öjamö lä a cuo däjä, a yömöcacö lä comi wei a çai waloqueyolumaje. Aca çai boleböoma. Öjö a çai fa waloicujenö, Jesús imicö maqueobä bä a fe blacäjoma, a jalomabä.

33Bä bluca lä çoçamono wei jamö Jesúsno a jalili çai fa bayäcäblalunö, bei yömöcacö jamö imicö lucäa mö fedududaliyoma. Bei canojoli bä fa jämölunö, aca yaḷebalema.

34Aca fa yaḷebalönö, a mö nonolanö a bufi laamoma. Öjö däjä, yömöcacö jolablamaö bufii ja, —Efaða! —a cudaliyoma, cama bä caficö a ja.

35Inaja a fa cudalunö, yömöcacö jolablou showadalayoma. Aca çai jayublou showadalayoma.

³⁶Öjö dǎjä, yömöcacö lä wacacablamaleno wei, aca çai lä jayublamaleno wei tä ʔ wäyää mlaobeje, bä ʔ wasöma, ai moli a bädawä ma cui nija tä ʔ wäyää mlaobeje. Inaja bä nowa ma tadano wei ma cui, cama a wʔ ja, bä ʔ shi shino yai dooblou majöö dicooma.

³⁷Bä shino shädayaimou fe balojooma. Abinaja bä nowa tayoma. —A cuaaö lä bädao wei tä ma cui ja, showadi a dodijaö. Bä yömöcacö lä comi wei bä ma cui, bä yömöcacö jolablamaö majöö. Bä aca lä bolebo wei bä ma cui, bä ʔ fablamaö majöö —bä nowa tayoma.

San Marcos 8

¹Ai dǎjä, Jesús nija täbä bluca çocamou çoyoluu dǎjä, bä niibö cuonomi. Bä niibö cuo fa mlacunö, cama ebä lä nocamabono wei bä nacaajedelema. Abinaja bä nowa tama.

²—Ei bä lä çocamole bä nija ya bufi wajäaö a lä cule. Camiyä nijamö bä lä çocale, bolacabö tä mö didi tabou waiquijaje. Bä iyabä täbä çai cuami.

³Bä ofäö ma cui ya bä shömaö fe yadio dicoo ja, bä ofili nia wäcäcou dicoofälöö. Ai bä lä cui, blajai jamö bä cuoma bä malä waloqueno wei —bä nowa tama.

⁴Bä lä nocamabono wei bä lä cui, abinaja ebä cuma. —Ei tä ulifi bloque dodijiwä. Nii a cuami. ¿Wedinaja yama bä li iyamaö cuaaö buobä?

⁵Jesúsno bä wʔlii ja, abinaja a cuma. —¿Wedinaja bä nii cudale wama bä tabou culawä? —Nii 7 yama bä tabou bädaa lä cule —bä cuma.

⁶Öjö dǎjä, bä lä çocamono wei bä lä cui, mashita a jamö bä loamaö bufima. Nii 7 bä lä tabono wejei bä nii fa dälönö, Yai Bada nija a bufi ʔfa doblalou wäyämoma. Öjö dǎjä, bä nii cää fa nomöjölalönö, cama ebä lä nocamabono wei bä nija bä jöböquema, bä lä çocamole bä dobäö mö feduobeje. ¿Öjö tawä? Bä dobäö cuaaö showaomaje.

⁷Yuli bolacadabö bä wai çai tabomaje. Jesúsno öjö bä çai dää nomöjölema. Yai Bada nija, öjö bä ja a bufi ʔfa çai doblalou wäamou fa çonö, bä lä çocamono wei bä nija bä jöböamaö bufima.

⁸Bä bluca fa iyaolalunö, bä bädöolaliyoma. Öjö dǎjä, cama ebä lä cuinö, nii bä sheje çqablaö fa cuaajenö, wöö 7 bä jamö bä nii sheje fe lajomalalemaje.

⁹Bä lä iyano wei bä lä cui, jai 4.000 bä cuoma.

¹⁰Öjö dǎjä, Jesúsno bä shömöa fa çabodunö, cama ebä lä nocamabou wei bä lä cui, lobe, canawä a jamö bä çai döcäçao fa çobalunö, Damanuda tä ulifi jamö bä befi çai caläa çolayoma.

¹¹Jesús nija faliseo bä bada waloquema. Bä fa waloicunö, a wʔ dodijidawä jiliaö mlajei ja, bä ʔ shino lämoma. Jesús a wʔ nia bejedi fa wabajenö, abinaja bä cuma. —Yai Bada wa e nö öjöböamobä, tä nö lä quilijii tä da wawämälö —bä cuma.

12Cama bä ʔ ja, Jesús a bufi fa uomodalunö, a bufi ʔamolayoma. Abinaja a cuma. — Wamacö fei dǎjä lä bälöle wamacönö, ʔwedi tabä wamale ʔ bejedi wabaö bufi li doblao dicoo? Ma, cafä wamacö nija ei ya wǎ lä cui, bejedi lä ya wǎ. Yai Bada ya e nö öjööamobä, tä nö lä quilijii wama tä wawämaö bufi ma doblao wei ma cui, bamacö ʔ nia juaimi—a cuma.

13Öjö dǎjä, bä tabi fa feicönö, canawä a jamö cama ebä çai döcäcäo fa çöbalunö, bä bucaduobä bä calälayoma.

14Bei. Jesús nija bä lä nocaono wei bä lä cui, nii bä ja bä bufi möblaliyoma, bä nofi mojuduquemaje yalo. Canawä a jamö nii moli a çai shino wai jumaje.

15Öjö dǎjä, bä moyawämabobä, Jesúsno nii julumamodima tä ʔfa wäyöo yaclämoma. Abinaja bä nowa tama. —Bä da moyaweicu. Faliseo bä bada lä cui, etä julumamodima wayu. Bada tä Elode a ma cui, inaja showawä cama etä çai wayu cuwä mö feduwä —bä nowa tama.

16Jesús a wǎ ja, bä bufi wedinajamolanö abinaja bä nowa tayoma. —Nii bäma bä çai juu fa mlacunö, nii bä lä juluu wei tä ʔfa taö —bä nowa tayoma.

17Bä bufi lä cuno wei tä daö waiquioma yalo, abinaja Jesús a cuma. —ʔWedi tabä “Nii bäma bä tabou lä mlai, tä ʔfa li wayoaö”, wamacö nowa li tayou dicoblaa cule? ʔBei wamacö bufi çai möbloimi showawä? ʔBei wamacö bufi jaducudaloimi? ʔWamacö bufi jifuwä showawä dicoo daanö?

18Bei wamacö mamocu ma cule ma cui, wama tä möimi bawä. Wamacö yömöcacö çai ma cule ma cui, wama tä ʔ jiliblaimi showawä. Ya bä da iyamablei, ʔwama tä nofi çai jaducuboimi?

19Nii 5 ya bä da cleyablei dǎjä, 5.000 ya bä iyamalema. ʔÖjö tawä? Nii wama bä sheje da çablablei bä ja, ʔwedinaja bä wöö cudale bä ja, wama bä fe lajoblamalema? —a cuma. —Wöö 12 bä ja —bä cudaliyoma.

20—Jǎo, —a cuma—. Nii 5 ya bä da cleyablei dǎjä, 4.000 ya bä çai iyamalema. Öjamö lä, nii wama bä sheje bluca çai çablaö da cuaablei bä nii sheje ja, ʔwedinaja bä wöö cudale bä ja, wama bä fe lajoblamaö çolayoma? —Jesús a cuma. —Wöö 7 bä ja —bä cuma.

21—ʔÖjö tawä? —Jesús a cuma—. ʔBei wamacö bufi li jaducubloimi showawä tawä? Nii bä ja ya bufi jalublalobä yami. ʔWedi tä tabä, “Shomi tä ʔfa li wayoaö da culaanö”, bei wamale nofi li taboimi? —a cuma.

22Besaidateli bä nijamö Jesúsno cama ebä çai yafia nomöjölayoma. Öjamö lä, a lä jubäböono wei a çai waloquemaje. Öjö nija Jesús imicö maqueobä, bä ʔ faö fe blacájoma, a mamocu jalomabä.

23Öjö dǎjä, shabono a sibo jamö, Jesúsno a lä jubäböono wei a öböa showadalefälöma. Cäcöbö fa sibolunö, bei canojolibö fa jämolunö, a lä jubäböono wei mamö casöcö jölöcölema. Öjö dǎjä, imicö çai maquea fa baliicunö, a wǎlima. —ʔFei dǎjä, wa täbä möö tawä? —a cuma.

- 24**A lä jubäböono wei a lä cuinö täbä möadalaö fa cuanö, abinaja e cuma. — Yanowamö ya täbä juu dabraö ma cui, jai fii fibä mömou cuwä dicowä —a cuma.
- 25**Jesúsnö bei mamocu casöcö jubädaö fa çolunö, täbä möö dodijodii fa cuanö, öjö däjä a mamocu yai jaloa cadidia showadalayoma. Täbä bluca möö wacacablou showadalayoma.
- 26**Öjö däjä, a wə nō wāo mlaobä, shabono jamö a famaö mlai ja, cama e yai yafi jamö Jesúsnö a shömöa taa çö showadalema. —Bei. Ei a shabono jamö a lucäo çö bādao dijä —e cuma.
- 27**Jesúsnö bä lä nocamabono wei, Filibo jamö bä çai aa nomöjölayoma, Sesaleateli bä shabonobö lä cublai jamö. Bä çai juu showaofälöö däjä, bä wəlifälöma. —¿Wedinaja wale nofi yai li tabou dodijiaje? ¿Camiyā wedi bei ya jəwa? —a cuma.
- 28**Abinaja ebä cuma. —Fe ojomalewä Juan bei wa jəwa fa talei. Ai bä mö feduwä lä cuinö, Yai Bada a wəno wəyālewä Elia a cuo lä balöono wei, öjö wa jəwa bufidaö talajei. Ai bä ə showawä ja, Yai Bada a wəno wəyālewä ai a demi jocādou fa çolonö, öjö bei wa jəwa çodawä fa talei—bä cuma.
- 29**—Öjö ma cui, çafä wamacö lä cuinö, ¿wedinaja bei wamale nofi li tabou dodijia cule?—Jesús a cuma. Pedro a wə juoma. —Yai Bada tänö a shömabä a lä yaileno wei, öjö çafä bei wa dodijiwä —bei e cuma.
- 30**Öjö däjä, bä lä nocamabono wei bä ə wasöma, a nō öjöböamaö showadao mlaobeje.
- 31**Öjö däjä, cama a lä yanowamöblaleyoluno wei, Jelusale jamö a nō nia lä bleaamano wejei tä ə ja, Jesúsnö bä jaba yömölaö cuaama. Judio bada bä ma cuinö, nofi bəyālewä bä blowājəwä ma cuinö, Moisesi etä ə ja täbä lä damaö wejei bä ma cuinö, öjö bānō a nō nia jəwa bleaamaö fe balojoomaje. A nia waimaje. A nia shämou cadidioma. Inaja a taamamobä a cuo waiquioma. Öjö ma cui, bolacabö tä mö fa dödlönö, a demi nia jəwa jocādou çoma.
- 32**Cama a wəfa wəyāmamou wawādooma. Öjö däjä, Pedronö a çai fa casöblalunö, a wə wasöma.
- 33**Öjö ma cui, Jesús a mö fa jadublalunö, cama ebä lä nocamabou wei bä möö fa cuanö, Pedro a wə wasölema. Abinaja e cuma. —¿A da blajalö, Sadanasi! Yai Bada nija wa bufi taamamou fa mlacunö, yanowamö täbä bufi showadi lä cuu weinaja wa bufi cuablalou malä dicole —e cuma.
- 34**Öjö däjä, bä bluca lä çocamono wei bä lä cui, bä naca çöalalema, cama ebä lä nocamabou wei bä çai. Abinaja bä nowa tama. —Camiyā nija bä nia lä nocaö wei bä lä cui, cama bä cuao bufi lä doblao wei tä ja, bä nia yai wasöo. Wale bufiije yalo, bä ma shäöje däjä, bä nia ojode cuo fe yadio. Bä nia nocaö fe yadio.
- 35**Bitaja bä nia demi lä cudio wei tä ja, bä bufi mö lä blucao wei bä lä cui, bä bəlimi nia cuodayou malä mlai. Öjö ma cui, çamiyā ya nowa ja bä shämou lä ojodao wei bä lä cui, iba dodjidawä tä ə wəyāö quili lä mlajei, öjö bä nia shino bəlimi cuo ayao.

36' ¿Öjö tawä? —a cuma—. Bitä jamö bä madofi bluca lä cublai, bä madofi ma däamou wei ma cui, bä nia yai lä baḷimiblou wei tä joyamou dicoo ja, ¿wedi tänö bä yai nia li bayeliblamou majöo, öjö lä?

37'Bä nia baḷimi lä cuo wei, öjö lä bä madofi ja tä nowa çoamamou dao malä mlai.

38' ¿Öjö tawä? Fei täbä doblou lä mlai, täbä nofi lä jushublalou wei täbä lä cule jamö, iba bä afa jilamou quilii dicoo ja, inaja showawä camiyä ya nia quilii cuo mö feduo. Wale afa çai wäyäo quilii dicoo ja, inaja showawä camiyä ya lä yanowamöblaleyoluno wei ya ma cui, ya nia quilii cuo mö feduo—a cuma—. Fayä etä shii lä cule jamö, ajele ya etäbä çai itou dāja, camiyä ma cui, “Iba cäbä”, ya nia cuu quilii.

San Marcos 9

1'Abinaja Jesúsnö bä nowa çai tama. —Cafä wamacö nija ei ya wə lä cui, bejedi lä ya wə. Ai wamacö lä ublale, wamacö nomaö showaono mlai ja, Yai Bada tänö cama ebä nia çai lä cuo wei wama tä lojode nia dabläo —Jesús a cuma.

2'Öjö dāja,

6' tä mö didi fa cublalunö, Jesúsnö cama ai ebä nacalema. Pedro a nacalema, Santiago a çai, öjö bä fäashä Juan e çai. Bä fa nacalänö, jefu balöcö ösöwä jamö öjö bä çai yami dolequebefälöma. Öjamö bä mamo mötale dāja, Jesús a mömou shomiblaliyoma.

3'Camishi ecö ma cui, ecö shii çai wacalamiblaliyoma. Bä yaluuje dāja bä lä cublou weinaja bädawä mlai, ebä yai mömou aublou dodijilayoma.

4'Öjö dāja, ai täcöbö fa bädalunö, Jesús sho bä a wayoma. Moisesi, Elia sho cäcöbö cuoma.

5'Jesús nija abinaja Pedro a cuma. —Tä a wäyäle. Eja bamacö lä cule, tä dodijidawä waiquiwä. Yano 3 yama bä nia wai itamaö, ¿öjö tawä? Afä a, Moisesi e, Elia e, einaja yama bä nia wai yano tabläo, ¿öjö tawä? —a cuma.

6'Bä nö quilili bleaama yalo, a wə biyäcou bädäoma.

7'Öjö dāja, öläjashi a bada fa itolunö, bä joyablalema. Öjö dāja, öläjashi jamö culanö a wə bädaliyoma. —Ei Ijiluyä a, ya lä nofimaö wei. A wə da jililäje —a cuma.

8'Öjö dāja, lobe tä möö fa cuaajenö, cama bä lä cuono wei jamö Jesús a yami ublaa daa çə majölälemaje, ai täcöbö cuonomi.

9'Jefu a jamö bä dömöo fa çoimanö, Jesúsnö bä wasölefälöma, tä lä dalaleno wejei tä afa wäaö showadao mlaobeje. ¿Öjö tawä? Cama a lä yanowamöblaleyoluno wei a lä cui, a demi jocädou showao mlao dāja, tä afa wäaö balöo mlaobeje.

10'Inaja a cuma yalo, ai täbä nija tä afa wäyäo showadaonomije. A demi afa jocädou lä wäyämono wei tä a ja, bä bufi wedinajamoma yalo, cama bä shino wəliyodima.

11Öjö dǎjä, abinaja Jesús nija bä cuma. —Moisesi tä ʘ ja täbä lä damaö wejei bä lä cuinö, ¿wedi tabä Elia a wǎfa li juu ʘo wǎyǎöje? Yai Bada tänö a shömabä a lä yaileno wei a juu showao mlao dǎjä, ¿wedi tabä öjö bei a nia jowa li juu balöblao? —bä cuma.

12—Awei —Jesús a cuma—. Inaja tä ʘ malä cuu wei. Tä bluca dodijidablaö ʘobä, Elia a nia jowa juu ʘo balöoma. Camiyä ya lä yanowamöblaleyoluno wei ya ma cui, yale nö nia lä bleaamano wejei, tä ʘfa ʘai wǎyämou showaoma. Wale nö nia ʘai jowa waiblamaje.

13Öjö ma cui, abinaja ya cuu. Elia a nia jowa juu lä ʘono wei a wawäblou waiquilayou cublei. A nö öjöböanomije. A taamaö bufi lä doblaono wejeinaja a taamamaje, Yai Bada etä ʘ oni jamö a wǎfa lä wǎyämou weinaja showawä —a cuma.

14Jesúsnö bä lä nocamabou wei bä cuo juobä ja, täbä bluca ʘocamoja jǎlayoma. Cama ai ebä ʘai waloa fa ʘobalucölönö, täbä lä ʘocamole täbä dalalemaje. Moisesi etä ʘ ja täbä lä damaö wejei bä lä cui, Jesús ebä nija bä ʘ lämoma.

15Bä lä ʘocamole bänö Jesús a ʘo fa dalalöjenö, bä shi ʘ bluca dolayoma. A nabä läläa mö baquemaje.

16Öjö dǎjä, Jesúsnö cama ebä wǎlii ja, abinaja a cuma. —Ei bä sho, ¿wedi bei wama tä ʘfa wayoaö cufe? —a cudaliyoma.

17Bä lä ʘocamole ai a lä cui, abinaja e cuma. —Tä ʘ wǎyäle. Fecula anö ijiluyä aca bolebömabou yalo, ʘafä nija ya ʘai waloqueyoluma.

18A shi yai lä wǎlimaö wei dǎjä, ʘcali a shǎyäblao. A fa queoblonö, ʘaficö moshi boyacaoblou, nacö ʘai wǎsönöoblou. A ʘai cofibö cashäshäoblou. Afä wa bä lä nocamabou wei bä nija, fecula ya e yashumaö bufima ma cui, bä dobloimi —e cuma.

19Abinaja Jesús e cuma. —¡Uo! Äyämö ya nö dedeaö ma waiquile, Yai Bada wama tä nofi nö mölabobimi waiquiwä. Wama tä nofi mölabou shaliliobä bämäcö nö dabou ja, ya modaaö waiquiwä. Bei. Bä ijilubö e da bälabayöje —e cuma.

20Jesús nija bä ijilubö e fa bälacöjenö, fecula a lä didilenö Jesús a dalalema. A fa dalalönö, fiya a shi lobe wǎlidamaö fa ʘolonö, a ʘcali shǎyäblaa ʘoquema. Mashita jamö ʘcali a yabolemolanö, ʘaficö moshi boyacaa ʘolayoma.

21Jesúsnö bä föö e wǎlii ja, abinaja e cuma. —Feculanö inaja ijilufä a lä taamaö wei, ¿a nö dedea culawä? —a fa cunö, —Jöö —bä föö e cuma—. Oshe a cuo showao dǎjä, a jaba taamama.

22Cowa wacö ma cui jamö, feculanö a shǎyäblaö cuaaö talei. Mau u jamö ma cui, inaja showawä, a nia waicaö fa showadaonö. ¿Öjö tawä? Wamalecö bayeliblaö dao ja, wamalecö nofi da ojodadalö. Wamalecö da bayeliblalö —e cuma.

23Abinaja Jesús e cuma. —¿Wedi tabä “Wamalecö bayeliblaö dao ja”, bei wale nowa li taö dicoa cule? Yai Bada a bejedi bufibouje ja, tä bluca tamou malä dao wei —e cuma.

24Bä föö e bufi nö bleaalanö lobe e ʔ fadaliyoma. —ʔYa tä ʔ bejedi bufibou lä! Ya bufi lä ujudi wei, ʔwale bufi da lojodoblamalö, öjö lä! —e cuma.

25Öjö dǎjä, täbä lä läläaimi täbä fa dalalönö, Jesús a wǎ faö showadaoma. Fecula a bälöö wasöö ja, abinaja a nowa tama. —Wa aca lä bolebömbabile wa fecula lä cui, wa yömöcacö çai lä comamabile, çafä bǎfä nowa taö lä cule. A faa da çolufälö. A lucäo çödaa dijä —a nowa tama.

26Fecula a ʔçali fa şilalamolunö, fiya a shi wǎlia fa çomalönö, mashita jamö ʔçali a yabolemou ja, a nö quiliama. Öjö dǎjä, fecula a faa çö fa showadalufälönö, jai nomawä fiya a bloque bladio juoma. Öjö cudeenö, bluca bǎ fe lä fayoono wei bǎnö a wǎfa nomawä tamaje.

27Öjö ma cui, Jesúsno a boco fa dǎlǎnö, a fa öbödalönö, a ubladou çölayoma.

28Yafi jamö Jesús a lucäa fa çöicunö, a yami cuo dǎjä cama ebä lä nocamabono wei bǎ fa icuicunö, abinaja bǎ cuma. —ʔWedinaja yamacö li cuao dicoo ja, yama a li yashuu doblonomi dicowä tawä? —ebä cuma.

29Abinaja Jesús e cuma. —Ei bǎ fecula mö feduwä lä cui, bǎ yashublamou si ijejewämi talei. Wamacö iyaö wasöolanö Yai Bada nija wamacö nö bayeli lä nacao wei tänö, ei bǎ shino yashublamou, öjö tä shinonö —e cuma.

30-31Öjamö lä Jesúsno bǎ çai fa jayuicunö, Calilea jamö ʔätowä bǎ çai jayua nomöjöquefälöma. ʔÖjö tawä? Cama ebä lä nocamabono wei bǎ damaö ja, a wǎ yabäçofälöma yalo, a nö öjöböamou bufionomi. Bǎ damaö ja, abinaja bǎ nowa tafälöma. —Ya lä yanowamöblaleyoluno wei ya lä cui, yanowamö täbä nija ya nia jöböamou. Wale ma shǎlei wejei ma cui, bolacabö tä mö didi fa cublalunö, demi ya nia jocädou çö —bǎ nowa tafälöma.

32Öjö ma cui, cama a wǎfa lä wäamono wei, a wǎ ʔilia möblanomije. Tä ʔ çai wǎlii quilimaje.

33Cabenaö jamö Jesúsno bǎ çai çöblou çölayoma. Yafi jamö bǎ çai fa çöblalunö, Jesúsno bǎ wǎlima. —ʔWedi bei wama tä ʔfa li wayoafälöö cublei? —a cuma.

34Öjö ma cui, bǎ ʔ juo fa quilinö bǎ ʔ fanomi. “Camiyä ya yai bada cuobä”, bǎ nowa bluca tayou ja, bǎ ʔfa malä tayofälöno wei.

35Öjö dǎjä Jesús a fa döçäicunö, cama 12 ebä nacao ajedelema. Abinaja bǎ nowa tama. —Çafä ai wa lä cui, bada wa cublou bufi doblao ja, “Camiyä ya shino yai balöwä”, wamacö bufi nia cuimi. Wamacö nia shino yai nojablou. Aifä wama bǎ nia shino yai bayelibläö —bǎ nowa tama.

36Öjö dǎjä, ijilu a fa dǎlǎnö, a öböbou çai möamoblaliyoma. Öjö dǎjä a fa yäböläno, bei wacucu ja a döçämabolanö, abinaja bǎ nowa tama.

37—Ei a lä culenaja a wai ijilu lä cui, a shomi ma cui, camiyä ya wǎnö a wai nofimaö fe yadioje ja, camiyä ma cui wale nofimaö mö feduoje. Inaja showawä, camiyä wale

nofimaöje ja, wale lä shömöleno wei a ma cui, öjö a nofimaö mö feduo showaoje —bä nowa tama.

38Jesús nija Juan a wə fama. —Tä ʔ wäyäle. Ai a lä cuinö, cafä wa wəfa jayumalanö fecula bä yashuu. Yama a dalalema. Camiyä bamacö nija a yädao bufiomi yalo, yama a wasöblalema —a cuma.

39Öjö ma cui, abinaja Jesúsnö a nowa tama. —A wasö dijejä. Tä nö lä quilijii tä lä wawämaö wejei bä lä cuinö, camiyä wale ʔfa jayumalajenö tä taöje ja, wale ʔfa wəlidiwä taö showadaobeje bä malä mlai.

40Camiyä bamacö nija bei bä ʔ läblou dao lä mlai bä lä cui, bämalecö ʔ bayeliblabeje öjö bä li waiquiwä malä cui.

41'Cafä wamacö nija ei ya wə lä cui, bejedi lä ya wə —a cuma—. Iba wamacö lä cui, Cristo wama ecö ʔfa jilou yalo wamacö lä dobäo wejei bä lä cui, inaja showawä öjö bä nia çai dobämou cuo mö feduodayou. Mau si ajiwä u ja wamacö dobäo bädao ma cujei, bejedi lä bä nia dobämodayou.

42'Wəlidiwä tä jamö iba ai a wai luluao lä dicoo wei tä wayu —a cuma—. Yanowamö a ja, bei olafi jamö maa ma bada fa jalemacöjenö, modu u jamö a befi çai queamaöje ja, öjö a nö bleaaö ma cuquei wei ma cui, iba ai a wai lä wəlidiamale a lä cui, öjö bei a nö shino yai bleaaö cuquei.

43'Abinaja çai —Jesús a cuma—. Bei wa imicönö wa wəliamou dicoo ja, imicö da bäblamolou. Wa imicö bäblamolou ja, wa nö nia ma bleaaö wei ma cui, wa demi nia lä cudio wei öjö bei tä shino yai dodijidawä. Shobali wacö jamö wa imicö demi befi çai juu ja, wacö lublou dao lä mlai jamö, öjö däjä wa nö shino yai bleaaö cuquei.

44-45Abinaja çai. Bei wa mamicö ma cui, inaja showawä. Bei wa mamicönö wa wəliamou dicoo ja, mamicö da bäblamolou. Wa mamicö bäblamolou ja, wa nö nia ma bleaaö wei ma cui, wa demi nia lä cudio wei, öjö bei tä shino yai dodijidawä. Shobali wacö jamö wa mamicö demi befi çai shäyäblamolou dicoo ja, öjö däjä wa nö shino yai bleaaö cuquei.

46-47Abinaja çai. Bei wa mamonö wa wəliamou dicoo ja, mamö da ucäblamolou. Wa mamö ma ucäblamolayou wei ma cui, Yai Bada tänö cama ebä çai cuobä jamö wa waloo fe lä yadio wei, öjö bei tä shino yai dodijidawä. Shobali wacö jamö wa mamocu demi befi çai shäyäblamolou dicoo ja, öjö däjä wa nö shino yai bleaaö cuquei.

48Öjamö lä täbä moshabö nia nomadaloimi. Wacö çai ludaloimi.

49'Nö bleaaö tänö täbä bufi nö yai shino wəloblou. Täbä wabamou däjä, dodijidawä täbä li cuo majöobä täbä li wabamou, sayu bänö bä nii mödadiblou majöo lä culenaja showawä.

50Sayu bä dodijidawä. Öjö ma cui, bä oquediblou dicoo ja, bä nia mödadio lä çoo wei etä cuami waiquiwä. Cafä wamacö lä dodijaö wei tänö, sayu bä lä culenaja wamacö nia yai cuo. Dodijidawä wama bä çai cuobä, öjö tä li. Wamacö bufi yanöcöwä çai bluca bälöobä.

San Marcos 10

¹Öjamö lä a fa alufälönö, Judea tä ulifi jamö a walöa fa balöicunö, Jodana u mashi jamö a bucadua nomöjbaliyoma. Öjamö täbä bluca çocamoä fa çoliyonö, Yai Bada etä a ja bä yömöläö çoma, showadi a lä cuaano weinaja showawä.

²Öjö däjä, Jesús nija faliseo bä bada fa icuicunö, a wälimaje. A wä bejedi nia fa wabajenö, abinaja bä cuma. —Täbä suwäbö joyao mlaobä, ¿tä a läa tawä? —bä cuma.

³Abinaja Jesús a cuma. —Moisesinö ¿wedinaja wamacö jaba taamaö bufima? —a cuma.

⁴Judio bä bada lä cui, abinaja bä cuu nomöjöoma. —Ma. Bä suwäbö bä joyaö cadidiobeje, Moisesinö tä a oniblamaö bufima. Bä feyalobö bänö tä a oni fa tablajenö, bä suwäbö bä nija tä a oni nia jöböamaje, etä a çai oni shömamou çobä —bä cuma.

⁵Einaja bä ma cuno wei ma cui, abinaja Jesúsno bä nowa li tama. —Wamacö bufi jifuwä waiquiwä yalo, Moisesinö öjö tä a li oniblalema.

⁶Öjö ma cui, Yai Bada tänö täbä jaba lä tablaleno wei däjä, inaja cama a bufi cunomi. Abinaja a çai cuu showaoma. Wälo a, suwä a, cäcöbö tablalema.

⁷Öjö cudeenö, täbä doayou däjä, täbä shelelou nodiablalou showawä. Bä föö nijamö, bä nöö nijamö, bä jaba ma cublamou wei ma cui, bä suwäbö bä nia fa ajedemabojenö, bä sheleleblou majöo,

⁸moli bä cublou majöobä. '¿Öjö tawä? Einaja a cuu showaoma —Jesúsno bä nowa tama—.

⁹¿Öjö tawä? Yai Bada tänö moli cäcöbö tablamaö waiquilayoma ja lä, yanowamö täbänö cäcöbö sheleleblamaö majöobeje etä cuami waiquiwä —bä nowa tama.

¹⁰Yafi jamö bä lucäa fa çolunö, öjö tä a lä cui ja, cama ebä lä nocamabono wei bänö a wälimaje.

¹¹Abinaja Jesúsno bä nowa tama. —Ai a lä cuinö, bä suwäbö e fa joyalönö, ai a suwä däaö majöo ja, a dobroimi. A suwäbö cua ma waiquile ma cui, ai a däaö lä majöo wei tä ja, a nö waibläö. “Iba ya däa majölei lä cufe”, cama a bufi cuu ma bäle ma cui, inaja Yai Bada a bufi cuimi. “A lä joleblalou wei a”, Yai Badanö a nofi li tabou.

¹²Inaja showawä, suwä a ma cuinö, bä feyalobö e fa joyalönö, ai a wälo däaö majöo ja, öjö a çai dobroimi mö feduwä. A feyalobö cua ma waiquile ma cui, ai a däaö majöo dicoo ja, a nö waibläö. “Iba ya däa majölei lä cufe”, cama a bufi cuu ma bäle ma cui, inaja Yai Bada a bufi cuimi. Ma. “A lä joleblalou wei a”, Yai Badanö a nofi li tabou —Jesúsno bä nowa tama.

¹³Ijilu bä wai oshe lä cui, bä çai waloomaje, Jesús imicö maquelanö Yai Bada nija bä bayelimabä. Cama ebä lä nocamabono wei bänö, öjö bä çai juu fa dalalöjenö bä wasömaje.

14Öjö ma cui, Jesúsno bä wasöö fa dalalönö a wä läblaliyoma. Abinaja e cuma. — Wamacö a läablalou dicoo mlai. Camiyä nija ijilu wama bä yai jumabä bä li. Ijilu bä a juo si ijejewä lä culenaja bä lä cui, Yai Bada tänö öjö bä çai cuobä bä malä cui —a cuma—.

15Ei ya wä lä cui, bejedi lä ya wä. Ijilu bänö Yai Bada a wä juaö si ijejewä lä culajeinaja bä cuwä lä mlai, Yai Bada tänö cama ebä çai cuobä jamö, öjö bä nia cuomi waiquiwä —a Jesús cuma.

16Inaja a fa cunö, ijilu bä fa däablanö, imicö fa maquedonö bä bayelimama. Bä fa bayelimanö, a aa nomöjölayoma.

17Jesús a jaba juu bayäcadou däjä, ai a läläo mö fa baimanö, a möfe boaleyoluma. Jesús a wälii ja, abinaja e cuma. —Tä a wäyäle, çafä wa yai lä dodijaö wei. ¿Wedinaja camiyä ya yai fa cuaanö, ya li bałimi cuobä? —a cuma.

18Abinaja Jesúsno a nowa tama. —¿Wedi tabä camiyä wale afa dodijaö li taö? Yai Bada a lä cui, öjö moli a shino dodijaö ayao.

19Moisesi wa etä a daö. Abinaja tä a cuu. Yanowamö wama täbä nia shäimi. Wamacö nia joleblaloimi. Wamacö nia tomömoimi. Ai wama täbä afa nia jole jole wäyäimi. Wama täbä çai nia mölamaö buomi. Faafä a ma cui, naafä a ma cui, dodijidawä wama bä çai fa cuonö, wama bä a nia juaö. 'Einaja tä a cuu —Jesúsno a nowa tama.

20Öjö däjä, abinaja Jesús nija a cuma. —Tä a wäyäle. Oshe yanö ya tä a lä jilileno wei ya tä a nofi bluca cadidibou showaa lä cule —a cuma.

21Jesúsno a nofimalanö a möö shalilioma. Abinaja a nowa tama. —Ei moli wa tä yai taö fa cunoja, wa nö dodijaö cuquebö wei. Wa täbä bluca lä table, blada bä ja wa täbä fa nomöjöacönö, öjö lä bä blada ja, täbä nö jilili lä bleaaö wei täbä da dobälälö. Inaja wa yai cuaaö ja, afä täbä nowa lä bluca wei wa täbä nia tabodayou. Öjö däjä, camiyä nija a nocaa da showadaiquiyo —a nowa tama.

22Jesús a wä fa jililänö, a bufi çai wajäwä çolayoma, madofi bä bluca tabou dodijioma cudeenö.

23Jesúsno täbä möö fa cuaanö, bä lä nocamabono wei bä nija abinaja a cuma. —Bä nö lä madofibö wei bä lä cui, Yai Bada tänö cama ebä çai cuobä jamö öjö bä nia juu si ijejeomi —a cuma.

24Cama ebä lä nocamabono wei bä lä cui, Jesús a wä ja, bä bufi shädayaimou dodijioma. Öjö ma cui, abinaja Jesúsno bä nowa taö çoma. —Ijilu bä. Yai Bada tänö cama ebä çai cuobä jamö, täbä juu si ijejewämi.

25¿Öjö tawä? —a cuma—. Möscö aca jamö cameyo bä lucäo si ijejewä malä mlai. Bä nö lucäbimi waiquiwä. ¿Öjö tawä? Möscö aca jamö cameyo bä lucäimi ma waiquii, bä nö lä madofibö wei bä lä cui, Yai Bada tänö cama ebä çai cuobä jamö, öjö bei bä lucäimi yaiquei —a cuma.

26 Öjö dāja, bä bufi yai shādayaimou dodijioma. Abinaja ebä cudaliyoma. —Jao. Yai Bada nijamö öjö bä nö cuobimi waiquiwä ja, ¿wedi bei bä shino yai jucāamou dao, öjö lä? —ebä cudaliyoma.

27 Jesúsno bä möö fa cuaanö, abinaja bä nowa tama. —Ma. Yanowamö cama täbä jucāamou buobä, tä cuami waiquiwä. Öjö ma cui, Yai Bada tänö täbä jucāao dao. Yai Bada tänö jödödöwä tä tamabä, öjö a —a cuma.

28 Abinaja Pedro a cudaliyoma. —Öjö ma cui, camiyä yamacö lä cuinö, yama täbä bluca lä tabono wei yama täbä fa daacönö, cafä nija yamacö nocaa lä cule —a cuma.

29-30 Abinaja Jesúsno bä nowa tama. —Cafä wamacö nija ei ya wä lä cui, bejedi lä ya wä. Camiyä nija wamacö bufi mö blucao yalo, iba dodijidawä wama tä a bufibou waiquia cudeenö afä wama täbä daaö ja, wamacö nö bleaaö mlaicätä. Wamacö yafibö ma daamamou wei ma cui, wamacö mashi ma damoquei wei ma cui, faafä, naafä, wama bä bluca ma daquei wei ma cui, ijilufä wama bä ma daaö wei ma cui, wamacö ulifibö ma daamamole ma cui, öjö lä täbä showawä ja, wamacö nia dobāmamou mö yabao ço. Iba wamacö yalo, yanowamö bänö wamacö nö nia ma bleaamaö wejei ma cui, Yai Bada tänö wamacö nia dobäo. Yafi bä ma cui ja, wamacö mashi ma cui ja, naafä bä ma cui ja, ijilufä bä ma cui ja, ulifi a ma cui ja, öjö lä täbä bluca ja, Yai Bada tänö eja wamacö dobäa fa balölälonö, obi wamacö nia çai balimiblamaö.

31 Öjö ma cui, “Camiyä balöwä”, täbä nofi lä tamamou wei bä bluca mö feduwä lä cui, öjö lä bä nia nojablou. Inaja showawä, äyämö bä nojablou si lä ijejei bä lä cui, öjö lä bä nia shino balöblou nomöjödoyou —bä nowa tama.

32 Jelusale jamö Jesúsno bä çai juolanö a balöoma. Jelusaleteli bä lä bälöle jamö tä wālidiwä waiquiwä cudeenö, cama ebä bufi shādayaimou çai jufälöma. Ai bä lä nocono wei bä ma cui, bä çai quilli dodijioma. Öjö dāja, cama 12 ebä çai fa bayäcāblaludunö, cama a nia lä taamamono wei tä ja, bä yömölalema.

33 Abinaja bä nowa tama. —Bei. Jelusale jamö bamacö juu lä cuimadi. Ya lä yanowamöblaleyoluno wei ya lä cui, bada täbä nija wale nia jöböaöje. Nofi bāyāalewä blowājāwä bä ma cui nija, Moisesi tä a ja täbä lä damaö wejei bä ma cui nija, öjö bä nija ya fa jöbömoicunö, wale shāmabeje wale nia jömaöje. Öjö dāja, judio bä lä mlai bä nija wale noshi nia öjödabou majöoje.

34 Wale nö nia waiblaöje. Wale çai nia clāshaöje. Wale si çai yafelia fa balölälöjenö, wale nia shäo cadidioje. Öjö ma cui, bolacabö tä mö didi fa cublalunö, ya demi nia jocādou ço —a cuma.

35 Öjö dāja, Jesús nija Sebedeo bä ijilubö ecöbö ajedequema, Santiago, Juan sho cācöbö lä cui. Abinaja a nowa taböma. —Tä a wāyāle. Yafäcö nia lä nacou wei tä ja, yafälecö a da julä, ¿öjö tawä? —a nowa taböma.

36 Abinaja Jesús e cuma. —¿Wedinaja bāfäcö li taamabä, bei wafäcö nia li nacou? —e cuma.

- 37 Öjö däjä, abinaja cäcöbö cuu nomöjöoma. — Afä wa bä çai bälöa dodijiqueyoluu ja, yafälecö bada lomabou ajedeobä yafäcö a. ¿Öjö tawä? Jayu wa boco mashi jamö ai a, acasi wa boco mashi jamö ai a, yafälecö döcämabou mö feduduobä —cäcöbö cuma.
- 38 Öjö ma cui, abinaja Jesúsnö cäcöbö nowa tama. —Wafä tä lä nacaö wei wafä tä daimi dicowä. Wale nö nia lä bleaamaö wejei däjä, ¿wafäcö nö bleaaö mö feduobä wafäcö daanö? Camiyä wale nia lä taamaö wejeinaja, ¿inaja showawä çafä wafäcö çai tablamou mö feduobä wafäcö? —cäcöbö nowa tama.
- 39 —Awei, inaja lä yafäcö çai tablamamobä yafäcö waiquiwä —cäcöbö cuma. Öjö däjä, abinaja Jesúsnö cäcöbö nowa tama. —Bejedi lä wafäcö a. Wafäcö nö nia bleaaö mö feduo. Wafäcö nia taamaö mö feduoje.
- 40 Öjö ma cui, jayu ya boco mashi jamö a nia lä döcäo wei a lä cui, camiyänö ya tä daimi. Acasi ya boco mashi jamö ma cui, inaja showawä. Cäcöbö nia lä döcämabou wei, Fayänö öjö tä shino daö waiquia —cäcöbö nowa tama.
- 41 Jesús a wä lä juaö wejei ai bä 10 lä cuinö cäcöbö wano fa jililäjenö, Santiago, Juan sho cäcöbö noshi wälidalemaje.
- 42 Öjö cudeenö, Jesúsnö bä bluca fa nacalänö, abinaja bä nowa tama. —Shomi bä lä bälöblai bä nijamö bä bada läobä bä lä cui, cama bä a shino jiliamou bufi doblao bädao. Cama bä bada lä cuinö bä shino shömaö fe blacäjou talajei.
- 43 Öjö ma cui, inaja çafä wamacö nofi tamamobä wamacömi. Ma, çafä wamacö nija a nosiemou bufi lä doblao wei a lä cuinö, bä nosiemaö fe balojoo mlai, bä shino yai bayeliblabä. ¿Öjö tawä?
- 44 “Camiyä ya shino yai bada cuobä”, wa nofi lä tamamou wei wa lä cui, aifä showadi wa bä bluca bayelibladibä wa e nia shino yai cuo.
- 45 Camiyä ya lä yanowamöblaleyoluno wei ya ma cui, ya nosiemobä ya juno malä mlai. Ya bä yai bayeliblabä ya li waloqueyoluma. Yanowamö täbä bluca mö feduwä lä cui ya bä nowa çai çamabä, ya jöböamou mö juma —bä nowa tama.
- 46 Jelico jamö Jesúsnö cama ebä lä nocamabono wei bä çai jayuablalou cuaafälöbä jamö, ai täbä çai bluca fa nocaicunö, bei yo casö jamö a jubäbö loo mö baoma. Dimeo bä ijilubö e cuoma, Badimeo a wafa lä cule. Täbä lä jayuaö wei täbä nija a nofi nia ojode fa tablamonö, a showadi nacou läadima.
- 47 Nasaleteli Jesús a wafa jayuaö fa jililänö, çali a comöö läoma. —¡Jesús! ¡David nodiwä wa e lä cui! ¡Wale nofi da ojadadaliyo!
- 48 Mamicai a nia fa lomabojenö, bluca bänö a wä ma wasöno wejei ma cui, a wä yai nacläa majöa dicolayoma. —¡David nodiwä wa lä cui! ¡Wale nofi da ojadadaliyo!
- 49 Jesús a ublaa fa yanöcödalunö, a lä jubäböono wei a ajedeblamaö bufima. Öjö cudeenö a naca fa showadalöjenö, abinaja a nowa tamaje. —¡Wa fa jocädalunö, a da ubladalu! Wa nacaö a lä cubiyei, ¡a bufi shi da jalijidalu! —a nowa tamaje.

⁵⁰Cäcö lä lucäbono wei cäcö fa jayudalönö, lobe a fa jocädalunö, Jesús nija a icua showadaquema.

⁵¹Abinaja Jesús e cuma. —¿Wedinaja bäfä li taamabä, bei wale li nacaä lälei? —e cuma. A lä jubäböono wei abinaja a cuma. —Bada tä. Ya täbä möbä, wale mamocu da dodijidablaliyo —a cuma.

⁵²Abinaja Jesús e cuma. —Dodijidawä a da çojamö. Wale nofi mölaboma yalo, wa jaloa waiquilayou lä cufe —e cuma. Öjö däjä, a mamocu dodijidablou fa showadalonö, Jesús nijamö a yaua showaquema.

San Marcos 11

¹Jelusale jamö Jesúsno cama ebä çai ajedeblaleyoluma. Oliba tä balöcö jamö bä waloquema, Befajeiteli bä lä bälöle jamö. Bedaniateli bä çai bälöa mö lä fedule jamö. Öjö däjä, öjamö culanö bä lä nocamabono wei ai cäcöbö shömöa balölema.

²Abinaja cäcöbö nowa tama. —Wafäcö juu fa shaliloimadunö, quiji a shabono jamö cäcöbö da yafilujulu. Wafäcö lä çöblöle jamö, yalo bulo a nata lä cule wafä a nia ijilubö dablajalayou, täbä döcamabou showaono lä mlai. Öjö wafä a nata fa cushälänö, äyämö a çai jubö da çoima.

³Ai anö wafäcö wälii bädao ja, “¿Wedi tä tabä, inaja wafäcö li cuaaö cufe?”, a cuu bädao ja, abinaja wafäcö cuu. “Bada anö a majöamaö bufii cublei. Lobe a nia çoamaö ço cublei”, wafäcö cubä —Jesúsno cäcöbö nowa tama.

⁴Cäcöbö lä shömöleno wei cäcöbö aa fa showalöfälönö, Jesús a lä cuno weinaja, inaja showawä tä dabölalema. Cäcöbö fa çöblalunö, täbä showadi lä jayublaaö wei jamö bulo ijilubö a nata yäa dabölalema, bei yoca lä jolele jamö. A nata cushäa showadabölema.

⁵Öjamö lä bä lä ublaono wei bä lä cui, abinaja ebä cuma. —¿Wedi wafä tä tabä, bulo bei wafä a nata li ijilubö cushäaö cule? —ebä cuma.

⁶Öjö ma cui, Jesús a wano wäyäbö ja, ebä a faö çoadaanomi.

⁷Jesús nija bulo a ijilubö çai waloböa çoqueyoluma. A çai waloböa fa çoiquiyonö, yalo bei mabucabö ja, cama cäcöbö camishibö maquea fa balöaböcönö, öjamö lä Jesús a döcäquema.

⁸Jesús a befi çai jubä jamö, bufi doblalolanö a befi çai jayuamamaje. A befi çai nia lä jayuono wei yo jamö, bluca bä camishibö jilablaamou läafälöma. Ai bä mö feduwä lä cuinö, ulifi jamö dejenabä shiço befi çai fa bafedialalöjenö, dejenabä jilamaö cuaaö balöablalou mö feduofälömaje.

⁹Bä lä balöfälöno wei bä ma cui, bä lä nojaono wei bä ma cui, öjö bä a noshi fa jalilaimadunö, abinaja bä cufälöma. —¿Yai Bada a nofi shino yai da doablaje! Bada a wano a lä juimi, öjö a shino yai bayeliblamobä a!

10Bämalecö çai nia lä cuo wei, fei däjä tä cublou ajede waiquiwä, bada tä David a lä cuinö bä çai jaba bälöo lä cuono weinaja showawä. ¡Doblaö bämalecö çai nia cudio! ¡Bada tä lä culadi, a nofi shino yai doablamobä! —bä cufälöma.

11Jelusale jamö Jesús a fa yafilönö, Yai Bada etä yafi jamö a lucäa showalayoma. Öjamö lä täbä bluca möa fa balöabafälönö, tä weyaaö waiquia ja a faa çolayofälöma. Öjö däjä, Bedania jamö cama 12 ebä çai aa mö yabaa çolayofälöma.

12Bedania jamö Jesúsno cama ebä çai cua fe fa jalualunö, öjö tä fena ja, Jelusale jamö bä çai aa mö yabaa çolayofälöma. Bä lä juimi däjä, Jesús a ofälayoma.

13Öjö däjä, tä möö balö mou fa cuanö, ico fi jenabä shico çai blajawä fa dalalönö, a ajedeblaleyoluma, ico bä nia cua fa mönö. A fa icuicunö, fi bloque dalalema. Fi jenabä shino shico buoma. Ico bä showadi lä lalou wei tä cuonomi showawä yalo, fi blocooma.

14Öjö däjä, cama ebä lä nocamabono wei bä yömöca dao mötalöo däjä, fi wafäblaö ja, abinaja a cudaliyoma. —Cafä ico wa fi lä cui ja täbä iyabä, ¡wa fi nia bufiblamamou çödaaimi! —a cudaliyoma.

15Jelusale jamö Jesúsno cama ebä çai fa yafilönö, Yai Bada etä yafi sibo lä jicloi jamö a lucälayoma. Öjamö lä, blada bä ja täbä madofi lä jöbäö wejei bä lä cui, bä yashublalema, täbä madofi lä lulaö wejei bä çai. Bä blada lä nomöjano wejei bä ma cui, bä bladabö lä maquecono wei täbä çai jocäabodayoma. Joledo bä lä nomöjöano wejei bä ma cui, bä lä döcäcäono wei täbä çai jaiyabodayoma.

16Yai Bada etä yafi lä cule jamö täbä madofi çai juu lä buono wejei bä ma cui, täbä çai madofi yafimanomi.

17Öjö däjä, Yai Bada tä a wäyää ja, abinaja bä nowa tama. —Abinaja Yai Bada etä a oni cuu. Iba yafi a lä cui, jödödöwä bä bälöblawä lä yaiblai bä nö bayeli nacaobä, a wafa yafi nia shino yai jilamou. '¿Öjö tawä? Einaja tä a cuu ma cui, täbä lä tomö mou wei bei wama a yafi li tablaö bashiblalayoma —bä nowa tama.

18Nofi bäyäälewä blowäjawä bä ma cuinö, Moisesi tä a ja täbä lä damaö wejei bä ma cuinö, Jesús a wano jililemaje. A wano fa jililäjenö, a shäbeje a nofi washuamaje. Jödödöwä täbä lä cui, Jesús a wä ja bä bufi bluca möaama yalo, bada bänö a nö quili malä tano wejei.

19¿Öjö tawä? Tä mö weyaaö däjä, Jelusaleteli bä shabonobö jamö cama ebä çai faa çolayofälöma.

20Öjö tä fena ja, öjamö lä bä jayuaö çofälöö ja, ico fi fäwä dalalemaje. Bei fi nasöcö ma cui, fi nasöcö bluca fäa waiquilyoma.

21Pedronö öjö tä nofi jaducubou fa showadaonö, abinaja Jesús nija a cuma. —¡Bada tä! ¡Tä da möbla! Ico wa fi da wafäbiblei, ¡fi fäa waiquilyoma tai! —a Pedro cuma.

22Cama ebä bluca nija abinaja Jesús a cuma. —Yai Bada a nofi yai shino da mölaboje, öjö lä.

²³Cafä wamacö nija ei ya wä lä cui, bejedi lä ya wä. Wamacö bufi ujudublou mlai ja wamacö a faö däjä, cafä wamacö ma cui nija tä nia cublou. Quiji a jefu ma cui, Yai Bada wama a nofi yai mölabolanö wama a nowa taö ja, a nia majöblou. “¡Jefu a da ucäblalufälö! ¡Modu u jamö, a da shäyablamobalu!”, wama a nowa taö däjä, a nia jefu queamamou.

²⁴Öjö cudeenö, bamacö nowa taö lä cule. Yai Bada nija wamacö nacou däjä, wama tä nacaö lä bädale tä ma cui, jai wa däa waiquilema wama a nofi tabou ja, wama a nia däaö.

²⁵Abinaja çai. Yai Bada nija wamacö nö bayeli nacao däjä, ai a nija wamacö nowa cua badaa ja, öjö tä mladamaö da balöloje, Faafä a lä culadinö, inaja showawä afä tä çai nowa mladamaö cuo mö feduobä.

²⁶Öjö ma cui, ai täbä nija wamacö nowa lä cuo wei wama tä nowa mladamaimi dicowä ja, cafä wamacö ma cui nija, Faafä a lä culadinö tä nowa lä taboladi tä nia çai mladamaö ayaomi —bä nowa tama.

²⁷Jelusale jamö bä waloa çoquema. Yai Bada etä yafi jamö Jesús a juablalou cuaaö däjä, bada bänö a nabä icuquemaje. Nofi bäyäälewä blowäjawä bä ma cuinö, Moisesi etä a ja täbä lä damaö wejei bä ma cuinö, judio ai bä çai bada ma cuinö, Jesús a nabä fa icuicujenö

²⁸abinaja a nowa tayolumaje. —Bei. Einaja wa cuaabä, ¿cafä bada bei wa tawä? ¿Wedinö bada bei wa tablamalema, öjö lä?—a nowa tamaje.

²⁹Jesús abinaja a cuu mö feduoma. —Cafä wamacö ma cui, bamacö çai nia wälü nomöjöö mö feduo. Wamale a jua da balölöje. Öjö däjä, wale Bada lä tablamaleno wei ya wäfa nia wawämaö nomöjöö.

³⁰Jaö. ¿Wedinö Juan a shömölema, täbä fe ojomabä? ¿Yai Bada tänö a shömölema tawä? Ma, ¿yanowamö täbänö a shömölema sijewä? Wamale yömölaa da balölö —Jesús a cuma.

³¹Bä nowa nia lä juo wei tä afa wayoaö balöoje ja, cama bä a shino läablalodii buoma. Abinaja bä nowa tayodii badaoma. —“Juan a lä cui, Yai Bada tänö a shömölema”, bamacö cuu dicoquei ja, “Inaja lä wama a nofi ma table ma cui, ¿wedi tä tabä wama a wä bejedi li bufinomi, öjö lä?”, a nia cuu majöblao dicoo.

³²Öjö ma cui, “Yanowamö täbä nija a shömamoma”, bamacö cuu dao malä mlai—bä nowa tayoma. Täbä bluca lä ublale täbä nija bä quilima yalo, bä a li cuoma. “Yai Bada a wano wäyålewä Juan a yai cuo dodijoma”, a nofi malä tabono wejei.

³³Öjö cudeenö, abinaja bä shino cuma, Jesús nija. —Cuwi. “Öjönö Juan a shömölema a”, yama a nofi çai taboimi —bä cuma. —Jaö —Jesús e cuma—. Camiyä ya ma cui, cafä wamacö nija, “Öjönö wale shömölema ya”, ya çai nia cuu ayaomi —a cuma.

San Marcos 12

- ¹Bluca täbä nija, shominaja Jesúsno tä ʔ wäyää yaclämou ja, abinaja a cudaliyoma. — Ai anö uba totobä bluca fa döalälönö, etäca jicoloblalema. Öjö däjä, uba bä nia wacä lä cadicaö wejei täca tablaö nomöjölöyoma. Tä möö cuaabeje yafi ösöwä a çai tablaö fa nomöjölönö, cama ficali etäca jamö shomi täbä bälömaquefälöma, etäca nowamaö juobeje. Öjö däjä shomi tä ulifi jamö a aa nomöjölöyofälöma.
- ²’Uba a fabä tä cublou däjä, ficali ca ja bä lä bälöblamabole bä nija, a nosie lä juaö wei ai e fa shömölönö, uba bä yefiamaö çö bufima.
- ³Öjö ma cui, täca nowamaö lä juono wejei bä lä cuinö a nabä quea mö fa baicujenö, a si yafelilalemaje. A shinoco çai shömöa mö yabaa çolemaje.
- ⁴Cama ai e shömöa ma çoleno wei ma cui, bä doublou çö fa mlacunö a fe shäbemaje.
- ⁵Öjö däjä, ai e shömöa ma çoleno wei ma cui, a shälemaje. Inaja showawä, ai ebä shömaö ma çono wei ma cui, ai bä si yafelilalemaje, ai bä shäalalemaje.
- ⁶’Öjö ma cui, bada a lä cui, ai moli e feioma —Jesús a cuma—, bä ijilubö e yai lä cuono wei. Öjö a yai nofimaö dodijioma. Yacumö, öjö a shömöa nomöjölöma. “Ijiluyä ei a yai lä cui, a nofi yai tabobeje”, a bufi cuma yalo, a shömöa nomöjölöma.
- ⁷Öjö ma cui, bä lä bälöblamabole bä lä cuinö, bada tä ijilubö e cadidiwä fa dalalöjenö, abinaja bä nowa tayolayoma. “Ei bada tä ijilubö cadidiwä, ficali ca nia obi tabou lä juo wei. Fei däjä bäma a shäa fa showadalönö, camiyä bamacönö bäma täca yai ficali tabou juo nomöjööbä”, bä nowa tayolayoma.
- ⁸Öjö däjä, a juwäa mö fa balöjenö, a shälemaje. A fa shälöjenö, ficali ca sibo jamö a nomawä shäyäblaquemaje.
- ⁹’¿Öjö tawä? —Jesús a cuma—. ¿Wedinaja wamacö bufi cuu cule? Cama a ficalibö ca lä cui, ¿wedinaja a yai nia cuaaö? Wedinaja mlai. Bä nia waicaö mö juimaö. Shomi täbä nija täca nia jöböamou majöo.
- ¹⁰Yai Bada etä ʔ oni jamö, ¿ei bei wama tä ʔ oni daö mlaa cule? Abinaja tä ʔ cuu. Maa mabä ja a yafi nia lä itamaö wejei bä lä cuinö, ma wailemaje. Öjö ma cui, ma lä waileno wejei ma lä cui, a yafi colo lojodoobä ma yai li cublaliyoma.
- ¹¹Bada tänö inaja tä taamama. Öjö yama tä dabraö ja, jamacö bufi yai shädayaimou! ’Einaja tä ʔ cuu —Jesús a cuma.
- ¹²Shominaja tä ʔ wäyää lä jalomono wei tä ʔ ja, cama bada bä ʔfa yai lä wayoano wei tä damaje yalo, a mini juwäamaö showadaoma. Öjö ma cui, yanowamö täbä nö quili tamaje. Öjö cudeenö, a fa dacöfälöjenö, shomi jamö bä alayoma.
- ¹³Bada bänö Jesús a wafa jolemou nia fa jömajenö, faliseo bä shömöquemaje, bada tä Elode ai ebä çai mö feduwä. A jole jole nofimalajenö a wä nia jilimaje, a wano wäyää çöjlobeje.
- ¹⁴Jesús a wäliyoluuje ja, abinaja bä cuma. —Tä ʔ wäyäle. Wa lä bejedimou wei bäfä dabraö. Yanowamö wa bä nö quili taimi. Bada bä ma cui, bada bä lä mlai bä ma cui, wa bä nofi tabou fe usucuo fa showadaonö, Yai Bada tänö bämalecö taamaö lä bufii

wei, quillii mlai ja wa tä ʔ shino yai wäyää shalilou. ʔÖjö tawä? Öjö cudeenö, bäfä wälili lä cule. Lomateli bada Sesa a lä cui, öjö befi bä blada lä nacaö wejei, camiyä bamacö ma cuinö, ʔbäma bä blada jöböabä tawä? ʔTä ʔ läami daanö? Ma, ʔtä ʔ läa tawä?

15Judio bamacö lä cuinö, ʔblada bä ja bäma bä dobäbä, bamacö daanö? Ma, camiyä bamacönö, blada bäma bä jöböaö mlaobä, ʔöjö bei bamacö?—ebä cuma. Öjö ma cui, bä jole jole dodijaö lä buono wei bä daö waiquilanö, abinaja Jesús e cuma. —ʔWedi tabä wamale ʔ bejedi wabaö? ʔao. Blada a da jöböbaje, ya möblaabä —e cuma.

16Blada a fa jöböquiojenö, bä wälima. —Ei ʔwedi bei fe nö ʔle? ʔWedi bei a wäfa oni cua cule? —a cuma. —Lomateli bada tä Sesa —bä cuu mö feduoma.

17—ʔao —Jesús a cuma—. Sesa cama etäbä ja, wama a li dobäbä. Yai Bada cama etäbä mö feduwä lä cui täbä ja, cama wama a li dobäö mö feduobä —a Jesús cuma. A wä shaliliablalou dodijioma cudeenö, bä bufi yai shädayaimolayoma.

18Jesús a wälibeje, saduseo bä bada lä cuinö, Jesús a nabä icua nomöjöquemaje. Öjö bä saduseo lä cui, abinaja bä bufi shino cuu. “Täbä lä nomaö wei bä demi jocädou ço mlaicätä”, bä bufi shino cuu. Inaja bä bufi cuu waiquiwä cudeenö, a wä nia fa yaclämajenö, a wälimaje. Jesús nija abinaja ebä cuma.

19—Tä ʔ wäyäle. Moisesi tä ʔ oni jamö, abinaja judio bämalecö nowa tama. A ijilubö cuo showao mlao däjä, ai e mashi nomaö dicoo ja, bä suwäbö e lä feiblou wei a nia dääö nomöjöo. Öjö a suwä nija bä ijilubö ebä fa tacönö, a lä nomalayono wei a lä cui, öjö bä ijilubö ebä ʔfa nia jilabou nodio juoje. ʔÖjö tawä?

20’Bei —bada bä cuma, Jesús nija—. Cama cäbä mashi 7 cuoma. Jaba a lä cui, a suwä lä däleno wei a ijilubö cua showaa mlai ja, a mladaliyoma.

21Öjö a mashinö e dää nomöjölema. Öjö ma cui, bei ijilubö e cuo showao mlao däjä, cama ma cui, a çai nomaa majölayoma. Cama a mashinö e dää ma nomöjöleno wei ma cui, inaja showawä.

22ʔÖjö tawä? Jödödöwä bä 7 lä cuinö a suwä dää ma nodiadalano wejei ma cui, bä ijilubö cublou showao mlao däjä, bä bluca nomalaliyoma. Yacumö, suwä a ma cui, a çai mladaliyoma.

23’ʔÖjö tawä? —ebä cuma—. Inaja tä cuoma cudeenö, bäfä wälili lä cule. Yai Bada tänö täbä demi nia jowa jocädamaö lä ço wei däjä, ʔwedi jamö a lä cui, bei a suwäbö yai nia cuodayou, öjö lä? Bluca bä 7 wälo lä cuinö a däadalaö malä cuaano wejei —ebä cuma.

24Abinaja Jesúsno bä nowa taö nomöjöoma. —Yai Bada wama etä ʔ daimi yalo, wama etä lojode çai daimi cudeenö, wamacö ʔ yacäblalodii lä cule. ʔÖjö tawä?

25Yai Bada tänö täbä demi jocädamaö ço däjä, täbä nia doayou malä mlai. Täbä nia çai suwäbö jöböamou çodaaime. Ajele täbä doayou lä mlainaja täbä li cublou showadalayou.

26' ¿Öjö tawä? —Jesús a cuma—. Täbä demi nia jocädou lä çö wei, Moisesi a ma cuinö tä a jaba wawämaö balöoma. ¿Öjö bei wama tä a oni daö mlaa cule? Fii defi wacö lä waono wei defi jamö, Yai Bada a wafa wämou däjä, abinaja a malä cuno wei. Ablaamö a ma cui nija, Isaacö a ma cui nija, Jacobo a ma cui nija, öjö bä nija ya lä bufiblamou wei ya. 'Einaja Yai Bada a cuma.

27' ¿Öjö tawä? —bä nowa tama—. Bä demi cua showaa yalo, öjö bä nija a jowa bufiblamou showawä malä cui. Nomawä täbä nija a bufiblamou dao malä mlai. Wamacö a yacläo dodijiwä.

28' Jesús nija täbä a bluca lämou waiquio däjä, Moisesi tä a ja täbä lä damaö wei ai a lä cui, a icuquema. Jesús a wä dodijaö fa jililänö, a wälii bufi doblaoma. —Moisesinö tä tamaö lä bufino wei tä a bluca ja, ¿wedi jamö tä a lä cui, tä a shino yai lojode dodijiwä? —e cuma.

29' Abinaja Jesús e cuu nomöjööma. —Yai Bada tä a shino yai lä lojode wei, ei lä tä a. Bei. Bä yömöca da daicu, Isaeli wama ecö lä cui. Bada tä lä cui, camiyä bamacö nija a bufiblamobä a lä cui, öjö yami tä Yai Bada cua ayaa.

30' Bada wama tä yai nia nofimaö, cafä wamacö nija a bufiblamobä a lä cui. Bui jaduculanö wama a nia nofimaö, bei wamacö bufi yainö. Wamacö bufi lä cuaablalou wei tä ma cuinö, wamacö nö lä walojoablalou wei tä ma cuinö, wama a nia çai nofimaö fe baloo. '¿Öjö tawä? —Jesús a cuma—.

31' Ei tä a çai lojode cua mö fedua. Cafä wa nofi jolio lä culenaja, inaja showawä, aifä wa bä nofi tabolanö wa bä nia nofimaö. '¿Öjö tawä? —Jesús e cuma—. Moisesi nija Yai Bada tänö bluca tä nabä ma shömöqueno wei ma cui, öjö lä ya täcö a lä wäyafe, täcö a shino yai lojode dodijiwä —a cuma.

32' Moisesi tä a ja täbä lä damaö wei a lä cui, abinaja Jesús nija e cuu nomöjööma. —Tä a wäyale. Bejedi lä wa wä. Yami tä Yai Bada cua ayaa, wa lä cufenaja showawä. Tä bufiblamobä, öjö lä a waiquiwä, ai tä cuami.

33' Yai Bada nija yalo comi bä bluca öshö dodobou ma cujei, bä yalo bluca shämou ma läo wei ma cui, öjö tä nowa çai cua ma bale ma cui, wa tä a lä wäyafe, tä a nowa shino yai bluca. Bui jaduculanö Yai Bada a nofimaöje ja, öjö tä nowa shino yai cua, bei bufi yainö a nofimaöje ja. Bä nö lä walojoablalou wei tä çainö. Cama bä nofi jolio lä culenaja, inaja showawä, cama ai ebä nofi tabolajenö bä nofimaö cuo mö feduoje ja, öjö tä nowa shino yai cua —a cuma.

34' Jesúsno a wä faö moyawäablalou fa jililänö, abinaja e cuma. —Yai Bada tänö cama ebä çai lä cuo wei jamö, bei wa ajedou lä cuimadi —e cuma. Öjö däjä, bä fa quililalunö, a wälii çodaanomije. Moli ma cui, a wä fanomi.

35' Yai Bada etä yafi jamö Jesúsno täbä damalanö, abinaja a cuma. —A shömabä Yai Bada tänö a lä yaileno wei a lä cui, Bada tä David nodiwä e jowa. Moisesi etä a ja täbä lä damaö wejei bä lä cui, inaja bä shino cuu talei. ¿Öjö tawä? ¿Wedinaja bä bufi li fa cunö, David nodiwä bei a wafa li jilabouje?

³⁶Yai Bada bei tä Bufinö a wə famaö cadidou ja, David cama a showawä ma cui, a wə nö malä wäono wei. Abinaja a cuma. Iba Badayä a nija, abinaja Bada tä yai lä cui a cuma. “Äyämö, camiyä jayu ya boco mashi jamö, a döcäa da balöiquiyo. Bä nö lä nabämou wei bä lä cui, cafä nija ya bä möfe nia quilili bomabou.” ’Einaja David a cuma.

³⁷¿Öjö tawä? —Jesús a cuma—. Bada tä David a lä cuinö a nofi ma badabole ma cui, ¿bei e jəwa nia li nodiblou majöo tawä? Bä bufi da dayäo, öjö lä —a cuma. Täbä bluca lä çocamono wei bä lä cuinö, bufi doblalolanö a wə jiliamaje. Bada bä a ma fano wei ma cui, Jesús a wə shino yai lojodoaö ayaoma yalo, a wə jiliaö bufi doblaomaje.

³⁸Täbä damalanö, abinaja Jesús a çai cuma. —Moisesi tä a ja täbä lä damaö wejei bä nija bä da moyaweicu. Camishi labe bä ja bä shino didio bufi doblao talei, bä nowa lä bluca wei bä ja. Nii bä lä lulaö wejei jamö, bä nö bada çai öjöböamou bufi doblao.

³⁹Judio bamacö yododabä jamö, bada bä lä döcäo wei jamö öjamö bä döcäo bufi çai doblao mö feduo. Täbä iyaö çai çocamobä jamö ma cui, bada bä nijamö bä loo coyocaö bufi çai doblao.

⁴⁰Öjö bä lä cuinö, suwä bä lä feiblou wei bä fa mölamajenö, bä madofibö bluca däabläö läoje. Öjö däjä, bä mömou nia liyäjäo fe fa yadionö, Yai Bada nija bä nö bayeli nacao ja, bä a jole jole labaaö bädao. Yai Bada tänö öjö bä nö nia shino yai bleaamaö fe balojoo.

⁴¹Yai Bada nija bä blada jöböoje ja, bä blada lä didiblaaö wejei tä mashi jamö Jesús a döcöaliyoma. Öjamö lä bluca täbä lä çocamou wei täbänö bä blada didiabeje jamö, bä nö daama. Bä nö lä madofibö wei ai bä bluca lä cuinö, blada bluca bä didiblamaje.

⁴²Öjö däjä, suwä a yami nö jölili lä bleaano wei a fa waloicunö, blada cäcöbö wai nowa lä bolacami wei cäcöbö wai didia mö feduquema.

⁴³Öjö däjä, cama ebä lä nocamabono wei bä nacao fa ajedelönö, abinaja Jesús e cuma. —Cafä wamacö nija ei ya wə lä cui, bejedi lä ya wə. Ai bä bluca lä cuinö, blada bä bluca ma didiaö wejei ma cui, fei suwä a yami nö jölili lä bleaale a lä cui, öjö lä a shi shino yai öjöde fe balojowä.

⁴⁴Ai bä lä cuinö, bluca bä li blada tabouje yalo, Yai Bada a malä dobälufajei. Öjö ma cui, fei a suwä nö jölili lä bleaale a lä cuinö, nii bä luluabä cäcöbö shino wai ma tabono wei ma cui, öjö cä lä cäcöbö nö wai jöböa mlaquei lä cufe —Jesús e cuma.

San Marcos 13

¹Yai Bada etä yafi jamö a faö ço däjä, cama ebä lä nocamabono wei ai a lä cui, abinaja e cuma. —Tä a wäyäle. ¡Tä da mö! Yai Bada etä yafi mömou yai liyäjäwä dodijiwä. ¿Öjö tawä? Maa dodijidawä mabänö, ¡bä yafi baushi liyäjäwä dodijiwä! —cuma.

- ²Abinaja Jesús e cuu nomöjööma. —Jöö. Ei wa bä yafi bada dablaö, ¿öjöö tawä? Öjöö ma cui, ei wa bä yafi lä möle, wama bä nofi dobou ma bäle ma cui, bä nia obi waliaöje. Öjöö däjä ai ma jamö, moli ma cui, ma nia maqueo feibloimi —a cuma.
- ³Oliba tä balöcö jamö Jesús a dolequea fa majöbofälönö, Yai Bada etä yafi mö lä yaile jamö, a loa mö yabaa fa çobojolunö, cama ai ebä yami cuo däjä a wälimaje. Pedro, Santiago, Juan, Andrés bä lä cuinö a wäliije ja, abinaja bä cuma.
- ⁴—Yamalecö da yömölalö. ¿Wedinaja tä nö fa cublalunö, a yafi nia yai waliaöje? ¿Wedi cä däjä, öjöö bei tä nia yai wawäblou? Tä tamou lä bufiöle däjä, ¿wedi tä dodijiwänö yamacö nia yai moyawäo? —bä cuma.
- ⁵Bä nowa taö ja, abinaja Jesús a cuma. —Bä da moyaweicu, öjöö lä, wamacö yabäcaö fa dicoojenö, wamacö yaclämaö mlaobeje.
- ⁶Obi, bluca bä nia wawäblou. Camiyä ya wäfa nia ma wäyämou wei ma cui, bä möla dijä. “Öjöö ya”, bä nia cuu. “Tä bluca waicou bufiö lä cule”, bä nia çai ma cuu wei ma cui, öjöö bä nija bä nocaö dijä.
- ⁷Ai bä lä bälöblai ba nabä nia queayou. Inaja showawä, ai bä wäno çai nia jiliamou cuo mö feduo. Öjöö wama tä a jiliaö däjä, bä quili dijä. Öjöö tämi. Öjöö tä nia bluca ma cublou wei ma cui, tä nia bluca waicou showadaomi.
- ⁸Bä shomi lä cublai bä nabä nia queayou balöö. Bä bälöblawä lä yaiblai bä çai. Bluca täbä ulifibö lä cublai jamö, mashita a çai nia bada quida quidamou nö quiliaö. Ofi tä çai nia blaucublou. Ijilu bä nini jaba cuo däjä, bä nö bleaaö lä culenaja, inaja showawä bä nö nia jaba bleaaö cuo. Öjöö jaba cätä bädawä.
- ⁹¿Öjöö tawä? Bä da moyaweicu, wamacö nowamöö fe yadiobä —bä nowa tama—. Judio bä bada lä yododoblai bä nijamö wamacö noshi nia öjödabouje, wamacö nö bleaamabeje. Judio bä yododabä yafi bä jamö ma cui, wamacö si nia çai yafelimaöje. Iba wamacö yalo, bada bä bälöö lä dodijio wei bä nijamö wamacö nia icuamaöje, wamacö dobloimi jömabeje. Cama ebä lämabou mö lä feduo wejei bä ma cui nijamö, inaja showawä. Öjöö ma cui, öjöö bä nija wamale afa wäyäbä, öjöö tä nia cuo.
- ¹⁰¿Öjöö tawä? Yai Bada tänö täbä jödödöwä waicaö showao mlao däjä, iba dodijidawä tä a ja, täbä jödödöwä bälöjowä lä yaiblai, bä nia yömölamou balöö.
- ¹¹¿Öjöö tawä? —Jesús a cuma—. Wamacö fa juwäablajenö, bada bä nija wamacö noshi öjödabouje däjä, wamacö nofi nia lä bäyäo wei tä a ja, bä bufi jolijou dicoo dijä. Wamacö wäliije däjä, wamacö a moyawe juobä, wamacö a nia bayeliblamou. Cafä wamacö bufi lä cuu wei mlai, Yai Bada tä Bufinö wamacö a nia malä macocamaö wei.
- ¹²Tä nia wälidiblou. Cama bä mashi ma cuinö bä noshi nia öjödabouje, bä shäbeje. Bä föö bä ma cuinö bä ijilubö ebä noshi nia öjödabouje. Bä ijilubö ebä ma cuinö, bä föö, bä nöö ebä nabä nia shömaöje, bä shäbeje.

13Iba wamacö yalo, bluca bä bälöjowä lä yaiblai bä ma cuinö, wamacö nofi nia walıbouje. Öjö ma cui, a şämobä etä ma cuo däjä ma cui, a nö walojaö fe lä yadio wei a lä cui, öjö a nia jucäamou fe yadio.

14'Öjö ma cui, bä da moyaweicu —Jesús a cuma—. Tä yai lä walıdii tä lä cui, tä nö cuobö lä mlai jamö tä nia ublamabou fe yadioje, Yai Bada etä yafi jamö. Täbä bluca nia yai lä walıdiblamaö wei, öjö bei tä. ¿Öjö tawä? Ei ya wə ja, wamacö bufi çai jaducuwä cuobä wamacö. Yai Bada a wəno wäyälewä bä lä cui, inaja bä cuu malä balöono wei. Öjamö lä täbä lä walıdiblamaö wei wama tä ublaa dablaö däjä, Judea jamö wamacö lä bälöle, tä lä jefubö wei jamö bä docuo cuo da showadaomobodu.

15Wamacö siboa waiquilyou ja, yafi jamö bä lucäo çödaa dijä. Madofi wama bä çöablaö mlai ja, bä docua da showaolalu.

16Ficali ca jamö wamacö juu lä waiquile däjä, camishifä wama bä çöablaö mö yabao mlai ja, öjamö lä showawä wamacö nia docublou cuaaö.

17'Bä lä şöbönabö wei, ıbejedi lä öjö bä nö nia bleaaö fe balojoo —a cuma—. İjilu bä lä şadımabou wejei, inaja showawä bä nö nia bleaaö cuo.

18Maa däjä tä cublou mlaobä, Yai Bada nija bä da naco, öjö lä.

19Täbä nö nia yai malä bleaaö wei. Yedu ja Yai Bada tänö täbä bluca lä tablaleno wei däjä, täbä nö bleaaö ma showaono wei ma cui, öjö tä lä cublole däjä täbä nö nia şino yai bleaaö. Inaja täbä nia çai cuaaö çö ma mlai ma cui, öjö lä däjä moli bei bä nö nia şino yai bleaaö dodijio.

20Öjö tä lä cublole däjä, Bada tänö tä jamabou bufio mlao fa cunoja, moli ma cui täbä nö demi feio buobö mlai. Öjö ma cui, cama ebä lä yaimabole bä feımabou fe yadiobä, tä nö nia dedejeblamanomi.

21'Ai bä ą ja, bä möla dijä —a cuma—. “ıBei, bei! Yai Bada tänö a şöıabä a lä yaileno wei a lä cui, ıquıjamö a wawälayou lä cufe!”, ai bä ma cuu wei ma cui, “ıBei, bei! ıÄyämö a waloqueyoluu lä cufe!”, ai bä ma cuu wei ma cui, öjö bä ą bejedi bufıbla dijejä.

22Bä lä jolemou wei bä nia wawäblou. Abınaja bä nia jole cuu. “Yai Bada tänö wale şöıabä camiyä wale yailema”, bä nia jole cuu. Yai Bada a wəno jole jole lä wäyö wejei bä ma cui, öjö bä nia çai wawäo mö feduo. Yai Bada a mayo nia jole wawäıaöje. Tä nö lä quılıjii tä nia çai bluca wawäıaö fe yadioje, täbä bufi fa taamajenö täbä yaclämabeje. Yai Bada ebä lä yaimabole bä ma cui, öjö bä bufi taıaıaö fe yadiobeje bä nia wabäodii.

23¿Öjö tawä? Öjö ma cui bä da moyaweicu. Bluca tä nia lä cublou wei tä ja, bamacö yömölaö waiquia lä cule.

24'Öjö ma cui, einaja täbä nö nia yai bleaaö lä cuo wei tä jödödöblou fa balölonö, motoca şıı nia luaaö majöo. Belıbo a ma cui, inaja showawä a şıı nia cuomi majöo.

²⁵Shidicali bä ma cui, bä nia bläläö. ¿Öjö tawä? Judu mösö jamö bä lä shadiladi bä nia layäcäbladayou.

²⁶Öjö lä däjä, camiyä ya lä yanowamöblaleyoluno wei ya nia shino yai bädoyoluu. Öläjashi a jamö ya shiji çai fa itoimadunö, wale nia yai lojode dabläöje.

²⁷Öjö däjä, iba äjele ya bä nia shömaö cuaaö, jödödöwä bä lä bälöblai jamö, iba ya bä lä yaileno wei bä çoabläö cuaabeje.

²⁸Ico fibä ja, showadi wamacö bufi dao talei —Jesús a cuma—. Defi jenabä ducuu däjä, “Fei däjä motoca shiji ajeo çoa nö culai”, wamacö bufi shino cuu.

²⁹Inaja showawä, ei ya tä ä bluca lä wäyäfe, tä wawäblou däjä, wamacö bufi daobä cätä. “Fei däjä a itou ajedewä”, wamale nofi tabobä.

³⁰Cafä wamacö nija ei ya wä lä cui, bejedi lä ya wä. Wamacö fei däjä lä bälöblai wamacö bluca nomaö showaono mlai ja, öjö tä nia bluca wawäblou balöo.

³¹Judu mösö ma cui, bita a ma cui, öjö bä bluca ma mlaolaliyo wei ma cui, camiyä ya wä nia mladoimi.

³²Öjö ma cui, ya tä ä lä wäyäfe tä nia yai lä cubloyoluu wei, yanowamö täbänö öjö lä tä yai daimije —a cuma—. Yai Bada äjele bä lä culadi bä ma cuinö, inaja showawä tä çai daimi cuweje. Yai Bada bei Ijilubö ya e ma cuinö, inaja showawä ya tä çai daimi cuwä. Fayänö öjö tä shino yai daö ayawä.

³³¿Öjö tawä? Bä nö da daicu, öjö lä. Wamacö bufi cuu mlao däjä, camiyä ya lä yanowamöblaleyoluno wei ya nia malä bädou wei.

³⁴Abinaja tä çai cuwä —Jesús a cuma—. Shomi jamö bada a alayono wei ja, cama a nosie lä juamou wei ebä nö dablalou juo. A juu showao mlao däjä, cama ebä yömöläö balöo. Bä ojodamou juobä, bä nowa bluca taö cuaaö. Yoca lä jolemabou wei a lä cui, a nö dao juobä, a nosiemölefälöo.

³⁵¿Öjö tawä? Bä nö da daicu, öjö lä. “Öjö däjä Bada a yai nia wawäö”, wama a nofi tabou malä mlai. A weyade çai nia lä çoblou wei, wama tä daimi. Bähäcuoladi tä çai mlai. Cadala bä ä faö fe lä jaluu wei däjä ma cui, öjö wama tä çai daimi. A nia lä fenaö wei, inaja showawä.

³⁶A bädou bädalayou ja, wamacö mia dablajalou mlaobä, bä nö da daicu.

³⁷Cafä bamacö nowa lä talenaja, bluca täbä nowa çai tamamou mö feduobä ya wä. Bä nö da daicu, öjö lä.

San Marcos 14

¹Judio bänö bolacabö tä mö didi fa cublalunö, Yai Bada a waiteli lä jayuno wei a nofi nia çocamaö çomaje. Öjö däjä, nii bä juluu lä mlai bä ja, bä jaba iyaö lä cuaano weinaja bä nia çai cuaaö çoma, bä jaba lä cuaano wei tä nofi jaducubou showaobeje. Öjö tä nö dabolajenö, bada bänö Jesús a nofi washuamaje. Nofi bäyäälewä blowäjäwä

bä ma cuinö, Moisesi etä ʼ ja täbä lä damaö wejei bä ma cuinö, bä bufi moyawälanö a nia fa juwäajenö, a nia shämamaje.

²Abinaja ai bä malä cuno wei. —Täbä iyaö çai çocamou showaono mlai ja bäma a yai shäö showadaobä, täbä nia lä çocamou wei täbä shifilimoblalou dicoo wei.

³Bedaniateli Simón e yafi jamö, Jesús a iyaö çai loaliyoma. Öjö a Simón lä cui, täbä sicö lä jodemaö wei tä wayunö a lä jaliliono wei, bei a li cuoma. Öjö däjä, suwä anö toubä nö lä clëdeli wei toubä besi çai waloqueyoluma, toubä nowa bluca lä dodijii. Toubä fe fa caloblalönö, Jesús a iyaö çai loo däjä a fe löblalema.

⁴Öjö ma cui, ai bä lä coyocomono wei bä bufi fa jushujudalunö, abinaja bä bufi cudou dicolayoma. “Toubä nowa ma bluca wei ma cui, ¿wedi tabä toubä li wəlia bälei?

⁵Öjö lä toubä ja ¿wedi tabä blada 300 bä li däanomi, bä lä jəli wei bä yai bayeliblamobä?”, bä bufi cudaliyoma. Inaja bä bufi cuolanö, a suwä wasöo showadaomaje.

⁶Öjö ma cui, abinaja Jesúsno bä nowa tama. —A suwä wasöo dicoo dijejä. ¿Wedi tabä bei wama a bufi li suwä yabäcaö dicoblaa cule? Wale fe lä löbafē, tä dodijidawä waiquiwä.

⁷Bä lä jəli wei bä lä cui, cafä wamacö nijamö showadi bä nia malä cudio wei. Wama bä bayeliblaö bufi doblao ja, wama bä bayeliblaö juobä lä cäbä. Öjö ma cui, camiyä ya yai nia cudiomi.

⁸Dodijidawä wale taamabobä toubä çai waloquei lä cufe. Inaja lä yai. Toubä nö lä clëdeli wei toubänö, showadi täbä nomawä lä jölöcaö wejeinaja, bei wale taamaö balöa lä cule. ¿Öjö tawä?

⁹Cafä wamacö nija ei ya wə lä cui, bejedi lä ya wə. Jödödöwä tä jamö ma cui, iba dodijidawä tä ʼ wäyämamou cuaabä jamö, ei a suwänö wale fe lä löblalöfe tä ʼ afa nia çai wäyämamou cuaaö mö feduo, a lä dodijano wei, tä nofi jaducubou nodiablalobeje —bä nowa tama.

¹⁰Öjö däjä, nofi bäyäalewä blowäjäwä bä nijamö Juda Icaliode a alayoma. Öjö bä nija a jömabä, Jesús a nia lä nomojoliano wei a wəfa wäamoma. ¿Öjö tawä? Jesúsno bä 12 lä nocamabono wei a Juda cuoma.

¹¹Öjö a wə ja, nofi bäyäalewä bä bufi bada doblaloma. A nia lä jömaö wei tä nowa ja, blada ebä ʼ afa wäa showadaquemaje. Öjö däjä, Jesús a nia lä nomojoliano wei tä nofi dayäaö showadaoma.

¹²Nii bä juluu lä mlai bä ja, judio bä jaba iyaö çai çocamou çoo däjä, oweja ocalo bä shäbeje tä mö jalu lä cuono wei däjä, cama ebä lä nocamabono wei bä lä cui, abinaja Jesús nija ebä cuma. —¿Wedinaja wa bufi cuu? Yai Bada a waiteli lä jayvano wei bäma a nofi çocamaö çobä, ¿wedi jamö yafi lä cui jamö yama bä nii baabä? —ebä cuma.

- 13 Öjö cudeenö, cama ebä lä nocamabono wei ai cäcöbö shömöa balölema. Abinaja cäcöbö nowa tama. —Bei. Shabono jamö wafäcö çoblou ja, mau ubä befi çai lä döcömabole wafä a mö nia walo baamadayou. Öjö nija wafäcö fa nocalofälönö,
- 14 cama a lä fale jamö, wafäcö falö. Öjö a yafibö lä cui nija ya tä a lä wäyää wei ya lä cui, wafäle wano wäabä. Wafä yano wäli. Öjamö iba bämacö lä nocamabole wamacö sho bämacö nia iyaö, Yai Bada a waiteli lä jayuano wei bäma a nofi çocamoao çobä.
- 15 A yano lä feyacale tä bada jömöao wä, madofi bä befi çai. Öjamö lä bämacö iyabä wafä bä nii bacö —cäcöbö nowa tama.
- 16 Öjö däjä, cama ebä lä nocamabono wei cäcöbä lä cui, shabono jamö cäcöbö fa alufälönö, Jesús a lä cuu weinaja, inaja showawä tä dabölalema. Yai Bada a waiteli lä jayuano wei a nofi çocamoao çobeje, öjö a yafi jamö täbä nii baböquema.
- 17 Tä mö weyaaö däjä, öjamö Jesúsno cama 12 ebä çai waloquema.
- 18 Bä iyaö çai loo däjä, abinaja Jesús a cuma. —Cafä wamacö nija ei ya wä lä cui, bejedi lä ya wä. Cafä wamacö ai a lä cuinö, camiyä bämacö nija a iyaö çai lä çocalenö, öjönö wale nia nomojoliaö —a cuma.
- 19 Cama a wä ja bä nofi fa jalujublamolunö, abinaja ebä cudaliyoma. —¿Camiyä inaja ya nia cuaaö tawä? —bä cudou nocalayoma.
- 20 Abinaja Jesús e cuu nomöjööma. —Iba 12 wamacö nija ai a lä culenö wale nia taamaö. Ei nii ya lä ödäale jamö, a nii çai ödäao lä yädämole a lä cuinö.
- 21 ¿Öjö tawä? —a cuma—. Camiyä ya lä yanowamöblaleyoluno wei ya lä cui, bejedi lä wale nia nomamaöje, Yai Bada etä a oni jamö ya wäfa lä wäyämamou weinaja showawä. Öjö ma cui, wale nia yai lä nomojoliaö wei a lä cui, öjö a nö nia shino yai bleaaö fe baloo. Bä nöönö a lä didibole jamö, a oshe wai mojadi nomaö showadao fa cunoja, etä nö shino yai doblaobö wei —a cuma.
- 22 Bä iyaö showao däjä, nii a fa dälänö, Yai Bada nija a bufi äfa doblalou wäyämoma. Öjö däjä, a fa joyolalönö, cama ebä nija bä jöbäo cuaama. Bä jöbödalanö abinaja e cuma. —Ei nii a da dälöje. Ei nii a lä cui, camiyä ei bei ya yäji nö owä —e cuma.
- 23 Öjö däjä jishima a ja, nashiwä toubä befi çai däa nomöjolema. Yai Bada nija a bufi äfa doblalou wäyämou fa balöonö, cama ebä nija toubä befi çai fa jöböcönö, cama ebä blucanö toubä codaö cuaamaje.
- 24 Öjö däjä abinaja bä nowa tama. —Yai Bada tänö tä äfa lä wäqueno wei tä a bejedi cublobä, öjö bei lä ya iyäbö nö owä. Bluca täbä bayeliblamobä, ya iyäbö läblalio.
- 25 Cafä wamacö nija ei ya wä lä cui, bejedi lä ya wä. Ei uba bäma toubä nashiwä lä coale, ya toubä nia coao çoo jaöomi. ¿Öjö tawä? Obi, Yai Bada tänö cama ebä nia çai lä cuo wei däjä, öjö däjä ya toubä nia shino coao çoo —a cuma.
- 26 Öjö däjä, bä amowamoa fa balölönö, Oliba tä balöcö jamö Jesúsno cama ebä çai aa çolayofälöma.

- 27** Abinaja Jesúsnö bã nowa tafälöma. —Wamacö bluca fa quililalunö yamale nia daa dicoquei. ¿Öjö tawä? Abinaja Yai Bada etä ʘ oni malä cuu wei. Oweja bã çai lä cule a lä cui, öjö ya fa shämalönö, cama ebä nia sheleleblamodayou. 'Einaja tä ʘ oni cuu.
- 28** Öjö ma cui, ya demi jocädou fa çolonö, Calilea tä ulifi jamö bamacö möyou çobä ya nia balölayofälöö —Jesúsnö bã nowa tafälöma.
- 29** Abinaja Pedronö a nowa taö nomöjöoma. —Ei ai bã lä cuinö wa ma daquei wejei däjä, camiyä ya inaja cuaaö mlaicätä —a nowa tama.
- 30** Jesúsnö abinaja a nowa tama. —Cafä nija ei ya wə lä cui, bejedi lä ya wə. Ei tä didi showawä ja, cadala a wə faö showao mlao däjä, cafänö 3 wale nofi nia jole jole mojudoubou cuo —a cuma.
- 31** Öjö ma cui, Pedro a wə lojodoaö ja, abinaja e cuu fe yadioma. —Ma. Cafä bäfä bayelibläö ja, ya shämou mö feduobä tä ma cublole ma cui, bäfä nofi nia jole jole mojuduboimi —e cuma. Inaja showawä cama ai ebä bluca cublalou mö feduo showaoma.
- 32** Jesemani tä ʘfa ulifi lä jilabou wejei jamö bã alayofälöma. Bã fa waloalunö, cama ebä lä nocamabono wei bã nija abinaja Jesús e cuma. —Yai Bada nija ya nö bayeli nacao däjä, äyämö bã loa da balöicu —e cuma.
- 33** Pedro, Santiago, Juan bã lä cui, öjö bã shino nacalefälöma. Öjö bã çai fa bayäcäblaludunö, a bufi jalujublou dodijilayoma. A bufi çai wajäblaliyoma.
- 34** Abinaja e cuma. —Bufi jalujou tänö jai ya nö nomaa showadalayobö, ya bufi cuaaö dicoa lä cuimadi. Eja bã jilaa da jeicu. Bã nö da daicu —bã nowa tama.
- 35** Jesús a bayäcäblou fa çolodunö, a blaaledayoma. Yai Bada nija a nö bayeli nacao ja, abinaja a cuma. —Fei däjä wale nö yai nia lä bleaamaö wejei tä lä cui, wa tä blajamabä tä cua ja, tä da blajamalö.
- 36** Cafänö wa tä bluca taö daö malä cui. ¡Fabe! —a cuma—. ¡Fabemi! Wale nö nia lä bleaamaö wejei, ¡tä yai da blajamalö! Öjö ma cui, wa tä nö blajamabimi waiquiwä ja, öjö waiquiwä. Camiyä ya cuaaö bufi lä doblao weinaja mlai, cafänö wale taamaö bufi lä doblao weinaja wale da taama —a cuma.
- 37** Öjö däjä, cama ebä jilaa lä jäle jamö a waloa fa çoiquiyonö, bã mia dalalema. Pedro nija abinaja e cudaleyoluma. —Simón. ¿Wa midia dicoa mlalawä? Wa nö nia lä dao wei, wa nö dedejbloimi waiquiwä.
- 38** Bã nö shino da daicu. Yai Bada nija bã nö çai bayeli da nacao, Sadanasinö wamacö yabäcäbläö däjä, wama a wə juaö yacläo dicoo mlaobä. Wamacö cadidou bufi ma doblao wei ma cui, wamacö ujuduu si ijejewä waiquiwä—Jesús e cuma.
- 39** Öjamö lä a aa fa çolufälönö, a jaba lä cuno weinaja a cuu çobä, a nö bayeli nacao çodayoma.

⁴⁰Öjö dǎjä, cama ebä jilao lä juono wei jamö, a waloo fa çoiquiyonö, bä mia daa çolaleyoluma. Bä malishama yalo, bä laḏiobä bä cuonomi. Öjö dǎjä, bä ʾ juobä etä cuo fa mlacunö, bä mamicaï mamö li showajao buoma.

⁴¹Cama ebä nija 3 a waloo lä çole dǎjä, abinaja bä nowa tadaleyoluma. —iUo! çWamacö midia showaa cule? çBei wamacö washimi jolou showawä tawä? Inaja lä waiquiwä. Bei. Fei dǎjä tä cublou waiquia lä cule. Ya lä yanowamöblaleyoluno wei wale nia nomojoliaö, wǎḏidiwä talewä bä nija wale jöböabä.

⁴²çÖjö tawä? Bei. Bä da jocäcadalu. çBamacö da jufälö! çQuiji, quiji, tä da möje! Wale nia lä nomojoliaö weinö wale nabä juu waiquia lä cuimi —bä nowa tama.

⁴³Jesúsnö inaja bä nowa taö showao dǎjä, bä lä toujublaliyono wei bä lä cui, yedu Judanö bä çai blacädaleyoluma. Sibala bä showabomaje, nablushi bä çai. çÖjö tawä? Öjö Juda a lä cui, Jesúsnö cama 12 ebä lä nocamabono wei ai e cuoma. Nofi bǎyǎalewä blowǎjäwä bä ma cuinö, Moisesi etä ʾ ja täbä lä damaö wejei bä ma cuinö, judio ai bä bada ma cuinö, öjö bǎnö bä wayu shömölemaje.

⁴⁴Jesús a nia lä nomojoliaö weinö, abinaja bä nowa taö malä balöono wei. —Ya mamocacö nia lä buyucaö wei, öjö bei a waiquiwä. Wama a fa juwälönö, wama a documao mlai ja, wama a öböafälöbä —bä nowa taa balölema.

⁴⁵çÖjö tawä? Jesús a nabä cadidio showadaolanö abinaja Juda e cuma. —iBada tä! — e fa cudalunö, mamocacö buyucaö showadaoma.

⁴⁶Öjö dǎjä, Jesús a nabä quea fa showadaicujenö, a juwälemaje.

⁴⁷Öjö ma cui, Jesús ai e ublao lä ajedeono wei a lä cuinö, sibala a fa ucädalönö, a ishoa mö balayoma. Nofi bǎyǎalewä bada a wǎ juamobä e nabä fa queicunö, a yömöca baquequeblalema.

⁴⁸Öjö dǎjä, a nabä lä juno wejei bä nija abinaja a Jesús cuma. —Tomömolewä bä nabä juu lä culajeinaja, çwedi tä tabä bei wamale nabä li juu cuaaö dicoo cufe? çWedi tä tabä shocobi, nablushi wama bä çai fa juimanö, bei wamale li juwämaö cuboyoi?

⁴⁹Yai Bada etä yafi jamö showadi bamacö çai looma. Öjamö ya täbä yömölaö dǎjä, wamale juwäano malä mlai. Öjö ma cui, Yai Bada etä ʾ oni jamö tä ʾ lä cuu weinaja tä ʾ bejedi cublobä, ei tä waiquiwä —a cuma.

⁵⁰Öjö dǎjä cama ebä lä cuinö, Jesús a fa dacöfälöjenö, bä docuolaliyoma.

⁵¹çÖjö tawä? Jesús nija ai a fiya nocaaö fe yadiofälöma. Camishi cäcö ja a didio mlai ja, acadafu cäcönö a shino jöyao bädaoma. Öjö a nia juwäama ma cujei,

⁵²bä imicö lä waliblaole dǎjä ecö acadafu icocolayoma. Öjö cäcö tabi fa feiquefälönö, shinocu a doculayofälöma.

⁵³Öjö dǎjä, nofi bǎyǎalewä blowǎjäwä e yafi jamö, Jesús a öbölefälömaje. Nofi bǎyǎalewä blowǎjäwä bä ma cui, judio ai bä bada ma cui, Moisesi etä ʾ ja täbä lä damaö wejei bä ma cui, öjamö lä öjö bä bluca çocamoä waiquileyoma bä cuoma.

⁵⁴Pedro a jäwäjäwä fa yauicunö, nofi bäyäälewä bada e yafi sibo lä j̄icoloi jamö, a lucäa jälayofälöma. Öjamö Yai Bada tä yafi lä nowamano wejei bä sodado lä cui, öjö bä si lä bomono wei jamö a çai loa mö fedualiyoma, a si bomobä.

⁵⁵Bei. Nofi bäyäälewä blowäjäwä bä ma cuinö, ai bä bada yododaö mö lä feduono wei bä ma cuinö, Jesús a wafa jole wäyäbeje bä dayäämaje, öjö lä bä a ja, a shämaö showadaobeje. Bä ma dayäano wejei ma cui bä cuonomi.

⁵⁶A wafa jole lä wäyano wejei bä ma blucaono wei ma cui, bä jolemoma yalo, bä a faö fe usucublonomi.

⁵⁷Ai bä fa ubladonö, a wafa jole wäyääöje ja abinaja ebä cuma.

⁵⁸—Ei a lä cui, yama a wä j̄ililei cublelei. Abinaja a cuma. “Ei Yai Bada etä yafi lä cui, yanowamö bänö a yafi lä tablaleno wejei a lä cui, ya e yafi nia waliaö. Öjö däjä bolacabö tä mö didi cublou fa çolonö, ai ya yafi nia tablaö ço majöo, yanowamö bänö a yafi tablaö daö lä mlajei a yafi lä cui.” Einaja a cuu cublelei —ebä cuma.

⁵⁹Inaja a wano wäyääö ma cuaano wejei ma cui, bä a shomiablalou mö feduo fe yadioma.

⁶⁰Öjö däjä, nofi bäyäälewä bada a ublaa fa möamoblalunö, Jesús a wä nia fa wäamanö, a wäl̄ii cadidioma. —¿Wa wä nia juomi tawä? ¿Wa wafa lä wäyäfajei bä a bejedi tawä? —e cuma ma cui,

⁶¹Jesús a wä juo mlai ja, mamicai a ubladioma. Nofi bäyäälewä bada anö a wäl̄ii çoma. —Yai Bada tänö a shömabä a lä yaileno wei, ¿öjö lä cafä bei wa e waiquiwä tawä? A wafa doblao lä talajei, ¿öjö wa l̄jilubö tawä?

⁶²—Awei. Öjö lä ya e —Jesús e cudaliyoma—. Ya lä yanowamöblaleyloluno wei ya lä cui, Yai Bada a nö walojaö lä ayao wei boco jayu mashi jamö, wamale nia çai döcäa dabladayou. Ölajashi a jamö wamale çai nia itou dabraö —a cuma.

⁶³Öjö a wä ja, nofi bäyäälewä bada a lä cui, a nö walowä jushudaliyoma yalo a camishibö cacablamolayoma. Abinaja bä nowa bluca tama. —¿Öjö tawä? ¿Wedi tä tabä ai bäma bä a li j̄iliaa çolei?

⁶⁴Yai Bada a nö lä waiblafe, wama a wä j̄iliaa waiquilei lä cufe. Yanowamö a ma cui, ¡Yai Bada a wafa jilou! Fei däjä, ¿wedinaja wamacö bufi cuu dodijio? —bä nowa tama. Öjö a wä ja, Jesús a shämaö showadao bufimaje.

⁶⁵Ai bänö a nabä icua showadaquemaje. A mö cläshamaje. A çai shädaamaje. Mamocu fa j̄oyabojenö, a nö waibläöje ja, a çai wäl̄imaje. —Yai Bada a wano wäyäälewä wa yalo, tä afa wäa da cadidiba. ¿Wedinö bei wa shälei cufe? —a nowa tamaje. Bä sodado lä läono wei bä ma cuinö a si çai baimaje.

⁶⁶Yano lä feyacale jamö, Jesús a wäl̄ijilayouje däjä, bäfätä jamö Pedro a loo juoma, yafi sibo lä j̄icoloi jamö. Öjamö a loo däjä a suwä waloquema, nofi bäyäälewä bada a wä juamobä a suwä lä cui.

⁶⁷Pedro a si bomou fa dalalönö, a möö dodijolanö abinaja e cuma. —Nasaleteli Jesús a lä cui nija cafä wa çai cuoma —a cuma.

⁶⁸Öjö ma cui, a wə jole mojudumoma. Abinaja Pedro a cuma. —Cuwi. Camiyä nija wa lä cufe ya tä daimi —suwä nija a cuma. Einaja e fa cunö, yoca lä joleono wei jamö a icua cublou majölayoma.

⁶⁹Öjamö lä a cuo majöö däjä, bada a wə juamobä a suwä lä cuinö a daa fa çölalönö, a wə faö çoma, ai bä ublao lä ajedeono wei bä nija. —Fei a lä cui, öjö lä bä nija a çai çocaoma —a cuma.

⁷⁰Öjö ma cui, a wə jole mojudumou çoma. Tä nö dedejedou fa çolonö, bä ublao lä ajedeono wei bä lä cui, abinaja Pedro nija bä cuu çoma. —Bejedi lä öjö bä nija cafä wa çai çocaoma. Calileатели wa malä cui —bä cuma.

⁷¹Öjö ma cui, Pedro a wə jole mojudumou çoma. Yai Bada a wəfa çai jayumama, a jolemou bädao ja, a nö bleaamamou showadaobä. —Öjö wa wəfa lä wäyäfe a wəlo lä cui, ya daimi —a jole cuma.

⁷²Inaja Pedro a lä cuno wei däjä, yedu cadala a wə nocablaliyoma. A wə cadala faö ço waiquioma yalo, Jesúsno a nowa lä tano wei, Pedronö tä nofi jaducudalema. “Cadala a wə faö ço showao mlao däjä, 3 wale nofi nia jole mojudoubou”, a nowa malä tano wei. Öjö däjä a bufi fa wajäblalunö, a öcöma.

San Marcos 15

¹Tä mö jaba jaluimaö däjä, bada bä bluca yododaö jaluma. Nofi bäyäälewä blowäjäwä bä ma cui, judio bada ai bä ma cui, Moisesi tä ą ja täbä lä damaö wejei bä ma cui, öjö bä bluca fa yododoblalunö, bä ą wayolayoma, Jesús a shäbeje. Öjö däjä, bococu fa çacöjenö, Bilado nijamö a öbölefälömaje, Lomateli bänö Bilado a bada lä lämabono wei a nijamö.

²Öjö däjä, Biladonö a wəlii ja, abinaja a cuma. —¿Cafä judio bada bei wa? —a cuma. —Awei. Wa wə cadidou —Jesús a cuma.

³Öjö däjä, nofi bäyäälewä blowäjäwä bä lä cuinö, bluca täbä ą ja Jesús a wəfa tamaje.

⁴Öjö däjä, Biladonö a wəlii çoma. —¿Wedi tä tabä wa wə li juomi? —e cuma—. Wa wəfa lä talajei, ¿wa täbä ą jiliblaimi tawä?

⁵Öjö ma cui, Jesús a wə juo çodaanomi. A wə juo fa mlacunö, Bilado a bufi shino yai wedinajamo a dodijilayoma.

⁶Bei. Abinaja Bilado a showadi cuaama. Judio bänö Yai Bada a waiteli lä jayuno wei a nofi çocamoao çoje däjä, judio bä fe lä labono wei, ai moli a shino fadamaö çoma, judio bänö a wəfa yubou lä cadidiono wejei a lä cui.

⁷Öjö däjä, Lomateli bä ą bada juaö lä mlajei, ai bä fe labomaje. Ai a lä cui, Balabasi a wəfa cuoma. Jelusaleteli bä lä shifilimoblalono wei däjä, ai a shäa dicolema yalo, a fe labomaje.

⁸Bilado a showadi lä cuaaö wei tä daöje yalo, judio bä bluca fa çoçamoliyonö, bä fe lä laono wei ai moli a famaö çoço bufimaje.

⁹A wə juo ja, abinaja Bilado a cuma. —Judio wamacö nija a bada cuobä a lä cui, ¿öjjo bei wama a jujeblamaö bufii tawä? —a cuma.

¹⁰Einaja Bilado a cuma. Nofi bäyäälewä blowäjawä bä daö malä waiquiono wei. “Jesús a dodijaö ayao cudeenö, a shämaö bufi doblaöje”, bä nofi tabou waiquioma.

¹¹Öjjo ma cui, nofi bäyäälewä blowäjawä bänö täbä shi domaö waiquia dicoaje yalo, Jesús mlai, Balabasi a wəfa shino yai yublalemaje, a jujeblamabä.

¹²Abinaja Bilado e cuu nomöjööma. —Jəo. Inaja wamacö cuu ja, judio wama a wəfa bada lä jilabou wei a lä cui, ¿wedinaja öjjo ya yai li taamabä? —e cuma.

¹³Öjjo däjä, bä ə shi doa çoço dicolayoma. —¿Fii balitama defii jamö, a shino da basumacö! —ebä cublalou çoçoma.

¹⁴—¿Wedi tabä fii balitama defii jamö ya li basua bädamaquei? ¿Wedi bei tä li taö dodijioma? —a Bilado cuma ma cui, öjjo a wə ja, bä ə yai balaa dicolayoma. —¿Fii balitama defii jamö, a da basumacö! —bä cublaloma.

¹⁵Öjjo däjä, bä lä çoçamono wei bä bufi doblamabou bufi doblaoma yalo, Balabasi a faa çoçmalema, bä lä cuno weinaja showawä. Jesús a si fa yafelimalalönö, fii balitama defii jamö a basuabeje, a jöböa majöquema.

¹⁶Öjjo däjä, bada tä yafibö sibo lä jicoloji jamö, sodado bänö Jesús a öböbou çai sibo majöa çoçayofälömaje. Cama ai bä çai sodado mashi bluca nacaalalemaje.

¹⁷¿Öjjo tawä? Camishi ushi wacäjawä labe cäcö ja, a jole jole lucäa nomöjömalemaje, bada bä nö öjöböamobä bä showadi lä didio wei cäcö lä culenaja cäcö ja. Too totocö mösöcöbö fa motoleblalöjenö, Jesús nija totocö yojoquemaje, bada bänö olo bä showadi lä yojobou wejeinaja showawä.

¹⁸Cama nija bä fa icublaanö, a nö waiblaöje ja, abinaja a nowa jole tamaje. —¿Bada tä! Judio bä nija wa bada lä läle, ¿dodijidawä wa bälödiobä! —a nowa jole tamaje.

¹⁹Ujudidiwä desinö a fe shäbemaje. A çai cläshamaje. Bä möfe çai jole deidolanö a nofi jole jole badamoamaje.

²⁰Inaja a nö waiblaö cuaaö fa balöojenö, ushi wacäjawä cäcö jayua fa çoçlujenö, cama ecö ja a didia çoçaquemaje. Öjjo däjä, fii balitama defii jamö a basuabeje, sibo jamö a öböa taa majölefälömaje.

²¹Jesús a öböbou çai lä juimadujei jamö, Sileneteli Simón a lä çoçimi a mö bamalefälömaje. Alejado, Lufo, öjjo cäcöbö lä cui bei föö e cuoma. A mö fa bamalöjenö, öjjo nija fii defii nia lä blilio wei defii yalucua nomöjööa fe yadimaquemaje, edefii çai nojaobä.

²²Cocoda tä əfa ulifi lä jilabou wejei jamö, a çai waloquemaje. ¿Öjjo tawä? “Cocoda”, täbä caficö lä cudou wei, Felosi blaobä tä əfa ulifi taöje.

23Nashiwä toubä ja, çowami täbä fa coyocoblalöjenö, a fe nia fa coamajenö, e toubä dodoquemaje. Öjö ma cui, toubä coanomi.

24Fii balitama defî jamö a basuquemaje. Jesús camishi ebä nia fa sheleleablajenö, jömamodima ebä wai ja bä wabäoma, bä nia camishi tabou mö lä feduo wejei bä jömamobä.

25¿Öjö tawä? Motoca a ösöfälöö däjä, a basuquemaje.

26Öjamö etä a oni çai shadimaquemaje, Jesús nija tä nowa lä cuono wei tä dablamobä. Abinaja etä a oni cuma. “Judio bä nija a bada cuobä, ei a”, etä a oni cuma.

27-28Fii balitama defî jamö, Jesús a basua fa möamobalöjenö, cäcöbö doblou lä mlai cäcöbö çai basua lülocua mö feduquemaje. Acasi boco mashi jamö ai a, jayu boco mashi jamö ai a, cäcöbö basua taaquemaje.

29Ai bä lä cui bä jayuafälölanö a jömamaje. A nö çai waiblamaje. Abinaja ebä cuma. —¿Bei tawä! ¿Wa nö nia jowa lä walojano wei! Yai Bada wa etä yafi fa wälialönö, bolacabö tä mö didi fa cublalunö, ¿wa etä yafi nia itamaö lä çono wei wa nofi lä cui!

30¿Cafä a yai da bayeliblamolu, öjö lä! Wa ma basule ma cui, ¿a da itolu! —ebä cuma.

31Inaja showawä judio bada bä ma cuinö a nö çai waiblaö cuo mö feduomaje. Nofi bäyäälewä blowäjawä bä ma cui, Moisesi etä a ja täbä lä damaö wejei bä ma cui, judio ai bä bada ma cui, abinaja bä nowa tayou ja bä cuma. —Ai täbä jowa bayeliblaö ma cuaano wei ma cui, ¿wedi tä tabä cama bei a li bayeliblamamou mlaa cule?

32Yai Bada tänö a shömabä a lä yaileno wei, ei a cua waiquiwä ja, judio bä nija a bada cuobä a waiquiwä ja, fii balitama defî jamö a basudio dicoo mlai ja, a yai itou showadaobä. Bäma a itou fa dalalönö, öjö däjä bäma a wä bejedi yai bufiblaö showadaobä, ¿öjö tawä? —bä jole cuma. Fii balitama ai deficö jamö, cäcöbö basua mö lä fedule cäcöbö ma cuinö a nö çai waiblaböma.

33Bei. Motoca a yöloloblojolayou däjä, tä mö jödödöwa dödölayoma. Motoca a itou bähäcuaö däjä tä shî jomoblou çolayoma.

34¿Öjö tawä? Tä shî jomoblou ço lä bufiole däjä, Jesús a wä icalî fa falönö, cama bä caficö a ja, abinaja a cudaliyoma. —¿Eloi, Eloi, lema sabadani? Inaja a lä cuobojoli, abinaja a yai cuma. “¿Yai Bada bäfä lä bufiblale! ¿Yai Bada bäfä lä bufiblale! ¿Wedi tä tabä bei wale li daa dicofälöö cufe?” ¿Öjö tawä? Einaja a yai cudaliyoma.

35Bä ublao lä ajedeono wei ai bä lä cuinö a wä fa jililäjenö, abinaja bä cuma. —¿Bei, bei! ¿Elia a jowa nacaö lä cule, Yai Bada a wano wäyälewä a jaba Elia lä cuono wei! —bä cuma.

36Öjö däjä, nashiwä toubä befi çai lä itaono wei jamö ai a fa läläicunö, öjö toubä ja tä madofi wai fa çadalönö, fii fi ja tä fa jïibanö, Jesús caficö ja toubä befi çai dodobou ajedeojolayoma. Toubä befi çai dodobolanö, abinaja cama ebä nija a cuma. —¿Waija, waija! Bamacö nö daablalou da balö, ¿öjö tawä? Elia bäma a waloo fa mönö, öjönö bäma a itoblamaö möbä —a cuma.

- ³⁷Öjö dájä, Jesús a içali fa laamolunö, a jele jelemou mladaliyoma.
- ³⁸Öjö dájä showawä, Yai Bada etä yafi jamö camishi cäcö bada acadafu lä läono wei, cäcö cacablou wädätefälöma.
- ³⁹Sodado 100 bä çai lä cuono wei a bada lä cui, Jesús a mö lä yaile jamö a lä ublaono wei a lä cui, a jele jelemou mladou fa dalalönö, a wə faö showadaoma. —Bejedi lä quiji a lä cui, ¡Yai Bada tä Ijilubö e cuo dodijioma! —a cuma.
- ⁴⁰Öjamö suwä bä çai cuoma. Bä jäwäjäwä çai fa ublajaonö, bä nö çai labajami dablalou mö feduo showaoma. Öjö bä nijamö Madalateliyoma a María cuoma. Santiago a fiya lä cui, öjö bä nöö e çai, José bä nöö e showawä lä cui. María öjö a wəfa çai cuo mö feduoma. Salomei a wəfa suwä lä cule, öjö a çai cuoma.
- ⁴¹Calilea jamö a Jesús cuo dájä, öjö bä suwä lä cui bä showadi yauadima. A bayelibläö cuaafälömaje. Ai bä çai suwä bluca cuo mö feduoma, Jelusale jamö Jesúsno bä çai lä juno wei bä lä cui.
- ⁴²Sábado tä mö jalu nia cublou lä fenaö wei tä weyade cublou waiquia ja, bä ojomou showadaoma. Öjö tä fena ja täbä yanöcöobä tä nia cuoma cudeenö, tä tamobä tä lä cule tä taö showadaomaje.
- ⁴³Alimadeateli a José lä cui, a bufi fa lojododalunö, Bilado nija a fa icuicunö, Jesús a wəfa nomawä boma. Öjö a José lä cui, judio bada bä lä läono wei bä nija a coyocooma. A nofi yai tabou dodijiomaje. Yai Bada tänö cama ebä nia çai lä cuo wei, José a ma cuinö, öjö tä nö çai shi jaliwä dablalaö mö feduoma.
- ⁴⁴Bilado a lä cuinö, “A nomaa waicölöfe daanö”, Jesús a nofi tabou fa mlacunö, sodado 100 bä çai lä cule a bada nacalema, a lä nomalayono wei tä nia wəlii fa cadidionö.
- ⁴⁵Sodado a bada lä cuinö, a wəfa nomaö cadidou tama yalo, José nija a nomawä dämalema.
- ⁴⁶Jesús a nomawä jaoblaba, Joséno camishi acadafu au cäcö lululema. Öjö dájä, a nomawä fa itomalönö, öjö cäcö au dude ja a jaoblalema. Maa maca jamö a maquequema, nomawä bä maqueblaabeje maca lä tablaleno wejei jamö. Öjö dájä, maca fe laobä, maa ma bada jiluluquefälöma.
- ⁴⁷Öjamö Madalateliyoma a María lä cui, José bä nöö María e sho, cäcöbö nö daoma. Jesús a nomawä lä maqueono wei a dabölalema.

San Marcos 16

¹Täbä lä yanöcöo wei tä mö jalu jayublou waiquilayono wei ja, suwä bänö täbä nö lä clēdeli wei täbä lulualalemaje, a nomawä lä maqueono wei jamö täbä çai jubeje. Nomawä täbä showadi jölöcaö lä cuaaö wejeinaja, Jesús a nia taamamaje. Madalateliyoma María a cuoma, Santiago bä nöö María e çai, Salomei a çai.

- ²Bei. Öjö tä fena ja, domingo tä mö jalu lä cublole dāja, suwä bä jocäblou fa fenablalonö, maa maca jamö bä aa fenalayoma, motoca a jaba juimaö dāja.
- ³Bä lä juimadi jamö, abinaja bä nowa tayofälöma. —Öjö ma cui, maa maca jamö bamacö lucäbä, maa manö yoca lä lale, ¿wedinö ma li jilulublabä? —bä nowa tayofälöma.
- ⁴Öjö dāja, maa maca jamö bä ajedou dāja, tä fa mödalöjenö ma bada jilulano dalalemaje. Bada ma bada cuoma.
- ⁵Maa maca jamö bä lucäa fa showadaalunö, jayu boco mashi jamö fiya tä dököa dalaledayomaje. Camishi aulimi labe cäcö ja a didioma. Öjö a fa dalalöjenö bä bufi shädayaimou dodijioma.
- ⁶Abinaja tä cuma. —Bä bufi shädayaimo dijä. Nasaleteli Jesús wama a lä dayäboyoi, fii balitama defi jamö a lä basuqueno wejei a lä cui, fei dāja äyämö a cuami. A demi jocädou waiquilayoma. A nomawä lä maquequeno wejei wama tä möblaaö balöobä, öjö lä.
- ⁷Wama tä möblaaö fa balöonö, cama ebä lä nocamabono wei bä lä cui, wama bä yömölajalayobä, Pedro a çai showawä. Calilea jamö a dablaö çobeje a nia balöfälöö. A nia dablaö çoje, bä nowa lä tano weinaja showawä —e cuma.
- ⁸Maa maca jamö bä faa fa çobofälönö, bä quilili docua showalayofälöma. Bä nö quilili bleaama cudeenö bä blösö blösömoma. Bä quilii fe balojooma yalo, moli a ma cui nija tä a wäyää bädaonomije.
- ⁹¿Öjö tawä? Domingo tä mö jalu cublou dāja, Jesús a demi jocäblou ço fenalayoma. Madalateliyoma a María lä cui nija a damoa balölaliyoma, ebä fecula 7 lä yashublaleno wei a suwä lä cui nija.
- ¹⁰Öjö dāja, Jesúsnö bä lä nocamabono wei bä lä cui bä bluca öcöö dāja, María a waloa çobeyoluma. A waloa fa çoboyonö tä a wäyää showadaojoloma.
- ¹¹Öjö ma cui, a wäfa demi tama ma cui, a lä dalaleno wei a wäfa çai wäyäma ma cui, a wä bejedi bufinomije.
- ¹²Inaja a cublou waiquilayono wei ja, shomi jamö cama ai ecöbö jufälöbä jamö, jai shomi a damoa cua majölaliyoma.
- ¹³Öjö cäcöbö mö yabadou çoa fa showadalofälönö, cama ebä yömölaböö ma çoyoluno wei ma cui, “Ei bejedi lä cäcöbö a”, bä bufi çai cunomi çowä.
- ¹⁴Öjö tä cublou fa balölonö, bä iyabä jamö, cama 11 ebä nija a damoa çoa majölaleyoluma. A demi jocädou lä möno wejei, bä a bejedi bufinomije yalo, bä afa dobroimi tayoluma. Bä bufi afa çai jifuwä tama.
- ¹⁵Abinaja bä nowa tama. —Bä bälöblawä lä jödödöblai bä nijamö wamacö juu fa cuaafälönö, jödödöwä bä lä cublai bä nija iba dodijidawä tä a wäyää da cuaaje.

16Wale ɔ bejedi lä bufii wejei bä lä cui, bä fe fa ojoblamolunö, bä jucäamou wä. Öjö ma cui, wale ɔ bejedi bufii lä mlajei bä waimamobä cäbä.

17Wale ɔ bejedi lä bufii wejei bä lä cuinö, tä nö lä quilijii tä nia wawämaö cuaaöje, Yai Bada a mayo lojode dablabeje. Fecula bä nia çai yashuuje. Shomi bä caficö ɔ ma cui ja, bä ɔ çai nia faö.

18Olu bä ma däablaö wejei ma cui, toubä lä wayu wei toubä çai ma coaö wejei ma cui, bä nia shominajabloimi. Täbä lä jaliliaö wei bä nija bä imicö fa maqueonö, bä nia jalomaö cuaaöje —bä nowa tama.

19Öjö däjä, Bada tä Jesúsno bä yömölaa jödödöa fa balölönö, fedu jamö a çomolayoma. Yai Bada boco jayu mashi jamö, a döcäaledayoma.

20Öjö däjä, cama ebä fa alufälönö, jödödöwä täbä lä bälöblai bä nijamö bä yömölaö blaucou cuaamaje. Bä yömölaöje däjä bä ɔ nö bejedi öjöböamobä, Bada tänö bä çai bayeliblaö cuaama, tä nö lä quilijii tä wawämaö cuaabeje. Inaja lä tä yai cuoma.

San Lucas

San Lucas 1

- ¹ Camiyä yamacö nijamö, Jesucristo a lä cuaano wei tä ʘ bluca onimabeje, bluca bä wabäo waiquiwä.
- ² Yamalecö yömölaöje ja bä lä cuno weinaja, inaja showawä tä ʘ oniblaö cadidiomaje. ¿Öjö tawä? Tä bluca lä cuaano wei däjä, bä mamö lä showaono wei bä lä cuinö yamalecö yömölamaje, tä ʘ showadi lä wäyāno wejei bä lä cuinö.
- ³ Camiyä ya ma cuinö, ya tä ʘ yanöcö wāliadalaö fa cuanö, ya tä ʘ çai oniblaö bufi doblaoma. Tä bluca lä cuaano wei, cafä Deofilo bada wa nija ya tä ʘ oni shömabä, ya tä ʘ oni jödödöbou lä cule,
- ⁴ ei wa tä ʘ oni fa mönö, cafä nija tä ʘ lä wäyāno wejei wa bä ʘ bejedi dablaba.
- ⁵ Judea jamö Elode a bada lä läono wei däjä, nofi bāyāalewä Sacalia a bälöo mö feduoma. Bä suwäbö Elisabei e ʘfa cuoma. Öjö a suwä lä cui, Aaloni nodiwä e suwä cuoma. ¿Öjö tawä? Nofi bāyāalewä bä ojodamou lä nomöjono wei bä yaiblamoma. Sacalia a lä cui, Abiasi ebä nija a çocaoma.
- ⁶ Öjö cäcöbö lä cui, Yai Bada nija cäcöbö cadidoma. Bada tänö tä tamaö lä bufii wei tä ja, showadi cäcöbö cadidoma yalo, cäcöbö ʘfa tamobä etä cuonomi.
- ⁷ Öjö ma cui Elisabei a shöbönabödalou fa mlacunö, cäcöbö badao ma waiquiono wei cäcöbö ijilubö cuonomi.
- ⁸ Bei. Yai Bada etä yafi jamö Abiasi ebä ojodamou nomöjöobä tä lä cublaliyono wei däjä, täbä nofi bāyāabeje jamö Sacalia a läoma. Öjamö a läo däjä,
- ⁹ ʘeshi yano jamö a fabä a yaimolayoma, wāqueshi bä nö çledeli lä ʘucamou wei bä wacö döcäbä. ¿Öjö tawä? Abinaja bä showadi cuaama. Nofi bāyāalewä bei bä ʘfa lä cublai bä ʘfa fa onimajenö, a nia lä yaiamou wei a wāfa oni wawäblou mömaje.
- ¹⁰ ¿Öjö tawä? Sacalianö wāqueshi bä nö çledeli lä ʘucamou wei bä wacö döcäo däjä, Yai Bada etä yafi jēfa jamö, bä bluca lä yododano wei bä nö bayeli nacao sibooma.
- ¹¹ Öjö däjä, Bada tänö ʘjele etä fa shömöludunö, Sacalia nija etä wawālayoyoluma. Täbä nö wāqueshi çledeli lä ʘucamou wei täbä maqueobä defi ola jamö, a ublaa ajedequema.
- ¹² Öjö tä fa dalalönö, Sacalia a bufi fa mablalunö, a fe taläblaliyoma.
- ¹³ Öjö ma cui abinaja ʘjelenö a nowa tama. —A quili dijä, Sacalia. Yai Bada nija wa nö bayeli lä nacao wei tä ʘ jilio culadi. Suwäböfä Elisabei a lä cuinö, ijilufä a nia tablaö. Juan wa wāfa nia jilaö.
- ¹⁴ Öjö nija wa bufi nia doblalou. Ai bä ma cui, ijilufä a oshe wawäblou cudeenö bä bufi nia bluca doblalou cuaaö.

- 15**Bada dodijiwä a cuobä, Bada tänö a nia malä tablamaö wei. Nashiwä toubä nia coaimi. Ai toubä ma cui, täbä shi lä wälüi wei toubä nia coaimi dodijiwä. Bä nöö nija a didio showao däjä, Yai Bada tä Bufinö a nia jödödöbou showao.
- 16**'Isaeli ebä nodiwä lä cui, Yai Bada nija bä bufi mö blucaobä, bluca bä bufi nia taamaö, a bufiblabeje a lä cui nija —a nowa tama—.
- 17**Bada tä nijamö ijilufä a nia balöfälöö. Yai Bada a wano wäyälwä Elia a bufi nö walojomabou lä cuono weinaja, inaja showawä ijilufä a bufi nö nia walojomabou cuo. Öjö a wä ja, bä föö ebänö bä ijilubö ebä nia nofiamaö çoje. Cama a wä showawä ja, Yai Bada a wä juaö lä mlajei bä ma cui, bä lä dodijaö wei bä bufi jaducuwä lä culenaja, bä bufi nia jaducuwä tablamaö mö feduo. Bada tä nia lä juu wei jamö a wano nia taö balöablalou, a wä jiliaö dodijidaobeje —ajelenö a nowa tama.
- 18**Abinaja Sacalia a cuma. —Wa wä lä fafe, çwedi tänö bäfä a nö li bejedi öjöböabä? Walojada ya malä cui. Iba suwä a ma cui, a suwäbada waiquiwä —a cuma.
- 19**Öjö däjä, ajele abinaja e cuu mö feduoma. —Camiyä Cablieli cä ya. Yai Bada tä lä cule jamö showadi ya e ajedeo. Cafä bäfä yömölabä wale shömöledayoma, ei dodijidawä ya tä a wäyayolubä.
- 20**çÖjö tawä? Wale a bejedi bufiimi dicoo tä nowa ja, wa wä nia fablou jaöomi. Ya tä a lä wäyafe tä bejedi cublou däjä, wa wä nia shino faö dodijidablou ço. Tä wawäblou bufio däjä, tä nia bejedi cublou —ajele bei a cuma.
- 21**Jefa jamö bä lä yododoono wei bänö, Sacalia a faö ço nö dabomaje. Yai Bada etä yafi uesthi jamö a nö dededayou ja, bä bufi wedinajamoma.
- 22**Yacumö a faa fa çolunö, a wä faö mlai ja, bei imicö juablalou cuaama. Bei imicönö bä lä yömölano wei ebä bufi fa möblalunö, “Yai Bada etä yafi uesthi jamö, ajele a nofi wawäa yaylayodayoma!”, bä bufi cudaliyoma.
- 23**Yai Bada etä yafi jamö Sacalia a nia lä läono wei tä fa jödödöblalunö, a çolayoma.
- 24**Tä nö fa dedejedalunö, bä suwäbö Elisabei a shöbönabölayoma. A wawäblou mlai ja, belibo 5 bä famalanö, abinaja a suwä cuma.
- 25**—Ijiluyä ya tablabä, Bada tänö wale bayelibleyoluma. Fei däjä wale afa nia wayoaimije —a cuma.
- 26**Elisabei a lä shöbönabö wei, belibo 6 a famaö bähäcuaö däjä, ajele Cablieli a lä cui, Yai Bada tänö a shömöa çolema. Calilea tä ulifi jamö, Nasaleteli bä shabonobö jamö, a shömöa nomöjoledayoma.
- 27**Öjamö lä María a wäfa moco lä cule nija, a shömölema. David nodiwä a José lä cuinö, öjö a nia suwä däama. A wäfa boma ma cui, cäcöbö doayonomi showawä. A suwä jubamou dao lä mlai a suwä cuo showaoma.
- 28**María nija abinaja ajele e cuyoluma. —Cafä nija ya wä nia faö, wa bayeliblebä wa nofi lä ojodaboladi wa nija. Bada tänö wa çai cua lä cule —a cuma.

- ²⁹Öjö a wə ja, María a bufi fa mablalunö, “¿Wedinaja wale nia fa taamanö, wale nowa li taö cule?”, a bufi cudaliyoma.
- ³⁰Öjö dájä, María nija abinaja ajele e cuma. —A quili dijä, María. Yai Bada tänö wa bayeliblebä, wa nofi ojodabou waiquia lä cule.
- ³¹¿Öjö tawä? Wa nia shöbönaböö. Ijilufä wəlo wa nia tablaö. Jesús wa wəfa nia jilaö.
- ³²Bada a nia yai cuo. Yai Bada tä Bada lä ayai Ijilubö e əfa nia jilaöje. Yai Bada tänö bada tä David a bälöa lä lojodomabono weinaja, ijilufä a nia bälöa lojodomabou cuo nomöjöö.
- ³³Jacobo ebä nija a nia Bada läo shi wəlii. A Bada bälöö lä dodijio wei etä nia mladoimi —e cuma.
- ³⁴Abinaja ajele a nija María a cuma. —¿Wedinaja ya li shöbönaböa cua bälayou? Ya jubamou dao lä mlai ya showawä —a cuma.
- ³⁵Öjö dájä, abinaja ajele e cuma. —Yai Bada tä Bufinö wa fe walou dájä, Yai Bada tä Bada lä ayai tä lojodenö wa nia joyablaö. Öjö cudeenö ijilufä a nia yaio. Yai Bada Ijilubö e əfa nia jilamou.
- ³⁶Abinaja çai. Amiyofä Elisabei a suwäbada lä cui, a shöbönabö. Bä ijilubö wəlo a didibou. “A ijilubö nö cublobimi waiquiwä”, a nofi ma tabono wejei ma cui, a lä shöbönabö wei, belibo 6 a famaö bəshäcuaö waiquia lä cule.
- ³⁷¿Öjö tawä? Yai Bada tänö tä taö daö lä mlai, etä cua malä mlai —a cuma.
- ³⁸Abinaja María a cuma. —Inaja lä waiquiwä. Wa lä cufenaja tä yai cuobä. Bada a nosie juamobä ya e waiquiwä malä cui —a cuma. Öjö dájä, ajelenö a daa çoquefälöma.
- ³⁹Tä fe fa weyadalunö, Judea tä ulifi lä jefubö wei jamö María a shi jalijiwä çai ayofälöma. Öjamö lä, ai bä shabonobö jamö a fa çoblalunö,
- ⁴⁰Sacalia a yai lä bälöle jamö a çoblou majölayoma. A fa falönö, Elisabei nija a wə fayoluma.
- ⁴¹María a wə fa jililänö, Elisabei bä ijilubö e lä didibono wei e icalı quıblaliyoma. Öjö dájä, Yai Bada tä Bufinö Elisabei a fa jödödöblalunö,
- ⁴²a wə bädaliyoma. María nija a wə icalı faö ja, abinaja e cuma. —Suwä bluca bamacö ma cule, Yai Bada tänö çafä wa bayelibobä wa yai. Ijilufä wa nia lä tablaö wei a ma cui, öjö a nia çai bayelibou fe balojoo.
- ⁴³Iba Badayä bei bä nöö wa e lä cuinö, camiyä wale fe walobä ya mlai ma cui, wale fe nofi waloo jaa dodijia yaiboyoi!
- ⁴⁴Bäfä ə lä jiliaö wei dájä, ijiluyä ya lä didibole a bufi doblalou ja, icalı a malä quıblalufe.

- ⁴⁵Bada wa wə bejedi bufii lä showadaono wei wa lä cui, Yai Bada tänö wa nia yai bayelibou —Elisabei a cuma.
- ⁴⁶Öjö dāja, María a wə bädaliyoma. Abinaja a cuma. —Bei ya bufi cadidiwänö Bada ya nofi doablaö.
- ⁴⁷Yai Bada nija bejedi lä ya bufi doblalou, wale lä jucäaö wei a lä cui nija.
- ⁴⁸Öjö a nosie juamobä ya e lä cui, wale nö bayeliblabö ya ma mlai, wale bayeliblaö. Fei dāja ma cui, obi ma cui, bä bälöaö lä nodiaö wei bä blucanö, wale afa nia wayoaö nodiablalouje. “Yai Bada tänö öjö a nofi yai bayelibou dodijiono wei”, bä nia cuu.
- ⁴⁹A yai lä lojode weinö wale bayeliblaö fe malä balojoono wei. Yami a yaia.
- ⁵⁰A nö quili lä taö wejei, showadi cama ebä nofi ojodabou nodiablalou.
- ⁵¹Cama a lojodenö a nö wəlojaö. ’“Camiyä cä yai”, bä nofi lä tamamou wei, Yai Bada tänö bä yashublaö shelelou.
- ⁵²Bada bä yai bälöo lä dodijio wei bä ma waii wei ma cui, bä dodijidawä jömöo lä mlai bä nofi shino wawädowä tabou.
- ⁵³Bä lä ofäo wei, dodijidawä tä ja bä ma dodijamaö dāja ma cui, bä nö lä madofibö wei bä lä cui, öjö bä bloque shömaö cəo.
- ⁵⁴Isaeli bäma ecö lä cui, Yai Bada tänö bämalecö bayeliblaö, a nosie juamobä bäma ecö lä cui. ’A wəfa wäyämou lä balöono wei, tä a nofi jaducubolanö bämalecö nofi ojodabou,
- ⁵⁵bämacö nö badabö nija a wə nö wäo lä balöono weinaja showawä. Ablaamö a ma cui, cama nodiwä bä ma cui, bä nofi nia bluca ojodabou nodiablalou showaoma —María a cuma.
- ⁵⁶Elisabei nijamö Maríanö belibo jai 3 bä fa famalönö, a cəo cəlayoma.
- ⁵⁷Bei. Elisabeinö bä ijilubö e tablabä etä fa cublalunö, bä ijilubö wəlo e tablalema.
- ⁵⁸Cama nija bä bälöo lä ajedeono wei bä ma cuinö, cama ebä mashi ma cuinö, tä a jililemaje. Bada tänö a nofi ojodabou fe lä balojoono wei tä a fa jililäjenö, cama bä bufi cəi doblalou mö feduoma.
- ⁵⁹Ijilu a wainö, 8 tä mö didi fa tablamalönö, a mosi sicö joyabeje, bada bä waloquema. Öjö dāja, bä föö e nija Sacalia a wəfa mini ma yädäamano wejei ma cui,
- ⁶⁰bä nöo e a läoma. —Ma —a cuma—. Juan a wəfa nia cuo.
- ⁶¹Cama nija abinaja bä cuma. —Juan mlai —bä cuma—. Afä bä mashi nija Juan ai a wəfa cua malä mlai.
- ⁶²Öjö dāja bä föö e nija, bei bä imicönö bä ijilubö e afa wəlii nomöjoomaje.
- ⁶³A wə oniabä, bä föö enö etä nacama. Etä fa jöböcöjenö, a wəfa oniquema. “Juan a wəfa cua”, tä oni fa möjenö, bä bufi bluca shädayaimoma.

- 64 Öjö lä dāja, bä föö e aca jayublou fa çolonö, a wə jaba faö ja, Yai Bada a nofi doablama.
- 65 ¿Öjö tawä? Bä bälöo lä ajedeono wei bä quililaliyoma. Judea tä ulifi lä jefubö wei jamö, bä bluca lä bälöblai bä lä cuinö, öjö tä ɤfa bluca wayoamaje.
- 66 Tä ɤ lä jiliano wejei, bä bufi bluca dayäo fe balojooma. Abinaja bä cuma. — ¿Wedinaja ei a nia ijilu cuaaö? —bä cuma. Bada tänö a bayelibou malä wawädoono wei.
- 67 Öjö ijilu bä föö e ɤ falayoma, Sacalia a lä cui. Yai Bada tä Bufinö a fa jödödöblalunö, Yai Bada a wəno wäyäo ja, abinaja a cudaliyoma.
- 68 —Isaeli bäma ecö nija a Bada lä bufiblamou wei a waloqueyoluma, cama bäma ecö nowa çamabä. ¡Bäma a nofi da doabla, öjö lä!
- 69 Bämalecö jucäabä, a nö lä wəlojaö wei a shömölema. Yai Bada a nosie lä juano wei a David lä cui, öjö a nodiwä waiquiwä.
- 70 Yedu jamö ma cui, cama a wəno wäyämobä ebä lä yaileno wei, inaja cama bä cuu balöo showadaoma, Yai Bada a wəno wäyälwä bä lä cui.
- 71 'A nia lä shömano wei a lä cuinö, bä nö lä nabämou wei bä nija, bämalecö nia jowa jucäo çoma —a cuma—. Bämalecö nofi lä wəlibou wejei bä bluca nija, bämalecö nia jowa çai nowamaö showaoma.
- 72 Bamacö nö badabö nofi nia lä ojadabono wei tä ja, Yai Bada a yami lä yaile a wə nö wäa balöquema. A wə nö lä wäqueno wei tä ɤ nofi çai jaducubou showawä.
- 73 ¿Öjö tawä? —a cuma—. Nö badabö Ablaamö nija a wəfa wäyäo lä balöono wei dāja, a wə nö wäo wawädoo showaoma.
- 74 Bämalecö nia jowa bayeliblama. Bä nö lä nabämou wei bä nija bämalecö nia bayelibläo läoma, quilii mlai ja, cama Yai Bada bäma a nosie yai juaabä.
- 75 Bamacö demi cuo showao dāja, cama bäma ecö lä yaile, bamacö showadi dodijadibä. Cama nija bamacö yai cadidobä.
- 76 'Uasi —a cuma—. Cafä ijiluyä wa lä cui, Yai Bada tä Bada lä ayai a wəno wäyälwä wa wəfa nia jilabouje. Bada tä nia lä juu wei jamö, wa wəno nia taö balöablalou, a wə yai jiliaö dodijidaobeje.
- 77 Yai Bada ebä nia lä jucämou wei tä ja, wa bä bufi nia jaducublamaö balöo. Täbä doblou lä mlai tä ma cule, tä nowa nia lä mladamaö wei tä ja, wa bä nia yömöläo.
- 78 Yai Bada bäma a lä bufibläo wei a lä cuinö, dodijidawä bämalecö nofi malä ojadabou wei. Bämalecö nofi ojadabou yalo, fedu jamö culanö tä shi lä wacacai tä nia waloyoluu.
- 79 Tä mö lä didi wei jamö bä lä bälöle, bä mini lä nomaö wei bä lä cui, öjö bä nija tä mö nia wacacablamaö. Bamacö bufi yanöcöwä çai bälöobä bämalecö nia lulubou — Sacalia a cuma.

⁸⁰¿Öjö tawä? Öjö ijilu Juan a lä cui, a yawälayoma. A bufi lojodoblaliyoma. Isaeli ebä nija a wä wawäblou showaa mlai, ulifi bloque jamö a cuo balöoma.

San Lucas 2

¹Juan a oshe cuo showao däjä, Lomateli Aucuto a bada nosiemoma, cama bluca ebä lä bälöblai ebä afa oniblamabeje.

²¿Öjö tawä? Bä afa jaba onimamou balöa mlai ja, öjö lä däjä bä afa jaba onimamoma, Silia jamö Silenio a bada lä läono wei däjä.

³Bä afa bluca onimamobä, bluca bä lä bälöblai bä lä cui, cama bä nö badabö lä bälöblamono wei jamö, bä jublou cuaama.

⁴José a ma cui, a aa mö fedulayoma. Calilea tä ulifi jamö, Nasaleteli bä lä bälöle jamö a culanö, Judea tä ulifi jamö a alayoma. David nodiwä a li cuoma yalo, Belenateli bä lä bälöle jamö a juu cadidioma, David a jaba lä bälöono wei jamö.

⁵A nia lä däano wei a María sho cäcöbö juma, cäcöbö afa oni taamamobä. ¿Öjö tawä? María a shöbönaböoma.

⁶Öjamö lä cäcöbö cuo däjä, bä ijilubö e tablabä a ninimoma.

⁷Fama bä lä cublaaö wei tä yafi mashiquio fa dicoonö, yalo bä yanobö jamö cäcöbö cublaquema. Öjamö lä ijilubö jaba e fa tablalönö, camishi acadafu cäcö ja, a bacojeboma. A fa bacojelänö, yalo bä niibö lä bao wei tä ja, a wai didiquema.

⁸Öjamö a bälösö blao lä ajedeono wei jamö, ai bänö oweja bä çai cuo fe jalumaje, bä nowamabeje.

⁹Bada tänö ajele e fa shömöludunö, öjö bä nija a fa bädalunö, Bada etä shi fe fayoblaliyoma. ¡Bejedi lä bä quilia dodijilaliyoma!

¹⁰Öjö bä nija abinaja ajele e cudaliyoma. —Bä quili dijä. ¿Öjö tawä? Ei dodijidawä ya tä a wäyayolubä, ya itolayou lä cufe, wamacö bufi doblalobä. Cafä wamacö ma cui, bä bluca lä bälöblai bä ma cui, wamacö bufi bluca doblalou fe balojoobä.

¹¹¿Öjö tawä? Wamacö jucäamobä, bada tä David a jaba lä bälöono wei jamö, a oshe wawäblaliyo lä cufe. Yai Bada tänö a shömabä a lä yaileno wei, öjö a Bada.

¹²Wamale a bejedi möbä, ei ya wä. Camishi acadafu cäcö ja, wama a nia ijilu bacojea dabraö. Yalo bä niibö lä bale jamö, a wai didia —e cuma.

¹³Öjö däjä, yedu ajele a lä cule jamö ai bä çai ajele bluca wawälaliyoma. Yai Bada a nofi doaöje ja, abinaja bä cuma.

¹⁴—Fedu fedole jamö Yai Bada a lä bälöladi, ¡a nofi shino yai doablamobä! Bitamö a bufi lä doblamabolajei bä lä cui, ¡dodijidawä bä bufi yanöcöwä çai bälöblamou cuaabä! —bä ajele cuma.

¹⁵Öjö däjä, ajele bänö bä daa fa çocufälöjenö, fedu jamö bä çoa çolayoma. Oweja bä çai lä cuono wejei, abinaja öjö bä nowa tayou juoma. —¡Bei, bei! Belena jamö

bämacö juu da showadao, tä jowa lä cublalufe bäma tä möblaabä, Bada tänö tä afa wäyamaö lä bufino wei —bä nowa tayoma.

16Bä shi jalimolanö, bä lobe aa fa showadalunö, María, José sho cäcöbö lä cule jamö, bä fa waloicunö, cäcöbö dalalemaje. Yalo bä niibö lä bale jamö, ijilu a didia çai daa mö fedua showalalemaje.

17Ijilu a fa dalalöjenö, cama bä nija ijilu a wafa lä wäyano wei tä a ja, bä bluca yömölaö showadaomaje.

18¿Öjö tawä? Oweja bä çai lä cuono wejei bä a ja, bä bufi bluca shädayaimoma.

19Tä bluca lä cublaliyono wei, Maríanö tä nofi jaducubou showalanö a bufi dayäodima.

20Öjö dāja, oweja bä çai lä cuono wejei bä lä cuinö, Yai Bada a wafa dodijaö taö showajei, bä çoa çolayoma. Tä lä möno wejei tä ma cui ja, tä a lä jilileno wejei tä a ma cui ja, Yai Bada a wafa doblao tamaje. Bä lä yömölamono weinaja, tä bejedi cublaliyoma yalo, a nofi doablafälömaje.

21Öjö dāja, 8 tä mö didi fa cublalunö, ijilu mosi sicö joyalemaje. Mosi sicö fa joyalöjenö, Jesús a wafa ijilu jilaquemaje, bä nöö e shöbönaböo showao mlao dāja, ajele anö a wafa jilaamaö lä bufino weinaja showawä.

22Bei. María, José sho cäcöbö dodijidablou çobä etä cublaliyoma, Moisesi tä a oni jamö täbä taamaö lä bufino weinaja showawä. Öjö etä cublou dāja, Yai Bada nija bä ijilubö e mömaböbä, Jelusale jamö e çai jubölayoma, Yai Bada etä yafi jamö,

23Bada etä a oni lä cuu weinaja showawä. Abinaja tä a cuu. Bä ijilubö cublou lä balöo wei bä lä cui, Yai Bada ebä cuobä wama bä nia yaimabou. Einaja tä a oni cuu.

24Yai Bada nija yalo cäcöbö nia çai dodoboböo showaoma, Bada etä a oni lä cuu weinaja showawä. Abinaja tä a cuu. Joledo cäcöbö ma cui ja, wacocoa calaba cäcöbö ma cui ja, Yai Bada tä dobäo daoje. Einaja tä a oni cuu.

25Bei. Jelusale jamö Simeoni a wafa lä cuono wei a bälöoma. Showadi a dodijama. A bejedimou bufi doblaoma. Yai Bada tänö Isaeli nodiwä ebä bufi nia jowa lojodoamaö lä çoyoluu wei tä nö daboma. ¿Öjö tawä? Cama nija Yai Bada tä Bufi yanöcöoma.

26Yai Bada tä Bufinö a yömölaa waiquilema cudeenö, a nö daoma. A nomaö showao mlai ja, Bada tänö a shömabä a lä yaileno wei a nia jowa möö balöoma.

27Bei. Yai Bada tä Bufinö a fa shömanö, Yai Bada etä yafi jamö Simeoni a falayoma. Öjamö a cuo dāja, bä ijilubö Jesús a çai waloböquema, Moisesi tä a oni jamö, ijilu bä taamaö lä bufino weinaja a taamaböbä.

28Ijilu a fa dalalönö, a dälema. A maobolanö Yai Bada a wafa dodijaö tama. Abinaja a cuma.

- 29—Bada tä. Cafä wa nosie juamobä ya lä cui, fei däjä bufi yanöcöwä wale nia çoaö. Wa wä nö lä wäbeno wei, tä bejedi cublaliyo lä cufe.
- 30Yamalecö nia lä jucäaö wei, camiyä bei ya mamocunö ya dalalei lä cufe.
- 31Täbä bluca jucäabä wa lä yaileno wei, bluca bä lä bälöblai bä ma cui nija, wa tä wawäblamaö lä cule.
- 32Judio bä lä mlai bä bufi jaducublobä, etä shji nia wacacablou. Isaeli nodiwä, fei däjä yamacö nofi nia yai doablamou —Simeoni a cuma.
- 33Bä ijilubö Jesús e afa lä wayoamou wei ja, José, María sho cäcöbö bufi shädayaimoma.
- 34Öjö däjä, Yai Bada nija, Simeoni a lä cuinö cäcöbö bayeliblamaö bufima. Jesús bä nö nija a wä çai fama. Abinaja María a nowa tama. —Ei ijilu a lä cui nija, Isaeli nodiwä bä bluca wabamobä a waiquiwä. A lä waii wejei, cama bä nia bluca waimamou. A wä lä jiliaö wejei, dodijidawä bä nia bluca taamabou. Yai Bada a mayo dablabeje, a nia ma cuo wei ma cui, a wäfa nia taöje,
- 35bä bufi bluca cuu lä jätou wei tä wawäblobä. Cafä bä nö wa e ma cui, jai shocobi anö wa balöcö diquibalemaje, wa bufi nö nia bleaaö cuaaö, wajä wajä bänö —María a nowa tama.
- 36Öjamö lä Yai Bada a wano lä wäyano wei a çai suwä cuoma, Ana a wäfa lä cuono wei. Aselo nodiwä Fanueli e lä cui, öjö bä tää e cuoma. A suwäbadaoma. Bä feyalobö sho cäcöbö cuo däjä, lasha 7 a faböa balömalema.
- 37Öjö däjä bä feyalobö e bufi fa mlaicunö, yami a cudalou fa nomöjööno, a suwäbadao dodijioma. Lasha 84 a faa waiquimalema. Yai Bada etä yafi jamö showadi a cudioma. A möfe bolanö Yai Bada a wäfa Bada doblao tama. Didi däjä ma cui, jalu däjä ma cui, a iyaö yabäcou mlai ja, a nö bayeli nacaodima.
- 38Öjö a lä cui, María nija, José nija a suwä icua fa showadaicunö, Yai Bada nija a bufi afa doblalou wäyämoma. Öjö däjä, Yai Bada nija Jelusaleteli bä bayeliblamobä bä nö bluca lä daono wei bä lä cui bä nija, ijilu Jesús a wäfa wäyädima.
- 39Bada tä a oni jamö, tä tamaö lä bufino weinaja tä taa fa jödödöblabölönö, Calilea jamö bä ijilubö a çai çoböa çolayoma, cama Nasaleteli bä nijamö.
- 40Ijilu a lojode badafälöma. Yai Bada tänö a bufi jaducumabou dodijioma. Öjö nija Yai Bada a bufi fa doblalonö, showadi a bayeliboma.
- 41Yai Bada a waiteli lä jayuano wei a nofi çocamoao çobeje jamö, José, María sho cäcöbö showadi jublaadima, Jelusale jamö.
- 42Jesúsnö lasha 12 a faa fa waiquimalönö, fiya oshe a cuo däjä, öjö sho bä bluca juu çofälöma, showadi bä lä cuaano weinaja showawä.
- 43Bä iyaö fa waiconö, bä çofälöbä jamö Jesús a jäblou fa jätolonö, Jelusale jamö a jäquema. José, María sho cäcöbö mojuduoma.

⁴⁴“Ai bä juu mö lä fedule jamö a nocaa”, cäcöbö bufi fa cunö, cäcöbö shi jalimonomi. Cäcöbö juu fe lä weyaaö wei, cama mashi ebä nijamö ma cui, cama nofi ebä nijamö ma cui, a dayäaböma ma cui,

⁴⁵a dablonomi. A dablou fa mlacunö, Jelusale jamö cäcöbö mö yabaö çolanö, a dayäbö cuaaö çofälöma.

⁴⁶Öjamö lä a dayäbö showao däjä, 3 tä mö didi fa tablamabölönö, Yai Bada etä yafi jamö yacumö a daböa çolalema. Yai Bada etä a ja täbä lä damaö wejei bä nija a coyocooma. Bä a jiliama, bä çai wälama.

⁴⁷Jesús a wä lä jiliano wejei bä bufi bluca shädayaimoma. A bufi lä jaducuono wei tä ma cui ja, a wä juo lä moyawäono wei tä ma cui ja, bä bufi shädayaimou dodijioma.

⁴⁸¿Öjö tawä? Öjamö lä a dablaböö çö däjä, cäcöbö bufi çai shädayaimoma. Abinaja bä nö e cuma. —Üasi. ¿Wedi tabä wafälecö bufi nö li bleaamaö dicooma? Camiyä ya ma cui, faafä a ma cui, yafäcö bufi jalujolanö bäfä dayäö nö dedeaö waiquiwä.

⁴⁹Abinaja cäcöbö nowa tama. —¿Wedi tabä Fayä e yafi jamö wafäcö juu cadidou showadao mlai, wafäle li dayäbö cuaaö dicooma? —cäcöbö nowa tama.

⁵⁰Öjö ma cui, cäcöbö nowa lä tano wei tä ja, cäcöbö bufi jaducublonomi.

⁵¹Öjö däjä, cama ecöbö nijamö a nocaa çolayofälöma. Nasale jamö bä çö fa çölunö, dodijidawä cäcöbö a juama. Tä bluca lä cublaliyono wei, bä nö enö tä nofi jaducubou showalanö a bufi dayäodima.

⁵²Jesús a fa yawäfälönö, a bufi moyawäafälöma. Yai Bada a bufi cai doblamabou dodijioma, yanowamö bä cai.

San Lucas 3

¹Lomateli Dibelio a bada läo showao däjä, lasha 15 a faa fa waiquimalönö, cama ebä lämabou mö lä feduono wei, abinaja ebä afa cublamoma. Judea jamö, Bösio Bilado a lämaboma. Calilea jamö, Elode a lämabou mö feduoma. Idulea jamö, Elode a li mashi lämabou mö feduo showaoma, Daconide jamö çai. Öjö Felipe a wäfa cuoma. Abilinia jamö, Lisania a lämabou mö feduoma.

²Jelusale jamö, nofi bäyälewä Anasi, Caifasi sho cäcöbö bada läoma, Yai Bada etä yafi jamö. Öjö bä bada cublamou cuaaö däjä, ulifi bloque jamö Sacalia bä ijilubö Juan a cuobä jamö, cama nija Yai Bada a wä bädaliyoma.

³Öjö cudeenö, Yai Bada etä a ja, Jodana u jamö bä bluca lä bälöblai bä yömöläo cuaama. Wälidiwä tä ja bä bufi lädamaö bufima, cama nija bä fe ojoblamobä. Bä dablou lä mlai tä ma cule ma cui, Yai Bada tänö tä nowa mladamabä.

⁴Juan a cua showao mlao däjä, Yai Bada a wäno wäyälewä Isaia a lä cuinö a wäfa wäyäo balöo showaoma. Abinaja tä a cuu. Ulifi bloque jamö bä yömöläo ja, a wä nia lojodoaö. “Bada tä juu lä cuimi!”, a nia cuu. Abinaja bä nowa nia taö, a wä Bada jiliaö

cadidio showadaobeje. “A nia lä juu wei jamö, bei wama e yo wawämaö fa cuaaimadunö, e yo shalilibläö da balöloje”, bä nowa nia taö.

⁵“Tä fe yalö lä möamoblai bä nia quefuo. Jefu bä bluca lä cublai, bä fe nia yalöblamou. Yo cabamou lä ɔloqui wei yo nia dodijidablou.

⁶Bä bälöblawä lä yaiblai bä bluca lä cuinö, Yai Bada tänö täbä jucäaö bufi lä doblao wei tä nia dabläöje.” ɔÖjö tawä? Einaja Juannö bä nowa nia jowa tama.

⁷Juan nija bä fe ojoblamobä, bä bluca ɔcablamoyoluma. A wə lojodoaö ja, abinaja Juannö bä nowa tama. —ɔOlu bä wayu lä culenaja, wamacö lä cui! Wamacö jolemou. Wamacö fe ojoblamou lä buo wei tänö, ɔwamacö nia nowamamou daanö? Ma. Yai Bada a ishous dājä, wamacö nia nowamamoimi.

⁸Wamacö bufi lädou dablamobä, bä bejedimou da wawädoö, öjö lä. “Ablaamö nodiwä yama ecö li cudeenö, yamacö doblou fe yadio weicätä”, bä nofi ɔai tamamou dicoo dijä. Öjö tä nowa cuami. Bamacö nowa malä tale. Yai Bada tänö Ablaamö ebä nodiwä tabou bufi doblao fa cunoja, fei maa mabä ma cui ja, bä nö tablamalebö wei.

⁹ɔÖjö tawä? —a cuma—. Yai Bada a nia ishoomi daanö? Fii fibä nasöcö jamö, a fayocola yalejebou waiquia lä cule. Öjö cudeenö, nii dodijidawä bä lalou lä mlai fibä nia diyämamou. Cowa wacö jamö fibä nia shäyäblamou —a cuma.

¹⁰Bä bluca lä ɔcamono wei, abinaja bä cuma. —ɔWedinaja yamacö li bejedimou cuobä, öjö lä?

¹¹Juan abinaja a cuma. —Jəo. Ola jamö cäcö lä bolacabolenö, cäcö tabou lä mlai nija cäcö mashi jöböabä, öjö lä. Nii bä lä table a ma cuinö, inaja showawä —a cuma.

¹²Lomateli bada bä befi bä blada lä doaö wejei bä ma cui, öjö bä fe ɔai ojoblamobä, bä waloquema. Abinaja Juan nija bä cuma. —Tä ɔ wäyäle. ɔWedinaja camiyä yamacö li cuaabä?

¹³Abinaja bä nowa tama. —Blada bä däamaö bufi lä cuo wejeinaja, bä nacaö da cadidioje, ai wama bä yädäblamaö jətoo mlai ja —bä nowa tama.

¹⁴Sodado bä ma cuinö, Juan a ɔai wəlii mö feduomaje. —ɔWedinaja camiyä yamacö li cuaaö mö feduobä? Abinaja Juannö bä nowa tama. —Ai bä nija wamacö waitelimolanö, blada bä doaö fe yadiblo dijejä. Abinaja ɔai. “Wale dobäimi ja, bada bä nija bäfä ɔfa nia wäyäö”, bä cu dijä. Wamacö nowa ojode lä ɔamaö wejei bä nija bä ɔai nacömo dijä —bä nowa tama.

¹⁵Bei. Yai Bada tänö a shömabä a lä yaileno wei a lä cui, bä shi jalimolanö a nö dabomaje. Juan a ma cui nija bä mölama. “Öjö a jətowä waiquiwä daanö”, bä bufi bluca cuma.

¹⁶Öjö cudeenö, Juan abinaja a cuu mö feduoma. —Ma. Camiyänö bamacö fe ojobläö dājä, mau u ja bamacö jödödblamaö. Inaja camiyä ya cuaaö ma balöo wei ma cui, a nö yai lä wəlojaö wei a nia waloo nomöjööyoluu. Öjö a shino yai doblaa ayaa cudeenö, ya bayelibläö bädaobä tä ma cui ja, ya nö quilibö wei. Bei mamicö lä didio

wei etäcö nata bädawä ma cui, ya etäcö nö cushaö quilibö wei. Öjö a lä cuinö, bejedi lä wamacö nia yai jödödöblaö. Mau unö mlai, Yai Bada a Bufinö wamacö nia jödödöblaö. Cowa wacönö täbä çai nia jödödöblaö.

17 Nii bä tamou däjä, mobä yaiblamou lä culenaja, a nia cuaaö —a cuma—. Mobä fa yaiblalönö, tä ulifi aublaö çobä. ¿Öjö tawä? Shode walalawä fe çai bada juu waiquia lä cuimi, tesibä fa joyalönö, mobä feiblamabä. Mobä nia lä cuo wei jamö, mobä taablabä. Öjö ma cui, cowa wacö ludalou dao lä mlai jamö, bei tesibä nia yablaö —a cuu nö quiliama.

18 Inaja Juannö tä a bluca wäyää lojodoaö fa cuaanö, dodijidawä tä a ja bä yömölama.

19 Öjö ma cui, bada tä Elode a wasöma yalo, etä wälidiblaliyoma. Bada anö cama mashi bei suwäbö e lälema, Elodia a wäfa suwä lä cui. Öjö cudeenö Juannö a wasöma. Öjö a nowa suwä shino ja mlai, a lä cuaanö wei tä nowa çai bluca ja, a wasöma.

20 ¿Öjö tawä? Bada a doblonomi ma waiquii ma cui, öjö lä däjä a yai doblonomi fe balojowä. Juan a fa juwämalönö, a fe lamaquema.

21 Juan a fe lao showao mlao däjä, bluca bä fe lä ojomano wei däjä, Jesús a ma cui a fe çai ojoblamolayoma. A fe fa ojoblamolunö, Yai Bada nija a wä faö showao däjä, judu mösö ca jolablaliyoma. Möso ca fa jolablalunö,

22 Yai Bada tä Bufo, jai joledo a cuwä, Jesús nija a itolayoyoluma. Öjö däjä, fedu jamö culanö a wä bädaliyoma. —Ijiluyä bäfä nofimaö lä dodijile, çafä wa. Çafä nija ya bufo yai doblalou dodijia —a cuma.

23 Jesúsno lasha jai 30 a faa fa waiquimalönö, Yai Bada etä a ja bä yömölabä, a wawälayoma. ¿Öjö tawä? Jesús a lä cui, “José bä ijilubö e”, a nofi tabomaje. Öjö José bä föö, Eli e afa cuoma.

24 Eli bä föö, Madada e afa cuoma. Madada bä föö, Lewi e afa cuoma. Lewi bä föö, Mequi e afa cuoma. Mequi bä föö, Jana e afa cuoma. Jana bä föö, José e afa cuoma.

25 José bä föö, Madadia e afa cuoma. Madadia bä föö, Amosi e afa cuoma. Amosi bä föö, Naomo e afa cuoma. Naomo bä föö, Esili e afa cuoma. Esili bä föö, Nacai e afa cuoma.

26 Nacai bä föö, Maada e afa cuoma. Maada bä föö, Madadia e afa cuoma. Madadia bä föö, Semei e afa cuoma. Semei bä föö, Joseco e afa cuoma. Joseco bä föö, Judawä e afa cuoma.

27 Judawä bä föö, Joanano e afa cuoma. Joanano bä föö, Lesa e afa cuoma. Lesa bä föö, Solobabele e afa cuoma. Solobabele bä föö, Saladiele e afa cuoma. Saladiele bä föö, Neli e afa cuoma.

28 Neli bä föö, Mequi e afa cuoma. Mequi bä föö, Adi e afa cuoma. Adi bä föö, Cosamö e afa cuoma. Cosamö bä föö, Emadamo e afa cuoma. Emadamo bä föö, Ele e afa cuoma.

²⁹Ele bä föö, Jesús e ʼafa cuoma. Jesús bä föö, Elieseli e ʼafa cuoma. Elieseli bä föö, Jolimi e ʼafa cuoma. Jolimi bä föö, Madada e ʼafa cuoma. Madada bä föö, Lewi e ʼafa cuoma.

³⁰Lewi bä föö, Simeoni e ʼafa cuoma. Simeoni bä föö, Judawä e ʼafa cuoma. Judawä bä föö, José e ʼafa cuoma. José bä föö, Jonamö e ʼafa cuoma. Jonamö bä föö, Eliaquimi e ʼafa cuoma.

³¹Eliaquimi bä föö, Melea e ʼafa cuoma. Melea bä föö, Mena e ʼafa cuoma. Mena bä föö, Madada e ʼafa cuoma. Madada bä föö, Nadana e ʼafa cuoma. Nadana bä föö, David e ʼafa cuoma.

³²David bä föö, Isai e ʼafa cuoma. Isai bä föö, Obede e ʼafa cuoma. Obede bä föö, Booso e ʼafa cuoma. Booso bä föö, Sala e ʼafa cuoma. Sala bä föö, Naasono e ʼafa cuoma.

³³Naasono bä föö, Aminadaba e ʼafa cuoma. Aminadaba bä föö, Amino e ʼafa cuoma. Amino bä föö, Ani e ʼafa cuoma. Ani bä föö, Esomo e ʼafa cuoma. Esomo bä föö, Fale e ʼafa cuoma. Fale bä föö, Judawä e ʼafa cuoma.

³⁴Judawä bä föö, Jacobo e ʼafa cuoma. Jacobo bä föö, Isaacö e ʼafa cuoma. Isaacö bä föö, Ablaamö e ʼafa cuoma. Ablaamö bä föö, Dalei e ʼafa cuoma. Dalei bä föö, Nacolo e ʼafa cuoma.

³⁵Nacolo bä föö, Selucu e ʼafa cuoma. Selucu bä föö, Leu e ʼafa cuoma. Leu bä föö, Beleque e ʼafa cuoma. Beleque bä föö, Ebelo e ʼafa cuoma. Ebelo bä föö, Sala e ʼafa cuoma.

³⁶Sala bä föö, Cainana e ʼafa cuoma. Cainana bä föö, Afasada e ʼafa cuoma. Afasada bä föö, Semö e ʼafa cuoma. Semö bä föö, Noewä e ʼafa cuoma. Noewä bä föö, Lameco e ʼafa cuoma.

³⁷Lameco bä föö, Medusali e ʼafa cuoma. Medusali bä föö, Enocö e ʼafa cuoma. Enocö bä föö, Jalede e ʼafa cuoma. Jalede bä föö, Malaleli e ʼafa cuoma. Malaleli bä föö, Cainana e ʼafa cuoma.

³⁸Cainana bä föö, Enosi e ʼafa cuoma. Enosi bä föö, Sede e ʼafa cuoma. Sede bä föö, Adana e ʼafa cuoma. Adana bä föö, Yai Bada a cuoma.

San Lucas 4

¹Jodana u jamö Jesús a culanö, a waloa çoquema. Yai Bada tä Bufinö a jödödöbou ja, ulifi bloque jamö a lulubou cuaama.

²Öjamö, ulifi bloque jamö 40 tä fe didi cuaaö däjä, fecula badanö a yabäcäblalama. Öjamö a cudio däjä, a iyaö fa mlacunö, 40 tä mö didi lä cublou wei däjä, a ofäö dodijioma.

³Jesús nija abinaja fecula bada a cuma. —Yai Bada wa Ijilübö waiquiwä ja, fei maa ma da nosiema, nii a cublobä.

- ⁴Öjö dāja, abinaja Jesús a cuu mö feduoma. —Ma. Abinaja Yai Bada tä ʔ oni cuu. Nii bā ma waö wejei ma cui, öjö tä bādawänö tǎbā nia demi cudiomi. ʼEinaja tä ʔ cuu — Jesús a cuma.
- ⁵Öjö dāja, tä ösöwä lä dodijii jamö, fecula badanö Jesús a bālaquedayoma. Öjamö cǎcöbö culanö, Jesús nija, bita jamö tǎbā jödödöwä bälöblawä lä yaiblai tǎbā jömaö cuaama.
- ⁶Abinaja a nowa tama. —Ei tǎbā bluca lä bälöbe tǎbā nija wa bada cuobä, bǎfā nia lä tablamaö wei ya. Etǎbā nowa lä bluca wei, cafä nija ya tǎbā çai jöböabä. Iba ya bā bluca malä dälenu wei. Ya dobäö bufi lä doblao wei a lä cui nija ya bā jöböabä, iba bā malä cui.
- ⁷Öjö tawä? Camiyä nija wa möfe bolanö wale ʔfa bada doblao taö ja, afä tǎbā nia bluca cublou —a nowa tama.
- ⁸Öjö dāja, Jesús abinaja a cuu mö feduoma. —Ma. Abinaja tä ʔ oni cuu. Cafä wamacö nija Yai Bada ya lä bufiblamou wei ya. Wamacö möfe bolanö, camiyä Bada ya lä cui wamale ʔfa nia shino Bada doblao taö. Camiyä wamale ʔ nia shino yai juaö. ʼEinaja tä ʔ oni cuu —a Jesús cuma.
- ⁹Öjö dāja, fecula bada a lä cuinö, öjamö culanö Jelusale jamö Jesús a lulua taa majölefälöma. Yai Bada etä yafi feyaca jamö a fa ublamabajalunö, abinaja a nowa tama. —Bei. Yai Bada wa Ijilubö ja lä, eja culanö a da quelufälö.
- ¹⁰Abinaja tä ʔ oni malä cuu wei. Cafä nija ʔjele etǎbā nia läamaö, wa nowamabeje. ʼEinaja tä ʔ oni cuu.
- ¹¹Abinaja çai. Dodijidawä wa nia ʔçaaöje, maa mabä ja wa mamicö shäo mlaobä. ʼEinaja tä ʔ çai cuu —fecula badanö a nowa tama.
- ¹²Jesús abinaja e cuu mö feduoma. —Abinaja tä ʔ oni çai cuu. Cafä wamacö nija Yai Bada ya lä bufiblamou wei ya Bada lä cui, wamale bejedimou nia wabaimi. ʼEinaja tä ʔ oni cuu —a Jesús cuma.
- ¹³Öjö dāja, fecula badanö Jesús a lä yabäcano wei tä fa waiconö, a dablaquema.
- ¹⁴Öjö dāja, Calilea jamö Jesús a çö çölayoma. Yai Bada tä Bufinö a nö wǎlojomabou dodijioma yalo, öjamö bluca bā lä bälöblai bā nija a wǎfa jilimobodayoma.
- ¹⁵Judio bā yododabä jamö bā damaö fa cuaanö, bluca bänö a wǎfa dodijaö tamaje.
- ¹⁶Öjö dāja, Nasale jamö Jesús a çölayoma, a oshe lä cuono wei jamö. Öjamö lä judio bā yododabä yafi jamö a lucälayoma, showadi a lä cuano weinaja showawä. Tǎbā nia lä yanöcöono wei tä mö jalu sǎbado cuoma. Öjamö, wawädowä tä ʔ oni nia fa doanö, a ublalayoma.
- ¹⁷Tä ʔ oni doabä, tä si jöbömoquema, Yai Bada a wǎno wǎyǎlewä Isaia a wǎ oni lä cui. Öjö tä si fa cushähäblalönö, tä ʔ doaö bufi lä doblaono wei tä ʔ oni dayäblalema. Öjö dāja, abinaja tä ʔ oni lä cuu wei tä ʔ wawädowä doama.

18Bä lä jöli wei bä nija, tä ʔ lä dodijidai ya tä ʔ wäyäbä, Yai Bada tänö wale yailema. Öjö cudeenö, Bada tä Bufinö wale çai cua lä cule. Ya bä nia lä bayeliblaö wei ya wafa wäamobä, wale shömölema. Bä shi lä wəlimabou wejei ya bä nia jujeblamaö. Bä lä jubäbö wei ya bä mamocu nia dodijidablaö ço. Bä nö lä bleaamaö wejei ya bä nia bayeliblaö.

19Bada tänö fei däjä täbä nia bayeliblaö lä waiquile ya tä ʔ wäyäbä, wale shömölema. Einaja tä ʔ oni lä cuu wei tä ʔ doama.

20Öjö däjä, si cofublaö fa çolonö, a lä läono wei nija si oni çomaquema. Öjö däjä, camateli bä yömölabä a dökäquema. Judio bä yododabä yafi jamö bä bluca lä loono wei, Jesús nija bä mamö bluca showaoma.

21Bä jaba yömöläö ja, abinaja a cuma. —Fei däjä, wamacö yömöca lä dale däjä, ei ya tä ʔ oni lä doafe tä ʔ lä cuu weinaja, tä bejedi wawäblou waiquilayou lä cufe —a cuma.

22A wə lä jiliano wejei bä blucanö, a wafa dodijaö tamaje. A wə dodijaö ja, bä bufi möaama ma cui, abinaja bä cudou majölayoma. —¿José fei bä ijilubö emi daanö? —bä cuma.

23Cama bä nija abinaja Jesús a cuma. —Wamale nowa nia lä taö wei, ya tä daö waiquiwä. Showadi täbä ʔ. Täbä bejedimou wabaöje ja, abinaja bä cuu. “Wa bä jalomaö lä daö wei wa waiquiwä ja lä, ʔcafä a da jalomamo, öjö lä! Cabenao jamö bäfä ʔfa lä jilibolenaja, ʔafä tä ulifi jamö a yai da cuaayo!” Inaja wamale nowa nia taö, ¿öjö tawä? —Jesús a cuma.

24Abinaja a çai cuma. —Cafä nija ei ya wə lä cui, bejedi lä ya wə. Yai Bada a wəno wäyälwä bä lä cui, cama bä ulifibö yai ja, showadi bä ʔ jiliblaimije.

25Cafä wamacö nija ya bejedimou. Yai Bada a wəno wäyälwä Elia a jaba lä bälöono wei däjä, Isaeli nodiwä bä ulifibö ofäo nö quilio fe balojooma. Lasha 3 a lalou ma çono wei ma cui, ai a lalou bähäcuaaö ma çono wei ma cui, maa a quenomi showawä. Öjamö, suwä bä lä feiblonö wei bä bluca ma bälöono wei ma cui,

26Elia a iyamabeje, öjö bä nija Yai Bada tänö a shömöanomi. Saledateliyoma a lä feiblonö wei a nija a yai shömölema, Sidono tä ulifi jamö a suwä lä bälöono wei a nija.

27¿Öjö tawä? —a cuma—. Yai Bada a wəno wäyälwä Eliseo a bälöo lä nomöjöaliyono wei däjä, Isaeli nodiwä bä ulifibö jamö, jalili bluca bä bälöoma. Täbä sicö lä jodemaö wei tä wayunö, bä jalili bluca bälöo mö ma feduono wei ma cui, öjö bä jaloblonomi. Bä dodijidablou çodaanomi. Silia tä ulifi jamö a lä bälöono wei a Naamana lä cui, öjö a shino dodijidablou çolayoma. ¿Öjö tawä? —Jesús a cuma.

28Shomi täbä bayeliblamou lä ayaono wei tä ʔ fa jililäjenö, judio bä yododabä yafi jamö bä lä cuono wei bä bluca jushudou fe balojolayoma. Bä asi asimoma.

- 29**Bä jocäcadou fa showadalonö, a nabä quequemaje. Shabono a sibo jamö a jilulaö sibo showadalayfälömaje. ¿Öjö tawä? Jefu a bada jamö a shabono blaoma. Öjö jefu tä feyaca jamö a çai fa culujenö, bei macö balöcö jamö a nia jaiblaamaje, a shälobä.
- 30**Öjö ma cui, a çai lä juno wejei jamö a mö yabadou fa bälönö, a jayua fa möamoicunö, a aa çolayofälöma.
- 31**Öjö däjä, Cabenaoteli bä shabonobö jamö Jesús a cua nomöjölayofälöma, Calilea tä ulifi jamö. Täbä yanöcöobä tä mö jalu sábado lä cui ja, bä damama.
- 32**Bä damaö däjä, a wä lä shaliliablalou wei a wä ja, bä bufi möaaö dodijioma. Jai tä a yai daö shalilio showadaoma, a wä jiliaö malä cuaano wejei.
- 33**Öjamö lä, judio bä yododabä yafi jamö, a lä feculaböono wei a çai wälo coyocooma. A wä çali fecula fa falönö, a wä quilili läblaliyoma.
- 34**—¡Ma! ¡Inaja mlai! Nasaleteli Jesús wa lä cuinö, ¿wedinaja yamalecö nia fa taamanö, bei wa li waloo cuboyoi? ¿Bei yamalecö nabä juu waiquio cufe? Bäfa daö. Yai Bada tänö wa lä yaileno wei wa e —a cuma.
- 35**Öjö ma cui, Jesúsnö a wä wasöblalema. —¡A wä fa dijä. E faa da çolufälö! —a cuma. Öjö däjä, cama bä mamö mötale däjä, feculanö a wälo fa shäyäblacöfälönö, a daa showaquefälöma. A famimanomi.
- 36**Öjö tä fa dalalöjenö, bä bluca shädayaimou dodijioma. Abinaja bä nowa tayou ja bä cuma. —¿Ei wedi bei tä a majöwä? A wä fa shalilonö, a wä çai fa lojodoanö, fecula bä ma cui, ¡bä nofi lä yashublamou wei! —bä cuma.
- 37**Jesús a wäfa wäyääö cuaaö fa showaojenö, tä ulifi fe lä fayoi jamö ma cui, a wäfa jilimou blaucumobodayoma.
- 38**Öjö däjä, judio bä yododabä yafi jamö a faa fa çolufälönö, Simón e yafi jamö a lucäa majölayoma. ¿Öjö tawä? Simón bä yesi e lä cui, e jalilioma. A yoblaö dodijioma. Jesús nija a bayeliblamaö bufimaje.
- 39**Öjö cudeenö, a jalili blaobä ja a fa jotoiquiyonö, a lä yoblaono wei etä wasölema. Etä fa wasölönö, etä mladou showadalayoma. Öjö däjä, a suwä jocäcadou fa çolonö, bä fama iyaa showadamalema.
- 40**Bei. Motoca a lä queo wei däjä, jalili bä çai lä cublamono wejei bä çai bluca waloqueyolumaje. Bluca tä wayu shomitawänö bä nö bleaama. Öjö bä bluca nija, Jesús imicö maqueblou fa cuanö, bä jaloa showamalalema.
- 41**Bluca bä nija, fecula bä yashuabodayoma. Bä şilalamolanö abinaja bä fecula cudoma. —¡Yai Bada bei Ijilubö wa e! —bä cudoma. Öjö ma cui, bä a wasölema. Yai Bada tänö a shömabä a lä yaileno wei a nö öjöböamaje yalo, bä a fablamanomi.
- 42**Tä mö fa jalulunö, täbä bälöa lä mlale jamö a alayoma. A dayääö lä juono wejei, yacumö bä waloa jäqueyoluma. A daa fa çolalöjenö, a juu ma wasöno wejei ma cui,

⁴³a wə läblaliyoma. Abinaja bä nowa tama. —Ma. Ai bä shabonobö jamö ya tä a dodijidawä wäyää mö feduobä, Yai Bada tänö wale malä shömöleno wei, öjamö lä Yai Bada tänö cama ebä çai lä cuo wei, ya tä a dodijidawä wäyää mö feduobä —bä nowa tama.

⁴⁴Öjö däjä, Judea jamö a juu fa cuaanö, judio bä yododabä yafi bä jamö, bä yömölaö cuaama.

San Lucas 5

¹Bei. Modu Jenesale u casö jamö, Jesúsno Yai Bada etä a wäyää ja, tä a jiliaö bufi fa doblaojenö, bä mashicou dodijioma.

²Öjö däjä, mau u casö jamö, canawä bolacabö cäcöbö çä dalalema. Yuli bä lä yaçäö wejei bä fa itoblalunö, yaçamodima täbä walalawä yaluu bayäcäomaje.

³Simón canawä e ja, Jesús a fa ijilaicunö, a jiluludamaö bufima, yawäläwä a culanö bä yömölabä. Öjö däjä, canawä a jamö a dökalanö bä damama.

⁴Bä yömölaö fa waiconö, Simón nija a wə fama. —Wamacö befi çai fa caläläfälönö, u ocoobä ja, bä befi çai da çaicu. Öjamö walalawä täbä da quemabalöje, yuli wama bä yaçaabä —a cuma.

⁵Simón abinaja a cuu mö feduoma. —Bada tä. Yuli yama bä nia fa yaçaanö, yamacö juu fe jaluma ma cui, yamacö nö bleaaö fe jaluma. Moli yama a yaçäö buonomi. Öjö ma cui, inaja çafä wa cuu ja, ya täbä nia walalawä queamaö çö —a Simón cuma.

⁶Jesús a lä cuno weinaja bä fa cuaanö, walalawä täbä jamö bä yuli bluca fa yaçalöjenö, yuli bä judenö täbä jädödou nö quiliama. Täbä jädödou waiquia ja,

⁷ai a canawä jamö, cama ai ebä befi çai caläö mö lä feduono wei bä nacalemaje, bä bayeliblabeje. Öjö bä befi çai fa waloiquiyonö, yuli bä ja, cäcöbö fe canawä lajoblaö bolacaa showalayomaje. Cäcöbö fe canawä lajoblaö fe fa balojolojenö, yuli bä judenö cäcöbö fe mini canawä ojobaliyoma.

⁸Simón Pedro a lä cuinö, yuli bä bluca lä yaçalöfe tä fa dalalönö, Jesús cotä jamö a quilili diyäliquema. A fa diyälicunö, e a fama. —Bada tä. Camiyä nija a ajedo dijä. Ya doblou malä mlai —a cuma.

⁹Yuli bä bluca lä yaçaleno wejei tä ja, cama a ma cui, ai bä cuo mö lä feduono wei bä ma cui, bä bufi malä shädayaimono wei.

¹⁰Santiago a ma cui, Juan a ma cui, inaja cäcöbö bufi çai cuablalou mö feduo showaoma. Öjö Sebedeo bä ijilubö ecöbö cuoma, Simón sho yuli bä showadi lä yaçano wejei. Simón nija abinaja Jesús a cuma. —A quili dijä. Fei däjä, yuli bä bädawä mlai, yanowamö wa bä nabä nia shino yai juu, camiyä nija wa bä lulubobä —a cuma.

¹¹Bä befi çai fa washölöicunö, mau u casö jamö, canawä ecöbö shailemaje. Öjö däjä, cama etäbä bluca daa fa showadacöfälöjenö, Jesús nijamö bä yaua showadalayoma.

12Ai täbä shabonobö jamö Jesús a cuo däjä, täbä sicö lä jodemaö wei tä wayunö a nö lä bleaano wei a jalili waloquema. Sicö bluca jodeoma. Jesús a fa dalaliyonö, mashita jamö a möfe deialiyoma. A möfe deilanö, a nofi nia ojode fa tablamonö, a wə fama. —Bada tä. Wale bayelibläö ojode ja, wale jalomaö dao, ya dodijidablou cəobä —a cuma.

13Jesús boco fa dododalunö, a jubädalema. Abinaja e cuma. —Ya ojode lä. A da jalolu, öjö lä, wa dodijidablou cəobä —e cuma. Sicö lä jodeono wei etä wayu mladou showadalayoma.

14Öjö däjä, a wə nö wäo wasöö showaoma. —Ei bäfä lä jalomalöfe, yanowamö täbä nija wa tä əfa nia wäaimi. Nofi bəyāalewä nija a yai da mömodu. Wa dodijidablou lä cəlufe tä nowa ja, Moisesinö tä jöböamaö lä bufino wei etä da dodobodu. Inaja wa cuaaö ja, bluca täbä nija wa demi nia dablomou wawädo —a cuma.

15Öjö ma cui, Jesús a wəfa yai wəyāö balaa fa showadaalujenö, Jesús nija bluca bə cəcamoblaayoluma. A wə jiliaö bufi doblaomaje. Bə lä jalili wei bə cəi jalomamou bufi doblaoma.

16Öjö ma cui, ulifi bloque jamö Jesús a fa jublaanö, Yai Bada nija a nö bayeli nacaodima.

17Ai däjä, Jesúsno täbä damaö däjä, faliseo bə bada loo coyocoblamoma, Moisesi tä ə ja täbä lä damaö wejei bə cəi. Calilea jamö ma cui, Judea jamö ma cui, Jelusale jamö ma cui, öjamö bə culanö bə bada waloqueyoluma. Jalili bə jalomabä, Bada tänö Jesús a nö wəlojomaboma.

18Öjö däjä, a lä yətoliböono wei a befi cəi cadömaboimamaje. Jesús nija a befi cəi blaabeje, yafi jamö a cəi nia fa fajenö, a cəi icuquema ma cujei,

19bə lä cəcamono wei bänö a yafi jəfa mashiquiwä yalo, a cəi faö doblonomije. Öjö cudeenö, yafi feyaca sibo jamö a cəi dubefälömaje. A cəi fa dubofälöjenö, tä fa jocäblalujulujenö, a lä yətoliböono wei a befi cəi itomalejelayomaje. Öjö däjä, Jesús a mötalöbö ja, a befi cəi blaquemaje.

20A nofi lä mölabou wejei, Jesúsno etä fa dalalönö, abinaja a cuma, a lä yətoliböono wei a nija. —Bei. Wa doblou lä mlai, əfa ya tä nowa bluca mladamaö lä cule —a cuma.

21Moisesi tä ə ja täbä lä damaö wejei bə ma cui, faliseo bə cəi bada ma cui, bə bufi bluca jöjömoma. Abinaja bə bufi cudaliyoma. “¿Ei wedi a wə bashiwä? Yai Bada a nö waibläö lä cule. Täbä doblou lä mlai, Yai Bada tänö etä nowa shino mladamaö dao, yanowamö a bashiwänö mlai”, bə bufi cudaliyoma.

22Bə bufi cuu lä jətoono wei, Jesúsno bə daö fa showadaonö, a wə fama. —¿Wedi tä tabä wamacö bufi li jöjömou dicoa cube?

23Ei a lä cui, camiyä bei ya wənö ya jalomaö lä dalenaja, inaja showawä ya etä nowa cəi mladamaö si ijejewä cuwä. Ya nowa tabä ya waiquiwä malä cui, a fa jocädalunö a cojamöö cəobä. ¿Öjö tawä?

24 Camiyä ya lä yanowamöblaleyoluno wei ya lä cui, eja bita jamö ya lä cule däjä, bä doblou lä mlai ya etä nowa mladamabä ya waiquiwä. Wama tä möbä, öjö lä —a cuma. Einaja a fa cunö, a wə wawäa showaquema, a lä yətoliböono wei nija. —Bei. Cafä nija abinaja ya cuu. A da ubladalu. Wa lä maquele wa täcö fa jocälänö, täcö çai çojamö da çoo —a cuma.

25 Öjö däjä, bä lä çocamono wei bä mamö bluca showao däjä, a lä yətoliböono wei a lä cui, a fa ubladalunö, a lä maqueono wei etäcö jocälema. Täcö fa jocälänö, Yai Bada a nofi doabläö çai çolayofälöma.

26 Bä bluca lä çocamono wei bä bufi shädayaimou dodijioma. Yai Bada a nofi doablamaje. Bä fa quililalunö, abinaja bä nowa tayoma. —Fei däjä, tä nö lä quilijii, ;bäma tä daa dodijilalei lä cufe! —bä nowa tayolayoma.

27 Öjö däjä, Jesús a faa fa çolufälönö, Lewi a wəfa lä cule, a loa dalalema. Lomateli bada bä befi bä blada lä doaö wei, a Lewi cuoma. Blada bä doabä jamö a läa fa dalalönö, abinaja e cuma. —Camiyä nijamö a da nocaiquiyo —e cuma.

28 Lewi a ubladou fa showadalonö, täbä bluca daa fa showadacöfälönö, Jesús nija a nocaa showadalayofälöma.

29 Öjö däjä, Jesús sho bä iyabä, Lewinö cama e yafi jamö nii bluca bä tama. Lomateli bada bä befi bä blada lä doaö wejei bä bluca ma cui, ai bä ma cui, bä iyaö çai lä loono wei jamö, öjö bä bluca loo mö feduoma.

30 Öjö tä fa dalalöjenö, faliseo bä bufi bada jushujuoma. Cama ebä lä nocamabono wejei bä ma cui, Moisesi tä ʌ ja täbä lä damaö wejei, öjö bä bufi çai jushujuo mö feduoma. Jesúsno bä lä nocamabono wei bä lä cui, abinaja bä nowa tamaje. —¿Wedi tabä inaja wamacö li cuaaö dicoo? Lomateli bada bä befi bä blada lä doaö wejei bä ma cui, wəlidiwä talewä ai bä ma cui, ¿wedi tabä öjö wama bä çai li iyaö dicoo? —bä nowa tamaje.

31 Jesús a wə juo ja, abinaja bä nowa taö jəlooma. —Bä jalobä, bä lä demi wei bä icuo malä mlai. Bä lä jalili wei bä nia shino yai icuo. ¿Öjö tawä?

32 Bä dodijidawä lä jömöo wei ya bä nabä junö malä mlai. Wəlidiwä talewä ya bä nabä yai li juma, wəlidiwä tä ja, bä bufi lädobä —bä nowa tama.

33 Abinaja Jesús nija bä cuma. —Juan a lä cuinö bä lä nocamabole bä iyaö wasöo si ijejewä, bä iyaö yabäcou mlai ja, Yai Bada nija bä nö bayeli nacaodibä. Faliseo bä bada nija bä lä nocao wei bä ma cui, inaja showawä öjö bä çai cuaaö mö feduo talei. Öjö ma cui, afä bä çai iyaö wasöomi dicowä —bä cuma.

34 Öjö bä nija abinaja Jesús a cuma. —Fiya a lä cuinö a suwä dääö däjä, ¿cäcöbö nofi çocamoabeje jamö wama bä iyaö wasöö daanö? Ma.

35 Öjö ma cui, tä nö fa dedelönö, a fiya çomolayou ja, öjö däjä bä fa wajäänö, bä nia shino iyaimi juo. ¿Öjö tawä? —cama a wəfa tao ja, a cuma.

³⁶Öjö dájä, shomi tä ʔ coyocomabou bufio fa mlacunö, camishi bä ʔfa ʔai wäyää yaclämoma. —Camishi jode cäcö lebesi ja, ai cäcö acadafu läabeje, dude cäcö cacaaimije. Inaja bä cuaaö fa cunoja, cäcö yaluuje dájä, dude cäcö fa busudublalunö, täca jädödou nö blaucublaliyobö wei. Jode cäcö ma cui ja, dude cäcö sudio dicoo ja, cäcö nia mömou nö liyäjäblobimi.

³⁷Inaja showawä, yalo wejediwä sibä ja, nashiwä dude toubä löaimije. Inaja bä cuaaö fa cunoja, toubä lä juluu wei toubänö sibä fa jädölönö, sibä nö wʔliolaliyobö wei. Toubä nö ʔai bläshäblaliyobö wei. Wejediwä sibä uduo malä mlai.

³⁸Ma, yalo dude sibä ja, nashiwä dude toubä nia yai löaöje.

³⁹ʔAbinaja ʔai —a cuu ʔoma—. Nashiwä toubä cuo nö lä dedeano wei toubä coaö daö fa waiquiojenö, dude toubä bufiimije. Abinaja bä malä cuu wei. “Ma, toubä cuo nö lä dedeano wei toubä coamou dodijidawä yaiwä”, bä cuu. ʔÖjö tawä? Einaja Jesúsno bä nowa taö ja, a cuma.

San Lucas 6

¹Täbä nia lä yanöcöono wei ai tä mö jalu sábado ja, ficali ca jamö Jesúsno cama ebä ʔai jayuafälöö dájä, cama ebä lä nocamabono wei bänö mobä jucäa jayulalefälömaje. Mobä fa juducafälöjenö, lʔshi mobä waö cuaafälömaje.

²Öjö ma cui, inaja bä cuaama yalo, faliseo ai bä bada lä cui, abinaja bä cuma. —Täbä yanöcöobä tä mö jalu ja, inaja wamacö cuaaö mlaobä tä ʔ ma läle ma cui, ʔwedi tabä inaja wamacö li cuaaö fe yadio? —bä cuma.

³Jesús a wʔ juo ja, abinaja a cudaliyoma. —Bada tä David a lä cuaano wei, ʔbei wama tä ʔ oni daö mlaa cule? Cama a ma cui, cama ebä lä nocaono wei bä ma cui, bä ofäö ja,

⁴Yai Bada etä yano jamö, a lucäa fa jayulofälönö, Yai Bada ebä nii lä yaimabou wejei bä nii ja, a iyalayofälöma. ʔÖjö tawä? Öjö bä nii ja, nofi bäyäälewä bä iyabä bä nii yaimoma. Bä nofi bäyäälewä lä mlai bä iyabä, bä nii cuonomi. Bä iyaö mlaobä, Moisesi etä ʔ läoma. Öjö ma cui, öjö bä nii ja, David a iyama. Bä ʔai lä juno wei bä ma cui, öjö bä dobäa mö fedua showalalema. Öjö ma cui, inaja David a ma cuaano wei ma cui, a jömamonomi. ʔÖjö tawä? —Jesús a cuma.

⁵Öjö dájä, abinaja e cuma. —Täbä yanöcöobä tä mö jalu jamö täbä nia lä cuaaö wei tä ma cui ja, täbä nia cuaaö lä mlai tä ma cui ja, camiyä ya wʔ fabä ei Bada ya waiquiwä, ya lä yanowamöblaleyoluno wei ya lä cui —a cuma.

⁶Täbä nia lä yanöcöono wei ai tä mö jalu sábado ja, judio bä yododabä yafi jamö Jesús a lucäa fa ʔolunö, bä yömölama. Bä yömöläö dájä, imicö lä cofeono wei a cuoma. ʔÖjö tawä? Jayu boco jamö imicö lä cui, imicö cofeoma.

⁷Täbä nia lä yanöcöono wei tä mö jalu cuoma cudeenö, Moisesi tä ʔ ja bä lä damaö wejei bä ma cui, faliseo bä ʔai bada ma cui, Jesús nija öjö bä mamö bluca

showajaoma. Imicö lä cofeono wei a jalomaö fe yadio ja, a wafa nia dobroimi wäyämaje.

⁸Öjö ma cui, bä bufi lä cuu wei, Jesúsno tä daö fa waiquionö, imicö lä cofeono wei abinaja a nowa tama. —Eja wa fa ajedeicunö, a da ublabaliyo —a nowa tama. A ublaa möamoa showadaquema.

⁹Öjö däjä, bä mamö lä showajaono wei bä nija abinaja Jesús a cuma. —Bämacö wälili ojodaa lä cule. Täbä yanöcöobä tä mö jalu jamö, ¿bämacö dodijaö mlaobä tä ʔ lää daanö? Ma, wälidiwä bäma tä taö mlaobä tä ʔ shino lää. ¿Öjö daanö? Täbä shäö mlaobeje tä ʔ lää ma cui, täbä jalomabeje tä ʔ läami —a cuma.

¹⁰Öjö däjä, Jesúsno täbä bluca möö shoqueaö fa cuaanö, imicö lä cofeono wei a nija abinaja e cuma. —Boco da dodoiquiyo —a cuma. Boco fa dododalunö, imicö cushähshäblou showadalayoma.

¹¹Öjö ma cui, judio bä bada jushuo dodijioma. Jesús a nia lä taamano wejei tä ja, bä ʔ wayou showadaoma.

¹²Tä nö fa dedejedalunö, a nö bayeli nacaobä, jefu a jamö Jesús a dolequebefälöma. Yai Bada nija a wʔ faö fe jaluma.

¹³Öjö tä fena ja, cama nija bä lä nocaono wei bä nacaema. Bä naca fa ajedelänö, cama 12 ebä yaialalema. Bä yaiaö ja, abinaja a cuma. —Ei bä lä cui, ya bä nia lä shömaö wei cäbä —a cuma.

¹⁴Abinaja bä ʔfa lä cule bä cuoma. Simón a cuoma, Pedro a wafa çai lä jilaqueno wei. Öjö bä fäähshä Andrés e çai. Santiago a çai, Juan sho. Felipe a çai. Badolomei a çai.

¹⁵Mateo a çai. Tomás a çai. Afeo bä ijilubö Santiago e çai. Simón a çai, cama bä ulifibö jamö täbä shomi lämabou nofi lä wʔlibono wei a Simón lä cui.

¹⁶Santiago bä ijilubö Juda e çai. Juda Icaliode a çai, Jesús a nomojoliabä a lä cublaliyono wei a lä cui.

¹⁷Tä fe yalöobä ja, Jesúsno öjö bä çai dimöbaliyoma. Öjamö, cama nija bä lä nocaono wei bä çai bluca cuoma. Jelusaleteli bä ma cui, Judea jamö bä bluca lä bälöblaono wei bä ma cui, öjö bä bluca çai çacao mö feduoma. Diloteli bä ma cui, Sidonoteli bä ma cui, öjö bä çai bluca cuoma, modu u casö jamö bä lä bälöono wei bä lä cui. Jesús a wʔ nia fa jiliajenö, bä lä jaliliono wei bä çai nia fa jalomamonö, bä bluca çocamolayoluma.

¹⁸Bä lä feculaböono wei bä ma cui, öjö bä jalomalema.

¹⁹Jesús etä lojodenö bä bluca jalolayoma yalo, bä bluca lä çocamono wei bänö a jubaö bufi doblaomaje.

²⁰Cama nija bä lä nocaono wei bä nija, Jesús a mamö fa showaicunö, abinaja a cuma. —Yai Bada nija wamacö jömöo lä mlai wamacö lä cui, wamacö bufi yai doblalobä wamacö. Yai Bada tänö wamacö çai malä cule.

21'Yai Bada nija wamacö cadidou bufi lä doblao wei wamacö lä cui, wamacö bufi yai doblalobä wamacö. Yai Bada tänö wamacö bufi nia malä doblamabou wei. 'Wamacö lä öcöö wei wamacö lä cui, wamacö bufi yai doblalobä wamacö. Wamacö nia icablalou malä majöö wei.

22'¿Öjö tawä? —a cuma—. Ya lä yanowamöblaleyoluno wei wamale bufii yalo, wamacö nö ma bleaamaöje däjä ma cui, wamacö bufi doblalobä wamacö. Wamacö nofi ma wəlibouje däjä ma cui, wamacö ma waibouje däjä ma cui, wamacö əfa ma lafujəöje däjä ma cui, wamacö əfa dobloimi ma taöje däjä ma cui, wamacö bufi doblalobä wamacö.

23Inaja wamacö taamaöje däjä, bä bufi shino da doblalo. ;Bä bufi shino yai doblalou da dodijio! ¿Öjö tawä? Fedu fedole jamö wamacö nia dobəmou fe malä baloo wei. Cama bä nö badabö ma cuinö, inaja showawä Yai Bada a wəno wəyələwä bä nö bleaamaö malä balöono wejei. Öjö bä owəbou nodia dicoa lä culajei —Jesús a cuma.

24Abinaja Jesús a cuma. —Öjö ma cui, wamacö nö lä madofibö wei wamacö nö nia bleaaö majöö. Fei wamacö bufi dodijaö lä waiquile, öjö tä waiquiwä.

25Wamacö bədöwä lä waiquii, wamacö nö nia bleaaö majöö. Wamacö nia ofäo malä majöö wei. Wamacö lä icablalou wei wamacö nö nia bleaaö majöö. Wamacö fa wajəanö wamacö nia öcöö malä majöö wei.

26'¿Öjö tawä? —a cuma—. Bluca bənö wamacö əfa dodijaö lä taö wejei däjä, wamacö nö nia bleaaö majöö. Cama bä nö badabö ma cuinö, inaja showawä Yai Bada a wəno jole jole lä wəyənə wejei, bä taamaö malä balöono wejei.

27Abinaja Jesús a cuma. —Wamale ə lä jiliaö wei wamacö nija, abinaja ya cuu. Wamacö nofi lä wəlibou wejei bä ma cui, bä da nofimaje. Wamacö nofi ma wəlibou wejei ma cui, bä da bayelibleje.

28Wamacö lä wafəblaö wejei bä ma cui, Yai Bada nija bä da bayelimaje. Wamacö nö lä bleaamaö wejei bä ma cui, bä nö bayeli da nacaje.

29Bei wa mamoca baiaö ja, wa nö yuo mlai, ai mamoca mashi lədou da çolo. Inaja showawä, afä wa cö lä feyacabole cəcö dāaö dicoo ja, wa cö lä ʷeshibou wei cəcö ma cui, cəcö noshi umabo dijä.

30Cafä nija bä lä nacou wei, bä bluca da dobälö. Madofifä a lä dāafälöö wei nija a nacaö codaa dijä.

31¿Öjö tawä? Ai tábä nija cafä wamacö nofimamou bufi lä doblao weinaja, inaja showawä, ai wama tábä yai nofimaö cuobä.

32'Cafä wamacö lä nofimaö wejei wama bä nofimaö mö feduo yalo, ¿Yai Bada tänö wamacö əfa nia dodijaö taö daanö? —a cuma—. Ma. Wəlidiwä talewä bä ma cuinö, cama bä lä nofimaö wejei, showadi bä nofimaö mö malä feduo wejei.

33 Cafä wamacö lä bayeliblaö wejei bä lä cui wama bä bayeliblaö mö feduo yalo, ¿Yai Bada tänö wamacö afa nia dodijaö taö daanö? Ma. Wälidiwä talewä bä ma cui, inaja showawä cama bä showadi malä taamayou wei.

34 Tä nowa nia lä çamaö wejei bä nija wama bä madofi shino majöaö ayao ja, öjö däjä ¿wamacö nia afa shino dodijidawä tamou daanö? Ma. Wälidiwä talewä bä ma cui, inaja cama bä çai taamayou waiquiwä. Tä nowa nia çamaö lä jödödöo wejei bä nija bä madofi shino majöaöje.

35 'Öjö ma cui, abinaja bä yai da cuaa —a cuma—. Wamacö nofi lä wälibou wejei bä lä cui wama bä fa nofimanö, bä da bayeliblaje. Tä nowa nia lä çamaö wejei tä ja, wamacö möläö mlai ja, madofifä no mlai ja bä da majöaje. Öjö lä däjä Yai Bada nija wamacö nia yai dobämou. Inaja wa lä cuaaö wei tänö, Yai Bada tä Bada lä ayai wama ecö ijilubö nia dablamous dodijio. ¿Öjö tawä? Cama Yai Bada nija bä bufi afa doblalou wäyämou ma mlai ma cui, bä doblou ma mlai ma cui, dodijidawä bä bayeliblaö fe malä yadio wei.

36 Ma. Faafä Yai Bada a lä culadi a bufi asio lä culenaja, wamacö cuo mö feduobä wama ecö —Jesús a cuma.

37 Abinaja Jesúsnö bä nowa tama. —Yanowamö bä dobloimi jöma dijejä. Öjö däjä, cafä wamacö ma cui Yai Bada tänö wamacö nia jömaimi. Bä çai wai dijejä. Cafä wamacönö wama bä waiimi ja, inaja showawä cafä wamacö nia waimamoimi cuo mö feduo. Bä doblou lä mlai bä nija tä nowa çai tabo dijejä. Ai bä nija wama tä nowa taboimi ja, inaja showawä cafä wamacö nija tä nowa nia cuomi.

38 'Täbä da dobäje —a cuma—. Wama bä dobäö ja, inaja showawä cafä wamacö nia dobämamou cuo mö feduo. ¿Bejedi lä wamacö nia dobämamou! Fe lajowä wama täbä fa mönö, ¿wamacö nia fejeleo! Ai wama bä dobäö lä cuaaö weinaja, inaja showawä cafä wamacö nia dobämamou cuo mö feduo —a cuma.

39 Jesúsnö bä bufi dayäamabä, shominaja tä a wäyäö yacläoma. —Jubäbö a lä cui, ¿ai a jubäbö mö feduwänö a nia lulubou daanö? ¿Täca täca aca jamö, cäcöbö nia queo bolacao showadaomi daanö?

40 'Tä a lä wäyäö wei a wä jiliaö mlaoje däjä, cama ebä lä nocale bä a nia jiliaö ayaomije. Öjö ma cui, bä lä nocaö wei bä bufi yai jaducublou däjä, tä a lä wäyäö wei a nofi lä tabou wejeinaja, inaja showawä bä nofi çai nia tabou mö feduoje.

41 'Aifä a mamö jamö libu libu wa ma möö wei, cafä wa mamö jamö fii wa fi bada lä çäbole, ¿wa nö öjöböamoimi tawä? —a cuma—.

42 Cafä nija fii fi bada ma läo däjä, ¿aifä nija bei wa wä nia li faö? Aifä mamö jamö libu libu e wai lä çale, ¿öjö bei wa e nia li joyaö? ¿Jole jole wa lä dodijaö wei! Cafä wa mamö jamö fi bada lä çale fi joya da balölö. Öjö däjä, wa tä möö fa wacacablalunö, aifä a mamö lä libubö wei wa e nia shino joyaö dodijidao.

43 Abinaja Jesús a cuma. —Fii fibä lä dodijidai fibä jamö, nii wälidiwä bä nia laloimi. ¿Öjö tawä? Fii wälidii fibä ma cui jamö, nii dodijidawä bä nö çai lalobimi mö feduwä.

⁴⁴Täbä nii lä lalou wei täbä ja, defibä nö malä öjöböamou wei. ¿Öjö tawä? Mö söcö bä jamö nii bä jucamou dao malä mlai. Ico bä ma cui, uba bä ma cui, öjamö lä bä nia yädäomi.

⁴⁵'A lä dodijaö wei a wə faö dāja, bei bufi jamö tä dodijidawä lä didile etä ʔ nia wawäblou —a cuma—. Inaja showawä, wəlidiwä talewä a lä cui a wə faö dāja, bei bufi jamö tä wəlidiwä lä didile etä ʔ nia çai wəlidiwä wawäblou mö feduo. ¿Öjö tawä? Bei täbä bufi jamö tä lä didile etä ʔ shino malä wawäblou wei.

⁴⁶Abinaja Jesúsnö bä nowa taö showaoma. —Cafä wamacö nija ya tä tamaö lä bufii wei wama tä taö mlao dāja, ¿wedi tä tabä camiyä nija “¡Bada tä, Bada tä!” wamacö jole jole cudii buo?

⁴⁷Camiyä wale ʔ lä jiliayoluu wejei dāja, wale ʔ juaö lä showadao wejei bä lä cui, abinaja öjö bä li cuwä.

⁴⁸Yafi a lä itamano wei a lä culenaja bä cuwä. Öjö a lä cuinö täca fa blajamalönö, bei masi blaa lä çojomole jamö e defibä colo fa itaolalönö, e yafi itao lojodooma. Maa a fa quenö, u bada fa oconö, yafi e jamö u caläo lojodoama ma cui, e yafi itao jifuo fa waiquionö, e yafi çai bloloaö bädaonomi.

⁴⁹'Öjö ma cui, ai bä mö feduwä lä cuinö, wale ʔ ma jiliaö wejei ma cui, wale ʔ juaimije —a cuma—. Öjö bä lä cui, abinaja bä cuwä mö feduwä. Yafi a itamaö mö lä feduono wei a lä culenaja bä cuwä mö feduwä. A yafi colo dalomaö mlai ja, a yafi itaa bäquema. Tä fa maaböonö, yafi e jamö u caläo fa lojodoanö, e yafi wäcälayoma. E yafi lä wäcälayono wei dāja e yafi bada wəlioblou showadalayoma —a cuma.

San Lucas 7

¹Jesúsnö bä damaö fa jödödöblalunö, Cabenao jamö a çoblaliyoma.

²Öjamö sodado 100 bä çai lä cuono wei a Lomateli bada bälöoma. A nosie juamobä e wəlo taboma. A nofimaö dodijioma. Öjö e lä cui e fa jalililalunö, e nomaö ajedeoma.

³Öjö dāja bada a lä cuinö, Jesús a wəfa juu fa jililänö, judio bada bä shömölema, a nacabeje. A nosie juamobä e lä jaliliono wei e jalomayolubä.

⁴Jesús nija judio bada bä fa waloicunö, a nacablalamaje. Bä ʔ fe blacäjou ja, abinaja bä cuma. —Öjö lä a bada lä cui, wa bayeliblabä a waiquiwä. A dodijaö. ¿Öjö tawä?

⁵Judio bämalecö malä nofimaö wei. Yamacö yododabä a yafi tablalema —bä cuma.

⁶Öjö bä nija Jesús a nocaa showalayofälöma. Öjö ma cui, Lomateli bada e yafi jamö a ajedoimaö ja, cama nofi ebä shömöa mö baquema, a wəno wäyäbeje. Abinaja Jesús a nowa tamaje. —Bada tä. Sodado bä çai lä cule yama a wəno taö. Wa yabäcaö bufiomi. Wa nö jəwa yafimabimi. A quilii. “Wale bayeliblabä yami”, a bufi cuu. Judio a malä mlai.

⁷Öjö cudeenö, cama a icuo showadao mlai, camiyä yamalecö shömöa lälema. Eja culanö ma cui, wa wə blajawä famaö bufii, a nosie juamobä a lä cui, a jalou showadaobä.

⁸Öjö tawä? Tübä nosie lä juaö wejei tä malä dale. Cama bada ebä lä cui ebä ʔ juaö. Inaja showawä, cama a nosiemou ja, sodado ebä çai lä cule ebänö a wə çai juaöje. Ai a shömaö ma cui, ai a nacaö ma cui, a wə juaö si ijejeweje. A nosie juamobä a lä tabolenö a nosie çai juaö showadao malä cui —Jesús a nowa tamaje.

⁹Öjö bä ʔ ja, sodado 100 bä çai lä cuono wei a nija, ʔ bejedi lä Jesús a bufi doblaloma! A mö fa yabadalunö, bä bluca lä nocaono wei bä nija abinaja a cuma. —Cafä bamacö nowa taö lä cule —a cuma—. Quiji Lomateli a lä cuinö wale nofi mölabou lä culenaja, Isaeli wama ecö nija, moli ma cui ya dablaö bädaami —a cuma.

¹⁰Öjö däjä, bada anö bä lä shömöleno wei bä çə showalayoma. Bä fa çəbonö, bada a nosie juamobä e lä jaliliono wei a lä cui, a demi dalalejelomaje.

¹¹Tä nö fa dedejedalunö, Naini tä ʔfa shabono lä cuono wei jamö a Jesús juu majöoma. Cama ebä lä nocamabono wei bä ma cui, ai bä bluca lä çəcaono wei bä ma cui, cama nija bä bluca yaua showalayofälöma.

¹²Nainiteli bä beibö yoca lä joleono wei jamö bä blacäö däjä, yafiteli bänö nomawä a çai faa mö balayomaje. A lä nomalayono wei bä fjö e fa nomalönö, bä nö e yamiblaliyoma. Ai ebä ijilu çai cuonomi. Öjamö bä lä bälöle bä bluca fa çəcamolunö, a nomöa bolajenö a suwä çai jumaje.

¹³Öjö tawä? Bada tänö a suwä fa dalalönö, a nofi ojodadalema. Abinaja e cuma. —Ami. A öcö dijä.

¹⁴Öjö däjä, a fa ajedebalunö, a besi nomawä jubama. A nomawä çai lä juno wejei bä yanöcöquema. Fiya nomawä a nija abinaja Jesús a cuma. —ʔUasi! Cafä nija ya wə faö lä cule. A da jocädalö —a cuma.

¹⁵Inaja a fa cunö, nomawä a fa jocäbalunö, a fa loalunö, a wə fama. Öjö däjä, bä nö e nija Jesúsno a demi çə çəmaquema.

¹⁶Öjö tä ja bä bluca fa quililalunö, Yai Bada a nofi doablaöje ja, abinaja bä cuma. —Camiyä yamacö nija, ʔYai Bada a wəno wäyäləwä a bada waloqueyoluu lä cufe! ʔYai Bada tänö bejedi lä cama ebä bayeliblaö dodijilayoyoluu lä cufe! —bä cuma.

¹⁷Jesús a lä cuaano wei tä ʔfa wäyämou blaucuolaliyoma. Judea jamö bä bluca lä bälöblai bä nija ma cui, bä bälöa fe lä dolejeono wei bä nija ma cui, tä ʔfa wayoamoma.

¹⁸Öjö däjä, Juannö bä lä nocamabono wei bä lä cuinö, Jesús a lä cuaano wei tä bluca ja, a yömölamaje.

¹⁹A fa yömölajenö, Juan a wəno wäyämobä, cama bolacabö ecöbö fa nacalänö, Bada tä nijamö cäcöbö shömölema. Jesús a wəlibö ja, abinaja cäcöbö nia cuma. “A nia

jowa lä juno wei, ¿öjō cafä wa waiquiwä tawä?”, bä nia cuma. “Ma, cafä mlai, ¿ai a nia yai lä juu wei yama a nö dabou showaobä daanö?”, cäcöbö nia cuma. ¿Öjō tawä?

20Jesús nija cäcöbö fa waloicunö, inaja showawä cäcöbö cuyoluma. —Bä fe ojomalewä Juan a lä cui, öjō yafä a wano taö lä cule. A nia jowa lä juno wei, ¿öjō cafä wa waiquiwä tawä? Ma, cafä mlai, ¿ai a nia yai lä juu wei yama a nö dabou showaobä daanö? —cäcöbö cuma.

21Öjamö cäcöbö cuo showao däjä, jalili bluca bä jalomalema. Bluca tä wayu shomitawä mö feduwänö bä nö lä bleaano wei bä ma cui, bä lä feculaböono wei bä ma cui, bä bluca jalomalalema. Bä lä jubäböno wei bä ma cui, bä mamocu bluca dodijidabläö çolayoma.

22Öjō cudeenö, abinaja Jesúsnö cäcöbö nowa tama. —Wafä tä lä dalalufe, wafä tä a lä jililäfe, Juan nija tä afa bluca da wäyäbödu. Bä lä jubäbö wei bä lä cui, bä mamocu dodjidablou ço. Bä juu dao lä mlai bä lä cui, bä jublou. Täbä sicö lä jodemaö wei tä wayunö bä nö lä bleaö wei bä lä cui, bä dodijidablou ço. Bä yömöca lä comi wei bä lä cui, bä yömöca walalablou ço. Bä lä nomaö wei bä lä cui, bä demi jocädou ço. Bä lä jöli wei bä lä cui, dodijidawä tä a ja, bä yömölamou.

23¿Öjō tawä? Camiyä wale nofi mölabou fe lä yadio wei a lä cui, öjō a bufi nia yai doblalou —cäcöbö nowa tama.

24Juannö cäcöbö lä shömöleno wei cäcöbö ço fa çolunö, bluca bä lä çocamono wei bä nija, Jesúsnö Juan a wafa wayoaö juoma. —Ulifi bloque a jamö, ¿wedi wama tä möbä wamacö li juma? ¿Wadoli anö cau cau bä lä yaläläö wei wama bä möö bädaobä daanö? Mlaicätä. Wamacö juu buonomi.

25’Jao. ¿Wedi wama tä yai nia fa mönö, wamacö li juma, öjō lä? —a cuma—. Camishi dodijidawä bä ja a lä didio wei a lä cui, öjō wama a nia fa mönö, ¿bei wamacö juma daanö? Ma, camishi dodijidawä bä ja bä lä didio wei bä lä cui, bä nö lä madofibö wei bä lä cui, ulifi bloque a jamö öjō bä nia cuomi. Bada bä bälöo lä dodijio wei bä nija, öjō bä li bälöo.

26’Jao —a cuma—. ¿Wedinaja a walo cuwä wama a yai nia fa mönö, wamacö juma, öjō lä? ¿Yai Bada a wano wäyäläwä wama a möbä mlai daanö? Awei, öjō wama a möbä lä. Cafä bamacö nowa taö lä cule. Juan a lä cui, Yai Bada a wano wäyäläwä ai a bädawä mlai, öjō bei a shino yai bada dodijiwä.

27Yai Bada etä a oni jamö, Juan a wafa çai wäyäö balöomaje. Abinaja tä a cuu. Bei. Wa nia juu lä cuaafälöo wei jamö, wa wano taö balöafälöbä, iba ya nia shömaö balöo, wa wä jiliaö dodijidaobeje. ’Einaja tä a cuu —Jesús a cuma—.

28Cafä bamacö nowa taö lä cule. Bluca bä lä bälöblai bä ma cui nija, bä jaba lä bälöjono wei bä ma cui nija, Juan nija a bada fe biyäjäobä a cuami. ¿Öjō tawä? Öjō ma cui, Yai Bada tänö cama ebä çai lä cuo wei bä lä cui, öjō bä nofi shino yai tabobeje cäbä. Öjō bä nijamö a cua lä bäle a ma cui nija, Juan a nojablaliyo.

29' ¿Öjö tawä? —a cuma—. Täbä yömölabä, Juan a jaba wawäblou däjä, Lomateli bada bä befi bä blada lä doano wejei bä ma cuinö, ai bä bluca ma cuinö, Juan a wä julemaje. Bä fe bluca ojoblamolayoma, Yai Bada tänö bä taamaö lä bufino weinaja showawä.

30' Öjö ma cui, faliseo bä bada lä cui bä fe ojoblamonomi. Moisesi tä a ja täbä lä damaö wejei bä ma cui, inaja showawä. Yai Bada tänö bä taamaö lä bufino wei tä a wailemaje.

31' Wamacö fei däjä lä bälöblai, ¿wedi tä cuwä lä dodijiinaja, bei wamacö cuwä dodijiwä? —a cuma—. ¿Wedinaja ya cubä? Wamacö a juomi fe balojowä.

32' Ijilu bä ñiyamobä jamö, bä a juayou lä mlainaja showawä. Nii bä luluabeje jamö, ijilu bä ñiyamou däjä, abinaja bä cuaaö. Ai bä mashi ñiyamou fa shomitaicunö, abinaja bä nowa taöje. “Uo. ¿Wedi tabä yamalecö a li juaimi dicowä? Amowa yama fi jolaö däjä ma cui, wamacö blaö blaömoimi. Jole jole yamacö ma öcöö däjä ma cui, wamalecö a çai bayeliblaimi”, bä nowa taöje. Ijilu bä ñiyamobä jamö, showadi einaja bä li taamayou.

33' ¿Öjö tawä? —a cuma—. Cafä wamacö ma cui, inaja showawä wamacö cuaaö. Wamacö a juomi fe balojowä. Fe ojomalewä Juan a lä cui, öjö wama a wä juano malä mlai. Öjö a fa waloiquiyonö, nii a ja, a wasöoma. Nashiwä toubä çai ja. A waiyoma cudeenö, “A li feculabö”, wama a nofi li taboma.

34' ¿Öjö tawä? Juan a lä cuaano weinaja ya cuaaö ma mlai ma cui, inaja showawä camiyä ya lä yanowamöblaleyoluno wei ya lä cui, wamale a çai jiliblaimi cuwä mö feduwä. Camiyä ya fa waloiquiyonö, ya çai waiyo mlai ja ya iyaö showawä. Bei ya toubä çai coaö. Öjö ma cui, wamale afa çai wayoaö mö feduwä showawä. “Showadi a iyadii”, wamacö cuu. “A shi wälili bufi fa doblaonö, toubä coadii”, wamacö cuu. “Lomateli bada bä befi bä blada lä doaö wejei bä ma cui, wälidiwä talewä ai bä ma cui, öjö bä shino nofimadii”, wamacö cuu. ¿Öjö tawä?

35' Inaja wamacö ma cuu däjä ma cui, Yai Bada a wä moyawe. Öjö a wä lä cadidibou wejei bä bluca lä cuinö, a bejedi dablamaöje —a cuma.

36' Cama nija a nö liyobä, faliseo ai a badanö Jesús a nacalema. Öjö cudeenö, öjö e yafi ja a fa falönö, bä iyaö çai loobä jamö a cuquema.

37' Faliseo e yafi jamö Jesús a wäfa iyaö fa jililänö, öjöteliyoma a doblou lä mlai a waloquema. ¿Öjö tawä? Toubä nö lä clèdeli wei toubä çai besi waloquema, toubä nowa bluca lä dodijii.

38' Jesús maticö mö cuobä jamö a ublaqueyoluma. Öjamö a öcölanö a möfe boquema. Bei mabu ubänö Jesús mamicö jelemalalema. Öjö däjä a fa loicunö, cama suwä feta ucu showawänö mamicö yajöblalema. Mamicö buyucadima. Toubä nö lä clèdeli wei toubänö mamicö fe löblalema.

39' ¿Öjö tawä? Jesús a lä nacano wei a faliseo lä cuinö, öjö tä fa dalalönö, abinaja a bufi bada cudaliyoma. “Yai Bada a wäno wäyälwä ei a yai cuo fa cunoja, a lä jubamole a

doblou lä mlai etä nö öjööabö wei. Fei suwä a doblou lä mlai, etä nofi daimi dodijiwä yai”, a bufi cudaliyoma.

⁴⁰A wä juo ja, abinaja Jesús a cuma. —Simón, cafä nija ya tä ą nia wäaö. —A wä da fabla, tä ą wäyäle —e cuma.

⁴¹Abinaja Jesús a cuma. —Blada showadi bä lä majöaö wei anö, bolacabö cäcöbö nija bä blada majöquema. Ai a nija 500 bä bluca majöquema, bä nowa lä blucai. Ai a mö feduwä nija 50.

⁴²Tä nowa nö çamabimi waiquiwä ja, bolacabö cäcöbö nija etä nowa mladamaö showalayoma. ¿Öjö tawä? Cafä ¿wedinaja wa bufi cuu? ¿Wedi jamö a lä cuinö a nia yai nofimaö fe balojowä? —Jesús a cuma.

⁴³—Abinaja ya bufi cuu —Simón a cuma—. Blada ebä çamabä ebä lä blucono wei a lä cuinö a nia shino yai nofimaö fe balojoo, etä nowa bluca mladamalema cudeenö —a cuma. —Bejedi lä wa wä. Wa wä cadidou —Jesús a cuma.

⁴⁴Öjö däjä, suwä nija a mö fa yaiblalunö, Simón nija abinaja Jesús a cuma. —¿Ei wa suwä dablaö cule? Cafänö dodijidawä wale yafimabä, ya mamicö yälömobä, mau wa ubä jöböabä wa ma cui, wa ubä jöböanomi. Öjö ma cui, ei a suwä lä cuinö, bei mabu ubänö wale mamicö fa jelemalalönö, bei fëta ucinö wale mamicö yäjöblalei lä cufe.

⁴⁵Dodijidawä wale yafimabä, cafänö wale nofimaö mö baono ma mlai ma cui, ei a suwänö wale mamicö malöcaö malä showale.

⁴⁶Dodijidawä wale yafimabä, dabö dabö ubänö wale fe liyäyabä wa ma cui, wale fe liyäyanomi. Öjö ma cui, toubä nö lä çledeli wei toubänö, ei a suwänö wale mamicö fe löblalei lä cufe.

⁴⁷Öjö cudeenö cafä bäfä nowa taö lä cule —a cuma—. Tä doblou lä mlai ya etä nowa bluca mladamaö yalo, ei a suwä lä cuinö wale nofimaö fe balojowä. ¿Öjö tawä? Öjö ma cui, Yai Bada tänö wiisibö etä nowa mladamaö lä buo wei, wiisibö a nia nofimaö bädao —Simón nija Jesús a cuma.

⁴⁸Suwä nija abinaja a Jesús cuu nomöjööma. —Wa doblou lä mlai ya tä nowa mladamaö waiquiwä —a cuma.

⁴⁹Öjö däjä, bä iyabä jamö bä çai lä jilaono wei, abinaja bä nowa tayoma. —¿Wedinaja cama a nofi li tamamou dicoa cule? Bä doblou lä mlai, ¿camanö bei tä nowa nia mladamaö daanö?

⁵⁰Suwä nija abinaja Jesús a cuu showaoma. —Wale nofi mölabou yalo, Yai Bada tänö wa jucäaö waiquia lä cule. A bufi yanöcöwä çai da çujamö.

San Lucas 8

¹Tä no dedeaö mlao däjä, ai täbä bälöblawä mö lä fedui jamö, shabono bada bä jamö ma cui, wajaquemi bä wai shabono jamö ma cui, Yai Bada etä ą wäyäö cuaama. Dodijidawä tä ą ja, bä yömölaö cuaama, Yai Bada tänö cama ebä nia çai lä cuo wei tä ą ja. Cama 12 ebä nocaö showaoma,

²ai bä suwä lä jalomano wei bä çai. Bä lä feculaböono wei bä suwä lä cui, öjö bä fa jalolalunö bä cuoma. Shomi tä wayunö ai bä suwä lä jaliliono wei, öjö bä fa jalolalunö bä çai cuo mö feduoma. Madalatelyoma María a çai, fecula 7 ebä lä yashuleno wei a lä cui.

³Cusa bä suwäbö Wana e çai. Öjö Cusa a lä cui, Elode e yafi jamö a bada läoma. Susana a ma cui, öjö a çai cuoma. Ai bä çai suwä bluca. Öjö bä suwä bladabö showawänö, bä bluca bayeliblamou cuaama.

⁴Bluca bä lä bälöblai bä fa çocamolionö, bä bufi dayäamabä, Jesúsno shominaja tä a wäyäö yacläoma. Abinaja a cuma.

⁵—Ai anö mobä shäyajaö mö alayoma. Mobä shäyajaö cuaafälöo däjä, bei yo jamö ai mobä fa blälälalunö, mobä cadiquilalemaje. Biyomö bänö mobä çai owa nocaa jäalalemaje.

⁶Bei masi blaobä jamö ai mobä blälälaliyoma. Mobä lobe caua showadalaliyoma ma cui, mosibä shiliquii nocamou dicooma, mashita a jäläläo dicoo fa mlacunö.

⁷Tä mösöcöböobä jamö ai mobä fa blälälalunö, mobä caua ma bälayono wei ma cui, mösöcö bä caua mö fa fedulalunö, mosibä baömölayoma.

⁸Mashita a lä dodijidai jamö ai mobä fa blälälalunö, mobä caua fa liyäjälalunö mosibä badalayoma. Ai mosibä jamö, moli mosi ma cui ja, 100 mobä cublou majölayoma. 'Öjö tawä? —a icali cuma—. Wamacö yömöcacö lä walalai, bä yömöca daa da dodijiicu.

⁹Jesúsno bä lä nocamabono wei bä bufi wedinajamou yalo, shominaja tä a wäyäö lä yacläono wei tä a ja, a wälimaje. A wälrije däjä,

¹⁰abinaja Jesús a cuma. —Yai Bada tänö cama ebä çai lä cuo wei tä a lä cui ja, cafä wamacö bufi jaducumabou. Tä a jilimamou walalao showadao ma mlai ma cui, dodijidawä wama tä a bluca jiliaö fe yadiobä, wamacö bufi damaö. Öjö ma cui, ai bä mö feduwä lä cui bä nija, shominaja ya tä a li showadi wäyäö yacläo, bä bufi jaducublou mlaobä. Bä mamö ma showao wei ma cui, bä bufi möblou mlaobä. Bä yömöca ma dao wei ma cui, wale a jiliaö walalao mlaobeje —Jesús a cuma.

¹¹Abinaja a cuu çoma. —Mobä lä shäyajamou wei ya mobä afa wäyäö lä yacläofe, öjö Yai Bada ya etä a yai wayoaö lä cufe. Bei mobä lä culenaja, Yai Bada etä a cuwä.

¹²Bei yo jamö mobä bläläo lä cuaaö weinaja, ai bänö Yai Bada etä a jiliaö cuaaöje. Tä a jiliaöje ja, fecula bada a fa waloiquiyonö, bei bä bufi jamö tä a lä didile etä a doaö nocamou, tä a bejedi bufii mlaobeje. Bä jucäamou mlaobä.

¹³'Bei masi blaobä jamö mobä bläläa lä culaliyono weinaja, ai bä mö feduwänö tä a çai jiliaö cuaaöje —a cuma—. Tä a jiliaöje däjä, bufi doblalanö tä a daaöje. Öjö ma cui, mobä nasöcö daloblou fa mlacunö, mosibä dedejbloimi. Öjö mosibä lä culenaja bä lä cui, tä a bejedi jaba ma bufilei wejei ma cui, bä yabäcamou däjä, bä waiquidou.

14'Tä mösöcöböobä jamö mobä bläläa lä culaliyono weinaja, ai bä ma cuinö tä ʘ jiliaö cuwä mö feduweje —a cuma—. Tä ʘ ma jiliaö wejei ma cui, täbä showadi lä yabäcäblou wei tä ja, bä yabäcäablou majöblao dicoo. Madofi bä çai tabou bufi doblaoje. Cama bä cuaaö bufi lä doblao wei tä ja, bä çai yabäcäo. Öjö däjä, Yai Bada nija bä bufi badadalou fa mlacunö, tä lä dodijidai etä mili wawäblou ma cule, etä liyäjäbloimi.

15'A mashita lä dodijidai jamö ai mobä bläläa lä culayono weinaja, ai bä ma cuinö tä ʘ jiliaö cuwä mö feduweje —a cuma—. Öjö bä lä dodijaö wei bä lä cuinö, bä bufi bejedimolanö tä ʘ jiliaö cuaaöje. Tä ʘ fa jiliajenö, tä ʘ nofi jaducubou dodijioje. Bä bufi yanöcölanö tä ʘ juadiije ja, etä yai dodijidawä cublaliyo.

16'Abinaja Jesús a cuma. —Cowa wacö ömöamaöje däja, jaboca anö wacö fe nia yojoubou majöomije. A lä mio wei tä bäfätä jamö ma cui, wacö çai nia joyaboimije. Ma, wacö itaobä jamö wacö yai befi çai nia itabouje, öjö tä shininö, bä lä faö wei bänö wawädowä täbä dablao showadaobeje. ¿Öjö tawä?

17'Inaja showawä, jödödowä tä nia bluca wawädowä cuo. Fei däjä ai tä ʘ jilimamou nofi mojodi ma cui, obi tä ʘ nia malä walalablou wei. Fei däjä ai tä ʘ ma joyale ma cui, obi tä ʘ nia wawäblou malä nomöjöö wei.

18'Wamacö yömöca dao däjä, bä yömöca daa da dodijiicu, öjö lä, wamacö bufi yai jaducublobä. Bä bufi jaducuwä lä waiquii, öjö bei bä bufi jamö tä lä didile, Yai Bada tänö etä nia balamafälöö. Öjö ma cui, bä bufi jaducudalou lä mlai bä lä cui nija, “Ya tä ʘ wiisibö daö waiquia”, bä bufi ma cuu wei ma cui, etä wai wiisibö jowa daö lä bädale etä nia çaaö, tä ʘ nofi mojudoubou majöobeje —bä nowa tama.

19'Öjö däjä, Jesús bä nöö, bä fäähshä ebä walobeyoluma ma cui, täbä fa mashiquionö bä ajedou doblonomi.

20'Jesús nija abinaja ai e cuma. —Naafä a ma cui, fäähshäfä bä ma cui, bä ublaa siboa lä cubiyedi. Wa möö bufi doblaoje —a cuma.

21'Öjö ma cui, abinaja Jesús a cuu mö feduoma. —Yai Bada etä ʘ jiliaöje däjä, tä ʘ juaö lä showadao wejei bä lä cui, öjö iba nayä cäbä, iba mashi öjö bä çai li showawä —Jesús a cuma.

22'Äi däjä, canawä a jamö, Jesúsno bä lä nocamabono wei, cama sho bä bluca döcäcäobaliyoma. Abinaja Jesús e cuma. —Modu ai u mashi jamö, bamacö da bucaduo —e cuma. Einaja a fa cunö, bä befi çai caläa showalayofälöma.

23'Bä befi çai caläfälöbä jamö, Jesús a mialiyoma. Öjö däjä, wadoli a lojode juu fa showadaimanö, mau u bada lä shäyäjou wei ubä fe fa lajoblalunö, bä mishi mini dubaliyoma.

24'A jushulajenö abinaja a nowa tamaje. —¡Tä ʘ wäyäle! ¡Yamalecö da bayeliblalö! ¡Bamacö mishi duo a lä cube! Öjö däjä, a fa jocädalunö, wadoli a wasöa showadalema, u çai bada lä shäyäjono wei u çai. Öjö a wänö wadoli a çai mladou fa showadalonö, tä bluca ononodou showadalayoma.

- 25** Cama ebä nija abinaja a cuma. —¿Wedi tä tabä wamale nofi li mölaboimi dicoo? — a cuma. Bä quilima. Bä bufi shädayaimou ja, bä wəliyoma. —¿Ei wedi bei a li dodijiwä? Wadoli a bada ma cui, mau u bada lä shäyäjou wei u ma cui, cama a wəñö tabä nofi mladou si ijejewä yai —bä cuma.
- 26** Öjö däjä, Jelasateli bä ulifibö jamö, bä befi çai waloquema, Calilea tä mashi jamö.
- 27** Jesús a fa washölöblalunö, öjöteli a lä feculaböono wei anö a mö bamaleyoluma. Yedu ja camishi bä joyaa fa showadaacönö, a didionomi. Yafi jamö mlai, nomawä tabä didiblaaö lä yaimou wejei jamö, a li bälöoma.
- 28** Jesús a fa dalalönö, a şilalamoma. Öjö a cotä ja a möfe boblaquema, a nofi ojode tablamobä. İcali a wə faö ja, abinaja e cuma. —¿Jesús! Yai Bada a Bada lä ayai bä İjilubö wa e lä cui, ¿wedinaja wale nia fa taamanö wale nabä li waloo cuboyoi? ¿Wale a da jililä! ¿Wale nö bleaamaö showadao dijä! —a cuma.
- 29** Fecula a lä didile a faö çofälöbä, Jesúsno a shömaö waiquia yalo, e a çuoma. ¿Öjö tawä? Feculanö a shi fa wəlimälönö, showadi a nö bleaamadima. A shi wəlii däjä a nö quiliaö ja, bei bococu ma cui, bei matacö ma cui, a showadi çocabomaje, boo shicö bada cofibönö. Öjö ma cui, shicö bada jifediblaö fe fa yadilonö, ulifi bloque jamö feculanö a çai juaadima.
- 30** Öjö däjä, Jesúsno a wəfa wəlima. —Yajalawä ya wəfa cua —e cuma. Fecula bluca bä taboma yalo, a wə çuoma.
- 31** Jesús nija fecula bä a fe blacäjoma. Abinaja bä cuma. —Täca nö quilijiwä lä cubodi jamö, ¿yamacö shöma dijä!—bä cuma.
- 32** Bei. Öjamö yalo coshino bluca bä iyama, öjö jefu a balöcö showawä jamö. ¿Öjö tawä? Jesús nija fecula bä a fe blacäjou ja, coshino bä nijamö bä shömamou fa bufinö, öjamö bä shömöa yacläquema.
- 33** Öjö däjä, a shi lä wəlıno wei a fa dacöfälöjenö, coshino bä nija fecula bä bluca lucäa nomöjölaliyoma. Bä fa lucäolalunö, tä mö wädäjäa lä dodijibe jamö, bä shi jaliwä çai fa yəbalufälönö, modu u jamö bä mishi bluca duobaliyoma.
- 34** Coshino bä nofi lä tabou wejei bä lä cuinö, öjö tä fa dalalöjenö, bä quilili doculayoma. Shabono jamö bä lä bälöle bä ma cui nija, bä bälöo lä siboblai bä ma cui nija, tä afa wäyäo cuaamaje.
- 35** Tä a fa jililäjenö, öjamö bä bluca icua showadaquema, tä möbeje. Jesús nija bä fa waloicunö, fecula bänö a lä daqueno wejei, a dodijidawä dalalemaje. Jesús a cotä jamö a bufi demi çai looma. Camishi cäcö ja a didioma. Öjö tä bluca fa dalalöjenö, bä quilia fe balojolaliyoma.
- 36** Öjö däjä, bä mamö lä showaono wei bä lä cuinö tä afa bluca wäyämaje, a lä feculaböono wei a lä jalomaleno wei tä a lä cui.

37 Öjö dāja, öjamö bä lä bälöblai bä nö quilili bleaama yalo, Jesús a shömöa çolemaje. A shömaöje ja, canawä a jamö cama ebä çai döcäcäo çobaliyoma, bä befi çai caläo çofälöbä.

38 Fecula bänö a lä daqueno wejei a lä cui, Jesús nija a noca bufi fa doblaonö, a wə fe blacäjoma ma cui, Jesúsno a shömöa çolema. Abinaja e cuma.

39—Ma, a çojamö da ço. Yai Bada tänö wa bayelibläö lä dodijilofe, afä bä nija tä ʔfa shino da wäyäjälu —a cuma. Inaja a cuma yalo, a ço fa showadalufälönö, öjamö bä lä bälöle bä bluca nija, Jesúsno a bayelibläö lä dodijilayono wei, bei tä ʔfa wäyäo cuaaö showaoma.

40 Bei. Modu ai u mashi jamö Jesús a waloa fa çocunö, bä lä çocamono wei bänö a nö dabomaje yalo, bä bufi doblalanö a walomaquemaje.

41 Öjö bä nijamö, Jailo a wəfa bada lä cuono wei a cuoma, judio bä yododabä yafi jamö a lä läono wei. Öjö a fa icuicunö, Jesús a cotä jamö a möfe boaliyoma. Cama e yafi jamö Jesús a lulubou shi jalimou cudeenö, a wə fe blacäjoma.

42 Cama bä tää moli e lä cui, e fa jalililalunö e nomaö ajedeoma. Lasha jai 12 a faa waiquimalema, a moco cuoma. Jailo nija Jesús a fa nocalofälönö, täbä mashicou fe fa balojoonö a bacäjamamaje.

43 A bacäjamafälöbeje jamö, suwä a nö jalili bleaaö nö lä dedeano wei a juu coyocooma. A nö iyä bleaaö showai ja, lasha 12 a faa waiquimalema. Bluca bä nija a jalomamou ma wabäono wei ma cui, a jalomaö doblonomije.

44 ¿Öjö tawä? Jesús nija a yauaö ajedou juofälöma. A ajedou fa juofälönö, Jesús camishi ecö casö jubäa fe yadia yaulalema. Ecö casö fa jubädalönö, a iyä mladou showadalayoma.

45 Öjö dāja, abinaja Jesús a cuma. —¿Wedinö bei wale jubädalei cufe? —a cuma. —Camiyänö mlai —ebä bluca cuma. Öjö dāja, Pedro a wə fama. —Bada tä. Täbä malä mashicole. Bluca bänö wa malä bacäjamalajei.

46 Öjö ma cui, Jesús a wə fe blacäjoma. —A nia fa bayeliblamonö, ai tänö wale jubäa cadidilalei lä cufe. Camiyä ya lojodenö a jalou ja, wale nofi mojudubobä tä cua malä mlai —a cuma.

47 Öjö dāja, “Ya lä jubälöfe, tä jöyaami waiquiwä”, a suwä bufi fa cunö, a wawäblaliyoma. A quilili blösö blösömolanö a ajedequema. Jesús cotä jamö a möfe fa deialunö, bluca täbä mamö mötale dāja, a wə nö wäquema. A jalobä a jubädaö bufi lä doblaono wei tä ma cui, a jaloa lä showadaaliyono wei tä ma cui, öjö tä ʔfa bluca wäa showadaquema.

48 Abinaja Jesús e cuma. —Ami. Camiyä wale nofi mölaboma yalo, wa jalolayou lä cufe. A bufi yanöcöwä çai da çojamö —a cuma.

⁴⁹A wə faö showao dǎjä, bada e yafi jamö ai e cuo lä jäono wei e waloa mö baquema. Jailo a bada nija abinaja a cuma. —Bei. Inaja lä waiquiwä. Tääfä a waicou waiquio cublei. Tä ʔ lä wäyää wei a yabäcaö fe blacäjo dijä —a cuma.

⁵⁰Öjö ma cui, Jesúsno öjö tä ʔ fa jililänö, abinaja Jailo a nowa tadaö showalayoma. —A bufi jalujo dijä. Wale ʔ bejedi shino bufibou fe da yadio. Öjö dǎjä, a jalou wä —a nowa tama.

⁵¹Jailo e yafi jamö, Jesúsno bä çai fa waloicunö, moco a nomawä lä maqueono wei jamö, ai bä bluca famanomi. Pedro, Juan, Santiago, öjö bä shino famalema. A lä nomalayono wei bä föö e, bä nöö e, öjö cäcöbö çai shino famalema.

⁵²Öjö tawä? Bä öcöo waiquioma. A nomöa bluca bomaje. Öjö ma cui, abinaja Jesúsno bä nowa tama. —Bä öcö dijä. Wama a moco nomöa lä bole a nomaö cadidio malä mlai. A mia bädaa lä cule —bä nowa tama.

⁵³A lä nomalayono wei tä daö waiquiweje yalo, a noca çablalamaje.

⁵⁴Öjö ma cui, Jesúsno boco fa dälänö, a jocäblamaö bufima. —Uasi. A da jocäblalu —e cuma.

⁵⁵Inaja e fa cunö, a bufi jomoblou çolayoma. A jocädou fa showadalonö, Jesúsno a iyamaö bufii showadaoma.

⁵⁶Bä föö e ma cui, bä nöö e ma cui, cäcöbö bufi shädayaimou dodijjioma. Öjö ma cui, Jesús a lä cuaano wei tä ʔ wäyää mlaobä, cäcöbö ʔ çai wasöa dodijilema.

San Lucas 9

¹Öjö dǎjä, cama 12 ebä lä nocamabono wei bä lä cui, Jesúsno bä naca fa ajedealälönö, fecula bä bluca yashubeje bä tablamalema. Jalili bä jalomabeje bä çai tablamaö mö fedua showalayoma.

²Öjö dǎjä, Yai Bada tänö cama ebä çai lä cuo wei tä ʔ wäyää cuaabeje bä shömölema, bä lä jalili wei bä çai jalomaö cuaaö showadaobeje.

³Abinaja bä nowa tama. —Wamacö lä jublole dǎjä, shinoco wamacö nia juu. Fii wama defibä nia bofälöimi. Wama täbä didibofälöbä, wama täbä nia däboimi. Wamacö iyafälöbä, nii wama bä nia yefiboimi. Wama täbä lulafälöbä, wama bä nia blada boimi. Camishi wama bä nia bolacafälöimi.

⁴Wamacö shifilimou mlai, wamacö nia lä cuo wei a yafi ja, bä da yanöcöicu. Wamacö juu çofälöö ja, öjamö lä culanö wamacö nia jocäo ço.

⁵Öjö tawä? —a cuma—. Wamacö juu lä cuaaimadi jamö, wamacö bälömabou bufiomije ja, abinaja wamacö nia cuaaö. Öjö wama bä tabi feiaö yalo wamacö sibolanö, bei wamacö mamicö busi jamö bä libu libu lä sudile, wama ebä nia yaösöblalefälöö. Öjö tänö bä nö nia lä bleaaö wei wama tä nia jömaö —a cuma.

⁶Bä aa fa showalöfälönö, bluca täbä shabonobö jamö, Yai Bada tänö cama ebä çai lä cuo wei tä ʔ wäyää cuaamaje. Jalili bä çai jalomaö cuaaö showaomaje.

⁷Jesús a lä cuaano wei, bada tä Elode ma cuinö tä ʔ jililema. Ai bä ʔ ja, a bufi ʔai wedinajamoma. Fe ojomalewä Juan a ma shämono wei ma cui, ʔjö a fa bufijenö, a wä demi täo ʔomaje.

⁸Ai bä mö feduwä lä cuinö, Yai Bada a wäno jaba lä wäyano wei, Elia a bufidaö mö fedulayomaje. Ai bä showawä lä cui, abinaja bä bufi cuma. “Yai Bada a wäno wäyälewä bä jaba lä cuono wei, ai a demi jocädou fa ʔonö, ʔjö a jowa”, bä bufi cuu mö feduoma.

⁹Abinaja Elode a cuma. —Camiyänö Juan ya fe bäblamalema. Ei a wäfa bluca lä wäyälajei, ʔwedi bei a jowa li majöwä? —a cuma. Inaja a bufi cuma yalo, Jesús a möö bufi doblaoma.

¹⁰Jesúsno bä lä shömöleno wei bä ʔoblou fa ʔolonö, bä lä cuaano wei tä ʔafa bluca wäyää ʔojolomaje. ʔjö däjä, Besaidateli bä ulifibö jamö bä yamili cuo balöobä, bä lululefälöma.

¹¹ʔjö ma cui, bä lä ʔocamono wei bänö, ʔjamö bä ʔafa juu fa jililäjenö, a nosi däbofälömaje. Jesús nijamö bä waloa fa jeicunö, bä dodijidawä walomaquema. ʔjö däjä, Yai Bada tänö cama ebä ʔai lä cuo wei tä ʔ ja, bä bluca yömölama. Bä lä jaliliono wei bä ʔai jalomama.

¹²Motoca a yajadodoaö däjä, Jesús nija cama 12 ebä fa icuicunö, abinaja a nowa tamaje. —Fei bä bluca lä ʔocamole bä shömöa da ʔolu, bä bälöblawä fe lä fayoblai bä nija bä cuo fe jalubä. ʔjö bä nija bä nii luluabeje. ʔjö tawä? Ei tä ulifi bloque malä cui —a nowa tamaje.

¹³ʔjö ma cui, Jesús a wä läoma. —Ma. Cafä wamacönö wama bä yai iyamabä. Abinaja cama bä cuu nomöjöoma. —Nii yama bä bluca luluadayou mlao däjä, ei yama bä bluca nia lä iyamaö wei tä cuami waiquiwä. Nii 5 yama bä wai tabou bädaa lä cule. Yuli bolacabö cäcö ʔai —bä cuma.

¹⁴ʔjö tawä? Täbä malä blucaono wei. Wälo bä shino jai 5.000 cuoma. Cama ebä lä nocamabono wei bä nija bä loo toujamaö bufima. —Jai 50 täbä bluca cudale, bä da loamaboduje —a cuma.

¹⁵Inaja bä cuaaö fa showadaonö, bä bluca loamabodayomaje.

¹⁶ʔjö däjä, nii 5 bä lä cuono wei bä dälema, yuli bolacabö cäcö ʔai. ʔjö bä fa dälönö, fedu jamö a mö fa nonoicunö, bä nia lä iyano wei tä ja, Yai Bada nija a bufi ʔafa doblalou wäyämoma. ʔjö däjä, bä nii fa cälalönö, cama ebä lä nocamabono wei bä nija bä jöböquema, bä lä ʔocamono wei bä nija bä jöböaö cuaaö nomöjöobeje.

¹⁷ʔjö tawä? Bä bluca fa iyaolalunö, bä bädöolaliyoma. ʔjö däjä, Jesús ebä lä cuinö bä nii sheje ʔa fa ʔabodujenö, wöö 12 bä jamö bä fe nii shee lajomalalemaje.

¹⁸Ai däjä, Yai Bada nija Jesús a no bayeli nacao däjä, cama ebä lä nocamabono wei ebä ʔai yami culanö, bä wälima. —ʔWedinaja bei wale nofi jowa yai li tabou dodijiaje? Camiyä ʔwedi bei ya jowa?

- 19** Abinaja ebä cuma. —Fe ojomalewä Juan bei wa jowa fa talei. Ai bä mö feduwä lä cuinö, Yai Bada a wano wäyälwä Elia a cuo lä balöono wei, öjö wa jowa bufidaö talajei. Ai bä a showawä ja, Yai Bada a wano wäyälwä ai a demi jocädou fa çolonö, öjö bei wa jowa çodawä fa talei —bä cuma.
- 20** Abinaja e cuma. —Öjö ma cui, cafä wamacö lä cuinö, ¿wedinaja bei wamale nofi li tabou dodijia cule?—a cuma. Pedro a wä juoma. —Yai Bada tänö a shömabä a lä yaileno wei, öjö cafä bei wa dodijiwä —bei e cuma.
- 21** Öjö ma cui, bä lä nocamabono wei bä a wasöma. Bä nowa taö dodijioma, tä a wäyäö showadao mlaobeje.
- 22** Abinaja bä nowa tama. —Camiyä ya lä yanowamöblaleyoluno wei ya lä cui, wale nö nia bleaamaöje. Judio bada bä ma cuinö, nofi bäyälwä blowäjäwä bä ma cuinö, Moisesi tä a ja täbä lä damaö wejei bä ma cuinö, öjö bänö wale nö nia bleaamaö fe balooje. Wale nia waiije. Ya nia shämou cadidio. Inaja ya taamamobä ya waiquiwä. Öjö ma cui, bolacabö tä mö fa dödölönö, ya demi nia jocädou ço —bä nowa tama.
- 23** Öjö däjä, abinaja bä nowa bluca tama. —Camiyä nija bä nia lä nocaö wei bä lä cui, cama bä cuaaö bufi lä doblao wei tä ja, showadi bä nia yai wasöo. Wale bufiije yalo bä ma shäöje däjä, bä nia ojode cudio fe yadio. Bä nia nocaö fe yadio.
- 24** Bitä ja bä nia demi lä cudio wei tä ja, bä bufi mö lä blucao wei bä lä cui, bä balimi nia cuodayou malä mlai. Öjö ma cui, camiyä ya nowa ja bä shämou lä ojodao wei bä lä cui, öjö bä nia shino balimi cuo ayao.
- 25** Bitä jamö bä madofi bluca lä cublai bä madofi ma däamou wei ma cui, bä nia yai lä balimiblou wei tä joyamou dicoo ja, ¿wedi tänö bä yai nia li bayeliblamou majöo, öjö lä?
- 26** ¿Öjö tawä? —a cuma—. Iba bä afa jilamou quili dicoo ja, inaja showawä camiyä ya nia quili cuo mö feduo. Wale afa çai wäyäö quili dicoo ja, inaja showawä camiyä ya lä yanowamöblaleyoluno wei ya ma cui, ya nia quili cuo mö feduo. Ya shi çai itou lä çole däjä, camiyä ma cui, “Iba cäbä”, ya nia cuu quili, Fayä etä shi lä cule jamö ajele ya etäbä çai itou däjä.
- 27** Öjö ma cui, cafä wamacö nija ei ya wä lä cui, bejedi lä ya wä. Ai wamacö lä ublale wamacö nomaö showaono mlai ja, Yai Bada tänö cama ebä nia çai lä cuo wei, wama tä nia dablao.
- 28** Öjö tä a wäyäö fa balöonö, jai 8 tä mö didi cublou fa çolonö, Jesúsno cama ai ebä nacalema. Pedro, Juan, Santiago bä fa nacalänö, jefu a jamö bä çai dolequebefälöma, Yai Bada nija a nö bayeli nacaojolayobä.
- 29** A nö bayeli nacao däjä, Jesús wäyäcu mömou shomiblaliyoma. Camishi ecö ma cui, ecö shi çai wacalamiblaliyoma.
- 30** Öjö däjä, ai täcöbö fa bädalunö, Jesús sho bä a wayoma. Moisesi, Elia sho cäcöbö cuoma.

- 31**Yai Bada tä shiji lä cule ja cäcöbö fa wawäblalunö, Jesús a nia lä shämono wei tä äfa wayoamaje. Jelusale jamö Yai Bada tänö a shämaö lä bufino weinaja showawä.
- 32**¿Öjö tawä? Pedro sho bä lä cuono wei bä fa malishalönö, bä ma miqueno wei ma cui, bä äa fa çolunö, Jesús etä shiji lä doblale etä shiji dalalemaje. Jesús nija cäcöbö ublaa lä yädäono wei, cäcöbö çai daa showadaalalemaje.
- 33**Öjö däjä, Jesús nija Moisesi, Elia sho cäcöbö mladou çofälöö däjä, Pedro a wä fama. —Tä ä wäyäle. Eja bämacö lä cule, tä dodijidawä waiquiwä. Yano 3 yama bä nia wai itamaö, ¿jö tawä? Afä a, Moisesi e, Elia e, einaja yama bä nia wai yano tablaö, ¿jö tawä? —a cuma. A bufi mlaö yalo, a wä biyäcou bädaoma.
- 34**A wä faö showai ja, öläjashi a bada fa itolunö, bä jöyablalema. Öjamö bä fe fayoblou ja, bä quililaliyoma.
- 35**Öjö däjä, öläjashi jamö culanö a wä bädaliyoma. —Ei Ijiluyä a, ya lä yaileno wei. A wä da jililäje —a cuma.
- 36**A wä faö fa waiquidalunö, Jesús a yami ublaa daa ça majölalemaje. ¿Öjö tawä? Mamicaï bä cudio balöoma. Tä lä möno wejei tä lä cui, moli a ma cui nija tä äfa wäaö jaöonomije.
- 37**Öjö tä fena ja, jefu a jamö bä dömöa fa çöbalufälönö, bä bluca lä çocamono wei bänö Jesús a mö bamalemaje.
- 38**Bä lä çocamono wei bä nija ai a wälo lä ublaono wei, Jesús nija a wä çali fama. —¿Tä ä wäyäle! Ei iba ijiluyä a nofi da ojadadalö, ¿jö tawä? A malä moli wei.
- 39**Fecula anö a nabä fa queicunö, a şilalamou. A shi fa wälimalönö, a çali yabolemou. Inaja a fa cuadinö, showadi caficö moshi boyacaoblou. Yaçumö a nö shälebö. A yabäcaö mladoimi.
- 40**Afä wa bä lä nocamabole bä nija ya wä fe blacäjoma ma cui, a yashublaö doblonomije —a cuma.
- 41**Abinaja Jesús e cuma. —¿Uo! Äyämö ya nö dedeaö ma waiquile, Yai Bada wama tä nofi nö mölabobimi waiquiwä. Bejedi lä, wamacö dobloimi. Wama tä nofi mölabou shaliliobä bämacö nö dabou ja, ya modaaö waiquiwä. Bei. Bä ijilubö e da bälabayaöje —e cuma.
- 42**Bä ijilubö e blacäö däjä, feculanö a fa shäyäblacönö, a çali yabolemolayoma. Öjö ma cui, Jesúsno fecula e bälöo fa wasönö, e faa ça showadalayofälöma. A fiya fa jalomalönö, bä föö nija a demi icua çomaquema.
- 43**Yai Bada a nö Bada lojode lä quiliaö wei tä fa damolalunö, bä bufi bluca shädayaimoa fe balojolayoma.
- 44**—Ei ya wä lä fale, wamale ä jiliaö buo mlai ja, bei wamacö bufinö tä ä yai däa da cadidilöje. Ya lä yanowamöblaleyoluno wei ya lä cui, yanowamö täbä nija ya nia jöböamou —a cuma.

- 45 Öjö ma cui, cama a wafa lä wäamono wei a wä jilia möblanomije. Yai Bada tänö tä a nofi mojudumaboma, bä bufi jaducublou mlaobä. Tä a çai wälili quilimaje.
- 46 Jesús nija bä lä nocaono wei, “Camiyä ya yai bada cuobä”, bä nowa bluca tayou ja, bä afa tayoa dicolayoma.
- 47 Jesúsno bä bufi daö fa waiquionö, ijilu a fa dälänö, a ublaa ajedemaquema.
- 48 Öjö däjä, abinaja bä nowa tama. —Ei ijilu a lä cui, a shomi ma cui, camiyä ya wano a wai nofimaö fe yadioje ja, camiyä ma cui wale nofimaö mö feduoje. Inaja showawä, camiyä wale nofimaöje ja, wale lä shömöleno wei a ma cui, öjö a nofimaö mö feduo showaoje. ¿Öjö tawä? Cafä wamacö nijamö a jömöo lä mlai a lä cui, a nofi bada tabou lä mlajei, öjö a lä cui, Yai Bada tänö bada bei a nofi shino yai tabou.
- 49 Jesús nija Juan a wä fama. —Bada tä. Ai a lä cuinö, cafä wa wä ja fecula bä yashuu. Yama a dalalema. Camiyä bamacö nija a yädaö bufiomi yalo, yama a wasöblalema, ¿öjö tawä?
- 50 Öjö ma cui, abinaja Jesúsno a nowa tama. —A wasö dijejä. Cafä wamacö nija bä a läblou dao lä mlai bä lä cui, wamacö a bayeliblebeje bä li waiquiwä malä cui—a cuma.
- 51 Fedu jamö Jesús a nia lä çamou wei etä ajedou waiquioma yalo, a bufi cadidilanö Jelusale jamö a aa shalililayoma.
- 52 Cama a wano taö balöodayobeje, bä shömöa balölema. Samalia tä ulifi jamö, ai bä shabonobö jamö bä fa waloicunö, Jesús dodijidawä a waloamabeje bä a faö balöodayoma.
- 53 Öjö ma cui, Jelusale jamö a cadidou waiquioma yalo, a bälömabou bufionomije.
- 54 Öjö tä fa dabölalönö, Jesúsno bä lä nocamabono wei ai cäcöbö a fama, Santiago, Juan cäcöbö lä cui. Abinaja Jesús a nowa taböma. —Bada tä. Fedu jamö cowa wacö lä culadi, ¿yama wacöbä blälämabä tawä? Ei bä waicaö showadaobä —a nowa taböma.
- 55 Öjö ma cui, Jesús a mö fa yabadalunö cäcöbö a wasölema.
- 56 Bä jayuaö fa showadaicufälönö, ai a shabono jamö bä waloa majöquema.
- 57 Bä jufälöbä jamö, Jesús nija abinaja ai a cuma. —Wa juu lä bädao wei jamö ma cui, öjamö ya nia nocaö —a cuma.
- 58 Abinaja Jesús e cuu mö feduoma. —A möla dijä, ya yafibö cuami. Yalo bä bäcabö cublawä. Biyomö bä ma cui, bä yabäcabö cublawä mö feduwä. Öjö ma cui, camiyä ya lä yanowamöblaleyoluno wei ya lä cui, ya yanobö cuami —e cuma.
- 59 Ai a nija abinaja Jesús a cuma. —Camiyä nija a da nocaiquiyo —a cuma. Öjö ma cui, abinaja a cuu mö feduoma. —Bada tä. Fayä a lä ujudule etä cublou däjä, ya nomawä didiaö balöobä, ¿öjö tawä? —a cuma.

⁶⁰Öjö ma cui, abinaja Jesúsno a nowa tama. —Bufi nomawä cama bä li nomawä didiayobä. Cafä a da alufälö. Yai Bada tänö cama ebä çai lä cuo wei tä a da wäyädu —a nowa tama.

⁶¹Abinaja ai a çai cuma. —Bada tä. ;Camiyä çai! Cafä nija ya nia nocao. Iba yafi jamö, ya nia lä juu wei ya tä afa wäyäö balöojolayou —a cuma.

⁶²Abinaja Jesúsno a nowa tama. —Ficali täca jamö a nia ma ojodamou wei ma cui, a bufi shaliliomi dicowä ja, a nia dabloimi. Inaja bä bufi lä jujebloyou wei bä lä cui, Yai Bada tänö cama ebä çai nia lä cuo wei tä a wäyäbeje jamö, öjö bä yädäobä bämi—a nowa tama.

San Lucas 10

¹Öjö tä cublou fa waiquilonö, Bada tä nia lä junou wei jamö a wano taö balöodayobeje, 70 ai bä yaia nomöjomaquema. Bluca bä lä bälöblai bä nijamö, cama a nia waloadalou lä cuaaö wei jamö, bolacabö bä cudawä bä shömöa balöabodayoma.

²Öjö däjä, öjö bä nija abinaja a cuu yaclämoma. —Wale nia lä bufiblaö wejei bä bluca cublawä. Nii bä tamobä bä bada lä waiquiinaja bä cuwä ma cui, bä nii nia lä taö wejei, bä bolacami dicowä. Wale nofi mölabobeje, ;wedi bänö bä nia li yömöläöje? Yai Bada tä nija bä a da fa, öjö lä. Cama etäca ficali lä cule, a Bada lä cui nija wamacö a fa fanö, bä ojodamobä öjönö bä yai shömabä.

³Bei —a cuma—. Bä da alufälö. Bamacö shömaö lä cule. Jjima bä waiteli lä läle jamö, oweja bä ocalo shäablamou si ijejewä lä cuo weinaja, wamacö nia cuo.

⁴Blada wama bä nia besiboimi. Afä wama täbä didibofälöbä tä ma cui, öjö wama täbä çai nia däafälöimi. Wamacö mamicö didio nomöjöobä täcö ma cui, wama täcö nia bolacafälöimi. Bei yo jamö, wama bä a wayomaö mlai, wamacö nia jayuo showadao.

⁵Wamacö yafii cuaabä jamö, Yai Bada nija, öjamö bä lä bälöle wama bä nia bayelimaö showadao, bä bufi çai yanöcöwä cuobä —a cuma—.

⁶Öjamö bä çai lä culenö dodijidawä wamacö waloamaö ja, Yai Bada tänö a bufi nia yai yanöcomabou. Öjö ma cui, dodijidawä wamacö waloamaimi dicoo ja, a nia bayeliblamoimi. A bufi yanöcomabobä ami.

⁷Wamacö shifilimou mlai ja, wamacö lä cuo wei jamö bä da yanöcöicu, öjö bä nija wamacö nö liyobä. ;Öjö tawä? Shinoco täbä ma juu wei ma cui, bä ojodamou yalo, bä dobäbeje bä li waiquiwä malä cui. Ai täbä yafibö jamö, wamacö nia bälöadalou cuaimi.

⁸Wamacö juu cuaabä jamö, ai a shabono jamö dodijidawä wamacö waloamaöje ja, öjamö wamacö niibö lä baaö wejei bä ja, bä da iya —a cuma—.

⁹Öjamö bä lä jalili wei bä da jalomaje. Abinaja bä nowa da taje. “Yai Bada tänö cama ebä nia çai lä cuo wei, cafä wamacö nija tä ajedou waiquia”, wama bä nowa tabä.

10' ¿Öjö tawä? Öjö ma cui, ai a shabono jamö dodijidawä wamacö waloamaimije ja, cama bä lä juu wei jamö, wawadowä wama bä nowa taö ja, abinaja wamacö nia cuu.

11“Afä shabono jamö bä libu libu lä jilai, bei yamacö mamicö jamö bä lä jeicufe, yama bä yaösöblaö lä cule, bämacö dobroimi jömabä. Öjö ma cui, wamalecö ʘ da jililä. Yai Bada tänö cama ebä çai nia lä cuo wei, tä ajedou waiquia lä cule”, wamacö nia cuu. Einaja wama bä nowa taö fe yadiobä.

12'Bämacö nowa taö lä cule —a cuma—. Yai Bada tänö täbä jömabä etä cublou däjä, Sodomateli bä nö nia ma bleaaö wei ma cui, öjö lä bä nö nia shino yai bleaaö dodijio —Jesús a cuma.

13Öjö däjä, Jesúsnö ai bä lä bälöblai bä nowa blajawä tama. —Colasiniteli wamacö, Besaidateli wamacö, wamacö nö bleaaö fe balojobä wamacö. Yai Bada wama a lojode dablabä, cafä wamacö nijamö tä nö lä quilijii bluca ya tä wawämama. Diloteli bä nijamö inaja ya cuaaö mö feduo fa cunoja, Sidonoteli bä nijamö ya inaja cuaaö mö feduo fa cunoja, wälidiwä tä ja, yedu bä bufi nö lädaliobö wei. Bä doblou lä mlai tä ja, yubu ushibö ja yedu bä nö looqebö wei. Camishi ʘloqui bä ja yedu bä nö didiobö wei, bä bufi nö wälidiwä öjöböamobä.

14'Yai Bada tänö täbä obi nia lä jömadayou wei jamö, Diloteli bä nö nia ma bleaaö wei ma cui, Sidonoteli bä nö çai nia ma bleaaö wei ma cui, cafä bei wamacö nö nia shino yai bleaaö fe balojoo.

15'Cabenaoteli wamacö —a cuu nomöjööma—. ¿Fedu jamö Yai Bada tänö cafä dodijidawä wamacö nia tabodayou daanö? Mlaicätä. Bä lä nomaö wei bä cuobä jamö, wamacö nia shäyjäabodayou, täca nö quiliwä lä cubodi jamö —a cuma.

16Öjö däjä, abinaja Jesús a cuma, cama ebä lä nocamabono wei bä nija. —Cafä wamacö ʘ jiliaöje ja, camiyä ma cui wale ʘ jiliaö mö feduoje. Wamacö ʘ waii dicooje ja, camiyä ma cui wale ʘ waii mö feduoje. Inaja showawä, camiyä wale ʘ lä waii wejei bä lä cuinö, wale lä shömöleno wei a ma cui, öjö a wä waii mö feduoje —a cuma.

17Jesúsnö 70 ebä lä shömöleno wei bä lä cui, bufi doblalolanö bä waloa coquema. Abinaja Jesús nija bä cuu çojoloma. —Bada tä. Cafä wa wänö fecula yama bä yashublamaö däjä, öjö bä ma cuinö yamalecö ʘ juaöje —bä cuma.

18Abinaja Jesús a cuu nomöjööma. —Bejedi lä. Sadanasi a lä ujudulayono wei däjä, fedu jamö ya quei dalalema, madula a wacö quei lä culenaja showawä.

19¿Öjö tawä? Wamacö nö wälojabä, bämacö tablamaö waiquilayoma. Olu wama bä ma cadädäablaö wei ma cui, sufi wama bä ma cadädäablaö wei ma cui, wamacö nö nia bleaaimi. A nö lä nabämou wei a fecula bada lä cui, öjö a ma ishau däjä ma cui, wamacö nö nia wälojaö fe yadio. Ai tä bädawä ma cui ja, wamacö nia famiimi.

20Öjö ma cui, fecula bänö wamacö ʘ lä juaö wejei tä ja, bä bufi doblalo fe balojoo dijä. Fedu jamö, Yai Bada tänö wamacö ʘfa lä oniboladi tä ja, öjö tä ja bä bufi shino yai da doblalo —bä nowa tama.

- 21** Öjö dájä, Yai Bada tä Bufinö Jesús a bufi doblamabou fe fa balojoonö, bä Föo nija a wä fama. —Fabe. Fedu jamö ma cui, bita jamö ma cui, cafä lä wa shino Bada cua ayaa. Ei ya tä ʼä lä wäyāfe, bä bufi ʼafa moyawä lä taö wejei bä nija wa tä ʼä nofi mojudumabou. Bä bufi ʼafa dao lä taö wejei bä ma cui nija inaja showawä. Inaja öjö wa bä ma taamabou dájä ma cui, jai ijilu bä lä cule bä nija wa tä ʼä yai wawäblamalema. Awei, Fabe. No mlai ja inaja wa bä taamaö bufi malä doblaono wei.
- 22** ʼÖjö tawä? —a cuu nomöjöoma—. Jödödöwä täbä nija ya Bada läobä, Fayänö wale tablamalema. ʼÖjö tawä? Yanowamö täbänö wale daimije. Fayä a lä culadinö, bä Ijilubö ya e lä cui, wale shino daö ayawä. Inaja showawä, Fayä a daö ma mlajei ma cui, camiyä bä Ijilubö ya enö, ya shino daö ayawä. Fayä ya dablamaö bufi lä doblao wei bä lä cui nija ya fa damalalönö, öjö bä ma cuinö a daö mö feduaje —a cuma.
- 23** Öjö dájä, cama ebä lä nocamabono wei bä nija a mö fa yaiblalunö, wajado bä yömölama. —Cafä wamacö lä cuinö, ei dájä tä lä cuaale wama tä fa mönö, wamacö bufi yai möblou yalo, wamacö bufi yai doblalobä wamacö.
- 24** Bamacö nowa malä tale. Yai Bada a wāno wäyālewä bä cuo lä balöono wei bä bluca ma cuinö, bä bälöo lä dodijiono wei bä bada ma cuinö, fei dájä wama tä lä möö wei, tä möö bufi ma doblaono wejei ma cui, tä mönomije. Wama tä ʼä lä jiliaö wei, tä ʼä çai jiliaö bufi ma doblaono wejei ma cui, tä ʼä jilianomije —Jesús a cuma.
- 25** Öjö dájä, Moisesi tä ʼä yai lä daö wei ai a fa ublaiquiyonö, Jesús a wä bejedi wabama. —Tä ʼä wäyāle. ʼWedinaja ya yai fa cuanö, ya li bālimi bälöquedayou?
- 26** Abinaja Jesús e cuma. —Jao. Moisesi esibä oni jamö, ʼwedinaja tä ʼä oni cuu, öjö lä? ʼWedinaja bāmalecö taamabä tä ʼä li? Wa bufi lä cuu wei tä ʼä da wäba —a cuma.
- 27** Abinaja e cuu mö feduoma. —Abinaja tä ʼä oni cuu. Bada wama tä yai nia nofimaö, cafä wamacö nija a bufiblamobä a lä cui. Bufi jaduculanö wama a nia nofimaö, bei wamacö bufi yainö. Wamacö bufi lä cuaablalou wei tä ma cuinö, wamacö nö lä wālojoablalou wei tä ma cuinö, wama a nia çai nofimaö fe balojoö. Aifä bä ma cui, cafä wamacö nofi jolio lä culenaja, inaja showawä aifä wama bä nofi tabolanö, wama bä nia çai nofimaö. ʼEinaja tä ʼä oni cuu —Jesús nija a cuma.
- 28** —Jao. Wa wä cadidou —Jesús a cuma—. Inaja wa cuaaö ja, wa bālimi bälöaledayou —a nowa tama.
- 29** Öjö ma cui, dodijidawä a nia dablamous fe fa yadionö, abinaja a cuu dicooma. —Öjö ma cui, iba aiyä a jowa nofimamaö lä bufino wei, ʼwedi jamö bei a, ya nofimabä? —a cuma.
- 30** Jesús abinaja e cuma. —Wale ʼä da jililä, öjö lä, wa bufi jaducublobä. Jelusale jamö a culanö, Jelicoteli bä nijamö ai a alayoma. A jufälöö dájä, tomömolewä bänö a nabä quea mö baquemaje. Camishi ebä jayualalemaje. A famimaö fe fa balojoöjenö, shinoco a jalili daquefälömaje.
- 31** ʼÖjö tawä? Öjö dájä, a jalili blaobä yo jamö, nofi bāyālewä a juu fa bādaofälönö, a blaa dalalema. A dablao dájä, a jaloa dicoquefälöma.

- ³²Inaja showawä, öjamö Lewi nodiwä a juu fa jeimanö, a jalili daa nomöjöaleyoluma. A dablaö däjä, inaja showawä, a jaŋloa cua nomöjöquema.
- ³³Öjö ma cui, Samaliateli a juu fa nomöjöoimanö, a jalili blaobä jamö a waloa jää majöqueyoluma —a cuma—. A jalili dablaö däjä, shomiteli a ma cuinö a nofi ojadadaö showadalayoma.
- ³⁴A fa icuicunö, dabö dabö ubänö a jalili fälömaö fa showadaonö, nashiwä toubänö nini nini ebä fe lölalema. Acadafu cäcönö ebä ocaaquema. Öjö däjä, cama yalo e jüima jamö a maquequema. A befi çai fa lululäfälönö, fama bä waloblaabä yafi jamö a fa bälacönö, a bayeliblema.
- ³⁵Öjö tä fena ja, blada 2 cäcöbö fa dälönö, cama e yafi lä cui nija cäcöbö jöböquema. Abinaja a nowa tama. “Jalili a nofi taa da jäcö”, a nowa tama. “Wa bayeliblabä ai wa bä blada jöyao bädao ja, ya jayuaö çolanö ya tä nowa çamaö wä”, a nowa tama. ¿Öjö tawä?
- ³⁶Jaŋ —a cuma—. Fei däjä ¿cafä wedinaja wa bufi cuu? Tomömolewä bänö a nabä fa queicujenö, a famimalemaje. A jalili blaobä jamö 3 bä waloa jequema. ¿Wedi jamö a lä cuinö a nofi yai tadalema? —Jesús a cuma.
- ³⁷—A nofi lä ojadadaleño wei a lä cuinö —a cuma. —Inaja cafä wa çai cuaaö mö feduobä —Jesúsnö a nowa tama.
- ³⁸Jelusale jamö, Jesúsnö cama ebä çai juu çofälöbä jamö, ai a shabono jamö bä çai yafilayoma. Öjöteliyoma a Marta lä cuinö, cama e yafi jamö a nacaleta.
- ³⁹Bä fäähä María e afa lä culenö, Bada tä cotä jamö a fa loicunö, tä a lä wäyano wei tä a jüliama.
- ⁴⁰Öjö ma cui, fama bä nia fa iyamanö, nii bä ja Marta a li yabäcou dicooma. Jesús nija a fa icuicunö, abinaja a nowa tama. —Bada tä. Fäähäyänö wale daa fa dicocönö, yami ya ojadamou dicoa lä cule. “Inaja waiquiwä buo”, ¿bei wa bufi cuu daanö? Wale bayeliblamaö da bufi, öjö lä.
- ⁴¹Öjö ma cui, abinaja Bada tänö a nowa tama. —Ami, Marta. Wa bufi nofi jushublaa dicoa. Bluca täbä ja wa yabäcäablalou dicoa.
- ⁴²Tä yai lä dodijidai, moli tä cua. Maríanö öjö tä yaia waiquilema. Ya wä nia lämoimi —a cuma.

San Lucas 11

- ¹Ai däjä, Yai Bada nija Jesús a nö bayeli nacaoma. A wä faö waicou däjä, cama ai a lä nocamabono wei e a fama. —Bada tä. Yai Bada nija yamacö a fabä, tä a yai da wäba. Fe ojomalewä Juan a lä cuinö, cama ebä lä nocamabono wei bä nija, tä a wäa lä taqueno weinaja showawä —a cuma.

- ²Abinaja Jesúsnö bä nowa tama. —Yai Bada nija wamacö nö bayeli nacao ja, abinaja wamacö yai cubä. “Fabe, cafä wa wafa shino doblao wäyämöbä wa. Eja yamalecö çai bälöa da dodijiquiyo.
- ³Yamacö nia lä iyaö wei täbä ja, showadi yamalecö da dobä.
- ⁴Yamacö doblou lä mlai, tä nowa çai da mladamalö. Camiyä yamacö ma cuinö, yamalecö lä yabäcaö wejei bä nija yama tä nowa bluca malä mladamaö wei. Yamacö nö doblobö lä mlai jamö, yamalecö çai da wasö.” Einaja Yai Bada nija wamacö cubä —Jesúsnö bä nowa tama.
- ⁵Öjö däjä, abinaja Jesús a cuma. —Abinaja tä cuwä. Ai wa lä cui, wa lä nofimaö wei a lä cui nija wa nacou ja, bähäcuoladi wa aa jalulayou. ¿Öjö tawä? Wa ublaa sibolanö abinaja wa e cuu. “¡Nofi!” wa e cuu, “Iba nii 3 bä da majöba.
- ⁶Camiyä nija iba nofi a waloquei lä cufe. Ya niibö baabä tä cuami”, wa e cuu.
- ⁷Yafi ʘeshi jamö culanö a wə faö. “Wale yabäca dijä. Ya yoca laa waiquiquema. Ijiluyä bä sho yamacö mia waiquia lä cule. Bäfä dobäbä ya nö itoblobimi”, a nia cuu. ¿Öjö tawä?
- ⁸Öjö ma cui, abinaja bämacö nowa taö lä cule. Yaçumö a fa itoblalunö, wa nia dobäö fe yadio. Wa nofimaö cudeenö mlai. Quilii mlai ja wa nacodii cudeenö, a nia yaçumö jocäblou. Wa bä lä bufii wei bä nia bluca jöböaö.
- ⁹¿Öjö tawä? —Jesús a cuma—. Bämacö nowa taö lä cule. Yai Bada nija bä da naco, wamacö dobäö cuquei. Dodijidawä tä da dayäaje, wama tä dablaö weicätä. Bei yoca da cloocaje, yoca caloblaö wä. ¿Öjö tawä?
- ¹⁰Bä bluca lä nacou wei bä lä cui, bä malä dobämou wei. Inaja showawä, tä dodijidawä lä dayäaö wejei bä nija tä dodijidawä dablamous. Bei yoca lä cloocaö wejei bä ma cui, öjö bä nija yoca caloblamou.
- ¹¹Cafä wamacö ijilubö lä cuinö, yuli a nacaöje ja, yuli mlai, çolu wama ecö nia jöböaö yacläo daanö? —a cuma—.
- ¹²Cadala nate nacaö ja, çsufi wama e nia jöböaö yacläo daanö?
- ¹³Wəlidawä talewä wamacö ma cui, dodijidawä ijilufä wama bä dobäö daö waiquiwä ja lä, Fayä fedu jamö a lä culadi, öjö bei a nia shino yai dodijaö fe balojoo. Cama Yai Bada tä Bufe lä nacaö wejei bä nija a Bufe jöbömoquei —Jesús a cuma.
- ¹⁴Ai däjä, Jesúsnö fecula a yashuma. A lä feculaböono wei a lä cui, fecula anö aca fa bolebömalönö, a wə faö doblonomi. Öjö ma cui, fecula e fa yashulunö, aca lä boleböono wei a wə faö liyäjäblou çolayoma. Bä lä çocamono wei bä bufi bluca shadayaimoma.
- ¹⁵Öjö ma cui, abinaja ai bä cuma. —Fecula bada Sadanasi tä lojodenö bä li fecula yashuu —bä cuma.

- 16Ai bä mö feduwä lä cuinö Jesúsi a wə nia bejedi fa wabajenö, abinaja bä cuma. —Yai Bada wa e nö öjöböamobä, tä nö lä quilijii tä da wawämalö —bä cuma.
- 17Öjö ma cui, Jesúsnö bä bufi daö fa waiquionö, abinaja bä nowa tama. —Bä bälöa lä yaile bä nofi wəliayou ja, bä bälöo dobroimi majöo. Cama bä mashi ma cui, inaja showawä, bä nofi wəliayou däjä bä nia bälöo lojodoo majöomi.
- 18Ma. Sadanasi ebä lä cui, cama bä nofi wəliayou dicolayou ja, ¿wedi jamö tänö bei ebä çai li lojodoo nomöjöquei? Sadanasi a lojodenö ya bä jəwa fecula yashublaö yalo ya wə.
- 19“Sadanasi a lojodenö bä li fecula yashublaö”, wamale nofi tabou ja lä, ¿inaja showawä afä wama bä nofi çai tabou da culanö, fecula bä lä yashuu wejei bä lä cui? Mlaicätä. Öjö cudeenö, inaja wamacö cuu dicoo ja, afä bä showawä lä cuinö wamacö jolemou jömaö cuqueije.
- 20Öjö ma cui, Yai Bada a lojodenö öjö ya bä li yai yashuu, Yai Bada tänö cama ebä çai lä cuo wei wama tä dablaö fe yadiobä.
- 21¿Öjö tawä? —a cuma—. A lä waiteli wei a lä cuinö, cama madofi ebä nofi läbou däjä, etäbä nia yabäcamoimi. A ishobä etä madofi çai läa ja, shomi täbä nia lucämaimi.
- 22Öjö ma cui, a nö yai lä wəlojaö weinö a nabä fa queicunö, a nö bleaamaö ayao. Öjö däjä, cama a nowamöobä etä nofi lä mölabou wei etä jucälei. Cama etäbä bluca lä tabou wei etäbä fa dälalönö, etäbä shedecaö. ¿Öjö tawä?
- 23Camiyä wale bayeliblaö lä mlai a lä cuinö, Sadanasi a li bayeliblaö waiquiwä. Iba ya bä çəbä jamö bä çəö mö feduo lä mlai a lä cuinö bä yai sheleleblamaö—a cuma.
- 24Abinaja Jesús a cuma. —Fecula a yashublamou däjä, a lä tabou wei a daquefälöö. Öjö däjä, tä ulifi bloque lä wejedi jamö a shoqueadii cuaaö bäa. A yanöcöobä tä ma dayäo wei ma cui, tä dablaimi. Öjö däjä, abinaja a fecula cuu. “Ya da dacöi nija ya yai nia bälöo çə”, a cuu.
- 25Öjö däjä, a lä daquefälöno wei a lä cui nija a waloo fa çəiquiyonö, yafi wawädowä a dalalei. A yafi dodijidablaö jälayoma.
- 26Öjö däjä, ai bä çəablaö aa fa çəlunö, 7 bä çai fecula waloo çəqueyoluu. Cama a wəlidiwä ma waiquii ma cui, bä yai wəlidiwä fe lä balojoi bä çai waloo majöqueyoluu. Öjö nija bä fa lucälönö, bä bälöaliyo. Bä lä tabou wei a lä cui, a nö jaba ma bleano wei ma cui, öjö lä däjä a nö yai bleaaö dodijiquei —a Jesús cuma.
- 27Jesúsnö öjö tä ə wäyäo showalanö, bä lä çəcamono wei jamö, a wə suwä icali fama. —Naafänö wa lä tablaleno wei a lä cui, wa lä shadimabono wei a lä cui, a bufi yai doblalobä a —a suwä cuma.
- 28Öjö ma cui, abinaja Jesús a cuma. —Ma. Yai Bada etä ə fa jəliajenö, tä ə nofi lä jaducubou wejei, öjö bä bufi shino yai doblalobä bä li —a cuma.

29Täbä lä çoçamono wei täbä mashicou showai ja, abinaja Jesús a cuma. —Wamacö fei däjä lä bälöblai wamacö dobroimi fe balojowä. Yai Bada ya e nö öjöböamobä, tä nö lä quilijii wama tä wawämaö bufi ma doblao wei ma cui, bamacö a nia juaimi. Wama tä nia lä möö wei, Jonasi a lä taamano weinaja, inaja tä cuwä wama tä shino nia dabläö.

30Ninibeteli bänö Yai Bada tä lojode dablabeje, Jonasi a cuma. Inaja showawä, cafä wamacö fei däjä lä bälöblai wamacö lä cuinö, Yai Bada wama a lojode dabläö nomöjöobä, ei cä ya, ya lä yanowamöblaleyoluno wei ya lä cui.

31’Wamacö fei däjä lä bälöblai wamacö jömadayobä jamö, Sabaateliyoma a bada bälöö lä dodijiono wei, a suwä nia çai ublao yädäo mö feduo —a cuma—. Öjö a ma cuinö wamacö nia dobroimi jömaö. Wamacö nia waimaö bufii. ¿Öjö tawä? Bada tä Salomo a wä jilibä, öjö a li suwä blajawä waloa fe malä yadiqueno wei. Salomo a bada ma cui, camiyä bei ya yai bada dodijiwä. Fei däjä, cafä wamacö nijamö camiyä ya yai cua ma cule, wamale a jiliblaimi.

32’Wamacö fei däjä lä bälöblai wamacö jömadayobä jamö, Ninibeteli bä nia çai ublao yädäo mö feduo. Öjö bä ma cuinö wamacö nia çai jömaöje —a cuma—. Wamacö çai nia waimaö bufiije. Jonasi nija Yai Bada etä a fa jiliblajenö, wäliwä tä ja bä bufi lädou malä showadalayono wei. ¿Öjö tawä? Jonasi a bada ma cui, camiyä bei ya yai bada dodijiwä. Fei däjä, cafä wamacö nijamö camiyä ya yai cua ma cule, wamale a jiliblaimi.

33Inaja Jesús a cuma. —Cowa wacö ömöamaöje daja, shomi jamö wacö jöyabou nomöjöomije. Wöö anö wacö fe nia çai yojobou majöomije. Ma, wacö itaobä jamö wacö yai itamabouje, öjö tä shininö, bä lä faö wei bänö wawädwä täbä dablabeje. ¿Öjö tawä?

34Cowa wacö lä culenaja bei wamacö mamocu cuwä, wawädwä wama täbä dablaba. Wamacö mamocu demi ja, wama täbä bluca wawädoabläö cuquei. Öjö ma cui, wamacö mamocu wälidio däjä, wama täbä nia dablaimi.

35’¿Öjö tawä? —a cuma—. Bä da moyaweicu, öjö lä. “Tä shii cuobä jamö ya cua waiquia”, wamacö bufi jole cuu ja, wamacö mölaa bälou.

36Öjö cudeenö, wama täbä bluca wawädoablabä wamacö waiquiwä ja, mö didi wama tä coyocomaboimi ja, jbejedi lä wama täbä nia bluca wawädobou! Cowa wacö shii cuobä jamö, wamacö wawädwä juu lä cuaaö weinaja showawä.

37Jesús a wä waicou däjä, faliseo a badanö a nacalema, cama nija a nö liyobä. Öjö cudeenö, öjamö lä a fa junö, bä iyaö çai loobä jamö a cuquema.

38Bä iyaö showao mlao däjä judio bä imicö showadi lä yälömu wei, Jesús imicö yälömu fa mlacunö, faliseo a bufi shädayaimoma.

39Öjö däjä, abinaja Bada tä cuma. —Cafä faliseo wamacö lä cui. Jishima bä ma cui, çäo fesibä ma cui, fesibä sibosi aumaö lä culajeinaja wamacö sibosi ma taamamou

wei ma cui, bei wamacö ƣeshi shami fe balojowä. Madofi bä ja wamacö bufi shino yaimodii. Wamacö shino nabämou.

⁴⁰¿Wamacö bufi jaducuwä lä mlai! Bei wamacö sibo lä tablaleno wei a showawänö, ¿bei wamacö ƣai mötalö tablaö mö feduonomi daanö?

⁴¹Inaja wamacö cuaablalou mlai, abinaja wamacö yai cuaabä. Bä nö jölili lä bleaaö wei wama bä nofi yai ojodabobä. Inaja wamacö yai cuaaö ja, “Ei bä au nö mlawä”, Yai Bada tänö wamacö nofi nia shino tabou.

⁴²Faliseo wamacö nö bada bleaaö dodijjobä wamacö —a cuma—. Afä nii wama bä bluca lä doaö wei, wajaquemi jenabä wai bädawä ma cui, fe usucuwä 10 wama jenabä fa shedequeblalönö, ai moli jenabä wai ja, Yai Bada showadi wama a dobäö. Öjö ma cui, wamacö yai dodijaö mlai ja, wama a ƣai nofimaö mlalanö, wama a jole jole dobäö waiyoblalou bädao dicoo. Wamacö dodijalanö wama a dobäö fa cunoja, tä nö doblaobö wei. Wama a nofimalanö wama a dobäö fa cunoja, tä nö dodijidaobö wei.

⁴³Faliseo wamacö nö bleaaö dodijjobä wamacö —a cuma—. Judio bamacö yododabä jamö, bada bä lä döcäo wei jamö wamacö döcäo yaimou mö feduo talei. Nii bä lä lulaö wejei jamö ma cui, wamacö nö bada ƣai öjöböamou bufi doblao.

⁴⁴Wamacö nö bleaaö dodijjobä wamacö. Nomawä bä didia lä jätöle jamö, tä ulifi jole mömou liyäjäwä lä culenaja, bei wamacö jole mömou dodijidawä cuwä bawä. “Eja nomawä bä didia lä cule”, bä bufi cuu mlai ja, tä ulifi mojudili cabaöje —Jesús a cuma.

⁴⁵Öjö däjä, Moisesi tä ƣ yai lä daö wei ai a wä juoma. —Tä ƣ wäyäle. Faliseo bä bada lä cui, inaja wa bä nowa taö dicoo ja, camiyä yamacö ma cui yamalecö nö ƣai waiblaö mö feduo dicoo —a cuma.

⁴⁶Abinaja Jesús a cuu showadaoma. —Moisesi wama tä ƣ yai lä daö wei wamacö nö ƣai bleaaö mö feduobä wamacö. Yai Bada nija täbä dodijidawä cuobä, wama tä nabä bluca shömadii talei. Öjö ma cui, wama bä doblamaö mlai, wama bä modaablamaö buo. Jai jude wama tä bälamaö bädao. Bä doblou fe yadiobä, moli ma cui wama bä bayeliblaö buomi.

⁴⁷Wamacö nö bleaaö dodijjobä wamacö. Yai Bada a wäno wäyälewä bä lä cuono wei bä lä cui, öjö wama bä ƣ nofi jaducubou ma mlai, wama bä dodijidawä didimabou bufi doblaa bädaa lä cule. Cafä wamacö nö badabö showawä lä cuinö bä shäo fa balöojenö, bä lä didile jamö wama tä ulifi baushibou bufi doblao nodio, dodijidawä wamacö mömou cuo fe yadiobä.

⁴⁸¿Öjö tawä? —a cuma—. Cama wama ecö ƣafa nodiwä jilamou ja, cafä wamacö jömamou waiquiwä. Cafä wamacö nö badabö jaba doblou lä mlaono weinaja wamacö cuwä malä showai. Cama bänö bä ƣ waibolajenö bä shälemaje. Cafä wamacö linö wama bä ƣ waibou showalanö, bä lä didile jamö wama tä ulifi baushibou bädawä.

⁴⁹¿Öjö tawä? —a cuma—. Öjö cudeenö, Yai Bada a wä faö moyawäo showaoma. Abinaja a cuma. “Cama bä nija wale wäno nia lä wäyäo wejei ya bä nia shömaö. Ya

bä shömabä ya bä lä yaimabole, öjö ya bä nia çai shömaö mö feduo. Öjö ma cui, ai bä nia shäöje. Ai bä nö nia bleaamaöje”, a cuma,

⁵⁰cafä wamacö nija Yai Bada a wano wäyälwä bä yanöcö shäö lä cuaano wejei bä bluca lä cui, cafä wamacö nija bä nowa bluca cuobä. ¿Öjö tawä? Awei. Ei bita a lä tablamono wei däjä, bä jaba lä ishono wei tä ma cui, bä ishono lä nodiablalono wei tä ma cui, cafä wamacö nija tä nowa nia bluca jödödöwä cuo.

⁵¹Abele a jaba shämolayoma —a cuma—. Öjö däjä, Yai Bada ai ebä bluca yanöcö shäa jaa fa nomöjöabodujenö, yacumö nofi bäyälwä Sacalia a shäa nomöjölemaje. Yai Bada e yano jefa jamö a nabä quequemaje. Yalo bä öshö lä maqueblaaö wejei täcö ajede ja, Yai Bada etä yano sibo mötale jamö a shälemaje. ¿Öjö tawä? Awei, cafä bamacö nowa taö lä cule. Cafä wamacö fei däjä lä bälöle wamacö nija, öjö tä nowa nia bluca jödödöwä cuo.

⁵²Moisesi wama tä a yai lä daö wei wamacö nö bleaaö dodijibä wamacö —a cuma—. Yanowamö bä nija Yai Bada a dablamou bufi ma doblao wei ma cui, wama bä bufi jaducublamaimi. Yai Bada cafä wamacönö wama a daimi waiquiwä. Ai bänö a daö bufi ma doblao wejei ma cui, cafä wamacö anö wama bä doblamaimi —Jesús a cuma.

⁵³Öjö däjä, Jesús a aa lä çolayofälöno wei däjä, Moisesi tä a ja täbä lä damaö wejei bä ma cuinö, faliseo bä bada ma cuinö, a nofi jaba wawädowä wälibomaje. Bluca tä ma cui ja, showadi a wälii fe blacäjomaje.

⁵⁴A wafa taö bufi fa doblaojenö, a wä nia yaclämaö fe yadiomaje.

San Lucas 12

¹Inaja cama bä ma cuaaö däjä, Jesús nija bluca dodijiwä bä çocamou fa cuaayolunö, bei bä mashicoma. ¿Öjö tawä? Inaja bä mashicou cuaaö showai ja, cama ebä lä nocamabono wei bä nija a wä faö fa balöonö, abinaja a cuma. —Bä da moyaweicu. Faliseo bä bada lä cui etä julumamodima wayu. Jole jole bä dodijaö bäa —a cuma—.

²Tä a fei däjä wäyämamou lä jatoö wei, wawädowä tä a nia wäyämamou malä nomöjöo wei. Tä a lä jöyabou wejei, tä a nia jödödöwä wawäblamou malä cui.

³¿Öjö tawä? Öjö cudeenö, tä mö lä didile jamö wamacö a faö ma jatoono wei ma cui, wawädowä tä a nia jiliamou nomöjöo. Ueshi yafi jamö wamacö a wajado ma fano wei ma cui, bluca bä nija tä a nia wawädowä wäamamou nomöjöo.

⁴Cafä bamacö lä nofimalé bamacö nowa taö lä cule —a cuma—. Yanowamö täbä nö quili ta dijejä. Bei wamacö shäö ma cujei, wamacö bufi nia wäliaimi.

⁵Ma. Ya wä nia wawädoö. Yai Bada a nö shino quili yai da taje. Wamacö shäö fa balöonö, shobali wacö jamö wamacö nia shäyajaö nomöjöo lä dao wei a. Awei. Öjö wama a nö shino quili yai tabä. ¿Öjö tawä? Bamacö nowa taö lä cule.

⁶Blada bolacabö cäcö wai ja, biyomö 5 bä däamamou talei. ¿Öjö tawä? —a cuma—. Biyomö bä nowa bluca ma mlai ma cui, Yai Bada tänö bä nofi bluca jaducubou.

7'Öjö tawä? Bä nofi jolio dijä. Bei wamacö feta ucu ma cui, Yai Bada tänö wamacö feta ucu bluca daö. Bä quili dijä, öjö lä. Biyomö bä nowa lä culenaja mlai, Yai Bada tänö cafä wamacö nowa yai blucabou.

8'Cafä bamacö nowa taö lä cule —Jesús a cuma—. Yanowamö täbä nija quili mlai ja, iba bä afa wäamou lä wawädoö wei bä lä cui, iba ya bä afa nia çai wawädoö wäadayou. Camiyä ya lä yanowamöblaleyoluno wei ya lä cuinö, Yai Bada ajele etäbä lä cule jamö, iba ya bä afa nia wawädoö wäadayou.

9'Öjö ma cui, yanowamö täbä nija iba bä afa wäamou lä quili wei bä lä cui, Yai Bada ajele etäbä lä cule jamö, öjö ya bä afa nia çai wäyäimi mö feduo.

10'Öjö tawä? Camiyä ya lä yanowamöblaleyoluno wei, wale nö ma waibläö wejei ma cui tä nowa nia mladou. Öjö ma cui, Yai Bada a Bufi nö lä waibläö wejei bä lä cui, etä nia mladoimi waiquiwä.

11'Judio bada bänö wamacö doblomi jömabeje, bä yododabä yafi bä jamö wamacö çai nia jublou cuaaöje —a cuma—. Ai bä bada lä läblai bä nija çai. Wamacö çai juuje däjä, wamacö nofi nia lä bäyäo wei tä a ja, bä bufi jolijou dicoo dijä.

12Wamacö a moyawe juobä, öjö lä däjä showawä, Yai Bada tä Bufenö wamacö a nia malä bäläo wei —a cuma.

13Öjö däjä, bä lä çocamono wei jamö ai a wä falayoma. —Tä a wäyäle —a cuma—. Aiwä nija a wä da fa, fayä etäbä bluca lä jäblono wei täbä ja, wale dobäo mö feduobä —a cuma.

14Öjö ma cui, abinaja Jesúsnö a nowa tama. —Cafä wafäcö nija faafä ya etäbä shelelebläo juobä wale läamanomije. Dodijidawä wafä etäbä shelelebou juobä yami —a nowa tama.

15Bä lä çocamono wei bä nija abinaja a cuma. —Bä da moyaweicu, öjö lä, täbä bufi waiyou si lä ijejeoblou weinaja, wamacö cuaaö dicoo mlaobä. Täbä madofi bluca ma doaöje däjä, öjö tänö täbä dodijidawä cudio malä mlai —a cuma.

16Öjö däjä bä bufi dayäamabä, shominaja tä a wäyäo yacläo çoma. —A nö lä madofibö wei etäca ficali nö nijio fa dodijionö,

17abinaja a bufi cudaliyoma. “¿Wedinaja iba nii ya bä li taamabä? Ya bä nia lä shimomaö wei bä yafi cuami”, a bufi cudaliyoma.

18“Abinaja ya yai cuaabä”, a bufi cuu nomöjööma. “Iba yafi ya bä wajaquemi fa wälälönö, bada ya bä yafi nia yai itamaö nomöjöö. Öjamö lä iba madofi bä ma cui, iba nii bä ma cui, ya bä nia bluca nowamaö.

19Öjö däjä, abinaja camiyä ya nowa nia shino yai tamamou. ‘Bei. Fei däjä dodijidawä ya bälödiobä, ya täbä bluca nowamöbou waiquia lä cule. Lasha bluca ya lalomaö çoma cui, dodijidawä ya nia cuo shi wälili. Fei däjä ya nia ojodamou çodaaimi. Ya nia shino iyadii. Bufi doblalolanö yamacö iyabä, showadi ya bä nia nacadii. Fei däjä, ya nia yai dodijaö.’” ’Einaja a bufi cama cudaliyoma. ¿Öjö tawä? —Jesús a cuma—.

20Einaja a bufi ma cuno wei ma cui, abinaja Yai Bada tänö a nowa tama. “iWa bufi nofi jaducuwämi dodijiwä yai!”, a nowa tama. “Fei tä didi showawä ma cui ja, bäfä bufi nia çoaö. Ei wa bä bluca lä shimomalöfe, ai bänö bä nia çai cuo juoje”, a nowa tama.

21’¿Öjö tawä? —Jesús a cuma—. Inaja yanowamö täbä bluca cuaaö dicoo. Cama bä dodijidawä bälödiobä täbä ma nowamöbolajei ma cui, Yai Bada nija bä dodijidawä cuodayobä tä taboimije.

22Cama ebä lä nocamabono wei bä nija abinaja Jesús a çai cuma. —Öjö cudeenö bamacö nowa taö lä cule. Eja dodijidawä wamacö nia lä bälöo wei tä ja, bä bufi jolijo dijä. ¿Öjö tawä? Nii bä ma cui jamö, camishi bä ma cui jamö, bä bufi cuaablalo dijä.

23Wamacö demi lä cuo wei tä nowa yai bluca malä cui, nii wama bä lä waö wei bä nowa lä culenaja mlai. Bei wamacö nowa çai bluca, camishi bä nowa lä culenaja mlai.

24’¿Öjö tawä? —a cuma—. Male sibä ja bä bufi da jaducublalu. Mobä döaö ma mlajei ma cui bä iyaö. Nii bä taö ma mlajei ma cui, mobä shiliqui shimomaö ma mlajei ma cui, Yai Bada tänö bä malä iyamaö wei. Öjö bä nowa ma table ma cui, çafä wamacö nowa shino yai blucabou fe balojowä.

25Wamacö demi nia lä cuo wei, Yai Bada tänö tä daö fe wädöa waiquia. Wamacö bufi lä jalujublalou wei tänö, wiisibö ma cui wamacö nö nia dedejedou majöomi.

26¿Öjö tawä? Wamacö bufi lä jalujublalou wei tänö, öjö wiisibö ma cui ja wamacö bayeliblamou daomi waiquiwä ja lä, ¿wedi tabä ai tä bluca ma cui ja, wamacö bufi nö nia jushublao buo?

27’¿Öjö tawä? —a cuma—. Jole jole bä bawä ma cui ja, öjö bä ja, bä bufi da jaducublalu. Bä badaö. Bä ojodamou ma mlai ma cui, shinalu ubä juducaö ma mlajei ma cui, bä liyäjawä. ¿Öjö tawä? Bamacö nowa taö lä cule. Bada tä Salomo a nö ma madofiböono wei ma cui, camishi ebä ma dodijidaono wei ma cui, ei jole jole bä lä cui bä shino yai mömou liyäjawä dodijiwä.

28Caje caje bä cudio ma mlai ma cui, bä öshömaö ma nocamou wejei ma cui, bei bä jole fa fanö, bä mömou dodijidaobä Yai Bada tänö bä bayeliblaö. Öjö bä ma bayeliblaö wei ma cui, ¿camishi bä ja çafä bei wamacö nia shino bayeliblamou ayaomi daanö? Yai Bada wama a nofi bejedi mölaboimi showawä.

29’Wamacö nia lä iyaö wei tä jamö bä bufi cuaablalo dijä, öjö lä —a cuma—. Wamacö bufi jalujublalou dodijio mlai.

30Bluca bä bälöjowä lä yaiblai bä lä cui, inaja cama bä bufi li bluca cuaablalou. Öjö ma cui, wamacö lä jöli wei, Faafä a lä culadinö wamacö li daö waiquia.

31Öjö täbä ja wamacö bufi cuaablalou mlai ja, Yai Bada tänö cama ebä nia çai lä cuo wei tä ja, bä bufi shino dayäo da shalilio. Inaja wamacö bufi shaliliwä cudio ja, öjö täbä çai showawä ma cui ja, wamacö nia dobämou —Jesús a cuma.

- 32** Abinaja Jesús a cuma. —Bolacadabö oweja bä lä yododoblamou weinaja wamacö cuwä ma cui, bä quili dijä. Wamacö nö wəlojabimi ma cui, Faafänö cama ebä çai nia lä cuo wei jamö wamacö yädämabou bufi malä doblale. ¿Öjö tawä?
- 33** Wama täbä madofi lä table wama täbä fa nomöjöanö, blada bä da luluaje, bä nö lä bleaaö wei wama bä dobäbä. Inaja wamacö cuaalanö, bəlimi tä ja afä täbä nowa yai lä bluca wei bä fa tablamodunö, eja wamacö cua ma showale ma cui bä nia shimomaö balöodayou. ¿Öjö tawä? Fedu jamö wama täbä lä nowamöbou wei täbä nia mlaö majöomi. Täbä nia tomöaimije. Täbä çai nia wädömamoimi.
- 34** ¿Öjö tawä? Afä wama täbä yai lä bufibou wei täbä lä cule jamö, öjamö lä wamacö bufi nia malä cadididalou wei.
- 35** Abinaja Jesús a cuma. —Jai wamacö ʔ juo showadaobä, bä nö daa da cuicu. Camishi acadafu wama bä fayocomabou showale wamacö nö daobä. Cowa wama wacö luamaö mlai wama tä ʔtabou showaobä.
- 36** Cäcöbö lä doayou wei cäcöbö nofi çəçamoabeje jamö bada a juu däjä, a nö dabou lä juo wejeinaja wamacö cuaabä. Cama e yafi jamö a çə çəbei wei däjä, yoca cloocaö ja, yoca caloblaö showadaobeje bä nö dao.
- 37** Bada a çəblou çəlanö, a nosie juamobä ebä lä lale bä lä cui bä bufi nia shino doblalou mö bao —a cuma—. Cafä wamacö nija ei ya wə lä cui, bejedi lä ya wə. Öjö bä lä cui bä nia yai bayeliblamou. Bada a ma cuinö, acadafu cäcö ʔyoa fa majölönö, bä iyabä bä nia ajedamaö. Cama a showawänö, bä niibö nia bablaayoluu.
- 38** ¿Öjö tawä? Bəshäcuoladi a ma çə wei ma cui, tä jalu ajede däjä a ma çə wei ma cui, bä nö dao dablaö ja, bä bufi doblalobä öjö bei bä dodijiwä.
- 39** ¿Öjö tawä? —a cuma—. Cama e yano jamö a lä cule, a moyawäo fa cunoja, a tomömu lä juimi a nö famabö mlai. “Öjö däjä a juimaö”, a bufi cuu fa cunoja, a nö lucämabö mlai.
- 40** Cafä wamacö ma cui, showadi wamacö nö daobä, öjö lä. Wamacö bufi cuu mlao däjä, camiyä ya lä yanowamöblaleyoluno wei ya nia malä bädou wei —a cuma.
- 41** Jesús a wə fa jililänö, abinaja Pedro a cuma. —Tä ʔ wäyäle. Afä yamalecö ʔfa yai wayoaö ayaobä, ¿öjö wa tä ʔ wäyäo yacläo da cufanö? Ma, ¿yanowamö bluca yamalecö ʔfa wayoabä tä ʔ daanö? —a cuma.
- 42** Bada tä Jesús abinaja a cuma. —Camiyä wamale nosie lä juaö wei wamacö lä cui, ¿wedi jamö wa lä cui wa shino yai dodijaö daanö? Abinaja tä cuwä. Shomi jamö a bada nia lä juno wei a bada cuoma. A lä dodijaö wei a läo juobä a nosiemafälöma. Abinaja a nowa talefälöma. “Dodijidawä iba bä çai cua da jeicu. Bä iyabä tä cuo däjä, dodijidawä wa bä iyamabä”, a nowa talefälöma.
- 43** ¿Öjö tawä? —a cuma—. Bada e lä nosiemofälöno weinaja a cuaaö showao däjä e bada waloamaö çə ja, a bufi doblalolanö a nia çəblamaö çə.

44 Cafä wamacö nija ei ya wä lä cui, bejedi lä ya wä. A nosie juaö cadidioma yalo, öjö bada a lä cuinö a nia bada läamaö nomöjöö, cama etäbä bluca lä tabou wei etäbä nofi tabobä.

45 Öjö ma cui, ai a lä cui, bada a nosie juabä a ma cui, abinaja a bufi nia cuu dicoo. “Cuo buo. Bada tä çö jaöo malä mlai”, a bufi nia cuu dicoo —Jesús a cuma—. Bada a nosie juamobä ebä mö feduwä lä cui, bä si nia shino yafelimaö juo dicoo. Täbä iyaö lä çöcamou wei jamö a nia shino judii, bä shi wälii bufi lä doblao wei bä nijamö.

46 Inaja a cuaaö showao däjä, a nofi lä badabou wei e nia çöblou çö jätoyoluu. “Fei däjä a çöbei”, a bufi cuu mlao däjä, a nia çöblou çö jätolayou. A lä shominajaano wei etä fa dalalönö, bada anö a nö nia bleaamaö. Yai Bada a wä bejedi bufii lä mlajei bä nijamö a nia coyocomabou. Öjamö lä bä nia öcöö. Bä nö beblalou yalo, bä nia lalöö.

47 Öjö tawä? —Jesús a cuma—. Bada a nosie juamobä a lä cuinö, a taamaö lä bufii wei tä daö ma waiquiono wei ma cui, tä tanomi yalo a nö nia bleaamaö dodijio.

48 Öjö ma cui, bada a nosie juamobä ai a mö feduwä lä cuinö, tä tamaö lä bufii wei tä daö fe balojowämi. Tä daimi cudeenö a dobloimi. A dobloimi yalo, a nö bleaamabä a ma cui, a bufi jaducuwä fe balojowämi cudeenö, a nö nia bleaamaö fe balojoimi. Öjö tawä? Tä nowa lä bluca wei tä ja a lä dobäö wejei a lä cui, öjö a nia yai wälimamou. Inaja showawä, tä nowa lä bluca wei jamö a lä läamaö wejei a lä cui, öjö a nowa nia shino yai taöje —a cuma.

49 A wä faö showai ja, abinaja a cuu çöoma. —Bitä jamö cowa ya wacö ömöamaö mö juma, täbä doblou lä mlai bä nö bleaabä. Wacö ömöö waiquio fa cunoja, ya bufi nö doblaobö wei.

50 Öjö ma cui, camiyä wale nö nia bleaamaö balöoje. Bä fe ojoblamou ja, mau ubänö bä jödödöblou lä culenaja, nini nini bänö ya nia jödödöblou cuo. Öjö ya tä nö dabou showalanö ya bufi nö bleaaö.

51 Bitä jamö yanowamö ya täbä bufi yanöcöblamabä ya junomi. Öjö tawä? Cafä bamacö nowa taö lä cule. Ya bä bufi yai sheleleblamabä ya juma.

52 Abinaja tä nia fei däjä cuo majöo —a cuma—. Moli a yano showawä ja bä lä cui, bä nia sheleleblou. 3 bä nijamö, bolacabö cäcöbö a nia läo. Bolacabö cäcöbö nijamö, 3 bä a nia çai läo mö feduo.

53 Bä nia sheleleblou. Bä ijilubö nija bä föö e a nia läo. Bä föö nija bä ijilubö e a nia läo mö feduo. Bä tää nija bä nöö e a nia läo. Bä nöö nija bä tää e a nia läo mö feduo. Bä tatä nija bä yesi e a nia läo. Bä yesi nija bä tatä e a nia läo mö feduo —Jesús a cuma.

54 Bä lä çöcamono wei bä nija abinaja a cuma. —Motoca a lä queo wei jamö öläjashi a faö däjä, “Maa a elemashi juu lä cuimi”, wamacö cuu showadao. Öjö tawä? Inaja showawä a maa juu cuaaö.

55 Motoca a cuaaö lä mlai jamö wadoli a juimaö däjä, “Jo yai! Fei däjä yobli yobli tänö bamacö nö nia bleaaö!”, wamacö çai cuu. Inaja showawä tä yobli cublou.

⁵⁶Jole jole wamacö lä dodijidai! Judu mösö ma cui ja, bita a ma cui ja, wamacö moyawä ma waiquii, ¿wedi tabä camiyä fei däjä ya lä cuaale tä ja, wamacö bufi jaducudaloimi? —Jesús a cuma.

⁵⁷Abinaja Jesús a cuu çoma. —Yai Bada tänö tä tamaö lä bufii wei wama tä dabä wamacö waiquiwä ma cui, ¿wedi tabä wama tä li taimi?

⁵⁸Wa wafa nia dobroimi lä wäyöö wei a lä cuinö, bada nijamö wa çai juu showaofälöö däjä, lobe wa tä cadejeblabä a wä nö wäa da showadaicu. Bada a nija wa juwäamaö fa dicoonö, wa nö bleaamaö mlaobä. ¿Öjö tawä? Bä fe lä lamaö wei a nija wa juwäa majöa fa dicoblamalänö, wa fe laamaö dicoo mlaobä.

⁵⁹Cafä bäfä nowa taö lä cule. Tä nowa lä cule wa tä nowa bluca çamaö showao mlao däjä, wa nia famaö ço buomije —a cuma.

San Lucas 13

¹Öjö däjä showawä, Jesús nija ai bä lä cuono wei bänö Calileateli bä afa shämou wäyämaje. Biladonö bä nabä fa shömöcönö, Yai Bada nija yalo bä lä dobroblamou wei bä maqueblamobä täcö jamö, bä jowa shäamalalema. Yalo iyäbö lä jilale jamö, cama bä iyäbö quea coyocomalemaje.

²Abinaja Jesúsno bä nowa tama. —Öjö bä Calileateli shämou nö lä quiliano wei bä lä cui, ¿wedinaja wama bä nofi li tabou? “Calileateli ai bä dobroimi fe balojoo mlai, öjö bä yai doblou fa mlacunö, Yai Bada tänö inaja bä li tablalema”, ¿wama bä nofi tabou tawä?

³Ma. Inaja tä cuonomi. Cafä bämacö nowa taö lä cule. Wälidiwä tä ja wamacö bufi lädoimi ja, cafä wamacö ma cui, inaja showawä wamacö nia çai shämou cuo mö feduo.

⁴Siloe jamö a yafi ösöwä lä wäcälayo wei däjä, Jelusaleteli 18 bä lä shäblaliyono wei bä lä cui, ¿wedinaja wama bä nofi öjö tabou? —a cuma—. “Jelusaleteli ai bä dobroimi fe balojoo mlai, öjö bä nofi yai doblou fa mlacunö, bä li inaja tablamolayoma”, ¿wama bä nofi tabou tawä?

⁵Ma. Cafä bämacö nowa taö lä cule. Wälidiwä tä ja wamacö bufi lädoimi ja, cafä wamacö ma cui, inaja showawä wamacö nia çai shämou cuo mö feduo.

⁶Bä bufi dayämabä, Jesúsno ico fi afa wäyöö yacläoma. —Ficali etäca lä cuono wei anö, uba too tobä cuobä jamö ico fi ublamaboma. Öjö fi ja a iyabä, nii bä ma bomano wei ma cui bä cuonomi.

⁷Ficali etäca jamö a ojodamobä e nija abinaja e cuma. “Bei. Nii ya bä bomaö showai ja, lasha 3 ya famaö waiquia ma cule bä lalobloimi. ¿Öjö tawä? Fi da diyälö. Cäcö fadalou mlai ja, fi ublaa bädaa”, a cuma.

⁸A lä ojodamou wei abinaja e cuma. “Bada tä. Fi diyämaö jaödao bufi dijä. Bei fi cotä jamö mashita ya nia äbäjamaö. Yalo ya shibä nia löblaö. ¿Öjö tawä?

- ⁹Lasha ai a lalou ço däjä, nii bä lalou ja, inaja lä waiquiwä. Bä laloimi showao ja, öjö däjä yai. Öjö däjä, fi yai diyämou showadaobä”, a nowa tama —Jesús a cuma.
- ¹⁰Judio bä yododabä ai a yafi jamö, täbä nia lä yanöçoo wei tä mö sábado jalu ja, Jesúsno Yai Bada etä ʔ ja bä damama.
- ¹¹Öjamö a suwä juu lä tolucuono wei a cuoma. Inaja a cuwä showai ja, lasha 18 a ma famale ma cule, a juu wʔalidio showaoma. A shaliliblou doblonomi. Fecula anö inaja a li taamama.
- ¹²Jesúsno a fa dalalönö, a möamoblamalema. Abinaja a nowa tama. —Ami. Wa juu lä tolucui bäfä jalomaö waiquia lä cule —a cuma.
- ¹³Jesús imicö fa maqueicunö a ublao fa shaliloimadunö, Yai Bada a nofi doablalema.
- ¹⁴Öjö ma cui, judio bä yododabä yafi jamö a bada lä läono wei a jushudaliyoma. ¿Öjö tawä? Täbä yanöçöobä tä mö jalu ja Jesúsno a jalomama yalo, a jushudaliyoma. Bä lä yododono wei abinaja bä nowa tama. —Wamacö ojodamodibä 6 tä mö jalu cua. Bamacö nia lä yanöçoo wei tä mö jalu cublou showaa mlai ja, wamacö jalomamou mö juimabä, öjö lä, sábado däjä mlai —bä nowa tama.
- ¹⁵Öjö däjä, Bada tä Jesús abinaja e cuu mö feduoma. —¡Jole jole wamacö lä dodijidai! Wama bä wasöo ma cui, cafä inaja wamacö cuaaö mö feduwä malä showai. Täbä yanöçöobä tä mö jalu ma cui ja, jïimafä wama bä malä bayeliblaö wei. Baca bä ma cui, bulo bä ma cui, wama bä fa cushanö, wama bä amishi çamabä, wama bä malä lulubou wei.
- ¹⁶Inaja showawä, ei Ablaamö nodiwä a suwä lä cui, täbä yanöçöobä tä mö jalu ma cui ja, ya bayeliblabä a. Sadanasinö a çocabou lä waiquio wei däjä, lasha 18 a famaö malä waiquile —a Jesús cuma.
- ¹⁷Inaja a cuu ja, bä ʔ lä läono wei bä quililaliyoma. Bä lä yododoono wei bä lä cui, Jesús showadi a lä dodijano wei tä ja, bä bufi doblalou fe balojooma.
- ¹⁸Abinaja Jesús a cuu yacläoma. —Yai Bada tänö cama ebä çai lä cuo wei tä lä cui, ¿wedi tä cuwä lä dodijiinaja tä cuwä? ¿Wedinaja ya yai cubä?
- ¹⁹Abinaja. Nana shimono wai lä culenaja tä cuwä. Ficali etäca jamö, ai anö nana shimono wai döquema. Shimono fa caulunö, shifi falayoma. Shifi lä badalayou wei däjä, biyomö bä yabäcabö tamoyoluma —a cuma.
- ²⁰Abinaja Jesús a cuu çoma. —Yai Bada tänö cama ebä çai lä cuo wei tä lä cui, ¿wedi tä cuwä lä dodijiinaja tä cuwä?
- ²¹Suwä anö nii bä lä julumano weinaja tä cuwä. Nii bä lä julumaö wei tä lä cui, nii 3 jïbä jamö wiisibö tä wai coyocoa ma bäqueno wei ma cui, öjö tä wai bädawänö, bä bluca julumalema —a cuma.
- ²²Jelusale jamö Jesús a jufälöbä jamö, bluca täbä shabonobö jamö a jayuadalou fa cuaimadunö, täbä yömöläö cuaafälöma.

23Jesús a wǎlii ja, abinaja ai a cuma. —Tä ʘ wǎyǎle. Shobali wacö jamö bä juu mlaobä, Yai Bada tänö ʘbä nia bolacadabö shino jucäaö ayao tawä? Inaja a fa cunö, abinaja Jesúsnö bä nowa tama.

24—Yai Bada tänö cama ebä çai lä cuo wei jamö wamacö cuobä, wajaquemi yoca jamö bä faö fe da yadiofälö. ʘÖjö tawä? Cafä bamacö nowa taö lä cule. Öjamö bä cuobä, bluca bä nia faö ma wabäo wei ma cui, bä nia faö dobroimi.

25Yoca caloa showaa ma cule, cama yafi e lä cule a fa itoblalunö, yoca fe nia laaö. Öjö dǎjä, sibo jamö wamacö cudia showaa dicoo ja, wama yoca cloocalanö wamacö ʘ nö nia bleaaö. “ʘBada tä!”, wamacö nia cuu. “ʘYamalecö da famaliyo!”, wamacö nia ma cuu wei ma cui, camanö abinaja wamacö nowa nia taö. “Bamacö daimi. Shomi wamacö”, a nia cuu.

26ʘÖjö tawä? —a cuma—. Öjö dǎjä, abinaja wamacö nia cuu. “Cafä sho bamacö mada iyablei. Camiyä yamacö shabonobö jamö wa tä ʘ çai mada wǎyǎblei”, wamacö nia cuu ma cui,

27abinaja a nia cuu. “Bamacö nowa taö waiquia lä cule. Bamacö daimi. Shomi wamacö. Wǎlidiwä talewä wamacö lä cui, bä da alufälö”, a nia cuu.

28ʘÖjö tawä? Yai Bada tänö cama ebä çai nia lä cuo wei jamö, ai wama bä nia blajawä dabraö ayao. Ablaamö a ma cui, Isaacö a ma cui, Jacobo a ma cui, Yai Bada a wano wǎyǎlewä bä ma cui, öjö wama bä blajawä nia ma möö wei ma cui, cafä wamacö nia sibomabou. Öjö dǎjä wamacö nia öcöö. Wamacö nö beblalou ja, wamacö nia lalöö.

29Yai Bada tänö cama ebä çai cuobä jamö, shomi täbä lä bälöblai täbä nia waloblayoluu. Motoca a lä faö wei jamö ma cui, a lä queo wei jamö ma cui, a faö lä mlai jamö ma cui, a queo lä mlai jamö ma cui, öjamö bä cuoma bä bluca fa çocamoliyonö, bä nia iyaö çai loo.

30ʘÖjö tawä? —a cuma—. Öjamö täbä cua lä bädao wei täbä ma cui, bada bä nofi tabou lä cuaaö wejeinaja Yai Bada tänö bä nofi nia tabou. Inaja showawä, ai täbä nofi bada ma tabou wejei ma cui, Yai Bada tänö inaja bä nofi nia taboimi.

31Öjö dǎjä, faliseo ai bä bada fa waloicunö, Jesús a yömölamaje. —A da doculufälö. Bada tä Elode a lä cuinö wa shämaö bufi doblaa waiquia —a nowa tamaje.

32Abinaja Jesúsnö bä nowa tama. —Wamacö fa alufälönö, öjö a nofi wǎli lä jushuadii wei nija wamale ʘno da wäcudu. Fei dǎjä ma cui, fena ja ma cui, fecula ya bä nia yashubladii showao. Jalili ya bä nia jalomadii showao. Öjö tä fena ja ya nia shino waicou.

33Wale nia ma shämaö dǎjä ma cui, ya juu fe yadiofälöbä cä ya. Eja mlai, Jelusale jamö Yai Bada a wano wǎyǎlewä showadi bä shino malä shäo wejei —a Jesús cuma.

34Jesús a wǎ blajawä faö ja, abinaja Jelusaleteli bä nowa tama. —ʘShädayai, Jelusaleteli wamacö! Yai Bada a wano wǎyǎlewä wama bä lä shäo wei wamacö. Cafä wamacö nija Yai Bada tänö bä lä shömaö wei, maa mabänö wama bä lä shǎyǎo wei

wamacö. Cadala bänö bä ijilubö ebä fe yojobou lä cuaaö wejeinaja, inaja showawä cafä showadi bamacö tabou bufi ma doblaono wei ma cui, camiyä nija wamacö nowamamou bufionomi dicowä.

³⁵Jao. Inaja lä waiquiwä. Fei däjä bamacö nia daaö. Wamacö yafibö nia blocoaö. Abinaja bamacö nowa çai taö showadao. Wamale nofi doaö bao showao mlao däjä, wamale nia dabraö çodaaimi. “Yai Bada a wänö a lä juimi a lä cui, Yai Bada nija, jöjö lä a shino yai bayeliblamobä a!”, wamacö cuolanö wamale nia shino yai dabraö ço —bä nowa tama.

San Lucas 14

¹Täbä yanöcöobä ai sábado tä mö jalu däjä, faliseo bada a lä cuinö Jesús a nacaema, a nö liyamabä. Yafi jamö a fa waloicunö, a dobroimi jömaö bufi fa doblaohenö a mödimaje.

²Bei. Jesús a mötalebö ja, jalili a looma. Bei bococu shuwäoma, bei matacö çai.

³Moisesi tä a yai lä daö wejei bä lä cui, Jesúsno bä wälima, faliseo bä bada çai. Abinaja a cuma. —Moisesi esibä oni jamö, ¿wedinaja tä a oni cuu? Täbä yanöcöobä tä mö jalu jamö, ¿täbä jalomaö wasöo daanö? Ma, ¿täbä wasöimi tawä? —a cuma.

⁴Öjö ma cui, bä a juonomi. Öjö däjä, jalili a fa dälänö a jalomalema. A fa jalomalönö a demi shömöa çolema.

⁵Öjö däjä, abinaja bä nowa taö juoma. —Ai wa lä cuinö, mau uca jamö ijilufä a quequei ja, yalofä baca a quequei ja, täbä yanöcöobä tä mö jalu ma cui ja, ¿lobe wa nia yäbäaö çomi daanö? ¿Öjö tawä? —bä nowa tama.

⁶Einaja bä nowa ma tano wei ma cui, bä a juonomi.

⁷Bä iyabä bä lä nacano wei, Jesúsno bä yafiblaö nö daama. Bada bä loobä jamö bä loo yaimoma cudeenö, abinaja bä nowa tama.

⁸—Cäcöbö lä doayou wei cäcöbö nofi çocamoabeje jamö wa nacaöje däjä, bada bä loobä jamö a loo shi jalimo dijä. ¿Öjö tawä? A yai lä bada wei a nacaö mö feduo ja,

⁹öjö bada a yai cuobä jamö wa jole ma loblaquei wei ma cui, wafäcö lä nacano wei a lä cuinö, shomi jamö wa loa majöa dicomaquei. “Ei bada a lä cui, eja a yai loobä”, a cuu ja, wa quililanö wa nia shomi ja loo majöo, bä cua lä bädao wei bä nija.

¹⁰¿Öjö tawä? —a cuma—. Wa iyamabeje wa nacaöje ja, bä cua lä bädao wei bä nija a loa çocaa da showadaicu. Wa lä nacano wei a lä cuinö wa dabraö däjä, bada bä yai loobä jamö wawädwä wa yai loa cadidia jatomaquei. Öjö däjä, bluca bä lä loo wei bä nija wa nö öjööamou cuquei.

¹¹¿Öjö tawä? Cama a lä jömöo wei a lä cui, Yai Bada tänö a nia quilimaö malä majöo wei. A jömöo lä mlai, wawädwä a nofi nia shino yai tamabou —Jesús a cuma.

¹²A nö yai lä liyamano wei nija abinaja Jesús a cuma. —Wa bä nia iyaö çai çocablamaö ja, afä nofi bä ma cui, afä mashi bä ma cui, öjö wa bä nacaö mlai. Aifä bä

ma cui, cafä nija bä bälöa lä ajedele bä ma cui, bä nö lä niibö wei bä ma cui, öjö bä naca dijä. Inaja wa cuaaö dicoo ja, wa nowa çamabeje cafä wa nacaö nomöjöö dicoo mlaobeje.

13’Wa bä nia iyaö çai çocablamaö däjä, abinaja wa yai cuaabä. Bä nö jölili lä bleaaö wei bä yai da naca. Bä lä wälidii bä ma cui, bä juu doblou lä mlai bä ma cui, bä lä jubäbö wei bä ma cui,

14öjö wa bä nacaö ja, wa nö nowa çamabimi waiquiweje cudeenö, Yai Bada tänö wa bufi nia yai doblamabou. Bä lä dodijaö wei bä demi jocädou lä çoo wei däjä, öjö däjä wa nowa nia shino yai çamamodayou —a cuma.

15Bä iyaö çai lä loono wei jamö, ai anö Jesús a wä fa jililänö, abinaja a cuma. —Yai Bada tänö cama ebä çai cuobä jamö bä nia iyaö çai lä çocablou wei, öjö bä bufi yai doblalobä cäbä —a cuma.

16Öjö ma cui, abinaja Jesús a cuu mö feduoma. —Bada ai anö, bä nia bluca iyaö çai fa çocablamanö, bä yömölaa balölema.

17Nii a bluca tabou waiquilanö, a nosie lä juaö wei a fa shömölönö, bä nacaamaö bufima. “¡Fei däjä, fei däjä! Bä shulucua da jödödoolalu”, a cuma.

18Öjö ma cui, bä juu fa mojonö, bluca bä äfa yabäcou tao showaoma. ’Abinaja ai a cuu balöoma. “Ya nö juu doblobimi dicowä. ¿Öjö tawä? Ficali ya täca lä däleno wei, ya täca mödayou”, a cuma.

19Abinaja ai a lä cui a cuu nomöjööma. “Ya nö juu doblobimi dicowä. ¿Öjö tawä? Iba jjiima 10 ya bä baca lä däleno wei, ya bä nia ojode wabaö”, a cuma.

20Ai a showawä lä cui, abinaja a cuma. “Iba suwä ya delei culoi. Öjö cudeenö, ya nö juu doblobimi”, a cuma.

21’¿Öjö tawä? —Jesús a cuma—. A lä shömöleno wei, bada e nija a waloo fa çoicunö, bä äfa moji wäyäjäloma. Öjö däjä, bada e fa jushudalunö, a nosie juamobä e shömöa çolema. Abinaja a nowa tama. “Jao. ¡Lobe, lobe! Täbä lä bälöblai yobö jamö a jublou cuaaö da showadao, öjö lä. Bä nö lä beblalodii bä nö beliyobö jamö wa çai fa alufälönö, bä nö jölili lä bleaale bä da çabla. Bä lä wälidii bä ma cui, bä lä jubäbö wei bä ma cui, bä juu doblou lä mlai bä ma cui, öjö wa bä fa nacalalönö bä çai da juima”, a nowa tama.

22’Öjö däjä, bada a nosie juamobä e lä cui, a waloo fa çoicunö, abinaja e cuma. “Bada tä. Wale nowa lä tano weinaja ya cuaaö bäa ma cule, bä oimi showawä”, a cuma.

23Öjö cudeenö, cama e nija abinaja bada e cuu çoma. “Sibo jamö bä lä bälöblai yobö jamö wa jublou fa cuanö, casö jamö bä lä bälöblai bä naca fe da yadialalö. Iba yafi jamö ya bä nia çai lä iyaö wei, bä ou fe yadiobä.

24Cafä bamacö nowa malä tale. Ya bä jaba lä nacaleno wei bänö, ei ya tä lä tale tä nia wabaö buomije”, a bada cuma. ¿Öjö tawä? —Jesús a cuma.

²⁵Jesús nija, bluca bä lä çocamoyoluno wei bä nocaa showalayofälöma. Öjö bä nija a mö fa yabadalunö, abinaja bä nowa tama.

²⁶—Camiyä nija a nocao bufi lä doblao wei a lä cuinö, wale nofi yaiboimi ja, a doblou mlaicätä. Bä fëö e ma cui nija, bä nöö e ma cui nija, bä suwäbö e ma cui nija, öjö bä nija a bufi mö blucao dicoo ja, a nö nocaobimi waiquiwä. Bä ijilubö ebä ma cui, cama ebä mashi ma cui, inaja showawä. Cama a ma cui, a nia demi lä cuo wei tä ja a bufi mö blucao dicoo ja, a dobloimi waiquiwä.

²⁷Camiyä ya nowa ja a nö bleaamamou bufiomi ja, camiyä nija a nö nocaobimi waiquiwä.

²⁸¿Öjö tawä? —Jesús a cuma—. Cafä ai wanö, yafi ösöwä wa itamaö bufi doblao ja, wa bufi nia dayäo malä balöo wei. Wa yafi jödödöblabä tä cuami ja, wa nia yanöcöo balöo.

²⁹Wa bufi dayäo balöomi ja, wa yafi colo itamaö ma cui, wa nö waicobimi ja wa noca nia icablalaöje.

³⁰Abinaja bä nia cuu. “Öjönö colo etä yafi ma itamano wei ma cui, yano nö tabimi majöwä dicowä”, bä nia cuu.

³¹¿Öjö tawä? —a cuma—. Bada ai anö, sodado bä afa juu jiliaö ja, cama ebä nia toujublamaö shi jalimoimi. A bufi nia dayäo balöo. 20.000 bä çai bluca lä juu wei, cama 10.000 bä sho, bä mö nia baamaö buomije. “Cama bä bluca ma ayale ma cui, çyama bä nö bleaamaö ayaquei tawä?” bä nowa nia tayou.

³²Bä nö wəlojabimi waiquiwä ja, ai ebä nia shömaö, bä mö baamabeje. Bä ajedono mlai ja, bä a oquemabeje bä nia wəliije.

³³Öjö cudeenö bamacö nowa taö lä cule, wamacö bufi dayäo balöobä. Cafä ai wanö, afä wa tä bluca lä table wa tä daaö moji ja, camiyä nija wa nö nocaobimi waiquiwä.

³⁴Sayu bä dodijidawä —a cuma—. Öjö ma cui, bä sayu oquediblou dicoo ja, bä nia mödadiblou lä ço wei etä cuami waiquiwä.

³⁵Bä oquediwä waiquiwä ja, bä nia bufiblamou çodaaimi, bä nia joyamou showadao. ¿Öjö tawä? Wamacö yömöcacö lä walalai, bä yömöca daa da dodijiicu.

San Lucas 15

¹Bei. Lomateli bada bä befi bä blada lä doaö wejei bä ma cui, wəlidawä talewä ai bä ma cui, Jesús a wə jilibeje bä bluca çocamoyoluma.

²Öjö cudeenö faliseo bä bada ma cui, Moisesi tä a ja täbä lä damaö wejei bä ma cui, bä bufi jushujolanö abinaja bä cuma. —Ei a lä cui, wəlidawä talewä bä nija a nofimodii. Bä çai iyaö talei —bä cuma.

³Öjö cudeenö, bä bufi dayäamabä Jesúsnö ei tä a wäyäo yacläo showadaoma.

- 4—Cafä ai wa lä cuinö, yalofä 100 wa bä oweja tabou ja, afä moli a mojolua dicolayou ja, wa nia dayäaö, ¿öjjo tawä? Tä ulifi wawädoobä jamö,
- 9 bä lä jäle wa bä fa dacönö, afä moli a lä mojolulayono wei wa nia dayäö cuaaö. Wa dablao mlao showao däjä wa nia dayädii.
- 5'¿Öjjo tawä? —a cuma—. Wa daa fa çalälönö, bufi doblalolanö wa nia lucäbou çoimaö.
- 6Wa çai çoa fa çobonö, afä nofi bä ma cui, afä wa bä bälöa lä ajedemabole bä ma cui, wa bä bluca fa nacaalälönö, abinaja wa bä nowa nia taö. “Bämacö bufi doblalolanö bämacö da çocamo. Iba yalo a ma mojolulayono wei ma cui, ¡ya çoa çolei lä cufe!”, wa bä nowa nia taö.
- 7'¿Öjjo tawä? —a cuma—. Cafä bämacö nowa taö lä cule. Inaja showawä, wälidiwä talewä a lä cui, Yai Bada nija a bufi mö yabablou lä çole däjä, fedu jamö bä bufi nia çai doblalodayou. Bä 99 la dodijaö wei, bä bufi mö yabajadou çobä bä lä mlai, öjjo bä nija bä bufi çai ma doblalou wei ma cui, wälidiwä talewä moli a bufi mö yabablou lä çoa wei a lä cui, öjjo nija bä bufi nia shino yai doblalodayou.
- 8'Abinaja çai —Jesús a cuma—. Suwä anö blada 10 bä nowa lä bluca wei ai e nofi blada mojudumaö ja, ¿wedinjaja a nia cuaaö? Cowa wacö fa yäcönö, öjjo wacö shiji ja a yafi nia jowaö. E dablao mlao showao däjä a nia dayädii, ¿öjjo tawä?
- 9E blada dablao çoa däjä, bufi doblalolanö cama nofi ebä ma cui, bä bälöa lä ajedemabole ebä ma cui, bä fa nacaalälönö abinaja bä nowa nia taö. “Bämacö bufi doblalolanö bämacö da çocamo. Bladayä ya nofi da mojudumalii, ya daa çolalei lä cufe”, a nia cuu.
- 10'¿Öjjo tawä? —a cuma—. Cafä bämacö nowa taö lä cule. Inaja showawä, Yai Bada ajele etäbä lä culadi bä nijamö, wälidiwä talewä moli a bufi mö yabablou lä çoa wei a lä cui nija, bä bufi nia shino yai doblalodayou —a cuma.
- 11Abinaja Jesús a cuu çoma. —Bä ijilubö ecöbö lä bolacaono wei a cuoma.
- 12Oshe a lä cuinö, abinaja bä föö e nowa tama. “Fabe. Afä obi yafä bä nia tabou lä juo wei, wa bä sheleleblao fa showadalonö wale dobäa da showadalö”, a cuma. Inaja a cuma cudeenö, bä ijilubö ecöbö nija, bä föö enö ebä bluca shelelea showadaquema.
- 13Tä mö fa weyadalunö, bä ijilubö oshe e lä cuinö, cama ebä bluca fa çalälönö, blajai jamö bä çai aa showalayofälöma. '¿Öjjo tawä? —Jesús a cuma—. Öjamö, a doblou mlaobä jamö, ebä bluca wälia bädalema. A shijilonomi dodijiwä.
- 14Cama blada ebä waicaö däjä, tä nö ulifi ofäblaliyoma. A nö jölili bleaaö nomöjööma.
- 15Öjjo cudeenö, öjjeteli ai a nija a ojodamobä, a yädäblaliyoma. Öjönö coshino ebä iyamadayobä a shömölema.
- 16A nö ofili bleaaö fe fa balojoonö, coshino bänö bä canosi lä wano wejei bä ma cui ja, a bufi waiyoma. A dobnomi dodijiweje.

- 17'Yaçumö a bufi fa möblalunö, abinaja cama a nowa tamoma. “Fayä nija bä ojodamou lä jäle bä dodijidawä ma iyaö däjä ma cui, ofi ofi tänö bä ijilubö ya e bufi ofili mlao shomita bashia cuboyoi.
- 18'Fayä nijamö ya çobä ya nia shulucou showadao. Ya çoblou yalo, abinaja ya nowa tajalobä. ‘Fabe. Yai Bada tä ma cui nija, cafä wa ma cui nija, ya doblonomi fe balojowä.
- 19'Ijilufä wa nofi nö lä tabobö weinaja wale nofi tabou çobä yami. Ya quili majöö. Cafä nija bä lä ojodamou wei wa bä nofi lä tabolenaja, wale nofi tabou da bädao.’ Einaja ya e cuu wei dao”, cama a nowa tamoma.
- 20'¿Öjö tawä? —Jesús a cuma—. A shulucua fa showadaalunö, bä fjö e nijamö a ço çobema. Bä fjö enö a nö blajawä fa öjöbölönö, a nofi fa ojodadalönö a läläa mö balayofälöma. A fa locoa mö balema.
- 21'Bä fjö e nija abinaja bä ijilubö a cuma. “Fabe. Yai Bada tä ma cui nija, cafä wa ma cui nija, ya doblonomi fe balojowä. Ijilufä wa nofi nö lä tabobö weinaja wale nofi tabou çobä yami. Ya quili majöö”, a cuma.
- 22'¿Öjö tawä? —Jesús a cuma—. Öjö ma cui, bä fjö e nosie juamobä ebä nija a wä shi jali falayoma. “¿Lobe, lobe! Camishi cäcö yai lä dodijidai wama cäcö çai fa juimanö, a da lucämaliyoje. Imicö da baushiblälöje. Mamicö çai da lucämälöje.
- 23'Bämacö iyabä, baca bäma a ocalo blewä lä table a da shälöje, bufi doblalolanö bämacö iyabä.
- 24'Ei ijiluyä ya nomöa ma däblalano wei ma cui, eja a demi cua ço lä cule. A ma mojolulayono wei ma cui, a yaçumö dablamous ço lä cule”, bä fjö e cuma. A fa cunö, bä bufi doblalou çai cuaaö showadaoma.
- 25'Bei —a cuma—. Bä ijilubö bada e lä cui, ficali ca jamö a ojodamoma. A çoimabä jamö a ajedou däjä, bä bufi doblalou çai lä blaöano wei bä a jililema. Amowa bä a çai jililema.
- 26'A nosie juamobä ai e fa nacalänö a wälüma. “¿Wedi bei tä nofi jowa li çocamoao cubiyejei?” a cuma.
- 27'Abinaja öjö e cuma. “Fäähäfä a çobei lä cufe. Faafä nija dodijidawä a waloo çoma cudeenö, a bufi doblalou. Baca wama a ocalo blewä lä tabono wei a shämalema, bä iyabä”, a cuma.
- 28'Öjö ma cui, bä ijilubö bada e lä cui, a jushudou fa dicolonö a yafinomi. ¿Öjö tawä? —Jesús a cuma—. Bä fjö enö a famaö fe yadiobä a sibolayoma ma cui,
- 29'abinaja bä fjö e nowa taö dicooma. “Camiyänö dodijidawä bäfä nosie jaba lä juano weinaja, lasha bluca ya famaö ma cui ya cuaaö lä showale. Moli bäfä a waii bädaomi ma cui, inaja camiyä wale li taamaimi. Bufen doblalolanö iba nofi ya bä çai iyabä, shibo a wai ma cui ja camiyä wale dobanomi.

³⁰Öjö ma cui, öjö ijilufä a doblou lä mlai bei wa nofi nia shino li çoçamoamaö. Bä suwä lä dodoo wei jamö, afä blada bä bluca ma joyaleno wei ma cui, öjö wama a nofi yai çoçamoabä, baca bäma a ocalo blewä lä tabono wei wa jowa shäa dicoblamalei lä cufe”, a cuma.

³¹’¿Öjö tawä? —Jesús a cuma—. Abinaja bä föö e cuma. “Üasi. Cafä showadi camiyä nija wa cua waiquia lä cule. Ya bä bluca lä table afä bä li waiquiwä. ¿Öjö tawä?”

³²Bämacö bufi doblalobä lä. Fäähäfä bäma a nomöa ma bono wei ma cui, a demi çoç malä çoçofe. A ma mojolulayono wei ma cui, a dablamou malä çoçle”, e cuma.

San Lucas 16

¹Cama ebä lä nocamabono wei bä nija abinaja Jesús a çai cuma. —A nö lä madofibö wei a bada cuoma. A nosie juamobä, a bufi yai lä jaducui a lämaboma, cama etäbä madofi nowamabä. Öjö däjä, öjö a lä lämaqueno wei a lä cui, bada a nija a wafa dobloimi wäyämaje. Madofi bä ja bada a nö jowa waibläö dicooma.

²Öjö cudeenö, bada anö a lä lämabono wei a nacamalema. Abinaja a nowa taö ja e cuma. “Bäfä wano jiliaö dicoa lä cule. Madofi bä ja wale nö jowa waibläö. ¿Öjö tawä? Iba wa täbä bluca lä julii wei ya tä a oni möbä, sibä oni çai da juima. Cafä bäfä nia lämabou çoçaaïmi”, a bada cuma.

³A lä läono wei a bufi dayäoma. “Shädayai”, a bufi cudaliyoma. “Bada anö fei däjä yale nia lämabou çoçaaïmi. Iba blada ya bä däabä, ¿wedinaja ya li cuaaö nomöjöobä?”, a bufi cuma. “Ya lojodemi. Jude tä ja, ya nö ojodamobimi. Ya çai nacodii buobä yami. Ya quilii.

⁴Jao”, a bufi cudaliyoma. “Ya nia lä cuaaö wei tä ja, ya bufi cadidia waiquia. Bada anö wale yai joyaö däjä, ai bänö wale tabou nomöjöobeje ya bä nia nofiamaö”, a bufi cudaliyoma.

⁵Öjö cudeenö, bada a lä cui ebä madofi lä majöbono wejei bä moli nacadaö cuaaö çoçoma. ’¿Öjö tawä? —Jesús a cuma—. Jaba a lä waloqueno wei a wälima. “Iba bada a lä cuinö, cafä nija ¿wedinaja bei tä nowa tabou cule?”, e cuma.

⁶Abinaja e cuma. “Dabö dabö 100 ya ubä talö lä däleno wei ubä nowa tabou lä cule”, a cuma. A lä läono wei abinaja e cuma. “Bei, lobe. Cafä nija tä nowa lä table ei tä a li oni waiquiwä. Wa tä oni fa wälialönö, ai wa tä nia oniaö nomöjöo. ¿Öjö tawä? Dabö dabö 100 ubä nowa talö tabou ma cule, 50 a taa da nomöjöcö”, e cuma.

⁷’¿Öjö tawä? —Jesús a cuma—. Öjö a faa fa çoçmalönö, ai a naca nomöjömalema. Inaja showawä e cuma. “Iba bada anö cafä nija ¿wedinaja bei tä nowa tabou cule?”, e cuma. Öjö abinaja e cuu mö feduoma. “Nii 100 ya jibä talö lä däleno wei bä nowa tabou lä cule”, e cuma. A lä läono wei, abinaja e nowa tama. “Bei. Cafä nija tä nowa lä table ei tä a li oni waiquiwä. Wa tä oni fa wälialönö, ai wa tä nia oniaö nomöjöo. ¿Öjö tawä? Nii 100 jibä nowa tabou ma cule, 80 a taa da nomöjöcö”, a nowa tama.

8' ¿Öjö tawä? —Jesús a cuma—. Bada madofi ebä nowamabä a lä läono wei a lä cui, cama a nia fa bayeliblamonö, a jolemoma. Öjö ma cui, a lä cuaano wei bada enö etä a fa jililänö, a bufi afa moyawe tama. ¿Öjö tawä? Bä bufi lä wacacai, inaja bä bufi cuu fe balojoo ma mlai ma cui, bita jamö täbä yanowamö lä bälöblai, cama bä bayeliblamobä bä malä moyawäablalou wei —a cuma.

9' Öjö däjä abinaja Jesús a cuma. —Inaja showawä, cafä bamacö nowa taö lä cule. Blada bä ma cui, madofi bä ma cui, öjö wama bä noshi öjödabou anö täbä da nofiamaje, fedu jamö wamacö bayeliblamodayobä. ¿Öjö tawä? Wama bä bayeliblaö yalo, blada bä bufijamou lä mlai jamö, fedu jamö balimi wama bä cai bälöo nomöjodayobä.

10' ¿Öjö tawä? —a cuma—. Täbä nowa lä bolacami wei täbä ja a bejedimou waiquiwä ja, inaja showawä täbä nowa lä bluca wei täbä ma cui ja, a nia bejedimou cuo. Öjö ma cui, täbä nowa lä bolacami wei täbä ja, a jolemou si ijejewä ja, inaja showawä täbä nowa lä bluca wei täbä ma cui ja, a nia jolemou cuo.

11' ¿Öjö tawä? Blada bä bädawä ma cui ja, madofi bä bädawä ma cui ja, öjö bä ja wamacö bejedimoimi ma waiquii ma cui, täbä nowa yai lä bluca wei täbä ja, ¿wamacö nia dobämou majöo daanö?

12' Shomi etäbä ja wamacö bejedimoimi ma waiquii ma cui, afä wa täbä tabou cadidiobä, ¿täbä nia jöböaö majöoje daanö? —a cuma.

13' Abinaja Jesús a cuu çoma. —A lä ojodamou wei a lä cuinö, moli a nosie nia shino juaö cadidio. Ai a wä ma fale ma cui, bolacabö cäcöbö nosie nö juamamou doblobimi waiquiwä. Ai a nosie juaö mlai ja, ai a nosie nia shino yai juaö ayao. Ai a wä shino juaö bufi doblao waiquiwä cudeenö, ai a wä nia waii. Inaja showawä, madofi wama bä nofi yaibou dicoo ja, Yai Bada wama a nofi nö yaibobimi waiquiwä, wama a nosie juabä —Jesús a cuma.

14' Jesús nija faliseo bä bada yömöca ma daono wei ma cui, blada bä nofi yaibou waiquiaje cudeenö, a wä nö waiblamaje.

15' Öjö ma cui, abinaja Jesúsno bä nowa tama. —Ai täbä nija jai dodijidawä wamacö dablamos bufi ma doblao wei ma cui, Yai Bada tänö wamacö bufi daö. ¿Öjö tawä? Yanowamö täbänö tä afa showadi dodijidawä lä taö wejei tä ja, Yai Bada a shi doimi. Tä nofi yai wälibou —bä nowa tama.

16' Abinaja Jesús a cuu çoma. —Fe ojomalewä Juan a wawäo showao mlao däjä, Moisesi tä a ma cui, Yai Bada a wäno wäyälwä bä a ma cui, judio bamacö nija öjö bä a wäyämamou balöoma. Fei däjä, Yai Bada tänö cama ebä cai nia lä cuo wei tä a wäyämou nomöjöa lä cule. Juan a wawäblou däjä tä a jaba fa wäyänö, öjö yama tä a dodijidawä wäyäo lä showale. Yai Bada ebä cublobä, fei däjä bluca bä wabäo fe yadia.

17' Öjö ma cui, Moisesi tä a nia joyamoimi —a cuma—. Judu mösö ma cui, bita a ma cui, öjö bä joyamoimi ma waiquii ma cui, Moisesi bei etä a yai joyamoimi yaiquei. Moli tä mamö wai lä onile ma cui tä nia oni joyamoimi.

18' ¿Öjö tawä? —a cuma—. Ai a lä cuinö, bä suwäbö e fa joyalönö, ai a suwä dääö majöö ja, a dobroimi. “Iba ya dää majölei lä cufe”, cama a bufi cuu ma bäle ma cui, inaja Yai Bada a bufi cuimi. Ma. “A lä joleblalou wei a”, Yai Badanö a nofi li tabou. Inaja showawä, ai a walo lä cuinö, suwä joyano a dääö majöö ja, öjö a çai dobroimi mö feduwä. “Bä feyalobö enö a malä joyaleno wei”, a bufi cuu ma bäle ma cui, inaja Yai Bada a bufi cuimi. Ma. “A lä joleblalou wei a”, Yai Badanö öjö a nofi çai tabou —Jesús a cuma.

19' Abinaja Jesús a cuma. —A nö lä madofibö wei a cuoma. Camishi bä no lä bluca wei bä ja, showadi a didioma. Shi delelewä ai ebä liyäjawä cuoma. Shuducaje, au ai ebä dodijidawä cuoma. Nii dodijidawä bä ja, showadi a iyadima.

20' A nö jölili lä bleaaö wei, a wafa Lasalo cuo mö feduoma —a cuma—. A nö lä madofibö wei e yafi sibo jamö, showadi a bladalama, täbä lä fablaaö wei jamö. Walacasi bänö a jödödöblalema yalo, a nö bleaama.

21' A nö ofili bleaaö fe fa balojoonö, a nö lä madofibö wei a iyabä jamö, bä canosi lä bläläö wei bä ja, a bufi waiyoma. A nö bleaaö ma waiquio däjä, jjiima bä fa waloiquiyonö a walacasibö nacoaö majöoyolumaje.

22' ¿Öjö tawä? —Jesús a cuma—. A nö jölili lä bleaano wei a fa nomalönö, Ablaamö a cuodayobä jamö Yai Bada etäbä ajele lä cuinö a bäladayomaje. A nö lä madofiböono wei a ma cui, a bufi çai mlaa mö feduquema. A nomawä didiquemaje.

23' Öjö däjä, shobali wacö jamö a nö lä madofibö wei a fa cuicunö, a nö ninili bleaaö fe balojooma —a cuma—. A mö fa nonoicunö, Ablaamö a blajawä dalalema. Ablaamö nija Lasalo a lä ajedeono wei a çai daa mö fedua showalalema.

24' Ablaamö nija a comöö ja, abinaja e cuma. “Fabe, Ablaamö. Wale nofi da ojadaboyo. Lasalo a da shömölö, mau u jamö bei imi fa cadalönö, wale aca si ajiamabä. Ei wacö jamö ya nö ninili bleaaö malä cule”, a cuma.

25' Öjö ma cui, abinaja Ablaamönö a nowa tama. “Uasi, a bufi da jaducuicu. Wa demöö däjä, afä wa täbä dodijidawä fa dälönö, wa dodijidawä cuo ayaoma. Öjö waiquiwä. Lasalo dodijidawä a cunomi. Öjö ma cui fei däjä cama a bufi shino dodijidawä cua nomöjöö lä cule. Cafä fei däjä wa nö li bleaaö nomöjöö.

26' Abinaja çai. Eja bä lä cule, cafä wamacö nija bä bucaduo mlaobä, Yai Bada tänö täca nö bloque dalowä quilijiwä malä lämabole. Mijamö wamacö lä cule, eja wamacö bucaduo dobroimi mö feduwä”, Ablaamönö a nowa tama.

27' Ablaamö nija abinaja a cuu nomöjööma. “Fabe. Eja a juimi waiquiwä ja lä, fayä nijamö Lasalo a da shömölö, ¿öjö tawä?

28' Iba mashi 5 bä bälöa malä jäle. Öjö bä yai wasöbä, ¿öjö tawä? Eja yamacö nö bleaabä jamö, öjö bä çai juu dicoo mlaobä”, a cuma.

29' Öjö ma cui, abinaja Ablaamönö a nowa tama. “Ma. Moisesi tä a tabouje. Yai Bada a wano wäyälwä bä a bluca çai tabou mö feduaje. Öjö bä a yai jiliabeje”, a nowa tama.

³⁰Öjö dǎjä, Ablaamö nija abinaja a cuu nomöjööma. “Ma, öjö bǎ ǎ nia jǐliaimije. Fabe, Ablaamö. A yai lä nomalayono wei a demi jocädou fa çolunö, öjö a wǎ yai fa jǐliajenö, wǎlidiwǎ tä ja bǎ bufi lädou weicätǎ”, a cuma.

³¹Abinaja Ablaamönö a nowa tama. “Moisesi tä ǎ jǐliaö moji waiquiweje ja, Yai Bada a wǎno wǎyǎlewǎ bǎ ǎ çai jǐliaö moji waiquiweje ja, ai a demi jocädou ma ço wei ma cui, öjö a wǎ ma cui ja bǎ bufi nia jaducubloimi”, a cuma. ¿Öjö tawǎ? —Jesús a cuma.

San Lucas 17

¹Cama ebǎ lä nocamabono wei bǎ nija abinaja Jesús a cuma. —Tǎbǎ doblamaö mlaobǎ showadi tä nia lädio ma cui, tǎbǎ yai doblamaö lä mlajei bǎ lä cui, Yai Bada tänö bǎ nö nia bleaamaö fe balojoo.

²Yanowamö a ja, bei olafi jamö maa ma bada fa jalemacöjenö, modu u jamö a befi çai queamaöje ja, öjö a nö bleaaö ma cuquei wei ma cui, iba ai a wai lä wǎlidiyamale a lä cui, öjö bei a nö nia shino yai bleaaö cuquei.

³Bǎ da moyaweicu, öjö lä. ’Aifǎ a yabäçao dicoo ja a da wasö —a cuma—. A bufi mö yabablou ço ja, a jushuo dijǎ. Wa nowa lä tabole tä da mladamalö.

⁴Moli tä mö jalu showawǎ ma cui ja,

⁷ wa yabäçao çua ja, inaja showawǎ 7 wa nia wasöö cublou mö feduo. Wa lä yabäçano wei,

⁶ wa etǎ nowa mladamaö ma waiquiono wei ma cui, inaja a cublou çoçaa ja, “¡Uo!”, wa bufi nia cuimi. A bufi jowa yabablou ço ja,

⁷ ma cui ja wa etǎ nowa nia mladamaö ço —a cuma.

⁵Jesúsnö bǎ shömabǎ bǎ lä nocamabono wei bǎ lä cui, abinaja Bada tä nija bǎ cuma. —Yai Bada yama a nofi yai mölabou shaliliobǎ, yamalecö bufi da bayelibalö —bǎ cuma.

⁶Öjö dǎjä, abinaja Bada tänö bǎ nowa tama. —Yai Bada wama a nofi lä mölabole, wamacö bufi nö wiisibö wǎlojolanö wama a nofi bejedi mölajadaö bädao fa cunoja, wamacö nö doblobö wei. Nana shimono wai wiisibö ma cui, shifibǎ malǎ badaö wei. Öjö dǎjä, quiji fii defi ma cui, Yai Bada wama a nofi yai mölabolanö wama fi nowa taö fa cunoja, fi nö majöblobö wei. “¡Cafǎ fii wa defi lä cui, defi da ucablamolu! ¡Modu u jamö, defi dömoa da nomöjöbalufälö!”, wamacö cuu fa cunoja, wamacö ǎ nö julebö wei —a cuma.

⁷Jesúsnö bǎ yömölaö showao ja, abinaja a cuma. —Cafǎ wamacö ai a lä cuinö wa nosie juamobǎ wa shömaö ja, ficali täca jamö ma cui, oweja bǎ cuobǎ jamö ma cui, öjamö a nia ojodamou. ¿Öjö tawǎ? A fa ojodamonö, yafi jamö a ço çobei. Öjö dǎjä, wa iyamabǎ, ¿wa nia nacaao showadao daanö? Mlaicätǎ.

- ⁸Abinaja wa nowa nia yai taö. “Iba nii bä taö da nomöjöö. Camishi au wa cö ayoa fa dodijidalänö, bä da baquiyo. Camiyä ya iyaa fa balölönö, waija, cafä wa iyaö nomöjööbä”, wa nowa nia taö.
- ⁹¿Öjö tawä? —a cuma—. Wa nosie juaö tä nowa ja, wa bufi nia afa doblalou wäyämöimi. Wa nosie juamobä a li waiquiwä malä cui.
- ¹⁰Inaja showawä, Yai Bada a nosie juamobä wamacö. Wama a nosie juaö jödödou däjä, abinaja wamacö nia cuu. “Yamacö nofi doablamobä yamacömi. Yai Bada a nosie juamobä yama ecö waiquiwä malä cui”, wamacö nia cuu —Jesús a cuma.
- ¹¹Jelusale jamö Jesús a juu däjä, Samalia, Calilea tä ulifi möamo jamö, a jayuquefälöma.
- ¹²Öjamö lä ai a shabono jamö a yafii ja, jalili 10 bänö a mö fa bamalöjenö, bä bayäcäwä ublajao mö baoma. Täbä sicö lä jodemaö wei tä wayunö bä nö bleaama.
- ¹³İcali bä a blajawä fama, bä nofi nia ojode fa tablamonö. —İBada tä! İJesús! Yamalecö nofi da ojodadalö —bä cuma.
- ¹⁴Jesúsnö bä möö däjä abinaja bä nowa tama. —Nofi bäyäälewä bä nija bä da mömodu —bä nowa tama. Öjamö bä juolanö bä jaloa showalayofälöma.
- ¹⁵Ai a lä cui, cama a jalou fa damolalunö, Yai Bada a nofi icali doablalanö, Jesús nija a lälää mö yabaa çoquema.
- ¹⁶Jesús a cotä jamö a möfe fa deialunö, a bufi afa doblalou wäyämoma. ¿Öjö tawä? Judio öjö a cuonomi, Samaliateli a li cuoma.
- ¹⁷Öjö däjä, abinaja Jesúsnö bä nowa bluca tama. —İ10 ya bä nofi bluca jaloa lä showamalalöfe! Ai bä 9 lä cui, ¿wedi jamö bei bä li?
- ¹⁸Yai Bada a nofi doablaö çooyolubä, ei shomi a lä cui, ¿yami a mö lälääö yabaö ayaobä a li tawä? —bä nowa tama.
- ¹⁹Öjö däjä a lä jalolayono wei a nija a wä fama. —Wa fa ublaicunö a da alufälö. Wale nofi mölaboma yalo, bäfä jalomalei lä cufe —a cuma.
- ²⁰Faliseo bä bada lä cuinö, Jesús a wälímaje. —Yai Bada tänö cama ebä nia çai lä cuo wei tä lä cui, ¿wedi däjä tä nia yai wawäblou? —bä cuma. Abinaja Jesús a cuma. —Wamacö mamö ma showadio wei ma cui, “İFei däjä Yai Bada tänö cama ebä nia çai cuo!” wamacö cubä tä nia dablamoimi.
- ²¹¿Öjö tawä? “İEja, eja! Bada tänö cama ebä nia çai lä cuo wei, eja tä wawäblou lä cule”, bä nia cuimi. “İQuija, quija!”, bä nia çai cuimi. Cama ebä çai lä cuo wei, wawädowä tä dablamous mlai, cama ebä bufi jamö a läo jätöo —a cuma.
- ²²Cama ebä lä nocamabono wei bä nija a wä faö nomöjöö ja, abinaja bä nowa taö ja a cuma. —Obi, täbä nö nia yai lä bleaaö wei tä nia wawäö. Öjö däjä, camiyä ya lä yanowamöblaleyoluno wei, bejedi lä wamale nia bufijaö. “Öjönö, moli yamalecö çai

yai bälöo dodijio fa cunoja”, wamacö bufi nia ma cuu wei ma cui, tä nia wawäo jaöomi.

23’Wale ɤfa ma wäyäo wejei ma cui, bä möla dijä —a cuma—. “;Bei, bei! ;Quijamö a wawäo lä cule!”, bä ma cuu wei ma cui, “;Bei, bei! ;Eja a wawälayoyoluu lä cufe!”, bä ɤai ma cuu wei ma cui, bä ju dijä. Öjö bä nija bä nocao dijä.

24Camiyä ya lä yanowamöblaleyoluno wei ya juu ɤo däjä, ya nia juu ɤatoomi. Tä wacö ije ijemou däjä, mösö wawäoblou lä culenaja ya nia wawäowä dablamou.

25Öjö ma cui, öjö tä cublou showao mlao däjä yale nö nia bleaamaö balöoje. Ei bä bluca lä bälöblai bänö wale nia waiije.

26’;Öjö tawä? —a cuma—. Noewä däjä bä yanowamö lä cuaano weinaja, inaja showawä, camiyä ya lä yanowamöblaleyoluno wei ya juu ɤo lä bufiöle däjä, bä nia cuaaö ɤo.

27Bä showadi iyaö ɤai ɤoɤamoma. Bä ɤai doayoma. Inaja bä cuaaö showao däjä, bä nö dao mlai ja, canawä a bada jamö Noewä a lucälayoma. Öjö däjä tä fe ulifi bada baoblaliyoma. Bä bluca waicaö showadaolaliyoma.

28’Lodo a bälöo lä nodiono wei däjä ma cui, inaja tä cuo showaoma —a cuma—. Bä showadi iyaö ɤai ɤoɤamoma. Madofi bä nomöjayoma. Bä ficallimoma. Bä yafimoma. Inaja bä cuaaö showao däjä, bä nö dao mlai bä cuaaö showaoma.

29Öjö ma cui, Sodomateli bä nijamö Lodo a siboo däjä, fedu jamö culanö Yai Bada tänö cowa yaitawä wacö blälämalalema, wacöbä nö ɤucamou lä nacli wei. Öjö däjä, bä bluca waicaö showadaolaliyoma.

30’;Öjö tawä? —a cuma—. Camiyä ya lä yanowamöblaleyoluno wei ya wawäblou cadidio däjä, inaja showawä, bä showadi lä cuaaö weinaja bä cuaaö showao däjä, ya nia wawäblou ɤoyoluu.

31Wamacö siboa waiquilyou ja, yafi jamö bä lucäo ɤoɤaa dijä. Madofi wama bä ɤoɤabläo mlai ja, bä docua cua da showaolalu. Ficali ca jamö wamacö juu lä waiquile däjä, wamacö mö yabaaö ɤoɤaaö mlai ja, öjamö lä showawä wamacö nia docublou cuaaö.

32Lodo bä suwäbö a nofi da juduculeje, tä möö mö yabaaö lä dicoono wei a lä cui.

33’Bitä ja bä nia demi lä cudio wei tä ja bä bufi mö lä blucao wei bä lä cui, bä ɤalimi nia cuoimi —a cuma—. Öjö ma cui, camiyä ya nowa ja bä shämou lä ojodao wei bä lä cui, öjö bä nia shino ɤalimi cuo ayao.

34Cafä bamacö nowa taö lä cule. Öjö tä didi däjä, bolacabö cäcöbö nia mio ɤai ma yacajao wei, ai a nia ɤoɤamou ayao, ai a nia daamou.

35Nii bä jölöcaböbä jamö, suwä bolacabö cäcöbö nia ma ojodamou wei, ai a nia ɤoɤamou ayao, ai a nia daamou.

³⁶Ficali ca jamö bolacabö cäcöbö nia ma ojodamou wei, ai a nia çoamou ayao, ai a nia daamou. ¿Öjö tawä? —Jesús a cuma.

³⁷Jesús a wälíije ja, abinaja bä cuma. —Bada tä. ¿Wedi jamö bei wa nia yai wawäblou? —Wamacö bufi jaducublobä tä cuo weicätä —a cuma—. Ai bei tä jode blaobä jamö, waduba bä lä çoamou wei tä malä wawädole —a cuma.

San Lucas 18

¹Jesúsnö täbä yömöläö ja, shominaja tä a wäyääo jałooma. Bä bufi ujudublou mlai ja, Yai Bada nija bä nö bayeli shino nacaodibä, bä yömölalema.

²Abinaja bä nowa taö ja a cuma. —Ai a shabono jamö, bä doblou lä mlai bä jömabä a bada läoma. ¿Öjö tawä? Yai Bada tä nö quili tanomi. Yanowamö täbä ma cui nija a quilinomi.

³Öjamö a suwä lä feiblaliyono wei a çai bälöoma —a cuma—. A nö bleaama yalo, bada a nija a nofi ojode tablamobä, a wä shino fayoluma. “Wale nofi lä wälibole nija wale nofi da báyäle”, a cuu nocamoma.

⁴A wä ma fadii wei ma cui, a wä jilibläö jaöonomi. Yaçumö abinaja bada a bufi cudaliyoma. “Uo. Yai Bada ya nö quili taö ma mlai ma cui, yanowamö täbä nija ya çai quili ma mlai ma cui,

⁵ei a suwänö wale yabäcaö yalo, ya nofi nia báyäaö showadao. A wä shino fadii ja, yaçumö yale modamaö mlaobä”, a bufi cudaliyoma —a cuma.

⁶Öjö dájä abinaja Bada tä Jesús a cuma. —Öjö bada a doblou lä mlaono wei a lä cuno wei tä ja, bä bufi da jaducuicu.

⁷A doblono ma mlai ma cui, a suwä nofi yaçumö báyäa fe yadilema. ¿Öjö tawä? Yai Bada a lä cuinö, cama ebä lä yaileno wei ebä nofi yai báyäabä a. Jalu dájä ma cui, didi dájä ma cui, cama nija bä nofi ojode tablamobä bä nö bayeli lä nacaodii wei bä lä cui, lobe bä a nia juaö.

⁸Cafä bamacö nowa taö lä cule. Bä nofi lobe báyäaö weicätä. Öjö ma cui, camiyä ya lä yanowamöblaleyoluno wei ya juu ço dájä, ¿Yai Bada nija bä möläö lä cadidio wei, ya tä nia dablayoluu daanö? —a Jesús cuma.

⁹Jesús nija bä yömöca lä daono wei ai bä lä cui, cama bä nofi mölamamoma. “Camiyä yamacö shino yai dodijaö ayao”, bä bufi fa cunö, ai bä nofi wälibomaje. Jesúsnö öjö bä bufi jaducublamabä, shominaja ei tä a li wäyääo yacläoma.

¹⁰—Yai Bada etä yafi jamö, bolacabö cäcöbö nö bayeli nacao mö juma —a cuma—. Ai a lä cui, faliseo a bada cuoma. Ai a mö feduwä lä cui, Lomateli bada bä befi bä blada lä doaö wei a li cuo mö feduoma.

¹¹¿Öjö tawä? —a cuma—. Faliseo a bada fa ublaicunö, Yai Bada nija a wäfa wäyämoma. Abinaja a cuma. “Cafä Yai Bada wa nija ya bufi doblalou lä cule. Ai bä nofi jushuaö lä cuaaö weinaja ya cuaaimi cudeenö ya bufi doblalou. Öjö bä lä cuinö,

madofi bä ja bä mölamaö dicooje. Bä dodijaimi. Bä joleblalou. Ei blada doalewä a ma cui, cama a lä cuaaö weinaja camiyä ya cuaimi.

12Täbä yanöcöobä tä mö jalu cublou showaa mlai ja, bolacabö ya iyaö wasöo talei. Ya iyaö yabäcou mlai ja, cafä nija ya wə fabä, nii bä ja ya wasöo. ¿Öjö tawä? Abinaja çai. Ya täbä bluca lä dääö wei, fe usucuwä 10 ya täbä fa shedequeblalönö, ai moli täbä ja, cafä bäfä dobäblaaö”, a cuma.

13’¿Öjö tawä? —Jesús a cuma—. Inaja cama a ma cuno wei ma cui, Lomateli bada bä befi bä blada lä doaö wei a lä cui, a ublaa bayäcälänö, Yai Bada tä lä culadi jamö a mö nonoo quilima. A bufi wəlidiwä yalo, a balöcö shäablamolanö a wə fama. “Cafä Yai Bada wa lä cui nija ya wə faö lä cule”, a cuma. “Camiyä wəlidiwä talewä ya lä cui wale nofi da ojodadalö.” Einaja a cuma.

14’Cafä bamacö nowa taö lä cule —a cuma—. A nofi ojode tablamobä a wə lä fano wei a lä cui, Yai Bada tänö öjö a nofi shino yai dodijaö tabou ayalanö, a çə çəlayoma. Bä lä jömöo wei bä lä cui, Yai Bada tänö bä nia quilimaö malä majöo wei. Bä jömöo lä mlai bä lä cui, wawədowä öjö bä nia shino yai tamabou. ¿Öjö tawä? —Jesús a cuma.

15Bei. Ijilu oshe bä ma cui, bä çai waloblaamaje, Jesús imicö maquelanö Yai Bada nija bä bayelimabä. Cama ebä lä nocamabono wei bänö, öjö bä çai juu fa dalalöjenö bä wasöma ma cujei,

16Jesúsnö bä naca fe yadilema. Bä lä nocaono wei bä nija abinaja a cuma. —Wamacö ą läablalou dicoo mlai. Camiyä nija ijilu wama bä yai jumabä bä li. Ijilu bä ą juo si ijejewä lä culenaja bä lä cui, Yai Bada tänö öjö bä çai cuobä bä malä cui.

17Ei ya wə lä cui, bejedi lä ya wə. Ijilu bänö Yai Bada a wə juaö si ijejewä lä culajeinaja bä cuwä lä mlai, Yai Bada tänö cama ebä çai cuobä jamö, öjö bä nia cuomi waiquiwä —Jesús a cuma.

18Bada ai anö Jesús a wəlima. —Tä ą wäyäle, cafä wa yai lä dodijaö wei. ¿Wedinaja camiyä ya yai fa cuanö, ya li bəlimi cuobä?

19Abinaja Jesúsnö a nowa tama. —¿Wedi tabä camiyä wale ąfa dodijaö li taö? Yai Bada a lä cui, öjö moli a shino dodijaö ayao.

20Moisesi wa etä ą daö. Abinaja tä ą lä cuu wei. Wamacö nia joleblaloimi. Yanowamö wama täbä nia shäimi. Wamacö nia tomömoimi. Ai wama bä ąfa nia jole jole wäyäimi. Faafä a ma cui, naafä a ma cui, dodijidawä wama bä çai fa cuonö, wama bä ą nia juaö. ’Einaja tä ą cuu —Jesúsnö a nowa tama.

21Abinaja bada a cuu mö feduoma. —Oshe yanö ya tä ą lä jilileno wei, ya tä ą nofi bluca jaducubou showaa lä cule —a cuma.

22Jesúsnö a wə fa jilianö, abinaja a nowa tama. —Ei moli wa tä yai taö fa cunoja, wa nö dodijaö cuquebö wei. Wa bä bluca lä table, blada bä ja wa bä fa nomöjöacönö, öjö lä bä blada ja, täbä nö jolili lä bleaaö wei täbä da dobälalö. Inaja wa yai cuaaö ja,

afä täbä nowa lä bluca wei wa täbä nia tabodayou. Öjö däjä, camiyä nija a nocaa da showadaiquiyo —a nowa tama.

²³Öjö ma cui, Jesús a wä jiliaö ja a bufi wajäblaliyoma, madofi bä bluca tabou dodijioma cudeenö.

²⁴Cama nija Jesús a mamö fa showaicunö, abinaja a cuma. —Bä nö lä madofibö wei bä lä cui, Yai Bada tänö cama ebä çai cuobä jamö, öjö bä juu si ijejewämi.

²⁵Mösöcö aca jamö cameyo bä lucäo si ijejewä malä mlai. Bä nö lucäbimi waiquiwä. ¿Öjö tawä? Mösöcö aca jamö cameyo bä lucäimi ma waiquii, bä nö lä madofibö wei bä lä cui, Yai Bada tänö cama ebä çai cuobä jamö öjö bei bä lucäimi yaiquei —a cuma.

²⁶A wä lä jiliano wejei abinaja bä cudaliyoma. —Jao. Yai Bada nijamö öjö lä bä nö cuobimi waiquiwä ja, ¿wedi bei bä nia shino yai jucäamou, öjö lä? —bä cudaliyoma.

²⁷Öjö ma cui, abinaja Jesús a cuu nomöjöoma. —Ma. Cama yanowamö täbä bayeliblamou buobä, tä cuami waiquiwä. Öjö ma cui Yai Bada tänö täbä bayeliblabä, öjö a —a cuma.

²⁸Abinaja Pedro a cuma. —Camiyä yamacö yafibö fa damoicunö, cafä nija yamacö nocaa lä cule —a cuma.

²⁹⁻³⁰Abinaja Jesúsno bä nowa taö ja a cuma. —Cafä wamacö nija ei ya wä lä cui, bejedi lä ya wä. Yai Bada tänö cama ebä nia çai lä cuo wei tä ja bä bufi mö blucao yalo ebä madofi daaöje ja, bä nö bleaaö mlaicätä. Bä yafibö ma daamamou wei ma cui, bä suwäbö ma damoquei wei ma cui, cama mashi ebä ma damoquei wei ma cui, bä föö, bä nöö bä bluca ma daquei wejei ma cui, bä ijilubö ebä ma daaö wejei ma cui, Yai Bada tänö eja bä dobäo fa balöonö, obi bä nia bälhimiblamadayou —a cuma.

³¹Jesúsno cama 12 ebä çai fa bayäqueicunö abinaja a cuma. —Bei. Jelusale jamö bamacö juu lä cuimadi. Öjamö lä bamacö waloo däjä, Yai Bada a wano wäyälwä bänö wale äfa wäyää lä balöono wejei, tä ä nia bejedi cublou. Camiyä ya lä yanowamöblaleyoluno wei yale nia jowa lä taamano wejei, öjö tä nia bluca wawäblou.

³²Wale fa juwälöjenö, judio bä lä mlai bä nija wale nia jöböaöje. Öjö bänö wale nö fa waiblajenö, wale nö nia bleaamaö nö quiliaöje. Wale nia çai cläshaöje.

³³Wale si fa yafelimalalöjenö, wale nia çai shäöje. Wale ma shälei wejei ma cui, bolacabö tä mö didi fa cublalunö ya demi nia jocädou ço —a cuma.

³⁴Öjö ma cui, Jesús a lä cuno wei tä ja bä bufi jaducuanomi dodijiwä. Yai Bada tänö tä ä jöyamaboma. Tä ä jilimou nofi fa mojuduonö bä bufi möblonomi.

³⁵Jelico jamö Jesúsno bä çai ajedou däjä, bei yo casö jamö a jubäbö loo mö baoma. Bä lä jayuaö wei bä nija a nofi ojode tablamobä, a nacodima.

³⁶Bä ä bluca lä juimi bä äfa jayuaö fa jililänö, bä wälima.

³⁷Abinaja a nowa tamaje. —Nasaleteli Jesús a jayuo lä cube —a nowa tamaje.

³⁸Öjö dāja, a lä jubäböono wei a lä cui icala a comöma. —¡Jesús! ¡David nodiwä wa e lä cui! ¡Wale nofi da ojodadaliyo!

³⁹Mamicai a nia fa lomabojenö, bä lä balöono wei bänö a wä ma wasöno wejei ma cui, a wä yai nacläa majöa dicolayoma. —¡David nodiwä wa e lä cui! ¡Wale nofi da ojodadaliyo!

⁴⁰Jesús a ublaa fa yanöcödalunö, a lä jubäböono wei a ajedebblamaö bufima. A ajedebloyoluu dāja, a wäläma.

⁴¹—¿Wedinaja bäfä li taamabä, bei wale li nacaä lälei? —a cuma. —Bada tä. Ya täbä möbä wale mamocu da dodijidablaliyo —a cuma.

⁴²Öjö dāja, abinaja Jesúsno a nowa tama. —Mamocu da dodijidablalu. Wale nofi mölaboma yalo, wa jalou lä cule —a nowa tama.

⁴³Öjö dāja a mamocu dodijidablou fa showadalonö, Yai Bada tä nofi doablalanö a yaua showaquema. Bluca bä lä çocamono wei bä ma cuinö, a jalou dabläöje dāja, Yai Bada tä nofi bluca doablamaje.

San Lucas 19

¹Jelico jamö Jesús a fa waloicunö, a jayuaö cuaama.

²Lomateli bada bä befi bä blada lä doano wei a bada lä cui, öjamö a bada bälöoma. Saqueo a wäfa cuoma. A nö madofiböo dodijiomä.

³Jesús a möö bufi doblaoma ma cui, bä lä çocamou wei bä fa mashiquionö bä läo dicooma. A labajao fa mlacunö a möö doblonomi.

⁴Öjö cudeenö, Jesús a juu cuaafälöbä jamö a läläa fa balölönö, ico fi bada ja a dua balöbedayoma. Öjamö a nia malä jayuaö wei.

⁵Saqueo a döcäodayobä jamö Jesús a fa waloicunö, a mö fa nonodalunö a nowa tama. —Saqueo. Lobe a da itolu. Fei dāja, afä yafi jamö ya nia malä cuo wei —a nowa tama.

⁶Öjö cudeenö, Saqueo a shi jaliwä itolayoma. Cama e yafi jamö, bufi doblalolanö Jesús a walomaquema.

⁷¿Öjö tawä? Saqueo nija Jesús a çoblou fa dalalöjenö, ai bä bufi bluca jushujudaliyoma. —Wälidiwä talewä nijamö a nofi fama lä waloicufe —bä nowa tayoma.

⁸Öjö dāja, Bada a nija Saqueo a fa ubladalunö, abinaja a cuma. —Bada tä. Ya bä bluca lä tabole, bä nö jölili lä bleaaö wei bä nija ai ya bä mashi nia sheleläö cuaaö. ¿Öjö tawä? Ai ya ebä blada däa lä jatoleno wei ya bä nia çamaö. Ya bä çamaö ja, ya bä lä däleno wei ya tä çamaö bädao mlai, ai ya bä nia yädädamaö cuaaö majöo. Moli

ya lä däleno wei a ja, 4 ya bä nia çõamaö. Inaja showawä ya bä nia yädädamaö cuaaö—a cuma.

⁹Abinaja Jesúsno a nowa tama. —Ablaamö a lä cuinö, Yai Bada a nofi lä mölabono weinaja wa nofi mölabou nodia cua yalo, afä wa bä çai lä cule wamacö nia bayeliblamou. Wamacö nia lä jucämou wei, cafä wamacö nija tä ʔ fei däjä waloqueyoluu lä cufe.

¹⁰Camiyä ya lä yanowamöblaleyoluno wei ya lä cuinö, bä lä mojoluu wei ya bä dayäabä ya malä waloqueyoluno wei, ya bä çõablaö çõobä —a nowa tama.

¹¹Jesús a wʔ jilifälöbeje jamö, Jelusale jamö bä ajedou waiquia yalo, shominaja tä ʔ li wäyäö yacläoma. “Fei däjä, Jelusale jamö Yai Bada tänö cama ebä nia çai cuo dodijio”, bä bufi çai jole cuma cudeenö.

¹²Öjö cudeenö, abinaja Jesús a cuma. —A nia bada läo lä nomöjööno wei a wʔlo cuoma. Bada a yai tablamodayobä, blajai jamö a nia juu balöoma. Öjö däjä, cama etä yai ulifi jamö a nia waloo çõoma.

¹³A juu showao mlao däjä, a nosie juamobä 10 bä yai lä dodijano wei ebä nacalema. Öjö 10 bä nija, blada moli ebä jöbödaö fa cuanö, 10 ebä jöböa taquema, bä nowa lä bluca wei. Abinaja bä nowa tafälöma. “Ya waloo showao mlao däjä, dodijidawä iba wama bä blada nia nomöjõaö juo, wama bä omaö juobä”, bä nowa tafälöma.

¹⁴¿Öjö tawä? —a cuma—. Öjö ma cui, cama ai ebänö a nofi wʔlibomaje. A nofi fa wʔlibojenö, ai ebä shömöa nodia jelemaje, bada a tabladayobeje jamö, ebä ʔ läobä. “Camiyä yamacö nijamö a bada bälöobä, yama a bufiimi waiquiwä”, bä cubä.

¹⁵Öjö ma cui, a bada tablamaö fe fa yadiojenö, a çõa çõbema. A çõa fa çõbonö, cama a wʔ juamobä 10 ebä nacamaö bufima, blada bä ja bä lä dobälalefälöno wei bä lä cui. Cama blada ebä oa lä jämaleno wejei, bä nia bluca fa mönö, bä nia wʔlima.

¹⁶A jaba lä waloqueno wei, bada nija a icuquema —Jesús a cuma—. A fa icuicunö abinaja e cuma. “Bada tä. Camiyä nija afä wa blada lä jamaqueno wei, dodijidawä ya nomöjõaö fa juonö, 10 ya bä blada yädäblamaö çõlayoma”, e cuma.

¹⁷Abinaja bada anö a nowa tama. “iWa dodijaö juo waiquioma lä! Ya blada wai da jöböquii a ma moliono wei ma cui, wa dodijaö juo fe yadioma yalo cafä bada bäfä nia tablamaö. Shabono 10 bä jamö wa nia bada läo”, a nowa tama.

¹⁸¿Öjö tawä? —Jesús a cuma—. Ai e mö feduwä lä cui, öjö a icua nomöjõquema. Abinaja a cuma. “Bada tä. Camiyä nija afä wa blada lä jamaqueno wei, dodijidawä ya nomöjõaö fa juonö, 5 ya bä blada yädäblamaö çõlayoma”, e cuma.

¹⁹Cama nija a wʔ faö mö feduo ja, abinaja e cuma. “Shabono 5 bä jamö wa bada läobä cafä wa”, a nowa tama.

²⁰Ai e icua fa nomöjõicönö, abinaja e cuma. “Bada tä. Camiyä nija afä wa blada lä jamaqueno wei, ei a. Camishi acadafu cäcönö ya fa jʔloblalönö ya jʔlobou showaa lä cule. Bei.

- 21** Bäfä daö yalo ya malä quilino wei. Afä wa bä fe blacäjamaö talei. Ai bä ojodamobä jamö showadi cafä wa shino bayeliblamou talei”, e cuma.
- 22** ‘¿Öjö tawä? —Jesús a cuma—. Abinaja bada enö a nowa tama. “Cafä wa wä showawä ja, bäfä nia dobroimi jömaö. Wale a juaö dobroimi waiquiwä. Cafä wa wä faö ja, iba ya bä fe jowa lä blacäjamaö wei wa tä jowa daö waiquioma. Ai bä ojodamobä jamö camiyä ya jowa shino lä bayeliblamou wei wa tä çai malä dale.
- 23** Inaja ya jowa cuaaö waiquiwä ja lä, iba wa blada omabä, ¿wedi tabä bei wa li wabäonomi, öjö lä? Bä blada lä nomöjöö wejei bä nija wa blada majöaö fa cunoja, iba ai wa bä nö shino wai çocablamalebö wei”, a nowa tama.
- 24** ‘Öjö däjä, bä ublao lä ajedeono wei bä nija abinaja bada a cudaliyoma. “Quijinö moli a blada lä table a da çoleje. 10 bä lä table nija e jöbäa da majöcöje”, a cuma.
- 25** Bada nija abinaja bä cuma. “Ma, bada tä. Öjö 10 ebä li cua malä waiquile”, bä cuma.
- 26** Öjö däjä, bada a wä fama. “Ma, cafä bamacö nowa taö lä cule. Bä li dodijaö yalo, bä lä tabolajei bä nija ai bä nia jöböamou ço. Öjö ma cui, bä tabou lä mlajei bä nija, wiisibö a tabou ma bälajei ma cui, a nia çoamamou, bä li dodijaimi waiquiwä cudeenö.
- 27** ‘Jao. Öjö ma cui, camiyä nija bä nö lä nabämou wei ya bä nö nia yai bleaamaö, bada wale lämaö nofi lä wälibono wejei bä lä cui. Eja öjö bä bluca çai da juimaje. Ya mammo showao däjä wama bä shäyolubä”, a bada cuma. ¿Öjö tawä? —Jesús a cuma.
- 28** Öjö tä a wäyöö fa waiconö, Jelusale jamö bä lulua taa çolefälöma.
- 29** Befajeiteli bä lä bälöle jamö, Jesúsnö cama ebä çai ajedeblaleyoma, Bedaniateli bä çai bälöo mö lä fedule jamö. Oliba tä balöcö jamö bä çai fa waloicunö, öjamö culanö bä lä nocamabono wei ai cäcöbö shömöa balölema.
- 30** Abinaja cäcöbö nowa tama. —Wafäcö juu fa shaliloimadunö, quiiji a shabono jamö cäcöbö da yafilujulu. Wafäcö lä çoblöle jamö, yalo bulo a nata lä cule wafä a nia ijilubö dablajalayu, täbä döcämabou showaono lä mlai. Öjö wafä a nata fa cushälänö, äyämö a çai juböö da çoima.
- 31** Ai anö wafäcö wälii bädao ja, “¿Wedi tä tabä wafä a nata cushälei cufe?”, a cuu bädao ja, abinaja wafäcö cuu. “Bada anö a majöamaö bufii cublei”, wafäcö cubä — Jesúsnö cäcöbö nowa tama.
- 32** Öjö cudeenö, cäcöbö lä shömöleno wei cäcöbö aa fa showalöfälönö, Jesús a lä cuno weinaja, inaja showawä tä dabölalema.
- 33** Bulu a nata ijilubö fa cushäblabölönö, cama ebä yalo lä cuono wei abinaja ebä cuma. —¿Wedi tä tabä bulo bei wafä a nata li ijilubö cushäaö cule? —ebä cuma.
- 34** —Bada tänö a majöaö bufii cublei —cäcöbö cuma.

- ³⁵Jesús nija bulo a çai waloböa çoqueyoluma. Cäcöbö çai waloböa fa çoquiyonö, yalo a mabucabö ja, cama cäcöbö camishibö maquea fa balöaböcönö, Jesús a döcamaböquema.
- ³⁶Öjö däjä, Jesús a befi çai jufälöbä jamö, bufi doblalolanö a befi çai jayuamamaje. A befi çai nia lä jayuono wei yo jamö, bä camishibö çai jilablaamou läafälöma.
- ³⁷Oliba tä balöcö ja, yo dömöobä ja bä fa waloicunö, Jelusale tä casö ja bä ajedolanö, Jesús nija bä lä nocaono wei bä a shi bluca dou cuaama. Jesúsino Yai Bada tä lojode dablamaö lä cuaano wei tä ja, a noshi jaliwä fa queboimadujenö, Yai Bada tä nofi doablaö cuaaö dodijiofälömaje.
- ³⁸Abinaja bä cufälöma. —;Yai Bada a wänö a lä juimi, öjö Bada cä tä! ;Öjö lä a shino yai bayeliblamobä a! Fedu jamö tä lä cule a sho, ;dodijidawä bämacö bälöo yanöcöobä! ;Bada tä lä culadi a nofi shino yai doablamobä! —bä cufälöma.
- ³⁹Bä lä çoçamono wei bä nija, faliseo bä bada lä coyocoono wei bä a fama. —Tä a wäyäle. Wa bä lä nocamabole bä a da wasö —bä cuma.
- ⁴⁰Öjö ma cui, abinaja Jesús a cudaliyoma. —Cafä bämacö nowa taö lä cule. Ei bä a waidou fa cunoja, wale nofi doablabeje, maa mabä ma cui mabä a nö bädou nomöjölayobö wei —a cuma.
- ⁴¹Jelusaleteli bä shabonobö jamö Jesús a ajedolanö, bä yafibö dablaö däjä a fa wajäblalunö, bä nofi ojode taö ja, a öcöma.
- ⁴²Abinaja a blajawä cuma. —Wamacö bufi nia yai lä yanöcöo wei wama tä daö fa cunoja, fei däjä ma cui wamacö nö bayeliblamou showadaobö wei. Öjö ma cui, cafä wamacö nija Yai Bada tänö tä a joyabou lä cule.
- ⁴³Wamacö nö nia lä bleaaö wei tä nia obi wawäö. Bä nö lä nabämou wei bänö wamacö nabä fa juimajenö, wamacö fe fa fayoblalöjenö bä nia alanamou shoqueaö, wamacö shi wälimabobeje.
- ⁴⁴Cafä wamacö yafibö nabä fa quebojenö, wamacö lä bälöle wamacö mö nia watäblaöje. Wamacö yafibö wälia fa jödödöblalöjenö, ai ma jamö ma nia maqueo feibloimi. Yai Bada tänö wamacö bayeliblabä ya ma waloqueyoluno wei ma cui, wamale nö öjöböaö fa mlacunö wamacö nö nia bleaaö —a Jesús cuma.
- ⁴⁵Jelusale jamö a fa waloicunö, Yai Bada etä yafi sibo lä jicoloji jamö Jesús a lucälalayoma. Öjamö lä blada bä ja täbä madofi lä jöbäö wejei bä lä cui bä yashublaö ja,
- ⁴⁶abinaja a cudaliyoma. —Abinaja Yai Bada etä a oni cuu. Iba yafi a lä cui, camiyä nija bä nö bayeli nacaobä a yafi cuobä. 'Einaja etä a ma cuu wei ma cui, täbä lä tomöμου wei bei wama a yafi li tablaö bashiblalayoma —Jesús a cuma.
- ⁴⁷Yai Bada etä yafi jamö showadi täbä yömöladima. Nofi bäyälewä blowäjäwä bä ma cuinö, Moisesi tä a ja täbä lä damaö wejei bä ma cuinö, judio ai bä bada ma cuinö, a shäbeje a nofi washuamaje.

⁴⁸Öjö ma cui, a wə lä jīlii wejei bā bluca mashiquioma cudeenö a shäö jətoobeje etä cuonomi.

San Lucas 20

¹Ai dājä, Yai Bada etä yafi jamö Jesúsno bā damaö çoma. Tä ʔ lä dodijidai tä ʔ wäyää dājä, bada bänö a nabä icuquemaje. Nofi bāyäälewä blowäjäwä bā ma cuinö, Moisesi tä ʔ ja täbä lä damaö wejei bā ma cuinö, judio ai bā bada ma cuinö, Jesús a nabä fa icuicunö,

²abinaja a nowa tayolumaje. —Bei. Yamalecö da yömöla. Einaja wa cuaabä, çcafä bada bei wa tawä? çWedinö bada bei wa li tablamalema, öjö lä? —a nowa tamaje.

³Jesús a wə juo ja, abinaja bā nowa tama. —Cafä wamacö ma cui, bāmacö nia wəlii mö feduo. Wamale da yömöla, öjö lä.

⁴Jəo. çWedinö Juan a shömölema, täbä fe ojomabä? çYai Bada tänö a shömölema tawä? Ma, çyanowamö täbänö a shömölema sijewä? —Jesúsno bā nowa tama.

⁵Bā nowa nia lä juo wei tä ʔfa wayoaö balöoje ja, bā ʔ shino läablalodii buoma. Abinaja bā nowa tayoma. —“Juan a lä cui, Yai Bada tänö a shömölema”, bāmacö cuu dicoo ja, “Inaja lä wama a nofi ma table ma cui, çwedi tä tabä, wama a wə bejedi li bufinomi?”, a nia cuu majöo dicoo.

⁶Öjö ma cui, “Yanowamö täbä nija a shömamoma”, bāmacö cuu dicoo ja, ei täbä bluca lä ublale bā nia jushudou. Maa ma bänö bāmalecö nia shäyääje. “Yai Bada a wəno wäyālewä Juan a cuoma”, bā cuu malä shalilio wei —bā nowa tayoma.

⁷Öjö cudeenö, bā ʔ jəwa mojudumoma. —Cuwi. “Öjönö Juan a shömölema a”, yama a nofi çai taboimi —bā cuma.

⁸—Jəo —Jesús e cuma—. Camiyä ma cui, cafä wamacö nija “Öjönö wale shömölema ya”, ya çai nia cuu ayaomi —a cuma.

⁹Shominaja ei tä ʔ nia wäyää yaclāmou ja, bluca bā nija Jesús a wə faö çoma. —Ai anö uba too tobä bluca fa döalälönö, shomi täbä bälömaquefälöma, etäca nowamaö juobeje. Öjö dājä, shomi täbä ulifibö jamö a fa alufälönö, a nö dedeadayoma.

¹⁰Uba a fabä tä cublou dājä, ficali ca ja bā lä bälöblamabole bā nija, a nosie lä juaö wei ai e fa shömölönö, uba bā yefimaö ço bufima. Öjö ma cui, bā lä bälöblamabole bā lä cuinö a nabä quea mö fa baicöjenö, a si yafelilalemaje. A shinoco çai shömöa mö yabaa çolemaje.

¹¹Cama ai e shömöa ma çoleno wei ma cui, bā doblou ço fa mlacunö a si yoalalemaje. Öjö dājä, a shinoco shömöa mö yabaa çolemaje.

¹²Öjö dājä, ai e shömöa nomöjölema. Öjö a famia fa balömalöjenö, a fa jəilöjenö a çicali sibomalemaje.

- 13'Öjö däjä, cama ficali etäca lä cuono wei abinaja a bufi cuma. “¿Wedinaja ya li cuaabä da tawä? Jaõ. Iba ijiluyä ya lä nofimaõ wei ya nia shõmaõ. Öjö a nofi tabou jãtoo wejeicãtä”, a bufi cuma.
- 14Öjö ma cui, bä lä bälöblamabole bä lä cuinõ, bada tä ijilubõ e cadidiwä fa dalalõjenõ abinaja bä nowa tayolayoma. “Ei bada tä ijilubõ e cadidiwä, ficali ca nia obi tabou lä juo wei. Öjö bäma a shäa fa showadalõnõ, camiyä bãmácõnõ bäma täca ficali tabou juo nomõjöobä”, bä nowa tayolayoma.
- 15Öjö däjä, ficali täca casõ jamõ a fa jãilõjenõ, a shãlemaje. ¿Öjö tawä? —Jesús a cuma—. Bada anõ ¿wedinaja öjö bä nia taamaõ, öjö lä?
- 16Wedinaja mlai. Bä nia waicaõ mö juimaõ. Shomi täbä nija täca nia jöböamou majõõ —Jesús a cuma. Öjö a wã fa jãilãjenõ, cama bä afa lä wayoale bä nõ fa öjöbömolunõ, bä ushuyaimou dodijïoma. —¿Inaja dicoo mlai! —bã lobe cudaliyoma.
- 17Öjö ma cui, cama bä nija Jesús a mamõ fa showaicunõ, abinaja a cuu nomõjöõma. —¿Inaja mlai daanõ? ¿Wedi tabä ei tä a oniblalema, öjö lä, camiyä wale afa wäyãõ lä balõono wei tä a lä cui? Abinaja tä a cuu. Maa mabä ja a yafi nia lä itamaõ wejei bä lä cuinõ, ma wailemaje. Öjö ma cui, ma lä waileno wejei ma lä cui, a yafi colo lojodoobä ma yai li cublaliyoma. 'Einaja tä a oni cuu.
- 18Öjö ma jamõ bä fa yudublaicunõ bä lä quelayou wei bä lä cui, bä nõ nia bleaaõ fe balojoo. Öjö bä nõ nia ma bleaaõ wei ma cui, ai bä lä cui, öjö ma showawãnõ bä fe yai shãõ däjä, öjö bä nia yai cobequeblou fe balojoo —a cuma.
- 19Moisesi tä a ja täbä lä damaõ wejei bä ma cuinõ, nofi bäyãalewä blowãjãwã bä ma cuinõ, a mili juwãamaõ showadaomaje. A wã lä shomiano wei tä a ja, cama bä nõ malä öjöbömolayono wei. Öjö ma cui yanowamõ täbä nõ quili tamaje yalo, bä waiquidaliyoma.
- 20Bã jushuo waiquioma cudeenõ, Jesús nija showadi bä mamõ showadioma. Jai dodijidawã a nia fa wãliijenõ cama ai ebã shõmõa jãtolemaje. Jole jole bä nofimolanõ a wã nia fa jãliãjenõ, Lomateli bada a yai lä cui nija a wãno nia wäyãõ majõõmaje, öjönõ a yai juwãamabã.
- 21Jesús a wãliije ja, abinaja bä cuma. —Tã a wäyãle. Wa lä bejedimou wei bãfã daõ. Wa bä yõmölaõ ja, wa wã cadidou. Bada bä ma cui, bada bä lä mlai bä ma cui, wa bä nofi tabou fe usucuo fa showaonõ, Yai Bada tänõ bãmãlecõ taamaõ lä bufii wei, quili mlai ja wa tä a shino yai wäyãõ shalilou. Öjö cudeenõ bãfã nia wãlii.
- 22Lomateli bada Sesa a lä cui, öjö befi bä blada lä nacaõ wejei, judio bãmãcõ ma cuinõ, ¿bãma bä blada jöböabã tawä? ¿Tã a läami daanõ? Ma, ¿tä a läa tawä? —bã cuma.
- 23Öjö ma cui, Jesúsnõ bä daõ waiquioma yalo a mölanomi. Abinaja a cuma.
- 24—Blada a da dodobla. Ei ¿wedi bei fe nõ eõle? ¿Wedi bei a wãfa oni? —a cuma. —Lomateli bada tä Sesa —bã cuu mö feduoma.

- 25—Jao —e cuma—. Sesa cama etäbä ja, wama a li dobäbä, öjö lä. Yai Bada cama etäbä mö feduwä lä cui täbä ja, cama wama a li dobäö mö feduobä —a Jesús cuma.
- 26Bluca bä mammo showao däjä, Jesús a wə shominajamaö bufi ma doblaono wejei ma cui, a wə shaliliablalou yalo, mamicaï bä bufi shino shädayaimou bädaoma.
- 27Öjö däjä, saduseo bä bada lä cuinö, Jesús a nabä icua nomöjöquemaje. Öjö bä saduseo lä cui, abinaja bä bufi shino cuu. “Täbä lä nomaö wei bä demi jocädou ço mlaicätä”, bä bufi shino cuu.
- 28Inaja bä bufi cuu waiquiwä cudeenö, a wə nia fa yaclämajenö a wəlimaje. —Tä a wäyälé. Moisesi tä a oni jamö, abinaja judio bämalecö nowa tama. A ijilubö cuo showao mlao däjä, ai e mashi nomaö dicoo ja, bä suwäbö e lä feiblou wei a nia dääö nomöjöo. Öjö a suwä nija bä ijilubö ebä fa tacönö, a lä nomalayono wei a lä cui, öjö bä ijilubö ebä afa nia jilabou nodio juoje. ¿Öjö tawä?
- 29’Bei —bada bä cuu çoma, Jesús nija—. Cama cäbä mashi 7 cuoma. Jaba a lä cui, a suwä lä däleno wei a ijilubö cua showaa mlai ja, a mladaliyoma.
- 30Öjö a mashinö e dää nomöjölema. Öjö ma cui, bei ijilubö e cuo showao mlao däjä, cama a ma cui a çai nomaa majölayoma.
- 31Cama ai a mashinö, e dää ma nomöjöleno wei ma cui, inaja showawä. ¿Öjö tawä? Jödödöwä bä 7 lä cuinö, a suwä dää ma nodiadalano wejei ma cui, bä ijilubö cublou showao mlao däjä bä bluca nomalaliyoma.
- 32Yaçumö, suwä a ma cui, a çai mladaliyoma.
- 33’¿Öjö tawä? —bä cuma—. Inaja tä cuoma cudeenö bäfä wəlii. Yai Bada tänö täbä demi nia jowa jocädamaö lä ço wei däjä, ¿wedi jamö a lä cui bei a suwäbö yai nia cuodayou, öjö lä? Bluca bä 7 wəlo lä cuinö a däadalaö malä cuaano wejei —ebä cuma.
- 34Abinaja Jesúsno bä nowa tama. —Yanowamö täbä showadi doayou ma cui,
- 35Yai Bada tänö täbä demi jocädamaö ço däjä, täbä nia inaja cuaaimi. “Ei a bəlimi cuobä a”, Yai Bada tänö täbä nofi lä tabou wei, täbä nia doayou çodaaïmi. Täbä nia çai suwäbö jöböamou çodaaïmi.
- 36Täbä nia nomaö çodaaö malä mlai. Ajele täbä doayou lä mlainaja täbä li cublou showadalayou. Yai Badanö täbä demi jocädamaö yalo, öjö ijilubö ebä nia yai cuo.
- 37’¿Öjö tawä? —Jesús a cuma—. Täbä demi nia jocädou lä ço wei, Moisesi a ma cuinö tä a jaba wawäblamalema. Fii defi wacö lä waono wei jamö Yai Bada a wəfa wäyämou däjä, abinaja a malä cuno wei. Ablaamö a ma cui nija, Isaacö a ma cui nija, Jacobo a ma cui nija, öjö bä nija ya lä bufiblamou wei ya. ¿Öjö tawä? —Jesús a cuma—. Einaja Yai Bada a cuma.
- 38A lä bufiblamou wei a lä cui, nomawä täbä nija a bufiblamoïmi. Bä lä demi wei bä nija a yai bufiblamou. Yai Bada ebä bluca lä cui, bä demi malä table —a cuma.

³⁹Öjö dǎjä, Moisesi tä ʔ ja täbä lä damaö wejei, ai bä ʔ fama. —Tä ʔ wäyäle. Wa ʔa juo ja, wa ʔa cadidoma —bä cuma.

⁴⁰Bä malä quilino wei. Bä fa quililalunö a ʔali çodaanomije.

⁴¹Jesúsnö bä bufi dayäamaö ja, abinaja bä nowa tama. —A shömabä Yai Bada tänö a lä yaileno wei a lä cui, Bada tä David nodiwä e jowa. ¿Wedinaja bä bufi li fa cunö, David nodiwä e ʔfa li jilabouje?

⁴²David cama a showawä ma cui, amowa etä ʔ oni jamö, abinaja a malä cuno wei. Iba Badayä a nija, abinaja Bada tä yai lä cui a cuma. “Äyämö, camiyä jayu ya boco mashi jamö a döcäa da balöiquiyo.

⁴³Bä nö lä nabämou wei bä lä cui, cafä nija ya bä möfe nia quilili bomabou.” ¿Öjö tawä? —Jesús a cuma—. Einaja a cuma.

⁴⁴Bada tä David a lä cuinö a nofi ma badabole ma cui, ¿bei e jowa nia li nodiblou majöo tawä? Bä bufi da dayäo, öjö lä —a cuma.

⁴⁵Bä yömöca bluca dao dǎjä, abinaja Jesús a cuma, bä lä nocamabono wei bä nija.

⁴⁶—Moisesi tä ʔ ja täbä lä damaö wejei bä nija bä da moyaweicu. Camishi labe bä ja bä shino didio bufi doblao talei, bä nowa lä bluca wei bä ja. Madofi bä luluabeje jamö bä lä çocamou wei bä lä cui nija, bä nö bada öjöböamou bufi çai doblao. Judio bamacö yododabä jamö, bada bä lä döcäo wei jamö bä döcäo yaimou mö feduo. Täbä iyaö çai çocamobä jamö ma cui, bada bä nijamö bä loo coyocoo bufi çai doblao.

⁴⁷Öjö bä lä cuinö, suwä bä lä feiblou wei bä fa mölamajenö, bä madofibö bluca däabläö läoje. Öjö dǎjä, bä mömou nia liyäjäo fe fa yadionö, Yai Bada nija bä nö bayeli nacao ja bä ʔ jole jole labaaö bädao. Yai Bada tänö öjö bä nö nia shino yai bleaamaö fe balojoo —a cuma.

San Lucas 21

¹Yai Bada nija bä blada jöböoje ja bä blada lä didiblaaö wejei jamö, Jesús a cuoma. Tä fa mödalönö, bä nö lä madofibö wei bänö bä blada didiabeje jamö, bä nö daama.

²Öjö dǎjä, suwä a yami nö jölili lä bleaano wei a fa waloicunö, blada cäcöbö wai nowa lä bolacami wei cäcöbö wai didiaö dalalema.

³Abinaja Jesús a cuma, cama ebä nija. —Cafä wamacö nija ei ya ʔa lä cui, bejedi lä ya ʔa. Bä nö lä madofibö wei bä lä cuinö, blada bluca bä ma didiaöje dǎjä ma cui, fei suwä a yami nö jölili lä bleaale a lä cui, öjö lä a shi shino yai öjöde fe balojowä.

⁴Ai bä lä cuinö, bluca bä li tabomaje yalo Yai Bada a malä dobälufajei. Öjö ma cui, fei a suwä nö jölili lä bleaale a lä cuinö, nii bä luluabä cäcöbö shino wai ma tabono wei ma cui, öjö cä lä, cäcöbö jöböa nö mlaquei lä cufe —a Jesús cuma.

⁵Bä lä nocaono wei bänö Yai Bada etä yafi ʔfa liyäjäwä tamaje. Maa dodijidawä mabä ma cuinö, madofi bä no mlai ja lä jöböano wejei bä ma cuinö, e yafi baushi liyäjäoma. Öjö tä ʔfa wayoalajenö, abinaja Jesús a cuma.

6—Ei wama bä yafi lä möle bä lä cui, bä nia cudiomi. Wama bä nofi dobou ma bäle ma cui, bä nia obi wəliaöje. Öjö dāja, ai ma jamö, moli ma cui ma nia maqueo feibloimi —a cuma.

7A wəliije ja, abinaja bä cuma. —Tä ʔ wäyäle. Wa tä ʔfa lä wäyāblei, ʔ wedinaja tä nö yai fa cublalunö, bei tä nia yai wawāblou? Tä tamou bufio dāja, ʔ wedi tä dodijiwänö yamacö li moyawäobä? —bä cuma.

8Abinaja Jesúsno bä nowa tama. —Bä da moyaweicu, öjö lä, wamacö mölamaö mlaobeje. Obi, bä lä jolemou wei bluca bä nia wawāblou. Camiyä ya wəfa nia ma wäyāmou wei ma cui, bä möla dijä. “Öjö ya”, bä nia cuu. “Tä bluca waicou bufio lä cule”, bä nia çai ma cuu wei ma cui, öjö bä nija bä nocao dijä.

9’Bä lä bälöblai bä nabä nia queayou. Ai bä mö feduwä lä cui, inaja showawä bä nia shifilimou cuo mö feduo. Öjö wama bä wəno jiliaö dāja, bä quili dijä. Öjö tämi. Öjö tä nia bluca cublou ma balöo wei ma cui, tä nia bluca waicou jaödaomi showawä —a cuma.

10Öjö dāja, abinaja Jesúsno bä nowa tama. —Bä shomi lä cublai bä nabä nia queayou balöo. Bä bälöblawä lä yaiblai bä çai.

11Mashita a nia bada quida quidamou nö quiliaö. Bluca täbä ulifibö lä cublai jamö, ofi tä nia blaucublou. Shawala a çai. Judu mösö jamö tä nia lä cublou wei tänö bä bufi nö nia beblalou. Yai Bada tä nia lojode dablomou nö quiliadayou —Jesúsno bä nowa tama.

12Jesús abinaja a cuma. —Öjö ma cui, öjö tä cublou showao mlao dāja, wamacö nia juwäaö balöoje. Wamacö nö nia bleaamaöje. Judio bä yododabä yafi bä jamö wamacö nia çai juuje, bada bä nija wamacö noshi öjödabobeje. Wamacö ʔfa dobloimi fa wäyājenö, wamacö fe nia lamabouje. Iba wamacö yalo, bada bä bälöo lä dodijio wei bä ma cui nija wamacö nia çai jublou cuaaöje, wamacö dobloimi jömabeje. Cama ebä lämabou mö lä feduo wejei bä ma cui nija, inaja showawä.

13Öjö ma cui, öjö bä nija wamale ʔfa wäyābä, öjö tä nia cuo.

14’ʔ Öjö tawä? —a cuma—. Wamacö nofi nia lä bəyāo wei tä ja, bä bufi jalujou dicoo dijä. Fei dāja ma cui, bä bufi shalilia da showadaicu.

15Wamacö ʔ moyawe juobä, camiyänö bamacö ʔ nia malä macocamaö wei. Bamacö ʔ lä bayelibläo wei dāja, bä nö lä nabāmou wei wama bä ʔ nö nia wəlojamaimi.

16’Afä bä ma cuinö wamacö nö bleaamabeje, wamacö noshi nia öjödabouje —a cuma—. Faafä bä ma cuinö, naafä bä ma cuinö, afä mashi bä ma cuinö, aifä bä ma cuinö, afä nofi bä ma cuinö, ai wamacö shämaö cadidiobeje, wamacö nia jömaöje.

17Iba wamacö yalo, bluca bänö wamacö nofi nia wəlibouje.

18Inaja ma cui, wamacö nö bleaaö shi wəlibä tämi. Bei wamacö feta ucu bädawä ma cui, Yai Bada tänö wamacö nowamaö daö.

- 19**Wamacö nö wəlojaö fe lä yadio wei tänö wamacö nia bəlimi cuodayou —Jesús a cuma.
- 20**Jesúsnö abinaja bä nowa tama. —Jelusaleteli bä yafibö sibo jamö, wayu wama bä toujou fe fəyoaö dabraö dājä, bä da moyaweicu. Bä yafibö çai waicaö ajedeweje.
- 21**Öjö dājä, Judea jamö wamacö lä bälöle wamacö lä cui, tä lä jefubö wei jamö bä docuo cuo da showadaomobodu. Jelusale jamö bä lä bälöo wei bä sibou showadaofälöbä. Sibo jamö bä cublawä lä waiquii, shabono jamö bä lucäo ço mlai.
- 22**Jelusaleteli bä nija, Yai Bada tä nö nia lä bəshälöo wei tä malä cule. Yai Bada a wəno wäyäləwä esibä oni jamö, bä nö nia jəwa lä bleaamaö wei tä ə bejedi bluca wawəblobä.
- 23**’Bä lä shöbönabö wei, ;bejedi lä öjö bä nö nia bleaaö fe balojoo! —a cuma—. Ijilu bä lä shadimabou wejei, inaja showawä bä nö nia bleaaö cuo. Judio bä lä bälöblai bä ulifibö nö nia malä wayuböo wei. Öjö bä nija Yai Bada a nia lä ishous wei tä nia wawəblou fe malä balojoo wei.
- 24**Shocobi bänö, judio bluca bä nia waicaöje. Shomi täbä bälöblawä lä yaiblai täbä ulifibö jamö, ai bä nia bälöje. Jelusaleteli ai bä lä jäblou wei bä nijamö, shomi täbä bälöla läa fa jäicunö bä nö nia bleaamadii juoje. Öjö judio bä lä mlai bä lä cui, Yai Bada tänö bä lämabobä tä mladou showaa mlai ja, inaja bä nia cuaaö balöo —Jesús a cuma.
- 25**Abinaja Jesús a cuma. —Motoca a ma cui, belibo a ma cui, shidicali bä ma cui, bä nia shomiaö nö quiliadayou, yanowamö täbä moyawäobä. Bitä jamö ma cui, täbä bälöblawä lä yaiblai bä bufi nö nia bluca bleaaö cuaaö. Modu u ə nö nia bada quiliaö ja, u bada fa bolilonö bä bufi nia wedinajamou.
- 26**Bitä jamö tä nia lä cublou wei tä ja, ai bä nia quilili wäcäcou. Judu mösö jamö bä lä shadiladi bä nia çai layäcäbladayou.
- 27**Öjö dājä, camiyä ya lä yanowamöblaleyoluno wei ya nia shino yai bädoyoluu. Öläjashi a ja ya shi çai bada fa itoimadunö, wale nia lojode dabraöje.
- 28**’¿Öjö tawä? Inaja wama tä cuaaö dabraö ja, wamacö bufi lojodolanö bä nö da daicu. Wamacö nia yai lä bayeliblamou wei tä malä ajedei —a Jesús cuma.
- 29**Cama bä nija ei tä ə wäyäo yacläoma. —Ico fibä ma cui ja, bluca defibä ma cui ja, wamacö bufi dao talei.
- 30**Defi jenabä ducuu dājä, “Fei dājä motoca shi ajeo ço nö culai”, wamacö bufi shino cuu.
- 31**Inaja showawä, ei ya tä ə bluca lä wäyäfe tä wawəblou dājä, wamacö bufi daobä cätä. “Fei dājä Yai Bada tänö cama ebä çai nia lä cuo wei tä ajedou lä cule”, wamacö cubä.
- 32**’Cafä wamacö nija ei ya wə lä cui, bejedi lä ya wə —a cuma—. Wamacö fei dājä lä bälöblai wamacö bluca nomaö showaono mlai ja, öjö tä nia bluca wawəblou balöo.

³³Judu mösö ma cui, bita a ma cui, öjö bä bluca ma mlaolaliyo wei ma cui, camiyä ya wə nia mladoimi —a cuma.

³⁴Abinaja Jesúsnö bä nowa çai tama. —Bä da moyaweicu, Yai Bada nija wamacö bufi walalao fe yadiobä. Täbä iyaö çai lä çocamou wei jamö bä bufi mö blucao dijä. Bä shi wəlimamo dijä. Eja dodijidawä wamacö nia lä bälöo wei tä ja, bä bufi çai cuaablalo dijä. ¿Öjö tawä? “Fei dājā dao”, wamacö bufi cuu mlalanö wamacö lobe quiliblou dicoo mlaobä.

³⁵’Ya juu ço lä bufio wei dājā, tä nia lä cublou wei, bita jamö täbä lä bälöblai täbä bluca nijamö tä nia wawäblou nö malä quiliaö wei.

³⁶Bä nö da daicu, öjö lä. Yai Bada nija bä nö bayeli da nacao, tä cublou nö ma quiliaö wei ma cui, wamacö nö fa wəlojomabonö, wamacö dodijaö fe yadiobä. Ya lä yanowamöblaleyoluno wei ya juu ço dājā, camiyä nija dodijidawä wamacö icuo mö baobä —a cuma.

³⁷Showadi Yai Bada etä yafi jamö Jesúsnö täbä yömöladima ma cui, didi dājā a fa juoblofälönö, Oliba tä balöcö jamö a shino cuo fe jaluma.

³⁸Öjö dājā, a wə nia jiliaö fa çojenö, fena dājā Yai Bada etä yafi jamö täbä shino bluca waloblaaö ço fenaoma.

San Lucas 22

¹Bei. Nii juluno mlai bä ja, judio showadi bä iyaö çai lä çocamou wei tä ajeoma. Yai Bada a waiteli lä jayvano wei a nofi showadi lä çocamoä wejei tä lä cui.

²Nofi bäyäälewä blowäjäwä bä ma cuinö, Moisesi tä a ja täbä lä damaö wejei bä ma cuinö, Jesús a shäbeje a nofi washuamaje. Yanowamö täbä nö quili tamaje yalo, a wəfa wayoaö jətoomaje.

³Öjö dājā, Juda nija Sadanasi a lucälayoma, Juda Icaliode a wəfa lä cuono wei nija. ¿Öjö tawä? Jesús nija bä 12 lä nocaono wei ai e cuoma.

⁴Nofi bäyäälewä blowäjäwä bä ma cui, Yai Bada etä yafi jamö bä bada lä läono wei bä ma cui, öjö bä sho bä a wayobä, Juda a alayoma. Öjö bä nija a jömabä, Jesús a nia lä nomojoliano wei a wəfa wəamoma.

⁵Bä bufi bada doblaloma. Jesús a nia lä jömaö wei tä nowa ja, blada ebä afa wəa showadaquemaje.

⁶Juda a fa jəmodonö, a nia lä nomojoliano wei tä nofi dayäaö showadaoma. Bä showadi lä çocamou wei bä cuo mlao dājā, a nia nomojoliaö balöoma.

⁷Nii bä juluu lä mlai bä ja bä iyaö çai çocamou çobä, oweja ocalo bä shäbeje tä mö jalu cublaliyoma.

⁸Öjö cudeenö, Jesúsnö Pedro, Juan sho cäcöbö shömöa balölema. Abinaja cäcöbö nowa tama. —Yai Bada a waiteli lä jayvano wei bäma a nofi çocamoä çobä, täbä da baböcudu, bamacö iyabä —cäcöbö nowa tama.

- ⁹A wəliböö ja, abinaja cäcöbö cuma. —¿Wedinaja wa bufi cuu? ¿Wedi jamö yafi lä cui jamö yafä bä nii baabä?
- ¹⁰Abinaja cäcöbö nowa tama. —Bei. Shabono jamö wafäcö çoblou däjä, mau ubä befi çai lä döcömabole wafä a mö nia wəlo baamadayou. Öjö nija wafäcö fa nocalofälönö, cama a lä faö wei jamö wafäcö falö.
- ¹¹Öjö a yafibö lä cui nija, ya tä ʔ lä wäyäo wei ya lä cui wafäle wəno wäabä. Wafä yano wəli. Öjamö iba bamacö lä nocamabole wamacö sho bamacö nia iyaö, Yai Bada a waiteli lä jayvano wei bama a nofi çocamoao çobä.
- ¹²A yano lä feyacale tä bada jömöao wä, madofi bä befi çai. Öjamö lä bamacö iyabä wafä bä nii bacö —cäcöbö nowa tama.
- ¹³Cäcöbö fa alufälönö, Jesús a lä cuu weinaja inaja showawä tä dabölalema. Yai Bada a waiteli lä jayvano wei a nofi çocamoao çobeje, öjö a yafi jamö täbä nii baböquema.
- ¹⁴Bä iyabä tä cublou däjä, Jesúsno bä shömabä bä lä yaileno wei bä çai looma, bä iyabä.
- ¹⁵Abinaja Jesús a cuma. —Yale nö bleaamaö showao mlaoje däjä, çafä wamacö nija ya iyaö çai çocamou bufi doblaoma, Yai Bada a waiteli lä jayvano wei bama a nofi çocamoao çobä.
- ¹⁶Bamacö lä cuaale ya tä nia taö ço jaöo malä mlai. ¿Öjö tawä? Çafä bamacö nowa taö lä cule. Yai Bada tänö cama ebä çai cuobä jamö, cama ebä yai çao cadidio däjä, öjö däjä ya tä nia shino waö ço —a cuma.
- ¹⁷Öjö däjä jishima a fa dälönö, toubä nia lä coano wejei toubä ja, Yai Bada nija a bufi ʔafa doblalou fa wäyamonö, cama ebä nija a wə fama. —Bei. Ei jishima a ja wamacö nö bluca liyobä, a da dälöje.
- ¹⁸Çafä bamacö nowa taö lä cule. Ei uba bama nashiwä toubä lä coale ya toubä nia coao ço jaöomi. Yai Bada tänö cama ebä çai cuobä jamö, öjamö ya toubä nia shino coao ço —a cuma.
- ¹⁹Öjö däjä nii a fa dälönö, Yai Bada nija a bufi ʔafa doblalou wäyämou çoma. Öjö däjä a fa joyolalönö cama ebä nija bä jöböo cuaama. Bä jöbälänö abinaja bä nowa tama. —Ei nii a lä cui, camiyä ya nia lä jöböo wei, ei bei ya yaji nö owä, çafä wamacö bayeliblamobä ya nia lä jöböo wei. Bamacö iyaö lä cuaalenaja bä cuao da juo, wamale nofi jaducubobä —bä nowa tama.
- ²⁰Inaja showawä, bä fa iyalönö, jishima a ja, nashiwä toubä befi çai däa nomöjölema. Abinaja a cuma. —Yai Bada tänö tä ʔafa lä wäqueno wei tä ʔ bejedi cublobä, öjö bei lä ya iyäbö nö owä. Wamacö bayeliblamobä ya iyäbö läblalio. Öjö wama tä ʔ nofi dude jaducubobä, ei a li jishima.
- ²¹Öjö ma cui, yale nia lä nomojoliaö wei a lä cui, camiyä bamacö nija a iyaö çai coyocoa lä cule.

22 Camiyä ya lä yanowamöblaleyoluno wei ya lä cui, bejedi lä wale nia nomamaöje, Yai Bada tänö tä taamaö lä bufiono weinaja showawä. Öjö ma cui, wale yai nia lä nomojoliaö wei a lä cui, öjö a nö nia shino yai bleaaö dodijio —a cuma.

23 Cama ebä wəliyou ja, abinaja bä cuma. —Bä nö lä nabämou wei bä nija, ¿wedi jamö a lä cuinö a nia jömöaö? —bä cuma.

24 Jesús nija bä lä nocaono wei, cama bä bada cuo bufi doblao fa ayaonö, bä ʼafa tayo a dicolayoma.

25 Abinaja Jesúsnö bä nowa tama. —Bluca bä lä bälöblai bä nijamö bä bada lä läblai, cama bä ʼa shino jiliamou bufi doblao talei. Cama bä bada lä cui, “Ya bä bayeliblabä ya li läo”, bä li cama cuu.

26 Öjö ma cui, inaja cafä wamacö nofi tamamobä wamacömi. Ma, cafä wamacö nija bada a cuo bufi lä doblao wei a lä cui, jai a oshe a shino yai cublobä. A lä nosiemou wei a lä cuinö bä nosiemaö fe baloo mlai, bä shino yai bayeliblabä. ¿Öjö tawä?

27 Ai a lä cui, a iyabä a loquei. Ai a mö feduwä lä cuinö a iyamabä ebä nii baaquei. ¿Wedi jamö a lä cui, a yai bada, öjö lä? A lä iyale a shino yai bada, ¿öjö tawä? Öjö ma cui, camiyä ya lä cui, cafä wamacö nijamö ya lä cuaale, jai bamacö nosie juabä ya cua yalo, ya jaomou si ijejewä.

28 ¿Öjö tawä? —a cuma—. Wale nö ma bleamaö wejei ma cui, wamacö nocaö fe lä yadio wei wamacö.

29 Öjö cudeenö bada bamacö nia tablaö, Fayänö camiyä wale lä taamano weinaja showawä,

30 iba ya bä çai nia lä cuo wei jamö, camiyä nija wamacö nö liyobä. Bada bä döcäobä täbä lä cui, afä 12 täbä ja wamacö fa döcäalunö, Israeli ebä nija wamacö nia bada läo, öjö bä ijilubö 12 ebä nodiwä lä yaiablalou wei bä nija—a cuma.

31 Simón Pedro nija abinaja Jesús a cuma. —Simón. Wale ʼa da jililä, Simón. Sadanasinö wa wababä, Yai Bada nija a wə faö waiquiwä. İcali wa fa laecanö, nii bä lä taö wejei jamö bei tesibä joyamou lä culenaja, wa nia tablamou.

32 Öjö ma cui, Yai Bada nija bäfä nö bayeli nacaö waiquiwä, wa bufi lojodoo fe yadiobä. Wa bufi mö yabajablou çoo däjä, aifä wa bä bufi lojodoamaö mö feduobä —a cuma.

33 Abinaja Pedro a cuma. —Tä ʼa wäyäle. Bäfä nia daaimi. Täbä fe lä lamaö wejei jamö wa fe ma laquei wejei ma cui, wa shäo ma cujei, cafä nija ya nia nocaö fe yadio showao —a cuma.

34 —Ma, Pedro —Jesús a cuma—. Bäfä nowa taö lä cule. Cadala a wə faö showao mlao däjä, 3 wale nofi nia jole jole mojudoubou cuo —a cuma.

35 Cama ebä nija abinaja Jesús a çai cuma. —Bamacö jaba lä shömano wei däjä, blada wama bä besibonomi. Wama täbä didibofälöbä tä ma cui, wama täbä dāanomi. Wamacö mamicö didio nomöjööbä täcö ma cui, wama täbä bolacabonomi. Wamacö

shinoco lä junu wei dǎjä, ¿wamacö nö bleaama tawä? —a cuma. —Ma, bleanomi —bä cuma.

³⁶Abinaja bä nowa taö nomöjööma. —Öjö ma cui, abinaja ya cuu nomöjöö. Blada wama bä besibou ja, öjö bä çai da juje. Wama tabä didibofälöbä wama tä tabou ja, inaja showawä. Ai wanö, shocobi wa taboimi ja, camishi wa cö fa jöböcönö, shocobifä a da lululä.

³⁷Bāmacö nowa malä tale. Yai Bada etä ʔ oni jamö ya wafa lä tamou wei tä ʔ nia bejedi wawäblou. Abinaja tä ʔ cuu. Wāliwä talewä bä nija a yādāmaquemaje. ¿Öjö tawä? —a cuma—. Einaja tä ʔ cuu. Yai Bada etä ʔ ja, ya wafa lä tamou wei tä bluca wawäblobä tä malä cui.

³⁸Abinaja bä cuma. —Tä ʔ wäyäle, möblaa. Ei shocobi bolacabö cäcöbö cua —bä cuma. —Inaja lä waiquiwä —a cuma.

³⁹A fa sibolunö, Oliba tä balöcö jamö Jesús a ayofälöma, showadi a lä cuaano weinaja showawä. Cama ebä lä nocamabono wei bä yauablalou showaoma.

⁴⁰Bä showadi lä cublaaö wei jamö bä fa waloicunö, abinaja bä nowa tama. —Yai Bada nija bä nö çai bayeli da nacao, Sadanasinö wamacö yabäcäblaö dǎjä wama a wä juaö yacläo dicoo mlaobä —bä nowa tama.

⁴¹Cama bä jilao juo dǎjä, maa mabä blajawä shäyämou lä culenaja Jesús a bayäcäwä fa cuicudunö, a diyäliqedayoma. A fa diyälibodunö a nö bayeli nacaoma.

⁴²—Fabe. Fei dǎjä wale nö yai nia lä bleaamaö wejei tä lä cui, wa tä blajamabä tä cua ja, tä da blajamalö. Öjö ma cui, camiyä ya cuaaö bufi lä doblao weinaja mlai, cafänö wale taamaö bufi lä doblao weinaja wale da taama —a cuma.

⁴³Öjö dǎjä Yai Bada etä ʔjele fa wawäblaliyonö, a bufi lojodoblama.

⁴⁴Öjö dǎjä Jesús a bufi jölijou fe fa balojoonö, a nö bayeli yai nacao fe balojooma. Bei wäyäcu yobli lä cui, mashita jamö jai iyä iyä bä cuwä bä bläläma.

⁴⁵Yai Bada nija a wä faö fa waiconö, a fa ubladalunö, cama ebä lä nocamabono wei bä jilaa lä jäle jamö a waloo fa çiquiyonö, bä mia dalalema. Wajä wajä bänö bä fa malishalönö bä mioma.

⁴⁶Abinaja bä nowa tama. —¿Wedi tä tabä wamacö li mia dicoa cule? Bä da jocäcälalu. Yai Bada nija bä nö çai bayeli da nacao, Sadanasinö wamacö yabäcäblaö dǎjä wama a wä juaö yacläo dicoo mlaobä —bä nowa tama.

⁴⁷Jesúsnö inaja bä nowa taö showao dǎjä, bä lä toujublaliyono wei bä bluca juu showaimama. Jesúsnö bä 12 lä nocamabono wei ai e lä cuinö bä luluboma, Juda a wafa lä cuono wei a lä cuinö. Jesús nija a icua ajedequema, a nomojoli mamocacö buyucabä.

⁴⁸Öjö ma cui, abinaja Jesús a cuma. —Juda. Wale nomojoli lä buyucaö wei tänö, camiyä ya lä yanowamöblaleyoluno wei ya lä cui, bä nö lä nabämou wei bä nija, ¿bei wale nia li jömöaö dicoo? —a cuma.

- 49 Jesús ebänö tä nia lä cublou wei tä fa dalalöjenö, abinaja Jesús nija bä cuma. —Tä a wayäle. Shocobi bänö bama bä nabä quequei tawä? —bä cudaliyoma.
- 50 Inaja bä fa cudalunö, ai e isholayoma. Nofi bääälewä bada a nosie juamobä a nabä fa queicunö, a yömöca baquequeblalema.
- 51 Öjö ma cui, Jesúsno a wasölema. —Ma, bä isho dijä —a fa cunö, bei yömöcacö lä baquequeblaleno wei yömöcacö fa jubanö, a jaloa çomalema.
- 52 Öjö däjä, a nabä lä juno wejei bä nija Jesús a wə fama. Nofi bääälewä blowäjawä bä ma cui nija, Yai Bada etä yafi jamö bä lä läono wei bä ma cui nija, judio bada ai bä ma cui nija, abinaja Jesús a cuma. —Tomömolewä bä nabä juu lä culajeinaja, ¿wedi tä tabä bei wamale nabä li juu cuaaö dicoo cufe? ¿Wedi tä tabä shocobi, nablushi wama bä çai juu cuboyoi?
- 53 Yai Bada etä yafi jamö bamacö çai loo däjä wamale juwäano malä mlai. Öjö ma cui, wamacö cuaaö bufi lä doblao wei wamacö cuaabä tä cublou lä cule, mö didi jamö a bada lä läle a nosiemobä —a cuma.
- 54 Öjö däjä Jesús a fa juwälöjenö, nofi bääälewä bada e yafi jamö a öbölefälömaje. Pedro a jäwäjawä yauafälöma.
- 55 Yafi sibo lä jçoloi tä möamo ja, cowa wacö fa yäbalöjenö, bä bomobä bä loquema. Öjö däjä Pedro a çai loo coyocoquema.
- 56 ¿Öjö tawä? Pedro a loobä jamö, cowa wacö shji wacacawä ja a fa dalalönö, bada a wə juamobä a suwä lä cuinö a möö dodijoma. Yoca lä jolemabou wei a suwä cuoma. Ai e nija abinaja a cuma. —Jesús nija fei a çai cuoma —a cuma.
- 57 Öjö ma cui a wə jole mojudumou ja, abinaja a Pedro cuma. —Ma. Öjö ya daimi —suwä nija a cuma.
- 58 Tä nö fa dedejedalunö, ai anö Pedro a daa fa nomöjölalönö, abinaja e cuma. —Cafä ma cui cama wa e çai —a cuma ma cui, —Ma, öjö ya emi —Pedro a cuma.
- 59 Tä nö dedejedou fa çolonö, ai a wə faö nomöjöö ja, a wə fe blacäjoma. —Bejedi lä öjö bä nija ei a çai çocaoma. Calileateli a malä cui —a cuma.
- 60 Öjö ma cui abinaja Pedro a cuu mö feduoma. —Cuwi. Camiyä nija wa lä cufe ya tä daimi —a cudou däjä, yedu cadala a wə nocablaliyoma.
- 61 Öjö däjä Bada tänö Pedro a möa ashädalema. A fa mödalönö, Bada anö a nowa lä tano wei Pedronö tä nofi jaducudalema. “Cadala fei däjä a wə faö showao mlao däjä, 3 wale nofi nia jole mojudubou”, a nowa malä tano wei.
- 62 Öjö däjä a bufi fa wajäblalunö, a siboa fa showadalunö a öcöma.
- 63 Jesús a lä juwäbono wejei bänö a nö waiblamaje. A çai shämaje.
- 64 Mamocu fa jøyabojenö, a nö waibläöje ja, a çai wəlimaje. —Yai Bada a wəno wäyälwä wa jowa lä cui, tä afa wäa da cadidiba. ¿Wedinö bei wa shälei cufe? —a nowa tamaje.

⁶⁵Bä ą walıdiwä falanö a nö waibladimaje.

⁶⁶Tä mö fa jalulunö, judio bada bä yododaö fenaoma. Nofi bäyäälewä blowäjäwä bä ma cui, Moisesi tä ą ja täbä lä damaö wejei bä ma cui, öjö bä yododoobä jamö a icuobä, Jesús a öbölefälömaje. Abinaja a nowa tamaje.

⁶⁷—Yai Bada tänö a shömabä a lä yaileno wei, öjö lä cafä bei wa e waiquiwä ja, a wä nö da wäbo —bä cuma ma cui, abinaja Jesús a cuma. —Bämacö nowa taö ma cui ja, wamale ą nia bejedi bufiimi.

⁶⁸Cafä bämacö walıi ma cui ja, wamale ą nia çai juaimi.

⁶⁹Öjö ma cui, ya fe fa weyadalunö, camiyä ya lä yanowamöblaleyoluno wei ya lä cui, Yai Bada tä nö wəlojaö lä ayao wei boco jayu mashi jamö ya nia döcöodayou —a cuma.

⁷⁰Öjö däjä, abinaja bä bluca cuu showaoma. —¿Yai Bada cafä bei wa e Ijilubö, öjö lä? —bä cuma. —Wamacö ą cadidou. Öjö ya e —Jesús a cuu mö feduoma.

⁷¹Öjö däjä, abinaja cama bä nowa tayoma. —¿Öjö tawä? ¿Wedi tä tabä ai bäma bä ą li jiliaa çolei? Cama bäma a wä jilia malä waiquilufe —bä nowa tayoma.

San Lucas 23

¹Öjö däjä, bä bluca fa ubladalunö, Lomateli bada tä Bilado nija Jesús a çai fa jujenö,

²a wəfa dobroimi wäyämaje. Abinaja bä cuma. —Ei a lä cuinö, judio yamalecö yaclämaö bufi lä doblao wei yama a daö. Cafä Lomateli bada bämacö ą juaö mlaobä a wə faö. Bada tä Sesa nija blada bä jöböamobä tä ma cule, yamalecö wasöö. Cama a wəfa bada jilou, Yai Bada tänö a shömabä a lä yaileno wei. A nia jəwa yai bälöo dodijio —bä cuma.

³Biladonö a walıi ja, abinaja a cuma. —Cafä ¿judio bada bei wa? —a cuma. —Awei. Wa wə cadidou —Jesús a cuma.

⁴Öjö däjä, nofi bäyäälewä blowäjäwä bä ma cui nija, bä lä toujono wei bä ma cui nija, abinaja Bilado a cuma. —Ei a doblou lä mlai ya etä daimi —a cuma.

⁵Öjö ma cui, bä ą fe blacäjoma. —Judea tä ulifi jamö bä lä bälöblai bä shi bluca jalimomaö lä cudi. Calilea jamö bä jaba fa yömölanö, etä ą wäyäö fa cuaaimanö, eja ma cui etä ą çai wäyäö showawä —bä cuma.

⁶Biladonö öjö tä ą fa jililänö bä wəlima. —¿Fei Calileатели bei a? —a cuma.

⁷A wəfa Calileатели fa jililänö, öjö bä nija a bada lä läono wei nija, Jesús a shömöa fe dolea majölema, Elode a bada nija. Jelusale jamö Elode cama a fama çai cuo ajedeoma.

⁸Jesús a möö ja, Elode a bufi doblaloma. A wəno bluca jilibou waiquioma yalo, a möö bufi doblao nö dedeaö waiquioma. Tä nö lä quilijii tä jəwa lä wawämano wei, tä çai möö bufi doblaoma.

- ⁹Öjö cudeenö a walıi nö dedeama ma cui, Jesús a wə juo badaonomi.
- ¹⁰Nofi báyáalewä blowájäwä bä ma cui, Moisesi tä ʔ ja täbä lä damaö wejei bä ma cui, öjamö bä ʔai fa ublajaicunö, Jesús a wəfa dobroimi wáyäöje ja, bä ʔ faö walıdioma.
- ¹¹¿Öjö tawä? Elode a ma cuinö, cama sodado ebä ma cuinö, a nö waiblamaje. A noca flecamaje. Camishi liyájäwä cäcö ja, a jole jole lucäa fa nomöjomalönö, Bilado nija a shömöa çolema.
- ¹²¿Öjö tawä? Öjö tä cublou showao mlao dāja, Elode, Bilado sho cäcöbö nofi ma walıayono wei ma cui, öjö dāja cäcöbö nofimayou majöoma.
- ¹³Öjö dāja, Biladonö bä çocamomalema. Nofi báyáalewä blowájäwä bä ma cui, judio bada ai bä ma cui, ai bä bluca ma cui, öjö bä fa çocamomalönö,
- ¹⁴abinaja bä nowa tama. —Bei. Ya dobroimi jömabä fei wama a bälaqueyoluma. Wamacö jowa yaclämaö bufi doblaoma, Lomateli bada yamalecö ʔ juaö mlaobä. Cafä wamacö mamö mötale ja ya ma walıno wei ma cui, wamacö lä cuno wei moli ma cui ya etä dablanomi.
- ¹⁵Elode ma cuinö etä ʔai dablanomi. A shömöa malä çoleno wei. ¿Öjö tawä? A nomabä etä cuami.
- ¹⁶Öjö cudeenö, ya si yafelia fa bämälalönö ya nia jujeblamaö —a cuma.
- ¹⁷¿Öjö tawä? Yai Bada a waiteli lä jayuno wei a nofi çocamoäje dāja, Bilado nija judio showadi bä ʔ shino fama. Bä fe lä laono wei bä lä cui, moli täbä shino jujedamaö bufimaje.
- ¹⁸Öjö cudeenö, bä lä yododano wei bä ʔ bluca faö fa showadaonö, abinaja bä cuma. —¡Miji a da shämälö! ¡Balabasi a yai shino da famaliyo! —bä cuma.
- ¹⁹Öjö Balabasi a lä cui, Lomateli bada bä joyabeje, Jelusaleteli bä shifilimomaö ja, a fe labomaje. Ai a lä shälei wei tä nowa ʔai ja.
- ²⁰Jesús a jujeblaö bufi doblao waiquiwä yalo, bä lä çocamono wei bä nija Bilado a wə faö çoma.
- ²¹Öjö ma cui, bä ʔ shi doa dicolayoma. —¡Fii balitama defi jamö a shino da basumacö! ¡A da basumacö! —bä cublaloma.
- ²²Bilado a wə faö çoma. —¿Wedi tabä fii balitama defi jamö ya li basua bädamaquei? ¿Wedi bei tä li taö dodijioma? A doblou lä mlai ya etä daimi, a shämöbä. Öjö cudeenö ya si yafelia fa bämälalönö, ya nia jujeblamaö —a Bilado cuma.
- ²³Öjö ma cui, bä ʔ shi doa dicolayoma. Fii balitama defi ja a basuamabä, bä ʔ fe blacájoma. Bä ʔ nacläalanö, Bilado a nowa tadiimaje.
- ²⁴Öjö cudeenö, yaçumö Biladonö a shämaö bufima, bä lä cuno weinaja showawä.

25 Ai a fe lä labono wejei a shino jujeblamaö ayalayoma, a wafa lä yubono wejei. ¿Öjö tawä? Lomateli bada bä joyabeje, Jelusaleteli bä lä shifilimomaleno wei a lä cui, ai a çai lä shälano wei, öjö a jujeblalema. Öjö ma cui, Jesús a taamaö bufi lä doblaono wejeinaja a taamabeje, a noshi öjödadalesma.

26 Jesús a öböbou çai lä juimadujei jamö, Sileneteli Simón a çaimabä jamö a mö bamalemaje. A mö fa bamalöjenö a juwälemaje. Öjö nija, fii defii nia lä blilio wei defii yalucua nomöjöa fe yadimaquemaje, Jesús a nodi jamö edefii çai nojaobä.

27 A shäbeje jamö, Jesús nijamö bluca fe balojowä bä nocalayofälöma. Suwä bä çai. Öjö suwä bä balöcö shäolanö a nomöa bofälömaje.

28 Öjö bä nija Jesús a mö fa yaiblalunö, abinaja bä nowa tama. —Jelusaleteliyoma wamacö. Wamale nomöa bo dijä. Cafä bä nomöa yai da yuamo. Ijilufä bä nomöa çai yai da boje.

29 Tä yai wälidiblou däjä, bä lä shöbönabö wei bä nö nia malä bleaaö wei. Bä ijilubö çai lä cui, inaja showawä. Öjö däjä, abinaja täbä nia cuu. “Bä shöbönabödalou lä mlai bä bufi yai doblalobä, öjö bä li. Bä ijilubö tablaö dao lä mlai, bä shadimabou dao lä mlai, öjö bä bufi yai doblalobä”, bä nia cuu.

30 Öjö däjä, bei macö ma cui ja bä a nia faö. “¡Bei wamacö fa wäcälönö, yamalecö fe da shäbalu!”, bä nia cuu. Jefu bä ma cui ja, bä a nia çai faö. “¡Jefu wamacö fa wäcälönö, yamalecö da badädäbalö!”, bä nia cuu —Jesúsnö bä nowa tama.

31 Abinaja a çai cuma. —Camiyä fii ya defii liyä lä cui, inaja wale taamaö dicooje ja, cafä fäwä wamacö defibä lä cui wamacö nö nia yai bleaamaö fe balojooje —a cuma.

32 Cäcöbö çai shämou mö feduobä, ai cäcöbö öböa mö fedua showalemaje. Cäcöbö doblonomi yalo, Jesús a shämobä jamö cäcöbö nia çai shäö mö feduo showadaomaje.

33 Felosi blaobä tä afa ulifi lä jilabou wejei jamö a çai fa walobojolujenö, fii balitama defii jamö Jesús a basuquemaje. Cäcöbö doblou lä mlai cäcöbö çai basua lülocua mö feduquemaje. Acasi boco mashi jamö ai a, jayu boco mashi jamö ai a, cäcöbö basua taaquemaje.

34 Öjö däjä Yai Bada nija Jesús a wä falayoma. —Fabe. Fei bä nija wale nö bähälö tabo dijä. Bä mojudili cuaaö dicoa —a cudaliyoma. Jesús a lä didiono wei bä camishi ja, ai bä bufi fa waiyonö, jömmamodima bä wai shäyäjamaje, ebä nia yai lä döaö wei etä wawäblobä.

35 Bä nö daobä, bluca bä ublajaoma. Judio bada bänö a nö waiblaöje ja, abinaja bä cuma. —Ai täbä jowa bayeliblaö ma cuaano wei ma cui, ¿wedi tä tabä cama bei a li bayeliblamoimi? Yai Bada tänö a shömabä a lä yaileno wei, ei a waiquiwä ja, fei däjä cama a yai bayeliblamobä, öjö lä —bä cuma.

36 Sodado bänö a nö çai waiblamaje. Bä fa ajedeicunö, nashiwä toubä dodobolajenö,

37 abinaja a nowa tamaje. —Cafä judio bada bei wa waiquiwä ja, cafä a yai da bayeliblamolu, öjö lä —bä cuma.

- ³⁸Jesús a feduböcö ja, etä ʔ oni ɕai shadimaquemaje. Abinaja etä ʔ oni cuma. “Judio bä nija a bada cuobä, ei a”, etä ʔ oni cuma.
- ³⁹A doblou lä mlai ai a basua mö lä fedule a lä cui, Jesús nija abinaja a jushuo ɕai cuma. —Yai Bada tänö a shömabä a lä yaileno wei, ʔöjö lä wami tawä? A da bayeliblamolu, öjö lä. Camiyä yafälecö ɕai bayeliblaö mö da fedulo —a cuma.
- ⁴⁰Öjö ma cui, Jesús ai tä mashi jamö a lä basule a lä cuinö a wə wasölema. —ʔYai Bada bei wa tä nö quili taimi? Cafä wa ɕai nomaö mö feduobä wa.
- ⁴¹Bäfacö doblou fa mlacunö, bäfacö nofi nacalayoma ma cui, ei a lä cui a nomabä etä cuami —a cuma.
- ⁴²Öjö däjä, Jesús nija a wə faö cadidioma. —Jesús. Afä wa bä ɕai cuobä jamö, wale nofi da jaducule —a cuma.
- ⁴³Abinaja Jesús a cuu mö feduoma. —Cafä nija ei ya wə lä cui, bejedi lä ya wə. Fei däjä showadawä, camiyänö fedu jamö bäfä ɕai cuodayou wä —a cuma.
- ⁴⁴⁻⁴⁵Bei. Motoca a yöloloblojolayou däjä, tä mö jödödöwä dödölayoma. Motoca lublodayou däjä, Yai Bada etä yafi jamö cäcö bada acadafu lä läono wei, cäcö cacablou mö wädätefälöma. Motoca yajadou däjä, tä shi jomoblou ɕolayoma.
- ⁴⁶Öjö däjä Jesús a wə icali lamou ja, abinaja a cuma. —ʔFabe! Cafä nija ya cuobä wale bufi da ɕölö. Inaja a fa cunö a jele jelemou mladaliyoma.
- ⁴⁷Sodado 100 bä ɕai lä cuono wei a bada lä cuinö, öjö tä bluca lä cublaliyono wei tä fa dalalönö, Yai Bada a nofi doablama. Abinaja a cuma. —Bejedi lä, ei a doblou lä mlai etä cuonomi.
- ⁴⁸A shäö nö daabeje bä bluca lä ɕocaono wei bä lä cuinö, öjö tä fa dalalöjenö, bä balöcö shäolanö bä bufi wəlidiwä ɕai sheleleo ɕolaliyoma.
- ⁴⁹Jesús nofi ebä ma cui, Calilea jamö culanö bä suwä lä nocaono wei bä ma cui, öjö bä bluca jäwäjäwä ɕai fa ublajaonö, bä nö ɕai labajami dablalou showaoma.
- ⁵⁰Öjamö Alimadeateli José a wəfa lä cule, a ɕai cuoma. Öjö Alimadeateli bä lä cui, Judea tä ulifi jamö bä bälöo mö feduoma. Öjö José a lä cui, a bejedimou bufi doblaoma, a dodijama. Judio bada bä lä läono wei bä nija a coyocooma.
- ⁵¹ʔÖjö tawä? Jesús a lä waileno wejei däjä a waimaö bufinomi. Yai Bada tänö cama ebä nia ɕai lä cuo wei, tä nö shi jaliwä daboma.
- ⁵²Öjö a José lä cui, Bilado nija a fa icuicunö, Jesús a wəfa nomawä boma, a didiabä.
- ⁵³A nomawä fa itomalönö, camishi acadafu au cäcönö a jəloblalema. Maa maca ja a maquequema, nomawä bä maqueblaabeje, maca lä tablaleno wejei maca jamö. Nomawä ai bä maquebou balöono lä mlajei maca cuoma.
- ⁵⁴ʔÖjö tawä? Täbä yanöcöobä tä mö jalu nia cublou lä fenao wei tä weyade cuo waiquioma cudeenö bä shi jalimoma, tä nia lä tamou wei tä taö showadaobeje.

⁵⁵Calilea jamö culanö, Jesús nija bä suwä lä yauono wei bä lä cuinö, José nija bä nocaa fa showadaicunö maca dalalemaje. A lä maqueono wei tä çai fa dalalöjenö,

⁵⁶bä lä bälöle jamö bä çö çölayofälöma. Nomawä bä showadi jölöcaö lä cuaano wejeinaja a taamabeje, dabö dabö toubä nö lä liöli wei toubä tamaje. Täbä nö lä çedeli wei tä çai coyocamaje.

⁵⁷Öjö ma cui, sábado däjä täbä yanöcöo balöoma, Moisesi tä a lä cuu weinaja showawä.

San Lucas 24

¹Öjö tä fena ja, domingo tä mö jalu lä cublole däjä, suwä bä jocäblou fa fenablalonö, maa maca jamö bä aa fenalayofälöma, motoca a jaba juimaö däjä. Dabö dabö toubä nö lä liöli wei toubä lä tano wejei, öjö toubä çai.

²Maa maca jamö bä fa waloicunö, yoca lä laono wei ma bada jilulano dalalema ma cujei,

³bä fa lucälönö maca bloque dalalemaje. A nomawä cuonomi.

⁴Öjö tä ja, bä bufi wedinajamou yaio däjä, yedu bolacabö täcöbö damolaliyoma. Täcöbö camishibö mömou shi wacalaoma.

⁵Bä suwä fa quililalunö, mashita ajamö bä möfe deiolaliyoma. Öjö däjä täcöbö lä damolaliyono wei täcöbö lä cuinö, abinaja bä nowa suwä taböma. —¿Wedi tabä nomawä bä cuobä jamö, demi bei wama a li dayäaö?

⁶Calilea jamö wamacö çai cuo showao däjä, wamacö malä yömölano wei. Tä a nofi da jaduculeje.

⁷A lä yanowamöblaleyoluno wei a lä cui, wäliidiwä talewä bä nija a noshi nia jöwa öjödabomaje. ¿Öjö tawä? Fii balitama defi ja a nia basuamamaje. Öjö däjä bolacabö tä mö fa dödölönö, a demi nia jöwa jocädou çöma —täcöbö cuma.

⁸Cama täcöbö anö bä bufi suwä möblaliyoma. Jesús a lä cuno wei tä a nofi jaducudalemaje.

⁹Öjö däjä maa maca jamö bä faa fa çölufulönö, Jesús 11 ebä ma cui nija, ai bä bluca ma cui nija, tä a bluca wäyäö çöjölomaje.

¹⁰¿Öjö tawä? Jesúsno bä lä shömöleno wei bä nija tä a lä wäyāno wejei bä lä cui, ei bä afa suwä cuoma. Madalatelyoma María a cuoma, Wana a çai. Santiago bä nöö e çai cuoma, María a wafa cuo mö lä feduono wei. Ai bä çai suwä.

¹¹Öjö ma cui, tä a jilimamou nofi fa mojuduonö, bä a bejedi bufinomije.

¹²Öjö ma cui, Pedro a fa jocädalunö, maa maca jamö a läläa fe yadilayofälöma, Jesús a lä maquequeno wejei jamö. Öjamö a fa lodalunö, tä möö mö wädäama. Öjö ma cui cama bei a möö mlai ja, camishi acadafu au bänö a lä yaicoolono wei bä lä cui, öjö bä shino jilaa dalalema. Öjö däjä a bufi wedinajamou çai çö çölayofälöma.

13 Öjö tä mö jalu showawä ja, Emausi tä ʼafa shabono lä cule jamö, Jesús nija bä lä nocaono wei ai cäcöbö alayoma. Moli tä mö jalu ja täbä blajawä juu lä culenaja, tä shabono blajadawä cuoma.

14 Tä bluca lä cuaano wei tä ʼafa wayoaböfälöma.

15 Öjö tä ʼafa wayoaböfälöö däjä, cama Jesús a fa ajededalunö a juu boaafälöma ma cui,

16 Yai Bada tänö a nö öjöböamanomi.

17 Öjö cäcöbö nija abinaja Jesús a cuma. —¿Wedi bei wafä tä ʼafa li wayoaö dodijia lä cuimadi, wafäcö jufälöbä jamö? —a cuma. Cäcöbö bufi wälidiwä çai fa ubladalunö,

18 Cleofa a wäfa lä cuono wei a wä juoma. —Jelusale jamö tä da cublalui ai bä fama bluca lä bälölenö tä daö ma ayaoje däjä ma cui, ¿cafä moli wanö bei wa tä li daö bashia showaa mlaa cule? —a cuma.

19 Abinaja Jesús a cuu çoma. —¿Wedinaja täbä lä cuaano wei tä lä cui? —a fa cunö, abinaja cäcöbö cuma. —Nasaleteli Jesús a lä taamano wejei —cäcöbö cuma—. Yai Bada a wäno wäyää nö wälojaö fe balojooma. Tä nö lä quilijii tä bluca wawämaö dodijiomä. ¿Öjö tawä? Yai Bada tänö a nofimaö wawädooma. Yanowamö bluca bä ma cuinö a nofi çai dobomaje.

20 Bada bänö, Lomateli bada a nija a noshi öjödadalemaje, a shämabä. Nofi bääalewä blowäjäwä bä ma cuinö, camiyä yamacö nija bä bada lä läle bä ma cuinö, öjö nija a fa jöbäcöjenö, fii balitama defi ja a basuamaö fa bufinö a shämalemaje.

21 ¿Öjö tawä? —cäcöbö cuma—. Öjö ma cui, öjö nija yamacö möläö fe balojooma. “Isaeli bäma ecö nija fei tä ulifi nia jowa däamaö lä çono wei, öjö a waiquiwä”, yama a nofi tabou dodijio cublelei. ¿Öjö tawä? A lä shäleno wejei bolacabö tä mö didi cublou waiquia lä cule.

22 Abinaja çai —cäcöbö cuma—. Camiyä yamacö nija ai bä suwä lä culenö, fei däjä yamalecö bufi shädayaimomaö dodijiomaje. Maa maca jamö bä juu fa fenaonö,

23 a jowa nomawä dablanomije. Bä çoa fa çobonö, ajele täcöbö ʼafa çai wäyää çojolomaje. Suwä bä nija täcöbö jowa nofi fa damolalunö, Jesús a wäfa jowa demi jocädou taböma.

24 Ai yamacö lä cui, maa maca jamö bä aa fa nomöjölöfälönö, maca bloque daa nomöjölalecölömaje, suwä bä lä cuno weinaja showawä. Öjö ma cui öjö bei a dablanomije —cäcöbö cuma.

25 Abinaja Jesúsno cäcöbö nowa tama. —¿Wafäcö bufi jaducuwä lä mlai! Yai Bada a wäno wäyälwä bänö tä ʼafa bluca wäyää ma balöono wejei ma cui, ¿wafä tä ʼa bejedi bufi si ijejewämi!

26 Yai Bada tänö a shömabä a lä yaileno wei a lä cui, a nö bleaamabeje etä cuo waiquioma. A demi jocädamaö fa çolonö, cama etä shi lä doblaladi jamö a döcömabou nomöjöödayobä. ¿Öjö tawä? —a cuma.

- 27 Öjö dǎjä, cǎcöbö bufi jaducublobä, Yai Bada etä ʘ oni jamö cama a wǎfa lä tamou wei tä ʘ bluca wawāmafälöma. Moisesi tä ʘ wawāa fa balömalönö, Yai Bada a wǎno wǎyǎlewä ai täbä ʘ bluca wawāa nomöjömalema.
- 28 Cǎcöbö lä juu wei a shabono jamö bä ajedou dǎjä, Jesús jai a jayublobä a cuaama.
- 29 Öjö ma cui a naca cadidibölema. —Camiyä yafäcö nija a mia fe da jaluiquiyo. Tä weyade waiquiwä —cǎcöbö cuma. Öjö cudeenö, cama cǎcöbö nija a cublaquema.
- 30 Bä iyaö çai loobä jamö nii a fa dälönö, Yai Bada nija a bufi ʘfa doblalou wǎyāmoma. Öjö dǎjä nii a fa joyolalönö, cǎcöbö dobälema.
- 31 Inaja a lä cuaale dǎjä, Yai Bada tänö a nö öjöbömalema. A nö öjöböaböö dǎjä, a mojududou showalayoma.
- 32 Öjö dǎjä abinaja cǎcöbö nowa tayou juoma. —Bāmacö juimabä jamö, cama a wǎnö, bejedi lä bǎfälecö bufi shi jalijiblamaö dodijilayoma, Yai Bada etä ʘ wawāmaö lä cuaaimano wei tä ʘ ja —cǎcöbö nowa tayou juoma.
- 33 Öjö dǎjä showawä cǎcöbö mö yabaa fa çolufälönö, Jelusale jamö cǎcöbö waloa çoquema. Jesús 11 ebä lä nocaono wei bä yododabä jamö cǎcöbö fa waloicunö, bä dabölalema, ai bä çai lä yododano wei bä sho.
- 34 Abinaja cǎcöbö nowa taö mö baomaje. —¡Bejedi lä, Bada tä demi jocädou çolayoma! ¡Simón Pedro nija a damolaliyoma! —cǎcöbö nowa taö mö baomaje.
- 35 Öjö dǎjä cama cǎcöbö ʘ nö çai wäo mö feduoma. Emausiteli bä nijamö cǎcöbö jufälöö dǎjä, tä lä cublaliyono wei tä ʘfa wǎyǎböma. Jesúsnö nii a fa joyolalönö, a nö lä öjöbömaleno wei tä ʘfa çai.
- 36 Öjö tä ʘfa wǎyǎbö showao dǎjä, yedu cama Jesús a fa bādaliyonö, cama bä mötale jamö a ublaa damoa bādaliyoma. —Bä bufi da yanöcöicu —bä nowa tama.
- 37 Öjö ma cui, bä bufi shädayaimou ja, bä çai quili ja, “Bolebole a daanö”, bä bufii cuu dicooma.
- 38 Abinaja bä nowa taö majöoma. —Bä bufi wedinajamo dijä. ¿Wedi tabä wamacö bufi li jaducubloimi?
- 39 Wamale imicö dusi da mö. Wamale mamicö da mö. Öjö ya showawä. ¿Öjö tawä? Wamale da juba, öjö lä. Bei ya yǎjicö çai malä cule, bei ya ubä çai malä cule. Inaja bolebole bä cuwä malä mlai —bä nowa tama.
- 40 Inaja a fa cunö, bei imicö mömou wawädooma, bei mamicö çai.
- 41 Bä bufi ma doblalono wei ma cui, bä bufi çai wedinajamou coyocoo showawä ja, a wǎ bejedi bufii shalilionimije. Öjö cudeenö, abinaja cama bä nija a cuma. —Ya iyabä, ¿wama tä tabou cule? —a cuma.
- 42 Yuli löbö acadafu fa jöböcöjenö,
- 43 bä mamö showao dǎjä a walema.

⁴⁴Öjö dāja abinaja bä nowa çai tama. —Yai Bada etä ą oni ja ya wafa lä tamou wei tä bluca wawäblobä cätä. Moisesi tä ą ma cui ja, Yai Bada a wano wäyälwä bä ą ma cui ja, amowa bä ą ma cui ja, öjö waiquiwä. Cafä bamacö çai juu showao dāja, inaja ya mada cublei —bä nowa tama.

⁴⁵Öjö dāja bä bufi jaducublamalema, Yai Bada etä ą ja bä bufi möblobä.

⁴⁶Abinaja bä nowa çai tama. —Tä ą oni malä cuu wei. Yai Bada tänö a shömabä a lä yaileno wei a nö nia bleamamaje, a nomabä. A shäo fa cadidiojenö, bolacabö tä mö fa dödölönö a demi nia jocädou çoma. ¿Öjö tawä?

⁴⁷Bluca bä bälöjowä lä yaiblai bä nija, camiyä ya wä lojodenö, tä ą nia wäyämou blaucubloma, wäliwä tä ja bä bufi lä lädou wei, Yai Bada tänö tä nowa nia lä mladamaö wei tä ą lä cui. Jelusale jamö tä ą nia wäyämou fa balöonö, bluca bä lä bälöblai bä nija tä ą nia wäyämou cuaaö nomöjööma.

⁴⁸Ya showadi lä cuaano wei wamale möma cudeenö, wamale ąfa wäyäbä wamacö waiquiwä.

⁴⁹¿Öjö tawä? Fayänö tä ąfa wäyäo lä balöono wei ya tä nia shömaö. Yai Bada tänö wamacö nö nia lä wälojomabou wei wama tä nö dabou showalanö, eja Jelusale jamö bä cua da balöicu —bä nowa tama.

⁵⁰Öjö dāja, bä çai faa fa çolufälönö, Bedania tä shabono ajede jamö bä lululefälöma. Bococu fa lelejeicunö, Yai Bada nija bä bayeliblamaö bufima.

⁵¹Bä bayelimaö showale a ösöfälöma. Fedu jamö a çomolayoma.

⁵²Cama ebä möfe bolanö a wafa Bada doblao taö juomaje. Öjö dāja, Jelusale jamö, bä bufi doblalolanö bä ça çolayoma.

⁵³Yai Bada etä yafi jamö bä showadi fa jublaadinö, bä bufi doblalolanö Yai Bada a nofi shino doablamaje.

San Juan

San Juan 1

- ¹Bitá a cuo showao mlao dǎjä, Bei Tä ʔ, a wǎfa lä jilou wei a cuo showao balöoma. Yai Bada sho cǎcöbö cuo showadaoma. Öjö a lä cui, Yai Bada bei a cuoma.
- ²Jaba dǎjä, Yai Bada a jaba cuo lä showaono wei dǎjä, Bei Tä ʔ, a wǎfa lä jilou wei a ma cui, öjö a cǎi cuo mö feduo showaoma.
- ³Tǎbǎ bluca lä tablamolayono wei dǎjä, öjö lä a wǎnö, tǎbǎ bluca tablamolayoma. Bei Tä ʔ, a wǎfa lä jilou wei a lä cuinö, öjönö tǎbǎ tano lä mlai tǎbǎ cuami waiquiwǎ.
- ⁴Tǎbǎ lä ʔalimiblamaö wei, öjö a cuoma. Öjö ʔalimiblamodima tä shǐi lä cuinö, tǎbǎ bufi nia bluca wacacamaboma.
- ⁵Mö didi tä jamö öjö tä shǐi wacacawǎ cudio showao. Didi tänö tä shǐi lublamaimi.
- ⁶Bei. Yǎcumö Yai Bada a wǎno wǎyǎmobǎ, a wǎlo shömölema. Juan a wǎfa cuoma.
- ⁷Öjö tä shǐi ʔafa wǎyǎbǎ Juan a waloquema, ʔalimiblamodima tä shǐi ʔafa yai wǎyǎö shaliliobǎ. Yanowamö tǎbǎ bluca lä cuinö tä ʔ bejedi bufibeje.
- ⁸Tǎ shǐi ʔafa lä wǎyǎno wei, cama Juan a wǎfa wǎyǎmamonomi. Ma, Jesús a wǎfa yai wǎyǎma. Öjö bei tä shǐi ʔafa yai wǎyǎbǎ a waloquema.
- ⁹Jödödöwǎ tǎbǎ bufi nia lä wacacamabou wei tä shǐi bejedi lä cui, öjö Jesús a li cuoma. Bitá jamö a juu waiquiimama, yanowamö tǎbǎ nijamö.
- ¹⁰Bei Tä ʔ, a wǎfa lä jilou wei a lä cui, bitá jamö a waloqueyoluma. Cama a wǎnö tǎbǎ bluca ma tablamolayono wei ma cui, a nö öjöböanomije.
- ¹¹Cama ebǎ cadidiwǎ nijamö a ma waloqueno wei ma cui ebǎ ʔ juonomi.
- ¹²Öjö ma cui, a wǎ juaö fe lä yadiono wejei bǎ lä cui, a wǎ bejedi lä bufino wejei, Yai Bada ijilubö ebǎ cuobǎ, bǎ tablamalema.
- ¹³Öjö tawǎ? Yanowamö tǎbǎ oshe tablamou lä culenaja mlai. Cama yanowamö tǎbǎ inaja taamamou fa ojodaonö mlai. Yai Bada tänö cama ebǎ tablamaö ojodao fa showadaonö, bǎ li tablamalema.
- ¹⁴Awei. Öjö bei tä ʔ jaba cuo lä showaono wei tä ʔ lä cui, yǎcumö tä ʔ yanowamöblaleyoluma. A fa yanowamöblalunö, öjönö yamalecö cǎi bǎlöoma. Yama a doblao dalalema. Bǎ Ijilubö moli e cuoma yalo, bǎ Fjö enö a doblamabou dodijioma. Bejedi lä. Tǎbǎ jödödöwǎ nofi showadi ojodaboma. Showadi a bejedimoma.
- ¹⁵Fe ojomalewǎ Juan a lä cuinö, öjö a wǎfa wǎyǎö ja, abinaja a wǎ ʔcali faö ja, a cuma. —Ya wǎfa da wǎyǎblei, ei a waiquiwǎ. Abinaja bǎmacö nowa da tablei. “Camiyǎ ya nodi jamö, a juu lä jäimi, öjö a shino Bada. Camiyǎ ya cuo mlao dǎjä, a cuo showao balöoma yalo, öjö ya wǎfa Bada wǎyǎö lä cule”, bǎmacö nowa da tablei —Juan a cuma.

16 Öjö a nia juu lä juono wei a lä cuinö, täbä nofi showadi ojodabou yalo, showadi a bejedimou yalo, öjö nija bamacö shino bayeliblamou. Showadi bämalecö nia shino bayelibladii.

17 Yai Bada tänö tä tamaö lä bufii wei, Moisesi nija tä ą ma jöbäqueno wei ma cui, täbä nofi nia yai lä ojodabou wei tä lä cui, Jesucristo nija öjö tä shino yai wawälayoma, tä ą yai lä bejedii tä ą çai.

18 Yanowamö bamacö nija Yai Bada tä dablamoimi. Tä dablamou ma mlai ma cui, bä Ijilubö moli e lä cuinö, bä Fjö e nija a lä ajedelenö, öjönö tä damalalema.

19 Fe ojomalewä Juan a lä cui, a wäliije däjä, a wä nö wäo shalilioma. Jelusale jamö nofi bäyälwä ai bä lä cuono wei, Lewi nodiwä ai bä cuo mö lä feduono wei sho, Juan nijamö judio bänö öjö bä shömölemaje. Abinaja Juan nija bä cuyoluma. —Ei wa lä cuaale, ¿wedi çafä bei wa? —bä cuma.

20 A wä juo quilii mlai ja, Juan a wä nö wäo shalilio showadaoma. —Yai Bada tänö a shömabä a lä yaileno wei a lä cui, öjö yami —a cuma.

21 A wälii çoje ja, abinaja bä cuma. —Jao. ¿Wedi bei wa dodijiwä, öjö lä? Elia a lä cuono wei, ¿öjö wa tawä? —bä cuma. —Ma. Öjö ya çaimi —Juan a cuma. —Yai Bada a wäno wäyälwä a nia jowa lä waloono wei, ¿öjö bei wa? —bä cuu nomöjöoma. —Ma —a cuma.

22 Öjö däjä, abinaja a nowa tamaje. —Jao. ¿Wedi bei wa, öjö lä? Yamalecö lä shömöleno wejei bä nija, ¿wedinaja yama tä ą wäo cujolibä? Çafä ¿wedi bei wa wäfa jilou?

23 Öjö däjä, abinaja Juan a cuma. —Yai Bada a wäno wäyälwä Isaia a lä cuinö wale ąfa wäyäo lä balöono wei, öjö ya. Ulifi bloque jamö a wä nia jowa lä lojodoano wei, ei öjö lä ya wä. Abinaja ya nia jowa lä cuno wei. “İBada tä juu lä cuimi! A nia lä juu wei jamö, e yo shaliliblamaö da balöloje.” Einaja ya nia jowa lä cuno wei ya wä — Juan a cuma.

24 ¿Öjö tawä? Faliseo bä bada nija öjö bä shömamoma.

25 A wälii çoje ja, abinaja bä cuma. —Yai Bada tänö a shömabä a lä yaileno wei a lä cui, öjö wami ja, Elia wa çaimi ja, Yai Bada a wäno wäyälwä wa çaimi ja, ¿wedi tä tabä bei wa täbä fe li ojomaö, öjö lä? —bä cuma.

26 Abinaja Juan e cuma. —Camiyänö ya bä fe ojolaö däjä, mau u ja ya bä jödödblamaö. Öjö ma cui, çafä wamacö nijamö wama a nö öjöböaö lä mlale a coyocoa,

27 camiyä ya no jamö, a nia jowa lä junu wei. Öjö a shino yai doblaä ayaa cudeenö, ya bayeliblaö bädaobä tä ma cui ja, ya nö quilibö wei. Bei mamicö lä didio wei etäcö nata bädawä ma cui, ya etäcö nö cushaö quilibö wei —a Juan cuma.

28 ¿Öjö tawä? Jodana ai u mashi jamö, täbä fe lä ojomaö wei jamö, Juan a wälimaje, Bedania tä ąfa ulifi lä cule jamö.

- 29 Öjö tä fena ja, Jesús a juu fa dalalönö, Juan a wə fama. —¡Ei, ei! Quiji a lä cui, Yai Bada tänö a shömölema. Oweja a wəfa ocalo lä jilamou wei a. Bita jamö täbä lä bälöblai täbä nowa wəliidiwä mladamabä, a nia lä shämou wei, öjö lä a.
- 30 Ya wəfa da wäyāblei, öjö a waiquiwä. Abinaja ya da cublei. “Camiyä ya nodi jamö a juu lä jäimi, öjö a shino Bada. Camiyä ya cuo mlao dājä a cuo showao balöoma yalo, öjö ya wəfa Bada wäyāö lä cule”, ya da cublei.
- 31 Camiyänö ma cui ya nö öjöböanomi —Juan a cuma—. Öjö ma cui, Isaeli nodiwä bä nija a dablamou wawädoobä, mau u ja, ya bä fe ojomaö mö juma —a cuma.
- 32 A wəfa wäyāö showawä ja, abinaja Juan a cuma. —Fedu jamö, jai joledo a cuwä, Yai Bada ya Bufi itou dalalema. Jesús nija a Bufi yanöcüqema.
- 33 ¿Öjö tawä? Camiyänö ya nö öjöböano ma mlai ma cui, mau u ja ya bä fe ojomabä wale lä shömöleno wei a lä cuinö wale yömölama. Abinaja a cuma. “Wale Bufi nö nia itou lä daaö wei, ya Bufi lä yanöcüo wei nija, öjö a lä cuinö, camiyä ya Bufinö täbä lä jödödöblamaö wei, öjö bei a”, a cuma.
- 34 ¿Öjö tawä? Öjö ya dalalema. Ya fa dalalönö, Yai Bada bei ya e əfa Ijilubö wäyāö malä cui. Öjö a waiquiwä —Juan a cuma.
- 35 Öjö tä fena ja, Juan a lä ublaono wei jamö, cama ai ecöbö lä nocamabono wei ecöbä ublao fa yädäonö,
- 36 Jesús a jayuama. A jayuao fa dalalönö, abinaja cäcöbö nowa tama. —¡Ei, ei! Quiji a lä cui, Yai Bada tänö a shömölema. Oweja a wəfa ocalo lä jilamou wei a —cäcöbö nowa tama.
- 37 Cäcöbö lä nocamabono wei cäcöbö lä cuinö, Juan a wə fa jilibölänö, Jesús nija cäcöbö yaua nomöjölayoma.
- 38 Jesús a mö fa yabadalunö cäcöbö yaua dalalema. Cäcöbö wəlii ja, abinaja a cuma. —¿Wedi bei wafä tä dayäö cule? —a cuma. —Tä ə wäyäle —cäcöbö cuma—. ¿Wedi bä nija bei wa li bälöblaa cule?
- 39 Cäcöbö naca showalema. —Jabo. Ya lä cule jamö, wafä tä möbä —a cuma. Motoca a yajadou waiquioma. Cäcöbö naca fa showadalofälönö, a lä cuono wei tä yafi dabölalema. Öja cäcöbö fe weyalayoma.
- 40 Juan a wə fa jilibölänö, Jesús nija cäcöbö lä yauono wei ai a lä cui, Andrés a wəfa cuoma, Simón Pedro bä fäähä e lä cui.
- 41 Öjö a lä cuinö, bä əiyobö Simón a fa dayäblalönö a yömölalema. —Yai Bada tänö a shömabä a lä yaileno wei, yama a dalalei culoi, Cristo a wəfa lä jilabou wejei —a cuma.
- 42 Öjö dājä, Jesús nija Simón a çai juma. Öjö nija Jesús a mamö fa showaicunö, a wə çai fama. —Jonasi bä ijilubö Simón wa e. ¿Öjö tawä? Sefa wa wəfa çai nia yädäo —a cuma. ¿Öjö tawä? “Sefa”, a lä cudaliyono wei, “Pedro”, a yai cuma.

⁴³Öjö tä fena ja, Calilea jamö Jesús a bufi cadidioma. Felipe a fa dalalönö, a nacalema. —Jabo. Camiyä nija a da yauiquiyo —e cuma.

⁴⁴Felipe a lä cui, Besaidateli a cuoma. Andrés a ma cui, Pedro a ma cui, öjöteli bä bluca cuoma.

⁴⁵Felipe a lä cuino, Nataniel a fa dayäblalönö, abinaja e cuma. —Moisesi etä ʔ oni jamö a wafa wäyämou lä balöono wei, yama a dalalei culoi. Yai Bada a wano wäyälwä bä ma cuinö, a wafa çai onibomaje. Nasaleteli Jesús, öjö a waiquiwä, José bä ijilubö e lä cui —e cuma.

⁴⁶Abinaja Nataniel e cuma. —Nasaleteli bä nijamö, ¿tä nö bayeli cublou yai tawä? —e cuma. Felipe abinaja e cuma. —Jao. Jabo, öjö lä. Wa möblabä.

⁴⁷Jesúsino Nataniel a waloo fa dalalönö, abinaja a cuma. —Fei a lä waloole, Isaeli nodiwä çä a yai. A jolemou daomi —a cuma.

⁴⁸Nataniel abinaja e cudaliyoma. —Jao. ¿Wedi tänö bei wale li daö cule? Abinaja Jesús a cuma. —Felipenö wa nacaö showao mlao däjä, ico fi cotä jamö wa da lole bäfä dalalema —a cuma.

⁴⁹Nataniel abinaja e cuma. —Tä ʔ wäyäle. Cafä Yai Bada wa e Ijilubö waiquiwä. Isaeli bäma ecö nija wa Bada nia lä läo wei, ¿jöjö wa dodijiwä!

⁵⁰Abinaja Jesús a cuma. —“Ico fi cotä jamö bäfä dalalema”, ya cuu ja, öjö tä wai bädawä ma cuinö, ¿wale ʔ nia bejedi bufii tawä? Tä yai lä lojode wei, wa tä nia bluca dablao —a cuma.

⁵¹Abinaja Jesús a cuma. —Cafä wamacö nija ei ya wä lä cui, bejedi lä ya wä. Judu wama mösö cacablou fa dalalönö, camiyä ya lä yanowamöblaleyoluno wei ya nija, Yai Bada wama etäbä ajele nia juu dablao. ¿Öjö tawä? Wama bä nia itou dablao, wama bä nia çai duo dablao —a cuma.

San Juan 2

¹Bolacabö tä mö didi fa cublalunö, Calilea tä ulifi jamö, Canaateli bä çocamolayoma. Cäcöbö lä doayou wei cäcöbö nofi çocamoabeje jamö, Jesús bä nöö e çai loo coyocooma.

²Jesús a ma cui, cama ebä lä nocamabono wei bä ma cui, öjö bä bluca nacalemaje, cäcöbö nofi çocamoabeje.

³Bä çocamobä jamö, nashiwä toubä waicoma cudeenö, Jesús nija abinaja bä nöö e cuma. —Nashiwä e toubä jowa waicoma tai —e cuma.

⁴Abinaja Jesúsno bä nöö e nowa tama. —Nabe. Cafänö wale shömabä wami. Ya tä taö mö lä juno wei, ya tä taö showadaobä tämi —a nowa tama.

⁵Öjö däjä, cama e yafi lä cuono wei a wä juamobä ebä lä cui, Jesús bä nöö enö bä yömölama. —Ijiluyänö wamacö nowa taö ja, wama a wä nia juaö —a cuma.

⁶Bei. Jai oshoboli bä bada cuwä,

⁶täbä bada itao ajedeoma, maa mabä ja bä lä tablaleno wejei bä bada. Judio bä showadi aumamou lä cuaaö weinaja bä aumamou cuaabä, öjö ubä li cuoma, Moisesinö bä taamaö lä bufino weinaja showawä.

⁷Bada a wə juamobä ebä nija abinaja Jesús a cuma. —Fei bä bada lä itatale bä jamö, mau ubä fe da lajoaboduje —a cuma. A wə juaö fa showadalöjenö, ubä casö malöcöabodayomaje.

⁸Öjö däjä, bä iyabä jamö a bada lä loono wei a nija, ubä wabamaö bufima. Abinaja Jesúsnö bä nowa tama. —Bei. Fei däjä wama ubä fa jiquelönö, bada a nija ubä da jöbäcuduje —bä nowa tama. Inaja bä nowa tama yalo, ubä fa jiquelöjenö, e ubä çai icuquemaje.

⁹Öjö däjä, bä iyabä jamö a bada lä loono wei a lä cuinö, nashiwä toubä cublou lä nomöjölayono wei toubä wabama. Mau ubä ja toubä lä tablamolayono wei tä ja, a mojuduoma. ¿Öjö tawä? Toubä lä jiqueleno wejei bänö, ubä shino daö ayaomaje. Öjö däjä bada a lä cuinö toubä fa wabanö, a bufi shi jalimolayoma. A suwäbö nia lä däono wei a fiya nacaamaö showadao bufima.

¹⁰Abinaja a shi jalimolanö, a cuma. —Ei toubä shino yai coamamou dodijidawä! Ai täbä lä cuaaö weinaja mlai, çafä wa shino yai dodijaö. Ai täbä lä cuinö, nashiwä dodijidawä toubä coablamaö fa balöojenö, täbä bädöa waiquilaliyono wei ja, öjö däjä wälidiwä toubä li wawäblamaö majöö dicooje. Öjö ma cui, çafänö wa toubä wawäblamaö lä majöle, toubä shino yai dodijidawä fe balojowä —a cuma.

¹¹Inaja Jesús a cuaaö ja, tä nö lä quiliiji tä jaba wawäblamalema, Yai Bada e nö öjöböamobä. Inaja a doblao damoa fa culalunö, cama ebä lä nocamabono wei bä lä cuinö a wə bejedi bufilemaje. Calilea tä ulifi jamö a cuo däjä, inaja a cuaama, Canaateli bä nijamö.

¹²Öjö tä cublou waiquilayono wei ja, Cabenaoteli bä shabonobö jamö, Jesúsnö cama ebä çai cua nomöjölayofälöma. Bä nöö e cuoma, bä fääshä ebä çai, cama ebä lä nocamabono wei ebä çai. Öjamö bä fe weyablaliyoma.

¹³Judio bänö Yai Bada a waiteli lä jayvano wei a nofi çocamaoö çobeje, tä cublou ajedeoma. Öjö cudeenö Jelusale jamö Jesús a ayoma.

¹⁴Yai Bada etä yafi jəfa jamö a fa falönö, blada bä ja yalo bä lä jöbäö wejei bä dalalema. Baca bä tabomaje, oweja bä çai, joledo bä çai. Blada bä lä nomjöano wejei bä çai läa dalalema.

¹⁵Öjö däjä, tocuta bä fa däalalönö, bä si yoabä täcö fa diyäblalönö, bä bluca yashuaquema. Oweja ebä sho, baca ebä sho, Yai Bada etä yafi jəfa jamö bä lä cuono wei bä bluca yashuaquema. Blada bä lä nomjöano wejei bä ma cui, bä bladabö çai liyäyaö cuaama. Bä bladabö lä maquecono wei, täbä çai jocäabodayoma.

¹⁶Joledo bä lä nomjöano wejei bä lä cui, abinaja bä nowa çai tama. —Fei bä çai da blajalöje. Fayä e yafi lä cui, yalo bä lulamobä e yafi tablama dijejä —bä nowa tama.

¹⁷Öjö dájä, cama ebä lä nocamabono wei ebä lä cui, tä ʘ oni cuo lä balöono wei tä ʘ ja bä bufi möblaliyoma. Abinaja tä ʘ oni cuu. Afä ya tä yafi nofi lä jalubou wei tänö, ya bufi nia wajäblou jödödö. Einaja tä ʘ oni cuu.

¹⁸Inaja Jesús a cuaaö yalo, judio bänö a wälímaje. —¿Wedi a wänö, wa li inaja cuaaö bashio? Tä nö lä quilijii tä da wawämalö, Yai Bada wa e nö öjöböamobä. “Öjö lä a wänö waiquiwä”, yamacö cubä —bä cuma.

¹⁹Abinaja Jesús e cuma. —Jao. Ei a yafi da wälialöje, öjö lä. Bolacabö tä mö didi fa cublalunö, ya yafi itamaö ço wä —a cuma.

²⁰Öjö dájä, abinaja judio bä cuu nomöjöoma. —Ei Yai Bada etä yafi itamaöje dájä, lasha 46 a lalomalema ma cujei, bolacabö wa tä mö didi fa tablamalönö, ¿wa yafi nia itamaö ço showadao daanö? —bä cuma.

²¹Öjö ma cui, Yai Bada etä ʘfa yafi wäyöö lä yacläono wei, cama a wäfa yai wäyämamoma. Yai Bada a tabou yalo, cama a yafibö ʘfa taoma.

²²¿Öjö tawä? Jesús a fa nomalönö, a demi jocädou lä çolayono wei dájä, cama ebä lä nocamabono wei ebä bufi jaducublaliyoma. Yai Bada tä yafibö ʘfa lä tamono wei tä nofi fa jaducubojenö, Yai Bada etä ʘ bejedi bufilemaje. Jesús a wä bejedi çai bufia showalemaje.

²³Jelusale jamö, Yai Bada a waiteli lä jayvano wei a nofi çoçamaoö çoje dájä, Jesús a cuoma. Öjamö lä a culanö, Yai Bada e nö öjöböamobä, tä nö lä quilijii tä bluca wawämalema. Öjö tä dalalemaje yalo, bluca bänö a wä bejedi bufilemaje.

²⁴Öjö ma cui, öjö bä nija Jesús a mölanomi.

²⁵Bä bluca daö waiquioma yalo, a mölanomi. Cama nija yanowamö täbä ʘfa wäyäbeje, tä cuono malä mlai. Cama a showawänö, bä jödödöwä daö malä showadaono wei.

San Juan 3

¹Faliseo ai a wäfa Nicodemo lä cuono wei, judio bada a cuoma.

²Öjö a lä cui, didi dájä Jesús nija a icua fe fa jaluicunö, abinaja e cuma. —Tä ʘ wäyäle. Yamalecö yömölayolubä, Yai Bada tänö wa shömölema. Öjö yama tä daö. Öjö wa e nö öjöböamobä, tä nö lä quilijii bluca wa tä wawämaö. Yai Bada tänö wa çai cuo mlao fa cunoja, inaja wa nö cuaabö mlai —e cuma.

³Abinaja Jesús e cuma. —Cafä nija ei ya wä lä cui, bejedi lä ya wä. A tablamou ço lä mlai a lä cuinö, Yai Bada tänö cama ebä nia çai lä cuo wei tä nia dablaimi —e cuma.

⁴Abinaja Nicodemo e cuma. —Yanowamö täbä badao waiquio dájä, ¿wedinaja bä tablamou li cuo çoçabä? Bä tablamou çoçabä, bä nöö bä nija bä didio çoçabä tä cua malä mlai —e cuma.

- ⁵Abinaja Jesús e cuma. —Cafä nija ei ya wä lä cui, bejedi lä ya wä. Mau u ma cuinö, Yai Bada tä Bufi ma cuinö, öjö tänö a tablamou ço lä mlai a lä cui, Yai Bada tänö cama ebä çai cuobä jamö a cuo daomi.
- ⁶¿Öjö tawä? Yanowamö täbä nija bä lä tablamou wei, yanowamö täbä ijilubö. Yai Bada tä Bufinö bä tablamou lä ço wei bä lä cui, öjö Yai Bada bei ijilubö ebä li.
- ⁷¿Öjö tawä? “Wamacö tablamou çobä lä”, bäfä nowa lä tafe tä ja, a bufi mla dijä.
- ⁸Wadoli wa malä dale. A wadoli juu bufiobä jamö, a nia juimaö. A jayuabä jamö, wa wä jiliaö bäa ma cule, wa nia dablaimi. “Öjamö lä a cuoma a jayuquei lä cufe”, wa nofi nia çai taboimi. A nia juu lä nomöjöö wei jamö ma cui, wa tä nia çai daimi. Wa tä daö ma mlai ma cui, a malä cuaaö wei. Inaja showawä, Yai Bada tä Bufinö bä tablamaö lä ço wei, wa tä dabraö ma mlai ma cui, a cuaaö lä —Jesús e cuma.
- ⁹Nicodemo abinaja e cuma. —¿Wedinaja täbä li fa taamamonö, täbä nia li tablamamou ço? —e cuma.
- ¹⁰Abinaja Jesús e cuma. —Cafänö, Isaeli nodiwä wa ebä yömölabä wa ma cui, ¿wa tä li daimi tawä?
- ¹¹Cafä nija ei ya wä lä cui, bejedi lä ya wä. Yama tä lä daö wei yama tä afa wäyöö. Yama tä lä möno wei yama tä afa taö. Öjö ma cui, yama tä afa lä taö wei, wama tä a bufiboimi dicowä.
- ¹²Eja täbä lä cuaaö wei tä ja, bamacö yömölaö ma cule, wamale a bejedi bufiimi waiquiwä. Fedu jamö wama tä möö lä mlai tä ja bamacö yömölaö ja, bei wamale a bejedi bufiimi yaiquei —Jesús a cuma.
- ¹³Abinaja e cuo çoma. —Fedu jamö a yanowamö lä ösölayono wei a cuami, wama a wä jiliabä. Öjamö lä ya cuoma ya lä itolayono wei ya lä cuinö ya tä shino li daö, ya lä yanowamöblaleyoluno wei ya lä cuinö.
- ¹⁴¿Öjö tawä? Ulifi bloque a jamö, Moisesinö olu cäcö nö ijidubö befi çai lä itaqueno weinaja, inaja showawä camiyä ya lä yanowamöblaleyoluno wei, ya befi çai itao cuobä ya.
- ¹⁵Camiyä wale a bejedi lä bufii wejei bä bluca lä cui, bä bälimi cuobä.
- ¹⁶Yai Bada tänö yanowamö täbä nofimaö fa dodijionö, bä Ijilubö moli ya e lä cui yale shömölema. Wale a bejedi lä bufii wejei bä bluca lä cui, bä nomaö mlai ja bä bälimi cuobä.
- ¹⁷Yai Bada tänö bita jamö bä Ijilubö wale lä shömöleno wei ya lä cui, yanowamö ya täbä nö bleaamabä wale shömano malä mlai. Ya täbä yai jucäabä wale shömölema.
- ¹⁸Wale a bejedi lä bufii wejei bä lä cui, Yai Bada tänö öjö bä nö bleaamabä bämi —a cuma—. Wale a bejedi bufii lä mlajei bä lä cui, öjö bä nö bleaamabä cäbä. Yai Bada bei Ijilubö moli ya e lä cui, wale a bejedi bufiimije yalo, bä nö bleaamabä bä li waiquiwä.

- 19'Yanowamö täbä bufi wacacamabobä, bita jamö Yai Bada etä shiji ma waloole ma cui, etä shiji bufiimije. Mö didi tä shino yai bufiije, ¿öjjo tawä? Bä dobloimi waiquiwä cudeenö bä jöyao bufi doblao. Inaja bä cuaaö cudeenö bä nö nia bleaamaö.
- 20Wälidiwä talewä bä bluca lä cuinö, Yai Bada etä shiji nofi wälibouje. Bä lä cuaaö wei bä dablamous bufiomi yalo, tä wacacaobä jamö öjjo bä juimi.
- 21Öjjo ma cui, bä lä bejedimou wei bä lä cui, tä wacacaobä jamö öjjo bä shino yai icuo, Yai Bada etä ä lä juaö wejei wawädowä bä dablamosä —Jesús a cuma.
- 22Öjjo tä cublou waiquilayono wei ja, Judea tä ulifi jamö Jesúsnö cama ebä lä nocamabono wei bä çai juma. Öjamö lä bä çai fa yanöcöblaicunö, täbä fe ojomamama.
- 23Bä fe lä ojomano wei a Juan lä cuinö, Enono jamö ai bä fe çai ojomaö mö feduo showama, Salimiteli bä shabonobö ajede ja. Öjamö mau bluca ubä ajedeoma yalo, Juan nija bä fa icuicunö, bä fe ojomamoma.
- 24Bä doblou lä mlai bä fe laobä jamö, Juan a fe lao showaono malä mlai.
- 25Bei. Yai Bada nija bä dodijidawä dablamosä, judio bä showadi lä aumamou wei tä äfa wayoaöje ja, Juannö bä lä nocamabono wei bä sho, judio ai a sho, bä ä bluca lämoma.
- 26Öjjo däjä, Juan nija bä fa junö, abinaja bä cuma. —Tä ä wäyäle. Jodana ai u mashi jamö, çafä nijamö a lä icuono wei a lä cui, wa wäfa wäyää da balöoblei a lä cui, fei däjä quiji a cua çoa lä cule. Täbä fe ojomaö dicoo. ¿Öjjo tawä? Öjjo nija bä bluca juu bashia majöa lä cule —bä cuma.
- 27Juan abinaja a cuu mö feduoma. —Öjjo a nö bada öjöböaöje ja, öjjo Yai Bada tä mayo waiquiwä. Yai Bada tänö yanowamö täbä nofi bada tamaboimi ja, bä nofi nia taboimi bädaoje.
- 28Çafä wamacönö wamale ä malä jilileno wei. “Yai Bada tänö a shömabä a lä yaileno wei a lä cui, öjjo yami”, ya mada cublei. Öjjo a balö jamö Yai Bada tänö yale shömöa balölema.
- 29'¿Öjjo tawä? —Juan a cuma—. Wälonö suwä a däaö ja, cama e li suwä. Öjjo a wä ja, cama e nofi lä cui, e bufi nia doblalou mö feduo. Inaja showawä, öjjo a nö Bada öjöböaöje ja, fei däjä ya bufi shino yai doblalou.
- 30Cama a nö Bada lä öjöböamou wei, öjjo tä shino yai balafälöbä. Camiyä nija bä bufi cuo lä balöono wei, öjjo tä shino mlaaö majöofälöbä —a cuma.
- 31Bä fe lä ojomano wei a Juan lä cui, abinaja a cuma. —Fedu jamö a cuoma a lä itolayono wei a lä cui, öjjo a shino Bada ayawä. Bitä jamö camiyä sho bämacö li lä bälöle, öjjo ya. Bitä jamö täbä lä cuaaö wei, camiyänö öjjo ya tä äfa shino wayoaö. ¿Öjjo tawä? Fedu jamö a lä cuono wei a lä cui, öjjo a shino Bada ayawä.
- 32'Tä lä mödayono wei, tä ä çai lä jililedayono wei, öjjo tä äfa bluca wäyää ma cui, a wä bejedi bufiimije.

³³A wə nofi yai mölabou fe lä yadio wejei bä lä cuinö, Yai Bada a wəfa çai bejedi taöje.

³⁴¿Öjö tawä? Yai Bada tänö a lä shömöleno wei a lä cui, öjönö cama a wəno wäyää. Yai Bada tänö a fa dobälönö, bei a Bufinö a malä jödödöbole.

³⁵Bämacö lä Föömole a lä cuinö, showadi bä Ijilubö e yai nofimaö. Jödödöwä täbä lojodobobä, a Bada tablamalema.

³⁶Öjö bä Ijilubö e a bejedi lä bufii wejei bä lä cui, bəlimi bä cuobä bä li. Öjö ma cui, bä Ijilubö e a juaö lä mlajei bä lä cui, öjö bä nia bəlimi cuomi. Yai Bada tä nö wəlowä lä jushudou wei tänö bä nö bleaabä öjö bä li.

San Juan 4

¹Fe ojomalewä Juan a lä cuinö, cama ebä lä nocamabono wei bä fe bluca ojomama. Bada tä Jesús ma cui, inaja cama a çai cuaaö mö feduo showaoma. ¿Öjö tawä? Jesús ebä shino yai lä blucaono wei, faliseo bä bada lä cuinö tä a fa jililäjenö, bä a wayoma. Öjö dájä, Jesúsno bä wəno fa jililänö,

²⁻³Öjamö, Judea tä ulifi lä cui jamö, a bälöo bufionomi. Calilea jamö a juu çobä, a aa çolayofälöma. ¿Öjö tawä? Öjö ma cui, Jesús a cadidiwänö täbä fe ojomanomi. Cama ebä lä nocamabono wei bä nija täbä fe li ojomamoma.

⁴Bei. Calilea jamö Jesús a lä çoimadi dájä, Samalia tä ulifi jamö a jayuquefälöma.

⁵A jayuaö showale, Sicalateli bä shabonobö jamö a çoblaliyoma. Bä ijilubö José e nija, Jacobo a bada lä cuono wei anö, etäca ficali lä jöbäqueno wei täca ajede jamö, bä shabonobö blaoma.

⁶Öjamö lä, Jacobonö uca yedu ja lä diyäno wei, uca cuo showaoma. ¿Öjö tawä? Motoca a yololoblodayou dájä, Jesús a wəshimi jolou ja, öjö uca casö jamö a loofälöma.

⁷Samaliateliyoma ai anö mau u jiquei ja a fa juimanö, Jesús e a fama. —Ai u da jiquebayo —e cuma.

⁸¿Öjö tawä? Jesúsno bä lä nocamabono wei bä cuonomi. Sicalateli bä nijamö, nii bä luluabeje bä ayoma yalo, Jesús a yami loo juoma.

⁹Abinaja Samaliateliyoma e cuma. —Cafä judio wa ma cui, Samaliateliyoma ya nija, ¿mau bei wa u li nacaö cule? —e cuma. ¿Öjö tawä? Judio bänö Samaliateli bä möö ojodaono malä mlajei.

¹⁰Jesús e a juo ja, abinaja e cuma. —Yai Bada tänö tä lä jöbäaö wei wa tä daö fa cunoja, cafä nija mau ya u lä nacafe wale nö çai öjöböaö fa cunoja, camiyä nija wa nö yai nacobö wei. Cafä nija bəlimiblamamodima ya u nö jöbäquebö wei —e cuma.

¹¹Abinaja suwä e cuma. —U blajaa a lä cubocöli. Wa u jiqueabä wa tä çai taboimi. ¿Öjö tawä? ¿Wedi jamö öjö bəlimiblamamodima wa u nia li dääö?

- 12**Ei uca lä cui, Jacobonö yedu ja uca li diyäma. Cama nodiwä yama ecönö yama uca nofi tabou showaa. Cama a ma cui, bä ijilubö ebä ma cui, yalo ebä çai bluca ma cui, ei u ja bä amishi bluca çoma. Inaja cama a jaba ma cuaano wei ma cui, ¿cafä wa wafa nia shino lojode wäyämamou ayao daanö? —e cuma.
- 13**Abinaja Jesúsnö a nowa suwä tama. —Ei u ja, bä amishi lä ço wei bä lä cui, bä nia amishi mladou ma mlai ma cui,
- 14**camiyänö ya u lä jöbäaö wei u çoaöje ja, bä amishaö çadaaö mlaicätä. Ubä fe lä jojoblai jamö ubä fadii shi wälili lä cuaaö weinaja, bälímiblomodima ya u nia lä jöbäaö wei, inaja u fa cuaadinö, bälími bä nia cuo shi wälili —a nowa tama.
- 15**Abinaja suwä e cuma. —Jaö. Öjö u da jöbäbayo, ya amishaö çadaaö mlaobä. Äyämö ya u jiquei mö juu ço mlaobä —e cuma.
- 16**Jesús abinaja e cuma. —Bei. Feyalofä a da nacajalu, äyämö wa çai juu çoima —e cuma.
- 17**—Ya feyalobö cuami —a suwä cuma. —Bejedi lä wa wä —Jesús a cuma—. Feyalofä a cuami lä.
- 18**Afä walo 5 wa bä ma tabono wei ma cui, fei däjä wa lä table a lä cui, afä a malä mlai. Miji wa tä a lä tafe tä a ja, wa bejedimou —a cuma.
- 19**Abinaja suwä e cuma. —Fei däjä bäfä nö öjöböaö. Yai Bada a wano wäyäléwä wa —e cuma.
- 20**Öjö däjä, abinaja a cuma. —Camiyä yamacö bada lä cuono wei bä lä cuinö, ei macö jamö Yai Bada nija showadi bä möfe bolanö, a wafa Bada doblao tablaama ma cujei, abinaja judio wamacö shino cuu dicoo. “¡Jelusale jamö yai! Öjamö täbä möfe bolanö, a wafa Bada nia shino doblao taöje”, wamacö shino cafä cudii —a suwä cuma.
- 21**Abinaja Jesúsnö a nowa tama. —Ei ya wä lä cui tä a nia bejedi wawäblou. Fayä nija bä möfe bolanö, a wafa Bada doblao tabeje, fei macö nia yaiomi. “Jelusale jamö shino”, bä nia çai cuimi.
- 22**Cafä Samaliateli wamacö lä cuinö, Yai Bada nija wamacö möfe bolanö, wama a wafa Bada doblao ma taö wei ma cui, wama a yai daimi. Judio yamacönö yama a yai dalanö, yamacö möfe bolanö, yama a wafa Bada doblao taö. Yanowamö täbä nia lä jucäamou wei, judio yamacö nija tä wawäblobä tä malä cui.
- 23**Öjö ma cui, abinaja tä nia shino cuo. Tä wawäblou waiquia lä cule. Bä möfe bolanö, Fayä a wafa Bada doblao lä taö wejei bä lä cui, bei bä bufi yainö bä a nia faö. Bä bejedimolanö bä möfe nia bou. ¿Öjö tawä? Inaja bä lä cuaaö wei, Fayänö bä malä bufii wei.
- 24**Yai Bada a lä cui, yai bei cätä. ¿Öjö tawä? Öjö nija bä möfe lä bou wei bä lä cui, bei bä bufi yainö, a wafa nia Bada doblao taöje. Bä bejedimolanö, bä a nia faö —Jesúsnö a nowa tama.

- 25** Abinaja suwä e cuma. —Yai Bada tänö a shömabä a lä yaileno wei a lä cui, öjö a nia juu, Cristo a wafa lä jilamou wei a lä cui. Öjö ya bufibou. Öjö a waloqueyoluno wei ja, jödödöwä tä ja, yamalecö nia yai yömöläö, öjönö —e cuma.
- 26** Öjö däjä, abinaja Jesús e cuma. —Bäfacö ą lä wayole, öjö ei lä ya waiquiwä, ya cua shi lä wälile —e cuma.
- 27** Öjö däjä, cama ebä lä nocamabono wei ebä waloa çoquema. Samaliateliyoma sho cäcöbö ą lä wayou wei cäcöbö fa dalalöjenö, bei bä bufi shädayaimoma ma cui, bä ą fanomi. “¿Wedi wa tä taö?”, bä cunomi. “Samaliateliyoma a ma cui, ¿wedi tä tabä wa wä li wayomaö cule?”, bä çai cunomi.
- 28** Öjö däjä, öjamö oshoboli e fa ıtablacöfälönö, shabono jamö a suwä aa balölayoma. A fa çoblalunö, abinaja bä nowa taö çojoloma.
- 29** —Bä da jaboje. Quijamö walo a da möcöliyoje. Camiyänö ya tä bluca lä tano wei tä ą wawämaö cadidou cublei. Yai Bada tänö a shömabä a lä yaileno wei, ¿öjö lä a mada tawä? —bä nowa tama.
- 30** Öjö däjä, shabono jamö bä fa falalunö, öjö nijamö bä bluca ayoma.
- 31** ¿Öjö tawä? Cama bä juu showao däjä, Jesús a nia iyamaö fe fa yadiojenö, cama ebä lä nocamabono wei bä ą fe blacäjoma. —Tä ą wäyäle. A da iyayo, ¿öjö tawä? —ebä cudima.
- 32** Öjö ma cui, abinaja a cuma. —Wama a nii daö lä mlai ya li tabou waiquia, ya iyabä —a cuma.
- 33** Inaja a cuma cudeenö, cama ebä lä nocamabono wei bä wälüyoma. Abinaja bä cuma. —¿Ai täbänö, ebä nii bälää jäquemaje tawä? —bä cuma.
- 34** Abinaja Jesúsnö bä nowa tama. —Yale lä shömöleno wei ya wä juaö bufi doblao. Tä tamaö lä bufii wei ya tä jödödöblaö. Öjö iba nii bä waiquiwä.
- 35** ¿Öjö tawä? Abinaja wamacö cuu. “Belibo 4 bä cublou däjä, nii bämä bä nia taö”, wamacö cuu malä dao wei. ¿Tä da möje, öjö lä! Bamacö nowa taö lä cule. Yai Bada etäca ficali jamö, fei däjä bä nii tamou showaobä cätä. Täbä yanowamö lä yömölamou wei, jai nii bä tamobä, bä waiquiwä.
- 36** ¿Öjö tawä? Nii bä lä taö wejei, bä nowa ojode coamamou. Ai bä nijamö, nii bä bälää lä cuaaö wejeinaja, camiyä nija bä yanowamö lulubou cuoje, bälimi bä cuobä. Mobä döaö lä balöo wejei bä ma cui, nii bä taö lä nomöjöö wejei bä ma cui, öjö bä bufi bluca doblalobä.
- 37** Abinaja bä showadi lä cuu wei, bä ą nö malä bejediaö wei. “Ai bänö mobä döaöje, ai bä mö feduwä lä cuinö nii bä taöje”, bä cuu.
- 38** ¿Öjö tawä? Wamacö jaba ojodamou lä mlaono wei jamö, wama bä nii tabä bamacö shömölema. Ai bä ojodamou lä balöono wei jamö, fei däjä çafä wamacö ojodamou yädäblou nomöjöö lä cule —Jesúsnö bä nowa tama.

39 ¿Öjö tawä? Öjö Samaliateliyoma a lä cuinö, Jesús a wafa wäyää çojolobä jamö abinaja a cuma. “Camiyänö ya tä bluca lä tano wei tä a wawämaö cadidio cublei”, a cuma. Einaja a cuma yalo, Samaliateli ai bä bluca lä cuinö, Jesús a wä bejedi bufilemaje, öjö shabono jamö bä lä bälöle bä lä cuinö.

40 Öjö cudeenö, Jesús nija öjö Samaliateli bä fa waloicunö, a fe weyamaö fa bufiijenö, öjö bä nija bolacabö a fe dödölayoma.

41 Jesús a wä fa jililäjenö, cama ai bä bluca lä cuinö a wä bejedi çai bufia mö fedulemaje.

42 Öjö bä lä cui, abinaja Samaliateliyoma nija bä cuma. —Fei däjä, öjö bäma a wä bejedi bufi lä cule, çafä wa wä ja bädawänö mlai. Camiyä yamacö ma cuinö yama a wä malä jilileno wei. Yama a daö. Yanowamö jödödöwä täbä nia lä jucäaö wei, öjö lä a waiquiwä —bä cuma.

43 Sicalateli bä nija a fe didi fa bolacablalufälönö, Calilea jamö Jesús a aa majölayoma.

44 Yai Bada a wano wäyälwä bä lä cui, cama bä ulifibö yai ja, showadi bä a jiliblaö lä mlajei tä afa wäyää malä waiquiono wei.

45 Calilea jamö a fa çoblalunö, öjamö bä lä bälöle bänö dodijidawä a çoblamalemaje. Jelusale jamö bä iyaö çai çocamobä jamö, Jesús a dodijaö dabraö malä waiquiono wejei. ¿Öjö tawä? Bä iyaö çai çocamobä jamö cama bä çai cuoma.

46 Calilea tä ulifi jamö a fa çoblalunö, Canaateli bä nija a waloa çaliyoma, uba nashiwä ubä cublou lä nomöjölasyonö wei ubä mau lä taamano wei jamö. ¿Öjö tawä? Öjö tä mashi biyä jamö, Cabenaoteli bä nija bä bada lä läono wei ai a lä cui, bä ijilubö e jalilioma.

47 Judea jamö a cuoma Calilea jamö Jesús a wafa çoblou fa jililänö, a nacaö mö ayoma. Bä ijilubö e jalomadayobä, a wä fe blacäjoma. A nomaö ajedewä, a cuoma.

48 Öjö cudeenö, abinaja Jesús e cuma. —Tä nö lä quilijii ya tä wawämami ja, wamale a bejedi bufiimi dicowä —e cuma.

49 Bada a lä cuinö, abinaja Jesús a nowa tama. —Tä a wäyäle. Ijiluyä a fõshöacö mladono mlai ja, ja jabo da showadao! —a nowa tama.

50 Abinaja Jesús e cuma. —A da çobofälö. Ijilufä a nia jalou —e cuma. Jesús a lä cuno wei a wä bejedi bufibole a çolayofälöma.

51 A çofälöö däjä, a wä juamobä ebä mö balayoma. A yömölaöje ja, bä ijilubö e afa demi wäyämaje.

52 A wafa demi wäyämaje yalo, bä wälii cadidoma. —¿Wedi jamö motoca a yai cuo däjä, a jaba ononoblaliyoma? —a cuma. Abinaja bä cuma. —Weyaja a motoca yololodayou däjä, a yobli mladou showadalayoma —bä cuma.

53 Öjö bä a ja, a bufi jaducublaliyoma, bä ijilubö e lä jaliliono wei a lä cui. “Ijilufä a nia jalou”, Jesúsno a nowa lä tano wei däjä, öjö däjä showadawä, a jowa jaloa

showalayoma. Öjö dǎjä, cama a ma cuinö, cama ebä bluca ma cuinö, Jesús a wa bejedi bufia showadalemaje.

⁵⁴¿Öjö tawä? Judea tä ulifi jamö culanö, Calilea jamö a waloa fa majöicunö, tä nö lä quilijii tä jaba wawämalema, Yai Bada e nö öjöböamobä. Öjö dǎjä a juu çobä jamö, bada bä ijilubö e jalomaö dǎjä, inaja showawä a cuaaö çoma. Yai Bada e nö öjöböamobä, a nö quiliaö çoma.

San Juan 5

¹Öjö tä cublou waiquilayono wei ja, Jelusale jamö judio bä nia iyaö çai fa çocomonö, öjamö Jesús a alayoma.

²¿Öjö tawä? Jelusaleteli bä shabonobö jamö, oweja yoca lä cule jamö mau uca cuoma. Ebleo bä caficö a ja, Besada uca afa jilabouje. Öjö u casö jamö, yano bloque ⁵ maloco bä fe fayooma.

³Öjö bä yano jamö, bä lä wǎlidii bä bluca blaoma. Ai bä jubäböoma, ai bä mata wǎlidioma, ai bä yǎtoliböoma.

⁴¿Öjö tawä? Yai Bada etä ajele fa itoblaayonö, u quiyaamaö ja, a jalili itoo lä balöo wei a lä cui, bä jaloobloma.

⁵Bei. Öjamö lä ai a jalili nö dedeaö dǎjä, lasha 38 a faa ma waiquimaleno wei ma cui, a jalili cuo showaoma.

⁶Jesúsnö öjö a dablao dǎjä, a jalili blao nö lä dedeano wei tä daö waiquioma yalo, a wǎlima. —¿Wa jalou bufi doblaa cule? —e cuma.

⁷Abinaja a jalili cuma. —Tä a wǎyäle. Mau u quiyaamaö dǎjä, lobe wale itoblamabä a cuami. Ya nö icublobimi. Ya obisai juu showai ja, ai bä shino itou balöo dicoo —a cuma.

⁸Abinaja Jesúsnö a nowa tama. —Bei. A da ubladalu. Wa lä maquele wa täcö fa jocälänö, täcö çai çojamöö da ço —a nowa tama.

⁹A jaloa fa showadalunö, a lä maqueono wei täcö fa jocälänö, täcö çai çolayoma. ¿Öjö tawä? Täbä yanöcöobä tä mö jalu sábado cuoma.

¹⁰Öjö cudeenö, abinaja judio bä cuma, a lä jalolayono wei a nija. —Bämacö yanöcöobä tä mö jalu. Wa lä maqueono wei wa täcö çai jubä tämi. Tä a läa —bä cuma.

¹¹Öjö ma cui, abinaja a cuma. —Wale lä jalomaleno wei a lä cuinö, abinaja wale nowa tama. “Wa lä maquele wa täcö fa jocälänö, täcö çai çojamöö da ço”, wale nowa tama —a cuma.

¹²Abinaja faliseo bä bada cuma. —Wa täcö fa jocälänö wa täcö çai çojamöbä, ¿wedinö bei wa li shömölei cufe? —bä cuma.

- 13' ¿Öjö tawä? A lä jalolayono wei a lä cuinö, Jesús a daö fa mlacunö a danomi showawä. A çai dabraö çödaanomi. Täbä bluca lä mashicono wei jamö, a nofi mojududou showalayoma.
- 14' Öjö tä cublou fa waiquilonö, a lä jalomaleno wei a lä cui, Yai Bada etä yafi jamö Jesúsnö a daa fa çölalönö, e a fama. Abinaja e cuma. —Fei däjä wa demi, ¿öjö tawä? Wälidiwä tä taö çödaa dijä, wa nö yai bleaaö fe balojoa dicoicu —a cuma.
- 15' Öjö däjä, a lä jalomaleno wei a lä cui, judio bada bä nijamö a fa alunö, Jesús a wafa wäyää showadaoma. —Wale lä jalomaleno wei, öjö Jesús a waiquiwä —a cuma.
- 16' Täbä yanöcöobä tä mö jalu jamö Jesúsnö a jalomalema yalo, judio bada bänö a báyäblabeje a nabä jumaje.
- 17' Öjö ma cui Jesús a nofi báyäo ja, abinaja bä nowa tama. —Fayä a yanöcöblao mlai ja, showadi täbä bayeliblaö ojodao. Inaja showawä, camiyä ya çai cuaaö mö fedua —bä nowa tama.
- 18' Täbä yanöcöobä tä mö sábado jalu ma cui ja a wasöomi cudeenö, Jesús a shäo bufi doblao waiquiomaje. Yai Bada nija a çai Föömou fa cadidionö, bä jushuo balaö showadaoma, Yai Bada a sho cama cäcöbö afa wäyämoma yalo.
- 19' Abinaja Jesúsnö bä nowa tama. —Cafä wamacö nija ei ya wä lä cui, bejedi lä ya wä. Yai Bada bei Ijilubö ya e lä cui, camiyä ya cuaaö bufi lä doblao wei tänö ya cuaimi. Fayä a lä cuaaö wei ya tä möö yalo, inaja camiyä ya e çai cuaaö mö fedua. Fayänö tä lä taö wei, bä Ijilubö ya enö ya tä çai taö mö fedua. ¿Öjö tawä?
- 20' Fayänö bä Ijilubö wale nofimaö dodijia yalo, a lä cuaaö wei camiyä nija tä bluca wawämaö. Ya lä cuaafenaja bädawä mlai, tä yai lä lojode wei tä nia wawämaö cuaaö. Camiyä nija tä fa wawämalönö, inaja showawä, yanowamö wamacö nija ya etä nia wawämaö cuo mö feduo, wamacö bufi yai shädayaimobä.
- 21' Bä lä nomaö wei, Fayänö bä demi jocädamaö lä çö weinaja, inaja showawä, bä Ijilubö ya e cuaaö mö feduo. Ya bä demi jocädamaö lä ojode wei, ya bä li jocädamaö.
- 22' ¿Öjö tawä? —Jesús a cuma—. Fayänö yanowamö täbä dobloimi jömaili. Bä Ijilubö ya enö, ya täbä dobloimi jömabä wale yai tablamalema,
- 23' wale nofi dodijidawä tabobeje. Fayä Yai Bada a lä cui, a nofi dodijidawä lä tabou wejeinaja, bä Ijilubö ya e ma cui wale nofi çai tabou mö feduobeje. Bä Ijilubö wale nofi dodijidawä tabou lä mlajeinaja, Fayä a ma cui inaja showawä a nofi çai taboimi mö feduweje, wale lä shömöleno wei a lä cui.
- 24' Cafä wamacö nija ei ya wä lä cui, bejedi lä ya wä—a cuma—. Wale a fa jiliajenö, wale lä shömöleno wei a wä bejedi lä bufii wejei bä lä cui, bälimi bä cuobä bä li waiquiwä. Bä dobloimi jömamobä bämi. Öjö bä lä cui, bä nomabä bä ma cuono wei ma cui, bä bälimiblou nomöjja lä cule.

- 25' Cafä wamacö nija ei ya wä lä cui, bejedi lä ya wä —a cuma—. Abinaja tä nia cuo. Tä cua waiquia a lä cule. Bufe nomawä bä lä cuinö, camiyä Yai Bada bei Ijilubö wale ä nia jiliaöje. Wale ä fa jililäjenö, balimi bä nia cuo.
- 26' Balimi bä cuobä Fayänö bä lä taamaö weinaja, bei Ijilubö ya e ma cui, inaja showawä ya e çai cuaaö mö feduobä wale malä tablamaleno wei.
- 27' Ya täbä dobroimi jömabä wale çai lämabou, ya lä yanowamöblaleyoluno wei ya waiquiwä cudeenö.
- 28' Camiyä ei ya wä lä cui ja, bä bufi mla dijä —a cuma—. Abinaja tä nia malä cublou wei. Bä lä nomalalyono wei bä bluca lä cuinö, wale ä fa jililäjenö,
- 29' bä demi nia jocäcou. Demi bä cuo däjä, bä lä bejedimono wei bä lä cui, balimi bä cuobä bä nia jocäcou. ¿Öjö tawä? Wäliwä talewä bä lä cui, bä dobroimi jömamobä, bä nia çai cama jocäcou mö feduo, bä nö yai bleaaö nomöjöobä.
- 30' Abinaja Jesús a cuma. —Camiyä ya cuaaö bufi lä doblao wei tänö ya cuaimi. Fayä ya wä fa jilinö, ya bä yanowamö li jömaö. Camiyä ya cuaaö bufi lä doblao weinaja mlai, wale lä shömöleno wei a lä cuinö wale yai taamaö bufi lä doblao weinaja, ya li cuaaö. Öjö cudeenö, ya bä jömaö ja ya bejedimou showadawä.
- 31' ¿Öjö tawä? —Jesús a cuma—. Camiyä ya wäfa shino wäyämamou ayao fa cunoja, wamale ä bejedi bufibä tä nö cuobö mlai.
- 32' Ai tänö wale äfa li yai wäyää culadi. ¿Öjö tawä? Öjönö wale äfa lä wäyää wei, ya bejedimou daö.
- 33' Bä fe lä ojomaö wei a Juan ma cui nija afä wama bä çai shömölema, wama a wäno jiliaö çojolobä. ¿Öjö tawä? —a cuma—. Öjönö wale äfa wäyää ja, a çai bejedimoma.
- 34' ¿Öjö tawä? Yanowamö täbä ä ja, ya mölabä ya mlai ma cui, cafä wamacö bufi jaducublobä ya wä. Juannö wale äfa lä wäyänö wei, wama tä ä bejedi fa bufinö, wamacö jucäämou fe yadiobä.
- 35' Cowa wacö shi lä culenaja a li Juan cuoma. Öjö wama tä shi nofi jaba doaö ma ojodaono wei ma cui, wamacö nö dedejblonomi dicowä.
- 36' Öjö ma cui, Juannö wale äfa ma wäyää wei ma cui, yale äfa yai bejedi wäyää lä lojode wei, ai tä cua. ¿Öjö tawä? Ya lä cuaaö wei tä showawänö, Fayänö wale lä shömöleno wei tä dablamos malä wawädole. Camanö wale taamaö cudeenö, ya e li cuaaö.
- 37' Fayä cama a showawä ma cuinö wale äfa çai bejedi wäyää mö feduo, wale lä shömöleno wei a lä cuinö —a cuma—. Öjö wama a wä jiliaö mlai ja, wama a dablao mlai ja, wamacö cua showaa.
- 38' Wale lä shömöleno wei ya lä cui, wamale ä çai bejedi bufiimi dicowä ja, cama ma cui wama a wä çai bejedi taboimi.

³⁹’Bałimi wamacö cuobä, Yai Bada showadi wama tä ą oni mödii. ¿Öjö tawä? Camiyä ya wafa yai lä wäyamou wei, öjö lä tä ą oni waiquiwä.

⁴⁰Öjö ma cui, wamacö bałimi cuobä, camiyä nija wamacö juu moji dicowä.

⁴¹’Yanowamö täbä nija ya nofi doamobä, ya tä dayäimi —a cuma—.

⁴²Öjö ma cui, cafä bamacö daö. Bei wamacö bufi yainö, Yai Bada wama a nofimaimi.

⁴³Fayänö wale ma shömöleno wei ma cui, wamale ą juaimi. Ai a lä cui, a juu bufi doblao lä bädao wei a lä cui, öjö lä wama a wä nia shino yai juaö.

⁴⁴Yai Bada a yami lä cule nija wamacö ąfa dodijaö tamobä tä ma cule ma cui, öjö tä lä cui wama tä nofi yai cadidiboimi. Ma, Yai Bada nija mlai, yanowamö täbä nija wamacö ąfa shino dodijaö tamou bufi doblao. Öjö cudeenö, camiyä wamale ą bejedi nö bufibimi waiquiwä.

⁴⁵’Fayä nija camiyänö bamacö ąfa nia taimi —a cuma—. Inaja wale nofi tabo dijejä. Moisesi a yai lä cuinö, wama a nofi lä mölabou wei a showawä lä cuinö, öjönö wamacö ąfa nia dobroimi taö.

⁴⁶Moisesi wama a wä bejedi bufii fa cunoja, camiyä wamale ą nö ąai bejedi bufii mö feduobö wei. Cama etä ą oni jamö, camiyä wale ąfa malä wäyano wei.

⁴⁷Öjö ma cui, Moisesi wama tä ą bejedi bufiimi waiquiwä ja lä, camiyä ¿wedinaja wamale ą bejedi bufii li cuo ayaobä?

San Juan 6

¹Öjö tä cublou waiquilayono wei ja, modu Calilea ai u mashi jamö Jesús a bucadubaliyoma, Dibelia u ąfa ąai lä cule jamö.

²Öjamö lä, Jesús nijamö bluca dodijiwä bä nocalayoma. Yai Bada e nö öjöböamobä, jalili bä jalomaö nö lä quiliano wei tä fa dalalöjenö, bä bluca nocalayoma.

³¿Öjö tawä? Jefu a balöcö jamö, Jesúsno bä lä nocamabono wei bä ąai fa dolequebofälönö, bä ąai lobejelayoma.

⁴¿Öjö tawä? Judio bä nia iyaö lä ąono wei tä ajedoma. Yai Bada a waiteli lä jayvano wei a nofi nia ącamoaö ąmaje.

⁵Jesúsno tä fa mödalönö, cama nija täbä comi juu lä ajedofälöno wei täbä bluca fa dalalönö, Felipe nija a wä fama. —¿Wedinaja bamacö li fa cuanö, nii bäma bä li luluabä, ei bä lä juimi bä iyabä? —a cuma.

⁶Felipe a nia fa wabanö, a wä li cuoma. Camanö tä nia lä taö wei tä daö malä waiquiono wei.

⁷Abinaja Felipe a cuma. —Cuwi. Blada 200 bä ma cui ja, bäma bä nii ma дәlei wei ma cui, bä nö obimi. Nii wajaquemi bä wai jöbädamou ma cuaaö wei ma cui, ai bä nö damolayobö —a cuma.

⁸Cama ebä lä nocamabono wei ai a lä cui, Simón Pedro bä fääshä Andrés e lä cui, abinaja e cuma.

⁹—Nii bä nowa bluca lä mlai, eja ijilu a lä cuinö 5 bä wai nii tabou, yuli bolacabö cäcö çai. Öjö ma cui, bä nia oimi. Ei bä lä yododole bä bluca fe balojowä —e cuma.

¹⁰Abinaja Jesúsnö bä nowa tama. —Bä da loamaboduje —bä nowa tama. Bä yododoobä jamö, moimoima a blaucuoma yalo bä loomobodayoma. Wålo jai 5.000 bä cuoma.

¹¹Öjö däjä, nii 5 bä lä cuono wei, Jesúsnö bä dälema, yuli bolacabö cäcö çai. Öjö bä fa dälönö, fedu jamö a mö fa nonoicunö, bä nia lä iyano wei tä ja Yai Bada nija a bufi afa doblalou wäyämoma. Öjö däjä, bä bluca lä loono wei bä nijamö, bä jöböamaö cuaaö bufima. Yuli cäcöbö ma cui, inaja showawä, bä bufi läablalou mlai ja, bä jöböaö cuaabeje.

¹²¿Öjö tawä? Tábä bluca fa iyaolalunö, bä bädöolaliyoma. Öjö däjä, cama ebä lä nocamabono wei bä lä cui, abinaja Jesúsnö bä nowa taö nomöjöoma. —Bei. Nii bä sheje lä damalajei bä da çablaje, bä wålio bädao mlaobä —bä nowa tama.

¹³Inaja bä nowa tama yalo, öjö nii 5 bä nowa bluca lä mlai, bä sheje ça showaabodayomaje. Bä lä iyano wei bä lä cuinö, nii bä sheje lä damano wejei bä fa çöläjenö, wöö 12 bä ja bä nii sheje fe lajoblamalemaje.

¹⁴Nii bä wai bolacami ma cui ja, Jesúsnö tábä bluca lä iyamaleno wei tä fa dalalöjenö, öjö däjä Yai Bada e nö öjöbölemaje. Abinaja bä cuma. —Yai Bada a wano wäyälwä a nia jowa lä juno wei, i fei öjö lä a waiquiwä! —bä cuma.

¹⁵¿Öjö tawä? Bada a yai tablamaö fe yadiobeje, a nabä juu lä bufiono wejei tä dama cudeenö, jefu a jamö a fe yami doleblaliyofälöma.

¹⁶Tä mö weyaö däjä, modu u jamö cama ebä lä nocamabono wei bä dömöbaliyoma. Bä fa dömöbalunö,

¹⁷canawä a ja bä fa dökäcälonö, Cabenao jamö bä bucaduobä bä befi çai calälalayoma. Tä mö didi jicocoo ma waiquiono wei ma cui, cama bä nija Jesús a waloonomi showawä.

¹⁸Öjö däjä, wadoli a bada fa yacolemonö, modu u bada shäyäjama.

¹⁹Öjamö lä, modu u möamo ja bä yacolemou showao däjä, modu u feyaca jamö Jesús a jelejewä juu ajedoimama. Bä quilia fe balojolaliyoma.

²⁰Öjö ma cui, Jesúsinö lobe bä quili wasöblalema. —Ei camiyä cä ya. Bä quili dijä —bä nowa tama.

²¹A dökäamaö bufi doblaomaje. Canawä a ja a fa dökäicunö, yedu bä nia juu bucaduo lä cuono wei jamö, bä befi çai waloa showadaquema.

²²Öjö tä fena ja, ai u mashi jamö bä bluca cuo lä juono wei bä nö dadio juoma. ¿Öjö tawä? Jesús ebä lä nocamabono wei bä lä cui, canawä a jamö bä lä dökäcäbaliyono

wei dǎjä, bä nö daamaje. Öjö bä nijamö Jesús a coyocoonomi. Bä befi çai yamili lä calälayo no wei tä nö çai daamaje. Ai a canawä çai çonomi.

23Öjö dǎjä, Dibelia jamö culanö bä befi çai lä caläno wei, ai bä çai canawä washölöblaliyomaje. ¿Öjö tawä? Bada a lä cui, Yai Bada nija a bufi ʼafa doblalou wäyämou fa balöonö, bä nii lä wano wejei tä ajede jamö bä washölöquema.

24Öjö cudeenö, öjamö Jesús a dablaö fa mlacujenö, cama ebä lä nocamabono wei bä çai dablaö fa mlacujenö, öjö bä canawä jamö bä dökäcäobaliyoma. Bä fa dökäcäobalunö, Cabenao jamö bä befi çai caläa showalayofälöma, bucadu jamö Jesús a dayäbeje.

25Ai modu u mashi jamö a dablaöje dǎjä, abinaja bä cuma. —Tä ʼa wäyäle. ¿Fei dǎjä wa çobei cufe? —bä cuma.

26Jesúsno abinaja bä nowa tama. —Cafä wamacö nija ei ya wä lä cui, bejedi lä ya wä. Yai Bada ya e nö öjöböamobä, tä nö lä quilijii ya tä ma wawämano wei ma cui, öjö tänö wamacö bufi fa jaducublalunö wamale dayäimi. Ma, nii bänö wamacö bädölayoma yalo wamale li dayäaö. ¿Öjö tawä?

27’Nii bä mladou si lä ijejei bä ja, bä cuaablalou fe balojoo dijä. Täbä bälimi cuobä cäcö nii ja, wamacö shino yai ojodamobä. Öjö cäcö nii ja wamacö dobämobä, ei lä ya waiquiwä, camiyä ya lä yanowamöblaleyoluno wei ya lä cui. Fayä Yai Bada tänö wale nö malä öjöböamale —bä nowa tama.

28Öjö dǎjä, Jesús nija abinaja bä cuma. —¿Wedinaja yamacö yai cuaabä, öjö lä, Yai Bada nija yamacö ojodamobä? —bä cuma.

29Abinaja Jesús e cuma. —Yai Bada tänö wale lä shömöleno wei wamale ʼa bejedi da bufi, öjö lä. Öjö lä tä nabä shino shömaö —e cuma.

30Öjö cudeenö, abinaja bä cuu nomöjöoma. —Yai Bada wa e nö öjöböamobä, tä nö lä quilijii tä da wawämalö, öjö lä. Öjö yama tä fa dalalönö, bäfä ʼa bejedi bufibä. ¿Wedi wa tä yai tabä, cafä bei wa?

31Camiyä bamacö bada bä lä cuono wei bä lä cui, ulifi bloque jamö Moisesinö bä çai juu ja, manaa bä ja bä iyama, tä ʼa oni lä cuu weinaja showawä. Abinaja tä ʼa cuu. Fedu jamö bä nii lä bläläno wei bä ja, bä iyamama. ’Einaja tä ʼa cuu —bä cuma.

32Öjö dǎjä, abinaja Jesús e cuma. —Cafä wamacö nija ei ya wä lä cui, bejedi lä ya wä. Fedu jamö bä nii lä bläläno wei bä ja bä lä iyamano wei a lä cui, Moisesi a cuonomi. Öjö lä Fayä a yai li cuoma, fedu jamö culanö, nii cäcö yai ja wamacö dobäo lä showale a lä cui.

33Yai Bada tänö cäcö nii lä jöböaö wei cäcö lä cui, fedu jamö cäcö cuoma cäcö itolayoma. Yanowamö täbä bälimi cuobä, öjö cäcö nii yai —Jesús e cuma.

34Abinaja bä cuma. —Tä ʼa wäyäle. Showadi öjö cäcö ja yamalecö da dobäblaayo —bä cuma.

- 35 Abinaja Jesúsnö bä nowa taö ja a cuma. —Bä bəlimi cuobä cəcö nii lä cui, öjö bei ya. Camiyä nija bä lä juu wei bä nia ofäimi. Camiyä wale ʔ bejedi lä bufii wejei bä nia amishaö çədaimi.
- 36 Öjö ma cui, cafä wamacö nija ya mada cublei. Wamale ma dabraö wei ma cui, wamale ʔ bejedi bufiimi waiquiwä.
- 37 Camiyä nija Fayänö bä yanowamö lä jöböaö wei bä bluca lä cui, camiyä nija öjö bä nia juu. ¿Öjö tawä? Camiyä nija bä lä juu wei bä lä cui, ya bä wai mlaicätä.
- 38 Fedu jamö culanö ya lä itolayono wei ya lä cuinö, camiyänö ya tä taö lä bufii wei ya tä tabä, ya itono malä mlai. Wale lä shömöleno wei a lä cuinö, öjönö tä tamaö lä bufii wei ya tä yai tabä, ya malä itolayono wei.
- 39 ¿Öjö tawä? —a cuma—. Wale lä shömöleno wei a lä cuinö, abinaja wale taamaö bufi doblao. Tä lä jödödöblöle däjä, moli ya feimabou mlai ja, iba bä lä jöböbeno wei ya bä demi bluca jocädamaö çəbə, wale tamabou bufi doblao.
- 40 Abinaja Fayänö täbə taamaö bufi doblao malä cui. Bä Ijilubö wale nö yai lä öjöböaö wejei bä lä cui, wale ʔ bejedi bufiije ja, bä bəlimi tamabou bufi doblao. Tä lä jödödöblöle däjä, öjö ya bä nia demi jocädamaö çə —a cuma.
- 41 Öjö däjä, Jesús a wə ja judio bä bufi jushujuablaloma. “Fedu jamö ya cö nii lä cuono wei ya cö itolayoma”, a cuma yalo, bä ʔ lämoma.
- 42 Abinaja bä cuma. —José bä ijilubö Jesús a wəfa lä cui, ¿fei öjö a mlai daanö? Bä föö e ma cui, bä nöö e ma cui, bəma cəcöbö malä dale. ¿Wedi tabä “Fedu jamö culanö ya itolayoma”, bei a li cuu dicoo? —bə cuma.
- 43 Abinaja Jesúsnö bä nowa tama. —Bä bufi jushujuwä çai fa dijä.
- 44 Wale lä shömöleno wei, Fayä a lä cuinö bä blacəmaimi ja, camiyä nija cama bä nia juu bədaomi. Bä lä blacəmaö wei bä lä cui, tä lä jödödöblöle däjä, öjö ya bä nia jocädamaö çə.
- 45 Yai Bada a wəno wəyəlewä ai a wə oni jamö, abinaja tä ʔ cuu. Yai Bada nija täbə nia bluca damamou. ¿Öjö tawä? —a cuma—. Einaja tä ʔ cuu. Fayä a wəno fa jililäjenö, bä yai lä damamou wei bä lä cui, camiyä nija bä juu.
- 46 Öjö ma cui, Fayä nija bä bufi ma damamou wei ma cui, yanowamö täbə lä cui nija Fayä a dablamoimi. Yai Bada tänö wale lä shömöleno wei ya lä cuinö, Fayä ya shino dabraö ayao.
- 47 Cafä wamacö nija ei ya wə lä cui, bejedi lä ya wə —a cuma—. Wale ʔ bejedi lä bufii wejei bä lä cui, bəlimi bä cuobä bä li waiquiwä.
- 48 Bəlimiblamamodima cəcö nii lä cui, öjö lä ya.
- 49 Afä bada bä jaba lä cuono wei bä lä cuinö, manaa bä ma wano wejei ma cui, bä nomalaliyoma.

- 50 ¿Öjö tawä? Ya cö ɤfa nii lä wäyäle, fedu jamö culanö cäcö itolayoma, öjö cäcö ja bä lä iyaö wei bä nomaö mlaobä.
- 51 Bä ɤlimi cuobä cäcö nii lä cui, öjö bei ya waiquiwä, fedu jamö culanö ya lä itolayono wei ya lä cui. Camiyä ya cö nii lä cui ja bä lä iyaö wei bä lä cui, ɤlimi bä nia cuo. ¿Öjö tawä? Yanowamö täbä ɤlimi cuobä ya cö nii lä jöböaö wei, bei ya yaji nia jöböamou —a cuma.
- 52 Öjö däjä, Jesús a wɤ ja judio bä ɤ lafumayoma. Abinaja bä cuma. —¿Wedinaja bei yaji nia li jöböamou cuo, bäma yaji wabä?
- 53 Öjö cudeenö, abinaja Jesúsnö bä nowa tama. —Cafä wamacö nija ei ya wɤ lä cui, bejedi lä ya wɤ. Ya lä yanowamöblaleyoluno wei ya lä cui, wamale yaji waimi ja, wamale iyäbö coaimi ja, ɤlimi wamacö nia cuomi.
- 54 Wale yaji lä waö wejei, wale iyäbö ɤai lä coaö wejei bä lä cui, ɤlimi bä cuobä öjö bä li. Tä lä jödödblöle däjä, öjö ya bä demi nia jocädamaö ɤo.
- 55 Bei ya yaji lä cui, öjö nii cäcö yai malä cui. Bei ya iyäbö lä cui, bä amishi yai ɤobä, öjö cäbä.
- 56 Wale yaji lä waö wejei, wale iyäbö lä coaö wejei, öjö bä lä cui camiyä nija bä yanöcöwä cua, cama bä nija ya ɤai yanöcöwä cua mö fedua.
- 57 Fayänö wale shömölema, täbä lä ɤlimiblamaö wei a lä cuinö —a cuma—. ɤlimi ya cuobä, camanö wale tablalema. Inaja showawä, wale lä waö wejei bä lä cui, camiyänö ɤlimi ya bä nia tablamaö.
- 58 Fedu jamö ya cuoma ya cö nii lä itolayono wei ya lä cui, öjö camiyä ya cö ɤfa nii wäyämamou lä cule, camiyä bämacö bada bä lä cuono wei bänö, bä nii lä wano wejei mlai. Öjö lä bä ma wano wejei ma cui, bä li nomalaliyoma. Camiyä ya cö ɤfa nii lä wäyämole ya cö ja bä lä iyaö wei, ɤlimi bä yai nia cuo —a cuma.
- 59 ¿Öjö tawä? Judio bä yododabä yafi jamö, inaja bä nowa tama, Cabenao jamö tä ɤ wäyäö däjä.
- 60 Jesús nija bä lä nocaono wei ai bä lä cui, öjö a wɤ fa jililäjenö, abinaja bä nowa tayoma. —Öjö tä ɤ jilimamou nofi jaducuwämi. Tä ɤ jilio nö möblobimi —bä cuma.
- 61 Öjö ma cui, Jesúsnö bä bufi jushujuwä ɤai lä fano wei tä daö fa showadaonö, abinaja bä nowa tama. —Camiyä ei ya wɤ ja, ¿wamacö nia ɤamodou daanö?
- 62 Ya lä yanowamöblaleyoluno wei ya lä cui, ya jaba lä cuono wei jamö wamale yai ösöo dablao fa cunoja, ¿wedinaja wamacö bufi nö cuu nomöjöobö wei?
- 63 Yai Bada tä Bufinö täbä shino yanowamö ɤlimiblamaö, cama yanowamö täbä showawänö mlai. Cafä wamacö nija ya wɤ lä faö wei ya wänö, bämacö bufi jaducublamabä ya wɤ, Yai Bada tä Bufinö wamacö ɤlimiblobä.

⁶⁴Öjö ma cui, cafä ai wamacö lä cuinö wamale ʘ bejedi bufiimi —bä nowa tama. ¿Öjö tawä? Jaba dǎjä ma cui, a wǎ bejedi bufii lä mlajei bä daö malä showaono wei. A nia lä nomojoliano wei a ʘai.

⁶⁵Abinaja a ʘai cuma. —Öjö cudeenö bämacö nowa taö mada waiquiblei. Fayänö bä blacämaö lä mlai, camiyä nijamö cama bä nia juu bädaomi —a cuma.

⁶⁶Öjö tä cublou waiquilayono wei ja, cama nija bä lä nocaono wei ai bä bluca waicoma. A lä juaaö wei jamö, bä yauo mladaliyoma.

⁶⁷Cama 12 ebä nija abinaja Jesús e cuu juoma. —Cafä wamacö ma cui, ¿inaja showawä wamacö cublou ojode tawä? —a cuma.

⁶⁸Simón Pedro abinaja e cuma. —Tä ʘ wǎyǎle. ¿Wedi jamö a lä cui nija yamacö juu nomöjöobä? Täbä nia lä ʘalimiblou wei, cafänö wa tä ʘ yai li tabou.

⁶⁹Camiyä yamacönö ʘäfä ʘ li bejedi bufii waiquiwä. Yamacö bufi ʘai jaducublaliyoma. Yai Bada tänö a lä yaileno wei, öjö cafä bei wa dodijiwä —e cuma.

⁷⁰Abinaja Jesús e cuma. —Iba 12 wamacö lä cui bämacö yaia waiquilema. Öjö ma cui, cafä wamacö ai a lä cui, fecula a —e cuma.

⁷¹Simón Icaliode bä ijilubö Juda a wǎfa wǎyǎma. Cama 12 ebä nija a ma cuono ma cui, a nia malä nomojoliano wei.

San Juan 7

¹Öjö tä cublou waiquilayono wei ja, Calilea jamö Jesús a juu cuaama. Judio bänö a shäö bufi doblao waiquiomaje cudeenö, Judea jamö a juu bufionomi.

²Bei. Yano bä wai jamö bä cublamou dǎjä judio bä showadi iyaö ʘai lä ʘocamou wei, tä ajeoma.

³Öjö cudeenö, Jesús bä fǎäshä ebänö abinaja a nowa tamaje. —Eja wa cudio mlai ja, Judea jamö a yai da ju, öjamö cafä nija bä nocaono bufi lä doblao wei bä lä cuinö wa dablabeje. Wa lä cuaaö wei tä ʘai möbeje.

⁴Wawädowä bä nö öjöböamou bufi lä doblao wei bä lä cui, bä cuaaö ʘatoo malä mlai. Wa ʘowa lä cuaaö wei wa tä taö ja, yanowamö täbä nija a da damolaludu —a nowa tamaje.

⁵Bä fǎäshä ebä ma cuinö a wǎ bejedi bufino malä mlajei.

⁶Abinaja Jesúsno bä nowa tama. —Cafä wamacö juu bufi doblao dǎjä, wamacö juu showadaobä wamacö ma cule, öjamö lä camiyä ya jubä tä cuami showawä.

⁷Yanowamö bänö cafä wamacö nofi wǎlibou dao ma mlajei ma cui, camiyänö ya täbä ʘfa dobloimi wǎyǎö yalo, wale nofi yai li wǎlibouje.

⁸Bä iyaö ʘai ʘocamobä jamö, cafä bä da ju. Fei dǎjä camiyä ya nia juimi. Ya nia yai lä juu wei tä cua showaa malä mlai —bä nowa tama.

- ⁹Einaja bä nowa fa talönö, Calilea jamö yanöcöwä a cuo juoma.
- ¹⁰Öjö ma cui, bä iyaö çai çocamobä jamö bä fääshä ebä aa waiquilayono wei ja, wawädowä a juu mlai ja, jätowä Jesús a nodia jälayoma.
- ¹¹Bä iyaö çai çocamobä jamö judio bänö a dayäalajenö, a wäliadalaö cuaamaje. —¿Wedi jamö öjö lä bei a li? —bä cuma.
- ¹²Bluca bänö a wäfa wajado wayoaö cuaamaje. —A dodijaö —ai bä cuma. —Ma. Tübä mölamaö dicoo talei —ai bei bä cuu mö feduoma.
- ¹³Öjö ma cui, judio bada bä nö quili fa tajenö, wawädowä a wäfa wayoanomije.
- ¹⁴Bä iyaö çai lä çocamou wei bä nö dedejblou waiquio däjä, Jesús a aa fa jälönö, Yai Bada etä yafi jamö a çoblou jälayoma. A çoblou fa jälönö, Yai Bada etä ʘ ja bä yömölama.
- ¹⁵A wä lä macocoablalou wei a wä ja, judio bä bufi shädayaimoma. Abinaja bä cuma. —¿Wedinaja dodijiwä? Bada bä nija ei a damamono ma mlai ma cui, ʘtä nofi daö dodijiwä yai!—bä cuma.
- ¹⁶Öjö däjä, abinaja Jesúsno bä nowa tama. —Ya tä ʘ lä wäyää wei, camiyä ya wä bädawämi. Wale lä shömöleno wei, öjö lä ya wäno li wäyää.
- ¹⁷¿Öjö tawä? Yai Bada tänö bä taamaö lä bufii wei tä ja bä lä ojodao wei bä lä cuinö etä ʘ nö nia öjöböaöje. Camiyä ya bufi cuu lä bädao weinaja ya tä ʘ wäyää dicoo ja, wale nia çai daöje.
- ¹⁸Cama bä bufi cuu lä bädao weinaja tä ʘ lä wäyää wejei bä lä cui, cama bä ʘfa dodijidawä nia fa tamamonö bä ʘ li bädawä. Öjö ma cui, a lä shömöleno wei a nö nia dodijidawä lä öjöböamaö wei a lä cui, öjö a shino yai bejedimou. A jolemou daomi.
- ¹⁹Yai Bada tänö tä tamaö lä bufii wei, çafä wamacö nija Moisesinö tä ʘ jöböquema, ¿öjö tawä? —a cuma—. Tä ʘ ma jöböqueno wei ma cui, moli ai wamacö ma cuinö wama etä ʘ nofi cadidiboimi. ¿Wedi tabä bei wamale shäö bufi li doblao, öjö lä?
- ²⁰Abinaja bä cuma. —¿Jolemou dijä! Fecula wa tabou yalo, wa wä li faö mojudi. ¿Wedi jamö a lä cuinö wa li shäö bufi doblao? —bä cuma.
- ²¹Abinaja Jesúsno bä nowa tama. —Tübä yanöcöobä tä mö jalu sábado jamö, tä nö lä quiliiji moli ya tä wawämaö ja, wamacö bufi bluca wedinajamou.
- ²²Wamale ʘfa ma taö wei ma cui, inaja showawä çafä wamacö malä cuaaö wei. Wamacö mosi sicö lä joyamou wei tä lä cui, Moisesinö tä nabä li shömöquema, ¿öjö tawä? Ijilufä bä mosi sicö nia yai lä joyamou wei tä cublou däjä, tübä yanöcöobä tä mö jalu ma cui ja, wama bä mosi sicö joyaö fe yadio. ¿Öjö tawä? Moisesinö tä jaba tamano ma mlai ma cui, bamacö nö badabö ai a jaba lä bälöono wei a lä cuinö, öjönö tä yai jaba tamaö bufima.
- ²³Moisesinö tä tamaö lä bufii wei tä ja wamacö cadidobä, tübä yanöcöobä tä mö jalu ma cui ja, ijilufä wama bä mosi sicö joyaö dao. Inaja wamacö ma cuaaö däjä ma cui,

¿wedi tabä öjö tä mö jalu jamö ai ya jalomaö ja, camiyä nija bei wamacö shino li jushudou?

24Wama täbä jömaö däjä, bä bufi yai da dayäo. Wamacö bejedimolanö bä yai jömaö da cadidioje. Inaja tä mömou cuwä ma cui, wamacö bufi nia lobe cuu jaödaomi —bä nowa tama.

25Wawadowä Jesúsnö bä damaö cudeenö, abinaja Jelusaleteli ai bä cuma. —A shäo bufi lä doblao wejei, ¿fei bei ami?

26Eja wawadowä a wə ma fale ma cui, a wə wasöimije. “Yai Bada tänö a shömabä a lä yaileno wei a lä cui, öjö lä a waiquiwä”, bada bänö ¿fei bei a nofi tabou cadidia da culajenö?

27Öjö ma cui, fei a lä cui, cama bäma ebä mashi malä daö wei. Yai Bada tänö a shömabä a lä yaileno wei a yai wawäblou cadidio däjä, a nia daimije —bä cuma.

28Inaja bä cuma yalo, Yai Bada etä yafi jamö Jesúsnö bä damaö ja, a wə icali fama. Abinaja a cuma. —¿Camiyä wamale daö da culanö? Camiyä ma cui, ya jaba lä cuono wei jamö wama tä daimi. Öjö ma cui, camiyä ya juu bufi doblao tänö ya juu bädaonomi. Wale lä shömöleno wei a lä cui a bejedimou. Öjö wama a çai daimi.

29Camiyänö ya shino daö lä cule. Cama a lä culadi jamö ya cuoma ya malä waloqueno wei. Öjönö wale shömölema —a cuma.

30Inaja a cuu yalo, a nia juwäama ma cujei, a nia yai lä shämou wei etä cuonomi showawä yalo, bä imicö queonomi.

31Öjö ma cui, ai bä bluca lä cuinö a wə bejedi bufia fe yadilemaje. Abinaja bä cuma. —Yai Bada tänö a shömabä a lä yaileno wei a lä cui, fei a waiquiwä. ¿Wedi tabä ai bäma tä nö li dabou nomöjöquei? Yai Bada e nö öjöböamobä, fei a lä cuinö, tä nö lä quilijii tä bluca wawämaö malä waiquii—bä cuma.

32Jesús a wəfa wajado lä wayoaö wejei, faliseo bä bada lä cuinö bä ą fa jililäjenö, cama bä ma cuinö, nofi bəyāalewä blowäjäwä bä ma cuinö, Yai Bada etä yafi jamö bä bada lä läono wei bä nija, Jesús a juwäamaö bufimaje.

33Öjö däjä, judio bä nija abinaja Jesús a cuma. —Cafä wamacö nija ya nö dedejedou fa bälönö, wale lä shömöleno wei nijamö ya nia juu ço.

34Öjö däjä, wamale nia ma dayäo wei ma cui, wamale nia dablaimi. Ya nia lä cuo wei jamö, wamacö juu daomi —a cuma.

35Judio bä wəliyou ja, abinaja bä cuma. —Fei a lä cui, ¿wedi jamö a nia li juu fa nomöjöönö, a wə li? Bei bäma a nia jəwa dablao çodaaimi. Clesiateli bä nijamö, ai bamacö judio lä coyocole bä nijamö, ¿öjamö a nia juu tawä, shomi täbä nija tä ą li wəyāo nomöjöobä?

36“Wamale nia ma dayäo wei ma cui, wamale nia dablaimi”, a cuma. “Ya nia lä cuo wei jamö, wamacö juu daomi”, a çai cuma. ¿Öjö tawä? ¿Wedinaja a bufi yai fa cunö, bei a wə li cuo cufe? —bä cuma.

37Bä iyaö waicou lä bufiono wei däjä, bä yai çoçamobä jamö, Jesús wawäadowä a ubladaliyoma. A fa ubladalunö, a wə ıçali faö ja, abinaja a cuma. —Ai bä amishaö bādao ja, camiyä nija bä yai fa icubonö, bä amishi çoçyolubä.

38Camiyä wale ą bejedi lä bufii wejei bä lä cui, bei bä bufi jamö, bałimiblamamodima u fa bāda bādamonö u nia caläö cuaaö, Yai Bada etä ą lä cuu weinaja showawä —a cuma.

39¿Öjö tawä? Cama a wə bejedi lä bufii wejei bä lä cui nija, Yai Bada tä Bui nia lä jöböamou wei tä ąfa yai tama. Fedu jamö a doblaodayobä a ösonomi showao yalo, a Bui jöböamou showaono malä mlai.

40Jesús a wə jiliaöje däjä, abinaja ai bä cuma. —Yai Bada bāma a wəno wäyālewä nö lä dabole, fei a waiquiwä —ai bä cuma.

41Ai bä lä cui, abinaja bä cuma. —Yai Bada tänö a shömabä a lä yaileno wei, fei öjö a waiquiwä —ai bä cuu mö feduoma. Öjö ma cui, ai bä mö feduwä lä cui, abinaja öjö bä li cuma. —A shömabä a lä yaileno wei a lä cui, Calilea jamö a oshe nia wawāblono malä mlai.

42Yai Bada etä ą oni cuu malä wawādoö wei. A shömabä a lä yaileno wei a lä cui, bada tä David a nodiwä nia cuo. Belenateli bä nijamö a nia oshe tablamou, David a oshe lä cuono wei jamö showawä, ¿öjö tawä? —bä cuma.

43Inaja bä ą cuablalou ja, Jesús a wə ja, bä bufi bluca sheleleolaliyoma.

44Ai bä lä cuinö a juwāamaö bufi ma doblaono wejei ma cui, moli ma cui imicö queo bādaonomi.

45Öjö däjä, Jesús a juwāabeje, bada bä lä shömöleno wejei bä lä cui, shinoco bä waloa çoçuema. Nofi bāyāalewä bä lä blowājäi bä ma cuinö, faliseo bä ma cuinö, abinaja öjö bä nowa tamaje. —¿Wedi tabä bei wama a çai li juu showadaonomi? —bä nowa tamaje.

46Bä lä shömöleno wejei bä bada lä cui, abinaja bä cuma. —Quiji a lä cui, a wə yai walalawä fe balojowä. Öjö a wə yai jilimamou lä culenaja, yedu ja ma cui, fei däjä ma cui, ai bä ą jilimamou cuwāmi waiquiwä —bä cuma.

47Abinaja faliseo bä bada cuu nomöjöoma. —Cafä wamacö ma cui, ¿öjö nija wamacö nia çai luluamou dicoo tawä?

48Bada ai bä ma cuinö, faliseo ai yamacö ma cuinö, ¿öjö yama a wə bejedi lä bufii wei, wama tä ą jilibou da culanö, wama a bufii mö feduobä?

49Öjö ma cui, fei bä lä çoçamole bānö Moisesi etä ą daö fa mlacujenö, bä li lulamou. Yai Bada nija bä waimobä cābä —faliseo bä bada cuma.

50Öjö däjä, cama faliseo ai a bada lä cui, a wə fama, Nicodemo a wəfa lä cuono wei, Jesús nija a jaba icua fe lä jaluqueno wei a lä cui. Cama ai ebä nija abinaja a cuma.

⁵¹—Ma, inaja mlai. Inaja Moisesi bäma etä ʔ lä table ta ʔ cuimi. Cama bäma a wə jiliaö balöa mlai ja, a yai lä cuaaö wei bäma tä daö mlalanö, bäma a nia jömaö showadaomi —a cuma.

⁵²Abinaja cama nija bä cuu nomöjööma. —¿Cafä Calileateli wa mö fedua tawä? Yai Bada etä ʔ oni da mö. Calilea jamö Yai Bada a wəno wäyäləwä a nia lä wawäblou wei, tä ʔfa wäyämöimi —bä cuma.

⁵³Öjö däjä, cama bä yafibö jamö bä bluca ʔo ʔomobodayoma.

San Juan 8

¹Öjö bä bluca fa ʔobomobodunö, Oliba tä balöcö jamö, Jesús a li juma.

²Tä mö jaluaimaö däjä, Yai Bada etä yafi jamö Jesús a jua fenaa fa ʔolunö, öjö nija bluca täbä ʔocamou fenao ʔoyoluma. A fa loicunö, tä ʔ wäyäö ʔoma.

³Öjö däjä, a joleblalobä jamö a suwä fa dalalöjenö, bada bä lija a juwämalemaje. A fa juwämälöjenö a ʔai waloquemaje. Moisesi tä ʔ ja täbä lä damaö wejei bä ma cuinö, faliseo bä bada ma cuinö, öjö bänö a suwä ʔai fa jujenö, a möamoblamalemaje.

⁴Abinaja Jesús nija bä cuma. —Tä ʔ wäyälə. Ei a suwä joleblalobä jamö a dalalemaje, cäcöbö yacao däjä.

⁵¿Öjö tawä? Inaja bä lä cuaaö wei bä lä cui, Moisesinö bä yai shämaö bufima, maa mabänö. Inaja tä ʔ oni malä cuu wei. ¿Wedinaja cafänö wa nofi yai tabou? —a nowa tamaje.

⁶¿Öjö tawä? Jesús a nia fa wabajenö bä ʔ li cuma, Moisesi etä ʔ ja a wə shominajaaö ja, a wəfa dobloimi tabeje. Jesús a lolanö, bei iminö, coshi coshi bä jamö tä ʔ onimama.

⁷A wəlidiije ja, a ubladaliyoma. A fa ubladalunö, abinaja bä nowa tama. —Jəo, öjö lä. Cafä ai wa lä cuinö, wəlidiwä wa tä taö dao lä mlai wanö, fei a suwä nija wa ma jaba shäyääbä, öjö lä.

⁸Inaja bä nowa fa talönö, a loa fa ʔicunö, coshi coshi a jamö bei iminö a onimou ʔoma.

⁹Öjö ma cui, Jesús a wə fa jililäjenö, bä yanöcöwä bluca ʔoquema. Bada bä ʔo fa balöoicunö, fiya bä ʔo juoquema. Jesús a loo juobä jamö, suwä a yami ublaa jäaliyoma.

¹⁰Suwä nija Jesús a mamö fa showaicunö, abinaja e cuma. —Wa shäö bufi lä doblao wejei, ¿wedi jamö bei bä li cuoquei cufe? Wa shämobä, moli a ma cui, ¿bei a wə ʔai faö nomöjöö mlao cufe? —e cuma.

¹¹—Ma, tä ʔ wäyälə. Moli ma cui, a wə ʔai fanomi —a suwä cuma. Abinaja Jesús e cuma. —Camiyä ma cui, ya wə ʔai nia faimi. A da ʔojamö. Wəlidiwä wa tä taö ʔoäaö mlai —e cuma.

- 12**Judio bä nija Jesús a wə faö ço ja, abinaja a cuma. —Yanowamö ya täbä wacacamabobä, camiyä ei ya shji. Camiyä nija bä lä nocaö wei bä lä cui, mö didi jamö bä nia juimi. Camiyä ya shji wacacaobä jamö bä cuo ja, bəlimi bä nia cuo —a cuma.
- 13**Öjö däjä, Jesús nija abinaja faliseo bä bada cuma. —Cafä wa wəfa wäyämamou bädao dicoo ja, wa wəfa bejedimou tabeje, tä cuami waiquiwä —bä cuma.
- 14**Abinaja Jesús e cuu mö feduoma. —Camiyä ya wəfa wäyämamou ma bädao wei ma cui, ya bejedimou. Ya cuo lä balöono wei tä ma cui, ya nia lä juu wei tä ma cui, ya tä malä dale. Öjö ma cui, cafä wamacö lä cuinö, ya cuo lä balöono wei wama tä shino daimi. Ya nia lä juu wei tä ma cui, wama tä çai daimi.
- 15**’Cafä wamacö lä cuinö, yanowamö showadi bä bufi lä cuaablalou weinaja, wamacö bufi fa cuaablalonö, wama täbä li jömaö. Camiyä ya lä cuinö ya täbä jömaimi.
- 16**Öjö ma cui, ya täbä jömaö ma bädao wei, bejedi lä ya wə. Ya täbä jömaö cadidobä, camiyä ya bufi lä cuu weinaja ya nia cuu bädao malä mlai. Wale lä shömöleno wei a lä cuinö, wale ə fa bayelibonö ya wə faö malä cui.
- 17**Moisesi wama etä ə oni lä tabole sibä jamö, abinaja tä ə cuu. Bolacabö cəcöbö ə nö wäo fe usucuwä ja, “Bejedi lä wafäcö ə”, wama cəcöbö nofi nia tabou. ’Einaja tä ə cuu. ¿Öjö tawä?
- 18**Camiyä ya wəfa wäyämamou. Fayä a ma cuinö, wale lä shömöleno wei a showawä lä cuinö, öjönö yale əfa çai wäyäo —Jesús a cuma.
- 19**Inaja a cuma yalo, abinaja bä cuu nomöjööma. —¿Wedi jamö Faafä bei a, öjö lä? Abinaja Jesúsno bä nowa tama. —Fayä wama a daimi waiquiwä. Camiyä wamale çai daimi. Camiyä wamale daö fa cunoja, Fayä a ma cui, wama a nö çai daö mö feduobö wei—bä nowa tama.
- 20**Yai Bada etä yafi jamö bä yömöläo ja, einaja a cuma, Yai Bada nija bä blada lä jöböblaaö wejei, bä blada didiobä tä lä cule jamö. Öjamö bä yömöläo ma wawädoono wei ma cui, a juwäamanomije. A yai nia lä shämou wei etä cuo showadaono malä mlai.
- 21**Judio bä nija abinaja Jesús a cuu çoma. —Ya nia julayou. Wamale nia ma dayäo wei ma cui, wamacö wəlidiwä showai wamacö nia nomalaliyo. Ya nia lä cuo wei jamö, wamacö juu daomi —a cuma.
- 22**Öjö däjä, judio bä wəliyoma. —¿Cama a nia shämou daanö? “Ya nia lä cuo wei jamö, wamacö juu daomi”, a malä cui wei —bä cuma.
- 23**Abinaja Jesús a cuma, öjö bä nija. —Eja cafä wamacö li cuo showadaoma wamacö, camiyä fedu jamö ya li cuo balöoma. Bitä jamö wamacö lä bälöblai, öjö lä wamacö showawä, camiyä ya shino shomi.

- 24**Wɔlidiwä showawä wamacö nia lä nomablou wei tä ja, bämacö yömölalema. ¿Öjö tawä? “Yai Bada tänö a nia lä shömano wei, fei a waiquiwä”, wamale nofi taboimi ja, wamacö wɔlidiwä showai wamacö nia malä nomablou wei —a cuma.
- 25**Abinaja cama nija bä cuma. —Cafä ¿wedi bei wa dodijiwä? Abinaja Jesúsno bä nowa tama. —Ya wafa jaba da wäyämoblei dájä, bämacö nowa da tableinaja, öjö ya waiquiwä.
- 26**Cafä bämacö afa tabä, bluca ya tä tabou. Bämacö jömabä tä bluca. Öjö ma cui, wale lä shömöleno wei ya wä fa jililänö, yanowamö tabä nija, öjö lä ya wä nia shilo yai wäyää. Öjö a bejedimou —bä nowa tama.
- 27**¿Öjö tawä? Bä Föö e afa yai lä wayoano wei tä ja, bä bufi jaducublonomi.
- 28**Öjö cudeenö, abinaja Jesúsno bä nowa taö nomöjöoma. —Ya lä yanowamöblaleyoluno wei ya lä cui, wamale befi çai itamaö waiquio dájä, öjö lä dájä, wamale nö nia bejedi öjöböaö. “Öjö lä a waiquiwä cuoma, a da cubleinaja showadawä”, wamale nofi nia tabou. “Cama a bufi cuu lä bädao weinaja, a cuanomi. Bä Föönö tä a wäyää ja, a wä yai cuoma”, wamale nofi nia tabou.
- 29**Wale lä shömöleno wei a lä cuinö wale çai cua showaa lä cule. Wale daanomi. Ya yamimi. Showadi ya bufi malä doblamabou wei —bä nowa tama.
- 30**Inaja a wä cuablalou showao dájä, bluca bänö a wä bejedi bufilemaje.
- 31**Öjö dájä, Jesús a wä bejedi lä bufileno wejei bä judio lä cui bä nija abinaja a cuma. —Showadi wamale a nofi cadidibou ja, camiyä nija bejedi lä wamacö nia shino yai nocao.
- 32**Yai Bada nija tä a bejedi lä cule, wama tä a bejedi fa dalalönö, öjö tä anö wamacö nia shino jujeblamolayou —a cuma.
- 33**Abinaja Jesús nija bä cuma. —Ablaamö nodiwä yama ecö waiquiwä. Yedu ja ma cui, shomi tabä nija yamacö çai nosiemamou mlai ja, yamacö showawä. ¿Wedi tabä “Wamacö nia jujeblamolayou”, wa li cuu dicoo cufe?
- 34**Abinaja Jesúsno bä nowa tama. —Cafä wamacö nija ei ya wä lä cui, bejedi lä ya wä. Wɔlidiwä tä lä taö wejei bä lä cui, wɔlidiwä tä ja, bä li nosiemamou waiquiwä. Öjö lä wɔlidiwä tänö bä yai tabou. ¿Öjö tawä?
- 35**Täbä ojodamobä täbä lä tabou wejei, wama tä daö. Shomi täbä nija bä lä nosiemamou wei bä lä cui, öjö bä nija bä yanöcöwä cudiobä bämi. Bä ojodamobä bä li tabouje. Bä ijilubö ebä cadidiwä lä cui, öjö ebä nia shino yanöcöwä cudio.
- 36**Öjö cudeenö, Yai Bada bei Ijilubö ya e waiquiwä lä cuinö, wɔlidiwä tä ja bämacö yai jujeblaö ja, wamacö nia yai jujeblamolayou.
- 37**Ablaamö nija wamacö lä nodiblaliyono wei, ya tä daö lä. Öjö wama ecö bawä ma cui, wamale a wai dicoo yalo, wamale shäö bufi doblao.

- ³⁸Fayä nijamö ya tä lä möno wei ya tä ʾafa wäyää. Inaja showawä, cafä wamacö yai lä föömou wei nija wama tä ʾa lä jilileno wei, wama tä li taö dicoo —bä nowa tama.
- ³⁹Abinaja bä cuma. —Ablaamö a lä cui nija yamacö yai föömou. —Ma —Jesús a cuma—. Ablaamö wama ecö ijilubö yai cuo fa cunoja, öjö a lä cuaano weinaja, wamacö nö çai cuaaö yauabö wei.
- ⁴⁰Öjö ma cui, inaja wamacö cuaaimi dicowä. Yai Bada nijamö ya wä lä jilileno wei, cafä wamacö nija ya tä ʾa bejedi ma wäyää wei ma cui, wamale shäö bufi doblaä dicoa lä cule. Inaja Ablaamö a cuaano malä mlai.
- ⁴¹Wamacö fööbö yai lä cuaano weinaja, wamacö cuaaö yauaö dicoa lä cule —Jesús a cuma. Abinaja bä cuma. —Shomi yamacö ijilubö malä mlai. Yamacö yai lä föömou wei, öjö lä Yai Bada tä waiquiwä —bä cuma.
- ⁴²Abinaja Jesúsnö bä nowa tama. —Yai Bada wama ecö ijilubö cuo fa cunoja, wamale nö nofimabö wei. Öjö lä Yai Bada nija ya cuoma ya malä juno wei. Camiyä ya juu bashio bufi fa doblaonö mlai, öjönö wale yai shömölema.
- ⁴³¿Wedi tabä wamale ʾa jilia möblaimi öjö lä? Wedi tabä mlai. Wamale ʾa jiliaö moji waiquiwä yalo, wamale ʾa jilia möblaimi.
- ⁴⁴ʾFaafä fecula bada wama ecö yai ijilubö. Öjönö tä tamaö lä bufii weinaja, wamacö cuaaö bufi doblaö. Jaba däjä ma cui, täbä shäö bufi doblaö showaoma. A bejedimou daimi yalo, tä lä bejedi wei tä julii daimi waiquiwä. A jolemou däjä, cama a bufi lä cuaaö wei etä wawälayou. Jolemolewä a waiquiwä malä cui. Bä lä jolemou wei bä lä cui, öjö nija bä li föömou.
- ⁴⁵Öjö ma cui, camiyä ya li bejedimou. ¿Öjö tawä? Cafä wamacö nija bejedi ya tä ʾa li yai wäyää cudeenö, wamale ʾa bejedi bufiimi.
- ⁴⁶¿Wedi jamö a lä cuinö wale nia dobloimi jömaö, öjö lä? Ya jolemoimi waiquiwä ja lä, ¿wedi tabä wamale ʾa bejedi bufiimi?
- ⁴⁷Yai Bada ebä lä cuinö, cama Yai Bada etä ʾa jiliaöje. Yai Bada wama ecö waiquiwämi yalo, wama etä ʾa li jiliaimi —bä nowa tama.
- ⁴⁸Judio bä ʾa juoma. —Cafä Samaliateli bäfä ʾafa wäli wäyää ja, yamacö ʾa bejedi. Fecula wa lä bälömabolenö, wa wä li —bä cuma.
- ⁴⁹Abinaja Jesús a cuma. —Fecula ya bälömaboimi. Fayä ya nö yai dodijidawä ma öjöböamaö wei ma cui, cafä wamacönö wamale nö li waibläö.
- ⁵⁰Öjö ma cui, wale ʾafa doblaö tabeje, camiyänö ya tä dayäimi. Öjö tä shino lä dayäö wei tä cuadayoa. Öjönö wale nia shino jömaö.
- ⁵¹Cafä wamacö nija ei ya wä lä cui, bejedi lä ya wä. Wale ʾa nofi lä cadidibou wejei bä lä cui, bä nomaö mlaicätä —a cuma.
- ⁵²Jesús nija abinaja judio bä cuma. —Ei malä cui, ¡fecula wa malä bälömabole! Ablaamö a ma cui, a nomalayoma. Yai Bada a wäno wäyälwä bä ma cui, inaja

showawä. Öjö ma cui, “Wale a nofi lä cadidibou wejei bä nomaö mlaicätä”, bei wa li cuu.

⁵³Bämacö nö badabö Ablaamö a ma cui, a nomalayoma. ¿Cafä wa shino yai lojode ayawä daanö? Yai Bada a wano wäyälwä bä ma cui, bä çai nomalaliyoma. Cafä ¿wedi bei wa wafa yai li jilou? —bä cuma.

⁵⁴Jesús abinaja a cuu mö feduoma. —Camiyä ya wafa doblao tamamou bädao ja, tä nowa cuami waiquiwä. Wale afa yai doblao lä taö wei a lä cui, Fayä a, wama a jowa lä bufibou wei a showawä lä cui.

⁵⁵Öjö ma cui, Fayä wama a daimi. Camiyänö ya shino daö. ¿Öjö tawä? “Ya daimi”, ya cuu fa cunoja, cafä wamacö jolemou lä culenaja, ya nö cuo mö feduobö wei. Öjö ma cui ya daö lä. Ya wä nofi çai cadidibou.

⁵⁶Wamacö nö badabö Ablaamö a lä cuinö, a bufi doblalolanö wale nö daboma. Ya nia lä wawäblou wei tä daa fa balölonö, a bufi doblao dodijioma —a cuma.

⁵⁷Öjö däjä, abinaja Jesús nija judio bä cuma. —Jolemo dijä. Lasha 50 wa famaö showao ma mlao däjä ma cui, ¿“Ablaamö ya daö”, bei wa li cuu? —bä cuma.

⁵⁸Abinaja Jesús e cuma. —Cafä wamacö nija ei ya wä lä cui, bejedi lä ya wä. Ablaamö a cua showaa mlai ja, ya cuo lä balöono wei, ei ya —e cuma.

⁵⁹Inaja a cuma yalo, maa mabä yaçaalalemaje, a shäyäbeje. Öjö ma cui, Jesús a nofi fa mojudublalufälönö, Yai Bada etä yafi jamö a siboa çoa jatoa showalayofälöma.

San Juan 9

¹Jesús a jayualanö jubäbö tä dalalema, jubäbö showadawä a oshe lä tablaleno wei a lä cui.

²Cama ebä lä nocamabono wei bänö a wäliije ja, abinaja bä cuma. —Tä a wäyäle. Ei a lä cui, ¿wedi mayo ja, a li jubäböblaliyoma? Cama a doblou lä mlai tä nowanö, ¿inaja a li tablamolayoma daanö? Ma, bä nöö, bä föö, ¿öjö lä cäcöbö mayonö a jubäbö tawä? —bä cuma.

³Abinaja Jesúsno bä nowa tama. —Ma. Fei a lä jubäbö wei, cama etä nowanö mlai. Bä nöö e ma cui, bä föö e ma cui, öjö cäcöbö mayonö çai mlai. Cama nija Yai Bada etä lojode nia yai fa dablamonö, öjö a waiquiwä.

⁴Wale lä shömöleno wei a lä cuinö tä tamaö lä bufi wei bäma tä taö showadaobä cätä, tä wacacawä lä showai däjä. Tä mö fa dödlönö, täbä ojodamou daomi.

⁵Eja, ei ya cua lä showale däjä, yanowamö ya täbä wacacamabobä ya shi —bä nowa tama.

⁶Einaja a cuolanö, mashita jamö tä fa cläshäcönö, bei canojoli bänö tä aji-blamalema. Inaja a fa tablälönö, aji aji cäcönö, jubäbö a lä cui mamo casöcö ya-leblalema.

⁷Abinaja a nowa taö showadaoma. —Siloe uca jamö, a mö da ya-lömolöcölö —a nowa tama. ¿Öjö tawä? Siloe tä a lä cui, “Shömano”, tä a li cuu. Bei. Einaja Jesúsno a nowa

tama yalo, a mö yaḷömobä a ayoma. A mö fa yaḷömolönö, a lä çolayou wei, tä möablalaö cuaalanö a çolayofälöma.

⁸A lä jubäböono wei nija bä bälöo lä ajedeono wei bä lä cui, bä bufi wedinajamoma. A jubäbö nacou ja, imicö dodoablalou lä läaano wei a lä möno wejei bä lä cui, inaja showawä bä bufi wedinajamou çai cuo mö feduoma. Abinaja bä cuma. —Quijamö a lolanö, imicö dodoablalou da läodiblei, ꞑfei a nofi lä cui! —bä cuma.

⁹—Awei. Öjö lä a —ai bä cuma. —Ma —ai bä cuu mö feduoma—. Öjö a mö li owäbou bäa lä cule. A lä jubäböono wei a lä cui, abinaja cama a cuma. —Öjö lä ya — a cuma.

¹⁰Abinaja bä cuma. —Jao. Öjö lä wa ja lä, ꞑwedinaja wa mamocu li jaloa cua bälayoma? —bä cuma.

¹¹Abinaja a cuma. —Jesús a wafa lä culenö, aꞑi aꞑi cäcönö wale mamocu casöcö fa yaḷelönö, Siloe uca jamö wale shömölema, ya mö yaḷömobä. Öjö cudeenö, ya julayoma. Ya mö fa yaḷömolönö, bei ya mamocu yai jalolayou cublei —a cuma.

¹²—Öjö a lä cui, ꞑwedi jamö a li culayou cufe? —bä cuma. —Cuwi —a cuma.

¹³Öjö däjä, a lä jubäböono wei a lä cui, faliseo bä bada nija a çai jumaje.

¹⁴ꞑÖjö tawä? Jesúsnö aꞑi aꞑi lä tablaleno wei, mamocu çai lä jalomaleno wei tä lä cui, täbä yanöcöobä tä mö jalu jamö tä tama.

¹⁵Mamocu lä jalomaleno wei tä ja, faliseo bä badanö a wälüi çomaje. A wälüije ja, abinaja bä nowa tama. —Aꞑi aꞑi cäcönö wale mamocu casöcö fa yaḷelönö, ya mö yaḷömoa fa majölonö, ya täbä möö lä cule —bä nowa tama.

¹⁶Faliseo ai bä bada lä cui, abinaja bä cuma. —Ma. Ei a lä jalomalöfe, Yai Bada tänö a shömanomi. Täbä yanöcöobä, tä mö jalu nofi cadidibou malä mlai —bä cuma. Öjö ma cui, abinaja ai bä cuu mö feduoma. —Wälidiwä talewä a cuo fa cunoja, tä nö lä quiliꞑi tä lä wawämafenaja, a nö cuaaö fe balojoobö mlai —bä cuu mö feduoma. Einaja bä bluca cuu majöadalou ja, bä bufi shedequeblaliyoma.

¹⁷Öjö däjä, a lä jubäböono wei nija Jesús a wälüi cadidiomaje. —Cafä wa mamocu lä jalolayono wei wanö, ꞑwedinaja cafänö wa nofi li tabou? —bä cuma. —“Yai Bada a wano wäyälwä, öjö a”, ya nofi tabou —a cuma.

¹⁸A mamocu lä jalolayono wei, a jaba daö fa mlacujenö, judio bänö a wä bejedi bufii jaöonomije. “A ma jubäböono wei ma cui, mamocu jalomalema”, a nofi tabonomije. Öjö cudeenö, bei bä nöö e sho, bei bä föö e sho cäcöbö nacamaje.

¹⁹Cäcöbö wälüije ja, abinaja bä cuma. —ꞑEi ijilufä a tawä, jubäbö showadawä wafä a jowa lä tano wei a lä cui? ꞑWedinaja a li fa cublalunö, täbä li möö majöwä? —bä cuma.

²⁰Bä nöö e, bä föö e sho, abinaja cäcöbö cuma. —Ei ijiluyä a. Yafä a daö. Jubäbö showadawä yafä a lä tano wei, yafä tä çai daö.

- 21** Öjö ma cui, fei däjä täbä möö lä nomöjöö wei, yafä tä daimi. Mamocu lä jalomaleno wei a ma cui, öjö yafä a daimi. Ijluyä a bada malä waiquii, cama a da wälje. Cama a wä nö wäobä a —cäcöbö cuma.
- 22** Judio bä nija cäcöbö quilima yalo cäcöbö a li cuoma. ¿Öjö tawä? Judio bada bä a wayou malä waiquiono wei. “Yai Bada tänö a shömabä a lä yaileno wei, öjö Jesús a waiquiwä”, wawädwä bä lä cuu wei, bä nia joyamaje. Judio bä yododabä yafi jamö, bä nia coyocomabou çödaanomije.
- 23** Öjö cudeenö, bä nöö e ma cui, bä föö e ma cui, cäcöbö a cuoma. “A bada malä waiquii, cama a da wälje”, cäcöbö lä cuno wei.
- 24** Einaja cäcöbö cuma yalo, a lä jubäböono wei a nacaö çomaje. Abinaja a nowa tamaje. —Yai Bada tä nofi shino yai da doabla. Wa mamocu lä jalomaleno wei, yama a doloimi daö waiquiwä —bä cuma.
- 25** Abinaja e cuu mö feduoma. —Cuwí. Öjö a doblou lä mlai ya etä daimi. Ya lä jalolayono wei ya tä shino yai daö. Ya ma jubäböono wei ma cui, fei däjä ya täbä dablö —e cuma.
- 26** A wälíi çoje ja, abinaja bä cuma. —¿Wedinaja wa li fa taamanö, wa li jalolayoma? ¿Wedinaja a fa cuanö, wa mamocu li wacacablamalema? —bä cuma.
- 27** Abinaja e cuma. —Uo. Bämäcö yömöläö ma waiquiono wei ma cui, wamale a jilianomi. ¿Wedi tä tabä, wamale a jiliaö bufi doblao ço? Jao. Cafä wamacö ma cui, öjö nija wamacö nocaobä, ¿bei wamale wälíi ço daanö? —e cuma.
- 28** A wä lafujalajenö, abinaja a nowa tamaje. —Öjö nija wa nocaobä, cafä wa. Camiyä yamacö lä cui, Moisesi nija yamacö nia lä nocaö wei yamacö li cua waiquia.
- 29** Moisesi nija Yai Bada tä a lä fano wei, yama tä daö ma cui, fei a lä cui, a jaba lä cuono wei yama etä daimi.
- 30** A mamocu lä jalolayono wei a lä cuinö abinaja bä nowa tama. —¿Shädayai! A jaba lä cuono wei wama etä daö ma mlai ma cui, ¿wale mamocu nofi lä jalomaleno wei!
- 31** Yai Bada tänö wälidiwä talewä bä a jiliaimi. Öjö bäma tä daö. Yai Bada nija bä möfe bolanö, a wäfa Bada doblao lä taö wejei bä lä cui, öjö bä a shino jiliaö ayao, tä tamaö lä bufii wei tä ja, bä lä cadidou wei bä lä cui.
- 32** Bitä jamö täbä yanowamö lä bälöle, yedu ja täbä jaba ma bälöaliyono wei ma cui, camiyä wale lä taamano weinaja, molí ma cui, tä a çai jaba jilimou buonomi. Fei däjä ma cui, tä a jilimamoimi showawä. Jubäbö showadawä bä lä tablamou wei bä lä cui, bä mamocu nö dodijidablobimi waiquiwä.
- 33** Fei a lä cui, Yai Bada tänö a shömaö mlao fa cunoja, a nö cuaabö mlai —bä nowa tama.
- 34** Abinaja a nowa tamaje. —Cafä wälidiwä talewä wa oshe fa cublalunö, wa cua lä showale wa lä cuinö, ¿camiyä wamalecö nia damaö majöo daanö? —a nowa talajenö, sibo jamö çali a jilululemaje.

³⁵Mamocu lä jalolayono wei, Jesúsno a wafa jilulamou jililema. Öjö dāja, a fa dayäblalönö, abinaja e cuma. —A lä yanowamöblaleyoluno wei a lä cui, cafänö ¿wa wə bejedi bufii cule? —e cuma.

³⁶—Bada tä. ¿Wedi jamö a lä cui, bei a yanowamöblaliyoma, ya wə bejedi bufibä? —a cuma.

³⁷—Fei ya lä yanowamöblaleyoluno wei, wale möö a lä cule —Jesús e cuma—. Cafä nija ya wə lä fale, öjö ya waiquiwä.

³⁸—Bada tä. Cafä bäfä ʔ bejedi bufii lä cule —e fa cudalunö, a möfe bodou fa showadalonö, a wafa Bada doblao tama.

³⁹Jesús abinaja e cuma. —Täbä dobroimi jömamobä, eja, bita jamö ya waloqueyoluma. ¿Öjö tawä? Täbä lä jubäbö wei bänö tä möbeje, ya juma. Bä mamocu ʔfa dodijidawä waiquiwä lä tamou wei bä lä cui, jai jubäbö bä cuo mö feduobä —e cuma.

⁴⁰Faliseo ai bä lä ajedeono wei bä bada lä cui, öjö a wə fa jililäjenö, abinaja bä cuma. —Camiyä yamacö ma cui, ¿yamalecö ʔfa çai möbloimi taö mada tawä? —bä cuma.

⁴¹Öjö bä nija abinaja Jesús a cuma. —Wamacö mamocu ʔfa wəlidawä tamou showadao fa cunoja, afä tä nowa nö cuobö mlai. Täbä lä jubäbö wei, täbä shino bayeliblamou malä cui. Öjö ma cui, “Yama tä dodijidawä möö waiquia lä cule”, wamacö cuu dicoo ja, afä tä nowa cua showaa.

San Juan 10

¹Jesús a wə faö çoma. —Cafä wamacö nija ei ya wə lä cui, bejedi lä ya wə. Oweja bä lä jicolobou wejei yoca jamö bä faö lä mlai, casö jamö bä lucäö lä ʔatoo wei bä lä cui, bä lä tomöμου wei öjö bä li. Shomi bä madofibö lä lämaö wejei, öjö lä bä showawä.

²Öjö ma cui, bei yoca jamö a yai lä faö wei a lä cui, oweja bä lä nowamaö wei öjö a yai.

³Öjö a faö bufio ja, yoca lä jolemabou wei a lä cuinö e yoca caloblaö showadao. ¿Öjö tawä? Oweja bänö öjö a wə jilileije. Oweja bä ʔfa jayumalanö, sibo jamö bä lululefälö.

⁴Sibo jamö, cama ebä çai bluca fa falönö, a balöafälö. A wə nö fa öjöböajenö, öjö nija oweja bä li yauquei.

⁵Shomi nija bä yauomi, bä shino doculayou. Shomi bä ʔ nö öjöböaö malä mlajei —a cuma.

⁶Inaja a cuu yacläoma yalo, tä ʔ ʔfa yai lä wayoano wei, tä ʔfa jiliaö cadidionomije.

⁷Tä ʔ jiliaö möblanomi cudeejenö, abinaja Jesús a cuma. —Cafä wamacö nija ei ya wə lä cui, bejedi lä ya wə. Oweja bä lä faö wei, camiyä bei ya yoca.

⁸Ya juu showao mlao dǎjä, bä bluca waloo lä baloöno wei bä lä cui, bä lä tomömou wei, öjö lä bä li cuoma. Shomi etäbä lä lämaö wejei, öjö lä bä showawä. Öjö ma cui, öjö bä nija oweja bä ʔ juonomi.

⁹Camiyä öjö bei cä ya yoca. Camiyä nija bä lä faö wei, bä nia jucäamou. Bä iyabä, quilii mlai ja bä nia fadii.

¹⁰Bä lä tomömou wei bä lä cui, öjö bä li tomömou mö juu. Bä shäö mö juuje. Bä mö watäblaö mö juuje. Camiyä ya lä cui, bä bälimi cuobä ya li waloquema, bä yai dodijidawä cudiobä.

¹¹Oweja ya bä yai lä nowamaö wei, ei ya. Öjö ya lä cuinö, oweja ya bä nowamabä, ya nia lä shämou wei tä ma cui ja, ya ojode.

¹²Ai bä lä cuinö, oweja bä nowamabeje bä ma mlai ma cui, bä dobämou bufi fa doblaonö, bä jole jole läo. Oweja cama ebämi waiquiwä cudeenö, yalo waiteli a juu dabraöje dǎjä, oweja bä fa dacöfälöjenö, cama bä docua ayalayou. Yalo a waitelinö, oweja ba nabä quea fa jeicunö, bä shedequea jäamaquei.

¹³Öjö bä lä cui, blada bä nowa ja bä läo bädao yalo, bä doculayou. Oweja bä yai nofimaime —Jesús a cuma.

¹⁴⁻¹⁵Abinaja Jesús a cuu çoma. —Oweja ya bä yai lä nowamaö wei, öjö bei ya. Fayänö wale daö lä culenaja, cama ya çai daö cuwä mö lä fedulenaja, inaja showawä, iba ya bä daö cuwä mö feduwä. Iba bä lä cuinö camiyä wale çai daö mö fedua lä culajei. ¿Öjö tawä? Oweja ya bä nowamabä, ya nia lä shämou wei tä ma cui ja, ya ojode.

¹⁶Ai ya bä oweja çai tabou, fei ya bä lä jicolobole mlai. Öjö ya bä blacämaö mö feduobä ya. Öjö bänö wale ʔ çai nia jiliaöje. Öjö ya bä fa çölönö, oweja moli bä nia shino yododoo. Ya bä nowamabä, moli ya nia shino läo.

¹⁷Iba ya bä bayelibrabä, ya shämou ojode yalo, Fayänö wale nofimaö. Ya demi nia jocädou ço cudeenö, ya shämou ojode.

¹⁸¿Öjö tawä? Cama bä lojodenö wale nia shäimije. Camiyä ya shämou li fa ojodaonö, ya nia li shämou. Ya shämou ojodaobä, Fayänö wale nö li wälojomabou. Ya demi nia çai jocädou lä ço wei, inaja showawä —Jesús a cuma.

¹⁹Jesús a wä ja, judio bä bufi shedecou çoma.

²⁰Abinaja ai bä cuma. —Fecula a lä bälömabole, a wä. A wä faö nofi malä mojadi wei. ¿Wedi tabä bei wama a wä li jilidii?

²¹Abinaja judio ai bä cuu mö feduoma. —Fei a wä shaliliablalou lä cuaaö weinaja, fecula bänö bei bä ʔ famaö cuwämije. Fecula bänö ¿jubäbö bä mamocu jalomaö daö mada sijewä? —bä cuma.

²²Jelusale jamö judio bä iyaö çai çocamobä, tä cublou çolayoma. Judio bä nö badabö lä cuinö, bufi doblalolanö Yai Bada etä nofi yafi jaba lä çocamoano wejei, öjö tä nofi jaducubolajenö, bä nia iyaö çai çocamou çoma.

- 23 ¿Öjö tawä? Maa a quei lä dodijio wei tä cuoma. Yai Bada etä yafi jamö Jesús a juadaloma, a yano lä boaono wei jamö. Salomo öjö e yano afa jilabomaje.
- 24 Yai Bada etä yafi jamö a juma cudeenö, cama nija judio bä fa çocamoliyonö, a wälili cadidiyolumaje. —Bei. Cafä bäfä a nö dabou showaa lä cule. ¿Wedi tabä yamalecö yömölaö cadidiomi? Yai Bada tänö a shömabä a lä yaileno wei a lä cui, öjö lä wa waiquiwä ja, wawädowä a wä da wämobo —bä cuma.
- 25 Abinaja Jesús a cuma. —Bamacö yömölaö waiquiwä ma cui, wamale a bejedi bufiimi. Fayänö tä tamaö lä bufii wei ya tä taö yalo, ya bejedi dablamobä ya waiquiwä.
- 26 Öjö ma cui, iba oweja wamacömi yalo, wamale a bejedi bufiimi.
- 27 Iba oweja bä yai lä cuinö wale a yai jiliaöje. Ya bä çai daö. Camiyä nija bä çai yauo.
- 28 Öjö bä lä cui ya bä balimiblamaö. Bä nia çai nomaimi. Camiyä nija öjö bä nia lä jucäaö wei, moli ma cui a çai cuami.
- 29 Iba oweja bä lä cui, Fayänö bä jöböbema. Öjö a shino yai lojode ayawä. Fayä a ma cui nija bä nia çai jucäamoimi. Öjö nija bä jucäabä, moli ma cui a çai cuami.
- 30 Fayä sho, öjö yafäcö waiquiwä —a cuma.
- 31 Einaja a lä cuu wei a wä ja, judio bänö maa mabä yaçaa çalalemaje, Jesús a shäyäbeje.
- 32 Abinaja Jesúsnö bä nowa tama. —Fayänö dodijidawä tä wawämaö lä bufii wei, cafä wamacö nija bluca ya tä wawämalema. ¿Wedi jamö tä nowa yai ja, maa mabänö bei wamale nia li shäyäö? —bä nowa tama.
- 33 Abinaja bä cuma. —Wa tä dodijidawä lä wawämaleno wei tä nowa ja mlai, Yai Bada wa tä nö lä waiblaö wei tä nowa ja, bäfä nia yai shäyäö. Yanowamö wa mö feduwä ma cui, cafä Yai Bada wa wäfa jilou nofi jushuaö cudeenö, wa nia shäyämou —bä cuma.
- 34 Cama bä nija Jesús abinaja a cuma. —Yai Bada wama etä a oni lä tabole jamö, ¿Yai Bada tänö cafä Israeli wama ecö afa bufiblamou wäyänomi daanö?
- 35 Yai Bada etä a lä cuu wei, tä a çai shominajaö majöo daomi. ¿Öjö tawä? Cafä wamacö nija Yai Bada a wäno waloa fa ayaicunö, wamacö jowa bufiblamou. Cafä wamacö bufiblamou wäfa wäyämoma ja lä,
- 36 ¿camiyä bei wamale nia li bufiblaimi, eja, bita jamö Fayänö wale shömabä, wale lä yaileno wei ya lä cui? Yai Bada ya afa Ijlubö jilou yalo, ¿wedi tabä “Yai Bada wa tä nö waiblaö”, wamale nowa li taö dicoo?
- 37 Fayänö tä bluca tamaö lä bufii wei ya tä taimi ja, wamale a bejedi bufi dijä, öjö lä.
- 38 Öjö ma cui, ya tä yai taö däjä, camiyä wamale a bejedi bufii ma mlai ma cui, ya tä bluca lä taö wei tänö, bä bufi juducua fe da yadiicu. Camiyä nija Fayä a lä cule, wama

tä daö fe yadiobä. Cama nija camiyä ya çai lä cule, wama tä çai dabä. Öjö yafäcö — Jesús a cuma.

³⁹Bada bänö a juwäamaö wabaö ma çono wejei ma cui, a fa moyawäonö a juwäamonomi.

⁴⁰Jodana u mashi bucadu jamö, Juannö bä fe jaba lä ojomano wei jamö, Jesús a aa fa çolufälönö, öjamö a yanöcöquema.

⁴¹Öjamö Jesús nija bluca bä çocamolayoma. Bä ʔ wayomayou ja, abinaja bä nowa tayoma. —Fe ojomalewä Juan a lä cuinö, tä nö lä quilijii tä wawämano ma mlai ma cui, fei a wəfa da wäyāblei a wə bluca bejedioma —bä cuma.

⁴²Öjamö ai bä blucanö a wə bejedi bufilemaje.

San Juan 11

¹⁻²Bedaniateli a Lasalo cuoma. Bä yaö ecöbö çai bälöoma. Marta ai e ʔfa cuoma, María ai e ʔfa cuo mö feduoma. Öjö María a lä cui, toubä nö lä çedeli wei toubänö, Bada tä Jesús mamicö fe lä löblaleno wei a suwä cuoma, cama feťa ucuonö, mamicö yajöblaö lä majölayono wei a suwä lä cui. ¿Öjö tawä? María bä ʔiyobö Lasalo e lä cui, e jalilioma.

³Öjö cudeenö, Jesús nija a wəfa wäyābä, bä yaö ecöbönö, ai a shömöbölema. Abinaja a nowa nia tayoluma. “Tä ʔ wäyāle. Afä nofi a jalili tai”, a nowa nia tayoluma.

⁴Öjö ma cui, Jesúsno a wəfa jalili jiliaö dāja, abinaja a cuma. —A lä jaliliale tä wayunö, a nia nomawä cudiomi. Yai Bada a wəfa doblao tamobä tä li, Yai Bada ya Ijilubö doblao dablamobä —a cuma.

⁵Bei. Marta sho, bä fäähä María sho, bä ʔiyobö Lasalo sho, Jesúsno öjö bä bluca yai nofimaö dodijioma.

⁶Öjö cudeenö, Lasalo a wəfa jalili jiliaö dāja, a lä cuono wei jamö a yanöcöa balöquema. Öjamö a fe weyaa bolacalayoma.

⁷Öjö dāja, cama ebä lä nocamabono wei bä nija abinaja a cuma. —Bei. Judea jamö bamacö juu da ço —a cuma.

⁸Abinaja cama ebä cuma. —Tä ʔ wäyāle. Maa mabänö, judio bänö weyajada ja wa nia ma shäyāno wejei ma cui, ¿öjamö bei wa mö nia li yabaö çofälöö? —bä cuma.

⁹Abinaja Jesús a cuma. —Bä quili dijä. Tä mö jaba wacacablou lä fenao wei dāja, ¿tä mö wacacawä nö dedeaimi daanö? Tä mö wacacao showaobä jamö täbä juu ja, motoca shji cua yalo, täbä nö mojudili bleaaimi.

¹⁰Öjö ma cui, didi dāja täbä juu dicoo ja, tä lä wacacai etä cuami yalo, täbä wäcäblou si ijejewä —a cuu jalooma.

¹¹Inaja a cuu fa balöonö, abinaja bä nowa taö nomöjööma. —Bäma a lä nofimaö wei a Lasalo miquema ma cui, ya ləmaö çobä ya nia juu —bä nowa tama.

- 12** Cama ebä lä nocamabono wei bä lä cui, abinaja bä cuma. —Tä ʘ wäyäle. A miquema ja lä, a jalou ʘo weicätä —bä cuma.
- 13** A lä nomalayono wei, Jesúsno tä ʘfa yai wayoama ma cui, showadi täbä modawä ʘai lä mio wei tä ʘfa bufimaje.
- 14** Öjö däjä, Jesús a wʘ yai wawäoblaliyoma. —Lasalo a nomalayoma.
- 15** ¿Öjö tawä? Cama nijamö ya cuonomi yalo ya bufi doblalou, ya cuo lä mlaono wei tänö, wamacö bufi yai jaducublobä. Wamale ʘ bejedi yai bufibä. Bei. Cama nijamö bämacö da ju —a cuma.
- 16** Jesúsno bä nocamabou mö lä feduono wei bä lä cui nija, Tomás a wʘ fama, Cäcöbä lä ʘlequeblaliyono wei a, a wʘfa ʘai lä jilabono wejei a lä cui. Abinaja a cuma. —Jabo. Bämacö ʘai da ju. Jesús a nomabä jamö, bäma ecö nomaö yädäo mö feduo showadaobä —a cuma.
- 17** Bei. Maa maca jamö, Lasalo a nomawä maquebou waiquioje däjä,
4 tä mö didi cublou waiquilayono wei ja, Jesús a ʘoblou jälaiyoma.
- 18** Bedaniateli bä shabonobö jamö, Jelusale tä ulifi ajedeoma yalo,
- 19** öjamö culanö judio bluca bä juimama, bä ʘiyobö e ja, Marta, María cäcöbö ʘ nofi ojode tabeje.
- 20** Marta a lä cuinö, Jesús a wʘfa juu fa jililänö, María yafi jamö a loo juo däjä, Jesús a mö baamabä a julayoma.
- 21** Abinaja e cuyoluma. —Bada tä. Eja wa yai cuo fa cunoja, ʘiwä a bufi nö mlaobö mlai.
- 22** Fei däjä ma cui, Yai Bada tänö cafä wa wʘ lä jiliaö wei ya tä daö. Wa tä bayeli nacaö lä bädao wei tä ma cui, tä nia bayeli shömaö —e cuma.
- 23** —ʘiyofä a demi nia jocädou ʘo —Jesús e cuma.
- 24** Abinaja Marta e cuma. —Awei, öjö ya tä daö. Tä lä jödödblöle däjä, Yai Bada tänö täbä demi bluca jocäcamaö ʘo däjä, öjö däjä a demi nia jocädou ʘo —e cuma.
- 25** Abinaja Jesúsno a nowa tama. —Täbä demi nia jocäcou lä ʘo wei, öjö lä ei ya waiquiwä —Jesús a cuma—. Bʘlimi bä cuobä, camiyä ya showawä. Camiyä wale ʘ bejedi lä bufii wejei, bä ma nomaö wei ma cui, bä nia cudio fe yadio.
- 26** Bä demi lä cublai bä lä cuinö, wale ʘ bejedi bufiije ja, bä nomaö mlaicätä. ¿Öjö tawä? ¿Wale ʘ bejedi bufii cule? —a cuma.
- 27** Abinaja Marta e cuma. —Awei, bada tä. Bäfä ʘ bejedi bufii. Yai Bada tänö a shömabä a lä yaileno wei a lä cui, öjö cafä wa waiquiwä. Yai Bada tä Ijilubö wa e, bita jamö wa wʘfa juu lä wäyänö wejei —e cuma.
- 28** Einaja a fa culunö, bä fäähä María a nacaö mö alayoma. Abinaja e wajado cuma. —Tä ʘ lä wäyäo wei a waloquei lä cufe. Cafä wa nacaö tai —e cuma.

- 29**A wə fa jililänö, yedu María a jocädaliyoma, Jesús nijamö a juu showadaobä.
- 30**Bedaniateli bä shabonobö jamö, Jesús a yafinomi showawä. Martanö a mö lä bamaleno wei jamö, öjamö a yanöcöo juoma.
- 31**¿Öjö tawä? María yedu a fa jocädalunö, a sibolayofälöma. A nofi ojode tabeje, yafi jamö a çai lä loono wejei bä judio lä cuinö a juu dalalemaje. “A nomawä maquebobeje jamö a öcödayobä”, a nofi fa tabojenö, bä yaua showalayofälöma.
- 32**Öjö däjä, Jesús a lä cuono wei jamö, María e fa ajedebalunö, a dalalema. A fa dalalönö, bei a cotä jamö a möfe bolanö, a wə fama. —Bada tä. Eja wa yai cuo fa cunoja, aïwä a bufi nö mlaobö mlai —e cuma.
- 33**María a ma cuinö, a çai lä junö wejei bä judio ma cuinö, Lasalo a nomöa bluca bomaje. Bä bufi nö bleaaö fa dalalönö, Jesús a bufi nofi jushublaoma.
- 34**Abinaja a cuma. —¿Wedi jamö wama a nomawä maquequema? —Jabo, tä a wäyäle —bä cuma—. Wa tä möblaabä.
- 35**Jesús a öcöma.
- 36**A öcöma cudeenö, abinaja judio bä cuma. —¿Öjö tawä? A malä nofimano wei —bä cuma.
- 37**Öjö ma cui, abinaja ai bä cuu mö feduoma. —A jubäbö lä cuono wei, a mamocu lä jalomaleno wei, öjö a waiquiwä. ¿Wedi tabä Lasalo a ma cui, a bayeliblanomi, a nomaö mlaobä?
- 38**Öjö däjä, Jesús a bufi nofi jushublaa fa çöicunö, a nomawä lä maquebono wejei täca jamö, a ajedebalaliyoma. Maa maca bada cuoma. Maa ai manö maca fe laoma.
- 39**Abinaja Jesúsno bä nowa tama. —Maa ma da blajamalöje —bä nowa tama. Inaja a cuu ja, Marta a wə lämoma, bä aiyobö e bufi lä mlaqueno wei a lä cui. Abinaja e cuma. —Bada tä. Tä ni jitali waiquiwä cätä. A nomawä maquea lä waiquile,
- 4** tä mö didi cublou waiquia —e cuma.
- 40**Abinaja Jesús e cuma. —Wale a bejedi bufii ja, Yai Bada wa tä doblao dabraö wä. ¿Inaja bäfä nowa tanomi daanö, öjö lä? —e cuma.
- 41**Inaja a cuma yalo, ma blajaa fe yadimalemaje. Öjö däjä, Jesús a mö fa nonoicunö, abinaja a cuma. —Fabe. Cafänö wale a jiliaö ja, ya bufi doblao.
- 42**Showadi wale a shino lä jiliaö wei, ya tä daö waiquiwä ma cui, ei bä ublaa lä ajedele bä bufi jaducublobä ya wə. Cafänö wale lä shömöleno wei, tä a yai bejedi bufibeje —a cuma. Inaja a cuu fa balöonö, a wə çali falayoma. —¡Lasalo! ¡Fäyämö a da fabo!
- 44**A lä nomalayono wei, a demi jocädou fa çolonö, a faa showalayoma. Bei imicö ma cui, bei mamicö ma cui, camishi acadafu bänö a ocamaoma. Ai cäcönö a mö jöyao mö feduo showaoma. Jesúsno a nabä shimöquema. —A da cushäblalöje, a jubä —a cuma.

45 Öjö cudeenö, Lasalo a lä taamano wei tä fa dalalöjenö, María a çai lä juno wejei bä judio bluca mö feduwä lä cuinö, Jesús a wə bejedi bufilemaje.

46 Öjö ma cui, ai bä mö feduwä lä cui, faliseo bä bada nijamö bä jua showalayoma. Jesús a lä cuaano wei tä ʔ wäquemaje.

47 Öjö cudeenö, nofi bäyäälewä blowäjäwä bä lä cuinö, faliseo bä mö çai feduwä lä cuinö, bada bä yododoblamalemaje, bä ʔ wayobä. Abinaja bä nowa tayoma. — ʔ Wedinaja bamacö yai cuaabä, öjö lä? Yai Bada e nö nia fa öjöböamonö, quiji a lä cuinö, tä nö lä quilijii bluca tä wawämadii.

48 Bäma a ʔamaimi ja, jödödöwä bänö a wə bejedi nia bufiije. “Ei a waiquiwä”, bä fa cunö, bä shi nia dou. Öjö däjä, Lomateli bänö bämalecö nabä nia waloyoluuje. Yai Bada etä yafi nia wəliaöje. Judio bämalecö mö nia çai watäblaöje —bä nowa tayoma.

49 Öjö ma cui, cama ai a wə bada fama, Caifasi a wəfa lä cuono wei. Nofi bäyäälewä öjö a bada cuoma, öjö däjä. Abinaja bä nowa tama. —Uo. Wiisibö ma cui wamacö bufi nofi jaducubloimi dodijiwä yai.

50 Wamacö nia yai lä bayeliblamou wei, wama tä daimi. Täbä bluca waicaö mlaobeje, moli a lä cui a shämou ja, öjö tä dodijidawä waiquiwä. Judio bamacö mö bluca watäblamou showadao mlaobä —bä nowa tama.

51 Cama a bufi lä cuu weinaja, a wə bädao cuonomi. Nofi bäyäälewä öjö däjä a bada läoma cudeenö, öjö nijamö Yai Bada a wəno tamou ʔatooma. Judio bä bluca bayeliblamobä, Jesús a nia shämou lä läono wei, öjö tä ʔfa yai wäyöö ʔatooma.

52 ʔ Öjö tawä? Cama judio bä bayeliblamou ayaobä mlai. Yai Bada bei ijilubö ebä bälöblawä lä shedequeblai, bä çamodayobä a nia shämoma, Yai Bada bei ijilubö moli ebä cuobä.

53 Inaja bä nowa tayoma yalo, Jesús a shäbeje tä nofi cadidibomaje. A nia yai lä taamano wejei tä ja, bä ʔ showadi wayoma.

54 Inaja a nofi washuamaje yalo, judio bä nija Jesús wawädowä a juu mlaa showadaaliyoma. Judea tä ulifi jamö a cuo bufio fa mlacunö, ulifi bloque tä ajede jamö a juu nomöjöoma, Eflaini ebä nodiwä ulifibö jamö. Öjamö cama ebä lä nocamabono wei bä çai yanöcöblaoma.

55 Yai Bada a waiteli lä jayuanö wei, judio bänö a nofi nia çamoaö jaödao çomaje. Öjö cudeenö, bluca bä lä bälöjöi Jelusale jamö bä juma. Bä iyaö showao mlaö däjä, bä nia dodijidablamou balöoma, Moisesinö tä tamaö lä bufino weinaja showawä.

56 Öjamö Jesús a dayäämaje. Yai Bada etä yafi jamö bä ublajalanö, bä wəliyoma. — Cafä ʔ wedinaja wa bufi cuu dodijia cube? Bamacö iyabä jamö, ʔ Jesús a juu mlai daanö? —bä cuma.

57 ʔ Öjö tawä? Nofi bäyäälewä blowäjäwä bä ma cuinö, faliseo bä bada ma cuinö, öjö bänö täbä nowa bluca taö waiquiomaje. Jesús a dablaö bädaoje ja, cama bä yömöläö showadaobeje bä ʔ fama, a juwäämaö showadaobeje.

San Juan 12

¹Bei. Yai Bada a waiteli lä jayuano wei,

⁶ tä mö jalu cublou däjä tä nofi nia çocamoao çomaje. Bä iyaö showaa mlai ja, Bedaniateli bä nijamö Jesús a waloa balöquedayoma. Öjamö Lasalo a bälöoma, Jesúsno a demi jocädamaö lä çolayono wei a lä cui.

²Öjamö Jesús a çai iyabeje, bä yododama. Martanö nii bä bablaao cuaama. Bä iyabä bä lä loono wei jamö, Lasalo a çai cuoma.

³Öjö däjä, Maríanö toubä nö lä clëdeli wei toubä besi fa dälänö, Jesús mamicö fe löblalema. Toubä nowa blucao dodijioma. Cama suwä fëta ucuönö, mamicö çai yajöblaö nocalayoma. ¿Öjö tawä? Mamicö fe löblaö ja, a yafi nö clëdeli jödödöblaliyoma.

⁴Öjö ma cui, Juda Icaliode a wä läblaliyoma. Jesúsno bä lä nocamabono wei ai e cuo mö feduoma, a nia lä nomojoliano wei a lä cui. Abinaja a cuu dicooma.

⁵—Fei toubä nowa bluca fe balojowä. Öjö lä toubä ja, ¿wedi tabä blada 300 bä däänomi, bä lä jöli wei bä yai bayeliblamobä? —a cuma.

⁶Inaja a lä cuno wei a lä cui, bä lä jöli wei bä nofi jalujubou yalo a wä cuonomi. Showadi a tomömoma yalo a wä li cuoma. Cama bä bladabö talö yefiboma yalo, bä shino doaö jatooma.

⁷Abinaja Jesúsno a nowa tama. —A suwä wasö dijä. Toubä shee lä jäblalufe toubä tabobä, wale nomawä maquebobeje jamö, wale jölöcaö çobä.

⁸Bä lä jöli wei bä lä cui, çafä wamacö nijamö showadi bä nia malä cudio wei, wama bä bayeliblabä. Öjö ma cui, camiyä ya yai nia cudiommi —a nowa tama.

⁹Bedaniateli bä nijamö Jesús a jowa cuoma yalo, Jelusale jamö bä judio lä çocamono wei bä lä cui, Bedania jamö bä lobe aa balölayofälöma. Jesús a shino möbeje mlai. Lasalo a ma cui, öjö a çai möö bufi doblaomaje, Jesúsno a jowa demi jocädamaö lä çolayono wei a lä cui.

¹⁰Öjö cudeenö, nofi bäyäälewä blowäjawä bä lä cuinö, Lasalo a nofi çai washuaö mö feduo showadaomaje, a shämobä.

¹¹¿Öjö tawä? Lasalo a demi lä jocädamaleno wei tä nowanö, Jesús nija bä bufi mö blucablou fa nomöjolonö, judio bä blucanö a bejedi malä bufileno wejei.

¹²Öjö tä fena ja, bä iyaö çai çocamobä bä bluca lä yododano wei bä lä cuinö, Jelusale jamö Jesús a wafa juu jililemaje.

¹³Öjö cudeenö, jai lasha si jenabä cuwä jenabä fa däabodujenö, bä a noshi fa jalilaimadunö, Jesús a nabä aa mö balayomaje. Abinaja bä cufälöma. —Yai Bada a nofi shino yai da doablaje! Bada a wänö a lä juimi, ¿jö a shino yai bayeliblamobä a! ¿Isaeli nodiwä bäma ecö nija a Bada läobä a! —bä cuma.

- 14Jesúsnö bulo a j̄jima fa dälänö a döcäquema, a befi çai jubä, Yai Bada etä ʔ oni lä cuu weinaja showawä. Abinaja tä ʔ cuu.
- 15Sionoteli wamacö. Bä quili dijä. Bulo a ocalo ja a döcälänö, ʔcafä wamacö nija a Bada läobä, a juu lä cuimi! ʔÖjö tawä? Einaja tä ʔ cuu.
- 16Öjö tä lä cublaliyono wei tä ja, cama ebä lä nocamabono wei ebä bufi jaducublou showadaonomi. Öjö ma cui, fedu jamö Jesús a lä doblaquedayono wei däjä, Yai Bada etä ʔ oni jamö, a wafa lä wäyämöno wei, tä ʔ nofi jaducudaö jäläyomaje. Yai Bada etä ʔ oni jamö, a wafa bluca wäyäö lä balöno wejeinaja, a yai bejedi taamamaje. Öjö tä ja, bä bufi yai jaducublou jäläyoma.
- 17ʔÖjö tawä? Lasalo a nomawä lä maquebono wejei jamö, Jesúsnö a demi famaö lä çono wei däjä, bä mamö bluca lä showaono wei bä lä cuinö tä ʔafa wäyädimaje.
- 18Öjö bä ʔ fa j̄lilälänö, bluca bänö Jesús a nabä çocamoä mö baomaje, Yai Bada e nö öjöböamobä, a nö lä quiliano wei tä ʔ j̄lilemaje yalo.
- 19Öjö däjä, abinaja faliseo bä nowa tayoma. —Tä da möblaaje. Bäma a nö j̄amabimi waiquiwä. Bluca bä lä bälöblai bänö, a bufi waiquiweje —bä nowa tayoma.
- 20Jelusale jamö bä iyaö çai çocamobä bä lä juno wei bä nija, clieco bä çai çoyocomoma. Yai Bada nija bä möfe bolanö, a wafa çai nia Bada doblao fa tajenö, bä juma.
- 21Öjö lä bä shominö, Besaidateli Felipe nija bä icuquema, Calilea tä ulifi jamö a Felipe lä bälöno wei nija. Abinaja a nowa tamaje. —Tä ʔ wäyäle —bä cuma—. Jesús yama a möö ojode.
- 22Andrés nija Felipe a wä faö fa balöno, Jesús nija cäcöbö fa junö, a yömölaböma.
- 23Jesús abinaja a cuu mö feduoma. —Ya lä yanowamöblaleyoluno wei ya lä cui, Yai Bada tänö wale nia doblao dablamaö. Tä cublou ajedewä waiquia lä cule— a cuma.
- 24Cama a nia lä taamamono wei tä ʔafa wäyäö ja, abinaja a cuu nomöjööma. —Cafä wamacö nija ei ya wä lä cui, bejedi lä ya wä. Mashita jamö, nii mo befi çai lä quei wei, dude mo cuo däjä, mo nia cauu showadaomi. Mo nia yami blao. Wälidiwä mo fa cublalunö mo shino caulayou. Mo fa caulunö, moli mlai, bluca mobä nia yädäo.
- 25Inaja showawä, yanowamö bä ma cui, eja bä demi nia lä cudio wei tä ja, bä bufi mö lä blucao wei bä lä cui, bä bälimi nia cuodayoimi. Eja bä demi nia lä cudio wei tä ja, bä bufi mö blucao lä mlai bä lä cui, öjö bä nia shino bälimi cuo ayao.
- 26Wale ʔ juaö lä ojodao wejei bä lä cui, camiyä nija bä nocaobä öjö bä li. Camiyä ya cuobä jamö, öjö bä nia shino cuo. Wale ʔ juaö lä ojodao wejei bä lä cui, Fayänö bä nofi nia dodijidawä tamabou —a cuma.
- 27Abinaja Jesús a cuma. —Ya bufi nofi jushublaa lä cule. ʔWedinaja ya yai cubä? “Fabe. Fei däjä ya nö nia lä bleaaö wei tä ja, ʔwale noshi da umabo”, ya e cubä daanö? Ma, inaja ya taamamobä, ya malä waloqueyoluno wei —a cuma.

- 28 Öjö dǎjä, Yai Bada nija abinaja a cuma. —ǎFabe! —a cuma—. Cafǎ a shino yai doblao da damolalu. Einaja a cuu ja, fedu jamö a culanö a wǎ bǎdaliyoma. —Ya doblao damoa waiquilaliyoma. Ya nia ǎai doblao dablamou ǎo —a cuma.
- 29 Bǎ bluca lä ǎoǎaono wei bǎnö, a wǎ fa jǎlilǎjenö, yǎlu a wǎ bufimaje. Ai bǎ lä cui, abinaja bǎ cuu mö feduoma. —ǎjele anö a wǎ wayomaö lä cufe —bǎ cuma.
- 30 Jesús abinaja a cuma. —Camiyǎ ya bufi jaducublobǎ a wǎ cuonomi. Cafǎ wamacö bufi yai jaducublobǎ a wǎ julayou lä cufe.
- 31 Fei dǎjä Yai Bada tänö yanowamö tǎbǎ nia jömaö. Fei dǎjä fecula bada a nö nia bleaamaö, bita jamö a lä nosiemou wei a lä cui.
- 32 Camiyǎ ya lä cui, ya befi ǎai nia ǎtao. Öjö dǎjä, bluca bǎ lä bǎlöblai, camiyǎ nija ya bǎ nia ajedamaö —a cuma.
- 33 ǎÖjö tawǎ? A shǎmobǎ, a nia yai lä taamano wejei tǎ jömapǎ, a wǎ li cuoma.
- 34 Bǎ bluca lä ǎoǎaono wei bǎ lä cui, abinaja bǎ cuma. —Yai Bada yama tǎ ǎ oni daö. A shömapǎ a lä yaileno wei a lä cui, a nia jowa cudio. ǎÖjö tawǎ? Wa lä yanowamöblaleyoluno wei wa lä cui, ǎwedi tabǎ wa befi ǎai ǎfa ǎtao li wǎyǎmamou dicoo? ǎWedi jamö a lä cui, bei wa wǎfa yanowamöblou li taö, öjö lä? ǎCafǎ mlai daanö? —bǎ cuma.
- 35 Abinaja Jesúsno bǎ nowa tama. —Cafǎ wamacö nija lobe tǎ shǎi cublaa. Ei tǎ shǎi cua lä showale dǎjä, bǎ da cadidofälö, mö didi tǎ ja wamacö shi wǎlia dicoicu. Tǎ mö didiobǎ jamö bǎ lä juu wei, bǎ mojudili ǎai juu.
- 36 Cafǎ wamacö nija ya shǎi cua lä showale dǎjä, wamale ǎ bejedi da bufi, tǎ wacacaobǎ jamö wamacö lä cuo wei, wamacö yai cublobǎ —bǎ nowa tama. Einaja bǎ nowa fa talöfälönö, shomi jamö a cua showalayofälöma, a dablao mlaobeje.
- 37 Tǎbǎ mamö showao dǎjä, bejedi lä Jesús a nö quiliama. Yai Bada e nö öjöböamobǎ, tǎ nö lä quilijii tǎ bluca ma wawǎmano wei ma cui, a wǎ bejedi bufinomije.
- 38 ǎÖjö tawǎ? Yai Bada a wǎno wǎyǎlewǎ Isaia a wǎ bejedi cublobǎ, öjö lä tǎ li cuoma. Abinaja tǎ ǎ cuu. Tǎ ǎ wǎyǎle. Yama tǎ ǎ lä wǎyǎö wei, tǎ ǎ bejedi bufiimije. Cafǎ Bada wa nö lojode öjöböamobǎ tǎ ma cule ma cui, bǎ bufi jaducubloimi. Einaja tǎ ǎ cuu.
- 39 ǎÖjö tawǎ? Tǎ ǎ bejedi bufibeje, bǎ cuonomi waiquiwǎ. Yai Bada a wǎno wǎyǎö ja, Isaia a lä cuno weinaja showawǎ. Abinaja tǎ ǎ cuu.
- 40 Jai bǎ mamö casö miblawǎ, Yai Bada tänö bǎ tablamalema. Bǎ bufi ǎai jifumaboma, tǎ lä dablao wejei tǎ nö öjöböao mlaobeje. Bǎ bufi yai jaducublou mlaobǎ. Bǎ demi cudiobǎ, Yai Bada nija bǎ bufi mö yabajadou mlaobǎ. Einaja tǎ ǎ cuu.
- 41 ǎÖjö tawǎ? Jesús a nia lä doblaodayou wei a daa showalalema yalo, Isaianö a wǎfa wǎyǎö balöoma.

⁴²Inaja tä ma cuono wei ma cui, bada bä çai bluca ma cuinö, Jesús a wə bejedi bufia fe yadilemaje. Öjö ma cui, faliseo bä nö bada quili fa tajenö, wawadowä bä ʔa nö wäonomi, judio bä yododabä yafi jamö bä coyocamabou mladou mlaobeje.

⁴³Öjö tawä? Yai Bada nija mlai, yanowamö täbä nija bä ʔafa nia dodijidawä lä tamou wei tä ja, bä bufi mö yai blucao dicooma.

⁴⁴Jesús a wə icali faö ja, abinaja a cuma. —Wale ʔa bejedi lä bufii wejei bä lä cuinö, camiyä wale ʔa bufii ayaomije. Wale lä shömöleno wei a ma cui, öjö lä a wə bejedi çai bufii showaweje.

⁴⁵Camiyä wale lä dabraö wejei bä lä cuinö, wale lä shömöleno wei a ma cui, öjö a çai dabraö waiquiweje.

⁴⁶Cowa wacö shi lä culenaja ya shi cuobä, bita jamö ya waloqueyoluma, wale ʔa bejedi lä bufii wejei bä bluca lä cui, tä mö didiobä jamö bä shi wəlio mlaobä.

⁴⁷Ai bänö wale ʔa ma jiliaö wejei ma cui, wale ʔa nofi cadidiboimije ja, öjö bä lä cui ya bä nia jömaö showadaomi. Yanowamö ya täbä jömaö showadaobä, bita jamö ya juno malä mlai. Ya täbä jucäabä, ya yai juma.

⁴⁸Wale lä waii wejei, wale ʔa juaö lä mlajei bä lä cui, obi bä nia yai jömamou. Tä lä jödödblöle dāja, wale ʔa lä waileno wejei ya wə showawänö, bä nia jömamou.

⁴⁹Camiyä ya bufi lä cuu weinaja ya tä ʔa wäyäö bädao malä mlai. Fayänö wale lä shömöleno wei a showawä lä cuinö wale nosiemaö ja ya wə. Cama a wəno ya wə cadidou.

⁵⁰Yai Bada tänö tä tamaö lä bufii wei tä ja bä cadidou ja, bəlimi bä nia cuo. Öjö ya tä daö cudeenö, Fayänö tä ʔa wäyämaö lä bufii wei, ya tä ʔa li wäyäö —a cuma.

San Juan 13

¹Yai Bada a waiteli lä jayuno wei tä nofi nia çocamoä jaödao çomaje. Bä Fjö e nijamö a nia ço lä jaödaono wei, Jesúsno tä daö waiquioma. Ei tä bita tabi nia feiaö çoma. Cama ebä bita jamö lä cule, bä showadi lä nofimadino wei, bä nofimaö mladonomi. A waicobä jamö ma cui bä nofimaö fe yadio showaoma.

²Bei. Simón bä ijilubö Juda Icaliode a lä cui, fecula bada anö a bufi taamaö waiquioma, bä weyade lä iyano wei dāja. Jesús a nia nomojoliamä.

³Jesús a lä cuinö, jödödöwä täbä lojodobobä, bä Fjö enö Bada a yai tablamaö lä waiquilyono wei tä daö waiquioma. Yai Bada nija a cuo lä balöno wei tä çai daö showaoma. Öjö nijamö a nia lä ço wei tä çai.

⁴Öjö tä daö waiquioma yalo, bä weyade iyabä jamö a fa ublalonö, cäcö lä feyacabono wei cäcö fa jayublalonö, cäcö casömalema. Öjö dāja, täbä lä wejemamou wei cäcö ʔyao majölema.

- ⁵Madofi a jobocowä jamö ubä fa lölänö, cama ebä lä nocamabono wei bä mamicö yaluu ja, bä nabä jaba quequema. Bä mamicö fa yaludanö, cäcö lä ayobono wei cäcönö, bä mamicö yajödaö nocamou showadaoma.
- ⁶Simón Pedro nija a icua fa majöicunö, Pedro a wä lämoma. —Bada tä. Camiyä wale mamicö yalubä yami —a cuma.
- ⁷Jesús a wä juoma. —Ei ya tä lä tale tä ja, fei däjä wa bufi jaducua ma mlale ma cui, wale nia lä taamaö wejei tä cublou balölayono wei ja, öjö däjä wa bufi nia jaducublou nomöjöö —e cuma.
- ⁸—Ma. Camiyä wale mamicö nia yaluimi —Pedro a cuu çoma. Jesús abinaja e cuma. —Bäfä yaluimi ja, camiyä nija wa nia yädäomi —e cuma.
- ⁹Öjö däjä, abinaja Simón Pedro a cuma. —Bada tä. Inaja wa cuu ja, bei ya mamicö bädawä mlai, bei ya imicö çai da yalulu, bei ya fe çai —a cuu nomöjööma.
- ¹⁰Abinaja Jesús e cuma. —A yälömu lä waiquilayono wei a jödödöwä au waiquiwä. Bei mamicö nia shino yälömu çö. ¿Öjö tawä? Cafä wamacö au waiquiwä ma cui, moli ai wamacö lä cui a shino aumi —e cuma.
- ¹¹A nia lä nomojoliano wei a malä dano wei. Öjö cudeenö, “Moli ai wamacö lä cui a shino aumi”, a cuma.
- ¹²Bä mamicö yalua fa jödödöblalönö, cäcö lä feyacabono wei cäcö çö fa çölonö, bä lä iyano wei jamö a loa çöquema. Abinaja bä nowa tama. —Fei bamacö lä taamafe tä ja, ¿wamacö bufi jaducua culawä?
- ¹³Wamale afa jayumaö ja, “Tä a wäyäle”, wamacö cudou. “Bada tä”, wamacö çai cudou, ¿öjö tawä? Wamacö bejedimou. Öjö ya malä cui.
- ¹⁴Wamale nofi lä Badabou wei ya ja lä, ya tä a çai lä wäyää wei ya ja lä, wamale nia owäbou. Cafä bamacö mamicö yaluu lä cuaafenaja, cafä wamacö ma cui, wamacö taamayou mö feduobä wamacö.
- ¹⁵Wamale owämabä ya tä malä tafe, cafä bamacö taamaö lä cuaafenaja wamacö taamayou mö feduobä.
- ¹⁶’Cafä wamacö nija ei ya wä lä cui, bejedi lä ya wä —bä nowa tama—. Bada a lä cui a nofi tabou mlaoje däjä, cama ebä nofi nia tabou ayaomi. Inaja showawä, bä lä shömaö wei a lä cui a nofi tabou mlaoje däjä, bä lä shömamou wei bä nofi tabou ayao mlajeicätä.
- ¹⁷¿Öjö tawä? Bamacö lä yömölale tä ja, wamacö bufi fa jaducucunö wamale a juaö ja, wamacö bufi nia yai doblalou.
- ¹⁸’Cafä bluca bamacö afa wayoaimi —Jesús a cuu çoma—. Iba ya bä lä yaileno wei, ya bä daö. Tä nia lä cublou wei tä lä cui, Yai Bada etä a bejedi wawäblou bufio yalo, tä nia li cublou. Abinaja tä a oni cuu. Camiyä nija a showadi lä iyano wei a lä cuinö wale nomojoliaö nomöjöö lä cule. ’Einaja tä a cuu. ¿Öjö tawä?

- 19Tä cublou showaa mlai ja, bamacö yömöläö balöa lä cule, tä bejedi cublou dāja wamacö bufi yai möblobä. Ya wafa showadi lä wäyämamou wei, wamale a bejedi bufibä.
- 20’Cafä wamacö nija ei ya wä lä cui, bejedi lä ya wä. Ya bä lä shömaö wei bä lä cui, dodijidawä bä çoblamaöje ja, camiyä ma cui wale dodijidawä çoblamaö mö feduoje. Inaja showawä, camiyä dodijidawä wale lä çoblamaö wejei bä lä cuinö, wale lä shömöleno wei a ma cui, öjö a dodijidawä çoblamaö mö feduoje —a cuma.
- 21Einaja Jesús a fa culunö, a bufi nofi fa jushublaonö, cama a wafa wäyämou shalilioma. —Cafä wamacö nija ei ya wä lä cui, bejedi lä ya wä. Ya jolemoimi. Cafä wamacö ai a lä cuinö wale nia nomojoliaö—a cuma.
- 22Jesúsnö bä lä nocamabono wei bä lä cui, “Öjö a wafa yai wayoaö daanö”, bä bufi cunomi yalo, bä wäyäcu möyou cuaama.
- 23¿Öjö tawä? Jesúsnö bä lä nocamabono wei ai e lä cui sho cäcöbö jöçöjöoma, a yai lä nofimano wei e lä cui sho.
- 24Jesús nija öjö a ajedeoma yalo, bei imicönö Simón Pedronö a wälamaö bufima. Abinaja e cublaloma. —Wa wä fa jililänö yamalecö da yömöla. ¿Wedi jamö a lä cui, bei a wafa yai li taö? —a cuma.
- 25Öjö cudeenö, Jesús nija a loo lä jöçöjöono wei a lä cui, abinaja e cuma. —Bada tä. ¿Wedi jamö a lä cuinö bei wa nia jömaö dodijio?
- 26Abinaja Jesús e cuma. —Ei nii ya fa ödäblalönö, ya e nia lä jöböaö wei, öjö lä a waiquiwä —e cuma. Öjö dāja, nii a fa ödäblalönö, Juda nija a jöböquema, Simón Icaliode bä ijilubö e lä cui nija.
- 27Nii a fa dälänö, cama nija Sadanasi a lucäa showadalayoma. Abinaja Jesús e cudaliyoma. —Wa tä nia lä taö wei, fei dāja tä taö da showadao —e cudaliyoma.
- 28¿Öjö tawä? Bä iyabä jamö bä lä loono wei bä lä cui, Jesús a lä cuno wei tä ja, bä bufi jaducuonomi.
- 29Judanö blada bä talö yefiboma yalo, abinaja ai bä bufi cuma. “Bamacö iyabä, nii bä luluamaö bufii”, bä bufi cuma. Abinaja çai. “Bä lä jöli wei bä dobäbä, a shömaö lä cule”, ebä bufi çai cuu yacläoma.
- 30¿Öjö tawä? Nii a fa dälänö, Juda a siboa showadalayoma. Tä mö dödöoma.
- 31Juda a siboa waiquilayofälöno wei ja, abinaja Jesúsnö bä nowa taa jelema. —Fei dāja ya lä yanowamöblaleyoluno wei ya lä cui, ya nia doblao dablamou. Ya lä cuaaö wei tänö Yai Bada ya nia çai doblao dablamaö.
- 32¿Öjö tawä? Yai Bada ya doblao dablamaö ja, cama Yai Bada tänö camiyä ya lä yanowamöblaleyoluno wei ya lä cui, wale nö nia çai doblao öjöböamaö showadao.

³³Ijluyä wamacö —a cuu çoma—. Cafä wamacö nija lobe ya cublaa lä cule. Wamale nia dayäö. Judio bä nija ya lä cuno weinaja, cafä wamacö ma cui, bamacö nowa taö çoa lä cule. Ya nia lä cuo wei jamö, wamacö juu daomi.

³⁴Cafä wamacö nija ya tä tamaö lä bufii wei, ya tä ʘ dude wäaö lä cule. Bä da nofimayo. Cafä bamacö nofimaö lä waiquilenaja, inaja showawä, bä nofimayou da cuo.

³⁵Wamacö yai lä nofimayou wei tänö, camiyä nija wamacö lä nocao wei, bluca täbä nija wamacö nö nia yai öjöböamou —a cuma

³⁶Abinaja Simón Pedro e cuma. —Bada tä. ¿Wedi jamö wa nia yai juu? Jesús abinaja a cuma. —Ya nia lä juu wei jamö, fei dǎjä wa yauo daomi. Öjö ma cui, obi wa nia shino juu nomöjöo —e cuma.

³⁷Pedro abinaja e cuma. —Tä ʘ wäyäle. ¿Wedi tabä wale li yaumabou showadaomi? Cafä bǎfä bayeliblabä, ya shämobä tä ma cui ja, ya ojodaa lä cule —e cuma.

³⁸Abinaja Jesús e cuma. —¿Bei wa shämou ojode daanö? Cafä nija ei ya wǎ lä cui, bejedi lä ya wǎ. Cadala a wǎ faö showao mlao dǎjä, 3 wale nofi nia jole jole mojudoubou cuo —e cuma.

San Juan 14

¹Jesúsno abinaja bä nowa tama. —Bä bufi nofi jushublao dijä. Yai Bada tä ʘ shino bejedi da bufije. Camiyä wamale ʘ bejedi çai da bufi.

²Fayä e yafi jamö, täbä nia lä bälöo wei bä yano bluca. Inaja tä cuo mlao fa cunoja, ya tä ʘ nö wäyäbö mlai. Öjamö lä wamacö bälödiobä, bamacö yanobö nia dodijidabladayou.

³Cafä wamacö bälöobä, ya tä dodijidablaö fa balölonö, bamacö nabä nia juimaö. Camiyä ya cuobä jamö wamacö cuo mö feduobä, bamacö nia çablaö.

⁴Ya nia lä juu wei jamö, wama yo daö waiquia —a cuma.

⁵Tomás abinaja e cuma. —Bada tä. Wa nia lä juu wei jamö yama tä daimi. ¿Wedinaja yama yo li daö cuobä?

⁶Abinaja Jesús a cuma. —Camiyä öjö ya yoca waiquiwä. Bejedi tä lä cui, öjö ya çai. Täbä bǎlimi cuobä, öjö ya showawä. Camiyä nija bä juu lä mlai, Fayä nija bä waloo daomi.

⁷Camiyä wamale daö ja, Fayä wama a çai daö waiquiwä. ¿Öjö tawä? Fei dǎjä wama a yai daö. Wama a möö waiquiwä —a cuma.

⁸Felipe abinaja e cuma. —Bada tä. Faafä a da jömöba, “Inaja lä waiquiwä”, yamacö cubä.

- ⁹Abinaja Jesús e cuma. —Felipe. Cafä wamacö nija ya nö ma dedeale ma cui, ¿wale daimi showawä tawä? Camiyä wale lä möö wejei bä lä cuinö, Fayä a möö waiquiweje. ¿Wedinaja wa bufi li fa cunö, “Faafä a da jömöba”, bei wa li cuu cule?
- ¹⁰Fayä nija ya lä cule, camiyä nija Fayä a çai lä cule, ¿wama tä a bejedi bufii yailawä? Cafä wamacö nija ya tä a lä wäyäo wei, camiyä ya wä bädawämi. Fayä ya wano wäyäo. Ya ma cuaaö wei ma cui, camiyä nija Fayä a yai culanö, öjönö tä taö.
- ¹¹Fayä nija ya lä cule, camiyä nija Fayä a çai lä cule, tä a bejedi da bufije. Öjö lä yafäcö. ¿Öjö tawä? Camiyä wamale a bejedi bufii ma mlai ma cui, ya tä bluca lä taö wei tänö, bä bufi jaducua fe da yadiicu, wamale a bejedi bufii fe yadiobä.
- ¹²’Cafä wamacö nija ei ya wä lä cui, bejedi lä ya wä —a cuu çoma—. Wale a bejedi lä bufii wejei bä lä cuinö, Yai Bada ya mayo wawämaö lä cuaaö weinaja bä nia cuaaö mö feduo. ¿Öjö tawä? Fayä nija ya ço yalo, bä nia yai cuaaö.
- ¹³Camiyä ya wano, wamacö nö bayeli nacao ja, wama tä nacaö lä bädao wei tä ma cui ja, bamacö a nia juaö, Fayä ya doblao dablamabä.
- ¹⁴¿Öjö tawä? Camiyä ya wano, wamacö nö bayeli nacao lä bädao wei tä ma cui ja, ya tä nia taö —Jesús e cuma.
- ¹⁵Jesús a wä faö çoma. —Wamale nofimaö ja, ya tä tamaö lä bufii wei wama tä nofi nia cadidibou.
- ¹⁶Fayä nija cafä bamacö nö bayeli fa nacalänö, cafä wamacö nija Bayeliawä ai a nia shömaö. Öjönö wamacö çai nia cuo shi wälii.
- ¹⁷Yai Bada tä Bufe lä cui, öjö lä ya tä afa taö, tä a bejedi lä wäyäo wei. Yanowamö täbä lä cuinö, tä nö öjöböaimije yalo, tä çai daö fa mlacujenö, tä a waibouje. Öjö ma cui, cafä wamacönö wama tä li daö. Wamacö çai malä cule. Cafä wamacö nija tä nia yai cuo cadidio.
- ¹⁸’Bamacö ma daquei wei ma cui, bamacö nö nia beblalamaimi —a cuma—. Bamacö nabä nia juu çimaö.
- ¹⁹Tä nö dedeblou mlai ja, yanowamö täbänö wale nia dabraö ço ma mlajei ma cui, cafä wamacönö wamale nia shino yai dabraö. Camiyä balimi ya cua waiquia yalo, inaja showawä wamacö nia balimi cuo mö feduo.
- ²⁰Öjö däjä, wamacö bufi nia yai jaducublou. Fayä nija camiyä ya lä cule, wama tä nia daö wawadoo. Camiyä nija cafä wamacö lä cule, wama tä çai nia daö. Cafä wamacö nija camiyä ya cua mö lä fedule tä çai.
- ²¹’¿Öjö tawä? Ya tä tamaö lä bufii wei tä nofi lä cadidibou wejei bä lä cuinö, öjö bä lä cuinö wale yai nofimaöje. Wale lä nofimaö wejei bä lä cui, Fayänö bä nia nofimaö mö feduo. Camiyä ya ma cuinö ya bä nia çai nofimaö. Öjö bä nija ya nia dablamos —a cuma.

22Jesús nija Juda ai a lä cui a wə fama, Juda Icaliode mlai. Abinaja e cuma. —Bada tä. ¿Wedi tabä afä yamacö lä cui nija wa nia shino li dablamous ayao? ¿Wedi tabä yanowamö täbä nija wa nia dablamoimi? —e cuma.

23Abinaja Jesús e cuma. —Wale lä nofimaö wejei bänö, wale ʔ nofi nia cadidibouje. Fayänö bä nia nofimaö. Öjö bä nija yafäcö nia walooyoluu, yafäcö bälödiobä.

24Wale nofimaö lä mlajei bänö wale ʔ nofi cadidiboimije. ¿Öjö tawä? Cafä wamacö nija ya tä ʔ lä wäyäle, camiyä ya wə bädawämi, Fayänö wale lä shömöleno wei ya wano taö.

25ʔCafä wamacö nija ya cua showalanö, ei ya tä ʔ bluca wäyää waiquia —a cuma—.

26Öjö ma cui camiyä ya wänö, Fayänö Bayeliawä a nia shömaö, cama a Bufi showawä lä cui. Öjö a lä cuinö, bluca tä lä cule tä ja wamacö nia yömölabodii juo. Cafä wamacö nija ya tä ʔ bluca lä wäyänö wei tä ʔ ja, wamacö bufi nia jaducutamaö juo.

27ʔDodijidawä wamacö cuo juobä, bufi yanöcöwä tä ja bamacö dobäo lä cule. Camiyä ya bufi yanöcöwä lä culenaja wamacö bufi cuo mö feduobä. ¿Öjö tawä? Yanowamö täbänö täbä bufi yanöcömabou daomije. ʔTä nia lä cublou wei tä ja, bä bufi nofi jushublao dijä —a cuma—. Bä quili dijä.

28Ya nia lä cöo wei, ya nia obi çai juu lä cöo wei, cafä wamacö nija ya wəfa wäyämou waiquia. Wamale yai nofimaö fa cunoja, Fayä nija ya nia lä cöo wei tä ja, wamacö bufi nö yai doblalobö wei. Öjö a shino yai Bada malä cui.

29¿Öjö tawä? Tä cublou showao mlao däjä, fei bamacö nowa taö balöa lä cule. Tä yai cublou däjä wamale ʔ bejedi bufibä.

30ʔBei —a cuma—. Fei däjä bamacö ʔ wayomadibä tä cuami waiquiwä. Fecula bada a ajeo lä cule, ei tä ulifi jamö a lä nosiemou wei a lä cui. Cama nija camiyä ya nosiemamoimi.

31Fayänö wale lä nosiemaö wei tä ja ya li yai cadidou, yanowamö täbä bufi jaducublobä. Fayänö wale lä nofimaö wei tä dablabeje. ¿Öjö tawä? Bei. Bamacö da jufälö —a cuma.

San Juan 15

1Jesús a wə faö çoma. —Fayä ficali etäca jamö, camiyä too bei ya toto colo yai. Uba comi bä lalobä, too totobä lä dodijidablaö wei, öjö Fayä bei a.

2Ai ya totobä boco lä cui jamö, uba bä laloimi. Öjö totobä boco nia bloque joyamou. Ai ya totobä boco lä cui jamö, uba bä ma faö wei ma cui, totobä fa aublalönö totobä nia boco ola joyaö, uba bä bluca yai fabä.

3Cafä wamacö lä cui nija ya tä ʔ lä wäyänö wei tä ʔnö, wamacö aublamoia waiquilayoma, wamacö yai dodijabä.

- ⁴Camiyā nija bā yanöcöwä da cuicu —a cuma—, cafä wamacö nijamö ya lä culenaja showawä. Colo toto jamö to tobä boco shadiomi ja, uba bā çai nia faimi waiquiwä. ¿Öjö tawä? Inaja showawä, camiyä nija wamacö yanöcöwä cuomi ja, cafä wamacö nija dodijidawä tä nia wawäbloimi.
- ⁵Camiyä bei ya toto colo, ¿öjö tawä? Cafä wamacö lä cui, bei ya totocu boco. Camiyä nija bā lä yanöcöo wei bā lä cui, cama bā nija ya çai yanöcölanö, öjö bā nia dodijaö. Öjö bā lä cuinö, uba bā dodijidawä lalou lä culenaja, bluca tä nia dodijidawä wawämaö cuoje. Camiyä nija bā yanöcöomi ja, bā dobroimi malä waiquii.
- ⁶Camiyä nija bā yanöcöwä cuo lä mlai, to tobä boco fa manöblalönö, to tobä boco fäo lä culenaja bā nia taamamou. ¿Öjö tawä? Öjö dājä, to tobä boco fa dolalöjenö, cowa wacö jamö to tobä shäyäblaaöje, to tobä öshöbä.
- ⁷Camiyä nija wamacö yanöcöwä cuo ja, showadi wamale ą nofi çai jaducubou ja, camiyä nija wamacö nö bayeli nacao lä bädao wei tä ma cui ja, wamacö ą nia juamou —a cuma—.
- ⁸Wamacö showadi lä dodijaö wei tänö, camiyä nija wamacö lä nacao wei tä nia dablamou. Öjö dājä, Fayä a wäfa çai nia doblao tamou.
- ⁹Fayänö camiyä wale nofimaö lä culenaja, bamacö nofimaö cuwä mö feduwä. Bamacö lä nofimale tä ja bā da yanöcöicu.
- ¹⁰Wamale ą nofi cadidibou ja, bamacö lä nofimale tä ja wamacö nia yanöcöo. Fayä ya wä nofi cadidibolanö, camanö wale lä nofimale tä ja ya e yanöcöwä lä culenaja showawä.
- ¹¹Camiyä ya bufi doblalou lä culenaja wamacö cuo mö feduobä, bamacö yömölaö lä cule —a cuma—. Wamacö bufi shino yai doblalobä.
- ¹²Ya tä taamaö lä bufii wei, ei ya wä. Bā da nofimayo, öjö lä, camiyänö bamacö nofimaö lä culenaja showawä.
- ¹³Cama nofi ebä bayeliblabä a shämou lä läo wei a lä cui, öjö a yai nofi fe balojowä.
- ¹⁴Ya tä taamaö lä bufii wei wama tä taö ja, iba nofi lä wamacö.
- ¹⁵Bada a wä juamobä bā lä cui, a bayeliblabeje bā li tabou —a cuma—. Bada a lä cui, cama a nia yai lä cuaaö wei, öjö bā nija tä ąfa nia wäaimi. Bā ojudamou buobä cäbä. Öjö cudeenö, camiyä ya lä cuinö, “Ya wä juamobä cäbä”, bamacö nofi fei dājä tabou bäami. Ma, “Iba ya bā nofimaö lä dodijile cäbä”, bamacö nofi yai tabou majöa lä cule. Fayä nija ya tä ą bluca lä jilileno wei wama tä ą daö mö feduobä, ya tä ą bluca wäa malä waiquiqueno wei.
- ¹⁶Cafä wamacönö camiyä wamale yaianomi —a cuma—. Ma, camiyänö cafä bamacö yai yailema. Bamacö nia fa shömanö, bamacö cadidialalema, nii bā wawäblou lä culenaja, cafä wamacö ma cuinö, dodijidawä wama tä wawäblamaö cuobä. Wama tä dodijidawä lä wawäblamaö wei tä lä cui tä mladou mlai ja, tä

cudalodibä. Inaja wamacö cuaaö ja, camiyä ya wänö, Fayä nija wamacö nö bayeli nacao lä bädao wei tä ma cui ja, Fayänö wamacö nia dobäo.

¹⁷¿Öjö tawä? Bamacö yai taamaö lä bufii weinaja, ei ya wä waiquiwä, wamacö nofimayobä, öjö lä —Jesús a cuma.

¹⁸Abinaja Jesús a cuu çoma. —Yanowamö täbänö wamacö nofi wälibouje ja, bä bufi da jaduculu. Camiyä wale nofi wälibou balöoma cudeejenö, inaja showawä wamacö nofi wälibou cuo nomöjööje.

¹⁹Yanowamö täbä bufi lä cuaablalou weinaja wamacö bufi cuaaö mö feduo fa cunoja, wamacö nö shino nofimabö wejei. ¿Öjö tawä? Yanowamö ai täbä lä culenaja wamacö cuo ma balöono wei ma cui, iba wamacö cuo nomöjööbä, bamacö yailema. Öjö cudeenö wamacö nofi wälibouje.

²⁰'Cafä wamacö nija ya lä cuno wei, tä a nofi da jaduculeje. Bada a lä cui a nofi tabou mlaoje däjä, cama ebä nofi nia tabou ayaomije. ¿Öjö tawä? Camiyä wale nö bleaamaö waiquiaje ja, inaja showawä, cafä wamacö nö nia çai bleaamaö mö feduoje. Camiyä wale a nofi cadidibou waiquiaje ja, inaja showawä, cafä wamacö a nofi nia çai cadidibou cuo mö feduoje.

²¹Öjö ma cui, wale lä shömöleno wei a daimije yalo, iba wamacö cudeenö wamacö nia inaja taamaö dodijioje.

²²¿Öjö tawä? —a cuma—. Yanowamö ya bä nowa tabä ya waloo mlao fa cunoja, bä nö wäliwä jömamobö mlai. Öjö ma cui, fei däjä bä afa mojadi tamobä, tä yai cuami.

²³Wale nofi lä wälibou wejei bä lä cuinö, Fayä a ma cui a nofi çai wälibou mö feduoje.

²⁴Cama bä nijamö tä nö lä quilijii ya tä bluca wawämaö mlao fa cunoja, bä nö wäliwä jömamobö mlai. Öjö ma cui, ya lä cuaano wei tä ma dalaleno wejei ma cui, wale nofi wälibou fe yadioje. Fayä a ma cui, a nofi çai wälibou mö feduoje.

²⁵Moisesi tä a oni lä tabou wejei sibä jamö, tä a lä cuole tä a bejedi wawäblou bufio yalo bä li cuaaö. Abinaja tä a cuu. No mlai ja wale nofi wälibomaje. 'Einaja tä a cuu —Jesús a cuma—.

²⁶¿Öjö tawä? Öjö ma cui, Fayä nijamö Bayeliawä a lä culadi, cafä wamacö nija ya nia shömadayou, tä a bejedi lä wäyäo wei a lä cui. Fayä nija a culanö eja a waloo däjä, wale afa nia wäyäo.

²⁷Cafä wamacö ma cuinö wamale afa wäyäbä wamacö li. Ya bä jaba lä yömölano wei däjä, camiyä nija wamacö cudio fa showaonö, wamacö cua showaa malä cule.

San Juan 16

¹Abinaja Jesús a cuu çoma. —Ei ya tä a bluca lä wäyäle, wamale nofi lä mölabou wei, wama tä mladamaö mlaobä ya wä.

- ²Judio bänö wamacö nia joyaöje. Bä yododabä bä yafi jamö wamacö nia coyocomabou çödaaimije. Öjö bädao mlai, abinaja bä bufi çai nia cuu dicoo. “Ei bä lä cui ya bä shäö ja, jai Yai Bada ya yai bayelibläö ya nia cuaaö”, bä bufi nia cuu dicoo.
- ³Camiyã wale daimije yalo, Fayã a çai daimije cudeenö, bä nia inaja cuaaö.
- ⁴Bãmacö yömöläö balöa lä cule. Inaja cama bä yai cuaaö däjã, ya bä afa lä wäyãfe wama tä a nofi jaducubobã. Jaba däjã inaja bãmacö nowa taö showadaonomi. Bãmacö çai nia cudioma yalo, ya wã faö jaöonomi. Fei däjã, wawãdowã bãmacö nowa taö lä cule.
- ⁵Abinaja Jesús a cuma. —Öjö ma cui, wale lä shömöleno wei a lä cui nijamö, fei däjã ya nia çö ma cui, ya nia yai lä juu wei jamö wama tä wãliimi.
- ⁶Öjö tawã? Cafã wamacö nija ei ya tä a wäyãö yalo, wamacö bufi yai wãlidiwã jödödöwã.
- ⁷Wamacö bufi ma wãlidii ma cui, wamale a da jãlilã. Bejedi lä ya wã. Ya nia lä çö wei tä ja, wamacö nia yai bayeliblamou. Ya çö mlao fa cunoja, cafã wamacö nija Bayeliawã a nö waloobö ma mlai ma cui, ya çö däjã, cafã wamacö nija ya nia shömadayou.
- ⁸Öjö a yai waloyoluu däjã, yanowamö täbã bufi nia taamaö, tä lä wãlidii tä nö öjöböabeje. Tä lä dodijidai tä çai. Wãlidiwã talewã bä nia lä jömamou wei, tä nö çai öjöböabeje.
- ⁹Öjö tawã? —a cuma—. Camiyã wale a bejedi bufiimije yalo, Bayeliawãnö tä nö nia wãlidiwã öjöböamaö.
- ¹⁰Camiyã ya yai lä dodijaö wei tä ja, bä bufi nia çai jaducublamaö. Ya dodijama yalo, Fayã nijamö ya fa çö lunö, wamale nia dablaö çödaaimi.
- ¹¹Yai Bada tänö täbã nia lä jömaö wei tä ja, Bayeliawãnö täbã bufi nia çai jaducublamaö. Bitã jamö a yai lä nosiemou wei a fecula bada lä cui, öjö a jömöbou malã waiquile.
- ¹²Cafã wamacö nija ya tä a nia lä wäyãö wei, bluca ya tä a tabou ma showale, fei däjã wamale a nö yai jãliabimi —a cuma—.
- ¹³Yai Bada tä Bufi waloyoluu däjã, bejedi tä a jamö wamacö nia lulubou. Cama Bayeliawã a bufi lä cuu weinaja, a wã nia faö bãdaomi. Fayã nija tä a bluca lä jãliaö wei tä a nia yai wäyãö. Tä nia lä cublou wei, cafã wamacö nija tä a nia çai bluca wãwãmaö.
- ¹⁴Bayeliawã a lä cuinö, camiyã wale nia doblao dablamaö. Camiyã wale a fa jãlilãnö, cafã wamacö nija tä a nia malã wãwãmaö wei.
- ¹⁵Fayãnö tä a bluca lä table, iba tä a li waiquiwã yalo ya wã. Öjö cudeenö, “Camiyã ya wã fa jãlilãnö, cafã wamacö nija tä a nia wãwãmaö”, ya malã cufe.

- 16'Tä nö dedejeblou mlai ja, wamale nia möö mladou. Tä nö dedejeblou ço dǎjä, wamale nia shino dablǎo ço —a cuma.
- 17Cama ebä lä nocamabono wei ai ebä lä cui, abinaja bä nowa tayoma. —¿Wedinaja a bufi li fa cunö, einaja bǎmalecö nowa li taö cufe? Tä nö dedejeblou mlai ja, bǎma a nia jowa dablǎo mladou. Tä nö dedejeblou fa çolonö, bama a nia jowa shino dablǎo ço. “Fayä nijamö ya ço yalo”, a çai lä cufe, ¿wedinaja a bufi li fa cunö, bei a wǎ li? —bǎ nowa tayoma.
- 18Abinaja bä nowa çai tayoma. —¿Wedinaja a cuu bufio yalo, “Tä nö dedejeblou mlai ja”, a li cuu cufe? Bǎma a wǎ jiliblaimi waiquiwä —bǎ nowa tayoma.
- 19A wǎlii bufi lä doblaono wejei Jesúsno tä daö waiquioma yalo, abinaja bä nowa tama. —Bǎmacö nowa lä tafe tä ǎ ja, ¿wamacö wǎliyo da culanö? Abinaja ya cuma. Tä nö dedejeblou mlai ja, wamale nia dablǎo mladou. Tä nö dedejeblou ço dǎjä, wamale nia shino dablǎo ço. ¿Öjö tawä?
- 20Cafä wamacö nija ei ya wǎ lä cui, bejedi lä ya wǎ. Wamacö bufi nia joliblou. Cafä wamacö lä cui, wamacö nia yai ma öcöö wei ma cui, yanowamö täbǎ bufi nia bluca doblalou. ¿Öjö tawä? Wamacö bufi ma joliblaliyo wei ma cui, wamacö bufi nia dodijidablou ço.
- 21'¿Öjö tawä? —a cuma—. Suwä a lä cuinö ijilu a ninibou dǎjä, a nö bleaaö. Bä ijilubö e tablabä etǎ cublou waiquia cudeenö, a nö yai bleaaö. Öjö ma cui, bä ijilubö e fa tablalönö, a nö lä bleaano wei tä ja, a nofi jolio majöomi. Bä ijilubö dude e wai tabou yalo, a bufi doblalou majöquei.
- 22Inaja showawä, fei dǎjä wamacö bufi nia ma cublou wei ma cui, bǎmacö wǎyacu möyou ço yalo, wamacö bufi nia shino doblalou ço. Öjö lä dǎjä, wamacö taamaö ma bǎlajei ma cui, wamacö bufi nia doblalou fe yadio.
- 23'Öjö dǎjä camiyä nija wamacö nia nacoimi —a cuma—. Cafä wamacö nija ei ya wǎ lä cui, bejedi lä ya wǎ. Inaja tä cublou dǎjä, Fayä nija, camiyä ya wǎnö wamacö nö bayeli nacao lä bǎdao wei tä ma cui ja, wamacö nia dobāmou.
- 24Fayä nija, camiyä ya wǎnö wamacö nö bayeli nacaomi showawä. Bä da naco. Wamacö nö bayeli fa nacaonö, wamacö nia dobäö, wamacö bufi yai doblalou fe balojoobä —a cuma.
- 25Abinaja Jesús a cuma. —Cafä wamacö nija ya tä ǎ wǎyöö dǎjä, ya wǎ faö yaclāmou talei. Öjö ma cui, ya wǎ faö yaclāmou mlai ja, wawädowä ya wǎ nia lä faö wei tä cublou ajedewä waiquiwä. Fayä ya wǎfa nia wawädowä wäaö.
- 26Fayä ya wǎfa wawädowä wäaö dǎjä, camiyä ya wǎnö wamacö nö nia bayeli nacao. Öjö dǎjä, camiyänö Fayä nija bǎmacö nia bayelimaimi. Ma, inaja tä nia cuomi.
- 27Cama Fayä a showawä lä cuinö wamacö malä nofimaö wei. Camiyä wamale nofimaö yalo, Fayänö wamacö nofimaö. Fayä nijamö ya cuoma ya lä waloqueyoluno wei wama tä ǎ bejedi bufii yalo, wamacö nofimaö.

²⁸Fayä nijamö ya culanö, bita jamö ya waloqueyoluma. Fei däjä ei bita ya tabi fa feicönö, Fayä nijamö ya nia çojamöö —a cuma.

²⁹Jesúsnö bä lä nocamabono wei, abinaja bä cuma. —Jao. Fei däjä wa wə faö yacläablalou mlai ja, wawadowä wa wə faö.

³⁰Cafänö jödödöwä wa tä daö nö mlawä. Fei däjä, öjö yama tä daö. Wa wəlii showao ma mlajei ma cui, cama bä bufi lä cuu wei, wa tä daö waiquiwä. Öjö lä tänö yamacö bufi yai taamamou lä cule. Yai Bada nijamö wa cuoma wa lä waloqueyoluno wei tä lä cui, öjö yama tä ʔ bejedi yai bufii lä cule —bä cuma.

³¹—¿Öjö tawä? —Jesús a cuma—. ¿Wamale ʔ bejedi bufii dodijia culawä, öjö lä?

³²Wamale nia lä daaö wei tä nia cublou. Tä cublou waiquia lä cule. Wamacö nia sheleleblamodayou. Cafä wamacö yafibö jamö wamacö nia çooblou. Öjö ma cui, ya yamimi. Fayänö wale çai cua lä cule.

³³Camiyä nija wamacö culanö, wamacö bufi yanöcöo fe yadiobä ya wə. Bita jamö wamacö cua showalanö, wamacö nö nia ma bleaamaö wejei ma cui, bä bufi nö da wəlojoicu. Bita jamö a lä nosiemou wei a nija ya nö wəloblou waiquilayoma —a cuma.

San Juan 17

¹Inaja Jesús a fa culunö, fedu jamö a mö fa nonoicunö a wə fama. —Fabe, Fabemi. Wale taamaö lä bufio wei, fei däjä tä cublou waiquia lä cule. Ijilufä wale doblao da damalalö, cafä bäfä çai doblao dablamaö mö feduo showadaobä.

²Jödödöwä ya täbä juwäbobä, Bada wale malä tablamaleno wei, camiyä nija wa bä bluca lä jöböbeno wei, bəlimi ya bä tablamabä.

³Cafä Yai Bada wa bejedi cua lä ayale wa daöje ja, camiyä Jesucristo wale lä shömöleno wei wale çai daö mö feduoje ja, öjö tänö bä nia bəlimi cuo.

⁴Bitä jamö ya cua showalanö, camiyä nija wa tä tamaö lä bufino wei, ya tä jödödöblalema. Inaja ya lä cuaano wei tänö, cafä bäfä doblao damalalema.

⁵Fabe. Cafä wa lä cule jamö camiyä wale doblao da damalalö. Bitä wa tablaö showao mlao däjä, cafä sho bäfäcö doblao lä cuono weinaja showawä.

⁶Fabe —a cuma—. Ei bita jamö afä wa bä lä tabono wei, camiyä nija wa bä jöböbema. Wa bä lä jöböbeno wei bä nija, cafä bäfä damalalema. Wa wə nofi cadidibouje.

⁷Cafänö wale lä dobäo wei tä lä cui, fei däjä tä daöje. Cafä nija showadi ya dobämou.

⁸Cama bä nija, cafä bäfä ʔno malä wäyāno wei. Wa wəno jīliamaje. Cafä nijamö ya cuoma ya lä waloqueyoluno wei tä lä cui, öjö tä bejedi çai daöje. Cafänö wale lä shömöleno wei tä ma cui, öjö tä ʔ çai bejedi bufiije.

- 9'Öjö ya bä nö bayeli nacaö lä cule —a cuma—. Yanowamö ya täbä nö bayeli nacaö ma mlai ma cui, cafänö wa bä lä jöböbeno wei, öjö ya bä shino yai bayelimaö. Afä bä malä cui.
- 10Iba bä bluca lä cule, afä bä li. Inaja showawä, cafänö wa bä nofi lä ibabole, iba bä çai waiquiwä. Öjö bänö wale doblao dablamaöje.
- 11Fei däjä, ei bita a lä cui ya nia daaö. Iba bä cuo juo däjä, cafä nijamö ya nia ço. 'Fabe. Cafä yami wa yaia —a cuma—. Cafä sho bäfäcö moli lä culenaja bä molio mö feduobä, bä da nowama. Cafä wa lojodenö wa bä nowamabä, camiyä nija wa lojode lä wäyämono wei tä showawä lä cuinö.
- 12Öjö ya bä çai cuo showao däjä, camiyä nija wa lojode lä wäyämono wei tä showawänö, ya bä nowamadima. Ya bä noshi umaboma. Dodijidawä bä cua lä cule. A nomabä, moli a cuo lä showadaono wei a lä cui, öjö a shino wälidiblaliyoma. Cafä wa wano oni jamö, tä a lä cuu weinaja tä bejedi wawäblou bufioma yalo, öjö tä li cublaliyoma.
- 13'Öjö ma cui, fei däjä cafä nija ya ço —Jesús a cuma—. Camiyä ya bufi doblalou lä culenaja, bä bufi doblalou cuo mö feduobä, eja ya cuo showao däjä ya tä a bluca wäyöö.
- 14Iba bä nija bäfä ano wäyöö ja, bä shomiblaliyoma. Yanowamö täbänö bä nofi wälibouje, cama bämi cudeenö. Camiyä ya shomi lä culenaja, iba bä cuwä mö feduwä yalo, bä nofi li wälibouje.
- 15'Bitä jamö iba bä lä cublai wa bä çoaö showadaobä ya nacoimi —a cuma—. Ma. Fecula bada a yai lä wälidii a lä cui nija wa bä noshi yai umabobä ya wä.
- 16Yanowamö täbänö bä nofi taboimije. Cama ebämi. Bä li shomi, camiyä ya shomi lä culenaja showawä.
- 17Afä dodijidawä bä cuobä, bejedi tä ano bä da yaimacö. Cafä wa wä lä cui, öjö bejedi lä tä a waiquiwä.
- 18Yanowamö täbä nijamö camiyä wale lä shömöleno weinaja, cama bä ma cui, ya bä çai shömöa mö fedulema.
- 19Iba ya bä bayeliblabä, cafä nija ya jöböamou. Afä bejedi tä a fa jililäjenö, afä bä dodijidawä yaiobä.
- 20'Fei iba bä waiquiwä lä cui, ya bä nö bayeli nacaö ayaomi —a cuma—. Cama bä ano wale a nia bejedi lä bufiaö wejei, öjö ya bä nö çai bayeli nacaö.
- 21Jai moli bä bluca cublobä ya wä. Fabe. Camiyä nija cafä wa lä culenaja, cafä nija camiyä ya cua mö lä fedulenaja, inaja showawä camiyä bäfäcö nija öjö bä cuo mö feduobä. Öjö bämacö bluca cublobä. Inaja lä bämacö lä cuaaö wei tänö, yanowamö täbä bufi jaducublobä ya wä. Cafänö wale lä shömöleno wei tä lä cui, tä a bejedi bufiabeje.

²²Cafänö wale lä doblaamaö weinaja, camiyänö iba ya bä çai doblao taamaö mö feduoma, cafä sho bäfäcö moli lä culenaja, öjö bä moli cublou mö feduobä.

²³Cama bä nija ya culanö, camiyä nija cafä wa çai cuobä. Öjö däjä, cama bä ma cui, moli dodijiwä bä çai cuo mö feduo showaobä. Yanowamö täbä bufi jaducublobä. Cafänö eja camiyä wale lä shömöleno wei wale dabeje. Cafänö camiyä wale lä nofinalenaja, iba wa bä nofimaö mö lä feduo wei tä lä cui, öjö tä çai dabeje.

²⁴Fabe —a cuma—. Camiyä ya cuobä jamö, iba wa bä lä jöböbeno wei bä çai cuo mö feduobä ya nacou, wale doblao dabladayobeje. Cafänö wale nofimama yalo, ei bita a colo cua showaa mlai ja, wale doblamaboutä lä showaono wei, wale dablabeje.

²⁵Fabe, cafä wa lä cadidou wei wa. Yanowamö täbänö wa daö ma mlajei ma cui, camiyänö bäfä daö. Iba bä lä cuinö, eja wale lä shömöleno wei, wale çai daöje.

²⁶Fei bä nija cafä bäfä damalalema. Inaja showawä, bäfä nia dablamaö cuo showao, cafänö wale lä nofimaö weinaja, yanowamö täbä nofimaö cuo mö feduobeje. Cama bä nija ya yai cuobä —a cuma.

San Juan 18

¹Einaja Jesús a fa culunö, cama ebä lä nocamabono wei ebä çai falayoma. Sedono u jamö bä çai fa bucaduicufälönö, öjamö lä ficali täca lä blaono wei jamö, bä çai wawäblaliyoma.

²Jesúsno bä lä nocamabono wei, öjamö lä bä çai juu yaimoma yalo, Judanö täca çai daö waiquioma, a nia lä nomojoliano wei a lä cuinö.

³Judanö täca dama cudeenö, Jesús a nabä jubeje bä fa nacalänö, bä çai ayofälöma. Lomateli ai bä sodado coyocomoma. Yai Bada etä yafi jamö bä lä läono wei ai bä çai. ¿Öjö tawä? Nofi bäyäälewä blowäjawä bänö bä shömölemaje, faliseo bä bada çainö. Cowa wacöbä shi çai cuobä täbä dääquemaje. Wacöbä çai jibomaje. Bä ishobä täbä çai showaboutä showadaomaje.

⁴Öjö däjä, a nia lä taamano wejei tä daö waiquilanö, Jesús a wawäblaliyoma. Bä mö fa bamalänö, abinaja bä nowa tama. —¿Wedi jamö a lä cui, bei wama a nabä li juu cuimi?—bä nowa tama.

⁵—Nasaleтели a wäfa Jesús lä cule —bä cuma. —Camiyä öjö lä ya —Jesús a cuu showadaoma. Öjö bä nija Juda a ublao coyocooma, a lä nomojoliano wei a lä cui.

⁶Jesús a lä cui, “Camiyä öjö lä ya”, a cuu ja, a nabä lä juno wejei bä lä cui, bä quilili wäcäcäolaliyoma.

⁷Öjö däjä, Jesús a wä faö çoma. —¿Wedi jamö a lä cui, wama a li dayäaö? —a cuu çoma. —Nasaleтели a wäfa Jesús lä cule —bä cuu çoma.

⁸Jesús abinaja a cuu mö feduoma. —Camiyä öjö lä ya. Ya cuu malä waiquiofe. Camiyä wamale nabä yai juu yalo, ei bä lä cui bä juwäma dijejä —a cuma.

⁹A cuu lä balöono wei tä ʔ bejedi wawäblobä, a wʔ li cuoma. Abinaja bä Fjö e nija a lä cuno wei. “Wa bä lä jöböbeno wei bä lä cui, moli ma cui ya wʔlidiblamanomi”, a lä cuno wei.

¹⁰Öjö dǎjä, Simón Pedro a lä cuinö, sibala a fa ucädalänö, a ishoa mö balayoma. Nofi bäyäälewä bada a wʔ juamobä e nabä fa queicunö, jayu boco mashi lä cui jamö e yömöca baquequeblalema. Öjö a nabä lä queono wei a lä cui, Maco a wʔafa cuoma.

¹¹Pedro nija abinaja Jesús a cuu showadaoma, —Sibalafä a taa da çöcu. Ya nö yai bleaabä, Yai Bada tänö tä däamaö lä ojode wei tä ja, ya noshi umlaobä ya malä mlai —a cuma.

¹²Öjö cudeenö, a nabä lä junö wejei bä lä cuinö, Jesús a juwäa showadalemaje. Sodado bä çai lä cuono wei a bada ma cuinö, cama ebä ma cuinö, judio bä bada ma cuinö, Jesús a juwäa fa showadalöjenö, a bococu ʔcablalemaje.

¹³Öjö dǎjä, Anasi a bada nija a öböa balöquemaje. Nofi bäyäälewä, öjö dǎjä a bada lä cuono wei a Caifasi lä cui nija a fecamamoma.

¹⁴¿Öjö tawä? Judio bä lä yömölano wei, öjö Caifasi a li cuoma. Judio bä bluca waicaö mlaobeje, moli a shämou ja tä ʔafa dodijidawä lä tano wei a lä cui.

¹⁵Simón Pedro a lä cui, Jesús nija a jäwäjäwä yauaö jäafälöma. Jesús nija ai a nocao mö lä feduono wei a sho. Öjö ai a lä cui, nofi bäyäälewä a badanö a dama yalo, a jamabonomije. Öjö bada e yafi jefa jamö a faa cadidilayoma, Jesús a lä öbölefälöno wejei jamö.

¹⁶Öjö a ma fafälöö dǎjä ma cui, bei yoca sibo jamö Pedro a ublao siboo juoma. Öjö cudeenö, Jesús nija ai a nocao mö lä feduono wei a lä cui, nofi bäyäälewä bada anö a lä dano wei a lä cui, öjö a siboa çolayoma. Yoca lä jolemabou wei a suwä nija a wʔ fa fanö, Pedro a famalema.

¹⁷Öjö dǎjä, yoca lä jolemabou a suwä lä cui, Pedro nija abinaja a cuma. —Öjö Jesúsno bä lä nocamabono wei, çafä ai wa e nofima. ¿Öjö tawä? —Ma, öjö yami — Pedro a cuma.

¹⁸Tä si ajioma yalo, bada a wʔ juamobä ebä lä cuinö, öjamö bä lä läono wei bä çai badanö, acanafu bä wacö fa jolacöjenö, bä bomou çai ublajaoma. Öjö bä ublajaobä jamö, Pedro a çai bomobä a coyocooma.

¹⁹Öjö dǎjä, nofi bäyäälewä a bada lä cuinö, Jesúsno bä lä nocamabono wei bä wʔlima, tä ʔ lä wäyänö wei etä ʔ çai.

²⁰Jesús abinaja e cuu mö feduoma. —Yanowamö täbä nijamö, wawädowä ya wʔ shino faö talei. Judio bamacö yododabä yafi bä jamö ya tä ʔ shino wäyää, Yai Bada etä yafi jamö çai, judio bä bluca lä yododadii wei jamö. Moli ma cui, ya tä ʔ wäaö jatoonomi.

²¹Wale ʔ lä jilileno wejei bä lä cui nija wale ʔ yai da wʔli, camiyä nija mlai. Ya bä nowa lä tano wei tä lä cui, cama bänö tä daöje —a cuma.

- 22**Inaja Jesús a cuu dāja, öjamö bä lä läono wei ai a bada ublao lä ajedeono wei a lä cuinö, bei imicönö a si baiblalema. Abinaja e cuma. —Nofi bãyälewä bada a ma cui nija, ¿inaja bei wa e nia li cuu?
- 23**Abinaja Jesús e cuma. —Ya wə faö wəlidiwä ja lä, tä lä wəlidii tä da jömöba. Öjö ma cui, ya wə cadidiwä waiquiwä ja, wale si baiblaö buobä tä cuami —e cuma.
- 24**Öjö dāja, nofi bãyälewä a bada Caifasi lä cui nijamö, Anasinö a bococu ocama shömöa nomöjölema.
- 25**Simón Pedro a bomou çai ublao dāja, a wəlii çomaje. —Öjö Jesúsnö bä lä nocamabono wei, çafä ai wa e nofima. ¿Öjö tawä? —a cuma. A wə jole mojudumou ço ja, abinaja a cuma. —Ma. Öjö ya e mlaicätä —a cuma.
- 26**Nofi bãyälewä a wə bada juamobä ai e lä cui e a fama, Pedronö yömöca lä baquequeblaleno wei e mashi lä cui. —Çafä wa lä cui, ¿Jesús sho ficali ca jamö bäfäcö dablanomi daanö?
- 27**Öjö dāja, Pedro a wə mojudumou fa çonö, yedu cadala a wə nocablaliyoma.
- 28**Öjö dāja, Caifasi e yafi jamö Jesús a çai faa fa çölöfälöjenö, Lomateli bada e yafi jamö a öböa fenalefälömaje. Öjö ma cui, Lomateli bä shomi yalo, judio bänö bä nofi fa shamibojenö, ueshi jamö a çai fanomije. Yai Bada a waiteli lä jayuanu wei a nofi çocamoao çobä jamö, bä iyaö bufi doblaoma cudeenö, bä shamiaö bufionomi.
- 29**Öjö cudeenö, cama bä nija Bilado a fa sibolunö, abinaja a cuma. —Ei a lä cui, ¿wedinaja a fa cuanö, bei wama a wəfa li dobroimi taö? —a cuma.
- 30**Abinaja bä cuma. —Wəlidiwä talewä ei a cuo mlao fa cunoja, çafä nija yama a nö jöböabö mlai.
- 31**—A çai juu da çolufälöje —Lomateli a bada Bilado cuma—. Wama bä dobroimi jömabä, afä Moisesi wama etä a malä tabole. Abinaja judio bä cuma. —Yama a nia shäö lä showadao wei tä cuami. Tä a läa. Lomateli wamacönö yamalecö malä wasöbole —bä cuma.
- 32**¿Öjö tawä? Jesús a befi çai nia lä itamano wejei, cama a wəfa wäyämamou balöoma. Öjö a wə bejedi wawəblou bufio yalo, Lomateli a bada nija Jesús a jöböao ojodaomaje.
- 33**Cama etä yafi jamö Bilado a faa fa çolunö, Jesús a nacamaö bufima. Abinaja e cuma. —Çafä ¿judio bada bei wa? —a cuma.
- 34**Abinaja Jesús e cuma. —Judio wale bada lä wəlife, çafä wa bufi wedinajamou ja, ¿bei wa wə çuo da cufanö? Ma, wale a jilibou bäa ja, ¿bei wale wəlii cufe? —e cuma.
- 35**Bilado abinaja e cuma. —¿Camiyā judio ya daanö, ya bufi wedinajamobä? Çafä bäfä dobroimi jömabä, afä bä judio showawä ma cuinö wa balaqueyolumaje. Nofi bãyälewä bä blowäjäwä ma cuinö. ¿Wedinaja wa cuao dicooma? —e cuma.

³⁶Abinaja Jesús e cuma. —Bita jamö ya bada läobä yami. Yanowamö täbä nija ya bada läobä ya cuo fa cunoja, wale a lä juaö wejei bä lä cui bä nö ishobö wei, judio bä nija ya jöböamou mlaobä. Ma, bita jamö bä bada lä nosiemou weinaja, ya bada cuobä yami —e cuma.

³⁷—Öjö waiquiwä —Bilado e cuma—. Bada wa wafa jilou malä waiquiofe. —Cafänö wale afa shino bada jilaö lä cufe —Jesús e cuma—. Bejedi ya tä a wawämabä ya oshe tablamolayoma. Inaja ya cuaabä ya bita jamö waloqueyoluma. Bejedi tä a nofi lä yaibou wejei bä blucanö, wale a jiliaöje —e cuma.

³⁸—¿Wedi bei tä a li bejedi? —Bilado e cuma. Inaja a fa culunö, judio bä nija a faa çolayoma. Abinaja bä nowa tama. —Jesús a doblou lä mlai ya etä daimi.

³⁹Öjö ma cui, abinaja wamacö showadi cuaaö. Yai Bada a waiteli lä jayvano wei wama a nofi çocamoä ço däjä, afä ya fe lä lamabou wei moli wama a famaö bufio talei. ¿Öjö tawä? Fei däjä, judio wamacö nija a bada cuobä a lä cui, ¿öjö bei wama a jujeblamaö bufii cule?—bä nowa tama.

⁴⁰İcali bä a faö çoma. —¿Miji mlai! ¿Balabasi a yai shino da cushäblalö! ¿Öjö tawä? Öjö Balabasi a lä cui, shomi bä madofibö lä lämadii wejei, öjö a li cuoma.

San Juan 19

¹Öjö däjä, cama ebä nija, Biladonö Jesús a öböamaö bufima, a si yafelimabeje.

²¿Öjö tawä? Sodado bänö too totocö çai mösöcöbö fa motoleblalöjenö, Jesús nija totocö yojoquemaje, bada bänö olo bä showadi yojobou lä cuaaö wejeinaja showawä. Ushi wacäjäwä cäcö labe ja, a jole jole çai lucäa mö fedumalemaje.

³Cama nija bä fa icublaanö, abinaja a nowa jole tamaje. —¿Bada tä! Judio bä nija wa bada lä läle, ¿dodijidawä wa bälödiobä! —a nowa jole tamaje. Inaja a nowa talajenö, bei bä imicönö, a si bluca baidamaje.

⁴Bilado a siboa fa çolunö, abinaja judio bä nowa tama. —Bei. Cafä wamacö nija ya nia bälamaö ço, ya etä wälidiwä dablaö lä mlai tä ja, wamacö bufi jaducublobä —bä nowa tama.

⁵Öjö däjä, mösöcö totocö yojobou showale, Jesús a çai falayomaje. Ushi wacäjäwä cäcö çai labe lucäbou showaoma. Biladonö a jömalanö, abinaja judio bä nija a cuma. —Bei. Fei a waiquiwä. A da dalalöje —a cuma.

⁶Nofi bäyäälewä blowäjäwä bä lä cuinö, ai bä çai bada lä cuinö, Jesús a fa dalalöjenö bä a shi doa dicolayoma. —¿Fii balitama defi jamö a shino da basumacö! ¿A da basumacö! —¿Uo! —Bilado a cudaliyoma—. Cafä wamacö showawänö a da basucuduje, öjö lä. A doblou lä mlai, camiyänö ya etä dablano malä mlai —a cuma.

⁷Judio bä a juo ja, abinaja Bilado a nowa tamaje. —Camiyä yamacönö, Moisesi yama etä a tabou. Yama tä a daö. Miji a lä cui, Yai Bada bei tä afa İjilübö jilou yalo, a nomabä a waiquiwä—a nowa tamaje.

⁸Yai Bada bei tä ʔfa Ijilubö lä jilou wei, Biladonö tä ʔ fa jililänö, a yai quilia fe balojolaliyoma.

⁹Cama etä yafi jamö a lucäa fa çolunö, Jesús a wʔlii çoma. —Cafä ʔwediteli wa dodijiwä? —e cuma ma cui, Jesús e ʔ juonomi.

¹⁰E ʔ juonomi yalo, abinaja e cuu nomöjööma. —Camiyä nija ʔbei wa wʔ juo mlaquei? Camiyä ya wʔnö wa nia lä cushäblamou wei ya. Camiyä ya wʔ showawänö, fii balitama defi jamö wa nia lä basuo wei ya —e cuma.

¹¹Jesús abinaja e cuma. —Camiyä wale nia lä taamaö wejei tä ja, wa lä läle wa lä cui, Yai Bada tänö wa lämabou mlao fa cunoja, wa nö läobö mlai. ʔÖjö tawä? Cafänö wale shämaö ja, cafä nija tä nowa nia ma shadio wei ma cui, cafä nija wale lä jöböano wei a lä cui, öjö etä nowa nia shino yai cuo —a cuma.

¹²Öjö a wʔ fa jililänö, Biladonö a cushäblabä a wʔ ma lojodoano wei ma cui, judio bä ʔ nö wʔyäama. —Miji a lä cui wa cushäblamaö dicoo ja, Lomateli bada tä Sesa lä cui, wa nofimaimi waiquiwä. Bä ʔfa bada lä jilou wei bänö, Sesa a nofi malä wʔlibou wejei —bä cuma.

¹³Öjö bä ʔ fa jililänö, Jesús a wawäa çomalema. Wʔlidiwä talewä bä jömabeje, bada bä döcäobä täcö jamö Bilado a döcäquema. A lä döcäqueno wei tä ulifi lä cui, Maa mabä wei, tä ʔfa ulifi jilabouje. Ebleo bä caficö ʔ ja, Cabada tä ʔfa ulufi jilaö mö feduoje.

¹⁴Öjö tä fena ja, Yai Bada a waiteli lä jayuano wei a nofi nia yai çocamoao çomaje. ʔÖjö tawä? Motoca a yölolodayoma. Judio bä nija abinaja Bilado a cuma. —Cafä wamacö nija a bada läobä, fei a waiquiwä. ʔA da möje!

¹⁵Bä ʔ ʔcali faö ja, abinaja bä cuma. —ʔA befi çai da ʔtamacö! ʔA befi çai da ʔtamacö! ʔFii balitama defi jamö a da basumacö! Bilado abinaja a cuma. —Cafä wamacö nija a bada läobä a lä cui, ʔfii balitama defi jamö, ya basuamabä a daanö? Nofi báyäalewä blowäjäwä bä lä cui, bä ʔ juoma. —Yama a nofi badabobä, Lomateli bada Sesa a lä cui, öjö a waiquiwä —bä cuma.

¹⁶Öjö däjä, fii balitama defi jamö a basuamabeje, öjö bä nija Biladonö a noshi öjödadalesa.

¹⁷Öjö cudeenö, Jesús a çai fa alujenö, a juma. A nia lä basuano wejei defi lä cui, camanö defi yalucua showalefälöma. Fəlosi blaobä tä ʔfa ulifi lä cule jamö a çai jumaje, ebleo bä caficö ʔ ja, Cocoda a wʔfa lä jilabou wejei jamö.

¹⁸Öjamö lä, fii defi jamö a basuquemaje. Jesús a basua fa möamobalöjenö, ai cäcöbö çai basua lūlocua mö feduquemaje. Acasi boco mashi jamö ai a, jayu boco mashi jamö ai a, cäcöbö basua taaquemaje.

¹⁹Jesús a lä basuono wei defi jamö etä ʔ oni shadiobä, Biladonö etä ʔ oniblamalema. Abinaja etä ʔ cuma. “Judio bä nija a bada cuobä, ei Nasaleteli Jesús a”, etä ʔ cuma.

20Shabono ajede jamö Jesús a basuquemaje yalo, judio bluca bänö tä ʘ doblaö jayuamaje. Judio bä caficö ʘ ja tä ʘ oni cuoma. Lomateli bä caficö ʘ çai ja. Clesiateli bä caficö ʘ çai ja.

21Judio bä nofi lä báyäbou wejei bä blowäjäwä lä cuinö, öjö tä ʘ oni fa möjenö, abinaja Bilado nija bä cuma. —“Judio bä nija a bada cuobä a”, tä ʘ oni nofi cuu lä dicoo wei. Inaja mlai. Abinaja tä ʘ oni yai cubä. “Judio bä nija a bada cuobä a wafa lä jilou wei a”, tä ʘ yai oni cubä —bä cuma.

22Bilado abinaja a cuma. —Ya tä ʘ lä oniblamalöfe, öjö waiquiwä —a cuma.

23Sodado bänö Jesús a fa basucöjenö, a lä didiono wei ebä camishi däalalemaje. Cama sodado 4 bänö bä nia fa tabojenö, bä shelelealalemaje. Labe ecö çai. Öjö ma cui, labe ecö lä cui, comadiwä cäcö diyäblamoä lä showadalayono wei cäcö cuoma.

24Öjö cudeenö, abinaja bä nowa sodado tayoma. —Bäma cäcö cacaö mlai ja, jömamodima a ja bamacö shino da wabäo, cäcö nia lä tabou wei a jömamobä —bä cuma. ¿Öjö tawä? Yai Bada etä ʘ oni lä cule tä ʘ bejedi cublobä etä cuoma. Abinaja tä ʘ cuu. Ya lä didio wei cäcö shedequeblaleije. Ecö nia lä däablaö wejei bä nia fa jömonö, madofi a ja, bä wabäo balöo. Einaja tä ʘ cuu.

25Inaja bä sodado cuaaö showao däjä, Jesús a lä basuono wei defi cotä jamö, bei bä nöö e ublaoma. Bä nöö ai e çai. Cleofa bä suwäbö María a wafa lä cule a çai. Madalatelyoma a wafa María lä cule a çai.

26Jesúsno bä nöö e dalalema. A lä nocamabono wei ai e lä cui, e çai ublao ajedeoma, a yai lä nofimano wei e lä cui. Cäcöbö fa dalalönö, abinaja bä nöö e nija a cuu balöoma. —Nabe, nabemi. Ijilufä wa nofi nö lä tabobö weinaja, miji wa nofi nia tabou —a cuma.

27Öjö däjä, a lä nocamabono wei a lä cui nija abinaja a cuu nomöjöoma. —Bei. Naafä wa nofi nö lä tabobö weinaja, inaja showawä nayä wa nofi nia çai tabou juo —a cuma. Inaja cäcöbö nowa fa talönö, a lä nocaono wei e lä cuinö, cama e yafi jamö a bälöobä, a nofi taa showadaalema.

28Öjö däjä, tä bluca lä jödödöblaliyono wei tä fa dalalönö, a wä Jesús fama. Yai Bada etä ʘ oni jamö tä ʘ lä cuu weinaja tä ʘ bejedi cublobä, abinaja a cuma. —Ya amishi —a cuma.

29Öjamö lä showawä, nashiwä toubä befi çai itaoma. Inaja a cuu ja, öjö toubä ja tä madofi wai fa çadalöjenö, fii fi ja tä fa jibajenö, Jesús caficö ja toubä befi çai dodobou ajedeojolayomaje.

30Nashiwä toubä fa uyucanö, a wä Jesús fama. —Tä jödödöblou waiquilayou lä cufe —a cudaliyoma. Öjö däjä, a fe fa leidalunö, a möshöa jawäa fa showadaicunö, a nomalayoma.

31Öjö tä fena ja, Yai Bada a waiteli lä jayuno wei a nofi nia yai çocamoäo çomaje. Täbä yanöcöobä tä mö nia çai jalu sábado cuo showaoma yalo, tä nofi tabou bolacaomaje. ¿Öjö tawä? Täbä yanöcöobä tä mö jalu ja, bä nomawä basudio showao

dicoo mlaobä, Bilado nija judio bä ʼa fama. Fii defi jamö bä lä basuo wei bä lä cui, bä ucu yafequiblamaö bufimaje, bä nomaö showadaobä. Täbä yanöcöobä tä mö jalu sábado cublou showao mlaodäjä, bä nomawä nia itomaö showadaomaje.

³²Öjö cudeenö, sodado bä fa icuicunö, Jesús nija cäcöbö basua lä luöcuono wei, cäcöbö ucu yafequia balölälemaje.

³³Öjö ma cui, Jesús nija bä icua fa nomöjöicunö, a nomawä waiquiwä fa dalalöjenö ucu yafequiblanomije.

³⁴Öjö ma cui, sodado ai a lä cuinö, boo shi bada namonö, Jesús leboco diquibalejelayoma. Leboco fa diquibalujulunö, iyäbö falayoma, mau ubä çai.

³⁵Öjö tawä? Camiyänö ya tä daa fa cadidilälönö ya tä ʼa wäyää lä cule, çafä wamacö ma cuinö, wama tä ʼa çai bejedi bufii mö feduobä. Ya bejedimou. Yale ʼa nofi mölabobä ya wä.

³⁶Öjö tä lä cublaliyono wei tä lä cui, Yai Bada etä ʼa oni lä cuu weinaja tä ʼa bejedi wawäblobä tä li cublaliyoma. Abinaja tä ʼa cuu. Moli ma cui, u nia cäblamoimi. Einaja tä ʼa cuu.

³⁷Öjö tawä? Abinaja ai tä ʼa çai cuu mö fedua. A lä diquiano wejei a lä cui nija bä mamö nia showao. Einaja tä ʼa cuu.

³⁸Öjö tä cublou fa waiquilonö, Alimadeateli a wäfa José lä culenö Bilado a wälima, Jesús a nomawä çobä. Öjö José a lä cui, Jesús nija a nocaobä a ma cuono wei ma cui, judio bä nija a quili ja, a wä wawäanomi. Biladonö a wä fa jililänö, a çamaö bufima. Öjö däjä, a aa fa showadaalufälönö, a çolejelayoma.

³⁹Nicodemo a çai juma, didi däjä Jesús nija a jaba icua fe lä jaluqueno wei a lä cui. Nö çledeli täbä bluca fa çocablälönö, täbä besi çai jude waloquema.

⁴⁰Bei. Jesús a nomawä fa çöbölönö, camishi acadafu au bä jamö, täbä nö lä çledeli wei täbä jädamaböö cuaama, a nomawä yaicoloblaböö nomöjöobä. Täbä nomawä lä maqueblaaö wejei jamö, inaja judio bä showadi cuaama.

⁴¹Fii balitama defi ja, Jesús a lä basuqueno wejei jamö, ficali täca ajedeo blaoma. Öjamö lä, nomawä bä maqueblaabeje maca lä tablaleno wejei maca dude cuoma, bä nomawä maquebou balöno lä mlajei maca.

⁴²Öjö tawä? Täbä yanöcöobä tä mö jalu nia cublou lä fenao wei tä weyade cuo waiquioma cudeenö, bä shi jalimoma, tä nia lä tamou wei tä taö showadaobeje. Öjö maca ajedeo waiquioma cudeenö, öjamö Jesús a nomawä maqueböquema.

San Juan 20

¹Domingo tä mö jalu lä cublale däjä, Madalateliyoma María a lä cui, a jocäblou fa fenablalonö, maa maca jamö a aa fenalayofälöma, motoca a jaba juimaö däjä. Bei täca jamö, maa ma bada lä läono wei, shomi jamö ma bada casöa dalalema.

²Öjö tä fa dalalönö, tä ʔ wäyäbä a läläa çolayoma. Simón Pedro a yömölajaloma, Jesúsno bä lä nocamabono wei, ai a mö feduwä lä cui a çai, a yai lä nofimano wei a lä cui. Abinaja cäcöbö nowa tama. —Bada tä nomawä lä maqueono wei täca jamö, a cuami tai. A nofi fa dälöjenö, a nomawä maquea lä nomöjöqueno wejei, yama tä daimi —cäcöbö nowa tama.

³Pedro sho, Jesúsno ai a lä nocamabono wei a lä cui sho, cäcöbö faa fa showalöfälönö, nomawä a lä maqueono wejei täca jamö, cäcöbö cadidibaliyofälöma.

⁴Bolacabö cäcöbö läläa ma showalayono wei ma cui, Jesús nija a lä nocaono wei ai a lä cuinö, Pedro a nojablamalema. A nomawä lä maqueono wei täca jamö, a waloa balöblabalecölöma.

⁵Öjamö a fa lodalunö, tä möö mö wädäama. Camishi acadafu au bänö, a lä yaicoloono wei bä jilaa ma dalaleno wei ma cui, bei täca jamö a lucänomi.

⁶Öjö däjä, Simón Pedro a waloa nomöjöquema. A nomawä lä maqueono wei täca jamö, a lucäa showalayofälöma. Camishi acadafu au bänö a lä yaicoloono wei bä jilaa fa dalalönö,

⁷a mö lä jöyaono wei cäcö çai daa mö fedua showalalema. Camishi acadafu bä lä jilaono wei jamö mlai, yami, shomi jamö cäcö cofuma li blaoma.

⁸Öjö däjä, Jesúsno bä lä nocamabono wei ai a lä cui, bei täca jamö, a waloa lä balöqueno wei a lä cui, öjö a lucäa nomöjölayoma. Öjö tä bluca fa dalalönö, Jesús a demi jocädou lä çolayono wei tä ʔ bejedi bufia showadalema.

⁹Öjö ma cui, Yai Bada etä ʔ oni jamö, Jesús a wafa lä wäyäo wei tä ʔ ja, cäcöbö bufi jaducuo mlai ja, cäcöbö cuo showaoma. “Inaja lä a demi jocädou çobä lä”, cäcöbö bufi cunomi showawä.

¹⁰Öjö däjä, Jesúsno cäcöbö lä nocamabono wei cäcöbö çoa çolayoma.

¹¹Cäcöbö ma çolayono wei ma cui, a nomawä lä maqueono wei täca sibo jamö, María a öcöö çai ublao juoma. A öcölanö, a fa lodalunö, a mö yejeblaquema. A nomawä lä maqueono wei täca ʔeshi jamö tä fa mödalönö,

¹²ajele bolacabö cäcöbö dalalema. Camishi au cäcö ja, cäcöbö didioma. Jesús a nomawä lä maqueono wei jamö, cäcöbö döcäcäoma. Bei fe lä cuono wei jamö ai, bei mamicö cuo mö lä feduono wei jamö, ai a mö feduwä.

¹³María nija cäcöbö ʔ faö ja, abinaja cäcöbö cuma. —¿Wedi tä ja bei wa wä li dedeblalou cule? —cäcöbö cuma. —Ya nofi lä Badabou wei, a nomawä nofi fa dälöjenö, shomi jamö a maquea nomöjömaquemaje. Öjö ya tä daimi yalo, ya bufi joliblalou dodijia yalo ya wä —a cuma.

¹⁴Einaja a fa culunö, a mö fa lacödalunö, Jesús a ublaa dalalema ma cui, a nö öjöböanomi.

- 15 Abinaja Jesús e cuma. —¿Wedi tä ja bei wa wə li dedeblalou cule? ¿Wedi jamö a lä cui, bei wa li dayäo cuboyoi? —e cuma.
- 16 Ficali ca jamö a lä ojodamou wei a fa bufinö, abinaja e cuma. —Bada tä. Cafänö shomi jamö wa nomawä maquea nomöjömaquema ja, a jömöa da çobayo, ya çoaö showadaobä —e cuma. Jesús abinaja e cuma. —María— e cuma. A wəfa jayublamolayou ja, María a mö lacöblaliyoma. Ebleo bä caficö ʔ ja, abinaja e cudaliyoma. —¿Tä ʔ wäyäle! —e cudaliyoma.
- 17 —Wale jubaö shi jalimou dicoo dijä —Jesúsnö a nowa tama—. Fayä a lä culadi jamö ya junomi showawä. Fäähäyä bä nija wale ʔfa yai da wäyädu. Fayä nijamö ya juu, cafä wamacönö wama a nofi Föomaö lä showale a lä cui nijamö. ¿Öjö tawä? Yai Bada ya lä bufiblale a lä cui nija ya juu, wama a çai bufiblaö mö lä feduo wei a nija —a nowa tama.
- 18 Madalatelyoma a María lä cui, Jesúsnö bä lä nocamabono wei bä nijamö a fa alunö, abinaja a cuma. —Bada ya tä daa fenalalei cublei —a fa cunö, Jesús a lä cuno weinaja, a wəno wäyäo showadaojoloma.
- 19 Jaba tä mö jalu cuoma, domingo tä lä cui. Tä mö jaba jicocaö däjä, Jesúsnö bä lä nocamabono wei bä bluca dödöjowä çocamoma. Judio bä nö quili tamaje yalo, yocabä quefubomaje. Yedu Jesús a fa bädaliyonö, cama bä mötale jamö a ublaa damoa bädaalaliyoma. —Bä bufi da yanöcöicu —bä nowa tama.
- 20 Inaja a fa cunö, Jesús cama bei imicö mömou wawädooma, bei leboco çai. Öjö däjä, cama ebä lä nocamabono wei bä lä cuinö, Bada a nö fa öjöbölöjenö, bä bufi doblaloma.
- 21 Öjö däjä, —Bä bufi da yanöcöicu —a cuu çoma—. Fayänö wale lä shömöleno weinaja, cafä wamacö ma cui, bamacö shömaö mö fedua lä cule —a cuma.
- 22 Einaja a fa culunö, cama ebä nija a fa jolashicönö, abinaja bä nowa tama. —Yai Bada tä Bufi da taaleje.
- 23 Täbä doblou lä mlai, ai wama etä nowa taboimi ja, etä nowa nia cuomi. Wama etä nowa tabou showawä ja, etä nowa nia cudio —bä nowa tama.
- 24 Jesús a lä bädaliyono wei däjä, cama 12 a wə lä juaö wejei ai e ʔfa Tomás lä cui, a cuonomi. Cäcöbö lä ʔlequeblaliyono wei a, a wəfa çai lä jilamono wei a lä cui.
- 25 A cuonomi yalo Jesúsnö bä lä nocamabono wei ai bä lä cuinö a yömölaö juomaje. —Bada yama a daa çolalema —bä cuma ma cui, abinaja Tomás a cuu dicooma. —Jesús bei imicö lä basuono wei ya täca dabraö showao mlao däjä, bei ya imicönö ya dusi jubaö mlao däjä, bei leboco jamö ya imicö çai lucäo mlao däjä, bamacö ʔ bejedi bufii mlaicätä —a cuma.
- 26 Öjö däjä, 8 tä mö didi fa cublalunö, öjö a yano jamö, Jesúsnö bä lä nocamabono wei bä jilao çoma. Öjö däjä Tomás a çai çocaoma. Yocabä ma quefufubono wejei ma cui, yedu Jesús a bädaleyoluma. A fa bädaliyonö, cama bä mötale jamö a ublaa fa wawädooblalunö, —Bä bufi da yanöcöicu —a cuma.

²⁷Öjö dájä, Tomás nija abinaja a cuma. —Eja wale imicö da jubayo. Wale imicö da möyo. Wa fa ajedebalaliyolunö, bei ya leboco jamö imicö da lucäliyo. Wa möläö lä mlai tä da joyalö. Wale nofi yai da mölabo —a cuma.

²⁸Tomás abinaja e cuu mö feduoma. —¡Bada tä! Cafä bäfä shino yai bufiblabä wa.

²⁹Jesús abinaja e cuma. —Wale li möö yalo, wale a bejedi li bufiblaö lä cule. Wale möö ma mlajei ma cui, wale ano bejedi bufii fe lä yadio wejei bä lä cui, öjö lä bä bufi nia yai doblalou —e cuma.

³⁰¿Öjö tawä? Inaja lä tä cuoma. Camiyänö ya tä lä dalaleno wei, ya tä afa wäyää. Yai Bada e nö öjöböamobä, tä nö lä quilijii, Jesúsnö bluca tä wawämaö cuaama. Ei sibä jamö tä a oni bluca wäyämamou. Yamalecö lä nocamabono wei yamacö mamou showao dájä, tä nö lä quilijii, ai tä bluca wawämaö showao mö feduoma, ei sibä jamö tä a cua lä mlai.

³¹Öjö ma cui, Jesús wama tä a bejedi bufibä, ya tä a oni taaö lä cule. “Yai Bada tänö a shömabä a lä yaileno wei, öjö Jesús a waiquiwä”, wama a nofi yai tabobä. “Yai Bada bei Ijilubö e”, wama a nofi çai tabobä. Inaja wama a nofi tabolanö, cama a wano bälimi wamacö cuobä.

San Juan 21

¹Öjö tä cublou waiquilayono wei ja, modu Dibelia u casö jamö, cama ebä lä nocamabono wei bä nija Jesús a damoa çolaliyoma. Öjö dájä, abinaja tä cublaliyoma.

²Cama ebä lä nocamabono wei, ei 7 ebä li cuoma. Simón Pedro a cuoma, Tomás a çai, Cäcöbö lä equeblaliyono wei a, a wafa çai lä jilamou wei a lä cui. Canateli Nataniel a wafa lä cule a çai. Sebedeo bä ijilubö ecöbö çai. Jesúsnö bä lä nocamabono wei ai ecöbö çai.

³Simón Pedro abinaja e cuma. —Yuli ya bä nia yaçaö —a cuma. —Camiyä sho, bamacö nia bluca juu —ebä fa cunö, bä bluca alayoma. Canawä a jamö bä fa döcäcäolalunö, bä caläa showalayoma. Öjö ma cui, yuli bä yaçaö mlajei ja, bä nö bleaaö fe jaludii buoma.

⁴Tä mö wacacadou dájä, modu u casö jamö Jesús a ublaa jatoaleyoluma. Öjö ma cui, cama ebä lä nocamabono wei bä lä cuinö a nö öjöböanomije.

⁵Öjö bä nija abinaja Jesús a cudaliyoma. —Ijilubä. ¿Yuli wama bä yaçaö mlao cufe? —a cuma. —Ma. Yama bä çai yaçaö buonomi —bä cuma.

⁶Abinaja bä nowa taö nomöjöoma. —Jayu wamacö boco mashi jamö, yaçamodima cäcö da quemabalöje. Öjö dájä yuli wama bä nia dalalei —bä nowa tama. Öjö cudeenö, öjamö lä cäcö quea fa tamabalöjenö, yuli bä bluca cublaliyoma. Bä bluca cublaliyoma yalo, canawä a jamö bä tablaö doblonomije.

⁷Jesúsnö bä lä nocamabono wei ai e lä cui, a yai lä nofimano wei e lä cui, abinaja Pedro nija öjö a cuma. —Casö jamö quiiji a lä ublale, ¡Bada cätä! —a cuma. ¿Öjö tawä? Bä yulimobä jamö, Pedro a lä didiono wei ecö camishi jayublaö ma

waiquilayono wei ma cui, “Bada cätä”, a wə cuu fa jililänö, a lucäa çə showadaaliyoma. Öjö däjä, modu u jamö a quea showadabaliyoma, lobe a washölöblou balöobä.

⁸Öjö ma cui, cama ebä lä nocamabono wei ai bä lä cui, yuli bä befi çai fa shaiboimajenö, bä befi çai yanöcö washölöblou jalayoyoluma. Modu u casö ajede jamö, bä befi çai malä çəono wei.

⁹Bä fa washölöblalunö, acanafu bä wacö ja, yuli bä yaa dalalemaje, nii cäcö çai.

¹⁰Abinaja Jesúsnö bä nowa tama. —Wama bä yuli lä yaçalöfe, ai bä da boimaje.

¹¹Inaja bä nowa tama cudeenö, canawä a jamö Simón Pedro a didiblaa fa çəbaludunö, yaçamodima cäcö ja, yuli bä befi çai fa shaiboimanö, bä washölöblamalema. Yuli bä badanö cäcö fe lajooma. ¿Öjö tawä? Yuli 153 bä cuoma. Inaja bä bluca ma cuono wei ma cui, cäcö çai jädöö buonomi.

¹²Jesúsnö abinaja bä nowa tama. —Jabo. Bamacö da iya. ¿Öjö tawä? Cama ebä lä nocamabono wei bä lä cui, moli ma cui a wə faö badaonomi. Bada tä Jesús a nö ma öjöböleno wejei ma cui, “¿Cafä wa tawä?”, ebä cuu quilima.

¹³Jesús a fa icuicunö, nii cäcö fa dälänö, bä dobälalema. Yuli bä çai ja.

¹⁴¿Öjö tawä? A demi jocädou fa çolonö, cama ebä lä nocamabono wei bä nija Jesús a lä damolaliyono wei, öjö 3 a cuo waiquioma.

¹⁵Bä iyaö fa jödödöblalunö, Simón Pedro nija abinaja Jesús a cuma. —Jonasi ijilubö Simón wa lä cui. Ei bänö wale ma nofimaö wejei ma cui, ¿cafänö wale shino yai nofimaö dodijia da culanö? —Awei —a cuma—. Wale daö. Bäfä nofimaö —Pedro a cuma. —Wale nofimaö ja lä, iba bä lä cui, iba oweja bä wai lä cui bä da iyama —a cuma.

¹⁶Jesúsnö a wəlii çəoma. —Jonasi ijilubö Simón wa lä cui. ¿Wale nofimaö da culanö? —Awei, tä a wäyäle —Pedro a cuma—. Wale daö. Bäfä nofimaö lä. Abinaja Jesús e cuma. —Wale nofimaö ja lä, iba oweja bä da nowama —e cuma.

¹⁷Öjö däjä, Jesúsnö 3 a wəlii çəoma. —Jonasi ijilubö Simón wa lä cui. ¿Wale nofimaö da culanö? —e cuu çəoma. ¿Öjö tawä? “¿Wale nofimaö da culanö?”, 3 a cuu çəo ja, Pedro a bufi nö bleaama. Abinaja e cuma. —Bada tä. Wa tä daö jödödöwä. Bäfä lä nofimaö wei wale daö —e cuma. —Wale nofimaö ja lä, iba oweja bä da iyama, öjö lä.

¹⁸¿Öjö tawä? Cafä nija ei ya wə lä cui, bejedi lä ya wə. Wa osheo däjä, camishi wa cäcö fa ayolanö, wa juu lä ojode wei jamö wa juma. Öjö ma cui, wa wəlobadao däjä, wa bococu nia leleo. Cafä nija ai anö täcö fa çacönö, wa juu ojode lä mlai jamö wa nia öböafälöö —e cuma.

¹⁹Einaja a lä cuno wei, Pedro a nia lä shämono wei tä yai jömama, fii defi jamö bococu nia lä lelemabono wejei. A lä shämono wei tänö, Yai Bada tä nia doblao dablamama. Inaja a nowa fa talönö, —Camiyä nija a yai da nocaicu—e cuma.

20 Pedro a mö fa lacödalunö, Jesúsno bä lä nocamabono wei, ai a yaua dalalema, a yai lä nofimano wei e lä cui. Bä lä iyano wei jamö, Jesús sho cäcöbö lä jöcöjöono wei, öjö a cuoma. Jesús a wälíi dájä, “Bada tä. ¿Wedi jamö a lä cuinö wa nia nomojoliaö?” e lä cuno wei a lä cui.

21 Pedronö öjö a yaua fa dalalönö, abinaja Jesús nija a cuma. —Bada tä. Quiji a nodiaö lä jäimi, ¿wedinaja öjö a nia li taamamou? —a cuma.

22 Jesús abinaja e cuma. —Äyämö ya juu ço showao mlao dájä, ya demi tabou ojodao ja, ya nia tamabou. Cama a nia lä taamamou wei tä ja, a bufi cuaa dijä. Camiyä nija a yai da nocaicu —e cuma.

23 ¿Öjö tawä? Öjö dájä, Jesús ai ebä nija, öjö tä ą jilimou blaucublaliyoma. Abinaja bä nowa tayou cuaama. —Jesús nija a lä nocaio wei öjö a lä cui, a nia jowa nomaimi fa talei—bä cuma. Bä cuma ma cui, inaja Jesús a cunomi. Abinaja a shino cuma. “Äyämö ya juu ço showao mlao dájä ya demi tabou ojode ja, ya nia tamabou. Cama a nia lä taamamou wei tä ja, a bufi cuaa dijä”, Pedro nija a shino cuu bädaoma.

24 ¿Öjö tawä? Öjö a wafa yai lä wäyämöno wei a lä cui, Jesúsno bä lä nocamabono wei ai e mö feduwä lä cui, camiyä Juan, öjö lä bei ya e. Ei ya tä ąfa bluca lä wäyäle, öjö lä ya showawä. Camiyänö, öjö bei ya tä ą bluca onibläö lä cule. Ya tä ą lä wäyäle, yama tä ą bejedi daö.

25 Öjö ma cui, ei bädawä mlai, Jesús a lä cuaano wei ai tä bluca cua showaa. Tä ą jödödöwä onibläö fa cunoje ja, sibä nö blucao fe balojoobö wei. Bitä a bada blaucuwä ma cui, öjö sibä cuobä a nö obö mlai, ya bufi cuu.

Hechos

Hechos 1

- ¹Deofilo, cafä nija ya si jaba lä oniblaleno wei si ja, Jesús ya wäfa wäyää balöoma. A lä cuaano wei tä ma cui ja, täbä lä yömölano wei tä ma cui ja, öjö ya tä ą bluca wäyää waiquioma,
- ²a ösöö showao mlao däjä, a lä cuaano wei tä ą lä cui. ¿Öjö tawä? Fedu jamö a çqamamou showao mlao däjä, cama ebä nosiemaö balöoma, bä lä shömöleno wei bä lä cui. Yai Bada tä Bufinö a wä fa cadidonö, bä nosiemama.
- ³A nö lä bleaamano wejei däjä a fa nomalönö, a demi çai jocädou fa çolonö, cama ebä showawä lä cui nija a demi damoa çlaliyoma. A lä cuaano wei tä blucanö, a nö demi öjöbömolayoma. 40 tä mö didi cublou jaöo mlao däjä, öjö bä nija a dablamous lä cuaale jamö, Yai Badanö cama ebä nia çai lä cuo wei tä ą wäyää cuaama.
- ⁴¿Öjö tawä? Jesúsnö bä çai cuo showao däjä, bä juu wasöma. —Äyämö, Jelusale jamö bä da yanöcöicu —a cuma—. Fayänö tä äfa wäyää lä balöono wei tä ja, bä nö da daicu, cafä wamacö nija ya tä äfa da wäyäblei tä lä cui.
- ⁵Juan a lä cuinö, mau u ja bä fe ojomaö ja, mau unö bä jödödöblamama ma cui, tä nö dedejblou mlai ja, inaja showawä, Yai Bada tä Bufi yainö wamacö nia jödödöblaö nomöjöo —a cuma.
- ⁶Öjö cudeenö, bä lä yododano wei däjä, Jesús a wälimaje. —Bada tä. Isaeli yama ecö lä cui, eja yamacö nia bälöo shi ma wälio wei ma cui, shomi bä bälöa läa showaa bashia lä cule. ¿Fei däjä, yamalecö bälöa lojodomabobä, ei tä waiquiwä tawä? —bä cuma.
- ⁷Jesús a wä juo ja, abinaja bä nowa tama. —Öjö tä lä cui wama tä dabä wamacömi. Fayänö öjö tä shino daö ayao. “Fei däjä dodijiwä”, a cubä, öjö a shino.
- ⁸Öjö ma cui, cafä wamacö nija Yai Bada tä Bufi bälöo däjä, wamacö nö wälojoblobä, wamacö nia bayeliblamou. Öjö däjä, Jelusaleteli bä nija wamale äfa nia wäyää. Judea jamö ma cui, Samalia jamö ma cui, wamale äfa wäyää fa cuaaimadunö, täbä bälöo lä jödödole jamö ma cui, wamale äfa nia wäyää cuaaö —a cuma.
- ⁹Inaja bä nowa fa talönö, bä mamou showao däjä, Yai Bada tänö a ösömalefälöma. Öläjashi anö, a nö daamou mladaliyoma.
- ¹⁰Fedu jamö Jesús a lä ösöimadi jamö, bä mö nonoo showao däjä, bolacabö täcöbö bädaliyoma. Camishi shuducaje cäcö labe ja, täcöbö didioma.
- ¹¹Abinaja bä nowa taböma. —Calilea tä ulifi jamö wamacö lä bälöle, ¿wedi tä tabä, bei wamacö mö li nonodia cule? Öjö Jesús a lä cui, fedu jamö a lä ösölöfe, wamacö lä dacöfe a lä cui, a nia itou çoyoluu. Cafä wamacö mamou showao däjä, fedu jamö a ösöa lä culufenaja, inaja a nia cublou ço.

12Oliba tä ʔfa balöcö lä jilabolajei jamö, Jesús a fa çolufälönö, cama ebä lä nocamabono wei bä lä cui, Jelusale jamö ebä ça çolayoma. Yo ajededaoma.

13Bä fa yafilönö, bä bälöblao lä feyacaono wei jamö bä fa dubofälönö, bä lucälayoma. Abinaja bä bluca cuoma, Pedro, Juan, Santiago, Andrés, Felipe, Tomás, Badolomei, Mateo, öjö bä bluca lucälayoma. Afeo bä ijilubö Santiago a çai lä cui. Simón a çai lä cui, Lomateli täbä lämabou nofi lä wʔlibono wei a lä cui. Santiago bä ijilubö Juda a çai lä cui.

14Öjö bä lä cui, Yai Bada nija showadi bä ʔ fadima. Öjö bä ma cui, suwä bä ma cui, Jesús bä nöö María e ma cui, Jesús bä fäähä ebä ma cui, inaja bä bluca cuoma.

15Bei. Jesucristo ebä lä yododano wei jamö, jai 120 bä cuoma. Öjö bä nija Pedro a fa ubladalunö, a wʔ falayoma.

16—Iba wamacö. Juda a lä cuaano wei tä ja, bämacö bufi wedinajamobä tämi, Jesús a juwäabeje, täbä lä lulubono wei a lä cui. Öjö tä da cublalui, Yai Bada a wʔano bejedi wawäblobä, tä li cublaliyoma. ¿Öjö tawä? Nö badabö David a lä cui, Yai Bada tä Bufinö a wʔ fa cadidamanö, a wʔfa wayoaö malä balöono wei.

17Camiyä yamacö ai a cuoma. Yai Bada a nosie juamobä, öjö a ma cui a çai taamaö mö feduo showaoma.

18¿Öjö tawä? —Pedro a cuma—. Öjö a doblou lä mlaono wei tä nowa ja, blada bä fa lululänö, öjö bä ja, tä nowa ulifi çamamoma. Öjö tä ulifi showawä ja a fa quelunö, bei shibä bläshäblaliyoma.

19Öjö tä lä cui, Jelusaleteli bä blucanö tä ʔ jililemaje. Öjö tä ʔ jililemaje yalo, İyäbö wei tä ʔfa ulifi jilaquemaje. Cama bä caficö ʔ ja, Asedama tä ʔ li cuoma.

20¿Öjö tawä? Tä ʔ oni malä cule. Amowa täbä ʔ oni ja, tä ʔ lä cuu weinaja showawä. Fei däjä a yafibö nia blococo. Öjamö lä ai a nia bälöo nodiomi. ʔEinaja tä ʔ cuu. Abinaja ai tä ʔ çai —Pedro a cuma—. Cama a bada läobä tä ma cuono wei ma cui, fei däjä ai a nia läo juo nomöjöö. ʔEinaja tä ʔ cuu.

21-22Öjö cudeenö, ai yama a nia lämabou nomöjöö —Pedro a cuma—. Bada tä Jesúsno yamalecö çai juu lä cuaano wei jamö, showadi bä lä çololoablalono wei bä lä cui, eja ai bä coyocoo. Juan nija Jesús a fe lä ojoblamono wei däjä, bä coyocoo fa showaonö, showadi camiyä yamacö nija bä yädäablalou cuaama. Fedu jamö Jesús a lä çamamono wei däjä ma cui, öjö däjä bä çai yädäo showaoma. Öjö bä nija moli a nia yaiamou, Jesús yama a wʔfa demi jocädou wäyäo cuaabä jamö, öjönö yamalecö ʔ bayelibläö cuaabä —a cuma.

23Jesucristo ebänö, öjö a wʔ fa jililäjenö, bolacabö cäcöbö jömöblalemaje. Ai bänö, José Basabaa, a jömöblalemaje, Juto a wʔfa çai lä cuono wei. Madia a çai jömöbläö mö fedulayomaje.

24Öjö däjä, Yai Bada nija bä nö bayeli nacao ja, abinaja bä cuma. —Bada tä. Cafänö wa täbä bufi bluca yai lä daö wei, cafä wa. Ei cäcöbö nija wa yaiamaö lä bufile, camiyä yamacö nija a jömaö da cadido, öjö a yai cuobä.

²⁵Cafä wa nosie juamobä a Juda lä cuono wei jamö, a bada läo nomöjöobä. Jesucristonö bä lä shömöleno wei bä nija a yädäobä. Öjö bä nija Juda a yädäobä a ma cuono wei ma cui, a yacläa dicolayoma. A nö bleaabä jamö a alayoma —Yai Bada nija bä cuma.

²⁶Öjö däjä, madofi a jamö cäcöbö afa fa oniblälöjenö, a nia lä yaiono wei a wafa nia oni wawäo mömaje. ¿Öjö tawä? Inaja bä fa cuanö, Madia a wafa oni wawälayoma. Öjö a wafa fa wawälönö, Jesucristonö bä lä shömöleno wei bä nija a yädäquema.

Hechos 2

¹Showadi bä nii lalou däjä, judio bä iyaö çai lä çocamou wei tä cublou fa çolonö, bä yododabä jamö Jesucristo ebä bluca çocablou çolayoma.

²Yedu jai wadoli a wä bada cuwä tä a fa itoimanö, bä lä loono wei a yafi lä cui jamö, a wä jödödöblaliyoma.

³Öjö bä nija, jai cowa wacöbä cuwä wacöbä wai fa shedequeblalunö, öjö bä bluca nija wacöbä wai döcäcäolaliyoma.

⁴Inaja tä fa cuonö, Jesucristo bluca ebä nijamö, Yai Bada a Bufi fa jödödöblalunö, bä a faö shomiblamalema. Yai Bada a Bufenö bä a fa bädamanö, shomi bä caficö a ja bä a bluca fadou cuaama.

⁵Bei. Öjamö, Jelusale jamö, judio bä bluca bälöblaama, Yai Bada nija bä bejedimou bufi lä doblaono wei.

⁶Öjö a wä bada lä jilileno wejei däjä, bä bluca çocabloyoluma. Bä a faö lä shomiblaliyono wei bä a fa jililäjenö, bä bufi wedinajamoma. Cama bä caficö a showadawä ja, tä a jililemaje yalo,

⁷bä bufi shädayaimoma. Bä bufi wedinajamolanö bä a fama. —Ei bä a bluca lä cui, ¿cama Calileateli bä mlai daanö?

⁸¿Wedinaja tawä? Camiyä bamacö a caficö cadidiwä showawä ja, bä a faö mö feduwä.

⁹Bluca bamacö shomi coyocoa lä cule. Badia jamö bä lä bälöle bä ma cui, Media jamö bä lä bälöle bä ma cui, Elama jamö bä lä bälöle bä ma cui, bä cua lä cule. Mesobodamia jamö bä lä bälöle bä ma cui, Judea jamö bä lä bälöle bä ma cui, Cabadosia jamö bä lä bälöle bä ma cui, Bodo jamö bä lä bälöle bä ma cui, Asia jamö bä lä bälöle bä ma cui, bä bluca coyocoa.

¹⁰Judio bamacö waiquiwä bamacö ma cui, judio bamacö nija bä lä çocao wei bä ma cui, bä bluca coyocoa mö fedua —bä cuma—. Flijia jamö bä lä bälöle bä ma cui, Bañilia jamö bä lä bälöle bä ma cui, Ejido jamö bä lä bälöle bä ma cui, öjö bä çai bluca cua lä cule. Libia jamö, Sileneteli bä lä bälöle tä ajede jamö, öjamö bä lä bälöle bä ma cui, Lomateli bä fama lä çoblaliyono wei bä ma cui, öjö bä bluca coyocoa.

11Cleda jamö bä lä bälöle bä ma cui, Alabia jamö bä lä bälöle bä ma cui, bamacö bluca cua. Camiyä bamacö a caficö cadidiwä showawä ja, bä a faö lä cule. Yai Bada a wafa lojode lä wäyäo wejei, camiyä bamacö a faö lä culenaja, bä a faö cuaaö cudeenö, walalawä bäma bä a jiliaö lä cule —bä cuma.

12Bä bufi bluca shadayaimoma. Bä bufi wedinajamoma yalo, cama bä cai walyiodima. —¿Wedinaja dodijiwä tawä?

13Öjö ma cui, ai bä lä cuinö bä noca flecamaje. —Shi walyimamodima ubä dude fa coalalöjenö, bä a li biyäcäblalou lä cubiyei. Nashiwä toubänö bä shi li walyii —bä cuma.

14Öjö ma cui, Pedro a wä juo showadaoma. Ai bä 11 lä cuono wei bä cai fa ubladalunö, a wä icali fama. —Judio wamacö mö lä fedui. Jelusale jamö wamacö lä bälöle wamacö. Ei ya wä lä cui, wamale a da jililä.

15Ei bä lä cui, wama bä shi afa walyii lä tafe, bä shi walyii malä mlai. Einaja a motoca jaba ösöblou cuo däjä, täbä shi walyibä tä cuami.

16Ma, ei bä a lä shomiblalufe, yedu jamö Yai Bada a wano wäyäléwä Joeli a lä cuinö, öjö tä afa cai wäyäo balöo showaoma. Abinaja tä a cuu.

17Yai Bada ya wano taö lä cule. Yai Bada tänö täbä nia lä jömaö wei tä cublou ajedou däjä, bluca bä nija Yai Bada tä Bufenia jöwa yai jöbömou. Wamacö ijilubö bä ma cuinö, wamacö täabö bä ma cuinö, a wano nia wäyäöje. Tä nia lä cublou wei, cafäteli ai bä fiyanö, tä yai nia wawädou mööje. Bada bä lä cuinö, tabi tä nia li dabläöje.

18Bejedi lä ya wä. Yai Bada a nosie juamobä bä suwä ma cui nija, bä walo ma cui nija, Yai Bada cama a Bufenia jöböamou. A Bufenia fa jöbömoicunö, a wano nia jöwa wäyäöje.

19Täbä bufi möblobä, fedu jamö tä nö lä quilijii, tä nia bluca wawämadayou. Bitajamö ma cui, yanowamö bamacö lä cule jamö, a mayo nia cai jöwa dablou nö quiliaö. İyā İyā bä ma cui, cowa wacöbä ma cui, waqueshi bä bada lä toluou wei bä ma cui, öjö täbä nia bluca wawäblou.

20Bada tä nö nia yai lä quiliaö wei, tä mö jalu cublou showao mlao däjä, motoca a shii nia jöwa lublou balöo. Belibo a ma cui, İyā İyā bä wacä lä culenaja, a nia cublou nö quilio.

21Öjö däjä, Bada a nija a bayeliblamou lä bufio wei a lä cui, a nia jöwa jucäamou. 'Einaja tä a cuu. ¿Öjö tawä? —Pedro a cuma—.

22Isaeli cä wama ecö. Nasaleteli Jesús ya wafa wäyäo ja, wamale a da jililä. Yai Bada tänö cafä wamacö nija Jesús a fa shömölönö, a nö walojoblamalema, wamacö bufi jaducublobä. Yai Bada tänö a nia lä shömano wei, “Fei a waiquiwä”, wama a nofi tabobä. ¿Öjö tawä? Cafä wamacö nija a da cuoblei däjä, Yai Bada a lä cui, jbejedi a lojode damalalema! Tä nö lä quilijii tä bluca wawämalema. Jesús nija Yai Bada a lojode damoa dodijilaliyoma. '¿Öjö tawä? —a cuma—.

- 23 Öjö a Jesús shäbeje, wama a jöbäa dicoquema. Yai Bada tänö inaja a taamaö bufi doblao waiquioma yalo, tä cublaliyoma. Tä daö waiquioma. Wälidiwä talewä bä nija, fii balitama defi jamö wama a shäa dicomalema.
- 24 Öjö ma cui, a ma shäleno wejei ma cui, Yai Bada tänö a jucäa fe yadilema. A çai demi jocädamaö çolayoma. A nomaö shi wäljijobä a cuono malä mlai.
- 25 ¿Öjö tawä? Öjö yedu ja, Davidnö a wäfa wäyäö balöoma. Abinaja a cuma. Bada a lä cui, showadi ya bufibou. Ya shominajablou mlaobä, wale malä ajedebou wei.
- 26 Öjö cudeenö, ya bufi doblalou. Ya wä bufi çai doblao faö. Quilii mlai ja ya nia cudio.
- 27 Bä lä nomaö wei bä cuobä jamö, wale noshi nia öjödabou malä mlai. Camiyä wale lä yaileno wei ya lä cui, wale sicö nia jodemaimi.
- 28 Dodijidawä ya cudiobä, cafänö wale damama. Wale çai lä cua wei tänö, showadi ya bufi nia doblalou. 'Einaja a cuma —Pedro a cuma—.
- 29 Iba wamacö. Wamacö bufi yai jaducublobä, ya wä nia wawädoablalou. Nö badabö David a lä cui, öjö tä äfa lä tano wei ja, cama a wäfa tamonomi. ¿Öjö tawä? David a fa nomalönö, mashita jamö nomawä a didiquemaje. Bäma a didibou malä showale.
- 30 Öjö ma cui, Yai Bada a wäno wäyälwä a li David cuoma cudeenö, tä nia lä cublou wei tä ja, a moyawäo showaoma. Yai Bada a wä lä wäono wei, tä ä çai daö waiquioma, cama David a bada läo lä cuono weinaja, e nia bada nodiwä lämabou lä juono wei tä ä lä cui.
- 31 'Öjö cudeenö, tä cublou showao mlao däjä, Yai Bada tänö a shömabä a lä yaileno wei, a nia demi jocädou lä çono wei tä çai daö showaoma. ¿Öjö tawä? Bä lä nomaö wei bä cuobä jamö, a noshi nia äfa öjödaboimi lä wäyänö wei ja, cama a wäfa tamou mlai ja, a nia lä shömano wei bei a wäfa li wäyäma. Öjö sicö yai jodemanomi.
- 32 Öjö Jesús a lä cui, Yai Bada tänö a demi jocädamaö çolayoma. Camiyä bluca yamacö mamocunö, yama a demi daa çolalei cublelei.
- 33 '¿Öjö tawä? —a cuma—. A nö Bada öjöböamobä, cama Yai Bada jayu boco mashi jamö, a döcämabou lä culadi. Öjamö a Bada lä döcämaqueno wei däjä, bä Föönö a dobälema. Cama a Bui äfa wäyämamou lä balöono wei tä ja, a dobälema. Öjö tä ja, cama a fa dobämamoludunö, camiyä yamalecö dobäa fe dolea nomöjölema. Ei wama tä lä möle, wama tä ä lä jiliale, öjönö tä wawäblamalei lä cufe.
- 34 Cama David a ösöono malä mlai, fedu jamö. A ösöono ma mlai ma cui, abinaja a cuma. Iba Bada a nija, abinaja Bada a yai lä cui a cuma. Eja, camiyä ya lä cule jamö a da döcäiquiyo, jayu ya boco mashi jamö.
- 35 Eja wa döcäo showao däjä, bä nö lä nabämou wei bä lä cui, cafä nija ya bä möfe nia quilili bomabou. 'Einaja a cuma. ¿Öjö tawä? —Pedro a cuma—.

³⁶Isaeli wama ecö bufi bluca jaducublobä ya wə. Öjö Jesús a lä cui, fii balitama defi ja wama a lä shämäléno wei a showawä lä cui, Yai Bada tänö Bada bei a yai tablamalema. A shömabä a lä yailéno wei, öjö a —a cuma.

³⁷¿Öjö tawä? Pedro a wə fa jililäjenö, bä bufi nö yai bleaaö fe balojooma. Pedro a ma cui nija, Jesucristonö bä lä shömöleno wei ai bä ma cui nija, abinaja bä cuma. — Shädayai. Iba wamacö. ¿Wedinaja yamacö li cuaaö dodijjobä? —bä cuma.

³⁸A wə juo ja, abinaja Pedro a cuma. —Wedinaja mlai. Wəlidiwä tä ja, bä bufi da lädalú. Jesucristo nija wamacö bufi fa cuicunö, öjö a wəno, bä fe da ojomamo. Wamacö doblou lä mlai tä ma cule, tä nowa mladamabä. Inaja wamacö cublaliyo ja, cama Yai Bada tä Bui ja, wamacö nia dobämamou.

³⁹Cafä wamacö ma cui nija, wamacö ijilubö nodiwä ma cui nija, bä blajawä lä bälöle bä ma cui nija, bluca wamacö bayeliblamobä tä ə wäa malä balöqueno wei. ¿Öjö tawä? Yai Bada bäma a lä bufibläö wei a wə nö wäoma, bäma a nofi lä Badabole a lä cui. Cama nija bä ajeou çobä bä bufi lä taamaö wei bä lä cui nija a wə nö wäquema, täbä bluca bayeliblabä —a Pedro cuma.

⁴⁰Jesús a wəfa wäyäö ja, bä yömöladima. Yai Bada etä ə ja bä nowa talanö, abinaja a çai cuablaloma. —Ei bä lä bälöblai, bä dobloimi waiquiwä. Öjö bä lä cui bä nö bleaabä jamö, wamacö nö bleaaö bashio mlaobä, bä da nowamöo —a cuma.

⁴¹Öjö cudeenö, Pedro a wə fa jililäjenö, tä ə dädaö lä showalayono wejei bä lä cui, bä fe bluca fa ojoblamolunö, Jesucristo ebä nija bä yädäblou showadalayoma. Bä lä yädäblaliyono wei bä lä cui, jai 3.000 bä cuoma.

⁴²Jesucristonö bä lä shömöleno wei bä ə jiliaö bufi doblaomaje. Öjö bä sho, bä nofi tamayou bufi doblaoma. Bä iyabä jamö ma cui, bä çai çocaablalou bufi doblaoma. Yai Bada nija bä nö bayeli nacaobä jamö ma cui, bä çai yädäablalou bufi doblao showaoma.

⁴³Jesucristonö bä lä shömöleno wei bä lä cuinö, tä nö lä quilijii showadi tä bluca wawämamaje, tä tamou dao lä mlai. Öjö cudeenö, öjamö lä bä bluca lä cuono wei bä quilima.

⁴⁴Jesús a bejedi lä bufibono wejei, cama bä bluca yaiblamolayoma. Bä bayeliblayou bufi doblaoma. Cama bä madofibö ma cui ja, bä bufi läablalou mlai ja, bä madofibö nofi bluca ibamayoma.

⁴⁵¿Öjö tawä? Abinaja bei bä taamayoma. Ai bä jöli ja, ulifi bä lä tabou wejei bä ma cui, madofi bä lä tabou wejei bä ma cui, blada bä ja bä jöböqueije. Öjö däjä, öjö blada bä ja, bä lä jölio wei bei bä bluca döbäleije, bä cuaama.

⁴⁶Cama bä bluca lä cui, showadi Yai Bada e yafi jamö bä yododaö nosi blacäcodima. Cama bä yafibö jamö bä iyaö çai çocamodima. Bä iyamayou bufi doblaoma.

⁴⁷Yai Bada a lä cui, showadi a nofi dodijaö doablamaje. Dodijidawä bä cuoma yalo, öjamö bä lä bälöle bä blucanö, bä nofimamaje. Inaja bä cuaalanö, Yai Bada tänö bä

jucäaö lä nocamono wei bä lä cui, Jesucristo ebä nija bä yädäblamaö nosi blacäcofälöma.

Hechos 3

¹Bei. Yai Bada nija showadi bä nö bayeli nacaobä tä cublou däjä, motoca a yadodafälöö däjä, Yai Bada etä yafi jamö Pedro, Juan sho cäcöbö alayoma.

²Öjamö, bä lä fablaaö wei jamö, a wälo juno lä mlai a bälacquemaje, Dodijidawä yoca äfa lä jilabou wejei jamö. Öjö yoca lä jolale jamö, bä lä faö wei bä nija a nofi ojode tablamobä, showadi a lomabodimaje, a nacobä. A oshe lä cublono wei däjä, a wäldio fa showadaonö a li wäldioma.

³Öjö a lä cuinö, Yai Bada etä yafi jamö Pedro, Juan sho cäcöbö lucäo fa dalalönö, a nofi ojode tablamobä, a nacoma.

⁴Öjö nija cäcöbö mamo fa showaicunö, Pedro a wä fama. —Camiyä yafäcö nijamö mamo da showaicu.

⁵Öjö cudeenö, a mölaa fa showadaicunö, öjö cäcöbö nija a mamo showadaliyoma ma cui,

⁶abinaja Pedronö a nowa taö nomöjööma. —Blada ya bä tabou ma mlai, ya tä lä table tä ja, bäfä nia yai dobäo. Nasaleteli Jesucristo a wä lojodenö, wa fa ublaicunö, a da ju.

⁷Inaja a fa cunö, Pedronö jayu boco fa dälänö, a fa ublamaimadunö, öjö däjä showawä, yedu bei mamicö ma cui, bei wäyamobö ma cui, a jödödöwä jifudou showalayoma.

⁸Öjö a lä jifudole däjä, a shi jaliwä çai yudu yudumou showadaoma. A çai lojode juda judaablaloma. Öjö däjä, Yai Bada etä yafi jamö cäcöbö çai lä lucäle däjä, a wä çai yudu yudumou showai, a wä çai juda judaablalou showai, cäcöbö çai lucälayoma. Yai Bada a nofi doablaö dodijioma.

⁹Yai Bada e yafi jamö bä bluca lä cuono wei bä lä cuinö a juu dalalemaje. Yai Bada a nofi lä doano wei, a wä çai jililemaje.

¹⁰A nö çai öjöbölemaje. Yai Bada e yafi ja, Dodijidawä a wäfa yoca lä jilabou wejei jamö, a wäldiwä lä lodiono wei a malä cuono wei, a nofi ojode tablamobä showadi a lä nacono wei. Öjö a dodijidablaliyoma yalo, bä bufi shädayaimoma. Bä shi bluca çai jalimolayoma.

¹¹A juno lä mlai a wälo lä cuinö, Pedro, Juan sho cäcöbö juwäbou showao däjä, ai bä lä cui bä ä çai bluca läläaimama. —;Shädayai! ¿Wedi tä mayo li dodijiwä? —bä bufi wedinajamolanö, bei bä cuma. Tä yafi yädäa lä boale ja bä cuoma, Salomo tä äfa yafi lä jilabolajei jamö.

¹²Bä bluca lä çocamole tä fa dalalönö, abinaja Pedronö bä nowa tama. —Isaeli wama ecö. ¿Wedi tä ja, wamacö bufi li wedinajamou cule? ¿Wedi tabä camiyä yafäcö nija

wamacö mamö li showaa cule? Ei yama a lä jumale, camiyä yafäcö a lojodenö tä cublonomi, camiyä yafäcö dodijaö lä showadaono wei tänö mlai.

13Bämacö nö badabö Ablaamö a ma cui nija, Isaacö a ma cui nija, Jacobo a ma cui nija, öjö bä nija a lä bufiblamou wei a lä cuinö, Jesús a doblao damalalema. ¿Öjö tawä? Öjö Jesús a lä cui, Yai Bada a nosie yai lä juaö wei a, bada bänö a shäbeje, wama a noshi lä öjödabono wei a lä cui. Biladonö öjö a nia ma jujeblano wei ma cui, öjö a mamö mötälä däjä, wama a waia dicolema.

14'Yai Bada a wä yai juabä, a ma yaiono wei ma cui, öjö a shino ma bejedimono wei ma cui, wama a wailema. Bilado wama a fa wälinö, a lä unocai wei wama a yai shino jujeblamaö bufi doblao dicooma.

15¿Öjö tawä? —a cuma—. Täbä lä demidamaö wei, wama a shäa dicomalema. Wama a ma shämaleno wei ma cui, Yai Bada tänö a demi jocädamaö çolayoma. Camiyä yamacönö, yama a demi daa çolalema.

16'Ei a wälo lä cui, wama a lä dale, eja wama a lä möle, öjö Jesús a wä lojodenö bei a li lojodoblou çolayoma, Jesús yafä a nofi mölabou yalo. ¿Öjö tawä? Jesús yafä a nofi lä mölabole tänö, cafä wamacö nijamö ei a wälo demi ublaa wawädoa lä cule.

17'Bei —a cuma—. Iba wamacö. Cafä wamacö ma cui, cafä wamacö nija bä bada lä läo wei bä ma cui, wamacö bufi mojuduoma yalo, öjö wama tä taö dicooma. Öjö ya tä daö.

18Öjö ma cui, yedu jamö Yai Bada a wäno wäyälwä bä a fa cadidonö, tä a wäyäo balöomaje. A shömabä a lä yaileno wei e lä cui, öjö a nö nia lä bleano wei, tä a çai wäablalaö showaomaje. ¿Öjö tawä? Fei däjä tä a bejedi wawäblaliyoma. Wamacö cuaaö lä dicoono wei tä ja, Yai Bada tänö tä a bejedi wawäblamalema.

19'Öjö cudeenö, bämacö nowa taö lä cule —a cuma—. Wälidiwä tä ja, bä bufi da lädalü. Yai Bada nija bä bufi da cuicu. Wamacö doblou lä mlaono wei tä lä cui, tä nowa mladamabä. Inaja wamacö cuaaö ja, tä dodijidablamaö fa çolonö, Yai Bada tänö wamacö bufi lojodoamadibä.

20Jesús a çai shömaö çobä, a shömabä a lä yaileno wei a lä cui.

21Fedu jamö Jesús a cublaa balöadayoa. Eja Yai Bada tänö tä bluca cadejeblaö lä bufiöle däjä, a shömaö ço wä. Inaja Yai Bada tä malä cuno wei. ¿Öjö tawä? Yai Bada a wäno wäyälwä bä a fa cadidonö, öjö tä afa wayoaö malä balöono wejei.

22Moisesi a ma cuinö, Jesucristo a wäfa wäyäo balöoma. Abinaja tä a cuu. Yai Bada a wäno wäyäbä, camiyä wale shömaö lä cuaano weinaja, cafä Isaeli wama ecö nodiwä nija, ai a nia shömaö cuo nomöjöö. Öjönö wamacö yömöläö lä bädao wei tä ma cui ja, wama a wä nia jiliaö.

23Öjö Yai Bada a wäno wäyälwä a nia lä shömaö wei a lä cui, ai anö a wä jiliaimi ja, Yai Bada ebä nija a nia çocaomi. A nia nomamaö. '¿Öjö tawä? —Pedro a cuma—. Einaja tä a cuu.

²⁴Fei dǎjä tä lä wawǎblöle, Yai Bada a wǎno wǎyǎlewǎ bä bluca lä cuono wei bǎnö, öjö tä ǎfa wǎyǎmaje. Samuel a ma cuinö, bä cublou lä nodiono wei bä ma cuinö, ei tä lä wawǎblöle tä ǎfa bluca wǎyǎmaje.

²⁵¿Öjö tawǎ? Yai Bada a wǎno wǎyǎlewǎ bä cuo lä balöono wei, wama ecö nodiwǎ. Cafǎ wamacö nö badabö nija Yai Bada a wǎ nö lä wǎono wei dǎjä, abinaja Ablaamö a nowa tama. Bluca bä bǎlöjowǎ lä yaiblai bä ma cui, ijilufǎ ebǎ nodiwǎ nija bä nia bayeliblamou mö feduo. '¿Öjö tawǎ? —a cuma—. Einaja tä ǎ cuu. Cafǎ wamacö lä cui, öjö Ablaamö wama ecö li nodiwǎ waiquiwǎ.

²⁶Öjö cudeenö, Yai Bada a wǎ yai lä juaö wei a fa wawǎmalönö, cafǎ wamacö nija a shömöa balölema, wamacö doblou lä mlai tä ja, wamacö fe bluca fa dadomalönö, wamacö yai bayeliblamobǎ —a Pedro cuma.

Hechos 4

¹Öjö bä nija Pedro, Juan sho cǎcöbö ǎ faö showao dǎjä, bada bǎnö cǎcöbö nabǎ waloaliyomaje. Nofi bǎyǎalewǎ blowǎjǎwǎ bä ma cui, Yai Bada etǎ yafi nowamabeje bä çai lä cuono wei a ma cui, saduseo bä çai bada ma cui, öjö bä bluca icuquema.

²Jesús a wǎfa wǎyǎböma yalo bä jushuoma. ¿Öjö tawǎ? Jesús a demi jocädou lä culayono weinaja, yanowamö täbǎ nia demi çai jocädou çö, cǎcöbö nofi cuu jushuama cudeenö, bä bada jushuoma.

³Öjö dǎjä cǎcöbö juwǎa showalemaje. Tä mö weyaa jaödalayoma cudeenö, cǎcöbö fe lao fe jalubǎ, cǎcöbö didiquemaje.

⁴Öjö ma cui, Pedro, Juan sho cǎcöbö nija tä ǎ lä jilileno wejei ai bä bluca mö feduwǎ lä cuinö tä ǎ bejedi bufiblaö fa showadalojenö, Jesucristo ebǎ bluca cublaliyoma. Öjö dǎjä, Jesucristo ebǎ lä cui, jai 5.000 bä wǎlo cublou majölayoma.

⁵Öjö tä fena ja, judio bä bada lä nosiemou wei bä ma cui, ai bä çai bada ma cui, Moisesi tä ǎ ja täbǎ lä damaö wejei bä ma cui, Jelusale jamö öjö bä bada çöcablaliyoma.

⁶Anasi lija bä yododoblaliyoma, nofi bǎyǎalewǎ a bada lä cui lija. Öjö bä lä çöcablaliyono wei jamö, Anasi ai ebǎ cuo mö feduoma, Caifasi a ma cui, Juan a ma cui, Alejado a ma cui, öjö ebǎ bluca cuo mö feduoma.

⁷Pedro, Juan sho cǎcöbö fa mötalömabalöjenö, cǎcöbö wǎlimaje. Abinaja cǎcöbö nowa tamaje. —¿Wedi tä lojodenö, öjö wafǎ a li wǎlo jalomalema? ¿Wedi a wǎnö, wafäcö inaja li cuaaö bashio? —cǎcöbö nowa tamaje.

⁸Öjö dǎjä, Yai Bada tä Bufinö Pedro a fa jödödöblalönö, a wǎ juo shalilioma. —Bada wamacö lä läo wei wamacö. Wamacö bufi lä walalai wamacö çai bada.

⁹Ei a wǎlo juu lä mlaono wei a lä cui, wama a bayeliblaö wǎlii ja, a lä jalolayono wei wama tä çai wǎlii ja,

- 10** Bä yömöca da daicu, öjö lä. Cafä wamacö ma cui nija, Isaeli bluca ebä ma cui nija, ya wə wawädou showadaobä. Nasaleteli Jesucristo a lä cui, fii balitama defi ja wama a lä shämaleno wei a lä cui, Yai Bada tänö a demi jocädamaö çolayoma. Öjö a wə lojode showawänö, ei wama a wəlo demi ublaa dabläö lä cule.
- 11** Jai maa mabä ja, wama a yafi nia lä itamaö wei wamacö bada lä culenö, maa wama ma lä waileno wei, öjö Jesucristo a li waiquiwä. Öjö wama ma lä waileno wei, fei däjä a yafi colo lojodoobä, ma yai li cublou nomöjölayoma.
- 12** Ai a nija bamacö nia lä jucäamou wei a cuami. Jödödöwä täbä lä bälöblai täbä ma cui nija, ai a wəfa wäyämamou malä mlai, bamacö jucäamobä —Pedronö bä nowa tama.
- 13** Pedro, Juan sho cäcöbö ʔ waiteli lä juono wei tä fa dalalöjenö, bada bä bufi wedinajamoma. Oni sibä ja, cäcöbö damamou fe balojoono malä mlaono wei. Showadi ai bä cua lä bädalenaja cäcöbö cuo mö malä feduono wei. Bä bufi fa möblalunö, “Jesús nija showadi cäcöbö lä nocaablalodino wei cäcöbö nofi yaiwä”, cäcöbö nofi tadalemaje.
- 14** Öjö ma cui, cäcöbö nofi ma wəlibono wejei ma cui, a lä jalomaböleno wei a çai ublaoböma yalo, bä ʔ läobä tä cuonomi.
- 15** Öjö däjä, sibo jamö cäcöbö çai famaö fa bufijenö, bä lä yododoono wei jamö, bada bä ʔ bluca wayou juoma.
- 16** Abinaja bä nowa tayoma. —¿Wedinaja bei bäma cäcöbö li taamabä tawä? Ei cäcöbö ʔ lä fafe cäcöböno, tä nö lä quiliiji tä malä wawämaböno wei. Bäma cäcöbö ʔafa jolemou tabä tä cuami waiquiwä. Jelsaleteli bä blucanö, öjö tä daö malä waiquilajei.
- 17** Öjö ma cui, ei tä ʔ lä wäyäfe, tä ʔ jilimou blaucublou mlaobä bäma cäcöbö ʔ shino da wasö, moli a bädawä ma cui nija Jesús a wəfa wäyäbö çödaaö mlaobä —bä nowa tayoma.
- 18** Öjö cudeenö, cäcöbö naca fa çomalöjenö, cäcöbö wasöo dodijiomaje. —Jesús wafä ʔafa nia wäyäo çödaaimi. Öjö etä ʔ ma cui ja, wafä bä nia yömöläo çödaaimi —bä cuu fe blacäjoma.
- 19** Cäcöbö ma wasöno wejei ma cui, Pedro, Juan sho cäcöbö ʔ juo ja, abinaja cäcöbö cuma. —¿Wedi jamö tä lä cui tä yai dodijidawä, öjö lä? Yai Bada etä ʔ yai jilimamou mlai ja, cafä wamacö lä cuu wei, ¿öjö tä ʔ shino yai juamamobä daanö? ¿Wedinaja cafä wamacö bufi li cuu? Ma, cafä wamacö ʔ nia yai juamamoimi.
- 20** Yafä tä lä möno wei tä ma cui, yafä tä ʔ lä jilileno wei tä ʔ ma cui, yafä tä ʔ wäyäo mladobä tä cua malä mlai —cäcöbö cuu mö feduoma.
- 21** Cäcöbö wasöoje ja, bada bä ʔ nö quiliama. Öjö däjä, cäcöbö jujeblalemaje. Cäcöbö nö ninili bleamaö bufi ma doblaono wejei ma cui, yanowamö täbä nija bä quilima. Täbä shi doo malä waiquiono wei. A lä jalomaböleno wei tä nowa ja, bluca bänö Yai Bada a nofi doablaamaje.

22Öjö a lä cui, Yai Bada tä lojode dablabeje, a lä jalomaböleno wei a walo lä cui, a badao malä waiquiono wei. A waldio showao dāja, lasha 40 a malä jayublamaleno wei.

23Cäcöbö fa jujeblalöjenö, cama ebä nija cäcöbö çoblou lä çono wei jamö, cäcöbö a nö wäoma. Nofi bäyäläwä blowäjäwä bä ma cui, bä bufi lä walalai bä bada mö feduwä ma cui, öjö bä wano wäyaböö showadaojoloma.

24Öjö cäcöbö a fa jililäjenö, Yai Bada nija cama bä a bluca faö showadaoma. —Bada tä. Yai Bada wa tä. Judu wa mösö lä tablaleno wei wa. Ulifi a bada ma cui, modu ubä lä cublai ubä ma cui, wa ubä tablalema. Fedu jamö bä bluca lä culadi bä ma cui, bita jamö bä bluca lä cule bä ma cui, mau jamö bä bluca lä cublai bä ma cui, wa bä bluca lä tablaleno wei, öjö cafä wa dodijiwä.

25Wa wä juamobä, camiyä yamacö nö badabö David a lä cuono wei, bei wa Bufinö wa wä macocamama. Abinaja wa cuma. ¿Wedi tä tabeje, judio bä lä mlai bä jushudou fe balojolayoma? Öjö bä shomi lä cuinö, ¿wedi tä tabeje, Yai Bada a nofi jole jole li washublalamaje?

26Bä bälöo lä dodijio wei bä bluca lä cublai, bä wayu itoblaliyoma. Bä bada lä läo wei bä lä cui, bä çocablaliyoma. Bada tä lä bufibrilamou wei tä ma cui, cama e lä yaileno wei a ma cui, cäcöbö nabä queobeje bä toujublaliyoma. 'Einaja wa cuma —Yai Bada nija bä cuma—.

27Eja, Jelusale jamö bä mada toujablei. Elode a ma cui, Boşio Bilado a ma cui, judio bä lä mlai bä sho, Isaeli nodiwä ebä çai bluca sho, öjö bä bluca çocablaliyoma. Afä wa lä yaileno wei a lä cui, öjö Jesús a nabä çocamoamaje.

28A nia lä taamano wejei, yedu jamö ma cui, cafänö wa tä taamaö bufi doblao waiquiona. Wa tä taamaö bufi fa doblaonö, cafä wa lojodenö wa tä wawäblamalema.

29'Fei dāja ma cui, ei wa bä a jiliaö, Bada tä —bä cuma—. Bä jowa waitelimou bufi doblao. ¿Öjö tawä? Cafä wa wä juamobä yamacö lä cui, yamacö bufi da lojodomabo, quili mlai ja, afä yama tä a wäyöö fe yadiobä.

30Yama tä a wäyabä jamö, bä lä jalili wei bä çai da jaloma, cafä wa mayo dablamobä. Wa wä juamobä, afä wa lä yaileno wei a Jesús lä cui, öjö a wä lojodenö, tä nö lä quiliiji yama tä bluca wawämaö showadaobä —bä cuma.

31Yai Bada nija bä a faö waicou dāja, bä lä çocablono wei a yafi lä cui, a yafi quida quidamou nö quiliama. Öjö bä bluca lä cui, Yai Bada tä Bufinö bä fa jödödöblalunö, bä quili mlai ja etä a wäyöö waitelblou showadalaliyomaje.

32Jesucristo bufilewä bä lä cui, bä bufi shedecou mlai ja, moli tä ja bä bufi bluca yaimoma. Bä bluca lä tabono wejei bä ma cui ja, “Ei iba moli tä li cuobä”, bä cunomi. Bä bufi läablalou mlai ja, bä madofibö nofi bluca ibamayoma.

33Jesucristonö bä lä shömöleno wei bä lä cuinö, Bada tä Jesús a wafa demi jocädou wäyöje dāja, Yai Bada a lojode damoa dodijia showadalaliyoma. Yai Bada tänö wawadowä bä bayelibläo cuaama.

³⁴Cama bä nija, moli a ma cui a jolimobä a cuonomi. Abinaja bä showadi cuaama. Ulifi bä nofi lä tabono wejei bä lä cuinö, blada bä ja bä ulifibö jöböamaje. Yafi bä lä tabono wejei bä ma cuinö, inaja showawä, bä yafibö jöböamou cuoma, blada bä ja. Öjö bä ja, bä blada lä doano wejei, bä blada çai fa waloostenö,

³⁵Jesucristonö bä lä shömöleno wei bä nija, bä blada jöböamaje. Öjö bä lä cuinö, bä lä jöli wei bä dobäo fe dolemou nomöjöomaje.

³⁶¿Öjö tawä? Inaja showawä, Shibleтели ai a çai cuaaö mö feduoma, José a wafa lä cuono wei. Lewi nodiwä öjö e li cuoma. Showadi täbä bufi lojodoaamaö cuaaö cudeenö, Jesucristonö bä lä shömöleno wei bä lä cuinö a wafa Benabei jilaa nömöjöquemaje.

³⁷Öjö Benabei a lä cuinö, cama etä ulifi fa jöböcönö, blada bä dälema. Öjö bä blada çai fa waloicunö, Jesucristonö bä lä shömöleno wei bä nija bä jöböquema, bä lä jöli wei bä dobäo mö feduobeje.

Hechos 5

¹Inaja bä ma cuaaö däjä ma cui, abinaja Anania a cuaaö dicooma, bä suwäbö Safila sho cäcöbö lä cui. Cama a ficalibö ca fa jöbömoicunö, blada bä dälema.

²Bä suwäbö e sho cäcöbö a wayou balöo ja, ai bä blada mashi jöyauema. Ai bä blada mashi lä cui, Jesucristonö bä lä shömöleno wei bä nija, jai bä comi jöböquema a wä cuaama.

³Öjö ma cui, abinaja Pedronö a nowa tama. —Anania. ¿Wedi tä tabä fecula bada a Sadanasi nija bei wa bufi li lulumoa dicolayoma? ¿Wedi tabä Yai Bada a Bufeni nija wa li jolemolayoma? Afä ficali wa täca lä nomöjöqueno wei täca nowa ja, wa bä blada lä däleno wei, wa bä mashi tabou malä showale.

⁴Wa täca jöböaö showao mlao däjä, afä täca cadidiwä cuoma. Wa täca fa jöböcönö, öjö täca nowa ja wa bä blada lä däleno wei, afä bä çai blada cuo showaoma. Wa bä jöböaö bufi doblao ja, wa bä jöböabä bä li cuoma. Wa bä noshi umabou bufi doblao ja, wa bä noshi çai umabobä. Einaja tä yai ma cuono wei ma cui, ¿wedi tä tabä, jai wa bä comi jöböquema bei wa wä li cuaaö dicooma? Yanowamö yamacö nija wa jolemonomi. Yai Bada nija wa yai jolemoa dicolayoma —Pedronö a nowa tama.

⁵Ananianö öjö a wä fa jililänö, a nomawä wäcädou showalayoma. Öjö tä a lä jiliano wejei, bä bluca quilia fe balojolaliyoma.

⁶Fiya bänö, acadafu sicönö a nomawä fa çablalöjenö, sibo jamö a çai fa alujenö, a didiquemaje.

⁷Inaja tä cublou waiquilyono wei ja, tä nö fa dedejedalunö, öjamö lä bä suwäbö e mojadi waloa jäqueyoluma.

⁸Öjö nija Pedro a wä faö nomöjöoma. —Ficali täca nowa ja, ¿einaja bä cudale wafä bä dälema? —a cuma. —Awei —a jole cuma—. Wa lä cufenaja bä cudale yafä bä dälema —a cuma.

⁹Einaja a cuu ja, abinaja Pedronö a nowa tama. —¿Wedinaja wafäcö bufi cuu fa dicoonö, inaja bei wafäcö nowa li tayoma? ¿Wedi tabä Yai Bada wafä a Bufi mölamabä, bei wafäcö li wabäo dicoblaoma? Bei. ¿Feyalofä a nomawä lä didiqueno wejei, bä mamicö jowa blölölömou ça lä cuimi! Öjamö lä, cafä wa nomawä nia bäläo nomöjooje —a cuma.

¹⁰Pedro a cotä ja, a suwä fa wäcäblaicunö, a waicou showadaoma. Fiya bä fa falönö, a nomawä fa dalalöjenö, sibo jamö öjö a çai aa nomöjölayomaje. Bä feyalobö a didia lä balöqueno wejei jamö, öjö a didia yädäquemaje.

¹¹Jesucristo ebä bluca lä cui, bä quilii dodijioma. Ai bä ma cui, tä a lä jiliano wejei bä bluca çai quilii fe balojooma.

¹²Jesucristonö bä lä shömöleno wei bä lä cuinö, Jelusaleteli bä nijamö, tä nö lä quilijii bluca tä wawämamaje. Yai Bada etä yafi yädäa lä boale ja, showadi bä bluca yododblaama, Salomo e afa yafi lä cule jamö.

¹³Ai täbä lä cui, öjö bä nija täbä jole jole yädäblou quilima. Öjö ma cui, Jelusaleteli bä lä cuinö, “Öjö bä nofi yai dodijaö”, Jesucristo ebä nofi tabou fe balojoomaje.

¹⁴¿Öjö tawä? Jesucristo a bejedi fa bufilöjenö, showadi bä yädäblou nosi ma blacäcono wei ma cui, ¿jöjö däjä yai! Walo bä ma cui, suwä bä ma cui, Bada tä nija bä bluca yädäblou dodijilayoma.

¹⁵Jalili bä jalomaö fa dalalöjenö, bä shi fa jalimolunö, cama jalili ebä çai bluca sibolayomaje. Pedro a jayuabä jamö, bei yo casö jamö bä jalili blaaquemaje. Täbä maqueobä täbä ja, bä maqueaquemaje. ¿Öjö tawä? Öjamö lä Pedro a jayuaö däjä, “Bei a malashinö bä fa jöyablamafälönö bä jalobä”, a nofi tabomaje.

¹⁶Jelusaleteli bä shabonobö jamö ai bä yanobö lä siboblamono wei jamö ma cui, ai bä bluca çai waloblaaö mö feduoma. Jalili bä ma cui, bä lä feculaböono wei bä ma cui, öjö bä çai fa waloicujenö, bä bluca jalolaliyoma.

¹⁷Öjö ma cui, nofi bäyäälewä a bada lä cui, a bufi jushujuo fe balojooma. Cama nija bä cuo mö lä feduono wei bä saduseo ma cui, öjö bä bufi çai bluca jushujuo mö feduo showaoma, Yai Bada yafi jamö bä lä badamou wei bä lä cui. Jesucristonö bä lä shömöleno wei, bä nofi doablamou ayao cudeenö, bä jushuoma.

¹⁸Öjö däjä, bä juwäa fa çomalöjenö, bä doblou lä mlai bä fe lä laono wei jamö, bä fe laa çomaquemaje.

¹⁹Öjö ma cui, didi däjä Yai Bada tänö ajele etä fa shömöludunö, bä fe lä laono wei yoca fa caloblalönö, bä öböa siboblaö çolayoma. Abinaja bä nowa tama.

²⁰—Yai Bada etä yafi jamö wamacö cua fa çolunö, bä yömöläo da çoduje. Fei däjä, Yai Bada nija dodijidawä wamacö cua lä nomöjöle, bä a da wäyämö —bä nowa tama.

²¹Ajele a wä fa jililäjenö, Yai Bada etä yafi jamö bä lucäa fa fenalunö, tä a wäyääo ço fenaomaje. Bei. Bä nia lä yododano wei jamö, nofi bäyäälewä a badanö, cama ebä çai waloa fenaquema. Öjö däjä, Israeli ebä bada lä cui, bä bluca naca fenaalalema, bä a

wayobä. Bä bluca fa çoçablalunö, Jesucristo ebä nia çoäö fa fenaöjenö, ai ebä shömölemaje, bä fe lä lamaqueno wejei jamö.

22Öjö ma cui, bä fe lä laono wei jamö bada bä waloo däjä, bä cuonomi. Öjö däjä, bä cuono lä mlai tä ʔ wäyäö çoçolomaje. Abinaja bä cuma.

23—Bä fe lä lao wei tä yafi jamö, yoca lojodooma ma cui, sibo jamö yoca nofi lä läbou wejei bä läo ma showao däjä ma cui, yama yoca fa caloblalönö, a yafi blocooma —bä nowa tamaje.

24Öjö däjä, öjö tä ʔ fa jililäjenö, bä bufi wedinajamolayoma. Yai Bada etä yafi nowamabeje bä çai lä cule a bada ma cui, nofi bäyäalewä blowäjäwä bä ma cui, “Shädayai. ʔWedinaja bei tä nia cublou nomöjöö, öjö lä?”, bä bufi cudaliyoma.

25Öjö däjä, ai a çoçlou fa nomöjolonö, öjönö bä yömöläö nomöjööma. —ʔQuija, quija! Wama bä fe lä laqueno wei bä lä cui, Yai Bada etä yafi jamö bä cua çoä lä cubiyei. Täbä yömöläö çoä lä cubiyejei —a cuma.

26Öjö däjä, Yai Bada etä yafi nowamabeje bä çai lä cule a bada lä cuinö, cama ebä fa nacalänö, bä çoä çoçlemaje. Yanowamö täbä nija bä quilima yalo, dodijidawä bä öböalalefälömaje. “Maa ma bänö yamalecö shäö mlaobeje”, bä bufi fa cunö, bä icala öbömanomije.

27Bä çai waloo fa çoçujenö, bada bä lä yododoono wei jamö, bä mötaleblamalemaje. Nofi bäyäalewä a bada lä cuinö, abinaja bä nowa tama.

28—Jesús wama a wäfa wäyäö çoçäaö mlaobä, bamacö wasöö ma dodijiono wei ma cui, Jelusaleteli bä nijamö, öjö wama tä ʔ jowa jödödöblamaö waiquia lä cule. Öjö bädawä mlai, öjö a lä shämono wei a lä cui, camiyä yamacö nija wama tä nowa jowa shadimabou bufi doblao —a cuma.

29Öjö ma cui, Pedro, Jesucristonö bä lä shömöleno wei ai bä sho, abinaja bä cuma. —Yai Bada yama a wä yai jiliabä yamacö. Yanowamö wamacö ʔ ma läo wei ma cui, bamacö ʔ çai nia jiliaimi.

30Fii balitama defi ja wama a fa basumacönö, Jesús wama a shämalema. Wama a ma shämaleno wei ma cui, Yai Badanö a demi jocädamaö çoçlayoma, bamacö nö badabö nija a lä bufiplomou wei a lä cuinö.

31ʔÖjö tawä? A nö Bada öjöböamobä, cama Yai Bada jayu boco mashi jamö, a döçamabou lä culadi. Yanowamö täbä jucäabä, öjö a Bada. Wälidiwä tä ja, Isaeli nodiwä ebä bufi lädamabä, a Bada tablamalema, bä doblou lä mlai tä ma cule, tä nowa mladamabä.

32ʔÖjö tawä? Tä lä cublaliyono wei yama tä ʔfa wäyäbä, öjö yamacö. Yai Bada a Bufi ma cuinö tä ʔfa çai wäyäö. A wä lä juaö wejei bä nija a Bufi jöböamou —bä cuma.

33Inaja bä cuma yalo, bä bada jushudou fe fa balojolonö, bä shäö bufi doblaomaje.

34Öjö ma cui, bä lä yododano wei bä nijamö, ai a faliseo lä cui a bada ubladaliyoma. Camalieli a wäfa cuoma. Moisesi tä ʔ ja täbä lä damaö wei öjö a bada cuoma. Judio bä

blucanö a nofi tabomaje. Öjö a fa ubladalunö, Jesucristonö bä lä shömöleno wei bä lä cui, bä sibomaö balöo bufima, cama bada bä ą wayou juo balöobä.

³⁵Öjö bä fa famalöjenö, bada bä lä yododoono wei bä nija abinaja Camalieli a cuu juoma. —Isaeli wama ecö. Ei wama bä nia lä taamaö wei tä ja, bä bufi da moyaweicu. ¿Öjö tawä?

³⁶Ei tä cublou showao mlao däjä, ai tä wawäblou mada balöoblei. Öjö Deuda a wafa lä cuono wei a fa wawäblalönö, a wä bada wäyämamou fa cuaanö, cama nija bluca bä lulolayoma. Öjö nija jai 400 bä nocaoma. Öjö ma cui, a fa shälöjenö, cama ebä bluca lä nocamabono wei bä mada sheleleblalui. Öjö däjä, tä ą jilimamou çödaaö mlai, tä ą mladou showalayoma.

³⁷Öjö a nodi jamö, Calileateli a Judanö, cama ai ebä lulubou nomöjööma. ¿Öjö tawä? Bämalecö ąfa bluca da onimablejei däjä, a wawäblaliyoma. Öjö a fa shälöjenö, cama ebä lä nocamabono wei bä bluca çai sheleleblou nomöjölaiyoma.

³⁸Fei däjä ma cui, abinaja ya cuu ja wamale ą da jililä. Ei bä lä cui bä yabäca dijejä. Bä cuobä. Ei tä ą ma tabolajei ma cui, yanowamö tä ą bädawä ja, tä ą cudio mlaicätä.

³⁹Öjö ma cui, ei Yai Bada tä mayo waiquiwä cua ja, öjö bä nija wamacö nö nia walojaimi. Yai Bada tä ma cui nija wamacö ą läo dicoo wei, ¿öjö tawä? —a cuma.

⁴⁰Inaja a lä cuu wei, a wä jililemaje. Jesucristonö bä lä shömöleno wei bä lä cui, bä lucäa fa çomalöjenö, bä si yafelilalemaje. Jesús a wafa wäyäo çödaaö mlaobeje, bä wasöo çomaje. Öjö däjä, bä jujeblaö showalayomaje.

⁴¹Bada bä lä çöcaono wei jamö, bä faa çölayofälöma. Jesús a nowa ja bä nö li bleaama cudeenö, bä bufi doblaloma. Inaja Yai Bada tänö bä taamaö bufi doblao ja, bä bufi yai doblaloma.

⁴²Yai Bada etä yafi jamö ma cui, cama bä yafibö jamö ma cui, showadi bä damaö fe yadiomaje. Täbä yömöläöje ja, abinaja bä cudima. —Yai Bada tänö a shömabä a lä yaileno wei a lä cui, öjö Jesús a waiquiwä.

Hechos 6

¹Bei. Öjö däjä, Jesucristo nija bä lä nocaö wei ebä blucablou däjä, cama bä showawä bä ąfa tayoma. Clesiateli bä caficö ą lä däleno wejei bä judio lä cui, bä nacömoma, cama judio bä caficö ą lä showabono wejei bä nija. Nii showadi bä jöbäo lä shedecaö wejei bä ja, camateliyoma bä lä feiblonö wei bä walablaö dicooje ja, bä jushudaliyoma.

²Jesucristo 12 ebä lä cuinö tä nia fa cadejeblajenö, Jesucristo nija bä lä nocaono wei ebä bluca çöcamomamaje. Abinaja bä nowa tamaje. —Yai Bada yama etä ą wäyäbä, öjö yamacö li waiquiwä. Nii bä ja yamacö yabäcamou ja tä dodijidawämi.

³¿Öjö tawä, iba wamacö? Öjö cudeenö, cafä wamacö nija 7 wama bä nia yaiaö, nii showadi bä jöbäbeje jamö, yama bä lämabobä. Bä ąfa wayoamou dao lä mlai wama bä nia yaiaö, Yai Bada tä Bufinö bä lä jödödöbou wei, bä bufi çai lä jaducui.

⁴Inaja cama bä li ma cuaaö däjä, camiyä Yai Bada nija yamacö ʾ fadibä, yama etä ʾ çai wäyädibä, showadi öjö yama tä nabä nia cadidou mö feduo —bä cuma.

⁵Öjö bä ʾ ja, bä bufi bluca fa doblalonö, ei bä ʾfa lä cule bä yailemaje. Esteban a yailemaje, a bufi cadidilanö Jesucristo a nofi lä mölabono wei a lä cui. Yai Bada tä Bufinö a jödödöbou ja, showadi a cadidoma. Felipe a çai yailemaje. Blocolo a ma cui, Nicanolo a ma cui, Dimono a ma cui, Bamena a ma cui, Nicolasi a ma cui, öjö bä bluca yaialalemaje. Nicolasi a lä cui, Adioquiатели a cuoma. Judio a jaba cuono ma mlai ma cui, öjö bä nija a fa yädäblalunö, Jesucristo nija a bufi cuquema.

⁶Öjö bä 7 lä cui, Jesucristonö bä lä shömöleno wei bä nija bä çai jumaje. Wawädownä bä bada nia fa lämabojenö, bä imicö maquelanö, Yai Bada nija bä nö bayeli nacamaje.

⁷Inaja bä fa cuaanö, Yai Bada tä ʾ jilimou blaucou cuaama. Öjö däjä, Jelusale jamö, Jesucristo nija bä nia lä nocao wei ebä blucablou dodijilayoma. Nofi bäyäalewä ai bä bluca ma cuinö, Jesucristo etä ʾ fa julejenö, a bufilemaje.

⁸Yai Bada tänö Esteban a bayelibou wawädooma, a nö çai wəlojomaboma. Yanowamö täbä nija, tä nö lä quilijii tä bluca wawämama, tä tamou dao lä mlai.

⁹Öjö däjä, Esteban nija judio ai bä ʾ läoma. Öjö Sileneteli ai bä cuoma. Alejadiатели ai bä cuo mö feduoma. Shomi bä judio lä yododaö wei yafi jamö, showadi öjö bä çocabloma, Jueblano tä ʾfa yafi lä jilabono wejei jamö. Silisia jamö bä judio lä bälöle ai bä ma cui, Asia jamö bä judio lä bälöle ai bä ma cui, öjö bä lä cui bä ʾ çai bluca läoma.

¹⁰Öjö ma cui, Yai Bada tä Bufinö a wə faö fa moyawäonö, Estebannö bä ʾ nö wəlojamanomi.

¹¹Öjö däjä, ai täbä nija Esteban a nofi washuquemaje, bada bä nija a wəfa jole wäyäbeje. Öjö bä lä cui, abinaja bä jole cuma. —Estebannö Moisesi a nö lä waiblano wei, yama a wə jililema. Yai Bada tä ma cui, tä nö çai waiblama. Yama a wə jililema —bä jole cuma.

¹²Öjö bä ʾ ja, ai bä shi bluca jalimoa showadalayoma. Bada bä ma cui, Moisesi tä ʾ ja täbä lä damaö wejei bä ma cui, ai bä ma cui, öjö bä shi fa jalimolunö, Esteban a nabä juu showadaomaje. A fa juwälöjenö, bada bä yododoobä jamö a shailefälömaje.

¹³Esteban a wəfa jole wäyäbeje, ai bä fa ublamacöjenö, abinaja öjö bä jole cuma. —Ei Yai Bada yama etä yafi lä yaibole tä ma cui, tä yafi nö waibläö dicoo. Moisesi tä ʾ ma cui, showadi tä ʾ nö çai waibläö.

¹⁴Yama a wə malä jilileno wei. Nasaleteli Jesús a lä cuinö, ei bei a yafi nia jowa wəliaö. Moisesinö yamalecö taamaö lä bufino wei tä ʾ lä cui, öjö bei tä ʾ nia jowa shomiblamaö nomöjöo—bä cuma.

¹⁵Bada bä lä yododoono wei bä lä cui, Esteban nija bä mamö fa showaicunö, wäyacu shii lä wacalamiono wei wäyacu dalalemaje, ʾjele bä wäyacu lä culenaja showawä.

Hechos 7

¹Nofi bäyäälewä a bada lä cui, Esteban nija abinaja a cuma. —¿Fei bä ʔ lä fafe, bä ʔ bejedi daanö?

²Abinaja Esteban a cuu nomöjööma. —Iba wamacö. Bada wamacö. Wamale ʔ da jililä. Camiyä bämacö nö badabö Ablaamö a lä cui nija, Yai Bada etä shij wawälayoma. ¿Öjö tawä? Mesobodamia jamö a bälöo showao däjä, Alana jamö a waloo showao mlao däjä a fa damolalunö,

³abinaja Ablaamö a nowa taö ja, a cuma. Afä wa tä ulifi tabi fa feicänö, afä wa bä fa dacönö, a da alufälö. Cafä nija ya tä ulifi nia lä jömöaö wei jamö, wa waloobä. ¿Öjö tawä? —Esteban a cuma—. Einaja Yai Bada a cuma.

⁴Inaja a nowa fa talönö, cadeo bä ulifibö tabi fa feicöfälönö, Alana jamö a bälöblaa nomöjöquefälöma. Öjamö lä bä föö e bufi fa mlaicunö, Yai Bada tänö eja a bälaa nomöjöqueyoluma, bämacö bälöa lä showale tä ulifi ja.

⁵Eja a ma bälacqueno wei ma cui, camanö tä ulifi nofi yai tabobä, wajaquemi tä wai ulifi ma cui tä jöböanomi. Tä jöböaö showadaono ma mlai ma cui, tä ulifi tabou juobeje tä ʔfa wäyäö balöo showaoma. ¿Öjö tawä? Bä ijilubö e cuo showaono ma mlai ma cui, cama nodiwä ebä nija tä ulifi nofi nia tamabou nodiablalou showaoma.

⁶Yai Bada tänö a yömölaö ja, cama nija bä nia lä nodiblono wei tä ʔfa wäa showaquema, shomi täbä nija bä nia lä bälöblaono wei tä ʔ ja. Öjamö bä nosie juamobä bä shi nia wälimabomaje. Bä nö bleaamaö showaoje däjä, lasha bluca 400 a nia jöwa famaö nodiablalou showaomaje.

⁷Abinaja Yai Bada a cuma. Bä nosie juamobä bä nia ma tabou wejei ma cui, camiyänö öjö ya bä nö nia bleaamaö mö feduo. Öjö ya bä nö bleaamaö fa balöonö, iba bä lä cuinö tä ulifi nia daafälöoje. Camiyä nija bä nö bayeli nacaobä, eja wale nofi nia cöcamoayoluuje. ¿Öjö tawä? —Esteban a cuma—. Einaja Yai Bada a cuma.

⁸Öjö däjä, Ablaamö a nia lä bayeliblano wei tä ʔ fa wäcönö, bei bä mosi sicö joyamaö bufima, cama ebä nö öjöböamobä. A wä nofi jaducubolajenö, bei bä mosi sicö joyamaö nodiablalobeje. Öjö cudeenö, Ablaamö bä ijilubö Isaacö e oshe lä cublono wei däjä,

⁸ tä mö didi fa tablamalönö, bä föö enö mosi sicö joyalema. Öjö Isaacö a lä cuinö, inaja showawä bä ijilubö Jacobo e taamaö nomöjööma. Jacobo a lä cuinö, inaja showawä bä ijilubö 12 ebä taamaö nomöjöö nodiama. Öjö 12 ebä nija bämacö yaiablalou nodiablalou showawä.

⁹¿Öjö tawä? —a cuma—. Öjö 12 bäma ecö nodiwä lä yaile bä lä cuono wei bänö, bä fäähä José e nofi wälilomaje. Cama a nofimamou ayao ja, a nofi fa wälilobenö, Ejido jamö a bälabeje a jöböquemaje, blada bä ja. Öjö ma cui, Yai Bada tänö a bayelibou fa showaonö,

¹⁰a nö ma bleaamano wejei ma cui, a bayelibladima. A bufi fa moyawämabonö, Ejido jamö a bälöo lä dodijiono wei a lä cuinö, José a nofi mölaboma. Bada a tablamalema, Ejido tä ulifi jamö a bada läobä. Cama etä yafi jamö ma cui, öjamö a çai lämaboma.

- 11'Öjö dāja, Ejido ma cui jamö, Canaana ma cui jamö, ofi tä blaucublaliyoma —a cuma—. Täbä nö ofili bleaama. Bamacö nö badabö iyabä tä cuonomi dodijiwä.
- 12'Öjö ma cui, Jacobonö Ejidoteli bä ulifibö afa nö niji jililema. Öjö dāja, öjamö bä ijilubö ebä jaba shömöa balölema, camiyä bamacö nö badabö lä cui.
- 13'Bä juu lä çono wei dāja, bä aiyobö ebä nija José a wafa fa wäamonö, a nö öjöbömolayoma. Bada a yai lä cui nija, José ebä bluca damoa showalaliyoma.
- 14'Josénö bä föö Jacobo e fa nacamalänö, cama nija bä bluca lä cuono wei bä çai naca mö fedua showamalema. Öjö bä bluca lä cui, 75 bei bä cuoma.
- 15'Öjö dāja, Ejido jamö Jacobonö cama ebä çai alayoma —a cuma—. Öjamö lä cama a yacumö fa nomalönö, camiyä bamacö nö badabö yanöcö nomablou cuaaö mö feduoma.
- 16'Bä fa nomalalunö, Siquemö jamö bei toubä maloco balaö çomaje. Öjamö lä maa maca jamö toubä didiquemaje, Ablaamönö tä ulifi lä lululeno wei jamö. Amolo bä ijilubö ebä nija, blada bä ja tä ulifi lä däleno wei jamö.
- 17'Öjö ma cui, Yai Badanö Ablaamö nija tä afa wäyää lä balöno wei tä a wawäblou bufio dāja, Ejido jamö Jacobo nodiwä ebä fa balalönö, bä blucablaliyoma.
- 18'Bä balaö showao dāja, Ejido jamö ai a bada läa nomöjöaliyoma. José nija bä jaba lä bayeliblamono wei, öjönö tä danomi.
- 19'Öjönö bämalecö nö badabö mölamalema. Bä ijilubö lä cublono wei bä wawäblamaö bufima, bä nomamabä.
- 20'Öjö dāja, Moisesi a oshe cublaliyoma —a cuma—. A çai wai liyäjäo dodijioma. Bä föö e nija a oshe lä cuono wei dāja, belibo 3 bä lublamalema.
- 21'Öjö dāja, a fa wawäblamalöjenö, bada bä tää enö a däa nomöjolema. Jai cama e dodijiwä dejemi a nofi fa taalönö, a badaalema.
- 22'Ejidoteli bä nija Moisesi a fa damamonö, cama bä bufi jaducuwä lä culenaja a cublou mö fedulayoma. A wä lä fano wei tä ma cui ja, a çai lä cuaano wei tä ma cui ja, a nö walojaö dodijioma.
- 23'Moisesinö lasha 40 a fa famalönö, cama ebä cadidiwä möö bufi doblaoma, Isaeli ebä nodiwä lä cui.
- 24'Öjö bä nija a fa waloicunö, Ejidotelinö Moisesi camateli a nö bleaamaö fa dalalönö, a nö yuabä a icuqema. A shäa showadalema.
- 25'Abinaja a bufi cuma. “Ya bä bayeliblabä, Yai Bada tänö wale lämabou a lä cule”, Moisesi a bufi cuma. “Ya bä nia lä bayeliblaö wei tä ja, iba bä bufi çai jaducua mö fedule dao”, a bufi ma cuno wei ma cui, bä bufi jaducunomi.
- 26'Öjö tä fena ja, a aa fa çolunö, cama Isaeli ecöbö afa tayou dalalema. Cäcöbö nofimayou çobä, a wä faö läoma. “Iba wafäcö. Cafä wafäcö ma cui, ¿wedi tabä wafäcö afa tayou dicoa cule? Wafäcö nö bleaamayobä wafäcömi”, a cuma.

27Inaja a cuma ma cui, a yai doblou lä mlaono wei a lä cui, a wə lafujolanö a fa jəilönö, a nowa tama. “Camiyä yamacö nija, ʔwedinö cafä bei wa li bada tamaquema, yamalecö dobroimi jömabä?”

28Weyaja, Ejidoteli wa shäa lä taleno weinaja, ʔwale nia shaö cuo mö feduo daanö?” a cuma.

29Öjö a wə fa jililänö, Madiana tä ulifi jamö Moisesi a docua mö cua showalayoma. Öjamö a fa bälöalunö, suwä a fa dälönö, bä ijilubö bolacabö ecöbö taquema.

30ʔÖjö tawä? —Esteban a cuma—. Öjamö lä, lasha 40 a faa fa çomalönö, Sinai cäcö ajede jamö, Yai Bada a wə faö bufio ja, Moisesi nija ajele etä shömöledayoma. Fii defi wacö lä wao wei jamö, tä wawälayoma, ulifi bloque jamö.

31Öjö tä fa dalalönö, tä mömou nö quilijioma yalo, a bufi mlama. Tä möö ajedeobä a blacäö däjä, Bada tä a bädaliyoma.

32Abinaja a cuma. Cafä wamacö nö badabö nija ya lä bufiblamou wei ya. Ablaamö ma cui nija, Isaacö ma cui nija, Jacobo ma cui nija, öjö bä nija ya lä bufiblamou wei ya. 'Einaja a cuma. Öjö däjä, Moisesi a quilili blösö blösömoma. Tä möö fa quilinö, a mö jöçöoma.

33Abinaja Bada tänö a nowa taö ja a cuma. Wa mamicö lä didile täcö da jayublälö. Eja camiyä ya li cua yalo, miji wa tä ulifi lä cabale tä ulifi yaia.

34Ejido jamö, iba bä nö lä bleamalajei ya bä dablaö dodijia waiquia lä cule. Ya bä a nö bleaaö jiliaö waiquiwä. Ejidoteli bä nija ya bä jucäabä, ya itou waiquia lä cule. ʔÖjö tawä? Bei. Ejido jamö cafä bäfä nia shömaö.

35ʔÖjö tawä? Einaja a cuma —Esteban a cuma—. Öjö Moisesi a lä cui, a wailemaje. “ʔWedinö bei wa li bada tamaquema, yamalecö dobroimi jömabä?”, bä cuma. Öjö ma cui, a ma waileno wejei ma cui, Yai Bada tänö bada öjö a fa tablamalönö, a shömölema, bä nö bleaabä jamö bä jucäabä. Fii defi möamo jamö, Yai Bada ajele etä lä wawälayono wei a wə ja, a shömölema.

36Öjönö bä lulubou çoma. Ejido jamö ma cui, modu Wacä u jamö ma cui, Yai Bada tä lojode dablamaö ja, tä nö lä quilijii tä bluca wawämaö cuaama, tä tamou dao lä mlai. Ulifi bloque jamö ma cui, öjamö lasha 40 a famaö lä cuaafälöno wejei jamö, inaja a cuaaö showalanö bä lulubou cuaama.

37ʔÖjö a Moisesi showawä lä cuinö, abinaja Isaeli nodiwä bä nowa tama. Yai Bada a wəno wäyäbä, camiyä wale shömaö lä cuaano weinaja, cafä Isaeli wama ecö nodiwä nija, inaja showawä ai a nia shömaö cuo nomöjöö. 'Einaja bä nowa tama —Esteban a cuma—.

38Tä ulifi blocoobä jamö, Isaeli nodiwä bä çocamolanö, bä juu lä cuaafälöno wei, öjö Moisesinö bä çai cuoma. Sinai cäcö jamö öjö Moisesi nija showawä, Yai Bada tänö cama ajele etä lä shömöleno wei a wə fama. Camiyä bamacö nö çai badabö cuoma, Moisesinö. Yai Bada nija dodijidawä bä balimi cuobä, Moisesi nija tä a bluca wäyäö fa balöonö, bamacö nö badabö nija tä a wäyäö fe dolemou nomöjööma.

39'Öjö ma cui, camiyä bamacö nö badabönö a wə jiliaö bufio dicoo fa mlacujenö, a wə juanomije —a cuma—. A wə wailemaje. Ejido jamö bä bufi mö shino yabajaoma.

40Abinaja Aaloni nija bä cuma. “Bei. Yama täbä bufi labä, täbä nö idubö da tablalö. Öjö bäma täbä çai fa balömabonö, öjö bä nija bamacö yai nocaobä. Öjö Moisesi a lä cui, Ejido jamö bämalecö lä çoleno wei a lä cui, ‘Öja lä a cule daanö’, yamacö bufi cuimi waiquiwä”, bä cuma.

41'Öjö däjä, baca ocalo a nö idubö tablalemaje. A bufi labeye a lä tablaleno wejei a ja, yalo bä öshö dodobou showaomaje. A nö idubö lä tablaleno wejei a ja, bä bufi doblalou dodijioma.

42Öjö cudeenö, wəlidiwä tä ja Yai Bada tänö bä noshi öjödabou nomöjööma, judu mösö jamö bä bluca lä culadi bä nija, bä jole bayeliblamou nomöjööbä. Öjö bä nija bä möfe bolanö, bä nö jole bayeli nacaobä. Yai Bada a wəno wəyäləwä bänö, tä lä oniblaleno wejeinaja showawä. Yai Bada a wəno wəyäö ja, abinaja ai a cuma. Isaeli wama ecö. Ulifi bloque jamö, lasha 40 wama a famaö lä cuaafälöno wei däjä, çcama Yai Bada a dodijiwä nija wama bä yalo öshö yai dodobou yaio nowa tawä? Ma. Inaja wamacö nofi cuanomi.

43Wamacö jocäö lä cuaafälöno wei jamö, öjö shomi bä nija a lä bufi blamou wei, Moloco a lä cui, öjö bei wama e yano çai jocädou cuaafälöma. Shomi bä nija a bufi blamou mö lä feduo wei a shidicali ma cui, öjö bei wama a nö idubö shino çai judou cuaafälöma. Lefana wama a wəfa shidicali lä jilaö wei. Öjö bä nija wamacö nö bayeli nacaobä, wama bä nö idubö tablalema. çÖjö tawä? Öjö cudeenö, bä nö lä nabämou wei bä nija, Babilonia tä fe biyä jamö wamacö nia bälamou nomöjöö. çÖjö tawä? —Esteban a cuma—. Einaja Yai Bada a cuma.

44Ulifi bloque jamö, camiyä bamacö nö badabönö Yai Bada etä yano tabomaje, bä bufi jaducuafälöbä. Moisesi nija Yai Bada tänö tä taamaö lä bufino weinaja, a yano tablamama. “Einaja tä mömou cuo dodijio bə”, Yai Bada a lä cuno weinaja, inaja showawä Moisesinö a yano tablamalema.

45'çÖjö tawä? Camiyä bamacö nö badabö lä cui, Josuéno bä çai waloa lä nomöjöqueyoluno wei däjä, Yai Bada etä yano çai fa juimajenö, e çai waloqueyolumaje. Yai Badanö, eja shomi bä lä bälöjömono wei bä fa yashublälönö, öjö bä bälöa läa nomöjömaquema. Yai Bada etä yano tabou fa showaojenö, nö badabö David a bälöo lä nodiono wei däjä ma cui, e yano tabou nodio showaomaje.

46'Öjö David a lä cuinö, Yai Bada a bufi doblamaboma —Esteban a cuma—. E yafi tablaö bufi doblaoma, öjamö Jacobo nija a lä bufi blamou wei a yai cuobä.

47E yafi tablaö bufi ma doblaono wei ma cui, bä ijilubö Salomo e lä cuinö etä yafi yai tablalema.

48Öjö ma cui, yanowamö bamacönö bäma bä yafi lä tablaö wei jamö, öja Yai Bada a shino Bada lä ayai a lä cui, a nia cuomi. Yai Bada a wəno wəyäləwä a lä cuno weinaja showawä. Abinaja tä ç cuu.

⁴⁹Fedu jamö Bada a yai läo. Bitä a lä cui, a mamicö li maqueobä a li. ¿Wedi wama tä yafi fa tablalönö, bei wama a nia bälömabou? ¿Wedi jamö wama a nia li yanöcömabou?

⁵⁰Cama a showawänö ¿fei täbä bluca çai tablanomi daanö? '¿Öjö tawä? —a cuma—. Einaja tä a cuu.

⁵¹Wamacö bufi nofi jifuwä. Jai Yai Bada wama a wä nofi mojudoubou, wamacö cuwä. Wama a wä juaimi. Wama tä a jiliblaimi. Yai Bada a Bufi ma cui, öjö showadi wama a wä çai waibou. Wamacö nö badabö lä cuaano weinaja, wamacö cuaaö nodiablalou showawä.

⁵²Yai Bada a wäno wäyälwä bä lä cui, ¿bä nö bluca bleaamanomi sijewä? Yai Bada a wä juamobä a lä yaileno wei a ma cui, öjö a wäfa juu wäyäo lä balöono wejei bä bluca çai shäa balöalalemaje. Öjö a wäfa juu lä wäyano wejei a lä cui, çafä wamacö lä nodiblaliyono wei wamacö ma cuinö, fei däjä wama a fa nomojolilänö wama a shämalema.

⁵³Çafä wamacönö wama tä a tabobä, Yai Bada ajele etäbä nija Moisesinö tä a ma däleno wei ma cui, wama tä a jiliaö bädaonomi —Esteban a cuma.

⁵⁴¿Öjö tawä? Esteban a wä fa jililäjenö, bä jushudou fe fa balojolonö, bä asi asimou showadaoma.

⁵⁵Öjö ma cui, Yai Bada tä Bufinö Esteban a fa jödödöblalunö, fedu jamö a mö fa nonoicunö, Yai Bada bei tä shij dalalema. Jesús a çai ublaa dalalema, Yai Bada jayu boco mashi jamö.

⁵⁶Öjö tä fa dalalönö, abinaja Esteban a cuma. —Bei. ¡Quiji tä da möje! Judu mösö ca fa jolablalunö, Yai Bada jayu boco mashi jamö, a lä yanowamöblaleyoluno wei bei ya ublaa dabraö lä cule —a cuma.

⁵⁷Öjö a wänö, bä jushudou fe fa balojolonö, bä a nacli faa showalayoma. Bä yömöcaco fa jumödalunö, öjö lä bä bluca showadawänö, Esteban a nabä läläa showadaquemaje.

⁵⁸A nabä fa queicujenö, shabono a sibo jamö a shailefälömaje. Öjö däjä, bä nia lä ishous wei bänö, camishi ebä jayua fa balölalöjenö, fiya a ublao lä yädäono wei a cotä jamö, bä jilaaquemaje. Bä fa jilaacöjenö, maa mabänö Esteban a fa shäyälalöjenö a nomamalemaje. Öjö a fiya ublao lä yädäono wei a lä cui, Saulo a wäfa cuoma.

⁵⁹Maa mabänö, inaja a ma taamaöje däjä ma cui, a wä Esteban faö fe fa yadionö, Jesucristo nija a nö bayeli nacaoma. —¡Bada tä! ¡Jesús! —a cudaliyoma—. Wale bufi da çölö.

⁶⁰Öjö däjä, Esteban a fa diyäliicunö, moli a wä çali faa çolayoma. —Bada tä. Ei wale lä shälajei bä nija, wale nö bähölö tabo dijä —a fa cudalunö, a bufi mlaa showadaquema.

Hechos 8

- ¹Esteban a shäbeje jamö, öjö a fiya Saulo lä cuono wei, a wə çai yädäoma. Öjö tä mö jalu showawä ja, Jelusale jamö Jesucristo ebä lä yododaö wei bä nö bluca bleaamabeje, bä nabä quea showadaquemaje. Bä nö bleaamaö dodijiomaje yalo, Judea jamö ma cui, Samalia jamö ma cui, Jesucristo ebä bluca sheleleomobodayoma. Jesucristonö bä lä shömöleno wei bä shino waiquio juoma.
- ²Yai Bada nija bä bejedimou bufi lä doblaono wei ai bä lä cuinö, Esteban a nomawä fa çölöjenö, a didiquemaje. A nomöa çai däbou fe balojoomaje.
- ³Öjö ma cui, Saulonö, Jesucristo ebä lä yododaö wei bä nö bleaamaö fe balojooshowaoma. Cama bä yafibö jamö a lucäblou fa cuanö, wəlo bä ma cui, suwä bä ma cui, bä läcäamaö cuaama. Bä läcäamaö fa cuanö, bä fe lamaquema.
- ⁴Bei. Jesucristo ebä lä sheleleblaliyono wei ebänö, etä ʔ wäyääo cuaamaje.
- ⁵Felipe a lä cui, Samalia tä ulifi jamö a alayoma. A fa alufälönö, shabono ai a jamö a fa çöblalunö, Yai Bada tänö a shömabä a lä yaileno wei a wəfa wäyäma.
- ⁶Felipe nija bä yömöca fa daonö, Yai Bada tä lojode lä dablamaö wei tä çai fa möjenö, öjö bä blucanö a wə jilimaje.
- ⁷Bä bluca malä jalolaliyono wei. ʔÖjö tawä? Bä lä feculaböono wei bä jalomama. Fecula ebä fa şilalamooblonö, bä docuoblofälöma. Ai bä mö feduwä lä cui, bä lä yatoliböono wei bä ma cui, bä juno lä mlai bä ma cui, öjö bä bluca çai jalomaö mö feduo showaoma.
- ⁸Öjö cudeenö, öjö a shabono jamö bä bufi bluca doblaloma.
- ⁹Öjö a shabono ja, Simón a wəfa lä cule a bada shaboli fa bälöonö, a feculamoma. A feculamou nö quiliama cudeenö, cama a wəfa çai bada wäamoma yalo, Samalia jamö bä lä bälöblai bä bufi bluca shädayaimomama.
- ¹⁰Bada bä ma cuinö, oshe bä ma cuinö, a wə bluca jilimaje. Abinaja bä nowa tayoma. —Fei Simón a lä cui, Yai Bada etä ʔafa yai lojode lä wäyämou wei, fei öjö lä a waiquiwä —bä nowa tayoma.
- ¹¹Simón a nö feculamou quiliaö nö dedeama yalo, öjö nija bä bufi shädayaimou dodijioma. Showadi a wə jilimaje.
- ¹²Öjö ma cui, Felipe a fa waloicunö, bluca bä nija tä ʔ dodijidawä wäyäma. Yai Bada tänö cama ebä çai lä cuo wei tä ʔ fa wäyänö, Jesucristo a wəfa çai wäyääo mö feduo showaoma. Öjö tä ʔ bejedi fa jililäjenö, tä ʔ bufilemaje. Tä ʔ fa bufilöjenö, wəlo bä ma cui, suwä bä ma cui, bä fe bluca ojoblamoa showadalayoma.
- ¹³Cama Simón a ma cui, öjö tä ʔ çai fa bufilänö, a fe çai ojoblamolayoma. A fe fa ojoblamolunö, Felipe nija a nocaablalou showadaquema. ʔÖjö tawä? Felipenö Yai Bada tä lojode dablamaö dodijioma. Tä nö lä quilijii tä bluca tama, tä tamou dao lä mlai. Öjö tä bluca fa mönö, Simón a bufi shädayaimoma.

- 14**Bei. Jelusale jamö, Jesucristonö bä lä shömöleno wei bä lä cuinö tä ʾa jililemaje. Samaliateli bänö Yai Bada etä ʾa bejedi lä däleno wejei tä ʾa fa jililäjenö, öjamö lä Pedro, Juan sho cäcöbö shömöa showadaalemaje.
- 15**Öjamö cäcöbö fa waloicunö, Samaliateli bä nö bayeli nacaböma, Yai Bada a Bufi lucäbä.
- 16**Öjö bä nija a Bufi lucänomi showawä cudeenö, Yai Bada nija cäcöbö ʾa fama. Bada tä Jesús a nofi mölabomaje yalo, bä fe shino ojoblamoa bälayoma.
- 17**Öjö däjä, öjö bä nija cäcöbö imicö fa maqueicunö, Yai Bada a Bufi lucäo showadaolaliyoma.
- 18**Jesucristonö bä lä shömöleno wei cäcöbö imicö fa maqueicunö, Yai Bada a Bufi lucäo lä showadaono wei, Simón a lä cuinö tä möma. Öjö tä fa mönö, blada bä dodoboma.
- 19**Abinaja cäcöbö nowa tama. —Cafä wafäcö lä cuinö, lojode wafä tä lä table tä ja wafäle da dobälö, camiyä ya ma cuinö, inaja showawä ya bä taamaö mö feduobä. Camiyä ya imicö lä maqueo wei däjä, Yai Bada a Bufi lucäo showadaobä —a cuma.
- 20**Öjö ma cui, abinaja Pedronö a nowa tama. —Yai Bada tänö no mlai ja, bämalecö ma bayelibläö wei ma cui, “Blada bä ja ya dobämobä”, ʾbei wa bufi li cuu dicowä? Shobali wacö jamö afä bladafä bä çai da culu.
- 21**Camiyä yafäcö ojudamobä jamö, cafä wa nia yädäomi. Yai Bada nija wa bufi cadidia malä mlai.
- 22**Ei wa doblou lä mlale tä ja, a bufi da lädalü, öjö lä. Wa bufi lä cuole tä nowa mladamabä, Bada tä nija a wə da wämoicu. Wa bayelibläö jətoa bälayou fa cui.
- 23**Bufi waiyou tä lä cuinö wa lä wəlidiblole, bəfä dobroimi dabläö malä waiquile — Pedronö a nowa taö showadaoma.
- 24**Simón abinaja a cuu mö feduoma. —Bada tä nija wafäle da bayelima, wafäcö lä cufenaja wale taamaö dicoo mlaobä —a cuma.
- 25**ʾÖjö tawä? Pedro, Juan sho cäcöbö lä cuinö, öjamö bä lä bälöle bä nija Bada tä ʾafa wäyäböma. A wəno wäböquema. Öjö däjä, Jelusale jamö cäcöbö ço ja, Samalia jamö bä lä bälöblai bä bluca nijamö, Jesucristo etä ʾa dodijidawä wäyäbö jayuaö çofälöma.
- 26**Bei. Felipe nija Yai Bada tänö əjele etä fa shömöludunö, abinaja Felipe a nowa tama. —A da alufälö. Motoca a queo lä mlai jamö wa fa culufälönö, yo lä jafedile yo ja wa cuobä. Jelusaleteli bä lä bälöle yo lä cui, Casa jamö yo lä shadile yo ja, wa cuicu —a nowa tama. Öjö yo lä cui, ulifi bloque jamö yo jayua.
- 27**Inaja a nowa taö ja, a aa showadalayoma. Öjö yo jamö a fa waloicunö, Ediobiateli a bada lä yädäono wei a juu dalalema. Ediobia jamö bada a lä nosiemono wei a suwä lä cuinö a bada lämaboma, cama madofi ebä bluca nowamabä. Öjö a lä cui, Jelusale jamö Yai Bada a wəfa nia Bada doblao fa tanö, a alayoma. A fa alunö,

²⁸a ço çoimama. Läläämodima cäcö jamö a befi çai läläalanö, tä a oni möfälöma. Tä a oni lä doafälöno wei tä a lä cui, Yai Bada a wano wäyäléwä Isaia etä a cuoma.

²⁹¿Öjö tawä? Yai Bada a Bufinö, Felipe nija öjö a nabä shömöquema. — Läläämodima cäcö jamö a befi çai lä läläale jamö, e da boaicu —a cuma.

³⁰Öjö cudeenö, öjö nija Felipe a fa läläicunö, a läläaö boaama. Öjö däjä, Yai Bada a wano wäyäléwä Isaia etä a lä doaö wei a wä fa jililänö, a wälima. —Miji wa tä a oni lä doale tä a ja, ¿wa bufi jaducua cube? —a cuma.

³¹Abinaja Ediobiateli a cuma. —Tä a wawämabä a cuami ja, ya bufi jaducublou mlaiçätä —a cuma. Einaja a fa cunö, cama a befi çai lä läläale täcö jamö, Felipe a döçäa ajedeamaö bufima.

³²Tä a lä doafälöno wei tä a lä cui, abinaja tä a oni cuma. Oweja a shäbeje jamö a lulumamou lä culenaja, a lulumamou cuoma. Oweja ocalo a çoicö jasömamou däjä, mamicai a cadödio lä culenaja, a mamicai cudioma.

³³A nö waiblamaje. A wäfa jole fa wäyäjénö, a shämaö bufimaje. Cama nodiwä ebä nia bälöo juomi. A bälöa mladou malä waiquilayono wei. Einaja tä a oni cuma.

³⁴Öjö däjä, bada a lä cuinö, Felipe nija tä a wälima. —¿Wedi bei tä afa li tamou dodijio, öjö lä? Yai Bada a wano wäyäléwä a lä cui, ¿cama bei a wäfa wäyämamou daanö? Ma, cama a wäfa wäyämamou mlai, ¿ai bei a wäfa wayoaö daanö? —a cuma.

³⁵Öjö däjä, Felipe a wä fama. Öjö tä a wawäa fa balömalönö, Jesús dodijawä etä a wäyää nomöjöoma.

³⁶Öjö yo jamö cäcöbö befi çai fa lälälönö, mau u jamö cäcöbö waloquema. Öjö däjä, abinaja bada a cuma. —Fei mau u da mö, fei, fei. Camiyä ya fe ojoblamou showadaobä, ¿ai bei tä läami daanö? —a cuma.

³⁷—Jesús wa wä bejedi bufii ja, wa fe ojoblamobä wa waiquiwä —a Felipe cuu mö feduoma.

³⁸Öjö däjä, bada a lä cuinö, läläämodima cäcö yanöçödamaö fa bufinö, Felipe sho cäcöbö fa itoblalunö, mau u ja cäcöbö itoquema. Felipenö a fe ojoblalema.

³⁹Cäcöbö washölöblou fa çolonö, Yai Bada tä Bufinö Felipe a däa showadalefälöma. ¿Öjö tawä? Bada tänö Felipe a dablao ço mlai ja, a bufi çai doblao ço çolayoma.

⁴⁰Yai Bada a Bufinö Felipe a däa fa showadalefälönö, Asodo jamö a bäläa fa nomöjöcönö, öjamö lä a damoa nomöjöläliyoma. Öjamö lä a jayualanö, bluca bä shabonobö jamö, Jesucristo etä a dodijidawä wäyää fa jayuaimadunö, Sesalea jamö a waloa nomöjöquema.

Hechos 9

¹Bei. Öjö Saulo a lä cui, a wä waitelimou showai ja, Bada tä nija bä lä nocaö wei bä nia jöwa waicama. Nofi bäyäléwä a bada lä cui nija a fa icuicunö,

²si oniblamalema, Damaco jamö si oni çai jubä. Öjamö, judio bä yododabä yafi bä jamö, öjö tä a oni çai fa çöblalunö, bada bä nija tä a nia oni mömaö cuaama. Öjö tä a oni fa möjenö, Jesucristo a wä lä juaö wejei bä cublawä ja, bä jömabeje. Wälo bä ma cui, suwä bä ma cui, Saulonö bä fa dalalönö, bä juwäa fa showadalönö, Jelusale jamö bä nia bococu očama bälaö çoma.

³Öjö tawä? Saulonö bä çoaö mö jufälöö däjä, Damacoteli bä nijamö a çöblou bufio däjä, fedu jamö tä shji fa bädalunö, cama a lä cule jamö tä shji bada wacacadioma.

⁴Öjö däjä, a fa wäcäblaicunö, a wä jilia showalema. —Saulo, Saulo —a cuma—. ÖWedi tabä wale nö bleaamaö dicoa cule?

⁵—Bada tä —Saulo a cuma—. ÖWedi bei wa jowa? —Wale nö lä bleaamaö wei Jesús ya wä —a cuma—.

⁶Abinaja wa yai cuaabä. Wa fa jocädalunö, Damaco shabono jamö a da yafilö. Wa nia yai lä cuaaö wei tä ja, öjamö lä wa nia yömölamou nomöjöö —a cuma.

⁷Saulonö bä çai lä juno wei bä lä cui, öjö a wä ja, mamicai bä ublajaoma. Bei a yai dabraö ma mlajei ma cui, a wä shino jiliaö buomaje.

⁸Saulo a fa jocädalunö, mamocasicö ma yobadaliyono wei ma cui, tä möblanomi. Öjö cudeenö, a fa öbölöfälöjenö, Damaco jamö a çai çöblaliyomaje.

⁹Öjamö a jubäbö cuo showao däjä, bolacabö tä mö didi ma tablamaleno wei ma cui a jubäbö cuo showaoma. A çai iyanomi showawä. A amishi çai çonomi showawä.

¹⁰Bei. Damaco jamö Jesucristo nija a lä noçao wei, a wäfa Anania cuoma. Cama nija Bada tä Jesucristo wawädwä a fa bädalunö, abinaja a nowa tama. —Anania. Anania abinaja a cuma. —Aö. ÖWedi cätä, Bada tä?

¹¹Bada tänö abinaja a nowa tama. —Shaliliwä yo afa lä jilabou wejei yo jamö wa fa alufälönö, Juda e yafi jamö, Dasoteli a wä da wäli, Saulo a wäfa lä cule. Öjamö a nö bayeli nacao lä cubiyei.

¹²Cafä Anania wa lä cui, wawädwä wa dabraö waiquia lä cule. Jai wa çöblou, wa nofi tabou waiquiwä. Bei mamocu dodijidablou çobä, wa imicö maqueo dabraö waiquiwä —a nowa tama.

¹³Öjö ma cui, abinaja Anania a cuma. —Bada tä. Öjö wa wäfa lä wäyäfe, bluca bä nija ya wäfa jilibou waiquia. Jelusale jamö afä bä lä cui bä nö jowa bleaamaö dodijioma.

¹⁴Nofi bäyäälewä blowäjäwä bä lä cuinö, eja a shömaö nomöjöomaje. Öjö bä a ja, camiyä yamalecö nia jowa oçao nomöjöö, cafä bäfä nofi lä mölabou wei yamacö lä cui —a cuma.

¹⁵Öjö ma cui, abinaja Bada tänö a nowa taö fe yadioma. —Ma, a da alufälö. Wale afa wäyää cuaabä, iba ya yaia malä waiquilöfe. Judio bä lä mlai bä ma cui, bada bä bälöo lä dodijio wei bä ma cui, Israeli nodiwä ebä ma cui, öjö bä nia bluca yömöläo cuaaö.

- 16**Wale ɸa wɔyɔä tã nowa ja, a nŃ nia lä bleaamaŃ wejei tã ja, camiyänŃ ya nia yŃmŃlaŃ —Jesús a cuma.
- 17**Inaja a nowa fa talŃnŃ, Anania a aa showalayofälŃma. A fa yafilŃnŃ, Saulo a dalalema. ImicŃ maquelanŃ, abinaja a nowa tama. —Uasi. Saulo. Cafã nijamŃ, Bada tã JesúsnŃ wale shŃmŃlei lä cufe, wa juimabã jamŃ a dablamous lä läono wei a lä cuinŃ. Wa mamocu dodijidablou ɸŃbã wale shŃmŃlema, Yai Bada tã BufinŃ wa ɸai jŃdŃdŃblou showaobã —a cuma.
- 18**Yedu, Saulo mamocu jamŃ jai yuli niyosibã cuwã täcŃ fa quelunŃ, tã möŃ dodijidablou ɸŃlayoma. A fa jocädalunŃ, a fe ojoblamoa showadalayoma.
- 19**ŒjŃ dãjã a iyaŃ fa ɸŃnŃ, a lojodoblou ɸŃlayoma. Jesucristo nija bã lä nocaŃ wei bã nija a fa yädãblalunŃ, Damaco jamŃ a fe weyablaama.
- 20**Judio bã yododabã yafi bã jamŃ, Yai Bada IjilubŃ e ɸa Jesús wɔyɔä cuaaŃ ja, abinaja bã nowa tablaama. —Jesucristo a lä cui, Yai Bada cã tã IjilubŃ waiquiwã —bã nowa tablaama.
- 21**A wɔ lä jiliaŃ wejei bã lä cui, bã bufi bluca shädayaimoma. Abinaja bã nowa tayoma. —Jelusale jamŃ, Jesús a nofi lä mölabou wejei bã nŃ lä bleaamano wei, ŒjŃ a nofi lä cui. Eja ma cui, inaja a nia cuaaŃ fa ɸŃyonŃ, Jesucristo bãma ecŃ nabã malã ɸŃblalufe. Nofi bãyãalewã blowãjãwã bã nija, ɸcama bãmalecŃ nia bãlaŃ fa ɸŃnŃ —bã nowa tayoma.
- 22**ŒjŃ tawã? ŒjŃ ma cui, Jesucristo a wɔfa wɔyɔä ja, Saulo a wɔ faŃ fa lojodoablaloimadunŃ, a wɔ nŃ wɔlojoblaliyoma. Damacoteli judio bã lä cui, bã ɸ ma lämono wei ma cui, bã ɸ nŃ wɔloblamanomi. Abinaja SaulonŃ bã nowa shino tadima. —Jesús a lä cui Yai Bada tänŃ a shŃmabã a lä yaileno wei, ŒjŃ a waiquiwã —bã nowa taŃ lojodoama.
- 23**Tã nŃ fa dedelŃnŃ, judio bã yododama. Saulo a nofi lämabeje, a wɔfa ma wayoano wejei ma cui,
- 24**Saulo a moyawälayoma. A shãbeje, ala nacŃ jamŃ yoca lä joleono wei jamŃ bã läoma. Jalu dãjã ma cui, didi dãjã ma cui, ŒjamŃ bã ma lämodino wei ma cui,
- 25**cama ebã lä nocaono wei bãnŃ, shomi jamŃ a documalemaje. Didi dãjã, ala nacŃ jamŃ a ɸai fa dubofälŃjenŃ, yolofi a ja a fa didiicunŃ, tocota cãcŃnŃ sibo jamŃ a befi ɸai itoa jatomalemaje.
- 26**A fa doculunŃ, Jelusale jamŃ a ɸŃblaliyoma. ŒjŃ dãjã, Jesucristo nija bã lä nocaŃ wei ebã nija, a yädãblou bufi doblaoma ma cui, ebã quili dicooma. “Jesucristo nija ŒjŃ a ɸai nocaã mö fedua lä cule”, ebã bufi cuno malã mlai.
- 27**ŒjŃ ma cui, Benabei a lä cuinŃ a bayeliblaŃ fe yadilayoma. JesucristonŃ bã lä shŃmŃleno wei bã nija a ɸai fa junŃ, a nofi bãyãama. Bei yo jamŃ, Saulo nija Bada tã Jesús a lä bãdaliono wei, tã ɸa wɔyãma. JesúsnŃ a wɔ lä wayomano wei tã ɸ ɸai. Damaco jamŃ, Jesús a wɔfa wɔyɔä lä waiteliblaliyono wei tã ɸ ɸai.

- 28** Öjö cudeenö Jelusale jamö, Saulonö Jesucristo ebä çai dodijidawä juu cuaaö nomöjööma.
- 29** Showadi Bada tä afa wäyädima. Öjö ma cui, ai bä judio mö feduwä lä cuinö a wä jilianomije. Clesiateli bä caficö a lä däleno wejei bä judio lä cui, öjö bä çai ma yömölano wei ma cui, bä a shino lämodima. Bä bufi nia möblamaö fe fa yadionö, a wä ma lojodoano wei ma cui, Saulo a shäbeje a nofi washuamaje.
- 30** Jesucristo ebä lä cui, öjö tä a ja bä fa moyawälönö, Saulo a documalemaje. Sesalea jamö a çai waloa fa balöicujenö, Daso jamö a shömöa çölemaje.
- 31** Öjö däjä, Judea jamö ma cui, Calilea jamö ma cui, Samalia jamö ma cui, Jesucristo ebä bluca lä yododoblai bä yanöcöblou jälâyoma. Bä nö bleaamaö çödaaö jaöonomije. Bä bufi lojodoblaliyoma. Bada tä nija bä fa quilinö, bä bejedimoma. Yai Bada tä Bufinö bä bayeliboma. Inaja bä dodijidawä fa cuaanö, bä blucablaliyoma.
- 32** Bei. Pedro a lä cuinö, Yai Bada ebä lä bälöblai bä fe walou cuaama. Lidateli bä nijamö a fa alufälönö, öjö bä fe çai walolema.
- 33** Öjamö Eneasi a jalili dalalema. A yaṭolibööma. A jalili blao showao däjä, lasha 8 a faa waiquimalema.
- 34** Öjö nija Pedro a wä fama. —Eneasi. Jesucristonö wa jalomaö lä cule. Wa fa jocäblaluno, wa lä maquele täcö da cofublalö —a cuma. Inaja Pedro a fa cunö, a jalili jocädou showalayoma.
- 35** Lidateli bä bluca ma cuinö, Salonateli bä bluca ma cuinö, öjö a jalou fa dalalöjenö, Bada tä Jesús a bufia showalemaje.
- 36** Bei. Jobe jamö, a wäfa suwä Dabida cuoma. Jesucristo nija a lä nocaono wei a suwä cuoma. Clesiateli bä caficö a ja, Doca a wäfa jilabomaje. A dodijama. Bä lä jöli wei showadi bä shino bayelibladima.
- 37** Öjö däjä, a fa jalililalunö a bufi mlaquema. A nomawä fa yalublalöjenö, a yano lä feyacale jamö a nomöa bobeye a blabejelayomaje.
- 38** ¿Öjö tawä? Jobe tä ajede jamö, Lidateli bä shabonobö blao mö feduoma, Pedronö bä fe lä walono wei jamö. Öjö cudeenö, öjamö Pedro a jowa juu fa jililäjenö, Jesucristo nija bä lä nocaono wei ebänö, bolacabö cäcöbö shömölemaje, Pedro a nacaböbä. Cäcöbö fa çöblalunö, Pedro nija cäcöbö a fajaloma. —Lobe, lobe —cäcöbö cuma—. Camiyä yafäcö nija a yaua da showaiquiyo, ¿öjö tawä?
- 39** Inaja cäcöbö cuu ja, Pedro a yaua showalayofälöma. Öjamö lä a çai fa waloböicunö, a yano lä feyacale jamö a çai duböa showabefälöma. Öjamö lä Pedro a lä ublale jamö, bä suwä öcöö çai ajedebliyaloma, bä lä yamibliyalono wei bä suwä bluca lä cui. Bä didimaböbä, Docanö camishi ebä lä diyälaleno wei ebä çai yocoamaje. ¿Öjö tawä? Bä lä feyacabono wejei bä ma cui, bä lä ʔeshibono wejei bä ma cui, bä çai cuo showao däjä, bä bluca diyälalema.

⁴⁰Pedronö sibo jamö bä bluca fa shömölönö, Yai Bada nija a nö bayeli nacabä, a dijoblaquema. A nö bayeli fa nacalänö, nomawä a lä cui nija a mammo showadou nomöjölâyoma. A mammo fa showadalunö abinaja e cuu nomöjööma. —Dabida, wa fa jocädalunö, a ublaa da çolu —e cuma. Einaja a cuu ja, öjö a suwä lä nomalayono wei a mammo casö jocädaliyoma. Pedro a fa dalalönö, a loquema.

⁴¹Öjö däjä, Pedronö boco fa dälönö, a ublamafälöma. Yai Bada ebä naca fa çalälönö, bä suwä lä yamiblonö wei bä çai naca fa çalälönö, öjö bä nija Doca a demi daa çomalalema.

⁴²Jobeteli bä nija öjö tä ą jilimou fa blaucublalunö, öjö ai bä bluca lä cuinö, Bada tä Jesús a bejedi bufia showalemaje.

⁴³Jobeteli Simón a wafa lä cule nija Pedro a fa cualunö, öjamö lä a fe weyablaama. Öjö a Simón lä cui, showadi yalo sibä lä dodijamano wei a li cuoma.

Hechos 10

¹Sesalea jamö, Conelio a wafa lä cule a bälööma. Judio a cuonomi. Sodado 100 bä çai lä cuono wei a bada cuoma. Öjö 100 bä çai lä cuono wei bä lä cui, Italiano ebä ąfa sodado jilabomaje.

²Öjö a lä cui, Yai Bada nija a bejedimou bufi doblaoma. Cama a ma cuinö, cama ebä ma cuinö, Yai Bada tä nö quili bluca tamaje. A bufi läo mlai ja, judio bä lä jöli wei showadi bä dobäma. Yai Bada nija a nö shino bayeli nacaodima.

³Öjö tawä? Motoca a lä yajadodoblöle däjä, Yai Bada tänö cama ąjele etä fa shömöludunö, Conelionö wawadowä tä möma. Conelio a lä cule jamö a fa lucälönö, a wä wawälâyoma. —Conelio —a cuma.

⁴Yai Bada tä ąjele nija a mammo quilili showalanö, a wä juoma. —Wedi cätä, Bada tä? Abinaja ąjele e cuma. —Showadi Yai Bada nija wa nö bayeli lä nacao wei tä ą jilimou culadi. Bä lä jöli wei, wa bä showadi lä dobäo wei, öjö tä çai dablamodayou. Yai Bada tänö cafä wa nofi jaducubou.

⁵Öjö tawä? Jobe jamö, afä wa bä fa shömölönö, Simón a çamaö da bufi, Pedro a wafa lä yädäle.

⁶Yalo sibä lä dodijamaö wei a Simón lä cuinö a bälömabou lä cule, modu u casö jamö —ąjele e cuma.

⁷A wä lä wayomano wei ąjele tä fa çolunö, Conelionö cama ai ebä nacajelema. Showadi a wä lä juaö wejei bä nija, bolacabö ecöbö nacaema. Sodado bä çai lä cuono wei bä nija, molí a çai naca mö fedulema, Yai Bada nija a bejedimou bufi lä doblaono wei a lä cui.

⁸Ąjele a lä cuno wei tä ą ja, bä fa yömölalönö, Jobe jamö bä shömöa showadaalema.

- ⁹Öjö tä fena ja, Pedro a çabeje, Jobe jamö bä ajedequeyoluma, motoca a yöloloblou däjä. A nia lä çao wejei bä ajedou däjä, Pedro a nö bayeli nacaobä, feyaca yafi jamö a dubefälöma.
- ¹⁰Öjamö lä a fa ofälöjulunö, nii bä löbömaö bufima. Öjö ma cui, nii bä löbömaö showaoje däjä, cama nija wawadowä etä bädaliyoma.
- ¹¹Tä fa mödalönö, judu mösö ca jolaa dalalema. Öjamö lä, jai acadafu sicö bada cuwä, tä itolayoma. Sicö casö jududuoma. Sicö fa itoimadunö, mashita jamö sicö blaaliyoma.
- ¹²Öjö sicö jamö, yaitawä bä ma cui bä yalo bluca coyocomoma. Bä yalo lä jölölou wei bä ma cui, bä lä yäo wei bä ma cui, bä bluca didioma.
- ¹³Öjö däjä, tä a wawalayoma. —Bei, Pedro. Miji bä da shäalalö, wa iyabä —tä cuma.
- ¹⁴Öjö ma cui, abinaja Pedro a cuma. —Ma, Bada tä. Wa bä afa shami lä taö wei ya bä waimi waiquiwä. Wamodima bämi —a Pedro cuma.
- ¹⁵Öjö däjä, a wä wawäo lä balöono wei, a wä faö çoma. —Camiyä Yai Bada ya lä cuinö ya täbä aublaö lä waiquile, wa täbä afa shami taö mlai —a cuma.
- ¹⁶Öjö tawä? Pedro nija tä lä wawalayono wei tä lä cui, tä wawäa bolacablou fa çolonö, öjö däjä showawä, fedu jamö tä befi çai çomoa çolayofälöma.
- ¹⁷Bei. Cama nija tä lä wawalayono wei tä ja, Pedro a bufi wedinajamou showao däjä, Conelionö bä lä shömöleno wei bä waloquema. Bä fa waloicunö, bei yoca sibo jamö bä ublaqueyoluma. Simón e yafi wäliadalaö fa cuaaimadujenö, bä waloa cadidibeyoluma.
- ¹⁸Sibo jamö bä ublalanö, bä comöma. —Mijamö Pedro a cua culawä, Simón a wäfa lä yädäle? —bä cuma.
- ¹⁹Cama nija tä lä wawalayono wei tä ja, Pedro a bufi dayäblalou showao däjä, Yai Bada tä Bufinö abinaja a nowa tama. —Bei. Fama 3 bänö wa dayäo lä cuboyoji.
- ²⁰A itoa da çolufälö. Öjö bä nija a yauo quilii dijä, camiyänö ya bä malä shömöleno wei —a nowa tama.
- ²¹A fa itolufälönö, fama bä nija Pedro a wä fama. —Wamale lä dayäle cä ya. ¿Wedi wama tä nabä li juu cufe? —a Pedro cuma.
- ²²Abinaja bä cuu mö feduoma. —Bada tä Conelio e yafi jamö bäfä nia luluao fa çofälönö, yamacö waloquei lä cufe. Öjö Conelio a lä cuinö, sodado 100 bä çai lä cule a. A bejedimou bufi doblao. Yai Bada nija a quilii dodijiwä. Judio bä blucanö, a wäfa dodijaö taöje. ¿Öjö tawä? Öjö nija Yai Bada ajele etä fa wawälönö, cafä wa nacamaö bufima, Conelionö wa wä jliabä —bä cuma.
- ²³Öjö cudeenö, cama nija bä cuo fe jalubä, Pedronö bä nacalema. Öjö tä fena ja, fama bä nija Pedro a nocalayofälöma. Öjamö Jobeteli Jesucristo ai ebä lä cui, Pedro nija bä çai nocaquema.

- 24**Moli bä fa miicufälönö, Sesalea jamö bä çoblaliyoma. Conelionö bä nö daboma. Cama mashi ebä ma cui, cama nofi ebä ma cui, öjö bä bluca fa çocablamalönö, bä yododaö mö baoma.
- 25**Pedro a ajedou fa dalalönö, Conelionö a nabä läläa mö baquema. Öjö a cotä jamö, a möfe fa deiblaicunö, a wafa bada doblao tama ma cui,
- 26**Pedronö a ublamaö çoma. Abinaja a cuma. —A da ublaicu. Yanowamö bäfäcö malä cui —a cuma.
- 27**Conelio a wä wayomaö showale, yafi jamö a çai falayoma. A çai fa falönö, bluca bä çocamou dalalema.
- 28**Öjö bä nija a wä faö showadaoma. —Judio yamacö lä waio wei, çafä wamacönö yamalecö daö waiquiwä. Judio bä lä mlai yama bä çai cuo daomi. Shomi yama täbä fe çai waloimi. Öjö ma cui, Yai Bada tänö yale bufi jaducublamaö waiquiwä, judio bä lä mlai ya bä waii dicoo mlaobä. Ya bä äfa shami taö mlaobä.
- 29**Öjö cudeenö, çafä wamacö ma cuinö, wamale nacamaö lä bufino wei däjä, ya wä läo mlai ja, ya yaua showaquema ya malä cui. Bei. ¿Wedi wama tä tabä, wamale li nacamaö bufima, öjö lä? —Pedro a cujoloma.
- 30**Abinaja Conelio a cuma. —Weyajada ja, einaja motoca cuo däjä, Yai Bada nija ya wä fama, showadi bä nö shino weyade bayeli lä nacao wei däjä. ¿Öjö tawä? 4 tä mö didi cua waiquia. Iba yafi jamö ya wä faö däjä, bei a walo bädaliyoma. Shuducaje shi wacalawä sicö ja, a lä didile a fa wawäblalunö, camiyä ya mö cuobä jamö a ubladaliyoma.
- 31**Öjamö a fa ubladalunö, a wä fama. “Conelio”, a cuma. “Showadi Yai Bada nija wa nö bayeli lä nacao wei, tä ä jilimou culadi. Bä lä jöli wei wa bä showadi lä dobäo wei, öjö tä çai dablamosdayou. Yai Bada tänö wa nofi jaducubou lä culadi.
- 32**Öjö cudeenö, abinaja wa nia cuaaö. Jobe jamö afä wa bä fa shömölönö, Simón a çomaö da bufi, Pedro a wafa lä yädäle. Yalo sibä lä dodijamaö wei a Simón lä cuinö a bälömabou lä cule, modu u casö jamö”, a cuma.
- 33**Öjö cudeenö çafä bäfä nacamaö showadao bufima —Conelio a cuma—. Wa juu fa ojodaonö wa malä çoblalufe. Bei. Yamalecö da yömöla. Bäfä ä nia fa jilianö, eja yamacö bluca çocamou lä cule. Yai Bada tänö bämalecö çai malä cule. Bada tänö tä ä wäyamaö lä bufile tä ä da wäba —a cuma.
- 34**Öjö däjä, Pedro a wä fama. —Fei däjä ya bufi jaducua lä cule. Yai Bada tänö ai täbä shino nofimaö ayaomi.
- 35**Jödödöwä bä bälöblawä lä yaiblai bä ma cui nija, Yai Bada tä nö quili lä taö wejei, bä lä cadidou wei bä lä cui, öjö bä nia waiimi.
- 36**Camiyä Israeli yama ecö nija tä ä lä shömöleno wei, wama etä ä jilibole cätä. Tä ä dodijidawä. Jesucristo a lä cuaano wei tänö, Yai Bada tänö yanöcöwä bämalecö çai nia jowa cuo. Öjö Bada tä Jesucristo lä cui, bäma a nofi bluca Badabobä a.

37'Juan nija bä fe ojoblamobä, camanö bä yömölaö balöoma. Öjö däjä, Calilea jamö tä bluca lä cublaliyono wei, wama tä ʔ jilibou waiquile cätä. Yacumö, Judea tä ulifi jödödöwä jamö, tä ʔ wäyämou cuaama.

38'Öjö Nasaleteli Jesús a lä cui, Yai Bada tänö a bayelibou ja, bei Bufinö a jödödöboma. A nö çai wəlojomaboma. ¿Öjö tawä? Täbä shino bayeliblaö cuaama. Fecula bada tänö bä nö lä bleaamano wei, bä bluca çai jalomaö cuaama. Yai Bada tänö a çai malä cuono wei.

39'Judio yamacö bälöa lä blaucole jamö ma cui, Jelusale jamö ma cui, Jesús a lä cuaano wei yama tä bluca dalalema. Fii balitama defi ja a fa basumacöjenö, a shämalemaje.

40'Öjö ma cui, bolacabö tä mö fa dödölönö, Yai Bada tänö a demi jocädamaö fa çolonö, a demi daa çomalalema.

41'Judio bä bluca nija mlai, camiyä yama ecö yai çodawä nija a demi damalalema, yama a wəfa wäyäö cuaabä yamalecö lä yaileno wei yamacö nija. A demi jocäblou fa çolonö, yama a çai lä iyano wei yamacö lä cui nija.

42'Öjö däjä, yanowamö yama bä yömölabä yamalecö nosiemama, Yai Bada tänö a Bada lä tablamaleno wei yama a wəfa wäyäbä. Bamacö demi lä showai bamacö ma cui, bä nomaa lä waiquilaliyono wei bä ma cui, bamacö nia bluca lä jömaö wei, öjö a. Bamacö dodijaö ma cui, bamacö doblou ma mlai ma cui, öjönö bamacö nowa nia taö. Öjö yama tä ʔ bluca wäyäbä yamalecö nosiemama.

43'¿Öjö tawä? Yai Bada a wəno wäyäləwä bä bluca lä cuinö, Jesucristo a wəfa wäyäö balöomaje. Öjö a bejedi lä bufibou wejei bä bluca lä cui, bä doblou lä mlai tä ma cule, Yai Bada tänö tä nowa nia jəwa mladamama. Inaja bä jəwa cuu balöoma —Pedronö bä nowa tama.

44'Pedro a wə faö showao däjä, Jesucristo etä ʔ lä jiliano wejei bä bluca nija, Yai Bada tä Bui lucäa showadalayoma.

45'Pedro nija bä lä yauono wei bä bufi shädayaimoma, Jesucristo a bejedi lä bufibono wejei bä judio lä cui. Judio bä lä mlai bä ma cui nija Yai Bada tä Bui lucäo fe yadio ja, bejedi bä bufi möaama.

46'Bä caficö ʔ lä shomiblaliyono wei tä ʔ malä jilileno wejei, Yai Bada tä nofi doablaöje ja. Öjö däjä, Pedro a wə falayoma.

47—Camiyä judio yamacö nija Yai Bada tä Bui lucäa lä culufenaja, fei bä ma cui nija, inaja a Bui lucäa cua mö feduolaliyou lä cufe. Mau u ja bä fe ojoblamou showadaobä, bamacö ʔ läablalobä tä cuami waiquiwä —a cuma.

48'Öjö däjä, Jesucristo a wənö, bä fe ojoblamaö showadao bufima. Bä fe fa ojoblamolunö, cama bä nija Pedro a fe weyamaö bufimaje.

Hechos 11

- ¹Bei. Jesucristonö bä lä shömöleno wei bä ma cui nija, Judea jamö Jesucristo ebä lä cuono wei bä ma cui nija tä ʼano waloquema. Judio bä lä mlai bänö Yai Bada etä ʼa lä bufiblaleno wejei tä ʼa jililemaje.
- ²Öjö cudeenö, Jelusale jamö Pedro a çõa fa çõbonö, Jesucristo bufilewä ai bä judio lä cuinö a bäyäblaö mö baomaje, Moisesi tä ʼa nofi lä yaibono wejei bä lä cuinö.
- ³Abinaja a nowa tamaje. —¿Wedi tä tabä judio bä lä mlai bä nija wa fa falönö, wa iyaö çai li çõcao dicooma?
- ⁴Öjö däjä, Pedro a wä fa falönö, tä bluca lä cublaliyono wei tä ʼa wäyäma. Abinaja a cuma.
- ⁵—Jobe jamö ya cuo däjä, Yai Bada nija ya nö bayeli nacaoma —a cuma—. Öjö däjä, tä fa wawäblalunö, jai acadafu sicö bada cuwä ya tä itou dalalema. Jai sicö casöcö juwäbouje, sicö casö jududuo cuoma. Sicö fa itoimadunö, camiyä nija sicö itoimama.
- ⁶Öjamö lä ya täbä cua möö ja, bluca ya bä yalo coyocoa dalalema. Bä yalo jïima lä tabou wejei bä ma cui, ulifi jamö bä yalo lä juu wei bä ma cui, bä lä jölölou wei bä ma cui, bä lä yäö wei bä ma cui, ya bä bluca dalalema.
- ⁷Öjö däjä, ya wä jililema. Abinaja wale nowa tama. “Bei, Pedro. Bä da shäalalö, wa iyabä”, wale nowa tama.
- ⁸Öjö ma cui, abinaja ya e cuma. “Ma, Bada tä. Wa bä ʼafa yalo shami lä taö wei bä ja, ya caficö shamiaö daimi waiquiwä. Wamodima bämi”, ya e cuma.
- ⁹Öjö ma cui, fedu jamö a wä fa bädalunö, a wä faö çõoma. “Yai Bada tänö täbä aublaö lä waiquile, wa täbä ʼafa shami taö mlai”, a cuma.
- ¹⁰¿Öjö tawä? —Pedro a cuma—. Tä lä wawälayono wei, bolacabö tä cublou çõlayoma. Jödödö tä lä cuaano wei däjä, fedu jamö bä befi çai bluca çõmolayoma.
- ¹¹Öjö tä lä cublale däjä, yamacö lä cuono wei a yafi jamö, fama 3 bä walobeyoluma, Sesalea jamö culanö, camiyä nija bä lä shömöleyoluno wei.
- ¹²Yai Bada tä Bufinö, wale yauamaö bufii showadaoma. Jesucristo ai 6 ebä lä cule, camiyä nija bä fa yauicunö, Conelio e yafi jamö yamacö çõblaliyoma.
- ¹³Öjö Conelio a lä cuinö yamalecö yömöläö mö baoma —a cuma—. Cama e yafi jamö, Yai Bada ʼajele etä jõwa wawälayoma. Öjamö lä e fa ublaicunö, abinaja a nowa jõwa tama. “Jobe jamö Simón a çõamaö da bufi, Pedro a wäfa lä yädäle.
- ¹⁴Öjönö wa nia yömöläö. Cafä wa ma cui, afä wa bä çai lä cule bä ma cui, wamacö bluca bayeliblamobä, tä ʼa nia wäyäö”, ʼajele tänö bei a nowa jõwa tama fa talei.
- ¹⁵Öjö däjä, ya wä jaba faö däjä, lobe, öjö bä nija Yai Bada tä Bufi lucälayoma, camiyä bämacö nija a Bufi lucäa da culuinaja showawä —a cuma—.
- ¹⁶Öjö däjä Bada a wä jaba lä fano wei, ya tä ʼa nofi jaducubou showadaoma. Abinaja a lä cuno wei. “Juan a lä cuinö, mau u ja bä fe ojomaö ja, mau unö bä jödödöblamama ma cui, Yai Bada tä Bufinö wamacö nia jödödöblaö cuo.” Einaja a cuma.

17' ¿Öjö tawä? —Pedro a cuma—. Bada tä Jesucristo bäma a lä bufiblaö wei bamacö lä cui, cama a Bufi ja, Yai Bada tänö bämalecö dobälalema. Inaja showawä, judio bä lä mlai bä ma cui, öjö bä çai dobäa mö fedua showalalema. Inaja bämalecö bluca taamaö fe usucuwä waiquiwä yalo, Yai Bada nija ya wə läo bashiobä tä cuonomi, ¿öjö tawä? —a cuma.

18Öjö tä ą fa jililäjenö, Pedro a báyäblaö çodaanomije. Yai Bada tä nofi yai doablamaje. Abinaja bä cuma. —Jao. Judio bä ma mlai ma cui, ;Yai Bada tänö bä nofi çai bayeliblaö bufi doblao yai! Öjö bä ma cui, bä bufi lädobä, Yai Bada tänö bä bufi malä jaducublamaleno wei, bä bəlimiobä —bä cuma.

19Esteban a lä shäleno wejei dájä, Jesucristo ebä nabä bluca quea lä showadaqueno wejei dájä, bä docua blajaa showadaaliyoma. Fensia jamö ma cui, Shible jamö ma cui, Adioquiateli bä lä bälöle jamö ma cui, bä blajao shedequeomobodayoma. Bä lä docuolaliyono wei jamö, Jesucristo etä ą dodijidawä wäyäo cuaama ma cujei, judio bä shino yömöläö ayaomaje.

20Öjö ma cui, Shibleteli ai bä ma cui, Sileneteli ai bä ma cui, abinaja cama bä cuaama. Adioquia jamö bä fa waloicunö, judio bä lä mlai bä çai fa yömölajenö, Bada tä ąfa Jesús wäyämaje.

21Yai Bada tä lojodenö bä fa bayeliblamonö, bluca bänö tä ą bejedi fa bufiläjenö, Bada tä Jesucristo a bufilemaje.

22Jelusale jamö, Jesucristo ebä lä yododano wei bä lä cuinö, öjö tä ą fa jililäjenö, Adioquia jamö Benabei a shömölemaje.

23Öjamö a fa çöblalunö, Yai Bada tänö bä lä bayeliblaleno wei tä fa dalalönö, a bufi doblaloma. Öjö dájä, abinaja bä nowa tama. —Bada tä nija showadi wamacö bufi bejedimou fe yadiobä, bä bufi yai da shaliliicu —Benabeinö bä nowa tama.

24Cama Benabei a dodijama. Yai Bada tä Bufinö a fa jödödöblalunö a showadi cadidoma. A bufi cadidilanö Jesucristo a nofi mölabou dodijioma. Öjamö, Bada tä Jesús a fa bufiläjenö, cama nija bluca bä yädäblaliyoma.

25Yaçumö, Benabei a lä cuinö, Daso jamö Saulo a nia fa dayäänö a alayoma.

26A daa fa çölalönö, Adioquia jamö a çai juu çoma. Lasha ai a lalou jaöo mlao dájä, Jesucristo ebä yododabä jamö showadi cäcöbö fa çocablonö, bluca bä yömölabödima. Öjamö lä, Adioquia jamö, Jesucristo nija bä lä nocao wei ebä lä cui, Cristo bufilewä bä ąfa jaba jilabomaje.

27Bei. Öjö lä dájä, Jelusale jamö Yai Bada a wəno wäyälwä bä lä cuono wei, Adioquia jamö ai bä alayofälöma.

28Öjö ai a lä cui, Acabo a wəfa cuoma. Bä lä yododano wei jamö öjö a fa ublaicunö, Yai Bada tä Bufinö a wə fa macocoamanö, ofi a nia lä cublono wei bei tä ąfa wäyäo balöoma. Jödödöwä bä lä bälöblai, ofi tänö bä nö nia jowa bleaaö cuaama. A la cuno weinaja, inaja showawä tä cublaliyoma. Lomateli bada Claudio a lä läono wei dájä, tä bejedi wawäblaliyoma.

²⁹Öjö cudeenö, Jesucristo nija bä lä nocio wei ebä bufi shaliblou showadalayoma, bufi läo mlai ja, blada bä shömabeje. Judea jamö Jesucristo ebä bälöo mö lä feduono wei bä bayeliblabeje.

³⁰Inaja showawä bä cuaama. Blada bä fa çocamalöjenö, Benabei, Saulo cäcöbö nija bä jöböquemaje. Jelusale jamö, Jesucristo ebä çai lä yododaö wejei bä bada nija bä jöböabö fe doleobä.

Hechos 12

¹Öjö däjä, bada tä Elode lä cui, Jesucristo ai ebä nija a jaba waitelimoma.

²Juan bei aiyobö Santiago a lä cui, shocobi anö a shämalema.

³Santiago a lä shämälino wei tä ja, judio bä bufi doblalou fa dalalönö, a waitelimou çoma. Showadi, nii bä juluu lä mlai bä ja, judio bä iyaö çai lä çocamou wei tä cublou ço däjä, Pedro a juwää nomöjömalema.

⁴A fa juwämalönö, a fe lamaquema. Judio bänö Yai Bada a waiteli lä jayuno wei a nofi çocamoä çobeje, bä çocablou waiquiono wei ja, öjö a nia shämaö nomöjööma. Pedro a docuu mlaobä, sodado bluca bä lämaquema. Bä nia läo lä nomöjono wei,

⁴ bä sodado toujublamalema.

⁵Öjö tawä? Pedro a fe labomaje. Öjö ma cui, Jesucristo ebä bufi cadididilanö, Yai Bada nija a nö bayeli nacadimaje.

⁶Elodenö a shämaö fenaö lä bufino wei däjä, öjö tä didi showawä ja, Pedro a mioma. A nofi lä lämaböno wei cäcöbö sodado lä cuinö, Pedro a çama möamomaboböma. Boo bolacabö shicönö a bococu çao yädäoma. Ai bä lämou mö lä feduono wei bä lä cui, bei yoca lä joleono wei yoca sibo jamö, bä läo mö feduoma.

⁷Öjö däjä, Yai Bada tänö cama ajele etä fa shömöludunö, a bädaliyoma. A fa bädalunö, Pedro a fe lä laono wei jamö tä shi wacacablaliyoma. Ajele a lä cuinö a fa jushulunö, Pedro a lamalema. —¡Lobe, lobe! A da jocäblalu —a fa cunö, bococu lä çao wei boo eshicö wajeblou showadalayoma.

⁸Abinaja Pedro a nowa çai tama. —Bäshäcu ja sicö da ayolä. Mamicö da besiblalu. A taamaö lä bufino weinaja, Pedro a cuaä showadaoma. Öjö däjä, ajele a wa faö çoma. —Wa sicö fa jalelänö, camiyä nija a da yauiquiyo —a cuma.

⁹A fe lä laono wei jamö, Pedro a faa fa çolufälönö, Yai Bada ajele etä nija a yaua showaquema. A ma yauqueno wei ma cui, “Wale yai bayelibläö da culanö”, a bufi cuu mlai ja, tabi a bufima.

¹⁰Bei yoca nofi lä lämano wejei bä sodado nijamö, cäcöbö jayua mötalöquema. Bä läo lä bayäcäono wei bä nijamö, cäcöbö jayua fa nomöjöicufälönö, shabono jamö bä lä joleblou wei yoca jamö cäcöbö waloquema, boo shicönö yoca lä tablaleno wejei yoca jamö. Cama yoca caloblou fa bädalonö, cäcöbö falayoma. Ai a yafi mashi jamö cäcöbö fa cadidofälönö, yedu ajele tä dablou mladaliyoma.

- 11**Öjö lä dāja, Pedro a bufi yai möblaliyoma. “¡Bejedi lä!” a bufi cudaliyoma. “Bada tänö ajele e fa shömöludunö, wale nofi bayeliblaö lä mlaloiyofe, Elodenö wale shämaö mlaobä. Judio bänö wale shaö nö lä dabou wejei tä ma cui ja, wale bayeliblalei lä cufe!”, a bufi cudaliyoma.
- 12**A bufi fa möblalunö, María e yafi jamö a cadidiblaliyofälöma. Öjö María a lä cui, Juan Marcos bei bä nöö e cuoma. Yai Bada nija bä a fabä, öjö e yafi jamö bä bluca yododooma.
- 13**Bä jaba lä faö wei jamö, yoca fe lä laono wei yoca cloocama. Tä jowa lä cloocamole tä möblaabä, bei yoca lä lale ja, Lode a wafa moco lä cule a icuquema.
- 14**Pedro a wä nö fa öjöbölönö, öjö a wä ja, a bufi fa doblalonö, yoca caloblaö mlai ja, a lälää mö yabaquema. Bei yoca sibo jamö, Pedro a wafa ublao wäyama.
- 15**—Wa wä li biyäcäblalou mlai a da cuicu —a nowa tama ma cujei, moco a wä fe fa blacäjonö, —Bolebole a jowa —bä cuu nomöjöoma.
- 16**Öjö ma cui, Pedronö yoca cloocadii juo showaoma. Yacumö yoca fa caloblalöjenö, bei a dalalemaje. A fa dalalöjenö, bä bufi yai shädayaimoma.
- 17**Bei imicönö, Pedronö bä a fa wasölönö, a wä nö wäoma. A fe lä laono wei jamö, Bada tänö a famaö lä cuaano weinaja tä a fa wäyänö, abinaja a cuma. —Jacobo ma cui nija, Jesucristo ai ebä ma cui nija, wamale afa da wäyä, ¿öjö tawä? —a cuma. Öjö dāja, shomi jamö a aa showalayofälöma.
- 18**Tä mö fa jalulunö, Pedro a dabloimi yalo, a docuu mlaobä bä sodado lämou lä nomöjono wei bä afa tayou fe balojooma.
- 19**Elode a bada lä cuinö, Pedro a ma dayäamano wei ma cui, a dablanomije. Öjö dāja, a nofi lä lämano wejei bä fa nacamalänö, bä wälüi cadidioma. Pedro a lä documaleno wejei tä nowa ja, bä bluca shäamalalema. Öjö dāja, Elodenö Judea tä ulifi fa daacöfälönö, Sesalea jamö a bälöa nomöjöquema.
- 20**Bei. Diloteli bä ma cui nija, Sidonoteli bä ma cui nija, öjö bä nija bada tä Elode a lä cui, a jushuoma. Nii bä ja, öjö nija bä shino dobämoma yalo, Elode a jushuo fa dalalöjenö bä bufi nofi jushublaoma. A wä nia fa wayomajenö, Blato nija bä a faö balöoma, Elode e yafi jamö a bada lä läono wei a lä cui nija. Öjönö bä fa famalönö, bada a wä oquemabeje, cama bluca showadawä bä icuquema.
- 21**Bä a wayobä tä lä cublaliyono wei dāja, camishi liyäjawä cäcö ja Elode a didioma, bada bä yai lä didio wei cäcö ja. Öjö dāja, bada bä döcäobä täcö jamö, a fa döcäicunö, a wä cadidolanö tä a labamalema.
- 22**Cama a wä ja, bä a shi bluca dolayoma. —¡Camiyä yanowamö bamacö a faö lä cuaaö weinaja mlai, yai täbä a cadidou lä cuaaö weinaja a wä jilimamou cuwä! —bä shi jaliwä çai cuma.

²³Yai Bada a nofi shino doablamobä tä ma cule ma cui, cama Elode a nofi yaimamou bufi fa doblaonö, yedu Yai Bada ajele etä isholayoma. Mosha bä nija Elode a nabä fa shömöcönö, a nomamalema.

²⁴¿Öjö tawä? Yai Bada etä a jilimamou balaa showalayoma. Etä a bejedi lä bufino wejei bä blucablou fe balojolayoma.

²⁵Benabei, Saulo sho cäcöbö lä cuinö, Jelusale jamö bä blada bälaböö fa balöonö, Adioquia jamö cäcöbö ça çolayoma. Juan a çai çöböa çolayofälöma, Marcos a wäfa lä yädäle.

Hechos 13

¹Bei. Adioquia jamö, Jesucristo ebä lä yododano wei bä nijamö, Yai Bada a wäno wäyälwä bä cuoma. Öjö bä showawä lä cuinö, Yai Bada etä a ja bä çai damamaje. Abinaja bä cuoma. Benabei a cuoma, Simón a çai, Ushiteli a wäfa çai lä yädämabono wejei. Sileneteli a çai Lusio cuoma, Maneno a çai. Öjö Maneno a lä cui, Elode a bada sho cäcöbö badalayoma. Saulo a çai cuoma.

²Öjö bä lä cui, bä iyaö yabäcou mlaobä, nii bä ja bä wasöolanö Bada tä nija bä nö bayeli nacaodima. Inaja bä cuaaö däjä, cama bä nija Yai Bada a wä Bufi bädaliyoma. Abinaja a cuma. —Benabei, Saulo sho ya cöbö yaia waiquilema. Ya cöbö shömabä jamö cäcöbö ojodamobä, iba cäcöbö da yaimacöje —a cuma.

³¿Öjö tawä? Nii bä ja bä yabäcou mlai ja Yai Bada nija bä nö bayeli nacao däjä a wä bädaliyoma. Öjö däjä, bä a faö waicou ja, öjö cäcöbö nija bä imicö maqueoma. Bä imicö maquelanö, cäcöbö yaimaquemaje. Öjö däjä cäcöbö shömöa showadalemaje.

⁴Yai Bada tä Bufinö cäcöbö shömama yalo, cäcöbö alayoma. Seleusia jamö cäcöbö fa waloicunö, Shible tä ulifi lä jöcole jamö bä befi çai caläfälöma.

⁵Salaminateli bä nijamö cäcöbö befi çai fa waloicunö, judio bä yododabä yafi bä jamö, Yai Bada etä a wäyäbö cuama. Juan Marcos a luluboböma, cäcöbö bayeliblafälöbä.

⁶Öjö tä lä jöcole jamö, bä bluca lä bälöblai bä fe waloo fa cuaajenö, Bafositeli bä nijamö bä waloo nomöjjuema. Öjamö lä judio a bada shaboli lä cui, a dalalemaje, Yai Bada a wäno jole lä wäyänö wei a lä cui. Bajesusi a wäfa cuoma.

⁷Öjamö a bada lä läono wei a lä cuinö a shaboli yädämaboma, Sejio Baulo a wäfa lä culenö. Öjö a bada lä cui, a bufi jaducaö si ijejeoma. Yai Bada etä a jiliaö bufi fa doblaonö, Benabei, Saulo sho cäcöbö nacamalema.

⁸Öjö ma cui, shaboli Bajesusi a bada lä cuinö tä a jilimaö bufio fa mlacunö a wä läoma, bada anö Jesucristo a nofi mölabou mlaobä. Öjö a bada shaboli lä cui, Clesiateli bä caficö a ja, Elima bei a wäfa çai cuo mö feduoma.

⁹Öjö a wä ma lämono wei ma cui, Saulo nija Yai Bada tä Bufi fa jödödöblalunö, a möö shalilioma. Öjö Saulo a lä cui, Pablo a wäfa çai yädäa lä cule.

- ¹⁰Öjö a möö fa cadidionö, a wə fama. —;Fecula bada wa ijilubö! Tä lä dodijidai wa tä nofi bluca lä wəlibole wa. Showadi wa täbä mölamaö. Wəlidiwä showadi wa tä tadii. Yai Bada etä ʾa lä bejedi wei, wa etä ʾa shomiblamabä, ʾcbei wa nia shijilodoimi?
- ¹¹Bei. Bada wa tä lojode möbä. Wa nia jubäbömaö. Wacacawä wa tä çai dablaö jaöo mlaiçätä —Pablonö a nowa tama. Inaja Pablonö a nowa lä tale däjä, yedu tä möö mladou showadalayoma. A jubäbölayoma. A öbömamobä tä dayäblalama.
- ¹²Öjö tä fa dalalönö, bada a lä cuinö, bejedi tä ʾa bufia showalema. Yai Bada a wəfa lä wäyämöno wei tä ʾa ja, a bufi malä shädayaimolayono wei.
- ¹³Öjö däjä, Pablonö bä çai lä cule, bä befi çai caläa çolayofälöma. Bafosi jamö bä fa jocälöfälönö, Baçilia tä ulifi jamö, Bejeteli bä lä bälöle bä nija, bä befi çai waloaliyoma. Öja lä Juan Marcosnö bä fa dacöfälönö, Jelusale jamö a ça mö yabaa çolayofälöma.
- ¹⁴Öjö däjä, Bejeteli bä nijamö cäcöbö shulucoa fa çoläfälönö, Bisidia tä ulifi jamö cäcöbö waloa nomöjöquema, Adioquia tä ʾa shabono cuo mö lä feduono wei jamö. Täbä yanöcöobä tä mö jalu ja, judio bä yododabä yafi jamö cäcöbö fa falönö, cäcöbö fama looma.
- ¹⁵Bä lä yododano wei jamö, Moisesi tä ʾa oni fa doajenö, Yai Bada a wəno wäyäləwä etäbä ʾa oni çai doaö mö fa feduojenö, bada bänö fama cäcöbö wəlimaje. —Bei. Iba wafäcö lä cui. Yai Bada etä ʾa ja, yamalecö yömöläö bufi doblaö ja, fei däjä yamalecö da yömölabö, öjö lä —bä cuma.
- ¹⁶Öjö cudeenö, Pablo a fa ublaicunö, bei imicönö bä ʾa fa wasölönö, abinaja a cuma. —Isaeli wama ecö mö lä fedui. Yai Bada wama a nö quili lä tale. Wamale ʾa da jililä.
- ¹⁷Yai Badanö, Isaeli bäma ecö nö badabö fa yailönö, Ejido jamö bä fa blucablamalönö, cama a lojodenö bä lulubou çofälöma.
- ¹⁸Ulifi bloque jamö bä çai wayumö lä culayofälöno wei däjä, lasha jai 40 a lalou jaöo mlao däjä, bä doblono ma mlai ma cui, bä bayeliblaö fe yadiofälöma.
- ¹⁹Canaana jamö,
- ⁷ bä bälöblawä lä yaiblai bä mö bluca watäblaö fa baläläonö, öjö bä ulifibö jamö bä bälömabou juoma. Lasha jai 450 a lalou jaöo mlao däjä, öjö bä lä cuinö tä ulifi juwäbou nö dedeaö nomöjöomaje.
- ²⁰Inaja Yai Badanö bä taamaö fa balöonö, bä lulubobeje ai bä bada lämabou nomöjöoma —a cuma—. Öjö däjä, Samuel a shömöa nomöjölema, Yai Bada a wəno lä wäyänö wei.
- ²¹Öjönö bä çai ma bälöono wei ma cui, bada a yai lämabou bufi fa doblaöjenö, Yai Bada tänö Sisi bä ijilubö Saulo a shömöa nomöjölema, öjönö bä çai bälöobä. Bejamino nodiwä e li Saulo cuoma. Lasha jai 40 a lalou jaöo mlao däjä Saulo a bada läo bälöoma.

22 Öjö a Saulo waia fa majölönö, David bada a yai tablamaö nomöjölayoma, öjamö a läobä. Yai Bada tänö öjö David a wafa dodijaö tama. Abinaja a cuma. Isai bä ijilubö David a lä cuinö wale bufi doblamabou fe balojoo. Ya tä tamaö lä bufii wei, tä nia taö jödödou. '¿Öjö tawä? —Pablo a cuma—. Einaja Yai Bada a cuma.

23 Öjö David nija Yai Bada tänö a wafa wäyää lä balöono wei tä a bejedi cublaliyoma. Isaeli bäma ecö jucäabä, David nodiwä e yacumö wawäblamalema, Jesús a lä cui.

24 'A wawäblou mlao showao däjä, Juan a wawäblou balölayoma —a cuma—. Isaeli nodiwä bä bluca yömölabou balöoma. Abinaja bä nowa tama. “Wälidiwä tä ja wamacö bufi fa lädalunö, bä fe da ojomamo”, bä nowa tama.

25 Öjö Juan a lä cuinö bä yömölaö waicou ajedou däjä, abinaja bä nowa çai tama. “¿Wedinaja bei wamale nofi li tabou dicoa cule? Showadi bäma a nö lä dabou wei, öjö ya mlai. Ma, camiyä ya nodi jamö, öjö a nia shino wawäblou nomöjöo. Öjö a lä cui a shino yai doblaa ayaa cudeenö, bei mamicö busi nata bädawä ma cui ja, ya nö bayeliblabimi”, bä nowa Juan tama. ¿Öjö tawä?

26 'Iba wamacö —a cuma—. Ablaamö nodiwä wamacö lä cui. Shomi wamacö çai, Yai Bada wama a nö quili lä taö wei wamacö. Bamacö nia lä jucämou wei tä a lä cui, camiyä bamacö nija tä a shömölema, ¿öjö tawä?

27 Bamacö jucäabä a ma cuono wei ma cui, Jelusaleteli bä ma cuinö, bä çai lä culajei bä ma cuinö, öjö a nö öjöböblanomije. Täbä yanöcöobä tä mö jalu ja, Yai Bada a wano wäyälwä, showadi bä a oni doaö daö ma cujei, tä a nofi jaducubonomije. ¿Öjö tawä? Tä a nofi jaducubou fa mlacujenö, tä afa lä wäyämou wei tä a bejedi wawäa dicoblamalemaje. A shämaö malä bufino wejei.

28 ¿Öjö tawä? Tä nowa cua mlai ma cui, bä a faö buoma. Bilado nija a shämalemaje.

29 '¿Öjö tawä? —a cuma—. Yai Bada etä a oni jamö, Jesucristo a wafa bluca lä wäyämöno wei tä a bejedi wawäblaliyoma. Öjö däjä, fii balitama defii ja a lä basuono wei, a nomawä itomalemaje. Maa maca jamö a nomawä ma didiqueno wejei ma cui,

30 Yai Bada tänö a demi jocädamaö çölayoma.

31 Calilea jamö, cama nija bä showadi lä yauono wei bä lä cui bä nija a dablamou nö dedeama, Jelusale jamö bä çai lä alayofälöno wei bä lä cui bä nija. Fei däjä öjö bä lä cuinö, yanowamö täbä nija a wafa wäyää cuaabeje bä li.

32 'Yama tä a dodijidawä wäabä, çafä wamacö nija yamacö waloo lä cule —a cuma—. Bamacö nö badabö nija, Yai Bada tänö tä afa wäyää lä balöono wei tä a lä cui,

33 camiyä bamacö lä nodiblaliyono wei bamacö nija tä a bejedi cublaliyoma. ¿Öjö tawä? Jesús a demi jocädamaö lä çölayono wei ja, tä a bejedi wawäblamalema, Amowa tä a lä cuu weinaja showawä. Abinaja tä a cuu. Ijluyä bei wa. Fei däjä wawädowä iba bäfä nö yai öjöböamaö lä cule. 'Einaja tä a cuu —a cuma—.

34 Yai Bada tänö, baḷimi a demi nia jocädamaö lä çono wei tä ma cui, öjö tä afa çai wäyää balöoma. Abinaja tä a oni cuu. Iba wamacö lä cui, bamacö bayeliblaö weicätä, David nija ya wa nõ lä wäono weinaja showawä. Ya wa shomiblou majöö mlaicätä.

35 'Einaja tä a cuu —a cuma—. Öjö cudeenö, ai tä a li amowa ja, abinaja a cuu mö feduo. Camiyä wale lä yaileno wei ya lä cui, wale sicö nia jodemaimi.

36 'Öjö tawä? —Pablo a cuma—. Einaja tä a cuu. David a lä cuinö, cama ebä çai cuo showao däjä, Yai Bada tänö a tamaö lä bufino wei tä ja, a cadidoma. Öjö däjä, a bufi fa mlaicunö, a nomawä didiquemaje, cama showadi ebä nomawä lä taamaö wejeinaja showawä. A nomawä fa didicöjenö sicö jodelayoma.

37 Öjö ma cui, Yai Bada tänö a demi jocädamaö lä çolayono wei a lä cui, sicö yai jodeonomi.

38 'Öjö tawä? —a cuma—. Iba wamacö. Ei ya wa lä cui, wamale a da jililä. Öjö a demi jocädamaö lä çolayono wei a lä cui, wama a nofi mölabou ja, wamacö doblou lä mlai tä ma cule, Yai Bada tänö tä nowa mladamalei. Tä nowa lä mladamaö wei tä a ja, bamacö yömölaö lä cule.

39 Moisesi tä a nofi lä mölabou wejei bä nija tä nowa mladobä tä cuono ma mlai ma cui, Jesucristo a bejedi yai lä bufibou wejei bä bluca lä cui nija, Yai Bada tänö tä nowa taboimi waiquiwä.

40 Öjö tawä? Bä da moyaweicu, öjö lä, Yai Bada a wano wäyälwä a wa nõ lä quiliano weinaja, wamacö taamamou dicoo mlaobä. Abinaja tä a cuu.

41 Bei. Yai Bada wama a wa nõ lä waiblaö wei wamacö lä cui. Wamacö bufi nia möblou çai nomaö. Cafä wamacö bälöo däjä, ya tä nia taö nõ malä quiliaö wei. Wamacö ma yömölaö wejei ma cui, wama tä a nia bejedi bufiimi. 'Öjö tawä? —Pablo a cuma—. Einaja tä a cuu.

42 Pablo, Benabei sho cäcöbö mini sibou däjä, cäcöbö nacabou çomaje, täbä yanöcöobä tä mö jalu cublou ço däjä, tä a wäyäbö çoyolubä.

43 Öjö däjä, judio bä yododabä yafi jamö bä a wayou lä waicou wei däjä, bä bluca faa çolayofälöma. Bä faa lä çolayofälöö wei däjä, Pablo, Benabei nijamö judio ai bä yaua showalayofälöma. Yai Bada nija bä bejedimou bufi fa doblaonö, judio bä nija bä lä yädäono wei ai bä ma cui, öjö bä çai nocaa showalayofälöma. Öjö däjä bä lä nocaono wei bä yömölaböö cuaaö çofälöma, Yai Bada tänö bä nofi lä ojodabou wei tä shino yai bufibobeje.

44 Täbä yanöcöobä tä mö jalu cublou ço däjä, Yai Bada etä a nia jiliaö fa çojenö, bä yododaö çoma. Öjö däjä, öjö täbä shabonobö jamö, bä bluca lä bälöono wei bä nõ mlaoma.

45 Öjö ma cui judio bada bänö täbä bluca çocamou fa dalalöjenö, bä jushudaliyoma. Cama bä a bada jiliamou bufi doblao fa ayaonö, bä bufi jalujoma. Pablo a wa faö däjä bä a lämodima. A nõ çai waiblamaje.

⁴⁶Öjö däjä, Pablo, Benabei sho cäcöbö a faö waiteliama. Abinaja cäcöbö cuma. —Jaö. Cafä judio wamacö nija Yai Bada etä a wäyämou balöobä tä ma cuono wei ma cui, wama tä a waii waiquiwä yalo, judio bä lä mlai bä nija yama tä a nia wäyäo nomöjoo. Wamacö balimiblou moji waiquiwä.

⁴⁷Bada tänö yamalecö nosiemaö ja, abinaja tä a malä cuu wei. Bamacö yaia waiquilema. Judio bä lä mlai bä nijamö, jai shi jilajawä wama ecö nia cuo, bä bufi möblobä. Bä bälöo lä jödödole jamö ma cui, bä jucäamobä wama tä a wäyäo cuaabä. 'Öjö tawä? —Pablo a cuma—. Einaja tä a cuu.

⁴⁸Judio bä lä mlai bänö, Pablo a wä fa jililäjenö, bä bufi doblaloma. Yai Bada etä a jiliaö bufi doblaomaje. Bä balimiobä, Yai Bada tänö bä yaia lä waiquileno wei bä bluca lä cuinö, bejedi tä a bufia showalemaje.

⁴⁹Öjamö Bada etä a jilimamou blaucou cuaaö showaoma.

⁵⁰Öjö ma cui, suwä bä nö lä madofibö wei, judio bänö bä jushuo lulubomaje, Yai Bada nija bä bejedimou bufi lä doblaono wei bä suwä lä cui. Bada bä a showadi lä jiliono wei bä ma cui, öjö bä shi çai jalimomaö mö feduo showaomaje. Pablo, Benabei sho cäcöbö nö bleamabeje, bä bluca fa jushudamalöjenö, shomi jamö cäcöbö yashublalemaje.

⁵¹Yai Bada etä a wailemaje yalo, bä nia dobroimi fa jömabönö, bei cäcöbö mamicö jamö mä mashita lä sudiono wei bä fa yaösöblaböläfälönö, Iconio jamö cäcöbö docua showalayoma.

⁵²Öjö ma cui, Adioquia jamö Jesucristo nija bä nocaö bufi lä doblaono wei bä lä cui, bä bufi yai doblaloma. Yai Bada tä Bufinö bä fa jödödöblalönö, öjö nija bä luluamou bufi doblaoma.

Hechos 14

¹Bei. Iconio jamö cäcöbö fa çöblalunö, judio bä yododabä yafi jamö cäcöbö falayoma. Öjamö cäcöbö a lä fano wei cäcöbö anö, bluca bä bufi tamaböquema. Judio bä ma cuinö, judio bä lä mlai bä ma cuinö, bluca bänö tä a bejedi bufilemaje.

²Öjö ma cui, tä a bejedi bufii lä mlajei bä judio lä cuinö, bä judio lä mlai bä jushuo lulubomaje. Jesucristo ebä afa wäyäo fa dicoojenö, bä nofi wälilemaje.

³Öjamö Pablo, Benabei sho cäcöbö bälöo yanöcöblaoma. Bada tä afa wäyäbö ja, cäcöbö a faö waiteliama. Yai Bada tänö täbä nofi lä ojadadaö wei tä afa wäyäböbä jamö, cama tä lojode dablamoma, tä a bejedi bufibeje. Cäcöbö nö fa wälojoblamalönö, tä nö lä quilijii bluca tä wawämaböma, tä tamou dao lä mlai.

⁴Öjö ma cui, öjamö bä lä bälöle bä lä cui, bä bufi sheleleblaliyoma. Ai bänö, judio bä a jilii bufi doblaomaje. Ai bä mö feduwä lä cuinö, Jesucristonö bä lä shömöleno wei cäcöbö a jilii bufi doblao mö feduomaje.

⁵Yaçumö tä wälidiblaliyoma. Judio bä lä mlai bä ma cuinö, judio bä ma cuinö, cama bada ebä ma cuinö, öjö bä blucanö maa ma bänö cäcöbö nia shäyämaje. Cäcöbö nö

nia lä bleamano wejei dāja 6cäcöbö fa moyawälönö, Licaonia jamö cäcöbö docua cua majölayoma. Litateli bä lä bälöle bä ma cui nijamö, Debeteli bä lä bälöle bä ma cui nijamö, ai bä bälöo lä ajedele bä ma cui nijamö, öjamö cäcöbö cua majölayoma.

⁷Öjamö cäcöbö fa cualunö, öjö bä nija tä ą dodijidawä wäyäbö nomöjöoma.

⁸Bei. Litateli bä nija a jalili looma. A oshe lä cublono wei dāja mamicö wälidio fa showadaonö, a juu doblonomi showawä.

⁹Öjö a lä cui, Pablo nija a yömöca daoma. ¿Öjö tawä? Pablonö öjö a möö fa shalilonö, a bufi lä cuaablalou wei etä dalalema. A jalobä, Jesucristo a nofi mölabou waiquioma.

¹⁰Öjö etä fa dalalönö, icalı a nowa tama. —A da ubladalu. A ubladou fa showadalonö, a juma.

¹¹Pablo nija a jalomaö fa dalalöjenö, bä lä çocamono wei bä ą shi bluca jalimolayoma. Cama Licaoniateli bä caficö ą ja, abinaja bä nowa tayoma. —ıTäcöbä lä bufiblamou wei täcöbä waloqueyoluu lä cufe! ıCamiyā yanowamö bamacö lä culenaja cäcöbö fa cublalunö, cäcöbö cuaaö lä cubiyei!

¹²Yai täcöbö fa bufijenö, cäcöbö ąfa jilamaje. Benabei a lä cui, fecula Jubide a fa bufijenö, Jubide a wāfa jilamaje. Pablo a lä cui, a wā yai faö lojode yalo, fecula Meculio a bufimaje. Öjö cudeenö, Meculio a wāfa jilaö mö feduomaje.

¹³Öjamö lä, fecula Jubide nija täbä nofi lä bāyābono wei a bada cuoma. Jubide nija bä nö bayeli nacaobä yafi jamö a bada läoma, shabono a sibo jamö. Öjö a lä cuinö, jole jole bä fa jilalönö, baca bä baushiblalema. Bä fa baushiblälönö, bei yoca jamö bä çai waloquema. ¿Öjö tawä? Cama ebä nia fa yododoblamanö, fecula Jubide a lä bufino wei nija yalo bä nia öshö dodoboma.

¹⁴Öjö ma cui, Benabei, Pablo cäcöbönö tä ą jilbölema, Jesucristonö cäcöbö lä shömöleno wei cäcöbö lä cuinö. Tä ą fa jilböläno, bä lä yododale bä nijamö, cäcöbö bufi jalujuwä çai läläablaloma. Cäcöbö bufi jaluao yalo, cäcöbö camishibö cacablamolayoma. Abinaja cäcöbö cuma.

¹⁵—¿Wedi tabä inaja wamacö li cuaaö dicoa cule? Cafä wamacö lä culenaja, yafäcö cuwä mö feduwä yafäcö. Yanowamö bamacö bluca. ¿Öjö tawä? Yafä tä ą dodijidawä bäläo mö juu lä cufe. Wama bä jole lä bufiblaö wei wama bä fa dacönö, Yai Bada nija wamacö bufi yai cuobä. Öjö a shino balimi cua ayaa. Judu mösö ma cui, bita a ma cui, modu u ma cui, öjö bä bluca tablalema. Öjö bä jamö bä bluca lä cule, bä çai tablaö showaoma.

¹⁶Jaba dāja, bamacö nö badabö bälöblawä lä yaiblamono wei bä lä cui, cama etä jamö bä cuaaö ma cadidiono wei ma cui, Yai Bada tänö bä nö bleaamaö jaöonomi.

¹⁷Öjö ma cui, wama a daö fe yadiobä, wamacö bayeliblaö showaoma. Maa showadi a blälämama. Nii showadi bä çai lalomama. Nii bä ja wamacö bufi fa doblalamanö, öjönö wamacö dodijidawä tabou jatoo showaoma —cäcöbö cuma.

¹⁸Pablo, Benabei cäcöbö nija yalo bä öshö dodobou bufi doblao fe fa yadiojenö, bä mini jaḡamodou ma mlai ma cui, öjö cäcöbö ḡnö bä yaḡcumö wasömolayoma.

¹⁹Öjö ma cui, judio ai shomi bä fa waloicunö, Pablo a nofi waḡlibobeje bä ḡ fama. Adioquiateli bä judio ma cuinö, Iconioteli bä judio ma cuinö, öjö bä ḡnö bä bufi tablamalemaje. Öjö däjä, maa mabänö Pablo a fa shäyälälöjenö, nomawä a fa bufijenö, shabono a sibo jamö a shailefälömaje.

²⁰Öjö ma cui, Jesucristo nija bä lä nocaö wei bänö Pablo a fe faḡyoblaöje däjä, a jocädou çolayoma. Shabono jamö a yafia çolayoma. Öjö tä fena ja, Debe jamö Benabei sho cäcöbö cua nomöjöa showalayoma.

²¹Debe jamö tä ḡ dodijidawä fa wäyäbönö, Jesucristo nija bä nocaö mö feduobä bä bluca tablamabölema. Öjö däjä, cäcöbö mö yabaö fa çoimadunö, Lita jamö cäcöbö waloa fa çoicunö, Iconio jamö cäcöbö waloa fa majöicunö, Adioquia jamö cäcöbö waloa çoquema.

²²Cäcöbö jayuaö çolanö, Jesucristo nija bä lä nocaö wei, ebä bufi lojodoamaböö cuaaö çofälöma. A nofi mölabou fe yadiobeje, bä yömölaböö cuaama. Abinaja bä nowa taböma. —Yai Bada tänö cama ebä nia çai lä cuo wei tä cublou showao mlao däjä, bamacö yanöcöobä tä cuami waiquiwä. Jesucristo bäma a nofi lä mölabou wei, showadi bämalecö nö nia bleaamaöje —bä nowa taböö jayuaö çofälöma.

²³Jesucristo ebä lä yododoblai bä nijamö bä bada cublamobä, bä çai taamaböö cuaafälöma, Jesucristo ebä çai yododaö juobeje. Öjö däjä, cäcöbö iyaö wasöolanö, bä nö bada bayeli nacaböö showaoma, Bada tä Jesucristo a nofi lä mölabono wejei a showawä lä cui nija bä bayeliblamobä.

²⁴Öjö däjä, Bisidia jamö cäcöbö fa jayuicunö, Baḡfilia jamö cäcöbö waloquema.

²⁵Öjamö, Bejeteli bä nija Jesucristo etä ḡ wäyäbö fa jayuaimadunö, Adalia jamö cäcöbö waloa majöquema.

²⁶Öjö däjä, Adioquia jamö cäcöbö befi çai caläa cuaa çolayoma, Yai Bada tänö cäcöbö bayeliblaö cuaabä, cäcöbö nö bayeli jaba lä nacano wejei jamö. ¿Öjö tawä? Bä yömölaböö fa jödödöabodunö, cäcöbö lä shömano wejei bä nijamö cäcöbö çoblou çolayoma.

²⁷Adioquia jamö cäcöbö ça fa çobonö, Jesucristo ebä lä yododaö wei bä nacaböalalema. Yai Bada tänö cäcöbö nö waḡojamaö lä cuaano wei, tä ḡ wäyäbö çojoloma. Jesucristo a nofi mölabou mö feduobeje, judio bä lä mlai bä bufi jaducublamaö lä cuaaimano wei tä ḡ çai.

²⁸Öjamö Jesucristo nija bä lä nocaö wei ebä nija, cäcöbö nö dedeblaliyoma.

Hechos 15

¹Judea jamö ai bä lä bälöle, Adioquia jamö bä fa waloicunö, Jesucristo ebä judio lä mlai bä yömölamaje. Abinaja bä nowa tamaje. —Moisesi tä ḡ ja wamacö cadidoimi ja, wamacö mosi sicö janöblamoimi ja, wamacö jucäamou daomi —bä nowa tamaje.

²Pablo, Benabei sho cäcöbö a läblaliyoma. Cäcöbö a lojodoaama ma cui, bä a faö fe blacäjou showaoma. Öjö cudeenö, Jesucristonö bä lä shömöleno wei bä bada wäldayobeje, Pablo a ma cui, Benabei a ma cui, ai bä ma cui, Jelusale jamö bä shömölemaje. Öjamö lä, Jesucristo ebä çai lä yododano wejei bä a bada jiliabeje.

³Öjö cudeenö, Jesucristo ebä lä yododaö wei bä lä cuinö, öjö bä fa shömölöjenö, bä aa showalayofälöma. Fenisia jamö ma cui, Samalia jamö ma cui, bä bluca yömöläö jayuaö cuaafälömaje. Judio bä lä mlai bä Jesucristo bufilewä çai cublou mö lä fedulayono wei, tä a wäyäö fa cuaaimadujenö, Jesucristo ebä bufi bluca doblaloma.

⁴Jelusale jamö bä waloo däjä, Jesucristo ebä lä yododaö wei bä bufi doblaloma. Bä çai lä yododaö wejei bä bada ma cuinö, bä çai fama möö bufi doblao mö feduomaje. Jesucristonö bä lä shömöleno wei bä ma cuinö, inaja showawä. Öjö bä bluca nija, Yai Bada tänö bä nö wəlojamaö lä cuaano wei tä a bluca wäyäö çojolomaje.

⁵Öjö ma cui, Jesucristo a bejedi lä bufino wejei bä a bada faliseo shomiaö dicooma, Moisesi tä a nofi lä yaibou wejei bä lä cui. Öjö bä fa ublaicunö, abinaja bä cuma. — Öjö bä judio lä mlai, wama bä afa Jesucristo bufilewä lä wäyäö wei, öjö bäma bä mosi sicö nia joyamaö bufii. Moisesi tä a nofi cadidobeje bäma bä nia çai yömöläö, dodijidawä bä cuobä —bä faliseo cuma.

⁶Öjö tä a wayoabeje, Jesucristonö bä lä shömöleno wei bä ma cui, Jesucristo ebä çai lä yododaö wejei bä bada ma cui, bä bluca çecamolayoma.

⁷Bä a wayou nö dedeaö waiquiwä ja, öjö däjä Pedro a fa ubladalunö, a wə fama. —Iba wamacö. Judio bä lä mlai bä nija, Jesucristo ya etä a dodijidawä wäyäbä, Yai Bada tänö camiyä wale jaba lä yaileno wei, wama tä daö. Camiyä ya wəno, tä a bejedi bufibeje.

⁸¿Öjö tawä? Yanowamö täbä bufi lä daö wei a Yai Bada lä cuinö, öjö bä nija a Bufi fa jöbömoicunö, cama ebä jömaö wawädooma, camiyä bamacö nija a Bufi lä jöbömoqueno weinaja showawä.

⁹Judio bamacö ma cui, judio bä lä mlai bä ma cui, bämalecö fe bluca usucumabou showaoma. Jesucristo a nofi mölabouje yalo, cama bä ma cui, bä bufi çai aumaö mö feduo showaoma.

¹⁰Öjö cudeenö, abinaja ya cuu —a cuma—. ¿Wedi tä tabä Yai Bada wama a li wabaö bufi doblao, wama a jushuo lulubobä? Jesucristo nija bä lä nocao wei ebä lä cui, Moisesi tä a ja wama bä yabäcaö dicoo ja, wama bä nia doblamaimi. Camiyä bamacö nö badabö ma cui, camiyä bamacö ma cui, öjö tä a no bamacö doblono malä mlai.

¹¹Ma. Bada tä Jesúsno bämalecö nofi lä ojodadaleno wei tänö, bamacö nia jucäamou. Öjö bäma tä a bejedi bufii waiquia. Öjö tä showawänö, cama bä ma cui bä nia çai jucäamou mö feduo showao —Pedro a cuma.

¹²Öjö däjä bä a bluca fa waidalunö, Benabei, Pablo cäcöbö nija bä yömöca daoma. Judio bä lä mlai bä nijamö cäcöbö lä juno wei däjä, Yai Bada tänö cäcöbö nö

wajojamaö lä cuaano wei tä a wäyaböma. Yai Bada tä lojode dablamobä, tä nö lä quilijii tä bluca lä wawämaböno wei tä a çai, tä tamou dao lä mlai.

13Cäcöbö a faö fa waiconö, Santiago a wä faö nomöjöoma. —Iba wamacö. Wamale a da jililä.

14Simón Pedro bäma a wä jilia waiquilei lä cufe, ¿öjö tawä? Yai Bada tänö cama ebä tabobä, judio bä lä mlai bä jaba lä bayelibaleno wei tä ja, bämalecö yömölalema.

15Yai Bada a wäno wäyälwä bä lä cuinö, öjö tä afa çai wäyäo balöomaje. Abinaja tä a cuu.

16Yai Bada ya wäno wäyäo lä cule. Obi a nia juu çoo. David e yafi lä wäcälayono wei e yafi nia taö çoo. Defibä lä jilale defibä fa çalalunö öjö defibä showawä ja, yafi nia dodijidawä itabou,

17ai bä lä bälöblai bä blucanö, Bada tä bufiblabeje. Judio bä ma mlai ma cui, cama ebä blucanö, a bufiblabeje.

18Einaja Yai Bada bei a cuma, showadi täbä lä yömölabou wei a lä cui.

19¿Öjö tawä? — Santiago a cuma—. Einaja tä a cuu yalo, abinaja bamacö nowa taö lä cule. Judio bä lä mlai, Yai Bada tä lä bufiblaö wejei, bäma bä yabäcaö mlai.

20Oni bäma tä a shino yai fa shömölönö, bäma bä wasöbä. Nö idubö täbä ja, bä nii lä dodobou wejei bä ja, bäma bä iyaö wasöbä. Bä lä joleblalou wei tä ma cui ja, bäma bä çai wasöbä. Yalo bä olami lä shiamou wei bä ja, bäma bä çai iyaö wasöbä, iyäbö cua lä showale a ja. İyä iyä bäma bä çai waö wasöo showadaobä.

21Yedu jamö ma cui, jödödöwä täbä shabonobö jamö, Moisesi tä a ja bä yömölamou malä waiquii. Täbä yanöcöobä tä mö jalu ja, judio bä yododabä yafi bä jamö, öjö tä a oni doamou blaucou malä cui —a cuma.

22Öjö a wä fa jililäjenö, Jesucristo ebä lä yododaö wei bä a bluca wayoma. Jesucristonö bä lä shömöleno wei bä ma cui, cama ebä çai lä yododaö wejei bä bada ma cui, bä a bluca wayou fa balöonö, bä bufi shaliliblaliyoma. Adioquiateli bä nijamö cäcöbö shömabeje, bolacabö cäcöbö bada yailemaje, Pablo, Benabei sho cäcöbö çofälöbä jamö, cäcöbö yauo showaofälöbä. Bada cäcöbö lä yaileno wejei, Juda Basabaa ai a wäfa cuoma, Sila ai a wäfa cuo mö feduoma.

23Öjö cäcöböno tä a oni bälaböbä, si jöböquemaje. Abinaja tä a oni cuma. Adioquiateli wamacö nija. Silia jamö wamacö lä bälöle wamacö çai nija. Silisia jamö wamacö lä bälöle wamacö çai nija. Cafä Jesucristo wama ecö lä cui nija yama tä a oni shömaö bufi doblaa lä cule, judio wamacö lä mlai wamacö nija. Jesucristonö yamalecö lä shömöleno wei yamacö ma cuinö, cama ebä çai lä yododaö wejei bä çai bada ma cuinö, öjö yamacö blucanö, yama tä a oni shömaö lä cule. ¿Dodijidawä wamacö cua culawä?

²⁴Cafä wamacö nija, ai yamacö jowa juu fa jatonö, wamacö bufi jowa wedinajamomaö dicoomaje, shomi tä a lämaö bufi doblao fa dicoojenö. Camiyä yamacö badanö, yama bä shömanomi. Inaja bä jowa cuaama yalo,

²⁵ai yama cäcöbö nia shömaö. Yama cäcöbö shömaö bufi doblaa lä cule, tä cadejeblaböbä. Öjö yama tä a fa wayoanö, yamacö bufi bluca shaliliblaliyoma. Ai yama cäcöbö fa yailönö, Benabei, Pablo sho cäcöbö çofälöbä jamö, cafä wamacö nija yama cäcöbö nia shömaö. Benabei ;bejedi lä yama a nofimaö, Pablo a çai!

²⁶Cäcöbö nia ma shäno wejei ma cui, cäcöbö waiquidonomi. Bada tä Jesucristo a wa juaböö bufi fa doblaonö, etä a wäyaböö fe yadioma.

²⁷Öjö cudeenö, Juda yama a nia shömaö, Sila a çai, ei yama tä a lä oniblale tä a wäyaböbä.

²⁸Yamalecö cadidamabä, Yai Bada tä Bufinö yamalecö bufi shaliliblamalema. Cafä wamacö nija bluca yama tä a nia läamaimi. Ei tä ja bamacö nia shino wasöö, dodijidawä wamacö cuobä.

²⁹Nö idubö täbä ja, bä nii lä dodobou wejei bä wa dijejä. İyä İyä bä çai wa dijejä. Yalo bä olami lä şhamou wei, bä çai wa dijejä. Bä çai joleblalo dijä. Inaja lä waiquiwä. Einaja tä a oni cuma.

³⁰Öjö cudeenö, cäcöbö fa shömölöjenö, Adioquia jamö bä bluca aa showadalayofälöma. Öjamö bä fa waloicunö, Jesucristo ebä lä yododano wei bä bluca fa nacaalalöjenö, cama bä nija si oni jöböquemaje.

³¹Tä a oni fa jililäjenö, bä bufi lojodoblaliyoma. Bä bufi çai doblaloma.

³²Juda a ma cuinö, Sila a ma cuinö, Yai Bada a wano wäyälewä cäcöbö cuoma yalo, bä yömölaböö dodijioma. Bä bufi lojodoblamabölema.

³³⁻³⁴Öjamö cäcöbö nö dedeblou fa balölonö, Jesucristo ebänö, dodijidawä cäcöbö shömöa çolemaje, cäcöbö lä shömöleno wejei bä nijamö.

³⁵Öjö ma cui, Pablo, Benabei sho cäcöbö yanöcöa showaquema, Adioquiateli bä yömölaböö juo showaobä. Cama cäcöbö ma cuinö, ai bä bluca mö feduwä ma cuinö, bluca bänö bä yömöladimaje. Bada tä afa wäyädimaje.

³⁶Tä nö dedea fa çolunö, Benabei nija abinaja Pablo a cuma. —Bada tä Jesucristo bäfä afa lä wäyano wei jamö, bäfäcö mö yabaö da çofälö, Jesucristo ebä bluca lä cublai, bäfä bä dodijaö möö cuaaö çofälöbä —a cuma.

³⁷Benabei a lä cuinö, Juan Marcos a nocamabou bufi ma doblaono wei ma cui,

³⁸Pablo a wa lämoma. —Öjö a mlai —a cuma—. Bařilia jamö bäfäcö da cuoblei däjä, öjönö bäfälecö daa fa dicocufälönö, bäfälecö bayeliblaö mada maoblei —a cuma.

³⁹Inaja Pablo a cuu ja, cäcöbö jushuo lulayoa fa dicolunö, cäcöbö shedequeblaliyoma. Benabei a lä cuinö, Juan Marcos a fa nacaläfälönö, Shible jamö, öjö sho cäcöbö befi çai caläö çofälöma.

⁴⁰Öjö ma cui, Pablonö Sila a yaia mö fa fedulönö, öjö a çai aa mö fedua showalayoma. Bada tänö cäcöbö bayelibläö cuaabä, Jesucristo ebä lä cuinö cäcöbö nö bayeli nacaö fa balöojenö, cäcöbö shömölemaje.

⁴¹Silia jamö ma cui, Silisia jamö ma cui, cäcöbö jayuaö lä cuaano wei jamö, Jesucristo ebä lä yododoblai bä fe bluca waloböö cuaama. Bä bufi bluca lojodoamaböö çofälöma.

Hechos 16

¹Pablo a jayuablalou fa showaimadunö, Debe ma cui jamö, Lita ma cui jamö, öjamö a waloa nomöjjuema. Öjamö Jesucristo nija a lä nocao wei a wafa Timoteo fiya lä cule, a dalalema. Timoteo bä nöö e lä cui, judioteliyoma e cuoma. Jesucristo a bejedi bufiboma. Öjö ma cui, bä föö e lä cui, judio a cuonomi.

²Jesucristo ebä bluca lä cuinö, Litateli bä ma cuinö, Iconioteli bä ma cuinö, Timoteo a wafa bluca dodijaö tamaje.

³Pablonö Timoteo a nocamabou bufi fa doblaonö, mosi sicö joyaa balömalema, öjamö bä lä bälöblai bä judio lä cuinö a waii dicoo mlaobeje. Timoteo bä föö e lä cui, judio a lä mlai a malä dano wejei, Moisesi etä a tabou lä mlai.

⁴Bluca bä lä bälöjoi bä fe waloo fa cuaaimadujenö, bä yömöläö cuaamaje. Jelusale jamö bä bada lä yododano wei, bä wano çai wäyämaje, bä a juabeje. Jesucristonö bä lä shömöleno wei bä ma cui, cama ebä çai lä yododaö wejei bä çai bada ma cui, öjö bä bufi shalililanö bä a lä fano weinaja showawä.

⁵Tä a fa jililäjenö, Jesucristo ebä lä yododoblai bä bufi lojodoblaliyoma. Jesucristo a nofi shino yai mölabou cadidiomaje. Bä Jesucristo bufilewä çai cuaaö nosi blacäcoma.

⁶Pablonö bä çai lä cuono wei bä nija, Asia jamö Yai Bada tä Bufinö tä a wäyäö wasöma. Öjö cudeenö, Flijia ma cui jamö, Calasia ma cui jamö, öjamö lä bä shino jayuquefälöma.

⁷Misia jamö bä fa waloicunö, Bidinia jamö bä nia juu ma nomöjjuono wei ma cui, Jesús a wä Bui läöma.

⁸A wä läöma cudeenö, Misia jamö bä jayua fa showadaicufälönö, Doasi jamö bä cua nomöjölaiyoma.

⁹Öjamö lä, Pablo nija wawadowä etä bädou fe jalulayoma. Masedoniateli e wawadowä fa ubladaliyonö, e a bädaliyoma. —Jabo. Eja Masedonia jamö wa fa juimanö, yamalecö da bayeliblaliyo —a majali nowa tama.

¹⁰Pablonö öjö tä a fa jililänö, yamacö shulucou showadaoma, Masedonia jamö yamacö jubä. “Öjö lä Yai Bada tä mayo waiquiwä”, yamacö bufi cuma. “Masedoniateli bä nija yama tä a dodijidawä wäyäbä, Yai Bada tänö yamalecö shömöa cadidia waiquilei lä cufe”, yama a nofi taboma.

11Öjö cudeenö, Doasi jamö yamacö shulucua fa çolufälönö, Samodasia jamö yamacö befi çai caläo cadidou showadaofälöma. Öjö tä fena ja, Neaboli jamö yamacö jua fa nomöjölöfälönö,

12Filiboteli bä nijamö yamacö waloa nomöjöquema, Masedonia tä ulifi jamö bä jaba lä bälöle bä nija, Lomateli bä bälöo lä balöono wei jamö. Öjamö yamacö fe fa weyablalunö,

13täbä yanöcöobä tä mö jalu ja, yamacö fa sibolunö, mau u casö jamö yamacö judayoma. “Öjamö lä bei täbä nö bayeli nö nacaobö”, yamacö bufi cuma cudeenö, yamacö fa alufälönö, yamacö loaliyoma. Yamacö fa loalunö, suwä bä lä yododano wei bä nija yama tä ʘ wäyäma.

14Yamalecö ʘ lä jilileno wei a suwä ai lä cui, Diadilateliyoma a cuoma, Lidia a wafa lä cule. Camishi ushujuwä bä lä nomöjöano wei a li suwä cuoma, bä camishi nowa lä bluca wei. Yai Bada nija a möfe bolanö, showadi a wafa Bada doblaö tama. Öjö a suwä lä cuinö, Pablo a wʘ jiliaö shalilibä, Bada tänö a bufi jaducublamalema.

15A bufi fa jaducublalunö a fe ojoblamolayoma, bä çai lä cuono wei bä sho. Öjö däjä, abinaja yamalecö nowa taö fe blacäjoma. —“Bejedi lä, Bada tä lä culadi a nö bufibou waiquibö lä”, wamale nofi tabou ja, camiyä yamacö nijamö bä da cuiquiyo —a cudima.

16Yai Bada nija bä nö bayeli nacaobä jamö, yamacö juu çöo däjä, bä nosie juamobä a suwä lä tabono wejei a lä cui, yama a mö bamalema. A feculaoma. A fecula lä bälöono wei a wʘnö, a wʘ suwä shomioma. Tä nia lä cublou wei tä ʘ wawämaö balöoma. Öjö a wʘ jilii bufi doblaomaje cudeenö, a suwä lä tabono wejei bä lä cuinö, blada bä fa nacajenö, a wʘ jilimamaje. Cama suwä a wʘ ja, blada bluca bä däamaje.

17Pablonö yamalecö çai lä juno wei jamö, a wʘ suwä çai yauama. Abinaja a icalı cufälöma. —Yai Bada tä Bada lä ayai a nosie juabeje, fei bä li. Cafä wamacö nija etä ʘ wäyäöje, wamacö jucäamobä —a suwä cuma.

18Einaja a cuaaö showao däjä, tä nö dedejedaliyoma. A wʘ faö wʘlioblodii nojaaö ja, yacumö Pablo a mö fa yabadalunö, a fecula lä bälöono wei a nija a wʘ fama. —Jesucristo a wʘ lojodenö, bäfä shömaö lä cule. A suwä da dacöfälö—a cuma. Einaja a fa cunö, a suwä daa showadaquefälöma.

19Öjö ma cui, a suwä lä tabono wejei a blocoblou nofi jushulayou ja, bä nö bayeliblamou çödaabimi yalo, bä jushudaliyoma. Öjö däjä, Pablo, Sila cäcöbö fa juwämalöjenö, bada bä yododabä jamö, cäcöbö läcämalefälömaje, nii bä showadi lä luluamou wei jamö.

20Bada bä nija cäcöbö çai fa icuicujenö, abinaja bada bä nowa tamaje. —Fei judio cäcöbö li. Eja Lomateli yamacö lä bälöle yamalecö yabäcaböö dodijia.

21Yamalecö taamaböö lä bufiı weınaja, camiyä Lomateli yamacö cuaabä yamacömi. Tä ʘ läa. “Jʘo”, yamacö cubä yamacö ma mlai ma cui, cäcöbö ʘ fe blacäjou —bä cuma.

- 22**Öjö tä ʔ fa jililäjenö, öjamö bä bluca lä yododano wei bä fa jocäcädalunö, Pablo, Sila cäcöbö nabä quea showadaquemaje. Bada bänö cäcöbö fa juwälöjenö, cäcöbö camishibö cacalalemaje. Fii fibänö cäcöbö si yowamalalemaje.
- 23**Cäcöbö si fa yowamalalöjenö, bä doblou lä mlai bä fe lä labou wejei jamö, cäcöbö fe jalili lamaquemaje. Öjamö a lä lämono wei a nosiemäo showadaomaje, cäcöbö documaö mlaobä.
- 24**Inaja a nowa tamaje yalo, ʔeshi yano jamö cäcöbö lojodomabou showaoma. Cäcöbö docuu mlaobä, madofi jude tänö cäcöbö matacö badädäa showaaquema.
- 25**Bäshäcuoladi, Yai Bada nija Pablo, Sila sho cäcöbö nö bayeli nacao fe jaluma. Yai Bada tä nija cäcöbö çai amowamoma. Ai bä fe lao mö lä feduono wei bä lä cui, bä yömöca daoma.
- 26**Öjö däjä, yedu mashita icalı a fa quıda quıdamonö, bä fe lä laono wei a yafi colo bloloblaliyoma. A yafi colo lä bloloblaliyo wei ja, bei yocabä çai caloa showaolaliyoma. Bä fe lä labono wejei bä matacö çai lä badädäbono wejei, täbä madofi bluca jayoyolaliyoma.
- 27**A lä lämou wei a lä cui, yedu a fa jocädalunö, bei yocabä bluca caloa fa dalalönö, a quililaliyoma. “Ya bä documaö tä nowa ja, bada tänö wale nia shämaö showadao”, a bufi cuma yalo, cama enö a nia shämou showadaoma. Shocobi a fa ucädalänö, cama a mini shämou däjä,
- 28**Pablo a wʔ ıcalı läblaliyoma. —Cafä a shämo dijä. Eja yamacö bluca jilaa showaa lä cule —a cudaliyoma.
- 29**A lä lämono weinö, cowa wacö fa nacalänö, ʔeshi yano jamö a shi jali falayoma. Pablo, Sila cäcöbö cotä jamö, a fa yäläblaicunö, a quilili blösö blösömoma.
- 30**Cäcöbö siboa fa showadamalönö, abinaja cäcöbö nowa tama. —Cafä bada wafäcö, ıwedinaja ya fa cuaanö, ya li jucäamobä? —a cuma.
- 31**Abinaja a nowa taböma. —Bada tä Jesús a bejedi da bufi, afä bä bluca sho, wamacö jucäamobä —cäcöbö cuma.
- 32**Cama a ma cui nija, bä çai lä cule bä ma cui nija, Bada tä ʔfa Jesucristo wäyäbö showadaoma.
- 33**Öjö tä didi showao däjä, a lä läono wei a lä cuinö cäcöbö fa nacaläfälönö, cäcöbö iyä yalulema. Öjö däjä showadawä, cama a ma cui, bä çai lä cule bä ma cui, bä fe bluca ojoblamo showalayoma.
- 34**Öjö däjä, cama ebä çai lä bälöo wei jamö, cäcöbö çai dua fa çobofälönö, cäcöbö niibö baaquema. Cama a ma cui, bä çai lä cule bä ma cui, Yai Bada etä ʔ bejedi bufilemaje yalo, bä bufi yai doblalou dodijioma.
- 35**Öjö tä fena ja, bä bada lä läono wei bänö cama ebä fa shömölöjenö, cäcöbö cushäblamaö bufimaje.

³⁶Cäcöbö fe lä laono wei yafi jamö, a lä lämono wei a lä cuinö, Pablo a yömöläö ja, abinaja a cuma. —Bada bä wano taö mö waloquei lä cufajei, bäfäcö cushäblaö çobä. ¿Öjö tawä? Jabo. Dodijidawä wafäcö juu çofälöbä —cäcöbö nowa tama.

³⁷Öjö ma cui, bä lä waloqueno wei bä nija Pablo a wä fama. —Bada bänö yafälecö dobroimi jömano ma mlajei ma cui, fii fibänö wawadowä yafälecö si yowamalalemaje. Lomateli bänö yafälecö nofi lä tabou wejei yafäcö ma cui, täbä fe lä lamaö wejei yafi jamö yafälecö fe laquemaje. ¿Öjö tawä? Wawadowä yafälecö nö bleaamama ma cujei, fei däjä ¿yafälecö nia shömaö jätöoje daanö? Mlaicätä. Eja cama bä yai fa waloiquiyonö, wawadowä yafälecö nö bleaamaö lä cuofajeinaja, wawadowä yafälecö yai famaö çobeje —Pablo a cuma.

³⁸Bada bä lä laono wei ebä lä cuinö, Pablo a wano wäyäjälomaje. “Wama cäcöbö fe lä laqueno wei, Lomateli bänö cäcöbö nofi lä tabou wejei cäcöbö jowa fa tai”, bä cuu fa jililäjeno, bä quililaliyoma.

³⁹Bä fa quililalunö, bä icua showadaquema. —Shädayai —bä cuma— “Lomateli bänö ei cäcöbö nofi tabouje”, yamacö bufi cuu fa mlacunö, inaja bäfäcö li taamamaö dicooma —bä cuma. Einaja bä fa cunö, cäcöbö faa fa showadamalöjenö, cäcöbö shömöa çolemaje.

⁴⁰¿Öjö tawä? Cäcöbö fe lä labono wejei yafi fa daböcöfälönö, Lidia e yafi jamö cäcöbö juu nomöjöoma. Öjamö lä Jesucristo ebä möbö fa çonö, Yai Bada etä a ja bä yömölaböö fa jayuaimadunö, cäcöbö cadidiblou çolayofälöma.

Hechos 17

¹Bei. Afiboliteli bä lä bälöle jamö, Pablo, Sila sho cäcöbö jayuaö fa balöonö, Aboloniатели bä lä bälöle jamö cäcöbö jayua fa nomjöicufälönö, Desalonicатели bä nijamö cäcöbö waloquema. Öjamö judio bä yododabä yafi cuoma.

²Öjamö lä Pablo a alayoma, showadi a lä cuaano weinaja showawä. Täbä yanöcöobä tä mö jalu ja,

³ a juu fa cublalunö, Yai Bada a wano oni jömaö cuaaö ja, a wä lojodoama.

³Öjö tä a oni ja, Yai Bada tänö a shömabä a lä yaileno wei tä a wawämama. A nö nia lä bleaano wei tä a ma cui, a nia demi jocädou lä çono wei tä a ma cui, öjö tä a ja a wä cadidiablalou ja, bä a läobä etä cuonomi. Abinaja a cuma. —Cafä wamacö nija fei Jesús ya wafa lä wäyäle, öjö Yai Bada tänö a shömabä a lä yaileno wei a waiquiwä — a cuma.

⁴Pablo a wano, judio ai bä bufi taamamou dodijioma. Pablo, Sila cäcöbö nija bä yädäa showadablaliyoma. Judio bä lä mlai, Yai Bada nija bä bejedimou bufi lä doblaono wei bä ma cui, bä suwä bufi lä jaducui bä ma cui, inaja showawä bä bluca çai cuaaö mö feduo showaoma.

⁵Öjö ma cui, judio ai bä lä cui, cama bä a jilimamou bufi doblao fa ayaonö, bä jushuoma. Bä nofi lä jushuaö wei bä juu fa dalalöjenö, bä nacabalemaje. Öjö bä sho

bä ʔ shi jaliwä wayou ja, ai bä bluca ʔocablaliyoyoluma. Öjö däjä, öjö bä ʔnö bluca bä lä bälöle bä shi bluca dolayoma. Bada bä nija Pablo, Sila cäcöbö öböä showadaofälöbeje, Jasono e yafi jamö bä lucälayoma.

⁶Öjamö lä cäcöbö dayäma ma cujei, cäcöbö dabraö fa mlacujenö, Jasono a ma cui, Jesucristo ai ebä ma cui, bada bä nija öjö bä läcäa yacläaquemaje. Abinaja bada bä nowa tamaje. —Jödödöwä täbä lä bälöblai jamö cäcöbö ʔ nofi jushuadii lä cuaaö wei, bä shi bluca lä jalimomaböö wei, eja cäcöbö fa waloalijonö,

⁷fei Jasono a lä cuinö cäcöbö jowa bälömabou lä cubiyei. Sesa a wə bada ma faö wei ma cui, fei bä bluca lä cuinö a wə jilia möablaimije. Ai a bada wəfa wäyöö yacläo dicooje, Jesús a wəfa lä cule —bä jushuolanö bä cuma.

⁸Bä bluca lä toujono wei bä ma cui, bada bä lä läono wei bä ma cui, öjö bä ʔnö bä bluca shifilimoma.

⁹Jasono a ma cui, ai bä juwäbou mö lä feduono wejei bä ma cui, bä nofi jowa lä jushuano wei tä nowa ja, bada bänö blada bä nacamaje. Öjö däjä, cama bä nowa fa ʔamamoicunö bä jujeblamolayoma.

¹⁰Didi däjä Jesucristo ebä lä cuinö, Belea jamö Pablo, Sila cäcöbö shömöa fe jalua showadalemaje. Öjamö cäcöbö fa yafilönö, judio bä yododabä yafi jamö cäcöbö falayoma.

¹¹Öjö bä judio lä cuinö tä ʔ jiliaö bufi doblaomaje. Öjö bä bufi shino yai walalao dodijioma, Desalonicateli bä bufi lä cuono weinaja mlai. Cäcöbö ʔ nia bejedi fa möjenö, Yai Bada showadi etä ʔ oni mömaje.

¹²Inaja bä cuaama yalo, tä ʔ bejedi bufilemaje. Judio bä lä mlai bä nö suwä lä madofibö wei bä bluca ma cuinö, öjö bä ʔai wəlo mö feduwä ma cuinö tä ʔ ʔai bejedi bufia mö fedulemaje.

¹³Öjö ma cui, Desalonicateli bä judio lä cuinö, Belea jamö Pablonö Yai Bada etä ʔ wäyöö lä nomöjole tä ʔ fa jililäjenö, öjamö ma cui a nabä aa majölayomaje. Öjö bä ʔnö bä lä ʔocamono wei bä shi fa jalijimomalöjenö, bä jushuo lulubomaje.

¹⁴Öjö lä däjä, Jesucristo ebänö modu u casö jamö Pablo a shömöa showadalemaje, a befi ʔai caläo ʔofälöbä. Öjö ma cui, Sila, Timoteo öjamö cäcöbö jäquema.

¹⁵Öjö däjä, Pablo a lä bälano wejei bä lä cui, Adena jamö Pablo a ʔai fa waloicujenö, Pablonö bä shömöa mö yabaa ʔolema, Sila, Timoteo cäcöbö shömaö jaödaobeje.

¹⁶Adena jamö Pablonö cäcöbö nö dabolanö, öjamö bä lä bälöle bä nö bayeli lä nacao wei täbä nö idubö bluca möö cuaama. Öjö täbä nö idubönö Adenateli bä shabonobö jödödöoma. Öjö bä bluca fa dalalönö, Pablo a bufi jalujou dodijioma.

¹⁷Öjö cudeenö, judio bä yododabä yafi jamö a wə fama. Judio bä ma cui nija, Yai Bada nija ai bä bejedimou bufi lä doblao wei bä ma cui nija, öjö bä nija Pablo a wə lojodoama. Nii bä showadi lä luluamou wei jamö ma cui, öjamö bä lä waloblaaö wei bä ma cui nijamö, showadi a wə fadii cuaama.

18Shomi täbä a ja, bä damaö mö lä feduono wejei ai bä cuoma. Öjö bä lä cuinö, Pablo a dalalemaje. Ai etä a nofi lä yaibono wejei, ebiculeo bä afa jilabomaje. Ai etä a tabou mö lä feduono wejei, etoico bä afa jilabou mö feduomaje. Pablo a wə wayoaöje ja, abinaja cama ai bä cuma. —¿Wedinaja a cuu ja, bei a wə li shifilimou cubiyei? Jesús a lä nomalayono wei, a demi jocädou lä çolayono wei tä afa wäyää yalo, abinaja ai bä cuu mö feduoma. —Cui. Shomi täbä lä bufiblaö wejei, bei täbä afa wäyää buo fa cui —bä cublaloma.

19¿Öjö tawä? Pablo a naca fa showadalöfälöjenö, bada bä yododabä jamö a lululefälömaje, bada bä a lä jilamou wei jamö. Abinaja bä cuma. —Wa tä a lä wäyää wei yama tä a jiliaö bufi doblao, ¿öjö tawä?

20Yama tä a jaba jiliaö fa mlacunö, yama tä a jiliaö doblaimi showawä. Yamacö bufi jaducublobä, tä a da wäba —bä cuma.

21¿Öjö tawä? Adenateli bä yai ma cui, shomi bä lä coyocoi bä ma cui, öjö bä bluca lä cui abinaja bä showadi cuaama. Tä a daö balöono lä mlajei tä a shino jiliaö bädao bufi doblaomaje. Tä a çai wayoaö bufi doblaomaje. Inaja bä cualanö, shomi tä a ja bä showadi yabäcäaliyoma.

22Öjö cudeenö, bada bä yododabä jamö Pablo a ublaa fa möamodalunö, bä yömölalema. —Adenateli wamacö. Wamacö nö bayeli nacaobä, wama täbä nö idubö bluca lä table, ya täbä dabraö cuaaö waiquia. Bluca täbä ja wamacö nofi quilii yai.

23Afä wama täbä lä bufiblaö wei ya täbä nö idubö möö cuaama, wama täbä afa lojode lä wäyää wei täbä lä cui. Ya täbä möö fa cuaaimadunö, ai tä nö idubö ja, abinaja ya tä a oni dalalema, “Bäma tä nofi lä mojudubole”, tä a oni cuu culai. ¿Öjö tawä? Wama tä nofi ma mojudubole ma cui nija wamacö nö bayeli nacaobä wama etä yafi wai tabou. Öjö wama tä daö lä mlale tä ja, wawädowä bämacö yömöläö lä cule.

24’Bei —Pablo a cuma—. Mashita a bada lä tablaleno wei a lä cui, jödödowä bä lä cublai bä çai lä tablaleno wei a showawä lä cui, öjö Yai Bada çätä. Fedu jamö ma cui, bita jamö ma cui, öjö a shino Bada cua ayaa. Öjö cudeenö, wamacö nö bayeli nacaobä wama e yano ma tablalei wei ma cui, a nia bälöomi.

25’Camiyä bämacö nija a nia bayeliblamoimi. A jöliimi. Camanö bämalecö nia shilo yai bayeliblaö ayao. Camanö bämalecö bayelibou yalo bämacö demi, bämacö çai jele jelemou. Täbä bluca lä cublai täbä ja, bämacö dobäo talei.

26Moli a jaba lä cuono wei a nija, bluca bämacö bälöjowä lä yaiblai bämalecö bluca balamalema. Bämacö bälöa yaiblamobä, bämacö ulifibö jöböa cadidia sheleleabodayoma. Öjamö bämacö fe nia lä wädäo wei tä daö lä waiquilenaja, bämacö bälöa taamabou lä cudi.

27’¿Öjö tawä? —a cuma—. Inaja bämalecö lä taamaö wei, cama bäma a bufijabä a li, bäma a dayäbä. Öjö ma cui, camiyä bämacö bluca nijamö a ajedeblawä waiquiwä.

28Afä ai wama bä a showadi lä jiliaö wei, bä cuu lä waiquio weinaja showawä. Abinaja bä cuu. “Bämacö lä demöo wei tä ma cui, bämacö lä qujaaö wei tä ma cui,

cama a lojodenö bamacö cua lä cule”, bä cuu. Abinaja çai, “Cama bama ecö ijilubö malä cui”, bä çai cuu.

²⁹ Öjö tawä? —Pablo a cuma—. Yai Bada bama ecö ijilubö waiquiwä yalo, bamacö bufi jaducublobä, öjö lä. Olo bä ma cui ja, blada bä ma cui ja, maa mabä ma cui ja, öjö bä ja bä nö idubö lä tablamou wei bä lä culenaja, Yai Bada tä cuwämi. Inaja bama a nofi tabobä bamacömi. Yanowamö täbä bufi fa dayäonö, täbä li tablaö bädaomaje täbä li.

³⁰ Täbä yanowamö bufi jaba lä mojuduono wei däjä, Yai Bada tänö bä nö bleaamaö jaöono ma mlai ma cui, fei däjä bluca bamacö lä bälöblai bämalecö wasöo, wälidiwä tä ja bamacö bufi lädobä.

³¹ Yanowamö täbä obi nia malä jömaö wei. Bamacö dodijaö ma cui, bamacö doblou ma mlai ma cui, bämalecö nowa taö ja a wä nia cadidou. A wä nia lä famaö wei a yaia waiquilema. “Bejedi lä öjö lä a waiquiwä”, bamacö bluca cubä, a nofi lä yaibole a ma nomalayono wei ma cui, a demi jocädamaö çolayoma —Pablo a cuma.

³² A demi afa jocädou taö ja, ai bä lä cuinö a nö waiblamaje. Öjö ma cui, ai bä mö feduwä lä cuinö a wä nia shino jiliaö çomaje.

³³ Inaja bä cuu fa jililänö, Pablo a faa çolayofälöma ma cui,

³⁴ cama nija ai bä yädäblou showadalayoma. Jesucristo a wäfa lä wäyämöno wei tä a bejedi bufilemaje. Ai a lä cui, Dionisio a wäfa cuoma, bada bä yododabä jamö showadi bä a lä jilidino wei. Ai a lä cui, a wäfa suwä Damali cuoma. Öjö cäcöbö nija ai bä çai yädäo showaoma.

Hechos 18

¹ Tä fe fa weyadalunö, Adena jamö Pablo a fa jocälönö, Colido jamö a juu nomöjöoma.

² Öjamö Bødoteli a judio dalalema, Aquila a wäfa lä cule. Italia tä ulifi jamö, bä suwäbö Blisila sho cäcöbö jaba bälöoma, Lomateli bä nijamö. Öjö ma cui, öjamö bada tä Claudionö judio bä bälömabou fa mojjilalunö, bä yashublamaö bufima. Colido jamö cäcöbö bälömuo dudo däjä Pablonö cäcöbö fa dalalönö, cäcöbö fe walolema.

³ Blada bä lulubobä, Aquilanö yalo sibä ja bä lä wejejou wei sibä diyädima. Öjö sibä ja Pablo a çai showadi ojodamou mö feduoma yalo, öjö cäcöbö nija a bälöquema. A fa bälöalunö, öjö esibä mashi diyäo mö feduoma.

⁴ Täbä yanöcöobä tä mö jalu ja, judio bä yododabä yafi jamö, showadi Pablo a fa waloönö, Yai Bada tä a wäyäo ja a wä lojodoaama. Judio bä ma cui, judio bä lä mlai bä ma cui, bä bufi taamaö fe yadioma.

⁵ Masedonia jamö culanö, Sila, Timoteo sho cäcöbö walöa çolayoma. Pablo nijamö cäcöbö walöa fa çalunö, shomi tä ja Pablo a yabäcou mlai ja, showadi Yai Bada etä a

shino yai wäyädima. Judio bä nija tä ʔ wäyäo ja, abinaja a cudima. —Yai Bada tänö a shömabä a lä yaileno wei, ʔjö Jesús a waiquiwä —a cuma.

⁶ʔjö ma cui, bä ʔ läblaliyoma. A nö waiblalemaje. ʔjö däjä, Yai Bada etä ʔ wailemaje yalo, Pablonö bä nia dobroimi fa jömanö, a lä didile ecö libubö yaösöblalefälöma. Cäcö yaösöblalanö, abinaja bä nowa taa showalema. —Jao. Wamacö nia lä shämou wei, cafä wamacö mayo. “A wə fanomi”, wamacö nia cuimi. Fei däjä, judio bä lä mlai ya bä yömöläo nomöjoo.

⁷Einaja bä nowa fa talönö, a faa fa showalöfälönö, Disio Juto e yafi jamö a waloo nomöjökema, judio a lä mlai a nija. ʔjö a lä cui, Yai Bada nija showadi a nö bayeli nacaoma. Judio bä yododabä yafi ja, cama e yafi ublaa bayäcäoma.

⁸Bei. Judio bä yododabä yafi jamö a bada lä läono weinö, Bada tä Jesucristo a bejedi bufilema, Clibo a lä cuinö. Cama a ma cuinö, cama ebä çai lä cuono wei bä bluca ma cuinö, Bada tä bufilemaje. Colidoteli bä bluca ma cuinö, Pablo a wə fa jiliajenö, Jesucristo a fa bufilöjenö bä fe bluca ojoblamolayoma.

⁹ʔjamö lä, Pablo nija Bada tä Jesucristo a fa bädalunö, a nowa taö fe jaluma. —A quili dijä. Bä yömöläo fe da yadio. A wə si waiblo dijä.

¹⁰Camiyänö bäfä çai malä cule. Wa nabä nia queomije. Ei a shabono ja, iba bä bluca cua malä waiquibiyei —a cuma.

¹¹Colido jamö Pablonö Yai Bada etä ʔ wäyäo nö dedeama. Lasha ai a faa fa balömalönö, ai a lasha famaö bähäcuaö ço däjä, a wəfa wäyäo showaoma.

¹²ʔjö ma cui, ʔjö Acaya jamö showawä Caliono a bada läo däjä, judio bä bluca fa toujublalunö, Pablo a nabä fa queicujenö a juwälemaje. ʔjö däjä, bada a nija a wəfa wäyäbeje a çai jumaje, Pablo a dobroimi jömabä.

¹³Abinaja bada a nowa tamaje. —Fei a lä cuinö, Yai Bada nija bä bayeliblamaö lä bufii wei tä dodijidawämi. Tä taö ma wasöo wejei ma cui, a wə fe fa blacäjonö, bä bufi taamaö fe yadia lä cule —bä cuma.

¹⁴ʔjö ma cui, Pablo a wə mini faö däjä, Caliono a lä cuinö, abinaja judio bä nowa tama. —Judio wamacö. Fei a yai doblou mlao fa cunoja, a nofi waiteli jushuaö fa cunoja, “Jao”, ya bufi nö cudaliyobö wei ma cui ya bufi cudoimi.

¹⁵Afä wama tä ʔ lä table tä ʔnö wamacö li bäyäblyou bädao dicoo ja, bamacö ʔ jiliaö moji waiquiwä. Cafä wamacö showadi lä cuaaö wei, wamacö showadi lä wasöo wei, afä tä li waiquiwä. Afä wama tä ʔ nofi li bäyäbobä cafä wamacö li. ʔjö ya tä ʔ jilibä ya nia cuomi —a cuma.

¹⁶Inaja a fa cunö, bä lä yododano wei a yafi jamö bä yashublamalema.

¹⁷ʔjö däjä, judio bä yododabä yafi jamö a bada lä läono wei a juwäa nomöjolemaje, Sodene a wəfa lä cule. Caliono a lä cuinö, bada bä çai lä yododano wei a yafi jefa jamö, ʔjö a öböa nomöjolefälöma. ʔjamö Caliono a mötale ja a nabä quequema ma cujei, Caliono a wə faö çodaanomi.

¹⁸Öjö tä cublou fa waiquilonö, öjamö Pablo a nö dedejeblou fa çolonö, a shұлucou çooma. A nia lä juu wei, Jesucristo ebä nija tä ą fa wäyänö, Silia jamö a befi çai caläfälöma. Aquila ma cui, bä suwäbö Blisila a ma cui, Pablo nija cäcöbö yaua showalayofälöma. Yai Bada nija Pablo a wə nö fa wäicunö, a bejedimou dablamobä, Seclea jamö a fe malocoblamolayoma, judio bä showadi lä cuaano weinaja showawä.

¹⁹Efeso jamö Pablonö cäcöbö çai fa washölöblalunö, cäcöbö tabi feiquefälöma. Cäcöbö tabi fa feiquefälönö, judio bä yododabä yafi jamö cama Pablo a falayoma. Öjamö Jesucristo etä ą wäyää ja, judio bä nija a wə lojodoama.

²⁰Öjamö ai bä lä cuinö a fe weyablamaö ma bufino wejei, bä ą juanomi.

²¹Öjö ma cui, a nia lä juu wei tä ąfa wäyää ja, abinaja a cuma. —Eja Yai Bada tänö wale shömaö ço ja, bamacö fe waloo çofälöö weicätä —a cuma. Öjö däjä, Efeso jamö a fa shұлuculonö, a befi çai caläa showalayofälöma.

²²Sesalea jamö Pablo a fa waloicunö, a fa itoblalunö, Jelusale jamö a aa nomöjölayoma, Jesucristo ebä möbä. Öjö däjä, Adioquiateli bä nijamö a aa nomöjölayoma.

²³Öjamö a fe fa weyalönö, a aa çolayofälöma. Calasia tä ulifi ma cui jamö, Flijia tä ulifi ma cui jamö, öjamö bä lä bälöjoi bä fe waloadalaö fa cuaaimadunö, Jesucristo nija bä lä nocaö wei ebä bufi lojodoamaö cuaafälöma.

²⁴Bei. Alejariateli Abolo a judio cuoma. Efesoteli bä nijamö a waloquema. Aca jayu a cuoma. Yai Bada etä ą çai daö dodijioma.

²⁵Bada tänö bä taamaö lä bufii wei tä ja, a damamou cadidou waiquioma. Tä ą wäyää bufi fa doblaonö, Jesús a wəfa wäyää cadidou dodijioma. Öjö ma cui, Juan a lä cuinö, mau u ja bä fe lä ojomano wei tä shino daö ayaoma.

²⁶Judio bä yododabä yafi jamö, a wə jaba faö ja, tä ą wawädowä wäyäma. Aquila bä suwäbö Blisila sho cäcöbö lä cuinö a wə fa jilibölänö, a nacabölema. A fa nacabölänö, Yai Bada tänö täbä taamaö lä bufii wei tä ą ja, a yömölaböö fa shalilionö, a bufi moyawäblamabölema.

²⁷Öjö däjä, Acaya jamö Abolo a juu nomöjöobä, Jesucristo ebänö a bayeliblalemaje. Acaya jamö bä lä bälöle bänö dodijidawä a wə jiliabeje, öjamö Jesucristo nija bä lä nocaö wei bä nija tä ą oniblalemaje. Öjamö Abolo a fa waloicunö, Jesucristo ebä bufi bayelibläö fe balojooma, Yai Bada tänö bä nofi fa ojobonö, tä ą bejedi bufia lä waiquileno wejei bä lä cui.

²⁸Judio bä nija wawädowä a wə faö fa lojodoablalonö, bä ą nö wəlojamanomi. Yai Bada a wəno oni jömaö fa cuanö, abinaja bä nowa tama. —Yai Bada tänö a shömabä a lä yaileno wei, bama a nö lä dabono wei, öjö a li Jesús waiquiwä —bä nowa tama.

Hechos 19

- ¹Colido jamö Abolo a cuo showao däjä, jefu bä jamö Pablo a jayuyou fa cuaaamadunö, Efeso jamö a çoblaliyoma. Öjamö a fa waloicunö, Jesucristo nija bä lä nocao wei ai ebä dalalema.
- ²Cama bä nija abinaja a cuma. —Jesucristo wama a bejedi lä bufileno wei däjä, ¿cafä wamacö nija Yai Bada tä Bufi lucäa showadalayoma daanö? —a cuma. —Ma —bä cuma—. Yai Bada yama tä Bufi afa çai jiliboimi.
- ³Öjö däjä, Pablonö bä wälili çoma. —¿Wedi a wänö wamacö fe li ojoblamolayoma, öjö lä? Bä a juo ja, abinaja bä cuma. —Juan yama a wä bejedi fa bufinö, öjö nija yamacö fe ojomamolayoma —bä cuma.
- ⁴Abinaja Pablonö bä nowa tama. —Wäliwä tä ja, bä bufi lä lädaliyono wei bä judio lä cui, Juannö bä fe ojoblalema. Bä yömöläö showadaoma, cama a nodi jamö a juu lä nomöjööno wei a bejedi yai bufii cadidiobeje. Öjö a wäfa li Jesús wayoama —Pablonö bä nowa tama.
- ⁵Pablo a wä fa jililäjenö, Bada tä Jesús a wänö bä fe ojoblalema.
- ⁶Öjö däjä, cama bä nija Pablo imicö fa maqueicunö, Yai Bada tä Bufi lucälaiyoma. A Bufi fa lucälönö, bä a faö shominajadaliyoma. Yai Bada etä a çai wäyöö showadaomaje.
- ⁷Öjö bä lä cui, jai 12 bä bluca cuoma.
- ⁸Öjamö Pablo a yanöcöo däjä, belibo 3 bä famalema. Judio bä yododabä yafi jamö showadi a fa judinö, a wä faö waiteliama. Yai Bada tänö cama ebä çai lä cuo wei tä afa wäyäma. Bä bufi taamaö fe yadiobä a wä lojodoama.
- ⁹Öjö ma cui, ai bä bufi jifuo fa dicoonö, tä a bejedi bufinomije. Jesucristo a wä lä juamou wei, wawädowä etä afa jilimamou wäliwä taö dicooje ja, Pablonö bä yömöläö mladaliyoma. Dilano e yafi jamö Jesucristo nija bä lä nocao wei ebä çai juu majööma, öjamö bä lä bälöle bä a showadi lä jilayono wei jamö. Öjamö tä a wäyöö nomöjöö ja, a wä lojodoama.
- ¹⁰Öjamö tä a wäyöö showao däjä, bolacabö lasha a famalema. Inaja a cuaadima yalo, Asia jamö bä bluca lä bälöblai bänö, Bada etä a jiliamaje. Judio bä ma cuinö, judio bä lä mlai bä ma cuinö, tä a bluca jiliamaje.
- ¹¹Yai Bada nija Pablo a bayeliblamou fa dodijionö, tä nö lä quilijii tä bluca wawäblamalema.
- ¹²Pablonö camishi cäcö lä labou wei cäcö ma cui, cäcö lä yojobou wei cäcö ma cui, jalili bä nijamö öjö cäcö çai jumaje. Öjö ecö camishi bawä ma cuinö, bä lä jaliliono wei bä bluca jalolaliyoma. Bä lä feculabööno wei bä ma cui, bä fecula fa yashublamolunö bä çai jaloa çolaliyoma.
- ¹³¿Öjö tawä? Öjamö, showadi fecula bä shömaö lä cuaano wejei, ai bä judio cuoma. Öjö bä lä cui, bä a wäbäoma. Bä lä feculabööno wei bä jalomabeje, Bada tä Jesús bei a wäfa yublamaje. Bä fecula lä bälöle nija bä a faö cadidou fa showadaonö, abinaja bä

cuma. —Jesús a wānō bāmacō shōmaō lä cule, Pablonō a wāfa lä wäyāō wei a wā showawānō —bā cuma.

14Inaja bä lä cuaano wei bä 7 lä cui, nofi bāyāalewā bada a wāfa Eseba lä cule, öjö bä ijilubö ebä cuoma.

15Öjö ma cui, fecula abinaja a cuu mö feduoma. —Jesús ya daö. Pablo ya çai daö. Öjö ma cui, cafā wamacō lä cui, ¿wedi bei wamacō li bashiwā? —a fecula cuu nomöjöoma.

16Öjö dājā, a lä feculaböono wei, lobe a fa niyablaicunö, bä nabä quequema. Bä bluca fa famimalalönö, bä nö blemaalalema. Bä lä didile bä fa cacalalönö, sibo jamö shinoco bä jalili docuamaquema.

17Judio bä ma cuinö, judio bä lä mlai bä ma cuinö, Efesoteli bä blucanö öjö tä ą fa jililäjenö, bä quililaliyoma. Öjö dājā, Bada tä Jesús a wāfa nofi lojode doabläö dodijiomaje.

18Abinaja bä çai cuaama. Jesucristo bufilewā dude bä lä cublou wei, öjö bä fa waloicunö, wawādwā bä ą nö wäoyoluma. Bä doblou lä mlaono wei tä ą bluca wawāmalemaje.

19Bä lä shaboliono wei bä lä cuinö, Jesucristo a fa bufilöjenö, cama oni etäbā çai waloqueyolumaje. Sibā wawādwā yablalemaje, fecula täbā nija bä damamobā sibā lä cuono wei sibā lä cui. Öjö oni sibā fa wabajenö, sibā nowa blucaoma. Blada 50.000 sibā nowa cuoma ma cui, sibā yablalemaje.

20Inaja bä cuaama yalo, Bada tä ą lä jiliaö wejei bä lä cui, ¡bejedi lä bä yai blucablou fe balojolayoma!

21Inaja tä cublou fa balölonö, shomi jamö a juu nomöjöobā, Pablo a bufi cadidiblaliyoma. Masedonia ma cui jamö, Acaya ma cui jamö, öjamö a fa jayuicunö, Jelusale jamö a nia juu nomöjöoma. Abinaja a çai cuma. —Jelusale jamö ya juu fa balöonö, Loma jamö bä lä bälöle ya bä nia möö —a cuma.

22Öjö dājā, Pablonö Masedonia jamö Timoteo, Elato cäcöbö shömölema, cama a lä bayeliblano wejei ai cäcöbö lä cui. Öjamö cäcöbö ma shömano wei ma cui, Asia jamö cama a cuo showao juoma.

23Öjö lä dājā, Jesucristo a wā lä juamou wei tä ą ja, ai bä ą fa lämonö, tä wälidiblaliyoma.

24Abinaja tä cublaliyoma. Showadi, blada bä ja bä nö idubö lä tano wei a wāfa Demedio cuoma. Feculayoma Diana nija bä nö bayeli nacaobā yafi lä cui, öjö bä yafi nö idubö tablaö ja, blada bä luluama. Nö idubö bä bluca tablamobā, cama a lä bayeliblano wejei bä ma cui, öjö bä nö çai bluca bladaböa mö fedulaliyoma.

25Öjö cama ebä fa çocablamalönö, ai bä nö idubö tablaö mö lä feduono wejei bä çai fa nacaalalönö, öjö bä bluca yömölama. —Bei —a cuma—. Diana nija bāmacō nö bayeli

nacaobä bäma bä yafi nö idubö tablaö ja, bämacö nö bladaböaö lä cule. Öjö wama tä daö.

²⁶Pablo a lä cuaaö wei wama tä dabraö, ¿öjö tawä? Efeso jamö bädawä mlai, öjö a wänö Asia tä ulifi mini jödödöblou waiquia lä cule. Wama a wafa jilibou. Diana nija täbä möläö mladobä, a wä fe fa blacäjonö, täbä bufi yanöcamaö waiquia lä cudi. Abinaja bä nowa taö, “Nö idubö täbä ja wamacö nia bayeliblamoimi. Yanowamö täbä bädawä nija bä malä tablamou wei”, bä nowa taö.

²⁷Yafi bäma bä nö idubö lä tablaö wei, bä nia bufiblaö çödaaimije —a cuma—. Blada bäma bä lulubobä, tä nia cuo çödaaimi. Feculayoma Diana a lä cui, a nofi yai doamobä a ma cui, öjö nija bä nö bayeli nacaobä, a yafi nia bufiimi nomöjööje. ¿Öjö tawä? ¡Inaja dicowä mlai! Asia jamö bä bluca lä bälöblai bä ma cui, jödödöwä bä bälöblawä lä blaucui bä ma cui, öjö nija bä nö shino bayeli malä nacaodii wei. Öjö a shino feculayoma dodijaö ma cui, Pablo a wänö a nia joyaö majööje —a cuma.

²⁸Inaja a cuu ja bä jushudaliyoma. Bä fa jushudalunö bä a fama. —Efesoteli bämacönö bäma a Diana lä bufiblaö wei, ¡öjö a shino yai! —bä çali cudaliyoma.

²⁹Öjö bä anö, öjamö bä bluca lä bälöle bä shi bluca jalimolayoma. Masedoniateli cäcöbö juwäa showalemaje, Pablo nija cäcöbö lä yauono wei cäcöbö lä cui. Ai a wafa Cayo cuoma. Ai a mö lä fedule, Alidaco a wafa cuo mö feduoma. Efesoteli bä showadi lä yododoblaano wei jamö, cäcöbö läcälefälömaje.

³⁰Bä lä toujole jamö Pablo a wä fabä, a nia ma lucäno wei ma cui, Jesucristo nija bä lä nocao wei ebä lä cuinö a wasölemaje.

³¹Asia tä ulifi jamö bä bada lä läono wei bä ma cuinö, Pablo cama nofi ebä cuoma yalo, a çai wasömaö bufimaje. Bä a fe blacäjoma.

³²Bä bluca lä toujono wei bä lä cui, bä shifilimou fa bädaonö, bä a faö shalilionomi. Cama bä bluca mö feduwä lä cuinö, tä afa nia lä wayoaö wejei tä nofi jaducubou mlajei ja, bä a shi çai jaliwä fablalou buoma.

³³Judio bänö Alejado a wä famaö bufi fa doblaöjenö, bä lä toujono wei ai bä lä cuinö a möamoblamalemaje. Judio bä nofi bäyäabä, bei imicönö bä a wasöma ma cui,

³⁴judio a nö fa öjöbölöjenö, a wä faö doblamanomije. Bluca showadawä bä a shi doa showadalayoma. —Efesoteli bämacönö bäma a Diana lä bufiblale, ¡öjö a shino yai! —bä shi jaliwä çai cublalou nö dedeama.

³⁵Efesoteli a bada lä cui, showadi a wä lä jiliono wei a lä cuinö bä a fa wasöblalönö, abinaja bä nowa tama. —Jao. Bluca bämacönö öjö bäma tä malä dale. Camiyä Efesoteli bämacö lä cuinö, Diana nija bä nö bayeli nacaobä e yafi lä cui, öjö bäma e yafi nowamabä bämacö waiquiwä, Diana a lä dodijaö wei e yafi lä cui. Maa bäma ma nofi shino lä mölabou wei ma ma cui, öjö bäma ma çai nowamabä bämacö li, fedu jamö ma lä cuono wei ma lä quelayono wei ma lä cui.

³⁶Inaja tä cua waiquia cudeenö, tä shominajablamaö majöobeje tämi. ¿Öjö tawä? —a cuma—. Öjö cudeenö mamicaï bä da cuicu. Bä a shifilimo dijä.

³⁷Eja ei wama cäcöbö lä öbölöfe cäcöbö lä cuinö, Diana nija bamacö nö bayeli lä nacao wei yafi jamö täbä madofi lä cule, täbä madofi tomöaböno malä mlai. Feculayoma a Diana ma cui, a nö çai waiblabönomi.

³⁸Demedio a ma cuinö, nö idubö bä tablaö mö lä feduo wejei bä ma cuinö, ei cäcöbö bäyäblabeje tä cua ja, bada bä nija bä ʼa nia faö balöö. Bä dobroimi lä jömaö wejei yano fe laa malä mlai. Öjamö lä showadi bada bä malä läo wei. ¿Öjö tawä? Öjamö lä bä ʼafa yai tabeje.

³⁹Cafä wamacö ʼa faö bufi doblao fe yadio ja, bada bänö showadi bämalecö çai lä yododaö wejei jamö wamacö ʼa yai fabä. Öjamö lä tä cadejebälo wejeicätä.

⁴⁰Lomateli bada bänö bämalecö wano jiliaöje ja, bämalecö ʼafa tabeje tä cua waiquia, bamacö shifilimou dicoo ja —a cuma.

⁴¹Öjö tä ja bä fa yömölalönö, bä nowa tama. —Inaja lä waiquiwä. Bä da çomobodu —a cudaliyoma.

Hechos 20

¹Bä shi lä dono wei bä yanöcöblou fa çolonö, Jesucristo nija bä lä nacao wei, Pablonö bä nacamalema. Yai Bada etä ʼa ja, bä yömöläö fa balöonö, a nia lä junö wei tä ʼafa wäyama. Öjö däjä, Masedonia jamö a juu nomöjööbä, a aa showalayofälöma.

²Masedonia jamö Jesucristo ebä bufi lojodoamaö fa cuaaimadunö, Clesia tä ulifi jamö a walöa nomöjöküema.

³Öjamö 3 belibo a faa fa çomalönö, Silia jamö a befi çai mini caläo däjä, a nofi nia fa lämajenö judio bä ʼa wayoma. Öjö tä ʼa fa jililänö, Masedonia tä ulifi jamö a fe dadou çofälöbä a bufi shaliliblaliyoma.

⁴Cama nija Beleateli Sobade a yaua showalayofälöma, Bilo bä ijilubö e lä cui. Desalonicateli cäcöbö çai, Alidaco a wafa lä cule, Secudo a wafa çai lä cule. Debeteli Cayo a çai, Timoteo a çai. Asia jamö cäcöbö lä bälöle cäcöbö çai, Diquico a wafa lä cule, Dofimo a wafa lä cule a çai.

⁵Öjö bä bluca fa balölönö, Doasi jamö yamalecö nö dabou balöojolayomaje.

⁶Nii bä juluu lä mlai bä ja, judio showadi bä iyaö çai lä çocamou wei tä fa jayuicunö, Filiboteli bä nijamö culanö yamacö shuluculayoma. Yamacö befi çai caläo showalanö,

⁵ yama tä mö didi fa tablamalöfälönö, Doasi jamö cama bä nija yamacö walöa jäquema. Öjamö 7 yamacö fe cublaliyoma.

⁷Jaba tä mö jalu ja, yamacö weyade iyaö çai çocamobä jamö, Pablonö bä yömöladima. Öjö tä fena ja yamacö nia shulucou showadao yalo, a wafä faö showao däjä tä nö bähäcublamalema.

⁸A yano fe lä döbädäono wei jamö, yamacö lä çocamono wei jamö, cowa wacö bluca bä cublamoma.

⁹Eudico a wafa fiya lä cule, yafi a fe wädöobä ja a döcäojolayoma. Pablonö tä a labamafälöö ja, a fiya fa malishalönö, a miquema. Yacumö a mia fa sublaicunö a malishi quelayofälöma. Yano fe döbädäwä ajamö a fa quelunö, öjamö nomawä a jocälemaje.

¹⁰Öjö ma cui, öjamö Pablo a fa itolunö, öjö a fiya nija a maqueoma. İcali a fa fałocolänö abinaja bä nowa tama. —Bä bufi jölijo dijä. A demi ça lä cule.

¹¹Yano fe döbädäwä ajamö Pablo a dua fa çobofälönö, nii a ja bä çai iyajalayoma. Öjö däjä bä a wayou fe fa jalunö, tä mö jaba jaluimaö däjä bä fa waiconö, öjö däjä Pablo a jua fena showalayoma.

¹²Fiya a lä quelayono wei dodijidawä a çai çomaje yalo, bä bufi dodijidablou çolayoma.

¹³Modu u casö jamö Pablo a nia fa watoafälönö, Aso jamö yamalecö shömöa balölema, canawä a bada ja. Aso jamö yamacö waloo däjä, canawä a jamö Pablo yama a nia döcäamaö jayuafälöma.

¹⁴Öjö cudeenö, Aso jamö Pablo a mö bao däjä, yama a döcämalefälöma. Öjö däjä yamacö befi çai bluca fa calälönö, Midilene jamö yamacö waloa majöquema.

¹⁵Yamacö befi çai caläo fa çofälönö, moli yamacö fa miicufälönö, Quio jamö yamacö jayuquema. Öjö tä fena ja, Samo jamö yamacö washölöa nomöjöquema. Öjö tä fena ja nomöjowä, Miledo jamö yamacö waloquema.

¹⁶Asia jamö Pablo a yanöcöo bufio fa mlacunö, Efeso jamö lobe a nia caläo jayuoma. Jelusale jamö a waloo shi malä jalimono wei. Showadi bä nii lalou däjä, judio bä iyaö çai lä çocamou wei jamö, a cadidou bufi doblaoma.

¹⁷Miledo jamö a culanö, Efeso jamö Pablonö ai bä fa shömölönö, Jesucristo ebä çai lä yododaö wejei bä bada nacamalema.

¹⁸Cama nija bä fa waloicunö, abinaja bä nowa tama. —Äyämö, Asia tä ulifi jamö, çafä wamacö nija ya showadi lä cuaaö wei wamale daö. Ya jaba da cuaableinaja ya cuaaö fa showaonö, ya cuaaö lä cule.

¹⁹Bada tä Jesucristo dodijidawä ya nosie lä juaaö wei wama tä çai daö. “Camiyä yai”, ya nofi tamamonomi. Ya lä öcöno wei tä ma cui, wamale daö. Judio bänö wale nofi lä lämano wejei, wale nö lä bleaamano wejei, wama tä çai daö.

²⁰Wamacö bayeliblamobä, ya wä wawädou mada showadaoblei. Yai Bada etä a ja, bamacö lä yömölano wei wama tä çai daö. Wamacö yododabä jamö ma cui, wamacö yafibö jamö ma cui, ya tä a çai wäyäo cuama.

²¹Judio bä ma cui, judio bä lä mlai bä ma cui, öjö ya bä yömölaö ja, ya wä wawäama. Abinaja ya bä nowa tama. “Wälidiwä tä ja, wamacö bufi fa lädalunö, Yai Bada nija bä bufi da cuicu. Bada tä Jesucristo a nofi da mölaboje”, ya bä nowa tama.

²²Öjö tawä? —a cuma—. Fei däjä, Jelusale jamö ya nia juu. Yai Bada tä Bufinö wale shömaö lä cule. Öjamö lä wale nia lä taamaö wejei ya tä daimi.

23Ya tä daö ma mlai ma cui, Yai Bada tä Bufinö wale yömöläö ja, a wə li wawäaö. “Wa juaö ma bädao wei jamö ma cui, showadi wa nö nia bleaamaöje. Wa fe nia labouje”, wale nowa taö.

24Öjö ma cui, ya demi cuobä tä nowa cuami. Ya nofi jölijjomi. Bada tä Jesucristonö wale nowa li taö lä cadidou wei tä ja, öjö tä lä cui ya tä nofi shino li yaibou. Cama dodijidawä ya etä ʔ wäyäbä ya nabä cadidou, Yai Bada tänö täbä nofi lä ojodabou wei tä ʔ lä cui.

25’Bei —a cuma—. Yai Bada tänö cama ebä çai lä cuo wei tä ʔ ja, bamacö bluca yömöläö ma cuaano wei ma cui, wamale wäyacu nia dabläö çödaaimi. Öjö ya tä daö.

26¿Öjö tawä? Öjö cudeenö, ya wə wawädoo lä cule. Shobali wacö jamö ai wamacö juu fe yadio ja, cafä wamacö mayo. Camiyä nija tä nowa nia cuomi.

27Yai Bada tänö täbä taamaö lä buffi wei tä ʔ ja, wawadowä bamacö malä yömölano wei.

28Bä da moyaweicu, wamacö bejedimobä. Jesucristo ebä lä yaile ebä bluca bejedimou mö feduobä, bä da cadidamaje. Yai Bada cama ebä li. Cama bä Ijilubö a lä shämono wei ja, bei iyä bänö bä nowa fa comacönö bä li tabou. Wama ebä çai cuobä, Yai Bada tä Bufinö wamacö li lämabou.

29¿Öjö tawä? —Pablo a cuma—. Eja ya juu mladou däjä, cafä wamacö nia yabäcaö lä juo wejei ya tä daö. Yalo bä ishous lä culenaja, bä waitelimou cuaaö fa jeicunö, Yai Bada ebä nabä nia queoje.

30Cafä wamacö ma cui, ai wamacö ʔ nia shominajablou juo. Öjö bä ʔ nia lä shominajablou wei bä lä cui, bä bejedimou fa mlacunö, cama ebä nia çai sheleleblouje. Cama bä ʔ nia jiliamou fa ayaonö, Jesucristo nija bä lä nocao wei ebä nia shedequeblamaö juoje.

31Öjö cudeenö, bä da moyaweicu. Camiyä ya lä cuaano wei tä nofi da jaduculäje, wamale owäbobä. Jalu däjä ma cui, didi däjä ma cui, ya öcölanö ya bä bluca yömöladima. Inaja ya wajäblalou waiquilanö lasha 3 ya famalema.

32’Bei —a cuma—. Wamacö bayeliblamou juobä, Yai Bada nija bamacö nö bayeli nacaö. Camanö wamacö nofi lä ojodabou wei tä ʔ lä cuinö wamacö bayeliblamobä. Wamacö bufi nia lä lojodoo wei, öjö lä tä ʔ waiquiwä. Cama bluca ebä dobäbä, tä ʔfa bluca lä wäqueno wei tä ma cui ja, cafä wamacö çai dobäö mö feduobä.

33’Cafä wamacö madofibö ja, ya bufi waiyonomi —a cuma—. Blada bä ma cui ja, olo bä ma cui ja, camishi bä ma cui ja, öjö täbä ja ya bufi waiyonomi.

34Wamale daö waiquiwä. Camiyä ma cui, ya bä çai lä cuo wei bä ma cui, yamacö jolio mlaobä ya mada ojodamoblei.

35Camiyä ya lä cuaano wei tä ja, bamacö damaö waiquioma. Bamacö ojodamobä lä. Bada tä Jesús bäma a wə nofi jaducubolanö, jalili bäma bä bayeliblabä. Abinaja a malä cuno wei, “Wamacö dobämou ja wamacö bufi ma doblao wei ma cui, cafä

wamacönö ai wama bä yai dobäo ja, öjö dāja bei wamacö bufi nia shino yai doblalou”, a Jesús cuma —Pablonö bä nowa tama.

³⁶Pablo a wə fa waiconö, a fa dijoblaicunö, a möfe deialiyoma. Bä çai lä cuono wei bä sho, Yai Bada nija bä nö bluca bayeli nacao showadaoma.

³⁷Bä fa wajäänö, bä bluca öcöma. Pablo a çai fałocamaje.

³⁸Cama a wəno bä öcöo dodijioma, a wäyacu nia dablamou çodaaimi ja. Öjö dāja, a caläo çofälöbä, canawä ajamö a çai jumaje.

Hechos 21

¹Öjö yama bä bada fa dacöfälönö, yamacö befi çai caläa çolayoma. Così jamö yamacö cadidou showaofälöma. Öjö tä fena ja, Loda jamö yamacö waloa nomöjöquema. Öjamö culanö, Badala jamö yamacö juu nomöjöoma.

²Fenisia jamö täbä lä bäläo wejei a bada canawä lä cui, yama a fa dalalönö, öjamö yamacö fa döcäcäobalunö, yamacö befi çai caläa çolayofälöma.

³Shible tä lä jöcole yama tä ulifi labajami fa dalalönö, yamacö jałoaö showadaofälöma. Öjö yama tä ulifi fa dacöfälönö, Silia tä ulifi jamö yamacö befi çai cadidilayofälöma. Diloteli bä lä bälöle jamö bä madofi washölöblaamabeje, öjamö yamacö befi çai cadöquema.

⁴Öjamö yamacö fa washölöblalunö, Jesucristo nija bä lä nocao wei ai yama ebä fa dalalönö, öjamö lä 7 yamacö fe didi cublaliyoma. Öjö bä lä cui, Yai Bada tä Bufinö bä a fa cadidonö, Jelusale jamö Pablo a juu wasömaje.

⁵Öjö ma cui, yamacö shulucua fa çolunö, yamacö juu çoma. Öjö bä Jesucristo bufilewä lä cuinö yamalecö çai sibolayomaje. Cama bä ma cui, bä suwäbö ebä ma cui, bä ijilubö ebä ma cui, bei u casö jamö yamacö bluca waloquema. Öjamö yamacö fa dijojolalunö, Yai Bada nija yamacö nö bayeli bluca nacaoma. Öjö dāja, dodijidawä yamalecö shömöa çolemaje.

⁶Canawä ajamö yamacö döcäcäa fa çobalunö, cama bä çoa çolayoma.

⁷Dilo jamö culanö yamacö befi çai lä caläfälöö wei ja, Dolemaida jamö yamacö washölöblaliyoma. Öjamö Jesucristo yama ebä fe walou ja, moli yamacö fe didilayoma.

⁸Öjö tä fena ja, yamacö jua fa çolunö, Sesalea jamö yamacö waloa majöquema. Felipe e yafi jamö yamacö çoblaliyoma, dodijidawä tä a shino lä wäyädii wei e yafi jamö. Jesucristo ebä bayeliblabeje, bä 7 lä yaileno wejei dāja, öjö a yaia mö lä feduleno wejei a li Felipe cuoma.

⁹Cama bä tää 4 ebä shinoco lä cuono wei bänö, Yai Bada a wəno lä wäyöö wejei bä suwä cuoma.

¹⁰Öjamö yamacö fe weyaö dāja, Yai Bada a wəno wäyälwä Acabo a lä cui, Judea jamö a lä bälöle, a fama çoblaliyoma.

11 Camiyä yamacö nija a fa icubonö, Pablonö sicö acadafu lä yaḅono wei sicö fa jayulänö, cama bei mamicö, bei imicö sho, a ɔcablamolayoma. Abinaja Acabo a cuma. —Yai Bada ya Bufi wano taö lä cule. Camiyä ya ɔcao lä tablamolufenaja, inaja showawä Jelusaleteli bä judio lä cuinö, ei ya esicö lä tabole a nia ɔcablaö cuoje. Bä judio lä mlai bä nija a nia ɔcama jöböaöje —bei a cuma.

12 Öjö yama a wə fa jililänö, Jelusale jamö Pablo yama a juu wasöma. Camiyä yamacö ma cuinö, öjamö bä lä bälöle bä ma cuinö, bluca yamacönö yama a juu wasöö dodijioma.

13 Öjö dāja, Pablo a wə juo ja, abinaja yamalecö nowa taö nomöjööma. —¿Wedi wama tä tabä wamacö li ɔcöblalou? ¿Wedi tabä wamale bufi li wajäblalamaö? Jelusale jamö Bada tä Jesús ya wəfa wäyöö tä nowa ja, yale nia ma ɔcablaö wejei ma cui, ya ojode fe yadiwä. Yale nia yai ma shäö wejei ma cui, ya quiliimi —Pablo a cuma.

14 Yamalecö ɔ jiliaimi waiquiwä ja, yama a wasöö fe yadiblonomi. Abinaja yamacö shino cuma. —Jaö. Bada tänö tä tamaö lä ojode wei, öjö tä tamobä, öjö lä —yama ecö cudaliyoma.

15 Öjö tä cublou waiquio dāja, yamacö fa shuluculonö, Jelusale jamö yamacö aa showadalayofälöma.

16 Sesalea jamö ai bä lä bälöle, Jesucristo nija bä lä nocaö wei ebä lä cui, camiyä yamacö nija, öjö bä yauoma. Shibleteli Masono e yafi jamö yamalecö balaquemaje, öjö nija yamacö cuobä. Öjö a lä cui, Jesucristo nija a nocaö nö dedeaö waiquiwä a cuoma.

17 Jelusale jamö yamacö fa waloicunö, Jesucristo ebä lä cuinö, dodijidawä yamalecö walomaquemaje.

18 Öjö tä fena ja, Jacobo yama a möbä, Pablonö yamalecö ɔai falayoma. Öjamö Jesucristo ebä ɔai lä yododaö wejei, bä ɔai bluca looma.

19 Bä dodijidawä lä cule, Pablonö bä wəlii fa balöonö, Yai Bada tänö a nö wəlojamaö lä cuaano wei tä ɔ ja, bä yömölaö cadidioma. Judio bä lä mlai bänö, Jesucristo a nofi mölabou mö feduobeje, Yai Bada tänö bä bufi jaducublamaö lä cuaafälöno wei, tä ɔ bluca wäyäma.

20 Öjö tä ɔ fa jililäjenö, Yai Bada a nofi doaö dodijiomaje. Öjö dāja, abinaja ai a cuma. —Ai. Eja bamacö lä cuaaö wei, wa tä daö. Judio bamacö nija, Jesucristo a bejedi lä bufii wejei, fei dāja bluca bä 1.000 cua. Moisesi tä ɔ nofi ɔai yaibou fe balojooje, ¿öjö tawä?

21 Shomi bä nijamö bä judio lä bälöblai wa bä jowa lä taamaö wei wa wano jilibou waiquiweje. Moisesi wa tä ɔ jowa joyamaö bufii. Judio showadi bamacö ijilubö mosi sicö lä joyao wei tä ma cui, showadi bamacö lä cuaaö wei tä ma cui, öjö wa tä jowa taö wasöö.

22'Wa lä waloicufe, wa wə jiliaö waiquilajei cätä —a cuma—. Dodijidawä wa bä çai cuobä, ¿wedinaja wa li cuaabä?

23Wedinaja mlai, abinaja wa yai cuaabä. Bäfä yömölaö a lä cule. Yai Bada nija bä ą nö wäo lä shaliliono wei, eja 4 bä cua.

24Bä ą nia cadidou fa dablamonö, bä fe nia malocoblamou. Yai Bada etä yafi jamö cafänö bä çai da jufälö, öjö lä. Yai Bada ebä dodijidawä cuobä, nofi bäyäälewä bänö bä nia lä taamaö wejei däjä, cafä wa çai yädäobä. Bä yalo nia lä dodobou wejei, cafänö wa ebä nowa fa comacönö, bä fe malocoblamobä. Öjö däjä inaja wa cuaaö fa dalalöjenö, Jesucristo bufilewä bä judio lä cui, bä bufi nia jaducublou. Wa wəno lä jilibono wejei tä ą ja, bä nia mölaö majöomi. “Cama a ma cui, Moisesinö tä tamaö lä bufii wei tä çai taö mö malä fedule”, wa nofi nia tabouje.

25'¿Öjö tawä? —a cuma—. Jesucristo a bejedi lä bufii wejei bä judio lä mlai bä lä cui, öjö bä dodijidawä cuobä, yama tä ą oni shömaö waiquioma. Yama bä nowa çai taö shalilou waiquioma. Nö idubö täbä ja, bä nii lä dodobou wejei bä ja, yama bä çai iyaö wasöma. İyä iyä yama bä çai wamaö nofi wəliboma. Yalo bä olami lä şiamou wei, yama bä çai wäo wasöma. Yama bä çai joleblalou wasöma —a cuma.

26Öjö däjä, Yai Bada nija bä ą nö wäo lä cadidiono wei bä 4 lä cui, Pablonö bä çai aa showalayoma. Öjö tä fena ja, Yai Bada dodijidawä ebä cuobä, cama sho bä bluca fa taamamonö, Yai Bada etä yafi jamö Pablonö bä çai lucälayoma. Öjamö Pablo a wə nö wäo ja, abinaja a cuma. —Yai Bada dodijidawä yama ecö cuobä, yamacö jaba taamamou a lä cule. Inaja yamacö no fa cublalunö, jödödöwä yamacö dodijidablaliyono wei ja, Yai Bada yama a dobäyoluu wä —a cuma.

27Dodijidawä Yai Bada ebä cuobä, 7 tä mini lä cublole däjä, Asia jamö bä judio lä bälöle bänö, Pablo a dalalemaje. Yai Bada etä yafi jamö a fa dalalöjenö, bä ą shi jaliwä fama. Cama bä ąnö, bä bluca lä yododoono wei bä shi fa jalimomalöjenö, a juwälemaje.

28A juwäalajenö bä ą icalı fama. —¿Bä da jaboje! Isaeli wama ecö mö feduwänö, wamalecö da bayeliblayo. Täbä jole damaö lä cuaadi, ¿ei bei a, ei, ei! Judio bämalecö ąfa lä wayoaö wei a, Moisesi tä ą joyamaö bufi lä doblao wei a lä cuinö. Yai Bada ei tä yafi lä cui, tä yafi nö waiblaö lä cuboyoi. Abinaja çai. Yai Bada ei etä yafi ma yaile ma cui, bä judio lä mlai bä fa lucämälalönö, etä yafi shamimalalei lä cufe —bä cuma.

29¿Öjö tawä? Jelusale jamö Pablo sho, Efesoteli Dofimo sho cäcöbö juu fa dalalöjenö, “Yai Bada etä yafi jamö, öjö a lucämaö waiquio ątooma”, bä bufi jole cuma yalo bä ą cuoma.

30Jelusaleteli bä blucanö bä ą fa jililäjənö, bä shi jaliwä läläaimama. Yai Bada etä yafi jamö Pablo a fa juwälöjenö, sibo jamö a läcäläfälömaje. Lobe yoca laa jaa showadaquemaje.

31A nomamaö shi wəlijiojeje a şhäö showadaoje däjä, sodado bada a lä cui nija bä shi lä dono wei bä ąfa wäyämaje. Jelusaleteli bä bluca jowa waitelimou ja,

³²cama ebä nacaö showadaofälöma. Sodado ebä ma cui, öjö 100 bä çai lä cublamono wejei ebä ma cui, öjö bä naca fa showadaläfälönö, bä nabä lälääimamaje. Bada a lälääö fa dalalöjenö, sodado ebä çai lälääö fa dalalöjenö, Pablo a shäö waicou mö baomaje.

³³Pablo nija sodado bada a fa icuicunö, a juwämalema. Boo bolacabö shicö badanö, a bococu ocablamaö bufima. Bä lä ublale bä nija Pablo a wälima. —¿Ei wedi bei a dodijiwä? ¿Wedinaja a cuaaö ja, bei wama a li shäö cule? —a cuma.

³⁴Öjö ma cui, bä lä toujono wei bä a wawäblou mlai ja, bä a icali faablalou bädaoma. Pablo a lä cuano wei tä a yai jiliabä, bada tänö tä ma wälino wei ma cui, tä afa wääö fa mlacujenö, camanö sodado bä çai lä bälöono wei a yafi jamö, a bälamaö bufima.

³⁵Öjö a yafi jamö Pablo a fa bälacöjenö, yafi lä feyacale jamö a mini çai duoje däjä, bä lä toujono wei bä waitelimou fe balojooma. Öjö bä nija Pablo a noshi umabouje ja, sodado bänö a yalucälefälömaje.

³⁶Pablo a çai jubeje jamö, bä a çai yaua malä showadaqueno wei. Bä a icali faö ja, abinaja bä cuma. —¿Fei däjä bäma a shäö da showadao! —bä cuma.

³⁷Sodado bä yafibö jamö, Pablo a mini çai lä lucälasyonu wejei däjä, sodado bada a nija abinaja Pablo a cuma. —Cafä nija ya wä faö bufii —a Pablo cuma. Abinaja bada a cuu mö feduoma. —¿Clesiateli wa bä caficö a çai daö daanö?

³⁸Cafä ¿wedi bei wa dodijiwä? Öjö Ejidoteli a nofi da jushuadiblei bäfä bufima, Lomateli yamalecö yashublabeje, ebä shi bluca da jalimomablei a lä cui. Ulifi bloque jamö, yanowamö shädimi 4.000 ebä bluca da luluboblei, ¿öjö wami daanö? —a cuma.

³⁹—Ma, öjö yami —Pablo a cuma —Judio cä ya. Silisia tä ulifi jamö ya jaba lä bälöono wei, öjö ya. Dasoteli bä nijamö ya oshe cublaliyoma, showadi tä afa ulifi lä juyumadii wejei jamö. Ei bä lä toujole bä nija ya wä da fa, ¿öjö tawä? —a cuma.

⁴⁰Bada tänö a wä famaö fa bufinö, bä lä duo wei jamö a ublalanö, bei imicönö bä a wasöma. Bä a yanöcödou lä dodijio wei däjä, judio bä caficö a ja, a wä fama. Abinaja a cuma.

Hechos 22

¹—Iba wamacö —Pablo a cuma—. Bada wamacö. Bei. Ya nofi báyäo ja, wamale a da jililä —a cuma.

²Judio bä caficö a ja Pablo a wä faö fa jililäjenö, mamicai bä yömöca yai daoma. Abinaja a Pablo cuma.

³—Judio cä ya. Silisia tä ulifi jamö ya oshe cublaliyoma, Dasoteli bä nijamö. Eja, Jelusale jamö, ya yawälasyonu. Camiyä bamacö nö badabö cuaaö lä cadidiono wei tä ja, ya cadidou nodiablalou showaobä, Camalieli nija ya çai damamoma. Cafä wamacönö, Yai Bada wama a wä nofi lä yaibou weinaja, camiyä ya ma cui ya tä a nofi yaibou cua mö fedua.

4' ¿Öjö tawä? —Pablo a cuma—. Jesucristo a wä lä juaö wejei ya bä shämaö ja, ya bä nö jaba bleaamama. Wälo bä ma cui, suwä bä ma cui, ya bä fa ɔcablamanö, täbä fe lä lamaö wejei jamö ya bä fe lamaboma.

5' Nofi bäyäälewä bada a ma cuinö, bada bä lä yododaö wei bä ma cuinö wale ɔ bejedi daöje. Cama bä nija oni ya si dälema, Jesucristo ya ebä juwäamaö lä bufino wei tä oni. Judio bä nija ya si oni çai jubä. Öjö däjä, Damaco jamö ya juma, öjamö Jesucristo bufilewä bä lä cuono wei ya bä juwäamabä. Jelusale jamö bä nö bleaamabeje, ɔcama ya bä nia bäläö çoma.

6' Ya jufälöö däjä, motoca a yöloloblodayou däjä, Damacoteli bä nijamö ya ajedodayoma. Öjö däjä fedu jamö tä shii bada fa bädalunö, camiyä ya lä cule jamö tä shii wacacadaliyoma.

7' Ya fa wäcäblaicunö, ya wä jililema. “Saulo, Saulo”, a cuma. “¿Wedi tabä wale nö bleaamaö dicoa cule?” a cuma.

8' Ya wä juo ja, abinaja ya e cuma. “Bada tä, ¿wedi bei wa jowa?” Abinaja cama a cuu mö feduoma. “Wale nö lä bleaamale, Jesús ya wä”, a cuma.

9' ¿Öjö tawä? Ya bä çai lä juno wei bä lä cuinö tä shii bada ma dalaleno wejei ma cui, wale ɔ lä wayomaö wei, bei a wä jilianomije.

10' Abinaja camiyä ya cuu nomöjööma —a cuma—. “Bada tä”, ya cuma. “¿Wedinaja ya yai cuaabä?” Inaja ya cuu ja, Bada tänö wale nowa tama. “Wa fa jocädalunö, Damacoteli bä shabonobö jamö a da yafilö. Bäfä nia yai lä shömaö wei tä ja, öjamö lä wa nia yömölamou nomöjöö”, wale nowa tama.

11' Öjö tä shjinö, ya mamocu shi fa doblalunö, ya tä möblanomi —Pablo a cuma—. Öjö cudeenö, ya bä çai lä cuono wei bänö, wale fa öbölöfälöjenö, Damaco jamö wale çai çoblaliyomaje.

12' Öjamö Damacoteli Anania a cuoma. Yai Bada nija öjö a bejedimou dodijioma. Moisesi tä ɔ nofi cadidiboma. Öjamö bä judio bluca lä bälöle bänö, a wäfa dodijaö tamaje.

13' Öjö a fa waloiquiyonö, camiyä nija a fa icubonö, abinaja wale nowa tayoluma. “Üasi, Saulo. Mamocu dodijidablou da çolu”, wale nowa tayoluma. Inaja a fa cunö, yedu ya mamocu dodijidablou fa çolonö, ya dalalema.

14' Abinaja wale nowa taö showadaoma —a cuma—. “Camiyä bamacö nö badabö nija tä lä bufiblamono wei tä Yai Bada lä cuinö, çafä wa yailema, camanö täbä taamaö lä bufii wei wa tä dabä. Cama a nosie yai lä juaö wei a lä cui wa dablabä, a yai lä dodijaö wei a lä cui. Öjö wa wä yai jiliabä.

15' Bluca bä nija öjö wa wäfa nia wäyää. Wa lä möno wei tä ma cui, wa wä lä jilileno wei tä ma cui, öjö wa wäfa nia wäyää.

16' ¿Öjö tawä? Bei. A fe da ojomamo. Bada tä nija wa nö bayeli fa nacaonö, wa doblou lä mlai, öjö nija tä da mladamalö”, wale nowa tama —a Pablo cuma.

- 17** Abinaja Pablo a cuu çoma. —Jelusale jamö ya waloo ço däjä, Yai Bada yafi jamö ya nö bayeli nacao däjä, tä bädaliyoma.
- 18** Wawädowä ya tä fa dalalönö, abinaja wale nowa tama. “Lobe wa fa shuluculonö, shomi jamö a da alufälö. Eja, Jelusale jamö wale afa lä wäyää wei tä a bejedi nia bufiimije”, wale nowa tama.
- 19** Abinaja ya e cuma. “Bada tä”, ya e cuma. “Camiyä ya lä cuaano wei tä ja, bä bufi jaducublou jätöo weicätä. Judio bä yododabä yafi bä jamö, afä ya bä nö bleaamaö lä cuaano wei, tä daö waiquiaje. Cafä wa bejedi lä bufii wejei, ya bä fe lä lamabono wei, ya bä lä shämaleno wei, tä daöje.
- 20** Wa wäfa lä wäyänö wei a Esteban ma cui, öjö a lä shälöno wejei däjä, öja ya çai ublao yädäoma. A shäbeje ya wä çai fama. Bä lä ishono wei bä lä cui, camiyä nija bä camishibö fa jilamoicunö, ya bä nowamama”, ya e cuma.
- 21** Öjö ma cui, abinaja Bada tänö wale nowa tama. “A da alufälö. Blajai jamö bäfä nia shömaö, judio bä lä mlai bä nija”, wale nowa tama —Pablo a cuma.
- 22** Öjö tawä? Pablo nija dodijidawä bä yömöca jaba ma daono wei ma cui, bä judio lä mlai bä afa jayumaö ja, bä a nacläaö çoma. —A da shälöje! Miji a demi cuobä ami —bä cuma.
- 23** Bä a çali falanö, cama bä camishibö shi jaliwä yawedoablalamamoma. Coshi coshi bä ma cui, bä bluca shäyäjamaje. Inaja bä cuaaö showao däjä,
- 24** sodado bada a lä cui, cama ebä nija a wä fama. Cama bä lä cule jamö, Pablo a lucämaö bufima. Judio bänö a shäo shi jalimomaje yalo, bada a lä cui a bufi wedinajamoma. Öjö cudeenö, Pablo a wä nö nia wäamaö fe fa yadionö, a si yowamaö bufima.
- 25** Öjö ma cui, Pablo a çcabou waiquilajenö, sodado 100 bä çai lä cule a ublao yädäo däjä, a wä Pablo fama. Abinaja a cuma. —Lomateli bänö wale nofi la tabou wejei ya ma cui, bada bänö wale dobloimi jömaö ma mlajei ma cui, çwamale si nia li yowaö?
- 26** Inaja a fa cunö, sodado 100 bä çai lä culenö, Pablo a wä fa jililänö, bada e nija a wä wäyää showadaoma. —Wa tä nia lä taö wei tä ja, a da moyaweicu —a cuma—. Lomateli bänö a nofi lä tabou wejei, a jöwa.
- 27** Öjö cudeenö, sodado bada a lä cui a fa icuicunö, Pablo nija a wä fama. —A wä da cadidibo. Lomateli bänö çcafä wa nofi tabouje? —Awei. Öjöteli ya —Pablo a cuma.
- 28** Sodado abinaja a bada cuu mö feduoma. —Shädayai. Cama bä nija ya ççaobä, blada bluca ya bä jöböquema —a cuma. Abinaja Pablo a cuu nomöjöoma. —Öjö ma cui, camiyä Lomateli bä nija ya oshe cublaliyoma cudeenö, Lomateli ya showadawä —Pablo a cuma.
- 29** Öjö cudeenö, Pablo a wä wäamabeje a si nia lä yowano wejei, bä jäwäjäblaliyoma. Sodado bada a ma cui, Pablo a wä ja, a quilia majöläliyoma. Lomateli bänö a nofi lä tabou wejei a ma cui, a çcablamaö dicooma cudeenö, a quilima.

³⁰Sodado bä nija a bada lä läono wei a lä cuinö, Pablo a cushäblamalema. Öjö tä fena ja, judio bä nia wälili fa shalilionö, bada bä yododamaö bufima. Nofi bäyäälewä blowäjawä bä ma cui, judio bada bä ma cui, öjö bä yododoo waiquio däjä, Pablo a fa nacamalönö, a mötalömabalema.

Hechos 23

¹Pablonö judio bada bä möö fa shalilionö, abinaja bä nowa tama. —Iba wamacö. Yai Bada nija showadi ya dodijidawä lä cuaano weinaja, ya cuaaö showaa lä cule.

²Inaja Pablo a cuu ja, bä ublaa lä ajedele bä nija, nofi bäyäälewä Anania a badanö, bei caficö shäamaö bufima.

³Öjö nija Pablo a wä jushuo çai faö showadaoma. —;Yai Bada tänö cafä wa shäö nomöjöö weicätä! Jole jole wa li mömou liyäjawä bäwä. Moisesi wa tä a nofi jaducubolanö, wale jömabä wa ma cui, bei wale li shämaö dicoa cule. Moisesinö öjö tä taö wasöö malä cui —a Pablo cuma.

⁴Bä ublaa lä ajedele bä a fama. —Yai Bada tänö nofi bäyäälewä a bada ma tamable ma cui, ¿öjö nija bei wa wä li lafujou?

⁵Abinaja Pablo a cuu nomöjööma. —Iba wamacö. “Fei nofi bäyäälewä bada a”, ya bufi cunomi. Abinaja tä a oni malä cuu wei, Cafä wamacö nija a bada lä läo wei, wama a wäfa nia taimi. ’¿Öjö tawä? —a Pablo cuma.

⁶Bä lä yododano wei ai bä lä cui, Yai Bada etä yafi jamö bä bada lä läo wei bä saduseo cuoma. Ai bä bada faliseo cuo mö feduoma. Pablonö öjö bä bluca loo coyocoa fa dalalönö, faliseo bä nija a nofi nia fa bäyäämamonö, a wä icalli fama. —Iba wamacö. Camiyä, faliseo cä ya. Iba bada bä ma cui, faliseo cäbä. Faliseo ya waiquiwä cudeenö, bä lä nomaö wei bä lä cui, bä nia demi jocädou lä ço wei tä ja ya bufi shalilia. Öjö tä ja ya mölaö yalo, eja wale tabou lä culajei, wale nia dobloimi fa jömajenö —a cuma.

⁷Inaja Pablo a cuma yalo, faliseo bä sho, saduseo bä sho bä afa bluca lafumayoma. Bä bufi bluca shedequeblaliyoma.

⁸Saduseo bänö, nomawä bä demi nia jocädou lä ço wei, tä a bejedi bufii malä mlajei. Yai Bada ajele etäbä lä culadi bä ma cui, yai ai täbä lä cublai bä ma cui, bä afa cuami taö jödödöweje. Öjö ma cui, faliseo bänö öjö bä afa bluca cua taöje.

⁹Öjö däjä, saduseo bä ma cui, faliseo bä ma cui, bä afa lafujayou nacläaö fa showadaonö, faliseo ai bä ubladaliyoma, Moisesi tä a ja bä showadi lä damaö wejei bä lä cui. Pablo a nofi bäyääöje ja, abinaja bä cuma. —Ei Pablo a doblou lä mlai yama etä daimi. Cama nija a wä jowa faö lä jatoono wei, Yai Bada etä a ajele wawäa jatolayoma. Cuwi, ai etä a yai faö jatooma fa cui. Öjö yai tabä malä cublai —bä cuma.

¹⁰Öjö däjä, bä a nö fa quilianö, sodado bada a lä cuinö Pablo a nofi jalujuboma. “A cacalaleije daanö”, a nofi fa tabonö, cama ebä shömöquema. —Bei, bei, bei. Öjö bä nija wama a jucäa fe fa yadilönö, yafi jamö a lucäa da cömalöje —bä nowa tama.

- 11**Tä fa dödölönö, Pablo nija Bada tä Jesucristo a fa bädalunö, a ubladaliyoma. Abinaja a cuma. —A bufi da lojodoicu. Jelusale jamö wale afa wäyää lä cuaano weinaja, Loma jamö ma cui, öjamö wale afa wäyää nomöjöobä, öjö wa —a cuma.
- 12**Tä mö jaluu ço däjä, Pablo a shäbeje judio bä a wayoma. A nia shäo fa showadaojenö, Yai Bada ma cui nija bä a nö wäa cadidiquema. Abinaja bä cuma. —Pablo yama a shäo showao mlao däjä, yamacö nia iyaö çodaaimi. Yamacö amishi nia çai çomi—bä cuma.
- 13**Pablo a shäbeje bä a nö lä wäono wei bä blucaoma. 40 tä nojablamalemaje.
- 14**Nofi bäyäälewä blowäjäwä bä ma cui nija, judio bada bä ma cui nija, öjö bä nija bä fa icuicunö, abinaja bä nowa tamaje. —Pablo yama a nia shäo. Yama a shäo showao mlao däjä, nii moli ma cui yama a nia wabaö bädaomi. Yai Bada nija yamacö a nö wäa waiquiquema.
- 15**¿Öjö tawä? Fei däjä sodado bada a nija wamacö a nia faö. Öjö nija ai wama bä fa shömölönö, judio bada wama bä wano tayolubä. Jai Pablo dodijidawä wama a wälili çobä, a shömamaö da bufije. Yama a nofi nia lämaö. A ajedou showao mlao däjä, yama a nia shäo showadao —bä cuma.
- 16**¿Öjö tawä? Pablo bä fecamabö enö, bä afa lämou fa jililänö, sodado bä yafibö jamö a fa lucälönö, Pablo a yömölalema.
- 17**Öjö däjä, sodado 100 bä çai lä cule ai a fa nacalänö, abinaja Pablo a cuma. —Afa bada a nija, ei fecamayä a da lululäfälö, a wä nö wäobä —a cuma.
- 18**Sodado bada a nija, Pablo bä fecamabö e çai aa fa showadalunö, abinaja e cuyoluma. —Cafä nija Pablonö ei wale çai shömaö lä cufe, wa fe lä labole a lä cuinö. Cafä nija a nö wäobä, a bälamaö bufima —a cuma.
- 19**Sodado bada anö fiya a fa öbölönö, cäcöbö fa bayäqueicunö, a wälima. —¿Wedinaja bei wa nia cuu cufawä? —a cuma.
- 20**Abinaja a fiya cuma. —Cafä nija judio bä a fayolubä, bä a wayoma. Bada bä yododoobä jamö, Pablo a nia jowa bälamaö bufiije. Jai dodijidawä a wälili çobeje, bä a dodijidawä nia ma faö wei ma cui,
- 21**bä nosie jua dijä. Bluca bänö a nofi lämaö waiquiweje. 40 tä jayublamaöje. Pablo a shäbeje, Yai Bada nija bä a nö wäa waiquiquema. A shäo showao mlaoje däjä, bä nia jowa iyaimi. Bä nia çai amishi çomi. ¿Öjö tawä? A shäbeje, bä läa waiquia lä cule. Cafä wa wä nö shino dabou lä culajei —a fiya cuma.
- 22**Öjö däjä, sodado bada anö fiya a wä fa wasölönö, a shömöa çolema. Abinaja a cuma. —Camiyä wale lä moyawämälufe, moli a ma cui nija tä a wäaö fe balojoo dijä —a cuma.
- 23**Öjö däjä, sodado bada a lä cuinö, sodado 100 bä çai lä cule, bolacabö cäcöbö nacalema. Abinaja cäcöbö nowa tama. —200 wafä bä çai sodado jubä, bä çai shulucobö da showadao. Tä mö didi sublublou däjä, wafä bä nia çai alayou. Cabayo

bä jamö bä befi çai lä lälääö wei, 70 bä çai. Namo bä çai juu mö feduobeje, 200 bä çai. Sesalea jamö wafä bä çai jubä.

²⁴Pablo a befi çai lälääö mö feduobä, wafä ebä cabayo dääö mö feduo showaobä. Bada tä Feli nija dodijidawä wafä a bälabä —bada anö cäcöbö nowa tama.

²⁵Öjö däjä, Feli nija si jöböaböbä, si oniblalema. Abinaja tä a oni cuma.

²⁶Camiyä Claudio Lisia cä ya. Cafä Feli bada wa nija ya si onibläö, wa bada bälöa lä dodijile wa nija. ¿Dodijidawä wa cua culawä?

²⁷Cafä nija ei ya lä shömale, judio bänö a fa juwälöjenö a mini shälemaje. “Öjö Lomateli bänö a nofi lä tabou wejei a”, ya bä cuu fa jililänö, sodado ya bä çai lobe lälääö fa showaonö, yama a jucälema.

²⁸Judio bada bä lä yododaö wei bä nija ya bälacquema, a jöwa doblono lä mlai, ya tä a jiliabä.

²⁹Öjö ma cui etä cuonomi. Judio bä nö badabö tä a ja, a jöwa doblono lä mlai, tä afa shino wayoaö bädaomaje. A shämobä etä cuonomi. Täbä fe lä lamaö wejei yafi jamö a fe laobä tä ma cui, etä çai cuonomi.

³⁰Öjö däjä, a shäbeje a nofi jöwa lä lämaö wejei ya tä a fa jililänö, cafä nija ya shömöa showadalei lä cufe. A wafä lä wäyääö wejei bä ma cui, cafä nija bä a nö wäo shaliliobä, ya bä çai shömölei lä cufe. Einaja bei tä a oni cuma.

³¹Öjö cudeenö, sodado bänö Pablo a fa nacaläfälöjenö, Adibadi jamö a bälää fe jaluquemaje, bä nowa lä tano weinaja showawä.

³²Öjö tä fena ja, Jelusale jamö sodado bä balöa çolayofälöma, cama bä lä cule jamö. Bä balöa fa çolunö, cabayo bä jamö bä befi çai lä lälääö wei bänö, Pablo a çai blajaö çofälömaje.

³³Sesalea jamö bä fa waloicunö, bada tä nija oni si jöböa fa balöcöjenö, Pablo a çai icua nomöjökemaje.

³⁴Bada tänö tä a oni fa doanö, Pablo a wälima. —Cafä ¿wedi jamö bei wa oshe cuoma? —Silisia tä ulifi jamö ya cuoma —Pablo bei a cuma. Öjö däjä,

³⁵abinaja Pablo a nowa tama. —Wa wafä lä wäyääö wejei bä waloo däjä, eja bamacö bluca culanö, bäfä a nia shino yai jiliaö —a cuma. Inaja a fa cunö, Elodenö a yafi bada lä tablaleno wei jamö, Pablo a fe lamaquema. A docuu mlaobä, sodado bä lämaquema.

Hechos 24

¹Bei. 5 tä mö didi fa cublalunö, nofi bäyäälewä Anania a bada waloquema. Judio bada bä çai. Dedulo a çai waloquema, Pablo a wafä wäyäbeje jamö bä a nia lä bayeliblano wei. Öjö däjä a wafä dobloimi wäyäbeje, bada tä Feli nija bä a fama.

²Dedulo a wafä famaö fa bufinö, Pablo a wafä wäyääö cadidiobä a wafä falayoma. Bada nija abinaja a cuma. —Cafä Feli wa bada läa yalo, yamacö bälöa yanöcöa dodijia.

Cafa bada wanö judio yamalecö bluca bayelibou cudeenö, dodijidawä yamacö cua majöa lä cule.

³Öjö cudeenö, yamacö lä bälöblai yamacö bufi doblalou lä cudi.

⁴¿Öjö tawä? Bäfä yabäcaö bufiimi yalo, ya wə nia dedeimi. Ya wə ononowä lä faö wei, dodijidawä wale ʔ da jililä.

⁵Fei Pablo a lä cuinö, bä lä yabäcaö wei yama a daö waiquiwä. Judio bluca bä lä bälöblai bä nijamö ma cui, fei a wəno bä bluca shifilimou talei. Nasaleteli Jesús ebä nija, fei a bada lä läle a.

⁶Yai Bada etä yafi shamiamabä jamö, yama a juwälema. Inaja bä lä cuaaö wei, Moisesinö bä tamaö lä bufii wei yama a mini taö showadaoma ma cui,

⁷sodado bä nija Lisia a bada lä lälenö, a nowamaö fa dicoonö, a jucäa lälema.

⁸Cafänö yamalecö ʔ yai jiliabä, yamalecö shömölema. ¿Öjö tawä? Cafä ma cuinö Pablo a da wəli, yamalecö ʔ bejedio nowa möbä, öjö lä —Dedulo a cuma.

⁹Pablo a wəfa wäyäö däjä, judio bä ʔ faö nocamou mö feduoma.

¹⁰Bada tänö bei imicönö Pablo a wə famaö fa bufinö, a nofi bəyäobä a wə juoma. — Judio yamacö nija wa nö bada läo dedewä lä waiquii, ya tä daö. Yamalecö lä jömaö wei wa. Öjö ya tä daö yalo, cafä nija bufi doblalanö ya nofi bəyäo lä cule.

¹¹Yai Bada nija ya nö bayeli nacaobä, Jelusale jamö weyajada ja ya waloquei cublelei. Wa bä wəlii ja, wale nia bejedi dabläö. Öjamö ya lä waloqueno wei däjä,

¹² tä mö didi cubloimi showawä.

¹²Wale ʔ lafujou dablanomije. Yai Bada yafi jamö ma cui, judio bä yododabä yafi bä jamö ma cui, shabono jamö ma cui, ya bä shifiliwä çai tamabou mlai ja, mamicai ya cuoma.

¹³Yale ʔfa lä wäyälajei bä bejedimoimi waiquiwä. Ya nofi jəwa lä jushuaö wei, cafä nija tä nö dablamabimi waiquiweje.

¹⁴Öjö ma cui fei däjä cafä nija ya wə nö wäo cadidia lä cule —Pablo a cuma. — Jesucristo a wə lä juamou wei etä ʔfa jole ma taö wejei ma cui, öjö ya tä ʔ bejedi bufibou. ¿Öjö tawä? Öjö ya tä ʔ bejedi bufibolanö, Yai Bada nija ya nö bayeli nacao, camiyä yamacö nö badabönö a lä bufiblano wejei a showawä lä cui nija. Moisesinö tä ʔ bluca lä oniblaleno wei tä ʔ ma cui, Yai Bada a wəno wäyäləwä bänö tä ʔ onia mö lä fedublaleno wejei tä ʔ çai bluca ma cui, ya tä ʔ bejedi bluca bufii a lä cule.

¹⁵Yai Bada ya nofi mölabou. Bä lä dodijaö wei bä ma cui, bä doblou lä mlai bä ma cui, bä nia bluca demi jocädou lä ço wei tä ja, showadi ya möläö. Fei bä lä ublale bä ma cuinö, öjö tä ʔ çai tabou mö feduaje.

¹⁶Öjö cudeenö, Yai Bada tä ma cui nija, yanowamö täbä ma cui nija, ya dodijidawä cuobä ya cadidou fe yadio.

17'Bei —a cuu çoma—. Shomi täbä ulifibö jamö ya juu nö fa dedelönö, iba judio bä mö feduwä lä cui ya bä bayeliblabä ya ça çolayoma. Bä lä jöli wei ya bä dobäbä, ya bä çai blada waloquema. Yai Bada ya dobäbä, ya bä çai tabou mö feduoma.

18Öjö ya tä taö ja, Yai Bada etä yafi jamö wale dalalemaje. Yai Bada nija dodijidawä ya cuobä ya fa tablamolunö, wale dalalemaje. Ai bä toujonomi. Bä a fanomi. 'Inaja bä cuaano ma mlai ma cui, öjö däjä Asia jamö ai bä lä bälöle bä judio waloquema.

19Öjö bä lä cui, eja bä ublaa yädäo fa cunoja, tä nö doblaobö wei. Camiyä nija tä nowa tabouje ja, çafä nija bä a faö shalilio showadao fa cunoja, öjö tä nö shino doblaobö wei.

20Öjö ma cui, fei bä lä ublale cama bä a çai faö dao. Bada bä nija ya nofi lä báyäono wei däjä, wale dabloimi lä dablano wejei tä a wäabeje.

21Cama bänö wale ublaa lä möamoblaleno wejei däjä, moli ya lä cuno wei tä a ja, bä jushudaliyoma. Abinaja ya cuma. "Bä lä nomablou wei bä nia demi jocädou lä ço wei tä ja, showadi ya möläo yalo, wale dabloimi jömaöje." Einaja ya cuma. Öjö tä a lä cui ja, bä jushudaliyoma —Pablo a cuma.

22Öjö ma cui, Feli a lä cuinö, Jesucristo a wä lä juamou wei etä a jilibou fa waiquionö, bä a bluca wasölema. —Inaja lä waiquiwä, —a cuma—. Eja Lisia ya nö nia dabou, sodado bä nija a bada lä läle. Öjö a bada waloo däjä, öjö ya wä jilia fa balölönö, ya wä faö cadidio weicätä —a cuma.

23Öjö däjä, Pablo a docuu mlaobä, sodado 100 bä çai lä cuono wei a nija a wä fama. —A da moyaweicu —a cuma—. Öjö ma cui, ajede jamö wa nia juadalamaö. Cama nofi ebänö a bayeliblabeje a fe walooje däjä, wa wä nia läomi —a cuma.

24Tä fe weyadou däjä, Feli a lä cuinö, bä suwäbö Dusila e çai waloquema. Öjö a suwä lä cui, judioteliyoma a cuoma. Felinö Pablo a wä jiliaö bufi fa doblaonö a nacamalema. Jesucristo a nofi lä mölabou wejei tä a wäyö ja, a yömöca daoma.

25Täbä lä bejedimou wei tä a ma cui, täbä bufi lä wasöo wei tä a ma cui, Yai Bada tänö täbä nia obi lä jömaö wei tä a ma cui, Pablonö öjö tä a bluca wawämaö ja, a wä lojodoama. Feli a quilima. —Inaja lä waiquiwä —a cuma—. Fei däjä a çojamö da balöo. Obi, ya yabäcoimi ja, bäfä nacamaö ço weicätä —a cuma.

26Abinaja Feli a bufi çai cuma. "Pablo ya jujeblabä, camiyä nija blada bä afa wäyöo jätöo weicätä", a bufi fa cunö, showadi a nacadima, cäcöbö a wayobä.

27Öjö ma cui, lasha bolacabö cäcöbö fa falönö, shomi jamö bada bänö Feli a shömöa fa nomöjölöjenö, öjamö Bösio Fedo a lämabou nomöjöomaje. ¿Öjö tawä? Shomi jamö Feli a juu lä bufiöle däjä, judio bä bufi nia fa doblamabonö, täbä fe lä lamaö wejei yafi jamö Pablo a daa showadaquefälöma.

Hechos 25

1Sesalea jamö Fedo a bada läo nomöjöobä a fa waloicunö,

- ³ tä mö didi fa cublalunö, Jelusale jamö a alayofälöma.
- ²Öjamö, nofi bäyäälewä blowäjäwä bä ma cuinö, judio bada bä ma cuinö, cama nija Pablo a wafa jole wäyämaje. Bä a fe blacäjoma,
- ³Fedo nija bä bayeliblamobä. Jelusale jamö Pablo a shömaö bufimaje. A juimaö däjä a nofi nia fa lämajenö, a nia shäö showadaomaje.
- ⁴Abinaja Fedo a cuma. —Sesalea jamö Pablo a fe labodayouje. Camiyä ma cui öjamö ya nia juu jaödaofälöö.
- ⁵Öjö tawä? —a cuma—. Camiyä nija bada wamacö nocaö showadaobä. Öjamö cama sho bämacö bluca cuobä jamö, a doblou lä mlaono wei wama tä afa wäyäbä —Fedo a cuma.
- ⁶Öjö bä nija a nö fa dedejedalunö, jai 8, cuwi jai 10 a fe didi fa cublalunö, Sesalea jamö a aa çolayofälöma. Öjö tä fena ja, bada bänö täbä showadi lä jömaö wejei jamö, a döcäquema. Öjö däjä, Pablo a nacamaö bufima.
- ⁷Öjamö Pablo a fa waloicunö, Jelusaleteli bä judio lä cuinö a wafa nia fa tajenö, bä ublaa fe fayoblaliyoma, öjamö bä lä nocaono wei bä lä cuinö. A wafa dobloimi fe balojowä ma wäyäno wejei ma cui, a doblono lä mlai, öjö bada a lä cui nija etä dablamaö doblonomije.
- ⁸Pablo a nofi bäyäo ja, abinaja a cuma. —Judio yamacönö yama tä a lä tabou wei, ya tä a nö waiblanomi. Yai Bada ya yafi nö çai waiblanomi. Lomateli Sesa a bada ma cui, ya wafa çai wayoanomi. Wale afa lä wäyäfajei, ya tä daimi —a Pablo cuma.
- ⁹Öjö ma cui, Fedonö judio bä bufi doblamabou bufi fa doblaonö, abinaja a cuma. —Jelusale jamö ¿wa juu ojodaa cule? Öjamö camiyänö ya bä a bluca fa jililänö ya bä a bejedi möbä —a cuma ma cui,
- ¹⁰Pablo a wä lämoma. —Mlaicätä. Wa bä dobloimi jömabä, Lomateli Sesa a bada lä cuinö, eja wa li tamabou waiquia lä cule. Judio bä nija ya doblou lä mlaono wei tä cuami waiquiwä. Wa tä daö malä waiquile.
- ¹¹Ya doblou mlao fa cunoja, ya shämobä ya tä tabou fa cunoja, ya noshi nö umlaobö mlai. Öjö ma cui wale afa lä wäyäo wejei bä bejedimi ja, cama bä nija ya nia jöböamoimi. Sesa a bada lä cui nija wale da shömölö, öjö lä. Öjönö wale a yai shino jiliabä —a Pablo cuma.
- ¹²Öjö däjä, Fedonö bä bada lä yädämabono wei bä sho, bä a wayou fa balöonö, abinaja Pablo a nowa tama. —Jao. Sesa nijamö wa jowa juu bufi doblao waiquiwä. Öjö nijamö wa jubä, öjö lä.
- ¹³Tä nö fa dedeblalunö, Sesalea jamö Fedo a bada läo dude yalo, bada tä Acliba sho, bä suwäbö Belenise sho, a fe waloböma.
- ¹⁴Öjö nija cäcöbö fa yanöcöicunö, Fedonö bada tä yömölama. Pablo a wafa dobloimi lä wäyäno wejei tä a bluca wäyäma. Abinaja a cuma. —Bada tä Felinö a fe lao lä daqueno wei, eja a showaa lä cule.

15Jelusale jamö ya lä cuono wei däjä, nofi bäyäälewä bä blowäjäwä ma cuinö, judio bä bada ma cuinö, öjö bänö a wafa wäyämaje. Ya dobroimi jömabä bä ʼa fama, ya nö bleaamabä.

16Ya wə juo ja, abinaja ya bä nowa tama. “Inaja Lomateli yamacö cuaaö daomi. A wafa lä tamou wei sho, a wafa lä taö wejei bä sho, bä ʼa bluca jiliayou showao mlao däjä, yama bä nö bleaamaimi. A wafa lä taö wejei ya bä ʼa fa jililänö, a nofi lä bäyao wei ya wə çai jilia mö fa fedulänö, ya wə shino faö cadidiobä”, ya bä nowa tama.

17’Öjö cudeenö, eja bä bluca lä waloqueno wei däjä, ya yanöcöonomi —a cuma—. Öjö tä fena ja showawä, bada bamacönö bama täbä showadi lä jömaö wei jamö ya fa döcäicunö, Pablo ya nacamaö bufima.

18A wafa lä tano wejei bä fa ublaicunö, öjö bä ʼanö ya bufi wedinajamoma. “A wafa yai dobroimi tabeje daanö”, ya bufi ma cuno wei ma cui,

19cama judio bä nö badabö tä ʼa ja bä bäyäblayou buoma. Judio a wafa Jesús lä cule a wafa wayoaöje ja, bä ʼafa çai tayoma. Öjö a jowa ma nomalayono wei ma cui, Pablonö a wafa demi jocädou tama.

20’Ya tä bejedi yai dablaba tä cuo fa mlacunö, ya bufi wedinajamolayoma. Pablo ya wəlima. “Jelusale jamö wa bejedi yai dablambä, ʼwa juu ojodaa cule?”, ya nowa tama ma cui,

21eja a cua showalanö, bada tä Sesa nija a wə jilimamou bufi doblaoma. Öjö cudeenö, Sesa nija ya bälao showao mlao däjä, eja a fe labou showaobeje, sodado ya bä nosiemama —Fedo a cuma.

22Fedo nija abinaja bada tä Acliba a cuma. —Camiyänö ma cui, öjö ya wə jiliaö bufi doblao mö fedua lä cule. —Jaç. Fena ja wa wə jiliaö wä —Fedonö a nowa tama.

23Öjö cudeenö, öjö tä fena ja, bada bä yododabä jamö Acliba, Belenise sho cäcöbö waloquema. Täbä nofi doambä, showadi täbä bada yafii lä culenaja, cäcöbö yafia culayoma. Sodado bä nija bä bada lä läblai bä ma cui, öjamö bä bada lä cule bä ma cui, öjö bä çai bluca fabölayoma. Öjö däjä Fedo a wə fa fanö, Pablo a icuamaquemaje.

24Fedo a wə falayoma. —Bada tä Acliba. Cafä bluca wamacö lä cule. Fei wama a dablao lä cule. Judio bluca bä lä bälöblai bänö camiyä nija a shämaö lä bufino wejei a. Jelusale jamö ma cui, eja ma cui, a nomabä bä ʼa shi bluca dolayoma.

25Öjö ma cui, ya ma wəlino wei ma cui, a shämobä ya etä dablanomi. Lomateli bada a yai lä cui nija a wə jilimamobä a wə fama yalo, öjamö ya shömabä ya bufi shaliliblaliyoma.

26Öjö ma cui, bada nija ya si oniblabä tä cuami. Pablo ya wafa wäyabä ya tä taboimi. Ya tä taboimi cudeenö, cafä wamacö nija ya icuamaö lä cule, cafä wamacönö wama a wə jiliabä. Acliba, cafänö wa wə yai jiliabä, bada wa lä cuinö. Bama a wə fa jilianö, Lomateli bada tä Sesa nija ya çai oni shömabä.

²⁷Ya fe lä labole a doblou lä mlaono wei ya etä oni shömaö mlalanö, bada nija ya shömaö dicoo ja, tä nö doblobimi —a cuma.

Hechos 26

¹Öjö dāja, Pablo nija abinaja bada tä Acliba a cuma. —Bei. Cafä wa wə fabä. Inaja bada tä fa cunö, Pablo a nofi bāyāo ja a fa ubladalunö, imicö cudaliyoma.

²—Bei. Bada tä Acliba. Judio bänö wale əfa bluca lä wāyāo wejei tä ja, cafä nija ya wə nia fei dāja wawādo. Ya nofi bāyāobä, cafä wa yai lä cui nija ya wə faö bufi doblaa lä cule,

³Judio showadi yamacö lä cuaaö wei, cafänö wa tä yai daö cudeenö. Showadi yamacö ə lä läablalou wei wa tä çai daö. Öjö cudeenö dodijidawä wale ə da jililä.

⁴¿Öjö tawä? —Pablo a cuma—. Iba tä ulifi jamö ma cui, Jelusale jamö ma cui, judio bä sho yamacö bluca fa yawälönö, ya showadi lä cuaano wei judio bluca bänö tä daöje.

⁵Faliseo bä nija ya yädäblaliyoma, judio yamacö nö badabö tä ə nofi lä yaibolajei bä bada lä cui nija. Yai Bada nija bä cadidou bufi lä doblao weinaja, ya cuaaö mö lä feduo wei, tä çai daöje. Yedu ja ma cui, tä daö showaomaje. Bä ə faö ojode ja, wale əfa nia bejedi taöje.

⁶Camiyä yamacö nö badabö nija, Yai Bada tä ə nö wäo lä balöono wei ya tä ə nofi mölabou yalo, wale əfa dobloimi wāyāöje. Öjö tä nowa ja cafä nija wale ocama ublamabou lä culajei.

⁷Yai Bada a wə nö wäo lä balöono wei, yama tä ə nofi mölabou —a cuma—. Jacobo bä ijilubö 12 yama ecö nodiwä yamacö lä cuinö, yama tä ə nofi mölabolanö, didi dāja ma cui, jalu dāja ma cui, yamacö nö bayeli malä nacaodii wei. Öjö ya tä ə nofi mölabou yalo, fei bä judio showawä lä cuinö wale əfa dobloimi wāyāöje. ¿Öjö tawä, Bada tä?

⁸Ya tä ə nofi mölabobä lä! 'Judio wamacö. ¿Wedi tä tabä cafä wamacö ma cuinö, Yai Bada tänö bä demi jocädamaö lä ço wei, wama tä ə bejedi nia bufiimi majöwä dicoo?

⁹Camiyä ma cui, Nasaleteli Jesús ya wə jiliaö nofi fa wəlibonö, ya bufi jaba lämou dodijiona —a cuma—. Ya lämoba ya bufi fa shalilionö, bluca ya shomiablaloma.

¹⁰Jelusale jamö cama ya ebä nö bleaamama. Nofi bāyāalewä blowājawä bä lä cuinö tä tamaö fa bufijenö, täbä fe lä lamaö wejei yafi jamö, Yai Bada bluca ya ebä fe lamaboma. Öjö bādawä mlai, bä lä shāblamano wejei bä nija, ya wə çai yädäo dicooma.

¹¹Judio bä yododabä yafi bä jamö, bluca ya bä nö bleaamaö cuaama. Jesucristo a nofi lä mölabono wejei ya tä joyamaö bufi ja, ya wə fe blacājoma. Ya jushuo fa dodijionö, shomiteli bä shabonobö jamö ma cui, ya bä nö blajawä bleaamaö cuaaö fe yadioma —Pablo a cuma.

12Pablo a wə faö showai ja, abinaja a cuma. —Inaja tä fa cuonö, nofi bäyäälewä blowäjäwä bä lä cuinö wale fa shömölöjenö, öjö bä ʔnö, Damaco jamö ya alayoma.

13Ya jufälöö däjä, motoca a yöloloblaliyoma. ¿Öjö tawä, bada tä? Öjö däjä, camiyä ya ma cui nija, ya bä çai lä juno wei bä ma cui nija, fedu jamö culanö tä shji fa bädalunö, tä shji bada wacacadalioma. ¿Öjö tawä? Motoca a mömou shji dowäjäwä ma cui, öjö tä shji mömou yai dowäjäo fe balojooma.

14Yamacö bluca fa wäcäcälalunö, yamacö jilao däjä, judio yamacö caficö ʔ ja ya wə jililema. Abinaja a cuma. “Saulo, Saulo. ¿Wedi tä tabä wale nö li bleaamaö dicoa cule? Camiyä nija wa ishous dicoo ja, cafä wa nia famii ayao”, wale nowa tama.

15’Abinaja ya cuma. “Bada tä. ¿Wedi bei wa jowa?” ya cuma. Öjö däjä, Bada a wə juoma. “Jesús cä ya, wale nö lä bleaamale.

16A da ublaicu. Bäfä shömabä, cafä nija ya dablamous lä cule. Wale ʔ juabä bäfä yailema, wale ʔfa wäyöö cuaabä. Fei däjä ya lä dablamos ma cui, cafä nija ya nia obi lä dablamos wei ma cui, öjö wa tä ʔ bluca wäyabä.

17Judio bä nija bäfä nowamaö wä. Shomi jamö bäfä nia lä shömaö wei jamö ma cui, öjö bä ma cui nija bäfä nowamaö showao wä, judio bä lä mlai bä nija.

18Wa bä bufi möblamabä bäfä nia shömaö, bä mö jamoliblobä. Tä mö lä didi wei jamö bä ma cule ma cui, tä shji lä wacacai jamö bä mö shino yaiblous nomöjöobä. Fecula bada tänö bä ma lojodobou däjä, öjö tä fa dacöjenö, camiyä Yai Bada nija bä mö cublous nomöjöobä. Bä doblous lä mlai tä bluca ma cule, tä nowa mladobä. Camiyä wale nofi lä mölabous wejei tänö, iba bä lä yaile bä nija bä yädäblobä”, camiyä nija Bada tä cuma. ¿Öjö tawä? —Pablo a cuma.

19Pablo a wə faö showaoma. —Bada tä, Acliba. Öjö cudeenö fedu jamö culanö, camiyä nija Jesús a lä bädaleyoluno wei ya wə fa jililänö, ya wə jua showadalema.

20Damacoteli ya bä yömölaö balöoma. Öjö däjä Jelusale jamö ya bä yömölaö nomöjöoma. Öjö däjä, Judea jamö bä lä bälöblai bä nija ya tä ʔ wäyöö fa cuanö, judio bä lä mlai ya bä çai yömölaö majöoma. Abinaja ya bä nowa tama. “Wälidiwä tä ja wamacö bufi fa lädalunö, Yai Bada nijamö bä mö da yaiblous. Wa bejedimous dablamosbä, bä yai da dodija”, ya bä nowa tama.

21Öjö tä nowa ja, Yai Bada etä yafi jamö ya cuo däjä, judio bänö wale juwälemaje. Wale shöö bufi fa doblaosenö, wale nabä quequemaje.

22Öjö ma cui, Yai Bada nija ya fa bayeliblamonö, ya li bayeliblamous showaa lä cule. ’Öjö cudeenö, bada bä ma cui nija, bada bä lä mlai bä ma cui nija, ya tä ʔfa wäyöö showalanö eja ya ublaa —a cuma—. Ya tä ʔ lä wäyöö wei tä ʔ shomimi. Yai Bada a wəno wäyälöwä bä ma cuinö, Moisesi a ma cuinö, öjö bänö tä ʔfa wäyööje ja, tä nia jowa lä cublous wei tä yacumö wawäblaliyoma. Öjö ya tä ʔ li wäyöö shalilous.

23Yai Bada tänö a shömabä a lä yailenous wei a wəfa wäyöö balöoje ja, a nö nia jowa bleaamamaje. A fa shäblamonö, ʔlimi a nia demi jocädous çöoma. ¿Öjö tawä? Ai bä ʔlimiblous balöa mlai ja, cama a nia shino demi jocädous balöoma. A demi jocädous lä

çono wei tänö, Yai Bada tä shi afa nia wäyämou blaucoma, judio bä ma cui, judio bä lä mlai bä ma cui, bä bufi bluca jaducublobä —a cuma.

²⁴Inaja Pablo a nofi bäyäo showai ja, Fedo a wä icalı falayoma. —ıPablo, wa shi walıı! Oni wa sibä showadi mödii ja, wa shi walıjou.

²⁵Öjö ma cui, abinaja Pablo a cuma. —Ma, ya shi çai walıimi. Cafä bada wa bälöa lä dodijile wa nija, bejedi ya tä a wäyäo lä cule.

²⁶Ya tä a lä wäyäle, bada tä Aclibanö tä a bluca daö waiquiwä yalo, cama nija ya wä wawädoablalou. Tä bluca lä cublaliyono wei tä nofi mojudubobä ami. Tä jöyaono malä mlai.

²⁷Bada tä, Acliba. Yai Bada a wano wäyälwä bänö tä a lä oniblaleno wejei, çwa tä a bejedi bufii culawä? Wa tä a bejedi lä bufii wei, bäfä daö waiquiwä —Pablo a cuma.

²⁸Pablo nija abinaja Acliba a cuma. —Cafä wa wano Jesucristo ya e cuobä, çwale nia tablamaö showadao daano?

²⁹Öjö däjä, abinaja Pablonö a nowa tama. —Fei däjä showao ma cui, obi ma cui, öjö tä nö doblaobö wei. Cafä bädawä mlai, wamale a lä jilile wamacö bluca ma cui, Yai Bada nija cafä bamacö bayelimaö, camiyä ya lä culenaja wamacö cublou mö feduobä. çÖjö tawä? Ya ocama lä culenaja mlai, Jesucristo ya lä bufiblalenaja wamacö çai cuo mö feduobä —Pablonö a nowa tama.

³⁰Öjö däjä, bada tä Acliba a ubladou fa balölonö, Fedo a bada ma cui, Belenise a ma cui, ai bä loo mö lä feduono wei bä ma cui, öjö bä bluca fa ublaolalunö,

³¹bä faa çölayofälöma. Bä faa fa çölufälönö, abinaja bä nowa tayoma. —Fei a fe lä labole a shämobä tä cuami waiquiwä. A fe labobä ma cui tä cuami —bä nowa tayoma.

³²Fedo nija abinaja Acliba a cuma. —Shädayai. Sesa nija a wä jiliamobä a wä faö mlao fa cunoja, a nö jujeblamo showadalayobö wei —a cuma.

Hechos 27

¹Sesa nija Pablo a wä jiliamobä, Loma jamö yamalecö nia shömamaje, Italia tä ulifi jamö. Öjamö yamalecö shömabeje bada a bufi shaliliblou däjä, sodado 100 bä çai lä cuono wei a nija a wä fama, Julio a bada nija. Cama 100 bä çai lä cuono wei bä lä cui, bada tä Aucuto ebä afa sodado jilabomaje. Pablo a ma cui, ai bä fe lao mö lä feduono wei bä ma cui, öjö bada tä Julio nija bä bluca balaquemaje, camanö bä çai caläfälöbä.

²çÖjö tawä? Adamidoteli bä canawäbö bada jamö, yamacö bluca fa döcäcäobalunö, yamacö befi çai caläa showalayoma. Öjö a canawä jamö bä lä juno wei bä lä cui, Asia tä ulifi jamö, modu u casö jamö bä lä bälöjoi bä nijamö, bä nia washölöblou cuaafälöma. Camiyä yamacö nija, Desalonicateli Alidaco a nocalayoma, Masedonia tä ulifi jamö a lä bälöle a lä cui.

³Öjö tä fena ja, Sidonoteli bä lä bälöle jamö yamacö fa waloicunö, yamacö befi çai cadöquema. Julio a bada lä cuinö, Pablo a nofi ojodaboma yalo a washölöo

wasönomi. Cama nofi ebä fe walobä, a washölömaquema, cama bä nija a bayeliblamofälöbä.

⁴Yamacö befi çai caläa fa çölöfälönö, wadoli a badanö yamalecö mini doblamanomi yalo, Shible tä ulifi lä jöcole ai tä mashi jamö, yamacö befi çai jaloquefälöma, tä wadoli cua lä mlai jamö.

⁵Silisia tä ulifi ma cui, Bañilia tä ulifi ma cui, öjö yama tä ulifi fa jayucufälönö, Lisia jamö yamacö waloquema, Milateli bä lä bälöle bä nijamö.

⁶Öjamö sodado 100 bä çai lä cuono wei a lä cuinö, Alejariateli bä canawäbö bada çaa dalalema. Öjö a ja, Italia jamö ai bä befi çai nia caläo fa showadaonö, öjö bä nija yamalecö döcaa çocamaquema.

⁷Tä wadolimou dicoo ja, obisi yamacö befi çai calädii däjä, tä nö dedelayoma. Yaçumö Nido tä ulifi jamö yamacö ajedea fe yadialiyoma ma cui, öjamö wadolinö yamalecö doblamaimi majöa ja, shomi jamö yamacö culayoma. Cleda tä ulifi lä jöcole ai tä mashi jamö, tä wadolimou lä mlai jamö, yamacö befi çai watolayofälöma, Samono tä ajede jamö.

⁸Öjamö Cleda tä ulifi casö jamö, yamacö befi çai lä watoafälöno wei jamö, yamacö doblou jaödaonomi. Yaçumö u lä ononoi jamö yamacö befi çai waloquema, Laseateli bä bälöa lä ajedele jamö.

⁹Yamacö befi çai caläo nö dedeaö waiquioma yalo, maa a nö lä wadoli wei a nia quei fa çonö, modu u jaba wayuama. ¿Öjö tawä? Bä iyaö wasöolanö, judio showadi bä lä çocamou wei tä çai jayublou waiquilyoma. Öjö cudeenö Pablonö bä wasöo ja,

¹⁰abinaja a cuma. —Iba wamacö. Bamacö caläo fe yadio dicoo ja, bejedi lä bamacö nö nia bleaaö. Ya tä wayu daö waiquiwä. Bamacö nia befi çai bluca löblou. Madofi bä nia caläblou. Canawä a nia shäblou. Camiyä bamacö mishi nia duoblou —bä nowa tama.

¹¹Öjö ma cui, sodado 100 bä çai lä cuono wei a lä cuinö, Pablo a wa jilianomi. Canawä a lä cadidamaö wei a ma cui, cama e canawä lä cuono wei a ma cui, öjö cäcöbö a shino yai jiliaö dicooma.

¹²Abinaja bä bufi bluca cuma. “Maa däjä, eja bäma a canawä nia çabou dobloimi. Cleda jamö bamacö juu wabäo da showadao, Feniseteli bä lä bälöle jamö, tä wadolimou lä mlai jamö. Maa däjä öjamö bamacö shino yai yanöcöobä, showadi bä canawä lä çablaö wejei jamö”, bä bufi cuma. Einaja bä bufi bluca cuu ja, bä juu fe yadioma.

¹³Motoca a cuaaö lä mlai tä mashi jamö, juliliwä tä wai fa yaläimanö, “Fei däjä waiquiwä dao”, bä bufi cudaliyoma. Öjö däjä, canawä a caläo mlaobä, tä jude lä çabono wejei tä fa çöläjenö, yamacö befi çai caläa çolayofälöma. Dodijidawä yamacö befi çai caläfälöbä, Cleda tä ulifi casö jamö yamacö befi çai watoafälöma ma cui,

¹⁴yamacö blajaö showao mlao däjä, ulifi jamö wadoli a bada cuaaimama.

15Modu u ʒeshi jamö, wadolinö canawä a ʒcali jilulaö fa dicoonö, yamacö casöblou doblou fa mlacunö, ʒacumö tä ʒacolemaö jujeblaliyomaje. Wadoli anö yamalecö befi ʒai jilulua bälefälöma.

16Öjö däjä, Cauda tä ulifi wai lä ʒöcole ai tä mashi jamö, wadoli a ja yamacö nofi fa bäyälönö, tä wiisibö dodijidablou ʒolayoma. Yamacö nö walojaö fe fa yadionö, canawä yama a wai shaibou lä yädäono wei, yama a ʒcaa lojodobalema.

17Öjö a wai canawä fa maquebalöjenö, yamacö befi ʒai lä caläno wei, a canawä colo ʒcaa nomöjökquemaje, bada nata badanö. Öjö däjä, mlaca mlaca a cuobä jamö bä befi ʒai ʒao fa quilinö, camishi bä bada lä lelemabono wejei bä jayulalemaje, bä befi ʒai jilulamofälöbä bä showadi lä lelemabou wejei bä lä cui. Inaja bä fa cuaanö, yamacö befi ʒai cadidobä tä cuo fa mlacunö, u bada lä shäyä shäyämou wei unö, yamacö befi ʒai jilulaö buofälöma.

18Öjö tä fena ja, wadoli a badanö yamacö befi ʒai shäyäjaö showawä ja, bä madofi lä didibono wejei ai bä queamabalemaje, jelejewä yamacö befi ʒai caläo fe yadiobä.

19Öjö tä fena ja, yamacö nö bleaö showao däjä, camishi bada bä showadi lä lelemabou wejei ai bä ma cui, canawä a cadidamabeje ai bä madofi ma cui, öjö bä quea nomöjämabalemaje.

20Motoca a ma cui, shidicali bä ma cui, bä dablamos mlai ja tä nö fa dedelönö, maa a nö lä wadoli wei a quei nö quiliaö fa showadabalunö, yamacö bufi ʒacumö jaluama. “Fei däjä bamacö nia bayeliblamoimi”, yamacö bufi cudou dodijilayoma.

21Yamacö iyaö mlai ja yamacö nö dedeaö waiquioma yalo, Pablo a wä fabä a möamoblaliyoma. —Iba wamacö. Cleda jamö bamacö da wasöblei däjä, wamale ʒ juaö fa cunoja, tä nö doblaobö wei. Öjamö bamacö jocäo mlao fa cunoja, bamacö nö bleaabö mlai. Madofi bäma bä nö bluca tabou showaobö wei. Demi bamacö nö cuobö wei.

22Öjö ma cui, bä bufi da lojodoicu, ʒöjö tawä? Canawä a nia ma wälioblou wei ma cui, wamacö nia nomaimi dodijiwä.

23’Ei tä didi showawä ja, Yai Bada ʒjele etä fa wawäblaliyonö, wale yömölalei lä cufe —a cuma—. ʒÖjö tawä? Yai Bada ya lä bufiblaö wei a lä cuinö, cama ʒjele etä shömöledayoma, camiyä ya e lä cui nija. Camiyä nija a ublaa fa yädäicunö,

24abinaja wale nowa tama. “A quili dijä, Pablo. Sesa nija wa icuobä wa waiquiwä. Wa bä befi ʒai lä caläle bä ma cui, Yai Bada tänö öjö bä bayeliblaö bufi doblaa mö fedua lä cule”, wale nowa tama.

25ʒÖjö tawä, iba wamacö? Bä bufi da lojodoicu, öjö lä. Yai Bada tä lä cuno weinaja tä cuobä, ya möläo showaa lä cule.

26Öjö ma cui, bamacö bluca demi washölöo fe yadiobä, ai tä ulifi lä ʒöcole jamö, bamacö befi ʒai nia jilulamou buo —a Pablo cuma.

- ²⁷Öjö dāja, 14 tä mö didi fa cublalunö, wadolinö yamalecö befi çai fa jilulaimadunö, modu Adiadico u ʘeshi jamö, yamacö befi çai jilulamou showaofälöma. Tä bähäcublou dāja, canawä a lä juwäbono wejei bä bufi möblaliyoma. “Ulifi a jamö bamacö nofi ajedou yaia lä cule”, bä bufi cudaliyoma.
- ²⁸Öjö dāja, jude wabamodima tä nata cua tänö, u ʘqui wabamaje. Abinaja bä cuma. —i36 tä jamö u ʘqui fe wädöa lä cubodi! —bä cuu balöoma. Bä fa colojoblalucölönö, u wabaö çomaje. —i27 tä jamö u ʘqui fe wädöo nomöjölayou lä cufe! iU badedeadalou a lä cuimadi! —bä cuu nomöjöoma.
- ²⁹Maa mabä ja bä befi çai difequio fa quilinö, canawä a colo jamö 4 täbä lä jude wei täbä çaquemaje, bä befi çai yanöcöo fe jalubä. Öjö dāja tä mö jaluu jaödaobä, bä nö bayeli nacaoma.
- ³⁰Öjö dāja canawä a lä juwäbono wejei, bä mini docua jalua showalayofälöma. Canawä ola jamö, jude ai bä nia jowa ma queamano wejei ma cui, bä jolemoma. Canawä a wai lä maquebono wejei, a çaa çoa jatoquemaje. Inaja bä cuaaö showai ja,
- ³¹sodado 100 bä çai lä cuono wei a ma cui, cama sodado bä showawä ma cui, Pablonö bä bluca yömölaö showadaoma. —Canawä jamö, fei bä yanöcöomi ja, wamacö nia demi cuomi —bä nowa tama.
- ³²Öjö dāja, sodado bänö canawä a wai nata fa bäblalöjenö, a caläa bädamalemaje.
- ³³Tä mö jaluaimaö dāja, Pablonö bä bluca iyamaö bufima. Abinaja bä nowa tama. —Eja wamacö nö lä bleaale, iyaö mlai ja 14 wama tä mö didi tablamaö waiquiwä, nii wama a waö mlai ja.
- ³⁴Öjö cudeenö wamacö iyabä ya wä fe blacäjää lä cule. Wamacö lojodoblou çobä. ¿Öjö tawä? Moli ma cui wamacö nia famiimi waiquiwä —bä nowa tama.
- ³⁵Inaja a fa cunö, bä mamö bluca yäo showai ja, nii a fa dälönö, Yai Bada nija a bufi afa doblalou wäyämoma. Öjö dāja nii a fa joyolänö, a iyama.
- ³⁶Öjö dāja, bä bufi bluca lojodoblou fa çolonö, cama bä ma cuinö, nii a çai waa mö fedulemaje.
- ³⁷Yamacö befi çai lä caläno wei, bluca yamacö cuoma. 276 yamacö didioma.
- ³⁸Canawä a lä juwäbono wejei bä fa iyaolalunö, jelejewä bä nia caläo fa çofälönö, bä madofi shee lä jäblaliyono wei bä quea çomabalemaje.
- ³⁹Bei. Tä mö fa jalulunö, tä nö ulifi öjöböanomije. Öjö ma cui, modu u casö mlaca mlacaböobä jamö, mau u lä ononoi u bajadedewä dalalemaje. Canawä a wälioblou fe balojoo mlaobä, öjamö bä befi çai nia jao fa showaonö, bä a wayoma.
- ⁴⁰Öjö cudeenö, jude täbä lä queamano wejei täbä nata fa bafedilalöjenö, täbä daaquemaje. Canawä a colo lä ʘcabono wejei toto bloloamaö çomaje, canawä a cadidamaö dodijiofälöbeje. Öjö dāja canawä ola jamö acadafu sicö ösöa fa çomalöjenö, sicö lelea fa çomacöjenö, mau u bajadedewä jamö bä befi çai cadidou showaofälöma, bä befi çai jacobä.

⁴¹Öjö ma cui, bä ijede blajajawä showai ja, mlaca mlaca ai a läa fa jatobalunö, canawä a ola jaquema. Öja a fa jaalunö, a lojodobaliyoma. Modu u bada lou loumou fa showaonö, canawä a bada colo shäblou showadalayoma.

⁴²Bä fe lä labono wejei bä documaö mlaobeje, sodado bä lä cuinö bä nia bluca shäblaö showadaomaje, mau u jamö bä fa caläfälönö bä washölöblou mlaobä.

⁴³Öjö ma cui cama 100 bä çai lä cuono wei a lä cuinö, Pablo a nowamaö bufi fa doblaonö bä yanöcöblamalema. Abinaja yamalecö nowa tama. —Wamacö caläö lä daö wei wamacö queo balöobä. Wamacö fa caläfälönö wamacö washölöobä.

⁴⁴Ai wamacö lä cui, fii acadafu fibä ma cui ja, canawä acadafu bä ma cui ja, öjö bä ja wamacö fa yädäicunö, wamacö befi çai caläö mö feduofälöbä —yamalecö nowa tama. Inaja yamacö bluca fa cublalunö, demi yamacö bluca washölöblaliyoma.

Hechos 28

¹Öjö tä ulifi lä jöcole jamö yamacö fa washölöolalunö, yama tä afa ulifi jililema. Mada tä afa ulifi jöwa cuoma.

²Madateli jbejedi bä nofimou fe balojooma! A fa maböonö, tä çai fa wajalionö, cowa wacö bada fa tacöjenö, yamalecö bomomabeje yamalecö bluca nacalemaje.

³Pablonö çowa ayobä fa jocälälänö, wacö lä yäqueno wejei jamö ayobä maquequeaquema. Öjö ayobä ja wacö ömöö ja, olu ecö wawäblaliyoma. Pablo bei imi ja, cäcö shadiblaquema.

⁴Madateli bänö cäcö shadia fa dalalöjenö, abinaja bä nowa tayoma. —Ei a lä cui, yanowamö shädimi a nofi yaiwä. Modu u jamö a ma docubeno wei ma cui, yai tä nö yualewä lä cuinö a demi nia tamaboimi —bä nowa tayoma.

⁵Inaja bä nowa ma tayono wei ma cui, Pablonö olu cäcö fa yomösöbanö, cäcö yabema. A çai jaliliblou bädaonomi.

⁶Madateli bänö, Pablo imicö shuwäö nö dabomaje. A nomawä wäcadou nö çai daboma ma cujei, tä nö fa dedejedalunö, a nö bleaaö dablaö fa mlacujenö, bä a shomiblou nomöjölalayoma. Yai tä bufii nomöjöomaje.

⁷Bei. Öjö tä ajede jamö, bada tä Bubliko ficali etäca bä blaoma. Öjö Bubliko a lä cui, Mada tä ulifi lä jöcole jamö a bada läoma. Öjönö yamalecö fa nacälänö, dodijidawä yamalecö iyamaö showao däjä, bolacabö tä mö didi ma cublaliyono wei ma cui, yamalecö iyamadii showaoma.

⁸Öjö tawä? Bubliko bä föö e lä cui, e jalili blaoma. Shuu wayu anö a fa dälänö, a nö bleaama. A çai yobladima. Pablonö öjö a fe fa waloönö, Yai Bada nija a bayelimama. Öjö däjä Pablo imicö fa maqueicunö, a jalomalema.

⁹Inaja a fa cuanö, öjö tä ulifi lä jöcole jamö ai bä jalili lä bälöblaono wei bä fa waloiquiyonö, bä bluca jalomalalema.

10Bluca täbä ja, yamalecö dobämaje. Canawä ai a bada jamö, yacumö yamacö döcäa fa çöicunö, dodijidawä yamacö befi çai caläfälöbä täbä bluca didibalemaje.

11Mada tä ulifi lä jöcole jamö, belibo 3 yama a fa famalönö yamacö befi çai caläo çöofälöma, maa däjä öjamö a canawä lä yanöcöono wei a canawä ja. Alejariateli bä canawäbö bada cuoma. Yai täcöbö lä çelequeblaliyono wei, a wäfa bada canawä jilabomaje.

12Silacusateli bä lä bälöle jamö yamacö fa washölöblalunö, 3 yama tä mö didi tablamalefälöma.

13Öjamö culanö yamacö befi çai caläo fa shoqueafälönö, Lejioteli bä lä bälöle jamö yamacö waloquema. Öjö tä fena ja, motoca a juu lä mlai jamö wadoli a juu fa bädaoimanö, bolacabö yama tä mö didi tablamaö fa çölofälönö, Budeoli jamö yamacö waloa nomöjöquema, showadi bä canawä lä çäbou wejei jamö.

14Öjamö Jesucristo ai yama ebä dalalema. Yamalecö nacalemaje. Öjö bänö yamalecö bälömabou showaoje däjä, 7 yama tä mö didi tablamalema. Inaja yamacö fa cuadaloimadunö, Loma jamö yamacö yanöcöwä waloquema.

15Öjamö Jesucristo ebä lä bälöle bänö yamacö ajedou fa jililäjenö, yamalecö mö baamayolumaje. Abio jamö ai bä waloqueyoluma, nii bä lä lulublaaö wejei jamö. Ai bä mö feduwä lä cui,

3 bä yafi lä itale jamö bä çai waloa mö feduqueyoluma. Pablonö bä fa dalalönö, Yai Bada nija a bufi doblaloma. A bufi lojodoblou çölayoma.

16Lomateli bä shabonobö cadidiwä jamö yamacö yafiblou däjä, Lomateli bada bänö Pablo a fe labonomije. Dodijidawä a yami bälöo mö feduobä, a tamaquemaje. A docuu mlaobä, Pablo nija sodado moli a bälöa mö fedumaquemaje.

17Öjö däjä, 3 tä mö didi fa cublalunö, Pablonö öjamö judio bä bada lä bälöle bä nacamalema. Bä fa çöcablamalönö, abinaja bä nowa tama. —Iba wamacö. Camiyä ya lä cui, judio bä nija ya doblou lä mlai tä cuono ma mlai ma cui, wale juwälemaje. Bamacö nö badabö owämabeje ya bä wasöno ma mlai ma cui. Jelusale jamö wale fe jaba fa lamabojenö, Lomateli bä nija çocama wale bälöa nomöjöquemaje.

18Lomateli bada bänö wale nia dobloimi fa dablajenö, wale ma wälino wejei ma cui, iba tä dabanomije. Ya shämobä tä cuo fa mlacunö, wale jujeblamaö bufima ma cujei,

19judio bä çä läblaliyoma. ¿Öjö tawä? Sesa nija ya nofi bäyäobä ya bufi cuno ma mlai ma cui, wale jujeblamaö fa mojiöjenö, öjö nija yacumö ya shömamou bufioma, iba judio bä mö feduwä lä cui ya bä çafa wäyäo mö feduobä tä cuono ma mlai ma cui.

20Öjö cudeenö, çafä bamacö möö bufi doblaoma, bamacö çä wayomabä. Isaeli bama ecö blucanö, bama tä nö showadi lä dabodii wei tä nowa ja, ei boo shicönö ya malä çcale —bä nowa tama.

21Pablo nija abinaja bä cuma. —Judea jamö bä lä bälöle bänö, camiyä yamacö nija cafä wa wafa wayoaimije. Oni tä ma cui, tä shömaimije. Eja judio bä fama ma juu wei ma cui, wa wafa çai dobroimi wäyämije.

22Öjö ma cui, cafä bäfä ʔ jiliaö bufi doblaa lä cule. Wa bufi lä cuu wei, yama tä ʔ jiliabä. Jesucristo bufilewä bä ʔfa dobroimi wäyöö cuaaö malä cudujei, cafänö wa bä çai lä cule bä lä cui —bä cuma.

23Pablo a lä bälöono wei a yafi jamö bä çocablou çobä, tä ʔfa mö jalu fa wäyäjənö, bluca bä waloa çoqueyoluma. Öjö bä nija Pablonö tä ʔ jaba wäyöö fa fenaonö, a wa wayou showai a fe weyalayoma. Yai Bada tänö cama ebä çai lä cuo wei tä ʔ wawäblamalema. Jesús a wafa wäyöö ja, Moisesi tä ʔ ma cui, Yai Bada a wano wäyäləwä bä ʔ ma cui, öjö tä ʔfa bluca jayumaö showaoma, bä bufi jaducublamaö fe yadiobä.

24Pablonö tä ʔ lä wäyöö wei tä ʔ ja, ai bä bufi jaducublaliyoma ma cui, ai bä mö feduwä lä cuinö tä ʔ bejedi bufinomije.

25Öjö cudeenö, öjö tä ʔ ja bä bufi shalilio fa mlacunö, bä ʔ lāmoma. Bä çö lä bufiöle dājä, Pablo moli a wa faö çoma. —Yai Bada tä Bufi lä cui a wa cadidou dodijioma. Cafä wamacö nö badabö nija a wano wäyämöbä, abinaja Isaia a nowa tama, Yai Bada a wano wäyäləwä a lä cui.

26Ei bä nija wa wa fabä. Camiyä wale ʔno çai tabä. Tä ʔ nia yai jiliaö ma cui, bä bufi nia jaducubloimi waiquiwä. Bä mamö nia ma showao wei ma cui, bä bufi nia yai möbloimi.

27Bä bufi yai walalaobä tä cua ma cule, bä bufi jaducudalou malä mlai. Tä ʔ yai jiliaö walalaoeje tä ma cule, jai bä yömöcacö quefua bä cuadii. Tä dablamoebä tä ma cule, jai bä mamö casö midou bä cuaaö. Wale yai bufiöle fa cunojeja, ya bä nö demi tamabobö wei. ʔEinaja Yai Bada tä Bufinö Isaia a nowa tama.

28ʔÇao —a cuu çoma—. Bamacö nowa taö lä cule. Yai Bada tä ʔ lä cui, judio bä lä mlai bä nija tä ʔ shömamou nomöjöö lä cule, öjö bä bayeliblemoba. Öjö bänö tä ʔ nia shino yai jiliaöje —Pablonö bä nowa tama.

29Pablonö inaja bä nowa fa talönö, bä çö showalayoma. Tä ʔ lä wäyänö wei tä ʔ ja, bä bufi shaliliblou mlai ja, bä nowa shino tayou dicoofälöma.

30Öjamö Pablo a bälöa nö dedeaö ja, lasha bolacabö a famalema. Öjö a yafi jamö a cuobä, camanö tä nowa comaquema. A fe lä walono wejei bä lä cui, dodijidawä bä fa walomacönö,

31bä bluca yömöladima. Yai Bada tänö cama ebä çai lä cuo wei tä ʔ wäyäma. Bada tä Jesucristo wawädowä a wafa wäyöö ja, a yabäcaö mlajei ja bä yömöladima.

Romanos

Romanos 1

- ¹Jesucristo ya nosie lä fuaö wei ei camiyä Pablo cä ya, wale lä shimöleno wei ya lä cui. Yai Bada ya etä ą dodijidawä wäyäbä wale yaimabou.
- ²Öjö tä ą lä cui, Yai Bada a wano wäyälwä bä lija tä ąfa wäyää balöoma. Yai Bada tä ą oni jamö tä ą cua.
- ³Bä ijilubö Jesucristo etä ą dodijidawä lä wäyämou wei, öjö tä ą waiquiwä. Bada tä David e li nodiwä cuoma.
- ⁴Bada tä Jesucristo lä cui, Yai Bada Ijilubö e. A demi lä jocädamaleno wei tänö, Yai Bada tä Bufe lofotenö bä Ijilubö e wawadowä nö öjöbömalemä.
- ⁵Jesucristo a lä cuaano wei tänö, Yai Badanö wale nofi ojodadalema. Wale nofi fa ojodadalönö wale shimölema, ya wano wäyää cuaabä. Bluca bä bälöblawä lä yaiblai bänö a nofi fa mölabojenö a nosie fuabeje, wale shimölema.
- ⁶Cafä Lomateli wamacö ma cui, Jesucristo wama ecö cublobä wamacö çai nacaä mö fedulema.
- ⁷Öjö cudeenö Yai Bada tänö Lomateli wamacö lä nofimaö wei wamacö lija, ei ya tä ą oni shimaö lä cule, Yai Bada wama ecö cuobä wamacö nacaä mö lä feduleno wei wamacö lija. Bei. Fayä Yai Bada lija wamacö shılo bayeliblamobä, Bada tä Jesucristo lija çai. Wamacö bufi shılo yanöcömaboböbä. Wamacö nofi çai shılo ojodaboböbä.
- ⁸Abenaja ya cuu balöo. Jesucristo wama a nofi lä mölabou wei wamacö ąfa jılimou blaucou cuaaö cudi. Öjö cudeenö ya bufi doblalou. Jesucristo a wano, Yai Bada ya lä bufiblaö wei lija ya bufi ąfa doblalou wäyämou talei.
- ⁹Ya wä faö däjä, showadi bamacö ąfa jayumaö talei. Bejedi lä ya wä. Yai Bada tänö wale ą bejedi daö. Bei ya bufinö ya wä lä fuaö wei ya e, bä Ijilubö ya etä ą dodijidawä wäyäbä.
- ¹⁰Öjö lija ya wä faö däjä, cafä bamacö fe waloobä ya nacou, wale shimaö ja, mijamö ya yacumö fuu fe yadiobä.
- ¹¹Bamacö bufi bayeliblabä bamacö möö bufi doblao malä cui. Bamacö bufi yai lofotoblamabä.
- ¹²¿Öjö tawä? Bamacö bufi bluca yai lofotoamayobä. Jesucristo wama a nofi lä mölabou wei tänö, camiyä ma cui ya bufi çai lofotoblou mö feduobä. Inaja showawä, camiyänö ya nofi mölabou mö lä feduo wei tänö cafä wamacö bufi çai lofotoblou mö feduobä.
- ¹³Iba wamacö. Cafä wamacö lija ya fuu bufi doblao, Jesucristo lija, judio bä lä mlai ai ya bä bufi bayeliblaö lä cuaaö weinaja, cafä bamacö bufi çai bayeliblaö cuo mö feduobä. ¿Öjö tawä? Ya fubä bluca ya ma wabäo wei ma cui, showadi ai tä lädou dicoo. Öjö wama tä dabä ya wä.

14Jödödöwä bä lija Jesucristo ya etä ʼa wäyäbä ya. Dodijidawä bä yai lä bälöo wei bä ma cui lija, bä nö bälöo lä beblalou wei bä ma cui lija, öjö bä bluca lija ya tä ʼa wäyäbä. Bä bufi ʼafa jaducäwä lä jilaö wejei bä ma cui, bä bufi jowa dao lä mlai bä ma cui, öjö bä bluca lija ya tä ʼa wäyäbä.

15Öjö cudeenö cafä Lomateli wamacö ma cui lija, Jesucristo ya etä ʼa dodijidawä wäyäö bufi çai doblaa lä cule.

16Jesucristo ya etä ʼa dodijidawä wäyäö quiliimi. Öjö tä ʼa nofi lä mölabou wejei bä lä cui, Yai Bada tä lofotenö bä bluca malä fucäamou wei. Judio bä lä cui, inaja bä nia yai fucäamou cuo balöoma. Judio bä lä mlai bä ma cui, inaja showawä öjö bä nia çai fucäamou mö feduo.

17Öjö etä ʼa dodijidawä lä cui jamö, Yai Bada tänö bämalecö nofi tabou fe lä yadio wei tä dablamous. Bäma tä ʼa nofi yai lä mölabou wei tänö, jai bamacö cadejewä waiquiwä bämalecö nofi tabou. Öjö tä shilonö. Yai Bada tä ʼa oni lä cuu weinaja showawä. Abenaja tä ʼa cuu. Cama a nofi mölabouje yalo, jai bä cadejewä waiquiwä Yai Bada tänö bä nofi tabou. Öjö bä lä cui bä nia shilo yai demi cuo. Einaja tä ʼa cuu.

18Wälidiwä tä bluca lä cule tä ja Yai Bada tä nö wälöwä lä jushuo wei, fedu jamö culanö etä wawäblou. Wälidiwä talewä bä lija a jushuo, bä doblou lä mlai bä lija. Wälidiwä tä lä taö wejei tänö, bejedi tä ʼa lä cui tä ʼa jilia doblamaimije.

19A jushuobä lä. Yai Bada tä lä cule tä malä wawädoi. Bä bufi jaducäblobä cäbä. Bä bufi jaducäblamabä, cama a mayo dablamous malä waiquio wei.

20Öjö tawä? Bei tä yai dablamous ma mlai ma cui, ulufi a jödödöwä lä tablaleno wei tä ja bä bufi jaducäblou dao. Täbä lä tablaleno wei täbä ja, a lofote shi lä wälili wei etä dablamous. A yai bufi blamobä etä çai dablamous. Öjö cudeenö bä ʼa jole mojudumobä etä cuami waiquiwä.

21Yai Bada tä ma dano wejei ma cui, “Öjö a yai bufi blamobä a”, bä bufi cunomi. Öjö lija bä ma bayeliblamous wei ma cui, bä bufi ʼafa doblalou çai wäyämonomi. Tä nowa lä mlai tä ja, bä bufi shilo cuaablalou bädaoma. Bä bufi dao fa mlacunö, bä bufi mö dödölayoma.

22Bä bufi ʼafa jaducäwä ma taolanö bä bufi mojudublaliyoma.

23Yai Bada tä cua shi lä wälile tä ma doblao wei ma cui, öjö tä fa wailöjenö, yanowamö täbä nö yai ijidubö bufi blaö majöomaje. Yalo bä nö ijidubö çai. Bä lä yäö wei bä nö ijidubö çai. Bä lä joleaö wei bä ma cui, öjö bä nö çai ijidubö bufi blamaje.

24Öjö cudeenö yacumö bä nowamanomi majöwä. Showadi bä nofi beshili jushuadima yalo, wälidiwä tä ja bä noshi öjödaboma, bä nofi yai jushublalodibä. Bä yai wälidiamayodibä.

25Yai Bada tä jamö tä ʼa bejedi lä cule tä ʼa fa wailöjenö, jole tä ʼa shilo yai bufi blaö majöomaje. Täbä bluca lä tablaleno wei a lä cui a nofi doamou shi wälilibä, öjö a waiquiwä. Inaja lä tä cuobä. Öjö ma cui, Yai Bada lija bä möfe bolanö a wäfa doblao

tanomije. A nosie çai fuanomije. Täbä lä tablamono wei täbä lija bä möfe bolanö, öjö täbä afa shïlo yai doblao taö dicoomaje. Öjö bä shïlo yai bufiblaö dicoomaje.

²⁶Öjö cudeenö bä bufi läablalou mlai ja, bä nofi yai jushublalodibä Yai Bada tänö bä noshi öjödabou majöoma. Bä feyalobö sho cäcöbä cuaaö mlai ja, ai suwä a mö feduwä sho cäcöbä cuaabä bä li suwä cuaaö dicooma.

²⁷Walo bä ma cui inaja bä cuaaö mö feduoma. Bä suwäbö sho cäcöbä cuaaö mlai ja, ai walo a mö feduwä sho cäcöbä cuaabä bä yai icuo shi jalimou dicoblaoma. Bä bufi quilijobä etä ma cuono wei ma cui bä bufi quilijonomi. Öjö cudeenö bä nofi lä jushublalou wei tä lä cui, Yai Bada tänö etä nowa yuaö cadidioma, bä nö bleaabä.

²⁸Yai Bada a nofi jaducäbou bufionomije. Öjö cudeenö wälidiwä tä ja bä bufi cudiobä, Yai Bada tänö bä noshi öjödabou cadidioma, wälidiwä tä tabeje.

²⁹Wälidiwä tä bluca lä cui ja, showadi bä doblou fa mlacunö bä doblonomi. Bä bufi shïlo waiyodima. Bä nö shïlo nabämoma. Ai täbä dodijaö ayao ja, showadi bä jushuoma. Bä shäyoma. Bä ishousi ijejeadaloma. Bä jolemoma. Bä nofi wälaiyoma. Ei bä lä cui bä shïlo wanomodii.

³⁰Bä afa wayoayou. Yai Bada tä nö çai nabämaöje. Täbä afa çai dobroimi taöje. “Camiyä cä yai”, bä bufi cuu. Cama bä nofi doo. Wälidiwä tä ja bä bufi shïlo daeodii. Bä föö ebä nosie fuaimije. Bä nöö ebä nosie çai fuaimije.

³¹Bä bufi çai daomi. Bä a cadidou mlai ja bä a shïlo shomiaö majöö. Täbä nofi çai ojoboimije. Bä bufi çai asiomi.

³²Öjö tawä? Inaja bä lä cuaaö wei Yai Bada tänö bä nia lä nomamaö wei tä ma daö wejei ma cui, bä shijiloimi. Wälidiwä tä taö mö lä feduo wejei bä lä cui, öjö bä nofi çai doablaöje.

Romanos 2

¹Ai wama bä lä jimaö wei däjä, cafä wamacö ma cui wamacö çai jimamou mö feduo. Ai wama bä nö bleaamaö lä bufio wei däjä, cafä wamacö ma cui wamacö çai waimamou mö feduo. Wama bä ma jimaö wei ma cui, inaja showawä cafä wamacö çai malä cuaaö wei.

²Inaja bä lä cuaaö wei bä lä cui, Yai Bada tänö bä nö bleaamabä bä li waiquiwä.

³Wedinaja wamacö bufi yai li cuu? Inaja showawä cafä wamacö cuaaö mö ma feduo wei ma cui, çai bei wama bä nia li jimaö? Öjö wama bä jimaö däjä, Yai Bada tänö cafä wamacö nö bleaamaö mlai ja, öjö bä nö nia li bleaamaö ayao daanö?

⁴Yai Bada tänö dodijidawä wamacö tabou yalo, çai bei wamacö li waiteliblou da culanö? A bufi asimou yalo, a nö dao balöö yalo, çai bei wama a nö quili taimi? Wamacö bufi nofi jaducäwämi yai. Dodijidawä Yai Bada tänö wamacö lä tabou wei tä ja, wamacö bufi jaducäblobä tä ma cui, wamacö bufi mö çai yabajadobä tä ma cui, “Inaja yamalecö taamaö bufi doblao”, wama a nofi taboimi waiquiwä.

⁵Wamacö bufi jifua lä dicole tänö, wamacö bufi mö yabajadou fa mlacunö, cafä wamacö nö bleaamamou dicoquei. Yai Bada tä nö wəlowä lä jushudou wei etä wawəblou dǎjä, wamacö nö nia lä bleaaö wei wama tä balamaö dicoa lä cule. Täbä jimaö dǎjä a nia yai bejedimou.

⁶Ǫjō tawä? Jödödöwä täbä nia malä jimaö wei. Wəlidiwä tä lä tamou wei tä ma cui, dodijidawä tä lä tamou wei tä ma cui, cama etä cadidiwä ja tä nowa nia bluca cəamamou.

⁷Ai bä lä cuinö bä nia lä bəlimiblou wei tä shilo dayäaöje. Yai Bada tänö bä nia lä doblamabodayou wei tä çai. Wawədowä bä nia lä tamabou wei tä çai. Ǫjō bä lä cui Yai Bada tänö bä nia bəlimiblamaö.

⁸Ǫjō ma cui bä ʔ shilo lä lämou wei bä lä cuinö, tä ʔ lä bejedi wei tä ʔ jiliaimije. Wəlidiwä tä jamö bä luluamou. Yai Bada tä nö wəlowä lä jushuo wei etä wawəblou dǎjä, Ǫjō bä nö nia yai bleaaö fe balojoo.

⁹Wəlidiwä tä lä taö wejei bä lä cui, bä nö nia yai bleaaö nö quiliaö. Bä bufi nia yai jaluaö. Judio bä lä cui, inaja Ǫjō bä nia yai cuaaö. Judio bä lä mlai bä ma cui, inaja bä nia çai cuaaö mö feduo.

¹⁰Ǫjō ma cui dodijidawä tä lä taö wejei bä lä cui, Yai Bada tänö Ǫjō bä nia doblamabodayou. Wawədowä bä nia dodijidawä çai tamabou. Bä bufi nia çai yanöcömabou. Judio bä lä cui inaja bä nia yai taamaö. Judio bä lä mlai bä ma cui, inaja showawä cama bä nia çai taamaö mö feduo.

¹¹Judio bä ma cui, judio bä lä mlai bä ma cui, bä jimaö fe usucubou.

¹²Ǫjō tawä? Judio bä lä mlai bänö Moisesi etä ʔ taboimije. Wəlidiwä tä taöje yalo, tä ʔ tabou mlalajenö bä nomaö shi wəlijio. Judio bä lä cuinö tä ʔ yai tabou ma cujei, wəlidiwä tä taö mö feduoje. Moisesi tä ʔ ja bä wasömamou fa mlacunö, Yai Bada tänö bä nia jimaö.

¹³Jai bä cadejewä waiquiwä, Yai Bada tänö bä nofi lä tabou wei bä lä cui, Moisesi etä ʔ jiliaö lä buo wejei tänö, bä nofi tabou malä mlai. Tä ʔ nofi yai lä cadidibou wejei bä lä cui, jai bä dodijidawä waiquiwä, Ǫjō bä nofi shilo tabou ayao.

¹⁴Judio bä lä mlai bä lä cuinö, Moisesi etä ʔ tabou ma mlai ma cujei tä lä dodijidai tä nö Ǫjōbäaöje. Bä bufi dao. Bä bufi dao ja lä, Moisesi etä ʔ tabou ma mlajei, ai dǎjä bä cadidou fe yadio.

¹⁵Moisesi etä ʔ ja bä cadidou fe lä yadio wei tänö, bei täbä bufi jamö tä ʔ cua lä ʔatole tä dablamou. Bä bufi dao lä. Tä nö wəlidiwä Ǫjōbäaöje yalo, ai dǎjä bä bufi quilijou. Tä nö dodijidawä çai Ǫjōbäaöje cudeenö, ai dǎjä dodijidawä bä cua.

¹⁶Ǫjō cudeenö Yai Bada tänö bä nia lä jimaö wei tä cublou dǎjä, Jesucristonö bä ʔ nö nia bluca wäamaö. Bä bufi cuaablalou lä ʔatoo wei tä fa wawəblamanö bä nia jimaö.

¹⁷Judio wamacö ʔfa jilou bufi doblao. Moisesi wama etä ʔ tabou yalo bei wamacö nia jəwa bayeliblamou. Yai Bada wama ecö ʔfa jilamou yalo wamacö nofi li doablamou.

18Yai Bada tänö tä tamaö lä bufii wei wama tä jowa daö. Tä yai lä dodijidai wama tä nofi jowa yaibou. Moisesi tä a ja wamacö jowa damamou.

19¿Öjö tawä? Bä lä jubäbö wei wama bä shalilamabä wamacö afa jole jilou. Mö didi tä jamö bä lä fuu wei wama bä çai jowa wacacamabou.

20Bä bufi jaduquemi lä waiquii wama bä cadidamabä wamacö çai jowa. Bä bufi jaducäwä lä mlai wama bä çai jowa damaö. Moisesi wama etä a tabou yalo, “Yama tä jödödöwä daö waiquiwä”, wamacö bufi jole cuu. “Yamacö bejedimou waiquiwä”, wamacö bufi çai cuu.

21Jao. Ai wama bä jowa lä damaö wei wamacö lä cui, ¿wedi tabä cafä wamacö yai li damamoimi, öjö lä? “Wamacö nia tomömoimi”, wama bä nowa lä taö wei wamacö lä cui, ¿inaja cafä wamacö cuaaimi?

22“Wamacö nia joleblaloimi”, ai wama bä nowa ma taö wei ma cui, ¿cafä bei wamacö inaja cuaaimi, öjö lä? Täbä nö ijidubö lä bufiblamou wei, wama täbä nofi jowa ma wälibou wei ma cui, ¿öjö lä täbä yafibö jamö, bei wamacö lucäo jatoomi daanö, wamacö tomömobä?

23Moisesi wama etä a tabou yalo wamacö nofi doo ma cui, wama tä a nofi cadidiboimi ja, Yai Bada wama a nö waiblamaö.

24Yai Bada tä a oni lä cuu weinaja showawä. Abenaja tä a cuu. Cafä wamacö dobroimi tä nowa ja, judio bä lä mlai bänö Yai Bada bei tä nö waibläö lä cudujei. Einaja tä a cuu.

25Yai Bada wama ecö jimamobä, judio wamacö mosi sicö joyamou. ¿Öjö tawä? Moisesi wama etä a nofi cadidibolanö, wamacö mosi sicö joyamou ja, wamacö bayeliblamou dao ma cui, wama tä a nofi cadidiboimi ja, tä nowa cuami waiquiwä. Wama tä a nofi cadidiboimi ja, jai wamacö mosi sicö joyamonomi, Yai Bada tänö wamacö nofi tabou.

26Inaja lä showawä, ai bä mosi sicö joyamou ma mlai ma cui, Moisesi etä a nofi cadidibouje ja, jai bä mosi sicö joyamolayoma, Yai Bada tänö bä nofi nia tabou.

27Öjö däjä bä mosi sicö joyamou mlalanö, tä a nofi lä cadidibou wejei bä lä cuinö, Yai Bada lija judio wamacö nia waimaö bufiije. Wama tä a oni ma tabou wei ma cui, wamacö mosi sicö ma joyamou wei ma cui, wama tä a nofi cadidiboimi.

28Judio bä yai lä cui bä mosi sicö joyamou bädao mlai ja, bä bufi bejedimou. Bä bufi bejedilanö bä li taamamobä Yai Bada tänö tä nabä li shimöquema.

29Yai Bada lija bä bufi yai lä cuo wei bä lä cui, öjö judio bei bä yai. Bä bufi cadidilanö bä mosi sicö lä joyamou wei bä lä cui, öjö bä shilo bejedimou. Bei bä taamamou buomi. Öjö bä lä cui, yanowamö täbä lija bä nofi doablamou mlai ja, Yai Bada lija bä nofi yai doablamou.

Romanos 3

- ¹Ja. Judio bamacö mosi sicö lä joyamou wei tä ja, ¿wedinaja bamacö bufi yai cubä, öjö lä? ¿Wedi tä ja judio bä afa yai bayeliblamou wäyämou?
- ²Wedi tä ja mlai, bluca tä cua. Abenaja balöwä. Judio bä yai lija Yai Bada bei tä a jibämoquema. ¿Öjö tawä?
- ³Bamacö nö badabö ai bä doblono ma mlai ma cui, cama bä li doblonomi. Bä a cadidou lä mlaono wei tänö, Yai Bada cama a wä nö lä wäono wei, öjö tä wälidiblamanomije. Showadi Yai Bada a wä cadidou.
- ⁴Öjö malä cui. Yanowamö täbä bluca ma jolemou wei ma cui, Yai Bada a wä cadidou showaobä a. Abenaja tä a oni malä cuu wei. Showadi wa wä shilo lä cadidou wei tä dablabeje wa. Wa ma jimaöje däjä, wa shilo bejedimou ayaobä cafä bei wa. Einaja tä a cuu.
- ⁵¿Öjö tawä? ¿Wedinaja bamacö bufi daeo li cuobä tä a? Wedinaja mlai. Ai bä jimamou fa mojonö, Yai Bada a wäfa dobloimi li taöje. Abenaja bä cuu dicoo. “Judio bamacö doblou lä mlai tänö, Yai Bada bäma a yai dodijidawä ma dablamaale ma cui, ¿wedi tabä bämalecö nö nia bleaamaö dicoo?”
- ⁶¿Öjö tawä? Ma, inaja bamacö nia cuimi. Judio bämalecö jimaö cadidio mlao fa cunoja, ai bä lä bälöblai bä jimabä a nö çai cuobö mlai.
- ⁷Ai bänö abenaja yamalecö wäno jowa taöje. “Bamacö jolemou da bädao”, yamacö jowa cuu. “Bamacö jolemou däjä Yai Bada bäma a nö yai öjöböamaö, a shilo bejedimou lä ayai a lä cui. Öjö däjä a nofi yai doablaöje. Öjö cudeenö bämalecö afa wälidiwä talewä tabä tä cuami”, yamacö jowa çai cuu. “Ma. Bämalecö nö bleaamabä tä cuami, Yai Bada bäma a nofi malä doablamaö wei”, yamacö jowa çai cuu.
- ⁸Abenaja çai. “Wälidiwä bäma tä taö da bädao, Yai Bada tä nofi nia lä doablamou wei tä dodijidawä waiquiwä”, yamacö jowa çai cuu. Yamalecö nö waiblaöje ja, inaja täbä jole cuu dicoo. ¿Öjö tawä? Inaja bä lä cuu wei bä lä cui, Yai Bada tänö bä nö bleaamabä bä li waiquiwä.
- ⁹¿Wedinaja dodijiwä tawä? Camiyä judio bamacö lija ¿Yai Bada tä Bufi nia asio ayao tawä? Ma, asiomi. Ya cuu malä waiquiofe. Judio bamacö ma cui, judio bä lä mlai bä ma cui, wälidiwä tänö bämalecö bluca lofotobou,
- ¹⁰Yai Bada tä a oni lä cuu weinaja showawä. Abenaja tä a cuu. A cadejewä lä waiquii, moli ma cui a cuami waiquiwä.
- ¹¹A bufi lä jaducäi a ma cui, Yai Bada lija a bufi lä daeo wei a ma cui, a cuami. Moli ma cui a cuami waiquiwä.
- ¹²Jödödöwä täbä bluca yaclälawayoma cä täbä. Bä nö bluca bleaaö. Dodijidawä tä lä taö wei, moli ma cui a cuami.
- ¹³Bä a lä faö wei tänö täbä shäblamaöje. Bä caficö a lä jolemou wei tänö täbä mölamaöje. Olu bä nacö wayu lä culenaja bä a wayu cuwä.
- ¹⁴Bä a faö wälidiwä. Bä wajäblabeje bä caficö fe lajowä.

- 15 Tābā shābeje bā mamicö bälöcöblalou.
- 16 Bā cuaabā jamö tā bluca wālidiblamaöje. Tābā nö beblalamaöje.
- 17 Bā yanöcöwā cuobā, tā çai daimije.
- 18 Yai Bada tā nö quili lä tamou wei tā ja, bā bufi çai cudou bādaomi. Einaja tā a cuu.
- 19 ¿Öjö tawā? Ei bāma tā daö. Moisesi etā a lä cui, judio bā lija tā a jibāmoquema, tā a fuabeje. Judio bā ma cui, judio bā lä mlai bā ma cui, wamicai bā bluca tabobā. Bā a fuo mlai ja, Yai Bada lija bā bluca jimamobā.
- 20 Moisesi tā a ja bā lä cadidou wei bā cua malä mlai, Yai Bada lija bā dodijidawā dablamobā. Moli ma cui a nia dabloimi. Tā a li fuaimi waiquiweje. Öjö tā a lä cui, bā nö wālidiwā öjöböamobā, öjö bei tā a.
- 21 Jai bā cadejewā waiquiwā, Yai Bada tänö bā nofi nia lä tabou wei, fei dājā tā a wawālayoma. Moisesi etā a ja bā lä cadidou wei tänö mlai. Öjö ma cui Moisesi etā a jamö bei tā a shīlo wawāa balölayoma. Yai Bada a wāno wāyālewā bā a oni jamö çai.
- 22 ¿Öjö tawā? Jesucristo a bejedi lä bufii wejei bā lä cuinö a nofi mölabouje yalo, jai bā cadejewā waiquiwā Yai Bada tänö bā nofi bluca tabou. Judio bā nia bayeliblaö ayao malä mlai.
- 23 Yanowamö tābā jödödöwänö wālidiwā tā taö malä cujei. Yai Bada tā doblao lä culenaja bā cuwā malä mlai.
- 24 Jesucristonö bā no comaquema yalo, no mlai ja Yai Bada tänö bā nofi ojobabou. Jai bā dodijidawā waiquiwā, fei dājā bā nofi tabou majöwā.
- 25-26 Yai Bada tänö Jesucristo a noshi öjödaboma, a shāmou läobā. Öjö a nofi fa mölabojenö, cama bei iyäbönö bā doblou lä mlai etā nowa mladou. ¿Öjö tawā? Cama Yai Bada tā nia cadejewā fa dablamonö, inaja a li cuaama. Jaba dājā tābā doblono ma mlai, a bufi asio fa balöonö, a bufi lämoma. Öjö ma cui fei dājā tā nowa yai tabou, cama a cadejewā dablamobā. Jesús a nofi lä mölabou wejei tänö, jai bā dodijidawā waiquiwā bā nofi tabou.
- 27 ¿Öjö tawā? Yai Bada tänö bāmolecö dodijidawā tabou yalo, ¿bāmacö nofi nia doo tawā? Bāmacö nofi doobā tā cuami. Bāmacö lä dodijaö wei tänö bāmolecö nofi tabou malä mlai. Jesucristo bāma a nofi lä mölabou wei tänö, jai bāmacö dodijidawā waiquiwā bāmolecö nofi shīlo yai tabou.
- 28 Abenaja bāmacö malä cuu wei. Moisesi etā a ja bā lä cadidou wei tänö mlai, Jesucristo a nofi lä mölabou wejei tänö, Yai Bada lija bā dodijidawā shīlo yai dablamos. Öjö tā shīlonö.
- 29 ¿Judio bā lija Yai Bada tā shīlo bufiblamobā a daanö? ¿Judio bā lä mlai bā lija a nia bufiblamoiimi? Judio bā lä mlai bā ma cui lija a bufiblamobā a waiquiwā.
- 30 Moli tā Yai Bada malä cule. Bā mosi sicö lä joyamou wei bā lä cuinö, Jesucristo a nofi mölabouje yalo, jai bā dodijidawā waiquiwā bā nofi nia tabou. Inaja showawā, bā

mosi sicö joyamou lä mlai bä ma cuinö, Jesucristo a nofi mölabouje yalo, jai bä dodijidawä waiquiwä bä nofi nia tabou mö feduo.

31 ¿Öjö tawä? Jesucristo bäma a nofi lä mölabou wei tänö, Yai Bada lija bämacö dodijidawä dablou waiquiwä yalo, ¿Moisesi bäma etä ʘ nia oni joyaö majöo daanö? Mlaicätä. Fei dāja öjö tä ʘ lä cui bäma tä ʘ shılo yai bejedi jimaö.

Romanos 4

1 Judio bämacö nö badabö Ablaamö a lä cui, ¿wedinaja bäma a nofi nia yai tabou, öjö lä?

2 Ablaamö a lä dodijano wei tänö Yai Bada lija a dodijidawä dablou fa cunoja, cama a wafa dodijaö wäamobä tä nö cuobö wei. Yai Bada lija a wə nö fabö ma mlai ma cui, yanowamö täbä lija a wə fabä tä nö cuobö wei.

3 Öjö ma cui abenaja Yai Bada etä ʘ oni cuu. Yai Bada a wə fa jilimolunö, Ablaamönö a wə bejedi bufia showadaalema. Cama Yai Bada a wə bufiblamou fa damolalunö, jai a cadejewä waiquiwä bei a nofi Ablaamö tadaö showadalayoma. Einaja tä ʘ oni cuu.

4 ¿Öjö tawä? Bä lä ojodamou wei bä no ojode çamaöje ja, “No mlai ja wale dobäö”, bä nia cuimi. “Ya dobämou lä, ya malä ojodamono wei”, bä nia shılo cuu.

5 Öjö ma cui Yai Bada lija bämacö nia lä bayeliblamou wei, inaja bämacö nia cuimi. Cama bä lä dodijaö wei tä ja bä möläö lä mlai, Yai Bada tä nofi yai lä mölabou wejei bä lä cui, öjö bä nia shılo yai bayeliblamou ayao. Wəlidawä talewä bä ma cui, Yai Bada lija bä möläö cudeenö jai bä cadejewä waiquiwä bä nofi tabou. Öjö a lä cuinö, jai bä dodijidawä waiquiwä bä nofi tabou.

6 Bada tä David a ma cuinö, öjö tä ʘfa wäyäö balöoma. Jai bä cadejewä waiquiwä, Yai Bada tänö bä nofi lä tabou wei bä lä cui, bä nia jowa bayeliblamoma. Cama bä lä dodijaö wei tänö mlai.

7 Abenaja tä ʘ oni cuu. Bä doblou lä mlai, Yai Bada tänö etä nowa lä mladamaö wei bä lä cui, öjö bä bufi yai doblalobä cäbä, etä nowa tabou lä mlai bä lä cui.

8 Bada tänö etä nowa nia tabou lä mlai, bä bufi yai doblalobä cäbä. Einaja tä ʘ cuu.

9 Täbä ʘfa bayeliblamou lä wäyänö wei, ¿bämacö mosi sicö lä joyamou wei, bämacö nia shılo judio bayeliblamou ayaoma daanö? Ma, judio bä lä mlai bä ma cui bä nia çai bayeliblamou mö feduoma. Abenaja bämacö malä cuu wei. “Ablaamö a lä cuinö, Yai Bada tä nofi mölaboma yalo, jai a cadejewä waiquiwä Yai Bada tänö a nofi taboma.” Einaja bämacö cuu.

10 ¿Öjö tawä? ¿Wedinaja tä yai cuoma, öjö lä? Yai Bada tänö a nofi lä tabono wei, mosi sicö joyamou showao mlao dāja a nofi tabou showaoma. Mosi sicö joyamo fa balölönö mlai.

11 ¿Öjö tawä? Ablaamö mosi sicö joyamou showao mlao dāja Yai Bada a nofi mölaboma yalo, jai a cadejewä waiquiwä a nofi taboma. Öjö dāja, Yai Bada tänö a nofi tabou lä waiquile a nö öjöböamobä, mosi sicö li joyamaö bufima. ¿Öjö tawä? Jai

bä cadejewä waiquiwä Yai Bada tänö bä nofi tabou lä nodio wei bä lä cuinö, Ablaamö a nofi fjömaö nodiobeje, inaja a li taamaö balöoma. Öjö bä lä cui, bä mosi sicö joyamou ma mlai, Jesucristo a bejedi bufii cudeeenö bä nofi li tabou nomöjöö lä cule.

¹²Inaja showawä, bä mosi sicö lä joyamou wei bä ma cuinö, Ablaamö a bufi owäbouje yalo a nofi çai fjömaö nodio showaoje. Bä mosi sicö joyamou buomi. Bamacö nö badabö Ablaamö mosi sicö joyamou showao mlao däjä, Yai Bada a nofi mölabou lä showadaono weinaja, a nofi li mölabou cuo nodioje.

¹³Ablaamö lija Yai Bada a wä nö wäoma. Cama a ma cui, cama bä ijilubö ebä nodiwä ma cui, jödödöwä tä jamö ebä nia jowa bälöo lofotooma. ¿Öjö tawä? Moisesi etä a nofi cadidiboma yalo, ¿Ablaamö lija a wä nö wäoma daanö? Ma, a wä nofi yai mölaboma yalo jai a cadejewä waiquiwä a nofi fa tadalönö, a wä nö wäquema.

¹⁴Moisesi etä a lä tabou wejei bä lä cui, öjö bä nia shilo dobämou ayao fa cunoja, bamacö nö çai jole jole mölablalous buobö wei. Yai Bada tänö tä a lä wäqueno wei tä nö çai bejedi cublobö mlai.

¹⁵Moisesi bäma etä a fuaimi ja, Yai Bada bäma a jushuo lulubou. Öjö ma cui, tä a läa lä mlai jamö tä a waibeje tä cuami waiquiwä.

¹⁶Öjö cudeenö, Yai Bada bäma a wä nofi mölabou däjä bamacö li bayeliblamou. No mlai ja bämalecö nofi bluca fa ojodabonö, tä afa bayeli lä wäqueno wei tä a ja bamacö bluca bayeliblamobä tä malä cui. ¿Öjö tawä? Judio bä ma mlai ma cui, Ablaamö bäma a bufi lä owäbou wei bamacö nia bluca bayeliblamou, Moisesi etä a oni lä tabou wejei bä shilo mlai. Ablaamö a lä cuinö, Yai Bada a wä nofi lä mölabono weinaja, bäma a wä nofi mölabou lä nomöjöö wei bamacö ma cuinö, Ablaamö bäma a nofi bluca malä fjömaö wei.

¹⁷Tä a oni lä cuu weinaja showawä. Yai Bada tänö abenaja Ablaamö a nowa tama. Bluca bä bälöjou lä yaiblai bänö wa nofi fjöomabeje, çafä bä tablamalema. Einaja Yai Bada tänö a nowa tama, Ablaamö lija a lä bufiblamono wei a lä cuinö. Öjö a lä cuinö, nomawä bä ma cui bä demi jocädamaö ço. Täbä cua lä mlai täbä ma cui, cama a wänö täbä cublou.

¹⁸¿Öjö tawä? Ablaamö bä ijilubö ebä cublobä etä cuono ma mlai ma cui, Yai Bada tä a bejedi bufibou fe yadioma. “Ijluyä nodiwä bä lä cui bä fa blucablalunö, bä nia bälöjou yaiblamou”, a bufi cuu cadidio showaoma, Yai Bada tä lä cuno weinaja showawä. Abenaja Yai Bada tänö a nowa tama. Inaja ijilufä bä nia bluca nodiwä cublou. Einaja a nowa tama.

¹⁹¿Öjö tawä? Ablaamö a ma wälobadaono wei ma cui, a möläö showaoma yalo a bufi lofotoo fe yadio showaoma. Bä ijilubö e taabä etä çai cuonomi. Lasha 100 a jayumaö ajedeo waiquioma. Bä suwäbö Sara a ma cui, a shibönabödalou fa mlacunö a ijilubö cuonomi showawä. Öjö ma cui, Yai Bada tä a nofi mölabou cadidio showao fe yadioma.

²⁰Yai Bada tänö tä ʘ lä wäqueno wei tä ʘ ja, “Shädayai”, moli ma cui a bufi ʘai ʘunomi. A nofi lä mölabou wei tä ja, a bufi yai fa lofotoblalunö, Yai Bada tä nofi doablama.

²¹“Camiyä lija Yai Bada tänö tä ʘ lä wäqueno wei, tä taö dao lä”, a nofi tabou cadidioma.

²²Öjö cudeenö, a wʘ nofi mölaboma yalo, jai a cadejewä waiquiwä Yai Bada tänö Ablaamö a nofi tabou showadaoma. Inaja tä ʘ oni malä cuu wei.

²³¿Öjö tawä? Ablaamö a nofi lä tabono wei tä ʘ lä cui, cama a wʘfa wayoamou bädao mlai,

²⁴camiyä bamacö ma cui bämalecö ʘfa ʘai wayoaö mö feduo showaoma. Bada tä Jesús a demi jocädamaö lä ʘlayono wei a lä cui, öjö bama a bejedi bufi yalo, bämalecö nofi ʘai tabou mö feduo.

²⁵¿Öjö tawä? Camiyä bamacö doblou lä mlai tä nowa ja, a shämolayoma. Jai bamacö dodijidawä waiquiwä Yai Bada tänö bämalecö nofi taböbä, a demi ʘai jocädou ʘoma.

Romanos 5

¹¿Öjö tawä? Jesucristo bama a nofi mölabou yalo, jai bamacö dodijidawä waiquiwä Yai Bada tänö bämalecö nofi tabou. Bada tä Jesucristo a lä cuaano wei tänö, fei däjä Yai Bada tänö yanöcöwä bämalecö ʘai cua lä cule.

²Öjö a lä cuaano wei tä nowa ja, fei däjä Yai Bada tänö showadi bämalecö nofi ojodabou. Cama a doblao lä culenaja bamacö nia cuo mö lä feduo wei tä ja, bamacö bufi möläö ʘai cua yalo, bamacö bufi doblalou.

³Öjö bädawä mlai, bamacö nö lä bleaaö wei tä ma cui ja, bamacö bufi ʘai doblalou fe yadio. Bamacö nö lä bleaaö wei tä showawänö, bamacö nö wʘlojaö dablou malä cui.

⁴Bamacö nö lä wʘlojaö wei tänö, Yai Bada bama a bufi doblamabou. Bama a bufi doblamabou yalo, bämalecö nia lä dobäö wei tä ja, bamacö möläö showao.

⁵Bamacö möläö lä showale tä ja, bämalecö nia mölamaimi. Yai Bada tänö bämalecö malä nofimaö wei. Camiyä bamacö lija a Bufe lä jibämobeno wei tänö bama a nofimu daö.

⁶Bamacö nö bayeliblamobimi waiquiwä tä cuo däjä, Cristo a shämoa lälayoma. Yai Bada tänö a taamaö lä bufiono wei däjä, öjö däjä showawä a shämolayoma, bamacö doblou lä mlai bämalecö bayeliblabä.

⁷Inaja yanowamö täbä nö cuaabö mlai. A bejedimou daö lä dodijio wei a ma cui, öjö a bayeliblabeje bä nia shämo läo si ijejeomi. Cui. A showadi lä dodijaö wei a bayeliblabä, ai a shämo ojodaa ʘatoquei fa cui.

⁸Öjö ma cui camiyä bämalecö bayeliblabä, dodijidawä mlai, wʘlidiwä talewä bamacö yai cuo showao däjä, Cristo a shämoa lälayoma. Öjö tä lä cublaliyono wei tä ja, Yai Bada tänö bämalecö yai lä nofimaö wei tä jimöa cadidiquema.

⁹¿Öjö tawä? Jesucristo a nö iyä lä bleaamano wejei tä nowanö, fei däjä jai bamacö dodijidawä waiquiwä Yai Bada tänö bämalecö nofi tabou. Inaja bämalecö nofi tabou waiquia ja lä, Yai Bada tä nö wəlowä lä jushuo wei tä wawəblou däjä, bämalecö noshi nia yai umlabou.

¹⁰Yai Bada lija bamacö nö nabāmou showao däjä, bä Ijlubö e nomaa lä lälayo no wei tä ja, bämalecö nofi blamalema. Inaja a cuaama cudeenö, fei däjä Yai Bada tä sho bamacö nofi mayou majöa. Bamacö nofi mayou waiquilanö, bä Ijlubö e demi cua lä çole tänö bämalecö noshi nia yai umlabou.

¹¹Abenaja çai. Bada tä Jesucristonö bämalecö nofi blamalema yalo, Yai Bada lija fei däjä bamacö bufi yai doblalou.

¹²Yanowamö moli anö, wəlidiwä tä taö balöoma yalo, nomaö tä wawəblaliyoma. Bluca täbä wəlidiblou fa nodilonö, tä jödödöblaliyoma. Yanowamö bluca täbänö wəlidiwä tä taöje yalo, täbä jödödöwä nomablou cuaaö.

¹³Bejedi lä Moisesi etä ą cuo showao mlao däjä, wəlidiwä tä cuo showadaoma. Tä cuo showadaoma ma cui, Moisesi tä ą jibāamou showao mlao däjä, tä nowa wəlidiwä tabou jaöonomi.

¹⁴Öjö ma cui Moisesi a cuo showao mlao däjä, Adana a nojamö bä lä bälöono wei bä doblou fa mlacunö, bä bluca nomablou fe yadio showaoma. Adananö Yai Bada tä ą fuano lä mlainaja bä cuaaö shaliliono ma mlai ma cui, bä doblono malä mlai. Cristo a nia lä funo wei a lä cui, Adananö öjö a owəbou balöoma. Abenaja tä cuoma. Adana a lä cuinö, wəlidiwä tä jödödöblalema. Inaja showawä Jesucristo a mö feduwä lä cuinö, dodijidawä tä çai jödödöblaö mö fedulayoma.

¹⁵Öjö ma cui cəcöbä shomi mö feduwä. Jaba a lä cuinö täbä wəlidiblamalema. A fuu lä nomöjöono wei a lä cuinö, no mlai ja täbä yai bayelibou. ¿Öjö tawä? Yanowamö moli a doblou fa mlacunö täbä bluca nomama ma cui, fei däjä no mlai ja Yai Bada tänö bämalecö nofi bluca yai ojodabou. Jesucristo a wawäa fa nomöjölonö, no mlai ja bämalecö nofi fa ojodabonö, bluca bämalecö yai bayelibou fe balojoa.

¹⁶Öjö moli anö täbä lä wəlidimabono wei tä dodijidaono ma mlai ma cui, no mlai ja bämalecö fei däjä lä bayelibou wei tä yai dodijidawä. Öjö moli a doblou lä mlaono wei tänö, bluca bä waimolayoma. Öjö ma cui, bamacö bluca doblou nodio lä mlai, fei däjä bamacö yai bayeliblamou. Jesucristonö no mlai ja bämalecö lä bayeliblaö wei tänö, jai bamacö dodijidawä waiquiwä Yai Bada tänö bämalecö nofi tabou majöo.

¹⁷Yanowamö moli a doblou fa mlacunö, nomaö tänö yanowamö täbä bluca lofotoa showadalema. Öjö ma cui, ai a çai yanowamö moli mö feduwä lä cui, Jesucristo a lä cui, öjö a nö shilo yai wəlojama. Cama a lä cuaano wei tänö bamacö yai bayeliblamou, Cristo sho bamacö bluca bəlimi cuobä. No mlai ja bämalecö nofi fa ojodadalönö, jai bamacö cadejewä waiquiwä, Yai Bada tänö no mlai ja bämalecö nofi tabou.

¹⁸¿Öjö tawä? Moli a lä cui a jaba doblou fa mlacunö, yanowamö täbä bluca waimolayoma. Inaja showawä, ai a moli mö feduwä lä cui a fa bejedimonö, täbä bluca

bayeliblamou majöwä. Bä lä waimolayono wei etä nowa fa mladamalönö, bä bluca bälimiblamaö majöo.

¹⁹Yanowamö moli anö, Yai Bada a wä jaba fuaö lä mlaono wei tänö, wälidiwä talewä bä bluca tablamalema. Inaja showawä, ai a moli mö feduwä lä cuinö, Yai Bada a wä yai lä fuaö wei tänö, jai bä cadejewä waiquiwä bä nofi nia bluca tamabou majöo.

²⁰Täbä doblou lä mlai bä nö yai öjööamobä, Moisesi etä a jibämoquema. Öjö ma cui, täbä nö wälidiwä yai lä öjööamono wei däjä, Yai Bada tänö no mlai ja bä nofi shilo yai ojobabou showao ayaoma,

²¹bä bayeliblamou fe yadiobä. ¿Öjö tawä? Wälidiwä tänö täbä bluca jaba nomablou lä cuaano weinaja, inaja showawä täbä nofi lä ojobabou wei tänö, bä nia yai bälimi bluca cuo nomöjööma. Bada tä Jesucristo a yai lä cuaano wei tänö, jai bä cadejewä waiquiwä, Yai Bada tänö bä nofi nia tabou fe yadioma.

Romanos 6

¹Jaö. ¿Wedinaja bamacö cubä, öjö lä? Yai Bada tänö no mlai ja bämalecö nofi nia ojobabou fe yadio cudeenö, ¿wälidiwä tä ja bamacö nia cudio bädao daanö?

²Ma! Wälidiwä tä ja bamacö nia cudiommi. Wälidiwä tä ja bamacö luluamou çödao mlaobä, Jesucristo lija bamacö nomaa malä yädälalayono wei.

³Jesucristo lija bamacö lä yädäle bamacö lä cui, a lä nomalayono wei tä ma cui ja bamacö yädäa. Wama tä malä dale.

⁴¿Öjö tawä? Bämalecö fa yädamacönö, Cristo a nomabä jamö bamacö nomaa yädälalayoma. A nomawä lä didiqueno wejei jamö ma cui, bamacö çai didio yädäoma, a demi lä jocädono wei tä jamö bamacö çai yädäblou mö feduo showaobä. ¿Öjö tawä? Bä Fjö e lä doblale etä lofotenö a demi jocädamaö lä culayono weinaja, inaja showawä camiyä dude bämalecö çai tablamaö mö fedulayoma, bamacö showadi lä cuaano wei bäma tä bufiblaö çö mlaobä.

⁵A lä nomalayono wei tä jamö, cama lija bamacö yädäa waiquia ja lä, a demi lä jocädalalayono wei tä ma cui ja, bamacö nia yädäblou mö malä feduo wei.

⁶Ei bäma tä malä dale. Fii balitama tefi ja Jesucristo a lä shäleno wejei däjä, wälidiwä bamacö bufi lä cui, öjamö lä bamacö bufi çai shämoa yädälalayoma. Wälidiwä tä jamö bamacö showadi yädäo bufi lä doblao wei, bamacö bufi waiquidou showadaobä. ¿Öjö tawä? Wälidiwä tä ja bamacö luluamou çödaaö mlaobä.

⁷Täbä lä nomaö wei bä lä cui, wälidiwä tä ja bä luluamobä bä malä mlai. Bä fa nomalönö, bä nia lä cuaaö wei etä mladou showadao. Wälidiwä tä ja bä li fujebblamolayou.

⁸¿Öjö tawä? Inaja showawä, Cristonö bämalecö çai nomaa waiquilayoma ja lä, demi bämalecö çai nia cuo mö feduo. Inaja lä bamacö bufi cuu.

⁹Cristo a demi jocädou fa çolonö, a nomaö çödaaö mlaicätä. A nomabä ami.

10A nomaö däjä, wəlidiwä tänö bəmalecö lofotobou mlaobä a li nomalayoma. A nia nomaö çödaaimi. Fei däjä a demi lä cule Yai Bada tä bufi doblamabobä a li demi.

11Cafä wamacö ma cui, inaja showawä wamacö nofi tamobou mö feduobä. Nomawä anö, wəlidiwä tä nofi nö jaducəbobö lä mlainaja wamacö cuobä. Jesucristo lija wamacö cua yalo, cafä wamacö ma cuinö, Yai Bada wama a bufi çai doblamabou mö feduobä.

12¿Öjö tawä? Öjö cudeenö wəlidiwä tä ja bä noshi da umlao, wamacö bufi lä waiyou wei tänö wamacö icuamaö dicoo mlaobä.

13Bei wamacö mamocu ma cui, wamacö caficö ma cui, wamacö yömöcacö ma cui, wamacö lä bayucui bä noshi jödödöwä da umlao. Wəlidiwä wama tä tabä wamacömi. Yai Bada lija wamacö noshi yai öjödaobä. Wamacö nomabä wamacö ma cuono wei ma cui, bəlimi wamacö cuobä wamacö tablamalema. Öjö cudeenö wamacö yai bejedimobä, Yai Bada lija bä jödödöwä da jibäamo.

14Wəlidiwä tä lä cuinö wamacö luluao fe yadiobä wamacömi. Moisesi tä ʘ ja wamacö nosiemamobä wamacö malä mlai. Fei däjä Yai Bada tänö no mlai ja wamacö nofi lä ojobabou wei wama tä ʘ nofi shilo yai mölabou malä majöle.

15¿Wedinaja tawä? Moisesi tä ʘ ja bəmacö nosiemamobä bəmacömi cudeenö, fei däjä ¿wəlidiwä bəma tä nia shilo taö daanö? Yai Bada tänö no mlai ja bəmalecö nofi ojobabou waiquiwä yalo, ¿“Cuaaö buo”, bəmacö nia cuu daanö? Ma. Einaja bəmacö nia cuimi.

16¿Wama tä daimi daanö? Wamacö nosiemamobä, ai tabä lija wamacö noshi öjödao ja, wama bä nosie lä fuaö wei öjö wama ecö waiquiwä. Wamacö tabouje. ¿Öjö tawä? Wəlidiwä tä ja wamacö noshi öjödao dicoo ja, inaja showawä, wəlidiwä tänö wamacö tabou waiquiwä. Öjö wama ecö yalo wamacö nomaö shi nia wəlijio. Yai Bada wama a wə yai fuabä wamacö noshi öjödao ja, wamacö nia shilo yai bejedimou.

17Öjö ma cui, Yai Bada lija yamacö bufi ʘfa doblalou wəyämou. Wəlidiwä tä ja wamacö jaba nosiemamoma ma cui, fei däjä inaja wamacö cuaaimi. Yama tä ʘ lä wəyäö wei tä ʘ ja, wamacö damamou bufi fa doblaonö, öjö wama tä ʘ yai fuaö majöobä wamacö cublaliyoma.

18Wəlidiwä tä ja wamacö fa fujebəlamolunö, tä ʘ lä dodijidai tä ʘ ja wamacö nosiemamou majöobä wamacö cublaliyoma, wamacö bejedimobä.

19Wamacö bufi showadi lä cuaaö wei tä läa yalo, ya wə nia faö yaclämou, wamacö bufi jaducəblou fe yadiobä. ¿Öjö tawä? Bei wamacö mamocu ma cui, wamacö caficö ma cui, wamacö yömöcacö ma cui, shami tä ja, wamacö bluca lä bayucui wamacö noshi jaba öjödao balöoma. Wamacö wəlidiaö nö quiliama. Inaja wamacö jaba lä cuaano weinaja mlai, fei däjä wamacö lä bayucui Yai Bada tä lija bä noshi shilo yai öjödao da majöo, wamacö bejedimobä. Yai Bada wama ecö dodijidawä yaiobä.

20Wəlidiwä tänö wamacö tabou däjä, öjö tä ja wamacö nosiemamoma. Wamacö bejedimobä wamacö cuonomi.

²¹Öjö ma cui, öjö wama tä wälidiwä lä tano wei tä ja wamacö bayeliblamonomi. Wamacö lä cuaano wei tä ja, fei däjä wamacö bufi yai quilijou majöö. Inaja bä lä cuaaö wei bä nomaö shi wälili.

²²Öjö ma cui wälidiwä tä ja, fei däjä wamacö fujebliiyoma. Yai Bada wama a nosie yai fuaö majöobä wama ecö cublou fa nomöjölönö, wamacö yai bayeliblamou. Yai Badanö dodijidawä wamacö fa yaimacönö, bälimi wamacö cuobä.

²³Wälidiwä tä lä taö wejei tä nowa ja täbä malä nomaö wei. Öjö ma cui Bada tä Jesucristo lija bämacö bufi cua yalo, Yai Bada tänö no mlai ja bämalecö bayeliblaö, bälimi bämacö cuobä.

Romanos 7

¹Iba wamacö. Bada bä bälöö lä dodijio wei bänö tä ą läblamaöje däjä, bäma tä ą nosie fuabä tä ą läblamaöje. Bämacö demi cuo showao däjä, bada bäma bä nosie fuabä bämacö. Bämacö nomaö däjä bämacö shılo fujeblou.

²Suwä a lä cuinö, bä feyalobö e nofi lä tabou weinaja showawä. “Afä a waiquiwä”, bada bä cuu ja, bä feyalobö e ą nia showadi fuaö. Öjö ma cui, bä feyalobö e nomalayo ja, a wä lä fuaö wei etä nia çai mladou showadao.

³Öjö cudeenö, bä feyalobö e demi cuo ma showao däjä ma cui, ai a lija a cua majöblaquei ja, a wäfa nia joleblalou taöje. ¿Öjö tawä? Öjö ma cui bä feyalobö e nomaö däjä, öjö a wä lä fuaö wei etä mladaliyo. Öjö däjä, ai a lijamö a cuo ma majöö wei ma cui a wäfa nia tamoimi.

⁴¿Öjö tawä, iba wamacö? Inaja showawä, Moisesi etä ą jamö wamacö jaba ma cuono wei ma cui, Cristo a lä nomalayo wei däjä, wamacö nomaö çai yädäoma, cama lijamö wamacö yai cuo majöobä. A demi jocädamaö lä çolayo wei a lä cui lijamö wamacö cua majöa, wamacö lä bejedimou wei tänö, Yai Bada wama a dodijidawä dablamabä.

⁵Yanowamö täbä showadi lä cuaaö wei tä ja, bämacö cuo showao däjä, bämacö shijilodou bufio fa mlacunö bämacö doblonomi. Moisesi tä ą ma läono wei ma cui, öjö tä ą ja bämacö bufi shılo yai balaa dicolayoma. Bämacö lä cuaano wei tänö, bämacö nomabä tä cuoma.

⁶Öjö ma cui, Moisesi tä ą ja bämacö cuo mlaobä, fei däjä Yai Bada tänö bämalecö yai fujebliamalema. Öjö tä ą ja, bämacö nia nosiemamou çadaaimi. Täbä lä nomaoblou wei bä lä cui, täbä nosiemaö malä mlajei. Jaba tä ą mlai ja, fei däjä Yai Bada dude bäma tä ą nia shılo yai fuaö majöö, Yai Bada tä Bufinö tä lä jimale jamö bämacö yai cuobä.

⁷Jaö. ¿Wedinaja bämacö cubä, öjö lä? Moisesi etä ą lä cui, ¿bäma etä ąfa nia wälidiwä taö majöö daanö? Ma, bäma tä ąfa nia wälidiwä taimi. Öjö tä ą cuo mlao fa cunoja, ya wälidiwä nö öjöböamobö mlai. ¿Öjö tawä? “Wamacö bufi nia waiyoimi”, tä ą cuu mlao fa cunoja, ya bufi lä waiyou wei ya tä nö dabö mlai.

⁸Öjö ma cui, Moisesi ya etä ʼa daö yalo, ya tä wʼalidiwä lä didibole tä wawäblaliyo. Öjö däjä abenaja ya bufi cuu majöö. “Shädayai. Bejedi lä ya bufi yai waiyou fe balojoo dicoo”, ya bufi cuu majöö. Moisesi etä ʼa läo mlao fa cunoja ya nö öjöböamobö mlai.

⁹Moisesi ya etä ʼa daö showao mlao däjä, ya mojadi li cudalou balöoma. Öjö ma cui, öjö tä ʼa ja ya bufi fa jaducäblalunö, wʼalidiwä tä ja ya bufi mö blucablou dicolayoma. Ya nia nomaö shi lä wʼalii wei, ya tä daa majölalema.

¹⁰Demi bamacö cudiobä tä ʼa ma cuono wei ma cui, öjö tä ʼa showawänö, ya nia nomaö shi lä wʼalii wei tä yai wawäblaliyoma.

¹¹¿Öjö tawä? Ya tä wʼalidiwä lä didibole tänö wale mölamalema, Moisesi tä ʼa ja. Ya nia lä bayeliblamou wei ya tä bufima ma cui, ya nia lä nomaö wei bei ya tä daa majöa dicolalema.

¹²¿Öjö tawä? Moisesi etä ʼa lä cui, tä ʼa li yaia. Yai Bada tänö tä tamaö lä bufii wei tä ʼa bluca yaia. Tä ʼa bejedi. Tä ʼa dodijidawä.

¹³Öjö ma cui, “Tä ʼa lä dodijidai tä ʼanö wale shälema”, ya cuimi. Ma. Wʼalidiwä tänö, öjö tä ʼa ja wale fa mölamalönö, wale yai shäa cadidilema. Öjö tä ʼanö, ya doblou lä mlai ya tä nö yai öjöböaö. Yai Bada tänö tä tamaö lä wasöö wei tä ja ya shijilodou lä mlai, ya tä yai wʼalidiwä dabraö.

¹⁴Moisesi etä ʼa lä cui, Yai Bada tä Bufinö tä ʼa jibämoquema. Öjö bama tä daö. Öjö ma cui, yanowamö bamacö doblou lä mlai, öjö ya. Wʼalidiwä tä ja ya jibämoquema. Öjö tänö wale lofotobou.

¹⁵Ya lä cuaaö wei tä ja, ya bufi yai wedinajamou. Ya tä taö bufi lä doblao wei ya tä taö malä mlai. Ya tä nofi lä wʼalibou wei tä ma cui, öjö ya tä taö fe yadio dicoo.

¹⁶¿Öjö tawä? Moisesi etä ʼa dodijidawä. Ya tä ʼa nö bejedi öjöböaö. Ya tä taö bufio lä mlai, ya tä taö si ijejewä malä dicoi.

¹⁷¿Öjö tawä? Ya tä taö bufi lä doblao wei tänö, ya tä taö ma mlai ma cui, bei ya bufi jamö tä wʼalidiwä lä läle tänö, wale bufi taamaö fa dicoonö, ya tä li taö.

¹⁸Ei ya tä malä dale. Yanowamö ya lä cui lija, tä lä dodijidai, wiisibö ma cui tä çai didiami. Dodijidawä ya tä taö bufi ma doblao wei ma cui, ya tä nö tabimi waiquiwä.

¹⁹Dodijidawä ya tä taö bufi lä doblao wei ya tä taö malä mlai. Wʼalidiwä ya tä taö lä moji wei, öjö ya tä yai taö dicoo, bei cä ya bufi wʼalidiwänö.

²⁰Ya tä taö lä moji wei ya tä taö fe yadio dicoo ja, ¿wedi mayo li? Camiyä ya cuaaö bufi lä doblao weinaja, ya cuaaö malä mlai. Ma, bei ya bufi jamö tä wʼalidiwä lä läle tänö, wale taamaö fa dicoonö, ya tä li taö.

²¹Showadi ei tä shilo dablamou. Dodijidawä ya tä taö bufi doblao däjä, wʼalidiwä tä lä cui tä lämou ajedeo.

²²Yai Bada tänö tä tamaö lä bufii wei tä ʼa ja, ya bufi malä doblalou wei.

²³Öjö ma cui, camiyä lija tä shomi lä didile, showadi ya tä lämou dablaö. Ya cuaaö bufi lä doblao wei tä ja, showadi a li läo. Wəḷidiwä ya tä lä didibolenö wale lofotobou.

²⁴Ya nö yai beblalodii. ¿Wedinö wale nia yai bayeliblaö, öjö lä, showadi ya lä cuaaö wei tänö ya nomaö mlaobä?

²⁵Wedinö mlai, ;Yai Badanö! Öjö lija ya bufi ɤfa doblalou wäyämou. Ya nö beblalou mlaobä, Bada tä Jesucristo lija ya bayeliblamou. ¿Öjö tawä? Abenaja camiyä ya cuwä. Yanowamö ya lä cui, wəḷidiwä tä ja ya wə fuobä ya waiquiwä ma cui, bei ya bufi dude lä cuinö, Yai Bada ya wə fuaö bufi doblao.

Romanos 8

¹Fei dājä Jesucristo lija bamacö lä yädäle, Yai Bada tänö bamacö nö nia bleaamaimi.

²Yai Bada tä Bufinö bamacö malä bayeliblaö wei. Jesucristo lija bamacö fa yädamacönö, dodijidawä bamacö li cua. Wəḷidiwä tänö bamacö ma lofotobono wei ma cui, nomaö tänö bamacö ɤai ma lofotobono wei ma cui, Yai Bada tä Bufinö bamacö fujebmlalema.

³¿Öjö tawä? Yanowamö bamacö showadi dobloimi yalo, Moisesinö tä ɤ ma lämaqueno wei ma cui, öjö tä ɤ ja, bamacö nö bayeli cublobimi waiquiwä. Öjö ma cui, Yai Bada tänö bamacö bayeliblaö fe yadioma. Cama bä Ijilubö e fa shimölödunö, e yanowamöblaleyoluma. Bamacö doblou lä mlai tä nowa ja, a shämou läobä. Bä Ijilubö e lija tä nowa mladamabä, a shämalema,

⁴bamacö cadidou fe yadiobä. Yanowamö täbä showadi lä cuaablalou weinaja bamacö fa cuaanö mlai. Yai Bada tä Bufinö bamacö yai cadidobä. Yai Bada tä Bufinö bamacö fa cadidofälönö, tä tamaö lä bufii wei bäma tä dodijidawä taö fe yadiobä.

⁵Yanowamö täbä showadi lä cuaablalou wei tä ja bä lä luluamou wei bä lä cui, yanowamö tä ɤ ja bä bufi shılo malä cuaablalou wei. Öjö ma cui, Yai Bada tä Bufi ja bä lä luluamou wei bä lä cui, cama Yai Bada tä ɤ ja bä bufi shılo yai daeou.

⁶¿Öjö tawä? Yanowamö täbä showadi lä cuaablalou wei tä ja bä lä luluamou wei bä lä cui, bä nia nomaö shi wəḷijio. Öjö ma cui, Yai Bada tä Bufi ja bä lä luluamou wei bä lä cui, bəḷimi bä nia yai cuo. Bä bufi nia yai yanöcöo.

⁷Yanowamö täbä showadi lä cuaablalou wei tä ja bä bufi shılo lä daeodii wei bä lä cuinö, Yai Bada tä nofi wəḷibouje. Yai Bada tänö tä tamaö lä wasöö wei tä ja, bä shijilodoimi. Bä nö shijilobimi waiquiwä.

⁸Yanowamö täbä showadi lä cuaaö wei tä ja bä lä culenö, Yai Bada tä Bufi ɤai doblamabout daomije.

⁹Öjö ma cui, Yai Bada wama a Bufi bejedi tabou ja, yanowamö täbä showadi lä cuaaö wei tä ja wamacö luluamoimi waiquiwä. Öjö lija wamacö bufi yai luluamou. Cristo a Bufi tabou lä mlajei, cama ebämi waiquiwä.

- 10** Öjö ma cui Cristo wama a tabou ja, Yai Bada tä Bufinö wamacö baḷimiblamaö. Waḷidiwä tä lä läle tänö, wamacö nia ma nomaö wei ma cui, jai wamacö cadejewä waiquiwä Yai Bada tänö wamacö nofi tabou. Öjö tänö, baḷimi wamacö nia cuo fe yadio.
- 11** Jesús a demi jocädamaö lä çolayono wei wama a Bufi tabou ja, wamacö ma nomaö wei ma cui, wamacö demi nia çai jocädamaö ço. Cafä wamacö lija Yai Bada tä Bufi lä bälölenö, wamacö nia inaja taamaö.
- 12** Öjö cudeenö, yanowamö täbä showadi lä cuaaö wei bäma tä nia bufiblaimi. Öjö bäma tä bufiblabä bamacömi. Inaja bamacö cuaabä bamacö mlai.
- 13** Yanowamö täbä showadi lä cuaaö wei wama tä bufiblaö ja, wamacö nia nomaö shi waḷijio. Öjö ma cui, yanowamö täbä showadi lä cuaaö wei tä lä cui, Yai Bada tä Bufinö wama tä mladamaö ja, baḷimi wamacö nia yai cuo.
- 14** Yai Bada tä Bufi ja bä bluca lä luluamou wei bä lä cui, öjö Yai Bada bei ijilubö ebä waiquiwä malä cui.
- 15** Yai Bada lija wamacö quili çodaabä a Bufi jibäonomi. Bada a wa fuamobä bä lä tabou wei bä lä cuinö, a nö quili taö lä culajeinaja mlai. Ma, wama a nofi föömaö cadidobä cafä wamacö lija a Bufi jibämoquema. “¡Fabe, Fabemi!”, bäma ecö cuu ja,
- 16** Öjö cama a Bufi showawänö, bämalecö bufi taamaö. Yai Bada bäma ecö nö ijilubö öjöböamaö.
- 17** Bä ijilubö bäma ecö waiquiwä ja lä, bämalecö befi lä taboladi täbä ja bamacö nia dobämodayou, Cristo a nia lä dobämou weinaja showawä. Cristo a nö bleaamaö lä cuaano wejeinaja bamacö nö bleaamaö mö feduoje ja, öjö sho bämalecö nia bluca doblamabodayou.
- 18** Abenaja ya bufi cuu. Bämalecö nö fei däjä lä bleaamaö wejei tä ja, “Shädayai”, bamacö nia cuimi. Tä nowa bolacami. Tä yai lä doblale, camiyä bamacö lija Yai Bada tänö tä nia obi lä jimadayou wei, öjö tä nowa shilo yai bluca.
- 19** Öjö tawä? Yai Bada tänö täbä bluca lä tablaleno wei, täbä nö bluca malä dablai. Yai Bada bä ijilubö bämalecö nia dodijidawä lä wawäblamaö wei, bufi shi jalimolanö tä nö dabouje.
- 20** Täbä bluca lä tablano wei täbä ma cui, täbä malä waḷidiblaliyono wei. Inaja cama täbä taamamou bufi fa doblaonö mlai. Yai Bada tänö täbä waḷidiblamalema ma cui, täbä nia obi dobladou lä çono wei tä ja, tä nö dao showaoma.
- 21** Täbä bluca lä tablamono wei, täbä nia bayeliblamou. Showadi täbä lä waçou wei tä ja, Yai Bada tänö bä nia fujebä, täbä inaja cuaaö çodaaö mlaobä. Bä ijilubö doblao ebä nia lä tabou weinaja, jödödöwä täbä lä tablamono wei täbä ma cui, bä nia bluca doblamabou mö feduo.

22Ei bäma tä daö. Täbä bluca lä tablamono wei täbä ma cui, täbä bufi bluca lamou çai nö beblalou mö fedua showaa lä cule, ijilu bä nini tabouje däjä bä ą nö nini dao lä culenaja showawä.

23Täbä bluca lä tablamono wei täbä bädawä mlai. Camiyä bämacö ma cui, Yai Bada tä Bufen ja bämacö jaba dobämou lä balöono wei bämacö lä cui, bämacö bufi nö çai bleaaö. Bä ijilubö bäma ecö nia lä doblaodayou wei bäma tä nö dabolanö, balimi bämalecö nia yai lä tablaö wei bäma tä nö çai dabolanö, bämacö bufi lamou çai nö bleaaö.

24Yai Bada tänö bämalecö lä fucäleno wei däjä ma cui, öjö tä ja bämacö malä mölano wei. ¿Öjö tawä? Bämacö möläö showaobä lä. Tä dablamou lä waiquile tä ja, ¿wedinaja bämacö möläö li cuo majöobä?

25Öjö ma cui, tä dablamou showao mlao däjä bämacö möläö ja, bämacö bufi yanöcölanö bämacö nö nia dao.

26Inaja showawä, bämacö bufi ujuduaö si lä ijejei bämacö lä cui, Yai Bada tä Bufenö showadi bämalecö çai bayeliblaö talei. Camiyä bämacö nö bayeli nacao doblou fa mlacunö, cama tä Bufen showawänö bämalecö nö bayeli nacaö. Yanowamö täbä caficö ą ja mlai, a wä Bufen yai cadidou showadao.

27Yanowamö bämalecö bufi lä dale a lä cuinö a wä jiliaö walalao. A nacou bufi lä doblao wei tä ą daö. Yai Bada bäma ecö nofi bäyääö däjä, Yai Bada tänö a wä famaö cuo lä bufio weinaja, a wä faö cadidou cuaaö showawä malä cui.

28Ei bäma tä daö. Tä cublou lä bädao wei tä ma cui, Yai Bada tänö tä fulii yalo, a lä nofimaö wejei bä lä cui bä bayeliblamou. Inaja Yai Bada tänö bä taamaö bufi doblao fa showaonö, bä nacama.

29Bä daö lä showadaono wei bä lä cui, bä Ijilubö e lä culenaja bä cuo mö feduobä, bä yaibou showadaoma. Bä Ijilubö jaba e lä cui e no jamö, ebä mashi bluca cuobä.

30Bä lä yaibono wei bä çai nacama. Bä lä nacano wei, jai bä dodijidawä waiquiwä bä nofi çai taboma. Öjö bä nofi lä tabono wei bä lä cui, bä doblaodayobä bä çai tablamalema.

31¿Öjö tawä? Bämalecö doblamabobä Yai Bada a cua waiquia ja lä, ¿wedinö bämalecö nia li doblamaimi majöo?

32Cama bä Ijilubö e ma cui, Yai Bada tänö a noshi umlabonomi. Bämalecö bluca bayeliblabä, a noshi malä öjödabono wei. ¿Öjö tawä? Bä Ijilubö e jibääö ojodao waiquioma ja lä, ai täbä bluca ma cui ja, bei bämalecö dobäa yailei.

33Cama bäma ecö lä yaile, jai bämacö dodijidawä waiquiwä, cama Yai Bada tänö bämalecö nofi tabou waiquia ja lä, ¿wedinö bämalecö ąfa nia li taö majöo?

34Bämacö doblou lä mlaono wei tä nowa ja, ¿wedinö bämalecö nö nia li bleaamaö? Jesucristo a shämou malä läono wei. A demi jocädou çoma. Yai Bada jayu boco mashi jamö, a loadayoa. Bämalecö nofi bäyäbou culadi.

³⁵Cristonö bämalecö nofimaö waiquiwä. Bämalecö nofimaö mladobä, tä cuami. Bämalecö ma yabäcaö wejei ma cui, bämalecö nia nofimaö showao. Bämalecö nö ma bleaamaö wejei ma cui, bamacö nö ofili ma bleaaö wei ma cui, bamacö didiobä bama sibä tabou ma mlai ma cui, inaja showawä. Bamacö ma shämou wei ma cui, bämalecö nabä ma queo wejei ma cui, inaja showawä. Bämalecö nofimaö waiquiwä.

³⁶Tä ʘ oni lä cuu weinaja showawä. Abenaja tä ʘ cuu. Afä yamacö cudeenö, showadi yamalecö shäo bufi doblaöje. Oweja bä nofi lä tabou wejeinaja, yamalecö nofi tabou mö feduoje. “Bä shämobä bä waiquiwä”, yamalecö nofi tabouje. Einaja tä ʘ cuu.

³⁷Ma. Inaja bämalecö ma taamaö wejei ma cui, bamacö nö wəlojaö fe yadiobä bamacö. Bämalecö yai lä nofimaö a lija bamacö bayeliblamou ja, bamacö nö yai wəlojabä bamacö.

³⁸⁻³⁹Ei ya tä malä dale. Bamacö ma nomablou däjä ma cui, bamacö demi ma cudio wei ma cui, ʘjele bä ma läblou wei ma cui, fecula bänö bämalecö ma yabäcaöje däjä ma cui, Yai Bada tänö bämalecö nofimaö lä waiquile tä ja, bämalecö fujebloö majöobä tä cuami waiquiwä. Tä fei däjä cublou lä bädao wei tä ma cui, tä nia obi lä cublou wei tä ma cui, ai tä lofote lää lä bädale tä ma cui, Yai Bada tänö bämalecö nia nofimaö showao. Fedu jamö täbä lä culadi täbä ma cuinö, ʘjomö jamö täbä lä cublai täbä ma cuinö, ai täbä lä tablaleno wei täbä bädawä ma cuinö, Yai Bada tänö bämalecö nofimaö lä waiquile tä ja, ʘjö lä täbänö bämalecö nia fujebblamaimije. Bada tä Jesucristo lä cuaano wei tänö, bämalecö yai nofimaö waiquia lä culadi.

Romanos 9

¹Ei ya wə lä cui ya wə bejedimou. Ya jolemoimi, Cristo ya e malä cui. Yai Bada tä Bufen ma cuinö wale bufi möö. Wale bejedimou daö.

²Ya bufi ʘquijou fe balojowä. Showadi ya bufi nö bleaadii.

³Iba mashi ya bä nofi ʘlijibou, Isaeli ebä mö feduwä lä cui. Shädayai. Camiyä ya waimou tä nowa ja bä bayeliblamou dao fa cunoja, ya nö waimou ojodaobö wei.

⁴Isaeli ebä nodiwä malä cui, Yai Bada tänö bä lä yaileno wei. Bä nofi ʘijilumama. ʘjö lä bä lija tä shij doblaö ʘai dablomoma. ʘjö bä lija a wə nö ʘai wäoma. Moisesi tä ʘ lä cui, ʘjö bä lija tä ʘ ʘai jibämoquema. Cama lija bä ajedobä tä ʘai jimöquema. Bä nia obi lä bayeliblamono wei tä ʘfa ʘai wäyö balöoma.

⁵ʘjö bama bä ʘfa nö ʘai badabö jayumaö showawä. Yai Bada tänö a shimabä a lä yaileno wei, cama ebä nodiwä lija a nia ʘai wawämama. ʘjö tawä? Yai Bada tä shijlo yai Bada lä ayai, a wə nofi yai doablamou shi wəlibä a. Inaja lä tä cuobä.

⁶ʘjö ma cui, “Yai Bada tä ʘ nö lä wäono wei, tä bejedi cublonomi”, bamacö nia cuimi. ʘjö tawä? Isaeli bä ijilubö nodiwä ebä ma bluca wei ma cui, ʘjö bä bluca bayeliblamobä bämi. Yai Bada lija bä bufi cua lä mlai, bä nofi taboimi.

⁷Inaja showawä, Ablaamö bä ijilubö nodiwä ebä ʘai ma bluca wei ma cui, ʘjö lija bä nodiblou lä bädao wei tänö bä nofi ʘai tamamoimi. Ablaamö lija Yai Bada a lä cuno

weinaja showawä. Abenaja tä ʼa oni cuu. Isaacö lija bä yai lä nodiblou wei, bä ʼafa nia sh̄ilo ijilufä jilamou. Einaja tä ʼa cuu.

⁸Abenaja. Ablaamö bä ijilubö ebä lä cui, Yai Bada tänö cama ebä nofi bluca taboimi. Ablaamö bä ijilubö e ʼafa yai wäyää lä balöono wei a Isaacö lä cui, öjö bä ijilubö ebä nofi yai sh̄ilo ibabou,

⁹Isaacö a wafa wäyää ja, a cuu lä balöono weinaja showawä. Abenaja tä ʼa oni cuu. Sara a fa shibönabölönö, obi ei a belibo cublou ço däjä bei ijilubö e nia tabou. Bejedi lä ya wä. Wafä a ijilu tabou däjä, ya nia fuu ço. Einaja tä ʼa cuu.

¹⁰Abenaja tä çai cuoma. Bamacö nö badabö Isaacö a lä cuinö, bä suwäbö Lebeca lija, ijilu cäcöbä lä ʼelequeblaliyono wei cäcöbä taquema. ¿Öjö tawä?

¹¹Cäcöbä tablaö showao mlao däjä, dodijidawä tä ma cui, wälidiwä tä ma cui, tä taböonomi. Tä taböö ma mlai ma cui, Yai Bada tänö cäcöbä taamaö lä bufiono wei tä daö showaoma. ¿Öjö tawä? Yanowamö täbä lä cuaaö wei tänö mlai, cama Yai Bada tänö täbä li bufii waiquiwä cudeenö täbä li cadidaö. Inaja tä cuoma yalo,

¹²Lebeca lija abenaja a cuma. Jaba a lä faö wei a lä cuinö, a faö lä yaule a nosie nia sh̄ilo fuaö. Einaja a cuma,

¹³ai tä ʼa oni lä cuu weinaja showawä. Jacobo ya yailema ma cui, Esau ya wailema. Einaja tä ʼa cuu.

¹⁴¿Öjö tawä? ¿Wedinaja bamacö cubä, öjö lä? “Yai Bada tänö täbä yaiaö cadidio daimi”, ¿bamacö nia cuu daanö? ¿A dodijaimi tawä? Ma, inaja mlai.

¹⁵Abenaja Moisesi lija Yai Bada tä malä cuno wei. Ya nofi asibou bufi lä doblao wei a lä cui, ya nofi asibou cuquei. Ya nofi ojobadou bufi lä doblao wei a lä cui, ya nofi ojobadou cuquei. Einaja a cuma.

¹⁶¿Öjö tawä? Yai Bada tänö täbä yanowamö lä yaiaö wei, cama bä yaiamou bufi fa doblaonö bä yaiamoimi. Cama bä nö lä walojoablalou wei tänö mlai. Yai Bada tänö täbä nofi ojobadou bufi fa doblaonö, bä li yaiaö.

¹⁷Tä ʼa malä cuu wei. Ejidoteli bada a wafa wäyää ja, abenaja Yai Bada a cuma. Öjö ma cui, cama lija ya lofote nia fa dablamonö ya li tabou. Ya lofote fa damolalunö, jödödöwä täbä lä bälöblai bä lijamö, wale ʼafa wäyää blaucobeje, ya li demimabou showaa bäa lä cule. Einaja a cuma.

¹⁸¿Öjö tawä? Täbä nofi asibou bufi lä doblao wei täbä lä cui, täbä nofi li asibou. Täbä bufi jifublamaö bufi lä doblao wei täbä bufi çai jifublamaö.

¹⁹¿Abenaja wa nia cuu dicoo daanö? “Camanö bämalecö taamaö fa bufinö bämalecö ma taamaö wei ma cui, ¿bämalecö ʼafa nia dobloimi taö majöblao? Cama lija bamacö noshi umlaobä, tä cua malä mlai”, ¿wa nia cuu tawä? Ma, cu dijä.

²⁰¿Cafä wedi bei wa wä li bashiwä? Cafä yanowamö wa ma cui, Yai Bada lija, ¿inaja bei wa wä nia fuo li cuaaö? Oshoboli a lä taö wei a lä cui lija, ¿cama oshoboli a wä

nia faö daanö? “Wedi tabä inaja bei wale tablaö li cua cule”, ¿oshoboli a nia cuu daanö?

21Oshoboli bolacabö cäcöbä lä tablaö wei a lä cuinö, ¿shi yaiabä ami? “A nofi yai oshoboli doablabeje, ei shinö ya nia tablaö”, a cubä a waiquiwä. “Ei shi mö feduwä lä cuinö ya tabou buobä ya nia tablaö mö feduo”, a çai cubä a showawä malä cui.

22¿Öjö tawä? Yai Bada tänö täbä yanowamö taamaö lä bufio weinaja täbä li taamabä a waiquiwä. Wälidiwä tä nowa ja, a nö wälöwä lä jushudou wei tä wawämaö ma bufio wei ma cui, a shi jalimoimi. A lofote dablamo bufi çai ma doblao wei ma cui. Täbä mö watäblamobä täbä ma cui, a bufi yanöcöo fe yadio balöoma,

23bämalecö nofi nia yai lä asibou wei tä yai wawäblobä. ¿Öjö tawä? Doblao bämalecö tabodayobä, yedu ja ma cui bämalecö nofi tabou showadaoma.

24¿Öjö tawä? Judio bämecö shïlo bädawä mlai, judio bä lä mlai bä ma cui, bämalecö bluca lä nacano wei, bämalecö nofi çai tabou balöo showaoma.

25Yai Bada a wano wäyälöwä Osea lija a lä cuno weinaja showawä. Abenaja tä a cuu. Iba bä cuono lä mlai bä lä cui, ya bä nofi nia ibaaö majöo. Öjö bä shomi bälöo lä yaiblai bä lä cui, ya bä jaba nofimano ma mlai ma cui, “Iba ya bä lä nofimale cäbä”, ya bä nofi nia tabou majöo. Einaja tä a cuu.

26“Iba wamacömi”, Yai Bada tänö bä nowa lä tano wei jamö, öjamö lä showawä, Yai Bada tä demi cua shi lä wälile bä ijilubö ebä afa nia jilamou.

27Isaia a ma cuinö, Isaeli ebä afa taö ja, a wä lofotoaama. Abenaja tä a oni cuu. Modu u casö jamö mlaca mlaca bä nö wabamobimi lä culenaja, Isaeli bä ijilubö ebä nodiwä cublou mö ma feduo wei ma cui, Yai Bada tänö bä noshi nia yai lä umlabou wei bä nia bolacamio dodijio.

28Bitä jamö bä lä bälöblai bä lä cui, Bada tänö bä nö bleaamaö däjä, lobe tä nia taö showadao. Einaja tä a cuu.

29Isaia a showawänö, ei tä afa çai wäyäö lä balöono weinaja showawä. Abenaja tä a oni cuu. Bada tä Bada lofote lä ayai tänö bämalecö nodiwä feiblamaö mlao fa cunoja, Sodomateli bä lä tablaleno weinaja bämalecö nö tablalebö wei. Comolateli bä lä cublaliyono weinaja showadawä. Einaja tä a cuu.

30¿Öjö tawä? Abenaja tä cublaliyoma. Judio bä lä mlai bä lä cuinö, Yai Bada lija bä bejedimou dablamo bä tä dayäano ma mlajei ma cui, tä daa bälalemaje. Jesucristo a nofi mölabouje yalo, fei däjä jai bä cadejewä waiquiwä Yai Bada tänö bä nofi tabou.

31Öjö ma cui, Isaeli ebä lä cui, Yai Bada lija bä bejedimou dablamo bä, Jesucristo a nofi mölabou mlajei ja, cama bä nia wabäoma. Moisesi etä a jamö bä nia cadidou fe yadioma. Bä nia ma cadidono wei ma cui, tä a nofi cadidibou doblonomije.

32¿Wedinaja bä li cuaaö fa dicoonö, bä li doblonomi? Wedinaja mlai. Bä bejedimou dablamo bä, Yai Bada tä nofi mölabono malä mlajei. Cama bä nia dodijaö fe fa

yadionö, cama bä nofi shïlo li mölamoboma. Jesucristo a shämou lä läono wei tä ja bä bufi jaducäblonomi yalo, jai maa ma jamö bä yudulayoma.

³³Yai Bada a lä cuno weinaja showawä. Abenaja tä ʘ oni cuu. Tä da möje. Isaeli ebä lä fuu wei, maa ma jamö bä mamicö fa difequionö bä yudubä, ya ma nia blaaö läo. Maa bada ma nia blao läo, täbä fa yudulunö täbä quebä. Öjö ma cui, täbä lä yudumaö wei a bejedi lä bufibou wejei bä lä cui, bä nö nia bleaaimi. Einaja tä ʘ cuu.

Romanos 10

¹Iba wamacö. Yai Bada lija bä fucäamobä, judio ya bä nö bayeli nacadii. Bä fucäamou fa cunoja ya bufi nö yai doblalobö wei.

²¿Öjö tawä? Yai Bada tä bufi doblamabobeje, tä dayäaöje. Ya bä daö yalo ya wʘ. Öjö ma cui, bä bufi jaducäa mlalanö tä li dayäaöje.

³Yai Bada tänö jai täbä cadejewä waiquiwä täbä nofi lä tabou wei tä lä cui, öjö tä nofi mojudoubouje. Cama bä nia dodijaö fe fa yadionö, bä nofi li mölamobou. Jesucristo a nofi mölabou bufiomi malä waiquije.

⁴¿Öjö tawä? A nofi nia lä mölabou wejei, öjö a Cristo waiquiwä yalo, Moisesi tä ʘ ja bä mölabä etä cuami. Cristo a nofi lä mölabou wejei tänö, jai bä dodijidawä waiquiwä Yai Bada tänö bä nofi nia shïlo tabou.

⁵Moisesinö tä ʘ oni taö balöoma. Cama etä ʘ ja bä lä bejedimou wei bä lä cui, öjö bä nia shïlo jöwa bʘlimi cuoma.

⁶Öjö ma cui, cama bä nia lä bejedimou wei tä ja, ai bä mölaimi waiquiwä. Yai Bada lija bä bejedimou dablamobä, Cristo a nofi yai mölabouje. Abenaja öjö bä bufi nia cuimi. Fedu jamö, ¿wedi a yai nia duofälöö? Ma, einaja bä bufi nia cuimi. “A fa duofälönö, Cristo a çai itou fa çöimanö, öjö bäma a wʘ yai jʘliabä”, bä nia cuimi. Abenaja çai mlai.

⁷Bä lä nomaö wei bä cuobä jamö, ¿wedi a nia li itou? Ma, inaja bä bufi nia çai cuimi. “Mashita çöjomö jamö a fa itolunö, Cristo a fa çöläcölönö, öjö bäma a wʘ yai jʘliabä”, bä nia çai cuimi.

⁸¿Wedinaja tä ʘ yai cuu, öjö lä? Abenaja. Wa nia lä bayeliblamou wei tä ʘ yai ajedewä waiquiwä. Wa tä ʘ wayoaö dao. Öjö tä ʘ ja wa bufi çai daeo dao. Einaja tä ʘ yai cuu. ¿Öjö tawä? Yama tä ʘ lä wäyäö wei, öjö tä ʘ li waiquiwä, Jesucristo a nofi mölabobeje tä ʘ lä cui.

⁹Bei wa caficönö Jesús wa wʘfa Bada wäaö ja, bei wa bufinö Yai Bada tänö a demi jocädamaö lä çölayono wei wa tä ʘ bejedi çai bufibou ja, wa fucäamou wä.

¹⁰Bei täbä bufinö tä ʘ bejedi malä bufibou wejei, jai bä dodijidawä waiquiwä Yai Bada tänö bä nofi tabobä. Bei täbä caficönö bä ʘ nö çai wäo, bä fucäamobä.

¹¹Abenaja Yai Bada etä ʘ oni cuu. A bejedi lä bufi wejei bä lä cui, bä nia möläö buomi. Einaja tä ʘ oni cuu.

12Yai Bada tänö judio bä nofi tabou ayao malä mlai. Judio bä ma mlai ma cui, bä nofi çai malä tabou wei. Judio bä ma cuinö, judio bä lä mlai bä ma cuinö, öjö a showawä a nofi Badabou malä cujei. Öjö lija bä nö bayeli bluca lä nacao wei bä bluca bayelibou fe balojowä.

13Abenaja tä a malä cuu wei. Bada tä lija bä nö bayeli lä nacao wei, bä nia bluca fucäamou. Einaja tä a malä cuu wei.

14Öjö ma cui a bejedi bufii lä mlajei a lija, bä nö bayeli nacaobä etä cuami. A wafa jilibou lä mlajei bä lä cuinö a nia çai bufiblaö bädaomije. Bä yömölabä a cuami ja, a wafa nia çai jiliaimije.

15Bä yömölabeye bä shimamoimi ja, bä nia çai yömölamou bädaomi. Abenaja tä a oni cuu. Dodijidawä tä a çai lä waloo wejei bä lä cui, bä yai dablamou dodijidawä fe balojowä. Einaja tä a oni cuu.

16Öjö ma cui, tä a lä dodijidai tä a ma jiliaö wejei ma cui, ai bä a fuomi. Isaia a lä cuno weinaja showawä. Abenaja tä a oni cuu. Bada tä. Yama tä a ma wäyää wei, yamalecö a bejedi bufiimje. Einaja tä a cuu.

17¿Öjö tawä? Cristo a wafa wäyääje ja, tä a nia shilo jiliaöje. Tä a jiliaöje ja, a nofi nia shilo mölabouje.

18Öjö ma cui, abenaja ya cuu. ¿Judio bänö bei tä a jilianomije daanö? Tä a malä jilileno wejei. Abenaja tä a oni cuu. Bluca bä lä bälöblai bä lijamö, tä a lä wäyääno wejei bä a blaucublaliyoma. Täbä bälöblawä lä jödödöblai jamö ma cui, bä a jiliamaje. Einaja tä a oni cuu.

19Abenaja ya nia cuu ço. Isaeli ebä lä cui, ¿bä bufi jaducäblonomi daanö? Yai Bada a wano wäyää ja, Moisesi a wä faö balöoma. Abenaja tä a oni cuu. Judio bä lä mlai bä lija wamacö bufi waiyobä, wamacö nia jowa tablamaö, cama bä dodijaö ayao ja. Wama bä bufi afa jaducäwämi lä taö wei bä lä cui lija wamacö nia jushudamaö. Einaja tä a cuu.

20Tä nö fa dedelönö, Isaia a wä çai waiteliblou nomöjölaiyoma. Abenaja tä a oni cuu. Yai Bada tä dayää lä mlajei bä ma cuinö a jowa dalalemaje. A wälino lä mlajei bä ma cui lija a çai jowa damolaliyoma. Einaja tä a cuu.

21Öjö ma cui, Yai Bada tänö Isaeli ebä afa wäyää ja, abenaja a jowa cuma. Bä shijiloblao lä mlai ya bä ajedemaö çobä, showadi ya boco ma dododalou wei ma cui, bä wasömamoimi. Einaja a jowa cuma.

Romanos 11

1Jaö. Abenaja ya nia cuu. Cama ebä lä yaileno wei, ¿Yai Bada tänö bä li waia majölema tawä? Mlaicätä. Camiyä Isaeli öjö lä ya e showawä malä cui. Ablaamö nodiwä ya showawä. Bejamino lija ya yai nodiblaliyoma.

²¿Öjö tawä? Yai Bada tänö cama ebä daö lä balöono wei ebä wai majöonomi. Yai Bada etä a oni jamö, Elianö bä afa lä wäyano wei, ¿wama tä a daimi daanö? Yai Bada lija Isaeli ebä afa wäyama.

³Abenaja tä a cuu. Bada tä. Cafä wa wano wäyalewä bä lä cui, bä shäalalemaje. Wa dobäbeje bä yalo lä maqueblaaö wejei täbä madofi ma cui, täbä wälialalemaje. Camiyä yami ya feiquia ma cule, wale çai dayäaöje, wale shäbeje. Einaja tä a cuu.

⁴Öjö ma cui, Yai Bada tänö ¿wedinaja Elia a nowa tama? Abenaja tä a cuu. Iba 7.000 ya bä feiquibou fe yadioma, Baala a jole lä bufiblamou wei a nö ijidubö lija bä möfe boo lä mlai. Einaja tä a cuu.

⁵Inaja showawä, fei däjä ma cui cama ebä feiquibou. Bä nofi fa ojadadalönö bä yailema.

⁶¿Öjö tawä? Bä nofi li fa ojadabonö bä li yailema, bä dodijaö fa dablanö mlai. Bä dodijaö fa dablanö bä yaiaö fa cunoja, “Bä nofi fa ojadabonö”, bamacö nö cubö mlai.

⁷¿Öjö tawä? ¿Wedinaja tä cublaliyoma, öjö lä? Isaeli ebä dodijidawä cuobä tä ma dayano wejei ma cujei, tä dablanomije. Yai Bada tänö bä lä yaileno wei bä lä cuinö, öjö bänö tä daa ma ayalaleno wejei ma cui, ai bä mö feduwä lä cui bä bufi shilo jifublaliyoma,

⁸Yai Bada etä a oni jamö tä a lä cuu weinaja showawä. Abenaja tä a cuu. Yai Bada tänö bä bufi mojudublamalema. Bä mamocu fubäböblamalema. Bä yömöcacö comablamalema. Fei däjä ma cui inaja bä cuwä showawä dicowä. Einaja tä a cuu.

⁹Nö badabö David a lä cuno weinaja showawä, Yai Bada lija. Abenaja öjö tä a oni cuu. Bä iyaö çai çocamobä jamö, “Dodijidawä yamacö cua waiquia”, bä bufi jole cuu. Bä mölaö showao däjä, ¿wa etä wälidiblamabä! ¿Wa bä nö bleaamaö majöobä! Bä doblou lä mlai, ¿wa tä nö bähälö tabä!

¹⁰Bä bufi möblou mlaobä bä da taama, bä çai yabäcamou nö bleaaö shi wälibä. Einaja tä a cuu.

¹¹Öjö cudeenö, abenaja ya cuu nomöjöö. Judio bänö Jesucristo a fa wailöjenö, jai bä yudulayoma bä cublaliyoma ma cui, bä bladio shi wälibä bämi. Jesucristo etä a wailemaje yalo, judio bä lä mlai bä lija etä a wäyämou majöa lä cule, bä fucäamobä. Shomi bä fucäamou ayao ja, judio bä bufi waiyou mö yabao çobä.

¹²¿Öjö tawä? Judio bä mili bayeliblamoma ma cui, Jesucristo a wailemaje yalo, jödödöwä täbä lä bälöblai täbä fei däjä yai bayeliblamou majöa lä cule. Bä doblou lä mlaono wei tänö, fei däjä judio bä lä mlai bä yai bayeliblamou. ¿Öjö tawä? Öjö ma cui judio bä nia yai obi lä dodijaö wei tänö, öjö däjä, ¿bejedi lä täbä nia shilo yai bayeliblamou dodijio!

¹³Bei. Jesucristonö wale shimölema yalo, cafä judio wamacö lä mlai wamacö lija, fei däjä ya wä faö majöa lä cule. Bamacö yömölabä wale lämabou yalo, bamacö yömölaö bufi doblaa malä cui,

14Jesucristo wama a nofi lä mölabou wei tä ja, iba judio bä mö feduwä lä cui ya bä bufi waiyamabä. Bä bufi lä waiyou wei tänö, ai bä bufi fa jaducäblalunö, bä fucäamou fe yadiobä.

15¿Öjö tawä? Yai Bada tänö cama ebä wailema yalo, judio bä lä mlai bä fei däjä nofiblamaö majöa. Öjö ma cui, Jesucristo yacumö a bufiblaö çoje däjä, cama ebä nia ajemaö ço. Bä ajemaö däjä, jai bä demi jocädamaö çolayoma bä nia cublou.

16Yai Bada lija, nii jïbä lä dodobou wejei jïbä yaio däjä, cama ai jïbä mashi lä cui jïbä mashi yaia mö fedua. ¿Öjö tawä? Judio bä lä cui, Yai Bada ebä cuo fa balöonö, fei däjä ma cui bä yaibou showawä. Yai Bada lija fii bei fi nasöcö yaia waiquia cudeenö, öjö bei lä fibä boco bluca ma cui, fibä boco yaia mö fedua showadaa malä cui.

17Judio bä lä cui, jai oliba fi lä döbolajei bä cuwä. Öjö fi bococu cäblamou lä culenaja bä çai taamamoma. Cafä judio wamacö lä mlai, shomi tefi bococu diclämaö lä culajeinaja, Yai Bada tänö wamacö li tablamaö mö fedulayoma, oliba fi nasöcönö wamacö dodijidawä cuobä. Inaja wamacö yädäa tamaquema yalo,

18oliba fi bococu lä joyamono wei wama fi bococu nofi nia wäliboimi. “Camiyä yamacö yai”, wamacö bufi cuu dicoo ja, ei tä nofi da jaducäläje. Fii wamacö fi bococu lä cuinö wama tefi nasöcö bayeliboimi. Öjö tefi nasöcö lä cuinö, cafä wamacö yai li bayelibou.

19Abenaja wamacö cuu dao. “Camiyä yamacö yädäobä tefi bococu malä joyaleno wei”, wamacö cuu dao.

20Bejedi lä. Tefi bococu cäblou lä culenaja, Jesucristo a wä bejedi bufii fa mlacujenö, bä li judio tablamolayoma. Öjö ma cui, cafä wamacö cua lä majöle, “Camiyä yamacö yai”, bä nofi tamamö dijä. Bä shïlo yai da moyaweicu. Jesucristo wama a nofi li mölabou yalo wamacö li cua majöa lä cule, öjö lä tä bädawänö.

21Oliba fi bococu yai lä cuono wei, Yai Bada tänö fi bococu cäblaö ojodaoma ja lä, cafä shomi wama tefi bococu lä dicläcäle wama tefi bococu nia çai cäblaö ojodao mö feduo.

22¿Öjö tawä? Yai Bada tänö dodijidawä täbä çai nia lä cuo wei tä ja, bä bufi da jaducäicu. Täbä nö lä bleaamaö wei tä ma cui ja. Bä doblou lä mlai bä nö bleaamaö ma cui, cafä dodijidawä wamacö çai cua. ¿Öjö tawä? Wama a wä bejedi bufii showalanö, dodijidawä wamacö nia çai cuo ma cui, wama a wä bejedi bufiimi majöo dicoo ja, fii fi bococu cäblamou lä culenaja wamacö nia taamaö majöo.

23Judio bä ma cuinö, Yai Bada tä bejedi bufii majöoje ja, bä nia yädäblamaö ço. Inaja lä bä tablamaö çobä Yai Bada tä lofote malä cule.

24¿Öjö tawä? Ulufi jamö oliba fibä cublawä lä bädainaja, judio wamacö lä mlai wamacö cuoma. Oliba fi döbou lä culajeinaja judio bei bä yai cua. ¿Öjö tawä? Fi yai lä döbou wejei fi colo jamö cafä shomi wamacö yädämaö fe yadio ja lä, cama fi yai lä döamou wei fi bococu cua waiquia cudeenö, öjö fi bococu nia yai yädäblamou si ijejeo. Cama fi bococu waiquiwä malä cui.

²⁵Iba wamacö. Yai Bada tänö tä a jöyabou lä balöono wei tä ja, bamacö nia mojudumaboimi. “Camiyä yai”, wamacö bufi jole cuaablalou dicoo mlaobä. Isaeli ai ebä bufi bluca ma jifuale ma cui, inaja bä bufi cuo shi wälibä bämi. Judio bä lä mlai, Yai Bada lija cama ai ebä bufi cuo showao mlao däjä, inaja judio bä li cuaaö balöo.

²⁶Yai Bada lija, cama judio ebä lä mlai bä bufi bluca fa cuicunö, Isaeli ebä bufi nia bluca jaducäblou nomöjöö, bä fucäamobä. Tä a oni lä cuu weinaja showawä. Abenaja tä a cuu. Täbä nia yai bayeliblaö lä läo wei, judio bamacö lija a nia wawäo. Jacobo bäma ecö doblou lä mlai tä nowa nia mladamaö. Einaja tä a oni cuu.

²⁷Abenaja çai. Bä doblou lä mlai ya etä nowa nia mladamaö. Ya wä nö wäo waiquiwä. Einaja tä a cuu.

²⁸Jesucristo dodijidawä etä a waiije yalo, Yai Bada lija bä nö nabämou majöblaliyoma. Cafä judio wamacö lä mlai wamacö fei däjä bayeliblamou majöobä, öjö tä cublaliyoma. Bä nö nabämou majöo ma cui, Yai Bada tänö bä yaia balölema yalo, bä li nofimaö fe yadio showawä. ¿Öjö tawä? Cama bä nö badabö nofimaö balöoma yalo, inaja showawä cama ebä nodiwä ma cui, ebä nofimaö cuwä mö feduwä.

²⁹Täbä nia lä bayelibou wei tä ma cui, cama ebä lä cadidiablalaö wei tä ma cui, Yai Bada tä Bufe nia shomiablalou majöo malä mlai.

³⁰Cafä judio wamacö lä mlai wamacönö, Yai Bada wama a wä jaba fuanomi. Fei däjä judio bänö a wä fuaimije yalo, cafä wamacö nofi li yai asibou majöa.

³¹¿Öjö tawä? Judio bänö fei däjä Yai Bada a wä fuaö ma mlajei ma cui, cafä wamacö nofi asibou lä majöono weinaja, inaja showawä cama bä ma cui bä nofi nia çai asibou cuo nomöjöö.

³²Yanowamö jödödöwä bä nofi asibou bufi doblao yalo, bä afa jödödöwä dobloimi taö malä cui.

³³¿Öjö tawä? Yai Bada tä Bufe yai jaducäwä fe balojowä. Tä bluca daö nö mlawä. Öjö tä ja ya bufi daeo däjä, “¡Joo yai!”, ya bufi shilo cuu. A cuaaö bufi lä doblao wei tä ja, cama a bufi shilo shalilidio ayao. Bämalecö lä taamaö wei tä ja bamacö bufi nö möblobimi waiquiwä.

³⁴Abenaja tä a oni malä cuu wei. Bada tä bufi lä cuaablalou wei, ¿wedinö tä bufi yai daö? Öjö a lä cui, ¿wedinö a li yömölabou?

³⁵¿Wedinö Yai Bada tä dobäo fa balöonö, tä nowa nia çamaö? Einaja tä a malä cuu wei.

³⁶Camanö täbä bluca malä tablaleno wei. Cama a showawänö täbä bluca li fuwäbou. Camanö täbä tabobä täbä. ¿Öjö tawä? Cama a wäfa shilo doblao tamou shi wälibä. Inaja lä tä cuobä.

Romanos 12

¹Öjö cudeenö, cafä wamacö lija ya wə fe blacäjodii, iba wamacö. ¿Öjö tawä? Yai Bada tänö wamacö nofi ojobadou fe balojoa yalo, öjö lija bä yai da jibäo. Cama lija yalo bä öshö dodobou lä culajeinaja, inaja showawä wamacö demi dodoo cuobä. Cama wama ecö yaiobä. Wama a bufi çai doblamabobä. ¿Öjö tawä? Inaja wamacö cuaaö ja, bufi bejedimolanö Yai Bada lija wamacö yai nia ojobadou.

²Yanowamö täbä bufi showadi lä cuaablalou wei tä ja, bä bufi luluamou dicoo dijä. Yai Bada tänö wamacö taamaö bufi lä doblao wei wama tä dabä, öjö lija wamacö bufi dude yai fa tablamolunö, bä bufi da shomiblalu. Tä lä dodijidai wama tä nö öjöbäbä. Yai Bada wama a bufi çai doblamabobä. Dodijidawä wamacö çai cuobä.

³Yai Bada tänö wale nofi fa ojobadonö, Jesucristo ya wəno wäyää cuaabä wale shimölema. Öjö cudeenö bämacö nowa bluca taö lä cule. ¿Öjö tawä? Cafä wamacö nofi lä tamoble tä ja, bä da bejedimou. Wama tä nö taö doblobimi ja, bä jolemou buo dijä. Yai Bada tänö wamacö taamaö bufi lä doblao wei, öjö wama tä nofi mölabolanö wamacö shilo cuaabä.

⁴Wa mamocu ma cule ma cui, wa imicö ma cule ma cui, wa caficö ma cule ma cui, inaja wa bayucuwä ma cuwä wei ma cui, wa moli showawä, ¿öjö tawä? Inaja wa lä cuwä wei wa lä cui, cafä wa bayeliblamobä öjö lä täbä li bluca.

⁵Inaja showawä, Cristo lija bämacö bluca yädaa yalo, bämacö li moli. Bämacö bluca nia lä bayeliblamou wei bämacö shomiblawä.

⁶Bämalecö nofi ojobadou yalo, bämacö nia lä bayeliblayou wei tä bluca ja, Yai Bada tänö bämalecö nö wəlojamaö cuaaö. ¿Öjö tawä? Jesucristo ebä lija wa etä ʔ wäyäbä wa waiquiwä ja, wa nö nia lä wəlojomadou wei wa tä nofi mölabolanö, tä ʔ yai da wäyä.

⁷Jesucristo wa ebä bayeliblabä wa waiquiwä ja, ebä da bayelibla. Yai Bada etä ʔ ja, wa ebä damabä wa waiquiwä ja, dodijidawä bä li da dama.

⁸Wa ebä yömölabä wa waiquiwä ja, dodijidawä ebä da yömöla. Afä täbä ja wa ebä bayeliblabä wa waiquiwä ja, bufi läablalou mlai ja, dodijidawä bä da bayelibla. Wa bada läobä wa waiquiwä ja, a nö da wəlojoicu, öjö lä, dodijidawä wa ebä çai cuobä. Jesucristo ebä nö lä bleaale wa bä nofi ojobabä wa waiquiwä ja, bufi doblalolanö bä nofi da ojobada.

⁹Bufi bejedimolanö bä bufi yai da nofimo. Wəlidawä tä nofi da wəliboje. Tä lä dodijidai tä da lofotoleje.

¹⁰Cama täbä bluca nofimayou lä culenaja, bä nofimayou da cuo. Dodijidawä täbä nofi çai wawadowä da taboje. Inaja lä wamacö yai showadi taamayobä.

¹¹Mojimou mlai ja, Yai Bada lija bä da ojobaicu. Bä bufi shi da jaliblalo. Bada tä nosie yai da fuaje.

¹²Yai Bada tänö wamacö nia lä bayeliblaö wei, bufi doblalolanö tä nö da daboje. Wamacö nö bleaabä tä cua ja, bufi yanöcöwä bä cuo fe da yadio. Yai Bada lija bä nö shilo bayeli da nacao.

¹³Jesucristo ebä nö fölili bleaaö ja, afa täbä ja bä da bayelibleje. Jesucristo ebä fama bälömabou bufi da doblaöje.

¹⁴Wamacö nö lä bleaamaö wejei bä nö bayeli da nacaje. Wama bä wajäblaö mlai, bä yai da bayelimaje.

¹⁵Bä bufi lä doblalou wei bä lija, bä bufi çai doblalou mö da feduo. Bä lä öcöo wei bä a nofi çai ojode da taje.

¹⁶Dodijidawä bä çai da cuoje. “Camiyä ya yai”, bä bufi çai cuu dicoo dijä. “Ma, öjö tä ja ya nö ojodamobimi”, bä nofi çai tamobo dijä. Bä çai jimamo dijä.

¹⁷Wa lä yabäcaö wejei bä lä cui bä çai taamaö mö feduo dijejä. Wamacö nia lä dodijaö wei tä ja bä bufi shılo da daeo, wamacö afa dobloimi taö mlaobeje.

¹⁸Dodijidawä wama bä çai bluca cuobä, bä wabäo fe da yadio. Wamicai bä da bälöo.

¹⁹Bämacö lä nofimale wamacö. Bä nö yuo dijä. Täbä doblou lä mlai täbä nö nia lä yuaö wei, öjö Yai Bada tä waiquiwä. Inaja lä tä cuobä. Abenaja tä a oni malä cuu wei. “Nö yualewä camiyä ya yai. Ya tä nowa nia çaoö”, Bada tä cuu. Einaja tä a oni malä cuu wei.

²⁰Cafä wamacö nö nia yuomi. Abenaja tä a çai oni cuu. Cafä wamacö lija a nö lä nabämou wei a ofäo ja, a da iyamaje. Dodijidawä a da bälömaboje. Wamacö nofimou lä ayao wei tänö, a bufi nia quilijou majöo. Einaja tä a oni cuu.

²¹Bä doblou lä mlai tä ja wamacö luluamou mlai, wamacö lä dodijaö wei tänö cama bä yai da luluboje.

Romanos 13

¹Bada bä lä läo wei, bluca wamacönö wama bä a nia fuaö. Yai Bada tänö bä lämaboimi ja bä nia läo bädao malä mlai. Bada bä lä läblai bä lä cui, Yai Bada tänö bä li inaja tamabou ja lä bä li läblawä.

²Öjö tawä? Öjö cudeenö, bada bä lija bä wasömamou lä mlai bä lä cui, Yai Bada tänö bä lä lämabole bä lija bä wasömamoimi. Öjö tawä? Bä wasömamou lä mlai bä nofi çai nacao.

³Bä lä dodijaö wei bänö, bada bä nö quili tabeje bä malä mlai. Bä doblou lä mlai bä quilibä, öjö bä li. Öjö tawä? Bada bä lija wamacö quili moji waiquiwä ja, bä shılo da dodija, öjö lä, wamacö afa yai dodijaö tabeje.

⁴Dodijidawä wamacö cuobä Yai Bada tänö bä malä lämabou wei. Öjö ma cui wamacö dobloimi ja, wama bä nö quili tabä öjö lä bä waiquiwä. Bä a faö bädao malä mlai. Yai Bada tänö bä bada li lämabou, öjö bä lija bä doblou lä mlai bä nö bleamabä.

⁵Öjö cudeenö wama bä a nia fuaö, Yai Bada wama a jushuo lulubou mlaobä. Wama bä a fuaö lä mlai tä ja, wamacö bufi çai shädayaimou mlaobä.

⁶Inaja showawä, dodijidawä wamacö cuobä bä li ojomamou yalo, blada bä lä nacaö wejei bä ma cui, wama bä çai nia jibäaö. Yai Bada tänö tä tamaö lä bufii wei tä malä taö wejei.

⁷¿Öjö tawä? Bada bä bluca lä cublai, wama bä nofi nia tabou. Bada bä befi bä blada lä nacaö wejei tä cua ja, wama bä nia jibäaö. Ai tä nowa nia lä nacaö wejei tä cua ja, inaja showawä. Dodijidawä wama bä ą jılıabä bä waiquiwä ja, wama bä ą nia jılıaö. Wawadowä wama bä nofi tabobä bä waiquiwä ja, wawadowä wama bä nofi nia tabou.

⁸Wama tä nowa çamabä tä cua ja, tä nowa çamaö da showadaoje. Ai tä nowa läa mlai ja, dodijidawä wamacö shılo yai nofimayobä. Cama ai ebä yai lä nofimaö wejei bä lä cuinö, Moisesi etä ą nofi bluca cadidibou waiquiweje.

⁹Yai Bada tänö tä tamaö lä bufiono wei tä ą jamö, abenaja tä ą oni cuu. Wamacö nia joleblaloimi. Yanowamö wama täbä nia shäimi. Wamacö nia tomömoimi. Wamacö bufi nia waiyoimi. Einaja tä ą cuu. Ai täbä ą bluca çai cua mö fedua. Öjö wama täbä ą bluca fuaö cadidio showadaobä, aifä wama bä nia nofimaö. Abenaja tä ą çai cuu. Cafä wa nofi folio lä culenaja, inaja showawä aifä wa bä nofi tabolanö wa bä nofimabä. Einaja tä ą çai cuu.

¹⁰¿Öjö tawä? Aifä wama bä yai nofimaö däjä, wama bä nia yabäcaimi. Öjö cudeenö, aifä wama bä yai nofimaö däjä, Moisesi wama tä ą nofi cadidibou.

¹¹Inaja wamacö yai cuaabä. Tä lä cuaale wama tä daö. Tä nö dedei waiquiwä. Jai wamacö midia wamacö cuo mlai, wamacö shılo yai laobä. Jaba däjä, Jesucristo bäma a bejedi lä bufiblaleno wei däjä, tä ajedeono ma mlai ma cui, fei däjä bämacö nia yai lä bayelblou wei tä ajedou lä cuimi.

¹²Mö didi tä mlaafälöö. Tä mö jalu a lä cuimi. Öjö cudeenö, mö didi däjä tä lä tamou wei tä ja, bämacö da waiquido. Bei bämacö bufi mö lä jalu wei tänö, bämacö yai da nowamö, bämacö nö walojaö fe yadiobä.

¹³Tä mö lä jaluimi tä ajedou yalo, bämacö fei däjä yai da dodija. Bämacö shi walımamou mlai. Bä shi walımamobä jamö bä shifilimou lä cuaaö weinaja, bämacö cuaaö dicoo mlai. Bämacö yabäcäo dicoo mlai. Bämacö ą çai läablalou mlai. Ai täbä dodijaö ma ayao däjä, bämacö jushuo dicoo mlai.

¹⁴Bada tä Jesucristo a shılo yai da owämaje, cama a lä dodijano weinaja wamacö cuaaö mö feduobä. Yanowamö täbä showadi cuaaö bufi lä doblao wei tä ja bä bufi daeo dijä, wamacö inaja cuaaö dicoo mlaobä.

Romanos 14

¹Jesucristo ai ebä lä cui bä bufi lofotemi. Bä bufi ma quilijou däjä, bä nofi tabou fe da yadioje. Wamacö ą läablalou mlai ja, dodijidawä bä çai da cuoje.

²Jesucristo ai ebä bufi lofote yalo, bä waio mlai ja täbä jödödöwä waö ma cujei, ai bä mö feduwä lä cui, bä bufi quilijou ja, yalo bä ja bä waio.

³¿Öjö tawä? Yalo wama bä waö lä ayao wei wamacönö, bä lä waio wei bä nofi wəlibo dijejä. Inaja showawä, wamacö lä waio wei wamacö lä cuinö, yalo bä lä waö wejei bä jima dijejä. Yai Bada tänö bä nofi tabou malä cui.

⁴Cafä wamacö lä waio wei wamacönö, ¿wedi tabä öjö bei wama bä li jimaö dicoo? Cafä wamacö nosie fuamobä bä malä mlai, wama bä dobroimi jimabä. Bä dodijaö ja, cama bada enö bä əfa dodijaö li tabä a. Bä dobroimi ja, öjö a showawänö bä dobroimi nia jimaö. Öjö ma cui, bä nia dodijaö fe yadio. Cama bada enö bä dodijidamabobä a waiquiwä malä cui.

⁵Bamacö bluca shomitawä mö feduwä. Ai bänö ai tä nofi jalu yaibouje. Ai bä mö feduwä lä cuinö, fe usucuwä tä mö nofi bluca jalu tabou mö feduoje. “Inaja ya yai cuaabä”, wamacö bufi cuu cadididou waiquiwä ja, bä li da cuaa.

⁶Tä nofi jalu lä tabou wejei bänö, Bada tä bufi doblamabobeje tä nofi li tabouje. ¿Öjö tawä? Yalo bä ja bä lä iyaö wei bä ma cuinö, inaja showawä. Bada tä bufi doblamabobeje bä li iyaö. Bä iyaö däjä, Yai Bada lija bä bufi əfa doblalou malä wäyämou wei. Bä lä waio wei bä ma cuinö, Bada tä bufi nia fa doblamabojenö, bä li waio. Yai Bada lija öjö bä bufi əfa doblalou çai wäyämou mö feduo malä cui.

⁷Bamacö demi cuo bufi lä doblao wei tänö bamacö demimi. Bamacö nomaö bufi lä doblao wei tänö bamacö çai nomaimi. Yai Bada tänö bämalecö yai tabou malä cui.

⁸Bamacö demi cua ja, Bada bäma tä bufi doblamabobä bamacö li demi. Bamacö nomaö ja, inaja showawä. ¿Öjö tawä? Bamacö demi cua ma showale ma cui, bamacö çai ma nomaö wei ma cui, Bada bäma ecö showawä.

⁹Bada a yai cuobä Cristo a malä nomalayono wei, a demi çai jocädou malä çolayono wei. Bamacö demi ma showai bamacö ma cuinö, bä nomaa ma waiquilayono wei bä ma cuinö, Jesucristo bäma a nofi bluca Badabobä a.

¹⁰¿Öjö tawä? ¿Wedi tabä cafä wamacö lä cuaaö weinaja, aifä bä cuaaimi ja, bei wama bä dobroimi li jimaö dicoo? ¿Wedi tabä wama bä nofi li wəlibou? Yai Bada tänö tabä jimabä jamö, bamacö nia bluca malä icuo wei.

¹¹Abenaja tä ə oni malä cuu wei. Abenaja Bada tä cuu. “Ei ya wə bejedi. Yai Bada ya malä cui. Camiyä lija bä möfe nia bluca booyoluu. Wale nofi doablabeje, bluca bä caficö ə nia faö.” Einaja tä ə malä cuu wei.

¹²¿Öjö tawä? Bamacö lä cuaaö wei tä ja, Yai Bada tänö bämalecö ə nö nia bluca wäamaö. Öjönö bämalecö nowa nia taö.

¹³Bämalecö nia yai lä jimaö wei tä cua waiquidayoa ja lä, bamacö jimayou da mlado. Bamacö nia yai lä doblamayou wei tä ja, bamacö bufi yai da cadido. Camiyä bamacö lä cuaaö wei tänö, Jesucristo ai ebä mö feduwä lä cui bäma ebä yaclämaö dicoo mlaobä. Bäma ebä bufi çai lä wedinajamomaö wei tänö bä dobroimi majöo mlaobä.

¹⁴Ei ya tä daö. Bada tä Jesucristo lija ya cua yalo, ya bufi shaliliwä waiquiwä. Bäma bä lä waö wei bänö bamacö bufi nia shamibloimi. Öjö ma cui, “Yai Bada tänö öjö bä

waö wasöö”, ai bänö bä nofi tabouje. “Shädayai”, bä bufi cuolanö bä iyaö fe yadio ja, bä bufi wälidiblou. ¿Öjö tawä?

¹⁵“Bamacö iyabä lä”, wamacö cuu fe yadiblou dicoo ja, wama bä bufi wälidiblamaö ja, nofimou wama tä taboimi waiquiwä. Bä bayeliblabä Cristo a ma nomalayono wei ma cui, yalo wama bä waö fe lä yadio wei tänö wama bä bufi wälidiblamaö dicowä. Inaja bä taama dijejä.

¹⁶Öjö cudeenö, abenaja ya cuu. “Tä dodijidawä waiquiwä”, wama tä nofi tabolanö wama tä ma taö wei ma cui, aifä bä bufi wälidiblama dijejä. Wamacö afa doloimi taö dicoo mlaobeje ya wä.

¹⁷Yai Bada tänö bämalecö dodijidawä çai cuobä, nii bä afa jayumamobä tämi. Toubä lä coaö wejei toubä çai mlai. Öjö täbä nowa cua malä mlai. Bamacö nia lä bejedimou wei, öjö tä nowa shïlo yai bluca. Bamacö bufi nia çai lä yanöcöo wei tä çai. Yai Bada tä Bufinö bamacö bufi nia çai lä doblalou wei tä çai. Öjö tä nowa shïlo yai bluca.

¹⁸Inaja bamacö yai cuaalanö, Cristo bäma a nosie lä fuaö wei tä ja, Yai Bada bäma a bufi nia yai doblamabou. Yanowamö täbä ma cuinö, bämalecö nia nofi çai dodijidawä tabouje.

¹⁹¿Öjö tawä? Dodijidawä bamacö nia lä yanöcöo wei bäma tä yai dayäabä, öjö lä. Yai Bada lija bamacö bufi nia lä lofotoamayou wei tä çai.

²⁰Yai Bada tänö cama ebä bufi bluca bayeliblaö. Yalo wama bä waö bufi lä doblao wei tänö, öjö tä wälia dijejä. Yai Bada tänö yalo bä waö wasöö ma mlai ma cui, wamacö lä iyaö wei tä ja, Jesucristo ai wama ebä yaclämaö dicoo ja, tä wälidiwä waiquiwä.

²¹Yalo wama bä lä waö wei tä ja, aifä bä yacläo dicoo ja, bä wa dijejä, öjö lä. Tä dodijidawämi. Nashiwä wama toubä lä coaö wei tä ma cui ja, bä yacläo dicoo ja, toubä çai coa dijejä. Wamacö cuaaö lä bädao wei tä ma cui ja, aifä bä yacläo ja, bä cuaa dijä, öjö lä. Tä dodijidawämi.

²²Wamacö nia lä iyaö wei tä ma cui ja, wama toubä nia lä coaö wei tä ma cui ja, öjö tä ja Yai Bada lija wamacö bufi cadidia ja lä, cafä bä da cuaa. Bufi quilijou mlalanö bä lä cuaaö wei, bä bufi shädayaimoimi yalo bä bufi yai doblalou.

²³Öjö ma cui, bä bufi quilijolanö bä iyaö fe lä yadio wei bä lä cui, bä nia doloimi jimamou. Yai Bada lija bä bufi lofotoa mlalanö bä malä iyaö wei. ¿Öjö tawä? Bamacö cuaaö lä bädao wei tä ma cui, Yai Bada lija bamacö bufi lofotoa mlalanö bamacö cuaaö dicoo ja, bamacö doloimi waiquiwä.

Romanos 15

¹Yai Bada lija bamacö bufi lofote lä waiquii bamacönö, bä bufi lä quilijou wei bäma bä bayeliblabä bamacö. Camiyä bamacö cuaaö bufi lä doblao wei tä ja, bamacö cuaabä bamacömi.

- ²Jesucristo ai bāma ebā bayeliblabā, bāma bā bufi shīlo yai da doblamabo, bā bufi lofotoobā.
- ³Cristo a ma cui, cama a cuaaō bufi lä doblaono weinaja a cuaano malā mlai. Bā Fjö e lija a lä cuno weinaja showawā. Abenaja tā ą cuu. Cafā wa nō lä waiblano wejei dāja, jai camiyā wale nō ąai waiblaō mö feduoma tā cuoma. Einaja tā ą cuu.
- ⁴Jaba dāja tā ą lä onimano wejei, camiyā bāmacō bufi jaducāblobā tā ą onimamaje. Bāma tā ą fa jīlilānō bāmacō nō wālojaō fe yadiobā. Bāmacō bufi fa lofotoicunō, Yai Bada tänō tā ą lä wāqueno wei tā ą ja, bāmacō mölaō fe yadiobā.
- ⁵Yai Bada lija bāmacō nō bayeli nacaō, bāmalecō nō lä wālojomabou wei a lä cui lija. Bāmacō bufi lä lofotomabou wei a showawā lä cui lija. Öjö lija wamacō yai bayeliblamobā. Jesucristo wama a fa owāmanō, cafā wamacō bufi bluca shaliliobā.
- ⁶Inaja wamacō cuaaō yalo, bluca wamacō ą showadawānō, Yai Bada wama a nofi nia doablaō, Bada tā Jesucristo bā Fjö e lä cui.
- ⁷Öjö tawā? Cristonō cafā wamacō nofi lä tabou weinaja, inaja showawā bā nofi da taboyo, wamacō lä dodijaō wei tänō Yai Bada tā nofi doablamobā.
- ⁸Wamacō bufi jaducāblobā ya wā. Jesucristo a lä cuaano wei, judio bāmalecō bayeliblabā a li cuaama, Yai Bada tā nō bejedi öjöböamabā. Bāmacō nō badabö lija tā ą nō lä wāqueno wei tā ą bejedi cublobā.
- ⁹Judio bā lä mlai bā ma cuinō, Yai Bada tā bufi lä asimou wei tā ja, a nofi ąai doablabeje. Tā ą oni lä cuu weinaja showawā. Judio bā lä mlai bā lijamō ya culanō, cafā bā nofi nia doablaō. Cafānō wale amowabō ą jīliadayobā. Einaja tā ą cuu.
- ¹⁰Abenaja ai tā ą oni ąai cuu. Judio wamacō lä mlai, Yai Bada ebā sho bā bufi bluca da doblalo. Einaja tā ą ąai cuu.
- ¹¹Abenaja ai tā ą oni ąai cuu. Judio wamacō lä mlai wamacō bluca lä cuinō, Bada tā nofi da doablaje. Bluca bā bälöblawā lä yaiblai bā ma cuinō, a nofi doablabeje. Einaja tā ą ąai cuu.
- ¹²Isaia a ma cui, a wā ąai fama. Abenaja tā ą oni cuu. Isai nodiwā bā lija a nia Bada bādou, jai fii fi nasöcō nia cabudu lä faō wei a lä cui. Judio bā lä mlai bā lijamō a läobā, a nia bādou. Öjö lija judio bā lä mlai bā nia mölaō. Einaja tā ą cuu.
- ¹³Bāmacō mölaō showaobā, showadi Yai Bada tänō bāmalecō bufi yai bayelibou. Öjö lija cafā bāmacō nō bayeli nacaō. Wama a nofi mölabolanō, wamacō bufi shīlo yai doblalobā ya wā faō, wamacō bufi shīlo ąai yanöcöobā. Yai Bada tā Bui lofotenō, showadi wamacō shīlo yai mölaō fe yadio showaobā.
- ¹⁴Iba wamacō. Cafā wamacō lija ya bufi doblalou. “Quiji bā nofi dodijaō yai”, bāmacō nofi tabou waiquiwā. Wamacō bufi yai dao. Wamacō yömölayobā wamacō.
- ¹⁵Öjö ma cui, bāmacō bufi nia jaducāblamaō fa ąonō, ya tā ą oniblaō lä cule. Yai Bada tänō wale nofi fa ojodadalönō, cafā bāmacō yömölabā wale tablamalema. Inaja wale tablamalema yalo, ya wā li lofotoaō.

16 ¿Öjö tawä? Judio bä lä mlai bä lija, Jesucristo ya etä ʘ dodijidawä wäyäbä wale tablamalema. Yai Bada ya wə dodijidawä wäyālanö, nofi bāyālewä bānō tābä nowamaö lä cuaaö wejeinaja, ya bä nofi bāyābou li cuobä. Yai Bada a dobäö lä cuaaö wejeinaja, inaja showawä, judio bä lä mlai bä ja, ya dobäö cuo mö feduobä. ¿Öjö tawä? Cama ebä cuobä, Yai Bada tä Bufinö bä fa yaimacönö, dodijidawä bä nofi nia tabou.

17 ¿Öjö tawä? Jesucristo lija ya cua yalo, Yai Bada lija ya lä ojodamou wei tä ja ya bufi doblalou. “Awei, einaja lä yai”, ya bufi cuu talei.

18 Öjö ya tä ʘfa shılo yai wayoadii malä cui. Judio bä lä mlai ya bä bufi taamabä, Cristonö wale nö wəlojomabou, cama etä ʘ yai fuabeje. Ya bä lä yömölaö wei tä ma cuinö, ya lä cuaaö wei tä ma cuinö, ya bä bufi jaducäblamaö talei.

19 Yai Bada tä Bufi lofotenö tä nö lä quilijii ya tä bluca wawämaö, Yai Bada tä mayo dablabeje. Inaja ya cuaaanö, Jelusaleteli bä ulufibö jamö ya fuu cuaaö fa balöonö, ya tä ʘ çai fuu shoqueaö cuaaö fa showadaofälönö, Ililico tä ulufi ma cui jamö Cristo dodijidawä ya etä ʘ wäyäö jödödou cuaama.

20 ¿Öjö tawä? Ya bä nia yai yömölaö lä cuaaö wei tä ja, ya bufi shaliliblou showalayoma. Cristo a wəfa jilibou lä mlajei jamö, Jesús ya etä ʘ nia dodijidawä wäyäö cuaaö showaoma. Tä ʘ wäyämou lä balöono wei jamö mlai. Yafi a colo taö lä waiquiono wejei jamö, ai bä yädäo lä bädao weinaja mlai.

21 Ma, ei tä ʘ oni jamö ya bufi shaliliblaliyoma. Abenaja tä ʘ lä cuu wei. Öjö bä lija a wəfa wäyāmono ma mlai ma cui, a wə bejedi nia dabraöje. A wəfa jilibou ma mlajei, bä bufi nia jaducäblou. Einaja tä ʘ cuu.

22 Inaja ya showadi cuaaö yalo, çafä bamacö fe waloo bufi ma doblao wei ma cui ya shılo yabäcodii.

23 Öjö ma cui, Jesús a wəfa jilibou lä mlajei ya bä yömölabä, ei tä ulufi jamö fei dāja tä cuami. Çafä bamacö fe waloo bufi doblalanö, lasha bluca ya çai famaö waiquiwä.

24 Öjö cudeenö bamacö nia lä möö wei tä ja, ya mölaö waiquia. España jamö ya fuu dāja, bamacö möö jayuabä. Çafä wamacö lijamö dodijidawä ya cublaa fa balöicunö, ya fuu çofälöö dāja wamale bayeliblafälöbä.

25 Öjö ma cui, fei dāja Jelusale jamö ya fuu balöa. Jesucristo ebä bayeliblaöje ja, camiyä lija blada bä jibäbemaje, ya bä çai fubä. ¿Öjö tawä?

26 Jelusale jamö Jesucristo ai ebä lä cui, bä nö ʘlilili bleaaö lä cule. Öjö cudeenö, Masedonia jamö Jesucristo ebä lä bälöle bānō, Acaya jamö ebä bälöa mö lä fedule bānō, öjö bä nofi ojode taö bufi fa doblaohenö, bä blada jibäbemaje.

27 Bä bayeliblaö bufi doblaomaje. ¿Öjö tawä? Bä bayeliblabeje lä. Jelusaleteli bä lija, cama judio bä lä mlai bä bayeliblamou malä balöono wei. Jesucristo etä ʘ ja, bä bufi yai bayeliblamou waiquilyoma yalo, madofi bä ma cui ja, bä bayeliblaö mö yabao çobeje bä li waiquiwä.

²⁸Blada bä lä shimomaleno wejei ya bä çai fuu fa balöonö, Jelusaleteli bä lija ya bä nia jibäaö balöo. Öjö däjä, España jamö ya fuu däjä, bamacö fe nia waloo jayuaö.

²⁹¿Öjö tawä? Bamacö fe waloo däjä, Cristonö bämalecö nia yai bayelibou, bamacö bufi doblalobä. Öjö ya tä daö waiquia lä cule.

³⁰Bada tä Jesucristo bama ecö bluca waiquiwä yalo, Yai Bada tä Bufinö bamacö çai nofimayou waiquiwä cudeenö bamacö nowa taö. Wamale da bayelima. Yai Bada lija camiyä ya nö bayeli lä nacao wei tä ja, cafä wamacö ma cui wamacö a çai yädäobä.

³¹Judea jamö Jesucristo a bejedi bufibou lä mlajei bä judio lä cui bä lija wale noshi umlabobä. Jelusale jamö Jesucristo ya ebä bayeliblabä ya bä blada çai fuu däjä, bufi doblalolanö bä çai blada däabeje.

³²Yai Bada tänö wale fa bayeliblanö, cafä wamacö lija wale çai shimaö nomöjööbä. Bufi doblalolanö cafä bamacö fe waloo fa nomöjööonö, bamacö dodijidawä lä cuo wei tänö ya bufi yai dobladou çobä.

³³Täbä bufi lä yanöcomabou wei a Yai Bada lija, bamacö nö bayeli nacaö talei, wamacö çai shilo cuobä. ¿Öjö tawä? Inaja lä tä cuobä.

Romanos 16

¹Febe a wafa suwä lä cule wama a nofi bejedi tabobä, ya wafa wäaö lä cule. Camiyä bamacö mashi a waiquiwä. Secleateli bä lä bälöle jamö, öjö a li ojodamou. Jesucristo ebä lä yododaö wei bä bayelibläö.

²Dodijidawä wama a suwä çoblamabä ya wä. Bada tä Jesucristo e malä cui. Cama dodijidawä bama ebä waloamabä bamacö waiquiwä. Dodijidawä a cuobä wama a bayeliblabä, ¿öjö tawä? Camanö bluca täbä bayelibläö malä waiquii. Camiyä ma cui, wale çai bayeliblama.

³Aquila lija wamale afa da wäyä, bä suwäbö Blisila e lija çai. Jesucristo lija ya ojodamou däjä, öjö cäcöbänö wale çai bayeliblaböö talei.

⁴Cäcöbä shämobä tä ma cuono wei ma cui, wale bayeliblaböö fe yadioma. Öjö cudeenö, öjö cäcöbä lija ya bufi doblalou. Jesucristo ebä lä yododoblai bä judio lä mlai bä ma cui, öjö cäcöbä lija bä bufi çai bluca doblalou mö feduo, wale bayeliblaböö cudeenö.

⁵Cama cäcöbä yafibö jamö bä çai lä yododaböö wei bä ma cui lija, wamale afa çai da wäyä. Ebenedo lija çai. Öjö ya yai nofimaö dodijiwä. Asia jamö Jesucristo lija ai bä bufi cuo showao mlao däjä, öjönö a bufibläö balölayoma.

⁶María lija wamale afa çai da wäyä, cafä wamacö lija a ojodamou lä dodijio wei a suwä lä cui lija.

⁷Adonico lija çai, Junia lija çai. Öjö ya cöbä nofi tabou dodijio. Wälidiwä talewä bä fe lä labou wejei jamö, öjö cäcöbä sho yamacö fe bluca laoma. Jesucristonö bä lä

shimöleno wei bä lä cuinö, öjö cäcöbä nofi yai tabou dodijioje. Camiyä Jesucristo lija ya bufi cuo showao mlao däjä cäcöbä bufi cuo lä balöblaono wei cäcöbä.

⁸Abliado lija wamale afa çai da wäyä. Ya nofimaö dodijiwä. Bada tä lija öjö a bufi çai cua.

⁹Ubano lija wamale afa çai wäaö mö feduobä. Cristo lija yamacö ojodamobä jamö, öjönö yamalecö bayelibläö talei. Edaqui lija wamale afa çai wäyäbä. Öjö ya çai nofimaö.

¹⁰Abele lija çai. Cristo a nofi mölabou fe lä yadio wei tänö, a bejedi wawädwä dablamous. Alidobulonö bä çai lä cule bä lija, wamale afa çai da wäyä.

¹¹Iba mashi Elodiono a çai lija. Nasisonö bä çai lä cule, Bada tä lija bä bufi bluca lä cule bä lä cui, öjö bä lija wamale afa çai da wäyä.

¹²Difena, Difosa cäcöbä lija wamale afa çai da wäyä, Bada tä lija cäcöbä suwä lä ojodamou wei. Besida lija çai. Öjö yama a nofimaö. Bada tä lija a ojodamou ja, öjö bei a nö yai walojoablalou.

¹³Lufö lija wamale afa çai da wäyä, bluca bänö Jesucristo e afa dodijidawä yai lä taö wejei a lä cui lija. Bä nöö e çai lija. Öjönö wale nofi shilo yai ijilumaö talei.

¹⁴Asiclido a ma cui lija, Flecode a ma cui lija, Eleme a ma cui lija, Badoba a ma cui lija, Elema a ma cui lija, öjö bä lija wamale afa çai da wäyä. Öjö bänö bä çai lä culajei bä lija çai, Jesucristo ebä lä cui.

¹⁵Filoloco a ma cui lija, Julia a ma cui lija, Neleo a ma cui lija, öjö bä yaö e çai lija, Oliba a çai lija, öjö bä lija wamale afa çai wäyäbä, cama bänö bä çai lä culajei bä lija çai, Jesucristo ebä lä cui.

¹⁶Jesucristo wama ecö yalo, wamacö mö fedudayou ja bä da nofimayo. Cristo ebä bluca lä yododabläi bä lä cuinö, cafä wamacö lija bä afa çai wäyämamou bufi doblao.

¹⁷Iba wamacö. Bamacö yömöläö. Jesucristo ebä lä shifilimomaö wejei bä lija bä da moyaweicu. Cama bä anö bä wälidiblamaö talajei. Jesucristo tä a ja wamacö lä yömölamono wei tä a taboimije. Shomi tä a li lämabouje. Öjö bä ajedemabo dijejä.

¹⁸Inaja bä lä cuaaö wei bä lä cui, Bada tä Cristonö bä taamaö lä bufii wei tä taö mlajei, cama bä cuaaö bufi lä doblao wei tä shilo yai taöje. Bä a lä dodijiablalou wei tänö, bä moyawäo lä mlai bä bufi yaclämaö si ijejeje.

¹⁹Öjö tawä? Jesucristo wama a wä lä fuaö wei, wamacö a jilimou blaucou cuaaö cudi. Öjö cudeenö cafä wamacö lija ya bufi doblalou. Öjö ma cui dodijidawä wama tä tabä, bä da moyaweicu. Wälidiwä tä nofi da mojuduboje.

²⁰Inaja wamacö cualanö, bämalecö bufi lä yanöcomabou wei tä Yai Bada lä cuinö wamacö nia nowamöbou. Sadanasi wama a jamabobä wamacö nia lofotomabou. Bei. Bada tä Jesucristo lä cuinö, showadi wamacö shilo bayelibläbä. Wamacö nofi ojodabobä.

- ²¹Cafä wamacö lija Timoteo a wafa wäyämou bufi doblao, camiyä sho yafäcö lä ojobamou wei a lä cui. Lusio a çai, Jasono a çai, Sosibade a çai. Öjö camiyä yamacö bluca.
- ²²Camiyä Desio yanö, ei Pablo ya wano onibläö lä cule. Camiyä ya ma cuinö, Bada ya tä çai daö. Cafä wamacö lija ya wafa çai wäyämou bufi doblao.
- ²³Cayo a wafa çai wäyämou bufi doblao. Öjönö wale bälömabou lä cule. Jesucristo eja ebä lä cule, öjö e yafi jamö bä yododaö talei. Elato a bada ma cui, cafä wamacö lija a wafa çai wäyämou bufi doblao. Ei a shabono jamö, bada bä befi bä blada lä nacaö wejei bä bladabö nowamabä a läa. Ai bamacö mashi lä cui, Cuado a wafa çai lä cule, öjö a wafa çai wäyämamou bufi doblao.
- ²⁴Bei. Bada tä Jesucristo lija showadi wamacö bufi bayeliblamobä. Wamacö nofi shilo ojobabö. Inaja lä tä cuobä.
- ²⁵Yai Bada bäma a nofi doablabä a, wamacö bufi lä lofotomabou wei a lä cui. Öjö ya etä a dodijidawä wäyäbä jamö, Jesucristo ya wafa wäyäö. Öjö bejedi tä a lä cui, tä a joyabou ma balöono wei ma cui,
- ²⁶yacumö tä a wawäblamalema. Yai Bada a wano wäyälwä bä lä cuinö tä a onibläö balölayomaje. Fei dajā Yai Bada a cua shi lä wälile tä lä cuinö tä a wäyämaö fa bufinö, bluca bä bälöblawä lä yaiblai bä lija yama tä a wäyäö lä cule, tä a fa jililäjenö, Jesucristo a nofi lä mölabou wejei dajā a nosie fuabeje.
- ²⁷Jesucristonö bämalecö bayelibou yalo, Yai Bada tä bufi shilo jaducäwä lä ayai bäma a wafa shilo doblao taö shi wälibä. Inaja lä tä cuobä.

1 Corintios

1 Corintios 1

¹Pablo cä ya. Yai Bada tänö Jesucristo lija wale yaiamaö fa bufinö wale nacalema, wale shimabä. Camiyä ai bämacö mashi lä cui, Sodene a wafa lä cule sho, yafä si oni shimaö bufi fa doblaonö, ya si oniblaö lä cule.

²Colido jamö Yai Bada wama ecö lä yododaö wei wamacö lija yafä si oni shimaö, Jesucristo lija wamacö bufi cuobä, wamacö lä yaimolayono wei wamacö lija. Yai Bada wama ecö cuobä wamacö nacalema, ai täbä bluca taamaö mö feduwä lä showainaja. Bluca täbä lä bälöblai täbänö, Bada tä Jesucristo a lä bufiblaö wejei, cama lä ebä bluca. Camiyä bämacönö bäma a nosie fuaö lä cuaaö weinaja, a nosie fuaö cuaaö mö feduoje.

³Bei. Fayä Yai Bada lija wamacö shïlo bayeliblamobä, Bada tä Jesucristo lija çai. Wamacö bufi shïlo yanöcömaboböbä. Wamacö nofi çai shïlo ojodaboböbä.

⁴Jesucristo lija wamacö bufi fa cuicunö, Yai Bada tänö wamacö nofi ojodabou. Öjö cudeenö Yai Bada lija ya bufi afa doblalou wäyämou talei.

⁵Cama lija wamacö bayeliblamou fe malä balojoo wei. Öjönö wamacö a nö shïlo yai walojomabou. Wamacö bufi çai jaducämabou fe balojowä.

⁶Cristo yama a wafa lä wäyano wei wama tä a lofotobolanö, wamacö bayeliblamou.

⁷Öjö cudeenö Bada tä Jesucristo a nia lä bädou wei wama a noshi jali dabolano, dodijidawä wamacö cua. Yai Bada tä Bufinö täbä lä jibädaö wei täbä ja wamacö fõlimi.

⁸Wama tä a lofote fuwäbou showaobä, Jesucristonö wamacö nia bayeliblaö shi wãlii, Bada tä Jesucristo a bädou däjä wamacö afa dobloimi tamou mlaobä.

⁹Yai Bada wama a nofi mölabobä cätä. Öjönö wamacö nacalema, bä Ijilubö Bada tä Jesucristo sho wamacö nofi tamayobä.

¹⁰Iba wamacö. Bada tä Jesucristo a wänö bämacö yömölaö. Moli tä a showawä ja, bä bufi da shalilo. Wamacö a fa majöablalonö, wamacö bufi shedecou mlai. Moli tä a ja wamacö fa cadidonö, wamacö dodijabä.

¹¹¿Öjö tawä, iba wamacö? Wamacö lä cuaaö wei tä ja, wale yömölamaje, Cloemi ebä lä cuinö. Wamacö afa jöwa lafumayou dicoo.

¹²¿Öjö daanö? Abenaja wamacö jöwa cuadalou dicoo. “Pablo ya wä shïlo yai jïliabä”, ai wamacö cuu. “Ma, Abolo ya wä nia yai jïliaö”, ai wamacö cuu mö feduo. “Ma, Pedro a wä yai”, ai wamacö jöwa cuu. “Ma, Jesucristo ya wä yai jïliabä”, ai wamacö jöwa cuu mö feduwä showawä. Inaja wamacö jöwa bluca cuu majöablalou dicoo.

¹³¿Cristo a sheleleblamoa yailayo nowa tawä? Cafä wamacö bayeliblamobä, fii balitama tefi jamö, ¿camiyä Pablo wale lä shäleno wejei bei ya mada tawä? Wamacö

möfe lä ojomamono wei, ¿camiyä Pablo lä ya wänö wamacö möfe ojomamoma daanö?

14 Camiyänö bamacö möfe bluca ojomanomi. Clibo a lä cui, Cayo a çai lä cui, öjö ya cöbä möfe shïlo fa ojoblalönö, Yai Bada lija ya bufi doblalou,

15 camiyä ya wänö wamacö möfe afa ojomamou wäyämou mlaobä.

16 ¡Jai! Cama Edefana ya ebä möfe çai ojoblamalema. Ai ya tä möfe ojoblamaö nofi jaducäboimi.

17 Ya bä möfe ojomabä, Jesucristonö wale shimano malä mlai. Cama dodijidawä ya etä a wäyäbä, wale yai shimölema. Öjö ma cui täbä a faö fe lä difeliablalou wei tänö mlai. Ma, ya aca nofi jayu mölamobobä tämi. Fii balitama tefi ja, Cristo a lä shäleno wejei tä a lä cui, cama tä a nö walojaö waiquiwä. Cama tä a lofote showawänö, täbä bufi li taamamou. Camiyä ya aca jayu nofi mölamobou fa cunoja, ya tä a nö doblamabö mlai.

18 Shobali wacä jamö täbä cadidou lä showai täbä lija, fii balitama tefi ja Jesucristo a lä shäleno wejei tä a jilimamou nofi mojodi talei. Cama bä lija tä a jilimamou nofi ma mojodi wei ma cui, camiyä bamacö lä fucäamou wei bamacö lija tä a jilimamou yai walalawä. Öjö tä anö Yai Bada tä lofote dablamou.

19 Abenaja tä a oni cuu malä balöono wei. Täbä bufi afa jaducäwä lä jilabou wejei, ya etä nia doblamaimi. Täbä bufi afa dao lä jilabou wejei, ya etä shi nia wälïamaö. Einaja tä a cuu. ¿Öjö tawä?

20 Täbä bufi afa jaducäwä ma jilabou wejei ma cui, Yai Bada tänö bä möfe nia bomabou. Moisesi tä a oni lä daö wejei, bä afa moyawe taö ma cujei, öjö bä möfe nia çai bomabou mö feduo. Ai täbä a nö walojowä ma jimaö wejei ma cui, inaja showawä. Yanowamö täbänö tä afa moyawe lä taö wejei, Yai Bada tänö etä afa jole taö malä waiquii.

21 Yai Bada tä Bufi shïlo yai moyawe yalo, cama yanowamö täbä bufi moyawe anö a dablamou bufionomi. Cama Yai Bada yama etä a lä wäyäö wei tä a showawänö, täbä shïlo fucäaö bufi doblaoma. Ai täbä lija tä a jilimamou nofi ma mojodi wei ma cui, öjö tä a bejedi lä bufibou wejei täbä shïlo yai fucäamou.

22 Täbä bufi taamamou si ijejewä malä mlai. Judio bä lä cuinö, Yai Bada tä mayo shïlo wawämaö bufiije. Judio bä lä mlai bänö bufi moyawe tä a lä cui, tä a shïlo dayäaöje.

23 Öjö ma cui, fii balitama tefi jamö Cristo a lä shäleno wejei yama tä a shïlo wäyäö. Judio bä lija tä a jilimamou nofi jushuwä. Judio bä lä mlai bänö tä a jilïaimije.

24 Öjö ma cui Yai Bada tänö täbä bluca lä nacaö wei täbä lija, judio bä ma cui lija, judio bä lä mlai bä ma cui lija, tä a jilimamou walalawä. Cristonö Yai Bada tä lofote dablamaö. A bufi çai moyawe dablamaö.

25 Yai Bada tä a nofi jowa jilimamou mojodi ma cui, öjö a bufi shïlo jaducäwä ayawä. A nö afa walojaimi ma taö wejei ma cui, öjö a shïlo lofote ayawä.

²⁶Iba wamacö. Bä bufi da jaducäicu. Yai Bada tä ʘ ja wamacö bufi jaba lä jaducäblaliyono wei däjä, yanowamö täbänö wamacö nofi tabobeje wamacö bluca cuonomi. Wamacö bufi ʘfa dao tanomije. Wamacö nosie fuabeje wamacö çai cuonomi. Wamacö ʘfa bada wäyänomije.

²⁷Öjö ma cui, täbä bufi ʘfa jaducäwä lä taö wejei bä lä cui, Yai Bada tänö öjö bä bufi nia fa wedinajamomanö, bä bufi ʘfa jaducäwä taö lä mlajei bä li yailema. Täbä nö ʘfa wəlojaö lä taö wejei bä bufi nia fa wedinajamomanö, bä nö ʘfa wəlojaö taö lä mlajei bä lä cui, öjö bä çai yaia mö fedulema.

²⁸Täbä nofi tabou lä mlajei bä ma cui, täbä nofi çai lä wəlibou wejei bä ma cui, öjö bä yaialalema, täbä nofi yai lä tabou wejei täbä dobroimi dablamobä.

²⁹¿Öjö tawä? Cama a lä cule jamö yanowamö a nofi doablamou mlaobä, inaja Yai Bada a cuaama.

³⁰Jesucristo lija wamacö bufi fa yädäicunö, Yai Bada tänö wamacö ʘlimibou lä cule. ¿Öjö tawä? Cama bufi moyawe etä lä cuinö bamacö bufi li camiyä moyawəblaliyoma. Cama dodijidawä etänö, bamacö li dodijidablaliyoma. Yai Bada bäma ecö dodijidawä cuobä, Jesucristo lija bamacö yaimoa yädälayoma. Bämalecö nowa fa çomacönö, Yai Bada lija bämalecö ajedea comaquema.

³¹Öjö cudeenö tä ʘ oni cuu lä balöono wei, bäma tä ʘ bejedi dabraö. Yanowamö a wə shi doaö bufi doblao ja, cama a nofi doamolanö mlai, Bada tä nofi shilo yai doabä. Einaja tä ʘ cuu.

1 Corintios 2

¹Iba wamacö. Cafä wamacö lija Yai Bada ya tä ʘ wäyäö ja ya lä waloqueyoluno wei däjä, ya wə fe difelimonomi. “Pablo a bufi nofi moyawe yai”, bamacö bufi tamaö bufionomi.

²Cafä wamacö lija ya da bälöoblei däjä, ai ya tä ʘfa wäyäö coyocanomi. Jesucristo tä ʘ lä cui, fii balitama tefi ja a lä shälenu wejei tä ʘ dodijiwä lä cui, öjö ya tä ʘ mada cadidablei.

³Bamacö çai da cuoblei däjä ya wə faö fa quilinö, jai ya ujudi li blösö blösömoma ya cuaama.

⁴Ya tä ʘ lä wäyänö wei däjä, camiyä bei ya wə moyawe dablamou mlai ja, Yai Bada ya Bufi shilo lofote dablamaö dodijioma.

⁵Yanowamö täbä ʘ faö lä moyawe wei tä ja, wamacö mölaö mlaobä. Yai Bada tä nö lä wəlojaö wei wama tä nofi shilo yai mölabobä.

⁶Öjö ma cui yama tä ʘ lä wäyäö wei, moyawe cä tä ʘ. Yai Bada lija bä bufi lä jaducäafälöö wei bä lä cuinö tä ʘ nö moyawe öjöböaöje. Culenaja yanowamö bamacö lä cule jamö bä lä nosiemou wei bä lä cuinö, bä mladou si lä ijejei bänö, yama tä ʘ lä wäyäö wei tä ʘ taboimije.

⁷Moyawe yama tä ʔ lä wäyäö wei tä ʔ lä cui, Yai Bada tänö tä ʔ lä jöyabono wei tä ʔ li. Yanowamö täbä lija tä ʔ dablamono ma mlai ma cui, yedu jamö tä ulufi tablano mlai ja, tä ʔ tabou showaoma. Cama bäma ecö lä cui, bämalecö nia lä doblamabou wei tä ʔ yaibou ʔatoo showaoma.

⁸Öjö tä ʔ ja, ei tä ulufi jamö bä bluca lä nosiemou wei bä bufi jaducäblonomi. Bä bufi jaducäblou fa cunoja, fii balitama tefi ja Bada tä nofi lä doablamou wei tä nö shäbö mlajei.

⁹Abenaja Yai Bada etä ʔ oni cuu malä balöono wei. Yanowamö bei bä mamocunö tä dabraö balöono ma mlajei ma cui, bei bä yömöcacönö tä ʔ jiliaö balöono ma mlajei ma cui, bä befi cuo showaodayoma. “Inaja tä cuobä daanö”, bä bufi jaba cuno ma mlai ma cui, Yai Bada tä lä nofimaö wejei bä befi tabou showaoma. Öjö bä befi lä tabou wei tä lä cui,

¹⁰camiyä bamacö lija Yai Bada tä Bufinö tä wawäblamalema. Tä daö nö malä mlale. Yai Bada a bufi cuablalou lä ʔatoo wei tä ma cui, tä çai daö. ¿Öjö tawä? Einaja tä ʔ cuu.

¹¹Shomi täbä lija täbä bufi dablamou ma mlai ma cui, cama täbä bufi li yai dablamou. Inaja lä showawä, Yai Bada tä Bufinö cama a bufi shilo dablamou.

¹²Öjö bäma a Bufi li tabou. Yai Bada tänö bämalecö befi lä tabou wei tä ja bämalecö bufi moyawäblamabä, a Bufi jibämobema. Öjö bäma a Bufi tabou yalo, yanowamö täbä bufi lä cuaablalou weinaja bamacö bufi cuaaimi.

¹³Yama tä ʔ lä wäyäö wei, Yai Bada tä Bufi lija yama tä ʔ fa jililänö yama tä ʔ li wäyäö. Yanowamö täbä bufi ʔafa moyawe lä jilabou wejei täbä lija yama tä ʔ däano malä mlai. Yai Bada tä Bufi tabou mö lä fedule täbä lija yama tä ʔ bejedi wäyäö mö feduo.

¹⁴Yai Bada tä Bufi tabou lä mlajei bä lä cuinö tä ʔ jiliaö möblaimije. Yai Bada lija bä bufi jaducäo fa mlacunö, tä ʔ çai jiliaö bufiomije. Tä Bufi taboimije yalo, tä ʔ nö bejedi öjöböblaimije.

¹⁵Öjö ma cui, Yai Bada tä Bufi lä tabou wejei bä mö feduwä lä cuinö, tä bluca lä cublou wei tä nö öjöböaöje. Tä nö dodijidawä öjöböaöje, tä nö çai wälidiwä öjöböaöje. Cama bänö tä nö bluca ma öjöböaö wejei ma cui, mojadi täbä lija cama bä bufi nö öjöböamoimi. Yai Bada ebä lija bä lä mojadi wei bä bufi shilo wedinajamou.

¹⁶Abenaja Yai Bada etä ʔ oni cuu malä balöono wei. Bada tä bufi lä cuaablalou wei, ¿wedinö tä bufi yai daö? Öjö a lä cui, ¿wedinö a li yömölabou? Einaja tä ʔ cuu. Öjö ma cui, Yai Bada bäma a Bufi lä tabou wei bamacönö, Cristo a bufi lä cuaablalou wei bäma a bufi daö.

1 Corintios 3

¹Iba wamacö. Yai Bada wama a Bufi tabou mö ma fedule ma cui, bamacö yömöläö da balöoblei dāja ya wä doblonomi. Yanowamö täbä bufi showadi lä cuaablalou wei tä

ja, wamacö cuaaö bufi fa doblaonö, wamale doblamanomi. Jai Jesucristo lija wamacö jabamou, wamacö cuaaö dicooma yalo, colo wiisibö tä ɔ lä cui ja bamacö sh̄lo yömöläö bädaoma.

²Oshe dude täbä lija yalo bä jibäaimije. Bä sh̄lo shadimabouje. Yai Bada etä ɔ ja bamacö jaba lä yömöladaleno wei däjä, inaja showawä wamacö cuoma. Oshe täbä wainö bä nii waa doblaimi lä culajeinaja, inaja showawä Yai Bada etä ɔ ja wamacö dobloimi cuoma. Fei däjä ma cui wamacö dobloimi showawä.

³Cafä wamacö bufi cuu lä bädao wei tä ja, wamacö cuaaö bufi doblao showao dicoo. Ai täbä dodijaö ayao ja, wamacö jushuo si malä ijejei. Ai wama täbä nofi malä wəlibou wei. Inaja wamacö cuaaö dicoo ja, mojodi bä lä culenaja wamacö cuaaö mö feduwä malä showai.

⁴“Pablo ya wə yai j̄lii dodijio”, ai wamacö cuu dicoo ja, “Abolo ya wə yai j̄liabä”, ai wamacö cuu mö feduo dicoo ja, showadi täbä yanowamö lä cuaaö weinaja wamacö cuaaö malä showai.

⁵¿Wedi bei a li Abolo, wama a wəfa jayumadii yaibä? ¿Wedi bei ya li Pablo, wamale ɔfa jayumadii yaio mö feduobä? Yai Bada wama a bufi labä yafälecö lä shimöleno wei yafäcö li bädawä malä cui. Yai Bada tänö tä lä jimöbeno wei tä ja yafäcö lä icuqueno wei yafäcö li, yafäcö ojodamobä.

⁶Yai Bada ya wə jaba lä wäyāno wei däjä, cafä wamacö bufi jamö jai ya mobä döaö ya cuaama. Abolonö tä ɔ wäyāö lä nomöjööno wei, jai mau ubänö mobä fe liyāyāö a li cuaaö nomöjööma. Yai Bada tänö wamacö bufi lä jaducäblamaleno wei däjä, jai mobä caumalema tä li cuaaö nomöjööma.

⁷¿Öjö tawä? Mobä lä döaö wei a lä cuinö, mobä caumaö daomi. Mobä fe lä liyāyāö wei a ma cuinö, inaja showawä. Yai Bada tänö mobä sh̄lo badamaö daö ayawä.

⁸Mobä lä döaö wei a ojodamou lä cuaaö weinaja, mobä fe lä liyāyāö wei a ma cui, inaja showawä a ojodamou cuaaö mö feduo. Ai a lä cui, dodijidawä a ojodamou ja, Yai Bada tänö a no ojode comaquei. Ai a dodijaö mö lä feduo wei lija, a no çai ojode çqa mö fedumaquei.

⁹Yai Bada a lä cui jai a ficalimou a cuaaö. Cafä wamacö lä cui, jai Yai Bada ficali wama etäca cuwä. Cafä bei wamacö bufi jamö Yai Bada tä lä ojodamole jamö, ei camiyä yafäcö çca.

¹⁰Yai Bada tänö wale fa bayeliblalönö, ya tä ɔ lä wäyāno wei däjä, jai ya e yafi itamama ya cuaama. Bä yafimou lä daö wei bä lä cuinö, dodafi bä itamaö lä balöo wejeinaja, colo ya tä ɔ jaba wäyāö cuaaö balöoma. Ai a ojodamou nomöjööa lä cule. Bä ojodamou lä nomöjööo wei, bä bufi moyawālanö bä ojodamobä, öjö lä.

¹¹Yano jəfa a nofi lofote mölabou lä cuaaö wejeinaja, Jesucristo a nofi mölabobeje a lofote tablamaö malä waiquilayono wei. Täbä mölabä, ai tä nia cuo majöömi.

¹²Jesucristo jai colo etä yano cuwä waiquiwä. Yai Bada lija bä lä ojodamou wei, jai etä yano ola tafälööje bä cuaaö. Dodijidawä Yai Bada tä nosie lä fuaö wejei däjä, jai e

yano ola lofotoamaöje tä cuwä. Ai bä lä cuinö, jai maa mabä nofi lä yaibou wejei mabä yädämaöje bä cuaaö. Ai bä lä cuinö, jai mabä nowa lä bluca wei mabä yädämaöje bä cuaaö mö feduo. Ai bä lä cuinö, jai fii fibä yädämaö mö feduoje bä li cuaaö. Ai bä showawä lä cuinö, jai yaa jenabä yädämaöje bä cuaaö mö feduo. Ai bä mö feduwä showawä lä cuinö, jai bölösö bä yädämaöje bä cuaaö mö feduo.

¹³Tä lä taö wejei tä nia dodijidawä wabamou. Yai Bada tänö täbä jimabä etä cublou däjä, cowa wacänö tä nia bluca lä wabamou wei däjä, tä nowa nia wawäblou.

¹⁴Jai tä yafi ola taöje däjä täbä yädäo lä majöo wei, Yai Bada tänö bä no nia ojode çöamaö. Cowa wacänö tä wäliaö lä mlai, tä no ojode çömaquei.

¹⁵Tä lä tano wei etä öshölayou ja, tä nowa nia ojode çömaimi. A ojodamou nö nia bleaaö ma cui, cama a nia shïlo fucäamou. Cowa wacä jamö täbä fucäaö lä cuaaö wejeinaja, cama a nia shïlo fucäamou bädao.

¹⁶“Yai Bada yama ecö yafibö”, ¿wamacö bufi cuimi tawä? ¿Yai Bada wama a Bufi tabou nofi mojudoubou dicoo tawä?

¹⁷Ai a lä cuinö, Yai Bada etä yafi wäliaö ja, a nofi nacao. Yai Bada tänö öjö a wälialei. Cama e yafi malä yaibole, cafä wama ecö lä cui.

¹⁸Jole jole wamacö möläo bädao mlai. Yanowamö täbä lija a bufi äfa jaducäwä tamou shi jalimo dijä. “Wa bufi nofi jaducäbloimi yai”, wa nowa taö fa cunoje ja, tä nö shïlo doblaobö wei. Öjö däjä wa bufi shïlo yai moyawäblou dodijjobä.

¹⁹Yanowamö täbänö a bufi äfa moyawe lä taö wejei, cama etä lä cui Yai Bada tänö etä nia wailei. Abenaja tä ä oni cuu. Yanowamö bänö etä äfa moyawe lä taö wejei, Yai Bada tänö etä mojodi fa jimanö, bä doblamaimi. Einaja tä ä cuu.

²⁰Abenaja tä ä oni çai cuu. Bä bufi äfa moyawe lä wäyäo wejei, Yai Bada tänö bä bufi nö äfa bleaaö taö. Einaja tä ä cuu.

²¹Cama yanowamö täbä nofi moyawe mölamobobä tä cuami waiquiwä yalo, bä bufi da jaduqueicu. Yai Bada lija yamacö lä ojodamou wei, yamalecö nofi dodijidawä yaibou mlai. Cafä wamacö bayeliblamobä yamacö li bluca.

²²Camiyä Pablo ya ma cui, Abolo a ma cui, Pedro a ma cui, wamacö bayeliblamobä yamacö bluca. Jödödöwä täbä lä cublai, cafä wamacö befi bluca. Wamacö lä demöo wei tä ma cui ja, wamacö lä mladou wei tä ma cui ja, Yai Bada tänö wamacö nia bayelibläo shi wälii. Fei däjä tä lä cule tä ma cui, tä nia obi lä cublou wei tä ma cui, cafä wamacö befi tä bluca showawä.

²³Cafä wamacö lä cui, Cristo wama ecö. Cristo a lä cui, Yai Bada e.

1 Corintios 4

¹Abenaja yamalecö nofi shïlo tabobä. “Jesucristo a wä lä fuaö wejei cäbä. Yai Bada lija bä lä ojodamou wei cäbä, etä ä wawäblamabeje.” Einaja yamalecö nofi shïlo yai tabobä.

²¿Öjö tawä? Täbä lä ojodamou wei bä lä cui, bä dodijidawä ojodamobä bä li shimaöje, bada e ʘ fuabeje.

³Jesucristo ya wʘ lä fuaö wei ya lä cui, cafä wamacönö wamale dodijaö ma jimaö dǎjä ma cui, wamale ʘai dobroimi ma jimaö dǎjä ma cui, bamacö ʘ fuaö mlaicätä. Bada täbänö wale ʘfa wayoabeje, täbä ʘai ma yododaö dǎjä ma cui, ya nofi nia jaluomi. Yanowamö wamacö ʘ li bädawä. Camiyä ya ma cui, ya wʘ fabä tä cuami. Ya wʘfa dodijaö taomi.

⁴“Yale ʘfa tabeje tä cuami waiquiwä”, ya bufi cuu ma cui, camiyä ya bufi cuu lä bädao wei tänö ya dodijidawä jimöomi. Yale nia dodijaö lä jimaö wei a lä cui, yale nia dobroimi ʘai lä jimaö wei a lä cui, öjö Yai Bada bei tä waiquiwä.

⁵¿Öjö tawä? Öjö cudeenö, täbä dobroimi jimaö shi jalimo dijejä. Bada tä Jesucristo a itou ʘoyoluu dǎjä, tä bluca nia wawäblou. Jai mö didi jamö tä ma joyale ma cui, tä nia wawäblamaö. Täbä bufi cuaaö lä ʘatoo wei tä ma cui, täbä bufi nia ʘai wawadowä dablamaö. Öjö dǎjä, täbä dodijaö jimamobä tä cua ja, cama Yai Bada a showawänö, täbä nia jimaö.

⁶Iba wamacö. Bluca ya tä ʘfa lä wäyäfe, camiyä Pablo sho, Abolo sho yafäcö ʘfa wäyämou lä cufe. Wamacö bufi jaducäblobä einaja bei ya cublalou lä cufe. Tä ʘ oni cuu lä dodijio wei tä ja wamacö cadidobä. ¿Öjö tawä? ¿Wedi tabä wama täbä nofi nia li yaibou majöablalou?

⁷Cafä wamacö nofi doobä tä cuami. Yai Bada tänö wamacö dobäö mlao fa cunoja, wamacö nö doblou bädaobö mlai. Öjö lija wa shilo ma bayeliblamou wei ma cui, jai cafä wamacö dodijaö waiquiwä, ¿wamacö nofi nia li doo dicoo tawä?

⁸Wamacö jolemou dicoo. Wamacö bufi fudädawä ʘai bälöo dodijio mlaicätä. Wamacö nö madofiböo dodijio mlaicätä. Jai blowäjäwä wamacö yamili bälöo dodijio mlaicätä. ¿Blowäjäwä wamacö bejedi bälöaö yaio nowa! Wamacö jowa blowäjäwä bälöa lä dodijile jamö, yamacö bälöo naleobä.

⁹Abenaja tä nofi cuwä. Jesucristonö yamalecö ma shimöleno wei ma cui, yanowamö täbä lija Yai Bada tänö yamalecö nö waiblamaö. Jai yamalecö shäö bädaobeje yamalecö nofi tabouje. Yanowamö täbä ma cuinö, ʘjele täbä lä doblaladi täbä ma cuinö yamalecö nö waibläö dabläöje.

¹⁰¿Wedinaja tawä? Camiyä yamalecö lä taamaö wejeinaja, ¿cafä wamacö nofi taamaö mö feduo lä mlajei! Jesucristo a nowa ja, camiyä yamalecö bufi ʘfa daomi ma taö wejei ma cui, cafä wamacö bufi jowa jaducäwä ayawä. Camiyä yamalecö ʘfa dobroimi ma taö wejei ma cui, cafä wamacö nö jowa shilo yai walojaö ayawä. Cafä wamacö nofimaö ma macocolajei ma cui, camiyä yamalecö nofi shilo wʘlibouje.

¹¹Fei dǎjä showawä ma cui yamacö ofäö talei. Yamacö ʘai amishaö talei. Yamacö didiobä yama sibä dodijidawä taboimi. Yamalecö si yafelimaöje. Yamacö bälöo yanöcöobä yamacö yafibö cuami.

¹²Yamacö ojodamou fe baloo talei. ¿Öjö tawä? Yamalecö ma bäyäblaö wejei ma cui, Yai Bada lija yama täbä bayelimaö fe yadio showao. Yamalecö nö lä bleaamaö wejei däjä, wamicai yamacö nö bleaaö buo.

¹³Camiyä yamalecö afa ma wäyää wejei ma cui, yamacö jushuo mlai ja, dodijidawä yama bä a wayomaö showao. Yamalecö nofi wälibou dodijia lä culajei. Shami tä nö quili taö lä cuaaö wejeinaja, yamalecö nofi tabou dicooje.

¹⁴Bamacö quilijamabä, ei ya si onimaimi. Bamacö nofi malä ijilumaö wei. Bä ijilubö bä lä nofimaö wejei bä wasöö lä cuaaö wejeinaja, bamacö malä taamale.

¹⁵Jesucristo lija wamacö cadidobä, bluca bänö wamacö ma yömölaö wejei ma cui, öjö wama bä nofi föömabä bämi. Camiyä ya wä linö Jesucristo lija wamacö bufi jaba cuquema yalo, camiyä wamale nofi bluca föömabä ya malä cui.

¹⁶Öjö cudeenö, bamacö yömölaö lä cule. Bä föö täbä owäbou lä cuaaö wejeinaja, wamale da owälä.

¹⁷Wamale owäbobä, ijiluyä Timoteo ya lä nofimaö wei, ya shimölema. Jesucristo lija a bufi cuquema yalo ya nofi ijilumaö. Yale afa cadidibou yalo ya shimölema. Jesucristo lija ya lä cadidou wei tä a ja wamacö bufi jaducäblamabä, ya shimölema. Öjö tä a showawä ja, Jesucristo ebä yododaö lä blaucodi jamö ya bä yömölaö cuaaö.

¹⁸Aifä bänö wamale nö jowa waiblaö dicowä. “A waloomei waiquiwä”, bä bufi fa cunö, bä a waiteli faö ma cui,

¹⁹Yai Bada tänö wale fumaö ojode ja, lobe bamacö fe walolei. Öjö däjä, bä a lä waitelimou wei ya bä nia bejedimou möö. Ya bä a nia jiliaö buomi. Ya bä bufi nö nia walojaö möö.

²⁰Yai Bada tä nosie fuaö lä cadidio wejei ja, bä a faö bädao malä mlai. Yai Bada tänö bä nö lä walojamaö wei tänö, bä shilo bejedi dablamous.

²¹Cafä wamacö lijamö ya waloo däjä, ¿wedinaja tä nia yai cuo? Ei si oni ja wamale a jiliblaimi dicoo ja, icala ya wä nia fajalou. Ei ya wä oni ja wamale a shilo jiliaö dodijidao ja, bamacö nia shilo nofimajalou.

1 Corintios 5

¹Wamacö afa wayoaöje. Cafä wamacö lija ai a nofi jowa jushublalou fe balooja. Bä föö e suwäbö ma cui lija a jowa yabäcäo dicoo. Yai Bada tä daö lä mlajei täbä ma cui, jinaja täbä nofi cuaaö lä mlai!

²¿Wedi tabä aifä a nö ma quiliaö däjä ma cui, wamacö afa dodijaö tamou fe yadio dicoo? Wamacö yai öcöö fa cunaja tä nö shilo doblaobö wei. Inaja a lä cuaale, wama a coyocomabou fe yadio mlai, a waia da showadaalöje.

³Cafä wamacö lijamö bei ya cua ajedeami ma cui, jai wamale möö wawädowä wamale nofi tabobä. Miji a lä yawelemou wei a lä cui, jai bei ya wä yai faö, wawädowä ya jimaö waiquia lä cule.

⁴Bada tä Jesús a wānō, ya jimaō. Wamacō lä yododaō wei dājā, jai camiyä ya coyocoa, wamale nofi nia tabou. A lä yawelemou wei, Jesucristo a wā lofotenō abenaja wama a nia taamaō.

⁵Fecula bada a lija wama a nia jibäō, a wāliabä, Jesucristo a fuu lä ço wei dājā a bufi fucāmou fe yadiobä.

⁶Cafä wamacō afa dodijaō lä tao wei, tä dodijidawämi. ¿Wama tä daimi tawä? Nii täbä julumabeje, wiisibō tä wai ma coyocaō wejei ma cui, täbä malä julublou wei.

⁷Täbä nofi lä jushuaō wei tä lä cui, jai nii julumamodima tä lä culenaja tä cuwä. Öjö tä möcashi jotenō, tä mö comi fudäblaliyo. Cafä wamacō lijamō tä jode lä cule tä da joyalöje, bei wamacō bufi dude jamō tä jode coyocoo mladobä. Jode wama tä coyocobobä wamacō malä mlai. Yai Bada a waiteli lä jayuno wei a nofi çocamoabeje, yalo oweja bä shäō lä cuaaō wejeinaja, Cristo a shāmou malä waiquilayono wei.

⁸Öjö cudeenō, täbä bufi doblalou çai lä iyaō weinaja bamacō bufi çai doblalou da cuo. Nii ajamō, julumamodima tä coyocaō mlajei ja, täbä iyaō lä cuaaō weinaja showawä. Wālidiwä tä lä cui, nofi wāliayou tä lä cui, bāma tä coyocobou mlai ja. Bamacō bufi lä cadidou wei tänō, bamacō çai lä bejedimou wei tänō, bamacō bufi doblalou çai cuo showaobä.

⁹Cafä wamacō lijamō ya si jaba lä oniblaleno wei dājā, täbä nofi lä jushublalou wei, ya täbä lomabou wasōma. ¿Öjö tawä?

¹⁰Ya täbä lomabou lä wasōno wei dājā, Yai Bada tä daō lä mlajei ya täbä afa tanomi. Mojodi täbä nofi lä jushublalou wei, madofi bä ja täbä bufi shi lä jalimou wei, täbä lä mölamaō wejei, nö ijidubō täbä lä bufiblaō wejei, ei tä ulufi jamō wamacō cua lä showale dājā, showadi täbä mojodi cuadii cuquei malä cui.

¹¹Öjö ya si lä oniblaleno wei dājā, Yai Bada ebä afa lä jilou wei ya ebä afa li tama. Yai Bada e afa ma jilou wei ma cui, showadi a nofi jushublalou dicoo ja, madofi bä ja a bufi shi shilo jalimou dicoo ja, öjö wama a shilo lomabou dodijio mlai. Nö ijidubō täbä shilo bufiblaō dicoo ja, täbä afa shilo lafumaō dicoo ja, inaja showawä. Showadi cama a shi wālimamou dicoo ja, täbä shilo mölamaō dicoo ja, inaja showawä a lomabo dijejä. Wamacō iyabä jamō ma cui, wama a nacaō mlai.

¹²¿Öjö tawä? Yai Bada tä daō lä mlajei ya bä dobloimi jimabä ya malä mlai. Yai Bada ebä mö feduwä lä cui, bāma bä cadidamabä bamacō.

¹³Mojodi täbä doblou lä mlai, Yai Bada camanō täbä dobloimi jimabä cätä. Abenaja tä a oni malä cuu wei. Cafä wamacō lija tä coyocoo mlaobä, a doblou lä mlai a da blajamalöje. Einaja tä a cuu.

1 Corintios 6

- ¹Jesucristo bufilewä bä mö feduwä lä cuinö, ai wamacö yabäcaöje däjä, ¿wedi tabä shomi wama täbä li nacaablaö dicoo? Yai Bada ebä lija ¿wamacö ʘ nō shīlo yai wäo mlai? Öjö bänö tä bluca cadejabeje bä waiquiwä malä cui.
- ²Jesucristo a itou çoyoluu däjä, Yai Bada bäma ecö lä cuinö, jödödöwä täbä lä cublai bäma täbä nia malä jimaö wei. Aifä cäcöbä ʘfa tayou bädao ja, tä cadejaö da showadaoje.
- ³Ajele bäma täbä nia lä jimaö wei, ¿bei wama tä daimi? Inaja bämacö nia jöwa cuaaö waiquiwä ja lä, yanowamö bä bädawä lä cui, öjö bei bäma bä jimaö yaiquei.
- ⁴Aifä cäcöbä ʘfa tayou ja, ¿Yai Bada tä daö lä mlajei täbä lija wama tä cadejamaö dicoo tawä?
- ⁵Wamacö doblou lä mlai wamacö nō öjöböamobä ya wə. Aifä cäcöbä ʘfa tayou dicoo ja, cafä Yai Bada wama ecö lijamö tä nia lä cadejaö wei, ¿a cuami tawä? A bufi lä moyawe wei, moli ma cui, ¿a cua bädaami daanö?
- ⁶Öjö ma cui Jesucristo wama ecö bluca ma cui, bä ʘfa lä tayou wei ja shomi wama täbä yädämaö dicoo. Jesucristo bufilewä bä ma mlai bä ma cui lija wama tä cadejamaö dicoo.
- ⁷Wamacö ʘfa lä tayou wei däjä, shomi täbä lija wama tä cadidamaö dicoo ja, wamacö dobloimi waiquiwä. ¿Wedi tabä wamicai wamacö nō shīlo bleaaö bädaomi, öjö lä? ¿Wedi tabä “Wale mölamaö bädao”, wamacö li cuimi, öjö lä?
- ⁸Öjö ma cui, cafä wamacö showawä ma cui, wamacö nofi jushuaö. Jesucristo moli wama ecö mashi ma cui, wamacö nō bleamayou, wamacö çai mölamayou.
- ⁹¿Wama tä daimi tawä? Yai Bada tänö cama ebä çai cuobä jamö, bä doblou lä mlai bä ajedemabou mlaicätä. Bä möla dijä. Bä nofi beshili lä jushublalou wei bä ma cui, nō ijidubö täbä lä bufiblaö wejei bä ma cui, bä lä joleblalou wei bä ma cui, ai a wəlo mö feduwä sho cäcöbä nofi lä jushublalou wei bä ma cui, ai a suwä mö feduwä sho cäcöbä lä cuaaö wei bä ma cui, bä nia ajedemaboimi.
- ¹⁰Bä lä tomöμου wei bä ma cui, madofi täbä ja bä bufi lä waiyou wei bä ma cui, cama bä shi lä wəlimamou wei bä ma cui, bä ʘfa lä lafumaö wejei bä ma cui, Yai Bada tänö dodijidawä cama ebä çai cuobä jamö, öjö bä ajedemabou mlaicätä.
- ¹¹Inaja ai wamacö çai jaba cuaaö ma balöono wei ma cui, wamacö aublaliyoma. Yai Bada wama ecö cublaliyoma. Bada tä Jesucristo lä cuano wei tänö, jai wamacö dodijaö waiquiwä wamacö nofi tabou majöa. Yai Bada tä Bufinö inaja wamacö taamama, bäma a lä bufiblaö wei a Yai Bada lä cuinö.
- ¹²Abenaja ai bä cuu. “Ya cuaaö bufi lä doblao weinaja ya cuaabä lä. Tä ʘ läa malä mlai”, bä ma cuu wei ma cui, inaja bä lä cuaaö wei tänö bä nia bayeliblamoimi. “Ya cuaabä lä”, cama bä ma cuu wei ma cui, inaja camiyä ya bufi cuimi. Ya bufi luluamou mlaobä ya bufi yai wasöo.

¹³Abenaja täbä çai cuu. “Bei bamacö busi lä cui, nii bä befi”, täbä çai ma cuu wei ma cui, Yai Bada tänö bei bamacö busi nia lä mladamaö weinaja, nii bä nia çai mladamaö mö feduo. Bamacö iyabä bei bamacö busi tablalema ma cui, bei bamacö yai lä cui, bamacö nofi jushublalobä bamacö tablanomi. Bada tä lä culadi tä lija bei bamacö noshi yai öjödaobä, bamacö tablalema. Öjönö bei bamacö shilo bayelibleaö talei.

¹⁴Bei bamacö lä cui, Yai Bada tänö bamacö nia demi çai jocädamaö, cama a nö lä walojaö wei tänö. Bada tä demi lä jocädamaleno weinaja showawä.

¹⁵¿Bei wamacö bufi jaducäbloimi showawä? Jesucristo lija wamacö bufi fa yädäicunö, jai moli wamacö bayucuwä cuwä. ¿Öjö tawä? Ai a lä cui, Jesucristo lija a ma yädäle, showadi a suwä lä dodoo wei a lija, ¿a nia joleblalou majöo daanö? ¿Öjö sho cäcöbä moli cublobä a daanö? Mlaicätä.

¹⁶Öjö lija a walo joleblalou ja, moli cäcöbä mashi jowa cublou malä cui. Abenaja tä a oni cuu. Bolacabö cäcöbä ma cui, moli bä cublou majöo. Einaja tä a cuu.

¹⁷Öjö ma cui, Bada tä lä culadi a lija a bufi lä yädäo wei a lä cui, Jesucristo sho cäcöbä bufi moliblaliyo.

¹⁸Wamacö nofi beshili jushublalou dodijio mlai. Ai tä walıdiwä bluca ma taö wejei, bei bä walıdiamabä tämi. Öjö ma cui bä nofi beshili lä jushuaö wei, bei bä nia li fa walıdiblamonö bä li cuaaö.

¹⁹¿Wama tä daimi tawä? Cafä wamacö lija Yai Bada tä Bui fa jibämoicunö wama a Bui tabou. Öjö wama ecö yafi. Öjö wama ecö waiquiwä yalo, camanö tä tamaö lä bufio wei tä ja wamacö cadidobä wamacö.

²⁰Jesucristo cama a fa jibämoicunö, wamacö no comaquema. Cama wama ecö yalo, wamacö dodijidawä lä cuo wei tänö, ai täbä lija Yai Bada a doblao da dablamae.

1 Corintios 7

¹Oni si ja yamale lä walıno wei tä ja, bamacö yömölaö majöa lä cule. Awei, suwä bä dääimije ja, tä dodijidawä waiquiwä.

²Tä dodijidawä ma cui abenaja ya bufi cuu. Täbä nofi jushublalou mlaobä, walo bänö cama ebä nia suwä tabou cadidioje. Suwä bänö cama bä feyalobö bä nia çai cadidiwä tabou mö feduoje, ¿öjö tawä?

³Bä feyalobö lija suwä a noshi öjödaobä a. Bä suwäbö ma cui lija a noshi çai walo öjödao mö feduobä.

⁴Cäcöbä malä doayolayono wei. Bä feyalobö e li waiquiwä cudeenö, a noshi suwä umlaobä a malä mlai. Bä suwäbö e li waiquiwä cudeenö, a noshi walo umlaobä a çai malä mlai.

⁵Wamacö noshi umlao mlai. Cuwi, abenaja wamacö shilo cuaaö dao. Yai Bada lija cäcöbä nö bayeli nacaodibä, cäcöbä yanöcöo bufi doblao ja, cäcöbä noshi moli

umladobä. Öjö ma cui cäcöbä nö dedeaö mlai ja cäcöbä yacao çobä, ai a lä beshi wei däjä fecula badanö a yaclämaö mlaobä.

⁶Öjö tawä? Bamacö nosiemaö cadidiwä ma mlai ma cui, inaja wamacö cuaaö bufi doblao ja, “Inaja waiquiwä”, ya cudaliyo.

⁷Camiyä ya shıloco lä culenaja täbä bluca cuo mö feduo fa cunoja, ya bufi nö yai doblaobö wei ma cui, Yai Bada tänö inaja bämalecö bluca taamaimi. Öjö ma cui bämalecö bufi bluca bayelibläö. Bä lä shıloco wei bä lä cui, dodijidawä bä cuobä bä bayelibläö. Bä shıloco lä mlai, dodijidawä bä cuo mö feduobä bä çai bayelibläö mö feduo.

⁸Täbä lä shıloco wei täbä lija, täbä lä yamiblaliyono wei täbä çai lija, abenaja ya cuu talei. “Camiyä ya shıloco lä culenaja wamacö shıloco cuo mö feduo ja, tä yai dodijidawä”, ya cuu talei.

⁹Öjö ma cui täbä bufi wasöo daomi ja, bä suwäbö e däabeje, bä feyalobö e däabeje. Shomi täbä lija täbä yabäcäo mlaobä bei ya wä.

¹⁰Täbä suwäbö çai lä cule, täbä feyalobö çai lä cule, ya täbä yömöläö nomöjöö. Bada tä Jesucristo ya tä ç fe dolemaö lä cule. Suwä anö bä feyalobö e nia joyaimi.

¹¹Culenaja a joyaö fe yadio ja, shıloco a nia cuo. A shıloco cuo bufiomi ja, bä feyalobö lija a nia cuo ço. Bä feyalobö a ma cuinö, bä suwäbö a çai nia joyaimi.

¹²Ai wamacö lija ya wä faö nomöjöö lä cule. Bada tä Jesucristo ya wäno wäyöö mlai, camiyä ya wä li. Ai wa suwäbö lä cuinö, Jesucristo etä ç bejedi bufibou ma mlai ma cui, cafä lija a cuo bufi doblao ja wa joyaö mlai.

¹³Ai wa feyalobö lä cuinö, inaja showawä. Jesucristo bufilewä a ma mlai ma cui, cafä lija a cuo bufi doblao ja wa joyaö mlai.

¹⁴Abenaja tä malä cule. Wälo ai a lä cui, Jesucristo bufilewä a ma mlai ma cui, bä suwäbönö tä ç nofi shılo bejedi tabou ayawä. Öjö a suwä lä cui, Yai Bada e li yalo, bä feyalobö a çai yaibou mö fedua. Inaja showawä suwä a lä cuinö, Yai Bada etä ç bejedi bufibou ma mlai ma cui, bä feyalobönö tä ç nofi shılo bejedi tabou ayawä. Öjö a wälo lä cui, Yai Bada e li yalo, bä suwäbö a çai yaibou mö fedua. Inaja tä cuo mlao fa cunoja, Yai Bada tänö ijilufä bä nö blajamabobö wei ma cui, täbä li yaibou mö fedua malä cui.

¹⁵Öjö ma cui Yai Bada etä ç bejedi bufibou lä mlai a cuo bufiomi ja, a lä bole a joyaö bufi doblao waiquiwä ja, a fubä. Inaja a cuaaö dicoo ja, a lä damole a wä fe blacäjou mlai. Wamicai bamacö bälöobä Yai Bada tänö bämalecö malä nacano wei.

¹⁶Öjö ma cui, a çai cuo fe yadio showao ja, suwä anö Jesucristo a nofi mölabou ma ayale ma cui, bä feyalobö enö tä ç nofi obi bejedi tabou jatoquei. A fucäamou jato fa cui. Wälo anö Jesucristo a nofi çai mölabou ma ayale ma cui, bä suwäbö enö tä ç nofi obi bejedi tabou jatoquei. Öjö a çai fucäamou jato fa cui.

17 Öjö ma cui, Jesucristo ebä lä yododoblai jamö, abenaja ya bä nowa bluca taö talei. Bada tänö bämalecö jaba tabou lä cuono weinaja bamacö yanöcöwä cudioyä. Bämalecö bufi lä jaducäblamaleno wei däjä, bamacö cuo lä waiquiono weinaja bamacö cudio showaobä. Inaja bamacö culanö, cama tä lija bamacö fa bayeliblamonö bamacö dodijabä.

18 Yai Bada tänö wa bufi lä jaducäblamaleno wei däjä, judio bä mosi sicö joyamou lä cuaaö weinaja wa taamamou waiquioma tä nowa ja, a bufi jalujo dijä. Inaja showawä, wa mosi sicö joyamonomi waiquiwä ja, sicö joyamou bufio dijä.

19 Täbä mosi sicö lä joyamou wei tänö täbä bayelibloimi. Sicö joyamou lä mlai tä ma cuinö, öjö tänö täbä çai bayelibloimi mö feduwä. Yai Bada a nosie lä fuaö wejei tänö täbä shïlo bayeliblou.

20 Yai Bada tänö täbä lä nacano wei däjä, täbä cuo lä waiquiono weinaja täbä cadidiwä cuo showaobä.

21 Öjö tawä? Wa lä nacano wei däjä wa bä nosie fuabä wa tabou waiquiomaje ja, a nofi fujebamou fölijio dijä. Öjö ma cui, wa lä tabou wejei bä lä cuinö wa fujebäo ojodaoje ja, a yai da fujebamolü.

22 Bä nosie fuamobä wa lä tabou wejei wa lä cui, Bada tä lija wa bufi cuo ja, jai wa fujemoa waiquilayoma Bada tänö wa nofi tabou. Jesucristo lija wa bufi cuobä wa bufi malä fujebamono wei. Inaja showawä, bä nosie fuamobä wa tabou lä mlajei wa lä cui, shomi täbä lija wa ojodamou ma mlai ma cui, Jesucristo lija wa bufi cuo ja, cama Jesucristo lija wa yai ojodamobä wa tabou malä cui.

23 Jesucristonö wamacö nowa çomaquema. Öjö cudeenö, yanowamö täbä ç fuamobä wamacö tabobeje wamacömi. Jesucristo wama a nosie shïlo yai fuabä wamacö waiquiwä.

24 Öjö tawä, iba wamacö? Wamacö lä nacano wei däjä wamacö cuo lä waiquiono weinaja, wamacö cuo showaobä. Yai Bada tänö wamacö çai malä cule.

25 Bei. Täbä lä shïloco wei täbä ja, wamale lä wälino wei tä ja, ya wä faö nomöjja lä cule. Bada tä Jesucristonö ei tä çfa cadidiwä tano ma mlai ma cui, wamale ç nofi mölabobä ya. Yai Bada tänö wale nofi ojodabou yalo, yale ç malä bayelibläo wei.

26 Täbä lä shïloco wei, inaja täbä shïloco cuobä, ya bufi cuu. Bämalecö lä tamalajei tä cua yaia cudeenö, fei tä lä cui däjä, suwä bä doamobä tä malä mlai.

27 Suwä wa bou waiquiwä ja, a shïloco cuo ço bufio dijä. Wa shïloco waiquiwä ja, suwä a ajedamaö bufio dijä.

28 Öjö ma cui, suwä wa dääö ja, tä wälidiwämi. Inaja showawä, suwänö bä feyalobö a dääö ja, tä çai wälidiwämi. Tä wälidiwä ma mlai ma cui, täbä lä doayou wei showadi täbä shïlo yabäcäblou majöo dicoo. Bamacö yabäcäblou nofi jalujubou yalo ya wä.

²⁹ǃÖjö tawä, iba wamacö? Abenaja ya cuu. Yai Bada lija bämacö ojodamobä tä nö nia dedejbloimi waiquiwä. Shıloco täbä yabäcou mlai ja, täbä ojodamou cadidiwä lä culenaja, täbä suwäbö lä cule täbä çai cuaaö mö feduobä.

³⁰Inaja showawä, täbä bufi lä lofote wei täbä dodijidawä ojodamou lä cuaaö weinaja, ai täbä bufi ma ujudi wei ma cui täbä çai ojodamou cuo mö feduobä. Täbä bufi shi jalijiwä lä mlai täbä dodijidawä ojodamou lä cuaaö weinaja, täbä shi ma jalimou wei ma cui täbä çai ojodamou cuo mö feduobä. Madofi bä ja täbä yabäcou lä mlai täbä ojodamou dodijidawä lä culenaja, madofi täbä ma doaö wejei ma cui täbä çai cuo mö feduobä.

³¹Täbä ma cuaablalou wei ma cui, Yai Bada lija täbä bufi yai macocoo shalilio showaobä. Bluca tä lä cule tä malä mlaaimadi.

³²Wamacö yabäcou mlai ja, bämacö taamaö bufi doblaa lä cule. A walo lä shıloco wei, Bada a lija dodijidawä a ojodamou. Bada a bufi nia fa doblalamanö a cadidou ma cui,

³³bä suwäbö a çai lä culenö, bä suwäbö a bufi doblalamabä a shılo yabäcou, showadi bämacö lä yabäcäablalou weinaja showawä.

³⁴A bufi majöablalou. Suwä bä ma cui, inaja bä çai cuaaö mö feduo. Suwä moco a ma cui, bada waiquiwä a ma cui, a shıloco cuo däjä, Bada tä bufi doblalamabä a noshi umlao. Bei bufi ma cui, bei a ma cui, a wasöo. Bä feyalobö e çai lä cui, inaja a cuaaimi. Bä feyalobö e çai lä cui, showadi täbä yanowamö lä yabäcäablalou wei tä ja, a yabäcou dicoo, bä feyalobö e bufi nia fa doblalamanö.

³⁵Bämacö dodijamaö bufi doblao yalo ya wä. Bämacö yabäcamaö bufiomi. Wamacö bufi shedecou mlai ja, Bada tä lija doblao wamacö ojodamobä, bämacö yömöläö lä cule.

³⁶ǃÖjö tawä? “Ya ma suwäbömou wei ma cui, ǃwedi tabä ya li shıloco taamabou dicoo?”, ai a bufi cuu ja, a däabä, öjö lä. A bufi nö wasöobimi ja, bä suwäbö a dääö bufi doblao ja, a däabä. Cäcöbä doayou ja tä wälidiwämi.

³⁷Öjö ma cui, bufi cadidilanö a shıloco cuo bufi doblao waiquiwä ja, a bufi wasöμου dao waiquiwä ja, a dää dijä. A casimabobä. Tä dodijidawä waiquiwä.

³⁸Öjö tawä? Ai anö, bä suwäbö a ma dääö wei a dodijaö. Ai a mö feduwä lä cuinö, bä suwäbö a dääö ma mlai ma cui, a çai dodijaö. Öjö bei a yai dodijaö yaio.

³⁹Bä feyalobö e demi showao däjä, öja bä suwäbö e shılo cudibä. Bä feyalobö e mladou ja, ai a walo dääö bufi doblao ja, a dääö majöobä. Culenaja Bada tä lä daö wei a lija a shılo ajedobä.

⁴⁰Öjö ma cui, a yamiblou däjä a yami cudio ja, a bufi nia shılo doblao, ya bufi cuu. Camiyänö Yai Bada ya Bui çai malä tabole.

1 Corintios 8

- ¹Nö ijdubö täbä lija täbä yalo lä dodobou wejei tä ja, bamacö yömöläö majöo, wamale lä wälino wei tä ja. Awei, ai täbänö öjö bä yalo waö quili ma mlajei ma cui, ai täbänö bä shılo waö quili ayaoje. Öjö tä ja, bamacö bufi bluca dao waiquiwä. Öjö ma cui, “Camiyä wamacö bufi shılo dao ayawä”, wamacö bufi cuu dicoo ja, aifä bä lä quilijou wei wama bä nö bayeliblabimi waiquiwä. Wama bä yai nofimaö däjä, öjö däjä wama bä bufi shılo yai jaducäblamalei.
- ²“Ya bufi dao lä”, a bufi jole lä cuablalou wei a bufi jaducäbloimi showawä.
- ³Öjö ma cui, Yai Bada tä lä bufibou wei a lä cui, Yai Bada tänö öjö a nofi ibabou.
- ⁴Öjö tawä? Nö ijdubö täbä lija täbä yalo fa dodobojenö, täbä yalo ma waö wejei ma cui, ei bäma tä daö. Täbä nö ijdubö lä bufiblamou wei täbä demimi. A bufiblamobä moli Yai Bada a cua ayaa.
- ⁵Judu mösö jamö ma cui, bita jamö ma cui, täbä lä bufiblamou wei bluca täbä ąfa jayumaöje. Öjö tawä? Bluca täbä ma bufiblaö wejei ma cui, bluca täbä nofi ma badabou wejei ma cui,
- ⁶ma! Camiyä bamacönö moli bäma tä ąfa Yai Bada jayumaö, bamacö lä Föömole, bluca täbä lä tablaleno wei tä lä cui. Cama bäma ecö befi li. Moli tä shılo Bada cua, Jesucristo a wafa lä cule. Öjö lija täbä bluca tablamolayoma. Öjönö bämalecö fa çölanö Yai Bada bäma ecö cua lä cule.
- ⁷Öjö ma cui, ai bänö öjö tä daimije. Nö ijdubö täbä bufiblaö fa balöojenö, bä quili showawä. Nii täbä bädawä ma cui ja, jai yai cätä shomitawä lija bä nii liyamoma bä bufi fa cuanö, bä bufi shädayaimou. Bä bufi shädayaimolanö bä yalo waö fe fa yadiojenö, bä bufi wälidiblaliyo.
- ⁸Bäma bä lä waö wei, nii bei bä li bawä. Nii bäma bä lä waö wei bänö bamacö bufi bayeliblamoimi. Nii bä ja, bamacö lä waiyou wei tä ma cuinö, inaja showawä. Yai Bada tänö bämalecö nofimaö waiquia.
- ⁹Öjö tawä? Cafä wamacö bufi dao cudeenö, wamacö iyaö dao lä ma cui, bä bufi da jaduqueicu, a bufi lä quilijou wei wama a bufi wälidiamäö mlaobä.
- ¹⁰Nö ijdubö täbä lä bufiblaö wejei bä yododoobä jamö, cafä wa bufi lä dao wei wa iyaö fa dalalönö, a bufi wedinajamou cuquei. A bufi shedecou waiquiwä yalo, nö ijdubö täbä lija a bufi lulumou cuquei. A bufi lulumoa fa çolonö, öjö täbä lija a mölalanö a iyaö dicoquei.
- ¹¹Öjö tawä? Öjö däjä, cafä wa bufi lä dao wei wanö, a bufi lä shedequei wa yacläa fa dicomalönö, a waiyolayou. Jesucristo lija moli bamacö mashi ma cui, öjö a befi Jesucristo a çai nomaa ma lälayono wei ma cui, wa waia dicomalei.
- ¹²Cafänö aifä wa bä bufi wedinajamomaö dicoo däjä, bä bufi lä shedecou wei wa bä bufi wälidiamäö fa dicoonö, cama bä bädawä mlai, Jesucristo wa nö çai waiblaö.

¹³Öjö cudeenö, abenaja camiyä ya bufi li cuu. “Ya lä iyaö wei tä bädawä ma cuinö, öjö tänö aiyä ya bä bufi nia wälidiamäo dicoo ja, yalo ya waö çödaaö mlaicätä”, ya bufi cuu, ya bä bufi wälidiamäo mlaobä.

1 Corintios 9

¹Shomi täbä lija ya nosiemamobä yami. Jesucristonö wale lä shimöleno wei, öjö ya. Camiyä bei ya mamocunö Bada tä Jesús ya malä möno wei. Camiyä bei ya wəñö, öjö Bada wama tä malä bufiblaleno wei.

²“Jesucristonö wa shimano mlaicätä”, ai täbänö wale nofi ma tabou wejei ma cui, cafä wamacö lä cuinö, inaja wamale nofi tabobä wamacömi. Jesucristo lija wamacö bufi cuquema yalo, öjönö wale lä shimöleno wei wamale daö waiquiwä.

³Ya lä cuaaö wei tä ja wale wəliije däjä, abenaja ya shilo cuu talei.

⁴“Yama täbä lä yömölaö wei täbä lija, ¿yamacö nö liyobä yamacömi daanö?

⁵Camiyä yamacönö ¿suwä yama bä lulubobä tä cuaami daanö?”, ya cuu. Jesucristonö bä lä shimöleno wei ai bä mö feduwä lä cuinö, bä suwäbö bä çai malä fuu wejei. Inaja showawä, Bada tä Jesucristo bä fäähä ebä ma cuinö, Pedro a ma cuinö, bä suwäbö bä çai fuu mö malä feduo wejei.

⁶Ai täbä no mlai ja ma iyamaö wejei ma cui, ¿wedi tabä Benabei sho yafäcö fa ojodamonö yafä täbä nii nowa çowa ayamaquei?

⁷Täbä lä bulaö wejei, ¿täbä nofi lä iyamaö wejei! ¿Öjö tawä? Täbä ficalimobä ja täbä lä yädäo wei täbä nö çai malä liyamaö wejei. ¿Öjö tawä? Oweja bä lä nowamaö wejei, öjö täbä yalo showawä ja täbä çai malä dodijou wei.

⁸Yanowamö täbä ç bädawänö ya wə faimi. Yedu ja Yai Bada etä ç oni cuo malä balöono wei.

⁹Yalo bä lä ojodamomano wejei jamö, täbä nö yalo ofili bleaaö mlaobä, Moisesi lija tä ç oniblamalema. Abenaja tä ç oni cuu. Nii wa şicosi loşhiblamabä, yalo bä lija wa şicosi cablushamabä jamö bä iyaö mlaobä, wa bä fiyoca nia çcaini. Einaja tä ç cuu. Yalo bä lä ojodamomano wejei jamö bä nö yalo ofili bleaamaö mlaobeje, tä ç oniblamalema. Öjö ma cui, ¿wedinjaja wamacö bufi li cuu? ¿Yalo a nofi ofili jalubou fa ayaonö tä ç li cuoma daanö?

¹⁰Mlaicätä. Camiyä bämacö befi tä ç malä cui. Öjö tä ç ja bämacö bufi li yai jaducäblobä tä ç li. Ficali täca ja täbä jaba lä queo wei täbä ma cui, bä nii yacumö lä taö wejei täbä ma cui, nii bä bufibolajenö täbä bluca ojodamobä lä tä ç.

¹¹Inaja lä showawä, cafä wamacö lijamö yamacö ojodamoma yalo, cafä wamacö lija yamacö bayeliblamobä yamacö waiquiwä. Yai Bada etä ç ja bämacö bufi lä jaducäblamaleno wei tä nowa ja, yamalecö bayelibläö mö feduobä.

¹²Yai Bada etä ç ja, ai täbänö wamacö yömölaö mö walooje däjä, wama täbä bayelibläö malä cui. ¿Öjö tawä? Öjö wama bä bayelibläö lä cuaaö weinjaja, camiyä

yamacö lä cui yamacö bayeliblamobä bei yamacö yaiwä. ¿Öjö tawä? Yamalecö bayeliblabä tä ma cule ma cui yamacö a fanomi, wamacö fa jushudalunö wamalecö a jiliaö mladou dicolo. Cristo yama tä a wäyää bufi fa doblaonö, dodijidawä wama etä a jiliabä, wamicai yamacö nö bleaaö bädao.

13 ¿Wama tä daimi tawä? Judio bada täbä lä cui, Yai Bada etä yafi jamö täbä lä ojodamou wei, öjamö lä showawä täbä nö malä liyo wei. Yalo bä lä dodobou wejei bä lä cui, öjö bä yalo showawä ja täbä nö çai malä liyo wei.

14 Bada tä Jesucristonö, inaja showawä täbä taamaö bufima. Cama dodijidawä etä a lä wäyää wejei täbä bayeliblamaö bufima.

15 Öjö ma cui, yamalecö dobäbä tä cua ma cule, yamacö a faimi. Ei ya wä ma cui ya nacoimi. No mlai ja ya tä a shilo wäyää bufi doblao. “Yai Bada etä a lä wäyääno wei tä nowa nacaö dicooma”, bä cuu mlaobä ya nacoimi. Ya ofili ma nomaö wei ma cui ya nacou mlaicätä.

16 Jesucristo dodijidawä ya tä a wäyää tä nowa ja, ya dodijaö jimöobä tä cuami. Ya tä a wäyääbä ya waiquiwä malä cui. Ya tä a wäyääimi dicoo ja ya nö bleaaö cuquei.

17 Camiyänö ya täbä yömölaö bufi doblao fa buonö ya ojodamou fa cunoja, ya dobämou lä mlai tä ja, ya bufi nö ma jalujobö wei ma cui, inaja tä cuonomi. Jesucristo ya tä a wäyääbä, Yai Bada lija ya yaimoa cadidilayoma. Wale yaia cadidilema cudeenö, ya dobämou ma mlai ma cui, ya noshi umlaobä tä cuami. Wale malä yaileno wei.

18 ¿Öjö tawä? ¿Wedi tä ja ya tä a li wäyää bufi doblao? Wedi tä ja mlai. Ya bä lä yömölaö wei bä lija ya nacobä tä cua ma cule, no mlai ja Jesucristo ya tä a dodijidawä lä däamaö wei tänö, ya bufi doblalou waiquiwä.

19 Yanowamö täbä lija ya nosiemamobä ya ma mlai lä ma cui, Yai Bada lija ya bä fucäämabä, wale taamaö bufi lä doblao wejei tä ja, bluca täbä lija ya ojodao talei. Inaja ya cuaaö talei.

20 Judio täbä lä cui ya täbä bufi jaducäblamabä, dodijidawä ya bä çai cuoma. Ya bä jushuamaö mlaobä, cama judio showadi bä lä cuaaö weinaja ya cuaaö naleoma. Inaja showawä, Moisesi tä a nofi lä yaibou wejei ya täbä bufi jaducäblamabä, dodijidawä öjö ya bä çai cuo mö feduoma. Moisesi tä a ja ya nosiemamobä ya mlai ma cui, jai ya nosiemamobä ya ojodao cuoma. Dodijidawä wale a jiliabeje, ya täbä jushuamaö bufionomi.

21 Judio bä lä mlai ya täbä bufi jaducäblamabä, dodijidawä öjö ya bä çai cuo mö feduoma. Judio showadi bä lä cuaaö weinaja ya cuaaö mlalaliyoma. Öjö ma cui, Yai Bada ya wä cadidibou showao fe yadioma. Cristo ya nosie fuaö dodijidaoma, Yai Bada etä a jiliabeje.

22 Bä bufi lä quilijou wei ya bä bufi jaducäblamabä, dodijidawä öjö ya bä çai cuo mö feduoma. Cama bä bufi lä quilino wei tä ja, bei ya bufi çai wasömou showaoma, öjö ya bä bufi çai jaducäblamabä. Yanowamö ya bä yömölaö bufi lä doblao wei däjä,

cama bä lä cuaaö weinaja ya çai cuaaö mö fa feduonö, dodijidawä tä a jiliaöje. Inaja ya cuaaö lä majöablalou wei tänö, Jesucristo a nofi lä mölabou wejei däjä ai ya bä fucäamaö fe yadio wä.

²³Jesucristo dodijidawä tä a jilimamou blaucofälöbä inaja ya cuaaö talei. Bä bufi fa jaducäblalunö, Yai Bada lija bä lä bayeliblamou wei tä ja, ya bufi çai doblalou mö feduobä.

²⁴Täbä lobe lä wabayou wei wama tä daö. Täbä wabayou däjä, täbä bluca nö walojodou ma cui, ai moli a nö yai walojaö lä dodijio wei a nia dobämou ayao. A nö walojaö lä ayao wei a lija, a dodijaö jimabeje etä nia shilo yojoqueije. Inaja showawä, Yai Bada tänö cama ebä lä dodijaö wei bä nia çai dobäö. ¿Öjö tawä? Öjö lija wamacö dobämou mö feduobä, bä bufi nö çai da walojolö.

²⁵Bä wabayou bufi lä doblao wei bä nö nia walojaö fa ayaonö, täbä lä ujudamaö wei tä ja, täbä noshi umlao si ijejewä. Yanowamö täbä lija bä nia fa dobämonö, bä noshi umlao. Tä nowa cudio ma mlai lä tä ma cui ja, bä fe nia fa yojoonö bä wasömou. Camiyä bämacö lä cui, Yai Bada lija bälimi tä ja bämacö dobämobä, bei bämacö yai wasömou yaiohä.

²⁶Öjö lija ya wafa nö walojaö tamobä, ya dodijaö macocafälöö. Yai Bada lija bejedi ya ojodamou. Jole jole täbä imicö bushi yalejedou bädao malä mlai.

²⁷Camiyä ya cuaaö bufi doblao lä bädao wei tä ja, ya cuaaö mlai ja, Yai Bada lija ya bufi taamamou cadidiobä. Ya noshi umlao, ai ya bä cadidamaö ma balöono wei ma cui, ya dobroimi majöa fa dicoicunö, Yai Bada tänö wale casöblamaö majöö mlaobä.

1 Corintios 10

¹Iba wamacö. Nö badabö bä jaba lä cuaano wei tä ja, bämacö mojudumabou bufiomi. Öjölashi a feyacao däjä, täbä bluca nowamamofälöma. Modu Wacä u jamö, täbä wejediwä bucaduquefälöma.

²Öjölashi a nofi mojodi jamö Moisesinö bä çai lä funo wei däjä, modu u bada çojomo jamö bä çai lä funo wei däjä, jai bä möfe bluca ojomamoma bä cuaafälöma, Moisesi ebä li jimamobä. Moisesinö bä lä nocamabono wei jamö bä bayeliblamou mö fa feduonö, a wä fuaaö ojodaomaje.

³Yai Bada tä nö lä walojaö wei tänö, yai täbä niibö fa blälämalalönö, öjö täbä ja Moisesinö bä çai bluca iyama.

⁴Maa ma ja, Yai Bada tä lofotenö mau ubä fa famalönö, täbä amishi bluca çöoma. Öjö yai ma ja, täbä bayeliblamou cuaafälöma. Öjö maa ma lä nojaono wei, Cristo bei ma li cuo showaoma.

⁵Öjö ma cui, ai bluca täbä nofi jushuaö fa majöonö, Yai Bada a Bufi doblaonömi. Tä ulufi wälidiobä jamö täbä nomawä bluca malä yabucuumobodayono wei.

6 ǃǃǃǃ tawä? Yai Bada tänö ǃǃǃǃ bä nö badabö taamaö lä cuaano wei tä ǃ ja, bamacö wasöobä tä ǃ li. Wǃlidiwä tä lä cui ja, ǃǃǃǃ bä bufi yaimou lä cuaano weinaja bamacö bufi yaimou cuaaö mlaobä.

7 ǃǃǃǃ tawä? Nö ijidubö täbä bädawä ma cui, ai täbänö täbä nö ijidubö bufiblaö lä cuaano wejeinaja, bä cuaa dijä. Täbä nö ijidubö nofi doablaö fa dicoojenö, abenaja tä ǃ oni taa malä balöqueno wei. Täbä iyabä, toubä ǃai coabeje, täbä loquema. Täbä ǃliyamobä, täbä jocäcälaliyoma. Einaja tä ǃ cuu.

8 Ai täbä nofi lä jushublalou weinaja bamacö ǃai cuaaö mlai. Inaja bä cuaaö fa dicoonö, moli tä mö jalu ma cui ja, 23.000 bä nomaa showadalaliyoma.

9 Yai Bada bäma a jushuo ǃai lulubou mlai. Inaja ai bä cuaaö fa dicoonö, olu bänö bä bluca waicama.

10 Bamacö ǃai nacömou mlai. Inaja ai bä cuaaö fa dicoonö, Waicalewä a lä cuinö täbä bluca waicaö showadaoma.

11 Ai täbä mö feduwä lä cui täbä quiliblobä, inaja Yai Bada tänö täbä jaba taamama. Camiyä bamacö ma cui, bamacö ǃai quiliblou nodiobä tä ǃ oniblamalema. Tä nia lä jödödöblou wei tä ajedou malä cui.

12 Tä nö nia dedeaimi waiquiwä yalo, bä bufi da moyaweicu. “Camiyä ya bufi li lofote waiquiwä”, wa bufi lä cuu wei, wa nia dobloimi majöö.

13 Wamacö bufi lä wabamou wei tä ja, wamacö bufi wedinajamou mlai. Showadi täbä yanowamö bufi wabamou lä cuaaö weinaja wamacö wabamou cuaaö showawä. ǃǃǃǃ ma cui Yai Bada wama a nofi mölabou showaobä cätä. Wamacö nö bleaamaö mlaicätä. Wamacö bufi ma wabamou wei ma cui wamacö nia bayeliblaö showao, wamacö nö wǃlojaö fe yadiobä.

14 Iba bamacö lä nofimaö wei wamacö lä cui. Yai Bada lija wamacö nia bayeliblamou waiquiwä yalo, nö ijidubö wama täbä bufiblaö dicoo mlai. Täbä waia da showadaalöje.

15 Wamacö bufi moyawe yalo bamacö yömölaö lä cule. Ei ya wǃ lä fale tä ja, bä bufi da daeo.

16 Jesucristo a shämoa lä lälayono wei bäma tä nofi jaducäbobä, uba bäma toubä lä coaö wei toubä ja, Yai Bada lija bamacö bufi ǃfa doblalou wäyämou talei. Jesucristo ǃyäbö ja bamacö bufi bluca bayeliblamoma yalo, bäma ǃyäbö nö ǃle coaö. Nii bäma a lä cleaö wei bä ma cui ja, inaja showawä. A lä shämolayono wei tä ja, bamacö bufi ǃai bluca bayeliblamoma yalo, bei bäma a nö ǃle ǃai waö.

17 Nii moli cäcö cua, ǃǃǃǃ tawä? Camiyä bamacö ma bluca wei ma cui, nii moli cäcö ja, bamacö iyaö. Nii moli cäcö ja, bamacö bluca iyalanö, Jesucristo lija bamacö lä moliblaliyono wei bäma tä jimaö.

¹⁸Isaeli ebä lä cuaaö wei tä ja, bä bufi da daeo. Yai Bada lija a dodobobeje, yalo a shäöje. Öjö tä yalo ja bä bluca lä iyaö wei, bä nofi tamayolanö bä iyaö. Yai Bada tä nofi mölabolajenö, bä yalo waö mö feduo showaoje.

¹⁹¿Öjö tawä? Nö ijidubö täbä lija nii a lä dodobou wejei nii ja, wa caficö shamiaö mlaicätä. Nii a bädawä. Nii täbä shominajablabeje täbä nö ijidubö demi malä mlai. Nö ijidubö täbä li bädawä.

²⁰Öjö ma cui, abenaja ya cuu. Bä bufi lä mojodi wei bä lä cuinö, bä nia fa bayeliblamonö bä nii dodobouje. Inaja bä cuaalanö, fecula bä nofi yai mölabouje, Yai Bada mlai. ¿Öjö tawä? Fecula bä nofi lä mölabou wejei bä lija bamacö coyocomabou bufiomi.

²¹Bada a nomaa lä lälayono wei wama a nofi jaducäbobä, uba nashiwä wama toubä coaö waiquia ja, fecula bä befi lä cui ja wamacö nö liyo mö feduo daomi. Bada wama tä nofi jaducäbobä nii wama täcö waö ja, fecula bä befi lä cui ja wamacö nö liyo mö feduo daomi.

²²Inaja bamacö cuaaö dicoo ja, Bada a lä culadi bäma a li jushuamaö cuquei. Fecula bä lija bämalecö nofi malä jalubou wei. ¿Öjö tawä? Bäma a lä jushumalei wei däjä bamacö nö nia wəlojaimi.

²³Abenaja täbä cuu. “Ya cuaaö bufi lä doblao weinaja ya cuaabä lä. Tä ą läa malä mlai”, täbä ma cuu wei ma cui, inaja bä lä cuaaö wei tänö bä bayeliblamoimi. “Tä ą läa malä mlai”, bä ma cuu wei ma cui, inaja bä lä cuaaö wei tänö, täbä bufi lofotoblamaimije.

²⁴Cama cäbä dodijaö ayaobä bä shi shılo jalimou mlai, ai bä mashi dodijamabä bä shi yai jalijobä.

²⁵Yalo bä lä lulaö wejei jamö wamacö bufi quilijou mlai, bä da däleje. Yalo bä ja wama bä wəlii mlai bä da walöje.

²⁶Abenaja tä ą oni cuu malä balöono wei. Bitä tä lä cui, Bada etä. Öjamö täbä bluca lä cublai täbä ma cui, cama etäbä showawä. Einaja tä ą cuu.

²⁷Jesucristo bufilewä lä mlai a lä cuinö wamacö nacaö däjä, wamacö fuu bufi doblao ja wamacö fubä. Wamacö lä dobämou wei tä ja wamacö iyabä. Yalo bä ja bä wəli dijejä, wamacö bufi quilijou ą iyaö dicoo mlaobä.

²⁸Öjö ma cui, ai a bufi lä quilijou wei a wə faö ja, “Täbä nia fa bayeliblamonö nö ijidubö täbä lija, ei bä yalo dodobou dicoo lä cufajei”, a cuu ja, bä yalo wa dijejä, öjö wama a bufi nö bleaamaö mlaobä.

²⁹¿Öjö tawä? Cafä wamacö bufi quilijou ma mlai ma cui, cama a bufi shılo quilijou ayao ja, yalo wama bä nia waimi. Abenaja ai wa bufi cuu jətoo fa cui, “Camiyä ya bufi lofotolanö ya bä nö walebö ma cui, ą wedi tä tabä ai a bufi lä quilijou wei tänö, ya bä li waia dicolei?”

³⁰Yai Bada lija ya bufi doblalanö ya bä nö walebö ma cui, ¿wedi tä tabä ya li wasömou majöquei?”, wa bufi cuu jãtoo fa cui.

³¹Abenaja. Wamacö lä iyaö wei tä ma cui ja, wama toubä lä coaö wei tä ma cui ja, jödödöwä wama tä lä taö wei tä ma cui ja, Yai Bada wama a nofi dodijaö doablamabä wamacö.

³²Judio bä ma cui, judio bä lä mlai bä ma cui, bä bufi nö bleaama dijejä. Yai Bada ebä lä yododaö wei bä ma cui, inaja showawä.

³³Camiyänö ya täbä bufi shïlo bluca doblalamaö lä bufio weinaja, wama täbä bufi taamaö mö feduobä. ¿Öjö tawä? Camiyä ya dodijabä ya shi jalimou mlai, ai ya bä dodijamabä ya shi lä jalijou weinaja wamacö cuaaö mö feduobä. Jesucristo a nofi mölabolajenö, täbä fucäamou fe yadiobä.

1 Corintios 11

¹Cristo ya owämaö lä cuaaö weinaja, wamale owämaö cuaaö mö da feduo.

²Wamacö dodijaö waiquiwä yalo, cafä wamacö lija ya bufi doblalou. Ya lä cuaaö wei wamale nofi jaducäbou yalo ya bufi doblao. Cafä wamacö lija ya tä ʘ wäyäö fe lä dolemono wei, wama tä ʘ nofi cadidibou ja, ya bufi çai doblalou.

³Öjö ma cui, ei wama tä ʘ çai dääö mö feduobä. Walo bä lä cui, Cristo a nosie fuabeje cäbä. Inaja showawä, suwä bänö bä feyalobö ebä nosie fuaö mö feduobeje. Cristonö cama Yai Bada tä nosie fuabä, öjö bei a.

⁴Yai Bada wama ecö lä yododaö wei däjä, walo wamacö lä cuinö, Yai Bada lija wamacö nö bayeli nacao ja, fe yojolanö wamacö ʘ nia faimi. Inaja showawä, wama etä ʘ wäyäö ja, fe malocolanö wama tä ʘ nia wäyäö. Fe yojolanö wamacö nö bayeli nacao dicoo ja, fe yojolanö wama etä ʘ çai wäyäö dicoo ja, tä doblaami. Jai Cristo wama a nö waibläö tä cuwä dicoo.

⁵Öjö ma cui, inaja suwä bä nia cuaaimi. Wamacö lä yododoo wei jamö, fe yojoo mlalanö Yai Bada lija suwä bä nö bayeli nacao dicoo ja, fe yojoo mlalanö etä ʘ çai wäyäö dicooje ja, tä doblaami. Jai bä feyalobö bä nö waibläöje tä cuwä. A fe suwä malocoshibläöje däjä, a mömou nö quilijiwä lä culenaja tä cuwä.

⁶¿Öjö tawä? Cama suwä bä fe yojoo bufiomi dicoo ja, bä feta ucu joyamou showaobä, öjö lä. Öjö ma cui bä fe malocoblamou quili ja, bä fe yai yojobä, öjö lä.

⁷Walo täbä fe yojobä tä cuami. Yai Bada tänö cama a lä culenaja a walo tabläö malä cadidiono wei. Täbä fe yojoomi anö, Yai Bada tä nö lä walojaö wei tä jimaöje. Öjö ma cui suwä bä fe nia shïlo yojoo. Bä fe yojoo anö, jai bä feyalobö e ʘfa doblao taöje tä cuwä.

⁸Suwä a ja, walo a tablano malä mlai. Walo a ja, suwä bei a tablalema.

⁹Ei malä cui. Suwä a befi walo a tablanomi. Ma, walo a befi suwä bei a tablalema.

- 10** Öjö cudeenö, suwä a fe nia shïlo yojoo. Bä feyalobö e afa bada taö ja, a fe yojoquei. Ajele bä lä doblaladi bä mamö malä showale.
- 11** Inaja tä cua ma cule, Bada tä Jesucristo lija bämacö bufi lä cuo wei, bämacö nofi taboyobä bämacö. Walo bänö suwä bä bufiblaö lä cuaaö wejeinaja, suwä bä ma cuinö, walo bä çai bufiblaö mö feduo showaoje.
- 12** Walo a ja, a suwä jaba ma tablalenö wei ma cui, fei däjä suwä lija walo bä cublou nomöjöö malä cui. Suwä wamacö ma cui, walo bämacö ma cui, Yai Bada tänö bämalecö bluca malä tablaö wei.
- 13** ¿Ei wama tä nö bejedi öjöböaimi tawä? Wamacö lä yododaö wei jamö, fe yojoo mlalanö Yai Bada lija suwä bä nö bayeli nacao ja, ¿tä mömou nö quilijiwämi daanö?
- 14** Yedu ja ma cui, inaja Yai Bada tänö täbä bluca malä taamano wei. Walo täbä möcö labe malä mlai. Täbä feta ucu nofi labe jushuwä.
- 15** Öjö ma cui suwä bä möcö lä labaö wei däjä, bä nofi liyäjäwä doablaöje. Jai bei feta ucu ja bä fe yojoo showaobä, bä feta ucu shïco malä jibämoqueno wei.
- 16** Inaja ya bä nowa shïlo ma taö wei ma cui, ai anö wale a jiliaö bufiomi ja, abenaja ya cuu. Yama täbä lä yömölaö wei jamö, inaja yama täbä shïlo taamaö. Shominaja ya täbä taamaö majöobä tä cuami. Yai Bada lija täbä bluca lä yododaö wei, inaja täbä shïlo bluca cuaaö blaucou.
- 17** Ai tä ja wamacö ma dodijaö wei ma cui, ya tä a nia wäyää lä nomöjöö wei tä ja, bämacö afa dodijaö taimi. Wamacö lä yododaö wei däjä wamacö dodijaimi. Wamacö bufi bayeliblayoimi, wamacö bufi shïlo waldiamayou dicoo.
- 18** ¿Öjö tawä? Abenaja balöwä. Wamacö lä yododaö wei däjä wamacö a jowa jiliayoimi. Ai wama bä a jiliaö mlai, wama bä nofi lä yaibou wei wama bä a shïlo macocaö dicoo. Öjö ya tä a lä jiliaö wei däjä, “Tä a bejedi jatoicätä”, ya bufi cuu.
- 19** Showadi inaja täbä malä cuaaö wei. Ai täbä shominajaaö mlao fa cunoja, täbä lä bejedimou wei täbä nö bejedi dablamobö mlai.
- 20** Wamacö bluca iyaö mö yododaö däjä, “Bada tänö tä lä jimöqueno wei, yama tä taö lä cule”, wamacö bufi jole cuu ma cui, wama etä taimi.
- 21** Abenaja ai bä malä cuaaö wei. Nii bä çai waloqueije. Ai bä nö dabou mlajei bä balöö fa dicoonö, bä shïloco lä waloo wei bä daleije. Ai bä ofi nö bleaaö. Ai bänö nashiwä toubä bluca coaö fa ayaojenö, bä shi waliblou.
- 22** ¿Wedinaja tawä? Wamacö iyabä, wama toubä coabä, ¿wamacö yafibö cuami tawä? Yai Bada ebä lä yaibole, ¿wama bä nö waiblaö dicoo tawä? Bä lä ofää wei, ¿wama bä bufi quilijamaö dicoo tawä? ¿Wedinaja bämacö nowa li taö dodijibä? ¿Bämacö nofi dodijaö doablabä daanö? Ma, öjö tä ja bämacö nofi doablaimi.
- 23** Bada tä Jesucristo lija camiyänö ya tä a lä däleno wei, çafä wamacö lija ya tä a fe dolemaö waiquioma. Abenaja tä cuoma. Bä nö lä nabämono wei bä lija, Bada tä Jesús a jimaö fe jaluo lä bufiono wei däjä, nii a dälema.

²⁴Nii a ja, Yai Bada lija a bufi ɸfa doblalou fa wäyämonö, a joyolalema. Abenaja bä nowa tama. —Ei nii a lä cui, camiyä ei bei ya yaji nö owä. Cafä wamacö bayeliblamobä, ya nia lä jiböo wei. Bamacö iyaö lä cuaalenaja bä cuaaö da juo, wamale nofi jaducäbobä, —bä nowa tama.

²⁵Inaja showawä, bä fa iyalönö, jishöma a ja, nashiwä toubä befi çai dää nomöjölema. Abenaja a cuu nomöjöoma. —Yai Bada tänö tä ɸfa lä wäqueno wei tä ɸ bejedi cublobä, öjö bei lä ya iyäbö nö owä. Öjö wama tä ɸ nofi dude jaducäbobä, ei a li jishima. Wamacö yododoo juobä jamö, bamacö iyaö lä cuaalenaja bä cuaaö da juo, ei wama toubä coaö däjä showadi wamale nofi jaducäbou juobä. Einaja Jesús a cuma.

²⁶Öjö tawä? Nii ya wafa lä tafe a ja wamacö lä iyaö wei däjä, Bada tä Jesucristo a lä nomalayono wei wama tä malä jimaö wei. Ya tä ɸfa jishöma lä tafe tä ja wama toubä lä coaö wei däjä ma cui, inaja showawä. Wama a nö dabolano, inaja wamacö nia shilo cuaadii.

²⁷Öjö cudeenö, Jesucristo a nö waiblalajenö täbä iyaö bädao dicoo ja, bei yajicö lä cacablamolayono wei yajicö nö shilo yai waiblaöje. A nö waiblalajenö toubä coaö bädao dicooje ja, bei iyäbö lä falayono wei iyäbö nö shilo yai waiblaöje.

²⁸Cama täbä bufi bejedimou mömou fa balöonö, nii a shilo wabeje, toubä shilo coabeje.

²⁹Jesucristo a nö waiblalajenö yajicö nö owä waöje ja, bei iyäbö nö owä coaöje ja, Yai Bada tänö tä nowa malä tabou wei.

³⁰Öjö tä nowa ja, ai wamacö bluca ujduu, wamacö çai jaliliaö, ai wamacö cuami malä waiquii.

³¹Öjö ma cui, camiyä bamacö bufi bejedi mömou fa balöonö, bufi jaducälanö bamacö iyaö ja, Cristonö bämalecö nia jimaimi.

³²Öjö ma cui, Bada tä lä culadinö bämalecö dobroimi jimaö däjä bämalecö cadidamaö showawä, yanowamö täbä bluca waimou däjä, bamacö waimou naleo mlaobä.

³³Öjö tawä? Iba wamacö. Wamacö iyaö çai lä yododaö wei däjä wamacö nö daboyobä, öjö lä.

³⁴Ai a ofi bädawä ja, wamacö iyaö yododaö showao mlao däjä cama e yafi jamö a iyaö balöobä, wamacö lä cuaaö wei tä ja Yai Bada lija wamacö ɸfa tamou mlaobä. Bei. Wamale lä wälino wei ai tä ja, cafä wamacö lija ya lä waloquei wei däjä bamacö yömölaö cadidio wä.

1 Corintios 12

¹Iba wamacö. Yai Bada tä Bufinö bämalecö bayeliblabä bämalecö dobäo talei. Bamacö nö wäljabä täbä lä jibädaö wei täbä ja, bamacö mojudumabou bufiomi.

²Yai Bada wama a dano mlai ja, wamacö bufi jaba yacläablaloma. Täbä ɸ nö ijidubö faö ma mlai ma cui, wama täbä bufiblaö dicooma.

³Wamacö bufi jaba yacläma yalo bämacö cadidamaö lä cule, wamacö bufi wedinajamou mlaobä. ¿Öjö tawä? Yai Bada tä Bufinö a wä lä faö wei a lä cui, Jesús a wafa nia wäliwä taimi. Inaja showawä, Yai Bada tä Bufi lija a bufi taamamou lä mlai a lä cui, “Jesús Bada cätä waiquiwä”, a nia cuimi.

⁴Täbä nö bluca wälojaö shedecobä, Yai Bada tänö täbä dobädaö. Täbä nö wälojobamabä täbä lä jibäö wei täbä bluca shomiblawä ma cui, Yai Bada öjö a Bufi showawänö, täbä bluca jibäö cuaaö.

⁵Yai Bada lija täbä ojodamou shedecobä tä ma bluca wei ma cui, Yai Bada moli tä showawä lija täbä bluca ojodamou.

⁶Täbä ojodamou shedecobä jamö täbä bluca dodijabä, Yai Bada tänö täbä nö bluca wälojobamaö shedecou showao.

⁷Yai Bada tänö täbä bufi bluca fa jaducäblamanö, tä Bufi läa nö öjöböleije. Tä lä jibädaö wei tänö täbä nö fa wälojobonö, Jesucristo ebä bluca bayeliblamou.

⁸Yai Bada tä Bufinö, ai a wä nö fa wälojoblamanö, a wä faö moyawäobä etä jibäö. Ai a wä nö fa wälojoblamanö, a wä faö walalaobä etä jibäö mö feduo, öjö tä Bufi showawänö.

⁹Ai a bufi nö fa wälojomabonö, öjö tä Bufi showawänö Yai Bada tä nofi mölabobä etä jibäaö. Öjö moli tä Bufi showawänö ai a bufi fa lofotomabonö, jalili bä jalomabä etä çai jibäaö mö feduo.

¹⁰Ai a nö wälojoblamaö mö fa fedulonö, tä nö lä quilijii tä wawämabä etä li çai jibäaö mö feduo. Ai a nö wälojoblamaö mö fedua fa showadalonö, Jesucristo ebä lä yododaö wei jamö etä a wäyabä etä çai li jibäaö. Ai a mö feduwä lä cui, a bufi moyawämabou yalo, tä a lä wäyämou wei tä a nö bejedi öjöböamobä etä li çai jibäaö mö feduo. Yai Bada tä Bufinö täbä bufi lä taamaö wei däjä, tä nö bejedi öjöböaö showaobä. Fecula bä läo lä jatoö wei, öjö bä nö öjöböaö mö feduo showaobä etä çai jibäaö. Ai a mö feduwä lä cui a fa bayelibonö, a caficö a shominajaalanö tä a wäyabä etä çai jibäaö showadao. Ai a bufi fa bayeliblanö, a caficö a lä shominajaaö wei tä a ja a bufi jaducäblobä etä çai jibäaö, tä a fe dolemabä.

¹¹Yai Bada moli tä Bufi showawänö etäbä bluca jibädaö fa cuaanö, camanö täbä dobäo lä bufi weinaja, täbä dobäo cuaaö.

¹²Yanowamö wa moli ma cui wa bayucuwä. Wa bayucuwä ma cule wa moli showawä. Cristo lija bämacö lä yädäo wei, inaja tä cuwä mö feduwä.

¹³Yai Bada tä Bufinö, Cristo lija bämalecö bluca yädämaquema. Judio bä ma cui, judio bä lä mlai bä ma cui, täbä a fuamobä bä lä tabou wejei bä ma cui, bä tabou lä mlajei bä ma cui, Cristo lija bämalecö bluca yädämaquema. Yai Bada tä Bufi ma moli wei ma cui, bluca bämacönö bäma a Bufi tabou. A bälöo shedequewä.

¹⁴Wa lä bayucui wa tetewä.

- 15Bei wa mamicö a faö fa cunoja, “¿Wedi tabä bei ya imicö shïlo cuo mlai, ya mamicö li cua dicoquema?”, wa mamicö cuu fa cunoja, ¿wa mamicö bayucuwä mablou majölayou daanö?
- 16Bei wa yömöcacö a faö fa cunoja, “¿Wedi tabä bei ya mamocu shïlo cuo mlai, ya yömöcacö li cua dicoquema?”, wa yömöcacö cuu fa cunoja, ¿wa yömöcacö shadio mablou majölayou daanö?
- 17Bei wa mamocu shïlo yami cuo fa cunoja, ¿wedi tänö wa tä a nö li jililebö wei? Bei wa yömöcacö shïlo yami cuo fa cunoja, ¿wedi tänö wa tä nö li uçucabö wei?
- 18Öjö ma cui, inaja Yai Bada tänö bämalecö tablanomi. Bämalecö bayucamaö lä bufiono weinaja, inaja showawä bämalecö tablaö showalayoma.
- 19Wa bayucuwä mlao fa cunoja yanowamö wa nö cuobö mlai.
- 20¿Öjö tawä? Wa bayucuwä ma cui moli wa waiquiwä.
- 21Bei wa mamocu ma cule ma cui, wa imicö bufiblamou. Bei wa fe ma cule ma cui, wa mamicö bufiblamou.
- 22¿Öjö tawä? Ai wa lä bayucui tä bufiblamoimi ma cui, wa yai bayeliobä cätä.
- 23Ai wa lä bayucui tä ma cui, tä mömou shïloco quilijio mlaobä wa tä baushibläö. Wa tä wawädobou lä quilii wei wa tä lucämaö.
- 24Wa tä wawädobou quilii lä mlai wa tä lucämaimi. Öjö ma cui, Yai Bada tänö wa bayucublamaö lä cuaano wei tä ja, ai täbä nö bufiblamobö ma mlai ma cui täbä yai bufiblamou.
- 25¿Öjö tawä? Öjö cudeenö wa lä bayucui täbä nö nia bleaamayoimi, täbä nia yai bayeliblayou.
- 26Ai wa mashi lä bayucui tä nini balaö däjä, wa nini jödödöblaliyo. Inaja showawä, ai wa mashi lä bayucui wa bayeliblou ja, bei wa comi ayäyaimou cuquei.
- 27Jesucristo lija wamacö lä cule, jai moli wamacö bayucuwä cuwä. Jesucristo lija wamacö bluca yädäa.
- 28Cama ebä lä yododaö wei bä bayeliblayobä, Yai Bada tänö bä nö bluca wälojomabou. Jesucristonö yamalecö lä shimöleno wei ei yama ecö balöwä. Öjö däjä, cama ebä yododabä jamö Yai Bada etä a wäyäbeje ai bä çai tablamaö nomöjööma. Öjö däjä, cama ebä damabeje ai cäbä. Öjö däjä, tä nö lä quilijii tä wawämabeje, öjö bä çai mö feduwä. Öjö däjä, jalili täbä jalomabeje, öjö bä çai. Täbä bayeliblabeje bä çai. Täbä cadidamabeje bä çai. Täbä caticö a shominajaalanö etä a wäyäbeje bä çai.
- 29¿Öjö tawä? A wano wäyäö cuaabeje, Jesucristonö bluca jödödöwä täbä shimaimi. Cama ebä lä yododaö wei jamö Yai Bada etä a wäyäbeje, täbä çai bluca tablaimi. Inaja showawä, Yai Bada etä a ja täbä damabeje, täbä bluca cublou malä mlai. Tä nö lä quilijii tä wawämabeje, täbä nö bluca çai wälojamaimi.

³⁰Jalili täbä jalomabeje, täbä bluca dobäimi. Täbä caficö ʼ ʼ shominajaanö täbä ʼ ʼ fabä, täbä çai bluca cuomi. Öjö bā caficö ʼ ʼ lä shominajaaö wei bā ʼ ʼ fe dolemabeje, täbä çai bluca dobäimi.

³¹Bamacö bayeliblayobä, Yai Bada tä Bufinö bluca täbä ja bämalecö dobäö ma shedecou wei ma cui, tä yai lä dodijidai tä da bufiblaje. ¿Öjö tawä? Fei dājä, dodijidawä tä yai lä cui ya tä nia jimaö majöo.

1 Corintios 13

¹Bluca täbä caficö ʼ ʼ ja, ya aca ma jayuaö wei ma cui, ʼjele ya bā caficö ʼ ʼ çai ma daö wei ma cui, ya bufi nofio mlalanö ya wə faö bādao ja, ya wə jole jole nacli faö bādaquei.

²Jesucristo ebä lä yododaö wei jamö ya etä ʼ ʼ wäyäbä, Yai Bada tä Bufinö yale nö ma wəlojoablalamaö wei ma cui, ya bufi jaducäa ma jödödöi ma cui, ya bufi dao fe ma balojoi ma cui, Yai Bada ya nofi mölabolanö jefu ya tä balöcö majöblamaö ma daö wei ma cui, ya bufi nofiomi ja, ya no ojode çamamobä tä cuami waiquiwä.

³Täbä nö föli lä bleaaö wei täbä lija, bluca ya täbä lä table ya täbä ma jibäaö wei ma cui, ya bufi nofio mlalanö ya täbä jibäaö dicoo ja, ya nö bleaaö bāa. Jesucristo a nowa ja wale demi yaabeje ya noshi ma öjödao wei ma cui, ya bufi nofio mlalanö ya tä taö ja, ya nö bleaaö bāa.

⁴Bä bufi lä nofio wei bā jushuo jaöomi. Täbä bayeliblaöje. Ai täbä dodijaö ma ayao wei ma cui, bā jushudoimi. Cama bā nofi doablamoimi.

⁵Bä bufi lä nofio wei bā nofi jushuaimi. Bā joomodou si ijejewä. Bā jölaö si ijejewämi. Täbä nowa tabou nö dedeaimije.

⁶Täbä doblou lä mlale jamö, bā bufi lä nofio wei bā bufi doblaloimi. Täbä lä dodijale jamö bā bufi shılo yai doblalou.

⁷Bä bufi lä nofio wei bā lä cui, bā waiquidoimi. Yai Bada etä ʼ ʼ bejedi bufibou showao fe yadioje. Bā mölaö fe yadio. Bā nö ma bleaaö wei ma cui, bā nö wəlojaö fe yadio.

⁸Bufi nofio tä lä cui, tä mabloimi. Jesucristo ebä yododabä jamö ai täbänö Yai Bada etä ʼ ʼ ma wäyäö wejei ma cui, täbä ʼ ʼ nia obi mablou. Ai täbä mö feduwänö, täbä caficö ʼ ʼ shominajaanö Yai Bada etä ʼ ʼ ma wäyäö wejei ma cui, täbä caficö ʼ ʼ nia obi shominajaaö mablou. Ai täbä mö feduwä lä cui, Yai Bada etä ʼ ʼ ja täbä bufi ma dao wei ma cui, bufi dao etä nia obi mablou. Öjö tä bluca nia ma mablou wei ma cui, täbä bufi lä nofio wei tä nia shılo mabloimi. Öjö tä yai nia feiblou.

⁹Yai Bada tänö bämalecö fa dobälönö, bamacö bufi ma dao wei ma cui, bamacö bufi walalawä bāwä. Jesucristo ebä yododabä jamö bāma etä ʼ ʼ wäyäbä, Yai Bada tänö bämalecö ma dobäö wei ma cui, ijede bāma tä shılo daö bāwä.

¹⁰Obi, bāma tä daö jödödöo dājä, ijede bāma tä daö lä bāle tä nia çai mladou. Tä lä doblale tä nia cuo malä waiquii.

¹¹Ei malä cui. Ya osheo däjä, ya wə faö osheoma. Ijilu bä bufi lä cuaablalou weinaja ya bufi cuaablaloma. Ijilu bä bufi daeo lä culenaja ya bufi çai daeo cuaama. Ya fa badalönö, ijilu bä lä cuaaö weinaja ya cuaaö mlalayoma.

¹²Möle mö shami ajamö bäma täbä manashi möö cuo lä bädao weinaja, Yai Bada bäma a manashi möö cua bädaa lä cule. Obi bäma tä dablaö walalao wä. Fei däjä, Yai Bada lija ya bufi ijede jaducäblou ma cule, öjö däjä Yai Bada tänö camiyä wale daö walalawä lä culenaja, camiyänö ya nia daö walalao cuo mö feduo.

¹³¿Öjö tawä? Bamacö nia cuaaö fujebrou lä mlai, abenaja tä cua. Bufi shalililanö Yai Bada bäma a nofi nia mölabou. Öjö lija bamacö nia shïlo möläö. Bamacö bufi nia çai shïlo nofio. Inaja bamacö nia shïlo cuaadii ma cui, bamacö bufi lä nofio wei tä ja, bamacö bufi mö yai blucaobä. ¡Inaja lä yai!

1 Corintios 14

¹Wamacö bufi nia lä nofio wei tä nabä shïlo da cadidoje. Yai Bada tä Bufinö täbä lä jibädaö wei täbä çai da bufiblaje. Öjö wama täbä bluca bufibou ma cui, Yai Bada wama ecö lä yododaö wei däjä, wama etä ą nia lä wäyäö wei, öjö wama tä nofi shïlo yai macocobou dodijobä.

²Caficö ą shominajaalanö a wə lä faö wei a lä cui, yanowamö täbä lija a wə faimi. Yai Bada lija a wə yai fadou. Yai Bada tä Bufinö tä ą fa jilanö tä ą ma wäyäö wei ma cui, yanowamö täbä lija a wə jiliblou malä mlai.

³Öjö ma cui, Yai Bada ebä lä yododaö wei däjä etä ą lä wäyäö wei a lä cuinö, yanowamö täbä lija a wə faö fa shalilionö täbä shïlo bayelibläö, täbä cadidamaö, täbä bufi lofotoamaö.

⁴Caficö ą shominajaalanö a wə lä faö wei a lä cui, cama a bufi ma bayeliblamou wei ma cui, Yai Bada etä ą yai lä wawämaö wei a lä cuinö, Jesucristo ebä shïlo yai bayelibläö.

⁵Wamacö caficö ą shominajaalanö bamacö ą bluca famaö bufi ma doblao wei ma cui, Yai Bada wama ecö lä yododaö wei jamö wama tä ą yai wäyäö fa cunoja, ya bufi nö doblao fe balojobö wei. Tä ą lä wäyäö wei a lä cuinö täbä bufi shïlo yai bayelibläö dodijio. ¿Öjö tawä? A wə faö lä shomi wei a wə jilibloimi yalo, täbä nia bayeliblamoimi. Yanowamö täbä caficö ą ja tä ą fe dolemaö showaoje ja, tä ą jiliaö fa walalaojenö täbä bufi nia shïlo bluca bayeliblamou.

⁶Iba wamacö. Shomi täbä caficö ą ja bamacö yömöläö ja, ¿wamacö nia bayeliblamou daanö? Ma. Yai Bada tänö tä lä wawäblamaö wei ya tä ą yai wäyäö ja, wamacö nia shïlo yai bayeliblamou. Bamacö bufi jaducäblamabä ya tä ą wäyäö ja, inaja showawä. Bamacö yai damaö ja, inaja showawä. Wamale ą jilia doblaimi ja, wamacö nia bayeliblamoimi.

⁷Madofi bä bädawä ma cui, bä ą nö malä dabou wejei. Täbä amowamobä jamö, tä çai madofi lä shäö wejei a wə shalilibloimi ja, tä ą nö nia öjöböaimije.

- ⁸Täbä wayu itobä täbä madofi lä jolamou wei bä ą nö ąai dabouje. A wą famaö shalilioimije ja, “Fei dąjä dao”, täbä bufi nia cuimi.
- ⁹Inaja showawä, wa caficö ą shominajaanö wa wą faö ja, tä ą jiliblaimije ja, bä bufi nia jaducäbloimi. Jai tä blocoobä jamö wa wą faö bädao, wa wą nia cuaaö.
- ¹⁰Shomi täbä caficö ą bluca cublawä. Cama bä ą ma jiliayou wei ma cui,
- ¹¹camiyänö ya wą jilia doblaimi ja, ya bufi nia wedinajamou. Shomi täbä ą jiliayou lä mlainaja yafäcö ą nia jiliayoimi cuo.
- ¹²Yai Bada tä Bufinö täbä lä jibädaö wei täbä ja, wamacö dobämou bufi doblao waiquiwä yalo, Jesucristo wama ebä bufi nia lä lofotoamaö wei, tä shilo yai da bufiblaje.
- ¹³Öjö cudeenö, caficö ą shominajaanö a wą lä faö wei a lä cuinö, wawädowä tä ą wäyäö fe dolemou showaobä, Yai Bada lija a nacobä.
- ¹⁴Ya caficö ą shominajaanö Yai Bada lija ya nö bayeli nacao dąjä, bei ya bufinö ya ma nacou wei ma cui, ya bufi jaducäa mlalanö ya wą faö bädao.
- ¹⁵¿Wedinaja ya cuaabä, öjö lä? Ya nö bayeli nacao dąjä, bei ya bufinö ya nia nacou. Ya bufi jaducälanö ya wą nia yai faö. Yai Bada tä jamö ya amowamou dąjä, bei ya bufinö ya nia amowamou. Ya bufi jaducälanö ya wą nia yai faö.
- ¹⁶¿Öjö tawä? Wamacö caficö ą shominajaanö Yai Bada wama a ąfa doblao taö ja, shomi bä loo mö lä fedule bä bufi nia wedinajamou. Bei wamacö bufi jamö tä ą lä bädou wei dąjä, bufi doblalanö Yai Bada wama a nofi ma doabläö wei ma cui, tä ą jiliblaimi dicooje ja, “Awei, inaja lä”, bä bufi nia cuu yauaimi.
- ¹⁷Yai Bada dodijidawä wa shi öjöde ma jimaö wei ma cui, tä ą jilibloimi ja, ai bä bufi nia bayelibloimi.
- ¹⁸Cafä wamacö caficö ą shominajaanö wamacö ą ma faö wei ma cui, camiyä ya wą shilo yai faö fe balojoo cudeenö Yai Bada lija ya bufi doblalou.
- ¹⁹Ya caficö ą shominajaanö ya wą faö bufi ma doblao wei ma cui, Jesucristo ebä yododabä jamö, wawädowä ya täbä nia yai yömöläö. Ya bufi jaducälanö, jolodowä ya tä ą wädaö bädao ma cui, inaja yai. Ya caficö ą shominajaanö ya tä ą labamaö fe ma balojoo wei ma cui, wale ą nia jilibläö malä mlajei.
- ²⁰Iba wamacö. Ijilu oshe bä bufi mojodi lä culenaja wamacö bufi mojuduo mlai. Bä bufi yai da jaducäicu. Wälidiwä tä ja wamacö shilo yai mojuduobä, ijilu bä wai lä mojuduo weinaja showawä.
- ²¹Yai Bada tä ą oni jamö, abenaja Isaia a cuma. Bada tä lä culadi, abenaja a cuu. “Shomi täbä caficö ą ja, ei ya bä nia yömölamaö. Shomi täbä lija ya bä nia ma yömölamaö wei ma cui, tä ą nia jiliblaimi showaweje.” Einaja tä ą cuu.
- ²²Öjö malä cui. Täbä caficö ą shominajaanö Yai Bada tänö bä ą famaö dąjä, Jesucristo bufilewä bä bufi jaducäblobä bä ą famaimi. Tä ą bejedi bufibou lä mlajei bä

bufi möblobä, bä ʼ ʼ li famaö. Inaja showawä, Jesucristo ebä yododabä jamö, Yai Bada etä ʼ ʼ wawämaöje däjä, tä ʼ ʼ bejedi bufibou lä mlajei täbä bufi lofotoobä, bä ʼ ʼ famaimi. Jesucristo bufilewä bä bayeliblamobä, bä ʼ ʼ li famaö.

23 ¿Öjö tawä? Jesucristo wama ecö bluca yododaö däjä, wamacö ʼ ʼ bluca faö shominajablou dicoo ja, wamacö ʼ ʼ nia jliblaimije. Shomi bä coyocoo bädao ja, Jesucristo bufilewä bä lä mlai bä coyocoo bädao ja, wamacö ʼ ʼ afa shi nia wälii taöje.

24 Öjö ma cui wamacö ʼ ʼ bluca faö däjä, Yai Bada wama etä ʼ ʼ yai wawämaö ja, täbä bayeliblamolayou. Jesucristo bufilewä bä lä mlai bä ma coyocoo däjä, shomi bä ma coyocoo däjä, öjö bä ʼ ʼ blucanö bä bufi shilo shädayaimou cuquei. Bä quilii cuquei.

25 Bä bufi cuaablalou lä jatoö wei, Yai Bada tä ʼ ʼ anö tä wawäoblaliyo. Öjö däjä, bä möfe bolanö Yai Bada a wäfa doblao taö cuqueije. Öjönö wamacö ʼ ʼ caji lä cule tä nö öjöböaö cuqueije.

26 ¿Wedinaja dodijiwä tawä? Iba wamacö. Wamacö bluca lä yododaö wei däjä, wamacö bluca bayeliblayobä wamacö nia yododaö. Ai wamacö amowamobä. Ai wamacö mö feduwä lä cuinö, Yai Bada etä ʼ ʼ ja wama bä damabä. Ai wamacö showawänö, Yai Bada tänö tä lä wawämaö wei wama etä ʼ ʼ wäyäbä. Ai wamacö mö feduwä lä cuinö, wamacö caficö ʼ ʼ shominajaalanö wama tä ʼ ʼ wäyäbä. Ai wamacö showawänö, bä ʼ ʼ lä shominajaaö wei wama etä ʼ ʼ wawäblamabä. ¿Öjö tawä? Wamacö cuaaö lä bädao wei tä ma cui ja, wamacö bayeliblamobä wamacö nia yai cuaaö.

27 Täbä caficö ʼ ʼ shominajaalanö täbä ʼ ʼ nia faö ja, bolacabö bä ʼ ʼ faö bädaobä. Bä ʼ ʼ faö fa yawäläodonö, ai anö tä ʼ ʼ wawämaö showadaobä.

28 Tä ʼ ʼ nia lä wawämaö wei a cuami ja, bä ʼ ʼ nia shominajawä faili. Cama bei bufi jamö tä ʼ ʼ shilo fa tabojenö, cama bä ʼ ʼ nia shilo jliamou. Yai Bada tänö bä ʼ ʼ nia shilo jliiaö.

29 Ai bolacadabö bänö Yai Bada a wäno wäyäöje ja, täbä bufi nia bluca daeo.

30 A loa mö lä fedule a lija Yai Bada tänö ai etä wawämaö majöo ja, a wä faö lä balöo wei a wä si nia waiblou.

31 Bluca wamacönö wama tä ʼ ʼ wäyäö yawälädobä tä malä cule, wamacö bufi bluca jaducäblamayobä, wamacö bufi bluca lofotoamayobä.

32 Yai Bada tä Bufinö täbä bufi lä taamaö wei däjä, tä ʼ ʼ ma wäyäö wejei ma cui, cama bei bä ʼ ʼ si waidobä bä bufi nia wasöo.

33 Yai Bada tänö täbä bufi wedinajamomaö malä mlai. Täbä yanöcömabobä cätä.

34 Yai Bada ebä bluca lä yododoblai jamö, suwä wamicai bä nia yanöcöwä cuo. Bä ʼ ʼ nia wasömamou. Bä suwä nosiemobä bämi. Moisesi etä ʼ ʼ lä cuu weinaja showawä.

35 Tä ʼ ʼ lä wäyämou wei tä ʼ ʼ ja, suwä bä bufi wedinajamou ja, cama bä yafibö jamö bä feyalobö bä wälii cojolobeje. Jesucristo ebä yododabä jamö bä ʼ ʼ suwä faö dicoo ja, tä doemi.

³⁶¿Öjö daanö? Cafä wamacö lija ¿Yai Bada etä ʘ waloa balöblaquema daanö? ¿Cafä wamacö lija tä ʘ waloa ayaquema tawä, wama tä ʘ daö ayaobä?

³⁷Ai wamacö lä cui, “Yai Bada ya wʘ wäyäbä ya”, wamacö bufi cuu ja, wamale ʘ nö bejedi öjöböabä wamacö, öjö lä. “Yai Bada ya Bufe malä table”, wamacö bufi cuu ja, inaja showawä. Ya tä ʘ lä onimale, Bada tänö wale fa nosiemanö ya tä ʘ onimaö malä cui.

³⁸Wamale ʘ nö bejedi öjöböaimi dicowä ja, cafä wamacö ma cui wamacö ʘ nö çai nia öjöböamoimi.

³⁹¿Öjö tawä, iba wamacö? Wamacö yododaö däjä, Yai Bada wama tä ʘ wawämabä tä nofi da yaiboje. Bä caficö ʘ shominajaalanö bä ʘ lä faö wei, bä ʘ çai wasö dijejä.

⁴⁰Öjö ma cui, tä bluca lä tamou wei tä ma cui, dodijidawä tä tamobä. Yawäläwä wamacö ʘ fadobä.

1 Corintios 15

¹Bei. Iba wamacö. Cafä wamacö lija Jesucristo dodijidawä ya etä ʘ lä wäyāno wei tä ʘ ja, bamacö bufi nia fa jaducäblamanö, ei cä ya wʘ. Öjö wama tä ʘ bejedi fa dälänö, wamacö bufi lofotolanö, Jesucristo wama a nofi mölabou malä showai.

²Öjö wama tä ʘ nofi cadidibolanö wamacö fucäamou, wamacö möläö buomi ja.

³Tä ʘ yai lä lofote wei ya tä ʘ fa dälänö, cafä wamacö lija ya tä ʘ wäyāo fe dolemoma. Camiyä bamacö dobloimi tä nowa ja, Cristo a nomaa lä lälayono wei tä ʘ. Yai Bada etä ʘ oni ja, yedu ja a wʘfa nomaö lä wäyāno wejeinaja, inaja showawä a cublaliyoma.

⁴Maa maca jamö a nomawä fe fa lacöjenö, bolacabö tä mö fa dödölönö, Yai Bada tänö a demi jocädamaö çolayoma, tä ʘ oni lä cuno weinaja showawä.

⁵Pedro lija a jaba fa damolalunö, cama ebä lä nocamabono wei bä bluca lija a damoa nomöjölaliyoma.

⁶Tä fe fa weyadalunö, Yai Bada ai ebä lija a damoa majölaliyoma. Öjö bä blucäo dodijioma.

⁵OO tä jamö bä jayuquema. Öjö ai bä cuami ma cui, ai bä mö feduwä lä cui, bä demi bluca cua showawä.

⁷Öjö däjä, Santiago lija a damoa fa nomöjölalunö, bä lä shimöleno wei bä bluca lija a damoa majölaliyoma.

⁸Yaçumö camiyä ya ma cui lija a damoa majölaliyoma. Ya doblobä ya cuono ma mlai ma cui, a damolaliyoma.

⁹Jesucristonö bä lä shimöleno wei bä lija ya yädäobä, ya cuonomi. Ya etä ʘ wäyäbä ya çai cuonomi. Yai Bada ebä lä yaiblai, ya bä nö malä bleaamano wei.

¹⁰Yale bayeliblabä ya cuono ma mlai ma cui, yale nofi ojadadaö fe yadioma. Öjö cudeenö ya nö wʘlojoablalou. Jesucristonö bä lä shimöleno wei bä ma dodijaö wei ma

cui, camiyä ya yai ojodamou fe balojoo. Öjö ma cui, camiyä ya dodijaö tänö mlai, Yai Bada tänö yale bayeliblaö fa cuaanö, bei ya doblou fe yadio.

11 ¿Öjö tawä? Camiyä ya ma cuinö, cama bä ma cuinö, öjö lä yama tä ʘ bluca malä wäyää wei. Öjö wama tä ʘ bejedi lä bufileno wei lä tä ʘ showawä.

12 ¿Öjö tawä? Cristo a demi lä jocädaliyono wei tä ʘ ma wäyämou wei ma cui, ¿wedi tabä ai wamacö jolemou dicoo? Täbä lä mladou wei täbä nia jowa dablou çodaaimi.

13 Inaja mlai. Täbä demi jocädou mlao fa cunoja, Cristo a ma cui a nö çai demi jocädou çobö mlai.

14 Cristo a demi jocädamaö ço mlao fa cunoja, yama tä ʘ nö wäyää nö bleaabö wei. Wama tä ʘ nofi nö çai mölabou nö bleaaö buobö wei.

15 Cristo a demi jocädou mlao fa cunoja, Yai Bada yama tä ʘfa lä wayoaö wei ja, yamacö nö jolemobö wei. A demi lä jocädamaleno wei yama tä ʘfa ma wäyää wei ma cui, täbä lä mladou wei täbä dablou ço mlao fa cunoja, Cristo a ma cui a nö jocädobö mlai. Yamacö nö jolemou bädaobö wei.

16 Täbä lä mladou wei täbä demi jocädamaö mlao fa cunoja, Cristo a ma cui a demi nö jocädou çobö mlai.

17 Cristo a demi jocädamaö mlao fa cunoja wamacö nö möläö buobö wei. Wamacö doblou lä mlaono wei tä nowa lä cui, tä nowa nö cuo showaobö wei.

18 Tä nowa cuo showao fa cunoja, Jesucristo ebä nomaa lä waiquilyono wei bä ma cui, bä nö dablou çobö mlai, bä nö bleaaö shi wʘlibö wei.

19 ¿Öjö tawä? Bamacö nia lä doblaodayou wei tä ja bamacö möläö mlai ja, äyämö bamacö lä bälöale bamacö nia fa dobladionö Jesucristo bäma a nofi shʘlo mölabou bädao fa cunoja, bämalecö nofi jalujubobeje bamacö nö cuo fe balojoobö wei.

20 Öjö ma cui, Cristo bejedi lä a demi jocädou çolayoma. Döano si ja nii cäcö jaba lalou lä culenaja, Jesucristo bei a demi jaba jocädaliyoma.

21 Yanowamö a jaba cuo lä balöono wei a lä cuinö, bamacö bluca lä nomaö wei tä bädamalema. ¿Öjö tawä? Öjö ma cui, ai a lä nodiblaliyono wei a lä cuinö, demi bamacö nia jocädou lä ço wei bei tä bädamaö nomöjölaiyoma.

22 Adana lija täbä yädaa yalo täbä bluca nomaö malä cui. Inaja showawä, Cristo lija täbä fa yädäicunö täbä demi nia cuo shi wʘlii.

23 Tä bluca bädou malä nodimou wei. Nii cäcö jaba lalou lä culenaja, Cristo bei a jaba demi jocädaliyoma. Cama a lä bädoyoluu wei däjä, cama ebä nia çai demi jocädou nomöjöö.

24 Öjö däjä tä nia bluca waiquidou. Täbä nö lä nabämoladi täbä nabä fa queicunö, täbä jole jole lä nosiemou wei täbä çai, täbä ʘfa jole jole lofote lä jilou wei täbä nö çai bluca fa blemalalönö, bä Fjö Yai Bada lija tä ulufi befi çai nia çamaö.

- ²⁵Täbä nö lä nabämou wei bä lä cui, Cristo lija Yai Bada tänö bä bluca blamabou showao mlao däjä, Cristo a nia bälöo lofotomabou dodijio.
- ²⁶Täbä nö lä nabämou wei tä nia waicaö lä jödödöo wei tä lä cui, öjö nomaö bei tä.
- ²⁷Abenaja tä ʘ oni cuu malä balöono wei. Cristo lija täbä bluca nosiemamobä, Yai Bada tänö Bada bei a tablamalema. Einaja tä ʘ cuu. Öjö ma cui, Cristo lija täbä bluca nosiemamobä, tä ʘ oni lä cuu wei, Cristo Bada bei a lä tablamaleno wei tä ʘfa wayoamonomi.
- ²⁸Cristo lija täbä bluca lä nosiemamou wei däjä, Bada a lä tablamaleno wei a lija, bä Ijilubö Jesucristo a ma cui a nia nosiemamou mö feduo. Öjö däjä Yai Bada tänö jödödöwä täbä lä cublai täbä nia lofote fuwäbou.
- ²⁹Täbä lä mladaliyono wei bä befi, ai bä möfe ojomamou. ¿Wedinaja bä bufi li fa cunö bä li inaja cuaaö? Yai Bada tänö täbä demi jocädamaö mlao fa cunoja, bä lä mladaliyono wei bä befi, bä möfe nö ojomamobä mlai. Täbä nia demi jocädou lä ço wei tä nofi mölabou waiquiaje yalo, bä li inaja cuaaö malä cui.
- ³⁰Täbä demi jocädou mlao fa cunoja, wamalecö nabä lämobä jamö yamacö nö çai fudibö mlai.
- ³¹Bejedi lä ya wə. Showadi ya shämobä tä läa showaa ma cule, Bada tä Jesucristo lija wamacö bufi cuquema yalo, bejedi lä ya bufi doblalou.
- ³²Efesoteli bä waitelimou fe balojooma. Yalo bänö täbä nabä queo nö lä quiliaö wejeinaja wale ma taamano wejei ma cui, ya tä ʘ wäyäo fe blacäjoma. ¿Wedi tä nowa ja ya fe li blacäjou? Yai Bada tänö wale demi jocädamaö mlao fa cunoja, ya nö shämou ojodaobö mlai. Ya demöo çobä tä cuo mlao fa cunoja, yanowamö täbä showadi lä cuu weinaja ya nö cubö wei. Abenaja. “Bämacö da showayo. Bämacö nomaö bädao ja, bämacö dodijaö çobä tä nia cuo malä mlai”, ya nö cubö wei.
- ³³Bä möla dijä. Ai bä ma dodijaö wei ma cui, täbä nofi lä jushuaö wei täbä lija bä nocaablalou lä dicoo wei, bä wəlidilalio.
- ³⁴Bä bufi da jaducäicu. Wəlidiwä wama tä taö dicoo mlai. “Yai Bada ya daö”, wamacö cuu ma cui, ai wamacö bejedimou malä mlai. Wamacö shädayaimobä ya wə.
- ³⁵Abenaja ai a cuu ʘatoo fa cui. “Bä lä mladou wei, ¿wedinaja bä li demia taa çomalei? ¿Wedinaja täbä cuwä, bei täbä li demi cua çoquei?” Einaja a cuu ʘatoo fa cui.
- ³⁶Einaja wa lä cuu wei wa lä cui, wa bufi jaducäami fe balojowä. Nii bei wa mo döaö däjä, mo wəcoblou fa balölonö, dodijidawä tesi shilo falayou.
- ³⁷Tä nia obi lä cublou wei bei wa tä döaimi. Wa mo döa lä dodijiquei wei mo nia faili, bei mo li bädawä, yono mo ʘatowä, shomi tä mo ʘatowä.
- ³⁸Yai Bada tänö täbä nii shomitawä yaibläö fa balöonö, bluca mobä shomi lä cublai tä mobä ja, nii shomitawä bä faö cuaaö malä showai.

³⁹Inaja showawä, täbä demi lä cublai täbä shomi mö malä fedui. Yanowamö bamacö yajicö lä culenaja, yalo bä yajicö cuwä mö feduwä malä mlai. Yalo bä lä yäo wei bä yajicö cai shomi mö feduwä malä cui. Yuli bä yajicö ma cui, bä yajicö cai shomi mö feduwä.

⁴⁰Fedu jamö täbä bluca lä culadi, täbä cai shomi mö feduwä, yanowamö bamacö lä culenaja mlai. Fedu jamö täbä bluca lä culadi, täbä liyäjäwä shomitawä. Eja täbä lä cule, täbä liyäjäwä shomitawä mö feduwä.

⁴¹Judu mösö jamö täbä bluca lä culadi, täbä mömou shomiblawä ma cui, täbä mömou bluca liyäjäwä. Motoca a shï jilajao. Belibo shï wawädwä. Shidicali bä mamoca shï mida midamou liyäjäwä. Ai bä mamoca shï wacacawä, ai bä li shomitawä mö feduwä.

⁴²Inaja showawä, Yai Bada tänö täbä demi jocädamaö ço däjä, shomi tä liyäjäwänö, täbä nia liyäjäblou majöo. Yanowamö täbä lä cublai täbä mladou si ijejewä ma cui, täbä demi lä jocädou wei täbä bälimi.

⁴³Nomawä täbä wälidiwä nö quilijiwä ma cui, täbä demi lä jocädamaö wei, liyäjäwä fe balojowä täbä jocädamaö. Nomawä täbä ujudi fe balojowä ma cui, lofote täbä jocädamalei.

⁴⁴Yanowamö bei täbä jele jelemou fa mladonö täbä nomaö ma cui, Yai Bada tä Bufinö täbä demimabou shi wällobä, täbä nia malä jocädamaö wei. ¿Öjö tawä? Yanowamö bei bamacö mladou si ma ijejei ma cui, Yai Bada tä Bufinö bälimi bämalecö nia tablamaö.

⁴⁵Abenaja tä a oni cuu. Yanowamö a jaba cuo lä balöono wei, Adana a lä cui, a demi cublaliyoma. Einaja tä a cuu. Yanowamö a cuo lä nodiono wei, Cristo a lä cui, täbä demi tamabou shi wällobä bei a cublaliyoma.

⁴⁶Bälimi tä lä cui a balöbloimi. Tä mladou si lä ijejei a balöo. Bälimi tä lä cui a nojao.

⁴⁷Yanowamö a jaba lä cuono wei, mashita a ja a tablamolayoma. Coshi coshi bä ja a cuoma. A yanowamö lä nodiono wei, Cristo a lä cui, fedu jamö a li cuoma a.

⁴⁸Mashita a ja a lä tablamolayono wei a lä cui, a mladou si ijejewä lä cuono weinaja, eja bä bluca lä cublai bä ujudi cuwä nodiwä. Inaja showawä, fedu jamö a lä culadi a bälimi yai lä culenaja, cama ebä nia bluca bälimi cuo mö feduo.

⁴⁹Mashita a ja a lä tablamolayono wei bäma a ujudi nodibou lä culenaja, fedu jamö a lä culadi bäma a nia cai lofote nodibou mö feduo.

⁵⁰Wamale a da jili, iba wamacö. Täbä sicö mladou si lä ijejei sicö tabou showalajenö, Yai Badanö cama ebä cai lä cuo wei jamö bä walodayou mlaicätä. Täbä bälimi lä mlai bä lä cui, täbä bälimiobä jamö bä cuo daomi.

⁵¹Wamale a da jili. Tä a jaba lä jöyaono wei ya tä a wawämaö lä cule. Ai bamacö nia nomaimi. Bamacö bluca nomaö ma mlai ma cui, bamacö nia bluca shomiblou.

⁵²Yedu täbä mamō casi midou lä culenaja, amowa fibä lä jolamou wei tä ʘ famaö jödödöo däjä, bamacö nia shomiblaliyo. Tä ʘ jilio fa balöonö, täbä lä mladaliyono wei täbä lofote jocäblou fa çolonö, bamacö nia bluca shomiblou.

⁵³Bamacö mladou si lä ijejei, lofote tä lä cui tä ja bamacö nia lucäö. Bamacö cudio lä mlai, bałimi tä ja bamacö nia didio.

⁵⁴Bamacö mladou si lä ijejei, lofote tä ja bamacö nia didio. Bamacö cudio lä mlai, bałimi tä ja bamacö nia lucäö. Öjö däjä, tä ʘ oni cuu lä balöono wei tä ʘ nia bejedi cublou. Abenaja tä ʘ oni cuu. Bamacö nia nomaö çödaaimi. Nö walojou tä lä cuinö, nomaö tä blabou lä cule. Einaja tä ʘ cuu. Abenaja çai.

⁵⁵Nomaö wa lä cui, çwedi jamö tänö wa nö walojaö çöbä, öjö lä? Nomaö wa lä cuinö, çwedi tänö yamalecö nö nia bleaamaö çö? Einaja tä ʘ cuu.

⁵⁶Täbä nö malä bleaamaö wei. Täbä doblou lä mlai Yai Bada tänö tä nowa nia yuaö yalo, täbä nomaö quilii. Täbä doblou lä mlai däjä, Moisesi tä ʘ nofi cadidiboimije yalo tä nowa yulei.

⁵⁷Öjö ma cui, Yai Bada lija bamacö bufi doblalobä bamacö. Bada tä Jesucristo a shämou fa läonö tä nowa mladamalema, bamacö nö walojaö fe yadiobä, bamacö nomaö quilii mlaobä.

⁵⁸Öjö cudeenö, iba bamacö lä nofimaö wei wamacö, bä bufi da lofotoicu. Wamacö mojiplou mlai, Yai Bada lija wamacö yai ojodamou balafälöbä. Bada tä lä culadi tä lija wamacö ojodamou ja, wamacö nö nia bleaaö malä mlai.

1 Corintios 16

¹Judea jamö Yai Bada wama ebä nia lä bayeliblaö wei ya tä ʘfa nia wäyää majöö. Wama bä bayeliblabä, blada wama bä nia shimomaö, Calasia jamö Jesucristo ebä lä yododaö wei ya bä taamaö lä bufino weinaja showawä.

²Wama bä blada lä doaö wei bä ja, domingo däjä showadi ai wama bä mashi fa sheleleblalönö, wama bä shimomabä. Bluca wama bä doaö ja, bluca wama bä nia sheleleblaö. Wiisibö wama bä blada dääö ja, wiisibö wama bä nia sheleleblaö. Yanöcö wama bä fa shimomalönö, wama bä blada ajedebou waiquio däjä ya waloobä.

³Jelusale jamö blada wama bä çai nia lä shimaö wei wama bä fa yaialalönö, ya bä shimajalobä. Ya fa çöbonö, ya tä fa oniblalöjolonö, ya si jibää fa showadacönö, Jelusaleteli bä lija si oni jibäadayobeje. Si oni lä doadayou wejei ja, çafä wamacönö wama bä lä dobää wei tä ja, täbä moyawädayobä.

⁴Camiyänö ya bä çai fubä tä cua ja, ya bä çai fulayou.

⁵Masedonia tä ulufi jamö ya jayua fa balöicunö, çafä bamacö fe walolei. Öjamö ya nia jayuo balöofälöö.

- ⁶Öjö dāja, cafä wamacö lija ya bälödia jatoquei fa cui. Tä maaböö dāja, öjamö ya cudio fa balöönö, wamale fa bayeliblanö, ya fuu lä bufio wei jamö, dodijidawä wamale shimaö ço majöobä.
- ⁷Bamacö möö jayuaö bufio bädaomi. Obi, Yai Bada tänö wale fumaö lä dodijio wei ja, dodijidawä bamacö shïlo bälödiobä.
- ⁸Eja, Efesoteli bä lija ya yanöcöa lä cule. Showadi nii bä jaba lalou dāja bä lä iyaö wei ya tä nö dabou balöo.
- ⁹Eja walalawä ya etä ą wäyädibä, Yai Bada tänö tä tabou waiquia lä cule. Bluca täbänö wale ą jiliaö bufi doblaa lä culajei. Täbä ą lä lämou wei täbä çai bluca mö feduwä.
- ¹⁰Cafä wamacö lijamö Timoteo a waloo ja, dodijidawä a çai da bälöicöje. Yai Bada lija camiyä ya ojodamou lä culenaja, a ojodamou cuwä mö malä fedui.
- ¹¹Ai täbä lija wama a nö waiblamaö mlai. Wama a fa bayeliblanö, camiyä lija a waloo çoobä, a bufi yanöcöwä çai shimöa da çoluje. Timoteonö Jesucristo ai ebä çai lä fuu wei, ya bä nö bluca dabou lä cule.
- ¹²Öjö ma cui, camiyä ai bamacö mashi Abolo a lä cui, fei dāja wamacö fe nia waloomi. Cafä wamacö lija Jesucristo ai ebä çai fubä ya wä fadaama ma cui, a fuu mojio fa waiquionö a funomi. Obi a fubä etä cuo ço dāja, a fuu cuquei.
- ¹³Bä nö da daicu. Jesucristo a nofi mölabou da shalilioje. Wamacö bufi quilii mlai, bä bufi da lofotoicu. Bä bufi nö da wälojoicu.
- ¹⁴Wama tä bluca lä taö wei, wamacö bufi nofiolanö wama tä tabä.
- ¹⁵Bei, iba wamacö. Edefana wama a daö, cama ebä çai. Acaya jamö Jesucristo a nofi mölabou showao mlaoje dāja, öjö bänö tä ą jaba dää balölemaje. Yai Bada ebä bayeliblabeje, täbä noshi shïlo öjödao dodijio talei.
- ¹⁶Einaja täbä dodijaö lä cuaaö wei, wama täbä ą yai fuabä. Öjö bä lä bayeliblaö wejei bä ma cui, wama bä ą çai bluca fuaö mö feduobä.
- ¹⁷Eja Edefana a waloquema, Fodunado a çai, Acaico a çai. Öjö bä waloquema yalo ya bufi doblalou. Cafä wamacönö wamale nö bayeliblaö lä cuobö weinaja wale bayeliblaö cuaaöje yalo, ya bufi doblalou.
- ¹⁸Wale bufi lofotodamaö çolayomaje, cafä wamacö bufi lofotodamaö lä culayojolono wejeinaja showawä. Einaja täbä dodijaö lä cuaaö wei, wama täbä ą yai jiliaö dodijioobä.
- ¹⁹Asia jamö Jesucristo ebä lä yododoblai bä lä cui, cafä wamacö lija bä ąfa wäamou bufi doblao. Aquila a ma cui, bä suwäbö Blisila e ma cui, cama e yafi jamö Jesucristo ebä lä yododaö wei bä çai bluca ma cui, öjö bä ąfa çai wäamou bufi doblao. Bada tä lija wamacö cua yalo, bä ąfa wäamou bufi doblaa fe balojoa lä cule.

²⁰Jesucristo ebä bluca ma cui, cafä wamacö lija bä afa wäamou bufi doblaa lä cule. Jesucristo wama ecö mö fedudayou ja, bä yai da nofimayo.

²¹Camiyä Pablonö bamacö bluca nofimaö yalo, ei bei ya imicö cadidiwänö ya si onibläö lä cule.

²²Bada a bufibou lä mlajei bä lä cui, Yai Bada lija bä waimobä. ¿Öjö tawä? Inaja lä tä cuobä. ¡Bada tä Jesucristo a itou lobaaö çimabä!

²³Bei. Bada tä Jesucristonö, showadi wamacö bayeliblabä. Wamacö nofi shilo ojobabä.

²⁴Jesucristo wama ecö yalo, bamacö bluca nofimaö.

2 Corintios

2 Corintios 1

¹Jesucristonö wale lä shimöleno wei, ei Pablo cä ya, Yai Bada tänö wale çai shimaö fa bufinö. Camiyä bamacö mashi Timoteo sho, yafäcö cua lä cule. Colido jamö Jesucristo wama ecö lä yododaö wei wamacö lija ya tä ʘ oni shimaö, Yai Bada wama ecö lä cui lija. Acaya jamö Yai Bada ebä jödödöwä lä bälöblai bä lija çai.

²Bei. Fayä Yai Bada lija wamacö shïlo bayeliblamobä, Bada tä Jesucristo lija çai. Wamacö nofi ojodaboböbä. Wamacö bufi çai yanöcömaboböbä.

³Bada tä Jesucristo bä Fjö e nofi shïlo yai doablamobä, Jesús lija a lä bufiblamou wei a Bada lä cui. Inaja lä tä cuobä. Öjö bäma a nofi lä Fjömalenö, showadi bämalecö nofi shïlo ojodabou. Showadi bämalecö bufi shïlo lofotodamaö.

⁴¿Öjö tawä? Bamacö nö lä bleaaö wei tä bluca ma cui ja, bämalecö bufi lofotodamaö. Cama lija bamacö lä bayeliblamou weinaja, inaja showawä ai bäma bä bufi taamaö mö feduobä. Bä bufi nö bleaaö lä bädao wei tä ma cui ja, camiyä bämalecö bufi lä lofotodamaö weinaja, inaja showawä ai bäma bä bufi çai lofotodamaö cuo mö feduobä.

⁵¿Öjö tawä? Cristo a nö bleaaö lä cuaano weinaja, bamacö nö bleaaö cuo mö feduo. Inaja showawä, öjö lija bamacö yädaa yalo, cama a bufi bayeliblamou lä cuono weinaja, showadi bamacö bufi nia bluca bayeliblamou cuo mö feduo.

⁶Camiyä yamacö nö bleaaö ja, cafä wamacö bufi bayeliblamobä yamacö nö li bleaaö. Camiyä yamacö bufi lä bayeliblamou wei tänö, cafä wamacö bufi bayeliblamou mö feduobä. ¿Öjö tawä? Camiyä yamacö nö lä bleaaö weinaja wamacö nö bleaaö mö feduo ja, wamacö nö wəlojaö fe yadiobä.

⁷Cafä wamacö lija yamacö bufi wedinajamobä tä cuami. “Bä nö nia wəlojaö fe yadio”, bamacö nofi tabou waiquiwä. Ei yama tä malä dale. Camiyä yamacö nö bleaaö dāja, yamacö bufi lä bayeliblamou weinaja, inaja showawä cafä wamacö nö çai bleaaö dāja, wamacö bufi nia çai bayeliblamou cuo mö feduo.

⁸¿Öjö tawä, iba wamacö? Asia jamö wamalecö nö lä bleaamano wejei tä ja, bamacö mojudumabou bufiomi. Shädayai. Yamacö bufi nö beblalou dodijioma. “Yamacö demi cudio fe yadio weicätä”, yamacö bufi çai cunomi dodijiwä.

⁹Ma. “Fei dāja yamalecö nia shïlo yai shäö shalilioje”, yamacö bufi cuma. ¿Öjö tawä? Yamacö bufi nö lä beblalono wei, öjö Yai Bada bei tä mayo cuoma, camiyä yamacö nia lä fucäamou wei tä ja yamacö möläö dicoo mlaobä. Cama Yai Bada lija yamacö shïlo yai möläö showao fe yadiobä yamalecö inaja taamama, täbä demi lä jocädamaö wei a lä cui lija.

¹⁰Yamalecö shäbeje tä cuo ma waiquiono wei ma cui, yamalecö bayeliblaö fe yadilayoma. Inaja showawä yamalecö nia bayeliblaö cuo ço. Öjö yama a nofi yai mölabou waiquiwä, yamalecö bayeliblaö çobä.

11Cafä wamacö ma cuinö, Yai Bada lija wamalecö çai da bayelima, bluca bänö yamalecö nö bayeli fa nacajenö yamacö bayeliblamobä. Yamacö lä bayeliblamou wei tä ja, Yai Bada lija bluca bä bufi afa çai doblalou wäyämou mö feduobä. Inaja lä yai.

12Yanowamö yama bä yabäcaimi yalo, yamacö afa dodijaö tamou. Dodijidawä yamacö cua yalo bei yamacö bufi jamö ai tä läami. Bluca täbä lija yamacö dodijaö ma waiquii, cafä wamacö lija yamacö yai shïlo dodijaö. Camiyä yamacö bufi lä dao wei tänö mlai. Yai Bada tänö wamalecö nofi ojobadou yalo, jolemou mlai ja cama yama ecö yai bejedimou.

13-14Cafä wamacö lija yama tä a oni lä shimaö wei tä a ja, wamacö bufi mlaabä tä cuami. Tä a doamou si ijejewä, wamacö bufi jaducäblobä. ¿Öjö tawä? Ijede wama tä a jïlia walalaa lä taleno weinaja, bluca wama tä a jïliaö walalao cuobä, öjö lä. Wamacö bufi nia yai lä jaducäblou wei tä ja, yamacö möläö showaa lä cule. Yamacö bufi lä cuaale, wamalecö wiisibö daö lä waiquilenaja, wamalecö yai daö shalilibä. Bada tä Jesús a fuu ço däjä, camiyä yamacö nowa ja wamacö bufi yai doblalobä. Cafä wamacö nowa ja yamacö bufi nia doblalou mö lä feduo weinaja showawä.

15“Inaja yamalecö nofi tabou waiquia lä culajei”, ya bufi cuma yalo, bamacö fe mili waloo bolacaoma. ¿Öjö tawä? Moli bädawä mlai, bamacö bufi doblalamaö bolacao showadaobä.

16Masedoniateli bä lijamö ya fuu däjä, bamacö fe nia waloo jayuama. Ya fuu çoimaö däjä, bamacö fe nia waloo jayuaö çojoloma, Judea jamö ya fuu çoälöö däjä wamale bayeliblabä. Inaja ya cuaaö bufi doblaoma ma cui.

17Fei däjä ¿wedinaja wamale nofi tabou dodijia cule?Inaja ya nia jowa lä cuaano wei, ¿ya bufi shalilou mlai ja ya cuu bädaoma daanö?Yanowamö showadi täbä bufi lä majöablalou weinaja, ¿inaja camiyä ya bufi çai cuaabä ya daanö?Ma, inaja ya bufi cubä yami. “Ma”, ya bufi cuu waiquiwä ja, “Awei”, ya nia jole cuu bädaomi.

18Yai Bada a wä lä cadidou weinaja ya wä cadidou cuwä mö feduwä. Cafä wamacö lija, “Ma”, ya bufi cuu waiquilanö, “Awei”, ya jole cuimi.

19Yai Bada bei Ijilubö Jesucristo e lä cui a bufi majöablalono malä mlai. Sibano, Timoteo sho yamacö lä cuinö, cafä wamacö lija Jesucristo yama a wäfa lä wäyäle a lä cui a bufi yai shalilioma. “Awei”, a bufi cuu waiquilanö, “Ma”, a jole cunomi.

20Ma. Yai Bada tänö tä afa bluca wäyäö lä balöono wei tä a bejedi cublobä, “Awei, inaja lä tä cuobä”, a shïlo Jesucristo cuu. Öjö cudeenö, Yai Bada lija bamacö nö bayeli nacao däjä, öjö bäma a wäfa shïlo wädaö. “Jesucristo a wanö ya wä faö lä cule. Inaja lä tä cuobä”, bamacö shïlo malä cudou wei, Yai Bada a wäfa doblao wäyämobä.

21¿Öjö tawä? Cristo lija Yai Bada tänö wamacö bufi lofotomabou, camiyä yamalecö bufi çai lä lofotomabou weinaja showawä. Öjö lä showawänö, bamacö yaibou.

22Cama bäma ecö nö öjöböamobä, a Bufi jibämobema. Bei bamacö bufi jamö a lä bälöle tä ja, bamacö jaba dobämoa balölayoma, bamacö nia lä dobädayou wei tä ja, bamacö möläö showaobä.

²³Cafä wamacö lija ei ya wə nō lä wäole, ya wə bejedi. Yai Bada tä malä cule. Ya jolemoa bädalayou ja, ya tä wayu daö. Cafä Colidoteli bamacö fe walou ço da mlaoblei, bamacö bufi nō bleaamaö ço bufio fa mlacunö ya li funomi.

²⁴Camiyä yamacö lä cuinö bamacö bufi taamaö fe yadiobä yamacömi. Cafä wamacö ma cuinö, Jesucristo wama a nofi mölabou lofote malä waiquile. Bamacö bufi taamaö fe balojoo mlai, wamacö bufi doblalobä bamacö bufi shïlo yai lofotoamaö bufi doblao.

2 Corintios 2

¹Öjö cudeenö, bamacö bufi wəlidiblamaö ço bufiomi yalo, ya funomi majöwä. Bamacö fe da waloblei dajā bamacö bufi da taamableinaja bamacö bufi taamaö ço mlaobä, ya bufi cadidiblaliyoma.

²Abenaja ya bufi cuma. Cafä bamacö bufi wəlidiblamaö fa cunoja, ¿wedi bä lija ya bufi nō doblalou çobö wei? Wamale bufi doblalamabä, cafä wamacö waiquiwä malä cui.

³Inaja ya bufi cuma yalo, ya fuu mlai ja, ya tä ą oni shimöa balölema. Wama tä ą oni möö fa balöonö, wamacö bufi doblalolanö, dodijidawä wamale waloamaö nomöjöobä. Bufi wəlidiwä wamacö culanö mlai. ¿Öjö tawä? Wamale bufi doblalamabä, wamacö malä cui. Cafä wamacö lija ya möläö showaoma. “Ya bufi doblalolanö ya waloo ja, inaja showawä, cama bä bufi çai nia doblalou cuo mö feduo”, ya bufi cuma.

⁴¿Öjö tawä? Ya bufi nō bleaalanö ya tä ą oniblalema, ya öcölanö. Bamacö bufi wəlidiblambä ya tä ą shimano malä mlai. Bamacö nofimaö fe lä balojole wama tä yai dablaba, ya tä ą yai shimölema.

⁵Öjö ma cui, abenaja ya cuu. Wale bufi yai lä wəlidiblamaleno wei a lä cuinö, camiyä wale bufi nō bleaamaö ayaonomi. Öjö a lä cuaano wei tänö, cafä wamacö ma cui wamacö bufi çai bluca wajäblou mö feduoma. Öjö ma cui, ei tä ą lä cui ja, inaja ya nia cuu fe balojoomi.

⁶Inaja lä waiquiwä. Ai wamacö bluca mö feduwä lä cuinö wama a wasöa malä waiquilenno wei.

⁷Fei dajā, öjö wama etä nowa tabou mlai ja, a bufi shïlo yai yanöcöblamaö da çöloje. A bufi wəlidiblou fa jödödölonö a docua dicolu.

⁸¿Öjö tawä? Wawädowä a nofimaö da çöje, öjö lä.

⁹Bamacö nia bejedimou fa mönö, ya tä ą oni shimöa balölema, ya wə nia çai fuamamou fa mönö.

¹⁰¿Öjö tawä? A doblono lä mlai a lä cui, wama etä nowa taboimi waiquiwä ja, inaja showawä, camiyä ma cuinö ya nofi çai tabou mö feduo. Inaja Cristonö bämalecö taamaö bufi doblao malä cui. Tä nowa wəlidiwä cua bädaa ja, ya tä nowa mladamaö waiquilayoma, dodijidawä wamacö cuoba.

- ¹¹Sadanasinö bämalecö bufi taamaö dicoo mlaobä. Bämalecö bufi wälidiblamaö bufi lä doblao wei, bāma etä malä dale.
- ¹²Doasiteli bā lijamö, Cristo dodijidawä ya etä ʔ wäyää mö lä funo wei dājä, ya tā ʔ wäyää Bada tänö dodijidawä tā tabou ma waiquiono wei ma cui,
- ¹³ʔasimi Tito a walodalou fa mlacunö, ya bufi yanöcöblonomi. Öjö cudeenö, öjö ya bā fa dacöfälönö, äyämö Masedonia jamö ya cadidou showaoma.
- ¹⁴Öjö ma cui, Yai Bada lija, ʔbejedi lä ya bufi doblalou! Yamacö nö wälojoablalobä Cristonö showadi yamacö lä lulubou wei, öjö Yai Bada tā mayo waiquiwä. Jödödöwä tábä lä cublai tábä lijamö Jesucristo yama etä ʔ wäyää cuaabä, yamalecö bayelibou. Cristo yama a dablamaö lä cuaaö wei, jai nö clēdeli yama tábä nö ʔcucamaö cuaaö.
- ¹⁵Yai Bada tā ma cuinö, öjö tábä nö çai clēdeli ʔcucuadayou. Cristo yama a dablamaö ja, a bufi doblalou. ʔÖjö tawä? Yama tā ʔ wäyää lä cuaaö wei dājä, jai yama tā ʔ ʔcucuamaö yamacö cuaaö, bā nia lä fucāmou wei bā lija. Bā nia nomaö shi lä wäljio wei bā lija çai.
- ¹⁶Bā nia nomaö shi lä wäljio wei bā lija tā ʔ nö ʔcucamou wäli. Tā ʔ bejedi bufiimije yalo, bā malä nomaö wei. Bā nia lä bälimio wei bā lä cui bā lija tā ʔ nö shilo ʔcucamou clēdeli ayawä. Tā ʔ bejedi bufiije yalo bā malä bälimiblou wei. ʔÖjö tawä? ʔTā ʔ yai wayu! Tā ʔ fulimou buobä, tā ʔmi.
- ¹⁷Ai bā bluca jole ojodamou lä cuaaö weinaja, yamacö cuaaö bādao malä mlai. Öjö bā lä cui bā nia li fa dobāmonö tā ʔ li wäblalaö bādaoje. Ma, camiyä yamacö yai bejedimou. Yai Bada lija yamacö shimamolayoma, Jesucristo lija yamacö yädālanö yama etä ʔ wäyää cuaabä. Öjönö yamalecö bejedi dablaö.

2 Corintios 3

- ¹“Cama bā nofi doablamou çā lä cule”, ʔbei wamalecö nofi tabou tawä? Inaja dicoo mlai. Ai bā lä cuaaö weinaja yamacö cuaaö malä mlai. Bā ʔfa wäyämamobä sibä oni dodobou cuaaöje, dodijidawä bā ʔ jliabeje. Ma, çafä wamacö lijamö yama sibä oni çai fubä yamacömi. Ai tábä lijamö ma cui, çafä wamacönö wamalecö ʔfa wäyää, yama sibä oni çai nia fuimi.
- ²Yamacö ʔfa wäyämamobä si oni lä culenaja, inaja wamacö çafä cuwä waiquiwä. Oni tábä ʔ doamou lä culenaja, bluca bā lä cule bā lija wamacö bufi shomi dablamou wawädowä.
- ³Oni yama si mömaö mlai ja, çafä bāmacö yai jimaö talei. ʔÖjö tawä? Jai Cristonö si oniblalema wamacö cuwä, yamacö lä ojodamou wei tā dodijidawä dablamou wawädoobä. Madofi anö sibä lä oniblaö wejei dājä tábä oni dablamou lä culenaja mlai, Yai Bada tā bälimi cua shi lä wälile tā Bufenö, wamacö li dodijidawä dablamou. ʔÖjö tawä? Maa macö ja tā ʔ oni jaba dablamou lä cuono weinaja mlai, bei wamacö bufi jamö Yai Bada tā mayo yai dablamou.

- ⁴Cristo lija wamacö lä bayeliblamou wei yama tä möö cudeenö, “;Bejedi lä Yai Badanö yamalecö shimölema, öjamö lä!” yamacö bufi cuu talei.
- ⁵Camiyä yamacö lä dodijiablalou wei tänö mlai. Inaja yamacö nö cubimi waiquiwä. Yai Bada tänö yamalecö bayelibou yalo tä li dodijidawä.
- ⁶Yai Bada yama etä a dude wäyäbä yamalecö nö wəlojomabou. ¿Öjö tawä? Moisesi yama tä a oni nabä shimaimi. Yai Bada tä Bufeni nofi mölabobeje yama tä a dude wäyää lä cule. Moisesi tä a oninö täbä nomaö malä cui. Öjö ma cui, Yai Bada tä Bufeni täbä bəlimiblou.
- ⁷¿Öjö tawä? Moisesi etä a lä cui, maa macö ja tä a bluca oniblamolayoma. ¿Öjö tawä? Yai Bada tänö tä a çai fa wawälönö, tä shi wacalablou dāja, Moisesi a ma cui wäyacu çai mömou wacalamiblaliyoma. Inaja wäyacu shi cuo shi wəliobä etä cuono ma mlai ma cui, etä shi fa dalalöjenö Isaeli ebänö wäyacu möö quilimaje. ¿Öjö tawä? Täbä nia lä nomaö wei tä a ma cui ja, tä shi damoa waiquilaliyoma ja lä,
- ⁸fei dāja Yai Bada tä Bufeni täbä nia yai lä bayeliblamou wei tä a ja, bei tä shi dablou blaucublou yailayou. ¿Ya wə jolemou daanö?
- ⁹Täbä waimamobä tä a jamö, tä shi damoa waiquilaliyoma ja lä, Yai Bada lija täbä nia yai bejedi lä dablou wei tä a jamö, tä shi nia shilo yai dablou fe baloo malä cui.
- ¹⁰¿Öjö tawä? Bejedi lä. Jesucristo tä a cua lä nomöjole tä a dodijidawä fe baloo yalo, tä a jaba cuo lä balöno wei tä a jilimamou doemi majowä.
- ¹¹Tä a cudiobä lä mlai tä anö, tä shi çai waloa waiquiquema ja lä, tä a nia yai lä cudio wei tä a nia shilo yai dodijidawä dablou malä cui.
- ¹²Öjö tä a ja yamacö möläö yalo, wawadowä yamacö a faö.
- ¹³Moisesi buficö joyao lä cuono weinaja yama tä a joyabou cuomi. Wäyacu shi lä wacalamiono wei dāja, shi lä mlaafälöö wei tä dablö mlaobeje buficö joyaoma.
- ¹⁴Öjö ma cui, öjö bä lä cui bä bufi jifua dicolayoma. Fei dāja ma cui, Yai Bada tänö tä a jaba lä wəqueno wei tä a jiliaöje dāja, etä läblawä malä showai, bä bufi jaducəblou mlaobä. Moisesi buficö joyao dāja, a dablö lä mlaono wejeinaja bä cuwä malä showai. Öjö etä lä läblai, Cristo a bufiblamou dāja etä shilo joyamou.
- ¹⁵Awei, fei dāja ma cui, Moisesi etä a doamobä jamö bä bufi jaducəblou mlaobä tä läa showaa.
- ¹⁶Öjö ma cui Bada tä lija bä mö yaidou ja, tä lä läle etä nia joyamou.
- ¹⁷¿Öjö tawä? Öjö Bada ya tä afa lä wayoale, öjö Yai Bada tä Bufeni waiquiwä. Moisesi etä a nö quiliaö ma cui, Yai Bada bäma a Bufeni tabou lä waiquile dāja bamacö quiljobä tä cuami.

¹⁸¿Öjö tawä? Bamacö quilii mlai ja, Bada tä lä doblale jamö bamacö mö yaidalou ja, cama a lä culenaja bamacö yanöcö nia cublou mö feduo. Bada tä Bufinö, inaja lä showadi bamacö taamaö malä cui, Cristo a lä culenaja bamacö cublou mö feduobä.

2 Corintios 4

¹Yai Bada tänö yamalecö nofi ojodabolanö, Jesucristo yama a wano wäyää cuaabä wamalecö shimölema. Öjö cudeenö, yamacö bufi ujudublou buomi.

²Walidiwä yama tä waia waiquilema yalo, yamacö quilibä tä çai cuami. ¿Öjö tawä? Yamacö jolemoimi, öjö yama tä waia malä waiquileno wei. Yai Bada yama tä a çai shominajaablalaimi. Ma. Yama bä mölamaö mlai ja, bejedi dodijiwä, wawadowä yama tä a wawämaö shalilou. Yai Bada tänö yamalecö bejedimou daö.

³Yama tä a dodijidawä lä wäyäle tä a lä cui, tä a nofi mojudoubou fe yadioje ja, bä nomaö shi walijioyä bä li waiquiwä yalo tä a nofi li mojudoubuje.

⁴Bitä jamö Sadanasi a bada lä bufi blamou wei a lä cuinö, öjönö bä bufi mojudumabou. Dodijidawä tä anö bä bufi wacacablou mlaobä cama etä a li lämaö. Tä a bejedi bufii lä mlajei, showadi inaja bä li taamaö, Cristo a nö doblao öjöböaö mlaobeje. ¿Öjö tawä? Yai Bada a cuwä lä dodijiinaja, Cristo a cua mö fedua.

⁵¿Öjö tawä? Camiyä yamacö afa wäyämamou malä mlai. Camiyä yamacö mlai, Jesucristo a nofi shilo yai badobobeje, öjö yama etä a yai wäyää. Jesús wama ecö mö feduwä yalo, öjö etä a ja bamacö bayeliblabä yamacö.

⁶Tä mö didiobä jamö, cama a wanö tä jaba lä wacacadamaleno wei a lä cuinö, öjö a showawänö, yamalecö bufi malä wacacamabole. Cristonö Yai Bada tä doblao lä damalaleno weinaja, inaja showawä yama tä dablamaö cuo mö feduobä. ¿Öjö tawä? Tä mö ma dödoono wei ma cui, abenaja a jaba cuu malä balöono wei. Bei. Tä da wacacablalu. Einaja a cuma.

⁷¿Öjö tawä? Yama tä a lä table tä a nowa yai bluca ma cui, mashita yamacö ma cuinö yama tä a didibou. Cama tä nia lofote fa dablamonö, inaja tä li taö. Camiyä jai jaboca yamacö lä cule yamacö lä cui, yamacö lofote malä mlai.

⁸¿Öjö tawä? Bluca yamalecö ma yabäcaö wejei ma cui, yamalecö jamabou nö doblobimije. Yamacö bufi ma wedinajamou wei ma cui, yamacö bufi nö bleaaimi.

⁹Yamalecö nö bleaamaö ma cujei, yamacö yami nö beblaloimi. Yamalecö blabou ma dao wejei ma cui, yamacö ubladou ço.

¹⁰Jesús a shäo bufi lä doblaono wejeinaja, inaja showawä, showadi yamalecö shäo bufi çai doblaöje. Yamacö jamou lä mlai tänö, camiyä yamacö lija Jesús a balimi lä cule tä dablambö.

¹¹¿Öjö tawä? Yamacö demöo showao däjä, yamacö shämobä showadi tä läa, Jesús a nowa ja. Camiyä yanowamö yamacö lä ujudi wei yamacönö, Jesús yama a balimi lä table tä dablambö.

¹²Yama tä ʼa wäyää tä nowa ja, yamacö shämobä tä cua ma cule, cafä wamacö ʼalimi cuo mö feduobä yama tä ʼa wäyää fe yadiblou.

¹³Yai Bada etä ʼa oni jamö, abenaja ai anö tä ʼa oni tablalema. Ya tä ʼa bejedi bufii yalo, ya wä cuoma. Einaja a cuma. Öjönö tä ʼa bejedi bufii lä cuono weinaja, yama tä ʼa bejedi bufii çai cuwä mö feduwä. Yama tä ʼa bejedi bufii yalo, camiyä yamacö ma cui, yamacö ʼa çai faö.

¹⁴Öjö tawä? Abenaja yamacö bufi cuolanö yamacö ʼa faö. Bada tä Jesús a demi jocädamaö lä çono wei a lä cuinö, Jesús lija yamacö yädaa yalo, öjönö yamalecö demi nia çai jocädamaö ço. Cafä wamacö sho, Yai Bada tänö bämalecö nia bluca ublamabou.

¹⁵Cafä wamacö dodijidawä cuo mö feduobä, öjö lä tä bluca waiquiwä malä cui. Yai Bada tänö täbä nofi lä ojadabou wei tä ja, bä möläö fa blaucublalunö, cama lija bä bufi ʼafa doblalou çai wäyämou blaucublou mö feduobä. Yai Bada tä doblao dablamobä.

¹⁶Öjö cudeenö, yamacö bufi ujudubloimi. Bei yamacö sicö ma wälidiaaö ma dodijio däjä ma cui, bei yamacö bufi shïlo dodijidawä balaö fe yadia lä cuimadi.

¹⁷Yamacö nö lä bleaaö wei tä lä cui, tä cudio shi wäliobä tä malä mlai. Doblao yamacö cuo shi wäliodayobä, inaja lä yamacö cuaaö balöa lä cule. Öjö tawä? Yamacö nia lä doblaodayou wei tä jamö yamacö bufi daeo däjä, yamacö bufi fejeleo dodijio.

¹⁸Täbä lä dablamous wei täbä lä cui, täbä nia jole jole cuo balöblao bädao malä cui. Täbä dablamous lä mlai, öjö täbä nia shïlo yai cudio. Öjö cudeenö, täbä lä dablamous wei täbä ja yamacö bufi daeomi. Täbä dablamous lä mlai yama täbä shïlo yai bufibläö.

2 Corintios 5

¹Yanowamö bei bamacö lä cui, jai bei bamacö yafibö cuwä, bamacö bufi lä didile. Öjö tawä? Bamacö yafibö wälioblou bädao ja, ai bamacö yafibö cua mö feduadayoa, Yai Bada tänö bämalecö yafibö lä taboladi. Öjö lä bä yafi lä cui, yanowamö täbänö bä lä tablaö wejei mlai, ʼalimi bä yafi cuadayoa.

²Eja bamacö bälöo showao däjä, bamacö ʼamolanö, öjö lä bäma bä yafi bufibläö.

³Bamacö didiobä bamacö lucäo bufi doblao lä culenaja, öjö lä bä yafi jamö bamacö çai lucäo bufi doblao, bamacö nö shïloco beblalou mlaobä.

⁴Öjö tawä? Ei bamacö yafibö jamö bamacö cua lä showale däjä, bamacö nofi fölijio ja bamacö ʼa nö bleo. Shïloco bamacö bälöo majöobä mlai, ai bamacö yafibö jamö dodijidawä bamacö yai lucäo majöodayobä. Tä cudio dao lä mlai, bäma tä tabi fa feicöfälönö, ʼalimi bamacö yai cuodayobä.

⁵Öjö bäma bä yafi bufijabä, cama Yai Bada tänö bämalecö taamaö. Bämalecö nia lä dobädayou wei bäma tä bufibobä, cama a Bufi li jibämoa balöbema.

⁶Öjö cudeenö yamacö bufi shïlo lofote li cuo fe yadio. Ei yamacö sicö ja yamacö cuo showao däjä, Bada tä lä bälöladi jamö culanö, yamacö bälöa blajawä. Öjö yama tä daö.

⁷Yama tä dablaö ma mlai ma cui, tä nia lä cuo wei tä ja yamacö möläö showalanö, yamacö cudia lä cule.

⁸Yamacö bufi lofote. Ei yamacö sicö lä cui, yamacö sicö yai daamamou bufi doblao. Bada tä lä culadi jamö yamacö yai ço bufi doblao.

⁹¿Öjö tawä? Öjö ma cui, Bada lijamö yamacö ma culadi ma cui, äyämö yamacö blajawä bälöa ma showale ma cui, öjö yama tä bufi doblamabobä yama ecö li waiquiwä.

¹⁰Cristonö täbä nia lä jimaö wei jamö, bamacö bluca nia malä icuo wei, bamacö lä cuaano wei tä jimabä. Ei bamacö sicö ja bamacö cuo däjä bäma tä lä tano wei tä nowa nia çamaö cadidio. Wälidiwä bäma tä lä tano wei tä ma cui, dodijidawä bäma tä lä tano wei tä ma cui, tä nowa nia bluca çamaö.

¹¹Bada tä nö quili tamobä a. Öjö yama tä daö cudeenö yamacö a fe blacäjou, ai bä lä cui bä bufi jaducäblou fe yadiobä. Yamacö lä cuaaö wei, Yai Bada tänö yamalecö daö. Cafä wamacö ma cuinö yamalecö çai daö mö feduobä wamacö.

¹²“Dodijidawä yama a wä jïliabä, Pablo a wäfa wäyämou ço lä cule”, wamale nofi tabou dicoo dijä. Camiyä yamacö lija wamacö bufi yai doblalobä yamacö a. ¿Öjö tawä? Mijamö ai bä a läo däjä wamalecö nofi báyäbobä yamacö a. Miji bä lä cui, bä bufi nia lä cadidou wei tä ja bä bufi daeo mlai ja, ai täbä lija bä nofi nia lä doablamou wei tä ja, bä bufi shïlo yai doblalou talei.

¹³Yamacö a jowa faö mojodi ja, Yai Bada tänö yamalecö bayeliblabä a malä cule. Öjö ma cui, yamacö a faö walalawä waiquiwä ja, walalawä yamalecö a da jïlilä, öjö lä.

¹⁴Yai Bada tänö yamalecö nofimaö fe balojowä yalo, showadi öjö yama a wä fuabä tä malä cule. Abenaja yamacö bufi yai cuu dodijia lä cule. Yanowamö täbä nia bluca lä nomaö wei jamö Jesucristo a nomaa läa waiquilayoma cudeenö, öjö lija täbä bluca nomaa yädäa waiquilayoma.

¹⁵¿Öjö tawä? Täbä bluca bayeliblamobä a nomalayoma, cama bä cuaaö bufi lä doblao wei etä mladobä. Cristonö bä taamaö bufi lä doblao weinaja, bä shïlo yai cuaaö majöobä. Bä nomaö shi wäljio mlaobä, öjönö bä çai fa nomalönö, bä çai demi jocädou çoma.

¹⁶Yanowamö täbänö täbä nofi lä tabou wejeinaja, fei däjä ya täbä nofi taboimi majöwä. Shädayai. Cristo a ma cui, a nofi tabou lä balöono wejeinaja camiyä ya ma cuinö ya nofi çai jole tabou mö feduo balöoma. Inaja ya nofi jole tabou ma balöono wei ma cui, fei däjä inaja ya bufi cuimi.

¹⁷Cristo lijamö bä lä yädäle, bä dude cublou majölayoma cäbä. Bä jaba lä cuaano weinaja fei däjä bä cuaaimi. Dude tä a jamö bä cublou lä majölayono wei cäbä.

¹⁸Inaja Yai Bada tänö täbä taamaö. Cama lija bämacö ajedeblobä, Cristo a shimölema. Fei däjä, ai täbä ajedeblamaö mö feduobä, yamalecö lämabou.

¹⁹¿Öjö tawä? Yai Bada tänö yanowamö täbä ajedeblamabä, Cristo a shäa lämalema, täbä doblou lä mlai täbä lija etä nowa tabou mladobä. Öjö yama tä ʘ wäyää cuaabä, yamalecö lämabou.

²⁰Cristo yama a wano wäyabä yamacö, Yai Bada tä lä nofi wei tä ʘ jiliabeje. Cristo yama a wano talanö, yamacö ʘ fe blacäjou. Yai Bada lija bä nofiö mö da feduo, öjö lä.

²¹Cristonö wälidiwä tä dano ma mlai ma cui, camiyä bämacö bayeliblamobä, bäma tä wälidiwä lä tano wei Cristo lija tä yädämaquema. Camiyä bämacö lija, Cristo dodijidawä etä lä cui etä yädäo mö feduobä. Cristo lija bämacö bufi fa cuicunö, Yai Bada lija bämacö dodijidawä dablamous fe yadiobä.

2 Corintios 6

¹Yai Bada lija yamacö ojodamou yädäa yalo, cafä wamacö lija yamacö ʘ fe blacäjou. ¿Öjö tawä? Yai Bada tänö wamacö nofi lä ojodabou wei tä ʘ jole jole yubo dijejä.

²Yai Bada etä ʘ oni jamö, abenaja Yai Bada tä malä cuno wei. Bei. Bämacö bayeliblabä tä yai cuo lä shaliliono wei däjä, cafä wamacö lija ya yömöca daoma. Wamacö fucäamobä tä yai lä cublono wei däjä, bämacö bayeliblalema. ¿Öjö tawä? Einaja Yai Bada a cuma. ¡Fei däjä wamacö bayeliblamobä jowa! Fei däjä cafä wamacö nia lä bayeliblamou wei bei tä cua dodijia lä cule. Fei däjä showadawä wamacö fucäamobä.

³Tä ʘ jiliaö mojio dicoo mlaobeje yamacö bufi shilo moyawäablalou, Yai Bada yama tä ʘ lä wäyää wei yamacö ʘfa tamou mlaobä.

⁴Yamacö cuaaö lä bädao wei tä ma cui ja, showadi yamacö dodijaö, Yai Bada yama a wä lä fuaö wei yamalecö ʘfa jole taö dicoo mlaobeje. Yamalecö nö ma bleaamaö wejei ma cui, yamacö ma yabäcamou wei ma cui, yamalecö doblamaö ma mlajei ma cui, yamacö bufi yanöcölanö yamacö nö wälojaö fe yadio talei.

⁵Ai däjä yamalecö si yowaöje. Ai däjä yamalecö fe labouje. Ai däjä yamalecö nabä läläoje. Yamacö ojodamou modaaö. Yamacö çai majalishi waiyou. Yamalecö çai ofämaö talajei.

⁶Suwä bä lija yamacö yabäcäo lä mlai tänö yamacö bejedi dablamous. Yai Bada etä ʘ ja yamacö bufi lä jaducäi tänö çai. Täbä doblou ma mlai ma cui yamacö ʘ faö si ijejeomi. Yama täbä nofi ojodabou. Yai Bada tä Bufen lija yamacö luluamou. Yamacö nofimou shaliliwä.

⁷Yamacö ʘ faö ja yamacö bejedimou. ¿Öjö tawä? Yai Bada tä lofotenö inaja yamacö cuaaö. Yamacö showadi lä bejedimou wei tänö yamacö nowamöo.

⁸Wawädowä yamalecö nofi ma tabou wejei ma cui, yamalecö nofi ma wälibou wejei ma cui, yamacö bejedimou showao fe yadio. Yamalecö ʘfa ma taö wejei ma cui,

yamalecö ʔafa dodijidawä ma wäyäö wejei ma cui, inaja showawä. “Bä jolemou”, yamalecö nofi ma tabouje däjä ma cui, yamacö jolemoimi.

⁹Jesucristo yama a wəno wäyäbä yamacö ma cui, inaja ai bänö yamalecö nofi taboimije. Ai bä mö feduwänö, yamalecö ʔ shılo jıliaö bufi doblao ayaoje. “Bä nia shäo cadidioje”, ai bänö yamalecö nofi ma tabou wejei ma cui, yamacö demi fuadalou showaa lä cule. Yamalecö nö ma bleaamaö wejei ma cui, yamacö nomaö mlai yamacö demi cua fe yadia.

¹⁰Yamacö bufi wəlidiaö ma cui, yamacö bufi doblalou fe yadio showawä. Yamacö nö ʔlilili bleaaö ma cui, tä nowa yai lä bluca wei tä ja, bluca yama täbä dobäö. Yamacö nö madofibimi ma cui, tä jödödöwä bluca lä cublai, camiyä yamalecö befi li bluca waiquiwä.

¹¹Colidoteli bä. Cafä wamacö lija yamacö ʔ jəyaami. Bamacö bufibou.

¹²Bufi läo mlai ja, dodijidawä bamacö yai nofimaö ma cui, cafä wamacönö wama tä lä table tänö, yamalecö dodijidawä nofimaö dobloimi dicowä.

¹³Ijiluyä ya bä dodijidawä lä yömölaablalaö weinaja bamacö yömöläö lä cule. Camiyä yamacönö bamacö dodijidawä lä nofimalenaja, yamalecö nofimaö cuaaö mö da feduoje.

¹⁴Jesucristo a bejedi bufii lä mlajei bä lä cui lija bä yädäo dijä. Cama bä bufi lä cuaaö weinaja etä shomia cudeenö, wamacö bufi nia cuaaö fe usucuo malä mlai. Tä lä dodijidai tä sho, tä lä wəlididi tä sho, ʔtäcöbä nia coyocoo daanö? Ma. Didi tä sho, jalu tä sho, täcöbä nofi nia tamayou malä mlai.

¹⁵Fecula bada a bufi lä cuaablalou weinaja, Cristo a bufi nia çai cuaablalou mö feduomi. Ma, Jesucristo a bejedi lä bufii wei a lä cui sho, a bejedi bufii lä mlai sho cäcöbä nofi tamayobä tä malä mlai.

¹⁶Täbä nö jole ijidubö lä bufiblamou wei täbä lä cui, Yai Bada etä yafi jamö ʔöjö täbä nia dablalou daanö? ʔÖjö tawä? ʔao. Camiyä bamacö lä cui, ʔYai Bada bäma ecö yafibömi daanö? Yai Bada tä demi cua shi lä wəlile, öjö bäma ecö yafibö malä cui. Yai Bada etä ʔ oni lä cuu weinaja showawä. Abenaja Yai Bada a cuma. Öjö ya bä çai nia bälöo. Ya bä nia çai fuu. Cama bä lija showadi ya nia bufiblamodii. Iba bä nia yai cuo.

¹⁷Einaja a cuma. Öjö cudeenö, abenaja Bada tä çai cuma. Öjö wama bä fa dacönö bä da yayicu. Ya täbä nofi lä shamibou wei täbä fuli dijejä. Öjö däjä, bamacö nia shılo dodijidawä blacämabou.

¹⁸Camiyä wamale nofi nia çai Föomaö. Inaja showawä, cafä wamacö lija ya nia ijilumou. Ijiluyä wamacö nia cuo, täyäyä wamacö nia çai cuo. Bada ya shılo lofote lä ayai, inaja ya cuu waiquiwä. Einaja Bada a cuma.

2 Corintios 7

¹ Camiyä bamacö lija, Yai Bada tänö öjö tabä afa bluca waa waiquibema. ¿Öjö tawä, bamacö lä nofimale wamacö? Öjö cudeenö, bämalecö bufi nia lä shamiamaö wei tabä bluca lä cui, bama tabä fulii da mlado, bei bamacö sicö bädawä mlai, bamacö bufi yai auobä. Yai Bada bama a nö quili talanö, cama bama ecö yai dodijidawä cuobä.

² Dodijidawä wamalecö yai da nofima. Moli ma cui bamacö yabäcanomi. Bamacö bufi wälidiamanomi. Bamacö mölamanomi.

³ ¿Öjö tawä? Bamacö afa tabä ya wami. “Bamacö bufibou”, ya cuu malä waiquiono wei. Shominaja tä cublou bädao ma cui, bamacö nofimaö waiquiwä.

⁴ Bamacö yömölaö walalaobä wamacö. “Ei bä dodijaö”, bamacö nofi tabou. Wamacö dodijaö yalo ya bufi yai lofoteo. Showadi yamacö nö ma bleaaö wei ma cui, cafä wamacö nowa ja ya bufi doblalou fe yadio talei.

⁵ Eja Masedonia jamö yamacö waloo däjä, yamacö bälöo yanöcöblonomi. Yamacö cuaaö lä bädao wei tä ma cui ja, yamacö nö bleaadii showaoma. Yamalecö nofi lä wälibou wejei bänö showadi yamalecö yabäcadimaje. Yamacö nofi çai jalujuo ja, yamacö nö bleaama.

⁶ Öjö ma cui, tabä bufi lä jalujou wei, Yai Bada tänö tabä bufi shïlo bayeliblaö talei. Tito a lä waloqueyoluu wei tänö, yamacö bufi lofotoblou çolayoma.

⁷ A lä waloqueyoluno wei tänö bädawä mlai. Cafä wamacö afa lä wäyäjälono wei tä anö, yamacö bufi yai doblaloma. ¿Öjö tawä? Tito wama a bufi jowa lä lofotoamano wei tä a wäyö fa çojolonö, camiyä yamacö ma cui, yamacö bufi çai lofotoblou mö fedua çolayoma. Wamale möö bufi lä doblaono wei tä afa çai wäyäjäloma. Wamacö bufi lä shädayaimono wei tä afa çai. Wamale nofi báyäbou bufi lä doblaono wei tä afa çai. Öjö tä afa blucanö ya bufi yai doblalodima.

⁸ ¿Öjö tawä? Cafä wamacö lija ya tä a oni lä shimöleno wei tä anö, wamacö bufi ma föliblaliyono wei ma cui, “Shädayai, ¿wedi tä tabä ya tä a çai li shimöblaa dicolema?”, ya bufi çai cublaloimi. Jaba ya bufi shïlo cuma ma cui. Öjö tä a oninö wamacö bufi jowa ma föliblaliyono wei ma cui, nö dedejblou mlai ja, wamacö bufi ononoblou çolayoma.

⁹ Ma, ya bufi yai doblalou. Wamacö bufi lä föliblaliyono wei tä ja mlai. Öjö tänö wamacö bufi mö yai yabjadou çoma yalo, ya bufi yai li doblalou. Camiyä ya wänö, Yai Bada tä showawänö wamacö bufi fölijiblamalema, cama lija wamacö bayeliblamou çobä. Camiyä yamacö anö wamacö nö bleaaö mlaobä.

¹⁰ ¿Öjö tawä? Yai Bada tänö bä bufi föliblamaö däjä, bä bufi mö yabjadou fa majöonö bä malä fucäamou wei. Öjö tä ja, bä shädayaimobä etä cuami majöwä. Öjö ma cui, yanowamö tabä lä cublai, tabä bufi lädou ma mlai ma cui, tabä bufi fölijiblou bädao ja, Yai Bada tänö tabä fucäabä öjö tämi. Tabä nomabä öjö tabä li waiquiwä.

¹¹ ¿Ya jolemou daanö? Wamacö bufi lä föliblaliyono wei, öjö Yai Bada tä mayo li cuo waiquioma yalo, wamacö shi yai jalimou majöa. Fei däjä wamacö a nö wäo bufi doblao. A nofi lä jushuano wei a lä cui, fei däjä, “Cuaaö buo”, wamacö cuu mlai ja,

wamacö a yai waiteliblou majöa lä cule. Tä lä wäldii wama tä nö quili yai taö majöa. Fei däjä wamale nofi shïlo yai bejedi tabou. Mijamö a lä cuaale, öjö wama etä cadejebloä bufi doblao. Fei däjä öjö wama tä yai fulii ja, wamacö afa tamobä tä cuami waiquiwä.

¹²¿Öjö tawä? Cafä wamacö lija ya si oni lä shimöleno wei däjä, a doblono lä mlai ya wafa wayoaö badaobä ya tä a tanomi. A lä yabäcano wei ya nofi bäyäbobä tä çai mlai. Yai Bada tänö wamacö bufi jaducäblamabä ya tä a li oniblalema. Wamale bejedi lä bufibou wei wama tä nö çai öjöbäbä.

¹³Öjö cudeenö, fei däjä yamacö bufi çai dodijidawä cua çoa lä cule. Yamacö bufi çai dodijidawä cuo çoa waiquio däjä, cafä wamacö lija Tito a bufi yai lä doblalono wei tä ja, yamacö bufi yai doblalou fe balojooma. Cafä wamacö nofi jaba jalujuboma ma cui, wamacö dodijaö fa dalalönö, a bufi malä doblalono wei.

¹⁴Tito lija, cafä bämacö afa dodijidawä lä wäyänö wei tä ja, ya jolemonomi. ¿Öjö tawä? Tito a ma cuinö wamacö dodijaö dalalema. Cafä wamacö lija yamacö a faö ja, yamacö showadi lä bejedimou weinaja, Tito a ma cui lija yamacö bejedimolayoma. ¡Inaja yai!

¹⁵Wamacö nofimaö ma waiquiono wei ma cui, wama a wä lä fuano wei tä ja a bufi cuolanö, ¡bejedi lä wamacö yai nofimaö fe balojowä! Wamacö bufi quilijolanö wama a lä walomaqueno wei tä nofi çai jaducäbou showaa yalo, wamacö yai nofimaö.

¹⁶¿Öjö tawä? Cafä wamacö lijamö ya yai möläö shalilibä wamacö waiquiwä cudeenö, bejedi lä ya bufi doblalou.

2 Corintios 8

¹Iba wamacö. Masedonia jamö, Jesucristo ebä lä yododoblai bä lä cuaaö wei tä ja, bämacö yömöläö ojode. Yai Bada tänö bä nofi lä ojodabou wei etä dablamos malä wawädoi.

²Bä yabäcamou ja bä nö yai bleaama ma cui, bä bufi doblalou fe balojoa fe fa yadionö, bejedi lä bä dodijaö. Bä nö föli ma bleaalanö ma cui, täbä bayelibloä bufi doblao fe yadiomaje.

³Ya bä shi öjöde dalalema. Blada bluca täbä jibäaö ma waiquilajenö ma cui, bä nö lä bleaale bä bayelibloä bufi fa doblaojenö, ai bä bluca yädäamaö çomaje.

⁴Camiyä yamacö lija bä bufi shalililanö, bä a fe blacäjou dodijioma. Jelusale jamö Jesucristo ebä nö afa bleaaö fa jililajenö, blada bä ja bä nia lä bayelibloä wejei bä lija bä yädäblou bufi doblaoma.

⁵¿Öjö tawä? Bä shi öjödao fe balojooma, camiyä yamacö bufi cuu lä bädaono weinaja mlai. Bada tä Jesús lija bä noshi öjöde waiquiwä yalo bä jibämoquema. Camiyä yamalecö a jilibeje, bä shi çai öjödaoma, Yai Bada tänö bä taamaö bufi lä doblao weinaja showawä.

⁶Masedonia jamö bä lä bälöbiyei bänö, blada bä jibäo lä cuaaö wejeinaja, inaja showawä cafä wamacö cuaaö mö feduobä, Tito yama a nia shimaö ço, wamacö nowa jaba lä tano weinaja, wamacö nowa yai taö cadidiobä. Wamacö a nö jaba lä wäono weinaja, Jelusaleteli wama bä yai bayelibläo cuaabä.

⁷Öjö tawä? Wamacö bufi yai lofote. Dodijidawä Yai Bada wama etä a yai wäyöö. Wamacö bufi yai jaducäwä. Wamacö bufi nö yai wälojoablalou. Wamalecö yai nofimaö. Öjö cudeenö, öjö lä tä ja wamacö lä dodijaö weinaja, blada bä ja wamacö shi nia lä öjödao wei tä ma cui ja, bä çai da dodija.

⁸Inaja bämacö nowa ma tale ma cui, bämacö nia nosiemaimi. Wamacö nia yai lä cuaaö wei ya tä dablaba ya wä. Masedonia jamö bä lä bälöbiyei bä lä dodijaö weinaja, wamacö cuaaö mö feduo ja, wamacö bejedi lä nofimu wei ya tä nia möö.

⁹Bada tä Jesucristo lä cuinö wamacö nofi lä ojobadou wei wama tä daö. Dodijidawä a bälimi cuodayoma ma cui, cafä wamacö bayeliblamobä, cama etä bluca fa dacönö a shıloco itolayoma. A fıliblou majölayoma. A lä fıliblaliyono wei tänö, cafä dodijidawä wamacö yai bälimi cuo majöodayobä.

¹⁰Öjö tawä? Abenaja camiyä ya bufi cuu. Jesucristo wama ebä bayelibläo bufi doblaoma yalo, lasha ai a cuo da balöoblei däjä, blada wama bä jowa mada shimomablei. Wama tä taö jowa bufi da doblaoblei, fei däjä tä yai da taje, öjö lä. Tä nö yai dodijidaobö wei.

¹¹Wamacö cuaaö bufi da doblaobleinaja, fei däjä, bufi doblalolanö wamacö yai cuaabä. Wama bä blada lä table tä ja, wama bä dobäbä.

¹²Wama tä lä table wama tä jibäo bufi doblao ja, Yai Bada wama a bufi doblalamaö cuquei. Wama tä tabou lä mlale tä nia wälili malä mlai.

¹³Cama bä shılo yai dodijidawä cuo majöo ayaobä ya wä faimi, cafä wamacö nö fılili bleaaö ayaobä mlai.

¹⁴Abenaja ya bufi shılo cuu yalo ya wä. Cafä wamacö fei däjä dodijidawä lä cule wamacönö, ai bä nö lä bleaale wama bä nofi ojobablalaö balöobä. Ai däjä nomöjowä, cafä wamacö nö bleaaö nomöjöö däjä, inaja showawä cafä wamacö çai taamamou nomöjööbä. Fe usucuwä bämacö bluca cuobä.

¹⁵Tä a oni lä cuu weinaja showawä. Abenaja tä a cuu. Bluca täbä lä dolaleno wejei bä lä cuinö täbä feibou juonomije. Wiisibö täbä lä dolaleno wejei bä lija bä damonomi. Einaja tä a cuu.

¹⁶Camiyänö bämacö bufibou lä culenaja, Tito a ma cuinö wamacö bufibou mö fedua. Inaja Yai Bada tänö a bufi taamama yalo, ya bufi doblalou.

¹⁷Cafä wamacö lija a fubä, yamacö a fe lä blacäjono wei däjä, a wä fuo showadaoma. A fuu bufi doblao waiquioma yalo, a nia fuu.

¹⁸ Camiyä bamacö mashi ai Jesucristo e lä cui, Tito lija öjö yama e nia çai shimaö. Jesucristo etä ʔ dodijidawä wäyää ja, a wə shalilou yalo a nofi showadi lä dobou wejei a lä cui. Jesucristo ebä lä yododoblai bänö a daö waiquiweje.

¹⁹ Jelusale jamö yamacö fuu lä nomöjöö wei däjä ma cui, öjamö a nia çai fuu. Yamalecö bayeliblabä, Jesucristo ebä lä yododoblai bänö, fei däjä öjö a yaia shalililemaje. ¿Öjö tawä? Fei däjä blada bä shimomaö lä cudujei. Jelusaleteli bä lijamö yama bä çai fuu däjä, öjö yama bä blada çowaö cuaabä jamö, camiyä yamacö lija öjö a nia nocaaö. Jesucristo ebä nö lä bleaale bäma bä bayeliablalaö ja, Yai Bada tä nia doblao dablamous. Camiyä bamacö ma cui, bäma bä bayeliblaö lä ojodao wei, tä nia çai dablaöje.

²⁰ Jesucristo ebä nö lä bleaale bäma bä dobäbä, Jelusale jamö yama bä nia çai blada fufälöö. Öjö yama bä blada lä fulii wei tä ja yamacö ʔfa tamou mlaobä, yamacö moyawäablalou.

²¹ Yai Bada lija yamacö dodijaö dablamböbä, yamacö bufi shilo malä daeo wei. Yanowamö täbä lija çai.

²² Cafä wamacö lija Tito, ai sho, yama cöbä shimabä jamö, camiyä bamacö mashi Jesucristo ai e ma cui, öjö cäcöbä lija yama e nia çai yädäamaö. Bluca yama a wabaö waiquiwä, yama a bejedimou möbä. Yama a lä shimöadalaö wei tä ma cui ja, a ojodamou bufi doblao talei. Cafä wamacö nofi mölabou dodijia cudeenö, fei däjä cafä wamacö lijamö a yai fuu shi jalimou lä cule.

²³ ¿Öjö tawä? Tito a lä cui, camiyä sho yafäcö lä ojodamou wei a. Cafä bamacö bayeliblabä jamö, öjö a yädäa. Ai cäcöbä lä cui, Jesucristo ebä lä yododoblai bänö cäcöbä shimölemaje. Cäcöbä lä cuaaö wei tänö, Cristo showadi a doblao dablamböö waiquiwä.

²⁴ ¿Öjö tawä? Öjö bä waloo däjä, dodijidawä bä çai da cuoje, öjö lä. Jesucristo ebä lä yododoblai bänö wamacö ʔfa nofimou jiliabeje. Ei bä nia lä fuu wei bä lija, cafä bamacö nofi showadi lä dobou wei tä bejedi dablafälöbeje.

2 Corintios 9

¹ Jesucristo wama ebä bayeliblabä wama bä blada nia lä shimaö wei, ya tä ʔfa wayoabä tä cuami waiquiwä.

² Wama bä bayeliblaö bufi doblao malä waiquio wei. Bamacö daö. Masedonia jamö bä lä bälöbiyei bä lä cui lija bamacö nofi dobou talei. “Ai a lasha cuo lä balöofe a lasha ma cui ja, Acaya jamö bä lä bälöle bänö, bä blada shimomaö cuaaö waiquiomaje”, yamacö shilo cuu talei. Cafä bamacö shi ʔfa jalimou fa wäyänö, cama ai bä bluca lä cui, bä shi jalimoa mö fedulayoma.

³ Öjö ma cui, blada wama bä shimoa waiquimalema cudeenö, Tito sho, ei cäcöbä sho, yama bä shimaö balöa lä cule, wama bä blada lä table tä möblabeje. Wama bä blada çai ajedebou showadaobä, bamacö ʔfa wäyää ja ya lä cuno weinaja showawä. Bamacö nofi lä dobou wei tä ja, ya jolemou majöö mlaobä.

⁴Mijamö camiyä ya fuu fa majöonö, Masedoniateli ai ya bä nocamabou bädawä ja, wamacö jolemou dablamous majöö mlaobä. Ya möläö ma cadidio wei ma cui, bamacö jolemou fa dalalönö ya quiliyou majöö mlaobä. Camiyä shïlo bädawä mlai, cafä wamacö ma cui wamacö yai quiliyou mö feduo mlaobä ya wä.

⁵¿Öjö tawä? Öjö cudeenö, cafä wamacö lijamö Titonö cäcöbä çai fuu balöobä, ya bä nowa tama. “Inaja yai”, ya bufi cuma. Ya waloo showao mlao däjä wama bä blada ajedebou showadaobä, wamacö a nö lä wäono weinaja showawä. ¿Öjö tawä? Wama bä ajedebolanö, camiyä yamacö a faö mlai ja, bufi doblalolanö wama bä jibäa showadabebä.

⁶Abenaja tä malä cule. Tä lä döaö wejei tä çoaö cadidioje. Moli mo döamou ja, moli a nia çamamou. Bluca mobä döamou ja, bluca bä nia çamamou.

⁷Wama bä nia blada lä jibäo wei wamacö lä cuinö, cafä wamacö bufi bluca lä shalilou weinaja, wama bä nia blada jibäo cuaaö. Wama bä blada jibäalanö wamacö bufi läblou majöö mlai. Bä da jibäcöje, täbä cudii tänö mlai. Bui doblalolanö täbä lä jibäo wejei bä lä cuinö, Yai Bada tä Bui yai doblalamaöje.

⁸Cafä wamacö ma cui, wamacö nia yai lä bayeliblamou wei tä ja, Yai Bada tänö wamacö dobäo daö fe balojowä. Wamacö fõlimou mlaobä. Bä bluca lä dodijaö wei wama bä çai bayelibläo mö feduobä.

⁹¿Öjö tawä? Tä a oni lä cuu weinaja showawä. Abenaja tä a cuu. Bä lä fõli wei showadi bä bayelibläo lä culadi. A nia dodijaö shi wälii.

¹⁰Bä lä ficalimou wei bä lija, mobä bluca jibäaö talei. Täbä ofäo mlaobä nii bä bluca çai lalomaö. ¿Öjö tawä? Öjö a showawä lä cuinö, wama bä lä table bä nia balamaö. Bä nö lä bleaaö wei, wama bä nofi showadi ojodabobä, afä bä nia blucablamaö.

¹¹Wamacö shi lä öjöde wei tä nowa ja, wamacö bufi nia çai bayeliblamou fe balojoo. Bä nö lä bleaale bä lija yama bä blada jibädayou däjä, cafä wamacö nowa ja, Yai Bada lija öjö bä bufi nia afa yai doblalou wäyämou.

¹²Jesucristo bäma ebä lä bayelibläo wei tä ja, cama bä bayeliblamou bädao mlai ja, Yai Bada lija bluca bä bufi afa çai doblalou wäyämou fe malä balojoo wei.

¹³Jesucristo wama ebä bayelibläo bufi lä doblao wei tänö, wamacö lä bejedimou wei tä nia dablamous. Öjö tänö Yai Bada a wäfa nia dodijaö wämou. ¿Öjö tawä? Cristo dodijidawä wama etä a bejedi fa bufinö, wama tä a fuaö cadidiwä. Bui lämou mlai ja, Jelusale jamö Jesucristo ebä lä bälöle wama bä bayelibläo bufi malä doblao wei. Shomi jamö bä lä bälöblai bä ma cui, öjö wama bä bayelibläo bufi çai doblao.

¹⁴Yai Bada tänö wamacö nofi lä ojodabole tä dablamous fe balojowä yalo, öjö bä lä cuinö wamacö bufiçöje. Wamacö nö çai bayeli nacaöje.

¹⁵Camiyä bämalecö yai lä dobälano wei a lija, bamacö bufi afa yai doblalou da wäamo. Bui lämou mlai ja, tä yai lä lofote wei tä ja, bejedi lä Yai Bada tänö bämalecö dobälema!

2 Corintios 10

¹Cristo a wə oquewä faö lä cuaano weinaja, camiyä Pablo ya wə oquewä faö cuaaö mö fedua lä cule. Wamale ʔ jliabä, ya wə fe nia blacäjou. ¿Öjö tawä? Ai wamacönö abenaja wamale nofi jəwa tabou. “Eja culanö a wə Pablo faö ma quili wei ma cui, blajai jamö a culanö, a wə shilo li faö waiteliblou.”

²Jaö. Mijamö ya waloo däjä ya wə faö waiteliblou mlaojolobä, dodijidawä bä da cuicu, öjö lä. Yanowamö täbä showadi lä cuaaö weinaja, ¿camiyä yamacö cuaaö mö feduo daanö? Inaja ai wamacö bufi nami cuablalou. Inaja wamalecö nofi tabou dicoo ja, bejedi lä ya wə nia faö lofotoblojoulou.

³Bitä jamö yamacö bälöa ma showale, yanowamö täbä showadi lä cuaaö weinaja yamacö cuaaö malä mlai. Cama bä lä ishous weinaja yamacö cuaaö. Camiyä ya li ishobä, tä li shomi.

⁴Täbä ishobä täbä çai lä fuu wejei yama täbä bou malä mlai. Yai Bada etä lofote lä cui öjö yama etä yai bufibläö, fecula bada yama etä wəliabä.

⁵Yai Bada etä ʔ jliäö mlaobeje, ai bä ʔ shilo lämodii ma cui, yama bä ʔ nö wəloblamaimi. Ala nacö badanö bä fe dadomabou lä culajeinaja, tä ʔ jliäö mlaobeje tä lämabou ma cuo wejei ma cui, yama etä wəliäö cuaaö. Bä bufi ma shominajaablalou wei ma cui, Cristo a wə dodijidawä fuabeje yama bä bufi li taamaö fe yadio.

⁶¿Öjö tawä? Cristo wama a nosie yai fuaö lä daö wei däjä, wama a nosie fuaimi dicowä ja, bamacö nö nia bleamaö.

⁷Bä bufi yai da daeo. “Camiyä Cristo ya e”, wamacö nofi lä tamamou wei wamacö lä cui, bä bufi da jaducäicu. Cafä Cristo wama ecö lä culenaja, camiyä yamacö ma cui, yama ecö cua mö fedua.

⁸Cafä bamacö bayeliblebä, Bada tänö yamalecö lämabou lä cule. Yamalecö ʔ jliabä yamacö. Bamacö famimabä mlai, bamacö yai bayeliblebä yamalecö lämabou. ¿Öjö tawä? Yamalecö ʔ jliabä yamacö, ya cuu nofi jəwa ma jushuaö wei ma cui, ya wəfa nia bada wəamou quiliimi.

⁹Bamacö quilimabä ya sibä oni shimaimi. Inaja wamale nofi tabou dicoo dijä, ¿öjö tawä?

¹⁰Cafä wamacö lijamö, abenaja ai bä jəwa malä cuu wei. “Pablo oni etä ʔ jamö, a wə jilimamou lofote. A wə jilimamou çai waiteli. Öjö ma cui, cama a yai lä dablou wei däjä, a dablamou quili majöo. A wə nö lofotoblobimi talei.” Wale ʔfa wayoaöje ja, inaja bä jəwa cuu.

¹¹Inaja bä lä cuu wei bä lä cui lija abenaja ya cuu. “Öjamö ya waloo däjä, oni tä ʔ jamö ya lä cuu weinaja, inaja showawä ya nia cuaaö shalilou.”

¹²Mijamö showadi bä dodijidawä lä jimöo wei, ʔwamicai bä li dodijidawä cuo ayaobä! Yai Bada lija bä nia dodijidawä lä dablamou wei tä ja, bä shalilou mlai ja,

cama yanowamö bä lija bä nia dodijidawä fa dablamonö bä bufi shïlo cuaablalou dicoo. Inaja bä cuaaö dicoo ja bä bufi daomi waiquiwä.

¹³Camiyä yamacö äfa dodijaö wäamobä tä cuami waiquiwä ja, yamacö äfa nia wäamou buomi. Yai Bada tänö yamalecö yai lä shimöleno wei jamö, yamacö lä ojodamou wei tä ja, yamacö äfa nia shïlo wäamou bädao. Camiyä yamacö lija, cafä wamacö ma cui, wamacö nabä çai shimöquema. ¿Öjö tawä?

¹⁴Mijamö yamacö da ojodamoblei tä ja, yamacö äfa shïlo yai wäamou cuquei. Camiyä yamacönö, cafä wamacö lija Cristo yama etä ä mada wäyâyolublei.

¹⁵Ai täbä ojodamou lä dodijaö wei tä ja, camiyä yamacö äfa nia wäamamoimi. Camiyä yamacönö yama tä tano malä mlai. Yamacö nia jimöo bashiblaomi. Ma, camiyä yamacö nia ojodamou lä majöo wei jamö, yamacö bufi shïlo yai shalilio waiquia lä cule. Öjö tä ja, yamacö li möläo waiquia. Jesucristo wama a nofi mölabou lofotoo däjä, wamacö fe bluca lä fayole täbä lijamö yamacö nia ojodamou nomöjöo,

¹⁶täbä bälöa fe lä dolejele jamö, yama tä ä dodijidawä wäyâo nomöjöobä, ai bänö tä ä wäyâo lä waiquiono wejei jamö mlai. Inaja yamacö nia cuaaö, shomi bä ojodamou mö lä feduono wei tä jamö, yamacö äfa jole wäamou bashiblaomlaobä.

¹⁷Abenaja Yai Bada etä ä oni cuu. Yanowamö a wä shi doaö bufi doblao ja, cama a nofi doamolanö mlai, Bada tä nofi shïlo yai doabä. Einaja tä ä cuu.

¹⁸Cama bä äfa dodijaö lä wäyämou wei tänö, Yai Badanö bä nofi nia taboimi. Bada tänö bä äfa dodijaö lä taö wei däjä, öjö däjä bä nofi nia shïlo tabou cuquei.

2 Corintios 11

¹Bei. Miji bä showadi lä jimamou weinaja, ya wä nia faö bashio ma cui, wamale ä jïlia fe da yadilä.

²¿Öjö tawä? Yai Bada tänö wamacö nofi lä jalujubou weinaja, camiyä ya ma cuinö bäamacö nofi jalujubou mö feduo. Cama bä feyalobö e lija, suwä bä moco fubaö dao lä mlajei bä dodijidawä jibäaö lä cuaaö wejeinaja, Cristo lija, inaja showawä cafä bäamacö çai jibäa mada taquii.

³Öjö ma cui, bäamacö nofi fölijibou. Mölamalewä cäcönö, Ewa a mölaa lä tamaleno weinaja wamacö cublou mlaobä. Cristo wama a shïlo yai bejedi nofimaö cadidiobä a ma cui, shomi tä ä ja wamacö bufi li majöblou dicoo mlaobä.

⁴Jao. Wamale ä da jïlilä, öjö lä. Shomi tä ä lä wäyâo wejei, wama bä ä jowa jïliaö ojode malä waiquii. Cafä wamacö lija Jesús yama a wäfa da wäyâblei, tä ä shomiblamaö ma waiquioje däjä ma cui, wama bä ä jowa jïliaö bufi doblao dicoo. Yai Bada wama a Bufen tabou ma waiquile ma cui, shomi wama tä ä jowa dääo bufi doblao majöblaa. Jesucristo wama etä ä dodijidawä tabou ma waiquile ma cui, shomi tä ä ja wamacö jowa yömölamou bufi doblaa majöa.

⁵Jesucristonö miji bä jowa lä shimöleno wei, ¿miji bei bä shïlo dodijaö ayao daanö? Camiyänö ¿bei ya wäno wäyâo daimi tawä? Inaja camiyä ya nofi tamoboimi.

⁶Wawädowä bamacö lä yömöläö wei jamö, wamale aca afa jayu taö ma mlai ma cui, tä a nia yai lä wäyämou wei tä a lä cui, camiyänö ya tä a yai li daö. Wamale daö malä waiquile. Yamacö cuaablalou lä bädao wei tä ma cui ja, yamacö bejedi dablamou.

⁷Mijamö Yai Bada ya etä a dodijidawä da wäyädiblei däjä, bamacö yabäcaö mlaobä, ya tä nowa nacanomi. Ya nacobä ya ma cui, “Ya bufi lofotoablalou fe yadio weicätä”, ya bufi cuma. Inaja ya da cuaablei, ¿tä wälidioma daanö?

⁸Cafä bamacö bayeliblabä, Jesucristo bufilewä ai bä lä yododoblai bä lija ya li bayeliblamolayoma. Öjö bä lija ya dobämöbä bä cuono ma mlai ma cui.

⁹Cafä wamacö lijamö ya da cuoblei däjä, ya ma foliono wei ma cui, nii bä ja bamacö yabäcanomi. Masedonia jamö culanö, Jesucristo ebä da waloicui bänö wale fa dobälöjenö, dodijidawä ya cuo fe yadioma. ¿Öjö tawä? Nii bä ja bamacö yabäcaö mlaobä ya bufi läoma. Obi ma cui, bamacö nia yabäcaimi.

¹⁰Bamacö yabäcaö da mlaoblei tä ja, “¡Inaja lä yai!”, ya bufi cuu. Acaya jamö wamacö lä bälöblai, ai wamacö a ma läo däjä, ya wafa nia jilimamou fe yadio. Ya jolemoimi. Ya nacono lä mlai, ya quilijou mlai ja ya wafa nia wäyämamou. Cristo ya wafa bejedi wäyäo lä culenaja, inaja showawä ya wafa nia cai bejedi wäyämou cuo mö feduo.

¹¹¿Bamacö nofi wälibou yalo, bamacö niibö nacaimi daanö? Bamacö lä nofimale, Yai Bada tänö tä daö.

¹²Inaja showadi ya nia cuaaö, bä lä jolemou wei bä lä cui ya bä a si waidamabä. “Pablonö bä cai lä cuaaö weinaja, camiyä yamacö ma cui yamacö cuaaö mö feduo”, bä jole lä cublalou wei bä lä cui.

¹³Jesucristo lija bä a shimamou wafa ma wäyämou wei ma cui, bä jolemou. Jole jole bä ojodamou buo. Cristonö yamalecö yai lä shimöleno wei, yamalecö jole jole owäblalaö bädaoje, täbä mölamabeje.

¹⁴¿Öjö tawä? Inaja bä nia jole lä cuaaö wei, öjö bä waiquiwä. Sadanasi a ma cuinö, ajele bä shi lä wacalai bä cai jole malä owäblalaö wei.

¹⁵Cama ebä li inaja cuaaö mö feduobä, öjö ebä waiquiwä. Öjö a wä fuamöbä ebä lä cuinö, bä yai lä dodijaö wei bä jole jole owäbou daoje. Inaja bä cuaaö yalo, obi bä nö nia yai bleamamou fe balojoo.

¹⁶“A bufi daomi”, wamale a nofi tabo dijä. Ya wä faö malä waiquile. Öjö ma cui, inaja wamale nofi tabou fe yadio ja, wamale a jilia fe da yadilä. Bä bufi dao lä mlainaja bä jole jimöo lä culenaja, ya cai jole jimöo cuo mö feduobä.

¹⁷Inaja ya cublalou bashiobä, Bada tänö tä nabä shimaimi. Miji bä lä jimöo wei, ya bä shi jole jole owämaö bädaa, wama tä a nö wälidiwä öjöböabä.

¹⁸Yanowamö täbä showadi jimöo bufi lä doblao weinaja, mijamö Jesucristo a wano jole lä wäyäo wejei bä lä cui, bä cai bluca cublalou dicoo. Öjö cudeenö, öjö bä lä cuaalenaja, camiyänö ya bä a nia jole jole owäbou buo.

- 19**Bä bufi dao lä mlai, wama bä ʔ jiliaö bufi doblao malä waiquii. ¿Öjö tawä? Wamacö bufi jaducäwämi dodijiwä.
- 20**Cafä wamacö lija bä nosiemou ma bashio wei ma cui, wamacö ma blocoamaö wejei ma cui, wamacö ma mölamaö wejei ma cui, wama bä ʔ jiliaö ojode showawä dicowä. Cama bä jimöödii däjä ma cui, wamacö nö ma waiblaöje däjä ma cui, wamacö yömöca dablalou showao fe yadio.
- 21**Shädai. Inaja yamacö nö cuaabömi lä yai däjä. Öjö ma cui, cama bä lä cui bä jimöobä tä cua ja, camiyä ya jimöo mö feduobä, tä yai cua fe balojoa. Ya jimöobä ya ma mlai ma cui, jai ya bufi mojadi ya nia cuablalou buo.
- 22**Bei. Cama ebleo bä ʔfa jilou bufi lä doblao wei, ¿camiyä ebleo öjö yami daanö? “Isaeli yama ecö”, bä lä cuu wei, ¿öjö yami? Abloomö bä ijilubö nodiwä jowa. Camiyä öjö ya çai showawä.
- 23**“Cristo yama a wä lä fuaö wei yamacö”, bä ma cuu wei, ¿camiyä yai! Camiyänö ya wä yai li fuaö dodijio. ¿Öjö tawä? Ei ya wä lä fale tänö, jai ya shi wälii ya wä jilimamou cuwä ma cui, ya wä nia wabäo showao fe yadio. Bei. ¿Camiyä yai! Camiyä bei ya shilo ojodamou yaio. Showadi wale fe lä lamaö wejei, camiyä ei bei ya yai. Wale si çai shilo yafelimaöje. Bluca bei ya mili nomaoblou cuaaö.
- 24**Judio bänö 5 wale fuwämaö fa cuaajenö, wale si yafelimalajenö, 39 wale si yafelidaö cuaamaje.
- 25**Lomateli bä mö feduwänö, 3 wale fuwämaö fa cuaajenö, fii fibänö wale si yafelia mö fedulalemaje. Ai däjä, maa mabänö wale çai shäyälalemaje. Modu u jamö, 3 ya befi çai wälioblou cublou mö fedulayoma. Ai däjä, modu u jamö ya befi çai fa löblalunö, ya çaa fe fa jalualunö, ya çao showao däjä tä mö weyaa çolayoma.
- 26**Showadi ya blajawä fuu cuaadii. Mau u bada lä ʔcoblai ubä jamö ya nö quilili bleaaö. Wale madofibö fucäablabeje wale nabä queoje. Iba judio bä mö feduwä lä cuinö wale nabä çai läläoje. Judio bä lä mlai bä ma cuinö wale nabä çai fuuje. Täbä shabonobö lä cublai jamö ma cui, tä ulufi lä blocoblai jamö ma cui, modu u jamö ma cui, ya shämobä showadi tä läblawä. Jesucristo ebä ʔfa jole lä jilou wei bänö, wale nö çai bleaablalamaöje.
- 27**Ya ojodamou çai modaoblou. Ya nö çai bleaaö. Ya çai majalishi waiyoblou. Ya çai ofäoblou. Ya çai amishaoblou. Nii bä cua mlai ja ya cudio. Tä ulufi si lä ajii jamö, ya nö çai wajiadili beblalou.
- 28**Inaja ya cuaaö ma waiquio däjä ma cui, Jesucristo ebä lä yododoblai, ya bä nofi bluca fölijibou yalo, öjö bä lija ya bufi çai cuaablalou talei.
- 29**Ai bä bufi ujuduaö dicoo ja, inaja showawä camiyä ma cui ya bufi çai ujuduoblou mö feduo talei. Ai bä doblamaimije ja, ya bä nö çai bähölö taablaö talei.
- 30**¿Öjö tawä? Ya jimamobä tä cua ja, ya nö ujudi lä bleaaö wei ya tä ʔfa nia shilo wäaö.

³¹Ya jolemoimi. Bada tä Jesús bä Fjö e lä cuinö wale bejedimou daö, Jesús lija a lä bufiblamou wei a showawä lä cuinö. Öjö a nofi yai doamou shi wälibä.

³²¿Öjö tawä? Aleda a wäfa bada lä cui a lä cuono wei däjä, Damaco jamö bada e lä lämabono wei e lä cuinö wale fuwäamaö bufima, cama wayu ebä lija. Wale fuwäabeje, ala nacö jamö yoca lä joleono wei jamö bä läo waiquioma.

³³Öjö ma cui, iba bä lä cuinö, ala nacö jamö wale çai fa dubofälöjenö, jai yolofi a bada cuwä ja wale fa didibalöjenö, tocota cäcönö bei täca lä jolale jamö, wale befi çai itoa jatomalemaje. Inaja wale fa taamajenö, bada anö wale fuwäamaö ma bufiono wei ma cui, wale documalemaje.

2 Corintios 12

¹Camiyä ya wäfa wäamou lä bashile tä ja, wamacö bayeliblamobä tä cua ma mlai ma cui, ya jole jole jimamou çoa bashiblaa lä cule. Bada tänö camiyä lija jai majali tä cuwä tä lä damalaleno wei, ya tä äfa nia wäaö majöo. Ai tä bluca lä wawämaleno wei tä ma cui.

²Bei. Fedu fe dole jamö, ai däjä ya bälamodayoma. Jai bei ya yai fuu dodijiodayoma tejemi. Cuwi, bei ya bufi bälao buodayoma fa cui. Ya tä daimi. Yai Bada tänö tä shïlo daö. Yedu jamö öjö tä cublaliyoma, lasha 14 ya famaö waiquiwä.

³Fedu fe dole jamö ya lä bälamodayono wei, ya tä shïlo daö, ya lä cufenaja showawä. Bei ya yai fudayoma fa cui. Ya tä daimi. Bei ya bufi shïlo bälao buodayoma fa cui. Yai Bada tänö öjö tä shïlo daö.

⁴Öjamö ya culanö, tä ä wäyämamou dao lä mlai, ya tä ä yai bluca jililedayoma. Yanowamö bämacö caficönö, bäma tä ä jayumaö dao lä mlai.

⁵Yai Bada tänö wale inaja lä taamano wei tä ja, ya shïlo yai jimamou dao, camiyänö ya tä lä taö wei tä ja mlai. Ya lä dodijaö wei mlai, ya nö ujudi lä bleaaö wei ya wäfa nia shïlo yai wäamamou.

⁶Öjö ma cui, ya jimamou bufio fa cunoja, jai ya bufi daomi ya nö dablamobö mlai. Ya wä nö bejediabö wei. Öjö ma cui, camiyä ya lä cuaaö wei ya wäfa wäamamou bufiomi, wale nofi doablaö bashio buo wejei. ¿Öjö tawä? Camiyä ya wäfa wäamamou ma mlai ma cui, ya lä cuaaö wei tä dablamou malä wawädoi. Ya bä lä yömölaö wei tä ä çai jiliaö waiquioje. “Inaja waiquiwä”, ya bufi cuu.

⁷Camiyä lija Yai Bada tänö tä bluca ma wawämadii wei ma cui, öjö tä ja ya jimamou shi jalio mlaobä, ya nia lä wasöo wei tä çai wai jibäbema. Sadanasi ai etä fa waloalunö, wale yabäcäbodii. “¿Camiyä yai!”, ya cuablalou fe balojoo mlaobä.

⁸Tä casömabä, Bada tä lija 3ya nö bayeli nacao cuoma ma cui,

⁹abenaja wale nowa taö dicooma. —Ma. Bä nofi lä ojudabou wei, inaja lä waiquiwä. Wa ujuduo däjä, çafä lija ya lofote malä dablamou talei —wale nowa tama. Öjö cudeenö ya lä ujuduo wei, bufi doblalolanö ya wäfa nia shïlo yai wäamamou fe yadio. Ya ujuduu däjä, Cristo etä lofotenö ya shïlo yai malä bayeliblou wei.

10 ¿Öjö tawä? Cristo a nowa ja ya ma ujuduu däjä ma cui, “Inaja lä yai”, ya bufi cuu. Wale nö ma waiblaö wejei ma cui, wale ma yabäcaö wejei ma cui, ya nö ma bleaaö wei ma cui, ya bufi doblao fe yadio. Ya yai ujuduu lä dodijio wei däjä, wale nö yai walojomabou malä cui.

11 Jai ya bufi daomi ya wä cuaaö lä cufe. Cafä wamacö mayo ja. Camiyä ya wäfa wäamamobä mlai ja, cafä wamacönö wamale äfa yai wäyäbä wamacö yai ma cui, wamacö ä fanomi dicowä. Miji bä lä cui, “¿Jesucristonö bä lä shimöleno wei, fei bä yai!”, wama bä nofi jöwa ma tablalaö ma cule, camiyänö inaja ya bä nofi nö tabobimi. “Öjö bä shilo yai dodijaö”, camiyä ya bufi cuimi. Camiyä wamale nofi tabou ma mlale ma cui, bamacö nowa taö.

12 Mijamö ya da cuoblei däjä, ya lä bejedimou wei tä dablou wawädooma. Jesucristonö bä lä shimöleno wei bä showadi lä cuaaö weinaja, ya mada cuaablei. Bufi yanöcöwä yanö, Yai Bada ya mayo dablamama. Tä nö lä quilijii ya tä çai wawämaö fe balojooma.

13 Cafä bamacö bayeliblaö mlai, Jesucristo ai ebä lä yododoblai, ¿ya ebä shilo bayeliblaö cuaaö ayaoma daanö, wamale nofi wälibobä? Ma, fe usucuwä bamacö bluca bayeliblaö malä cuaano wei. Moli tä bädawä ma cui ja, bamacö fe shilo usucuwä taamanomi. Nii bä ja, ai ya bä lä yabäcano weinaja, cafä bamacö shilo taamanomi. ¿Öjö tawä? Nii bä ja bamacö yabäcano lä mlai, ¿öjö bei wama tä nowa tabou da culanö?

14 Cafä bamacö fe waloo bolacao waiquiyoma. Ei däjä moli bamacö fe nia waloo çoo. ¿Öjö tawä? Nii bä ma cui ja, ai tä ma cui ja, inaja showawä bamacö nia yabäcaimi çowä. Öjö ya täbä nabä fuu mlai ja, cafä bamacö nabä yai fublaaö, bamacö nofimaö yalo. Ijilu bä lija bada bä dobämou mlai ja, ijilu bä shilo yai malä dobämou wei. Inaja showawä cafä wamacönö wamale dobäbä, ya fuimi. Cafä bamacö yai nia fa dobänö ya li fuu.

15 Cafä wamacö bufi yai bayeliobä tä cua ja, iba ya täbä bluca lä table, bufi lämou mlai ja ya täbä nö jibäquebö wei. Camiyä ya ma cui ya nö çai jibämoquebö wei. Inaja cafä bamacö yai nofimaö cuwä ma dodijii ma cui, ¿camiyä wamale nia nofimaimi?

16 ¿Wedinaja wamale nofi yai tabou? Wedinaja mlai. “Nii bä ja yamalecö yabäcaö ma mlaono wei ma cui, yamacö moyawäo fa mlacunö, yamalecö nami mölamaö”, wamale nofi jöwa tabou dicoo.

17 Ma. Mijamö ya bä da shimölii bä ma cuinö wamacö mölamanomije. Wamacö mölamabeje ya bä çai shimanomi.

18 Mijamö Tito ya shimölema, Jesucristo ai e çai. ¿Öjö tawä? Titonö wamacö mölamaö mada mlaoblei. Camiyä ya bufi lä cuu weinaja, Tito a bufi cuu mö feduo showaoma. Camiyä ya showadi lä cuaaö weinaja, a cuaaö shalilioma.

19 “Pablonö bä çai lä cule, bä nofi bäyäobä a wä”, ¿wamale nofi tabou tawä? Ma, bamacö lä nofiale wamacö. Yamacö nofi bäyäobä ya wämi. Bamacö bufi nia yai fa

lofotomabonö, bämacö yömöläö, Cristonö wamacö yömöläö ja, a nö lä cubö weinaja showawä. Yai Bada tänö wamalecö a bejedi daö.

²⁰Bämacö nofi jalujubou yalo ya wä. Mijamö ya waloo däjä, dodijidawä bämacö dablaimi ja, “Shädayai”, ya bufi jalujolanö ya nia cuu. Öjö däjä, camiyä ya wä ja cafä wamacö çai shädayaimou mö feduquei. ¿Öjö tawä? “Täbä afa tayou jatoo fa cui”, ya bufi cuu fa cuicunö, ya bufi wälidiwä. “Ai täbä dodijaö ayao ja, täbä nofi wäliayou jatoo fa cui. Ai täbä jushuo jatoo fa cui. Camiyä ya shilo yai bayeliblamobä, ai täbä cuu jatoo fa cui.” Inaja ya bufi cuu ja, ya nö yai bleaaö. “Ai täbä afa wayoaö jatoo fa cujei”, ya bufi cuu. “Täbä wanomou jatoo buo fa cui. Cama ai täbä jimamou jatoo fa cui. Täbä shifilimou bäa fa cule”, ya bufi cuu yalo, ya bufi nö bleaaö.

²¹Shädayai. Cafä bämacö fe waloo däjä ai wamacö dabloimi showawä ja, wamacö nofi jushublalou showawä ja, wamacö nofi beshili jushuaö showawä ja, öjö tä ja Yai Bada tänö wale bufi nia quiliblamaö. Wamacö bufi mö bluca yabajadaloimi showawä ja, ya mö öcölanö ya wä çai nia loblalou.

2 Corintios 13

¹Cafä bämacö fe waloo bolacao waiquiyoma. Fei däjä moli bämacö fe nia waloo çö. ¿Öjö tawä? Yanowamö täbä afa dabloimi jimaöje ja, moli a wänö täbä nia jimamoimi. Bolacabö cäcöbä ma cui,

³bä ma cui, öjö bä a faö fe usucuwä ja, öjö däjä bä nia shilo dabloimi jimamou, tä a lä cuu weinaja showawä.

²¿Öjö tawä? Miji bä jaba doblono lä mlai ya bä wasöo waiquioma. Bluca wamacö ma cui bämacö wasöma. Eja ya culanö, fei däjä ya wä faö çö lä cule, mijamö ya cuo da çoblei däjä ya da cubleinaja showawä. Ya fuu çö däjä, bä dabloimi showawä ja, ya bä nö nia bleaamama.

³Cristo ya wäno lä wäyäo wei, ya bejedi nia dablamou. Öjönö wamacö taamaö däjä, ujudi wama a nia dablaimi. Wama a nia shilo lofote dablaö.

⁴A yanowamöblaliyoma yalo, bei a li ujuduo bädaoma. Fii balitama tefi ja a shälema ma cujei, fei däjä a ujudimi. Yai Bada tä lofotenö a demi cua lä cule. ¿Öjö tawä? Cristo a ujudi lä cuono weinaja yamacö ujudi cublalou ma cule, mijamö bämacö çai cuo däjä, ujudi yamalecö nia dablaimi. Yai Bada tä lofotenö, Cristo a demi lä culenaja yamacö cua mö fedua yalo, yamalecö nia lofote dablaö.

⁵Cafä wamacö ma cui, bä bufi bejedi da mömo, öjö lä, Jesucristo wama a nofi jöwa lä mölabou wei, wamacö bufi bejedi dablambä. Wamacö jolemoimi ja, “Awei, camiyä lija Jesucristo a cua lä cule”, wamacö nia cudou.

⁶Jesucristo cafä wama ecö nö lä öjöböamou wei tänö, yamacö lä ojodamono wei wama tä nia bejedi dablaö. ¿Öjö tawä? Cafä wamacö lija yamacö nia bejedimou lä dablamou wei tä ja, yamacö möläö waiquia.

⁷Wəlidawä wama tä taö mlaobä, Yai Bada lija yamacö ʼa faö. Camiyä yamacö dodijidawä dablambä mlai, cafä wamacö dodijidawä yai cuobä, yamacö ʼa faö. Camiyä yamalecö ʼafa dobroimi ma taöje dǎjä, cafä wamacö dodijaö fe yadiobä.

⁸Tä ʼa bejedi lä waiquii tä ʼa ja, yamacö ʼa läo daomi. Yamacö ʼa nia lä bayelio wei, yamacö ʼa shilo yädäblou dao.

⁹Camiyä yamacö ujudi nö ma bleaaö wei ma cui, Jesucristo lija wamacö bufi lofotoblou ja, yamacö bufi nia doblalou fe yadio. Wamacö bufi yai dodijidablou çoobä, bamacö nö bayeli nacaö.

¹⁰Mijamö ya waloo showao mlao dǎjä, ei ya tä ʼa oni shimaö balöa lä cule. Ei tä ʼa ja wamacö bufi yai jaducäblou fa balöonö, dodijidawä bamacö dablajalobä. Bada ya läobä, Bada tänö wale ma tablamaleno wei ma cui, ya wə faö ja ya wə nö quiliblalou mlaobä ya wə. ¿Öjö tawä? Bamacö nö bleaamabä mlai, bamacö yai bayeliblabä wale li lämabou.

¹¹Bei. Iba wamacö. Inaja lä waiquiwä. Wamacö doblou lä mlai, dodijidawä bä da cuicu. Wamale ʼa da jililä. Bä bufi bluca da shaliliicu. Yanöcöwä bä da bälöicu. Yai Bada tänö bamacö bufi lä nofimabou wei tä lä cuinö wamacö nia çai cuo, bamacö bufi lä yanöcomabou wei tä showawä lä cuinö.

¹²Jesucristo wama ecö mö fedudayou ja, bä da nofimayo.

¹³Jesucristo eja ebä lä cule, cafä wamacö lija bä ʼafa wäyämamou bufi doblaa lä cule.

¹⁴Bei. Yai Bada lija showadi wamacö bayeliblamobä. Bada tä Jesucristonö wamacö nofi shilo ojobobä. Yai Bada tänö showadi wamacö nofimabä. Yai Bada tä Bui sho, wamacö nofi shilo tamayobä.

Galatas

Galatas 1

- ¹Jesucristonö wale lä shimöleno wei, ei camiyä Pablo cä ya. Yanowamö täbänö mlai, Jesucristonö wale shïlo yai shimöa cadidilema. Yai Bada bäma a nofi lä Föömale tä çainö, öjö a demi jocädamaö lä çolayono wei a lä cuinö.
- ²Jesucristo ai ya ebä çai bluca lä cule, Calasia jamö öjö wama ecö lä yododaö wei wamacö lija bä afa çai wäamamou bufi doblaa lä cule.
- ³Bei. Fayä Yai Bada lija wamacö shïlo bayeliblamobä, Bada tä Jesucristo lija çai. Wamacö bufi shïlo yanöcömaboböbä. Wamacö nofi çai shïlo ojodaboböbä.
- ⁴Bämacö doblou lä mlai tä nowa ja, Jesucristo a shämou läobä a noshi öjödaoma. Yanowamö täbä bluca lä bälöblai bä nö bleaabä jamö, bämacö nö bleaaö mö feduo mlaobä. Fayä Yai Badanö, inaja tä tamaö bufi doblaoma.
- ⁵Öjö bäma a nofi shïlo doblao dobou shi wälibä. Inaja lä tä cuobä.
- ⁶Yai Bada lija lobe wamacö mö fuludou fa dicoonö, ;shädayai! wamale bufi taamaö dodijia lä cule. Öjö a lä cuinö, no mlai ja wamacö nofi ojodabobä wamacö ma nacano wei ma cui, shomi wama tä a jowa jiliaö majöblaa dicoa, tä afa jole dodijidawä lä taö wejei tä a.
- ⁷Täbä nia lä bayeliblamou wei, ai tä a dodijidawä cua ma mlai ma cui, wamacö lä yabäcaö wejei bä läblawä, Cristo dodijidawä etä a shominajablamaö bufi lä doblao wejei bä lä cui.
- ⁸Cafä wamacö lija dodijidawä yama tä a wäyöö waiquioma. Shomi tä a lämaö majöö dicooje ja, ;Yai Bada lija bä waimamobä cäbä waiquiwä! ;Öjö tawä? Camiyä yamacö ma cui, ajele a lä culadi a ma cui, inaja yamacö cuaaö dicoo ja yamacö waimamobä lä yamacö waiquiwä.
- ⁹Yamacö cuu da balöobleinaja ya cuu çö lä cule. Wama tä a dodijidawä da fuablei tä a jamö, ai a bädawä ma cuinö, shomi tä a lämaö majöö dicoo ja, Yai Bada lija a waimobä lä a waiquiwä.
- ¹⁰;Yanowamö ya täbä bufi doblamabobä ya wä daanö? Ma. Yai Bada ya bufi nia yai fa doblamabonö ya wä. Yanowamö ya täbä bufi nia doblamabou bashio fa cunoja, Cristo ya nosie fuabä, ya e nö cuobö mlai.
- ¹¹Iba wamacö. Wamacö bufi jaducäblobä ya wä. Ya tä a dodijidawä da wäyablei, yanowamö täbä lija öjö tä a cuonomi.
- ¹²Yanowamö täbä lija ya tä a däano malä mlai. Yanowamö täbä lija ya çai damamonomi. Jesucristo a showawä lä cuinö camiyä lija tä a yai wawämalema.
- ¹³;Öjö tawä? Judio ya mö feduwä cudeenö, Moisesi ya etä a fuaö bufi doblaoma. Öjö tä a ja ya jole cadidou bufi çai fa doblaonö, Yai Bada ebä lä yododoblai ya ebä nö

bleaamaö balöoma. Wamale afa jilibou waiquile cätä. Ya bä mö watäblaö showadaobä, jbejedi ya waitelimoma!

14 Camiyä ya bada lä culenaja bä cuwä mö lä fedui ai bä bluca lä cuinö, Moisesi etä a çai fuaö mö ma feduono wejei ma cui, camiyä ya fe yai dolejeo dodijio balöoma. Judio bamacö nö badabö jaba lä cuno wei ya tä a joyamaö nofi fa jalubonö, camiyä bejedi lä ya wä shilo lämodima.

15-16 Öjö ma cui, ya oshe cublou showao mlao däjä, Yai Bada tänö wale yaibou showaoma. Wale nofi fa ojodabonö wale nacalema. Judio bä lä mlai bä lija ya e afa wäyää cuaabä, camiyä lija bä Ijilubö Jesús e wawäblamaö bufi doblaoma. ¿Öjö tawä? Bä Ijilubö e fa wawämaliyonö, yanowamö täbä lija ya shimamobä ya icuonomi.

17 Ma. Jelusale jamö ma cui ya çai funomi, Jesucristo ebä bada lä läle jamö. Jesucristonö camiyä wale shimaö showao mlao däjä, öjö bä shimöa ma balöleno wei ma cui, öjö ya bä walinomi. Öjamö lä ya fuu balöa mlai ja, Alabia jamö ya aa cadidia showalayofälöma. Öjamö lä ya cuoma Damaco jamö ya çoblou çolayoma.

18 Camiyä lija Jesucristo a wawää waiquilayono wei ja, lasha 3 a cuo däjä, Jelusale jamö yaçumö ya alayoma, Pedro ya möbä. Öjö lijamö ya cua showalanö, 15 ya fe didi cublaliyoma.

19 Jesucristonö bä lä shimöleno bä lä cui, öjö ya bä dablanomi. Bada tä Jesús bä fäähä Santiago e lä cui, öjö ya e shilo moli dalalema.

20 ¿Öjö tawä? Ei ya tä a lä oniblale, ya wä bejedi. Yai Bada tänö wale malä dale.

21 ¿Öjö tawä? Jelusale jamö ya fuu fa balöonö, Silia tä ulufi jamö ya fuu nomöjööma, Silisia tä ulufi jamö çai.

22 Judea jamö Cristo ebä lä yododoblai bä lä cuinö wale dabraö mlajei ja, bä mojodi li cuo showaoma.

23 Wale afa shilo jilibou buomaje. Abenaja bä jowa cuma. “Jesucristo yama a bufibou tä nowa ja yamalecö nö jaba da bleaamablei a lä cuinö, fei däjä Jesucristo tä a ja täbä jowa yömöläö majöa lä cule. Tä a joyamaö ma bufino wei ma cui, fei däjä tä a yai li wäyää majöo”, bei bä jowa cuma.

24 ¿Öjö tawä? Ya lä cuaano wei tä a fa jililäjenö, Yai Bada tä nofi yai doablamaje.

Galatas 2

1 Öjö däjä, lasha 14 ya faa fa majömalönö, Jelusale jamö ya aa çolayofälöma. Benabei sho yafäcö alayoma. Tito a ma cui, öjö ya çai nocamaboma.

2 ¿Öjö tawä? Öjamö Yai Bada tänö wale fumaö bufi doblao cudeenö, a wä wawälayoma. A wä wawälayoma yalo, ya alayoma. Öjamö ya culanö Jesucristo ebä bada lä läono wei bä sho, yamacö yododoblaliyoma. Judio bä lä mlai bä lija, showadi ya tä a dodijidawä wäyää lä cuaaö wei ya tä a wawämalema. ¿Öjö tawä? “Awei. jInaja lä wa cubä lä!”, ya bä bufi nia fa tadamanö ya bä yömölama. Jesucristo ya etä a

jaba lä wäyāno wei tā ma cui ja, ya ojodamou lä showale tā ma cui ja, wale nö ɸa bleaaö taö mlaobeje.

³¿Öjö tawä? Jelusale jamö Tito ya nocamaboma. Judio a cuo fa mlaonö, mosi sicö joyamono ma mlai, a nofi tabou fe yadiomaje. Mosi sicö joyamobä, bä ɸ fe yadiblonomi.

⁴Ai bä ɸ wabäo buoma ma cui. Öjö bä ɸ lä wabäono wei bä lä cui, Jesucristo ebä lija bä jole fa yädäblalunö bä faa ɸatomalalemaje, judio tā ɸ ja bämalecö nia cadidoimi fa möjenö. ¿Öjö tawä? Jesucristo lija bämacö yädäa waiquia yalo, judio tā ɸ ja bämacö fujebliamoa ma waiquilayono wei ma cui, tā ɸ nia lämaö ɸo fe yadiomaje. Öjö tā ɸ ja bämacö nosiemamou ja, bämacö nö bleaaö lä buono weinaja bämalecö nia taamaö ɸomaje.

⁵Öjö ma cui öjö yama bä ɸ jilianomi waiquiwä, cafä wamacö lija yama tā ɸ da wäyäblei tā ɸ shomiblou majöo mlaobä. Öjö lä tā ɸ bejedi waiquiwä.

⁶¿Öjö tawä? Jelusale jamö bä bada lä läle bänö wale ɸ fa jililäjenö, ai tā ɸ ɸai lämaö majöonomije. Öjö bä lä cui bä ɸa bada jilabouje. Cuwi. Bä bada fa cui. Yai Bada a lä cuinö, fe usucuwä täbä nofi bluca malä tabou wei. Inaja showawä, camiyänö ya bä nofi ɸai tabou.

⁷Ma, wale wasöö mlajei ja, Yai Bada tänö wale lä shimöleno wei tā nö yai öjöbölemaje. Pedro lija judio bä nabä shimöa lä taqueno weinaja, inaja showawä camiyä lija, judio bä lä mlai bä nabä shimöa taa mö fedubema, öjö bä lija Jesucristo dodijidawä ya etä ɸ wäyäo cuaaö mö feduobä.

⁸Judio bä lä cui bä yömölabä, Yai Bada tänö Pedro a nö lä wälojomabou weinaja, camiyä wale nö wälojomabou mö malä fedui, judio bä lä mlai ya bä yömöläö mö feduobä.

⁹¿Öjö tawä? Santiago, Pedro, Juan bä lä cuinö, bä ɸa yai bada lä jilabono wejei bänö, Yai Bada tänö wale lä bayelibläö wei tā nö öjöbölemaje. Öjö däjä, —Awei, tä dodijidawä waiquiwä —wawädowä Benabei sho yafälecö nowa talemaje. Judio bä lä mlai yafä bä yömölabä wawädowä yafälecö shimölemaje. Cama bä mö feduwänö judio bä yömöläö mö feduobeje.

¹⁰Abenaja bä shilo cuma. —Bä ɸoli nö lä bleaaö wei, bä yai shilo da bayeliblaje —bä cuma. Camiyä ya ma cui, inaja ya cuaaö bufi ɸai doblao mö feduo showaoma.

¹¹Öjö ma cui, Adioquiateli bä lijamö Pedro a fa waloicunö, judio bä lä mlai bä lijamö bejedi lä ya nowa taö dodijoma. A shominajaaö fa dicoonö wawädowä ya nowa talalema.

¹²Abenaja tä cuoma. Judio bä lä mlai bä Jesucristo bufilewä iyabä jamö, Pedro dodijidawä a nö jaba liyoma. Öjö Adioquiateli bä lä cui, judio bä cuono ma mlai ma cui bä nofi shamibonomi. Dodijidawä bä ɸai iyama. Öjö ma cui Santiagonö judio bä lä shimöleno wei bä lä cui, bä ɸoblou fa dalalönö, a wäfa tamou quililayoma. Öjö bä lä

cuinö täbä mosi sicö joyamou lä mlai täbä nofi shamibouje yalo, Pedro a quilia fa majölalunö, a jole waiblalou majöoma.

13 ¿Öjö tawä? Pedro a quilili cuaaö fa dicoonö, judio ai bä ma cui Pedro lija bä lulumoa dicolayoma. Benabei a ma cui, a çai lulumoa dicolayoma.

14 ¿Öjö tawä? Jesucristo tä a dodijidawä lä cui tä a yai ma bejedio däjä ma cui, tä a nofi cadidibonomije. Öjö ya tä fa dalalönö, bä yömöca bluca dao däjä abenaja wawadowä Pedro ya nowa tama. —Ei Adioquateli bä lä cui, judio bä ma mlai ma cui, ¿wedi tä tabä judio bä yai lä cuaaö weinaja, wa bä li taamaö bashiquei? A da bejedimo. Cafä judio wa ma cui, judio bä yai lä cuaaö weinaja wa cuaaö malä mlai — ya nowa tama.

15 ¿Öjö tawä, judio wamacö? Camiyä judio bamacö oshe cuo showadaoma. Judio bä lä mlai bä afa wälidiwä talewä lä jilabolajei, öjö bamacömi.

16 Camiyä judio bamacö yai ma cui, ei bäma tä daö. Jai bä dodijidawä waiquiwä, Yai Bada tänö bä nofi lä tabou wei bä lä cui, Jesucristo a nofi li mölabouje yalo bä nofi li tamamou. Moisesi tä a ja bä fa cadidonö mlai. Camiyä judio bamacö ma cuinö, Jesucristo bäma a çai bejedi malä bufibou wei. ¿Ya jolemou daanö? Moisesi tä a ja bamacö lä cadidou wei tänö mlai, Cristo bäma a nofi yai mölabou yalo, jai bamacö dodijidawä waiquiwä bamacö nofi li tabou. ¿Öjö tawä? Yai Bada lija a nofi nia dodijidawä lä tamamou wei, Moisesi tä a ja moli ma cui a cadidou malä mlai.

17 Yai Bada lija bamacö dodijidawä dablamobä, Cristo bäma a nofi yai mölabou. Öjö bäma a nofi mölabou yalo, judio bänö bamacö afa dobloimi taöje. Öjö ma cui, ¡ma! Bamacö nia doblou lä mlai jamö Cristonö bamacö lulubobä a malä mlai.

18 Öjö ma cui, judio ya tä a joyaa ma waiquileno wei ma cui, ya tä a daaö çoo dicoo ja ya nia yai dobloimi.

19 Moisesi etä a ja ya nö cadidobimi waiquiwä yalo, ya nomawä blaa damoa malä bälaliyono wei. Öjö däjä ya nia cadidou fe lä yadiono wei tä ja, ya mölaö mladou showadalayoma, Yai Bada lija ya yai luluamou majöobä.

20 ¿Öjö tawä? Fii balitama tefi jamö Cristo a lä shäleno wejei däjä, camiyä ya çai shämoa yädaa showalayoma. Fei däjä ya demi lä cule, Cristonö wale çai demi cua. Camiyä ya bufi lä cuaablalou weinaja ya cuaimi. ¿Öjö tawä? Eja ya demi cua lä showale, Yai Bada bei Ijilubö ya e nofi mölabolanö ya e cua lä cule. Wale fa nofilänö, wale bayeliblabä cama a jibämoquema.

21 Yai Bada tänö bamacö nofi lä ojobou wei ya tä wai mlaicätä. Öjö tänö, Yai Bada lija bamacö shïlo yai dodijidawä dablamou. Moisesi tä a ja täbä bayeliblamou dao waiquio fa cunoja, Cristo a nö nomaö buobö mlai.

Galatas 3

1 Shädayai, Calasiateli wamacö. ¿Wedi jamö täbä a ja wamacö mölaö fa majöblaonö, bei wamacö bufi jaducäwämi majöwä? Fii balitama tefi jamö Jesucristo a shämou lä läono wei, wawadowä ya wäfa mada wäyablei. Wama tä a jilia walalalema.

²Bamacö wālii ojode. Cafä wamacö lija Yai Bada tä Bufe lä lucälayono wei tä lä cui, ¿wedi tä nowa ja bei a Bufe li lucälayoma? Moisesi etä ą ja wamacö cadidou yalo, ¿a Bufe li lucälayoma daanö? Mlaicätä. Jesucristo wama tä ą nofi mölaboma yalo a Bufe li lucälayoma.

³¿Wamacö bufi nö jaducäblobö lä mlai wamacö waiquiwä daanö? Yai Bada bei tä Bufinö wamacö jaba ma bayeliblamono wei ma cui, fei dąjä cafä wamacö nö nia lä wālojaö wei tänö, ¿bei wamacö nia bayeliblamou majöo?

⁴Jesucristo wama a bejedi bufibou nofi jushuaö yalo, judio bänö wamacö nö jaba bleaamaö balöomaje. Wamacö nö ma bleaamaöje dąjä, quili mlai ja wama a bufibou fe yadioma. Inaja wamacö cuaaö ma waiquiono wei ma cui, ¿fei dąjä wamacö bufi nia li shomiblou majöo? Inaja wamacö cuaaö majöobä wamacömi.

⁵Cafä wamacö lija Yai Bada a Bufe lucälayoma. Tä nö lä quilijii, cafä wamacö lija tä çai bluca wawämaö, ¿öjö tawä? ¿Wedi tä nowa ja inaja bei wamacö li taamaö? Moisesi etä ą ja wamacö cadidou yalo, ¿tä nö lä quilijii bei tä wawämaö daanö? Mlaicätä. Jesucristo wama tä ą nofi mölabou yalo tä li wawämaö.

⁶Bä bufi da daeo. Yai Bada etä ą oni jamö Ablaamö a wāfa wayoamou. Wama tä ą daö. Yai Bada a wā fa jilimolunö, Ablaamönö a wā bejedi bufiblaö showadalayoma. Cama Yai Bada a wā bufiblamou fa damolalunö, jai a cadejewä waiquiwä Ablaamö bei a nofi tadaö showalayoma.

⁷¿Öjö tawä? Yai Bada tä ą nofi lä mölabou wejei bä lä cui, öjö Ablaamö nodiwä bei ebä yai.

⁸Yedu jamö ma cui, Ablaamö lija tä ą dodijidawä wāyamamou showao balöoma. ¿Öjö tawä? Judio bä lä mlai bänö Yai Bada tä ą nofi mölabouje ja, jai bä dodijaö waiquiwä bä nofi nia tabou showaoma. Abenaja tä ą oni cuu malä balöono wei. Cafä bä bayelibou fa balöonö, bluca bä bälöjowä lä yaiblai, afä a nodiwä lija bä nia bayeliblamou nomöjöö. Einaja tä ą cuu.

⁹¿Öjö tawä? Ablaamönö Yai Bada a nofi mölaboma yalo, a bayeliblamoma. Inaja showawä, Yai Bada a nofi lä mölabou wejei bä bluca lä cui, öjö bä çai nia bayeliblamou mö feduo.

¹⁰Ai bä mö feduwä lä cui, “Dodijidawä ya cuobä Moisesi tä ą ja ya cadidou weicätä”, bä bufi lä cuu wei bä bluca lä cui, bä waimobä bä li waiquiwä. Abenaja tä ą malä cuu wei. Moisesi tä ą jödödöwä lä cui, tä ą nofi showadi cadidibou lä mlajei bä lä cui, Yai Bada lija bä waimobä bä waiquiwä. Einaja tä ą malä cuu wei.

¹¹Tä malä wawädole. Moisesi etä ą ja täbä cadidoimi waiquiwä, Yai Bada lija bä dodijidawä dablamoimi. Moli ma cui a dodijidawä dablamoimi waiquiwä. Abenaja tä ą malä cuu wei. A nofi mölabouje yalo, jai bä dodijaö waiquiwä Yai Bada tänö bä nofi lä tabou wei bä lä cui, öjö bä nia bālimiblou ayao. Einaja tä ą cuu.

12 ¿Öjö tawä? Moisesi etä ʘ nofi mölabobeje etä ʘ cuonomi. Ma. Tä ʘ nofi mölabobeje mlai, tä ʘ shılo yai fuabeje tä ʘ lämaquema. Abenaja tä ʘ malä cuu wei. Moisesi etä ʘ nofi bluca lä cadidibou wejei bä lä cui, öjö bä nia shılo ʘlimi cuo. Einaja tä ʘ cuu.

13 Moisesi etä ʘ ja bamacö nö cadidobimi waiquiwä yalo, bamacö waimolayoma. Öjö ma cui bamacö bayeliblamou fe yadiobä, Cristonö bämalecö nowa ʘmaquema. Bamacö nö lä beblalole jamö a shämoa fa lälönö, cama a waimoa yaclälayoma. Abenaja tä ʘ oni malä cuu wei. Fii balitama tefi jamö bä lä basuo wei, bä bluca waimobä bä li waiquiwä. Einaja tä ʘ oni malä cuu wei.

14 ¿Öjö tawä? Judio bä lä mlai, Jesucristo lija bä bayeliblamou mö feduobä bä nowa comaquema. Ablaamö a bayeliblamou lä culayono weinaja bä bayeliblamou cuo mö feduobä. Jesucristo bäma a nofi fa mölabonö, Yai Bada tä Bufe ʘfa lä wäyämöno wei bäma tä Bufe däabä.

15 Judio bamacö showadi lä cuaaö wei tä lä cui, ya tä ʘfa nia wäyää ʘaloo, wamale ʘ jıliaö walalaobä. ¿Öjö tawä? Yanowamö a lä cui a wafa wämou cadidio waiquio dāja, ai bänö a wafa nia shomiblamaö majöomije.

16 ¿Öjö tawä? Inaja showawä, Ablaamö lija Yai Bada tänö tä ʘfa jaba lä wäqueno wei tä ʘ lä cui, tä ʘ shomiblamaö majöobeje tä ʘmi. Ablaamö lija a wä nö wäo dāja, a wafa bayeliblaö wäquema. Ablaamö nodiwä a ma cui, a nia ʘai jowa bayeliblamou nodio mö feduoma. Ablaamö nodiwä bluca bä ʘfa wayoaö mlai, moli a wafa nodiwä yai wayoama, Cristo a lä cui. Öjö a wafa shılo yai tama.

17 Abenaja ya cuu. Yedu ja, Ablaamö lija Yai Bada tä ʘ nö wäo balöoma. ¿Öjö tawä? Lasha 430 a fa falönö, Moisesinö tä ʘ ʘai läobä, öjö etä ʘ jibäa nomöjökquema. Öjö ma cui, tä ʘ läa lä nomöjökqueno wei tä ʘ lä cuinö, Ablaamö lija tä ʘ nö wäo lä balöono wei tä ʘ walianomi. Yai Bada tä ʘ nö wäo malä waiquiono wei.

18 ¿Öjö tawä? Yai Bada lija wamacö lä bayeliblamole wamacö lä cui, ¿wedi tä ja bei wamacö li bayeliblamou, öjö lä? Moisesi etä ʘ ja wamacö lä cadidou wei tänö mlai. Ma. Cama Yai Bada tä ʘ nö wäa waiquiquema yalo wamacö malä bayeliblamole. Inaja showawä, Ablaamö lija Yai Bada tä ʘ nö wäo waiquioma cudeenö, a li bayeliblaö balölayoma.

19 “Jao. Moisesi etä ʘ ja, täbä nia bayelibloimi waiquiwä ja lä, ¿wedi tabä tä ʘ li wäa bäquema, öjö lä?”, ai bä nia cuu ʘatoo fa cui. Wedi tabä mlai. Ablaamö nodiwä a wawäblou jaöo mlao dāja, walıdiwä tä lä taö wejei täbä nia ʘamabou fa balöonö tä ʘ li lämaboma. ¿Öjö tawä? Ablaamö lija Yai Bada a wä nö wäo dāja, a wafa nodiwä bayeliblamou wäyää balöoma. Tä nö dedea fa nomöjölönö, Moisesi lija ʘjele bänö Yai Bada a wano wäyää nomöjökquaje, öjö a lä cuinö tä ʘ wäyää fe dolemobä.

20 ¿Öjö tawä? Yanowamö täbä lija täbä wano li wäyämou ma cui, inaja Yai Bada a cuanomi. Ma, Ablaamö lija a wafa wämou shalilou showadaoma.

21 ¿Abenaja ai wamacö bufi cuu tawä? “Yai Bada tänö Ablaamö a wafa bayeliblamou wäyää ma waiquiono wei ma cui, Moisesi lija ai tä ʘ läamaö majöo ja, a wä li shomiblou majöa dicolayoma.” ¿Einaja ai wamacö bufi cuu tawä? Ma. Moisesi tä ʘ ja

bamacö balimiblobä tä a cuonomi. Tä a cuo fa cunoja, öjö tä anö jai bamacö dodijidawä waiquiwä, Yai Bada tänö bamacö nofi nö tabou showadaobö wei.

²²Öjö ma cui, inaja Yai Bada etä a oni cuimi. Bluca bamacö ma cui, wälidiwä tä ja bamacö nö fujeblobimi waiquiwä yalo, bamacö jowa dobloimi. Öjö cudeenö, Jesucristo a bejedi lä bufibou wejei bä lä cui lija, Yai Bada tä afa Bufe wäyämou showaoma, bä bayeliblamou fe yadiobä.

²³Öjö tawä? Jesucristo a wawäblou showaa mlai ja, Moisesi etä a jamö judio yamacö li jaadalou balöoma. Öjö tä anö yamalecö jaamaboma. Inaja yamacö cuo showao däjä, Cristo a yacumö wawäblaliyoma, öjö yama a nofi yai mölabolanö, Yai Bada lija yamacö yai dodijidawä dablamobä.

²⁴Öjö tawä? Cristo a wawäo showao mlao däjä, Moisesi etä a läo balöoma, öjö tä a ja yamacö bufi jaducäblobä. Cristo a fa wawälönö yama a nofi mölabou showadaobä. Yama a nofi mölabou yalo, jai yamacö dodijidawä waiquiwä, Yai Bada tänö yamalecö nofi tabobä.

²⁵Fei däjä Cristo yama a nofi mölabou waiquiwä yalo, tä a lädio showaobä tä cuami.

²⁶Jesucristo lija wamacö lä yädäle wamacönö, öjö wama a nofi mölabou yalo, Yai Bada bei ijilubö wama ecö li bluca cublou malä majölayono wei.

²⁷Cristo lija wamacö yädäo jimamobä, wamacö fe bluca baoblamolayoma. Wamacö fe lä baoblamolayono wei wamacö lä cui, ilo dude sibä ja täbä didio lä cuo weinaja, Cristo lija wamacö didia majöaliyoma. Öjö a lä culenaja wamacö cublou mö feduobä.

²⁸Öjö tawä? Jesucristo lija täbä moliblou. Judio bä ma cui, judio bä lä mlai bä ma cui, bä nosie fuamobä bä lä tabou wejei bä ma cui, bä tabou lä mlajei bä ma cui, walo bä ma cui, suwä bä ma cui, Jesucristo lija, moli bä bluca cublou.

²⁹Cristo wama ecö waiquiwä ja lä, Ablaamö öjö wama ecö cai nodiwä waiquiwä. Yai Bada tänö Ablaamö a wafa bayeliblamou wäyäo lä balöono weinaja, wamacö cai bayeliblamou cuo nodiobä.

Galatas 4

¹Öjö tawä? Abenaja ya cuu. Ijilu a lä cuinö, bä föö madofi ebä ma blucao däjä ma cui, a bufi jaducäwämi showawä cudeenö bä föö etäbä nia fulii jaöomi. Öjö etäbä ja, a nia obi lä läo wei a waiquiwä ma cui, a nia läo jaöomi. Bä ijilubö e yai ma cui, a nosie fuamobä bä tabou lä bädao wejeinaja e nia cuo balöo.

²A cai lä culajei bänö a bufi nia jaducäblamaö balöoje. Öjö bä lija a nia damamou balöo. Bä föö e lä cuu weinaja a nia taamaö balöoje. “Ijluyä einaja a bufi cai jaducäwä cublou däjä, iba täbä ja a nia lämou nomöjöö”, bä föö e lä cuu weinaja, inaja showawä a nia taamaöje.

³Öjö tawä? Camiyä bamacö ma cui, bamacö bufi jaducäo showao mlao däjä, inaja showawä bamacö cuaaö balöoma. Täbä nosie fuamobä bä lä tabou wejei bä lä cui bä

nosiemamou lä culenaja, nö badabö tä ʘ ja bamacö nosiemamou balöoma, fecula bä lija çai.

⁴Öjö ma cui, Yai Bada tänö bä Ijilubö e shimabä tä yai lä cublaliyono wei däjä, suwä a lija a fa tablamolunö, a yanowamöblaleyoluma. Judio bä lija a cublaliyoma yalo, Moisesi etä ʘ ja a nosiemamobä a li cuo mö feduoma.

⁵Moisesi etä ʘ ja bamacö nosiemamou mö lä feduo wei bämalecö nowa çamabä a waloquema. Yai Bada bä ijilubö wawädowä bäma ecö yai cublobä.

⁶Cafä sho öjö bä ijilubö bäma ecö bluca waiquiwä yalo, bä Ijilubö e Bufi shimöledayoma, camiyä bamacö bufi jamö a bälöobä. Bäma a Bufi tabou yalo, “Fabe, Fabemi”, bamacö cuu.

⁷¿Öjö tawä? Yai Bada tänö wamacö bayelibou yalo, fei däjä wamacö nofi yai ijilumaö. Bä ʘ fuamobä täbä tabou lä buo wejeinaja mlai. Bä ijilubö wama ecö cadidiwä waiquiwä yalo, cama etäbä ja wamacö dobämobä, wama ecö li waiquiwä.

⁸Jaba däjä, Yai Bada wama a daö showao mlao däjä, fecula bä lija wamacö nosiemamou balöoma, täbä bufiblamobä täbä lä mlai täbä lija. Wamacö nö beblalou buoma.

⁹Öjö ma cui fei däjä Yai Bada wama a daö. Ma, camanö cafä wamacö li yai daö. ¿Öjö tawä? Öjö wama a daö ma waiquile ma cui, ¿fecula wama bä nia bufijaö ço daanö? Öjö bä ujudi. Öjö bänö täbä bayeliblamoimi. Öjö bä lija wamacö jaba nosiemamou nö ma bleaano wei ma cui, ¿wamacö nia jibäämou mö yabao ço dicoo daanö?

¹⁰Abenaja wamacö jowa cuaaö, wamacö nia fa bayeliblamonö. Judio showadi täbä shïlo iyaö çai lä çocamoblaaö wei, cafä wamacö ma cuinö, öjö wama täbä nofi jalu çai tabou mö feduo dicoo. Belibo ai a faö lä ço wei a ma cui, öjö wama a nofi jowa çai jaducäbou cuaaö mö fedua. Lasha a lä faö wei ma cui, wama bä çai jowa wabaö, cama bä lä cuaaö weinaja showawä.

¹¹¡Uo! Cafä bamacö yömöläö cadidiobä ya nö ma walojoablalono wei ma cui, ¡shädayai! ¡Ya nö nofi bleaablalou buo yayiono wei!, wamale bufi tamaö majöa lä cule.

¹²Iba wamacö. Cafä wamacö lija ya wə fe blacäjou. Camiyä wamale da owälä. Moisesi ya etä ʘ bufiblaö mladaliyoma. Cafä judio wamacö lä mlai wamacönö, wama tä ʘ nofi tabono lä mlainaja ya mada cublalui. ¿Wedinaja wamale nofi yai tabou cule? Jaba däjä wamale daö ma mlai ma cui, dodijidawä wamale çai cuoma,

¹³Jesucristo dodijidawä tä ʘ ja bamacö jaba da yömölablei däjä. Ya nö jalili beblaloma yalo, cafä wamacö lija ya çoblaliyoma. Wamale daö.

¹⁴Wamale jalili bayeliblaö ja, wamacö nö bleaablaloma ma cui wamale nö waiblanomi. Ma, wamale nofi wəlibou mlai ja, Yai Bada əjele wama etä dodijidawä bälömabou nö lä cuobö weinaja, inaja showawä camiyä lija wamacö çai cuaama. Jesucristo wama a nofi nö lä tabobö weinaja showawä.

15 ζÖjö tawä? Wamale bayeliblaö bufi mada doblaoblei. ζWedinaja wamacö bufi li cuu majöa cule? Bejedi lä wamacö dodijama. Cafä wamacö mamocu fa jocäblamolunö, camiyä lija wamacö mamocu nö didia majöquebö wei wamacö cuoma.

16 Fei däjä, bejedi tä a ja bämacö yömöläö shalilio tä nowa ja, ζwamale nofi nia wälibou majöo dicoblao daanö?

17 Moisesi tä a lämaö bufi lä doblao wejei bänö, bluca wamacö dayäaö ma cujei, öjö bä lija wamacö bufi nia bayeliblamoimi. Camiyä lija wamacö bufi cuo mlaobä wamacö taamaö bufi doblao buoje, cama bä a shilo yai jiliamou ayaobä.

18 ζÖjö tawä? Wamacö bufi nia yai bayeliblaö fa cunojeja, camiyä ya cua mlai ja ma cui, “Awei, öjö wama bä a shilo yai jiliabä”, ya nö cubö wei.

19 Uasimi cäbä. Ijilu bä ninibouje ja, bä nofi fölimamolanö bä tablaö shi jalimou lä cuaaö wejeinaja, inaja showawä Cristo wama ecö cublobä ya shi çai jalimou cuoma. Fei däjä ma cui, Cristo lija wamacö bufi yai jaducäblobä, bufi yanöcöa mlai ja, shi jalimolanö bämacö yai taamaö bufi doblaa showaa lä cule.

20 Shädayai. Cafä wamacö lija ya yai cuo fa cunoja ya wä nö cadidiablalobö wei. Wamale bufi malä wedinajamomale.

21 Moisesi etä a ja, wamacö nosiemamou bufi lä doblale wamacö lä cui, ζwama tä a daö dodijia da culanö?

22 Ablaamö bä ijilubö 2 ecöbä cuoma. Yai Bada etä a oni jamö, cäcöbä afa wayoamou. Ai a lä cui, cäcöbä nosie fuamobä a lä cui lija a taquema, Acala a wäfa lä cuono wei a lija. Bä ijilubö ai e mö feduwä lä cui, Sara e li cuo mö feduoma. Öjö Sara a lä cui, Ablaamö a wä fuamobä a bädawä mlai, bä suwäbö e yai li cuoma.

23 ζÖjö tawä? A nosie fuamobä a suwä lä tabono wei sho cäcöbä fa cuanö, bä ijilubö e tablamolayoma, showadi ijilu bä lä taaö wejeinaja showawä. Öjö ma cui, bä suwäbö e yai lija a lä cuono wei a lä cui, Yai Bada tänö öjö a wäfa li wäaö balöoma yalo, a li cublaliyoma. A wäfa wäaö mlao fa cunoja, a nö cublobö lä mlai a cuoma.

24 Ei cäcöbä suwä lä cui, cäcöbä afa wayoamou jaloobä cäcöbä li. Yai Bada a wä nö wäo lä bolacaono wei cäcöbä a lä culenaja, inaja cäcöbä suwä cuwä mö feduwä. Ablaamö lija a wä nö wäo fa balöonö, Moisesi lija a wä nö wäo majöoma, Sinai cäcö jamö. Öjö tä a lä culenaja, Acala a li cuwä. Ablaamö, bä suwäbö e sho cäcöbä nosie fuamobä a taboböma. Cama a ma cui, cama bä ijilubö ebä ma cui, bä fujebblamobä etä cuonomi. Inaja showawä, Moisesi etä a ja täbä lä nosiemamou wei bä lä cui, bä nö çai fujebblamobimi mö feduwä.

25 ζÖjö tawä? Alabia tä ulufi jamö, Sinai cäcö bada lä ublale, cäcö çai owäbou balöoma, Acalanö. Jelusale tä shabono lä blale, tä çai owäbou mö feduo showaoma. Jelusaleteli bä cua lä nodile, Moisesi tä a oni ja bä nosiemamou ja, bä nö bleaaö showao malä cui.

²⁶Öjö ma cui fedu jamö, Jelusale tä shabono dude blaa lä culadi. Öjö a shabono lä cui, Saranö öjö tä shılo yai owäbou balöoma. A nosiemamou ja, a nö bleaaö buobä a cuonomi. ¿Öjö tawä? Camiyä bämacö lä cui, Sara lija bämacö li nöömou.

²⁷Abenaja tä  oni malä cuu wei. Wa shibönabödalou fa mlacunö, wa ijilubö cua lä mlai, a bufi yai da doblalo. Ijilu wa nini tabou lä mlai, a w shi dou fe da yadio. Bä feyalobö e lä tabou wei a lä cui, öjö a ijilubö bluca ma jilale ma cui, a shıloco nö lä beblalou wei a lä cui, öjö bei a ijilubö shılo yai blucablou yailayou. Einaja tä  cuu.

²⁸¿Öjö tawä, iba wamacö? Sara bä ijilubö Isaacö e lä cui, öjö wama e li owäbobä wamacö. Yai Bada tänö a wfa li wäquema yalo, a li cublaliyoma. Inaja showawä, cafä wamacö ma cui wamacö fa çai wämoa balöquema.

²⁹Ablaamö a lä bälöono wei djä, Acala bä ijilubö Isimali e lä cuinö, Isaacö a nö bleaamama. ¿Öjö tawä? Showadi ijilu bä lä taaö wejeinaja a lä cublaliyono wei a lä cuinö, Yai Bada tä Bufi lofotenö a cublou mö lä fedulayono wei a lä cui a nö bleaamama. Inaja täbä yanowamö cuaaö showawä. Yai Bada tä Bufi lofotenö bä lä cublou wei bä lä cui, öjö bä nö yai bleaamaö showawä malä cujei.

³⁰Öjö ma cui, ¿wedinaja Yai Bada etä  oni cuma? A nosie fuamobä a suwä lä cui, a ijilubö nia çai shimamou çöoma. Öjö bä ijilubö lä cuinö, bä fö ebä madofi nia shelelebou juonomi. Ablaamö bä suwäbö e yai lä cui, a nosie fuamobä e lä mlai, öjö bä ijilubö e lä cuinö bä nia shılo bluca tabou juoma.

³¹¿Öjö tawä, iba wamacö? Camiyä bämacö lä cui, Ablaamö a nosie fuamobä a suwä lä cui lija bämacö nodiwä cublonomi. Acala lija mlai, bä suwäbö Sara e yai lija bämacö nodiblaliyoma. Öjö a suwä lä cui a nosie fuamou bädaobä mlai, bä suwäbö e li yai cuoma.

Galatas 5

¹Bämacö nö bleaaö buo mlaobä, Moisesi etä  ja Cristonö bämalecö fujebblamalema. Bä bufi da lofotoicu, öjö lä. Moisesi tä  ja bä nosiemamou çödaa dijä. Bä noshi yai da umlao, wamacö nö bleaaö dicoquei.

²Camiyä Pablo ya lä cui, abenaja ya cuu. Yai Bada lija wamacö dodijaö dablambö wamacö mosi sicö joyamou dicoo ja, Cristo lija wamacö bayeliblamobä tä cuami waiquiwä.

³¿Öjö tawä? Bämacö nowa bluca taö lä cule. Dodijidawä wamacö cuobä wamacö mosi sicö joyamou dicoo ja, Moisesi ai etä  jamö ma cui, wamacö yädäa waiquiquema. Inaja wamacö cuaaö dicoo ja, ai tä  bluca mö feduwä ma cui ja wamacö nosiemamobä wamacö waiquiwä.

⁴Moisesi etä  ja, ai wamacö nosiemamou bufi jwa doblao, Yai Bada lija dodijidawä wamacö dablambö. Inaja wamacö lä cuaaö wei wamacönö, Cristo wama a nofi taboimi majöwä. Yai Bada tänö wamacö nofi lä ojodabou wei wama etä wai dicoo.

⁵Jesucristo bäma a nofi mölabou yalo, jai bämacö dodijaö waiquiwä Yai Bada tänö bämalecö nofi tabou waiquiwä. ¿Öjö tawä? Yai Bada tä Bufinö, inaja bämalecö bufi malä taamaö wei.

⁶Bämacö mosi sicö ma joyamou wei ma cui, bämacö mosi sicö joyamou ma mlai lä ma cui, öjö lä tä nowa cuami waiquiwä. Jesucristo bäma a nofi lä mölabou wei, öjö lä tä nowa shïlo yai cua, cama lija bämacö yädäobä. Öjö bäma a nofi yai lä mölabou wei däjä, yanowamö bäma täbä yai nofiabläö.

⁷Wamacö nofi da cadidoble! ¿Wedinö wamacö yacläa majöblamalema, bejedi tä a lä cui wama tä a fuaö mladobä?

⁸Yai Bada tänö inaja wamacö taamaö mada mlaoblei, wamacö lä yaileno wei a lä cuinö.

⁹Wajaquemi moli tä a wai jole ma cuinö täbä bluca yacläoblou. Nii julumamodima wiisibö a wai bädawänö, nii comi bä malä juluoblou wei.

¹⁰¿Öjö tawä? Bada ya nofi mölabou, camiyä ya bufi lä cuu weinaja, cafä wamacö ma cui wamacö bufi taamaö cuo mö feduobä. Wamacö lä yaclämaö wei a lä cui, a nö nia bleaamaö.

¹¹Iba wamacö. Camiyä ya lä cuinö ya bä yömöläö däjä, täbä mosi sicö joyamobä ya tä nabä shimaimi. Täbä jolemou. Öjö ya tä nabä shimaö fa cunoja, judio bänö wale nö bleaamabö mlajei. Fii balitama tefi jamö Jesucristo a shämoa lä lälayono wei ya tä a wäyäö mlai ja, öjö ya tä nabä shïlo yai shimaö fa cunoja bä nö jushuobö mlai.

¹²¿Öjö tawä? Öjö yabäcalewä bä lä cui, wamacö janöblamaö bufi lä doblao wejei bä lä cui, öjö cama bä shïlo yai wäliamamou buobä.

¹³Moisesi tä a ja wamacö yai fujeblobä, wamacö malä nacaleno wei. Wamacö lä fujebloyou wei wamacö lä cui, wamacö fa nofimayonö wamacö nia li yai bayeliblayou. ¿Öjö tawä? Abenaja wamacö nia cuimi. “Jao. Öjö ya tä a fuabä tä cuami majöwä waiquiwä cudeenö, ya cuaaö bufi lä doblao weinaja ya shïlo yai da cuaa, öjö lä.” Ma. Inaja wamacö nia cuimi.

¹⁴Yai Bada tänö täbä nabä bluca lä shimöqueno wei tä a ja, wamacö cadidou showadaobä ei tä a malä cule. Cafä wa nofi fölio lä culenaja, inaja showawä aifä wa bä nofi tabolanö, wa bä nofimabä. Einaja tä a cuu.

¹⁵Öjö ma cui bä da moyaweicu, öjö lä, wamacö nofi wäliayou fa dicoblaicunö, yalo bä nabä queayou lä culenaja wamacö taamayou mlaobä. Wamacö mö watäblayou dicoo mlaobä.

¹⁶Öjö ma cui, abenaja bämacö nowa taö. Yai Bada tä Bufi ja, bä noshi yai shïlo da öjödao. Yanowamö täbä showadi cuaaö bufi lä doblao wei tä ja, bä cuaa dijä.

¹⁷¿Öjö tawä? Yanowamö täbä showadi lä cuaaö wei tä ja, Yai Bada tä Bufi läa malä cui. Inaja showawä, Yai Bada tä Bufinö täbä taamaö bufi lä doblao wei tä ma cui ja, yanowamö täbä bufi läa mö fedua. Täbä doblamaö mlaobä showadi tä läa.

¹⁸Öjö ma cui Yai Bada tä Bufi lija wamacö luluamou ja, Moisesi etä ʘ ja wamacö nosiemamobä wamacömi. Yai Bada tä Bufi lija wamacö luluamou malä waiquii.

¹⁹Yanowamö täbä showadi lä cuaaö wei tä wawäadowä. Bä joleblalou. Shami tä bluca ja, bä nofi ʘai jushublalou. Bä nofi beshili ʘai jushuaö.

²⁰Yai Bada a bufiblaö mlajei ja, shomi täbä shılo li bufiblaöje. Bä feculamou. Bä nofi ʘai walıayou. Bä ʘfa ʘai lafujayou. Ai täbä dodijaö ayao däjä, täbä nofi ʘai walıbouje. Bä ʘai jushudou si ijejewä. Bä shi ʘai imi. Bä ʘ ʘai lämou. Täbä nofimaö fe usucuwä mlajei, ai täbä ʘai shılo nofimaö ayaoje.

²¹Bä bufi ʘai waiyou. Cama bä shi ʘai walımamou. Bä nofi jushuabä, bä iyaö ʘai ʘocamou. Inaja showawä, ai tä ʘai bluca ma cui ja bä cuaablalou. Bamacö wasöö ja bamacö nowa jaba da tableinaja, bamacö nowa taö ʘa lä cule. Inaja bä lä cuaaö wei bä lä cui, Yai Bada tänö cama ebä ʘai cuobä jamö, öjö bä nia cuomi.

²²Öjö ma cui, Yai Bada tä Bufi ja bä lä luluamou wei bä lä cui, abenaja bä cuaaö. Bä bufi nofio. Bä bufi ʘai doblalou. Yanöcöwä bä bufi ʘai cuo. Bä shi jalimoimi. Täbä ʘai bayeliblaö bufi doblaoje. Dodijidawä bä ʘai cuoje. Bä ʘai li cadidou.

²³Oquewä bä ʘ ʘai faö. Bä ʘai wasöo dao. Einaja bä dodijidawä cuaaö mlaobä tä ʘ läami.

²⁴¿Öjö tawä? Yanowamö showadi täbä bufi waiyou nofi lä jushuaö weinaja, Jesucristo ebä bufi jaba cuaaö mö ma feduono wei ma cui, fei däjä bä cuaaimi majöwä. Fii balitama tefi jamö Jesucristo a lä shämolayono wei däjä, cama etä ʘai shadia yädämaquemaje.

²⁵Yai Bada tä Bufinö bälimi bamacö cua waiquia ja lä, öjö lä tä Bufi ja bamacö yai da luluamo.

²⁶¿Öjö tawä? Bamacö dodijidawä jimöobä mlai. Bäma täbä ʘ ʘai lulubobä mlai. Camiyä bamacö ai bä lä cui, bä ma dodijaö ma ayao däjä ma cui bäma bä nofi walıbobä mlai.

Galatas 6

¹Iba wamacö. Walıdiwä tä jamö aifä a lä cui a dobloimi dicoo ja, Yai Bada a Bufi lija wa lä luluamole wanö, wa yai nia bayeliblaö. Oquewä wa wä falanö, wa nia cadidamaö ʘo. ¿Öjö tawä? A da moyaweicu. “Camiyä inaja ya nö cuaabö lä mlainaja”, wa bufi jole cuu dicoo ja, inaja showawä cafä wa ma cui wa cublou dicolo.

²Aifä a lä cui a bufi nö bleaaö ja, a da bayelibla. Inaja wamacö taamayou ja, Cristo wama a nosie yai fuaö malä cui.

³“¿Camiyä shılo yai!”, wa bufi cuu dicoo ja wa jolemou cuquei.

⁴Cafä wa lä cuaaö wei tä ja, a bufi shılo da daeo, ai bä lä cuaaö wei tä ja mlai. Öjö däjä wa dodijaö ja, aifä wa bä jimaö mlai ja, cafä wa lä cuaaö wei tä ja wa bufi nia shılo yai doblalou.

- ⁵Bamacö cuaablalou lä bädao wei tä ma cui ja, bamacö dodijabä bamacö malä cui.
- ⁶Yai Bada tä ʘ ja wamacö lä damaö wejei bä lä cui, bä da dobäje. Dodijidawä täbä bluca ja wama bä dobäbä.
- ⁷Yai Bada a nö waiblamoimi. Bä möla dijä. Wamacö lä cuaaö wei tä nowa nia çoamamou. Mobä lä döaö wejei bänö, öjö mobä çoablaö mö yabaaö malä ço wejei. ¿Öjö tawä? Wälidiwä wama tä taö ja, öjö wama tä wälidiwä nia çoä mö yabao ço.
- ⁸Yanowamö täbä cuaaö bufi lä doblao wei tä ja bä luluamou dicoo ja, bä nia nomaö shi wälijio. Öjö ma cui, Yai Bada tä Bufi ja bä lä luluamou wei bä lä cui, bälimi bä nia li cuo.
- ⁹Dodijidawä tä ja bamacö bufi modablaö mlai. Dodijidawä bäma tä lä taö wei bamacönö, dodijidawä bäma tä nia çoä mö yabao ço malä cui.
- ¹⁰¿Öjö tawä? Dodijidawä bäma tä tabä tä cua ja, bäma tä taö showadaobä, öjö lä. Yanowamö jödödöwä bäma bä ma bayeliblaö däjä, Jesucristo a nofi lä mölabou wejei, öjö bäma bä yai bayeliblabä.
- ¹¹Cafä wamacö lija camiyä ei ya imicönö, ei ya tä ʘ bada lä oniblale tä ʘ oni da möje.
- ¹²Wamacö mosi sicö nia fa joyamajenö bä lä nosiemou wei bä lä cui, judio bä lija bä dodijidawä dablamosi bufi doblao yalo bä ʘ. Öjö bä lija bä nö bleaaö mlaobä bä ʘ li. “Fii balitama tefi jamö Cristo a lä shämolayono wei tä nofi shïlo yai da mölaboje”, bä cuu quilii.
- ¹³Öjö bä lä cui, ¿wedi tabä cafä wamacö lija bä ʘ fe li blacäjou? Moisesi etä ʘ fuamaö nofi fa jalubojenö mlai. Cama bä mosi sicö ma joyamou wei ma cui, etä ʘ fuaö malä mlajei. Ma. Judio ai bä lija, cafä wamacö mosi sicö lä joyamaö wejei tä ʘfa wäaö bufi doblaoje yalo, bä ʘ fe li blacäjou, öjö bä judio lija cama bä nofi nia fa doablamonö.
- ¹⁴Shädayai. Inaja camiyä ya nö cuaabö mlai. Camiyä ya lä cuaaö wei ya tä ʘfa nö çai wäabö mlai. Fii balitama tefi jamö Bada tä Jesucristo a lä shämolayono wei, öjö ya tä ʘfa nö shïlo yai tabö wei. Cama a lä cuaano wei tänö ya shomiblaliyoma. Fei däjä yanowamö täbä showadi cuaaö bufi lä doblao weinaja, ya cuaabä yami. Cama bä ma cui, camiyä ya cuaaö bufi lä doblao weinaja bä nö çai cuaabimi mö feduwä. Ma, camiyänö Jesucristo ya wäfa shïlo wäyäö.
- ¹⁵Täbä mosi sicö lä joyamou wei tä nowa cua malä mlai. Täbä mosi sicö joyamou lä mlai tä ma cui, öjö tä nowa çai cuami mö feduwä. Dude bamacö tablamou lä majöo wei, öjö tä nowa shïlo cua.
- ¹⁶¿Öjö tawä? Ya lä cufenaja wamacö cuaaö ja, Yai Bada tänö wamacö bufi nia yanöcomabou. Wamacö nofi çai nia asibou. Inaja bä lä cuaaö wei bä lä cui, öjö Yai Bada ebä yai.
- ¹⁷¿Öjö tawä? Camiyä wale yabäcaö çoäaö mlajei ja, bä yanöcöwä cuobä. Jesús ya etä ʘ bejedi wäyäö cudeenö wale dusimabou malä waiquilajei.

¹⁸Bei, iba wamacö. Bada tä Jesucristo lija showadi wamacö bufi bayeliblamobä. Wamacö nofi ojobabä. Wamacö bufi bayeliblamobä. Inaja lä tä cuobä.

Efesios

Efesios 1

¹Jesucristonö wale lä shimöleno wei, ei camiyä Pablo cä ya, Yai Bada tänö wale çai shimaö fa bufinö. Efesoteli Yai Bada wama ecö lä cui lija ya tä ą oni shimaö, Jesucristo wama a nofi yai lä mölabou wei wamacö lija.

²Bei. Fayä Yai Bada lija wamacö shılo bayeliblamobä, Bada tä Jesucristo lija çai. Wamacö bufi shılo yanöcomaboböbä. Wamacö nofi çai shılo ojodaboböbä.

³Yai Bada tä nofi shılo yai doablamobä a, Bada tä Jesucristo bä Föo e lä cui. Jesús lija a lä bufiblamou wei a showawä lä cui. Cristo lija bamacö yädaa yalo, bamacö bufi nia yai lä bayeliblamou wei täbä ja, bämalecö dobäo waiquia lä culadi.

⁴¿Öjö tawä? Yedu ja, bita a tablaö showaa mlai ja, Yai Bada tänö bämalecö yaia balölema, Jesucristo lija bamacö yädäobä. Bamacö ąfa tamobä tä cua mlai ja, cama bäma ecö dodijidawä yai cuobä bämalecö yaia waiquilema.

⁵A bufi nofia yalo, Jesucristo a lä cuaano wei tä ja bämalecö nofi nia ijiluaö showadaoma. Inaja bämalecö taamaö bufi doblao waiquioma.

⁶Bä Ijilubö Jesucristo a nofimaö dodijiwä. Öjö a lä cuaano wei tänö bamacö yai li bayeliblamou. Bämalecö nofi ojodabou fe balojooma yalo, bäma a nofi showadi da doabla. ¡A doblao dodijiwä!

⁷Wıłidiwä tä ja, Jesucristo iyäbönö bämalecö fujebblamalema. Bamacö doblou lä mlai tä nowa mladamalema. ¿Öjö tawä? ¡Bejedi lä bämalecö nofi ojodabou!

⁸Bämalecö nofi yai ojodabou fe balojoa.

⁹Yai Bada a nia lä cuaaö wei tä ą jaba jöyaoma ma cui, Cristo a lä cuaano wei tänö bämalecö bufi jaducäblamalema. Bämalecö bufi möblamalema.

¹⁰¿Öjö tawä? A nia lä cuaano wei, obi tä nia jödödöblaö. Cristo a nia Bada lämabou. A nia lä läamaö wei tä cublou däjä a nia lämabou. Bita jamö ma cui, fedu jamö ma cui, öjamö täbä bluca lä tablamolayono wei täbä lija, Cristo a nia Bada läo.

¹¹Yai Bada a lä cuinö, tä tamaö lä bufii wei showadi tä jödödöblaö. Cama yama ecö cuo mö feduobä, Cristo lija yamalecö yädämaquema. Inaja yamalecö taamaö bufii fa showadaonö, yamalecö taamama.

¹²Cristo yama a nofi jaba lä mölabono wei yamacö lä cuinö, Yai Bada yama tä doblao dablamabä yamalecö cadidilema. Bluca täbä lija a nofi doablamou cuaabä.

¹³Cafä wamacö ma cuinö, bejedi wama tä ą çai jılilema, wamacö fucäamobä tä ą dodijidawä lä cui. Cristo wama a bejedi fa bufilänö, öjö lija wamacö yädäblaliyoma. ¿Öjö tawä? Wamacö yädäo yalo, cafä wamacö lija Yai Bada tä Bui jibämoquema, tä ąfa Bui wämou lä balöono wei, cama wama ecö nö öjöböamobä.

14Bämalecö nia lä dobädayou wei bäma tä dääö showao mlaodayou däjä, a Bufi jibämoa balöbema, bamacö möläö showaobä. Obi bamacö nia shïlo yai dobämodayou, Yai Bada tä nofi doblao doablamodayobä.

15Öjö cudeenö, Bada tä Jesús wama a nofi lä mölabou wei ya tä ʘ fa jïlilänö, Jesucristo ai wama ebä bluca lä nofimaö wei ya tä ʘ çai fa jïlilänö,

16ya bufi doblalou. Cafä wamacö nowa ja, Yai Bada lija ya bufi ʘfa shïlo doblalou wäyämou. Showadi bamacö nö bayeli nacaö talei.

17Fayä a lä doblaladi lija ya nacou, Bada tä Jesucristo lija a lä bufiblamou wei a lä cui. Wamacö bufi jaducämabobä ya wʘ faö. Yai Bada wama a jaba lä dale, wama a yai daö balafälöbä.

18Wamacö bufi yai möblobä ya wʘ faö, wamacö dobäö bufi lä doblao wei tä ja wamacö bufi jaducäblobä. Wamacö bufi nia lä bayelibou wei tä ja wamacö yai möläö cadidiobä. Wamacö dobäö bufi doblao waiquiwä ja, cama wama ecö cublobä wamacö malä nacano wei.

19Cama wama etä lofote dablabä ya çai nacou. ¿Öjö tawä? Öjö a shïlo yai lofote dodijiwä. Cama etä lofotenö, bäma a bejedi lä bufii wei bamacö lä cui bämalecö bayelibou. Öjö etä yai lofote showawä lä cuinö,

20Cristo a demi jocädamaö çolayoma. Fedu jamö, cama jayu boco mashi jamö, a çai dicämaquedayoma.

21Öjamö culanö Cristo a Bada läadayoa. Yanowamö bada täbä cublawä ma cui, yai täbä lä nosiemou wei täbä çai cuadayoa ma cui, moli Cristo a shïlo yai Bada cua ayaa. Öjö bä lofotoblawä bäwä ma cui cama a shïlo yai lofote. Bluca bä ʘfa lofote ma jayumaö wejei ma cui, Cristo a wʘfa yai lofote wäyämamobä, ¡öjö a shïlo yai! Fei däjä ma cui, obi ma cui, Cristo a wʘfa nia shïlo yai lofote wäyämou ayao.

22Cristonö jödödöwä tä yai fuwäbou ayaobä, Yai Bada tänö Bada a tablamalema. Cama bäma ecö lä yododoblai bamacö lä cui, Cristo lija bamacö shïlo yai nosiemamobä a Bada lämabou.

23¿Öjö tawä? Cama lija bamacö fa yädäblalunö, cama sho moli bamacö cublaliyoma. Jesucristo cama bei a lä cui, camiyä bamacö waiquiwä. Cama a shïlonö, bamacö demi cua. Cama a showawä malä jödödöle.

Efesios 2

1Cafä wamacö lä cui, wʘlidiwä talewä wamacö jaba fa cuonö, jai nomawä wamacö cuoma. ¿Öjö tawä? Wamacö doblou lä mlaono wei tänö, nomawä wamacö blao ma waiquiono wei ma cui, Yai Bada tänö wamacö demiblamalema.

2Wʘlidiwä tä jamö yanowamö täbä showadi cuaaö lä showainaja, wamacö cafä çai jaba cuaaö balöoma. Fecula bada lija wamacö luluamoma, fecula ösö jamö bä lä cublai bä lä nosiemaö wei a lä cui lija. Yai Bada tä ʘ fuaö lä mlajei bä lä cui, öjö fecula bada lija bä luluamou showaa lä cudi.

³Öjö bā lä cuaaö weinaja, camiyä bamacö bluca ma cui, inaja bamacö çai jaba cuama. Wälidiwä bāma tā lä didibole tā ja, bamacö showadi luluamoma. Bamacö cuaaö bufi lä doblaono wei tā ja, bamacö cuaaö shalilioma. Wälidiwä bamacö cuo waiquioma yalo, Yai Bada tā nö wəlowä lä jushudou wei a lä cuinö bāmalecö nö nia blemaboma, ai bā nö nia lä blemabou weinaja showawä.

⁴Öjö ma cui, Yai Bada a bufi asio fe balojoo. Bāmalecö yai nofimaö fa dodijionö,

⁵wälidiwä tänö jai nomawä bamacö ma blaono wei ma cui, Cristo lija bāmalecö fa yädāmacönö bāmalecö çai demiblamalema. ¿Öjö tawä? Wamacö nofi ojodaboma yalo wamacö malä fucāano wei.

⁶Cristo lija bāmalecö fa yädāmacönö, nomawä bamacö ma cuono wei, bāmalecö demidamaö çolayoma. Cristo a Bada lä dicāmaboladi jamö bāmacö dicāo mö feduodayobä, bāmalecö tablalema,

⁷bāmalecö nofi yai lä ojodabou wei, obi ma cui tā dāblamou showaobä. ¿Öjö tawä? Jesucristo lija bāmacö yädāa yalo, bejedi lä bāmalecö bufi bayelibou.

⁸Wamacö nofi ojodabou yalo, Jesucristo wama a nofi fa mölabonö wamacö malä fucälēno wei. ¿Öjö tawä? Wama a nofi lä mölabou wei tā ma cui, Yai Bada tänö no mlai ja wamacö bayelibläö mlao fa cunoja, wama a nofi nö çai mölabou bādaobö mlai.

⁹Täbä lä dodijaö wei tänö täbä fucāamoimi yalo, cama bā dodijidawä jimöobä etä cuami.

¹⁰Fei dājä Jesucristo lija bāmacö lä yädäle, Yai Bada tänö bāmalecö inaja fa taamanö bāmacö malä cule. Dude bāmalecö tablamaö çolayoma, bāmacö dodijabä. Jaba dājä ma cui, inaja Yai Bada tänö bāmalecö nia taamaö showaoma, bāmacö dodijadibä.

¹¹Wamacö afa shomi lä jilabou wejei wamacö lä cui, bā bufi da daeo. ¿Öjö tawä? Cafä wamacö mosi sicö joyamoimi yalo, judio bānö wamacö nofi jaba tabonomije. Cama judio bā mosi sicö li joyamou fa ayaonö, bei bā sibo shīlo taamamou bādao ma cui, “Camiyä Yai Bada yama ecö ijilubö yaiwä”, bā jole cuma.

¹²¿Öjö tawä? Cristo wama a danomi showawä. Tā nofi da jaducäleje. Isaeli nodiwä ebä lä cuinö wamacö nofi tabonomije. Cama ebä lija Yai Bada tā a nö ma wāono wei ma cui, bayeli tā afa çai ma wāqueno wei ma cui, öjö cafä wamacö befi cuonomi. Öjö wama tā a bufibläö mlai ja, Yai Bada wama a çai daö mlai ja, wamacö bälödalou nö beblalodii buoma.

¹³Yai Bada tā lä cule jamö culanö wamacö bälöo blajaoma ma cui, fei dājä, Jesucristo lija wamacö yädāblaliyoma yalo, öjönö wamacö çai bälöa ajedebloou majölayoma. Cristo a fa shāmōlunö iyābö falayoma. ¿Öjö tawä? Öjö iyābö nowa ja wamacö ajedebaliyou lä cufe.

¹⁴Judio wamacö lä mlai wamacö sho bāmacö bluca nofimayou majöobä, öjö a Jesucristo waiquiwä malä cui. Bāmacö bufi yai yanöcöblobä. Bāmacö nofi jaba lä wāliayono wei tā lä cui, Cristonö tā wālia waiquilema.

¹⁵¿Öjö tawä? Judio yamacönö, Yai Bada yama etä ʘ tabou ayao balöblaoma. Tä nabä yai lä shimöqueno wei tä ʘ bluca ma cui, showadi yamacö nia cuaaö lä nodiablalono wei tä ʘ ma cui, camiyäteli yamacönö yama tä ʘ bluca oniboma. Öjö ma cui, Cristo a nomaö lä lälayono wei tänö, öjö tä ʘ joyalema, judio yamacö ma cui, judio wamacö ma mlai ma cui, cama lija bamacö bluca yädao fe usucuo showadaobä. Moli bamacö fa cublalunö bamacö dodijidawä nofimayobä. Bamacö bufi yai yanöcöblobä.

¹⁶Tefi lä balitaono wei jamö a lä shämolayono wei tänö, moli bämalecö tablamalema, Yai Bada lija bamacö bluca ajedou showaobä. Bamacö nofi waiyayou çodaaö mlaobä.

¹⁷Eja Cristo a fa waloiquiyonö, täbä bufi lä yanöcödamaö wei tä ʘ wäyayoluma. Yai Bada tä lä cule jamö culanö wamacö bälöo lä blajaono wei wamacö ma cui, judio yamacö ajedeo lä waiquiono wei yamacö ma cui, öjö tä ʘ Yai Bada lija bamacö bufi yanöcou fe usucuaaö showaobä.

¹⁸Cafä wamacö ma cui, camiyä yamacö ma cui, Cristo a lä cuaano wei tänö, bä Fjö e lija bämalecö bluca ajedamaö dao malä cui. Öjö cama a Bufen showawänö bamacö ajedou.

¹⁹¿Öjö tawä? Öjö cudeenö, judio wamacö lä mlai, shomi wamacö ʘfa nia jilamou çoomi. Fei dāja wamacö nia bälöblalou bädaomi. Ma, Jesucristo wama ecö mö feduwä. Yai Bada tänö cama ebä çai lä cule bä lija wamacö çocaa waiquia.

²⁰Yai Bada bäma ecö yafibö cublou majöa lä cule. Jesucristonö yamalecö lä shimöleno wei yamacö ma cui, Yai Bada a wano wäyälöwä bä jaba lä cuono wei bä ma cui, öjö yama ecö yafi li colo. Tä yafi nia colo lä lofotomabou wei, cama Jesucristo a waiquiwä.

²¹Cama lija bämalecö bluca fa yädäblamalönö etä yafi blaucublamaö lä cule, Bada bäma ecö yafibö dodijidawä yaibä.

²²¿Öjö tawä? Cafä wamacö ma cui, Cristo lija wamacö yädaa yalo, cama ai yama ecö lija Yai Bada a Bufen lofotenö wamacö çocablamaö, bamacö bluca fa çocablamolunö, Yai Bada bäma ecö yafibö yai cuobä.

Efesios 3

¹Öjö cudeenö, cafä judio wamacö lä mlai wamacö lija Jesucristo ya tä ʘ wäyää nofi jushuaö yalo, camiyä Pablo wale fe labouje.

²¿Öjö tawä? Yai Bada tänö täbä nofi lä ojodabou wei wama tä ʘ çai jiliaö mö feduobä, Yai Bada tänö wale cadidilema. Öjö wama tä ʘ çai jilibou waiquile cätä.

³Yai Bada tänö tä ʘ jaba lä jöyabono wei, camiyä lija tä ʘ wawäblamalema. Öjö ya tä ʘ jolodowä onibläö waiquio lä cufe.

⁴Ei wama tä ʘ doaö dāja wamale bufi nia jaducäwä dabläö. Yai Bada tänö tä ʘ jaba lä jöyabono wei ya tä ʘ daö, Cristo a nia lä cuaano wei tä ʘ showawä lä cui.

⁵Bämacö nö badabö lija tä ʔ jaba wawämano ma mlai ma cui, fei dǎjä Jesucristonö yamalecö lä shimöleno wei yamacö lija tä ʔ li ʔacumö wawäblamalema, bei a Bufinö. Jesucristo ebä yododabä jamö etä ʔ çai lä wäyää wejei bä lija çai. Yai Bada tänö yamalecö yaia cadidilema.

⁶Tä ʔ jöyabou lä showaono wei, ei tä ʔ. Yai Bada tänö judio yamalecö nia lä bayelibono weinaja, judio wamacö lä mlai wamacö nia çai bayelibou mö feduo lä showaono wei, öjö bei tä ʔ waiquiwä. Moli bämalecö nia bluca tablamaö majöoma. Jesucristo a wäfa wäyää lä balöono wei etä ʔ dodijidawä fa wäyämönö, öjö lija judio yamacö fa yädäicunö yamacö nia bayeliblamoma. Inaja showawä, judio wamacö lä mlai wamacö nia çai bayeliblamou mö feduo showaoma.

⁷¿Öjö tawä? Cama etä lofotenö öjö ya etä ʔ dodijidawä wäyää. Ya etä ʔ wäyää, wale nofi ojodabou yalo wale shimölema.

⁸Cama ai ebä shïlo dodijaö ma ayaono wei ma cui, camiyä wale nofi fa ojodadalönö wale shimöa fe yadilema. Cristo lija täbä yai bayeliblamou fe lä balojoo wei, judio wamacö lä mlai wamacö lija ya tä ʔ wäyää.

⁹Yai Bada tänö tä ʔ jaba lä jöyabono wei tä ʔ wawäblou fe yadiobä, camiyä lija täbä bufi nia bluca jaducäblamama. ¿Öjö tawä? Yai Bada a lä cuinö, täbä bluca lä tablaleno wei a showawä lä cuinö, cama a nia cuaaö lä jatoono wei tä ʔ nia ʔacumö wawäblamama.

¹⁰Fedu fe dole jamö, ʔjele bä lä cublai bä lija a bufi lä jaducäi tä dablamodayobä, inaja a li cuaama. ʔjele ai bä bada lä nosiemou wei bä çai lija. Yai Bada a bufi shïlo yai jaducäwä fe balojowä. ¿Öjö tawä? Jesucristo ebä lä yododoblai bä lä cui, öjö bä lä bayelibou wei tänö a bufi nia yai jaducäwä dablamoma.

¹¹Ei tä ulufi tablaö showao mlao dǎjä, inaja a nia cuaaö showaoma. Bada tä Jesucristo a lä cuaano wei tänö tä wawäblamalema.

¹²Öjö bäma a nofi lä mölabou wei tänö, quilii mlai ja Yai Bada lija bämäcö bufi möläö çai icuo dao.

¹³Öjö cudeenö abenaja ya cuu. Cafä wamacö lija ya tä ʔ lä wäyää wei tä nowa ja wale nö ma bleaamaö wejei ma cui, bä bufi fölijö dijä. Cafä wamacö doblao cuobä tä malä cui.

¹⁴Öjö cudeenö, Fayä lija ya möfe bolanö ya wä faö talei.

¹⁵Fedu jamö bä lä culadi bä ma cui, bita jamö bä lä cublai bä ma cui, öjö cama ebä ʔafa bluca jilamou.

¹⁶Cama ebä showadi bayelibou fe balojoo yalo bämäcö nö bayeli nacaö, cama bei Bufinö wamacö nö wälojomabobä. Wamacö bufi yai lofotomabobä.

¹⁷Cristo wama a nofi mölabou ja, cafä wamacö bufi jamö a cudiobä ya wä çai faö. Wamacö bufi yai nofiobä ya wä çai faö, fii fibä nasöcö fa dalonö, tefibä ublao lofotoo

lä culenaja, wamacö bufi yai lofotoo cuobä. Yafi bä colo lofotoo däjä, bä yafi wäcäo dao lä mlainaja wamacö yai cuo mö feduobä.

¹⁸Yai Bada ai ebä bufi nö bluca wəlojomabou lä cuaaö weinaja, cafä wamacö ma cui wamacö bufi nö çai wəlojomabou cuo mö feduobä. Cristonö bämalecö yai nofimaö fe lä balojoo wei tä ja, wamacö bufi möblou fe yadiobä.

¹⁹Cristonö bejedi lä bämalecö nofimaö fe balojowä. ¿Öjö tawä? Bämalecö nofimaö fe lä balojoo wei tä ja bämamacö bufi yai jaducäblou fa cunoja, bämamacö bufi nö fejelobö wei. Inaja wamacö bufi jaducäwä cuobä ya wə faö talei, Yai Bada tä lä culenaja wamacö bufi yai cublobä.

²⁰Bämalecö nia bayelibläö nö lä wəlojoo wei, öjö Yai Bada a, cama etä lofote showawänö bämamacö showadi lä bayeliblamou wei a lä cui. Camiyä bämamacö bufi lä cuablalou weinaja bädawä mlai, bämamacö lä bayeliblamou wei tä ja, bämalecö nia yai fejeleamaö.

²¹Öjö a nofi shılo yai doablamobä. Jesucristo a lä cuaano wei tänö, showadi a doblao dablamobä. Cama bäma ecö lä yododaö wei bämamacö ma cuinö, showadi bäma a doblao çai dablamabä. Inaja lä tä cuo shi wəlibä.

Efesios 4

¹Öjö cudeenö, Bada ya wəno wäyäo fe yadio yalo wale fe lä labolajei ya lä cuinö bämamacö nowa taö. Wamacö yai dodijabä ya wə fe blacəjou. Dodijidawä wamacö cuobä Yai Bada tänö wamacö malä nacano wei.

²Bufi oquewä bä yai da cuo. Bä bufi yai yanöcöo fe da yadio. Bä çai nofimayou fe da yadio.

³Yai Bada tä Bufinö moli wamacö mashi tablamalema yalo, bä ą majöablalo dijä. Wamacö bufi wedinajamobä tä cua ja, wamacö bufi yanöcölanö, tä cadejeblaö bufi doblao da showadaoje, wamacö bufi shalilio fe yadiobä.

⁴Moli a lija bämamacö bluca yädäa yalo, moli bämamacö. Bluca bämamacö lija, moli a lä cui a Bufi bälöblawä. Yai Bada tänö bämalecö lä nacano wei däjä, bämalecö ąfa bayeliblou lä wäyāno wei tä ą moli ja, bämamacö bluca möläö.

⁵Bäma a nofi bluca lä Badabole, moli a. Bäma tä ą nofi lä mölabole, moli tä ą. Moli a lija bämamacö bluca yädäobä, bämamacö fe ojomamou.

⁶Yai Bada moli cätä waiquiwä, bäma a nofi bluca lä Föömale. Öjö a shılo yai Bada. Öjö lija bämamacö bluca bayeliblamou. Bluca bämamacö lija öjö a cudia.

⁷Öjö ma cui, Yai Bada lija bämamacö ojodamolanö bämamacö nö bluca wəlojaö shedecobä, Cristonö bämalecö dobäo cuaama.

⁸Öjö cudeenö abenaja tä ą oni cuu balöoma. Ösö jamö a lä yamobefälöno wei däjä, yanowamö bluca täbä fa däfälönö, täbä lululefälöma. Täbä fa lululäfälönö, täbä dobädayoma. Einaja tä ą oni cuu.

⁹¿Öjö tawä? “Ösö jamö a lä yamobefälöno wei däjä” tä ʘ lä cuu wei, ¿wedinaja bāma tä ʘ nofi tabobä tä ʘ? Abenaja bāmacö bufi cubä tä ʘ. Ösö jamö a jowa lä funo wei, mashita a çojomo jamö a fa fuobalöcölönö, a ösöa çolayoma.

¹⁰Ösö jamö a lä itolayono wei a lä cui, fedu fe dole jamö a dua lä çobefälöno wei, öjö a showawä. Jödödöwä tä nia dodijidawä fa tamabonö, a li inaja cuaama.

¹¹Täbä jowa yanowamö lä dobädayono wei, abenaja täbä jowa taamama. Jesucristo a wano wäyäo cuaabeje, ai bä shimama. Jesús ebä yododabä jamö etä ʘ wäyäbeje, ai bä dobäma, bä ʘ nö wəlojabä. Mojodi täbä lija Jesucristo etä ʘ dodijidawä wäyäo cuaabeje, ai bä dobäo mö feduoma. Cama ebä çai yododabeje, ebä çai damabeje, ai bä çai dobäo mö feduo showaoma.

¹²Jesucristo ebä bayeliblabeje bä dobäo cuaama, ebä fa bayeliblalöjenö, Yai Bada lija dodijidawä cama ebä bluca ojodamobä. Cristo lija bä bluca lä yädäo wei bä bufi bluca lofotoafälöbä.

¹³Yai Bada bāma a nofi bluca lä mölabou wei, bei Ijilubö bāma a çai lä daö wei bāmacö bluca lä cui, bāmacö bufi bluca fa shalililonö bāmacö bufi badafälöbä. ¿Öjö tawä? Cristo a lä culenaja bāma ecö cuo mö feduobä.

¹⁴Öjö däjä, shomi tä ʘ çai lä fuaö wejei bä ʘ ja bāmacö nia mölaimi majöo. Bāmolecö yaclāmaö bufi lä doblao wejei bä ʘ ja, oshe bä bufi shelelewä lä culenaja bāmacö bufi nia cuaaö majöomi. Wadoli a badanö, mau u jamö täbä befi çai shäyājaö lä cuaaö weinaja bāmacö bufi taamamou dicoo mlaobä.

¹⁵Ma, bāmacö bufi yai nofilanö, bāmacö caficö ʘ yai da bejedimo. Inaja bāmacö cuaalanö, bāmacö bufi nia badafälöo, Cristo a lä culenaja bāmacö cuobä. ¿Öjö tawä? Bāmacö bayeliobä, Cristo lija bāmacö yädäa waiquia. Camiyä bāmacö fe lä cui, Cristo bei a. Cristo bei a lä cui, camiyä bāmacö.

¹⁶Cama a showawänö bāmolecö çocamabou. ¿Öjö tawä? Oshe bä dodijidawä tablamou lä waiquio wei bä dodijidawä badaö lä culenaja, camiyä bāmacö ma cui, dodijidawä bāmacö badaö cuobä. Cristo bāma ecö nofimayolanö, cama a lofotenö bāma ecö badafälöbä.

¹⁷Öjö cudeenö ya wə fe blacäjou a lä cule. Bada ya wano taö. Yai Bada tä daö lä mlajei bä lä cuaaö weinaja bä cuaaö da mladal. Inaja bä bufi lä cuaablalou wei bä bufi nö bleaaö.

¹⁸Bä bufi mö didi yalo, Yai Bada lija bä bufi nö jaducäblobimi waiquiwä. Bä bufi jifuwä yalo bä bufi mojodi. Bä bufi mojodi cudeenö, Yai Bada lija bəlimi bä nö tablamobimi waiquiwä.

¹⁹Wəlidiwä tä ja bä bufi quilijoimi. Bä wasömamou mlai, yanowamö täbä showadi lä cuaaö wei, öjö tä nabä shilo yai cadidouje. Shami tä bluca ma cui ja bä nö shijilobimi.

²⁰Cristo tä ʘ ja wamacö damamou däjä, inaja wamacö taamanomije.

²¹Öjö tawä? Wama afa jilibou malä waiquile. Öjö lija wamacö lä yädäqueno wei däjä, Jesús bejedi etä a lä cui ja wamacö damamaje.

²²Wamacö bufi jaba lä cuaablalono wei tä lä cui, tä daa da showadacöje. Inaja wamacö jaba cuaama ma cui, wamacö bufi lä waiyono wei tä ja wamacö möläö buoma. Öjö tänö wamacö wälidiadima.

²³Yai Bada tä Bufinö fei däjä bä bufi da shomiblalu.

²⁴Yai Bada tänö dude wamacö bufi tablamalema, cama a lä culenaja showawä. Wamacö bufi yai dude lä cui ja bä da luluamo, wamacö yai bejedimobä. Dodijidawä wama ecö yaiohä.

²⁵Öjö cudeenö bä caficö jolemo dijä. Aifä bä lija wamacö caficö bluca shilo yai bejedimobä. Moli bämacö mashi waiquiwä malä cui.

²⁶Wamacö jushudou bädao ja bä da moyaweicu, wälidiwä wama tä taö mlaobä. Wamacö jushuo showalanö bä fe weya dijä.

²⁷Fecula bada a nö walojama dijejä.

²⁸Wamacö jaba lä tomömono wei wamacö lä cui, bä tomömou çödaa dijä. Bä yai da ojodamo. Dodijidawä wamacö fa ojodamonö, bä nö föli lä bleaaö wei wama bä yai bayeliblehä.

²⁹Wälidiwä wamacö a fabä, bä caficö caloblou bädao dijä. Dodijidawä bä a shilo da fa, wama täbä bufi lofotoamabä. Wama bä bufi bayeliblehä tä cua ja, wamacö a shilo dodijidawä faö showadaobä.

³⁰Yai Bada tä Bufi lä jibämoqueno wei tä Bufi çai wälidiwä bälömabo dijejä. Cama wama ecö nö öjöböamobä a Bufi malä jibämoqueno wei. Wamacö çoaö showao mlao däjä wamacö çai cudio balöobä.

³¹Wama täbä nofi wälibou lä jatomou wei tä da blajamalöje. Wamacö nö wälöwä lä jushudou wei tä çai. Wamacö jushudou lä bädao wei tä çai. Wamacö a lä läblou wei tä çai. Wamacö afa lä tayou wei tä çai. Wamacö nö lä nabämou wei, tä jödödöwä da blajamalöje.

³²Dodijidawä täbä çai shilo yai da cuoje. Täbä nofi da ojodaboje. Cristo lija wamacö fa yädäicunö, Yai Bada tänö wamacö nofi asibou lä cuono weinaja, çafä wamacö ma cui wamacö nofi nia asiboyou cuo.

Efesios 5

¹Öjö cudeenö, Yai Bada bei ijilubö wama ecö yalo, öjö a shilo yai da owämaje. Wamacö nofimaö fe balojowä.

²Wama täbä nofimalanö bä çai da cuoje, Cristonö bämalecö nofimaö lä culenaja showawä. Bämalecö bayeliblehä a nomaa lälayoma. Yai Bada lija täbä waqueshi nö liyoli lä uçucamou wei täbä dodobou lä cuaaö wejeinaja, inaja showawä, Cristo cama a jibämou bufi doblao cuoma, Yai Bada a bufi doblamabobä.

³¿Öjö tawä? Wamacö nofi nia beshili jushuaimi. Shami wama tä nia fuliimi. Ai täbä jamö wamacö bufi nia waiyoblaloimi. Yai Bada wama ecö lä cui, inaja wamacö afa wayoamou cuobä wamacö malä mlai.

⁴Walidiwä tä a wayoa dijejä. Wamacö a biyäcäblalou bädaobä wamacömi. Wamacö nö lä quililaliyobö wei tä a ja, bä a cai wayoablalou bashio dijä. Ma, cafä wamacö lija öjö tä a jilimamou mlai ja, Yai Bada lija wamacö bufi afa shilo doblao lä wäyämou wei, öjö tä a shilo yai jiliabeje, öjö lä.

⁵Möla dijä. Bä nofi lä jushublalou wei bä ma cui, shami tä fulii bufi lä doblao wejei bä ma cui, ai täbä jamö bä bufi shilo lä waiyou wei bä ma cui, Yai Bada sho, Cristo sho cäcöbä bälöo lä dodijio wei jamö, öjö bä befi nia cubloimi. Öjö bä bufi shilo lä waiyou wei bä lä cuinö, Yai Bada a bufibläo mlajei, shomi täbä shilo malä bufijadii wejei.

⁶Bä a lä jolemou wei bä lija bä möla dijä. ¿Öjö tawä? Inaja täbä cuaadii yalo, Yai Bada tä nö walowä lä jushudou wei däjä a nosie fuaö lä mlajei bä lä cui bä nö nia malä bleaamaö wei.

⁷Öjö cudeenö, inaja bä lä cuaaö wei bä lija bä yädäblo dijä.

⁸Wamacö bufi mö jaba dödöoma ma cui, fei däjä Bada wama ecö li yalo, tä lä wacacai jamö wamacö cua malä majöle. ¿Öjö tawä? Tä mö lä wacacai jamö täbä dodijaö lä cuaalenaja bä shilo yai da cuaa.

⁹Tä mö lä wacacai jamö täbä cua yalo, täbä malä dodijaö wei. Bä bejedimou. Bejedi tä a jamö bä cadidou.

¹⁰Bada wama tä bufi nia lä doblamabou wei tä nabä shilo da cadidoje.

¹¹Täbä bufi mö lä didi wei bä nö bleaaö. Öjö bä lä cuaaö wei tä ja bä yädäblou bufio dijä. Bä lä cuaale wama etä nia yai wäaö.

¹²Öjö bä cuaaö lä jatoo wei tä afa wayoamou bädao ma cui, tä a jilimamou walidiwä malä cui.

¹³Öjö ma cui inaja bä lä cuaaö wei, bei tä shinö tä dablamos däjä tä wawäblou. Tä nia yai lä wawäblou wei, öjö lä bei tä shi waiquiwä.

¹⁴Öjö cudeenö abenaja tä a oni cuu. Wa lä mile, ja da lälö! Nomawä wa lä blale, ja da jocäblalu! Öjö däjä Cristonö wamacö bufi nia yai wacacamabou. Einaja tä a oni cuu.

¹⁵Wamacö lä cuaaö wei tä ja bä da moyaweicu, öjö lä, bä bufi jaducäwä lä mlai bä lä cuaaö weinaja wamacö cuaaö dicoo mlaobä. Bä bufi yai lä jaducäi bä lä cuaaö weinaja, inaja wamacö shilo yai cuaabä.

¹⁶Fei däjä walidiwä tä bluca taö lä cudujei. Öjö cudeenö, wamacö dodijabä tä cua waiquia ja, bä yai dodijaö da showadao.

¹⁷Bä bufi mojadi cuo dijä. Bada tänö tä taamaö lä bufii wei tä yai da dalalöje.

18Nashiwä toubänö bä shi çai wäli dijä. Öjö toubä wayunö täbä malä wälidiblou wei. Öjö toubä ja wamacö taamamou mlai, Yai Bada tä Bufen lija bä bufi yai da jödödöblamamolu.

19Wamacö yododabä jamö, Yai Bada lija täbä a amowa lä yädäblai täbä a shilo da taje. Nö badabö David etäbä a çai. Yai Bada tä Bufenö täbä a lä bädamaö wei täbä a çai. ¿Öjö tawä? Bada tänö wamacö a bufi doblalou jiliadayobä wama täbä a amowa nia taö.

20Tä cublou lä bädao wei tä ma cui ja, Bada tä Jesucristo a wänö, Fayä Yai Bada lija bä bufi afa shilo doblalou da wäyämo.

21Cristo lija wamacö quililanö, dodijidawä bä a da jiliayo.

22Bä suwäbö wama ecö lä cui. Feyalofä bä a da jiliaje, Bada wama a wä nö jilia lä talebö weinaja showawä.

23Feyalofä wama bä a nosie fuabä bä waiquiwä malä cui, cama bäma ecö lija Cristo a wä nosie fuamou lä culenaja showawä. Bämalecö lä nowamöbou wei, öjö lä Cristo a waiquiwä. Cama bäma ecö lä yododaö wei bamacö lä cui, Jesucristo sho jai moli bamacö cuwä.

24Cristo bäma a nosie fuabä bamacö. Inaja showawä, bä suwäbö wama ecö lä cuinö, feyalofä wama bä nosie nia çai fuaö.

25Bä feyalobö wama ecönö, suwäböfä bä yai da nofimaje, cama bäma ecö lä cui, Cristonö bämalecö nofimaö lä cuaano weinaja showawä. Bäma ecö bayeliblobä a noshi malä öjödaono wei.

26¿Öjö tawä? Yai Bada lija bamacö yaiblamobä a noshi öjödaoma. Mau unö täbä aublou lä culenaja bämalecö aublalema, cama a wä lä wäyämono wei tänö.

27Bämalecö dodijidawä ajedemabobä, inaja bämalecö li taamama. Wiisibö tä wai wäliwä sudia mlai ja, bamacö sicö wai wäquiblalou mlai ja, bäma ecö afa tamobä tä cua mlai ja, bäma ecö dodijidawä cuobä.

28Inaja showawä, bä feyalobö ebänö bä suwäbö ebä nia yai nofimaö cuoje, cama bä nofimamou lä culenaja showawä. Bä suwäbö e lä nofimaö wei, cama a nofimamou. ¿Öjö tawä?

29Cama a nowamöo lä mlai a yanowamö cua malä mlai. Bä dodijidawä cuobä bä iyaö. Bä nowamöo. Cama bäma ecö lä cui, Cristonö bämalecö nowamaö lä culenaja showawä.

30Cristo sho jai moli bamacö cuwä yalo, cama a lä nowamöo wei däjä, camiyä bamacö ma cui bamacö nowamamou cuquei.

31Abenaja tä a cuu. Täbä doayou däjä, täbä shelelou nodiablalou showawä. Bä föö lijamö, bä nöö lijamö bä jaba ma cublamou wei ma cui, bei suwäbö bä nia fa ajedemabojenö, bä sheleleblou majöo,moli bä cublou majöobä. Einaja tä a cuu.

³²Ei tä ʘ jamö tä ʘ yai lä dodijidai tä ʘ çai jöyaa. Cäcöbä lä doayou wei cäcöbä ʘfa wayoamou bädao mlai ja, Cristo a wʘfa yai wayoamou, cama bäma ecö sho.

³³¿Öjö tawä? Öjö ma cui, çafä wamacö bufi jaducäblobä tä ʘ çai showawä, wamacö suwäbö lä cui wama bä nofimabä. Çafä wamacö nofi fõlio lä culenaja, inaja showawä suwäböfä wama bä nofi tabolanö wama bä nofimabä. Bä suwäbö wama ecö ma cuinö, dodijidawä feyalofä wama bä nosie çai fuabä.

Efesios 6

¹Ijilu wamacö. Bada wama ecö yalo, faafä wama a wʘ fuabä wamacö waiquiwä. Naafä a çai. Tä malä dodijidai.

²Abenaja tä ʘ cuu. Faafä a ma cui, naafä a ma cui, dodijidawä wama bä çai fa cuonö, wama bä ʘ nia fuaö. Einaja tä ʘ cuu. ¿Öjö tawä? Inaja wamacö cuaaö ja wamacö nia jöwa bayeliblamou. Yai Bada tänö tä tamaö lä bufi wei 10 täbä ʘ jibämoquema, Moisesi lija. Öjö colo tä ʘ ja täbä nia lä bayeliblamou wei tä ʘfa wäyämono ma mlai ma cui, bä fõö, bä nöö bä ʘ nia lä fuaö wejei tänö täbä nia jöwa shilo yai bayeliblamoma.

³Bä fõö, bä nöö bä ʘ fuamaö fa bufinö, abenaja tä ʘ cuu majöö malä cui. Dodijidawä wamacö demi cudiobä, wama bä ʘ nia fuaö. Einaja tä ʘ malä cuu wei.

⁴Bä fõö wama ecönö, ijilufä bä jushuo lulubo dijejä. Wama bä çai dodijidawä fa cuonö, wama bä yai wasöbobä. Wama bä yai yömölabobä. Bada tänö tä tamaö lä bufi weinaja showawä.

⁵Bä nosie fuamobä wamacö lä tabou wejei wamacö lä cui lija ya wʘ faö majöö. Wamacö lä tabou wejei bä lija wamacö quilibä bä li. Cristo wama a bufi doblamabobä, wamacö bufi cadidilanö bä nosie da fuaje,

⁶bä mamö showao däjä shilo mlai. Öjö bä lija wamacö nofi doablamobä mlai. Cristo wama a nosie nö lä fulebö weinaja, wama bä nosie yai fuaö cuobä. Yai Bada tänö wamacö lä taamaö weinaja, bufi doblalolanö wama tä yai tabä.

⁷Dodijidawä bä da ojodamo. Jai yanowamö täbä lija mlai, jai Bada tä Jesucristo lija, bufi doblalolanö wamacö nö yai ojodamou lä cuquebö weinaja showawä.

⁸Bämacö cuaaö lä bädao wei tä ma cui, bämacö dodijaö ja, Bada tä lija bämacö nia malä dobämou wei. Wama tä daö. Täbä nosie fuamobä wamacö lä tabou wejei wamacö ma cui, wamacö tabou lä mlajei wamacö ma cui, inaja showawä wamacö nia bluca dobämou cuo.

⁹Wamacö nosie fuamobä wama bä lä table wamacö lija ya wʘ faö majöö. Afä wama bä lä table bä lä cui, dodijidawä bä çai da cuoje. Bä ʘ waitelimo dijä. Cama bä ma cui lija, çafä wamacö ma cui lija, a nosie nia yai lä fuamou wei a lä cui, fedu jamö a malä culadi. Öjö a lä cuinö täbä bluca jimaö fe malä usucuo wei.

¹⁰Abenaja nomöjowä, ya wʘ waicobä. Bada tä Jesucristo lija bä bufi shilo da lofotoicu. Cama etä lofotenö wamacö nö wʘlojabä.

11Bä shäyobä jamö bä nowamöobä, sodado bänö duo shibä läbou lä cuaaö wejeinaja bä bufi nowamöo da cuo. Yai Bada lija wama tä bayeli fa dälänö bä da nowamöo, fecula badanö wamacö mölamaö bufi lä doblao wei däjä, wamacö ublao lofotoablalou showaobä.

12Yanowamö täbä bädawä lija bämacö ishous malä mlai. Fecula bä yai lija bämacö ishous malä cui. Cama fecula ebä bada lä nosiemou wei bä çai lija. Ei tä mö lä didi wei jamö bä bada läblawä. Ösö jamö ma cui, bä çai bluca wälidiwä cuadayoa.

13Öjö cudeenö, Yai Bada lija wama tä bayeli fa dälänö bä da nowamöo, tä wälidiblou däjä wamacö nö yai wälöjaö fe yadiobä. ¿Öjö tawä? Wamacö nö wälöjalanö, wamacö ublao lofotoo showaobä.

14Bä ublaa da lofotoicu, öjö lä. Bä ishobä jamö, bä lä didio wei sibä ja sodado bä jalocaö mlaobä, sibä ocabou malä lofotoo wejei. Inaja showawä, çafä wamacö yabäcamou mlaobä, bejedi tä a shïlo da bufiboje. Wamacö shïlo lä bejedimou wei tänö wamacö nia nowamöo, duo shibänö sodado bä balöcö nowamöablalou lä cuaaö weinaja showawä.

15Sodado bä mamicö lofotoablalobä bä mamicö didio lä cuo weinaja, inaja showawä bä mamicö çai lofotoa da cuicu. Täbä bufi lä yanöcödamaö wei tä a dodijidawä lä cuinö, wamacö çajou mlai ja wamacö yai fuu lofotoablalou showao fe yadiobä.

16Inaja wamacö cuaalanö bä bufi yai da nowamöo, sodado bä balöcö nowamöablalou lä cuaaö weinaja showawä. Bä ishobä jamö täbä niyayou lä cuaaö weinaja, tä yai lä wälidii a lä cuinö, cowa wacä befi çainö wamacö befi ma niyaaö wei ma cui, Jesús wama a nofi lä mölabou wei tänö, öjö wama e wacä befi çai nia yaclämaö.

17Sodado bä fe nowamöo lä culenaja, Yai Bada lija wamacö fucäamou lä waiquile, öjö tä shïlo da bufiboje. Yai Bada tä Bufi lä cui, öjö e çai sibala da showaboje. Öjö e sibala lä cui, Yai Bada etä a waiquiwä.

18Yai Bada tä Bufi lija wamacö a fa luluamonö bä nö bayeli shïlo da nacao. Öjö lija bä shïlo showadi da naco. Bä çai da moyaweicu, wamacö nacou mojiblou mlaobä. Yai Bada ebä lä cui, showadi öjö wama ebä nö bayeli bluca nacabä.

19Camiyä ma cui wamale nö çai bayeli da naca, ya tä a wäyäbä jamö ya wä çadidobä. Jesucristo tä a dodijidawä lä jöyaono wei ya tä a wawämaö däjä, quilii mlai ja ya tä a wawämaö fe yadiobä.

20Jesucristo ya wäno wäyäbä wale lä shimöleno wei ya lä cui, ya wäno wäyäö nofi jushuadii yalo wale fe labouje. ¿Öjö tawä? Quilii mlai ja ya wäno wäyäö walalao fe yadiobä, wamale da bayelima. Ya wäno wäyäö walalaobä ya waiquiwä malä cui.

21Camiya ya lä cule, eja ya çai lä cuaaö wei, wama tä a bluca jiliabä Diquiconö wamacö nia yömöläö, Jesucristo ai e lä cuinö. Öjö yama a yai nofimaö. Dodijidawä Bada tä a shïlo fuaö talei.

22Tä a bluca wäyäbä ya shimaö lä cule, camiyä yamacö lä cule wama tä a çai jiliabä. Wamacö bufi çai lofotoblamabä.

²³Bei. Fayä Yai Bada lija showadi wamacö bayeliblamobä, Bada tä Jesucristo lija çai. Wamacö bufi shïlo yanöcomaboböbä. Wamacö bufi çai nofimaboböbä. ¿Öjö tawä, iba wamacö? Jesucristo showadi wama a nofi çai mölabou fe yadiobä.

²⁴Bada tä Jesucristo a nofimaö shi wälili lä waiquilajei bä lä cui, bä nofi shïlo çai ojadaboböbä.

Filipenses

Filipenses 1

¹Pablo cä ya. Timoteo sho yafäcö cua lä cule, Jesucristo yafä a wä lä fuaö wei yafäcö lä cui. Jesucristo lija wamacö lä yädao wei wamacö lija ya si oni shimaö, Filibo jamö Yai Bada wama ecö lä cui lija. Wamacö çai lä yododaö wejei bä bada lä cui lija ya si oni çai shimaö, wamacö lä bayelibläö wejei bä bada lija çai.

²Bei. Fayä Yai Bada lija wamacö shïlo bayeliblamobä, Bada tä Jesucristo lija çai. Wamacö bufi shïlo yanöcomaboböbä. Wamacö nofi çai shïlo ojodaboböbä.

³Showadi bamacö nofi jaducäblaö. Bamacö nofi jaducäbolanö, Yai Bada ya lä bufibläö wei tä lija ya bufi shïlo doblalou talei.

⁴Yai Bada lija bamacö bluca lä bayelimaö wei däjä, ya bufi doblalolanö showadi ya wä shïlo faö.

⁵Wamale bayelibläö yalo, Yai Bada lija ya bufi doblalou. Jesucristo tä ä dodijidawä wäyämou blaucobä wamale malä bayelibläö wei. Cafä wamacönö, Jesucristo wama a nofi jaba mölabolanö wamale bayelibläö lä showaono weinaja, fei däjä ma cui wamacö cuaaö malä showai.

⁶Ei ya tä daö malä waiquii. Wamacö bufi jaba lä dodijidablmaleno wei a lä cuinö wamacö bufi nia dodijidamabou shi wälii. Jesucristo a itou çoyoluu däjä, dodijidawä wamacö tabobä.

⁷¿Öjö tawä? ¡Inaja bamacö nofi tabou lä! Bamacö malä bufibole. Yai Bada lija ya ojodamobä ya cuono ma mlai ma cui, wale nofi fa ojodadalönö wale shimöa fe yadilema. Ya lä ojodamou wei jamö, blada bä ja wamale bayelibläö ja, bamacö bufibou. Fei däjä wale cafe ma quefubolajei ma cui, ya fe lao showaono mlai ja ma cui, showadi wamale bayelibladima. Jesucristo ya wä nofi bäyäbou ma cui, ya wä bayelibou ma cui, wamale bayelibläö showawä.

⁸Bejedi lä bamacö bufibou. Jesucristonö wamacö nofimaö fe balojoo lä culenaja, bamacö nofimaö cuwä mö feduwä. Bejedi lä ya wä. Yai Bada tänö wale ä bejedi daö.

⁹Yai Bada lija bamacö bayelimaö däjä, wamacö nofimayou balabä ya wä faö talei. ¿Öjö tawä? Wamacö nofimayou balaa fa dodijilönö, wamacö bufi yai jaducäblobä ya wä faö. Wamacö bufi wedinajamou mlai ja, wamacö bufi shïlo yai walalaobä.

¹⁰Wamacö bufi walalalanö, dodijidawä tä lä cui wama tä yaiabä. Wamacö bufi çai shomitawä coyocoablalou mlai ja, wamacö yai dodijabä. Inaja wamacö cuаланö, Jesucristo a fuu ço däjä wamacö dobloimi jimaö mlaobä.

¹¹Jesucristonö wamacö fa bayeliblanö, cama etä dodijidawä lä cuinö wamacö yai dodijidawä cuobä. Inaja wamacö cuаланö, Yai Bada wama a dodijaö dablambä, a nofi doablabeje.

12Iba wamacö, ei wamale a da jililä. Ei däjä wale cafe lä quefubolajei tä ma cui ja, bamacö bufi yai da doblalo. Ya nö bleaaö yalo, fei däjä Jesucristo etä a dodijidawä yai jilimou malä blajaadi.

13¿Öjö tawä? Eja bada a bälöo lä dodijiinö bä lä lämabole bä bluca moyawäblou waiquia lä cule. Ai bä bluca mö feduwä sho, bä çai moyawe waiquiwä. “Jesucristo etä a wäyäo tä nowa ja, a cafe quefubouje”, wale nofi tabou waiquiaje.

14Abenaja çai. Ya cafe quefua ma cule, ya bayeliblamou fe lä yadio wei tänö, Jesucristo ai ebä bufi bluca çai lofotoblou fe balojoa lä cule. Bada tänö bä bufi fa lofotoamanö, fei däjä bä quilii mlai ja, Yai Bada etä a yai wäyäo waiteliaö lä culajei.

15Awei, Cristo etä a lä wäyäo wejei bä lija, ai täbä dobloimi coyocowä dicowä. “¿Camiyā yamacö lija bä yömöca daa fa yaiicunö!”, bä bufi cuu fa dicoonö, wale nofi wälibou waiquiomaje, öjö bänö. Fei däjä cama bä a nia jilio fa ayaonö, etä a jole wäyäblalaö bädaoje. Öjö ma cui, ai bä mö feduwä lä cui, bä bufi bejedimolanö täbä li yömölaöje.

16Öjö bä bufi lä cadidou wei bä lä cuinö wale nofimaöje yalo, ya tä a lä wäyäo wei tä a ja, wale a bayelibouje. Bä moyawe malä waiquii. Eja Jesucristo ya etä a dodijidawä nofi bäyäbobä, Yai Bada tänö wale malä lämabou wei.

17Ai bä mö feduwä lä cui bä bufi cadidiwämi. Cama bä a nia shilo jiliamou ayao fa dicoonö, Jesucristo etä a jole wäyäblalaö buoje. Ya cafe lä quefule jamö wale bufi nia li fa jalujamajenö, täbä a li bädawä.

18Öjö ma cui, öjö bä a ja ya bufi jalujoimi. Jesucristo a wäfa malä wäyämou wei. ¿Inaja dodijiwä yai! Ai bä bufi cadidia mlalanö tä a wäyäo ma cujei, ai bä mö feduwä lä cuinö, bufi cadidilanö tä a yai wäyäöje. A wäfa wäyämou yalo ya bufi doblao fe yadio.

19¿Ya bufi doblalobä lä! Abenaja ya bufi malä cuu wei. “Ya nö lä bleaale, cafä wamacönö wamale bayelimaö malä cui. Yai Bada lija wamacö a fa fanö, Jesucristo a Bufinö wale fa bayelibonö, ya bayelio fe yadio weicätä”, ya bufi cuu talei.

20Inaja ya bufi lofote çai fa cuonö, ya mölaö showawä. Ya bufi nö wälojolanö, ya quilii mlai ja, ya doblao fe yadiobä. Wale shäo ma cadidio wejei ma cui, ya demi ma showai ma cui, inaja ya bufi lofote cuo showaobä ya mölaö showaa lä cule. Ya lä dodijaö wei tänö, ai bä lija Jesucristo ya dodijadawä dablamabä.

21Ya demöo showao däjä, Jesucristo ya dodijidawä dablamabä ya e waiquiwä malä cui. Ya shämou bädao ja, ¿awei, inaja lä yai! Wawäadowä ya dabladayobä.

22¿Wedi jamö tä lä cui ya tä yai yaiabä da tawä? Äyämö ya demi cuo bufi çai doblao, Yai Bada lija ya ojodamou nö wälojaö showaobä.

23Ya tä yaiabä ya tä daimi. Eja ya fa nomalönö, ¿Cristo lija ya yai cuodayobä daanö? Öjö tä shilo yai dodijidawä.

24Öjö ma cui, cafä wamacö bayeliobä, eja ya demi cuo showaobä ya çai malä cui.

²⁵Inaja tä cuwä yalo, ya demi nia cuo fe lä yadio wei tä ja, ya bufi shïlo cadidio. Jesucristo wama a nofi mölabou balabä, bamacö nia çai bluca cuo showao. Wama a nofi mölabou fa balalönö, wamacö bufi doblalobä.

²⁶Bamacö fe walou fa çonö, camiyä ya demi cua lä showale tä ja, Jesucristo lija wamacö bufi doblalou fe balojoobä. Inaja lä tä cuobä.

²⁷Bei tawä. Cristo dodijidawä etä anö wamacö taamaö lä bufii weinaja bä da cuaa. Wamacö cadidoimi fa dicoonö, jai tä a nowa cuami bä bufi tamaö dicoo dijeje. Bamacö möyou çobä tä ma cui, bamacö möyou ma mlai ma cui, moli tä ja wamacö bufi bluca lä cadidio wei bamacö wano jiliabä. Wamacö fa bayeliblayonö, wamacö nö bluca lä walojaö wei ya tä a yai jiliabä. Jesucristo etä a dodijidawä bufiblamou fe yadiobä.

²⁸Cafä wamacö lä yabäcaö wejei bä lija wamacö quilli mlai ja, bä nö walojaö fe da yadio. Wamacö quilibloimi dajä, cama täbä nia lä waiyou wei tä ja, bä bufi nia möblou. Cafä wamacö nia fucäamou lä ayao wei tä ja, bä bufi nia çai möblou. Wamacö bufi nö lä walojaö wei, Yai Bada tä nö li mayo malä cui.

²⁹Jesucristo wama a nofi mölabobä, Yai Bada tänö wamacö malä tablamaleno wei. Wama a bejedi bufibou bädaobä mlai, Cristo a nowa ja wamacö nö çai bleaaö mö feduobä wamacö tablamalema malä cui.

³⁰¡Bämalecö nö bleaamaöje lä! Wale da yabäcablejei wama tä daö. Wale yabäcaö lä showalajei, wama tä a çai jiliaö.

Filipenses 2

¹¿Öjö tawä? Jesucristonö bämalecö bufi lofotomabou, bämalecö çai nofimaö. Öjö bama a Bufen malä tabou wei. Öjönö bämalecö bufi çai malä bayelibou wei. Bämalecö nofi çai malä ojodabou wei. Inaja bämalecö taamaö ja lä,

²moli tä ja, bä bufi bluca da shalilo. Bä bluca da nofimayo. Moli tä a ja bä bufi mö da blucaicu. Moli tä a ja, wamacö bufi bluca fa shalilonö, dodijidawä bä da cuo. ¿Öjö tawä? Inaja wamacö cuaaö ja, ya bufi nia yai doblalou.

³Abenaja ya cuu. Jödödöwä wama tä taö lä bädao wei tä ma cui ja, cafä wamacö bädawä mlai, ai wama täbä nofi çai jaducäbobä. Cafä wamacö nofi dodijaö doobä mlai. Wamacö bufi jaducälanö, “¡Jai yä! ¡Cama bä nofi li dodijaö yai!”, ai wama bä nofi çai tabou mö feduobä.

⁴Cafä wamacö nia lä bayelio wei tä ja, bä shi dou ayao dijä, ai bä mö feduwä ma cui lija wamacö shi çai jalimou mö feduobä. Bä da bayeliblayo.

⁵Jesucristo a bufi lä cuono weinaja, a bufi da owäboje. Cama a lä dodijano weinaja wamacö cuaaö mö feduobä.

⁶Jesucristo a lä cui, “Yai Bada a waiquiwä”, a nofi tabobeje a ma cuono wei ma cui, öjö tä ja a bufi mö blucaonomi.

⁷Ma, cama etä fa dacöfälönö a itolayoma. Cama a yai nosiemobä a ma cuono wei ma cui, a nosiemamou ojodaoma. A yanowamöblaleyoluma.

⁸A fa yanowamöblalunö, a ojodaoma. A fa ojodaonö, a shämobä tä ma cui ja a ojodao fe yadioma. Fii ficö ma cui ja, täbä nofi yai jushuaö fe lä balojoowei täbä shäö lä cuaaö wejeinaja, a çai tablamou ojodao fe yadioma.

⁹Inaja a ojode cuoma yalo, Yai Bada tänö Bada tä yai tablamalema. Ai täbä afa bada ma wäyamou wei ma cui, öjö a wafa shilo yai Bada jilamou dodijjobä, a Bada tablamalema.

¹⁰¿Öjö tawä? Bluca bä lä bälöjoi bänö Jesús a nö Bada öjöböabeje, Bada bei a yai tablamalema. Fedu jamö bä bluca lä culadi bä ma cui, bita jamö bä bluca lä cublai bä ma cui, mashita a çojomö jamö bä bluca lä cublai bä ma cui, Jesús lija bä möfe bluca quilili boobä, Bada a tablamalema.

¹¹Bluca bä lä cublai bänö Jesucristo a wafa Bada wäyabeje. Fayä Yai Bada tä doblao çai dablambä. ¡Inaja lä tä yai cuobä!

¹²¿Öjö tawä? Iba bamacö lä nofimaö wei wamacö. Showadi wamacö a lä fuo weinaja, bä a fuo cuaaö da showao. Jesucristo a wafu si malä ijejeono wei. Yai Bada wama a nö quili talanö, wama ecö dodijidawä cuobä. Öjö wamacö bluca lä fucämou wei, dodijidawä wamacö cuobä wamacö malä cui. Cafä wamacö lija ya lä cuo wei däjä bädawä mlai, mija ya cua lä mlai däjä, öjö däjä dodijidawä wamacö a yai fuobä.

¹³Yai Bada wama a bufi doblalamabä, cama a showawänö wamacö bufi shi malä jalijamaö wei. Tä taamaö lä bufii wei tä ja, wamacö nö çai malä walojamaö wei.

¹⁴Wama tä bluca lä taö wei tä ja, dodijidawä bä da cuo. Wamacö bufi jushujuablalou mlai, wamacö a lafujou mlai, wamacö dodijabä.

¹⁵Wamacö afa wayoamou mlaobä. Wolidiwä tä lä cui tä ja, jai mojadi wamacö cuobä. Yai Bada wama ecö ijilubö dodijidawä cuobä. ¿Öjö tawä? Täbä dobloimi lä waiquii bä lijamö wamacö ma coyocoo wei ma cui, dodijidawä bä cua fe da yadiicu. Shominaja bä cuaaö nö lä quiliaö wei bä lä cui lijamö wamacö ma coyocoo wei ma cui, bä da dodija. Jai tä mö didi sublaobä jamö tä shii wacacadou lä culenaja, wamacö cuobä.

¹⁶Täbä lä balimiblamaö wei wama tä a lofotobolanö, wama tä a wäyää cuaabä. Jesucristo a itou çoyoluu däjä, wamacö nö lä walojano wei tä ja ya bufi doblalobä. Ya shi jalimobä. “¡Ei malä cui! ¡Ya nö bleaano malä mlai!”, ya cubä.

¹⁷Wale ma shäöje däjä ma cui, bamacö bufi bluca doblao fe yadiobä tä cua. Jesucristo wama a nofi mölabou yalo, wama a wafu malä fuaaö wei. Yai Bada lija yalo bä lä dodobou wejeinaja, cafä wamacö ma cui wamacö dodoa cua malä waiquile. Inaja wamacö cuaaö bufi doblao ja, camiyä ya bufi çai doblao mö feduo. Jai bei toubä liyayamou feyacao lä culenaja, camiyä bei ya iyäbö liyayamou ma cublou däjä ma cui ja, ya bufi nia doblalou fe yadio.

- 18** Cafä wamacö lija ya bufi doblao lä culenaja, inaja showawä, wamacö wajäaö mlai ja, camiyä lija wamacö bufi çai doblao cuo mö feduobä.
- 19** Bei. Cafä wamacö lija Timoteo ya nia shimaö fa jaödaonö, Bada tä Jesús lija ya mölablalous showaa lä cule. Ya fa shimölönö, cafä wamacö dodijaö fa dalalönö, wamacö afa dodijaö wäyää çojolou ja, ya bufi lofotoblou çobä.
- 20** Öjö ya nia shimaö lä cadidio wei a. A bufi bejedilanö wamacö malä nofimaö wei. Öjö Timoteo a nofi lä culenaja, ai a cuami.
- 21** Ai bä lä cui, cama bä befi shïlo tamou. Jesucristonö tä tamaö lä bufii wei tä ma cule, cama bä cuaaö bufi lä doblao wei tä ja, bä yabäcäo.
- 22** Öjö ma cui, Timoteo wama a dodijaö daö malä waiquii. Cama sho Jesucristo yafä etä a dodijidawä wäyää cuaabä, wale lä bayelibläö wei a dodijiwä. Bä ijilubö enö bä föö e dodijidawä bayelibläö lä culenaja wale taamaö talei.
- 23** Öjö tawä? Öjö ya shimaö bufi doblaa ma cule, camiyä lija tä nia lä cublou wei ya tä nö dabou balöo, wamacö yömöläö cadidiobä.
- 24** Camiyä ya ma cui, cafä wamacö lija ya çai fuu jaödaobä, Bada tä lija ya möläö showaa lä cule.
- 25** Aiyä Ebaflodi a lä cui ya shimaö bufi çai doblao. Cafä wamacö lijamö ya shimaö çobä, ya bufi dodijidadalio lä cufe, wale bayelibobä cafäteli wama a lä shimöleno wei a lä cui. Jesucristo yafä tä a wäyäbä yafäcö lä ojodamou wei a mö feduwä lä cui. Täbä wayu fubä jamö täbä nö wälojoablalou fe lä yadio weinaja, yafäcö lä cuaaö wei a.
- 26** Wamacö bufijaö ja, ya nia shimaö ço. Cama wama afa jalili jililema yalo a bufi nö bleaaö. Wamacö bufi jalujou nofi fölijibou.
- 27** Bejedi lä! A jalilia fa dodijilalunö, a mili nomaa dodijilayoma. Öjö ma cui Yai Bada tänö a nofi fa ojodadalönö, camiyä wale nofi çai fa ojodadalönö, a jaloa çomalema. Ya bufi fölijiblou fe balojoo dicoo mlaobä a bayeliblalema.
- 28** Öjö cudeenö, cafä wamacö lijamö ya shimaö shi jalimou ço lä cule, wama a demi daa fa çolalönö, wamacö bufi doblalou çobä. Cafä wamacö lija a cuo ço däjä, camiyä ya ma cui ya bufi jalujou fe yadio mlaobä.
- 29** Öjö tawä? Wamacö bufi doblalolanö a waloa da çomacöje, öjö lä. Bada tä Jesucristo bäma ecö lä cui, showadi bäma ecö lä taamayou weinaja showawä. Einaja täbä ojodamou lä cuaaö wei, “Ei bä nofi dodijaö dodijiwä yai!”, bä nofi shïlo da taboje.
- 30** Cristo lija a ojodamoma yalo a mili malä nomalayono wei. Cafä ai wamacönö wamale bayelibläö doblou lä mlaono wei däjä, wale bayelibou fe yadiobä, cama a noshi malä öjödaono wei. A nomaö nofi fölio mlai ja, a ojodamolayoma. Öjö tawä? Dodijidawä wama a waloamaö çobä, öjö lä.

Filipenses 3

¹Abenaja çai. Bada wama ecö yalo bä bufi da doblalo, iba wamacö. Ya tä ʘ jaba wäyää da balöblei, öjö ya tä ʘ wäyää çö lä cule. Bamacö bufi nia fa jaducämabonö, ya wə modabloimi. Wamacö yaclämaö bufi lä doblao wejei bä lija wamacö nowamöobä, ya wə çödawä.

²Abenaja ya cuu lä cule. Bä da moyaweicu. Jai jïima bä wəli waiteli läläo lä culenaja bä cuwänö, wamacö nofi lämaöje. Bä wayu. Bä çai dobloimi waiquiwä. Wamacö niniamäö bufi doblao bädaoje.

³¿Öjö tawä? Bä mosi sicö joyamou yalo Yai Bada ebä ʘfa ma jilou wei ma cui, ;ma! Camiyä bejedi bäma ecö li yaiwä. Jesucristo bäma a nofi mölabou yalo, jai bamacö mosi sicö joyamoa waiquilayoma bämalecö nofi tabou malä waiquiladi. Yai Bada tä Bufinö bämalecö fa bayelibonö, cama bäma a yai bufiblabä bamacö. Camiyä bamacö nofi mölamobobä bamacömi. Jesucristo bäma a nofi yai dobobä bamacö.

⁴Camiyä yanowamö bamacö nofi mölamobobä tä cuami waiquiwä. Tä cuo fa cunoja, camiyä ya nofi nö çai mölamobou mö feduobö wei. ¿Öjö tawä? “Ya mölabä lä”, ai täbä jole lä cuu weinaja, camiyä ya nö yai cuu fe balojoobö wei. Abenaja tä malä cule.

⁵Ya oshe fa wawälönö, 8 ya tä mö didi fa tablamalönö, wale mosi sicö joyalemaje, Moisesinö täbä taamaö lä bufino weinaja showawä. Isaeli nodiwä ya e. Bejamino bä ijilubö ebä nodiwä lija ya cublou nodilayoma. ¿Öjö tawä? Nayä a ma cui, fayä a ma cui, Isaeli yama ecö lä nodiblou wei, ebleo yamacö bluca. Moisesi ya etä ʘ nofi cadidibou bufi fa doblaonö, faliseo bä lija ya çöcablaliyoma.

⁶Moisesi ya etä ʘno joyaö nofi fa jalubonö, Jesucristo ebä lä yododaö wei ya ebä nö bleaamaö fe balojooma. Moisesi ya wəno cadidibou fa dodijionö, yanowamö täbä lija ya wəfa tamobä tä cuo fa mlacunö, ya nofi jole doo balöoma.

⁷Ya jaba lä mölano wei, “Öjö tänö ya bayeliobä tä dao”, ya bufi ma cuno wei ma cui, öjö tä ja, fei däjä ya mölaimi. Cristo ya yai tabobä, ya bufi jaba lä cuno wei tä lä cui, ya tä joyalema.

⁸Öjö lä, jödödöwä ya tä nofi jaba lä tabono wei ya tä bluca joyalema. Bada ya tä Jesucristo yai nofiaö fe balojoobä, “Tä nowa cuami waiquiwä”, ya täbä nofi bluca tabou majöa. Jesucristo ya yai tabobä, ai ya tä bluca waia waiquilema. Jai shii bä jilaa tejemi ya tä nofi tabou nomöjja lä cule. Jesucristo lija ya fa yädäicunö, ya yai bayelio dodijiobä.

⁹Jesucristo ya e cuo cadidiobä ya tä nofi cadidibou lä cule. Moisesi ya wəno lä fuano wei tänö ya dodijidablono malä mlai. Ma, Cristo ya nofi mölabou yalo, Yai Bada tänö wale li dodijidablamalema. Jesucristo lija täbä möläö ja, dodijidawä täbä nofi tabou malä showadao wei.

¹⁰Jesucristo ya daö wawädoobä, öjö ya tä bluca joyaö ojodaoma. A demi lä jocädamaleno wei etä lofote showawänö, showadi wale bayelibobä. Jesucristo ya wə lä fuaö wei tä nowa ja, wale nö ma bleaamaö wejei ma cui, Yai Bada lija ya noshi

öjüdao fe yadiobä. Yai Bada a wä fuama yalo, Jesucristo a nö bleaaö ojüdao malä balöono wei. Ya nomabä tä ma cublou däjä ma cui, ya noshi öjüdao fe yadiobä. Cama a nomaö malä ojüdaono wei.

11Ya ma nomaö wei ma cui, wale demi jocädamaö çobä ya malä möläö wei.

12Abenaja ya cuimi. “Ya doblou waiquiwä. Jesucristo a dodijaö lä culenaja ya cuwä waiquiwä”, ya cuimi. Ya dobloimi malä showai. Öjö ma cui, Jesucristo a lä culenaja ya cuo fe yadiobä, ya nabä cadidou showao. Cama a lä culenaja ya e cuobä, wale malä yaileno wei.

13Ma, iba wamacö. “Jesucristo a dodijaö lä culenaja ya cuwä”, ya nofi tamobou ma mlai ma cui, abenaja ya cuaaö. Ya jaba lä cuaano wei tä ja, ya mölaimi. Ya tä nofi lä macocobole tä ja ya nö wälojabä, ya yai cadidou.

14Jesucristo a lä culenaja ya cuobä, ya bufi macocoa dodijia lä cule. Öjö lija ya yädäquema yalo, Yai Bada tänö wale nia malä çaoö wei. Öjö lä ya nofi macocobou yalo, ya demöo showao däjä ya bufi nö wälojoobä.

15Yai Bada lija bämacö bufi moyawe lä waiquii bämacö lä cui, ya lä cufe tä ä ja bämacö bufi bluca shaliliobä. “Inaja lä waiquiwä”, ai wamacö bufi cuimi bädao ja, Yai Bada tänö tä wawämaö weicätä.

16Öjö ma cui, Yai Bada tänö tä wawämaö lä waiquile tä ja, öjö tä ja bämacö bluca cadidou da showao.

17Iba wamacö, abenaja ya cuu. Bluca wamacö showawänö wamale da owälä. Camiyä yamacö lä cuaaö weinaja, ai täbä cuaaö mö lä fedui wama bä çai dodijaö fa mönö, öjö bä çai shïlo da owämaje.

18Bä lä jolemou wei bä malä bluca wei. Yai Bada ebä äfa ma jilou wei ma cui, bä lä cuaaö wei tänö bä jolemou dablamou. Yai Bada bäma ecö dodijabä tä ma cuo däjä, bä ä läo. Bämacö dodijabä, fii balitama tefi ja Jesucristo a malä shämolayono wei. Öjö ma cui, cama dodijidawä bä cuo bufi fa mlacunö, bä nö nabä. Öjö ya bä äfa bluca wäyäo waiquiwä. Ei ya wä lä cui däjä ma cui, ya mabu ubä falanö ya bä äfa wäyäo çao lä cule.

19Yai Bada tänö bä nia waiyamaö. Tä tamaö lä bufii wei tä ja bä cadidou mlai, cama bä cuaaö bufi lä doblao wei tä ja, bä bufi shïlo macocoo dicoo. Bä lä cuaaö wei tä ja, “Shädayai”, bä bufi cubä tä ma cule, bä nofi dodijaö doo. Showadi täbä yanowamö bufi lä cuaaö weinaja, bä bufi çai cuaaö dicoo.

20Öjö ma cui, camiyä bämacö lä cui, feduteli bämacö li waiquiwä. Fedu fedole jamö bämacö cuodayobä bämacö li. Öjamö culanö bämalecö fucäabä, bäma a nö dabou waiquia malä cule, Bada tä Jesucristo lä cui.

21Cama a lofotenö, bei bämacö sicö lä ujüdi wei bämacö sicö fa shomiblamlanö, cama sicö dodijidawä lä culenaja, bämacö sicö nia tablamodayou. Cama Jesucristo a lofotenö tä bluca tamobä a malä cui.

Filipenses 4

¹Iba bämacö lä nofimaö wei wamacö. Bämacö bufibou. Ya bufi doblalobä cafä bei wamacö. Yai Bada lija wamacö lä dodijaö wei tänö, jai ya nowa çamamou ya tä nofi tabou waiquiwä. Bämacö lä nofimaö wei wamacö. Ei ya tä ʘ bluca lä onicöfe wama tä ʘ fa cadidibonö, Bada a nofi mölabou fe da yadioje.

²Miji suwä cäcöbä ʘfa lä tayou wei cäcöbä lija ya wʘ faö. Ebodia a lä cui, Sidique a çai lä cui, moli tä ja cäcöbä bufi shaliliobä, ya wʘ fe blacäjou. Bada tä Jesucristo ecöbä malä cui.

³Cafä lija ya wʘ çai faö lä cule, cafä sho dodijidawä bäfäcö shïlo lä ojodamou wei wa lä cui lija. Ei ya cöbä ʘfa suwä lä jayumafe cäcöbä nofimayou çobä, wa cöbä cadidamabä, öjö lä. Dodijidawä wale mada bayeliblaböblei. Jesucristo yama etä ʘ dodijidawä wäyäö fe yadiobä, cäcöbä nö mada wʘlojablei. Clemede sho, iba ai bä çai bluca lä yädäono wei bä sho, bäma tä ʘ wäyäö fe lä yadiono wei däjä, cäcöbä nö suwä mada wʘlojablei. Täbä nia lä ʘlimiodayou wei täbä ʘfa lä onibole sibä ja, Bada tänö täbä ʘfa bluca malä oniboladi.

⁴Bada tä Jesucristo wama ecö yalo, bä bufi shïlo da doblaicu. ¿Öjö tawä? ;Bä bufi da doblalo!

⁵Dodijidawä bä çai da cuoje. Showadi wamacö ʘ lä oquedio wei tä dablamobä. Bada a fuu malä ajedei.

⁶Bä bufi jalujou dodijio dijä. Tä bluca cublou lä bädao wei tä ma cui ja, wamacö bufi jalujou mlai, Yai Bada a shïlo yai da wʘlije. Bä nacou nosi da blacäco. Cama lija wamacö bufi ʘfa doblalou fa wäyämonö, bä nö shïlo bayeli da nacao.

⁷Inaja wamacö cuaaö ja, Yai Bada tänö wamacö bufi wasöbou fe yadiquei. Jesucristo wama a nofi mölabou yalo, wamacö bayeliblaö cuquei. Wamacö bufi dodijidablou çobä tä nö cuobö ma mlai, wamacö bufi yanöcömabou fe balojoquei.

⁸Abenaja çowä, iba wamacö. Dodijidawä wamacö cuobä, abenaja wamacö bufi shïlo yai daeo cuaabä. Tä lä bejedi wei tä ja, täbä yai lä dodijidamabou wei tä ja, wamacö bufi yai daeobä, tä lä dodijidai tä çai ja. Tä ʘ shomitawä coyocowä ja, öjö tä ja wamacö bufi daeo mlai. Täbä bufi lä doblalamaö wei tä ja, wamacö bufi yai daeobä. “;Inaja dodijiwä!”, täbä bufi taamabä tä cua ja, öjö tä ja, wamacö bufi shïlo yai daeobä. Tä nofi doamamobä tä cua ja, öjö tä ja wamacö bufi çai daeobä. ¿Öjö tawä?

⁹Wamale da owälä. Showadi ya lä cuaaö wei tä ja, wamacö moyawe waiquiwä. Ya täbä damaö lä cuaaö wei, wama tä daö. Wama tä ʘ däabä, cafä wamacö lija ya tä ʘ da wäyäblei däjä wamale ʘ jililema. Wamale çai möma. Wamale fa owälänö, Yai Badanö wamacö bayelibou cuquei, täbä bufi shïlo lä yanöcömabou wei a lä cuinö.

¹⁰Yaçumö wamale bayeliblaö çoa yalo, Bada tä lija ya bufi doblalou. ;Ya bufi doblalou fe balojoo! Wamale dobäö bufi doblao ma showaono wei ma cui, wama tä shimabä tä cuonomi.

11“‘A bufi jalujublalou yalo a wə daanö”, wamale nofi tabou dicoa lä mlale. Ya ma föli wei ma cui, ya çai föli ma mlai ma cui, öjö ma cui ya bufi doblao fe yadiobä ya malä dalaliyono wei.

12Ya ma föli wei ma cui, dodijidawä ya ma bälöö wei ma cui, ya bufi doblao fe yadio. Tä cublou lä bädao wei tä bluca ma cui ja, dodijidawä ya cuo fe yadio. Nii ya bä ma tabou wei ma cui, ya ma ofäö wei ma cui, ya nö ma madofiböö wei ma cui, ya ma föli wei ma cui, dodijidawä ya cuo fe yadiobä, Yai Bada tänö wale bufi daamaö.

13Tä cublou lä bädao wei tä ma cui ja, Jesucristonö wale nö wəlojomabou yalo, ya doblou fe yadio.

14Öjö ma cui, ya dodijaö ma waiquio däjä ma cui, wamale lä bayeliblano wei tä ja, wamale bufi doblalamaö dodijioma.

15Showadi inaja wamacö mada cuaablei. Cafä Filiboteli wamacönö, öjö wama tä daö malä waiquile. Mijamö Masedonia ulufi jamö bamacö jaba da yömölablei däjä, bamacö ulufibö daa fa nomöjocöfälönö, ai täbänö wale bayeliblanomije. Ai ya täbä yömöläö cuaaö majöobä, wale dobänomije. Öjö däjä cafä wamacönö wamale nö shilo bayeli shimama.

16Öjamö lä showawä, Desalonicateli bä lija ya lä cuono wei däjä ma cui, wamale nö bayeli shimaö mada bolacaablei.

17¿Öjö tawä? Camiyä ya bayeliobä ya wami. Cafä wamacö li bayeliobä ya wə. Camiyä wamale bayelibläö tä nowa ja, Yai Bada tänö wamacö bayelibläö mö lä feduo wei, öjö ya tä nofi cadidibou lä cule. ¿Öjö tawä?

18Wamale bayeliblabä, aifä Ebaflodi lija wama bä lä shimöbeno wei ya bä dälema. Ai wama bä yädäamaö çoma yalo, wamale ʘ fejelaamaö dodijioma. Fei däjä ya fölia mlaa lä cule. Fei däjä dodijidawä ya cuobä, ya tä bluca tabou. Abenaja çai. Wamale nö bayeli lä shimaö wei, öjö tänö Yai Bada wama a bufi çai doblalamaö. Jai Yai Bada cama a dobämou bei tä cuwä. Jai Yai Bada lija, toubä ni clëdeli liyäyaö lä cuaaö wejeinaja, inaja showawä tä nofi tabou lä culadi.

19Abenaja çai. Yai Bada ya lä bufibläö wei a lä cuinö, cafä wamacö çai nia bayelibläö mö feduo, wamacö nö bleaaö mlaobä. Jesucristo lija wamacö yädäa yalo, wamacö nia dobäö fe balojoo.

20Öjö Yai Bada bäma a lä bufibläö wei, bamacö lä Föömole, öjö tä nofi doablamou shi wəlibä. Inaja lä tä cuobä.

21Mija Yai Bada ebä bluca lä cule, Jesucristo a nofi lä mölabou wejei bä lija wamale ʘfa da wäyä. Camiyänö Jesucristo ya ebä çai lä cule, bä ʘfa çai wäyämamou bufio lä cule.

22Eja Yai Bada ebä bluca lä cule, cafä wamacö lija bä ʘfa wäyämamou bufi ma doblao wei ma cui, Lomateli bada a lä cui e yafi jamö bä lä cule, öjö bä ʘfa shilo yai wäyämamou bufi doblaa dodijia lä cule. ¿Öjö tawä?

²³Bei. Bada tä Jesucristo lija, showadi wamacö bifi bayeliblamobä. Wamacö nofi shïlo ojodabobä. Inaja lä tä cuobä.

Colosenses

Colosenses 1

- ¹Jesucristonö wale lä shimöleno wei, ei camiyä Pablo cä ya, Yai Bada tänö wale çai shimaö fa bufinö. Bamacö ai Timoteo sho yafäcö cua lä cule.
- ²Colosa jamö Yai Bada wama ecö bluca lä bälöle wamacö lija ya tä a oni shimaö, Cristo lija wamacö lä cadidou wei wama ecö lä cui lija. Bei. Fayä Yai Bada a lä cuinö, showadi wamacö shïlo bayeliblabä. Wamacö bufi shïlo yanöcömabobä. Wamacö nofi çai shïlo ojadobobä.
- ³Cafä bamacö bayelimaö ja, Yai Bada lija yamacö bufi afa doblalou wäyämou talei, Bada tä Jesucristo bä Föö e lä cui lija.
- ⁴Jesucristo wama a nofi jowa lä mölabole, bamacö afa malä jilibou wei. Yai Bada cama wama ebä bluca çai jowa nofimaö. ¿Öjö tawä?
- ⁵Yai Bada tänö wamacö nia lä dobädayou wei tä ja wamacö möläö yalo, inaja wamacö jowa li cuaaö. Öjö wama tä a bejedi jilia waiquilema, Jesucristo wama tä a dodijidawä lä jilileno wei däjä.
- ⁶Cafä wamacö lija tä a çai malä waloqueno wejei. Jödödöwä täbä lä bälöblai täbä ma cuinö tä a jiliaö balaö lä cudujei. Tä a jiliaöje yalo, bluca bä lä cublai Jesucristo ebä cublou lä cudi. Cafä wamacö ma cuinö, Yai Bada tänö täbä nofi lä ojadabou wei wama tä a jaba fa jililänö, öjö tä a bejedi ja, wamacö bufi jaba fa jaducäblalunö, inaja showawä cafä wamacö çai jowa dodijaö balaö lä cuimadi.
- ⁷Jesucristo tä a ja, Ebafla lija wamacö damamoma. ¿Öjö tawä? Öjö a lä cui yama a nofimaö dodijio. Jesucristo lija camiyä yamacö ojodamou lä cuaaö weinaja, cama a ma cui a çai ojodamou cuaaö mö feduo. Cristo a wafa wäyää cadidou dodijio talei. Cafä wamacö lija, öjö yama a fa shimölönö,
- ⁸wamacö afa wäa çobejeloma. ¿Öjö tawä? Yai Bada tä Bufinö wamacö jowa yai nofiblamaö majöa lä cule.
- ⁹Öjö cudeenö, cafä bamacö wano jaba lä jilileno wei däjä, bamacö bayelimaö showaoma. Inaja showawä bamacö bayelimaö cuwä showawä. Yai Bada tänö wamacö bufi jaducämabobä yamacö a faö, wamacö taamaö lä bufio wei wama tä daö jödödöblobä. Bui dao wamacö yai cuobä.
- ¹⁰Dodijidawä wamacö cuobä ya wä faö. Bada tä Jesucristo bäma ecö lä cui, dodijidawä bamacö cuobä bäma ecö waiquiwä malä cui, Jesucristo bäma a bufi yai doblamabobä. Wamacö lä bayeliblayou wei tä lä cui, öjö wama tä shïlo yai balamabä yamacö a çai faö. Yai Bada tä lä cui, wama tä çai daö cadidiobä.
- ¹¹Cama tä lofotenö wamacö nö yai walojomabobä. Öjö tä lä doblale a shïlo yai lofote cua. Wamacö nö yai lä walojomabou wei däjä, wamacö bufi shïlo yai doblao fe yadiobä. Wamacö bufi çai shïlo yanöcöwä cuo fe yadiobä.

- 12**Inaja wamacö cuaalanö, bamacö lä Föömole tä lija wamacö bufi ʄafa sh̄ilo doblalou wäyämobä. Cama ebä befi lä taboladi täbä ja bamacö dobämou mö feduodayobä, bämalecö malä tablamaleno wei, tä sh̄i lä wacalamiladi jamö.
- 13**Didi tä jamö tä bada lä läle tänö bämalecö tabou ma balöono wei ma cui, Yai Bada tänö bämalecö fujeblamaö majölayoma. Bä Ijilubö e yai lä nofimaö wei a Bada lä läle jamö, bämalecö yai taa majömaquema.
- 14**Öjö lija bamacö nowa çomolayoma. Bamacö doblou lä mlai, tä nowa bluca mladamalema.
- 15**Bei bamacö mamocu yainö Yai Bada bäma a dabraö ma mlai ma cui, cama a lä owäbole a damalalema, bä Ijilubö e lä cui. Yai Bada tänö täbä jödödöwä lä tablaleno wei täbä ja, bä Ijilubö e Bada läa.
- 16**Fedu jamö ma cui, bita jamö ma cui, täbä wawädowä lä dablamous wei täbä ma cui, täbä dablamous lä mlai täbä ma cui, öjö lä täbä lä cui, bä Ijilubö e lija, Yai Bada tänö täbä bluca tablamalema. Ajele bä lä culadi bä ma cui, ai yai täbä bada lä lofote wei täbä ma cui, yanowamö täbä bada lä läblai täbä ma cui, öjö täbä çai tablaö mö fedua showadalayoma. Cama etäbä cuobä, cama lija täbä bluca tablamalema.
- 17**Öjö täbä lä cui täbä cua showaa mlai ja, Yai Bada bä Ijilubö e cuo balöo showaoma. Cama a showawänö täbä bluca fuwäbou showaa lä cule.
- 18**¿Öjö tawä? Cama ebä lija, öjö lä a Bada läo. Öjö lä ebä bluca lä cui, cama bei lä fe waiquiwä, cama ebä dodijidawä cuobä. Ai bä demi jocädou balöa mlai ja, cama a sh̄ilo demi jocädamaö balölayoma, balimi a cudio shi wälibä. ¿Öjö tawä? Jödödöwä täbä lä cublai täbä ja a Bada läobä, inaja a li tablamalema.
- 19**Bä Ijilubö e lija, cama Yai Bada tä owämobou bufi malä doblaono wei.
- 20**Bä Ijilubö e showawä lija tä bluca cadejeblamaö bufi çai doblaono çoma, cama Yai Bada lija täbä nofio çobä. Bita jamö täbä bluca lä cule täbä ma cui, fedu jamö täbä bluca lä culadi täbä ma cui, Yai Bada lija täbä bluca dodijidawä çai cuo çobä. Fii balitama tefi jamö, Cristo a iyä nö lä bleono wei tä nowa ja, Yai Bada tänö bufi yanöcöwä bämalecö çai cua.
- 21**Cafä wamacö lä cui, Yai Bada tänö wamacö ajedebou balöonomi. Wäliidiwä showadi wama tä sh̄ilo tama cudeenö, wamacö bufi nö nabämoma.
- 22**Öjö ma cui, wamacö ajedeamaö çobä, bä Ijilubö e fa yanowamöblamalönö, a shämalema. ¿Öjö tawä? Dodijidawä cama wama ecö yaiobä, a shämoa lälayoma. Wamacö ʄafa tamobä tä cua mlai ja, cama a lä cule jamö dodijidawä wamacö ublamabobä.
- 23**Bufi lofotolanö, wama a wä nofi mölabou showao däjä, inaja wamacö nia yai taamaö, wamacö bufi cadidou showao däjä. ¿Öjö tawä? Wama tä ʄ dodijidawä lä jilileno wei tä ʄ nofi da cadidileje, öjö lä. Jödödöwä täbä lä bälöblai täbä ma cui lija tä ʄ wäyämamou waiquia lä cudi. Öjö ya tä ʄ wäyäo cuaaö mö feduobä, camiyä Pablo ya ma cui ya e cublaliyoma.

²⁴Cafä bamacö lä bayeliblaö wei tä nowa ja, wale nö bleaamaö ma culajei, bufi doblalolanö ya nö li fei däjä bleaaö lä cule. Inaja showawä, cama ebä bayeliblabä, Cristo a ma cui a nö bleaaö malä balöono wei. ¿Öjö tawä? Cama ebä lä cui, öjö cama bei a. Camiyä ma cui, cama ya ebä bayeliblabä ya nö çai bleaaö mö feduobä tä cua ja, ya nö bleaaö cuquei lä.

²⁵Cafä judio wamacö lä mlai wamacö bayeliblamou mö feduobä, Yai Bada tänö camiyä wale lämaquema. Cafä wamacö lija, Yai Bada jödödöwä ya etä a wawäblamabä, öjö ya e.

²⁶Täbä jaba lä bälöono wei täbä lija, Yai Bada tänö tä a ma jöyabono wei ma cui, fei däjä cama ebä lija tä a yai wawäblamalema.

²⁷Öjö tä a jaba lä jöyaono wei tä a lä cui, cama bluca ebä lija tä a yacumö wawäblamaö bufi doblaoma, judio bä lä mlai bä nia lä bayeliblamono wei tä a dodijidawä lä cui. Öjö tä a lofote dodijiwä. Judio wamacö lä mlai wamacö lija, Cristo a Bui nia lä bälöo wei, öjö tä a li waiquiwä. Cristo wama a Bui tabou waiquia yalo, wamacö nia lä doblaodayou wei tä ja wamacö möläö.

²⁸Wawädowä, öjö yama a wafa shilo yai wäyää. Yamacö a moyawälänö yama bä bluca wasöbou, yama bä bluca çai yömölabou, Yai Bada lija bä nia lä icuo wei däjä, Cristo ebä bufi bluca jaducäwä çai icuobä.

²⁹Inaja ya bä nia fa taamanö, ya ojodamou. Cristo a lofotenö ya nö yai walojaö lä cule.

Colosenses 2

¹¿Öjö tawä? Jesucristo wama ecö bluca bayeliblamobä, ya nö walojaö cuaaö talei. Öjö lä wama tä dabä ya wä. Cafä wama ecö ma cui, Laodisea jamö ebä lä bälöle bä ma cui, wale daö lä mlajei ebä çai bluca ma cui, wamacö bluca bayeliblamobä.

²Wamacö bufi çai bluca lofote cuobä ya ojodamou. Wamacö lä nofimayou wei tänö, jai moli wamacö mashi cublobä. Bui jaducälänö, Jesucristo wama tä a nofi yai mölabobä. Yai Bada tänö tä a jaba lä jöyabono wei wama tä a fa dalalönö, öjö tänö Cristo wama a yai dablabbä. Öjö däjä wamacö bufi nia shilo yai doblalou.

³Cristo lijamö tä nowa yai lä bluca wei tä cua. Bui jaducäwä tä ma cui, bufi dao tä ma cui, öjö lija tä shilo yai dablammou ayao.

⁴Shomi bä a ja, wamacö mölamamou mlaobä ya wä. Bä a faö ma liyääablalou wei ma cui, bä möla dijä.

⁵Mijamö wamale möö ma mlai ma cui, bamacö bufibou showao. Wamacö bufi shedecoimi yalo ya bufi doblalou, Cristo wama a nofi çai lofote mölabou yalo.

⁶Jesucristo a wafa Bada lä wäyämou wei, öjö wama tä a bejedi bufibou waiquia. Wama a nofi Badabou waiquia ja lä, öjö a nosie shilo yai da fuaje, öjö lä.

⁷Fii fibä nasöcö fa dalonö, tefibä yai ublao lofotoo lä culenaja, tefibä yai ösöö lä culenaja, inaja showawä Cristo lija bä bufi çai lofote yai da cuo. Wamacö yömölamou däjä, Cristo a wafa lä wäyämöno wei tä a nofi shilo yai lofote da mölaboje. Yai Bada tänö wamacö bayeliblaö cudeenö, öjö lija bä bufi afa shilo doblao da wäyämö.

⁸Bä da moyaweicu. Yai Bada etä afa jole lä wäyöö wejei bänö wamacö mölamaö mlaobeje. Bä a bejedimi. Bä a çai nowa cuami. Yai Bada tä a mlai, öjö yanowamö tä a li. Fecula tä a. Öjö bä lä cuinö, Cristo etä a lä bejedi wei tä a wäyämije.

⁹Bä möla dijä. Cristo a ma yanowamöblaleyoluno wei ma cui, Yai Bada a cuwä lä dodijiinaja a cuwä mö feduwä showaoma.

¹⁰Cafä wamacö ma cui, öjö lija wamacö yädaa yalo, dodijidawä wamacö tamabou malä waiquile. Wamacö nö nia yai lä bleaaö wei tä cuami. Bada täbä bluca lä läblai täbä ma cui, täbä bada lä nosiemou wei täbä bluca ma cui, öjö täbä lija Cristo a yai Bada läa.

¹¹Cristo lija wamacö yädaa yalo, jai wamacö mosi sicö joyamolayoma wamacö cuwä waiquiwä. Bei wamacö mosi sicö joyamou mlai ja, bei wamacö bufi showadi lä läono wei, öjö lä wamacö bufi shilo yai joyamolayoma. ¿Öjö tawä? Yanowamö täbä lija wamacö mosi sicö joyamou mlai ja, Cristo lija bei wamacö bufi wälidiwä joyamolayoma.

¹²Wamacö fe lä ojomamono wei däjä, Cristonö wamacö çai nomawä lä didiodayono wei wama tä jimama. Wamacö bocäblou lä çono wei däjä, camanö wamacö çai demi lä jocädaliyono wei wama tä çai jimaö mö feduo showaoma. ¿Öjö tawä? Yai Bada tä lofotenö Cristo a demi lä jocädamaleno wei tä lä cui, öjö wama tä a bejedi bufilema yalo, inaja wamacö taamamou mö feduo showaoma.

¹³Cafä Colosateli wamacö lä cui, wamacö doblonomi. Judio wamacö cuonomi yalo, Yai Bada wama a danomi. Öjö cudeenö, jai nomawä wamacö jaba cuoma. Öjö ma cui, Cristo a demi jocädou lä çolayono wei jamö, cafä wamacö ma cui wamacö demi çai jocädamaö yädaa showalayoma. Bamacö doblou ma mlai, Yai Bada tänö öjamö lä tä nowa bluca mladamalema.

¹⁴¿Öjö tawä? Wälidiwä bäma tä lä tano wei, bämalecö afa oniboma. Bamacö nowa nia lä çamamono wei tä a çai. Bämalecö nö bleaamabä tä cuo waiquioma. Öjö däjä, Cristo a lä shämolayono wei tefi jamö, öjö tä a oni çai shadia fa yädamacönö, öjö lija tä nowa bluca mladamaö showadalayoma.

¹⁵Bämalecö lofotobou çadaaö mlaobeje, fecula bä çai bluca ujudua showamalema, cama ebä bada lä läle bä çai. Cristo a shämou lä läono wei tänö, wawadowä bä nö bluca blemalalema.

¹⁶¿Öjö tawä? Wamacö bayeliblamobä, öjö lä tä waiquiwä. Wamacö afa nö bleaaö ma taöje däjä ma cui, bä a jilia dijejä. Nii ai bä ja wamacö lä waio wei wamacö bayeliblobä, tä afa ma wäyöö wejei ma cui, bä jolemou. Judio täbä iyaö çai çocamobä jamö wamacö çai lä loo wei tänö çai mlai. Ai wama a nofi belibo lä jaducäbou wei

tänö çai mlai. Sábado dájä täbä lä yanöcöo wei, öjö wama tä nofi jalu çai ma jaducäbou wei ma cui, öjö tänö wamacö nia çai bayeliblamoimi. Bä a jilia dijejä.

¹⁷Moisesinö öjö tä a jaba ma wäyano wei ma cui, öjö tä a cuo balöblaobä tä a li cuoma, tä nia yai lä cuono wei bäma tä nö ɛle dablaba. Fei dájä Cristo a yai wawäblaliyoma yalo, tä a jaba lä läono wei tä a nia bufiblamou çomi.

¹⁸Bä da moyaweicu, Yai Bada lija wamacö nowa nia lä çamamodayou wei tä waliaö dicoo mlaobeje. Bä jolemou. Ajele bä bufiblamobä, tä nabä çai shimaö dicooje. Cama bä lija tä jowa wawadowä lä mömono wei tä nofi çai yaibouje. Cama bä bufi jole cuu lä bashio wei tä a ma cui, tä a wäyöje. Bä nofi yaimobobä tä cua ma mlai, bä nofi doo.

¹⁹Cristo lija öjö bä yädäami, bei bamacö fe lä cui lija. ¿Öjö tawä? Bei bamacö fe lä cui, öjö Cristo a waiquiwä. Yanowamö bamacö bayucuwä yalo bamacö bayelio. Inaja showawä, Cristo lija bamacö bayeliobä bämalecö çocamabou. Öjö lija bamacö çocaa yalo, Yai Bada tänö dodijidawä bämalecö bufi badamaö.

²⁰Yanowamö wama täbä a bufiblaö mladobä, Cristonö wamacö çai nomaa waiquilayoma ja lä, ¿wedi tä tabä yanowamö täbä a bädawä ma cui ja, wamacö nia inaja cuaa fe yadiblou? Yanowamö täbä lija wamacö yädäobä wamacömi. Cama etä a lämaö bufi lä doblao wejei bä lija, ¿wedi tä tabä öjö bä lija wamacö noshi öjödaa dicoquei?

²¹Wamacö wasöje dájä, abenaja bä cuu. —Öjö wama täbä nia fulliimi. Öjö wama täbä nia waimi. Öjö wama täbä nia fubaö bädaomi —bä cuu.

²²Öjö yanowamö täbä a bluca. Öjö täbä balimi malä mlai, tä a lämaö bashiblaobeje.

²³Öjö bä a lä fuaö wejei bä lä cui, yanowamö täbänö bä bufi afa jole jaducäwä taö ma dao wejei ma cui, bä jolemou. Bä a fuamou si ijejeo ma mlai ma cui, bä nia cadidou fa dablamonö, bä wabäo fe yadio. Bä dodijidawä dablambobä, cama bä ma cui, bä nö bleaamamou ojode. Öjö ma cui, öjö bä a fuaö fe ma yadio wejei ma cui, bei bä bufi jamö etä wälidiwä bädou dájä, bä nö wasöobimi waiquiwä. Bä bayeliblamoimi.

Colosenses 3

¹¿Öjö tawä? Cristonö wamacö demi çai jocädou waiquilayoma ja lä, fedu jamö tä bluca lä cule tä ja, bä bufi shilo yai da cuo. Öjamö Yai Bada jayu boco mashi jamö, Cristo a dicäadayoa.

²Öjamö täbä lä culadi täbä ja, bä bufi shilo yai da daeo, bita jamö täbä lä cublai täbä ja mlai.

³Cristonö wamacö çai nomaa malä waiquilayono wei. Öjö sho balimi wamacö nia lä cuo wei, Yai Bada tänö a wawämaimi showawä ma cui,

⁴Cristo a bädodayou dájä, inaja showawä çafä wamacö nia çai bädou cuo. Balimi bämalecö yai lä tablamaö wei, öjö a. Cama a doblao lä culenaja, wamacö çai nia doblao cuo mö feduo.

⁵¿Öjö tawä? Yanowamö täbä showadi lä cuaaö weinaja wamacö cuaaö mö feduobä wamacömi. Bä cuaa dijä, öjö lä. Wamacö nofi beshili jushublalobä wamacömi. Shami wama tä nia fuliimi. Wamacö bufi nia çai waiyoimi. Wəḷidiwä tä taö bufi doblao dijejä. Madofi täbä ma cui ja, wamacö bufi nia çai waiyoimi. Bä bufi lä waiyou wei bä lä cui, Yai Bada a bufiblaö mlajei ja, shomi täbä ja bä bufi shılo cuablalou dicoo.

⁶Inaja täbä yanowamö cuaaö dicoo yalo, Yai Bada tä nö wəḷowä lä jushudou wei tä nia wawəblou.

⁷¿Öjö tawä? Wamacö mojodi bälöo showao däjä, inaja wamacö jaba cuaama.

⁸Öjö ma cui fei däjä, ei wama tä nia bluca mladamaö. Jushuo tä lä cui, täbä nö wəḷowä lä jushudou wei tä çai lä cui, täbä nofi lä wəḷibou wejei tä çai lä cui, öjö wama tä nia bluca mladamaö. Ai täbä əfa lä wayoaö wejei tä çai lä cui, bä caficö ə shami lä faö wei tä çai lä cui,

⁹täbä lä joleblamaö wejei tä çai lä cui, öjö wama tä nia çai bluca mladamaö. Yanowamö täbä bufi showadi lä cuaablalou wei, wama tä waia malä waiquilenou wei. Wamacö jaba lä cuaano wei tä çai.

¹⁰Yai Bada lija, dude wamacö bufi tablamoa waiquileyoma. Cama a lä culenaja wamacö bufi cuo mö feduobä wamacö bufi malä jaducäamaimadi, cama wama a yai daö shalilibä.

¹¹Öjö bäma ecö bluca waiquiwä cudeenö, moli bäma ecö mashi waiquiwä. Clesiateli bä ma cui, judio bä ma cui, bä mosi sicö lä joyamou wei bä ma cui, bä mosi sicö joyamou lä mlai bä ma cui, öjö bäma ecö bluca. Shomi täbä ma cui, oni sibä daö lä mlajei täbä ma cui, täbä ə fuamobä bä lä tabou wejei bä ma cui, bä tabou lä mlajei bä ma cui, inaja showawä. Camiyä bamacö nofi yaimamobä bamacö mlai, bäma a nofi nia lä yaibou wei, öjö Cristo a waiquiwä. Cama bäma ecö bluca lija a cua.

¹²Yai Bada tänö wamacö lä yaileno wei wama ecö waiquiwä. Öjö wama ecö yaia. Cafä wamacö yai nofimaö. Öjö cudeenö abenaja bä yai da cuaa. Bä nofi yai ojode da tayo. Dodijidawä bä çai da cuoje. “Camiyä yai”, bä bufi cu dijä. Bufi oquewä bä yai da cuo. Bä bufi yai yanöcöo fe da yadio.

¹³Täbä nofimaö fe da yadioje. Wamacö ma taamaö wejei ma cui, tä nowa tabo dijejä. Yai Bada tänö wamacö nofi lä asibono weinaja, cafä wamacö nofi asiboyou mö feduobä wamacö.

¹⁴Abenaja bä shılo yai da cuaa. Bä bufi yai da nofio, ¿öjö tawä? Wamacö yai lä nofimayou wei tänö, dodijidawä wamacö nia shılo yai cuo.

¹⁵Jai moli wamacö dodijidawä cuobä, Yai Bada tänö wamacö bufi yanöcömabou. Wama bä bufi yanöcöwä çai cuobä, wamacö nacama. Öjö tä nabä shılo yai da cadidoje. Yai Bada lija wamacö shılo lä bayeliblamou wei tä ja, bä bufi əfa shılo doblalou da wäyāmo.

¹⁶Cristo etä ə jamö, bä bufi yai shılo da taamamo. Wamacö bufi jaducəlanö bä da yömölayo. Bä çai da wasöyo. Yai Bada tä ja wamacö bufi doblalanö, öjö lija täbä ə

amowa lä yädäblai täbä ʼa shılo da taje. Nö badabö David etäbä ʼa çai. Yai Bada tä Bufinö täbä ʼa lä bädamaö wei täbä ʼa çai.

¹⁷Wamacö cuaaö lä bädao wei tä ma cui ja, Bada tä Jesús wama a nofi jaducäbolanö, wamacö yai cuaabä. Wamacö ʼa faö lä bädao wei tä ma cui ja, inaja showawä wama a nofi nia shılo jaducäbou cuo. Inaja wamacö cuaalanö, Bada tä Jesús a wəno, Yai Bada bäma a nofi lä Föömale lija bä bufi ʼafa doblalou da wäyāmo.

¹⁸Bei. Bä suwäbö wama ecönö, feyalofä bä ʼa da jıliaje. Bada wama ecö yalo, inaja wamacö cuaabä wama ecö waiquiwä.

¹⁹Bä feyalobö wama ecönö, suwäböfä bä yai da nofimaje. Dodijidawä bä çai da cuoje, bufi jushujulanö mlai.

²⁰Bä ijilubö wama ecö lä cuinö, naafä, faafä dodijidawä showadi bä ʼa shılo da fuaje. Inaja wamacö cuaaö ja, Bada wama tä bufi nia malä doblamabout wei.

²¹Bä föö wama ecö. Ijilufä wama bä lä wasöablalaö wei tänö, bä bufi nö bleaama dijejä, wama bä bufi wəlidiblamaö dicolo.

²²Bä nosie fuamobä wamacö lä tabou wejei wamacö lä cui lija ya wə faö majöo. Bitam jamö wamacö bälöo showao dāja, wamacö lä tabou wejei dodijidawä bä ʼa da fuaje. Bä mammo showao dāja shılo mlai. Yanowamö täbä lija wamacö dodijidawä dablambö çai mlai. Bada tä Jesucristo lija wamacö fa quilinö, bufi cadidilanö wama bä ʼa shılo yai fuabä.

²³Tä nabä shimaö lä bädao wejei tä ma cui ja, dodijidawä wamacö ojodambö. Jai yanowamö täbä lija mlai, jai Bada tä Jesucristo lija, bufi doblalolanö wamacö nö yai ojodamou cuaaö lä cuquebö weinaja showawä.

²⁴Yai Bada tänö wamacö no nia ojode lä çöamaö wei, wama tä malä dale. ¿Öjö tawä? Cama ebä lija täbä nia lä jibäadayou wei täbä ja, çafä wamacö ma cui, wamacö nia çai malä dobäo wei. Bada tä Cristo wama a nosie yai fuaö malä cui.

²⁵¿Öjö tawä? Wəlidiwä talewä bä ma cui, cama etä nowa nia çai çöamamou. ¿Öjö tawä? Bä lä dodijaö wei bä lä cui, bä nowa nia shılo çöamamou ayao malä mlai. Jödödöwä tä lä tamou wei tä ma cui, tä nowa nia çöamamou.

Colosenses 4

¹Wamacö ʼa fuamobä wama bä yanowamö lä tabou wei wamacö lija ya wə faö majöa. Afä wama bä lä table, dodijidawä bä da taamaje. Bä nö bleaama dijejä. Afä wama bä tabou lä culenaja, çafä wamacö ma cui, Yai Bada tänö wamacö çai tabou mö fedua malä culadi, wama a nosie fuabä.

²Yai Bada lija showadi bä da naco. Wamacö ʼa faö mojiplou mlaobä, bä çai da moyaweicu. Bä bufi ʼafa çai doblalou da wäyāmo.

³Camiyä yamacö ma cui, yamalecö nö bayeli çai da naca, Yai Bada tänö tä tamabou ja, Cristo etä ʼa daö lä mlalajei jamö yama etä ʼa wäyābä, etä ʼa çoyao lä balöono wei etä ʼa lä cui. Öjö ya tä ʼa wäyāo nofi jushuaö yalo wale fe labou lä culajei.

- ⁴Ya tä ʔ wäyää walalao fe yadiobä, yamale da bayelima. Yai Bada tänö, walalawä tä ʔ wäyäämäö lä bufio weinjaja showawä.
- ⁵Bä bufi da moyaweicu, Jesucristo ebä lä mlai wama bä çai cuo däjä, showadi wamacö dodijabä. ¿Öjö tawä? Wamacö dodijabä tä cua ja, bä dodijaö da showadao.
- ⁶Dodijidawä bä ʔ da wayomaje, wamacö ʔ jiliaö bufi doblaobeje. Inaja wamacö fa cuaanö, wamacö yai wälilije däjä, bufi jaducälanö wamacö ʔ nia fuo showadao.
- ⁷Camiya ya lä cule, eja ya çai lä cuaale wama tä ʔ bluca jiliabä, Jesucristo ai e lä cuinö, Diquico a wafa lä culenö, mijamö wamacö nia yömölajalayou. Öjö yama a yai nofimaö. Bada tä lä cui, dodijidawä a wä shilo fuaö talei.
- ⁸Tä ʔ bluca wäyäbä ya shimaö lä cule, camiyä eja yamacö lä cuaale yamalecö ʔ jiliabä. Öjönö wamacö bufi nia çai lofotoamaö.
- ⁹Onesimo ya nia çai shimaö, cafäteli ai a mö feduwä lä cui. Jesucristo öjö lä e çai. Öjö yama a çai nofimaö. A shilo cadidou talei. Eja tä bluca lä cublole wama tä ʔ jiliabä, öjö cäcöbänö wamacö nia yömölaböö.
- ¹⁰Eja yafälecö fe lä labolajei a lä cui, cafä wamacö lija a wafa çai wäamou bufi doblao, Alidaco a wafa lä cule. Marcos a ma cui, a wafa çai wäamou bufi doblaa lä cule, Benabei bä jeli e lä cui. Cafä wamacö lija, Marcos ya wafa wäyää mada waiquiblei, ¿öjö tawä? Mijamö cafä wamacö lijamö a waloo ja, dodijidawä a da walomacöje.
- ¹¹Jesusi a ma cui a wafa çai wäamou bufi doblao, Juto a wafa çai lä cule. Öjö bä lä cui, judio bä mö feduwä. Yai Bada tänö dodijidawä cama ebä çai lä cuo wei, öjö lä bä sho yama etä ʔ wäyää. Yama etä ʔ lä wäyää wei yamacö lä cui lija, judio ai bä cuami. Öjö lä yamacö waiquiwä. Öjö lä bänö wale bufi shilo yai lofotoamaöje.
- ¹²Ebafla a ma cui, cafä wamacö lija a wafa çai wäamou bufi doblao, cafäteli ai a mö feduwä lä cui. Jesucristo showadi a nosie fuaö. Öjönö showadi wamacö nö shilo bayeli yai nacaö dodijio talei, Jesucristo lija wamacö bufi shilo yai lofote cuobä. Yai Bada tänö wamacö taamaö lä bufii wei tä ja, wamacö bufi wedinajamou mlai ja, wama tä ʔ yai lofotobobä, wamacö nö bayeli nacaö.
- ¹³¿Öjö tawä? Cafä wamacö bayeliblamobä, a nö walojaö talei. Ya daö. Laodisea jamö ma cui, Yelaboli jamö ma cui, öjamö Jesucristo ebä lä bälöblai bä çai bayeliblamou mö feduobä, a nö walojaö.
- ¹⁴Luca a ma cui, cafä wamacö lija a wafa wäamou bufi doblao mö feduo, täbä fe jalili lä coamaö wei a lä cui. Öjö yama a çai nofimaö dodijia. Dema a ma cui, a wafa çai wäamou bufi doblao.
- ¹⁵Laodisea jamö Jesucristo ebä lä bälöle bä lija wale ʔafa da wäyäje, ¿öjö tawä? Nifa lija çai, cama e yafi jamö bä lä yododaö wei bä lija çai.
- ¹⁶Ei ya tä ʔ lä oniblale, cafä wamacö lija tä ʔ doamou fa balöonö, Laodisea jamö Jesucristo ebä lä yododaö wei bä lija si shimaö da majöoje, öjamö tä ʔ çai doamou mö

feduobä. Laodiseateli bä lija ya tä ʼ oni lä shimöleno wei, wama si ʼ ɸai fa nacalänö, ʼ ɸä wamacö ma cuinö, öjö wama tä ʼ nia ʼ ɸai doaö mö feduo.

17Aquibo lija wamale ʼ no da wäya. Cama lija Bada tänö tä tamaö lä bufi wei tä ja, a mojimou mlaobä. A wə yai fuabä.

18Camiyä Pablo ya lä cuinö, camiyä ya imicönö ei ya tä ʼ oni taö lä cule, ʼ ɸä wamacö lija ya wəfa wäyämobä. Eja wale fe lä labolajei wamale nofi da jaducäbo, wamale bayelimabä. Bei. Yai Bada a lä cuinö, showadi wamacö bayeliblabä. Wamacö nofi ojadabobä.

1 Thessalonians

1 Thessalonians 1

¹Pablo cä ya. Sila sho, Timoteo sho, yamacö cua lä cule. Cafä Desalonicateli wamacö lija, camiyänö ya si oniblaö lä cule. Fayä Yai Bada wama ecö lä yododaö wei wamacö lija ya tä a oni shimaö, Bada tä Jesucristo lija wamacö lä yädäle wamacö lä cui lija. Bei. Yai Bada tä lä cuinö, showadi wamacö bayeliblabä. Wamacö bufi shïlo yanöcömabobä. Wamacö nofi çai shïlo ojodabobä.

²Cafä bamacö bufibolanö, Yai Bada lija showadi yamacö bufi afa doblalou wäyämou talei. Öjö lija yamacö a faö däjä, bamacö afa shïlo wäaö.

³Öjö tawä? Fayä Yai Bada bäma a lä bufiblaö wei a lija, showadi bamacö nö bayeli nacaö. Jesucristo wama a nofi mölabolanö, wamacö lä dodijaö wei yama tä nofi jaducäbou. Wamacö ojodao talei. Wamacö bufi nofimolanö, ai wama bä bayeliblaö nö walojaö talei. Bada tä Jesucristo wama a nö dabou showalanö, showadi wamacö möläö dodijio talei.

⁴Öjö tawä, iba wamacö? Yai Bada tänö wamacö lä nofimaö wei wamacö. Cama wama ecö cuobä, wamacö lä yaileno wei yama tä daö yalo, yamacö bufi afa doblalou wäyämou talei.

⁵Jesucristo yama etä a dodijidawä lä wäyää wei tä a lä cui, cafä wamacö lija tä a lä waloqueyoluno wei däjä, bei tä a jïlio bädaono malä mlai. Yai Bada tä Bufinö yamalecö bufi nö fa walojomabonö, etä lofote damoa mada wawädolalui. Yama tä a nofi bejedi mölabou cadidilanö bamacö mada yömölablei. Cafä wamacö bayeliblobä, dodijidawä bamacö çai cuoma. Wamale bejedimou mada dalalii.

⁶Öjö däjä, Bada tä Jesucristo wama a owämama. Camiyä wamale çai owämama. Yai Bada wama a wä dääö tä nowa ja wamacö nö ma bleaamano wejei ma cui, wamacö bufi çai doblalou fe mada yadioblei. Yai Bada tä Bufinö wamacö bufi fa bayelibonö, wamacö bufi doblalou fe yadioma.

⁷Öjö tawä? Wamacö dodijaö fe lä yadio wei tä fa dalalöjenö, Jesucristo a bejedi lä bufibou wejei bä bufi çai lofotoblaliyoma. Masedoniateli bä ma cui, Acayateli bä ma cui, cafä wamacö lä cuaano weinaja bä çai cuaaö bufi doblao mö feduoma.

⁸Cafä wamacö lija Yai Bada tä a jaba lä waloqueno wei, wama tä a wäyää fa cuanö, tä a jïlimou malä blaucodi. Masedoniateli bä lija bädawä mlai, Acayateli bä lija bädawä mlai, Yai Bada wama a nofi lä mölabou wei wamacö afa jïlimou blajawä waiquiwä yalo, camiyä yamacö a fabä tä cuami. ¡Inaja lä waiquiwä!

⁹Cama cäbä showawä ma cuinö tä afa malä wayoaö wejei. Cafä wamacönö dodijidawä yamalecö a lä jïliano wei tä afa wayoaöje. Nö ijidubö bä lija wamacö nö jaba bayeli ma nacaono wei ma cui, Yai Bada wama a nofi yai mölabobä, wama bä jowa fujebalema. Yai Bada tä demi cua shi lä wälile, tä Yai Bada bejedi bufiblamobä tä lä cule, öjö wama a nosie yai fuaö majöobä wamacö bufi mö jowa yabajadaliyoma.

¹⁰Fei dǎjä bǎ Ijilubö e lä culadi wama e nö çai dabou. Öjö Jesús a lä cui, a ma nomalayono wei a demi jocǎa çomalema. Yai Bada a nö waiteli lä quiliaö wei dǎjä bǎmalecö noshi nia umlabou.

1 Thessalonians 2

¹Iba wamacö. Yai Bada yama tä ǎ wǎyǎbǎ, bǎmacö fe walou nö bleaanomi. Cafǎ wamacö ma cuinö, öjö wama tä malǎ dale.

²Cafǎ wamacö lija yamacö fuu mlao dǎjä, Filiboteli bǎ lijamö yamalecö nö ma bleaamano wejei ma cui, yamalecö nö ma waiblaö fe ma balojoono wejei ma cui, yamacö ǎ waiquidonomi. Wama tä malǎ dale. Yai Bada bǎma a lä bufiblaö wei a lija yamacö bufi fa lofotoonö, cafǎ wamacö lija yama tä ǎ wǎyǎö mö fuu fe yadioma. Tǎbǎ ǎ ma läono wei, Yai Bada yama etǎ ǎ dodijidawǎ wǎyǎö fe blacǎjoma.

³Yai Bada etǎ ǎ ja yama bǎ bufi tamaö fe lä blacǎjou wei, yamacö jolemolano yama bǎ bufi taamaimi. Yamacö shominajaalanö mlai. Yama bǎ mölamaimi.

⁴Yai Bada tänö yamalecö bejedimou fa dablanö, yama etǎ ǎ wǎyǎbǎ yamalecö shimölema. Etǎ ǎ wǎyǎmaö lä bufio weinaja yama tä ǎ cadidiwǎ wǎyǎö showao. Yanowamö yama tǎbǎ bufi doblalamabǎ mlai, Yai Bada yama a bufi yai doblalamabǎ yama etǎ ǎ wǎyǎö. Öjönö tǎbǎ bufi malǎ dablaö wei.

⁵Jole jole yamacö nofimou bǎdaono malǎ mlai. Madofi bǎ ja yamacö nia fa dobämonö, yamacö jole jole nofimonomi. Yai Bada tänö bǎmalecö bufi malǎ dablale.

⁶Cafǎ wamacö lija, ai tǎbǎ ma cui lija, yamacö nofi doablamobǎ yamacö funomi. Cafǎ wamacö lija yamacö nacobǎ yamacö çai funomi. ¿Öjö tawǎ? Cristonö yamalecö shimölema yalo, cafǎ wamacö lija yama tä bayeli nacabǎ yamacö cua ma waiquile ma cui, yamacö naconomi.

⁷Cafǎ wamacö lija yamacö ǎ shilo oquewǎ faö cuaama. Suwǎ anö, ijilu a çai oshe dodijidawǎ lä cuo weinaja, bǎmacö çai dodijidawǎ cuoma.

⁸Bǎmacö nofimaö fe balojowǎ yalo, wamacö bayeliobǎ yamacö noshi öjödaoma. Yai Bada yama etǎ ǎ dodijidawǎ wǎyǎö bufi doblaoma. Bǎmacö nofilema yalo, yamacö nö bleaö nofi fölionomi.

⁹Iba wamacö lä cui, yamacö ojodamou nö wǎlojaö fe lä yadiono wei wama tä daö. Yama tǎbǎ no nii çamabǎ, jalu dǎjä ma cui, didi dǎjä ma cui, yamacö ojodamou showaoma. Yai Bada tä ǎ ja bǎmacö lä yömölano wei dǎjä, cafǎ bǎmacö niibö yabǎcaö mlaobǎ yamacö ojodamodima.

¹⁰Cafǎ wamacönö yamalecö bejedimou malǎ daö wei. Yai Badanö yamalecö bejedimou çai daö. Cafǎ Jesucristo bufilewǎ wamacö lija yamacö da cuoblei dǎjä, yamacö mada cadidoblei. Dodijidawǎ bǎmacö çai cuoma. Yanowamö tǎbǎ lija yamacö ǎfa tamobǎ tä cuonomi.

¹¹Ei wama tä malä dale. Bä föö enö, bä ijilubö ebä taamaö lä cuaaö weinaja, cafä bamacö çai taamama. Wamacö moyawäobä bamacö yömölaö cuaama. Bamacö bufi lofotoamaö cuaama. Bamacö cadidamaö cuaama.

¹²Wamacö lä dodijaö wei tänö, Yai Bada wama a bufi doblalamabä bamacö cadidamama. Öjönö wamacö yailema, cama a nofi doablamobä jamö wamacö çai cuobä.

¹³Dodijidawä wama tä a jiliama yalo, showadi Yai Bada lija yamacö bufi afa çai doblalou wämou. Yama tä a da wäyäblei däjä, dodijidawä yamalecö a jililema. Yanowamö wama täbä a bufinomi. “Yai Bada etä a waiquiwä”, wama tä a nofi tabou yalo, wama tä a jiliaö ojodao showaoma. Öjö etä a li malä cui. Öjö tä anö wamacö bufi malä taamamou wei, Jesucristo wama a bejedi lä bufibou wei wamacö lä cui.

¹⁴Iba wamacö. Wamacö bufi shomi yalo, wamacö nö mada bleaamablejei. Judea tä ulufi jamö, Jesucristo ai ebä lä taamano wejeinaja showawä. Öjamö Yai Bada ebä yododaö lä cuaaö wei, ebä nö malä bleaamano wejei. Jesucristo lija wamacö bufi mö blucao yalo, cafä ai wamacönö wamacö nö da bleaamablejeinaja, judio bänö cama ebä nö çai jaba bleaamaö showaomaje.

¹⁵Öjö bä judio showawä lä cuinö, Yai Bada a wano jaba lä wawämano wejei bä shilo shäo cuaamaje. Bada tä Jesús a ma cui, a çai shälemaje. Camiyä yamacö ma cui, yamalecö nö çai bleaamaöje. Öjö tä nowanö, Yai Bada tä jushuamaö fe balojooje. Judio bänö bluca täbä yabäcaöje.

¹⁶Jesucristo lija judio bä lä mlai bä fucäamobä yama bä yömölaö ma cuaaö wei ma cui, öjö bä judio lä cui, bä a shilo lämodii. Judio showadi bä nofi ma jushuano wei ma cui, fei däjä bä nofi yai jushuaö fe balojowä. Shomi täbä yömölamaö nofi lä wälibou wejei tänö, yacumö Yai Bada tä jushuo lulubou lä culajei. Bejedi lä bä nofi nacao.

¹⁷Öjö ma cui, iba wamacö. Cafä wamacö lija yamalecö bälöamaö doblamaö dicoo fa mlacujenö, bamacö möö mablaliyoma. Öjö ma cui, tä nö dedejelou mlai ja bamacö nia möyou ço. Bamacö fei däjä möö ma mlai ma cui, bamacö bufibou showawä. ¿Öjö tawä? Bamacö möö bufi doblao cudeenö, showadi yamacö wabäodii nosi blacäcou dodijioma.

¹⁸Cafä wamacö lija yamacö fuu bufi malä doblaono wei. Camiyä Pablo ya lä cuinö bamacö fe nia walou fe fa yadionö, bolacadabö ya wabäoma ma cui, Sadanasinö yamalecö yabäcaö dicooma.

¹⁹¿Öjö tawä? Bada tä Jesús a itou çoyoluu däjä, bamacö bufi doblalou çai icuobä, cafä wamacö lija yamacö malä mölaö wei. Yamacö bufi çai doblalobä, cafä bei wamacö. Yai Bada lija cafä wamacö bufi cuquema yalo, camiyä yamacö ma cui, yamacö nofi nia doablamou mö feduo malä cui.

²⁰Cafä wamacö lä dodijaö wei tä nowa ja, Yai Bada lija yamacö nofi nia doablamou malä cui. Wamacö dodijaö yalo yamacö bufi nia doblalou.

1 Thessalonians 3

- ¹Öjö cudeenö, yacumö yamacö fa wajäanö, yamacö bufi nö bleaaö waiquio yalo, Adena jamö, Sila sho yafäcö yamili cuo juo fa ojodadalunö,
- ²mijamö Timoteo yafä a shimölema, camiyä bämacö ai a lä cui. Cristo etä a dodijidawä wäyämobä, Yai Bada lija showadi a ojodamou. Wamacö bufi lofotoamabä yafä a shimölema, Jesucristo wama a nofi mölabou cadidiobä. Wamacö fa yömölalönö, wamacö moyawäobä.
- ³Wamacö fa moyawäonö, wamacö bufi shominajaaö mlaobä. Wamacö nö ma bleaale, ai moli wamacö ma cui, wamacö bufi shominajablou dicoo mlaobä. Cafä wamacö ma cuinö, ei wama tä daö. Bämacö nö bleaabä lä bämacö waiquiwä.
- ⁴Cafä wamacö lijamö yamacö cuo showao däjä, bämacö mada yömölablei. Bämacö nö nia lä bleaaö wei yama tä wawämaö mada balöoblei. Wamacö nö lä bleaale öjö lä tä waiquiwä. ¿Öjö tawä? Wama tä malä dale.
- ⁵Öjö cudeenö, ya bufi nö yanöcödobimi waiquia yalo, Timoteo ya shimölema, Yai Bada ya wä nia bufibou showaa fa mönö. Mölamalewä lija bämacö bufi yabäcaö nofi fa jalujubonö, ya shimölema. Yamacö nö bleaaö nofi çai fa jalujumobonö, bämacö bomaö bufima.
- ⁶Öjö ma cui, cafä wamacö lija Timoteo a fa cuonö, äyämö tä a çai dodijidawä waloa fa çiquiyonö, yamacö bufi owäjädou çölayoma. Yai Bada wama a nofi jöwa mölabou showaa. Wamacö bufi jöwa nofimou showawä. Yamalecö lä bufibou wei tä a çai wäa çöbejeloma, yamalecö möö bufi lä doblao wei tä a çai. Inaja showawä, camiyä yamacö ma cuinö bämacö çai möö bufi doblao mö feduo.
- ⁷Iba wamacö. Yai Bada wama a jöwa bufibou showawä ja, yamacö bufi dodijidadou çoa lä cule. Eja Jesucristo tä a nowa ja, yamacö nö bleaabä tä ma bluca wei ma cui, yamacö famibä tä çai ma bluca wei ma cui, cafä bämacö afa jiliaö ja, yamacö bufi lofotoblou çoa fe yadia lä cule.
- ⁸Bada tä lija wamacö bufi cadidou fe yadia yalo, dodijidawä fe balojowä yamacö cua lä cule.
- ⁹Yai Bada lija bämacö bayelimaö däjä, ;bejedi yamacö bufi afa doblalou wäyämou! Yai Bada lija wamacö bufi lä bayeliblamou wei tä ja, yamacö bufi ayäyaimodii.
- ¹⁰Didi däjä ma cui, jalu däjä ma cui, bufi cadidilanö Yai Bada lija yamacö a fadii. Bämacö möyou çöbä yamacö a faö. Yama tä a lä wäyayoluu wei däjä, camiyä yamacö anö Yai Bada lija wamacö bufi balafälöbä.
- ¹¹Fayä Yai Bada bäma a lä bufiblaö wei a lija yamacö nacou, Bada tä Jesús a lija çai, cafä wamacö lija yamacö waloo fe yadiobä.
- ¹²Wamacö nofimayou balafälöbä, Bada tä lija ya wä çai faö. ;Bejedi lä wamacö nofimayou fe balojoobä! Inaja showawä, shomi täbä ma cui wama täbä nofimaö blaucobä. Cafä bämacö nofimaö fe balojoo lä culenaja, wamacö taamayobä.

¹³Bada tä Jesucristo lä cuinö, inaja wamacö bufi cadidamaö fa cuaanö, cama ebä çai bluca itoyoluu däjä wamacö dodijidawä icuo mö baobä. Fayä Yai Bada lija, quilii mlai ja wamacö icuamabä.

1 Thessalonians 4

¹Iba wamacö. Ei moli yamacö ʘ fe blacäjou ço. Wamacö moyawäobä bamacö yömöläö. Bada tä Jesucristo lä cuinö wamacö yömöläö nö lä cuobö weinaja showawä. Wamacö dodijabä yamacö ʘ, Yai Bada wama a bufi doblamabobä. Bamacö da yömölableinaja showawä. Wamacö dodijaö lä waiquilenaja, wamacö dodijaö balafälöbä.

²Wamacö cadidobä Bada tä Jesús yama tä ʘ jaba da wäyäblei, wama tä ʘ malä dale.

³Wamacö nofi beshili jushublalou mlai ja, wamacö yaiobä. Inaja Yai Bada tänö wamacö taamaö bufii.

⁴Wamacö suwäbö dāo fa cadidionö, dodijidawä wama bä çai li cuobä,

⁵Yai Bada tä daö lä mlajei bä beshili lä cuaaö weinaja mlai.

⁶Aifä bä suwäbö lija wamacö fa yabäcäonö wama bä nö waibläö dicoo mlai. Täbä nofi lä jushublalou wei bä lä cui, Bada tänö bä nö nia malä bleaamaö wei, bamacö da yömölableinaja showawä. Bamacö yömöläö mada dodijiole.

⁷Bamacö nofi jushublalobä Yai Bada tänö bämalecö nacano malä mlai. Cama bāma ecö dodijidawä yai cuobä bāmalecö yailema.

⁸¿Öjö tawä? Ei tä ʘ ja yamalecö ʘ jilibläö lä mlai, camiyä yamalecö ʘ jilibläimi bādawä mlai, Yai Bada wama a wə yai jilibläimi. Cafä wamacö lija a Bufen lä jibāamou wei wama a wə li waii.

⁹Aifä wama bä nofimabä, bamacö yömölabä tä cuami. Dodijidawä wamacö nofimayou malä waiquii. Wamacö nofimayobä, Yai Bada tänö wamacö damaö malä waiquii.

¹⁰Masedonia tä ulufi jamö aifä bä lä bälöblai, bejedi wama bä malä nofimaö wei. Öjö ma cui iba wamacö, bamacö moyawäblamabä yamacö ʘ faö. Wamacö cuaaö lä waiquilenaja wamacö cuaaö balafälöbä.

¹¹Wamacö bälöo yanöcöobä, tä da yaileje. Wamacö ʘ fabä tä cuami ja, wamicai bä da cuicu. Wamacö ʘ faö bashibläo mlai. Wamacö mojimou mlai, bä da ojodamo, bamacö nowa da tableinaja showawä.

¹²Inaja wamacö cuaaö ja, Yai Bada ebä lä mlai wama bä bufi jaducäblamabä. “¿Ei bä bufi nofi dao yai!” wamacö nofi tabobeje. Ai täbä lija wamacö möläö mlai ja, cafä wamacö showawä lä cui wamacö dodijidawä cuobä.

¹³Iba wamacö. Bä lä mladaliyono wei bä ja, bamacö bufi mojudumabou bufiomi. Yai Bada a nofi mölabou lä mlajei bä bufi nö bleaaö lä cuaaö weinaja, wamacö bufi nö bleaaö mlaobä.

¹⁴Jesús a fa nomalönö, a demi jocädamaö malä çölayono wei. Öjö bejedi bäma tä a fa bufilänö bamacö möläö. Jesús ebä ma mladou wei, Yai Bada tänö bä çai demi jocädamaö mö feduo weicätä. Jesús lija bä yädaa yalo, öjönö bä çai bluca cuo shi wälili wä.

¹⁵Bada etä a ja bamacö malä yömölale, Jesucristo ebä lä nomablono wei wama bä nofi jalujubou mlaobä. Bada tä itou çoyoluu däjä, camiyä bamacö demi lä showai bamacö balöö mlaicätä.

¹⁶Fedu jamö a culanö a lä itoyoluu wei däjä, abenaja tä nia malä cuo wei. A wä icalı comöö fa jilimolonö, Bada tä ajele a wä çai nacli fa jilimolonö, Yai Bada etä madofi lä folamou wei etä a çai fa jilimolonö, cama Bada a Jesús lä cui, a nia itoyoluu. Öjö däjä, Jesucristo ebä lä mladaliyono wei ebä demi jocädou fa balöönö,

¹⁷camiyä bamacö demi lä showai, bamacö lä daamou wei bamacö lä cui, yedu bamacö çai fucäa fa showaläfälönö, öjölashi ajamö bäma bä çai cuodayou wä, fedu jamö Bada bäma tä mö baamadayobä. Öjö tä fa cublalunö, Bada tänö bämalecö nia çai cuo shi wäliodayou.

¹⁸Inaja tä nia cublou yalo, ei tä anö bä bufi da lofotoamayo.

1 Thessalonians 5

¹Iba wamacö. Bada tä no nia lä cublou weinaja, ya tä oniblaimi. Öjö tä a ja, wamacö nö yömölamou çobimi. Wamacö bufi dao waiquiwä.

²Bada tänö tä mö nofi jalu lä tablele däjä, a nia fuu çö. Öjö wama tä malä dale. Didi däjä bä lä tomöμου wei bä fuu jätöo lä culenaja, a nia cublou.

³“Fei däjä tä nö ulufi wayubimi. Fei däjä bamacö bälöa doblaä lä cule”, täbä nowa tayou däjä, täbä nö nia lä bleaaö wei, yedu tä nia bädoyoluu. Suwä a lä shibönabö wei, yedu a ninimodou lä cuaaö weinaja, täbä nia yedu taamayoluu. Täbä docubä tä nia cuomi.

⁴Öjö ma cui, iba wamacö. Jesús a nia lä bädou wei tä ja, wamacö nö mojuduobimi. Didi däjä a lä tomöμου wei a wawäblou däjä bä lä quiliblou weinaja, wamacö quiliblobä wamacö malä mlai.

⁵Mö jalu tä jamö, tä mö wacacaobä jamö, quili mlai ja täbä lä cuaaö weinaja wamacö malä cui. Mö didi tä jamö, tä mö sublaobä jamö täbä lä cuaaö weinaja bamacö cuaabä bamacömi.

⁶Öjö cudeenö, bä mojodi mio lä bädao weinaja bamacö cuaaö da mlao. Ai bä moyawe lä ladio weinaja bamacö bufi fa cuanö, bamacö bufi da wasöo.

⁷Täbä lä mio wei, didi ja bei täbä mio. Shi wälimamodima ubä ja täbä shi lä wälimamou wei, täbä didi shi çai wälimamou.

⁸Öjö ma cui, mö jalu tä lä cui bäma tä nofi yaibou waiquiwä yalo, bamacö bufi da wasöo. Täbä shäyobä jamö wayu bä nowamöo lä culenaja, bamacö bufi da cuo.

Jesucristo bāma a nofi lä mölabou wei tänö, bāmacö bufi çai lä nofimou wei tänö, bāmacö bufi nowamöobä. Bāmacö fucāamobä bāmacö möläö lä cadidio wei tänö, bāmacö bufi çai nowamöobä.

⁹Yai Bada tänö bāmālecö nabä queobä bāmālecö yaiano malä mlai. Bāmālecö yai fucāabä bāmālecö yailema. Bada tä Jesucristo lija bāmacö fa yādāicunö, bāmacö fucāamobä.

¹⁰Bāmālecö nowamabä, a Jesucristo nomaa lälayoma. A itou çoyoluu dājä, bāmacö demi lä showai bāmacö ma cui, bā nomaa lä waiquilyono wei bā ma cui, cama lija bāmacö bluca cuo shi wālibä, a nomaa lälayoma.

¹¹Öjö cudeenö, bā bufi da lofotoamayo. Bā da bayeliblayo. Wamacö lä cuaaö weinaja showawä.

¹²Iba wamacö. Bāmacö moyawāblamabä yamacö a fe blacājou. Bada tä Jesucristo tä a ja, wamacö lä cadidamaö wejei wama bā nö waibläö mlai, dodijidawä wamacö yömölamobä. Öjö bā bada lä cui, wama bā a fuabä bā malä cui. Wamacö bufi jaducāblamabeje bā malä ojodamou wei.

¹³Wama bā yai fa nofimanö, bufi dao täbä nosie fuamou lä cuaaö weinaja wama bā nofi tabobä. Wamacö malä bayelibläö wejei. ¿Öjö tawä? Cafä dodijidawä wamacö nofimayou yanöcöobä.

¹⁴Iba wamacö. Bāmacö nia fa moyawāblamanö yamacö a. Bā lä moji wei bā da wasöje. Bā bufi nö lä bleaaö wei bā bufi da lofotoamaje. Bā lä ujudi wei bā da bayeliblaje. ¿Öjö tawä? Oquewä wama täbä a bluca wayomabä.

¹⁵Wamacö nö bleaamaö bādaoje dājä, bā taamaö mö feduo dijejä. Wamacö bayeliblayobä tä yai da cadidileje. Yanowamö bluca wama bā yai bayeliblabä.

¹⁶Bā bufi shīlo da doblalo.

¹⁷Wamacö a waiquidou mlai ja, Yai Bada lija bā a shīlo da fa.

¹⁸Tä cublou lä bādao wei, tä ma dodijidao dājä, tä ma wālidio dājä, Yai Bada lija bā bufi shīlo doblalou fe da yadio. Jesucristo lija wamacö lä yādäle, inaja Yai Bada tänö wamacö taamaö bufii.

¹⁹Yai Bada tä Bufen a waibo dijejä.

²⁰Yai Bada a wāno lä wawāmaö wejei bā a nofi çai wālibo dijejä.

²¹Öjö ma cui, wama bā a bluca fa jīlianö bā a bejediablalou da möje. Wama bā a bejedi fa wabanö, tä a lä dodijidai wama tä a cadidibobä.

²²Wamacö bufi fa wasöonö, Yai Bada tänö tä taö lä wasöo wei, tä bluca waia da showadalöje.

²³Cama Yai Bada a lä cuinö, bāmālecö bufi lä yanöcödamaö wei a lä cuinö, wamacö dodijidawä fe balojowä tabobä ya wā faö. Bei wamacö ma cui, bei wamacö bufi ma

cui, wamacö comi dodijidawä tabobä. Inaja wamacö au cuo fa showaonö, Bada tä Jesucristo a itou çoyoluu däjä, wamacö dobloimi jimabä tä nia cuomi.

²⁴Wamacö lä yaiäo wei a wä nia shomiblou majöomi. Wamacö möläo showaobä cätä. Dodijidawä wamacö nia lä tabou wei, wamacö dodijidawä tabou wä. A bejedimou weicätä.

²⁵Iba wamacö. Yai Bada lija yamalecö da bayelimaje.

²⁶Jesucristo ai wama ecö mö fedudayou ja, bä da nofimayo.

²⁷Ei tä ą da däleje. Bada tä lä cuinö wale ą famaö lä cule. Jesucristo bluca ebä yömöca dao däjä tä ą doamobä, ei tä ą oni.

²⁸Bei. Bada tä Jesucristo lä cuinö, showadi wamacö bayeliblabä. Wamacö nofi shılo ojadabobä.

2 Thessalonians

2 Thessalonians 1

¹Pablo cä ya. Sila sho, Timoteo sho, yamacö cua lä cule. Desalonicateli wamacö lija ya si oni shimaö, Yai Bada wama ecö lä yododaö wei wama ecö lija. Fayä Yai Bada lija wamacö bufi lä cuqueno wei, Bada tä Jesucristo lija wamacö bufi çai lä yädäqueno wei wamacö lä cui lija.

²Bei. Fayä Yai Bada lija wamacö shïlo bayeliblamobä, Bada tä Jesucristo lija çai. Wamacö bufi shïlo yanöcömaboböbä. Wamacö nofi çai shïlo ojodaboböbä.

³Iba cä wamacö. Wamacö dodijaö yalo yamacö bufi doblalou. Yai Bada lija showadi yamacö bufi äfa doblalou wäyämobä lä, wamacö malä dodijaö wei. Jesucristo lija fei däjä wamacö möläö malä balaimadi. Wamacö nofimayou çai balaö lä cuimadi.

⁴Inaja wamacö cuaaö yalo, Yai Bada ai ebä lä yododaö wei bä lija, camiyä yamacönö bamacö nofi dodijaö doablaö cuaaö. Wamacö nö ma bleaamaö wejei ma cui, wamacö bufi shominajablou mlai, wamacö nö wälojaö fe yadio malä cui. Jesucristo lija wamacö möläö fe malä yadio wei.

⁵Wamacö bufi nö wälojaö fe lä yadio wei, Yai Bada tä cadidou dablamobä cätä. Fei tä lä cui däjä, cama wama a nofi yaibou tä nowa ja wamacö nö lä bleaale, dodijidawä cama ebä çai cuobä jamö wamacö nia ajedemabou wawädoö.

⁶Fei däjä wamacö nö lä bleaamaö wejei, Yai Bada tänö cama bä nö bleaamaö nomöjöquei. Wamacö nö yuabä a malä cui.

⁷Bada tä Jesús lä cuinö, cama äjele ebä nö çai wälojowä wawäblodayou däjä, cowa wacä bä bada lä wao waomou wei wacä bä çai bada wawäblodayou wä. Öjö däjä cafä wamacö nö lä bleaale wamacö sho, bämalecö bluca bälöa yanöcömaquedayou.

⁸Yai Bada tä daö bufio lä mlajei bä nabä fa queicunö, a nö yuo cuquei. Bada tä Jesús etä ä dodijidawä jiliblaö lä mlajei bä nabä nia çai queo.

⁹Öjö däjä bä nö nia bleaaö shi wälii cuquei. Bä fa waimolunö, Bada tä Jesús a cuobä jamö bä nia icuomi. A nofi nia lofote lä doamou wei jamö bä nia cuomi.

¹⁰Öjö däjä, Jesucristo a yai nia itou lä cadidoyoluu wei däjä, cama ebä lija a nofi nia doablamou. A bejedi lä bufibou wejei bänö a noshi nia jaliwä queamaöje. Yama tä ä lä wäyänö wei wama tä ä bejedi bufiboma yalo, öjamö wamacö çai nia icuo.

¹¹Jesucristo a nofi doablamodayobä jamö wamacö nia cuo yalo, Yai Bada bäma a lä bufiblaö wei tä lija showadi bamacö bayelimaö. Fei däjä ma cui, Yai Bada tänö wamacö cadidiwä tabou lä bufio weinaja wamacö cadidiwä yai tabobä, ya wä faö talei. Cafä wamacö lä cui, wamacö çai dodijaö bufi lä doblao weinaja showawä wamacö cuaabä. Cama wama a nofi mölabolanö, cama etä lofote showawänö dodijidawä wamacö ojodamobä.

¹²Inaja wamacö dodijidawä fa cuonö, bluca täbä lija cama Bada tä Jesucristo a nofi doblao doablamobä. Cama wama ecö yalo, inaja showawä, Yai Bada lija cafä wamacö nofi çai doablamou mö feduobä. Yai Bada bäma a lä bufiblaö wei a lä cuinö, Bada tä Jesucristo a çai lä cuinö, täbä nofi shïlo malä ojobaboböo wei.

2 Thessalonians 2

¹Iba wamacö. Bada tä Jesucristo a nia lä itou wei tä ja, bämacö yömölaö lä cule. Bäma a mö baamadayobä, bämacö nia lä toujou wei tä ja bämacö yömölaö. Abenaja bämacö nowa taö.

²Wamacö bufi jalujou mlai. “Bada tä nia fuu lä ço wei, tä mö jalu cublou waiquilayou lä cufe”, bä bufi jole cuu dijä. Bä mölaö si ijejeo dijä. Inaja ai bä ma cuu wei ma cui, bä jolemou. Bei bä bufi jamö tä afa wawäblou ma taö wejei ma cui, bä jolemou. Ei malä cui. “Pablo ebä çai lä cuinö tä si oniblalemaje”, bä jole ma cuu wei ma cui, öjö yama tä a oniblanomi.

³Yanowamö täbä lija wamacö mölaö dodijio mlai. Yai Bada a waibeje, yanowamö täbä a nia bluca obi lofotoaö. Öjö tä cublou showao mlao däjä, Jesucristo a nia fuu ço jaöomi. Yai Bada lija a nö yai lä nabämou wei a nia wawäo balöo, shobali wacä jamö a nia lä wäliablamou wei a lä cui.

⁴Yai Bada a ma cui lija, täbä bluca lä bufiblamou wei täbä ma cui ja, a wä nia lämou. “Camiyä wamale bufiblabä çä ya waiquiwä”, a nia cuu. Yai Bada etä yafi ma cui ja, a fa lucälönö, öjamö lä a nia loo läo bashio.

⁵Cafä wamacö lijamo ya da cuoblei däjä, ya tä a mada wäyäblei. Wama tä a daö showale cätä.

⁶Öjö a nö yai lä nabämou wei a wawäblou jaöo mlaobä, a jaamabou showaa lä cule. A lä jaamabole wama tä daö waiquiwä, Yai Bada tä Bufi lä cui. A nö yai lä nabämou wei a lä cui, obi, Yai Bada tänö a wawäblamaö bufio däjä a nia shïlo wawäblou.

⁷Fei däjä a wawäblou showawä ma mlai ma cui, a cuaaö jatomou waiquia, wäliidiwä tä balamabä. Öjö ma cui, a lä jaamabole a çamamou däjä, öjö däjä a nia jaö çadaaimi.

⁸Öjö däjä a nö yai lä nabämou wei a nia wawäblou. Bada tä Jesús a waiteli çai itoa fa çolionö, bei föshöacö lofotenö a lä wawäblöle a nia shäo. Jesús a lä dablamole däjä, a nö lä quiliaö wei tänö a nia waicaö dodijio.

⁹Öjö tawä? A nö yai lä nabämou wei a wawäblou däjä, Sadanasi a bufi fa lucälönö, a nö nia wälojamaö nö quiliaö. Täbä joleblamabä, tä nö lä quilijii tä bluca fa wawämalönö, täbä bufi nia taamaö fe yadio.

¹⁰Shobali wacä jamö bä nö nia lä bleaaö wei bä lä cui, öjö bä nia mölamaö nö quiliaö. Yai Bada bejedi etä a lä cui, etä a bufibou fa mlacujenö, bä fucäamobä tä a jiliaö fa mojiojenö, bä nia mölaa fe balojolayou.

¹¹Öjö bejedi tä ʼa lä cui tä ʼa fa wailöjenö, jole tä ʼa lä cui ja Yai Bada tänö bä nö nia yai bleaamaö. Jole tä ʼa ma cui, tä ʼa bejedi bufibobeje täbä bufi nia taamaö majöo,

¹²täbä bluca waimou showadaobä. Täbä waimobä täbä waiquiwä. Yai Bada etä ʼa bejedi bufibou fa mlacujenö, tä lä wasöo wei tä yai taö bufi malä doblao wejei.

¹³Öjö ma cui, cafä wamacö yai bayeliblamou yalo, Yai Bada lija yamacö bufi doblalou. Showadi yamacö bufi doblalobä tä malä cui. Iba wamacö. Bada tä lä cuinö wamacö nofimaö fe lä balojoo wei wama ecö. Wamacö fucäamobä, jaba däjä Yai Bada tänö wamacö yaia showadalema. Cama a Bufinö wamacö fa yailänö, bejedi wama tä ʼa nofi mölabou, wamacö fucäamobä.

¹⁴Wamacö fucäamobä wamacö nacalema, Jesucristo yama tä ʼa dodijidawä lä wäyänö wei tä ʼanö. ¿Öjö tawä? Bada tä Jesucristo wama ecö yalo, cama a lä doblale jamö wamacö doblao mö feduobä, wamacö nacalema.

¹⁵¿Öjö tawä, iba wamacö? Bä bufi da cadidiicu. Bä bufi da lofotoicu. Cafä wamacö lijamö yama tä ʼa da wäyäblei, yama tä ʼa oni çai da shimölii, wama tä ʼa nofi cadidibobä.

¹⁶Bei. Bada tä Jesucristo lä cui, cama lija showadi wamacö bayeliblamobä, Fayä Yai Bada lija çai, bämalecö nofimaö fe lä balojoo wei a lija. Bämalecö nofi fa ojadadalönö, bämalecö bufi nia lofotomabou shi wälii. Bäma a nofi mölabobä, bämalecö bufi taamaö.

¹⁷Öjö cäcöbä lija wamacö bufi lofotoamamobä. Wamacö bufi lofotolanö wamacö dodijabä, dodijidawä wamacö ʼa çai fabä.

2 Thessalonians 3

¹Iba wamacö, abenaja yamacö cuu majöo. Yai Bada lija yamalecö da bayelimaje. Bada etä ʼa wäyämou fa cuaafälönö, dodijidawä etä ʼa yai jiliamou blaucou cuaabä. Cafä wamacönö wama tä ʼa jiliaö bufi doblao fe da yadiobleinaja, ai täbänö tä ʼa jiliaö bufi doblao fe yadio mö feduobeje.

²Yamalecö da bayelimaje, täbä nofi jushuaö fe lä balojoo wei täbä lija, Yai Bada tänö yamalecö noshi umlabobä. Jesucristo a nofi bluca mölabou malä mlajei.

³Öjö ma cui, Bada tä lä cui wama a nofi mölabou cadidiobä cätä. Öjö a lä cuinö wamacö bufi lofotoamaö wä. Sadanasi lija wamacö noshi çai umlabou wä.

⁴Bada tä Jesucristo wama ecö yalo, cafä bamacö nofi mölabou. “Fei däjä ma cui, obi ma cui, yama bä lä yömölaö wei tä ja, bä cadidole cätä”, yamacö bufi cuu ja yamacö mölaö.

⁵Bada tä lä cuinö wamacö bufi yai cadidamabä, yamacö ʼa faö. Yai Bada tänö bejedi wamacö lä nofimaö wei wama tä dablabä. Bufi yanöcölanö Cristo wama a nö dabou fe yadiobä.

- ⁶Iba cäbä. Wamacö moyawäobä bämacö yömöläö a lä cule. Bada tä Jesucristo lä cuinö wamacö yömöläö nö lä cuobö weinaja showawä. Jesucristo ebä ma cui, ai bä ojomamou moji ja, bä nofi lobo dijeje. Wamacö dodijabä bämacö ma yömölano wei ma cui, öjö bä lä cuinö yamalecö a jilianomi dicoweje.
- ⁷Camiyä yamacö lä cuaaö weinaja wamacö cuaaö mö feduobä tä malä cule. ¿Öjö tawä? Cafä wamacö lijämö yamacö lä cuono wei däjä, yamacö mojimono malä mlai.
- ⁸No mlai ja yama täbä nii waö mada mlaoblei. No mlai ja yamacö bayeliblamou mada mlaoblei. Bämacö nö bleaamaö mlaobä, yamacö ojomamodii fe balojooma.
- ⁹Yai Bada etä a ja bämacö lä bayelibläö wei tä nowa ja, yamacö nö liyobä tä cuoma ma cui, yamacö ojomamou fe yadioma. Camiyä yamacö ojomamou lä cuano weinaja, wamacö ojomamou cuaaö mö feduobä.
- ¹⁰Cafä bämacö çai cuo da showaoblei däjä, bämacö yömöläö mada waiquioblei. Abenaja yamacö cuma. “Ai a ojomamoiimi ja, a iyama dijejä”, yamacö cuma.
- ¹¹Bämacö afa dobroimi jiliaö waiquiwä. Ai wamacö jowa mojimou fa dicoonö, wamacö jowa mojomodili loadalou bädao. Ai wamacö lä cui, wamacö a fabä tä ma mlai ma cui, wamacö a jowa faö si ijejewä dicowä.
- ¹²Inaja täbä lä cuaaö wei yama täbä yömöläö lä cule. Yamacö a fe blacäjou. Bada tä Jesucristo lä cuinö täbä yömöläö nö lä cuobö weinaja showawä. ¿Wamicai wamacö li dodijidawä cuobä! Dodijidawä cafä wamacö li fa ojomamonö wamacö shilo iyabä. Wamacö folimou mlaobä bä da ojomamo.
- ¹³Iba cä wamacö. Wamacö lä dodijaö wei tä ja bä modaa dijä.
- ¹⁴Ei si oni ja bämacö lä yömölale, ai tänö yamalecö a fuaimi bädawä ja, wama a dobroimi fa dalalönö a nofi lobou da mladaluje, a quilibä.
- ¹⁵Wama a nofi wälibou cadidio mlai, jai aifä lija wamacö a nö oquewä faö lä cuobö weinaja, bä a da fa.
- ¹⁶Bei. Bada tä lija showadi wamacö bayeliblamobä, täbä bufi lä yanöcödamaö wei a lä cui lija. Cama a showawänö wamacö bufi yanöcömabobä. Tä cublou lä bädao wei tä ma cui ja, wamacö bufi yanöcömabou fe yadiobä. Bada tänö wamacö çai bluca cuobä.
- ¹⁷Camiyä Pablo ya imicö cadidiwänö, bämacö lä nofimaö wei ya tä afa onibläö lä cule. Camiyänö ya sibä oni lä shimaö wei sibä ja, inaja täbä nia oni shilo ola cuo. Wale imicö no öjöbäbä ei ya tä onibläö lä cule.
- ¹⁸Bada tä Jesucristo lija bämacö bayelimaö talei, wamacö nofi bluca ojomabobä. ¿Öjö tawä? Inaja lä tä cuobä.

1 Timoteo

1 Timoteo 1

¹Jesucristo bāma a lä bufiblaö wei a lä cuinö wale lä shimöleno wei ei camiyä Pablo cā ya. Yai Bada tänö wale shimaö fa bufinö wale shimölema, bāmalecö lä fucāaö wei a Yai Bada lä cuinö.

²Uasi Timoteo, cafä lija ei ya si onimaö lä cule, Jesucristo lija wa bufi cuquema yalo, bä nofi ijilumaö lä cadidio wei wa lä cui lija. Bei. Fayä Yai Bada lija showadi wa bayeliblamobä, Bada tä Jesucristo lija çai. Wa nofi shïlo ojodaboböbä. Showadi wa nofi çai asiboböbä. Wa bufi shïlo çai yanöcömaboböbä.

³Masedonia tä ulufi jamö ya lä funo wei dājä, mijamö cafä Efesoteli bä lija bä jämaquefälöma. “Mijamö a cudia da balöicu”, bä nowa da tableinaja showawä. Yai Bada tä a wäyämobä jamö, shomi tä a jole lä wäyää wejei wa bä a wasöbä, bä jämaquefälöma.

⁴Nö badabö tä a ja bä yabäcäo mlaobä, bä da wasö. Bada täbä jaba lä bälöono wei tä afa çai wayoaö labaaö mlaofälöbeje. Öjö bä a lädou dājä, täbä bufi shïlo wedinajamou. Jesucristo a nofi yai lä mölabou wejei dājä, täbä bufi nia shïlo yai jaducäafälöö.

⁵Shomi tä a ja bä yabäcäo mlaobä, ya bä wasöö bufii lä cule. Yai Bada lija bä bufi cadidilanö, dodijidawä Jesucristo ebä yai nofimayobä. Bä bufi wacacalanö, bä bufi bejedimolanö, bä nofimayobä.

⁶Ai bä lä cuinö, Yai Bada tä a nofi jaba ma cadidibono wejei ma cui, bä a fa shomianö bä a yacläö majöa. Shomi tä a ja bä nö bleaaö majöa.

⁷Moisesi tä a ja täbä damaö bufi ma doblao wejei ma cui, bufi jaducäa mlalanö bä a faö. Bui jaducäa mlalanö tä a jole wäyääje.

⁸Öjö Moisesi bāma etä a dodijidawä daö waiquiwä. Bui jaducälanö tä a wäyämou dājä, tä a malä doblale.

⁹Ei tä lä cui bāma tä nofi jaducäbolanö bāmacö bufi shïlo jaducäo. Moisesi tä a ja, täbä lä dodijaö wei täbä nowa tamoimi. ¿Öjö tawä? Täbä wasöo lä mlai, täbä fe lä blacäjou wei, öjö täbä nowa shïlo li tamou. Yai Bada tä bufiblaö lä mlajei, täbä wälidiwä talewä çai. Tä a lä waii wejei, tä a noca çai lä flecaö wejei bä lä cui, öjö bä nowa li tamou. Bä föö bä lä shäö wejei bä ma cui, bä nöö bä lä shäö wejei bä ma cui, yanowamö täbä lä shäö wejei bä ma cui, öjö bä çai.

¹⁰Täbä nofi lä jushublalou wei bä çai, ai a walo mö feduwä sho cäcöbä lä cuaaö wei bä çai. Täbä lä wayuaö wejei bä ma cui, täbä lä jolemou wei bä ma cui, öjö bä nowa çai bluca tamou. Täbä nofi lä wälimabou wejei bä çai, Yai Bada tä a jiliaö bufio lä mlajei bä çai.

¹¹Öjö tä a lä cui, Jesucristo dodijidawä etä a lä doblale tä a li showawä. Öjö ya etä a dodijidawä wäyääö cuaabä, Yai Bada tä nofi lä doablamou wei tänö wale shimölema.

¹²Bada tä Jesucristo lija ya bufi doblalou, ya ojordamobä wale nö lä wəlojomabole a lä cui lija. Wale shimabä wale cadidilema. “A doblou fe yadio wä”, wale nofi fa tadalönö, ya bufi ayäyaimou.

¹³Ya tä nö jaba ma waiblano wei ma cui, ya ebä nö jaba ma bleaamano wei ma cui, ya wəfa jaba ma lafujano wei ma cui, wale nofi asiboma. “Bejedi lä a wə”, ya bufi jaba cuu fa mlacunö, ya mojudili cuaama yalo yale nofi asiblalema.

¹⁴Bada tänö wale nofi çai ojordadaö fe fa balojoonö, bejedi wale bayeliblalema. Jesucristo lija ya bufi fa cuicunö, bufi cadidiwä tä jibäbema, bufi nofimou tä çai.

¹⁵Ei tä ą bejedi, tä ą nofi mölabobeje cä tä ą. Wəlidiwä talewä täbä bayeliblabä, Jesucristo a yanowamöblaleyoluma. Wəlidiwä talewä bluca bä cua ma cule, camiyä ya nofi shılo yai jushuaö dodijioma.

¹⁶Öjö ma cui, täbä bufi bluca nia fa jaducäblamanö, camiyä ya yai doblono lä mlai yale nofi asiboma. Täbä ąlimiobä a bejedi nia obi lä bufibono wejei täbä lija, Jesucristo a bufi nia oquewä fa dablamonö, camiyä wale nofi asibou balöoma. “Öjö a nö joyaa yailebö a ma cui, a nofi malä asibono wei”, bä bufi nia fa tadamanö.

¹⁷Öjö tawä? Tä shılo Bada nosiemou lä ayai, tä lofote cua shi lä wəlıle a lä cui, öjö tä ąfa doblao tamou shi wəlıbä. Tä dablamous dao lä mlai, tä bufiblabeje tä Yai Bada cua lä ayale, tä ąfa doblao tamou shi wəlıbä. Öjö lä tä nofi yai doablamos shi wəlıbä. Inaja lä tä cuobä.

¹⁸Uąsi Timoteo, bä yömölaö a lä cule. Yai Bada tä ą lä wawämaö wejei bä lä cuinö, cafä wa wəfa lä jayumano wejei tä ą nofi da jaducälä. Yai Bada lija wa nö nia ojordamou lä wəlojano wei tä ąfa wäaö malä balöono wejei. Öjö wa tä ą nofi jaducäbolanö, täbä ą ma lämou wei ma cui, quili mlai ja wa nö wəlojaö fe yadiobä.

¹⁹Jesucristo lija a bufi bejedimou da dodijio. Wa bufi wacacalanö wa wasöobä. Ai täbä bufi wasöo fa mojonö, Jesucristo a nofi jaba ma mölabono wejei ma cui bä bufi yacläa fe balojolayoma.

²⁰Imeneo, Alejandro sho cäcöbä bufi wasöono malä mlai. Cäcöbä bufi wasöo fa mlacunö, fecula bada Sadanasi lija ya cöbä noshi öjödaboma. Öjönö cäcöbö nö fa bleaamanö, cäcöbä bufi jaducäblou fe yadiobä ya cöbä jibäquema, Yai Bada tä nö waiblabböo çodaaö mlaobä.

1 Timoteo 2

¹Öjö cudeenö, inaja tä yai tamobä. Yanowamö jödödöwä bä bayeliobä, Yai Bada lija wamacö nia nacou. Wama bä bayeli nacabä. Yanowamö wama bä bluca bayelimabä. Bä lä bayeliblamou wei däjä, Yai Bada lija wamacö bufi ąfa çai doblalou wäamobä.

²Bada jödödöwä täbä lä bälöblai, Yai Bada lija wama bä nia bayelimaö, bä bälöo yanöcöobä. Camiyä bamacö lä cui, bamacö quilijou mlai ja bamacö bälöo yanöcöo mö feduobä. Yai Bada lija bamacö bufi cadidilanö, tä tamaö lä bufii wei tä ja bamacö cadidobä.

³Öjö tä dobla. Inaja wamacö cuaaö ja, Yai Bada wama a bufi nia doblalamaö, bämalecö lä fucäaö wei a lä cui.

⁴Yai Bada a lä cuinö, Jesucristo lija yanowamö bluca täbä fucäamaö bufi dobla. Bejedi tä ʘ ja, täbä bufi ʘai jaducäblamaö bufi dobla.

⁵A bufiblamobä moli tä Yai Bada malä cule. Öjö lija bämalecö ajedamaö ʘobä, moli a ʘai yanowamö malä cule, Jesucristo a lä cui.

⁶Öjönö bämalecö bluca ʘablabä, cama a dodoo läoma. A shämou lä ojodaono wei tänö, täbä fucäaö bufi lä doblaono wei tä wawäblaliyoma. Tä nia wawämaö lä showadaono wei däjä, öjö däjä showadawä, ʘacumö tä wawämalema.

⁷Täbä bluca fucäaö bufi dobla yalo wale cadidilema, ya etä ʘ wäyäbä. Jesucristonö wale shimölema. Ya jolemoimi, ya bejedimou. Judio bä lä mlai ya bä yömölabä wale shimölema. Tä ʘ nofi mölabobeje, bejedi ya tä ʘ wäyäö.

⁸Öjö cudeenö, abenaja ya tä tamaö bufii lä cule. Jesucristo ebä yododaö lä blaucodi jamö, wəlo bänö Yai Bada a nia wəliije. Dodijidawä bä bococu fa yaläjeicunö bä ʘ nia faö. Bufi cadidilanö, bä jushuo mlai ja, bä ʘfa tayou mlai ja, a nia wəliije.

⁹Inaja showawä, suwä dodijidawä bä nia cuo mö feduo. Bä bufi waiyamabeje, bä nia baushimou fe balojoimi. ʘÖjö tawä? Bä feta ʘcu lä liyäjäblamou wei tänö bä ʘfa dodijidawä tamobä mlai, dobä cäcö shico lä jalebou wejei tänö mlai, bä didiobä sibä nowa lä bluca wei sibänö mlai.

¹⁰Ma. Yai Bada tä lä daö wejei bä suwänö, dodijidawä tä lä taö wejei tänö, bä ʘfa dodijidawä yai tamobä. Yai Bada ebä ʘfa suwä lä jilou wei, inaja ebä dodijidawä cuobä bä malä cui.

¹¹Yai Bada tä ʘ lä wäyäö wejei jamö, wamicai bä suwä yömöca daobä. Bä ʘ faö mlai ja, dodijidawä bä yömölamobä.

¹²Suwä bä lija, wəlo ya bä damaö bufiimi. Suwä bänö wəlo bä nia nosiemaimije. Wamicai bä cuobä.

¹³Adana a tablamoa malä balölayono wei. Wəlo a nojamö, Ewa a cuo nomöjöoma.

¹⁴Fecula bada lija Adana a mölanomi, bä suwäbö e yai fa mölalönö, e bufi wəlidiblaliyoma. Yai Bada a wə fuaö mladaliyoma.

¹⁵Öjö ma cui, dodijidawä bä suwä cuo ja, ijilu bä ninibouje däjä bä bayeliblamou wä. Yai Bada a nofi mölabou showaoje ja, bä bufi nofimou showawä ja, Yai Bada lija bä cadidou showawä ja, bä nia bayeliblamou.

1 Timoteo 3

¹Ei bejedi lä tä ʘ. Yai Bada ebä ʘai yododabä a bada cublou bufi dobla ja, inaja lä yai. Tä dodijidawä. A ojodamobä lä.

²Bä nia çai lä yododaö wei a lä cui, abenaja a bada cuobä. A wafa tamou dao lä mlai, bä suwäbö moli a lä bou wei, a wasöo lä dao wei a bada cuobä. A bufi lä dao wei, a lä dodijaö wei a cuobä. Fama bä bälömabou bufi lä doblao wei, dodijidawä Yai Bada etä ą ja bä bufi lä jaducäablalamaö wei a bada cuobä.

³Shi wəlimamodima ubä ja, cama a shi wəlimamou lä mlai a cuobä. A waitelimou si ijejewä lä mlai, a wə lä oquedio wei a yai cuobä. A wə lafufou lä mlai, madofi bä ja a bufi mö blucaö lä mlai a bada cuobä.

⁴Cama ebä lä cadidamaö wei a cuobä. Bä ijilubö wamicai bä lä tabodii wei, dodijidawä bä ijilubö ebänö a wə lä fuaö wejei a bada cuobä.

⁵Öjö malä cui. Cama ebä cadidamaö dobloimi waiquiwä ja, Yai Bada bei ebä cadidamaimi yaiquei.

⁶Jesucristo a bufibläö dudoo ja, Yai Bada ebä çai lä yododaö wei a wafa bada jilamou jaöo mlai. A ma dude wei ma cui, cama a bada cublou jaödao ja, cama a nofi doablamou jatoquei. Öjö dāja, fecula bada a lija Yai Bada tänö tä nowa lä tabono weinaja, tä nowa çai tabou majöquei. Fecula bada a lä cui, cama a nofi doo fa dicoonö a malä joyamolayono wei.

⁷Abenaja çai. Bada a nia lä cublou wei, Yai Bada ebä lä mlai bä ma cuinö, inaja showawä a nofi çai tabobeje. A wafa tamobä tä cua ja, fecula badanö a läa dicolei.

⁸Inaja showawä, Jesucristo ebä bayeliblabeje bä bada lä cui, öjö bä dodijidawä cuo mö feduobä. Bä ą cadidou showai bä cuobä, cama bä shi wəlimamou lä mlai, madofi bä ja bä bufi waiyou lä mlai.

⁹Öjö bä bada lä cui, bä bufi fa walalaonö bä dodijabä. Cama bä lija tä ą lä wäyāno wejei tä ą nofi bejedi cadidibobeje.

¹⁰Ai täbä lija bä bejedi damoa fa balölalunö, täbä ąfa nö tamobimi ja, Yai Bada ebä lä bayelibläö wejei bä ąfa bada jilamou cuquei. Öjö dāja, dodijidawä bä ojodamobä Jesucristo ebä nia bayelibläöje.

¹¹Bä suwäbö ebä çai dodijidawä cuo mö feduobä, ai bä ąfa lä wayoaö wejei mlai. Cama bä suwäbö wasöo lä dodijii, showadi bä lä bejedimou wei bä suwäbö ebä cuobä.

¹²Jesucristo ebä lä bayelibläö wejei bä bada lä cui, moli bä suwäbö ebä cublamobä. Bä ijilubö ebä lä cui, dodijidawä bä fa wasöbojenö, dodijidawä bä fa yömölabojenö, bä dodijidawä çai cuobeje. Inaja showawä, cama ebä çai bluca lä cule, bä dodijidawä çai cuobeje.

¹³Yai Bada ebä lä bayelibläö wejei bä lä cui, dodijidawä bä bada ojodamou ja, bä ąfa dodijaö wäyāmou. Bä bufi waiteliaö cuquei. Jesucristo a nofi lä mölabou wejei tä ą wäyāö quiliimi cuqueije.

¹⁴Bä fe walou jaödao bufi ma doblao wei ma cui, ei ya si oni shimaö balöo, wa moyawäobä.

¹⁵Ya fuu yabäcäo bädao ja, bufi wedinajamou mlai ja, Yai Bada wa ebä cadidamabä. Jesucristo a nofi mölabouje yalo, Yai Bada a demi cua shi lä wälile, öjö ebä dodijiwä. Öjö a wano cadidibobeje ebä. Etä a shominajablobä jamö bä a läobä, bä bufi lofotomabou. A yafi wäcäblou mlaobä, a yafi lofotobou lä culajeinaja, inaja showawä Yai Bada tänö cama ebä lofote lämabou.

¹⁶Yai Bada tä a lä wawäblaliyono wei, bäma tä afa bejedi wäyää. Bejedi fe balojowä lä tä a. Abenaja tä a cuu. Jesucristo a yanowamöblaleyoluma. Yai Bada tä Bufinö a bejedi jimöquema. Ajele bä lä doblaladi bä lija a damolaliyoma. Bluca täbä caficö a ja, a wafa wäyämou cuaama. Yanowamö täbä lä bälöblai bänö a bejedi bufibomaje. Fedu tä lä doblale jamö a çomolayoma. Öjö lä bäma tä a wäyää.

1 Timoteo 4

¹Öjö tä a bejedi ma cui, Yai Bada tä Bufi a cadidou. Abenaja a cuu. Tä nö fa dedelönö, yai bä lä jolemou wei ai bä a fa jiliajenö, fecula bä a ja täbä nia jowa möläö. Öjö fecula bä anö bejedi tä a nia jowa joyaöje.

²Tä a jole lä wäyää wejei täbä anö täbä nia mölalayou. ¿Öjö tawä? Yai Bada tä a ja, täbä jole jole ma yömöläö wejei ma cui, bä bejedimoimi. Bä wasöo fa mlacunö bä bufi baömöa çolayou. Bä bufi fa baömölönö, tä lä dodijidai tä nö öjöböaimije. Tä lä wälidii, inaja showawä.

³Öjö bänö suwä bä doaö wasööje. Bä çai iyaö wasööje. Tä a bejedi lä bufibou wejei bä waiobä tä cua ma mlai ma cui, bä iyaö wasöo bädaoje. Tä a lä daö wejei bä waiobä tä cua ma mlai ma cui. ¿Öjö tawä? Bamacö iyabä lä bä nii malä tablaleno wei. Yai Bada lija bamacö bufi afa doblalou wäyämou fa balöonö, bamacö iyabä.

⁴Yai Bada tänö täbä lä tablaleno wei täbä bluca dodijidawä. Öjö lija bamacö bufi ayäyaimolanö, bäma täbä dääö ja, bamacö waio majöobä tä cuami.

⁵Yai Bada bäma a wä nofi jaducäbolanö, öjö lija bamacö bufi afa doblalou wäyämolanö, bäma tä nii waiibä tä cua malä mlai.

⁶Cafä lija ya tä a lä wäyäle, Jesucristo ebä lija wa tä a nia wäyää fe dolemou. Wa tä a wäyää fe dolemolanö, Jesucristo dodijidawä wa nosie fuabä wa e nia cuo. Bejedi wa tä a cadidibou ja, Yai Bada wa tä a nofi jaducäbou ja, wa bufi bayeliblamou cuquei.

⁷Nö badabö tä a bluca da wailö. Yai Bada tä a malä mlai. Täbä bayeliobä tä a malä mlai. Showadi Yai Bada wa wä yai fuaö dodijibä, a bufi nö wälojaö da wabäo.

⁸Täbä lofote wabäo däjä täbä nö wälojodou ma cui, Yai Bada a wä fuabeje bä lä wabäo wei bä lä cui, öjö bä yai bayeliblamou malä dodijio wei. Inaja bä lä cuaaö wei, eja bä ma cuo däjä ma cui, fedu jamö bä ma obi cuo majöodayou däjä ma cui, bä bayelio shi wälibä cäbä.

⁹Tä a bejedi dodijiwä. Tä a nofi mölabou fe balojoobeje tä a.

¹⁰Yai Bada tä demi cua shi lä wälile bäma a nofi mölabou yalo bämacö malä ojodamodii wei, bämacö nö malä wälojadii wei. Öjönö täbä bluca fucäabä a. Jesucristo bäma a bejedi lä bufibou wei bämalecö yai fucäabä a li.

¹¹Ei ya tä ʘ lä wäyäle, Yai Bada ebä lija wa tä ʘ wäyäo fe dolemobä. Ei tä ʘ ja täbä da cadidama.

¹²Wa fiya ma cui wa nö waiblamou dodijio mlai. Jesucristo bufilewä bänö wa owämabeje a da dodija. Dodijidawä wa bä ʘ lä wayomaö wei, dodijidawä wa bä çai lä bälöo wei, wa owämabeje. Wa bufi lä nofimu wei, Yai Bada wa nofi lä mölabou wei, suwä bä lija wa yabäcäo lä mlai, wa yai owämabeje.

¹³Ya fuu mlao däjä wale nö dabolano, Yai Bada ebä lä yododaö wei däjä, cama wa etä ʘ oni doaö wawädoobä. Öjö tä ʘ ja wa bä yömölabä. Wa bä damabä.

¹⁴Yai Bada tä Bufinö wa nö nia lä wälojoblamaö wei wa tä nofi mojudublaö mlai. A nö shïlo da wälojoicu. Jesucristo ebä çai lä yododaö wejei bä bada fa çocamolunö, wawädo wä wa jimöa cadidiquemaje. Wa nia lä bayeliblamou wei wa wäfa wäyäo balöomaje. Bei bä imicö maquequeo däjä, Yai Bada tä nö bayeli jibämoquema, wa nö wälojabä.

¹⁵Ei bä lä yömölafe tä ʘ ja, wa bufi cadidia showalanö a da wabäo. Wa nia lä cadidou wei tä nofi yai da yaibo. Wa yai dodijaö lä balafälöo wei däjä, bluca bä lija wa dodijaö dablamobä.

¹⁶Wa bejedimobä a da moyaweicu. Wa tä ʘ lä wäyäo wei tä ʘ da cadidilä. Inaja lä wa cuaaö anö, wa nowamöo cuquei. Wa wä lä jiliaö wejei bä ma cui, öjö wa bä çai nowamaö mö feduquei.

1 Timoteo 5

¹Wa wä lafujou mlai, dodijidawä bada wa bä nia wasöo. Wa bä lä föömou wei wa bä oquewä wasöo lä cuaaö weinaja, wa bä ʘ nia oquewä wayomaö cuaaö. Aifä wa bä nofi lä tabou weinaja, fiya wa bä nofi tabou mö feduobä.

²Wa bä lä nöömou wei wa bä nofi lä tabou weinaja, badayoma wa bä nofi tabou mö feduobä. Wa yabäcäo mlai ja, yaöfä wa bä nofi lä tabou weinaja, suwä moco wa bä nofi tabou mö feduobä.

³Yai Bada ebä lija bä suwä lä yamiblaliyono wei bä coyocowä ja, bä mashi cuami ja, Yai Bada ebä lija bä bayeliblamaö da bufi.

⁴Culenaja cama bä suwä lä yami wei ebä cua ja, bä ijilubö ebä cua ja, bä fäähä ebä cua ja, öjö bänö bä bayeliblabeje. Inaja Yai Bada tänö bä taamaö bufii. Bä osheo däjä, bä nöo lija bä jaba bayeliblamou lä balöono weinaja, bä nöo ebä taamaö nomöjööbeje. Inaja bä fa cuaanö, Yai Bada a bufi doblamabouje.

⁵Bä suwä yami fe lä balojoi bä lä cuinö, bä mashi cua lä mlainö, Yai Bada a nofi mölabouje. Inaja bä lä cuwä wei, wama bä bayeliblamabä bä li. Jalu däjä ma cui, didi däjä ma cui, Yai Bada lija bä ʘ shïlo fadii. Bä nö bayeli shïlo nacao.

⁶Öjö ma cui, ai bä suwä lä yami wei bä lä cui, inaja bä cuaaimi. Bä bufi wasöomi. Cama bä cuaaö bufi lä doblao weinaja, bä shïlo cuaaö bufi doblao dicoo. Bei bä demi ma bei ma cui, bä bufi nomawä.

⁷Ei bä nowa lä tafenaja, Jesucristo ebä taamaö da bufi, bä ɤfa dobloimi tamou mlaobä.

⁸Yai Bada ebä ɤfa ma jilou wei ma cui, cama ebä bayeliblainimije ja, bä dobloimi waiquiwä. Cama ebä ɤai lä cuo wejei bä bayeliblainimije ja, bä dobloimi fe balojowä. Yai Bada tä ɤ waii malä wawädoö wejei. Jesucristo a bejedi bufibou lä mlajei täbä doblou ma mlai lä ma cui, inaja bä lä cuaaö wei bei bä li dobloimi yaiwä.

⁹Abenaja bä suwä yami cuwä, bä bayeliblamobä wa bä ɤfa nia onibou. Bä badayoma waiquiwä ja, lasha 60 a jayumaö waiquiweje ja, bä feyalobö moli e cuoma ja, Yai Bada ebänö öjö bä nia suwäbada bayeliblaöje.

¹⁰Bä jowa dodijama ja, bä bayeliblamobä. Dodijidawä bä ijilubö ebä ɤai jowa cuomaje ja, ebä bufi jowa cadidamamaje ja, bä ɤfa nia onio. Fama bä jowa iyamamaje ja, Yai Bada ebä jowa bayeliblaö ojodaomaje ja, bä bayeliblamobä cäbä. Bä nö lä bleaaö wei bä nofi jowa ojodabomaje ja, showadi bä jowa dodijaö bufi doblaoma ja, inaja bä suwä yami cuwä, bä ɤfa nia onio.

¹¹Öjö ma cui, bä suwä yami moco showawä ja, Yai Bada ebä lija bä bayeliblamobä bä ɤfa onibo dijä. Cristo a nofi jaba ma yaibou wejei ma cui, bä shi jaliblalou dicoo ja, bä feyalobö bä dääö bufi doblao majöoje.

¹²Yami bä nia fa cuonö bä ɤfa jaba ma onibou wejei ma cui, bä shominajaaö dicoo däjä, Yai Bada lija bä jolemou dablamous.

¹³Abenaja ɤai. Suwä moco bä lä yamiblou wei bä ɤai mojiblou si ijejewä. Bä ojodamous mlai, bluca bä yafibö jamö bä mojudili loadalou. Inaja bädao mlai, wano wano bä ɤ ɤai wäyööje. Bä ɤ fabä tä ma mlai ma cui, bä ɤ nofi jushuaö diwalou.

¹⁴Öjö cudeenö, suwä yami bä moco lä cui, abenaja ya bä taamaö bufii. Bä feyalobö ebä dääö ɤobeje. Bä ijilubö ebä taö ɤobeje. Dodijidawä cama ebä ɤai bluca bälöobeje, Yai Bada tä daö lä mlajei bänö bämalecö nofi ɤfa jushublalou taö mlaobeje.

¹⁵Ai bä suwä lä yamiblono wei bä shominajaaö fa dicoonö, fecula bada Sadanasi lija bä yaua malä waiquile.

¹⁶Yai Bada a bejedi lä bufibou wei a suwä lä cuinö, e suwä mashi yamiblou ja, öjönö e bayeliblabä, Yai Bada ebä blucanö mlai. ¿Wedi tabä, nii bä ja Yai Bada bäma ebä nö bluca li bleaamaö bädaquei? Yai Bada ebä lä cuinö, bä suwä yami lä dodijii bä yai bayeliblaö walalobeje.

¹⁷Yai Bada ebä ɤai lä yododaö wejei bä bada lä cui, dodijidawä bä ojodamous ja, “Ei yama bä nia bayeliblaö”, wama bä nofi tabobä. “Ei yama bä ɤ nia fuaö”, wama bä nofi ɤai tabobä. Yai Bada tä ɤ wäyöö nö lä walojaö wejei, bä ɤai damaö nö lä walojaö wejei, wama bä yai bayeliblaö dodijiojä.

¹⁸Yedu ja, ei tä ʔ oni cuo malä showaono wei. Yalo täbä bädawä ma cui, täbä nö yalo ofili bleamaö mlaobeje, tä ʔ oniblamolayoma. Nii wa şicosi lõshiblamabä, yalo bä lija wa şicosi cablushamabä jamö bä iyaö mlaobä, wa bä fiyoca nia ʔcaimi. Ei tä ʔ oni ʔai cuo mö feduo showaoma. A lä ojodamou wei, a dobämobä a malä cui. ¿Öjö tawä? Yai Bada lija bä lä ojodamou wei bä yai dobäbeje, tä ʔ li oni.

¹⁹Jesucristo ebä ʔai lä yododaö wejei ai a bada lä cui, moli anö a wano wäyäö ja, wa wə nia jiliimi. A wano lä wäyäbö wei cäcöbä bolacaa ja, öjö lä däjä, “Bejedi lä cäcöbä ʔ”, wa bufi şilo cuu cuquei.

²⁰Ai bä bada wasömamoimi ja, Jesucristo ebä lä yododaö wei däjä bä wasöo da wawädo, bä bluca quilibä.

²¹Bä nowa taö cadidia lä cule, Yai Bada tänö wale malä dablale. Jesucristo a ma cuinö, Yai Bada tänö täbä ʔjele lä yaiboladi täbä ma cuinö wale ʔai dablaöje. Ya bä wasöo lä bufilenaja wa bä wasöo dodijio. Shomi wa täbä nia wasöo ayaomi. Afä bä cadidiwä ma cui, shomi bä ma cui, bä doblou lä mlai jamö, quili mlai ja, wa bä nia bluca wasöo fe usucuo.

²²Bada wa bä tablamaö shi jalio mlai. ¿Öjö tawä? Wa täbä bejedimou möö fa balöonö wa täbä yaiablabä. Ai a jolemou bädao ja, “¿Wedi tabä ei a ma jolemou wei a yaia dicolema?”, wa nofi tabou cuqueije. Cafä a bejedimou da dodijio.

²³Fei däjä mau wa ubä şilo coaö bädao mlai, nashiwä wiisibö toubä ʔai da coa, wa amocu owäjäblobä. Wa şilo malä jaliliaö wei.

²⁴Ai täbä nofi lä jushuaö wei, bluca bä lija täbä dobloimi dablamou showadao. Yai Bada lija bä nofi nacao wawädo. Ai bä nofi jushuaö lä ʔatoo wei, obi etä li wawäblou cuquei.

²⁵Inaja showawä, täbä lä dodijaö wei täbä ʔai dodijaö damolaliyo. Täbä dodijaö dablou jaöo bädaomi ja, täbä ʔacumö dodijaö wawäblaliyo.

1 Timoteo 6

¹Yai Bada ebä lä cui, täbä nosie fuamobä bä lä tabou wejei bä lä cui, dodijidawä bä cuo fe yadiobä. Bä fujebä ma mlaoje däjä ma cui, bä dodijaö fe yadiobä. Bä dobloimi dicowä ja, Yai Bada a wəfa jayumaö dicoo mlaobeje. Yai Bada tä ʔ lä wäyämou wei tä ʔ ma cui, tä ʔfa wayoaö dicoo mlaobeje.

²Bä lä tabou wejei bänö Yai Bada tä bejedi ʔai bufibou mö feduoje ja, bä nö waibläö mlajei, bä ʔ yai fuaö dodijidaobeje. Bä lä bayeliblamou wei bä lä cuinö, Jesucristo a ʔai bufibläö mö malä feduo wejei. Yai Bada tänö, öjö bä nofimaö mö malä feduo wei. ¿Öjö tawä? Ei tä ʔ lä cui, wa tä ʔ wäyäö cadidiobä. “Ei tä ʔ da däleje”, wa bä nowa taö dodijio.

³Yai Bada ebä yododabä jamö, ai anö tä ʔ shomitawä wäyäö ja, Bada tä Jesucristo dodijidawä etä ʔ owäboimi ja, a da moyaweicu. Yai Bada ebä dodijabä tä ʔno lä wäyämou wei tä ʔ cadidiboimi ja, a dobloimi waiquiwä.

- ⁴Inaja a lä cuaaö wei a lä cui, cama a nofi li yaimamou waiquiwä cudeenö, tä ą li cadidiboimi. A nofi ma doo wei ma cui, a bufi mojadi. A wą fabä tä ma mlai ma cui, a wą shılo läodii. Bä ą lulubou bufi doblao dicoo. Bä ą fa lulubonö, bä nofi walıayou. Bä ąfa lafujayou. Bä ąfa tayou. Bei bä bufi jushuo fe balojafälöö.
- ⁵Bä bufi walıdiwä waiquiwä yalo, Yai Bada tä ą nofi mölabou fa mlacujenö bei bä ą shılo jöshöcou. Abenaja bä bufi jole cuu. “Yai Bada ya bufi doblalamaö ja, ya shi fa öjödamanö ya nö madofibölayou”, bä bufi jole cuu.
- ⁶Yai Bada lija bamacö bufi nia lä bayeliblamou wei tä yai cua. Öjö bama a bufi doblalamaö ja, bamacö bufi ąai fa yanöcödalunö, bei bamacö bufi nia yai bayeliblamou dodijio.
- ⁷Eja bamacö oshe lä wawäblaliyono wei dąjä, madofi bama bä ąai wawäblonomi. Bamacö lä mladou wei dąjä ma cui, shomi jamö bamacö cua lä majöquei wei dąjä, bama bä nia ąai madofi yefiboimi.
- ⁸Ei tä lä cui dąjä bamacö iyabä tä cua ja, bamacö didiobä sibä cua ja, öjö bä waiquiwä ja bamacö bufi yanöcöobä.
- ⁹Öjö ma cui, madofi bä ja bä bufi mö lä blucuo wei bä yabacamou fe balojoo. Bä bufi fa yabäcäblamonö, cama bä fujeblamou ąobä tä cuami. Widicama ajamö yuli bä lucämaöje dąjä, bä faö ąo malä mlai. Bufi waiyou tänö bä bufi doblamaimi. Bä mojuduo bufi doblao fa waiquionö, bä bufi fa walıdiafälönö bä walıyoblou.
- ¹⁰Showadi madofi bä jamö bä bufi mö lä blucuo wei bä lija, walıdiwä tä bädou. Walıdiwä tä bluca lä tamou wei tä bädaliyo. Inaja ai täbä bufi yaimou fa cuanö, Jesucristo a bufiblaö fa mlaafälööjenö, cama bä nö bleaamamou fe balojoo.
- ¹¹Öjö ma cui, ąfä Yai Bada wa e lä cuinö, öjö wa tä bluca waii showadaobä. Wa dodijabä a bufi shılo da cadidiicu. Yai Bada tänö tä taamaö lä bufii wei tä ja, a bufi da macocoicu. Yai Bada wa tä ą nofi nia lä mölabou wei, wa bufi nia ąai lä nofio wei, öjö tä da yailä. Wa bufi nia cadidio fe lä yadio wei, dodijidawä wa bä nia ąai lä cuo wei, öjö tä da yailä.
- ¹²Täbä wayu fubä jamö täbä bufi nö walojoablalou lä culenaja, a bufi da cuicu, Yai Bada wa wą yai fuaö shaliliobä. Wa nia lä ąalimiblou wei tä ą da lofotolö. ¿Öjö tawä? Wa ąalimiobä, Yai Bada tänö wa nacalema. Jesucristo wa nofi ąfa mölabou lä wäono wei dąjä, bluca täbä yömöca mada daoblei.
- ¹³Ąfä bä yömöläö cadidia lä cule. Täbä bluca lä demidamaö wei Yai Bada tä malä cule. Jesucristo a ąai malä cule, tä ą bejedi wäyöö lä waiteliano wei. Bösio Bilado a wą nö bada ma quiliano wei ma cui, tä ą wäyöö quilino malä mlai.
- ¹⁴Abenaja bä nowa taö. Bada tä Jesucristo a nia bädou ąoyoluu. Öjö a waloo showao mlao dąjä, Yai Bada ya wą lä wäyäle tä ą da cadidilä. Tä ą da jılılă, wa wąfa dobloimi tamou mlaobä.
- ¹⁵A bädou bufio dąjä, Yai Bada tä lä doblalenö a bädamaö wä, Bada a yai lä läle a lä cuinö. Öjö Bada cä tä ayawä. Bada täbä bluca lä cublai täbä nosiemaö.

¹⁶Öjö a shïlo ɓalimi cua ayaa. Tä shï lä wacalamiladi jamö a cuadayoa. Bamacö icuo dao lä mlai jamö a cua, yanowamö täbä lija a dablamo lä mlai. A dablamoimi waiquiwä. ;Öjö a wafa shïlo yai doblao tamobä! ;Öjö a yai shïlo Bada cuo dodijjobä! Inaja lä tä cuobä.

¹⁷Täbä nö lä madofibö wei bä da cadidama. Madofi bä ja täbä bufi afa jole doblao tao mlaobä, bä da wasö. Madofi bä mlaö si lä ijejei bä ja bä möläö mlaobä. Yai Bada a nofi yai mölabou dodijiobeje. Öjönö bluca täbä ja bämalecö dobäo fe balojowä, bamacö bufi doblalobä.

¹⁸Dodijidawä bä cuobä wa bä nia yömöläö. Ai bänö madofi bä doaö shi jalimou lä cuaaö wejeinaja, dodijidawä tä ja bä bufi mö shïlo blucaobä. Bufi doblalanö ai täbä bayelibläö ojodaobeje. Bufi lämou mlai ja bä shi öjödaobä.

¹⁹Inaja Yai Bada ebä shi öjöde lä cuaaö wei, bä nia obi malä bayeliblamodayou wei. Bä nia lä dobädayou wei täbä ja, jai täbä shimomadayouje bei tä cuwä. Äyämö culanö bä lä dodijaö wei tänö, öjamö lä bei täbä shimomaö balöadayoaje. Öja dodijidawä bä çai obi ɓalimi bälöo shi wälidayobä.

²⁰Timoteo, Uasi, çafä bä nowa taö dodijia lä cule. Çafä lija Yai Bada tä a lä wäyämöno wei, tä a da lofotolä. Bä a jole faö lä bädao wei bä lija a yömöca dao dijä. Bä bufi afa jole moyawe lä jilaö wejei bä lija a yömöca dao dijä.

²¹Ai bänö öjö bä a fa jililäjenö, Jesucristo a nofi jaba ma mölabono wejei ma cui, bä bufi shominajaaö majöo dicoo. Bei. Yai Bada tänö showadi wamacö bayeliblabä. Wamacö nofi shïlo ojadabobä.

2 Timoteo

2 Timoteo 1

¹Jesucristonö wale lä shimöleno wei, ei camiyä Pablo cä ya, Yai Bada tänö wale çai shimaö fa bufinö. Yai Bada tänö täbä afa bälimi lä wäyäo wei ya tä a wäyäo, Jesucristonö täbä lä bälimiblamaö wei tä a lä cui.

²Cafä Timoteo bä nofi lä ijilumale wa lä cui lija, ei ya tä a oni shimaö, bä lä nofimale wa lä cui lija. Bei. Fayä Yai Bada lija wa shïlo bayeliblamobä, Bada tä Jesucristo lija çai. Wa nofi shïlo ojodaboböbä. Showadi wa nofi çai asiboböbä. Wa bufi shïlo çai yanöcömaboböbä.

³Cafä bä nö bayeli nacaö ja, Yai Bada ya wä lä fuale lija ya bufi afa doblalou wäyämou talei. Judio yamacö nö badabönö a wä fuaö lä showaono wejei a lä cui lija. Bei ya bufi jamö ya tä wälidiwä lämabou mlai ja, öjö lijamö ya dodijidawä cua lä cule.

⁴Wa da öcöblei ya tä nofi jaducäbou yalo, didi däjä ma cui, jalu däjä ma cui, bä bufijaö. Bä wäyacu dabraö ço däjä, ya bufi nia doblalou dodijio.

⁵Bufi cadidilanö, Jesucristo wa nofi yai lä mölabou wei ya tä nofi çai jaducäbou. Amiyäfa Loida a lä cuinö, öjö a nofi mölabou balöoma, naafa Eunise a çainö. Fei däjä cafä wa ma cuinö, wa nofi çai lä mölabou wei ya tä çai daö.

⁶Bä nofi tabou waiquia cudeenö, bä bufi jaducäblamaö ço lä cule. Cafä lija ya imicö lä maqueono wei däjä, cama wa ebä bayeliblabä Yai Bada tänö wa dobäa cadidilema. A da ojodamo, öjö lä.

⁷Bämacö quilibä Yai Bada tä Bufi jibäamono malä mlai. Bämalecö nö yai wälojomabobä a. Bämalecö bufi yai nofimabou. Bämacö wasöobä, bämalecö bufi yai taamaö.

⁸Bada wa tä afa nia lä wäyäo wei tä ja, a quili dijä, öjö lä. Cristo tä a nowa ja, wale fe ma labolajei ma cui, jai wale daimi a cublo dijä. Jesucristo yama tä a dodijidawä wäyäo yalo, yamalecö nö ma bleaamalajei ma cui, a yädäo quili dijä. Yai Bada tä lofotenö a yai da yädäicu.

⁹Öjönö bämalecö fucälema. Cama bäma ecö dodijidawä yaiobä bämalecö nacalema. Bämacö fa dodijanö mlai. Ma, bämalecö cadidaö bufi fa doblaonö, bämalecö li cadidilema, bämalecö nofi ojodabobä. ¿Öjö tawä? Mashita a tablaö showao mlao däjä, öjö tä nabä cadidou showaoma. Bämacö nia lä bayeliblou wei, Jesucristo a nia shimaö showaoma.

¹⁰Yaçumö tä bejedi fa wawäblalunö, bämalecö nia lä fucäaö wei a Jesucristo wawäblaliyoma. Öjö a lä cuinö bämacö nia nomaö shi lä wälijio wei tä joyalema. Jesucristo dodijidawä tä a lä wäyämou wei tä anö, dodijidawä bämacö nia yai lä cudio wei tä wawäa nomöjömalema. Bämacö nia bälimi lä cuo wei tä çai.

¹¹Jesucristonö wale shimabä wale yailema. Cama etä ʘ lä dodijidai tä ʘ ja ya bä yömölabä, ya bä çai damabä.

¹²Inaja ya cuaaö cudeenö wale fe ma labou wejei ma cui, ya bufi quilijoimi. Ma. Ya bejedi lä bufibole a lä cui ya malä dale. Ya etä ʘ wäyää cuabä wale shimölema. Yai Bada tänö täbä jimabä etä cublou showao mlao däjä, cama etä lofotenö tä ʘ nia wäyämamou showao fe yadio. Öjö ya tä daö.

¹³Cafä lija ya tä ʘ lä wäyänö wei tä ʘ yai bejedi. Jesucristo wa nofi mölabolanö, wa bufi çai nofilanö, tä ʘ nofi yai da cadidibo.

¹⁴Öjö tä ʘ lä bejedi wei tä ʘ ja, Yai Bada wa tä Bufe lä bälömabolenö wa dobäa waiquilema, wa tä ʘ wäyäbä.

¹⁵Asia jamö bä Jesucristo bufilewä lä bälöblai bänö, wale waibou majöa lä culajei. Wa tä ʘ jilibole cätä. Fijelo a ma cuinö, Emojeni a ma cuinö wale waiböö majöa lä cule.

¹⁶Onisifo a lä cuinö, showadi wale bufi shilo lofotoamayoluu showao fe yadioma. Eja ya shi lä wälimabolajei jamö, duo shicö badanö wale ma ʘcabolajei ma cui, quili mlai ja öjönö wale fe waloo fe yadioyoluma. Inaja wale taamaö yalo, cama ebä çai lä cui ya bä bluca bayelimaö talei, Yai Bada tänö bä nofi bluca ojadabobä.

¹⁷¿Öjö tawä? Loma jamö a fa waloiquiyonö, wale dayäablalaö shi jalimoma. Yaçumö eja wale fe laa dalaleyoluma.

¹⁸Efeso jamö wale showadi lä bayeliblano wei wa tä çai daö waiquiwä. ¿Öjö tawä? Öjö cudeenö, Bada tä lija öjö ya nö bayeli nacaö, Yai Bada tänö täbä jimabä etä cublou däjä, a nofi yai ojadabobä.

2 Timoteo 2

¹¿Öjö tawä, Uasi? Jesucristo lija wa yädäa yalo, showadi wa nofi nia ojadabou. Öjö cudeenö, a bufi shilo da lofotoicu, öjö lä.

²Ya bä bluca da yömölablei däjä, cafänö wale ʘ mada jiliablei. Öjö ya tä ʘ da wäyäblei, ai bä lija wa tä ʘ nia wäyää fe dolemou, bä nia yai lä bejedimou wei bä lä cui bä lija. Tä ʘ wäyää fe dolemou nomöjöobeje, bä yai lä cui bä lija.

³Wayu bä fuu däjä bä nö bleaaö ma cui, bä fuu fe lä yadio weinaja, cafä a çai da cuaa, camiyä yamacö lä cuaaö weinaja showawä. Jesucristo a showawänö wa çai malä fuole.

⁴Sodado bä wayu itou däjä, shomi tä jamö bä nia yabäcamou lä mlainaja, cafä wa ma cui wa nia cuaaö. ¿Öjö tawä? Bä çai lä fuu wei a bada lä cui, öjö a bufi yai doblamabou bufi doblaoje yalo, shomi tä jamö bä yabäcamoimi. Inaja showawä, cafä wa çai lä fuole wa bufi çai doblamabou cuo mö feduobä.

- ⁵Inaja showawä, bä lofote wabayobä jamö ma cui, “Ei a shïlo yai lofote”, bada bä nia cuu si ijejeomi. Tä nabä yai lä shimamou wei jamö a cadidoimi ja, a wafa nia wäamoimi. Camiyä bämacö ma cui, bämacö cadidoimi ja bämacö nia dobämoimi.
- ⁶Ficali ca jamö ma cui, öjamö a yai lä ojodamou wei a lä cui, nii döano bä ja a iyaö balöobä a waiquiwä. A mojimo dijä, öjö lä.
- ⁷¿Öjö tawä, Timoteo? Ya lä cufe tä ja, a bufi yai da daeo. Wa bufi jaducämabou jödödöobä, Bada tä malä cule.
- ⁸Jesucristo a nofi yai da jaducäbo. A demi jocädou çolayoma, ¿öjö tawä? David nodiwä öjö a waiquiwä, ya etä a dodijidawä wäyäo ja, ya lä cuu weinaja showawä.
- ⁹Öjö ya tä a dodijidawä lä wäyäo wei tä nowa ja, wale nö bleaamaö lä culajei. Wale bococu ocabouje, bä nofi yai lä jushuaö wei bä bococu ocabou lä cuaaö wejeinaja showawä. Öjö ma cui, Yai Bada etä a ocao daomi.
- ¹⁰Öjö cudeenö, tä cublou ma bädale ma cui ja, Yai Bada tänö bä lä yaibole bä bayeliblamobä, ya nö walojaö fe yadio. Jesucristo lija bä fa fucäamonö, bä yai doblaodayobä.
- ¹¹Ei tä a bejedi, tä a nofi mölabobeje cä tä a. Öjönö bämalecö çai nomalayoma ja lä, öjönö bämalecö nia çai balimi cuo.
- ¹²Bämacö nö walojaö fe yadio ja, öjö lä showawänö bämalecö nia çai bada läo. Bäma a nofi mojudoubou dicoo ja, camiyä bämacö ma cui, bämalecö nofi nia mojudoubou mö feduo.
- ¹³Bämacö ai däjä cadidou ma mlai ma cui, a wä nia cadidou showao fe yadio. A wä shominajaaö majöobä a malä mlai.
- ¹⁴Ei ya wä lä cui ja, bä bufi da jaducäblamalö. Bä a wasöo da dodijio. Bada tänö wa çai malä cule. ¿Öjö tawä? Tä a lä wäyämamou wei tä a ja, bä a lämou da wasö. Bä a lä lämou wei bä anö, täbä nia bayeliblamoimi. Täbä bufi nia shïlo yai wälidiblou.
- ¹⁵¿Öjö tawä, Timoteo? A nö da walojoicu, öjö lä, Yai Bada lija wa icuo däjä wa wafa dodijidawä tadayobä. Yai Bada lija dodijidawä wa nosiemamou ja, wa etä a bejedi wäyäo shalilio ja, wa bufi quilijobä tä nia cuomi.
- ¹⁶Öjö bä a lä lämou wei jamö a icuo dijä. Öjö bä anö, Yai Bada lija täbä ajedou mlai ja, täbä yai blajaö majöofälöo.
- ¹⁷Walacasi tä wayunö täbä sicö jodei lä cuaaö weinaja, öjö bä anö täbä bufi wälidiwä taamaö cuaafälöoje. Öjö bä a shïlo lä lämou wei bä lija, Imeneo, Filedo sho cäcöbä coyocoblou dicoa lä cule.
- ¹⁸Bejedi tä a ja cäcöbä jaba ma cuono wei ma cui, cäcöbä a shominajaaö majöa. Abenaja cäcöbä jowa cuu majöa. “Ma, bämacö nia demi jocädou çomi. Ai bä demi jocädamaö çoa lä waiquilayono wei, öjö waiquiwä”, cäcöbä jowa cuu dicoo. Einaja cäcöbä cuu fa dicoonö, ai bä lä cuinö, Jesucristo a nofi mölabou ma waiquiono wejei ma cui, a bufiblaimi majöweje.

¹⁹Öjö ma cui, Yai Bada tänö cama ebä lofotomabou fe yadio, dodafi bänö yano bä lofotobou lä culajeinaja showawä. Abenaja etä ʼa oni cuu. Bada tänö cama ebä daö waiquiwä. Einaja tä ʼa cuu. Abenaja çai. Bada ebä ʼafa lä jilou wei bänö, wʼalidiwä tä taö mladobeje, öjö bä li waiquiwä.

²⁰Einaja tä ʼa cuu. ¿Öjö tawä? Bä nö lä madofibö wei bä lä cuinö, yafi dodijidawä bä tabouje. Öjamö täbä didibobeje etäbä çai madofi bluca cua. Olo bä ja ai täbä. Blada bä ja ai täbä. Fii fibä ja ai täbä. Jaboca shibä ja ai täbä. Bä nii babobeje, ai täbä dodijidawä tabouje. Canosi bä didiabeje, ai täbä çai wʼalidiwä tabou mö feduoje.

²¹Cama e yafi a bada lä cui, öjö a bayeliobä etäbä bluca. Cafä wa ma cui, wʼalidiwä tä ja wa aumamou ja, jai Yai Bada etä madofi wa e nia dodijidawä cuo, cama etä yafi jamö. Wa e nia yaio. Cama e yafi a bada lä cui, öjö a bayeliobä wa wʼa nia fuaö. Dodijidawä tä ja, showadi wa e noshi nia shilo öjödao.

²²¿Öjö tawä? Fiya bä bufi waiyou si lä ijejei tä lä cui, tä da wailö. Wa nia lä bejedimou wei tä lä cui, öjö tä nabä yai da cadido, Jesús wa nofi nia lä mölabou wei tä çai. A bufi da nofio. Bui yanöcöwä a da cuo. Bä bufi lä bejedimou wei bä lä cui, inaja bä cuaalanö Yai Bada tä lija bä nö bayeli malä nacao wei.

²³Täbä ʼa fabä tä cua ma mlai ma cui, täbä ʼa mojadi li faö bädao bashio ja, a wʼa yädäo dijä. Täbä bayeliblamobä täbä ʼami. Täbä ʼafa nia shilo yai tayou. Wa tä malä dale.

²⁴Bada wa wʼa nia lä fuaö wei wa lä cui, wa wʼa läablalobä wami. Dodijidawä wa bä çai bluca cuobä wa. Bui moyawälanö wa bä bufi yai jaducäblamabä, öjö wa. Wa bufi nofio fe yadiobä wa.

²⁵Cafä lija bä ʼa lä lämou wei bä lä cui, bufi oquelanö wa bä bufi nia cadidamaö. Cui. Yai Bada tänö bä bufi mö yabajadamaö çou ja, tä ʼa lä bejedi wei tä ʼa daa jätolalei fa cujei.

²⁶Fecula bada a wʼa nia fa fuamonö, bä ma fuwämamolayono wei ma cui, öjö däjä bä fujebliamoa jätou çolayou fa cui.

2 Timoteo 3

¹Öjö ma cui, Yai Bada tänö täbä nia lä jimaö wei tä cublou bufi däjä, täbä nia yai doloimi. Wa tä dabä ya wʼa.

²Ai täbä nofimaö mlajei ja, cama täbä nia nofimamou ayao. Blada bä nofi nia yaibouje. Cama bä ʼafa nia wäamou. “Camiyä yai”, bä bufi nia shilo cama cuu. Täbä ʼafa nia taöje. Bä föö e ma cui, bä nöö e ma cui, bä ʼa nia fuaimije. Täbä bufi nia çai dobloimi. Yai Bada tä ma cui tä nö nia waibläöje.

³Nofimou tä lä cui tä nia çai daimije. Bä bufi nia asiomi. Täbä ʼafa nia shilo wayoaöje. Bä nia wasöomi. Bä nia waiteliblou. Dodijidawä tä lä cui tä nofi nia wʼalibouje.

⁴Täbä nia çai nomojolimou. Bä cuaaö bufi lä doblao wei tä ja, bä bufi daeo balöo mlai ja bä nia quedou showadao. Cama bä nofi nia doo. Cama bä cuaaö bufi lä doblao wei tä nofi shilo yaibouje yalo, Yai Bada tä nia nofimaö dobloimije.

⁵Yai Bada tä nia jowa ma daö wejei ma cui, cama bä nofi lä jushuaö wei tänö, Yai Bada etä lofote nia dablaimiije. Öjö bä lä culenaja bä lä cui, bä ajedemabo dijä, Timoteo.

⁶¿Öjö tawä? Bä doblou malä mlai. Öjö bä lä cui, abenaja ai bä li cuaaö. Ai täbä yafibö jamö bä waloo fe fa yadionö, suwä bä bufi dao lä mlai bä lä cui bä jole damaöje. Öjö bä suwä lä cui, wälidiwä tä lä taö wejei tänö, bä bufi nö doblobimi waiquiwä. Bä bufi taamamou si ijejewä.

⁷Bä ʔ faö lä bädao wei bä ma cui, bä ʔ bluca jiliaö showadaoje. Öjö ma cui, showadi bä ʔ bluca ma jiliablalaö wejei ma cui, tä ʔ bejedi dablaimi fe yadioje.

⁸Bejedi tä ʔ cua ma cule, öjö bä jole suwä lä damaö wejei bä lä cui, bä ʔ lämou. Moisesi däjä, ai cäcöbä ʔ läablalou lä balöono weinaja showawä. Jane ai a wäfa cuoma, Jable ai a wäfa cuo mö feduoma. ¿Öjö tawä? Inaja miji bä lä cui bä cuaaö showawä. Wälidiwä tä ja bä bufi shilo cuo. Jesucristo bufilewä bä ʔfa ma jilou wei ma cui bä jolemou.

⁹Öjö ma cui, öjö bä lija täbä nia möläö nö dedeaimi. Bä lä jolemou wei tä lä cui, bluca täbä lija etä nia wawädo blou. Moisesi däjä öjö cäcöbä jolemou lä damolaliyono weinaja showawä.

¹⁰Cafänö wale daö waiquiwä, ¿öjö tawä? Ya bä lä damaö wei tä ma cui, ya showadi lä cuaaö wei tä ma cui, ya tä nabä lä cadidou wei tä ma cui, wale daö. Ya bufi lä yanöcöo wei tä ma cui, ya bufi lä nofio wei tä ma cui, ya cadidou fe lä yadio wei tä ma cui, öjö wa tä bluca daö.

¹¹Wale lä yabäcano wejei tä ma cui, wa tä çai daö, ya nö lä bleaano wei. Adioquia jamö ma cui, Iconio jamö ma cui, Lita jamö ma cui, ʔbejedi lä wale nö bleaamamaje! Öjö ma cui, Bada tänö showadi wale nowamaö cuaama.

¹²¿Öjö tawä? Jesucristo lija bä bluca lä yädao wei bä ma cui, inaja showawä bä nö nia bluca bleaamaö cuoje, Yai Bada a bufi doblamabou bufi lä doblao wejei bä lä cui.

¹³Inaja bä taamalajenö, wälidiwä tä lä taö wejei tä ja, bä bufi nia shilo balaö. Jesucristo bufilewä bä ʔfa jole lä jilou wei bä ma cui, öjö bä bufi çai nia balaö mö feduo showao. Öjö bä bluca lä cui, jolemou tä ʔ ja cama bä möläö fa dicoonö, inaja showawä täbä nia çai mölamaö cuo mö feduoje.

¹⁴Öjö ma cui, Timoteo. Cafä lija yama tä ʔ lä wäyano wei, wa tä ʔ bejedi lä bufibole tä ʔ lä cui, öjö tä ʔ nofi shilo yai da cadidibo. Yamalecö malä dale. Camiyä yamacö ʔnö wa bufi malä jaducäblaliyono wei.

¹⁵Oshe wa cuo showao däjä ma cui, Yai Bada wa tä ʔ oni daö malä showadaono wei. ¿Öjö tawä? Wa bufi jaducäblobä, öjö täbä ʔ oni waiquiwä, Jesucristo wa nofi fa mölabonö wa fucäamobä.

¹⁶Öjö Yai Bada cä tä ʔ oni lä cui, bäma tä ʔ nofi mölabobä tä ʔ. Yanowamö täbä ʔmi. Cama ebä lijamö cama Yai Bada tä Bufino bei tä ʔ bädamaö fa cuaanö, etä ʔ oniblamaö bufima. Bäma täbä damabä, öjö tä ʔ waiquiwä. Bäma täbä wasöbä ma cui,

bäma täbä cadidamabä ma cui, öjö lä tä a showawä. Täbä yai bejedimobä, bäma täbä bufi nia lä taamaö wei, öjö tä a showawä.

¹⁷Yai Bada tä a lä fuaö wejei bä lä cui, ebä bufi yai jaducäblobä. Dodijidawä tä bluca lä cui tä taö dablobeje.

2 Timoteo 4

¹Timoteo. Ei ya wä lä fale, wale a da jililä. Yai Bada tä çai malä cule. Jesucristo a çai. Cama ebä çai dodijidawä cuobä, a nia bädou lä çoyoluu wei a lä cui. Bamacö demi lä showai bamacö ma cui, bä nomaa lä waiquillaliyono wei bä ma cui, bämalecö nia bluca lä jimaö wei, öjö a.

²Öjö tawä? Yai Bada etä a da wäyä. Tä a jiliaö bufi ma doblao wejei ma cui, tä a jiliaö bufi ma mlajei ma cui, tä a yai wäyöö fe da yadio. Bä bufi taamaö fe da yadio. Bä da wasö. Bä da cadidama. Wa bufi shilo yanöcölanö, Yai Bada tä a ja, bä damaö fe da yadio.

³Tä a nia jilimamou shi wälili malä mlai. Täbä dodijidawä cuobä tä a waiquiwä ma cui, obi tä a nia yacumö jilii mojoblouje. Cama bä cuaaö bufi lä doblao wei tä ja, bä nia yai cuaaö fa cadidionö, shomi bä a nia shilo jilii majöoje, bä a jilii bufi lä doblao wejei bä a lä cui.

⁴Öjö däjä, bejedi tä a lä cui, tä a nia jiliaimi majöweje. Nö badabö tä a nia shilo jiliaö bashio majöoje.

⁵Öjö ma cui, çafä wa lä cui, wa bufi shominajaaö mlai, a bufi shilo yai da shaliliicu. Wa nö bleaabä tä cua ma cule, a bufi cadidia fe da yadiicu. Jesucristo tä a dodijidawä da wäyädu. Çafä lija Yai Bada tänö tä tamaö lä bufii wei tä taö da jödödöo.

⁶Wale nia shäö jaödaoje. Yai Bada lija täbä dodobouje däjä, toubä liyayamou lä culenaja, inaja showawä ya iyäbö nia liyayamou cuo. Ya çö jaödalayou.

⁷Yai Bada tänö camiyä lija tä nabä lä shimöbeno wei tä ja, ya nö walojoablaloma. Tä tamaö lä bufino wei, ya tä jödödöblalema. Ya tä a bufibou showale ei ya.

⁸Öjö cudeenö, Bada tä lä cui, showadi ya bufi doblamabou yalo, wale nia lä dobädayou wei tä tabou waiquia lä culadi. Täbä jimaö lä cadidio wei, öjö a. Yai Bada tänö täbä jimabä etä cublou däjä, wale nia dobädayou. Camiyä bädawä mlai, bufi shi jalimolanö a itou nö lä dabolajei bä bluca ma cui, öjö bä nia çai bluca dobäö mö feduo.

⁹Uasi. Eja wale fe walou fe da yadioyo.

¹⁰Demanö wale daa dicoquema yalo ya wä. Bitä jamö tä bluca lä cule tä shilo bufijaö fa dicoonö, Desalonicateli bä lijamö a culayoma. Clesede a ma cui, Calasia jamö a aa mö fedulayoma. Tito a ma cui, Damasiateli bä lijamö a fua mö fedulayoma.

¹¹Lucanö wale shilo çai cua showaa lä cule. Marcos wa fa dayäänö, öjö a çai shilo da fuima. Wale bayelibläö ja, öjö a malä dodijaö wei.

¹²Efeso täbä lijamö Diquico ya çai shimölema.

¹³Ya didiobä sicö lä cui, Doasi jamö ya sicö daquema. Äyämö wa fuimaö däjä, sicö da boima. Cabonö sicö tabou jaa. Oni sibä çai. Yalo sibä ja tä a oni lä cule, öjö ya sibä yai bufii.

¹⁴Alejado a lä cuinö, öjönö wale nö shïlo yai bleaamaö dicooma, boo shibä ja täbä madofi lä tablaö wei a lä cuinö. A cuaaö lä dicoono wei etä lä cui, Bada tänö etä nowa nia çamaö.

¹⁵Cafä wa ma cui, öjö lija a da moyaweicu. Bäma tä a lä wäyää wei tä a lä cui ja, showadi a wä läablalou.

¹⁶Bada bänö wale nabä jaba çocamoaje däjä, täbä a lä faö wei bä a jïliaö fa balöojenö, öjö däjä camiyä wale a nö çai wäamaö bufimaje. Ya nofi bãyäo däjä, moli ma cui a wä yädäonomi. Wale bluca daa dicoquemaje. Wale daquema ma cujei, Yai Bada lija ya etä nowa tamabou bufiimi.

¹⁷Ya icuobä jamö, Bada tänö wale çai cuo showaoma. Öjönö wale nö wälojomaboma yalo, Jesucristo ya etä a wäyää jödödöo fe yadio showaoma, judio bä lä mlai bä blucanö tä a yai jïliaö walalobeje. ¿Öjö tawä? Inaja tä fa cuonö, wale shäo showadaobeje tä ma cuono wei ma cui, Yai Bada tänö wale nowamaö fe yadioma.

¹⁸Tä wälidiblou lä bädao wei tä ma cui ja, showadi wale nia nowamaö. Cama ebä çai dodijidawä bälöodayobä jamö, dodijidawä wale nia waloamadayou. Öjö a nofi shïlo doblao dobou shi wäliibeje. Inaja lä tä cuobä.

¹⁹Aquila lija wale afa da wäyä, bä suwäbö Blisila lija çai. Onisifonö cama ebä çai lä cule bä lija çai.

²⁰Elato a lä cui, Colido jamö a cua jaa showaa. Miledo jamö Dofimo ya shimölema.

²¹Maa a quei showao mlao däjä, eja a waloo balöo fe da yadio. Eubulo a lä cui, cafä lija öjö a wäfa wäamou bufi doblaa lä cule. Budede a çai. Lino a ma cui, Claudia a ma cui, Jesucristo ai ebä bluca ma cui, bä afa wäamou bufi doblao.

²²Bei, Uasi. Bada tänö showadi wa bufi bayelibobä. Wamacö nofi bluca ojodabobä.

Tito

Tito 1

¹Jesucristonö wale lä shimöleno wei, ei Pablo cä ya. Yai Bada ya wə fuabä lä ya e. Yai Bada tänö cama ebä lä yaileno wei ya bä bufi lofotoamabä cä ya. Bejedi tä ą cadidabeje ya bä yömöläö, Yai Bada lija bä cadidobä.

²Bä nia lä ɓalimio wei tä ja bä nö daobä, ya bä yömöläö. Yedu ja, bämalecö nia lä ɓalimiblamaö wei, Yai Bada tänö tä ąfa wäaö balöoma. A jolemoimi.

³Bämalecö lä fucäaö wei a lä cuinö tä ą wawämaö lä bufiono wei däjä, tä ą wawämaö showadaoma. Öjö ya etä ą wäyäö cuaabä, wale cadidilema.

⁴Uasi, Tito. Cafä lija ya si onibläö lä cule. Cafä sho Jesucristo bäfä a nofi mölabou yalo, bä nofi ijilumaö cadidiwä. Bei. Fayä Yai Bada lija wa shılo bayeliblamobä, Bada tä Jesucristo lija çai. Wa nofi shılo ojodaboböbä. Wa bufi shılo çai yanöcömaboböbä.

⁵Cledateli bä ulufibö lä jöcole jamö bä daquefälöma, Jesucristo ebä lä yododaö wei bä dobloimi lä showai tä ja, wa bä cadidamaö juobä, bä nowa da tableinaja showawä. Öjamö lä bada wa bä tablamaö cuaabä, Jesucristo ebä çai yododabeje.

⁶Abenaja bä lä cui wa bä bada tablamabä. A wəfa tamou dao lä mlai, bä suwäbö moli a lä bole, bä ijilubö ebänö Yai Bada a lä bufibläö wejei a cuobä. Bä ijilubö ebä ąfa dodijaö lä tamou wei, ebä lä wasöo wei a shılo bada cuobä.

⁷Jesucristo ebä çai yododabeje a lä cui, Yai Bada lija a ojodamou cadidia yalo, a lä bejedimou wei a nia shılo cuo. Oquejewä a wə lä faö wei a cuobä, a jushuo si ijejeoblou lä mlai, cama a shi wəlimamou lä mlai, a waitelimou si ijejeoblou lä mlai, madofi bä ja a bufi waiyou lä mlai a shılo bada cuobä.

⁸Fama bä bälömabou bufi lä doblao wei a cuobä. A dodijaö bufi lä doblao wei, a wasöo lä dao wei a cuobä. A bufi lä cadidou wei, Yai Bada lija a lä ojodao wei, a bufi lä dao wei a shılo bada cuobä.

⁹Cama lija bejedi tä ą lä wäyämono wei tä ą nofi lä cadidibou wei a cuobä, tä ą lä dodijidai tä ą ja, ai bä yömöläö nomöjööbä. Bä ą lä läo wei bä ą cadidamabä.

¹⁰Bä ą wasöo lä mlai bä malä tetei, jole jole bä ą lä faö wei. Öjö bä ąnö bä mölamaöje. Judio inaja bä yai cuaaö si ijejewä, showadi täbä mosi sicö joyamaö lä bufii wejei bä lä cui.

¹¹Öjö bä ą wasömamobä. Bluca bä bufi wedinajamomaö malä waiquilajei. Bada bä ma cui, suwä bä ma cui, ijilu bä ma cui bä bufi bluca mlamaö dicooje. Öjö tä ą ja bä damabeje bä ma mlai ma cui, bä nia fa dobämonö bä jole damaö bashioje.

¹²Cledateli ai a lä cuinö, a wə shılo lä jıliamou wei a lä cuinö, camateli bä waiquiwä ma cui, bä ąfa tama. Abenaja a cuma. —Cledateli bä jolemodii. Yalo bä bufi dao lä mlai bä waitelimou wasöo lä mlainaja, bä cuadii. Bä ojodamou mlai, bä mojudili iyadii. Einaja a cuma.

¹³A wə bejedi. Inaja bä cuaaö ja, bä wasöö da dodijio, Yai Bada etä ʔ sh̄lo yai cadidibobeje.

¹⁴Judio bä nö badabö tä ʔ lä wäyämou wei tä ʔ j̄liaö mlajei, Yai Bada etä ʔ sh̄lo yai cadidibobeje. Bejedi tä ʔ lä waibou wejei bä lija, bä yömöca dao mlaobä.

¹⁵Yai Bada tänö bä bufi aublaö lä waiquii, bä w̄lidiaö quilibä tä cua malä mlai. Inaja showawä, Yai Bada lija bä bufi aublamou lä mlai, bä dodijidablou fe yadiobä etä cuami. Bä bufi auobä tä ʔ bejedi bufiimi waiquiweje. Bä bufi w̄lidio fa waiquionö, bä bufi daomi waiquiwä.

¹⁶Yai Bada ebä ʔfa ma jilou wei, bä lä cuaaö wei tänö bä jolemou damolaliyo. Bä w̄lidiwä waiquiwä. Bä wasömamoimi. Bä dodijaö fe yadiobä etä cuami.

Tito 2

¹Öjö ma cui, cafä wa lä cuinö, dodijidawä wa bä nia damaö, Yai Bada tänö bä yömölamaö lä bufii weinaja showawä.

²Fiya wa bä sh̄lo yömölaö mlai, bada wa bä çai nia yömölaö. Dodijidawä bada wa bä fa yömölanö, abenaja wa bä taamabä. Cama bä bufi wasöobä a wə da fa. Dodijidawä bä cuobä. Bä bufi shominajablou mlai, showadi Yai Bada a nofi mölabobeje, bä bufi nofimobä, bä bufi cadidobä.

³Inaja showawä, suwä bufi moyawe wa bä nia çai yömölaö. Bä lä dodijaö wei tänö Yai Bada a bufi doblamabobeje. Bä ʔfa taö mlaobeje. Bä shi lä w̄limamou wei toubä ja, bä bufi mö blucuo mlaobä. Ai bä dodijaö mö feduobä, bä damabeje.

⁴Inaja bä suwä cualanö, moco bä nia cadidamaö mö feduoje, bä feyalobö ebä nofimabeje, bä ijilubö ebä çai nofimabeje.

⁵Moco bä bufi daobä bä nia damaöje, cama bä yafibö jamö bä yanöcölanö bä bufi wasöobä. Dodijidawä bä feyalobö ebä nosie fuabeje. Inaja moco bä çai dodijidawä cuobä, Yai Bada tä ʔ lä wäyämou wei tä ʔfa wayoaö mlaobeje.

⁶Inaja showawä, dodijidawä fiya wa bä çai fa yömölanö, cama bä bufi wasöobä.

⁷Cafä wa lä cui, showadi wa dodijaö fa dablamonö, wa owämabeje. Wa bä yömölaö däjä, Yai Bada wa etä ʔ wäyäö cadidiobä. Wa wə biyäcou mlai ja, cadidiwä wa wə fabä.

⁸Wa wə fa cadidonö, wa wəfa tamou mlaicätä. Bä ʔ lä lämou wei bä ʔ lafuo bufi ma doblao wei ma cui, bamacö ʔfa tamobä tä cuami yalo, wamicai bä nia cuo.

⁹Täbä nosie fuamobä bä lä tabou wejei, wa bä çai dodijidawä yömölabä. Bä lä tabou wejei dodijidawä bä ʔ fuabeje. Dodijidawä bä fa ojodamonö, cama bada ebä bufi doblalamabeje. Bä ʔ lafujou mlai ja, bä wamicai cuobä.

¹⁰Bä ojodamobä bä lä tabou wejei bä madofibö tomöaö mlaobeje, bä yai bejedimou fe balojoobä. Bä showadi lä dodijaö wei tänö, Yai Bada etä ʔ dodijidawä dablamobä, bämalecö lä fucäaö wei tä ʔ lä cui.

11Yai Bada tänö yanowamö bämalecö bluca fucäaö fa ojodaonö, bämalecö nofi lä ojodabou wei tä dablamou waiquiwä.

12Bämalecö nofi lä jalujubou wei bäma tä fa dalalönö, bamacö bufi wasöo cuquei. Yai Bada tänö tä tamaö bufio lä mlai, bäma tä bluca joyaö cuquei, bamacö bufi lä shominajaaö wei tä ja bamacö bufi yacläö mlaobä. Bitä jamö bamacö cua showalanö, bufi dao bamacö cuobä. Bufen cadidiwä bamacö cuobä. Yai Bada bäma a bufi doblamabobä.

13¿Öjö tawä? Jesucristo bäma a itou nö dabolanö, bamacö cadidobä. Bufen doblalolanö, bamacö nö dao. Bämalecö lä fucäaö wei Jesucristo a Bada lä cui, bäma a lä bufiblale, öjö bäma a nö dabou. A nofi nia lä doablamou wei bäma a çai doblao dablaba.

14Wälidiwä tä ja bämalecö fucäabä, Jesucristo a jibämoquema. A nomaa lälayoma. Dodijidawä tä ja bamacö shi jalimobä bämalecö bufi aublalema, cama dodijidawä bäma ecö yaiobä.

15Ya tä a bluca lä wäyäle tä a da wäyä. Bä yömölaö da dodijio. Bä wasöö da dodijio. Wa bä cadidamabä wa malä cui. A fe da blacäjo.

Tito 3

1Mijamö wa bä çai lä cule, bä bufi bluca da jaducäblamalö, bada bä lä cule bä a jiliabeje. Bä lä nosiemou wei bä a bada fuabeje. Bä a lämou mlai ja, dodijidawä bä ojodamobä.

2Bä a da wasö, täbä afa taö mlaobeje. Wamicai bä cuobä. Dodijidawä bä bälöobä. Jödödöwä täbä lija bä nofimobä.

3¿Öjö tawä? Camiyä bamacö ma cui, bamacö dodijaö mada mlaoblei. Bamacö bufi mojuduo bufi fa doblaonö, bamacö fe mada blacäjoblei. Bamacö bufi yacläläyoma. Bufen waiyou tänö bamacö nö bleaaö fa balalönö, bamacö bayeliblamobä tä cuonomi. Bamacö bufi wälidiwä çai fa bälöonö, bä dodijaö lä ayao wei showadi bäma bä nofi wäliboma. Bamacö nofi bluca wäliayoma.

4Öjö ma cui, Yai Bada lija bäma tä bayeli dalalema. Bämalecö lä fucäaö wei a li. Yai Bada bäma a nofi fa dalalönö, bämalecö nofi lä ojodadaö wei tä a fa wawäblalunö, bamacö fucäama.

5Bejedi lä, bämalecö fucäama. Dodijidawä bamacö cuo waiquio däjä mlai. Bamacö dodijaö waiquio däjä mlai. Bämalecö nofi fa jalujubonö, bämalecö nofi ojodadalema. Yai Bada tä Bufen bämalecö bufi fa aublalönö, dude bämalecö tablaö çölayoma.

6¿Öjö tawä? Bämalecö lä fucäaö wei Jesucristo a lä cui, öjö bäma a nofi mölabou cudeenö, Yai Bada a Bufen jibämoa fe balojobema.

7Yai Bada tänö bämalecö nofimaö fe balojoo yalo, bämalecö nofi ojodabou. Camiyä bamacö lija tä nowa bluca lä cuono wei tä mladamalema. Cama lija bämalecö cadidimaquema, bamacö nia obi lä bälimio wei bäma tä nofi mölabou showaobä.

⁸Ya tä ʔ lä wäyäle, bejedi lä tä ʔ. Wa bä cadidamabä, a wʔ fe da blacäjo. Yai Bada tä bejedi lä bufibou wejei bä mojimou mlai, showadi bä dodijabä. ʔjö tä nö doblaobö wei. ʔjö tänö bamacö bluca bayeliobä.

⁹Bä ʔfa ma lafujayou dǎjä ma cui, täbä jaba lä bälöono wei tä ʔfa ma wayoaöje dǎjä ma cui, wa icuo mlai. Bä ʔ ma jöshöcou dǎjä, Moisesi tä ʔ nowa ja bä ʔfa ma tayou dǎjä ma cui, wamicai a da cuicu. Bä bayeliobä bä ʔmi. Bä ʔ nö bleaaö.

¹⁰Ai täbä nofi wʔlimamaö dicoo ja, a wʔ da wasö. Wa wʔ jiliblaimi ja, moli wa wʔ nia wasöö ʔo. A wasöbloimi showawä ja, wa cadidamabä wa wʔ nia faö ʔdaaimi. “A dobloimi waiquiwä”, wa nofi nia tabou.

¹¹Inaja a lä cuaaö wei a lä cui, a bufi shominajawä malä waiquii. A doblou malä mlai. A wasöobä etä cua ma cule, a wasöomi.

¹²Cafä lijamö Adema ya shimaö dǎjä, cafä Nicoboli jamö wa fuu fa jaödaoimanö, öjamö cafä sho bǎfäcö cuobä. Tä maaböö dǎjä, öjamö ya nia malä yanöcöö wei. Cuwi, Adema ya shimaimi ja, Diquico ya shimöa ʔatolei.

¹³Moisesi tä ʔ lä cadidibou wei a Sena lä cui, Abolo sho cäcöbä shulucou cä dǎjä, cäcöbä da bayeliblalö, cäcöbä fölimou nö bleaaö mlaofälöbä.

¹⁴Mijamö Yai Bada wama ebä bufi ʔai jaducäblamabä. Bäma ebä lä yömölaö wei showadi bä dodijadibä. Bä fölimou nö lä bleaaö wei bä bayeliblabeje. Täbä mojudili cudio buo mlai, täbä yai dodijabä.

¹⁵Camiyä lija bä lä cule, cafä lija bä ʔfa wäamou bufi doblao. Mijamö Yai Bada a nofi lä mölabolajei bä lija yamacö ʔfa ʔai wäamou bufi doblaa lä cule. Bei. Yai Bada tänö showadi wamacö bayeliblabä. Wamacö nofi bluca ojodabobä.

Filemon

Filemon 1

- ¹ Camiyä Pablo ei ya, Jesucristo ya wafa wäyää nofi jushuaö ja, wale fe lä labolajei. Camiyä bamacö ai a Timoteo lä cui sho, yafäcö cua lä cule. Yai Bada lija cafä Filemono wa ojodamou mö lä fedule wa lä cui lija, ei ya tä ʘ oni shimaö, bä lä nofimala wa lä cui lija.
- ² Abia a çai lija, Jesucristo a bufii mö lä feduo wei a suwä lä cui. Aquibo a çai lija, Yai Bada lija a ojodamou nö walojaö mö lä feduo wei a lä cui. Öjö tawä? Afä yafi jamö, Jesucristo wa ebä çai lä yododaö wei bä çai bluca lija.
- ³ Fayä Yai Bada lija bä nö bayeli nacaö talei, Bada tä Jesucristo lija çai, wa nofi ojodaboböbä. Wa bufi çai yanöcomaboböbä. ¿Öjö tawä? Inaja lä tä cuobä.
- ⁴ Cafä bä nö bayeli nacaö däjä, showadi ya bufi ʘfa doblalou wäyämou talei, Yai Bada ya lä bufiblaö wei a lä cui lija.
- ⁵ Bada tä Jesucristo wa nofi lä mölabou wei, bä ʘfa jilibou talei. Jesucristo wa ebä jowa bluca çai nofimaö. Öjö cudeenö bä bayelimaö.
- ⁶ Cristo lija bamacö yädaa yalo, ;bejedi bämalecö bayelibou! Bämalecö lä bayelibou wei tä jamö wa bufi yai jaducäafälöbä, bä nö bayeli nacaö talei, afä wa bä bufi jaducäblamaö mö feduo showaobä.
- ⁷ ¿Öjö tawä, Uçasi? Wa bufi lä nofio wei tä ja, ya bufi shilo yai doblalou talei. Showadi ya bufi çai dobladou. Jesucristo wa ebä bufi shilo lofotoaamaö malä cui.
- ⁸⁻⁹ Cristo ya wano wäyäbä wale shimölema yalo, bä nosiemabä ya waiquiwä ma cui, wa bufi lä nofio wei ya tä daö cudeenö, ya wä yai oquewä faö, bä bufi taamabä. ¿Öjö tawä? Camiyä Pablo ya wä, Cristo ya wano wäyäbä ya lä cui. Jesucristo ya wano wäyää ja, wale fe lä labolajei ya showawä lä cui.
- ¹⁰ Uçasimi Onesimo ya nofi nia fa bäyäänö, ei ya wä. ¿Öjö tawä? Eja wale fe lä labolajei jamö culanö, Jesucristo ya fa bufiblamalönö wale nofi fça majölei lä cufe. Öjö a lä cui, dodijidawä wa yai taamabä, ¿öjö tawä?
- ¹¹ Wa bayeliblamobä wa ma tabono wei ma cui, a doblonomi. Bejedi lä wa bayeliblanomi. Öjö ma cui, cafä wa ma cui, camiyä ya ma cui, bafäcö nia yai lä bayeliblamou wei fei däjä bei a yai cublaliyou lä cufe.
- ¹² Ya bufi nö bleaalanö, cafä lija uçasimi Onesimo ya shimaö çä lä cule.
- ¹³ Jesucristo tä ʘ nowa ja, eja wale fe lä labolajei jamö ya tabou bufi ma doblale ma cui, ya shimaö lä cule. ¿Öjö tawä? Cafä wa bälöa blajawä cudeenö, wale bayelia doblaimi ma cui, Onesimo a lä cui, eja afä ya tabou fa cunoja, jai cafänö wale bayeliblaö, tä nö cuobö wei.

14Öjö ma cui, cafä bä ʘ nia j̄liamaö fa balöonö, ya shimaö c̄a lä cule. Camiyä lija wa shimaö ojode ja, wa shimabä, öjö lä. Wa nia lä dodijaö wei, camiyä ya w̄anö mlai, cafä inaja wa cuaaö bufi fa doblaonö, wa yai cuaabä.

15Cafä wa w̄a fuamobä wa ma tabono wei ma cui, a fa doculunö wa taboimi majöwä. Öjö ma cui fei d̄jä, afä wa nofi nia yai tabou shi w̄alii. Cuwi. Yai Badanö, inaja a nia taamaö fa showadaonö a docua j̄atomalema fa cui, wa çai sh̄ilo dodijidawä cudio majöobä.

16Wa w̄a fuamou buobä mlai, fei d̄jä Jesucristo e yai cublaliyoma yalo, wa nia yai nofimaö. Wa nofi nia yai tabou. ¿Öjö tawä? Camiyänö ya nofi tabou ma cui, cafänö wa nofi tabobä wa yai. Afä wa tabou malä balöono wei. Fei d̄jä Bada a lija a bufi cuquema yalo, wa nofi nia yai tabou majöo.

17“Yai Bada lija, Pablo sho yafäcö ojodamobä yafäcö”, wale nofi tabou waiquia ja, camiyä dodijidawä wale nö waloa lä tamaquebö weinaja, Onesimo a ma cui, wa nia dodijidawä waloamaö cuo mö feduo. ¿Öjö tawä?

18Cafä lija a cuaaö lä bädaono wei etä ma cui ja, ya etä nowa nia çamaö. Blada a çai çamabä tä çai tabou ja, öjö ya etä nia çai jibäaö. ¿Öjö tawä?

19Camiyä Pablo ei ya imicö showawänö, ya tä ʘ onibläö lä cule. Ya etä nowa çamaö weicätä. ¿Öjö tawä? Ya etä nowa çamaö ma cui, cafänö wa tä nowa çamaö mö feduobä ya tä çai tabou mö fedua lä cule. Fei d̄jä wa bufi demi lä cule, camiyä ya w̄anö wa bufi demiblaliyoma malä cui. Öjö ma cui, inaja ya nia cuu fe balojoomi. Wa bufi jaducäblobä ya w̄a.

20Awei. Inaja ya cuu, Uasi. Onesimo ya w̄afa lä bole tä ja, wale da bayelibla, öjö lä. Bada tä lija cafä sho b̄fäcö malä cule. Cristo lija cafä sho b̄fäcö yädaa yalo, öjö tänö wale bufi yai da lofotoama.

21Wale ʘ nia lä fuaö wei tä ja ya möläö waiquia yalo, ei ya tä ʘ oni shimaö lä cule. Ya lä cuu weinaja b̄dawä mlai, wale nia bayelibläö lä biyäjäo wei, ya tä daö waiquia.

22Abenaja çai. Ya fama nia lä bälöo wei, a yano çai da dodijidablalö. Wale nö bayeli nacaö yalo, cafä bä fe nia lä waloö wei, Yai Bada lija ya möläö waiquia.

23Jesucristo yafä etä ʘ wäyäo tä nowa ja, yafälecö fe lä labolajei a Ebafla lä cui, cafä wamacö lija a w̄afa wäamamou bufi çai doblaa lä cule.

24Marcos a ma cui, Alidaco a ma cui, Dema a ma cui, Luca a ma cui, inaja showawä öjö bä ʘfa bluca wäamou bufi çai doblaa lä cule, Jesucristo lija yamacö bluca lä ojodamou wei bä bluca lä cui.

25Bei. Bada tä Jesucristonö, showadi wamacö bufi bayeliblabä. Wamacö nofi sh̄ilo ojodabobä.

Hebreos

Hebreos 1

- ¹Yedu ja, Yai Bada a wano wäyämamoma, camiyä judio bamacö nö badabö lija. Cama a wano wäyälewä bä blucanö, a wano wäyöö cuaamaje.
- ²Öjö ma cui, fei däjä, Yai Bada tänö täbä nia lä jimaö wei tä cublou ajedou däjä, camiyä bamacö lija a wano wäyämamou nomöjööbä, bä Ijilubö e yai shimöledayoma. ¿Öjö tawä? Bä Ijilubö e lija, Yai Bada tänö jödödöwä tä lä cule tä bluca tablamalema. Öjö täbä bluca ja a Bada läobä, a yaia showadalema.
- ³Yai Bada bä Ijilubö e lä cuinö, bä Föö e doblao damalalema. Yai Bada a cuwä lä dodijiinaja, inaja showawä bä Ijilubö e cuwä mö feduwä. Cama a wä lofotenö, jödödöwä tä fuwäbou showaa lä cule. ¿Öjö tawä? Yanowamö täbä doblou lä mlai täbä bufi aublobä tä tama. Öjö däjä, Yai Bada tä nö shilo walojaö lä ayai tä lä dicäladi jamö, a dicäquedayoma. Yai Bada jayu boco mashi jamö a dicäquedayoma.
- ⁴Ajele bä lä culadi, bä dodijidawä bawä ma cui, Yai Bada bä Ijilubö e shilo yai dodijidawä cuadayoa. Inaja showawä, cama dodijidawä bei bä äfa cublawä ma cui, bä Ijilubö e lä cui, öjö e äfa shilo yai dodijidawä.
- ⁵Ajele moli a bädawä ma cui lija, Yai Bada tä ijilumoimi waiquiwä. Ma. Bä Ijilubö e yai lija abenaja a shilo cuma. Ijiluyä cä wa. Fei däjä, iba cafä bä nö wawadowä öjöböamaö lä cule. Einaja e shilo cuma. Abenaja a çai cuma. Camiyä wale nofi nia yai Föömaö. Camiyänö bä nofi nia çai Ijiluaö mö feduo. Einaja Yai Bada a cuma.
- ⁶Bä Ijilubö moli e lä cui, bita jamö e lä wawäblamaleyoluno wei däjä, abenaja a çai cuma. Yai Bada ajele ebä bluca lä culadinö, ei lija bä möfe bolanö, a wäfa nia Bada doblao taöje. ¿Öjö tawä? Bä Ijilubö e äfa wayoaö ja, einaja a cuma.
- ⁷Öjö ma cui, ajele ebä äfa li wayoaö ja, abenaja Yai Bada a cuu. Wadoli a lä culenaja iba ajele ya bä taamaö. Wale nosie lä fuaö wejei bä ajele lä cui, cowa wacä lä culenaja ya bä çai taamaö.
- ⁸Ajele einaja bä äfa li wayoaö cuaama. Öjö ma cui, bä Ijilubö e jamö, abenaja Yai Bada e cuma. Cafä wa lä bufiblamou wei wa lä cui, Bada wa nia cuo shi wälío. Wa Bada lä läo wei, showadi wa bejedimou.
- ⁹Tä lä dodijidai tä jamö, showadi wa bufi shilo cudalodii. Wälidiwä tä lä cui wa tä nofi shilo wälibou. Öjö cudeenö, camiyä Yai Bada ya lä cuinö bä yailema, cafä lija ya lä bufiblamou wei ya lä cuinö. Bä bufi çai doblamabou. Afä ya bä dodijidawä ma tamabile ma cui, cafä bä yai shilo dodijidawä tamabou. Einaja a cuma.
- ¹⁰Abenaja Yai Bada a çai jowa cuma, bä Ijilubö e lija. Cafä Bada wa lä cui, jaba däjä bita wa colo lä lofotoblamaleno wei wa. Judu mösö ma cui, cafä wa showawänö, wa mösö çai lelemaquema.
- ¹¹Öjö täbä nia bluca ma mladou wei ma cui, cafä wa nia shilo cuo showao. Täbä lä didio wei sibä jolebö lä cublou weinaja, bä nia jode cublou mö feduo.

¹²Wa bä bluca lä tablaleno wei bä lä cui, ilo sibä jode joyamou lä culenaja, wa bä nia jode joyaö cuo mö feduo. Öjö täbä nia ma nomöjöblamou wei ma cui, cafä wa nia nomöjöblamoimi. Fei däjä inaja wa cuwä lä showainaja, wa nia cuo shi wälio. Wa nia shomibloimi. Bä Ijilubö e lija, einaja Yai Bada a cuma.

¹³¿Öjö tawä? Abenaja a çai cuma. Eja, jayu ya boco mashi jamö, a da dicäiquiyo. Eja wa dicäoyoluu däjä, cafä wa cotä jamö wa nofi lä wälibou wejei ya bä möfe nia boblaamayoluu. Einaja a cuma. ¿Öjö tawä? Inaja a lä cuno wei, ¿wedi jamö a lä cui lija a yai cuma? Ajele a lija mlai.

¹⁴Ma. Ajele bä lä cui, yai cäbä lä tablaleno wei, öjö cäbä bädawä. Yai Bada tä a fuabeje bä li bluca. Täbä nia lä fucäamou wei bä bayeliblayolubeje, bä shimadayou.

Hebreos 2

¹Öjö cudeenö, bäma tä a lä jiliano wei bäma tä a yai jiliaö da dodijio, bamacö yacläo majöo mlaobä.

²Ajele bä bädawä ma cuinö, bamacö nö badabö lija tä a lä wäyänö wejei tä a bejedi wawäblaliyoma. Bä doblono lä mlai bä lä cui, tä a fuano lä mlajei bä çai lä cui, öjö bä lija etä nowa cadidiwä çamaö cuaama. ¿Öjö tawä? Öjö bä nö jaba bleaamaö waiquioma ja lä,

³bamacö bufi yai da jaducäblo, öjö lä, camiyä bämalecö nö bleaamaö nomöjöo mlaobä. Bamacö nia lä fucäamou wei tä a lä cui, cama Bada tä showawänö, tä a wäyäo balöoma. Öjö däjä, camiyä bamacö lija a wä lä jiliano wejei bänö, walalawä a wäno wäyäo nomöjöomaje.

⁴Tä a bejedi. Yai Bada tä ma cuinö, öjö tä a bejedi yai dablamaö cuaama. Tä a jiliamobä jamö, tä nö lä quilijii tä bluca çai wawämaö cuaama. Cama ebä lä cuaano wei jamö, a nö lofote çai öjöböamou cuaama. Bei tä Bui fa jibämoicunö, cama ebä dobäo bufi doblao lä cuono weinaja, bä çai taamaö cuaafälöma.

⁵Ma, ajele bä lä cui, Yai Bada tänö öjö bä afa bada wäyäimi. Jödödöwä tä nia dude lä cublou wei, ajele bänö tä nofi tabobeje bä bada tablamano malä mlai, bäma tä afa ulufi lä wayoale tä ulufi lä cui.

⁶Ma, ajele bä nofi tabou mlai, yanowamö bä nofi yai tabou. Yai Bada etä a oni jamö, abenaja ai tä a çai cuu. Yanowamö ¿wedi bei bä li, Yai Bada wa lä cuinö wa bä nofi tabou fe balojoobä? Yanowamö täbä ijilubö bädawä ma cui, ¿wedi tabä öjö wa bä li bufibou?

⁷Ajele bä doblao lä culenaja, wa bä yanowamö tablamonomi showawä ma cui, tä nö dedejeblou mlai ja, dodijidawä wa bä nia yai tamabou. Wawädowä wa bä nofi nia tamabou.

⁸Jödödöwä täbä lä cublai täbä nofi bluca tabobeje, yanowamö wa bä nia lämabou. Einaja tä a cuu. ¿Öjö tawä? Öjö yanowamö bä nia yai lä lämabou wei bä lä cui, bä nia

jowa lämabou jödödöo. Bä nia läo lä mlai, etä nia jowa cuomi. ¿Öjö tawä? Jödödöwä tä jamö bä nia lä läo wei, bama tä daimi showawä ma cui,

⁹Jesús bama a daö, a lä yanowamöblaleyoluno wei a lä cui. Ajele bä balimi lä culenaja a jaba ma cuono wei ma cui, yanowamö bamacö balimi lä mlainaja a li cublou majölayoma. Yai Bada tänö bämalecö nofi lä ojobole jamö, a nia nomamaö fa läonö, a li yanowamöblamalema. A nomaö däjä a nö ninili bleaama yalo, dodijidawä fe balojowä a tabou majöadayoa. Wawädowä a nofi yai tabou.

¹⁰¿Öjö tawä? Yanowamö täbä fucäamobä, Yai Bada tänö Jesús a nö bleaamaö fa balöonö, a doblaaj majömaquema. Yai Bada a shilo malä dodijaö wei. Jödödöwä täbä fa tablalönö, öjö etäbä bluca fuwäbou showaa lä cule. Yai Bada a doblao lä culenaja, cama ebä doblao cuo mö feduobä, bä Ijilubö Jesús lija bä lulumabou.

¹¹Jesús a lä cui, cama ebä lä yaile bä sho, cama bä bluca malä cui. Cama bä bluca waiquiwä yalo, Jesúsno cama ebä äfa jilaö quiliimi.

¹²Yai Bada etä ä oni jamö abenaja Jesús a jowa cuu. Fäähäyä bä lija, cafä bä äfa nia dodijaö wäyää. Yamacö yododabä jamö, cafä bä nofi nia doablaö. Einaja a cuu.

¹³Abenaja a cuu çä. Camiyänö, Yai Bada ya nofi nia mölabou. Abenaja çai. Yai Bada tänö bä lä jibäbeno wei, eja bä ijilubö ya ebä çai bluca cua lä cule. Einaja tä ä cuu.

¹⁴Öjö ijilu bama ecö lä cui, yanowamö bei bamacö, yai bamacömi. Bamacö yaji cublawä. Bamacö iyäbö çai cublawä. Camiyä bamacö lä culenaja a cublou mö feduobä, cama a yanowamöblaleyoluma, camiyä bamacö nomaö lä cuo weinaja a nomaö cuo mö feduoyolubä. Yanowamö a fa cublaliyonö, a lä nomaö wei tänö, fecula bada a nia wäliao showadaoma, täbä yanowamö lä nomamaö wei a bada lä cui.

¹⁵¿Öjö tawä? Nomaö tä lä cui ja, yanowamö täbä showadi quilili nö malä beblalou wei. Öjö ma cui, bamacö quili majöo mlaobä, bämalecö nia çai nowamaö showadaoma.

¹⁶Ajele bä bayeliblabä a funo malä mlai. Ablaamö ebä nodiwä nofi yai fölijibou dodijioma.

¹⁷Jesús bama ecö fäähäbö cuwä lä dodijiinaja Jesús a cublou mlao fa cunoja, Yai Bada tä lä cule jamö dodijidawä bämalecö nofi nia lä bäyäbou wei, a nö Bada cuobö mlai. Camiyä bamacö lä culenaja a cuoma cudeenö, a bufi asimou. Bama a nofi mölabobä a. Yanowamö bamacö lija tä nowa ma cule ma cui, a shämou läoma, bämalecö nowa mladamabä. ¿Öjö tawä?

¹⁸Cama a nö bleaaö daö waiquiwä yalo, fecula badanö täbä lä yabäcaö wei tä çai daö cudeenö, bämalecö yabäcaö mö lä fedule bämalecö bayeliblabä, öjö a waiquiwä.

Hebreos 3

¹¿Öjö tawä, iba wamacö? Jesucristo ai ebä yaia lä culenaja, cafä wama ecö ma cui, wama ecö yaia cua mö fedua. Cafä wamacö ma cui, wamacö çai cadidia mö fedulema.

Jesús lija bä bufi da daeo, Yai Bada a wano wäyayolubä a lä shimöledayono wei a lä cui lija. Nofi bäyäälewä bäma a shilo Bada bufibobä, öjö Jesús a waiquiwä.

²A lä yaileno wei a lä cui, Jesúsnö a wä fuaö cadidioma. Yai Bada ebä lijamö Moisesi a läo däjä, öjö a cadidou lä cuaano weinaja showawä.

³Öjö ma cui, Moisesi mlai, Jesús a wäfa shilo yai doblao tamobä a. ¿Öjö tawä? A yafi dodijidawä lä tablaö wei a lä cui, a wäfa dodijaö tamou lä culenaja showawä. A yafi äfa dodijidawä ma tamou däjä ma cui, a lä tablaleno wei a lä cui, öjö a wäfa nia shilo yai dodijaö tamou.

⁴Yafi bä bluca lä cublai, yanowamö täbä lija bä ma tablamou wei ma cui, jödödöwä täbä lä cublai, Yai Bada lija täbä li tablamolayoma.

⁵Yai Bada etä yafi jamö Moisesi a ojodamou ja, a dodijama. Yai Bada a wä fuaö cadidioma. A ojodamou ja, Yai Badanö tä äfa nia obi wäyää lä nomöjöono wei, tä jimaö balöo showaoma.

⁶Öjö ma cui, Cristo a lä cui, täbä ojodamou cuaaö lä bädao weinaja mlai, bä ijilubö ebänö bä föö ebä ä dodijidawä fuaö lä cadidio wejeinaja, inaja Cristo a yai cuaama. ¿Öjö tawä? Yai Bada e yafi lä cui, öjö camiyä bäma ecö. Öjö e yafi showawä jamö bä Ijilubö e Bada läa, camiyä bäma ecö lija. Bufi lofotolanö bäma a nofi mölabou showao ja, öjö lä bäma ecö li yafi.

⁷Öjö cudeenö, Yai Bada a Bufi lä cui, abenaja a cuma. Ei däjä, Yai Bada wamale ä jiliaö ja,

⁸bä bufi jifublou dicoo dijä. Ulufi bloque jamö wale yai lä wabano wejei däjä bä lä cuaano weinaja mlai. Öjö bä lä cui bä jãamodonomi.

⁹Lasha 40 a faö showao mlao däjä, ya lä dodijaö wei tä ma mödino wejei ma cui, wale wabaö fe blacãjomaje, cafä wamacö nö badabö lä cuinö.

¹⁰Öjö cudeenö, öjö bä bluca lija ya fa jushudalunö, abenaja ya cudaliyoma. “Showadi bä bufi lä yacläö wei, öjö bä waiquiwä. Ya bä taamaö lä bufii wei tä ja, bä bufi jaducädaloimi”, ya cudaliyoma.

¹¹Ya fa jushudalunö, ya wä nö wäo ja abenaja ya çai cuma. “Ya bä nia yai lä yanöcömabono wei tä ulufi ja, obi ma cui, ei bä lä cui bä nia waloomi waiquiwä”, ya cuu majöoma. Yai Bada a Bufi lä cui, einaja a cuma.

¹²Bä da moyaweicu, öjö lä, iba wamacö. Wamacö bufi wãlidiblou fa dicolonö, Yai Bada wama a wä bejedi bufii fa mlacunö, Yai Bada tä demi cua shi lä wãlile tä lija, ai wamacö mö fulublou mlaobä.

¹³Showadi bä da yömölayo, Yai Bada bäma a wä nia lä jiliaö wei tä cuo showao däjä, ai wa bädawä ma cui wa bufi jifublou dicoo mlaobä. ¿Öjö tawä? Wãlidiwä tä ja täbä möläö yalo, täbä bufi li jifublou.

¹⁴Cristo bäma a nofi jaba lä mölabono weinaja, bäma a nofi tabou cadidia fe yadia showalanö, cama a ojodamobä jamö bãmácö yädäa.

15Yai Bada etä ʘ oni lä cuu wei, ei tä ʘ showawä malä cui. Ei dǎjä, Yai Bada wamale ʘ jiliaö ja, bä bufi jifublou dicoo dijä. Ulufi bloque jamö, bä ʘamodou lä mlaono weinaja mlai. Einaja tä ʘ oni cuu.

16Yai Bada tä ʘ ma jiliano wejei, bä jowa ʘamodono lä mlai bä lä cui, ʘwedi bei bä jowa doblonomi? Ejido tä ulufi fa dacöfälöjenö, Moisesinö bä lulubou lä cuaano wei, ʘöjö bä mlai daanö?

17Lasha 40 a lalou showaa mlai ja, öjö bä showawä lija Yai Bada showadi tä shilo jushuodima. ʘöjö tawä? Bä doblou fa mlacunö, ulufi bloque a jamö täbä nomawä bluca yabucuolaliyoma.

18Öjö bä lä cui, Yai Bada tä ʘ fuano lä mlajei bä showawä lä cui bä lija, Yai Bada a wä nö wäoma. Bä nia yai lä yanöcomabono wei jamö, bä nia jowa waloamanomi majöwä.

19ʘöjö tawä? Bamacö bufi jaducäblobä tä ʘ. Yai Bada tä ʘ bejedi bufinomije yalo, bä waloo doblonomi.

Hebreos 4

1ʘöjö tawä? Fei dǎjä ma cui, bamacö nia lä yanöcomabou wei, Yai Bada tänö tä ʘfa wäyäö showaa lä cule. Bamacö da moyawäo, öjö lä, bamacö nö badabö nofi tabou lä mladaliyono weinaja, ai wa bädawä ma cui wa nofi tadaö mlaobä. Wa nia lä yanöcoo wei tä ja, wa daamou majöo mlaobä.

2Cama ebä lija, Moisesinö etä ʘ dodijidawä çai jaba lä waloqueno weinaja, camiyä bamacö ma cui lija, Jesucristonö tä ʘ dodijidawä çai waloa malä majöqueno wei. Öjö ma cui, öjö bänö Moisesi etä ʘ ma jiliano wejei ma cui, tä ʘ nofi mölabou fa mlacujenö, bä bayeliblamonomi.

3Yai Bada bäma a wä bejedi lä bufibou wei bamacö lä cui, camiyä bamacö bufi nia shilo yai yanöcomabou. A wä bejedi bufi lä mlaono wejei bä ʘfa wäyäö ja, abenaja a malä cuno wei. Ya fa jushudalunö, ya wä nö wäo ja abenaja ya cudaliyoma. “Öjö ya bä nia lä yanöcomabono wei, obi ma cui tä nia cuomi”, ya cuma. Einaja Yai Bada a cuma. Jaba dǎjä, bita a colo lä lofotoblamaleno wei dǎjä, a nia yai lä cuaano wei tä daö showaoma.

4Täbä lä yanöcodou wei, yedu jamö ma cui tä ʘfa wayoaö malä balöono wei, Yai Bada ai tä ʘ jamö. Abenaja tä ʘ cuu. Täbä cobebloö jödödöa fa waiquilonö,

7tä mö jalu lä cublaliyono wei dǎjä, Yai Bada tä ojodamou yanöcodaliyoma. Einaja tä ʘ cuu. ʘöjö tawä?

5Täbä lä yanöcodou wei, ai bäma tä ʘ oni möö lä waiquiono wei jamö, tä ʘfa çai wayoaö çoma. Abenaja tä ʘ lä cuno wei jamö. Öjö ya bä nia lä yanöcomabono wei, obi ma cui tä nia cuomi. Einaja a cuma.

6Bä ʘfa nia yanöcomabou lä wäyäno wei bä lä cuinö, Yai Bada tä ʘ bejedi bufi fa mlalalujenö bä yanöcodonomi. ʘöjö tawä? Bä mili lä yanöcomabono wei bä

yanöcödonomi cudeenö, tä läa showaa lä cule. Täbä nia yanöcömabou lä majöo wei, tä fei däjä yai cua lä cule.

⁷¿Öjö tawä? Tä nö fa dedelönö, bada tä David lija Yai Bada a wä faö malä çono wei. Täbä nia bayeliblamou lä showaono wei tä a ja, a wä nö wäo çoma. Abenaja bä nowa tama. Ei däjä, Yai Bada wamale a jiliaö ja, bä bufi jifublou dicoo dijä. ¿Öjö tawä? A wä nö wäo ja, einaja bä nowa taö çoma.

⁸Yai Bada tänö bä nia lä yanöcömabono wei jamö, Josué a lä cuinö Isaeli nodiwä bä çai yai waloo cadidio showadao fa cunoja, Yai Bada tä a nö obi wäo çobö mlai.

⁹Öjö cudeenö, Yai Bada bäma ecö lä cui, bämalecö nia yai lä yanöcömabou wei tä cua showaa. Bamacö nia yanöcödou,

⁷ tä mö jalu lä cublaliyono wei däjä, Yai Bada tä ojodamou lä yanöcödaliyono weinaja showawä.

¹⁰Bamacö nia fa yanöcömabonö, tä a lä wäqueno wei bäma tä a dädaö däjä, bamacö nia yai yanöcödou. Yai Bada tä ojodamou yanöcödou lä culayono weinaja, bämalecö bufi nia tadamaö.

¹¹¿Öjö tawä? Yai Bada tänö bämalecö bufi nia yai lä yanöcömabou wei tä ja, bamacö nö da wəlojo, öjö lä. Bamacö nö badabönö Yai Bada tä a fuaö lä mlaono wejeinaja, ai bamacö cuaaö nodio dicoo mlaobä.

¹²Yai Bada tä a malä cule. Tä a lofote. Sibala bä ma namo wei ma cui, Yai Bada bei tä a yai lucäo si ijejewä yaiwä. Bei täbä bufi yai wawäblamaö. Bä nia lä cuaaö wei tä ma cui, bä bufi cuaablalou lä jətoowei tä ma cui, wawadowä etä dablamaö.

¹³Yai Bada lijamö a nia lä jəyao wei, moli ma cui a cuami waiquiwä. Täbä jödödöwä wawädobou. Öjö a showawä lä cuinö bämalecö a nö nia wäamaö.

¹⁴¿Öjö tawä? Fedu fedole jamö bämalecö nofi lä bəyəbou wei, Yai Bada tä Ijilubö Jesús a cua waiquidayoa. Nofi bəyəalewä öjö a Bada. Öjö cudeenö, Jesucristo bufilewä bamacö əfa lä jilou wei bamacönö, bäma a nofi yai mölabou da dodijio.

¹⁵Bämalecö nofi lä bəyəbou wei a Bada lä cuinö, bamacö lä yabəcamou wei tä malä dale. Bämalecö nofi jalujubou. Fecula bada lija camiyä bamacö lä yabəcamou weinaja, cama a çai yabəcamou cuo mö feduoma ma cui, wəlidiwä tä tanomi.

¹⁶¿Öjö tawä? Bämalecö nofi lä ojodabou wei bäma a bufibolanö bamacö da icuo, öjö lä, bamacö bayeliblamobä. Bamacö nö yai lä bleaale däjä, dodijidawä bämalecö taamaö fe fa yadionö, bämalecö nia yai bayelibou.

Hebreos 5

¹Nofi bəyəalewä bada bä lä nomöjəadalou wei bä lä cui, yanowamö täbä lijamö Yai Bada tänö bä bluca yaiamaö cuaaö, täbä nofi bəyəbobeje. Täbä doblou lä mlai etä nowa mladobä, Yai Bada tä dobəöje. Yalo bä shəö fa läöjenö, bä öshö dodobouje.

²Nofi báyäalewä a bada lä läo wei a lä cui, yanowamö a mö feduwä cudeenö, bä bufi lä yabäcamou wei tä çai daö. Tä daö yalo, bä bufi lä mojadi wei bä lija a wə oquewä fabä a waiquiwä. Bä bufi lä yacläo wei bä lija çai.

³Öjö tawä? Cama a bufi yabäcamou mö feduwä yalo, ai täbä doblono lä mlai etä nowa mladobä, tä nia taö ayaomi. Cama a showawä ma cui, a doblono lä mlai etä nowa mladobä, tä çai taö mö feduo showadao.

⁴Nofi báyäalewä a bada lä cui, inaja cama a bada cuo bufi fa doblaonö a cubloimi. Ma, Yai Bada tänö a fa cadidilönö a shïlo bada läo. Jaba däjä, nofi báyäalewä Aaloni a lä cadidileno weinaja showawä.

⁵Cristo a ma cui, nofi báyäalewä a Bada cuobä, cama a jimamonimi. Ma, Yai Bada tänö a yailema, abenaja a nowa lä tano wei a lä cuinö. Ijiluyä wa. Fei däjä, iba bä nö wawädowä öjöböamaö. Einaja a nowa tama. Ai tä çai oni jamö, abenaja Yai Bada tä çai cuu. Showadi wa täbä nofi báyäaö shi wəlibä wa. Mequisedeco a lä cuinö täbä nofi jaba lä báyäbono weinaja, wa cuaaö nomöjöobä. Einaja Yai Bada tä çai cuu.

⁷Eja Jesús yanowamö showawä a cuo däjä, Yai Bada lija a nö bayeli nacaoma. A nomaö mlaobä, a noshi umlabou lä dao wei a lä cui lija a öcölanö a wə icali fama. Yai Bada tä nö quili tama yalo, a wə jilimolayoma.

⁸Öjö tawä? Yai Bada tä Ijilubö ma cui, bä Fjö e ç fuaö dablobä, a wabamoma. A nö lä bleaaö wei tänö, Yai Bada a wə nia fuaö fe lä yadio wei tä dalalema.

⁹A wə fuaö fe lä yadiono wei tänö, a nia lä doblao wei a yai cublou dodijilayoma. Inaja a fa cublalunö, cama a wə lä fuaö wejei bä lä cui, bä fucäaö shi wəlibä e cublou showadalayoma.

¹⁰Nofi báyäalewä a Bada cuobä, Yai Bada tänö a cadidilema, Mequisedeco a lä cuinö täbä nofi jaba lä báyäbono weinaja bä nofi báyäbou cuo nomöjöobä.

¹¹Öjö yama tä ç wäyäo showaobä tä ç bluca ma cule, wamacö bufi jaducäblou si ijejewämi dicowä.

¹²Wamacö nö dedeaö waiquiwä yalo, ai wama täbä damaö mö feduobä wamacö ma cui, wamacö doblou malä mlai. Ai wama bä damaö mlai ja, ai bä lija çafä wamacö yai damamou çobä wamacö, Yai Bada colo tä ç lä cui ja wamacö bufi yai jaducäblobä. Ijilu oshe bä lä culenaja wamacö cuwä showawä. Nii bä wabeje bämi. Sifu ubä ja bä shadio showawä cäbä.

¹³Sifu ubä ja bä lä shadio wei bänö, dodijidawä tä nö öjöböaö malä mlajei. Wəlidiwä tä nö çai öjöböaö malä mlajei. Bä oshe malä cui.

¹⁴Nii a yai lä cui, bada cäbä befi. Öjö bä lä cui bä bufi wasöo fa wabäodinö, tä lä wəlidii tä daöje. Tä lä dodijidai tä çai.

Hebreos 6

¹Öjö cudeenö bamacö bufi yai da walalaafälö. Cristo bäma tä ʘ jaba lä jilileno wei bäma tä ʘ daö waiquiwä. Bamacö jaba lä cuaano wei tä ja, bamacö nia nomaö shi lä wäljio wei tä ʘ çai. Bamacö bufi mö fa yabajadalunö, Yai Bada bäma a nofi nia yai lä mölabou wei tä ʘ çai. Öjö bäma tä ʘ daö waiquiwä cudeenö, bäma tä ʘ wayoadii showaobä tä cuami.

²Täbä fe lä ojomamou wei tä ʘ ma cui, Jesucristo ebä lija bada bä imicö lä maqueo wei tä ʘ ma cui, öjö bäma tä ʘ çai daö waiquiwä. Täbä nia demi jocädou lä ço wei tä ʘ ma cui, Jesucristo ebä lä mlai bä nö nia bleaö shi lä wälüi wei tä ʘ ma cui, öjö lä tä ʘ ja, bamacö yömöläö çobä tä cuami.

³¿Öjö tawä? Yai Bada tänö bämalecö bayelibläö bufi doblao ja, fei däjä bamacö bufi nia yai walalao.

⁴Jesucristonö bä bufi ma wacacablamaleno wei ma cui, a bufiboimi majöo dicoweje ja, Yai Bada lija bä bufi mö yabajadou çobä, etä cuami waiquiwä. No mlai ja Yai Bada tänö bä lä dobälano wei tä daöje. Yai Bada tä Bufi çai dää mö fedua waiquilemaje.

⁵Yai Bada tä ʘ çai dodijidawä daa waiquilalemaje. Yai Bada tänö cama ebä çai lä cuo wei, etä çai lofote daö waiquiomaje.

⁶Öjö bä lä cui, Jesucristo a yai bufiboimi majöo dicoweje ja, bä yai dobroimi. Jai fii balitama tefi jamö Jesucristo a shäö çaje öjö bä li cuaaö malä cui, cama bä lä cuaaö wei tänö. Wawädowä a nö waiblamaöje.

⁷¿Öjö tawä? Ficali täcabä ma cui, Yai Bada tänö ai täcabä bayelibou malä dodijio wei. Maanö täcabä fa jäläamanö, bä lä ficalimou wei bä iyabä, nii bä caumaö. ¿Öjö tawä? Yai Bada tänö täcabä dodijidawä fa dalalönö, täcabä nö yai nijiblamaö.

⁸Öjö ma cui, täcabä shilo mösöcöböblou bädawä ja, täcabä shilo bluca baömöö bädawä ja, täcabä nowa nia cublomi majöo. Yai Bada tänö öjö täcabä ʘfa waimou tabä täcabä. ¿Öjö tawä? Täcabä ʘfa waimou lä wäyää wei, täcabä nia yacumö öshömaö.

⁹¿Öjö tawä? Inaja yamacö cuu ma cui, çafä bamacö lä nofimale wamacö lä cui, Yai Bada tänö wamacö lä bayelibou wei yama tä daö waiquiwä. Yai Bada tänö täbä lä fucääö wei täbä lä cui, täbä dodijaö lä cuaaö weinaja wamacö cuaale cätä.

¹⁰Cama lija wamacö lä ojadamou wei tä lä cui, Yai Bada tänö tä nofi mojudubobä a malä mlai. A dodijaö. Yai Bada wama a nofimaö yalo, cama wama ebä lä bayeliblano wei, wama ebä bayelibläö lä showale, tä daö.

¹¹¡Showadi wamacö dodijadii bufi doblaobä, öjö lä! Inaja bamacö taamaö bufi doblao. Wamacö möläö showao däjä, wama tä nö lä dabole tä bejedi wawäblobä.

¹²Wamacö mojimou mlai ja, bä lä dodijaö wei wama bä yai owämabä. Bä lä dodijaö wei bä lä cui, bä bufi yanöcöwä çai möläö fa showaonö, Yai Bada tänö tä ʘfa lä wäqueno wei tä nia yai dääöje.

¹³Ablaamö lija Yai Bada tä ʼa nö lä wäono wei dǎjä, a wə yai lofotoblaliyoma. Cama a shīlo yami Bada cuo fa waiquicunö, ai a wəfa wäaö mlai ja, cama a wəfa shīlo wäamou showadaoma, a bejedimou dablamobä.

¹⁴Abenaja a cuma. Cafä bejedi bä bayelibou weicätä. Afä ya bä nodiwä fa balamalönö, bä nia blucablou dodijio. Einaja a cuma.

¹⁵Öjö cudeenö, bufi yanöcölanö Ablaamö a nö fa dadionö, Yai Bada tänö tä ʼafa lä wäqueno wei tä ʼacumö dälema.

¹⁶Showadi täbä malä cuaaö wei. Täbä ʼa nö wäo bufio dǎjä, bada täbä ʼafa shīlo wäyäöje. Abenaja bä cuu. “Ya wə wawädo da showadao. Bada tä malä cule”, bä cuu. ¿Öjö tawä? Ai bä ʼa ma läablalou wei ma cui, bada a wəfa yai wäyäö cadidioje ja, bä ʼa faimi majöwä.

¹⁷Inaja showawä Yai Bada a ma cui, a cuaama. Ablaamö lija a wə nö wäo dǎjä, cama Yai Bada tä shīlo Bada lä ayai a wəfa wäamoma, a bejedimou dablamobä. Ablaamö a ma cuinö, camiyä nodiwä bäma ecö ma cuinö, bäma a wə nofi mölabobä.

¹⁸Yai Bada a wə nö wäo ja a wə cadidou showadao. A wə nia shominajaö majöomi. Inaja showawä, cama a caficö jolemou dao lä mlai a wəfa wäyämou ja, a wə nö shominajaaö majöobimi waiquiwä. ¿Öjö tawä? A wə nö lä wäono wei tä ʼa lä cui ja, bamacö möläö lofotoo showaobä tä ʼa. Yai Bada lija bamacö nofi lä yashuo wei bamacö lä cui, bamacö nia lä bayeliblou wei tä ʼa ja, bamacö möläö showao fe yadiobä.

¹⁹Bäma a nofi lä mölabou wei tänö bamacö bufi lofote çai cudia. Modu u jamö, wadoli anö täbä befi çai jilulamou mlaobä, fude täbä bada fa çabojenö, täbä befi çai lofotomabou fe lä yadio wejeinaja showawä. ¿Öjö tawä? Bäma a nofi mölabou yalo, jai Yai Bada etä yafi lä culadi jamö bamacö lucäa waiquilayodayoma bamacö li cuwä. Yano a yai nowamaö lä dodijiladi jamö ma cui, acadafu cäcö lä läle jamö bamacö fa jayublalufälönö, jai bamacö ʼeshiblou waiquilayodayoma bamacö cuwä.

²⁰Nofi bäyäalewä a Bada cuo shi wəlibä Jesús a fa cublalunö, öjamö lä a fua waiquia balölayoma. Mequisedeco a lä cuinö täbä nofi bäyäbou cuo lä balöono weinaja, bämalecö nofi bäyäbou cuo nomöjöödayobä.

Hebreos 7

¹Öjö Mequisedeco a lä cui, Salemiteli bä lija a bada lä läono wei, bei a cuoma. Yai Bada tä Bada lä ayai a lä cui lija a ojodamou ja, täbä nofi bäyäboma. Ablaamö a lä cuinö, bada bä bluca shäa fa waiquimalalönö, cama ebä çai çoimabä jamö Mequisedeco a icua mö baquema. Yai Bada lija Ablaamö a bayelimaö bufima.

²Öjö dǎjä, täbä lä çeleno wei täbä ja, Ablaamönö Mequisedeco a dobälema. Täbä bluca lä coleno wei, fe usucuwä 10 täbä fa shedequeblalönö, öjö ai moli täbä ja Mequisedeco a dobälema. ¿Öjö tawä? “Mequisedeco”, täbä lä cudou wei, “Bada tä yai lä bejedimou wei”, täbä cudou. “Salemiteli bada”, täbä lä cui wei, “Täbä bufi lä yanöcömabou wei a bada”, täbä cui.

³Mequisedeco bä föö e ma cui, bä nöö e ma cui, bei tä ʘ oni jamö cäcöbä ʘfa çai cuami. Cama bä nö badabö cuo lä balöono wei bä ma cui, inaja showawä. A oshe lä cublono wei tä ma cui, a bufi lä mlaqueno wei tä ma cui, tä ʘfa oni çai cuami. Yai Bada tä Ijilubö e lä culenaja a cuwä. Täbä nofi bäyäbou shi wälii.

⁴Mequisedeco a lä cui, bada wama a nö yai öjöböabä ya wä. Nö badabö Ablaamö a ma cuinö, camanö bä lä coleno wei bä ja, fe usucuwä 10 bä fa shedequeblalönö, moli bä ja Mequisedeco a dobälema.

⁵¿Öjö tawä? Moisesi etä ʘ oni wawädwä. Ablaamö ebä nodiwä ma cuinö, nofi bäyäalewä bä nia lä dobäö wejei tä nabä shimöquema. Bluca täbä lä tabou wejei täbä ja, fe usucuwä 10 bä fa shedequeblajenö, ai moli täbä ja Lewi ebä nodiwä nia dobämaje, nofi bäyäalewä bä lä cui. ¿Öjö tawä? Cama Lewi bä mashi ma cui bä nia dobämaje.

⁶Öjö ma cui, ei Mequisedeco a wäfa lä cui, Lewi ebä nodiwä cuono ma mlai ma cui Ablaamö lija a dobämolayoma. Täbä lä çoleno wei, fe usucuwä 10 täbä fa shedequeblalönö, ai moli täbä ja Mequisedeco a dobälema. Öjö däjä, Mequisedeco a lä cui, Yai Bada lija Ablaamö a bayelimaö bufima. ¿Öjö tawä? Yai Bada a wä nö wäo ja, a nia jowa lä bayeliblamono wei a lä cui, öjö a showawä lä cui, Mequisedeconö a bayelimaö bufima.

⁷¿Öjö tawä? Bä yai lä bada wei bä lä cui, bä bada lä mlai bä ʘfa shilo bayeliblaö wäyäö talajei. Öjö bäma tä daö waiquiwä.

⁸Nofi bäyäalewä bä ma nomablou wei bä ma cui, eja bä dobämamou talei. Bluca täbä lä tabou wejei, fe usucuwä 10 täbä fa shedequeblajenö, ai moli täbä ja bä dobäöje. Öjö ma cui Yai Bada etä ʘ oni jamö, öjö Mequisedeco a lä cui, a wäfa nomaö wäyämamoimi. A demi showawä. ¿Öjö tawä?

⁹Ablaamö bei ijilubö nodiwä Lewi a lä cui, nofi bäyäalewä a cuoma yalo, ai täbä lija showadi a dobämamoma. Cama ebä nodiwä ma cui, bä dobämamou malä showai. Bluca täbä lä tabou wejei, fe usucuwä 10 täbä fa shedequeblajenö, ai moli täbä ja showadi bä dobäöje. Öjö ma cui, Lewi a oshe wawäblou showao mlao däjä ma cui, Ablaamö lija Mequisedeco a lä dobämono wei däjä, jai cama Lewi a showawä ma cui lija a dobämamoa culayoma.

¹⁰Mequisedeconö a mö lä bamaleno wei däjä, Ablaamönö Lewi a nia lä taaö wei a didibou showao jatoö däjä a malä dobälono wei.

¹¹Wamale ʘ da jililä. Lewi ebä nodiwä lä cui, Israeli ebä nofi nia lä bäyäbono wejei bä cuoma, Moisesi etä ʘ çai läobeje. Öjö ma cui, Aaloni a lä cuaano weinaja, bä cuaaö lä nodiono wei bä nofi bäyäalewä lä cui, yanowamö täbä doblamabeje etä cuonomi waiquiwä. Etä cuo fa mlacunö, Yai Bada tänö shomi ai a nia lämabou majöoma. A nia läo lä majöo wei a lä cui, Aaloni e nodiwä mlai, Mequisedeco a lä culenaja a cuwä mö lä fedui, Yai Bada tänö öjö a nia shilo yai lämabou majöoma.

¹²¿Öjö tawä? Nofi bäyäalewä shomi a nia läo majöo däjä, shomi tä ʘ nia çai malä läo wei. Showadi inaja täbä malä cuaaö wei.

13-14 Ai shomi a wafa bada läo lä wäyämöno wei a lä cui, Bada tä Jesús a wafa yai wayoamoma. Lewi a nodi jamö mlai, öjö cama e mashi lija a malä nodiblaliyöno wei, Judawä lija. Öjö e mashi lä cui lija bä lä nodiblaliyöno wei bä lä cui, nofi bäyäälewä bä cuonomi. Yalo bä lä dodoblamou wei bä maqueblamobä täcö jamö, Judawä nodiwä moli ma cui a ajedou bädaonomi. Judawä ebä nodiwä lä cui, Moisesinö nofi bäyäälewä bä afa çai jilanomi.

15 ¿Öjö tawä? Öjö malä cui. Nofi bäyäälewä ai shomi a waloa waiquiqueyoluma, Jesús a lä cui, Mequisedeco a lä culenaja a cuwä mö lä fedui.

16 Jaba däjä, bä föö ebänö täbä nofi bäyäbomaje yalo, bä ijilubö ebänö täbä nofi bäyäbou nodiablalobeje bä li cuo balöoma, Moisesinö tä tamaö lä bufino weinaja showawä. Fei däjä shomi tä a läa majöa. Bamacö bufi jaducäblobä öjö tä a waiquiwä. Nofi bäyäälewä Jesús a tablamaö majölayoma. ¿Öjö tawä? Cama bä bada cuo lä balöono wei bä lä cui, nofi bäyäälewä bä cuo fa showadaonö mlai. Jesús a lä cui, a balimi cua waiquia cudeenö a li lämaboma.

17 Cama a wafa wäyämou ja, abenaja ai tä a oni malä cuu wei. Showadi wa täbä nofi bäyäbou shi wälibä wa. Mequisedeconö täbä nofi jaba bäyääö lä cuaano weinaja wa cuaaö nomöjöobä. Einaja tä a malä cuu wei.

18 Moisesi etä a jaba lä läono wei tä a lä cui, tä a ujudi waiquiwä yalo tä a casöblamaö majölayoma. Öjö tä a ja, täbä bayeliblanomi waiquiwä yalo.

19 Moisesi etä anö täbä doblono malä mlai. Fei däjä, shomi tä a nomöjöblaö majöa lä cule, tä yai lä doblale bäma tä nö yai dabou majöobä. Öjö bäma tä nö dabolano, Yai Bada lija bamacö ajedou.

20 Bämalecö nofi bäyäädayobä Jesús a lä lämaqueno wei däjä, Yai Bada a wä nö wäolanö, a lämaquema.

21 Nofi bäyäälewä bä jaba lä läono wei bä lä cui, Yai Bada a wä nö wäo mlai ja bä bada läolaliyoma ma cui, Jesús a lä lämaqueno wei däjä, a wä nö yai wäo majöoma. A wä nö nia lä wäono wei, Yai Bada etä a oni jamö tä afa wäaö showaoma. Abenaja tä a cuu. Bada tä a nö wäo waiquio lä cufe. A wä nia shominajaaö majöomi. Abenaja e cuma. “Cafä nofi bäyäälewä wa nia cuo shi wälii”, e cuma. Einaja tä a cuu.

22 Jesús a lä lämaqueno wei däjä, Yai Bada a wä nö wäoma yalo, tä a läa lä majöle yama tä a yai doblao dabraö. Jesúsno öjö tä a çai läa cudeenö, bäma tä a nofi yai mölabou.

23 Bä nomabä etä cuo waiquioma yalo, nofi bäyäälewä bä nia bada lä lädio wei etä cuonomi. Bä showadi nodiablaloma yalo bä li blucaoma.

24 Öjö ma cui, Jesús a balimi waiquiwä yalo, nofi bäyäälewä öjö a nia shilo läo shi wälii.

25 Öjö cudeenö, Jesús a lä cuaano wei tänö, Yai Bada lija bä lä ajedou wei bä lä cui bä nia nowamaö. Bä nowamabä öjö Jesús a waiquiwä. Showadi bä bayelimaö bufibä a balimi cua malä waiquiladi.

²⁶Bämalecö nofi nia lä bäyābou wei, öjö Jesús a waiquiwä. Öjö a lä cui, nofi bäyālewä Bada a. A yaia. A wafa çai tamobä etä cuami. Etä çai shami läami. Wālidiwä talewä bamacö lä cui lijamö a coyocomabou mlai ja, fedu fe dole jamö Yai Bada tänö a yai doblamabodayou.

²⁷Nofi bäyālewä bada bä jaba lä cuono wei bänö, yalo showadi bä shäö fa läojenö, Yai Bada lija bä öshö dodoblaamaje. Cama bä doblou lä mlai etä nowa mladobä tä taö fa balöojenö, ai bä doblou lä mlai etä nowa mladou mö feduobä, etä taö nomöjoomaje. Inaja cama bä li showadi cuaaö balöoma ma cui, inaja Jesús a cuaaö mö feduobä etä cuami. A shāmou lä läono wei, moli a shīlo dodoo läoma, cama a showawä lä cui. Cama a dodoo waiquioma cudeenö, ai täbä dodobou majöobä etä cuami waiquiwä.

²⁸¿Öjö tawä? Nofi bäyālewä bada bä nodiablalou cuaabä, yanowamö täbä bādawä ma cui bä yaiamou cuaaö, Moisesi etä a lä cuu weinaja showawä. Yanowamö bamacö ujudi lä culenaja, inaja showawä bä ujudi cuwä mö feduwä. Öjö ma cui, Moisesi etä a cuo waiquio dājā, Yai Badanö shomi tä afa wāa majöquema. A wā nö wāolanö, bä Ijilubö e yaia majömaquema. Öjö a shīlo doblamabou shi wālii waiquiadayoa.

Hebreos 8

¹Öjö a lä cuinö, bämalecö nofi nia lä bäyāö wei, öjö a bada waiquiwä. Inaja bamacö nowa tabä, yama tä a oniblaö lä cule. Fedu jamö a dicāa waiquiadayoa, Yai Bada tä lä doblaladi jamö. ¿Öjö tawä? Yai Bada jayu boco mashi jamö a dicāa.

²Yai Bada etä yano lä italadi jamö a Bada läadayoa. E yano yai nowamaö lä dodijiladi jamö ma cui, öjamö lä a çai läa. Öjö a yano lä culadi, Yai Bada etä yano shaliliwä. Cama Bada a showawänö etä yano itabou. Yanowamö täbä lä cui lija, öjö a yano tablamonomi.

³Nofi bäyālewä bada bä bluca lä cui, Yai Bada tä dobäbeje bä yaimamou, yalo bä shäö fa läojenö bä çai dodobobeje. Öjö cudeenö, nofi bäyālewä Jesús a Bada ma cuinö, cama etä çai dodobou mö feduobä etä çai cua.

⁴Bitā jamö yanowamö Jesús a cuo showao fa cunoja, nofi bäyālewä a nö cuobö mlai. Ai bä nofi bäyālewä cua malä waiquile. Öjö bä lä cuinö, Yai Bada lija täbä li dodobouje, Moisesi etä a lä cuu weinaja showawä.

⁵Öjö bä lä läo wei bä lä cui, Yai Bada etä yafi lä tablaleno wejei jamö, bä li ojodamou. Öjö etä yafi lä cui, Yai Bada etä yano lä culadi etä yano nö li owä. Jaba dājā, Moisesinö Yai Bada etä yano nia jaba lä itamano wei dājā, a malä yömölaleno wei. Abenaja Yai Bada tänö a nowa talema. A da moyaweicu. Sinai cācö jamö ya culanö, cafä lija ya täbä jimaö da cuobleinaja, inaja showawä wa täbä bluca tablamaö cadidio showadaobä. Einaja a nowa talema.

⁶Nofi bäyālewä bä nia lä cuaano wei, Yai Bada tänö etä nabä bluca shimöquema ma cui, fei dājā Jesús lija tä yai lä dodijidai tä nabä shimöa majöquema, bämalecö nofi bäyābodayobä. Jesús tä a yai dodijidawä malä cui, Moisesi tä a lä culenaja mlai. ¿Öjö

tawä? Yai Bada tänö fei däjä tä yai lä dodijidai tä afa wäquema yalo, Jesús a lä cuaano wei tänö, dodijidawä cama bäma ecö nia yai cuo.

⁷Yai Bada tänö tä afa jaba lä wäqueno wei, tä a dodijidawä waiquio fa cunoja, a wä nö nö wäo cöbö mlai.

⁸Öjö tawä? Yai Bada tänö cama ebä dobroimi lä jimano wei däjä, a wä nö nia wäo lä majöono wei tä afa taö showaoma. Abenaja tä a oni cuu. Bada ya tä ano taö lä cule. Judawä ebä lija ma cui, Isaeli ai ebä mö feduwä lija ma cui, obi, a wä nö nia jöwa wäo cöo.

⁹Ejido jamö, cama bä nö badabö lä cöleno wei däjä, dodijidawä bä lä öbölefälöno wei däjä, a wä nö wäo balöoma. Öjö tä a lä culenaja tä a nia cuomi. A wä nö jaba lä wäono wei tä a nofi cadidibonomije. Tä a nofi cadidibou fa mlacufälöjenö, bä nowamaö malä mladaliyono wei. Inaja Bada tä cuma.

¹⁰Isaeli ebä lija a wä nö nia wäo lä cöo wei däjä, abenaja Bada a nia jöwa cuaaö. Bä taamaö lä bufii wei, bei bä bufi jamö tä a nia yai lämabou. Bei bä bufi nia yai taamaö. Cama bä lija a nia yai bufiblamou. Bä nofi nia yai tabou.

¹¹Öjö däjä, “Bada wa tä yai dabä”, bä nowa nia jöwa tayoimi. Cama bä blucanö a nia daö malä waiquio wejei. Bada bä ma cuinö, bada bä lä mlai bä ma cuinö, a nia jödödöwä daöje.

¹²Bä doblou ma mlai ma cui, a bufi nia malä asimou wei. Bä doblono lä mlai tä nofi nia jaducäboimi majöo. Einaja Bada tä cuma. Einaja tä a oni cuu.

¹³A wä nö nia wäo lä cöo wei tä afa wäyää ja, tä a cuo lä balöono wei, jai tä a nomöjöblaö waiquilayoma, tä a jilimamou cuwä. Öjö tawä? Shomi tä a nia lämabou malä majöono wei. Tä a nia nomöjöblaö waiquioma yalo, tä a cudiobä tä ami waiquiwä.

Hebreos 9

¹Öjö tawä? Yai Bada a wä nö wäo lä balöono wei tä a ma cui, tä a nofi cadidibobeje tä a li cuoma. Yai Bada lija täbä ajedobä, cama bä bufi cuu lä bädaono wei tä ja bä nia cuaanomi. Bä möfe bolanö bä nö bayeli nia lä nacaono wei däjä, inaja showawä. Cama bä bufi cuu lä bädaono wei tä ja mlai. Tä a nofi cadidibolajenö bä nia cuaama.

²Yai Bada e yano ma cui, a wä nofi cadidibolajenö e yano itamamaje. Täbä jaba lä faö wei jamö, öjamö cowa wacäbä shi cublamobä tä itabomaje. Nii bä maquebobeje tä çai. Nii bä nia lä maqueo wei bä çai. Öjö a yano lä cui, “A yano lä nowamaö wejei”, a yano afa jilabomaje.

³Acadafu cäcö lä läle tä mashi jamö, ai a yano olaoma. Öjö a lä cui, “A yano yai nowamaö lä dodijio wejei”, a wäfa yano jilabou mö feduomaje.

⁴Öjamö, täbä wäqueshi ni clëdeli uçucamobä, täbä maqueobä täcö çai cuoma. Täcö lä oloblälöno wejei täcö lä cui. Yai Bada a wäno oni didiobä tefi ca çai cuoma, tefi ca çai jödödöwä lä oloblälöno wejei tefi ca lä cui. Öjö tefi ca jamö, manaa bä befi çai

didibomaje. Bä lä didiono wei tä ma cui, tä çai sibosi ooblalemaje. Aaloni etefi lä cabudulayono wei tefi ma cui, öjö tefi ca jamö etefi çai didibomaje. Maa macö çai oni, Yai Bada tä ʘ nō wäo dǎjä, maa macö ja tä ʘ lä oniblamolayono wei macöbä lä cui.

⁵Öjö tefi ca fe laobä tä feyaca fedu jamö, yai waiteli täcöbä nō ijidubö cuoma. Bei täcöbä majecö fa lelejeicunö, jai tefi ca nowamöboböo täcöbä majecö cuoma. ¿Öjö tawä? Fei dǎjä öjö yama tä ʘfa nia wayoaö fe balojoomi.

⁶Inaja Yai Bada etä yano tablaö fa balölojenö, öjamö nofi bäyäälewä bä läa. Bä ojodamou lä cuaaö wei, Yai Bada etä yano lä nowamaö wejei jamö bä fuu ja, bä li cuaaö.

⁷Öjö ma cui, ai a yano lä cui jamö, a yano yai nowamaö lä dodijio wejei jamö, bä fuimi. Öjamö lä nofi bäyäälewä bada a shïlo fuu dao. A fuu ma dao wei ma cui, a showadi fuimi. Moli a shïlo fudou. Lasha ai a faö lä çole dǎjä ma cui, ai a faö lä çole jamö ma cui, ai a ja ma cui, moli a shïlo fudou cuaaö. Yalo iyäbö mlai ja a çai lucäo buomi. Yalo iyäbö mashi fa dälänö, iyäbö çai faö. Cama a ma cui, ai täbä mö feduwä ma cui, bä doblono lä mlai etä nowa mladobä, iyäbö dodobou.

⁸Inaja bä lä cuaaö wei tänö, Yai Bada tä Bufinö bämalecö bufi shïlo yai jaducäblamaö. Yai Bada a wǎ jaba lä wäono wei tä ʘ çai läo showaoje dǎjä, Yai Bada lija täbä ajedobä etä cuami. ¿Öjö tawä? Yai Bada etä yano itabou showaoje dǎjä, e yano yai nowamaö lä dodijio wejei jamö bä lucäo dao malä mlai.

⁹Bamacö fei dǎjä lä bälöle bamacö lä cui, bamacö bufi jaducäblobä, öjö lä tä ʘ waiquiwä. Moisesi etä ʘ lä fuaö wejei bä lä cuinö, bä möfe bolanö Yai Bada tä dobäöje. Yalo bä öshö çai dodobouje. Inaja bä ma cuaaö wei ma cui, bei bä bufi jamö tä lä läle tä mladoimi.

¹⁰Öjö Moisesi etä ʘ jamö, nii bä ʘfa shïlo wayoamou bädao. Toubä lä coaö wejei toubä çai. Täbä dodijidablou çobä, bä nia lä cuaaö wei tä çai. ¿Öjö tawä? Shomi tä ʘ läo showao mlao dǎjä, bei bä sibo nia lä taamamou wei tä ʘ shïlo läo showao balöoma.

¹¹Öjö ma cui, yacumö nofi bäyäälewä Cristo a Bada wawäblaliyoma. Fei dǎjä tä ʘ yai dodijidawä lä waloqueno wei, tä ʘ çai li läa. A lä läladi a lä cui, etä yano shïlo yai doblaa culadi. Öjö a yano lä cui, yanowamö täbänö e yano tablanomije. Ei tä ulufi lä tablamolayono wei jamö e yano çai cuami.

¹²E yano yai nowamaö lä dodijiladi jamö, Cristo moli a fadou waiquilayoma. A lucäo çobä etä cuami. Shibo bä iyäbö çai mlai ja, baca bä ocalo çai iyäbö mlai ja, cama iyäbö çai yai famolayoma, öjö iyäbö ja, bamacö doblou lä mlai tä nowa çamamou shi wǎlii showadaobä.

¹³Yai Bada tänö, yanowamö täbä nofi lä shamibou wei, Moisesi tä ʘ jamö tä ʘ wayoamou. Yai Bada lija dodijidawä täbä nia mömou fe fa yadionö, shibo bä ma cui, baca bä ocalo ma cui, öjö bä iyäbönö bä nia yomösamoma, baca a öshö lä dodobou

wejei ushibä çainö. Öjö täbä bädawä ma cuinö, dodijidawä bä nofi nia jowa tamamou çoma cudeenö,

14 Fei däjä yai! Cristo iyäbönö fei däjä bei wamacö bufi yai aublou dodijia yailayou. Etä wälidiwä cua mlai ja, Yai Bada lija a dodomoquema. Yai Bada tä Bufe lä bälimi wei tä lofotenö, a dodijidawä dodomoquema. Wamacö lä cuaano wei tänö wamacö mili nomama ma cui, bei wamacö bufi jamö tä wälidiwä lä läono wei, Cristo iyäbönö tä mladamalema. Wamacö bufi aublou majölayoma. Fei däjä wamacö yai au, Yai Bada a cua shi lä wälile wama a nosie yai fuaö majöbä.

15 Öjö cudeenö, Yai Bada a wä nö wäo lä majöono wei tä a lä cui, Cristonö öjö tä a çai läa waiquia, bä lä nacaö wei bä lä cui bä bälimi cuobä, Yai Bada a wä nö lä wäono weinaja showawä. Tä a läo lä balöblaono wei tä anö bä afa nomaö tama ma cui, bä doblou lä mlai etä nowa çowamabä, Cristo a nomaa lälayoma.

16 Öjö tawä? Cama madofi ebä nia shelelemabou lä juo wei a lä cuinö, a demi showao däjä bä nia madofi däamaö balöo malä mlai. A lä nomalayono wei a wäfa nomaö jiliaö däjä, ebä madofi nia shilo sheleläo juo.

17 Cama madofi ebä shelelemabou lä bufio weinaja, tä a oni tablaö fa balölonö, öjö tä a lä cui, bada anö tä a nia shilo oni möö juo, cama a nomaa waiquilyono wei ja. Camanö madofi bä çai cuo showao däjä, tä a oni möbä etä cua malä mlai.

18 Öjö tawä? Öjö cudeenö, Yai Bada a wä nö jaba lä wäono wei däjä ma cui, yalo a nomaö mlao däjä, etä nia cadejebonomi. İyä iyä bä cua mlai ja täbä nia bayeliblamonomi.

19 Öjö tawä? Moisesinö, Yai Bada etä a oni bluca däa fa jödödölänö, Isaeli nodiwa bluca bä lija tä a wäyama. Öjö däjä, baca iyäbö dälema, shibo iyäbö çai. Öjö bä iyä iyä fa dälönö, ai bei iyä iyä mashi lä baono wei jamö, mau ubä çai coyocoquema. Öjö däjä, naa jenabä nabä lä shömaö wei jenacö fa cälönö, jenacö fito befi çai ocaquema, shinalu wacä unö. İyä iyä bä lä baono wei bä ja, jenacö fa çadanö, täbä yomösaö cuaama. Yai Bada etä a oni ma cui, tä a oni çai yomösama.

20 Bä yomösalanö abenaja bä nowa tama. Yai Bada tänö wamacö nowa lä tano wei, wama tä a malä jililäfe. Wama a wä nia çai malä fuaö wei. Inaja lä tä cuo dodijioabä. Öjö cudeenö ei iyä iyä bänö bamacö yomösaö lä cule. Einaja bä nowa tama.

21 Inaja showawä, Yai Bada etä yano ma cui, iyä iyä bänö a yano yomösaö cuo mö feduoma. Nofi bäyälwä bänö täbä madofi lä fulino wejei täbä ma cui, täbä çai yomösaö mö feduoma, täbä didibobeje täbä lä cui.

22 Moisesi tä a oni jamö, showadi iyäbö afa malä wäyämou wei. Täbä jödödöwä nia lä aublou wei, iyä iyä bänö täbä fa taamajenö täbä nia shilo dodijidablou ço. Bei iyä bä faö mlao däjä, täbä doblou lä mlai etä nowa mladobä tä cuami waiquiwä.

23 Yai Bada etä yano ma cui, öjamö lä täbä madofi bluca lä fulii wejei täbä ma cui, täbä nofi lä shamibou wejei täbä dodijidablou çobä, inaja tä taamaö bufima. Fedu

jamö täbä lä culadi, öjö täbä nö owä cuo balöoma täbä. Öjö ma cui, Yai Bada tä yano yai lä culadi jamö täbä auobä, tä nowa yai lä bluca wei tänö täbä shïlo yai aublou.

²⁴Öjö cudeenö, yanowamö täbänö Yai Bada etä yano lä tablaleno wejei jamö, Cristo a fanomi. Öjö a yano lä cui, fedu jamö a yano yai lä culadi a nö li owä cuo balöö bādaoma. Fedu jamö, Yai Bada etä yai yano lä culadi jamö, Cristo a shïlo yai falayoma, Yai Bada tä lä culadi jamö bāmālecö nofi yai bāyābodāyobā.

²⁵Eja Yai Bada etä yano yai nowamaö lä dodijio wejei jamö, nofi bāyāalewā bada a shïlo fuu lä cuaadii weinaja mlai. Lasha ai a faö lä çole dājā ma cui, ai a faö lä çole jamö ma cui, ai a ja ma cui, iyābö shïlo çai malā fuu wei. ¿Öjö tawā? Cama iyābö mlai, yalo iyābö çai fuu. Ma, inaja Jesús a cuaanomi. Cama a nia dodoo cuadino malā mlai.

²⁶Einaja etä cuo fa cunoja, bita a colo jaba lä tablamolayono wei dājā a jaba shāmou fa showadaonö, ai a lasha jamö, a showadi shāmou fa çonö a cuaaö fa cunoja, jbejedi a nö nö bleaadii shi wāliblodibö wei! Ma, inaja a cuaanomi. Tä nia lä jödödöblou wei tä cublou ajedou dājā, öjö dājā a shïlo moli bādaliyoma, Yai Bada lija a jibāmoa fa läicunö, täbä doblou lä mlai tä nowa bluca mladamaö showadaobā.

²⁷Yanowamö täbä nia lä nomaö wei, moli bā nia shïlo nomaö. Öjö dājā Yai Bada lija bā nia icuo, bā jimamobā.

²⁸Inaja showawā, täbä bluca doblou lä mlai etä nowa mladamabā, Cristo moli a dodomoa waiquiquema yalo, a nia bādou ço. A nia fuu lä ço wei dājā, wālidiwā tä nowa mladamaö çobā a nia fuimi. Ma, bufi doblalolanö a nö lä dabou wejei bā lä cui, öjö bā nabā nia li fuu, bā fucāabā.

Hebreos 10

¹Moisesi tä ą ja, täbä ąfa lä wayoaö wei täbä lä cui, obi täbä nia dodijidawā lä wawāblou wei, öjö täbä nö owä cuo balöö showaoma. ¿Öjö tawā? Yai Bada lija yalo bā öshö dodoblaabeje, ai a lasha faö ço dājā ma cui, showadi bā yalo çai shïlo lucäo çoje. Öjö ma cui, tä yai lä bejedi wei etä manashi cuo fa bādaonö, täbä dodijidawā tamabou showadaobā etä cuami waiquiwā.

²Dodijidawā täbä cuo showadao fa cunoja, yalo bā nö çai lucäo showaobö mlajei. Bā möfe bolanö bā nö bayeli lä nacao wei bā lä cui, täbä yai aublou showadao fa cunoja, bei täbä bufi jamö etä nö çai wālidiwā läo showaobö mlai.

³Yai Bada lija bā yalo öshö lä dodobodii wejei, ai a lasha faö ço dājā ma cui, showadi bā inaja cuaaö yalo, showadi bā bufi nö wālidiwā öjöböamou.

⁴Baca bā ma cui, shibo bā ma cui, täbä doblou lä mlai, öjö iyābö yalonö etä nowa nö mladobimi waiquiwā.

⁵Öjö cudeenö, bita jamö Cristo a wawāblou dājā, Yai Bada lija a wā fama. Abenaja a jowa cuma. Bā yalo shāö lä läo wejei tä ma cui, wa lä dobäo wejei tä ma cui, öjö wa tä bufijaimi waiquiwā. Wale nia lä yanowamöblamaö wei, öjö wa tä shïlo bufii showadaoma.

⁶Yalo bä öshö lä dodobou wejei bänö wa bufi cafä doblaloimi. Wälidiwä etä nowa mladobä, täbä lä dodobou wejei täbänö çai mlai.

⁷Öjö däjä, abenaja camiyä ya cuma, cafä lija. “Yai Bada wa tä. Bei. Wa tä tamaö lä bufii wei ya tä taö mö fuma.” Einaja ya cuma. Afä tä a oni jamö ya nia jowa lä cuaano weinaja showawä. Einaja Cristo a jowa cuma.

⁸Öjö tawä? Cristo a lä cuno wei, wama tä a jiliaö culawä? Bä yalo shäo lä läo wejei tä ma cui, Yai Bada tä lä dobäo wejei tä ma cui, yalo bä öshö lä dodobou wejei tä ma cui, Yai Bada tänö öjö tä jowa bufiboimi. Wälidiwä etä nowa mladobä bä lä cuaao wei tä ma cui, inaja showawä. Moisesi tä a ja, bä ma nosiemamou wei ma cui, inaja a li cuma.

⁹Öjö däjä, abenaja Cristo a cuu nomöjööma. —Bei. Wa tä tamaö lä bufii wei, ya tä taö mö fuma —a cuu nomöjööma. Öjö tawä? Yai Bada tänö, tä yai lä bufii wei tä bejedi cublobä, tä a läo lä balöono wei tä a li joyamalema.

¹⁰Öjö tawä? Yai Bada tänö tä tamaö lä bufii wei, Jesucristonö tä taö waiquioma yalo, fei däjä Yai Bada dodijidawä bäma ecö waiquiwä. Bamacö bluca bayeliblobä, öjö cä lä cama moli a dodomoa showadaquema.

¹¹Nofi bäyäälewä bä lä cui, ai tä mö jalu lä çole tä ma cui däjä, showadi bä lädalou. Yalo ai bä shäo fa çojenö, showadi bä li dodoblaaöje. Öjö ma cui, bä lä dodobou wejei tänö, yanowamö etä nö wälidiwä mladobimi waiquiwä.

¹²Öjö tawä? Öjö ma cui, täbä doblou lä mlai etä nowa jödödöwä mladou showadaobä, Cristo moli a fa dodomoicunö, Yai Bada jayu boco mashi jamö a dicäquedayoma,

¹³a nö dao balöödayobä. Öjamö a dicäo showao däjä, cama a cotä jamö, a nofi lä wälidou wejei bä lä cui, Yai Bada tänö bä möfe nia boblaamadayou.

¹⁴Öjö cä lä cama moli a dodomoa lä showadaqueno wei tänö, Yai Bada bäma ecö dodijidawä taamabou shi malä wälüi wei.

¹⁵Yai Bada tä Bufi ma cuinö, camiyä bamacö lija tä afa çai wäyää. Abenaja a cuu balööma.

¹⁶Bada ya wano taö lä cule. Cama ebä lija, obi a wä nö nia jowa wäo ço. A wä nö nia wäo lä ço wei däjä, abenaja a nia jowa cuaao. Bei täbä bufi jamö tä a nia lämabou. Bei täbä bufi nia yai taamao.

¹⁷Öjö tawä? Abenaja a cuu nomöjööma. Bä doblou lä mlai tä ma cui, wälidiwä tä lä taö wejei tä ma cui, öjö tä nofi nia jaducäboimi majöo. Einaja Yai Bada bei tä Bufi cuma.

¹⁸Öjö tawä? Wälidiwä tä lä taö wejei tä nowa taboimi waiquio däjä, bä yalo shäo läo çobeje tä cuami waiquiwä.

¹⁹Öjö cudeenö, iba wamacö. Jesús iyäbö dodomoa waiquiquema yalo, Yai Bada etä yano yai nowamao lä dodijiladi jamö ma cui, bäma a bufibolanö bamacö fuu dao.

- 20**Yai Bada tä lä cule jamö täbä ajedou mlaobä, acadafu sicö jaba läoma ma cui, Jesúsno dude yoca caloblalema, balimi bamacö yai cuobä. Yai Bada lija Jesús a dodomamobä a jibämoquema.
- 21**Yai Bada etä yano jamö bamalecö nofi nia lä bäyäbou wei, a çai läa waiquiadayoa. Öjö cudeenö,
- 22**bamacö bufi da bejedimo. Bäma a bufibolanö, Yai Bada lija bamacö icuobä. Bamacö lä cuaaö wei, bei bamacö bufi jamö tä läa mlai ja, jai mau ubänö bamacö aublamolayoma bamacö culanö, dodijidawä bamacö icuobä.
- 23**Jesucristo bufilewä bamacö afa lä jilou wei bamacönö, bäma a nofi yai mölabou da cadidio. A wə nō lä wäono wei a wə cadidou malä cui.
- 24**Dodijidawä bamacö nia lä cuo wei tä ja, bamacö bufi çai da daeo. Bamacö bufi fa lofotoamayonö, bamacö bufi bluca nofiobä. Dodijidawä tä jamö bamacö bluca cuobä.
- 25**Bamacö nia lä yododaö wei tä jamö, ai bä bufi cadidoimi waiquiwä talei. Inaja bamacö cuaaö dicoo mlai. Ma, bamacö bufi yai lofotoamayodibä. ¿Öjö tawä? Bada tänö täbä nia lä jimaö wei etä ajedou waiquiwä yalo, bamacö bufi shılo yai lofotoamayou da dodijio.
- 26**Bei bamacö bufi jamö dodijidawä bäma tä a tabou ma waiquile ma cui, bamacö fe ou majöablalou dicoo ja, wəlidiwä bäma tä fulii mö yabaaö lä çole dāja, bamacö doblou lä mlai tä nowa mladobä, tä nia cuo ço majoomi. Ai a shämou çobä, a nia cuo çodaaimi.
- 27**Yai Bada tänö bamalecö nō nia lä bleaamaö wei tä nia shılo cuo, bamacö quilibä. Cowa wacä nō lä quilijii wacä çai, Yai Bada tä nō lä nabämaö wejei bä mö nia lä watäblamou wei wacä lä cui.
- 28**¿Öjö tawä? Moisesi etä a ma cui, etä a fuaö lä mlajei bä shämobä bä malä cuono wei. Bolacabö cäcöbä ma cuinö, 3 bä ma cuinö, a wəfa wäyää fe usucuoje ja, täbä bufi asimou mlai ja a nia nomamaö showadaomaje.
- 29**¿Öjö tawä? Wəlidiwä tä fulii mö yabaaö lä ço wejei bä nō bleaabä bä li waiquiwä. Öjö ma cui, Yai Bada bei Ijilubö a waii lä majöblao wejei bä lä cui, öjö bä nō nia yai bleaaö dodijio. ¿Öjö tawä? Yai Bada a wə nō wäo lä çono wei tä a çai läobä, Jesucristo a shämolayoma. İyäbö falayoma. Öjö İyäbönö bä doblou lä mlai etä nowa mladamalema ma cui, inaja bä lä cuaaö wei bä lä cuinö İyäbö nō waibläö majöoje. Yai Bada tänö täbä nofi ojodabobä a Bufen läa ma waiquile ma cui, a Bufen nō çai waibläöje.
- 30**¿Öjö tawä? Yai Bada bäma a malä dale, abenaja a lä cuno wei a lä cui. Nö yualewä camiyä ya yai. Ya tä no nia çoaö. Einaja a cuma. Abenaja etä a oni çai cuu. Bada tänö cama ebä nia jimaö. Einaja tä a cuu.
- 31**Yai Bada tä demi cua shi lä wəlile tänö täbä yai fuwäabläö fa cadidionö, bä nō nia shılo yai quilili bleaamaö.

³²Jesucristonö wamacö bufi lä wacacablmaleno wei däjä, wamacö dodijidawä jaba da cuoblei, tä nofi da jaducälöje. Wamacö nö bleaamaö ma dodijiono wejei ma cui, wamacö nö walojaö fe yadioma.

³³Ai däjä, wawadowä wamacö nö waiblamaje, wamacö nö çai bleaamamaje. Ai däjä, Jesucristo ebä nö lä bleamano wejei bä lija wamacö yädäoma yalo, çafä wamacö ma cui, wamacö çai taamaö yädäo mö feduo showaomaje.

³⁴Bä fe lä labono wejei bä lä cui, wama bä nofi çai malä ojobono wei. ¿Öjö tawä? Afä täbä madofi ma däabläöje däjä ma cui, wamacö bufi doblao çai cuo fe yadioma. Afä balimi täbä yai dodijidawä lä culadi wama täbä bufibläö waiquioma cudeenö, dodijidawä wamacö cuo fe yadioma.

³⁵Öjö cudeenö bä nö walojaö fe da yadio, öjö lä. Wamacö nö walojaö fe lä yadio wei tänö, wamacö nia malä dobämodayou wei.

³⁶Wamacö nö walojabä tä waiquiwä. Yai Bada tänö tä tamaö lä bufii wei wama tä taö fa cadidionö, tä afa lä wäqueno wei wama tä yai däadayobä.

³⁷Yai Bada etä a oni jamö, abenaja tä a çuu. Tä nö fa dedejedalunö, a nia lä fuu wei, a nö daablalou çoa mlai ja, a nia fuu showadao.

³⁸Iba bä lä cuinö, wale nofi mölabouje yalo bä demi nia cuo. Öjö ma cui, bä bufi mö yabablou çoo dicoo ja, wale bufi nia doblamaboimije. Einaja tä a çuu.

³⁹Öjö ma cui, camiyä bämacö lä cui, bämacö bufi mö yabablou çobä bämacö malä mlai. ¿Öjö tawä? Bämacö mö watäblamobä bämacömi. Ma, bäma a nofi yai mölabou. Öjö lija bämacö lä nowamöo wei bämacö, bämacö dodijidawä cudio fe yadiobä.

Hebreos 11

¹Yai Bada a wä nofi bejedi lä mölabou wejei bä lä cuinö, täbä afa lä wäaö wei täbä bufibou cadidioje. Täbä dablaimi showawä ma cujei, täbä nofi yai tabou cadidilajenö bä cuo.

²Bämacö nö badabö lä cuinö, Yai Bada a wä nofi mölabou fa cadidiojenö, a bufi malä doblamabono wejei.

³Yai Bada bäma a wä nofi mölabou yalo, bämacö bufi jaducäwä. Yai Bada a wänö, jödödöwä tä lä tablamolayono wei bäma tä daö. Bäma täbä lä möö wei täbä lä cui, tä dablamous lä mlai tä ja täbä li tablamolayoma täbä.

⁴Abele a lä cuinö, Yai Bada a wä nofi mölaboma yalo, dodijidawä etä dodoboma. Bä aiyobö Cainonö täbä dodobou lä cuono weinaja mlai. Öjö cudeenö, Abele lija Yai Bada a dobämamou bufi doblaoma. A wäfa dodijidawä wäyäma. ¿Öjö tawä? Abele a nomamalema ma cui, Yai Bada a wä nofi lä mölabono wei tä lä cui, fei däjä ma cui tä a jilimamou showawä.

⁵Enocö a lä cuinö, Yai Bada a wə nofi mölabou waiquioma yalo, demi a çöfäälöma, a nomaö mlaobä. A fa çöläfäälönö, a dablamous çödaanomi. A çöä showao mlao däjä, Yai Bada a bufi lä doblamabono wei, tä äfa wäyämou showaoma.

⁶¿Öjö tawä? Yanowamö täbä lä cuinö a wə nofi mölabou mlaoje däjä, Yai Bada a bufi doblamabobeje etä cuami waiquiwä. Yai Bada lija bä nia lä ajedou wei bä lä cui, “Yai Bada a cua lä”, bä bufi cuu mlao däjä, bä nia ajedou malä mlai. “Ya nö bayeli nacao ja, wale dobäö weicätä”, bä bufi cuu mlao däjä, bä nia ajedou buomi.

⁷Noewä a lä cuinö, Yai Bada a wə nofi mölaboma yalo, a wə li fulema. Tä nia lä cublono wei tä ja Yai Bada tänö a yömölaa fa balölönö, canawä a tablalema, cama ebä nofi çai yashuobä. Yai Bada a nosie fuaö lä ayaono wei tänö, ai täbä lä bälöblai bä dobloimi jimamoma. Öjö cudeenö, Yai Badanö bä nö bluca blemalalema. ¿Öjö tawä? Noewänö a wə nofi mölaboma cudeenö, Yai Bada tänö jai a cadejewä waiquiwä a nofi tabou showaoma.

⁸Ablaamö a lä cuinö, Yai Bada a wə nofi mölaboma yalo a wə fulema. ¿Öjö tawä? Ablaamö lija Yai Bada tänö etä ulufi nia fa jibäänö, a nacalefäälöma. A fa nacaläfäälönö, bei yo daö balöa ma mlai ma cui, a aa showadalayofäälöma.

⁹A wə nofi mölaboma yalo, tä äfa ulufi lä wäqueno wei jamö a bälöblaquefäälöma, shomi bä wayumö bälöblao lä culenaja showawä. Bä ijilubö Isaacö e ma cui, öjö bä ijilubö Jacobo e mö feduwä ma cui, öjamö bä yanomou mlai ja, yalo sibä ja bä shilo wejedou cuaafäälöma. Yai Bada tänö tä äfa lä wäqueno wei, Isaacö a ma cui lija, Jacobo a ma cui lija tä äfa çai wäyämamou mö malä feduono wei.

¹⁰Ablaamö a lä cuinö, Yai Bada tänö a shabono lä tablaladi a malä bufibono wei, a colo lä lofotoboladi a lä cui.

¹¹Sara a lä cuinö, Yai Bada a wə nofi mölaboma yalo, a lofotomaboma. A suwäbada ma waiquiono wei ma cui, a nia shibönaböö fe lä yadiono wei tä ja, a nö wəlojomaboma. Bä ijilubö e äfa lä wäqueno wei a wə bufiblalema yalo, e cublaliyoma.

¹²Inaja tä fa cublalunö, Ablaamö a wəlobada ma waiquiono wei ma cui, bä ijilubö e taa fe fa yadicönö ebä nodiwä blucablaliyoma. Fedu jamö shidicali bä nö wabamobimi lä culenaja bä bluca cublou mö feduoma, modu u casö jamö mlaca mlaca bä nö çai wabamobimi lä culenaja showawä.

¹³Yai Bada a wə nofi mölabou showalajenö, öjö bä bufi bluca mlao cuaama. Yai Bada tänö tä äfa ulufi lä wäqueno wei tä wawädowä möno ma mlajei, tä nia jowa lä cublono wei a wə bejedi bufibou showao fe yadiomaje. A wə bejedi bufibomaje yalo, bä bufi doblaloma. Bitä jamö bä nia cudio lä mlai, cama bä äfa wawädowä wäyämoma. Bä äfa shomi jilamoma.

¹⁴¿Öjö tawä? Inaja bä lä cuno wei bä ä jilimamou walalaoma. Bä nia yai lä cudiodayou wei tä äfa ulufi malä wäyänö wejei.

- 15** Cama etä ulufi lä daquefälöno wejei etä ulufi bufibou showao fa cunoje ja, öjamö bä mö nö yabaaö çoofälöbö wei.
- 16**Ma, tä ulufi yai lä dodijidai tä bufibomaje, fedu jamö tä ulufi lä culadi. Öjö cudeenö, Yai Bada tänö wawadowä cama ebä afa jilabou. Dodijidawä bä nia fa bälömabonö, bä shabonobö tabou malä waiquiladi.
- 17**Ablaamö a lä wabamono wei däjä, Yai Bada a wä nofi mölaboma yalo, bä ijilubö Isaacö a ma cui, a nia lä shämono wei jamö a maquebou waiquioma. ¿Öjö tawä? Yai Bada tänö, Ablaamö lija Isaacö a wäfa wäa ma balöblaqueno wei ma cui, öjö a shämobä a maquea majöa dicoquema, bä ijilubö moli a lä cui.
- 18**Yai Bada tänö a wäfa wäyää ja, abenaja a cuma. Afä ya bä afa nodiwä bluca lä wäyänö wei, ijilufä Isaacö lija bä nia bluca nodiblou. Einaja a cuma.
- 19**Einaja a cuu waiquioma yalo, Ablaamö a möläö showao fe yadioma. “Täbä ma nomablou wei ma cui, Yai Bada tänö täbä demi jocädamaö daö”, a bufi cuu lofotooma. Jai a nomaö waiquiwä, Ablaamönö a nofi tabou ma waiquiono wei ma cui, a demi tabou fe yadioma.
- 20**Isaacö a lä cuinö, Yai Bada a wä nofi mölaboma yalo, bä ijilubö ecöbä afa bayeliblamou wäyäma. Jacobo, Esau cäcöbä nia obi lä bayeliblamou wei tä afa wäyää balöoma.
- 21**Jacobo a nomaö ajedeo däjä, Yai Bada a wä nofi mölaboma yalo, José bä ijilubö ecöbä afa bayeliblamou wäa nomöjöquema. Dee anö a baijilanö, a möfe fa boalunö, Yai Bada a wäfa doblao tama.
- 22**José a lä cuinö, Yai Bada a wä nofi mölaboma yalo, a bufi mlao lä ajedeono wei däjä, cama ebä nowa talefälöma. Israeli ebä lä cuinö, Ejido tä ulufi nia lä daafälöno wejei tä a wäyää fa balöonö, cama a nia lä nomaö wei däjä a nia lä taamamou wei, a wäfa çai wäyämou showaoma. Ubä çoamamou bufioma, Canaana tä ulufi jamö bä yacumö fublou däjä, ubä çai fufälöbeje.
- 23**Moisesi bä föönö, Yai Bada a wä nofi çai mölaboma, bä nöö e ma cuinö, inaja showawä. A nofi mölaboböma yalo, Ejidoteli bada a wä nö quili tabönomi. Israeli ebä ijilubö nia ma shämaö wei ma cui, Moisesi a oshe liyäjäwä fa dabölalönö a joyaboböö showao däjä, belibo 3 ebä lublamabölema.
- 24**Ejidoteli bada a lä cui bä tää enö, Moisesi a nofi jaba oshe ma ijiluno wei ma cui, a lä badalayono wei däjä, öjö e afa jilobä, etä waia majölema.
- 25**Wälidiwä talewä bä sho, a bufi jole dobladobä etä ma cuono wei ma cui, Yai Bada ebä nö lä bleamano wejei bä lija a çoçabä etä shilo yaia majölema.
- 26**Ejidoteli bä nö yai madofiböoma ma cui, cama etäbä çai bluca wailema. Yai Bada tänö a shimabä a lä yaileno wei a bufibou waiquioma yalo, a nö bleaabä etä ma cuono wei ma cui, öjö tä jamö a bufi mö shilo yai blucaoma. A nia lä dobämodayou wei tä malä bufibono wei.

27Yai Bada a wə nofi mölaboma yalo, Ejidoteli bada a nö quili taö mlai ja, tä ulufi daaquefälöma. Yai Bada a dablamous ma mlai ma cui, jai a daa waiquilalema a nofi tabolanö, a nö wəlojaö fe yadioma.

28Yai Bada a wə nofi mölaboma yalo, Yai Bada a nia waiteli lä jayuanu wei dāja, bä nowamöö fe yadiobä, iyä iyä bänö bei yocabä yəblaö bufima. Yai Bada əjele etä Waicalewä lä cuinö, bä ijilubö jaba bä lä cublai bä shäö mlaobä, bä li inaja cuaama. ¿Öjö tawä? Yai Bada a nia waiteli lä jayuaö wei, a nofi çai çocamaoö malä showaodaono wejei.

29Isaeli ebä nodiwä lä cuinö, Yai Bada a wə nofi mölabomaje yalo, modu Wacä u bada jamö ma cui, jai wejediwä tä cuwä jamö bä bucadubaliyoma. Öjö ma cui Ejidoteli bä lä cui, inaja cama bä nia bucaduo cuo ma juono wei ma cui, bä mishi bluca duobaliyoma.

30Yai Bada a wə nofi mölabomaje yalo, Jelicoteli bä shabonobö sibo jamö bä shoqueblaaö cuaaö showao dāja, 7 tä mö didi fa tablamalöjenö, Jelicoteli bä alabö na blälälaliyoma.

31Laaba a lä cuinö, showadi a suwä lä dodoono wei a lä cuinö, Yai Bada a wə nofi çai mölabou mö feduoma. A wə nofi mölaboma yalo, bä jaamodou lä mlai bä mö bluca watäblaöje dāja, cama a demi feiblamamaje. Tä ulufi lä bomaböno wei cəcöbä lä cui, cəcöbä dodijidawä walomaquema yalo a nowamamaje.

32Ai ya bä əfa jayumaö ma dao wei ma cui, ya tä ə labamaö bufiomi. Jedeoni a çai malä cule, Balaco a çai, Sasono a çai, Jedei a çai, David a çai, Samuel a çai, Yai Bada a wəno wäyäləwä bä çai bluca.

33Öjö bä lä cuinö, Yai Bada a wə nofi bluca mölabomaje. ¿Öjö tawä? A wə nofi mölabomaje yalo, ai bä lä cuinö, täbä bälöjowä lä yaiblai bä bälöo yanöcömabou fe yadiomaje. Ai bä mö feduwä lä cui bä ə lofotoaö fa ayaonö, dodijidawä tä jamö täbä tamabou fe yadiomaje. Ai bä lä cui lija, Yai Bada tänö tä əfa lä wäqueno wei etä bejedi cublaliyoma. Ai bä lä cuinö, öla bä cəficö fuwädamaje.

34Ai bä mö feduwä lä cuinö, cowa wacä bada lublamamaje. Ai bä showawä lä cui, sibala bänö bä mili ma shäö wejei ma cui, bä docua fe yadilayoma. Ai bä lä cui bä ujuduo ma waiquiono wei ma cui, bä lofotoblou çolayoma. Ai bä mö feduwä lä cui, bä ishobä jamö bä nö yai wəlojaö dodijioma. Ai bä showawä lä cuinö, shomi bä lä bälöblai bä wayu yashublalemaje.

35Ai bä suwä lä cuinö, Yai Bada a wə nofi mölabomaje yalo cama ebä nomöa lä bono wejei ebä demi jocädou çoma. ¿Öjö tawä? Ai bä mö feduwä lä cuinö, Yai Bada tä ə nia fa joyamajenö, bä nö ninili ma bleamano wejei ma cui, tä ə daanomije. Bä bufi bejedio waiquioma yalo, bä fujelabeje etä ma cuono wei ma cui, “Ma, ya tä ə nö joyabimi”, bä cuma. ¿Öjö tawä? Bä nia lä doblaodayou wei tä bufibou waiquiomaje yalo, bä nö bleamamou ojodaoma.

36Ai bä lä cui bä nö waiblamaje. Bä si çai yafelimamaje. Boo shibä badanö ai bä çai çocabomaje. Bä fe çai labomaje.

³⁷Ai bä lä cui, maa mabänö bä çai shäyämaje. Ai bä fe çai jafedimamaje. Sibala bänö ai bä çai duyämaje. ¿Öjö tawä? Ai bä lä cui bä nö fölilil bleaablaloma. Täbä lä didio wei sibä ja bä didio mlai ja, oweja sibä shïlo läbou bädaomaje, shibo sibä çai. Bä nö ninili çai bleaablaloma. Bä nö çai blemabomaje.

³⁸Yanowamö täbänö bä nofi tabono ma mlajei ma cui, öjö bä shïlo yai dodijidaoma. Tä ulufi bloque jamö ma cui, bei macö jamö ma cui bä bälöblalou cuaama. Maa maca bä jamö ma cui, täcabä lä cublai jamö ma cui bä li cublaloma.

³⁹Öjö bä bluca lä cuinö, Yai Bada a nofi mölabou cadidiomaje. Yai Bada cama a ma cuinö, bä dama. Öjö ma cui, tä afa lä wäyänö wei tä ja bä dobämou showaa mlai ja, bä nomalaliyoma.

⁴⁰Yai Bada tänö dodijidawä bämalecö nia bluca lä tamabou wei tä daö waiquioma yalo, bä dobäo showadaonomi. Camiyä bamacö lä nodiblöle bamacö mlai ja, cama bä doblamabou balöo ayao mlaobä.

Hebreos 12

¹Öjö bä jaba lä cuono wei bä lä cuinö, Yai Bada a wä nofi lä mölabou wejei tä wawädowä damalalemaje. ¿Öjö tawä? Jai bämalecö fe fayobouje bä cuwä waiquiwä yalo, bamacö çai dodijaö mö da feduo, öjö lä. Bamacö lä yabäcamou wei bäma tä da joya. Wälidiwä bäma tä fujebloä si ijejewä lä mlai tä çai. Öjö däjä Yai Bada tänö bämalecö taamaö lä bufii weinaja, bamacö cuaaö cadidou fe da yadio.

²Jesús lija bamacö bufi mö shïlo yai da cudio, bämalecö lä lulubou wei a lä cui lija. Bamacö möläo showaobä bämalecö bufi lofotomabou. Fii balitama tefi ja a nö bleaabä etä ma cuono wei ma cui, a bufi nia doblao çai cuo lä majöono wei tä bufiboma yalo, a ojodao fe yadioma. Jai wälidiwä talewä a nia mömou ma cuono wei ma cui, a bufi quilinomi. Inaja a cuaaö fe yadioma yalo, fei däjä Yai Bada jayu boco mashi jamö a dicäadayoa.

³Wälidiwä talewä bänö a nofi wälibomaje yalo, inaja a taamamaje. Öjö ma cui a bufi nö wälojoablalou fe yadio showaoma. Öjö lija bä bufi da daeo, cama a lä taamamono weinaja wamacö çai taamamou mö feduo ja, wamacö modablou mlai ja, wamacö bufi lofote çai cuo fe yadiobä.

⁴Wälidiwä talewä bänö wamacö ma yabäcaöje däjä ma cui, wamacö shäo showadao malä mlajei.

⁵Yai Bada tänö bä ijilubö bäma ecö nowa lä taö wei, ¿wama tä a nofi mojudoubou tawä? Bamacö ma yabäcamou wei, bämalecö bufi lofotoamaö fe yadiobä, abenaja tä a cuu. Uasi. Bada tä lä culadinö wa lä cadidamaö wei tä ja, a bufi da jaducälö. Wa nö bleaamaö ja, a bufi çai ujudua dijä.

⁶Tabä yai nofimaö cudeenö, Bada tänö täbä cadidamaö malä cui. Täbä nofi bluca lä ijilumaö wei bä cadidamabä, bä malä taamaö wei. Einaja tä a cuu.

- ⁷Wamacö nö bleaaö dǎjä, “Yai Bada tänö wale cadidamabä ya nö li bleaaö”, bä bufi yai da cu. Yai Bada tänö wamacö nofi ijilumaö yalo, wamacö malä taamaö wei. Bä föö ebä lija, showadi bä ijilubö ebä shïlo cadidamamou malä cui.
- ⁸Yai Bada tänö bä ijilubö ebä cadidamaö lä cuaaö weinaja wamacö taamaimi ja, bä ijilubö wama ecömi waiquiwä. Jole jole wama a nofi föömaö bädaa lä cule.
- ⁹Eja bamacö lä föömole bä lä cuinö bamacö cadidamaöje ja, bäma bä nö quili talanö bäma bä ʼ fuaö malä cui. Bei bamacö bufinö bäma a nofi yai lä Föömale a lä cui, öjö bäma a wʼ shïlo yai fuabä a, bamacö demi cuobä.
- ¹⁰Yanowamö bäma bä nofi lä föömaö wei bänö bamacö cadidamaöje ja, cama bä cuaaö bufi lä doblao weinaja bamacö nia wanonowä taamaö balöoje. Öjö ma cui Yai Bada a lä cuinö, dodijidawä bamacö cudiobä bamacö yai cadidamaö. Cama a lä culenaja bäma ecö yai dodijidawä cuo mö feduobä.
- ¹¹Yai Bada tänö bamacö cadidamaö dǎjä, bamacö bufi doblalou mlai ja bamacö bufi nö yai bleaaö balöo. Öjö ma cui bamacö lä taamaö wei tänö, bamacö bufi yai jaducäblou ja, bamacö bufi yanöcölanö bamacö nia shïlo yai dodijaö majöo.
- ¹²Öjö cudeenö, jai ujudi bä cublou dijä. Bä shïlo yai ublaa da lofotoablalo.
- ¹³Yai Bada lija wamacö nia lä cadidofälöö wei tä ja bä bufi yai da shalilo, wamacö doblou lä mlai wamacö wʼ lidiblou fe balojoo mlai ja, wamacö yai dodijidablou çobä.
- ¹⁴Bufi yanöcöwä wama bä çai cuo fe yadiobä bä nö shïlo da wʼ loja. Yai Bada dodijidawä wama ecö yaiobä bä cuo fe da yadio. ¿Öjö tawä? Inaja bä cuaaö lä mlai bänö Bada tä nia möimi waiquiweje.
- ¹⁵Bä da moyaweicu, öjö lä, çafä ai wamacö lä cui, Yai Bada tänö wamacö nofi ojodabobä wamacö waiquiwä ma cui, wamacö bufi mö yabablou çoo mlaobä. Inaja ai wamacö cuaaö coyocoo dicoo ja, wamacö bluca yabäcamou cuquei. Cowamilimi cosinö möjödadilimi cocobä fuamaö lä culenaja, inaja wamacö cublou dicolo.
- ¹⁶¿Öjö tawä? Bä da moyaweicu, ai wamacö nofi jushuaö jʼ too mlaobä. Nö badabö Esau a lä cuinö, Yai Bada a nofi tabono lä mlainaja wamacö çai cuaaö dicoo mlaobä. Bä ijilubö jaba e cuoma yalo, bä föö lija a yai bayeliblamobä a ma cuono wei ma cui, moli a lä iyalayono wei tänö etä nomöjquema, bä fäähä e lija.
- ¹⁷Wama tä ʼ malä dale. Tä nö fa dedejedalunö, bä föö lija a bayeliblamou ma bufiono wei ma cui, a waimoa majölayoma. A ma öcöno wei ma cui, a wʼ nö wäo waiquioma yalo, a wʼ shominajaaö majöobä etä cuonomi.
- ¹⁸¿Öjö tawä? Çafä wamacö lä cui, Sinai cäcö jamö wamacö ajedobä wamacö waloyolonomi, cäcö yai lä dablomou wei cäcö lä cui jamö. Fei dǎjä cowa wacä bada ömoo nö quiliaimi. Tä mö didi çai sublaomi. Wadoli a nö çai bada quiliaimi.

¹⁹Tä madofi lä jolamou wei tä ʼ çai j̄liomi. A wə nō bada j̄liamou lä quiliano wei, a wə çai fei d̄jä j̄liamoimi. Öjō a wə nō jaba fa quilianō, a wə lä j̄lileno wejei bā lä cui bā yömōlamou quilii fe balojooma. Moisesi lija a wə faō wasōmaje,

²⁰Öjō lija bā nō nosiemamobimi waiquiwä cudeenō. ¿Öjō tawä? Yalo a bādawä ma cuinō, Sinai cäcō colo jubaō bādao ja, maa mabänō a shäyāmaō bufima, a nomaō showadaobä.

²¹¿Öjō tawä? Bejedi tä mömou nō quiliama. Moisesi a ma cui, cama a wəfa çai quilili blösō blösomou wäyāmoma.

²²Ma, Sinai cäcō jamō mlai, Siono cäcō jamō wamacō yai waloa waiquiqueyoluma. Yai Bada tä demi cuo shi lä wəlile e shabono jamō wamacō cua, Jelusale tä shabono dude yai lä culadi jamō, ajele bluca fe balojowä bā bufi doblalou çai lä çocamoladi jamō.

²³¿Öjō tawä? Yai Bada bā ijilubō ebä lä çocamoladi jamō wamacō çocaa, fedu jamō bā ʼfa bluca lä oniboladi bā lä cui lija. Bā ijilubō jaba bā nofi dobou lä culajeinaja, cama ebä nofi bluca tabou. Yai Bada tä lä culadi jamō wamacō yai cua lä cule, tábä jimaō lä cadidio wei a lä cui lija. Cama ebä jaba lä cuono wei ma cui, öjō bā çai çocaa. Bā lä bälöono wei d̄jä, dodijidawä bā li cuoma yalo, fei d̄jä doblao bā tamabou lä culadi, bei bā bufi lä cui.

²⁴Jesús a lä culadi jamō wamacō cua, dude tä ʼ çai lä läle a lä cui lija, cama iyäbō lä yomösamodayono wei jamō. Abele iyäbō nō yuamou lä bufiono weinaja mlai, camiyä bāmolecō nofi nia lä ojodabou wei iyäbō ʼfa sh̄lo wäyāmamou.

²⁵Bada tä lä culadi a wəfa lä j̄liole d̄jä, bā yömōcacō comao dijä. Bitä jamō bā wasöō lä balöono wei d̄jä, a wə j̄liano lä mlajei bā nō bleaamaō malä balöono wei. Fei d̄jä fedu jamō culanō bāmolecō yai lä wasöladi d̄jä, bāma a wə j̄liablaimi ja, bei bāmolecō nō bleaamaō yaiquei.

²⁶Sinai cäcō jamō a wə lä fano wei d̄jä, bei a wə lofotenō tä ulufi ma quida quidamomano wei ma cui, fei d̄jä a wə nō wāo ço ja, abenaja a cuu. Inaja ya nia cuaaō lä ço wei d̄jä, ulufi ya nia quida quidamomaō buomi. Judu mösō ma cui, inaja showawä ya mösō nia quida quidamomaō cuo. Einaja a cuu.

²⁷¿Wama a wə j̄liaō cule? Ulufi a jaba lä quida quidamomano weinaja a nia jōwa cuaaō ço. Tábä bluca lä tablaleno wei tábä quida quidamomaō fa çonō, tábä nia jōwa joyaō. Öjō d̄jä tábä joyamou dao lä mlai tä nia sh̄lo feiblou.

²⁸¿Öjō tawä? Tä ulufi joyamou dao lä mlai tä ja bāmolecō nia dobäō cudeenō, bāmacō bufi doblalou çai da cuo. Camiyä bāmacō lija a bufi doblalou çai cuodayobä, bāma ecō yai da bejedimo. Bāma a nō quili talanō, bāma ecō nō bayeli da nacao.

²⁹A nō quili tamobä a malä cui, cowa wacä lä ömōo wei wacä nō quili tamou lä culenaja showawä, tábä mö bluca lä watäblaō wei wacä lä cui.

Hebreos 13

- ¹Jesucristo wama ecö nofimayou lä cuaaö weinaja, inaja showawä bä shïlo yai da cuaa.
- ²Shomi täbä yafia bädalayou ja, täbä shïlo bälömabou bufi da dobloaje. Ai bänö shomi täbä bälömabou bufi fa dobloajenö, ajele täbä tabou malä jatoono wejei. ¿Öjö tawä?
- ³Bä fe lä labolajei bä lä cui, bä nofi da jaducäboje. Cafä wamacö fe labou fa cunoje ja, wamacö nö bayeliblamou cuo lä bufiobö weinaja, inaja showawä, bä nofi yai da taboje. Bä nö lä bleaamaö wejei bä lä cui, öjö bä nofi da ojodaboje. Cama bä ujudi lä culenaja wamacö cuwä mö feduwä malä cui.
- ⁴Bä feyalobö wama ecö lä cuinö, suwäböfä bä nofi da taboje. Bä suwäbö wama ecö mö feduwänö, inaja showawä, feyalofä wama bä nofi çai tabou mö feduobä. Wamacö joleblalolanö wamacö nö waiblayou mlai. Bä nofi lä jushublalou wei bä ma cui, bä çai lä joleblalou wei bä ma cui, Yai Bada tänö öjö bä nö nia bleaamaö malä cui.
- ⁵Blada bä ma cui, madofi bä ma cui, öjö bä nofi yaibo dijejä. Wama täbä tabou lä waiquile täbä ja, bä bufi shïlo yai cuo shalilio da showadao. Abenaja Yai Bada a malä cuu wei. Obi ma cui bamacö nia daaimi. Bamacö nia çai joyaö majöomi. Einaja Yai Bada a malä cuu wei.
- ⁶Bamalecö nia joyaimi waiquiwä yalo, Yai Bada etä a oni jamö tä a lä cuolenaja, camiyä bamacö ma cui bamacö çai cuu dao. Wale lä bayelibou wei a lä cui, öjö Bada tä waiquiwä. Ya quilibä tä cuami. ¿Wedi tabä yanowamö täbä bädawä ma cui ya bä nö quili taö bashiquei? Einaja bamacö cuu dao.
- ⁷Cafä Jesucristo wama ecö lija bä jaba bada lä läono wei bä lä cui, öjö bä lija bä bufi da daeo, Yai Bada etä a ja wamacö jaba lä yömölano wejei bä lä cui bä lija. Bä dodijidawä cuo fe lä yadiono wei tä ja, wamacö bufi fa daeonö, bä da owäboje. Yai Bada a nofi mölabou cuo fe lä yadiono wejeinaja, wama a nofi mölabou cuo mö feduo nomöjöobä.
- ⁸Jesucristo a bufi nia shomiblou majöomi. Jaba däjä a cuo lä balöono weinaja, fei däjä ma cui a cuwä showawä. Obi ma cui, inaja showawä a nia cuo shi wälii.
- ⁹Shomi tä a ma wäyamou wei ma cui, shomitawä tä a çai ma waloo wejei ma cui, öjö bä a ja bä bufi luluamo dijä. Judio bänö nii bä afa showadi ma wayoaö wejei ma cui, nii bänö täbä bufi bayeliblamoimi. Cama bä ma cui bä bufi bayeliblamou malä mlai. Yai Bada tänö wamacö nofi lä ojodabou wei tä anö, wamacö bufi nia shïlo yai lofote cuo.
- ¹⁰¿Öjö tawä? Camiyä bamacö bayeliblamobä a lä dodomoqueno wei a lä cui, bama a daö. Yai Bada etä yano jamö, nofi bäyälewä bä judio ojodamou ma buo wei ma cui, camiyä Jesucristo bufilewä bamacö lija bä yädäobä bämi.
- ¹¹Abenaja judio bä cuaaö. Nofi bäyälewä bada a lä cuinö, Yai Bada etä yano yai nowamaö lä dodijio wejei jamö, yalo iyäbö çai lucäö, täbä doblou lä mlai etä nowa

mladamabä. Inaja a cuaaö fa balöonö, bä yalo lä shäö wejei bä lä cui, täbä lä bälöle tä sibo jamö bä yalo öshömaö nomöjjoje. ¿Öjö tawä?

12Inaja showawä, täbä lä bälöle tä sibo jamö, Jesús a çai shämoa culayoma, cama iyäbö showawänö bäma ecö yaiobä.

13Öjö cudeenö, cama lija bämacö yaua fa showadaicunö, Jesús a nö çai yamili bleaamaö siboo lä cuono wejeinaja, inaja bämacö taamamou ojodao cuo mö feduobä.

14Eja bämacö nia lä cudalou wei bämacö shabonobö cua malä mlai. Ma, tä shabono nia obi lä wawäblou wei, öjö bäma tä nö shabono yai dabou.

15Jesúsnö camiyä bämalecö nofi bäyäbobä a läa waiquidayoa yalo, Yai Bada bäma a shïlo yai da dobä. ¿Öjö tawä? Wedi tä ja mlai. Öjö lija bämacö bufi afa doblalou lä wäyämou wei, jai bäma a dobäö tä nofi tabodayoa. Bufi doblalolanö bäma a nofi Badabou da wawädo.

16Wamacö dodijabä tä cua waiquia ja, ai wama bä nia lä dobäö wei tä cua waiquia ja, bä mojimo dijä. Ai bäma bä bayelibläö däjä, jai cama Yai Bada bäma a dobäö cadidio, tä nofi tabodayoa. Öjö lä tänö bäma a bufi shïlo yai doblamabou.

17Cafä Jesucristo bufilewä wamacö lija bä bada lä läo wei bä lä cui, dodijidawä bä a da fuaje. Wamacö bufi çai dodijidawä tamabobeje bä malä läo wei. Yai Bada tänö bä lämabou yalo, öjönö bä a nö nia wäamaö. Bufi doblalolanö bä ojodamobä, bä bufi wäliwä çai bälömabo dijejä. Wama bä bufi wälidianaö dicoo ja, wamacö nia bayeliblamou malä mlai.

18Yai Bada lija yamalecö nö bayeli shïlo da nacaje. Shominaja yamacö cuaaö malä mlai. Bei yamacö bufi jamö yama tä lämabou mlai ja, showadi yamacö dodijaö bufi malä doblao wei.

19¿Öjö tawä? Wamale bayelimaö da dodijio, cafä wamacö lijamö Yai Bada tänö wale shimaö çobä.

20Bei. Yai Bada tänö bämalecö bufi lä yanöcomabou wei a lä cui lija wamacö yai bayeliblamobä, öjö lä, Bada tä Jesús a demi jocädamaö lä çolayono wei a lä cui lija. Öjö oweja bäma ecö lä cui, bämalecö yai nia lä nowamaö wei, öjö a Bada. Cama iyäbö bämalecö nia nowamaö shi lä wälii wei tä a çai läa, Yai Bada tä a nö wäo ja a lä cuno weinaja showawä.

21Dodijidawä tä bluca lä cui ja wamacö bayeliblamobä, bämacö nö bayeli nacaö, tä tamaö lä bufi wei wama tä yai tabä. Yai Bada wama a bufi doblamabobä, cama a showawänö wamacö nia cadidimabou, Jesucristo wama ecö yalo. Öjö bäma a nofi doblaö shi wälibä a waiquiwä. Inaja lä tä cuobä.

22Iba wamacö. Wamacö moyawäobä, ei jolodowä ya tä a oni shimaö lä cule. Dodijidawä wamale a nia jiliaö, ¿öjö tawä?

23Timoteo a fujebäo çolayou lä cufajei. Öjö lä wama tä dabä ya wä. Eja a waloo jaödaoyoluu ja, öjö sho bämacö fe nia walou.

²⁴Jesucristo bufilewä wamacö çai lä culajei bä bada lija, wamalecö ɶfa da wäyäje. Cama Yai Bada ebä bluca lija çai. Italiateli bä Jesucristo bufilewä lä cui, çafä wamacö lija bä ɶfa çai wäyämamou bufi doblaä lä cule.

²⁵Bei. Yai Bada lija wamacö shïlo bayeliblamobä, wamacö nofi bluca ojodabobä.

Santiago

Santiago 1

¹Camiyä Santiago cä ya. Yai Bada ya nosie juabä ya, Bada tä Jesucristo çai. Isaeli bä ijilubö 12 wama ecö bälöa lä nodile wama ecö nija, ei ya tä ą oni shömaö. ¿Dodijidawä wamacö cua showaa culawä?

²Iba wamacö. Wamacö nö ma bleaaö wei ma cui, bä bufi yai doblao fe da yadio.

³Ei wama tä daö malä waiquii. Wamacö nö bleaaö däjä, Jesús wama a nofi mölabou fe lä yadio wei tänö, showadi wamacö bufi nö walojoablalou talei.

⁴Bä bufi nö shino yai da waloja, öjö lä, wamacö bufi yai bayeliblamobä. Wamacö bufi nö bleaaö mlai ja, wamacö bufi walalawä çai cuobä. Öjö däjä wamacö bufi nia ujuduaimi.

⁵Ai wamacö bufi wedinajamou bädawä ja, Yai Bada nija bä nö bayeli da nacao. Wamacö bufi jaducublamaö weicätä. A bufi läo mlai ja, bluca täbä nija a shi öjöde dablamous talei.

⁶Öjö ma cui a bufi jaducublamaö a lä nacou wei a lä cui, a bufi fa bolacaicunö mlai, moli tä jamö a bufi culanö a nacou shalilio showadaobä. Bolacabö täcö bufibolanö a wä faö dicoo ja, wadoli anö mau u shäyajaö lä culenaja a bufi cuwä waiquiwä dicowä.

⁷Inaja a bufi cuwä waiquiwä ja, a mölaa bälou. Yai Bada nija a nia dobämoimi.

⁸A bufi lä shedecou wei a lä cui, cama a nia lä cuaaö wei etä ma cui ja, a bufi shaliliwämi. Bada tä nija, öjö a lä cui a nia bayeliblamoimi waiquiwä.

⁹Jesucristo ai ebä ma jöli wei ma cui, bä bufi doblalobä cäbä. Yai Bada tänö bä nofi tabou fe yadio cudeenö bä bufi nia yai doblalou.

¹⁰Jesucristo ai ebä lä cui, bä nö lä madofibö wei, öjö bä bufi çai doblalou mö feduobä cäbä. Madofi bä ja mlai. Ma, Yai Bada nija bä yai bayeliblamou cudeenö bä bufi nia doblalou. ¿Öjö tawä? Madofi ebä nia cudio malä mlai. Cama bä ma cui, moimoima bei bä jole mlaaö lä cuaaö weinaja bä cuaaö mö feduo malä cui.

¹¹Moimoima bei bä jole lä cublai bä ma liyäjäi ma cui, motoca shi yoblao däjä bä wäblädaö malä majöo wei. Bä jole bläläa majölaliyo. Bä nö lä madofibö wei bä lä cui, inaja showawä bä çai cuaaö. Bä dodijidawä ma bälöo däjä, bä bufi fa mlaicunö, bä nia cuo majöomi.

¹²Bä bufi ma wabamou wei ma cui, bä nö walojaö fe lä yadio wei bä lä cui bä bufi nia doblalou. Dodijidawä bä cua fe yadia cudeenö, Yai Badanö bä nia malä bälimiblamaö wei. ¿Öjö tawä? A wä nö wäa waiquiquema. A lä nofimaö wejei bä nia bälimiblamaö.

¹³¿Öjö tawä? Wälidiwä tä ja wamacö yabäcamou ja, “Yai Bada tänö wale yabäcamäo da culanö”, bä bufi cu dijä. Yai Bada a lä cui, wälidiwä tä ja a nö yabäcamobimi. Yanowamö bä ma cui, wälidiwä tä ja cama Yai Bada tänö bä çai yabäcamaimi.

14Ma. Bä lä yabäcamou wei bä lä cui, wälidiwä tä ja bä bufi li fa luluamonö bä li yabäcamou, cama bä bufi waiyou waiquiwä cudeenö.

15¿Öjö tawä? Wälidiwä ta ja bä bufi cuaablalou cudeenö, bä nia wawädowä icuo. Öjö däjä, wälidiwä tä lä taö wejei tänö bä yaçumö nomaoblou.

16¿Öjö tawä? Bä möla dijä, iba bamacö lä nofimaö wei wamacö. Wälidiwä tänö täbä doblamaimi.

17Täbä yai lä doblamaö wei a lä cui, öjö Yai Bada a waiquiwä, fedu jamö a lä culadi. Öjamö culanö bämalecö yai bayeliblaö. ¿Öjö tawä? Bäma a nofi lä Föömale a lä cuinö tä ulifi wacacamabobä, judu mösö jamö täbä shi shadimaquedayoma. Tä shi yai lä doblaladi, cama a waiquiwä. Tä mö dödjöblou majöobä a nia shomibloimi.

18Cama bejedi etä anö, dude bämalecö tablaö çolayoma, Jesús nija jaba bamacö bufi lä cuqueno wei bamacö lä cui, cama bäma ecö yaiobä. ¿Öjö tawä? Judio bänö Yai Bada a dobäbeje, döano sibä ja bä jaba lä lalou wei ebä yaimabou lä culajeinaja, inaja showawä camiyä jaba bei bäma ecö yaia mö fedua lä cule. ¿Öjö tawä? Dude bämalecö tablamaö bufi fa doblaonö bämalecö li tablamalema.

19Wamale a da jililä, iba bamacö lä nofimale wamacönö. Ai bä a faö däjä lobe bä a da jiliaje. Bä a faö shi jalimo dijä. Bä çai jushudou showadao dijä.

20Täbä jushudou si lä ijejei täbänö Yai Bada a bufi doblamaboimije. Täbä dodijaö malä mlai.

21Öjö cudeenö, bei wamacö bufi jamö wama tä shami lä lämabole tä bluca da joyalöje. Wälidiwä wama tä lä taö wei tä çai. Öjö däjä, Yai Bada wama etä a tabou lä waiquile tä a da bufiblaje. Wamacö bufi oquewä çai fa cuonö, öjö tä a ja bä bufi shino yai da dayäo. Wamacö nia lä jucäamou wei, öjö tä a waiquiwä.

22Öjö ma cui, Yai Bada wama tä a jiliaö bädao mlai ja, tä a lä cuu weinaja wamacö yai cuaabä. Wama tä a jiliaö bädao ja, wamacö nia mölaa bälayou.

23Tä a juaö mlajei, tä a shino jiliaö lä bädao wejei bä lä cui, abinaja bä cuwä. Möle ajamö bä wäyacu moli lä mömou wei bä lä culenaja, inaja bä cuwä mö feduwä.

24Bä wäyacu ma mömou wei ma cui, bä fa alufälönö, bä wäyacu mömou lä cuono weinaja tä nofi mojududaö majölayouje.

25Öjö ma cui, Jesucristo etä a dodijidawä lä cui tä a fa jililäjenö, tä a nofi jaducubou fe lä yadio wejei bä lä cui, öjö bä nia shino yai bayeliblamou, tä a juaöje yalo. Bä bayeliblamobä tä a. Sadanasinö täbä ma tabou wei ma cui, täbä nia jujeblamou fe lä yadio wei, öjö lä tä a. ¿Öjö tawä? Öjö ma cui, tä a jiliaö lä buo wejei bä lä cui, tä a nofi mojudubou majöö dicooje ja, bä nia bayeliblamoimi.

26“Yai Bada nija ya dodijidawä cuobä ya malä cuaaö wei”, bä nofi lä tamamou wei bä lä cui, inaja bä nofi ma tamamou wei ma cui, bä caficö a wasöomi ja, cama bä nofi mölamamou nö beblalou lä cule. Öjö bä lä cui, bä jole ma dodijiablalou wei ma cui, cama bä caficö a jäo fa mlacunö, Yai Bada tänö bä dodijaö dablaimi waiquiwä.

²⁷Yai Bada bäma a nofi lä Fjömale a lä cuinö bämalecö dodijaö dablabä, abinaja bämacö nia yai cuaaö. Ijilu wajadi bä lä cui bäma bä nofi nia tabou. Suwä bä lä feiblou wei bä çai. Bä nö bleaaö cudeenö bäma bä nia bayeliblaö. ¿Öjö tawä? Yanowamö täbä showadi lä cuaaö wei tä ja, bämacö nia çai yädäbloimi. Inaja bämacö yai cuaaö ja, Yai Bada tänö bämalecö nia shino yai dodijaö dabraö.

Santiago 2

¹Iba wamacö. Bada tä Jesucristo a yai lä doblao wei wama a nofi mölabou yalo, yanowamö fe usucuwä wama bä nia nofimaö. Bä mömou ma wälidii ma cui, bä mömou ma liyäjäi ma cui, fe usucuwä wama bä çai dodijidawä cuobä.

²¿Öjö tawä? Cafä wamacö lä yododaö wei jamö, camishi liyäjäwä cäcö ja a lä didile a waloquei, imicö çai lä baushi wei a lä cui. Öjö däjä, lebesi cäcö ja ai a lä didile a çai waloa mö feduquei.

³A mömou lä liyäjäi a nija wamacö bufi doblalou cudeenö, “Eja a da loiquiyo”, wama a nowa taö. Öjö ma cui, a jöli nö lä bleaaö wei wama a nofi doaö mlai ja, a çöblou bälayou. Wama a çai loamaö mlai ja, cama a loa bädaquei. Inaja wamacö cuaaö dicoo ja, fe usucuwä wama cäcöbö nofimaii waiquiwä. Inaja wamacö lä cuaaö wei

⁴wamacö dobloimi. Bä mömou lä dodijidai tä ja bä möla dijä. Bei bufi mlai, bei wama bä sibosi li möö buo malä cui.

⁵Bämacö lä nofimaö wei wamacö. Wamale a da jililä. Yanowamö täbä jöli lä bälöblai, Yai Bada tänö öjö bä yaia cadidilema, tä nowa yai lä bluca wei tä tabobeje. Cama a nofi nia mölabou lä cadidio wejei, öjö tä nowa shino yai bluca. Cama nija bä nia lä cuo wei tä çai. ¿Öjö tawä? A lä nofimaö wejei bä lä cui, öjö bä nia çai bälöo lä dodijio wei tä afa malä wäqueno wei.

⁶Öjö ma cui, cafä wamacö lä cuinö, bä lä jöli wei wama bä nofi taboimi dicowä. ¿Wedi tä tabä bä nö lä madofibö wei, öjö bei wama bä nia li bufibou? Wamacö showadi lä yabäcaö wejei, ¿öjö bämi tawä? Bada bä nija wamacö afa dobloimi lä wäyää wejei, öjö bä li showawä malä cui.

⁷Öjö bä lä cuinö, ¿Bada tä Jesucristo a nö waiblaimi sijewä? ¿Öjö daanö? Afä a lä cui, a nö bejedi waiblaö dodijiweje.

⁸Yai Bada tänö tä nabä yai lä shömöqueno wei, ei tä a. Cafä wa nofi jölio lä culenaja, inaja showawä aifä wa bä nofi tabolanö wa bä nofimabä. Einaja Yai Bada etä a cuu. Inaja wamacö yai cuaaö ja, wamacö nia shino dodijaö cuquei.

⁹Öjö ma cui, ai wama bä nofi shino tabou ayao dicoo ja, wamacö dobloimi waiquiwä. Moisesi tä anö wamacö afa wälidiwä talewä tamou, wamacö waimobä.

¹⁰Moisesi tä a ja, wamacö mili cadidou ma cui, ai moli tä ja wamacö cadidoimi dicoa ja, wamacö waimobä wamacö waiquiwä malä cui. Wama tä a nofi bluca cadidibou malä mlai.

- 11 ¿Öjö tawä? Täbä joleblalou lä wasöö wei a lä cuinö, yanowamö täbä çai shäö wasöö malä cui. ¿Öjö tawä? Wamacö joleblalou ma mlai ma cui, yanowamö wama täbä shäö dicoo ja, wama etä a nofi cadidiboimi waiquiwä.
- 12 Moisesi tä anö wamacö waimou mlaobä, Jesucristonö wamacö jujeblamalema, cama dodijidawä etä a ja wamacö nosiemamou majöobä. Öjö etä anö wamacö nia shino jömmamou cudeenö, bä a da wasöö. Bä shino da dodija.
- 13 Yai Bada tänö täbä jömaö däjä, yanowamö täbä nofi ojadabono lä mlajei bä lä cui, cama bä nofi nia çai ojadaboimi mö feduwä. Öjö ma cui, täbä nofi lä ojadabono wejei bä lä cui, öjö bä nia jömmamou quiliimi.
- 14 Iba wamacö. “Yai Bada ya nofi mölabou”, wa ma cuu wei ma cui, wa dodijaimi ja, ¿wa nia bayeliblamou daanö? Wa wä lä faö wei wa wänö, ¿bei wa nia jucäamou daanö?
- 15 Wamale a da jililä. Jesucristo bufilewä ai a lä cui, a nia lä didio wei ecö camishi cuami ja, a nia lä iyaö wei ebä nii çai cuami ja,
- 16 bei wa wä bädawänö, ¿öjö a bayeliblamolayou daanö? “Dodijidawä a da çojamö”, wa nowa taö. “Camishi cäcö ja a da didiicu, wa nö wjadili bleaaö mlaofälöbä”, wa nowa çai taö. “Dodijidawä a da iya”, wa nowa çai taö ma cui, einaja wa lä cudou wei wa wänö, ¿a nia bayeliblamou daanö? Ma. Inaja wama a nowa ma taablalale ma cui, wama a yai dobäo mlao däjä, a nia bayeliblamou buo malä mlai.
- 17 Inaja showawä, “Yai Bada ya nofi mölabou”, bä ma cuu wei ma cui, bä dodijaimi ja bä jolemou waiquiwä. Bä bayeliblamobä etä cuami.
- 18 Abinaja ai wa lä cui, wa jowa cuu dicoo. “Jesucristo ya nofi ma mölabole ma cui, bei ya li dodijaimi bawä.” ;Inaja dicoo mlai! Jesucristo wa nofi jowa ma mölabou wei ma cui, wa dodijaimi ja, ¿wedi tänö wa nö bejedi li öjöböamobä, öjö lä? Camiyä ya lä cuinö, Jesucristo ya nofi lä mölale ya tä nia yai dablamaö, ya lä dodijaö wei tänö.
- 19 “Yai Bada a lä cui, yami tä Yai Bada cua ayaa”, wa bufi jowa cuu. Bejedi lä wa wä. Öjö wa tä a daö bäa ma cule, öjö tä anö wa nia jucäamoimi. Fecula bä jucäamou malä mlai. Yai Bada a lä cule tä daö ma cujei, bä jucäamou mlai ja, bä shino quilili blösö blösömmou bädao.
- 20 ¿Wedinaja bäfä nowa li fa tanö, bäfä bufi nia yai möblamaö? ;A bufi da jaduculu! “Yai Bada ya nofi mölabou”, täbä ma cuu wei ma cui, bä dodijaimi ja bä jolemou waiquiwä.
- 21 Camiyä bamacö nö badabö Ablaamö a lä cuinö, Yai Bada nija bä ijilubö Isaacö e dodoabä, e maqueboma. ¿Öjö tawä? Inaja a cuaama yalo, a dodijama cudeenö, jai a dodijidawä waiquiwä Yai Bada tänö a nofi li taboma.
- 22 ¿Öjö tawä? Ei malä cui. Yai Bada a nofi mölabolanö Ablaamönö a wä li juaö cadidioma. A lä dodijano wei tänö, Yai Bada a nofi lä mölabono wei etä damalalema.

²³Yai Bada etä ʼa oni lä cuu weinaja tä cublaliyoma. Abinaja tä ʼa cuu. Yai Bada a wə fa jilimolunö, Ablaamönö a wə bejedi bufia showadaalema. Cama Yai Bada a wə bufiblamou fa damolalunö, jai a cadejewä waiquiwä bei a nofi Ablaamö tadaö showadalayoma. Einaja tä ʼa oni cuu. Ablaamö a lä cui, Yai Badanö cama nofi e ʼafa jilaboma.

²⁴Ei malä cui. Täbä dodijaö yalo, jai bä dodijidawä waiquiwä Yai Bada tänö bä nofi yai tabou. A nofi lä mölabou wejei tä bädawänö mlai.

²⁵Laaba a ma cui, inaja showawä, ¿Yai Bada tänö a nofi çai tabou balöonomi daanö, showadi a suwä lä dodoono wei a lä cui? Abinaja a suwä cuaama. Isaeli ecöbö lä cuinö, Jelico tä ulifi bomaböö lä balöano wei däjä, cäcöbö dodijidawä walomaquema. Cäcöbö nowamama yalo, shomi jamö cäcöbö shömöa taa çolema. A dodijama yalo, jai a dodijidawä waiquiwä Yai Badanö a nofi li taboma.

²⁶Abinaja ya cuu. Yanowamö a bufi lä mlaqueno wei, nomawä bloque a nia cuo juo. ¿Öjö tawä? Yai Bada a nofi jəwa ma mölabou wejei ma cui, bä dodijaimi ja, inaja showawä bä bloque cuwä.

Santiago 3

¹Iba wamacö. “Ya täbä yömölabä ya waiquiwä”, bä nofi shi jaliwä tamamo dijä. Yai Bada tä ʼa ja, yama bä lä damaö wei yamacö lä cui, yamalecö nowa yai talanö yamalecö nia malä jömaö wei. Tä wayu.

²¿Öjö tawä? Showadi bamacö bluca yacläo si malä ijejeoblou wei. Öjö ma cui, bei a wə lä wasöo wei a lä cui, öjö a bufi shino yai walalawä waiquiwä. A cuu lä bufio wei tä ma cui ja, a nia lä cuaaö wei tä ma cui ja, a wasöo dao.

³Cabayo bä caficö jamö tä madofi lä çcabou wejei tänö, bä jumaö lä bufio wejei jamö bä cadidamaöje. Öjö bä yalo bada ma cui, öjö lä tä wai madofi natanö bä jumaö shaliliablouje.

⁴Canawä bä ma cui ja, bä bufi çai da dayäo, öjö lä. Wadoli a badanö, modu u jamö bä bada ma jilulamou wei ma cui, canawä a colo lä cadidamaö wei a lä cuinö, wiisibö etä wai madofinö a bada cadidiablalamaö, cama a befi çai cuaaö lä bufio wei jamö a cadidou cuaafälöbä.

⁵Inaja showawä, bei bamacö caficö wai ma wajaquemi wei ma cui bamacö caficö ʼa wayu. Wiisibö bamacö ʼa wəlidawä fadou ma buo wei ma cui, jödödöwä bäma tä wəlidablamaö. Cowa wacö wai ma wajaquemi wei ma cuinö, wacö wai fa balalönö tä ulifi öshöoblou malä cui.

⁶Bei bamacö caficö lä cui, jai cowa wacö lä culenaja bamacö caficö ʼa çai wayu cuwä mö feduwä. Bamacö caficö ʼa wasöomi ja, wəlidawä bluca tä lä cule bäma tä wawämaö talei. Inaja bamacö cuaaö dicoo ja, cowa wacö wai biyäblou lä culenaja, wəlidawä tänö bamacö comi jödödöwä wəlidablaliyo, shobali wacönö täbä bluca mö nia lä watäbläo weinaja showawä.

⁷Yanowamö tábänö yalo bä jïima tabouje ja, bä yanöcömabouje. Bä jïima tabouje cudeenö, a yalo waitelimou ma bufio wei ma cui etä bluca mladamaleije. Bä yalo lä juu wei bä ma cui, bä lä yäo wei bä ma cui, bä lä joleaö wei bä ma cui, modu u jamö bä bluca lä juu wei bä ma cui, bä yanöcömabou daöje. Bä waitelimobä bä ma cui, bä wasöbouje.

⁸Öjö ma cui, cama yanowamö tábä caficö ʘ nō wasömamobimi waiquiwä. Wʘlidiwä tä ʘ ja tábä caficö ʘ nō yanöcöblobimi. Tábä caficö ʘ wayu fe balojowä.

⁹Bei bamacö caficönö, Bada bäma tä nofi lä Föömale bäma tä ʘfa doblao wäyää. Öjö lä bamacö caficö showawänö, yanowamö bäma bä wafäo. Inaja dicoo mlai. Yai Bada a lä culenaja bä cuobä bä yanowamö ma tablamolayono wei ma cui, Yai Bada a Bufi owäbobeje bä waiquiwä ma cui, ʘwedi tabä bäma bä ʘfa nia li taö dicoo?

¹⁰ʘÖjö tawä? Moli bamacö caficö showawä jamö, Yai Bada bäma tä ʘfa doblao lä taö wei tä ʘ faö, bäma tábä lä wafäblaö wei tä ʘ çai showawä. Shädayai, iba wamacö. Inaja dicowä mlai.

¹¹U fe lä jojole jamö, dodijidawä u faö lä waiquile jamö, ʘwʘlidiwä u nia coyocoblou daanö? Mlaicätä.

¹²ʘIco fibä jamö oliba mabä nia lalou daanö? Ma, iba wamacö. Nii cama cäcö nia yai, cäcö nia majöbloimi. Uba totobä jamö ma cui, ico bä çai nia faimi. Inaja showawä, u mosidiwä waiquiwä ja, dodijidawä u nia jiqueamoimi.

¹³ʘCafä ai wamacö bufi jaducuwä cublawä tawä? ʘWamacö bufi çai dao tawä? Wamacö bufi lä jaducui wamacö nia jömöomi. Wamacö bufi oquejelanö, wamacö nia shino cudio. Wamacö lä dodijaö wei tänö wamacö bufi nia jaducuwä damolaliyo.

¹⁴Öjö ma cui, tábä dodijaö lä ayao wei wama bä nofi wʘlibou dicoo ja, “Camiyä shino yai”, wamacö bufi cuu dicoo ja, bä jolemo dijä, öjö lä. Bä dodijidawä jömöo dijä. Wamacö bejedimou malä mlai.

¹⁵Wamacö bufi ʘfa jaducuwä ma tao wei ma cui, inaja wamacö lä cuaaö wei wamacö lä cui, wamacö bufi jaducuwämi. Yai Bada nija wamacö bufi taamamou malä mlai. Ma, yanowamö showadi tábä lä cuaaö weinaja, wamacö cuaaö bädawä dicowä. Yai Bada tä Bufi ja wamacö luluamou mlai ja, fecula bada a nija wamacö yai luluamou dicoa.

¹⁶ʘÖjö tawä? Tábä dodijaö lä ayao wei tábä nofi wʘlibouje ja, “Camiyä shino yai”, bä bufi cuablalou dicoo ja, tä nia jödödöwä wʘlidiblou. Wʘlidiwä tä bluca lä cui ja, tábä nia yai cublou majöo.

¹⁷Öjö ma cui, Yai Bada nija bä bufi yai lä jaducuo wei bä lä cuinö, wisibö tä nia çai wʘlidiwä jubaö bädaomije. ʘÖjö tawä? Bä bufi nia shino yanöcöwä çai cuo. Bufi oquewä bä nia çai bälöo. Cama bä bufi lä cuu wei bädao mlai, ai bä ma cui bä ʘ nia çai jiliaö mö feduoje. Tábä nofi nia çai shino ojodabouje. Bä nia shino dodijaö. Ai tábä nofi nia tabou ayaomije. Bä nia shino bejedimou.

¹⁸¿Öjö tawä? Täbä nofi wəliayou balaö mlaobä, bä bufi lä yanöcöo wei bä lä cuinö täbä bufi yanöcömabouje. Täbä fa yanöcömabojenö, yanöcöwä täbä çai bluca bälöo nomöjööje.

Santiago 4

¹¿Wedinaja wamacö bufi fa cunö wamacö li ishous? ¿Wedi tabä wamacö li shäyou? Wedi tabä mlai. Wamacö wasömamou bufio fa mlacunö wamacö inaja cuaaö, çafä wamacö cuaaö lä ojode wei wama tä nofi yaibou fa dicoonö.

²Wama tä lä bufii wei wama tä taboimi yalo, wamacö niyayou. Wamacö bufi ma waiyou wei ma cui, wama tä nö däabimi yalo wamacö li shäyou. Wamacö ishous. ¿Öjö tawä? Wama tä tabou lä mlale, Yai Bada nija wamacö nacou fa mlacunö wama tä li taboimi.

³Ai däjä wamacö nacou ma buo wei ma cui, wamacö nacou dobroimi waiquiwä cudeenö wama tä nö däabimi waiquiwä. Wamacö cuaaö bufi lä doblao wei tä jamö wamacö cuaabä, wamacö shino yai bayeliblamou bufi doblao dicoo malä cui.

⁴¡Uo! Shominaja wamacö bufi lä cuaablalou wei wamacö lä cuinö, ¿ei bei wama tä daö mlaa culawä? Yanowamö täbä showadi lä cuaaö wei tä ja wamacö bufi cuo dicoo ja, Yai Bada wama tä nö nabämaö waiquiwä. Öjö cudeenö, öjö tä jamö wamacö cuo bufi lä doblao wei wamacö lä cui, Yai Bada nija wamacö nö nabämobä wamacö li cuaaö.

⁵¿Yai Bada a jolemou daanö? Abinaja etä ç oni cuu. Camiyä bamacö nija, Yai Bada a Bui bälöobä a lä shömamono wei a lä cuinö bämalecö nofi jalujubou talei. ¿Öjö tawä? Einaja etä ç cuu dodijio.

⁶Öjö ma cui, Yai Bada tänö bämalecö nofi yai ojodabou lä dodijio wei etä wawäblou talei. Öjö cudeenö abinaja tä ç çai cuu. Cama bä lä jömöo wei bä lä cui nija Yai Bada a wə Bui lämou. Öjö ma cui, bä jömöo lä mlai bä lä cui bä nofi yai ojodabou.

⁷¿Öjö tawä? Yai Bada tä ç shino yai da juaje, öjö lä. Fecula bada wama a wə wai showadao ja, a nia doculayou.

⁸Yai Bada nija bä da ajedofälö, camanö wamacö ajedemabobä. Wəlidiwä talewä wamacö lä cui, dodijidawä wamacö fa cuicunö bä yai da aublamlou. Wamacö bufi lä shedecou wei, moli tä ja bä bufi yai da shaliliicu.

⁹Wamacö doblou lä mlai, ¡bä bufi wəlidiwä yai da damolalu! ¡Bä yai da öcö! Wamacö çablalou lä bashiblaou wei, ¡bä bufi yai da wəlidiblalu! Wamacö bufi shi jaliblalou mlai ja, ¡bä bufi yai shino da shädayaimo!

¹⁰Yai Bada nija wamacö jömöo mlai, bä çafa shino dobroimi da wäyämö. Öjö däjä, dodijidawä wamacö nia taamabou fe yadio.

¹¹Iba wamacö, bä çafa wayoayo dicoo dijä. Aifä wama bä çafa wayoaö dicoo ja, wama bä jömaö dicoo ja, wamacö doblou malä mlai. Inaja wamacö cuaaö dicoo ja, Cristo wama etä ç juaimi. Wama etä ç juaö lä moji wei tänö, wama etä ç wəlidiwä çai jömaö

waiquiwä. ¿Öjö tawä? Cafä wamacö lä cuinö, Cristo wama etä a wälidiwä jömaö dicoblaobä wamacö malä mlai. Wama etä a yai juabä wamacö.

¹²A yai nosiemobä, öjö moli a shino yai cua. Öjö lä a showawänö täbä nia jömaö. Öjönö täbä jucäaö dao, täbä mö çai watäblaö dao. ¿Öjö tawä? Cafä ¿wedi bei wamacö li, aifä wama bä jömaö bashiblaobä?

¹³Bei tawä, cafä wamacö a faö lä dicoblaö wei. Shomi jamö wamacö nia jöwa lä juu wei, wamacö afa wäamamou. Madofi wama bä nia jöwa nomöjaö. Wamacö jöwa nia madofiböblou. Fei däjä wamacö juimi ja, fena ja wamacö nia jöwa juu. Öjamö lä wamacö bälöaö showao däjä, lasha moli wama a nia jöwa lalomaö.

¹⁴Inaja wamacö ma cuu wei ma cui, fena ja tä nia lä cublou wei wama tä daimi waiquiwä. Wamacö nia demi lä cuo wei wama tä çai daimi. Ölajashi a faö lä fenao wei a lä cui, a nö dedejebou mlai ja, lobe a mladou malä cui. Inaja showawä, cafä wamacö çai cuwä mö feduwä.

¹⁵Abinaja wamacö yai cuu fa cunoja tä nö shino yai doblaobö wei. “Bada tänö wale taamaö ojode ja, ya demi cua showaa ja, inaja ya nia cuaaö”, wamacö shino yai cuu fa cunoja tä nö dodijidaobö wei.

¹⁶Öjö ma cui wamacö nofi yaimamou fa dicoonö, jai cafä wamacö showawänö wama tä bluca cadejebou waiquiwä, wamacö a jilimamou cuwä dicowä. Inaja täbä afa wäamamou lä cuo wei tä wälidiwä waiquiwä.

¹⁷¿Öjö tawä? Tä lä dodijidai bäma tä nö ma öjöböaö wei ma cui, bäma tä taimi ja bamacö dabloimi waiquiwä.

Santiago 5

¹Bei tawä, wamacö nö lä madofibö wei wamacö lä cui. Wamacö bufi doblalou mlai ja, bä yai da öcö. Cafä bä nomöa yai da yuamamo. Wamacö nö nia lä bleaaö wei tä ajedewä waiquiwä.

²Wamacö madofibö nowa cuami waiquiwä. Jai täbä jodelaliyoma täbä cuwä waiquiwä. Wamacö camishibö ma cui, jai bä wädölalemaje bä cuwä waiquiwä.

³Afä olo bä ma cui, afä blada bä ma cui, jai bä bluca amu ushibö waiquiwä bä cuwä. Bä amu ushibö cudeenö, wama täbä tabodii lä buono wei wama tä dablamaö waiquia dicoa lä cule, Yai Bada nija wamacö jömamobä. Ei tä ulifi nia cudio malä mlai, wama täbä madofi shimomaö fe yadiobä. Öjö bä nija wamacö bayeliblamou mlai ja, wamacö mö nia shino yai watäblamou, cowa wacönö täbä mö watäblaö lä culenaja showawä.

⁴¿Öjö tawä? Cafä wamacö ficalibö ca jamö wama bä lä shömöleno wei bä lä cui, bä ma ojodamono wei ma cui wama bä nowa çamanomi dicowä. Wama bä mölaa dicomalema. Bei. Cama bä nowa çamamobä bä blada lä cule, wama bä blada jibäano lä mlai, bä a blada jilio lä cule. Wama bä blada nofi jöwa tabou fa showaonö bä çomöö, wamacö jolemou dablamobä. Wama bä lä ojodamomano wei bä ma cui, çali bä nacömu. Bada tä shino lojode cua lä ayaladinö bä a jiliaö culadi.

⁵Madofi wama bä çai bälöo bufi doblao dicooma. Wamacö cuaaö bufi lä doblao weinaja wamacö cuaaö cadidioma. Baca bä ocalo blewä lä culenaja wamacö cuwä, bä shämobä bä lä blemalajei bä baca lä culenaja. Cafä inaja wamacö çai nia fa tablamamonö wamacö blelaliyoma.

⁶Bä lä cadidou wei bä lä cui wama bä jole jömaö fa dicoonö, wama bä shäa yacläa dicomalalema. Cafä wamacö a shino lojodoaö fa ayaonö, bä nofi bäyäobä etä cuonomi.

⁷¿Öjö tawä, iba wamacö? Bada tä nia lä juu wei, wamacö bufi yanöcölanö wama a nö dabobä, öjö lä. Täbä lä ficalimou wei täbä lä cuinö, bufi yanöcölanö cama nii ebä malä bufibou wejei. Bä nia lä iyaö wei tä ja bä möladii. Maa a jaba lä quei wei a ma cui, a quei lä ço wei a ma cui, a nö dabou malä cujei, sibä badablobä.

⁸¿Öjö tawä? Cafä wamacö ma cui, wamacö bufi çai yanöcöwä cuo mö feduobä. Bä bufi da shalilo, Bada tä juu ajedewä malä cui.

⁹Wamacö bufi jushuolanö ai wama bä afa wayoaö mlai, iba wamacö, wamacö jömamou dicoo mlaobä. ¿Öjö tawä? Täbä nia bluca lä jömaö wei a lä cui, yoca lä jolele jamö a icuo ajedeo waiquia lä cule.

¹⁰Bada tä wano wäyälwä bä lä cuono wei bä nija bä bufi yai da dayäo, öjö wama bä owäbobä. Bä nö ma bleaano wei ma cui, bufi yanöcöwä bä cuo showao fe yadioma.

¹¹¿Öjö tawä? Bä nö walojaö fe lä yadiono wei bä lä cui, bäma bä bufi afa doblalou wäyäo talei. Jobö a ma cui wama afa malä jilibole, bufi yanöcölanö a nö walojaö fe lä yadiono wei a lä cui. Bada tänö dodijidawä öjö a nia taamaö fe lä yadiono wei wama tä a çai daö. ¿Öjö tawä? Bada tä bufi asimou talei. Täbä nofi çai ojodabou talei.

¹²Abinaja bämacö nowa çai taö, iba wamacö. Ei ya wä lä cui wamale a yai da jililä. Wamacö bejedimou dablambä, Yai Bada wama a wäfa nia jayumaö buomi. Abinaja bä cu dijä. “Ya jolemoimi. Yai Bada a malä cule”, bä cuu dodijio dijä. Inaja bä lä cuu wei bä jolemou bädao ja, Yai Bada nija bä nofi nia nacao. ¿Öjö tawä? Yai Bada wama a wäfa jayumaö mlai ja, bä bejedimou da showadao. Yai Bada a ma cui, judu mösö ma cui, bita a ma cui, ¿wedi tabä öjö bei wama bä afa nia jayumaö majöo? “Awei”, wamacö nia lä cuu wei, wamacö bejedimobä bä bufi cadidia da showadaicu. “Ma”, wamacö nia lä cuu wei, inaja showawä, Yai Bada tänö wamacö nö bleaamaö mlaobä.

¹³Cafä wamacö nija ai a lä cui a nö bleaaö ja, Yai Bada nija a nö bayeli nacaobä, öjö lä. Ai a mö feduwä lä cui a bufi doblalou ja, amowa tä anö Yai Bada a nofi doablabä.

¹⁴Ai a showawä lä cui a jalili ja, bada bä nacabä, Jesucristo ebä çai lä yododaö wejei bä bada lä cui. Öjö bä fa waloicunö, täbä lä jölöcamou wei toubä dabönö a nia jalili jölöcaöje. Inaja a taamalajenö a nö nia bayeli nacaöje, Bada tä Jesús a wano.

¹⁵A nofi mölabolajenö a nö bayeli nacaöje ja, a lä jalili wei a nia jalou. Bada tänö a demi nia ubladamaö ço. A doblono lä mlai etä cua ja, etä nowa nia mladamaö showadao.

¹⁶Öjö cudeenö wamacö doblou lä mlai, wawädowä wamacö ʼa nö fa wäonö, Yai Bada nija bä da bayelimayo, wamacö jalou çobä. Yai Bada nija a lä cadidou wei a wä faö ja, a wä nia jiliaö si ijejeo. A nö bayeli nacao dāja cama etä nia yai cublou.

¹⁷Öjö tawä? Yai Bada a wäno wäyälwä Elia a lä cuaano wei wama tä ʼa malä dale. Camiyä bämacö lä culenaja Elia a cuo mö feduoma ma cui, a wä yai jiliodayoma. Yai Bada a nofi mölabolanö a wä faö ja, maa a jamabou bufima. Yai Bada tänö a wä fa jililädunö, lasha 3 a lalou ma cuono wei ma cui, ai a lalou bähäcuaaö ma çono wei ma cui, maa a quenomi showawä.

¹⁸Öjö dāja Yai Bada nija a wä faö fa çonö, maa a quea fa çolunö, tä ulifi nö nijiblou çolayoma.

¹⁹Iba wamacö. Bejedi tä ʼa jamö wamacö ma cuo wei ma cui, shomi tä ja ai wamacö yacläö majöo dicoo ja, cafä wamacö ai a lä cuinö, Yai Bada nija a bufi mö nia yabablamaö ço.

²⁰Abinaja tä malä cule. Wälidiwä talewä a cadidamaö ço ja, a nomaö mlaobä a çoö cule. A doblono lä mlai etä nowa bluca mladobä a cadidamaö.

1 San Pedro

1 San Pedro 1

¹Jesucristonö wale lä shimöleno wei ei camiyä Pedro cä ya. Yai Bada wama ecö lä sheleleblai wamacö nija, ei ya tä ʼa oni shömaö lä cule, shomi täbä nijamö wamacö bälöa lä nomöjööaliyono wei wamacö lä cui nija. Bodo jamö ma cui, Calasia jamö ma cui, Cabadosia jamö ma cui, Asia jamö ma cui, Bidinia jamö ma cui, öjamö wamacö bluca lä coyocole wamacö nija, ei ya tä ʼa oni shömaö lä cule.

²Fayä Yai Bada tänö wamacö nia lä taamaö wei tä daö fa showadaonö, wamacö yailema. Cama wama ecö dodijidawä cuobä Yai Bada tä Bufinö wamacö yaimaquema. ¿Öjö tawä? Jesucristo wama a wä fa julänö, cama iyäbönö wamacö bufi aublobä wamacö yaia. Wamacö doblamabobä, öjö Yai Bada cätä. Bei. Yai Bada nija wamacö shino yai bayeliblamou dodijjobä. Wamacö nofi shino ojodabobä. Wamacö bufi shino çai yanöcömabobä.

³Awei. No mlai ja Yai Bada tänö bämalecö nofi ojodabou fe balojooma yalo, bamacö bufi doblalobä bamacö. Bada tä Jesucristo bä Föö e nija, bamacö bufi afa shino doblalou da wäyämö, Jesucristo nija a lä bufiblamou wei a showawä lä cui nija. ¿Öjö tawä? Dude bämalecö bufi tabläö çolayoma. Jesucristo a demi jocädou çolayoma yalo, bamacö möläö showalanö bamacö cua lä cule.

⁴Bamacö möläö lä! Bämalecö dobädayobä täbä çai malä taboladi, bälimi täbä lä cui. Täbä çai wälidiblou bädaomi. Täbä nia çai mladou majöo lä mlai täbä ja bämalecö nia dobäo.

⁵Bälimi bamacö cuobä, yacumö bämalecö nia malä jucäaö wei. Yai Bada tänö täbä nia lä jömaö wei tä cublou däjä, tä nia wawäblou. Bamacö nia lä dobämou wei bamacö lä cui, Yai Bada bäma a nofi mölabou yalo, cama tä lojodenö bämalecö nowamaö showaa lä cule. Öjö cudeenö bamacö bufi doblalou.

⁶¿Öjö tawä? ¡Wamacö bufi yai doblalobä wamacö! Wamacö bufi wabamou ja, wälidiwä tä bluca ma wawäblou wei ma cui, wanonowä wamacö nö bleaaö fa balöonö, doblao wamacö nia cuo majöodayou.

⁷¿Öjö tawä? Olo bä lä cui, bä bälimi ma mlai ma cui, bä nö yai öjöböamobä bä wabamou. Cowa wacönö bä fa wabajenö, “Awei, ei olo lä bä dodijiwä”, bä cuu majöo. Inaja lä showawä, Jesucristo bäma ecö çai wabamou cuwä mö feduwä, bamacö lä bejedimou wei bamacö nö öjöböamobä. Jesucristo bäma a nofi lä mölabou wei tä nowa yai bluca, olo bä nowa cua lä bädalenaja mlai. Camiyä bamacö yai wabamobä bamacö, Jesucristo bäma a nofi bejedi lä mölabou wei bäma tä dablamabä. Jesucristo a wawäblou däjä bamacö afa çai dodijidawä tamodayobä. Doblao bämalecö çai cuo majöodayobä. Wawädowä bämalecö nofi çai tabodayobä. Cama Jesucristo a wawäblou däjä, öjö tä nia bluca cublou.

⁸Jesucristo a wawäbloimi showawä. Wama a möimi. Wama a möö ma mlai ma cui, wama a nofimaö. Wama a möö ma mlai, wama a bejedi bufiblaö yalo wamacö bufi doblalou. Wamacö nia dodijidawä lä cuo wei tä ja, ¡bejedi lä wamacö bufi fejeleo!

⁹Wama a nofi mölabou cudeenö wamacö nia malä jucäamou wei.

¹⁰⁻¹¹¡Wamacö bufi doblalobä lä! Wamacö nia lä jucäamono wei, yedu jamö ma cui tä a jilimou showaoma. Yai Bada tänö no mlai ja wamacö nofi nia lä ojobono wei, cama a wano wäyälwä bänö tä afa wäyää balöomaje. Cama bä nijamö Cristo a Bufi culanö, a nö nia lä bleaano wei a wafa wäamou showaoma. Doblao a nia cuo lä majöodayono wei tä a çai. Tä a fa jililäjenö, öjö Yai Bada a wano wäyälwä bä lä cui bä bufi shino dayäodima. Showadi tä shino wälidimaje. “¿Wedi bei a nö nia li bleaaö? ¿Wedi däjä öjö bei tä nia yai wawäblou?”, bä bufi dayäo çai cublalodima.

¹²Öjö däjä, Yai Bada tänö bä moyawäblamalema. Cama bä nia bayeliblamou lä showadaono wei tä a cuonomi. Ma, çafä wamacö nia obi yai lä bayeliblamono wei tä a yai jowa cuoma. ¿Öjö tawä? Inaja bä nowa tama. Bä nowa lä tano weinaja, inaja showawä tä bejedi cublaliyoma. Fedu jamö culanö Yai Bada tä Bufi fa shömöludunö, fei däjä öjö tä lojodenö çafä wamacö nija tä a yai wäyämaje. ¡Tä a yai doblao! Yai Bada tänö bämalecö lä bayeliblaö wei tä a lä cui ja, Yai Bada etäbä ajele lä culadi täbä ma cui täbä bufi çai shino dayäodii. ¡Bämacö bufi doblalobä lä!

¹³Awei, Jesucristo nija bämácö lä bayeliblamou wei tä a yai doblao. Öjö cudeenö bä da moyaweicu. Wamacö bufi shifilimou mlai ja, bä bufi yai da shaliliicu. Jesucristo a wawäblou däjä wamacö nia malä bayeliblamou wei. Öjö tä a nofi shino yai da mölaboje.

¹⁴Yai Bada tä a yai da juaje, bä föö ebä a dodijidawä juaö lä culajeinaja showawä. Wamacö malä Fjöomou wei. Wamacö bufi mojuduo showao däjä, wamacö showadi cuaaö bufi lä doblaono weinaja bä cuaa dijä.

¹⁵Inaja wamacö cuaabä wamacömi. Yai Bada dodijidawä wama ecö cuobä wamacö malä nacano wei. Öjö cudeenö, dodijidawä tä jamö cama a yaia lä culenaja wamacö nia yaio cuo mö feduo. Wamacö cuaaö lä bädao wei tä ma cui ja, cama dodijidawä wama ecö yaioabä.

¹⁶Inaja lä showawä Yai Bada tänö täbä nowa taö malä balöono wei. Abinaja tä a oni cuu. Iba dodijidawä wamacö nia yaio. Camiyä dodijidawä tä jamö ya malä yaile. Inaja wamacö dodijidawä yaio cuo mö feduobä. ¿Öjö tawä? Einaja tä a oni cuu.

¹⁷Wamacö dodijidawä cuobä wamacö. Wamacö nö bayeli nacao däjä, Yai Bada wamacö lä Fjöomou wei nija wamacö nacou. Täbä lä dodijaö wei täbä ma cui, täbä dodijaö lä mlai täbä ma cui, täbä jömaö ja a wä cadidou showadao. ¿Öjö tawä? A nö quili tamobä a. Öjö cudeenö, eja wamacö bälöablalou showao däjä, wama a nö quili talanö wama ecö nia dodijidawä cuo.

¹⁸Wamacö nö badabö bälöo doblou lä mlaono weinaja wamacö cuaaö dicoo mlai. Cama bä nö jaba bleaaö lä cuano weinaja wamacö cuaaö fa nodionö, wamacö doblonomi waiquiwä. ¿Öjö tawä? Wamacö doblou ma mlaono wei ma cui, Cristonö tä

nowa çomaquema. Wama tä daö. Täbä bälimi lä mlai täbänö wamacö nowa çomanomi. Blada bänö mlai, olo bä çainö mlai.

¹⁹Tä nowa yai lä bluca wei tänö wamacö nowa çomolayoma, öjö Cristo iyäbö showawänö. Jaba däjä yanowamö täbä doblou lä mlai etä nowa mladobä, oweja bä shämou läoma, moli etä wai wälidiwä cuono lä mlai bä oweja lä cui. Inaja showawä, wälidiwä etä cua mlai ja, Cristo a ma cui a shämoa läa majölayoma.

²⁰Yedu jamö ma cui, Yai Bada tänö tä daö showaoma. Bita a colo lojodomabou showao mlao däjä, inaja Cristo a nia taamaö showaoma. Yaçumö a yai wawäblaliyoma, Yai Bada tänö täbä nia lä jömaö wei tä ajedou yaio däjä. Fei däjä wamacö bayeliblamobä, yaçumö Cristo a wawäblaliyoma.

²¹A fa wawäblalunö, cama nija wamacö bufi cuquema. Wamacö bufi fa cuicunö, Yai Bada wama a bufibou, a demi jocädamaö lä çolayono wei a lä cui. Öjönö a doblamaquedayoma. ¿Öjö tawä? Yai Bada wama a nofi mölabobä inaja a taamama, showadi wama a bufiblabä. Wamacö bayelibou fe balojowä cudeenö, cafa dodijidawä wama ecö yai cuobä wamacö.

²²Jesucristo nija tä a bejedi lä cule, wama tä a julema. Wama tä a lä juleno wei tänö wamacö bufi aublaliyoma, cama wama ebä nofimabä. ¿Öjö tawä? Bui cadidilanö bä da nofimayo, öjö lä.

²³Wamacö nofiobä, dude wamacö tablamoa çolayoma. Yanowamö täbä showadi lä tablamou weinaja mlai. Yai Bada tä a lä bälimi wei tä anö wamacö yai tablamoa çolayoma, tä a cua shi lä wälile tä anö.

²⁴Tä a bälimi. Yai Bada cama tä showawänö tä afa bälimi taö malä waiquii. Abinaja a cuu balöoma. Moimoima bä lä culenaja bä yanowamö bluca cuwä. Bä afa dodijidawä ma tamou wei ma cui, öjö bei cäcö jole cuwä lä bädainaja bä yanowamö li cuwä bawä. Moimoima bä fa deänö, bä jole bläläö nomöjöo.

²⁵Öjö ma cui Bada etä a lä cui, tä a mladou nomöjöo mlaicätä. Moimoima bä lä cublou weinaja mlai, öjö tä a nia shino yai cudio. ¿Öjö tawä? Einaja Yai Bada a cuu balöoma. Öjö tä a lä cui ja wamacö yömölamou waiquiwä. Wama tä a dodijidawä lä jilileno wei, öjö lä tä a waiquiwä.

1 San Pedro 2

¹Öjö wama tä a dodijidawä jilia waiquilema cudeenö, wälidiwä tä bluca da blajamalöje. Wamacö nö lä nabämou wei tä çai bluca. Wama täbä lä mölamaö wei tä bluca çai. Wamacö lä jolemou wei tä çai. Täbä dodijaö ayao ja wama täbä nofi lä wälibuwei wei tä çai. Ai wama täbä afa dobloimi lä wäyäo wei tä çai bluca. ¿Öjö tawä? Öjö tä bluca da blajamalöje.

²Inaja wamacö cuaaö mlai ja, Yai Bada etä a shino yai da bufiboje, wamacö bufi lojodoobä. Ijilu oshe bä wai lä cuinö, suju lobe ubä bufiblaö mö yabaö lä cuo wejeinaja, inaja Yai Bada wama etä a bufiablalaö cuaabä, wamacö bufi yai badafälöbä.

³Öjö tä ʘ shino yai da bufiboje, öjö lä. Bada wama tä dodijidawä daö malä waiquii. ¿Öjö tawä? Wʘlidiwä wama tä bufijabä wamacömi.

⁴Jesucristo nija bä da ajedeiquiyo. Öjö nija wamacö ajedou däjä, maa ma lä ʘalimi wei ma wʘfa lä jilabou wejei a nija wamacö yai ajedeblaliyo. Öjö ma lä cui, ma yai demi. Täbä ʘai demiblamaö. ¿Öjö tawä? Yai Bada tänö ma yailema. Ma wʘfa nowa bluca taö. Öjö ma cui, yanowamö täbänö ma li wailemaje.

⁵Cafä jai maa wamacö ma demi cuwä mö feduwä, öjö nija wamacö bluca fa ʘöcablalunö, cama wama ecö yafi yai cublobä. Yai Bada etä yafi jamö nofi ʘäyäälewä bä lä yailenaja, cafä inaja showawä wamacö ʘai yaia mö fedua. Yai Bada tä lä cule ja öjö bä lä ojodamou weinaja, inaja showawä wamacö ojodamou ajedeo cuo mö feduobä, Yai Bada wama a bufi doblamabobä. Jesucristo wama ecö yalo, wamacö lä ojodamou wei tä ja Yai Bada a bufi nia doblalou.

⁶Yai Bada etä ʘ oni jamö, öjö maa ma wʘfa ʘai wäyämamou showadao balöoma. Abinaja Yai Bada a cuma. ¡Tä da möje! Sionoteli bä shabonobö jamö, maa ya ma blaaö lä cule, a yafi nia colo lä lojodobou wei ma lä cui. Camiyänö ya ma yailema. Ma nowa bluca. Öjö jai maa ma lä cule, a bejedi lä bufibou wejei bä lä cui bä nia möläö buomi. Einaja Yai Bada a cuma.

⁷Tä ʘai bejedi cublaliyoma. Jesucristo wama a bejedi lä bufibou wei wamacö lä cuinö, ma nowa lä bluca wei wama ma nofi yai bejedi tabou. Öjö ma cui, a bejedi bufibou lä mlajei bä lä cuinö, ma nofi taboimije. Ma yai waiije. Yai Bada tä ʘ lä cuu weinaja showawä. Abinaja tä ʘ cuu. Maa mabä ja a yafi nia lä ʘtamaö wejei bä lä cuinö, ma wailemaje. Öjö ma cui, ma lä waileno wejei a yafi colo yai lojodoobä ma li cublaliyoma. Einaja tä ʘ cuu.

⁸Abinaja ʘai. Bä lä juu wei, maa ma jamö bä mamicö fa difequionö, bä yudubä ma nia blaaö läo. ¿Öjö tawä? Täbä fa yudulunö täbä quebä, ma nia blao. Einaja tä ʘ ʘai cuu balöö showaoma. Yai Bada tä ʘ juaimije ja, täbä yudulayou. Inaja bä taamamobä bä li cuo waiquioma cudeenö, bä li taamamou.

⁹Öjö ma cui, cafä wamacö nofi taboyobä wamacö yaia. Bada tä nija bä ojodamobä bä nofi ʘäyäälewä yaia lä culenaja wamacö cuwä mö feduwä. Cafä wamacö bluca lä cui, wamacö yaibou. Shomi mlai ja, cama Yai Bada wama ecö waiquiwä, a showadi lä dodijaö wei wama tä dablamabä. Tä mö didiobä jamö wamacö jaba ma cuono wei ma cui, cama etä shi yai lä wacacai jamö wamacö tabou majöobä wamacö naca taa nomöjolema.

¹⁰Jaba däjä wamacö nofi tabono ma mlai ma cui, fei däjä Yai Bada tänö wamacö nofi yai tabou majöa lä cule. Wamacö nofi jaba ojodabono ma mlai ma cui, fei däjä wamacö nofi yai ojodabou majöa.

¹¹Iba bämacö lä nofimaö wei wamacö. Ei cafä wamacö ulifibö mlai. Shomi täbä ʘälöblao cuo lä ʘädao weinaja wamacö cublao buobä wamacö. Öjö cudeenö, cafä wamacö nija ya wʘ fe blacäjou. Yanowamö showadi täbä cuaaö bufi lä doblao wei tä

ma cule ma cui, öjö tä ja bä noshi öjödao dijä. Wamacö bufi wäliblou dicoo mlaobä. ¿Öjö tawä? Shomi wamacö malä cui.

¹²Yai Bada tä daö lä mlajei jamö wamacö cuo ja, showadi bä da dodija. Wamacö äfa doloimi ma wäyö wejei ma cui, wamacö lä dodijaö wei tä nö öjöböaö fe yadiobeje. ¿Öjö tawä? Yacumö Yai Bada tänö täbä bluca jömaö däjä, bä bufi nia möblou. Yai Bada nija wamacö showadi lä bayeliblamono wei tä nia dabraöje. Öjö däjä Yai Bada a wäfa nia doblao taöje.

¹³¿Öjö tawä? Dodijidawä wamacö cuobä wamacö. Bada tä Jesucristo wama ecö malä cui. Öjö wama ecö yalo, yanowamö jödödöwä bä bada lä läblai bä ä dodijidawä da jiliaje. ¿Öjö tawä? Bada a bälöo lä dodijio wei wama a wä nia yai juaö.

¹⁴Bada anö bä lä yädämabou wei bä ma cui, öjö wama bä ä nia juaö mö feduo. Bä doblou lä mlai bä nö bleaamabeje, cama a showawänö bä malä shömaö wei, bä lä dodijaö wei bä äfa çai dodijaö wäyäbeje. ¿Öjö tawä? Wama bä ä jiliajä, öjö lä.

¹⁵Inaja wamacö dodijidawä yai lä bälöo wei tänö, bä bufi dao lä mlai bä ä mojodi li ma faö däjä ma cui, wama bä ä nia famaimi majöo. Inaja Yai Bada tänö wamacö taamaö bufi doblao malä waiquio wei.

¹⁶Öjö bä bada lä cui bä nosie bada juamobä wamacö taboimije. Bejedi lä. Wamacö nosiemamou mlai ja, wamacö cuaaö bufi lä doblao weinaja wamacö cuaaö dao lä ma cui, bä da moyaweicu. Abinaja wamacö bufi cuu mlai. “Jäo. Ya cuaaö bufi lä doblao weinaja ya cuaabä lä ya waiquiwä cudeenö, ¿wedi tabä ya bä nosie li julei?”, bä bufi cu dijä. Yai Bada wama a nosie juabä wama ecö malä cui. ¿Öjö tawä? Dodijidawä wamacö shino yai cuobä, öjö lä. Yai Bada tänö bä ä bada juamaö bufi waiquiwä ja lä, wama bä ä nia juaö.

¹⁷Yanowamö jödödöwä täbä lä cui, wama täbä nofi nia bluca tabou. Jesucristo ebä lä cui, öjö wama ebä nia yai nofimaö. Yai Bada a lä cui, öjö wama a nö nia yai quili taö. Bada a yai bälöo lä dodijio wei a lä cui, wawädowä wama a nofi nia tabou. Inaja wamacö nia shino yai cuaaö.

¹⁸Bada bä nosie juamobä wama ecö lä cuinö, äfa dodijidawä wama bä nofi tabolanö bä ä da juaje. Dodijidawä wamacö çai lä cuo wejei bä shino bädawä mlai. Bui oquewä bä çai lä cuo wejei bä çai bädawä mlai. Wamacö nö lä bleaamaö wejei bä ma cui, dodijidawä wama bä ä nia juaö fe yadio.

¹⁹Dodijidawä wamacö ma cuo däjä ma cui, tä nowa cua mlai ja wamacö nö bleaamaö dicooje ja, bä bufi nö wälojaö fe da yadio. Yai Bada wama a nofi jaducäbolanö wamacö inaja taamamou dicoo ja, bejedi lä wama a bufi nia yai doblamabou.

²⁰Öjö ma cui, çafä wamacö mayo ja wamacö si yafelimamou dicoo däjä, wamacö wäfa nia dodijaö tamoimi. Wamacö jushudou ma mlai ma cui wamacö wäfa nia dodijidawä taimi showawä, çafä wamacö mayo malä cui. Öjö ma cui, wamacö lä dodijaö wei tä nowa ja wamacö nö bleaamaöje däjä, wamacö jushudou mlai ja, wamacö bufi yanöcöwä cudio showao fe yadio ja, öjö däjä Yai Bada wama a bufi nia shino yai doblamabou.

²¹Inaja wamacö cuaabä wamacö. ¿Öjö tawä? Inaja Yai Bada tänö wamacö taamaö bufi fa doblaonö, wamacö malä nacaleno wei. Cristo a ma cui, inaja cama a çai cuaaö malä balöono wei. Cama a doblou lä mlaono wei tä nowa ja mlai, camiyä bämacö doblou lä mlaono wei tä nowa ja a nö yai bleaamamaje. ¿Öjö tawä? Öjö bäma a owämabä lä a waiquiwä, cama a bufi yanöcöwä çai cuo fe lä yadiono weinaja bämacö cuaaö nodiablalobä.

²²Cristo a lä cuaano wei tä nofi mojudubo dijejä. Wälidiwä tä tanomi dodijiwä. A wä çai wälidiwä faö buonomi.

²³A wäfa lä tano wejei däjä, a wä çai lafuo mö feduonomi. A nö ma bleaamano wejei ma cui a wä çai waitelimonomi. Yai Bada a nofi mölabou showao fe yadioma, täbä jömaö lä cadidou wei a lä cui. Öjö a nofi mölabou fe yadioma cudeenö, a nö yuonomi.

²⁴Cama mayo mlai ja, camiyä bämacö mayo ja a yai shämolayoma. Wälidiwä bäma tä lä tano wei, cama nija tä bluca fa yädäblalunö, fii balitama defii jamö öjö tä çai bluca wälidiwä yauoma. Wälidiwä tä ja bämacö cuo çö mlaobä a li inaja cuaama. Nomawä bä yabäcäomi lä culenaja bämacö fa cuonö, tä lä dodijidai tä jamö bämacö shino yai cuo nomöjööbä. Cama a lä dusimalaleno wejei tänö, bämacö bufi malä jalolayono wei.

²⁵Oweja bä mojudi li mojoluu lä cuaaö weinaja, inaja showawä wamacö mojoluu cuaaö ma balöono wei ma cui, fei däjä wamacö malä çalaleno wei. Wamacö lä nowamaö wei a lä cui nija wamacö yai luluamobä, wamacö çomolayoma.

1 San Pedro 3

¹Bei. Inaja showawä, fei däjä wamacö feyalobö çai lä cuo wei bämacö nowa taö nomöjöö. Afä feyalofä dodijidawä wama bä a nia jiliaö. Ai bä lä cuinö, Jesucristo a wä bejedi bufi ma mlajei ma cui, wama bä a lä juaö wei tänö bä bufi tamamou fe yadiobä. Wama bä yömöläö ma mlai ma cui,

²Yai Bada nija wamacö lä quili wei wamacö fa möjenö, wamacö joleblalou lä mlai wamacö çai fa möjenö, bä bufi jaducublobä.

³¿Öjö tawä, suwä wamacö? Wamacö feta ucu lä liyäjäblamou wei tänö wamacö afa liyäjäwä tamobä wamacömi. Wamacö lä baushimou wei tänö çai mlai. Wamacö camishibö çainö mlai. ¿Öjö tawä? Olo bänö wamacö ma baushimou wei ma cui, camishi cäcö nowa lä bluca wei cäcö ja wamacö ma didio wei ma cui, öjö tänö wamacö afa dodijidawä nia tamoimi.

⁴Ma, bei wamacö sibo mlai, bei wamacö bufi yai lä liyäjäö wei tänö, Yai Badanö wamacö afa nia shino suwä liyäjäwä taö. Wamacö bufi çai oquewä cuo ja, bufi yanöcöwä wamacö çai cuo ja, inaja lä yai. Öjö däjä Yai Bada wama a bufi nia yai doblamabou. Öjö tä nowa afa shino yai bluca taö.

⁵Yai Bada ebä jaba lä cuono wei bä suwä lä cui, inaja bä jaba cuaaö malä balöono wei, Yai Bada tä nofi lä mölabono wejei bä suwä lä cui. Bä feyalobö dodijidawä ebä a juaö lä cadidiono wejei tänö, bei bä bufi yai baushiblamoma.

⁶¿Öjö tawä? Sara a lä cuinö, inaja showawä bä feyalobö Ablaamö a wä juaö cuo balöoma. A nofi yai badaboma. Cama a lä cuaano weinaja wamacö suwä cuaaö nodio ja, quilii mlai ja feyalofä wama bä a dodijidawä juaö fe yadio ja, öjö nija wamacö nia nöömou.

⁷Bä feyalobö wama ecö ma cui, cafä bämacö yömöläö majöa lä cule, walo wamacö dodijidawä çai cuo mö feduobä. ¿Öjö tawä? Dodijidawä suwäböfä bä çai da cuoje. Bä da bayeliblaje. Cafä wamacö nö walojaö lä culenaja bä suwä cuwä malä mlai. Bä nofi çai da taboje. Bälimi wamacö cuobä, Yai Bada tänö cafä no mlai ja wamacö dobäo lä cuo weinaja, inaja showawä, suwäböfä bä ma cui bä nia çai dobäo cuo mö feduo malä cui. ¿Öjö tawä? Dodijidawä bä çai da cuoje, öjö lä, wamacö bluca bayeliblamobä. Yai Bada nija wamacö nö bayeli nacao däjä, afä tä wälidiwä läo dicoo mlaobä.

⁸Bei. Fei däjä bluca wamacö nija ya wä faö majöa lä cule. Wamacö bufi shedecou dicoo mlai, moli tä ja bä bufi bluca shino da shalilo, öjö lä. Täbä nofi çai da ojadaboje. Jesucristo ebä çai bluca da nofimaje. Bä nofi çai bluca da jölijiboje. “Camiyä ya shino yai”, bä bufi çai cuu dicoo dijä.

⁹Wamacö nö bleaamaöje ja, bä taamaö mö feduo dijejä. Wamacö afa taöje däjä, bä a çai juo dijä. Wama bä taamaö mö feduo mlai ja, Yai Bada nija wama bä shino yai bayelimabä, bä dodijidawä cuobä. ¿Öjö tawä? Inaja wamacö cuaaö ja, cafä wamacö ma cui wamacö nia çai bayeliblamou mö malä feduo wei. ¿Ya jolemou daanö? Wamacö bayeliblamobä Yai Bada tänö wamacö malä nacaleno wei.

¹⁰¿Öjö tawä? Bämacö nia lä bayeliblamou wei, yedu ja ma cui Yai Bada tänö tä afa wäyää balöö showaoma. Abinaja a cuma. Dodijidawä wamacö nia cudio ja lä, wamacö bufi nia doblalou ja lä, wälidiwä tä a ja bä a fa dijä. Bä caficö a jolemo dijä.

¹¹Wälidiwä tä ja bä mö da juluo. Dodijidawä tä shino yai da taje. Bufi yanöcöwä wamacö nia lä cuo wei tä shino yai da dayäaje. Öjö tä nabä shino yai da cadidoje.

¹²Bä lä cadidou wei bä nija, Bada tä mamö showaa, bä nowamabä. A yömöca çai dao, bä nö bayeli nacao däjä bä a jiliodayobä. Öjö ma cui, wälidiwä talewä bä nija, Bada tä mabucabö läo. Einaja Yai Bada a cuma.

¹³Bä bufi da dayäo. Showadi wamacö dodijaö bufi doblao ja, ¿öjö tä nowa ja wamacö nö nia bleaamaöje daanö?

¹⁴Jao. Öjö ma cui, wamacö dodijaö tä nowa ja wamacö nö bleaamaö bädaoje ja, wamacö bufi nia doblao fe yadio. Wamacö nö lä bleaamaö wejei bä lä cui, bä nö quili ta dijejä. Bä bufi nofi çai jushublao dijä.

¹⁵Bei wamacö bufi jamö Cristo a nofi shino yai da taboje, afä wama a nofi lä Badabou wei wama a wä yai juabä. Jesucristo wama a nofi lä mölabou wei tä wäliije ja, wawädowä bä a nö wäo da showadao. Öjö ma cui, Yai Bada wama a nofi tabolanö, oqewä wamacö a nia faö.

¹⁶Jesucristo wama ecö yalo, showadi wamacö afa nia taöje. Öjö ma cui, wamacö afa ma taöje däjä ma cui, bä dodijaö fe da yadio. Bei wamacö bufi jamö, wälidiwä tä

lämabo dijejä, wamacö bufi yanöcöo fe yadiobä. Wamacö afa lä taö wejei bä lä cui, yaçumö bä nö jolemou fa öjübömolunö, bä bufi nia quilijou majöo.

¹⁷Wamacö dodijaö tä nowa ja wamacö nö bleaamaöje ja, tä dodijidawä waiquiwä. Inaja Yai Bada tänö wamacö taamaö ja, tä wälidiwämi. Öjö ma cui, wamacö doblou lä mlai tä nowa ja wamacö nö bleaamaöje ja, wamacö nö bleamabeje lä wamacö waiquiwä. Cafä wamacö mayo.

¹⁸Cristo a ma cui, nowa mlai ja a nö malä bleaamano wejei. Camiyä bämacö doblou lä mlai tä nowa ja, öjö cä lä a moli shämoa malä showadalayono wei. A yai lä cadidou wei a lä cui, a shämoa lälayoma, bämacö cadidou lä mlai, Yai Bada nija bämalecö lulubobä. Bei a yai nomaa cadidilayoma ma cui, Yai Bada bei a Bufinö a demi jocädamaö çölayoma.

¹⁹Öjö tä Bui lojodenö, täbä lä nomaö wei täbä cuobä jamö Jesús a fa alufälönö, Yai Bada tänö täbä bufi shi lä wälimabole täbä çai yömölacölöma.

²⁰Noewä däjä bä lä bälöono wei, öjö bä bufi li cuoma. Canawä a lä tano wei däjä, öjö lä bänö Yai Bada tä a juanomije. Öjö ma cui, canawä a tamaö showao däjä, Yai Bada tä yanöcöblao balöoma. A ishous jaöonomi. Öjö däjä, canawä a jamö bolacadabö bä nofi shino yashulayoma, 8 bä lä cui. Modu u jamö bä befi çai çao däjä bä bayeliblamou fe yadioma.

²¹Inaja showawä, fei däjä bämacö lä bayeliblamou wei, mau u jamö culanö bäma tä jömaö, bämacö fe lä ojomamou wei däjä. Bei bämacö sibo yaölömobä tämi. Bämacö fe ojomamou däjä, wälidiwä bäma tä lämabou mlai ja, Yai Bada nijamö bämacö bufi mö lä yaiblou wei bäma tä shino yai jömaö. Jesucristo a demi jocädou çölayoma yalo, bämacö bayeliblamou.

²²A demi jocädou fa çolonö, fedu jamö a çomolayofälöma. Yai Bada jayu boco mashi jamö a cua lä culadi. Ajele täbä ma cui, täbä bada lä läladi täbä ma cui, täbä çai lojode lä culadi täbä ma cui, öjö lä täbä bluca nija Jesucristo a Bada läadayoa.

1 San Pedro 4

¹Cristo a lä cui yanowamö a cuo däjä, a nö nini li bleaaö balöoma. Inaja a cuaaö ojodaoma yalo, cafä wamacö ma cui, inaja showawä bä nö çai bleaaö ojodao cuo mö da feduo. Jesucristo a nowa ja bä nö bleaaö lä ojode wei bä lä cui, wälidiwä tä ja bä yabäcamou si ijejeo malä mlai.

²Öjö tawä? Eja wamacö demi cuo showao däjä, yanowamö täbä showadi lä cuaaö wei tä ja bä luluamo dijä, öjö lä. Yai Bada tänö wamacö nosiemaö ja, a lä cuu weinaja etä shino yai da taje.

³Yai Bada tä daö lä mlajei bä lä cuaaö weinaja wamacö jaba cuaaö mö feduoma. Wamacö nofi beshili jushuama. Wamacö bufi çai waiyoma. Wamacö shi çai walimamoma. Wamacö bufi nia jole jole fa dobladonö, showadi wamacö iyaö çai çocamoma. Nö idubö täbä bädawä ma cui, öjö wama täbä çai bufi blaö nofi jushuaö

dicooma. Fei dǎjä inaja bä cuaaö çödaa dijä. Wamacö jaba cuaaö lä waiquiono weinaja, inaja lä waiquiwä.

⁴Öjö bä sho wamacö jaba lä cuono wei bä lä cui, fei dǎjä cafä wamacö nija bä bufi wedinajamou nomöjōa. Bä bufi lämou mlai ja, bä nofi showadi jushuabä jamö wamacö fei dǎjä yädäomi ja, wamacö nö waibläö nomöjōoje.

⁵Öjö ma cui, Yai Bada tänö bä ʔ nö nia wäamaö, täbä jödödöwä nia lä jömaö wei a lä cuinö. Bä demi lä showai bä ma cui, bä lä nomaö wei bä ma cui, bä jödödöwä jömabä a läa waiquia.

⁶¿Öjö tawä? Bä nomaa lä waiquilayono wei bä ma cui nija, Yai Bada dodijidawä etä ʔ wäyämamou balöoma. Yanowamö bämacö dobloimi tä nowa ja, bämacö bluca lä nomaö weinaja bä cublou ma cule, tä ʔ bejedi fa bufijenö, Yai Bada a ʔlimi lä culenaja bä bufi cuo mö feduobä.

⁷Ei tä ʔ jamö, bä bufi mojuduo dijä. Yai Bada tänö täbä nia lä jömaö wei tä cublou ajedou waiquia. Öjö cudeenö bä bufi da wasöo. Bä bufi çai da moyaweicu, wamacö nö bayeli lä nacao wei tä ja wamacö jujeblou dicoo mlaobä.

⁸Showadi bä çai shino yai da nofimayo. Öjö dǎjä ai a doblou ma mlai ma cui, wamacö bufi nofio cudeenö wama tä nowa nia taboimi.

⁹Abinaja çai. Bui lämou mlai ja, dodijidawä bä iyaö çai da loablalamayo. Ai bä waloquei dǎjä, dodijidawä bä çai da bälömaboje.

¹⁰Wamacö bayeliblayobä, Yai Bada tänö wamacö bluca dobäö cuaaö waiquiwä. ¿Öjö tawä? Camanö wamacö nö bluca wəlojamaö yalo, dodijidawä bä da bayeliblayo.

¹¹Wama bä yömölabä wamacö waiquiwä ja, Yai Bada etä ʔ ja bä shino da yömölaje. Wama bä bayeliblabä wamacö waiquiwä ja, Yai Bada tänö wamacö nö lä wəlojomabouto wei wama a bufibolanö, bä da bayeliblaje. Inaja Jesucristo wama ecö bluca cuaaö ja, wama tä taö lä bədao wei tä ma cui ja, Yai Bada tä nia doblao dablamo. Öjö a wəfa doblao tamou shi wəlibä a waiquiwä. A nia Bada läo shi wəlii. ¿Öjö tawä? Inaja lä tä cuobä.

¹²Iba bämacö lä nofimaö wei wamacö. Wamacö nö lä bleaamaö wejei tä ja, bä bufi shädayaimou fe baloo dijä. Tä shomimi. Inaja bämacö taamobä bämacö waiquiwä. Bämacö bufi wabamobä cätä.

¹³¿Öjö tawä? Wamacö bufi cuaablalou mlai ja, wamacö bufi yai doblalobä. Cristo a ma cui a nö bleaamaö malä balöono wejei. Öjö wama a owämaö yalo wamacö bufi yai doblalobä wamacö. Fei dǎjä wamacö bufi doblalou fe yadio yalo, obi wamacö bufi nia shino yai doblalou fe baloo, Cristo a doblao dablamo dǎjä.

¹⁴Cristo wama a bufibou yalo wamacö nö waibläöje ja, wamacö bufi doblalobä wamacö waiquiwä. Yai Bada bei tä Bui lä doblalenö wamacö malä bayelibou wei.

¹⁵Öjö ma cui abinaja ya cuu. Yanowamö wama a fa shälönö wamacö nö bleaamaöje ja, öjö shomi tä li. Öjö ya tä ʔfa taimi. Wamacö fa tomömonö wamacö taamaöje ja,

cafä wamacö mayo. Wamacö doblou dicoo fa mlacunö wamacö taamamou ja, inaja showawä. Wamacö a faö bashio bädao däjä wamacö taamamou ja, cafä wamacö mayo li.

¹⁶Öjö ma cui, Jesucristo bufilewä wamacö yalo wamacö nö bleaamaöje ja, bä bufi quilijo dijä. Wamacö bufi quilijou mlai ja, Cristo wama ecö afa jilaöje yalo Yai Bada tä nofi shino yai da doablaje.

¹⁷Yai Bada tänö täbä nia bluca lä jömaö wei tä cuaaö waiquia lä cuimadi. Cama bäma ecö lä cui, bamacö nia jömamou lä balöblao wei bamacö. Bamacö fei däjä lä wabamou wei, öjö tä li waiquiwä. ¿Öjö tawä? Camiyä bamacö jömamou balöblao ja lä, Jesucristo dodijidawä etä a juaö lä mlajei bä lä cui, öjö bei bä nia yai jömamou dodijio.

¹⁸Yedu jamö abinaja Yai Bada tä a cuu balöo showaoma. Bä lä cadidou wei bä lä cui, nö bleaaö mlai ja bä bayeliblamoimi waiquiwä yalo, Yai Bada tä daö lä mlajei bä lä cui, ¿wedinaja öjö bei bä nia li taamamou dodijio, wälidiwä talewä bä lä cui? Einaja tä a cuu balöo showaoma.

¹⁹¿Öjö tawä? Öjö cudeenö, wamacö nö lä bleaamaö wejei wamacö lä cui, inaja Yai Bada tänö wamacö taamaö bufi waiquia ja, bä dodijaö fe da yadio. Wamacö lä tablaleno wei a lä cui a nofi shino yai da mölaboje, wamacö bufi bayelibobä. Öjö a wä cadidou malä waiquii.

1 San Pedro 5

¹Jesucristo wama ebä çai lä yododaö wei wamacö lä cui nija ya wä nia faö nomöjöö, camiyänö iba ya bä çai yododaö mö lä feduo wei ya lä cui. Jesucristo ya nö bleaaö lä dalaleno wei çai ya. Fedu jamö a lä doblaladi tä wawäblou däjä, camiyä ma cui ya nia doblao cuo mö feduo. ¿Öjö tawä? Öjö lä ya lä cuinö, abinaja bamacö nowa taö lä cule.

²Cama ebä nija Yai Bada tänö wamacö li lämabou, wama ebä yai nowamabä. Ebä da nowamaje, öjö lä. Wamacö mojianö mlai, bufi ojode wamacö culanö wama ebä yai nowamabä. Yanowamö täbä nija wamacö dobämou bufi lä doblao we tänö mlai, wama ebä nia lä nowamaö wei tä ja wamacö bufi yai shaliliobä.

³¿Öjö tawä? Wama bä nosiemaö fe blacäjou mlai ja, dodijidawä wama bä yai nia lulubou. Wamacö dodijaö fa möjenö wamacö owämabeje wamacö yai cuobä.

⁴Öjö däjä, bämalecö yai lä nowamöbole a Bada bädou däjä, wamacö nia dobämodayou. ¿Öjö tawä? Wamacö nö walojaö fe yadioma yalo, doblao tä yai lä cui ja wamacö nia dobädayou, bälimi tä ja. Einaja bada bamacö nowa taö lä cule.

⁵Fiya wamacö lä cuinö, bada wama bä a çai nia juaö. ¿Öjö tawä? Bluca wamacö ma cui, wamacö a dodijidawä juayobä wamacö. Cafä wamacö jömöo mlai, ai wama bä a shino jliabä. Abinaja tä a malä cuu wei. Cama bä lä jömöo wei bä lä cui nija, Yai Bada a bufi lämou. Öjö ma cui, bä jömöo lä mlai bä lä cui bä nofi yai ojodabou. ¿Öjö tawä? Einaja tä a cuu.

⁶Bä jömöo dijä, öjö lä. Wamacö jömöo mlai ja, Yai Bada tä lojode lä ayai nija, bä bufi yai shino da ojodao. Wamacö jömöomi ja, wawadowä wamacö nofi nia obi tabou, cama a bufi lä cuu wei däjä.

⁷Wamacö bufi lä jalujou wei, Yai Bada nija tä ą bluca ąai da wäaje. Wamacö nofi malä jalujoubou wei.

⁸Bä da moyaweicu, öjö lä. Bä nö ąai da daicu. Wamacö nofi lä walıbou wei a fecula bada lä cuinö, wamacö nabä queobä wamacö nofi taö malä cuaaö wei, öla bä waiteli lämou lä cuaaö weinaja showawä.

⁹Bä nö yai da walojoicu. Jesucristo wama a nofi lä mölabou wei tä ja, bufi lojode bä yai da cuicu. Sadanasinö Jesucristo ebä bluca lä yabäcaö wei wama tä daö malä waiquii, café wamacö shino ayawä mlai. Café wamacö nö bleaaö lä culenaja, aifä bä bluca lä bälöblai bä ma cui, öjö bä nö bleaaö mö feduwä malä cui.

¹⁰Fei däjä wamacö nö ma bleaaö wei ma cui, tä nö nia dedeaimi. Wanonowä wamacö nö bleaaö fa balöonö, cama Yai Bada tä showawänö dodijidawä wamacö nia tabou fe yadio. Wamacö bufi ąai nö nia walojomabou, wamacö bufi shominajablou si ijejeo mlaobä. Wamacö bufi ąai nia lojodomabou. ¿Öjö tawä? Yedu ja ma cui bämalecö daö showadaoma. Cristo bäma ecö cuobä bämalecö nacalema, cama ąalimi a doblao lä culadi jamö, ąalimi bamacö doblao cuo mö feduodayobä. Showadi bämalecö bayelibou. No mlai ja bämalecö nofi bluca ojodabou talei.

¹¹Täbä nia bluca juwäbou shi lä walı wei, öjö Yai Bada cätä waiquiwä. Inaja lä tä cuobä.

¹²Ei ya tä ą wai jolodowä shömabä, Sibano nija ya tä ą oniblamaö lä cule, iba aiyä a lä cui nija. Jesucristo ya e cadidiwä nofi tabou. ¿Öjö tawä? Café bamacö nowa tabä ya tä ą onibläö lä cule. Yai Bada tänö, no mlai ja bämalecö nofi yai lä ojodabou wei wama tä ą bejedi dablabä, bamacö nowa taö. Öjö wama tä ą nofi mölabolanö, bä bufi yai da lojodoicu.

¹³Babiloniateliyoma a lä cui, Jesucristonö a yaia mö lä feduleno wei a suwä lä cui, café wamacö nija a wafa wäyamamou bufi doblaa lä cule. Ұasimi Marcos a ąai.

¹⁴Jesucristo wama ecö yalo, wamacö mö fedudayou ja bä yai da nofimayo. Bei. Cristo a lä cuinö, showadi wamacö bayeliblabä. Öjö nija wamacö lä cule, wamacö bufi bluca yanöcömabobä.

2 San Pedro

2 San Pedro 1

¹Jesucristonö wale lä shömöleno wei, ei camiyä Simón Pedro cä ya, ya nosie juabä ya e lä cui. Jesucristo yama a nofi mölabou lä culenaja, wama a nofi mölabou cuo mö lä fedule wamacö nija, ei ya tä ʼa oni shömaö lä cule. Bäma a bufiblabä, öjö Jesucristo a waiquiwä, bämalecö lä jucäaö wei a lä cui. Bämalecö lä bayelibou wei tä nowa yai bluca dodijiwä. ¿Öjö tawä? Jesucristo a cadejewä cudeenö, cafä wamacö ma cui, camiyä yamacö ma cui, bämalecö bufi bluca taamaö fe usucuwä, bäma a nofi mölabobä. ¿Öjö tawä? Cama wama ecö mö feduwä yalo, cafä wamacö nija ei ya tä ʼa oni shömaö.

²Bei. Yai Bada wama a daö yalo, Bada tä Jesús wama a çai daö yalo, bä shino bayeliblamou da dodijio. Öjö lä cäcöbönö wamacö nofi shino ojoboböbä. Wamacö bufi shino çai yanöcomaboböbä.

³Yai Bada bäma a daö yalo, cama etä lojodenö bämalecö bufi showadi bayelibou. Eja dodijidawä bämalecö tamabou fe yadio, bäma a bufi yai doblamabobä. Cama a lä doblalenaja bamacö dodijidawä cuo mö feduobä, bämalecö nacalema.

⁴Yai Bada a doblao cudeenö, a dodijidawä yalo, ʼbejedi lä bämalecö bayelibou! A wa nö wäo ja bämalecö ʼafa bayeliblamou wäyää lä balöono weinaja showawä. Bämalecö nia jowa lä bayelibono wei tä ʼa nowa yai bluca fe balojowä. Tä ʼa liyäjawä dodijiwä. Yanowamö täbä bufi showadi lä waiyou wei tänö bamacö wälidiblou mlaobä, bämalecö nia bayelibou showaoma, cama a lä culenaja bamacö çai cuo mö feduobä.

⁵¿Öjö tawä? Wamacö nia jowa lä bayelibono wei tä ʼafa wäa waiquiquema cudeenö, bä bufi nö da wälojoicu. Jesucristo wama a nofi yai mölabolanö, bä yai da dodija. Wamacö dodijaö waiquilanö, bufi dao bä da cuo.

⁶Bufi dao wamacö culanö, bä bufi çai da wasöo. Wamacö bufi wasöolanö, bufi yanöcöwä bä çai da cuo. Bufi yanöcöwä wamacö culanö, Yai Bada nija bufi shaliliwä bä çai da cuicu.

⁷Yai Bada nija bufi shaliliwä wamacö culanö, cama bä mashi nofimayou lä culenaja bä da taamayo. Inaja wamacö cuaaö waiquiwä ja, bei bä bufi yai da nofio.

⁸Einaja wamacö yai cuaabä. ¿Öjö tawä? Bada tä Jesucristo wama a yai daö ja, inaja wamacö bufi nia cuaaö lojodoo. Öjö däjä wamacö doblou lä mlai tä ma läle ma cui wamacö nia doblou fe yadio. Wamacö çai nia yai dodijaö.

⁹Inaja bä cuaaö lä mlai bä lä cui, jai täbä möö blajabloimije bä cuwä. Jai bä jubäbö bä cuwä. Bä jaba lä cuaano wei tä ja, Yai Bada tänö bä aublaö ma waiquilayono wei ma cui, öjö tä nofi mojobubou çoo majöo dicooje. Öjö ma cui cafä wamacö lä cui, inaja bä cuaa dijä. Dodijidawä tä shino yai da balamalöje.

¹⁰¿Öjö tawä, iba wamacö? Öjö cudeenö wamacö yai dodijabä, bä bufi nö shino da wälojoicu, Yai Bada tänö wamacö lä nacaleno wei wama tä dablamabä. Wamacö lä

yaileno wei tä çai. Cama wama ecö cuobä wamacö malä yaileno wei. Inaja wamacö cuaaö ja, wamacö dodijaö cuquei. Obi ma cui wamacö bufi nia shomiblou majöomi.

¹¹Öjö däjä bufi doblalanö Yai Bada tänö wamacö nia waloamadayou. Bui lämou mlai ja dodijidawä wamacö nia waloamadayou, Jesucristo a dodijidawä bälöa shi lä wäliladi jamö. Bämalecö yai lä jucäaö wei, öjö Bada tä Jesucristo waiquiwä.

¹²Öjö cudeenö bejedi wama tä ą lä jilileno wei, wama tä ą lojodobou ma waiquile ma cui, showadi ya tä ą nia wäaö mö yabao ço. Wama tä ą daö ma waiquio wei ma cui, showadi bamacö bufi nia jaducublamaö ço.

¹³Öjö tawä? Ya demöo showao däjä, çafä wamacö nija öjö showadi ya tä ą nia wäyädii, wamacö bufi dayäobä. “Inaja yai”, ya bufi cuu a lä cule.

¹⁴Eja ya nia cudio malä mlai. Wale nia lä shäo wejei tä ajedewä malä waiquii, Bada tä Jesucristonö wale yömölaö ja wale nowa lä tano weinaja showawä.

¹⁵Öjö cudeenö, ya nomalayono wei ja wama tä ą nofi showadi jaducubou juo showaobä, ya nö walojaö showaa lä cule.

¹⁶Çafä bamacö yömölaö däjä yamacö bejedimoma. Inaja wamalecö nofi tabobä ya wä. Yanowamö täbä mölamabeje täbä jole lä cuu weinaja yama bä ą owäblalanomi. Ma. “Bäma bä joleblamabä, abinaja bamacö yai cubä”, yamacö nowa çai tayonomi. Bada tä Jesucristo lä cui, bejedi lä yama etä doblao dalalema. A waloo däjä, a nö yai walojayoluma, çafä wamacö nija yamacö da cubleinaja showawä.

¹⁷Yai Bada tänö wawadowä a nö malä öjöbömaleno wei. A wäfa doblao çai wäyäma, bäma a nofi lä Fjömaö wei a lä cuinö. A shino Bada doblaa lä ayaladi a lä cui, abinaja a cuma. Ijiluyä ya nofimaö lä dodijio wei, ei a. Cama nija ya bufi yai shino doblalou dodijiwä. Einaja a cuma.

¹⁸Fedu jamö a culanö a wä bada fa bädonö, yama a wä jililema. Cama Yai Bada etä balöcö jamö yamalecö çai malä cuodayono wei.

¹⁹Öjö tawä? Tä ą yai bufiblamobä çä tä ą. Yai Bada a wäno wäyälwä bä ą faö balöoma. Öjö cudeenö, bei çä yamacö mamocunö yama tä dablao däjä, yama bä ą bejedi yai bufibou dodijiomä. Öjö wama bä ą yai shino bejedi bufiblabä, öjö lä, tä mö dödoö däjä, cowa wacöbä bufiblamou lä culenaja showawä. Inaja wama bä ą bufibou cuo showao däjä, Jesucristo a nia juu çoimaö, tä mö jaluimaö däjä, shidicali a faö lä fenablao weinaja showawä. Öjö däjä wamacö bufi nia yai wacacamabou. Öjö tawä?

²⁰Ei ya wä lä cui wamale ą da jililä. Yai Bada a wäno wäyälwä bä lä cuinö, a wäno lä wäyäno wejei tä ą bluca çai oniblaö showadalayomaje, Yai Bada a wäno oni jamö tä ą oni lä cule. Cama bä bufi cuu lä buono wei tä ami.

²¹Ma, Yai Bada a wäno lä wäyämono wei tä ą lä cui, yanowamö täbä bufi cuu lä bädao wei tä ą cuonomi. Yai Bada bei tä Bufinö cama bä nijamö tä ą wäyäo fa shalilionö, yanowamö täbä nija tä ąno wäyäo shalilio nomöjömaje.

2 San Pedro 2

¹Awei, Isaeli ebä nijamö Yai Bada a wano wäyälwä bä lä cuinö a wano wäyää cuamaje. Öjö ma cui Yai Bada a wano jole lä wäyää wejei bä çai cublamou showadaoma. Yai Bada a wano wäyää mlajei, shomi tä a li wäyää läomaje, çafä wamacö nija ai bä nia lä cuaaö weinaja showawä. Showadi öjö tä nia cublou dicoo. Tä a lä wayu wei tä a lä cui, cama bänö tä a çai juu fa jatoojenö tä a nia bufiblamaöje. Bä doblou lä mlai bä nowa lä çomaqueno wei a Bada lä cui, öjö ma cui a nia çai waiije. Inaja bä lä cuaaö wei lobe bä nofi nia nacao, bä shämou showadaobä.

²Bä nofi beshili lä jushublalou wei tä ja, ai bä nia luluamou. Bä lä cuaaö wei tänö, Jesucristo tä a lä bejedi wei tä a nö nia waiblamaö dicooje.

³Bä bufi waiyou dicoo yalo, jole jole wamacö nia yömölablalaö buoje, bä dobämobä. Tä a bejedi lä mlai tä a ja, wamacö nia mölamaöje. ¿Öjö tawä? Öjö bä nia lä jömaö wei a lä cui a nö daa waiquia. Yedu jamö ma cui bä nö nia bleaamaö showaoma. Bä nofi mojudoboimi.

⁴Yai Bada a wano wäyälwä bä afa jole lä jilou wei bä lä cui, bä nö bleaamabä lä cäbä. Fei däjä bädao mlai, jaba däjä ma cui, showadi bä nö bleaamaö malä balöono wei. Ajele bä doblono lä mlai bä ma cui, Yai Bada tänö bä nofi asibono malä mlai. Bä nia yai lä jömaö wei tä cublou showao mlao däjä, shobali wacö mö lä didibodi jamö bä shäyää balöblaquema.

⁵Noewä däjä ma cui, täbä nofi çai asibonomi. Mashita a fe bluca baoblamaema, a wa juaö lä mlajei bä mishi bluca duoblobä. Noewä a shino nowamaö ayaoma, bejedi tä a ja täbä lä yömölano wei a lä cui. Cama 7 ai ebä sho.

⁶Sodomateli bä ma cui, Comolateli bä ma cui, öjö bä shabonobö fa öshömalönö, jai yubu ushibö tablamalema. Yai Bada tä daö lä mlajei bä quilibä, inaja bä li taamaö balöoma.

⁷Sodomateli bä nija Lodo a çai coyocooma, a lä cadidono wei a lä cui. A coyocooma ma cui, Yai Bada a ishous showao mlao däjä a çoa balömalema, öjö bä nö bleaabä jamö a nö bleaaö mö feduo mlaobä. ¿Öjö tawä? Öjö bä wälidiwä talewä nofi beshili jushublaloma yalo, j bejedi lä Lodo a wajäwä nö beblalamamaje!

⁸Öjö a lä cadidono wei a lä cui, cama bä nija a bälöo coyocooma yalo, showadi bä a malä jiliadino wei, showadi bä çai malä mödino wei. Wälidiwä tä ja bä cudioma cudeenö, a bufi nö yai bleadima. Yai Bada tänö öjö a nowamaö lä ayaono wei tä ja,

⁹bämacö bufi da dayäo, bämacö bufi jaducublobä. Inaja showawä, fei däjä ma cui a bufi lä doblamabou wejei bä wabamou däjä, bä noshi çai umabou daö dodijiwä. ¿Öjö tawä? Bä cadidou lä mlai bä lä cui, öjö bä nö çai bleaamaö daö. Bä nö bleaamabä, öjö lä a waiquiwä. Inaja showadi bä nia taamaö. Täbä bluca jömaö etä cublou showao mlao däjä, fei däjä ma cui bä nö nia bleaamaö balöo. Öjö däjä, bä nia lä jomadayou wei däjä bä nö nia yai bleaamaö shi wälii.

¹⁰¿Öjö tawä? Bä doblou lä mlai, Yai Bada tänö bä nö bleaamaö daö lä. Bä nofi showadi lä jushublalodii wei bä lä cui, öjö bei bä nö bleaamaö yaio, bä lä joleblalou wei bä lä cui. Yai Bada tä a juaö bufiomije. Bä fe yadiblou cudeenö, öjö bä nö

bleaamaö yaiquei. Mijamö tä ʼa jole lä wäyää wejei bä lä cui, bä caficö ʼa çai quilibloimi. Täbä lojode lä läladi täbä ma cui täbä nö çai waiblaöje. Bä quiliimi dodijiwä.

11 ʼÖjö tawä? Ajele bä ma cui, ʼinaja bä nö nofi cubö lä mlai! Ajele bä yai lojode ma cui, bä nö shino yai walojaö ma cui, obisai bä ʼa shino faö. Bada tä nija täbä ʼafa wäyääje ja, täbä nö waiblaimeje. Bä ʼa faö quili.

12 Öjö ma cui, mijamö tä ʼa jole lä wäyää wejei bä lä cui, öjö bä caficö ʼa jowa quilibloimi dodijiwä. Tä daö ma mlalajei ma cui, tä ʼafa jole wayoaö bädaoje. ʼÖjö tawä? Yalo bä bufi daomi lä culenaja bä cuwä. Bä shämobä cäbä. Bä cuaaö lä bufio weinaja, bä bufi dayäo balöo mlai ja bä cuaaö bädao. Bä lä wälidiblou wei tänö, yalo bä mö watäblamou lä culenaja, cama bä ma cui bä mö nia çai watäblamou cuo mö feduo.

13 Täbä nö bleaamaöje yalo, inaja showawä cama bä nö nia çai bleaamaö nomöjöö. Bä nö bleamabä lä. Bä bufi lämou mlai ja, wawädowä bä nofi jushublalou bufi doblao. Bä wälidiwä. Bä çai shami. Jesucristo wama ecö iyaö çai çocamobä jamö, ʼöjö bä loo ajedeobä bä nofi lä mlai! Wälidiwä tä ja bä quiliblou mlai ja, bä bufi shino yai doblalou dicoo. Bä dobloimi waiquiwä.

14 Suwä bä nijamö bä mamö beshili shino showablalou. Bä çai jaamodoimi. Jesucristo ebä bufi lojode lä mlai bä fa lulubojenö bä bufi wälidiblamaöje. Showadi bä bufi shino waiyodii. Inaja bä cuaaö yalo, Yai Bada nija bä wafämobä cäbä.

15 Miji bä lä jolemou wei bä lä cui, bä nia lä cadidou wei yo fa dacöjenö, ai yo jamö bä juu majöö. Beolo bä ijilubö Balaama a lä cui, öjö a owämaö nodiablalou dicooje, Israeli ebä wafäblabä a lä nacaano wejei a lä cui. Öjö a lä cui, a nia lä dobämou wei tä ja a bufi mö blucuo fa dicoonö, wälidiwä tä taö ojodaoma.

16 Öjö ma cui, a doblono lä mlai tä ja, Balaama a wasömamolayoma. Yalo a wä faö dao lä mlai a bulo lä cuinö, yanowamö bämacö ʼa faö lä cuaaö weinaja a wä fa cudalunö a wasölema, a shominajaaö mladobä.

17 Mijamö tä ʼa jole lä wäyää wejei bä lä cui, tä mö didi lä sublabodi jamö bä taamabobä, Yai Bada tänö tä tabou waiquia. Mau u loyoca wejediblou lä culenaja, öjö bei bä cuwä. Täbä mölamaö bädaoje. Öläjashi bä lä cublou weinaja bä çai cuwä. Wadoli anö öläjashi bä fa yalänö, maa a nö lä dabou wejei bä lä cui, bä uomodou nomöjöö.

18 Inaja showawä, miji bä lä jolemou wei bä ʼanö täbä mölamaöje. Jesucristo nija bä dude lä cublou wei bä lä cui, öjö bä yai mölamaöje. Täbä bufi lä yacläle täbä nija bä mili docuu ma waiquio wei ma cui, miji bä lä jolemou wei bänö bä jowa yabäcadii dicoaje. Bä ʼa dobloimi. Cama bä ʼa jilimamou bufi fa doblaonö bä ʼa faablalou ma cui, bä ʼa shifilimoablalou bädao. Bä nofi cama lä jushuaö wei jamö bä luluao nomöjöaje.

19 Abinaja bä çai jole cuu. “Jesucristo wama a nofi mölabou malä waiquile. Öjö wama a nofi mölabou waiquiwä yalo, ai täbä ʼa jamö wamacö nia nosiemamoimi. Fei däjä, wamacö cuaaö bufi lä doblao weinaja wamacö nia yai cuaaö”, bä cuu. Einaja bä ma

cuu wei ma cui bä jolemou. ¿Öjö tawä? Täbä nosiemamou ma wasöö wejei ma cui, cama bä ma cui bä nosiemamou fe balojoo. Wedi tä ja mlai. Cama wäliwä etä lä didile tä ja bä li nosiemamou. Wäliwä tänö täbä lojodobou däjä, täbä jujeblobä etä cua malä mlai.

²⁰¿Öjö tawä? Bada tä Jesucristo lä cuinö, öjönö bämalecö shino yai bayelibou. Mijamö tä a jole lä wäyöö wejei bä lä cuinö, Jesucristo etä a daöje yalo, wäliwä tä ja bä docuu dao, yanowamö täbä showadi cuaaö bufi lä doblao wei tänö bä wäliwä mlaobä. Öjö ma cui, tä a ma daö wejei ma cui, öjö tä julii mö yabaaö ço fa dicoojenö etä yai wayublaliyoma. ¿Öjö tawä? Bä jaba doblono ma mlai ma cui, fei däjä bä shino yai doloimi nomöjowä.

²¹Yai Bada tä daö mlaöje däjä bä mojadi li cuo lä balöono weinaja bä yai cuo showao fa cunoja, bä nofi nö nacao fe balojoobö mlai. Yai Bada nija bä ajedobä yo ma dano wejei ma cui, Yai Bada etä a ja bä çai ma damamono wei ma cui, tä a wai majöo dicomaje yalo, fei däjä bä yai wäliwä cadidiwä.

²²Täbä showadi lä cuu weinaja, cama bä nija etä bejedi cublaliyoma. Abinaja täbä lä cuu wei. “Jjima bänö, nii bä ma joblalei wejei ma cui, bä waö mö yabao malä ço wejei.” Einaja täbä cuu. Abinaja çai. “Coshino bä ma aublou wei ma cui, aji aji bä jamö yedu bä jölöcou mö yabablao malä ço wei.” Einaja täbä malä cuu wei. ¿Öjö tawä? Mijamö tä a jole lä wäyöö wejei bä lä cui, inaja bä cuaaö fa dicoonö bä nö bleamamobä bä li waiquiwä.

2 San Pedro 3

¹Iba bämácö lä nofimale wamacö. Cafä wamacö nijamö, ai ya tä a oni shömöa balölema, fei däjä ei ya tä a shömaö ço lä cule. Jaba ya tä a oni da shömölii tä a ma cui, ei ya tä a oni shömaö lä cole tä a ma cui, wama tä a daö lä waiquile tä a. Öjö tä a showawä ja bämácö bufi jaducublamabä ya tä a li shömaö. Wamacö lä bejedimou wei wamacö bufi yai dayäobä.

²¿Öjö tawä? Yai Bada a wano wäyälwä bä lä cuinö, tä a wäyöö lä balöono wejei wama tä a nofi mojudubou mlaobä, ya tä a oni shömaö. Bada tä Jesucristonö täbä taamaö lä bufino wei tä a çai. Bämalecö lä jucäaö wei, öjö a Bada waiquiwä. ¿Öjö tawä? Cafä wamacö nija yama a wano wäyöö cuaabä, yamalecö malä shömöleno wei. Öjö wama tä a nofi jaducubobä ya wä.

³Bei. Ei ya wä lä cui, wamale a da jlilä. Yai Bada tänö täbä nia lä jömaö wei tä cublou ajedou däjä, a nö nia lä waiblaö wejei täbä nia wawäblou. Cama bä cuaaö bufi lä doblao wei tä ja bä nia shino cadidou.

⁴Abinaja bä nia cuu. —A wäfa juu ço lä wäyämöno wei, ¿wedi jamö bei a li, öjö lä? Bada bä jaba lä cuono wei bä nomaa ma waiquilaliyono wei ma cui, ulifi tä jaba cuo lä showadaono weinaja, itä ulifi nofi cua lä showai! Einaja bä nia cuu.

⁵Einaja bä mojadi cudalou bufi fa doblaonö bä li cuu. Tä a lojode ma cui, tä a nofi mojudubou bufi doblao dicooje. Bäma tä a lojode daö waiquia, ¿öjö tawä? Judu mösö ma cui, bita a ma cui, Yai Bada tä anö täbä bluca bädaliyoma. Judu mösö fa

lelemacödunö, mau ubä shedequeblamalema. Bäfätä jamö u lä cuono wei u fa çoçamomalönö, mashita wejediwä a wawäblamalema.

⁶¿Öjö tawä? Öjö däjä, Yai Bada tä ʘ lojodenö tä bluca wʘlia majölema. Öjö lä mau u showawänö, tä ulifi jaba lä cuono wei tä fe fa baoblamalönö, täbä mö bluca watäblamalema.

⁷Fei däjä ma cui, Yai Bada tä ʘ lojode showawänö bämacö cua showaa lä cule. Judu mösö ma cui, bita a ma cui, Yai Bada tänö bä tabou balöa showaa. Täbä bluca jömabä etä cublou däjä, Yai Bada tä daö lä mlajei bä mö nia watäblaö. Öjö lä däjä, cowa wacönö jödödöwä tä nia bluca öshömaö. Tä ʘ lojode. Öjö ma cui, tä ʘ nö lä waiblaö wejei bä lä cuinö, tä ʘ nofi mojudoubou bufi doblaoje.

⁸Öjö ma cui, bämacö lä nofimale wamacö. Ei ya wʘ lä cui tä ʘ nofi mojudoubou dicoo dijejä. Camiyä yanowamö bämacö lä cuinö bäma tä nö ʘfa dedewä lä taö weinaja, inaja Yai Bada tänö tä nofi taboimi. Moli a fe nia ma didi wei ma cui, lasha 1.000 a nia ma faö wei ma cui, inaja showawä Yai Bada tänö tä nofi tabou fe usucuwä.

⁹Bada tänö tä ʘfa lä wäqueno wei tä taö jaöomi ja, ai bä bufi ma uomodou wei ma cui, a bufi li asio cudeenö tä li taimi showawä. Wamacö nofi yai asibou. Täbä mö çai watäblamaö bufiomi. Täbä bufi mö shino yai yabajadamaö bufi doblao cudeenö, tä li taimi showawä.

¹⁰Öjö ma cui, Bada tä juu çoçbä tä mö nofi jalu tabou waiquia. Bämacö bufi cuu mlao däjä tä nia juu çoç, täbä lä tomömou wei täbä ʘatomou lä cuaaö weinaja showawä. Öjö däjä tä ʘ çai nacli ʘliamolanö, judu mösö nia mladou. Öjamö bä bluca lä shadiladi bä ma cui, cowa wacönö bä mö nia jödödöwä watäblaö. Bita a ma cui, bluca täbä lä cublai täbä ma cui, täbä nia çai jödödöwä öshömaö. Täbä nia bluca mladou, a lä cuno weinaja showawä.

¹¹Inaja täbä nia bluca mladamaö cuaaö cudeenö, bämacö yai da bejedimo. ¿Öjö tawä? Täbä nia malä mladou wei. Yai Bada bäma ecö lä cui, dodijidawä bäma ecö shino yai cuobä. Bämalecö taamaö lä bufii wei tä ja, bämacö yai da cadido.

¹²Yai Bada tänö täbä nia bluca obi lä waicaö wei tä lä cui, bämacö shi jalimolanö bäma tä nö dabobä. Bäma tä nö dabou bädao mlai, bäma tä yai wawäblamaö bufibä. Öjö lä tä wawäblou däjä, judu mösö fa öshölönö mösö nia mladou. Cowa wacönö bä bluca lä shadiladi bä fa öshölönö, bä nia ʘolicou.

¹³Öjö ma cui, judu dude bäma mösö nö dabou, mashita a çai, Yai Bada tä ʘ nö wäo ja a lä cuno weinaja showawä. Öjamö lä täbä nia shino yai cadidou.

¹⁴Öjö cudeenö, bämacö lä nofimale wamacö. Öjö wama tä nö dabou waiquia ja lä, bä bufi nö shino da wʘlojoicu. Wamacö bufi nö shino fa wʘlojoicunö, Yai Bada nija dodijidawä wamacö dablamobä. Wʘlidiwä tä cua mlai ja, wamacö ʘfa çai tamobä tä cua mlai ja, wamacö bufi çai yanöçöwä cudiobä.

¹⁵Bada tä bufi asia lä showale däjä, “Bämacö bluca jucäamobä a bufi asio malä cui”, a nofi shino yai da taboje. ¿Öjö tawä? A jolemobä ami. Pablo a ma cui, bäma a yai lä

nofimaö wei a lä cuinö, inaja showawä wamacö nowa çai taö balöoma. Tanomi mlai. Pablo a ma cui, tä ą oni lä shömöleno wei dąjä, inaja showawä a cama cuma. Yai Bada tänö, öjö a bufi jaducublamaö yalo a wą li cuoma.

16Showadi öjö tä ąfa shino wáyäö mö feduo talei, tä ą oni lä shömaö wei sibä jamö. ¿Öjö tawä? Pablo ai etä ą oni doamamou si ijejewä ma cui, ai etä ą jamö täbä bufi jaducublou si ijejeomi. Etä ą doamamou walalao showadao fa mlacunö, bä bufi lä mojodi wei bä lä cuinö tä ą shomiblamaö si ijejeweje. Showadi etä ą shomiamaöje, bä bufi shalilou lä mlai bä lä cuinö. ¿Öjö tawä? Pablo etä ą oni bädawä mlai, Yai Bada ai etä ą oni mö feduwä ma cui, inaja showadi etä ą çai taamaö mö feduoje, öjö bänö. Etä ą shomiablalamaö majöö dicooje ja, bä mö nia watäblamou.

17¿Öjö tawä, bamacö lä nofimale wamacö? Öjö wama tä daö waiquiwä yalo bä da moyaweicu. Tä ą lä shomiamaö wejei bä ą ja wamacö möläö fa dicoonö, öjö walıdiwä talewä bä nija wamacö luluamou dicoo mlaobä. Wamacö bufi shaliloimi majöa dicoicu.

18Öjö ma cui, Jesucristo nija wamacö bayeliblamou lä waiquio wei wama ecö lä cui, bä yai bayeliblamou fe da balojolu. Wama a daö lä waiquile wamacönö, a yai daö da shalilioje. Bada tänö bämalecö yai bayelibou. Öjö cudeenö, fei dąjä ma cui, obi ma cui, öjö bäma a nofi shino yai da doabla. Inaja lä tä cuobä.

1 San Juan

1 San Juan 1

¹Jaba tä ʔ cuo showao lä balöono wei a lä cui, öjö ya wafa wäyäbä ya tä ʔ onibläö lä cule, täbä lä ʔalimiblamaö wei a lä cui. ¿Öjö tawä? Yama a wä jili cublelei. Bei yamacö mamocunö yama a ʔai möö cublelei. Bei yamacö imicönö yama a ʔai jubaö cublelei.

²ʔalimi täbä lä tablamaö wei a lä cui, Yai Bada tänö a fa yanowamöblamalönö, yama a möma. Öjö lä bei yama a wafa wäyäö. ʔalimi täbä lä tablamaö wei a lä cui, bä Fjö e nija a ʔalimi cuo showao balöoma. Cafä wamacö nija, öjö yama a wafa wäyäö, camiyä yamacö nija a lä damalaleno wei a showawä lä cui.

³Yama a lä möno wei, yama a wä ʔai lä jilino wei, cafä wamacö nija yama a wafa wäyäö, cafä sho bämacö nofi bluca tamayobä. Bämacö lä Fjömou wei a sho, bä Ijilubö Jesucristo e ʔai sho, bämacö nofi bluca tamayobä.

⁴¿Öjö tawä? Cafä wamacö nija yama tä ʔ wäyäö lä cule, bämacö bufi bluca yai doblalou fe balojoobä.

⁵Jesús nija yama tä ʔ lä jilileno wei tä ʔ lä cui, cafä wamacö nija ei yama tä ʔ wäyäö nomöjöa lä cule. Tä shi lä wacacai, öjö lä Yai Bada bei tä waiquiwä. Cama nija wiisibö ma cui tä mö ʔai wai didi cuami.

⁶Mö didi tä jamö bämacö cua showalanö, öjö sho bämacö nofi ʔafa tamayou ma wäyämou wei ma cui, bämacö jolemou waiquiwä. Bejedi tä lä cule jamö bämacö cuami.

⁷Öjö ma cui, tä shi lä wacacai jamö cama Yai Bada tä lä culenaja, öjamö bämacö cudia mö fedua ja, dodijidawä bämacö nofi nia yai shino tamayou. Öjö däjä Yai Bada bei Ijilubö Jesús iyäbönö, wälidiwä bäma tä lä taö wei tä bluca ja, bämacö aublou ʔolayou.

⁸“Iba tä cuami”, bämacö cuu ja, camiyä bämacö mölamamou bädaquei. Bejedi tä ʔ lä cui bäma tä ʔ taboimi.

⁹Wälidiwä bäma tä lä taö wei, Yai Bada nija bäma tä ʔafa wäaö ja, tä nowa nia mladamaö. Bämalecö nia aubläö ʔo. A wä malä cadidou wei. Öjö lä showadi a shino dodijaö.

¹⁰“Ma, wälidiwä ya tä tanomi”, bämacö cuu dicoo ja, Yai Bada bei bäma a wafa jole taö dicoo. Cama bäma etä ʔ taboimi waiquiwä.

1 San Juan 2

¹Ijilu bä. Wälidiwä wama tä taö mlaobä, ei ya tä ʔ onibläö lä cule. Öjö ma cui, wälidiwä bäma tä taö bädao ja, bämalecö nofi nia lä bäyäbou wei a cuadayoa. Bä Fjö e nijamö Jesucristo a cuadayoa, a shino lä cadidou wei a lä cui.

- ²Camiyä bamacö doblou lä mlai, öjö nija Yai Bada tänö bämalecö nowa bluca mladamalema. ¿Öjö tawä? Camiyä bamacö befi shino ayawä mlai, yanowamö täbä bluca lä cublai bä nowa çai mladamaö mö feduobä, a shämou ojodaoma.
- ³Yai Bada tänö tä tamaö lä bufii wei bäma tä a nofi shino cadidibou ja, bamacö bufi nia wedinajamoimi. “Yai Bada ya daö lä”, bamacö nia lojode cudou showadao.
- ⁴“Ya tä daö”, bamacö ma cuu wei ma cui, tä tamaö lä bufii wei bäma tä taimi ja, bamacö jolemou waiquiwä. Tä a lä bejedi wei bäma tä a taboimi.
- ⁵Öjö ma cui, bäma a wä nofi cadidibou ja, Yai Bada bäma a shino yai nofimaö fe balojoo. Bäma a wä nofi lä cadidibou wei tänö, bamacö bejedimou nö öjöböamou.
- ⁶“Öjö nija ya cua”, bamacö lä cuu wei, Jesús a lä cuaano weinaja bamacö cuaaö mö feduobä bamacö.
- ⁷Iba wamacö. Cafä wamacö nija Yai Bada tänö tä tamaö lä bufii wei ya tä a onibläö lä cule. Jesucristo wama a lä bufiblaleno wei däjä, wama tä a jaba lä jilileno wei tä a showawä. Tä a dudemi. Wama tä a jilia waiquilema.
- ⁸Öjö ma cui, ei ya tä a lä oniblale, tä a jaba cuo ma balöono wei ma cui, tä a çai dude showawä. Öjö tä a ja, Jesucristo a cadidou. Cafä wamacö ma cui wamacö çai cadidou. Mö didi tä lä cui tä malä mlaaimadi. Bejedi tä shijnö wamacö wacacamabou malä nomöjole.
- ⁹Ai bä lä cui, “Shji wacacawä tä jamö ya cua”, bä ma cuu wei ma cui, cama ebä mashi nofi wälibou dicooje ja bä jolemou. Mö didi jamö bä cua showaa.
- ¹⁰Cama ai ebä lä nofimaö wejei bä lä cui, shji wacacawä jamö öjö bei bä shino yanöcöwä cua lä cule. Öjamö lä bä mojudili wäcäcäablalobä tä cuami.
- ¹¹Öjö ma cui, cama ai ebä nofi lä wälibou wejei bä lä cui, mö didi jamö öjö bei bä cua. Öjamö bä cudia showaa lä cule. Mö didi tänö jai jubäbö bä li cuwä yalo, bä nö cadidoblobimi waiquiwä.
- ¹²Ijiluyä wamacö. Jesucristo a shämou lä läono wei tänö wamacö nowa mladamalema yalo, cafä wamacö nija ei ya tä a oni shömaö.
- ¹³Bada wamacö. Yai Bada a sho cäcöbö cuo lä balöono wei a lä cui wama a daö cudeenö, cafä wamacö nija ya tä a oni shömaö mö fedua. Fiya wamacö. Fecula bada a yai lä wälidii a lä cui nija wamacö nö wälojaö waiquia yalo, cafä wamacö nija ya tä a oni çai shömaö mö fedua. Oshe wamacö. Yai Bada nija bamacö lä Fjömou wei wama a fei däjä daö yalo, cafä wamacö ma cui nija ya tä a çai shömaö mö fedua.
- ¹⁴Yai Bada a sho cäcöbö cuo lä balöono wei a lä cui, bada wamacönö wama a daö yalo, cafä wamacö nija ya tä a oni shömaö. Fiya wamacö lä cui, wamacö bufi lojode. Yai Bada bei wama tä a nofi jaducubou. Fecula bada a yai lä wälidii nija wamacö nö wälojaö waiquia. Öjö cudeenö, cafä fiya wamacö nija ya tä a çai oni shömaö mö fedua.

- 15** Yanowamö täbä showadi lä cuaaö wei tä nofi yaibo dijejä. Täbä lä tabou wejei täbä ma cui ja, bä bufi mö blucao dijä. Öjö täbä ja bä bufi mö lä blucao wei bä lä cuinö, Yai Bada bäma a nofi lä Fjömaö wei a nofimaii waiquiweje.
- 16** Yanowamö täbä doblou malä mlai. Bä cuaaö bufi lä doblao wei tä ja, bä shi shino li jaliblalou. Bä bufi waiyou. Cama bä nofi shino doablamou. Yai Bada bäma a nofi lä Fjömaö wei a lä cuinö, öjö tä nabä shömaimi. Yanowamö öjö cama etä li.
- 17** Ei bita a lä cui a nia cudiomi. Täbä showadi lä cuaaö wei tä ma cui, tä nia mladou. Öjö ma cui, Yai Bada a nosie lä juaö wejei bä lä cui, öjö bä nia shino balimi yai cuo.
- 18** Ijilu bä. Ei tä ulifi nia lä mladou wei tä ajedou waiquiwä. Jesucristo a nofi yai lä walıbou wei a nia wawäblou. Öjö lä wama tä ą çai jlılibou waiquia. ¿Öjö tawä? A nofi lä walıbou wejei bä bluca wawäblou balöa waiquia yalo, öjö bäma tä ajedewä daö.
- 19** Camiyä bämacö lä yododaö wei jamö, öjö bä çai ma coyocoblaano wei ma cui bä loo mlalaliyoma. Camiyä bämacö mashi bä yai cuo fa cunoja, bä loo nö mladobö mlai. Ma. Öjö lä bä bluca shomi dablamou wawädoobä, bä coyocaö mladaliyoma.
- 20** Öjö ma cui, Yai Bada tänö a lä yaimabole a lä cuinö, çafä wamacö nija a Bufi shömöledayoma. Öjönö wamacö bayelibou yalo, bejedi tä ą lä cui wama tä ą daö.
- 21** Wama tä ą daö yalo, çafä wamacö nija ya tä ą oni shömaö. “Tä ą daimije”, bämacö nofi taboimi. Bejedi tä ą jamö, jolemou tä ą coyocoo dao lä mlai wama tä çai daö waiquiwä.
- 22** ¿Öjö tawä? Täbä lä jolemou wei täbä ą ma bluca wei ma cui, abinaja bä shino lä cuu wei bä yai jolemou. “Yai Bada tänö a shömabä a lä yaileno wei, öjö lä Jesús a cuonomi”, bä wawädowä lä cuu wei, öjö lä bä lä cui bä yai jolemou. Jesucristo a nofi yai lä walıbou wei a lä cuinö, Yai Bada bei Ijilubö Jesucristo e ma cui, bä Fjö e ma cui, cäcöbö waibou bolacao.
- 23** Yai Bada bei Ijilubö e lä waii wejei bä lä cuinö, bä Fjö e ma cui e taboimije. “Öjö lä a waiquiwä”, Jesús a nofi tabolajenö, a nofi lä mölabou wejei bä lä cuinö, Jesús, bä Fjö sho cäcöbä tabou bolacaaje.
- 24** Öjö cudeenö, Jesucristo wama etä ą jaba lä jılileno wei tä ą lä cui, bei wamacö bufi jamö tä ą da taleje. Öjö wama tä ą talei ja, Yai Bada bei Ijilubö Jesucristo nija, bä Fjö e çai nija, wamacö nia çai yanöcöwä cuo.
- 25** ¿Öjö tawä? Camiyä bämacö nija Jesucristonö tä ąfa lä wäyano wei tä lä cui, bämacö nia lä balimiblou wei tä ąfa yai wäyama.
- 26** Wamacö yaclämaö bufi lä doblao wejei bä lä cui nija wamacö moyawäobä, ei ya wä.
- 27** ¿Öjö tawä? Jesucristo a wänö, çafä wamacö nija Yai Bada a Bufi yanöcöa waiquia. Shomi täbä nija wamacö damamobä wamacömi. Wamacö nia lä damaö wei, öjö lä a waiquiwä. Çafä wamacö nija a Bufi lä yanöcöle a lä cuinö, jödödöwä tä ja wamacö

damaö. A jolemoimi. Tä ʘ lä wawämaö wei tä ʘ bejedi. Öjö cudeenö, Jesucristo nija bä yanöcöwä da cuicu, Yai Bada tä Bufinö wamacö taamaö lä bufii weinaja showawä.

²⁸¿Öjö tawä? Ijilu bä. Jesucristo nija, yanöcöwä bä da cuicu. A bädou däjä, bäma a nofi mölabolanö bamacö icuobä. Bamacö möfe quilili boo mö bao dicoo mlaobä.

²⁹Jesucristo wama a cadejewä daö waiquiwä ja lä, bufi wedinajamou mlai ja, Yai Bada bei ijilubö wama ebä nö nia çai öjöböaö. Bä cadejewä mö lä fedule bä lä cui, öjö lä bei ebä waiquiwä.

1 San Juan 3

¹Bamacö lä Föömou wei a lä cuinö, ʘbejedi lä bämalecö nofimaö! Bämalecö nofimaö dodijia ja lä, Yai Bada bei ijilubö bäma ecö ʘfa jilamobä bämalecö tablamalema. Öjö bäma ecö waiquiwä malä cui. Yanowamö täbänö Yai Bada tä daö fa mlacujenö, camiyä bämalecö nö çai öjöböboimi mö feduweje.

²Iba wamacö. Yai Bada bei ijilubö bäma ecö waiquiwä. Bamacö nia yai lä cublou wei bäma tä daö ma mlai, ei bäma tä shino daö. Jesucristo a bädou däjä, cama a lä culenaja bäma tä yai fa dalalönö, inaja showawä bamacö nia cublou mö feduo.

³Öjö tä ʘ ja bä lä mölaö wei bä lä cui, bä bufi shino wasöo talei. Jesucristonö wälidiwä tä coyocobou lä mlainaja, inaja bä dodijidawä cuo mö feduobä.

⁴Wälidiwä tä lä taö wejei bä bluca lä cuinö, Yai Bada tä ʘ waibouje. ¿Öjö tawä? Tä ʘ lä waibou wejei tä lä cui, öjö wälidiwä bei tä waiquiwä.

⁵Wama tä malä dale. Wälidiwä tä bluca lä cui, Jesucristonö tä joyabä a juma. Cama etä wälidiwä cuami.

⁶Öjö cudeenö, Jesucristo nija bä yanöcöwä lä cuo wei bänö tä wälidiwä taimije. Wälidiwä tä lä taö wejei bä lä cui, Jesucristo nija bä bufi jaducuwämi. A çai daimi waiquiweje.

⁷Ai shomi täbä ʘ bädawä ja bä möla dijä, ijilu bä. Bä cadidoimi ja, ¿wedi tabä wama bä ʘ li juaö cuquei? Bä lä cadidou wei bä lä cui, öjö bä li cadejewä waiquiwä cudeenö bä li cadidou, Jesucristo a cadidou lä culenaja showawä.

⁸Wälidiwä tä lä taö wejei, fecula bada öjö ebä li. Jaba däjä ma cui, öjönö tä wälidiwä taö malä showadaono wei. ¿Öjö tawä? Fecula badanö tä lä taö wei etä wäliabä, Yai Bada bei Ijilubö e wawälayoyoluma.

⁹Yai Bada nija dude bä tablamoa lä çolayono wei bä lä cuinö, wälidiwä tä taimije. Cama ebä nija, Yai Bada etä cua malä waiquile. Yai Bada bei ijilubö ebä waiquiwä yalo, tä wälidiwä taimije.

¹⁰¿Öjö tawä? Yai Bada bei ijilubö ebä nö shino öjöböamou si ijejewä. Fecula bada ebä nö çai öjöböamou mö feduo. Dodijidawä tä taö lä mlajei bä lä cui, Yai Bada ebämi. Bä ai ebä nofimaö lä mlajei bä lä cui, öjö ebä çai malä mlai.

- 11**Wama tä ʔ jaba lä jilileno wei tä ʔ lä cui, bamacö nia lä nofimayou wei, öjö tä ʔ showawä malä cui.
- 12**Caino bäma a owämaö mlai, bä fäähä e lä shäleno wei a lä cui. ¿Wedi tä tabä a li shälema, öjö lä? Wälidiwä talewä cama Caino a cuo dodijioma yalo, bä fäähä e shino dodijaö ayaoma cudeenö a li shälema.
- 13**¿Öjö tawä? Yanowamö täbänö wamacö nofi lä wälibou wejei tä ja, bä bufi wedinajamo dijä, iba wamacö.
- 14**Bamacö nomaö shi wälibä, bamacö ma cuono wei ma cui, bälimi bämalecö tablamaö nömöjölayoma. Jesucristo bäma ebä lä nofimaö wei tänö, bälimi bämalecö lä tablamaleno wei bäma tä daö. Täbä nofimaö lä mlajei bä lä cui, bä nomaö shi wälibä jamö bä cudia showaa lä cule.
- 15**Cama ai ebä nofi lä wälibou wejei bä lä cuinö, jai bä shäö waiquiaje Yai Bada tänö bä nofi tabou. ¿Öjö tawä? Täbä lä shäö wejei bä bälimi cuobä bä malä mlai. Öjö wama tä daö.
- 16**Jesús a lä cuaano wei tänö, fei däjä nofimou bäma tä shino daö. Bämalecö bayeliblabä a noshi umlao mlai ja, a shämolayoma. Inaja showawä, camiyä bamacö noshi çai umlao mlai ja, Jesús bäma ebä bayeliblabä. Bamacö nomabä tä ma cule ma cui ja bamacö ojodaobä.
- 17**Öjö ma cui täbä bayeliblabeje täbä tabou ma cujei, täbä bayeliblaö moji dicooje ja, öjö bä lä cui bä bufi nofiomi. Cama ai e nö jölili lä bleaaö wei a nofi ojodabou lä mlajei bä lä cuinö, Yai Bada bei tä nofimaiimi waiquiweje.
- 18**Ijilu bä. Bamacö ʔfa nofi wäyämamou buo mlai. Bamacö bejedimolanö, bamacö lä cuaaö wei tänö bamacö yai da nofimayo.
- 19**Inaja bamacö cuaaö ja, Yai Bada tä lä bejedi wei, bäma ecö nö nia öjöböamou. Bufi quilijou mlai ja, Yai Bada bäma a wä nofi mölabolanö, bamacö nia icuo.
- 20**“Shädayai. ¿Camiyä ya nofi jolemou bäa ma culawä?”, camiyä bamacö nofi tamamou si ma ijejeo wei ma cui, Yai Bada tänö inaja bämalecö nofi tabou malä mlai. Jödödöwä tä daö nö mlawä.
- 21**Iba wamacö. “Shädayai”, bamacö bufi cuimi waiquiwä ja, bäma a nofi mölabolanö Yai Bada nija bamacö shino icuo.
- 22**Öjö däjä, Yai Bada nija bäma tä ʔfa lä bou wei tä lä cui, bäma tä bluca dääö. Tä tamaö lä bufii wei bäma tä taö yalo, bäma a bufi doblamabou cudeenö bämalecö dobäö.
- 23**Jao. ¿Wedi tä tamaö bufii, öjö lä? Yai Bada bei Ijilubö Jesucristo bäma a bejedi bufibä, öjö waiquiwä. Bamacö nofimayobä tä çai, bämalecö nowa lä taleno weinaja showawä.
- 24**Yai Bada tänö tä tamaö lä bufii wei tä ʔ nofi lä cadidibou wejei bä lä cui, Yai Bada nija öjö bä yanöcöwä cudia. Cama bä nija Yai Bada tä çai yanöcöwä cudia mö fedua.

¿Öjö tawä? Camiyä bämacö nija Yai Bada tä Bufi jöbömobema yalo, a yanöcöwä lä cudio wei bäma tä daö.

1 San Juan 4

¹Iba wamacö. Yai Bada tä Bufi jowa lä tabou wejei bä lä cui, bä ʘ bejedi bufii showadao dijejä. Wama bä bejedi möö ja, bä ʘ jiliaö da balöoje, Yai Bada wama ebä nö öjöböabä. Yanowamö täbä lä bälöblai bä yömölabeje, Yai Bada a wano jole jole wäyälwä bluca bä ʘ çai juaö malä cudujei.

²Wama bä ʘ fa jililänö, Yai Bada wama a Bufi nö nia öjöböaö. ¿Öjö tawä? “Yai Bada tänö a shömabä, Jesucristo a yailema. A yanowamöblaleyoluma.” Einaja bä cuu lä wawädoo wei, öjö lä Yai Bada ebä waiquiwä.

³Öjö ma cui, “Ma, Yai Bada tänö a shömabä a lä yaileno wei a lä cui, Jesús öjö lä ami”, bä lä cuu wei, Yai Bada ebämi. Yai Bada tä Bufi tabou mlajei, Jesucristo a nofi yai lä wälbou wei etä ʘ shino tabouje. Öjö lä a nia jowa lä waloono wei etä ʘ cublawä waiquiwä.

⁴Ijilu bä. Yai Bada wama ecö waiquiwä. Yai Bada a wano jole jole wäyälwä bä lä cui bä nija wamacö nö walojoblou waiquilayoma. Bitä jamö bä lä cublai bä nija, fecula bada a nö walojaö ma cule, Yai Bada wama a Bufi lä bälömabole a nö shino yai walojaö ayawä malä cui.

⁵Yai Bada a wano jole jole wäyälwä bä lä cui, yanowamö showadi täbä lä cuaaö weinaja bä cuaaö mö feduo yalo, cama yanowamö tä ʘ li tabouje. Öjö tä ʘ tabouje yalo, yanowamö täbänö bä ʘ shino jiliaö bufi doblaöje.

⁶Camiyä bämacö mö feduwä lä cui, Yai Bada bei bäma ecö li. Yai Bada tä lä daö wejei bänö bämalecö ʘ jiliaö bufi doblaöje. Yai Bada ebä lä mlai bänö bämalecö ʘ jilii bufiomije. Öjö lä tänö Yai Bada tä Bufi lä tabou wejei bäma bä nö öjöböaö. Bä lä jolemou wei bä çai.

⁷Iba wamacö. Bämacö yai da nofimayo, öjö lä. Nofimou tä lä cui, öjö Yai Bada etä waiquiwä malä cui. Täbä yai lä nofimaö wejei bä lä cui, öjö Yai Bada bei ijilubö ebä waiquiwä. Öjö bänö a çai daöje.

⁸Bä nofimaö lä mlajei bänö Yai Bada bei a daimije. Nofimou tä lä cui, öjö Yai Bada bei etä waiquiwä malä cui.

⁹Yai Bada tänö bä Ijilubö moli e lä cui, bitä jamö a shömöledayoma, cama nija bämacö balimi cuobä. Öjö tänö, bämalecö yai lä nofimaö wei tä damalalema.

¹⁰¿Öjö tawä? Camiyä Yai Bada nija bämacö nofimou dobloimi dicowä. Camanö bämalecö lä nofimaö wei bäma tä dabraö däjä, nofimou tä lä cui bei bäma tä shino yai dalalei. Bä Ijilubö e shämou läobä a malä shömöleno wei, wälidiwä bäma tä lä taö wei tä nowa bluca mladamabä.

¹¹Iba wamacö. Inaja Yai Bada tänö bämalecö nofimaö waiquia yalo, bämacö nofimayou mö da feduo.

¹²Yanowamö bamacö lä cuinö, Yai Bada bäma a dablaö daomi. Öjö ma cui bamacö nofimayou ja, camiyä bamacö nija tä nia yanöcöwä cudio. Tä yanöcöwä fa cudionö, camanö täbä yai nofimaö lä culenaja, inaja showawä bäma täbä nia nofimaö cuo mö feduo.

¹³Camiyä bamacö nija Yai Bada tä Bufen jöbömobema yalo, a yanöcöwä lä cudio wei bäma tä daö. Cama nija bamacö yanöcöwä cudia mö lä fedule tä çai.

¹⁴Yanowamö täbä jucäabä, bamacö lä Fjömou wei a lä cuinö, bä Ijilubö e shömölema. Yama a möma. Yama a wafa bejedi çai wäyöö.

¹⁵Yai Bada bei Ijilubö Jesús e afa lä wäyöö wejei bä lä cui bä nija, Yai Bada tä yanöcöwä cudia. Yai Bada nija öjö lä bä yanöcöwä cua mö fedua.

¹⁶¿Öjö tawä? Yai Bada tänö bämalecö lä nofimaö wei bäma tä daö. Öjö tä ja bamacö mölaö. Bufen nofio tä lä cui, öjö lä Yai Bada etä waiquiwä. Täbä showadi lä nofimaö wejei bä lä cui, Yai Bada nija bä yanöcöwä cua. Inaja showawä, cama bä nija Yai Bada tä yanöcöwä cuo mö feduo.

¹⁷Yai Bada tänö täbä nofimaö lä culenaja bäma bä nofimaö cuo mö feduobä bämalecö shino bayelibou, täbä bluca jömabä jamö, bamacö bufen mölaö çai icuobä. Bitä jamö Jesús a lä cuono wei däjä, bä Fjö e nija a lä cuono weinaja camiyä bamacö cua mö fedua cudeenö, quili mlai ja bamacö icuo.

¹⁸“Bejedi lä, Yai Bada tänö wale nofimaö”, bä nofi lä tamamou wei bä lä cui bä quiliimi. Bä nofimamou lä dodijio wei tänö quili tä mladamalei. Bä bufen lä quili wei bä lä cui, “Ya doblou lä mlai tä nowa ja wale nö nia bleaamaö”, bä nofi li tamamou cudeenö bä li quili. Yai Bada tänö bä lä nofimaö wei tä ja, bä yai mölaimi. ¿Öjö tawä?

¹⁹Yai Bada tänö bämalecö nofimaö balöoma yalo, cama bäma a nofimaö nomöjja, cama ebä ma cui, öjö lä bäma bä çai bluca nofimaö.

²⁰“Yai Bada ya nofimaö”, bä cuu ma cui, cama ai ebä nofi wälibou dicooje ja, bä jolemou waiquiwä. Cama ai ebä ma dablou wei ma cui, öjö lä ebä nofimaimi waiquiweje ja, Yai Bada tä dablou lä mlai bei tä nofimaimi yaiweje.

²¹Camiyä bamacö nija, Yai Bada tänö ei tä lä cui tä nabä yai shömaö, Yai Bada bäma a lä nofimaö wei bamacönö, aiyä bäma bä çai nofimaö mö feduobä.

1 San Juan 5

¹“Yai Bada tänö a shömabä a lä yaileno wei, öjö Jesús a waiquiwä”, bä bufen lä cuu wei, Yai Bada bei ijilubö ebä waiquiwä. ¿Öjö tawä? Bä föö ebä lä nofimaö wejei bä lä cuinö, bä ijilubö ebä çai nofimaö mö feduo malä cujei.

²Yai Bada bäma a nofimaö däjä, tä tamaö lä bufii wei bäma tä a nofi çai cadidibou däjä, öjö däjä cama bäma ebä yai nofimaö cuquei.

- ³Yai Bada bäma a nofimaö ja, tä tamaö lä bufii wei bäma tä ʘ nofi nia cadidibou. Bamacö bufi nö modawä bleaaö mlai ja, bamacö nia cadidou.
- ⁴Bitä jamö bamacö ma yabacamou wei ma cui, Yai Bada bäma ecö ijilubö nö bluca walojaö fe yadiobä bamacö malä cui. Jesucristo bäma a nofi lä mölabou wei tänö bamacö nö walojaö fe yadio.
- ⁵¿Öjö tawä? Bitä jamö showadi bamacö ma yabacamou wei ma cui, Yai Bada bei Ijilubö Jesús bäma e bejedi lä bufii wei, bamacö nö shino yai walojaö ayaobä bamacö.
- ⁶Yai Bada bei Ijilubö a Jesucristo lä cui, yanowamö täbä nijamö a waloqueyoluma. Mau u jamö a fe ojoblamolayoma. A befi çai lä itaono wei jamö a iyä nö çai beblaloma. ¿Öjö tawä? Mau unö a fe lä ojoblamono wei tä bädawänö mlai, bei iyäbö lä falayono wei tä ma cuinö a nö çai öjöböamou waiquiwä.
- ⁷Yai Bada tä Bufinö, öjö tä ʘ çai bejedi wäyää. Tä ʘ lä bejedi wei tä ʘ wäyäbä, öjö Yai Bada tä Bufi malä waiquii.
- ⁸Tä ʘ nö bejedi lä öjöböamaö wejei,
- ³ bä cua. Yai Bada tä Bufinö tä ʘ nö bejedi öjöböamaö. Jesucristo a fe lä ojoblamolayono wei tänö tä ʘ nö bejedi çai dablamaö. A befi çai itaobä jamö, iyäbö lä falayono wei tänö çai. Öjö lä bä 3 lä cuinö tä ʘfa bejedi taö fe usucuweje.
- ⁹Tä ʘfa wäyäbeje jamö, yanowamö täbä nija bamacö ma mölaö wei ma cui, Yai Bada nija lobe bamacö mölabä öjö bei a wä shino yai. Yai Bada a wä nö wäo ja, bä Ijilubö e ʘfa wäyää cadidou.
- ¹⁰¿Öjö tawä? Yai Bada bei Ijilubö a bejedi lä bufii wejei bä lä cuinö, Yai Bada tänö bä Ijilubö e ʘfa lä wäyänö wei tä ʘ nofi jaducubouje. Yai Bada tä ʘ bejedi bufibou lä mlajei bä lä cuinö, tä ʘno lä waii wejei tänö, Yai Bada bei a jolemou jömaöje. Bä Ijilubö e ʘfa yai ma wäyää wei ma cui, Yai Bada tä ʘ bejedi bufii malä mlajei.
- ¹¹Balimi bamacö cuobä Yai Bada tänö bämalecö lä dobäléno wei tä ʘfa yai wäyämou. Bä Ijilubö bäma a bejedi lä bufii wei tänö bamacö yai balimi cuobä.
- ¹²Bä Ijilubö e lä tabou wejei bä lä cui, balimi bä li cua waiquia. Yai Bada bei Ijilubö e tabou lä mlajei bä lä cui, bä nia lä balimio wei etä cuami.
- ¹³Yai Bada bei Ijilubö wama a bejedi lä bufii wei wamacö bufi jaducublobä, ei ya tä ʘ oni shömaö. Balimi wamacö cua lä waiquile wama tä dabä.
- ¹⁴¿Öjö tawä? Yai Bada nija bamacö nö bayeli nacao däjä, bamacö bufi mölaö çai icuo dao. Yai Bada tänö tä tamaö lä bufii wei tä ja bamacö yädao bufi doblao yalo, bamacö nö bayeli nacao lä bädao wei tä ma cui ja, bämalecö ʘ nia jiliaö.
- ¹⁵Bamacö nacou däjä showadi bämalecö ʘ jiliaö yalo, bamacö mölaö showalanö bamacö nacou. Bamacö nö bayeli nacao däjä, bämalecö nia lä dobäo wei bäma tä daö showadao.

16Aifä a lä cuinö, walıdiwä wama tä taö dablaö ja, Yai Bada nija wamacö nia nacou. Tä walıdiwä wayu lä mlai tä shino taö ja, Yai Bada tänö wamacö ą nia juaö, a demi cudiobä. Tä yai lä wayu wei tä taö dicoo ja, a nomabä, öjö a waiquiwä. “Öjö tä lä taö wejei bä lä cui, wama bä nö bayeli nacabä”, bamacö nowa taimi.

17Walıdiwä tä bluca lä tamou wei tä walıdiwä waiquiwä ma cui, tä wayu lä mlai tänö täbä nomaimi.

18Yai Bada bei ijilubö ebänö walıdiwä tä taö fe yadibloimije. Öjö bäma tä daö. Yai Bada bei Ijilubö Jesucristo e lä cuinö bä nowamaö. Fecula bada a yai walıdiwä lä cuinö, öjö lä bä juliimi.

19Camiyä Yai Bada bei ijilubö bäma ecö waiquiwä ma cui, a yai lä walıdii a lä cuinö, yanowamö täbä bluca tabou dicoa. Öjö bäma tä çai daö.

20Yai Bada a lä cui, öjö a shino yai bejedimou. Öjö bäma a dabä, bei Ijilubö e fa itolionö bämalecö bufi jaducumabou lä cule. Bä Ijilubö Jesucristo nija bamacö cua lä cule, a yai lä bejedi wei a lä cui nija. A bufiblamobä öjö a shino yai bejedi cua ayaa. Bālimi bamacö cuobä, öjö a waiquiwä.

21Ijilu bä. Täbä nö idubö lä bufiblaö wejei täbä ja, bä bufi yabācamo dijä.

2 San Juan

2 San Juan 1

¹Mijamö Jesucristo wama ecö lä yaile wamacö nija ya tä ʼa oni shömaö, wamacö bluca lä yododaö wei wamacö nija. Eja Jesucristo ya ebä çai lä yododaö wei ya. Bejedi lä bamacö nofimaö dodijiwä. Bejedi tä ʼa lä daö wejei bä bluca ma cuinö wamacö çai nofimaöje.

²Camiyä bamacö nija, bejedi tä ʼa yanöcöwä cudia yalo, bamacö nofimayou. Öjö bama tä ʼa tabou shi wʼalii waiquia.

³Bei. Fayä Yai Bada nija bamacö shino da bayeliblamo, bä Ijilubö Jesucristo nija çai. Showadi bämalecö nofi nia ojodaboböö. Bämalecö nofi nia çai asiboböö. Bamacö bufi çai yanöcöo cuobä. Bejedi bama tä ʼa nofi cadidibolanö, bamacö çai nofimayolanö, bamacö nia yai bayeliblamou.

⁴Bamacö lä Fjöomou wei a lä cuinö bämalecö taamaö lä bufii wei tä ja, afä ai bä jowa cadidou yalo, ya bufi doblalou fe balojoo. Bä jowa bejedimou.

⁵Wamale ʼa da jililä, çöjö tawä? Bamacö yai da nofimayo, Jesús bama a jaba bufiblaö däjä, bämalecö taamaö lä bufino weinaja showawä. Tä ʼa dudemi.

⁶Yai Bada tänö tä tamaö lä bufii wei bama tä taö ja, bama a yai nofimaö. Showadi wamacö nofimayobä, Jesús wama a jaba bufiblaö däjä wamacö nowa lä tano wejeinaja showawä.

⁷Yanowamö täbä nijamö, täbä lä mölamaö wejei bä bluca jublou cuaaö waiquia lä cudi. Jesucristo a ma yanowamöblaleyoluno wei ma cui bä ʼa lämou. Tä ʼafa jole taö dicooje. Inaja bä lä cuu wei bänö täbä yai mölamaöje. Jesucristo a nofi yai lä wʼalibou wei a owämaöje, täbä lä mölamaö wei a lä cui. Inaja showawä a cama çai cuu.

⁸Bä da moyaweicu, öjö lä. Yai Bada lija wamacö lä ojodamou wei, öjö lä bänö tä wʼaliaö nomöjöö mlaobeje. Wamacö nowa nia ojode lä çamamou wei tä bolacamiblou nomöjöö mlaobä.

⁹Jesucristonö tä ʼa lä wäyāno wei tä ʼa jamö, shomi tä ʼa coyocobou lä dicoo wejei bänö Yai Bada tä taboimije. Jesucristonö tä ʼa yai lä wäyāno wei tä ʼa jamö bä lä cadidou wei bä lä cuinö, bä Fjöo e ma cui, bä Ijilubö e ma cui, öjö lä cäcöbö tabou bolacaaje.

¹⁰Cafä Jesucristo wama ecö nija tä ʼa nia fa wäyānö, ai a waloo bädao ja, Jesucristonö tä ʼa yai lä wäyāno wei tä ʼa ja a cadidoimi ja, a çoblama dijejä. A nofi çai ayä ayäa dijejä.

¹¹Shomi tä ʼa lä wäyāo wei tä wʼalidiwä waiquiwä. Wama a nofi doaö mö lä bao wei tänö, jai öjö lä wʼalidiwä etä jamö wamacö yädäa wamacö cuaaö dicoo.

¹²Cafä wamacö nija ya tä ʼa oni shömabä ya tä ʼa bluca tabou ma cule, inaja lä balöwä. Ya tä ʼa oni shömaö mlai, bamacö fe walobä ya nö shino daa lä cule. Bamacö möyou däjä bamacö ʼa yai wayobä, bamacö bufi yai doblamayobä.

¹³Eja Jesucristo ebä lä yaile bä lä cui, cafä wamacö nija bä afa wäyämamou bufi doblaa lä cule, eja bä yododaö mö lä feduo wei bä lä cui.

3 San Juan

3 San Juan 1

¹Cafä Cayo nija ei ya tä ʔ oni shömaö lä cule, bejedi lä bäfä lä nofimaö wei wa lä cui nija. Eja Jesucristo ya ebä çai lä yododaö wei ya lä cuinö ya tä ʔ oni shömaö lä cule.

²Cafä bäfä lä nofimale. Yai Bada nija bäfä bayelimaö talei, dodijidawä wa tamabobä. Wa jaliliblou mlai ja, wa çai demi cuobä ya wə çai faö, bei wa bufi yai lä doblalenaja showawä.

³Eja Jesucristo ai ebä waloa fa majöiquiyonö, wa lä bejedimou wei wa wəfa wäyäöje ja, ya bufi doblalou fe balojooma. Bejedi tä ʔ lä cui showadi wa tä ʔ nofi jowa cadidibou malä cui.

⁴Ijiluyä ya bä ʔfa bejedimou jiliaö dāja, bei ya bufi yai doblalou dodijio lä talei.

⁵Bäfä lä nofimale. Jesucristo wa ebä bayelibläö ja, bejedi lä wa dodijaö. Wa cadidou. Wa bä daö balöono ma mlai ma cui, öjö wa bä jowa lä bayelibläö wei tä yai dodijidawä fe balojowä.

⁶Wa bä lä bayeliblano wei bä fa çoblalunö, äyämö Jesucristo ebä lä yododaö wei jamö wa wəfa wäyäö çojolomaje. Mijamö bä jayuaö çö dāja inaja a shino da cuaa, Yai Bada wa tä bufi doblamabobä.

⁷Jesucristo a wəno wäyäbeje bä juu malä cuaaö wei. Jesucristo ebä lä mlai bä nija bä bayeliblou malä mlai.

⁸Öjö cudeenö, inaja bä lä cuaaö wei bäma bä yai bayeliblabä bamacö, bejedi tä ʔ wäyäö cuaabeje jamö bamacö yädäablalou cuaabä.

⁹Mijamö Jesucristo wama ecö çai lä yododaö wei wamacö nija ya tä ʔ oni shömölema ma cui, Diodefe a lä cuinö wale ʔ jowa jiliaö moji. “Öjönö yamalecö shino yai yömölabä”, wale nofi jowa taboimi. Cama a wə jowa shino jiliamou bufi doblao dicoo.

¹⁰Mijamö ya waloö bädao ja, cama a lä cuaaö wei ya tä ʔ nia wawämaö. Wale ʔfa jowa wayoadii cudeenö. Öjö ma cui, “Inaja lä waiquiwä”, a bufi cuu mlai, abinaja a çai jowa cuaaö dicoo. Jesucristo etä ʔ wäyäbeje bä fama ma juu wei ma cui, bä dodijidawä çöblamaimi. Bä waloamaö bufi lä doblao wejei bä çai wasöö. Bä bälömabou fe blacäjouje ja, Jesucristo ebä yododabä jamö bä çai lomabou çödaaimi.

¹¹Bäfä lä nofimale. Wəlidawä tä lä taö wejei bä owäma dijä. Bä lä dodijaö wei bä shino yai da owäma. Bä lä dodijaö wei bä lä cui, öjö Yai Bada bei ebä li waiquiwä. Bä doblou lä mlai bä lä cuinö, Yai Bada tä daimije.

¹²Demedio a lä cui, bluca bänö öjö a wəfa shino yai dodijaö wäyäöje. Bejedi tä ʔ jamö öjö lä a cua wawädoa. Camiyä ya ma cuinö, ya wəfa çai dodijaö taö. Bejedi lä ya wə. Cafänö wale bejedimou daö.

¹³Cafä nija ya tä ʔ wäyäbä ya tä ʔ bluca ma table ma cui, ya tä ʔ onibläö bufiomi.

14Bäfacö dablayou fa jaödaonö, dodijidawä bäfacö ʘ yai wayobä.

15Bei. Yai Bada tänö showadi wa bayeliblabä. Wa bufi shino yanöcömabobä. Eja wa lä nofimaö wejei bä bluca lä cui, cafä nija bä ʘfa çai wäyämamou bufi doblaa lä cule. Mijamö ya bä lä nofimale bä bluca lä cui nija wale ʘfa çai wäyöö da cuaa.

Judas

Judas 1

¹Jesucristo ya nosie juabä ei camiyä Juda cä ya e, Santiago ya e mashi lä cui. Yai Bada tänö wamacö lä nacaleno wei wamacö nija, ei ya tä ʼa oni shömaö lä cule. Yai Bada bäma a nofi lä Föömälönö wamacö nofimaö dodijia lä cule. Jesucristonö wamacö lä nowamaö wei wamacö.

²Bei. Yai Bada nija showadi wamacö shino bayeliblamou dodijjobä. Wamacö nofi shino asibobä. Wamacö bufi çai shino yanöcömabobä. ¿Öjö tawä? Wamacö bufi çai shino nofimabou fe balojobä.

³Iba bämacö lä nofimaö wei wamacö. Jesucristonö bämalecö lä bayelibou wei ya tä ʼa nia ma oniblano wei ma cui, öjö ya tä ʼa tablaö mlai ja, ei shomi ya tä ʼa onibläö majöa dicoa lä cule, wamacö yai moyawöbä. ¿Öjö tawä? Ya wä fe nia blacäjou. Yai Bada bäma a nofi nia lä mölabou wei tä ʼa jöbämoa waiquibema, cama bäma ecö lä cui nija. Mijamö tä ʼa shomiblamaö majöo mlaobeje, çafä wamacö nia läo. Wama tä ʼa nofi bäyäbobä wamacö waiquiwä.

⁴¿Öjö tawä? Camiyä bämacö nija Yai Bada a daö lä mlajei bä yädäo waiquio jätöolaliyoma, etä ʼa nia jole jole fa wäyäjönö. Bä nö nia lä bleamaö wei, yedu ja ma cui Yai Bada tänö tä daö showaoma. ¿Öjö tawä? No mlai ja Yai Bada tänö täbä nofi ojodabou cudeenö a wäfa ishoimi taöje, cama bä cuaaö bufi lä doblao weinaja bä cuaabä. Bada tä Jesucristo bäma a nosie shino yai juabä a waiquiwä ma cui, a wä juao mlajei, a wä waiije.

⁵Ei tä ʼa ja, wamacö yömölamou ma waiquiono wei ma cui, bämacö bufi nia jaducublamaö çö. ¿Öjö tawä? Ejido jamö culanö Isaeli ebä lä çöleno wei a lä cuinö, ai bä mö watäblaö majölayoma, a bejedi bufibou fa mlacujönö.

⁶¿Öjö tawä? Ajele bä ma cui, bä bada lämabou ma balöono wei ma cui, öjamö bä cuo fa mojonö etä daquemaje. Fei däjä tä mö didi sublaodayobä jamö Yai Bada tänö bä oçabou majöa lä cule, duo shibä bäliminö. Yai Bada tänö täbä bluca jömabä etä cublou showao mlao däjä, öjamö bä tabou balöa lä cule.

⁷¿Öjö tawä? Sodomateli bä ma cui, Comolateli bä ma cui, öjamö bä bälöblao fe lä fayoono wei bä ma cui, inaja bä yabäçao cuo mö feduo showaoma. Bä nofi çai beshili jushublalou nö quiliadima. Öjö cudeenö, cowa bälimi wacöbänö Yai Bada tänö bä nö blemalalema. ¿Öjö tawä? Bämácö quilibä tä ʼa.

⁸Inaja showawä, mijamö bä lä cule, tabi tabi bänö bä bufi taamamou bufi fa doblaonö, Yai Bada tä ʼa juaimije. Bä nofi beshili çai jushuaö. Fedu jamö täbä lä doblaladi täbä lä cui, täbä nö çai waibläö si ijejejeje.

⁹¿Öjö tawä? Yanowamö täbä bädawä ma cui, täbä ʼa faö quilibloimi. Ajele Miqueo a wäfa lä cui, a bada ma cui inaja a cuanomi. Moisesi nomawä a nowa ja, fecula bada nija a wä läo däjä a wä oquewä fama. A jömaö däjä e ʼa lafujou mlai ja, abinaja a shino oquewä cuma. —Bada tänö wa nö nia bleamaö —a shino moli cudaliyoma, oquewä.

10Öjö ma cui miji bä lä cuinö täbä daö lä mlajei täbä nö waiblaöje. Yalo bä bufi dao lä mlainaja öjö bä cuwä. ¿Öjö tawä? Yalo bä lä cui, showadi bä cama lä cuaaö weinaja bä cuaaö bädao. Inaja miji bä lä cui bä çai cuaaö dicoa yalo bä mö watäblamou cuquei.

11¡Bä nö bleamabä lä! Caino a lä cui, öjö a owämaö dicooje. Balaama a bufi yacläö lä cuaano weinaja bä çai cuaaö nodiablalou. Öjö a lä cui, a dobämou bufi fa doblaonö a noshi öjödao dicooma. Colei a ma cui a çai owämaöje. Bada bä a jilibläö fa mlacunö, a fe ou yalo cama ebä mö çai bluca watäblamolayoma. Inaja showawä, miji bä mö çai watäblamou nodiobä bä li cuaaö.

12Tä a jole lä wäyää wejei bä lä cui, wawädowä bä nofi fa jushuablonö, Jesucristo bufilewä wamacö iyaö çai çocamou däjä tä wälidiamäö läoje. Cama bä nofi shino yaimamou. Bä a lä jiliaö wejei bä mölaa bälayou. ¿Öjö tawä? Jai öljashi bloque bä lä culenaja bä cuwä. Maa a quei mlai ja, wadolinö bä yaläö çofälöö. Bä dodijaö mlai ja, jai fii bloque defibä çai cuwä mö feduwä. Nii bä lalobä defibä cua ma cule bä laloimi. Jai fii fäwä defibä lä culenaja bä çai cuwä, defibä nasöcö jocäblou lä waiquio wei defibä lä cui. Bäma bä a nofi mölabobä bämi.

13Mau u jamö bä moshi moshi shami dablamou nosi blacäcou lä culenaja, etä wälidiwä çai dablamodii cuwä. Shidicali bä queoblou lä culenaja, bä yacläö ja bä çai cuwä. Tä mö didi lä sublabodi jamö bä nö bleamaö shi wälibä bä waiquiwä.

14Enocö a ma cuinö, inaja bä lä cuaaö wei tä äfa çai wäyää balöö showaoma. Öjö Enocö a lä cui, Adana bä ijilubö ebä nodiwä bälöablalou fa cuaanö a bälöö nomöjöö nodioma. Tä nia lä cublou wei tä äfa wäyää ja, abinaja Enocö a cuma. ¡Bei! Bada tä juu lä cuimi. Äjele ebä lä doblaladi, bluca dodijiwä täbä çai juu lä cuimi,

15täbä nö jödödöwä bleamabä. Yai Bada a daö lä mlajei, öjö bä nowa nia taö cadidio, bä doblonomi cudeenö. Wälidiwä talewä cäbä. Bä nofi jushublalou dodijiomä. Yai Bada a wäfa wälidiwä tamaje. A nö waibläö dodijiomaje. Einaja Enocö a cuu showaoma.

16Inaja bä lä cuaaö wei bä lä cui, bä bufi shino jushuablalou talei. Bä bufi diclojowä. Cama bä cuaaö bufi lä doblao weinaja bä shino cuadii. Bä nofi cama shino doablamou. Jole jole täbä nofimaö buoje, bä shi öjödamabeje.

17¿Öjö tawä, bamacö lä nofimaö wei wamacö? Bada tä Jesucristonö bä lä shömöleno wei bä lä cui bä a malä fano wei. Öjö bä a nofi da jaduculöje. Tä nia lä cublou wei tä äfa wayoaö balöomaje.

18Abinaja wamacö nowa çai tamaje. —Yai Bada tänö täbä nia lä jömaö wei tä cublou ajedou däjä, tä a nö lä waibläö wejei bluca bä nia wawäblou. Yai Bada a daö lä mlajei bä showadi lä cuaaö weinaja bä nia cuaaö, cama bä cuaaö bufi lä doblao weinaja showawä.

19Öjö bä anö täbä nofi fa wäliayonö, täbä sheleleblou cuquei. Yanowamö täbä showadi lä cuaaö weinaja bä cuaaö mö feduobä cäbä. Yai Bada a Bufi taboimije, öjö bänö.

²⁰Öjö ma cui, bamacö lä nofimaö wei wamacö. Yai Bada tänö wamacö bufi taamaö waiquiwä yalo, Jesucristo wama a nofi mölabou. Wama a nofi mölabou waiquia yalo, bä bufi showadi da lojodoablalo. Yai Bada a Bufi lojodenö bä nö bayeli da nacao.

²¹Öjö tawä? Yai Bada tänö wamacö lä nofimaö wei wama tä bufibolanö, bä shino dodijidawä da cuo. Bada tä Jesucristonö wamacö nofi ojobabou yalo, balimi wamacö nia cuo. Öjö tä ja bä nö yai da daicu.

²²Afä ai bä lä cui, bä bufi wedinajamou dicoo ja, bä bufi yai da shaliliablalamaje.

²³Ai bä mö feduwä lä cui, jai cowa wacö jamö bä nö bleaaö lä waiquile, lobe bä da çablaje, bä jucäamobä. Ai bä lä shomiablalou wei bä lä cui, wama etä nö quili talanö wama bä bayeliblabä. Wamacö moyawälanö wama bä nofi ojobabobä, cama bä lä cuaaö wei tä ja, wamacö luluamou dicoo mlaobä.

²⁴⁻²⁵Jesucristo a lä cuaano wei tänö, Yai Bada a yami cua lä ayalenö bamacö jucäaö. Dodijidawä wamacö yai tamabobä a. Wamacö shomiablalou mlai ja, cafä wamacö nija wälidiwä wiisibö tä wai cua mlai ja, cama etä shji lä cule jamö wamacö nia dodijidawä lä ublamabou wei, öjö lä a waiquiwä. Wamacö bufi nia çai doblamabou. Tä ulifi tablamou showao mlao däjä ma cui, fei däjä ma cui, obi ma cui, öjö a wafa doblao tamou shi wälibä a waiquiwä. Wawädowä a nofi Badabobeje. A nö çai lojode öjöböabeje. Inaja lä tä cuobä.

Apocalipsis

Apocalipsis 1

¹Camiyä Juan ya nija Jesucristonö tä lä damalaleno wei, ei tä ʼa oni. Jesucristo nija Yai Bada tänö öjö tä bluca wawämalema, cama bäma ecö moyawämabou mö feduobä. Tä nö dedei showao mlao däjä, Yai Bada tänö tä nia lä taö wei tä nia cublou. Jesucristo a nosie juamobä ya lä cui nija tä dablamabä, ʼajele e shömöledayoma.

²Camiyä Juan ya nija Yai Bada a wano lä wäyämono wei ya tä ʼa wäyäbä, ya tä ʼa bluca oniblaö lä cule. Jesucristonö tä ʼa lä wawämano wei tä ʼa çai. Camiyä Juannö ya tä bluca lä dalaleno wei tä ʼa çai.

³Jesucristo ebä yododabä jamö, ei tä ʼa wawadowä lä doaö wei a lä cui, a bufi nia doblalou. Tä ʼa fa jililäjenö, tä ʼa nofi yai lä cadidibou wejei bä lä cui, öjö bä bufi çai nia doblalou mö feduo. Tä nia lä cublou wei, tä nö dedei mlai ja tä nia malä wawäo wei.

⁴Camiyä Juan cä ya. Asia tä ulifi jamö Jesucristo 7 wama ecö lä yododoblai wamacö nija, ei ya tä ʼa oni shömaö lä cule. Yai Bada nija ya nö bayeli nacaö, a jaba cuo lä showaono wei, a cua lä showale a lä cui nija. A nia juu lä ço wei a showawä lä cui nija. Bada tä lä döçao wei etäcö ajede jamö, yai 7 bä lä culadi bä ma cui nija çai. Öjö bä nija ya nö bayeli nacaö, wamacö nofi ojadabobeje, wamacö bufi çai yanöçömabobeje.

⁵Jesucristonö wamacö nofi çai ojadabobä, wamacö bufi çai yanöçömabobä, Yai Bada a wafa wäyäo lä cadidou wei a lä cuinö. A jaba demi jocädou lä çolayono wei a showawä lä cuinö. Bitä jamö bä bada lä cublai, öjönö bä bluca nosiemaö. Öjö Jesucristo a lä cuinö bämalecö nofimaö fe balojowä. Bämäcö doblou lä mlai tä blucanö bämäcö ma jaono wei ma cui, öjö a fa shämolunö, iyäbö fa falönö, bämalecö jujeblamalema.

⁶Jesucristonö bämalecö çai fa cuonö, Yai Bada bäma ecö cuobä bämalecö tablamalema. Bä Föö e nija bämäcö ojadamou ajedeobä, nofi bäyäälewä bämalecö tablamalema. ¿Öjö tawä? ¡Jesucristo a wafa shino doblao tamobä! ¡Öjö a lojode bälöo dodijio shi wälibä! ¡Inaja lä tä cuobä!

⁷¿Öjö tawä? Jesucristo a lä cuinö, öläjashi bä befi çai nia waloo çoyoluu. Jödödöwä bä blucanö a nia dabraöje. A lä diquiano wejei bä bluca ma cuinö a nia çai dabraöje. Öjö a nowa ja, bitä jamö bä jödödöwä lä bälöblai bä nofi fa jölijonö bä ʼa nö nia quilili bleaaö. Einaja lä tä nia cuo dodijio. ¡Inaja lä tä cuobä!

⁸Bada tä lä bufiblamou wei a lä cui, abinaja a cuu. —Camiyä ya lä cuinö täbä bluca cublaliyoma. Camiyä ya showawä ma cuinö täbä nia bluca waicou —a cuu. Einaja a lojode shi lä wälile a cuu, jaba däjä a cuo fa showaonö a cua lä showale a lä cui. A nia juu lä ço wei a lä cui.

⁹Camiyä Juan ya lä cui camiyä bämäcö bluca. Jesucristo a nowa ja wamacö nö bleaamaö lä culajeinaja, inaja showawä camiyä yale nö çai bleaamaö mö feduaje.

Jesucristo a bälöa dodijiqueyoluu däjä, cafä wamacö nia lä cuo weinaja camiyä ya nia çai cuo mö feduo. Öjö wama a nö dabolanö wamacö nö walojaö fe lä yadio weinaja, camiyä ya nö çai walojaö cuo mö feduo talei. ¿Öjö tawä? Yai Bada ya etä a wäyää nofi jushuaö yalo, Jesucristonö tä a lä wawämano wei ya etä a çai wayoablalaö fe yadia cudeenö, Bamo tä ulifi lä jõcole jamö wale shi wälimaquemaje.

10Bada tä Jesucristo ebä yododabä tä mö jalu ja, Yai Bada tä Bufinö wale lojodobolanö, bei ya mabucabö jamö ya wä jilia mö talema. Amowa fibä jolaöje däjä fibä a nacläaö lä cuaaö weinaja a wä nacli cuoma.

11A wä faö ja abinaja wale nowa tama. —Cafä nija tä lä wawäblou wei wa tä a bluca fa oniblälönö, iba 7 bä lä yododoblai bä nijamö si oni da shömölö. Efesoteli bä nija çai, Eminateli bä nija çai, Becamoteli bä nija çai, Diadilateli bä nija çai, Saditeli bä nija çai, Filadefiateli bä nija çai, Laodiseateli bä nija çai —wale nowa tama.

12Öjö däjä, a wä lä fale ya nia fa dablanö ya mö femijiblaliyoma. Ya mö fa femijiblälunö, cowa wacöbä shi cublamobä 7 ya täbä dalalema, olo bä ja täbä lä cui.

13Cowa wacöbä shi cublamobä täbä lä itataono wei täbä möamo ja, jai yanowamö a walo cuwä ya ublaa dalalema. Camishi labe cäcö ja a didioma. Ai cäcö jaleboma. Olo bä mömou flajajawä lä culenaja cäcö cuoma.

14Bei feta ucu lä cui, shinalu ubä jole au lä culenaja ucu cuoma. Ucu shuducaje fe balojooma. Bei mamocu lä cui, cowa wacöbä lä culenaja mamocu mömou nö quilijiwä cuoma.

15Bei mamicö lä cui, duo shibä lä culenaja mamicö cuoma. Wälidiwä tä lä coyocole tä mladamabeje, shibä yabou lä balöo wejeinaja, shibä jölöcaö fa nomöjoojenö shibä shi delelewä lä cublou weinaja showawä. Bei a wä lä cui, bola bä a bada jilio nacli lä culenaja a wä jilio cuoma.

16Jayu boconö shidicali 7 bä showaboma. Sibala namo mö feduduwä, bei caficö ja a waejeoma. Bei buficö lä cui, motoca a yololoblou däjä a mömou shi dowäjawä lä culenaja bei buficö mömou cuoma.

17Ya dablaö däjä, öjö lä a cotä jamö jai nomawä ya wäcäblaquema. Öjö ma cui, camiyä nija jayu imicö maquelanö, abinaja wale nowa tama. —A quili dijä. Camiyä jaba ya, jõdödö ya çai.

18Täbä balimi cudiobä ya tä tabou. Nomawä ya ma cuono wei ma cui, fei däjä ya balimi waiquia. ¿Öjö tawä? Bä lä nomablou wei ya bä demianaö çobä ya tä tabou, täbä lä nomaö wei täbä cuobä jamö, ya tä caloblabä çai.

19'Bei. Wa täbä lä möö wei tä da oniblälö. Fei däjä tä lä cublole tä ma cui, tä nia obi lä cublou wei tä ma cui, öjö tä bluca da oniblälö.

20Jayu ya boco jamö shidicali 7 wa bä lä möfe täbä jamö, ya tä a nia wawämaö, wa bufi wedinajamou mlaobä. Öjö bä lä cuinö, iba 7 bä lä yododoblai etäbä bada lä läo wei täbä jömamou. Camiyänö ya ebä lämabou. Cowa 7 wacöbä cublamobä täbä lä cuinö, iba 7 bä lä yododoblai bä li jömamou mö feduo —a cuma.

Apocalipsis 2

¹Ya tä lä möno wei abinaja a cuu nomöjööma. —Efeso jamö iba bä lä yododaö wei bä nija a lä läle a lä cui nija, wa tä ʔ nia oni shömaö. Jayu ya boconö, shidicali 7 ya bä lä showabole ya. Cowa wacöbä shii cublamobä täbä lä ʔtatale jamö ya juadalou, olo bä ja täbä lä cui jamö. Öjö ya lä cui wale wano nia onibläö.

²Iba Efesoteli bä lä cuaaö wei ya tä daö. Bä cadidou si ijejeobä tä cua ma mlai ma cui, bä dodijaö fe yadio. Bä ma yabäcamou wei ma cui bä waiquidoimi. Bä doblou lä mlai bä lä cui bä ʔ jiliaimije. “Jesucristo ya wafa wäyää cuabä yale shömölema”, bä lä cuno wei bä lä cui, bä bejedimou fa wabajenö bä jolemou dalalemaje.

³Ya bä daö. Bä ma yabäcaöje däjä bä waiquidoimi. Camiyä ya nowa ja bä nö ma bleaamaö ma cujei, bä modablou mlai ja bä nö shino walojaö fe yadio.

⁴Öjö ma cui, ai etä nowa çai cua. Bä jaba nofimayou lä cuono weinaja, fei däjä bä cuaimi dicowä.

⁵¿Öjö tawä? —a cuu çoma—. Bä jaba lä nofimayono wei tä nofi fa jaducubojenö, bä bufi mö yabajadou çobä, öjö lä. Bä jaba lä cuano weinaja, inaja bä cuaaö çobä. Inaja bä cuaimi ja, bä bufi mö çai yabajadou çomi ja, ya bä nabä nia waloyoluu. Cama cowa wacöbä shii cublamobä etä lä ʔtale, ya etä nia çoaö.

⁶Inaja tä ma cule ma cui, bä lä dodijaö wei ya tä çai daö. Nicolaida bä lä cuaaö wei tä nofi walıbouje, camiyänö ya tä nofi çai lä tabolenaja showawä.

⁷¿Öjö tawä? —a cuma—. Bä yömöcacö lä walalai bä yömöca dao dodijjobä, Yai Bada tä Bufinö iba bä lä yododoblai bä nowa lä taö wei tä ʔ jiliabeje. Bä nö shino walojaö lä ayao wei ya bä nia doblamabou. Yai Bada etä ca jamö, balimiblamodima defi lä ublale defi ja, bä nia iyaö —a cuma.

⁸Ya tä lä möno wei, abinaja a cuu nomöjööma. —Emina jamö, iba bä lä yododaö wei bä nija a lä läle a lä cui nija, wa etä ʔ çai nia oni shömaö. Camiyä jaba ya, jödödö ya çai. Nomawä ya ma cuono wei ya demi jocädou çolayoma. Öjö ya lä cui wale wano nia onibläö.

⁹Iba Eminateli bä lä cui, bä nö lä bleaamaö wejei ya tä daö. Madofi bä ja bä nö jölili çai bleaaö ma cui, tä nowa yai lä bluca wei tä tabou fe balojooje. Judio bänö iba bä ʔfa lä taö wejei ya bä ʔ çai daö. Judio öjö bä ʔfa yai ma jilou wei ma cui bä jolemou. Sadanasi a nofi yai shino yododoaöje.

¹⁰Iba bä nö nia lä bleaamaö wejei tä ja, bä quilli mlai bä cuobä —a cuma—. Tä nö dedei mlai ja, fecula bada a lä cuinö, iba ai bä fe nia lamabou, bä bluca wabamobä. Bä nö nia bleaamaö nö dedejedouje. Bä lä bejedimou wei tä nowa ja, bä shäbeje tä ma cublou däjä ma cui, bä bejedimou fe yadiobä. Bä bejedimou fe yadio ja, ya bä nia dobäö. Liyäjawä täcö yojobobeje ya bä nia dobäö. Balimi bä cuobä ya tä nia jöbaaö.

¹¹Bä yömöcacö lä walalai bä yömöca dao dodijjobä, Yai Bada tä Bufinö iba bä lä yododoblai bä nowa lä taö wei tä ʔ jiliabeje. Bä nö walojaö lä ayao wei ya bä nia nowamaö. Täbä nomablou lä ço wei tä ja, öjö bä nö nia bleaaimi —a cuma.

12Ya tä lä möno wei, abinaja a cuu nomöjööma. —Becamo jamö, iba bä lä yododaö wei bä nija a lä läle a lä cui nija, wa etä çai nia oni shömaö. Sibala ya namö mö feduduwä lä showabole, wale wano nia onibläö.

13Sadanasi a bälöo lä dodijio wei jamö, iba Becamoteli bä bälöa, fecula bada a lä döcäo wei etäcö lä cule jamö. Öjamö ya bä bälöa nofi jaducubou. Wale a cadidibou lojodoa fe yadiaje. Öjamö lä wale afa wäyää lä shaliono wei a shälemaje, Sadanasi a lä bälöle jamö. A ma shäleno wejei ma cui, iba bä lä cuinö wale nofi mölabou fe yadio showaomaje. A lä shäleno wejei a lä cui, Adiba a wafa cuoma. Showadi a bejedimoma.

14Öjö ma cui, öjö bä nija, bolacadabö tä nowa çai cua —a cuma—. Balaama a wä lä cadidibou wejei ai bä coyocomabou dicoaje. ¿Öjö tawä? Isaeli nodiwä bä lä cui, öjö a wano Balaconö bä yaclämalema. Nö idubö täbä ja bä nii lä dodobou wejei bä nii ja, bä nö liyamama. Bä nofi beshili çai jushublalobä bä bufi taamama.

15Inaja showawä, nicolaida bä cuu lä dicoo wei tä ja bä çai yaimou.

16Bä bufi mö yabjadou çobä, öjö lä. Bä bufi lädoimi ja, yedu ya bä nabä nia waloyoluu. Ya sibala lä waejemabole anö, bä doblou lä mlai bä nija ya nia ishoyoluu.

17Bä yömöcacö lä walalai bä yömöca dao dodijibä —a cuma—. Yai Bada tä Bufinö iba bä lä yododoblai bä nowa lä taö wei tä a jliabeje. Bä nö walojaö lä ayao wei bä lä cui, ya bä nia iyamaö, nii manaa bä lä joyale bä ja. Maa au ya mabä nia çai oni jöbäö. Dude a wafa çai lä onile, ya mabä nia jöbäö, a wafa daö lä mlajei. Mabä lä dääö wejei bä lä cuinö a wafa nia shino daöje.

18Ya tä lä möno wei, abinaja a cuu nomöjööma. —Bei. Diadila jamö, iba bä lä yododaö wei bä nija a lä läle a lä cui nija, wa etä a çai nia oni shömaö. Yai Bada ya e Ijilubö. Cowa wacö lä culenaja ya mamocu mömou nö quilijiwä cuwä. Duo shibä shi delelewä lä culenaja ya mamicö cuwä. Öjö ya lä cui, wale wano nia onibläö.

19Iba Diadilateli bä lä cuaaö wei ya tä daö —a cuma—. Bä lä nofimayou wei tä çai. Bä lä bejedimou wei tä çai. Bä lä bayeliblayou wei ya tä çai daö. Bä nö walojaö fe lä yadio wei tä çai. Bä jaba lä cuaano weinaja bädawä mlai, fei däjä bä yai shino dodijaö.

20Öjö ma cui, ai etä nowa çai cua —a cuma—. Jesabela a wafa suwä lä cule, a wasöboimije. Yai Bada a wano wäyälwä a wafa suwä ma jilou wei ma cui, a jolemou. Tä a lä wäyää wei tä anö, wale a lä juaö wejei bä mölamaö. Bä nofi beshili jushublalobä, bä bufi taamaö. Nö idubö täbä lä bufiblamou wei täbä ja, bä nii fa dodobojenö, öjö bä nii ja bä nö liyamaö dicoo.

21Öjö a bufi mö yabjadobä ya nö ma daono wei ma cui, a nofi lä jushublalou wei tä ja, öjö a suwä bufi mö yabjadou moji waiquiwä.

22¿Öjö tawä? Ya nia jalilimaö. Öjö nija bä lä joleblalou wei bä ma cui, bä waiquidoimi ja, öjö ya bä nö nia çai bleaamaö fe baloo.

23Öjö a suwä lä cui, bä ijilubö ya ebä nia shäö showadao, a wä suwä lä juaö wejei bä lä cui, iba bä lä yododoblai bä bufi yai jaducublobä. Bä bufi lä cuaablalou wei ma cui

ya tä daö. Bä bufi lä waiyou wei tä çai. Bä lä cuaaö wei tä nowa lä cudalenaja ya tä nowa nia bluca çoaö cuo.

²⁴¿Öjö tawä? —a cuma—. Öjö ma cui, iba Diadilateli ai bä lä cui, öjö a wə suwä juaö lä mlajei bä nija ya wə faö majöwä, Sadanasi etä afa lojode lä jilamamou wei tä a daö lä mlajei bä nija. Öjö bä nija ai ya tä a nia läamaö fe yadiomi.

²⁵Abinaja bä shino cuaabä. Ya waloo showao mlao däjä, bä bejedimou lä waiquio wei tä lä cui, öjö tä shino yai cadidibou lojodoo showaobeje.

²⁶Bä nö wəlojaö lä ayao wei bä lä cui, bä waicou mlai ja wale nosie lä juadii wejei, bada ya bä nia tablamaö —a cuma—. Yanowamö täbä bälöblawä lä yaiblai bä lä cui nija bä bada läobä, ya bä nö nia wəlojomabou.

²⁷Bä nosiemaöje däjä bä a nia lojodoaö. Duo shibä judenö jaboca bä läçashi cublou si lä ijejeinaja bä nia taamaöje. Camiyä Bada ya nosiemobä, Fayänö wale nö lä wəlojomabolenaja, inaja showawä ya bä nia taamaö mö feduo.

²⁸Ya bä nö wəlojaö jömabä, shidicali a faö lä fenablao wei ya e çai nia jöbäaö.

²⁹¿Öjö tawä? —a cuma—. Bä yömöcacö lä walalai bä yömöca dao dodijjobä, Yai Bada tä Bufinö iba bä lä yododoblai bä nowa lä taö wei tä a jliabeje.

Apocalipsis 3

¹Ya tä lä möno wei, abinaja a cuu nomöjööma. —Bei. Sadi jamö, iba bä lä yododaö wei bä nija a lä läle a lä cui nija, wa etä a çai nia oni shömaö. Yai Bada etä a juamobä ebä 7 yai lä cui, camiyänö ya ebä juwäbou. Shidicali 7 bä lä cui ya bä çai showabou. Öjö ya lä cui, wale wəno nia onibläö. 'Iba Saditeli bä lä cuaaö wei ya tä daö. Bä mömou dodijidawä cudeenö bä afa demi taö ma cujei bä demimi. Bä nomawä.

²Bä laö çobä, öjö lä. Bä ijede dodijaö lä showai tä lojodobou çobeje, öjö lä, etä mili mlaaö lä waiquile tä lä cui. Ya bä dodijaö dablaimi dicowä. Yai Bada ya wə lä juaö wei tä lä cuinö bä taamaö lä bufio weinaja bä cuaaö cadidiomi.

³Tä a lä däleno wejei tä a nofi yai jaducubobeje, öjö lä, tä a lä jilileno wejei tä a showawä lä cui. Tä a nofi jaducubolajenö bä bufi mö yai yabajadobä. Bä laö bufiomi dicoo ja, yedu ya bä nabä nia waloo, täbä tomömobä täbä jatomou lä culenaja showawä.

⁴¿Öjö tawä? —a cuma—. Öjö ma cui, iba Saditeli ai bä bolacadabö dodijaö showaa fe yadia. Wəlidiwä tä ja bä nowamöo yalo, jai camishi bä shamimabou lä mlajeinaja bä cuwä. ¿Öjö tawä? Camishi au bä ja ya bä didimabolanö, öjö camiyänö ya bä çai nia juu. Ya bä çai nia lä juu wei bä waiquiwä malä cui.

⁵Camishi au bä ja öjö bä nia lä didio weinaja, inaja showawä bä nö yai lä wəlojaö wei bä nia çai didio mö feduo. Bä nia bəlimi lä cudio wei ya bä afa lä onibole si ja, ya bä afa mladamaö mlaicätä. Fayänö cama ajele ebä çai lä cule jamö, öjamö iba ya bä afa nia wawadowä wäaö.

6' ¿Öjö tawä? —a cuma—. Bä yömöcacö lä walalai bä yömöca dao dodijjobä, Yai Bada tä Bufinö iba bä lä yododoblai bä nowa lä taö wei tä ʘ jiliabeje.

7' Ya tä lä möno wei, abinaja a cuu nomöjöoma. —Filadefia jamö, iba bä lä yododaö wei bä nija a lä läle a lä cui nija, wa etä ʘ çai nia oni shömaö. Camiyä yami ya lä yaile ya. Ya lä bejedimou wei ya. Bada tä David a lojode jömaö ayaobä tä caloblamodima lä cui, camiyänö ya tä tabou nomöjöa lä cule. Camiyänö ya yoca calobou waiquia ja, yoca nia laaimije. Ya yoca labou ja, yoca nia çai caloblaimije. Öjö ya lä cui, wale wano nia oniblaö.

8' Iba Filadefiateli bä lä cuaaö wei ya tä daö. Bä ʘfa lojode wäyää lä mlajei, ya bä ʘ çai daö. Öjö ma cui, wale ʘ nofi cadidibouje. Wale ʘ nofi çai jole mojuduboimije. ¿Öjö tawä? Öjö bä mö lä yaile jamö, ya yoca calobou lä cule, yoca laaö dao lä mlajei.

9' ¿Öjö tawä? Öjö bä ʘfa jole jole judio lä jilou wei bä lä cui, bä jolemou. Sadanasi a nofi yai çocamoaje. ¿Öjö tawä? Iba Filadefiateli bä cotä jamö, ya bä möfe nia bomabou. Iba öjö ya bä showadi lä nofimaö wei, ya tä nia dablamaö.

10' ¿Öjö tawä? Iba bä nö walojaö fe yadioma, ya bä nowa lä tano weinaja showawä. Öjö cudeenö, bita jamö yanowamö täbä bluca lä bälöblai bä wabamobä tä cublou däjä, bä nö nia yai lä bleaaö wei däjä, iba bä lä cui ya bä nia lojodomabou fe yadio.

11' Lobe ya nia juu ço —a cuma—. Ya waloo showao mlao däjä, bä bejedimou lä waiquio wei tä nofi cadidibou lojodoo showaobeje, camä bä nija ya tä nia lä jöbää wei tä daaö cadidiobeje. Bä nia doblamaö lä mlajei, bä malä läle. ¿Öjö tawä? Liyäjäwä täcö yojobobeje, iba ya bä nia dobäö.

12' Bä nö walojaö lä ayao wei bä lä cui, ya bä nia bada tablamaö, Yai Bada ebä nijamö bä läobä. Yai Bada ya wä lä juaö wei etä yafi jamö, jai codobö ya bä bada nia tamabou. Öjamö bä nia cudio shi wälili. Cama ebä yalo, öjö bä nijamö, Yai Bada ya wä lä juaö wei ya wäfa nia oniblaö. Yai Bada etä shabono lä cule, öjö etä ʘfa çai. Fedu jamö, Yai Bada ya wä lä juaö wei a lä cule jamö culanö, etä nia shabono itou. Jelusale dude tä shabono lä cui. Camiyä dude ya wäfa nia çai oniamou, öjö bä nijamö.

13' ¿Öjö tawä? —a cuma—. Bä yömöcacö lä walalai bä yömöca dao dodijjobä, Yai Bada tä Bufinö iba bä lä yododoblai bä nowa lä taö wei tä ʘ jiliabeje —a cuma.

14' Ya tä lä möno wei, abinaja a cuu nomöjöoma. —Laodisea jamö, iba bä lä yododaö wei bä nija a lä läle a lä cui nija, wa etä ʘ çai nia oni shömaö. Yai Bada nija bä nacou ja, “Inaja lä tä cuobä”, bä ola lä cudou wei tä ʘ bejedi cublobä, camiyä öjö lä ya. Ya tä ʘfa bejedi wäyää lä shalilio wei, öjö lä ya showawä. Yai Bada tänö täbä bluca lä tablaleno wei däjä, camiyä ya lä cuinö täbä bluca tablamolayoma. Öjö ya lä cui wale wano nia oniblaö.

15' Iba Laodiseateli bä lä cuaaö wei ya tä daö —a cuma—. Wale ʘ waibou cadidio ma mlajei ma cui, wale ʘ juaö çai shaliliomije. Jole jole wale ʘ shilo jiliaö bädaoje. Inaja bä cuaaö mlao fa cunoja tä nö doblaobö wei.

16 ¿Öjö tawä? Bä dodijaimi. Jole jole wale ʔ sh̄lo j̄liäö bädao dicooje ja, nii wamou w̄lidiwä lä culenaja ya bä nofi nia tabou. Ya bä nia joleleblaö.

17 Abinaja bä malä cuu wei. “Ya nö madofibö waiquiwä. Fei d̄jä dodijidawä ya yai cua lä cule. Ya j̄li malä mlai”, bä ma cuu wei ma cui bä nö yai beblalou dodijiwä. Bä nofi ojode tablamobä bä li. Bä nö j̄lili bleaaö. Bä jubäbö. Bä shinoco.

18 Öjö cudeenö ya bä yömöläö, camiyä nija bä yai bayeliblamobä. Camiyä nija olo bä lulabeje ya w̄, tä w̄lidiwä coyocoa lä mlai. Camiyä nija jai olo bä yai lä dodijidai bä fa lulualalöjenö, bä yai bayeliblamobä. Camiyä nija bä camishi lä au wei bä çai fa lulualalöjenö bä didiobä, bä shinoco nö dablamos quilijsio mlaobä. Bä mamocu f̄lömamobä, camiyä nija toubä çai fa lulualalöjenö bä mamocu f̄lömamobä, täbä möö liyäjablou çobeje.

19 ‘Ya bä lä nofimaö wei ya bä wasöo —a cuma—. Bä cadidobä ya bä nö çai bleaamaö. Öjö cudeenö, j̄lobe wale ʔ juabeje, öjö lä! j̄Lobe bä bufi mö çai yabajadou çobä!

20 ¿Öjö tawä? Bei yoca lä jolele jamö ya nö dadia lä cule. Wale famabeje ya tä çai cloocaö. Wale ʔ fa j̄lilänö, ai tänö yoca caloblaö ja ya nia faö. Öjö sho yafäcö nia iyalayou.

21 Bä nö w̄lojaö lä ayao wei bä lä cui, bada ya bä nia tablamaö. Camiyä ya lä döçao wei täcö ja bä nia döçao ajedeblo. Camiyä ya nö çai w̄lojaö fa ayaonö, Fayä a lä döçao wei etäcö ajede jamö wale döçamabou lä culenaja showawä.

22 ¿Öjö tawä? —a cuma—. Bä yömöcacö lä walalai bä yömöca dao dodijioyä, Yai Bada tä Bufinö iba bä lä yododablaï bä nowa lä taö wei tä ʔ j̄liabeje —a cuma.

Apocalipsis 4

1 Öjö ya tä daa fa balölalönö, ai ya tä möö çoma. ¿Öjö tawä? Fedu jamö ya yoca caloa dalalema. Amowa fibä jolaöje d̄jä fibä ʔ nacläaö lä culenaja, ya w̄ jaba lä j̄lileno wei a lä cui, abinaja a cuma. —Jabo. Fäyämö a da juoquibiyolu. Obi tä nia lä cublou wei, çafä nija ya tä wawämabä —a cuma.

2 Yedu, Yai Bada tä Bufinö wale lojodobolanö, Bada a lä döçao wei etäcö jamö, ya fedu jamö döçaa dalalema. ¿Öjö tawä?

3 Öjamö a lä döçäono wei bei tä sh̄inö a fe fayoboma. Tä sh̄i auoma, tä sh̄i çai wacjäöma. A döçäobä täcö feduböcö jamö ai tä sh̄i shoqueo mö feduböcöoma. Jai jedu çäcö sh̄i mömou ma cuono wei ma cui tä sh̄i liyäoma.

4 Bada tä döçäobä etäcö ajede jamö, 24 ai ebä döçao mö feduobä etäbä fe fayooma. Öjö täbä jamö bada 24 ebä döçäcäoma. Camishi au bä ja bä didioma. Olo bä çai yojobomaje.

5 ¿Öjö tawä? Bada tä lä döçao wei etäcö jamö, madula a wacö blada bladamos. Täbä ʔ bluca çai mashiquiwä j̄lio. Yalu a w̄ çai faö nö quiliaö showadao. Bada a lä döçao

wei etäcö mashi jamö, cowa 7 wacöbä befi çai itatawä. Öjö wacöbä lä cuinö, Yai Bada etä a lä juaö wejei ebä yai 7 jömamou.

⁶Bada tä lä döcäo wei etäcö mashi showawä jamö, modu u si flacajawä cobejewä lä culenaja tä cuwä tä blaa. Tä mömou walalawä. ¿Öjö tawä? Bada tä döcäobä etäcö jamö, yaitawä 4 täbä fe fayoa. Bei bä balöcö jamö ma cui, bei bä mabucabö jamö ma cui, cama comi bä jamö jödödöwä bä mamobä cublawä.

⁷Jaba tä lä cui, öla a lä culenaja tä mömou cuwä. Ai tä lä cui, baca a lä culenaja tä mömou cuwä mö feduwä. Ai tä lä cui, yanowamö mofecö lä culenaja tä mofecö cuwä. Ai tä mö feduwä lä cui, mojomö bä bada lelaaö lä cuaaö weinaja tä mömou cuwä mö feduwä.

⁸¿Öjö tawä? Öjö 4 täbä lä cui, 6 täbä majecö cublawä. Bei bä majecö mabucabö jamö ma cui, cama comi bä jamö bä mamobä cublawä nö mlawä. Öjö täbä lä cuinö, täbä yanöcöblou balöa mlai ja ei tä a amowa shino tadiije. Yai Bada tä Bada lojode lä ayai, iyami a yaia! Jaba däjä tä cuo fa showaonö tä cua lä showale, iyami a yaia! Tä nia juu lä ço wei tä showawä lä cui, iyami a yaia! Einaja täbä amowamou ja täbä cudii.

⁹¿Öjö tawä? Bada tä döcäobä etäcö jamö a lä döcäle, a nia cuo shi lä wälüi wei a wäfa doblao taöje. A nofi dodijidawä tabouje. Öjö nija täbä bufi lä doblao wei tä afa çai wäyäöje. Inaja cama bä cuaalanö,

¹⁰Bada tä yai lä cui a cotä jamö, bä 24 lä yädäo wei bä möfe bada boblaaö. A nia cuo shi lä wälüi wei a wäfa çai Bada doblao taöje. Öjö däjä, olo bä lä yojobou wejei ebä fa jayualalöjenö, amowa täbä a talajenö, Bada tä döcäobä etäcö cotä jamö ebä shäyäblaqueije. Abinaja bä amowabö a cuu.

¹¹Cafä bäfä nofi lä Badabou wei wa Bada. Bäfä lä bufibou wei cafä wa. Wa wäfa doblao tamou ayaobä, öjö wa waiquiwä. Cafä wa lä cui, wa nofi dodijidawä tabou ayaobeje, öjö wa. Cafä wa nofi çai lojode doablamou ayaobä. Jödödöwä wa täbä malä tablaleno wei. Wa täbä tablaö fa bufinö wa täbä tablalema. Einaja bä amowabö a cuu.

Apocalipsis 5

¹Ai ya tä möö ço ja, oni ya si cofefama dalalema. Bada tä döcäobä etäcö jamö a lä döcälänö, jayu boconö tä si däboma. Balöcö si ma cui, mabucabö si ma cui, si onio jödödöoma. Si caloblamou mlaobä, mai 7 cocobä sudioma.

²Öjö däjä, ajele lojode ya bada dalalema. A wä faö lojodoaö ja abinaja a cuma. —Mai cocobä jädödabä, oni si calomabä, ¿wedi bei a yai? —a cuma.

³Öjö ma cui, fedu jamö ma cui, bita jamö ma cui, mashita cojomö jamö ma cui, si oni nia lä calomaö wei a cuonomi. Tä a oni möbä a cuonomi.

⁴¿Öjö tawä? Si calomabä, tä a oni çai möbä a dablonomi yalo, ya bufi fa wajäblalunö ya öcöa dodijilayoma.

⁵Öjö däjä, bada 24 bä lä yädäono wei ai a lä cuinö, abinaja wale nowa tama. —A öcö dijä. Judawä nodiwä e afa Öla lä jilamou wei a lä cui, a nö Bada wälojaö ayaoma.

David nodiwä bä nija a nia Bada lä bädono wei, öjö lä a showawä, jai fii fi nasöcö nia cabudu faö lä çono wei. Waḷidiwä tä ja a nö waḷojaö ayaoma yalo, mai 7 cocobä lä sudile cocobä calomabä, öjö a yai. Tä a oni çai möbä, öjö a yai —wale nowa tama.

⁶Öjö däjä, Bada tä döcäobä etäcö ajede jamö, Oweja a wafa ocalo lä jilou wei ya dalalema, yaitawä 4 täbä möamo jamö. Bada 24 bä lä yädäono wei bä fe fayooma. Öjö Oweja a wafa ocalo lä jilou wei a lä cui, jai a shälemaje a mömou cuoma. 7 yola bä cuoma. 7 mamö bä çai. Öjö bei mamö bänö, yai 7 täbä jömamoma. Yai Bada etä a juamobä ebä 7 lä cui, bita jödödöwä a jamö bä lä shömöleno wei, öjö bä yai cuoma.

⁷Bada tä döcäobä etäcö jamö a lä döcäle a nija, Oweja a wafa ocalo lä jilou wei a icuquema, jayu boconö si lä däbono wei a nija. Öjö nija a fa icuicunö, si delema.

⁸Si lä däleno wei däjä, Oweja a wafa ocalo lä jilou wei a cotä jamö, yaitawä 4 täbä lä cui täbä möfe boblaquema. Bada 24 bä lä yädäono wei, inaja showawä. Öjö bä bluca lä cuinö, amowa fibä showabomaje, bei fibä nata lä jubamou wei fibä lä cui. Olo bä ja täbä lä cui täbä ja, täbä nö waçueshi liyoli uçucamabeje täbä fe çai lajowä didibomaje. Öjö täbä lä cui, Yai Bada nija cama ebä nö bayeli lä nacao wei bä a jömamobä bei täbä li cuoma.

⁹Amowa dude tä a çai tamaje. Abinaja bä amowabö a cuma. Oni wa si däabä, mai wa cocobä caloblabä, cafä wa yai. Cafä wa shämou fa läonö, bei wa iyäbönö yanowamö wa täbä nowa bluca malä comaqueno wei. Yai Bada tänö bä tabobä, bluca bä yaiablalou lä nodiaö wei bä nijamö, cama wa ebä nowa comaquema. Bluca bä caficö a lä bou wejei bä nijamö çai. Shomi bä bluca lä bälöblai bä nijamö çai. Bluca bä bälöblawä lä yaiblai bä nijamö çai.

¹⁰Cafänö wa bä çai fa cuonö, Yai Bada bäma a wä lä juaö wei a nija bä bluca ojodamou ajedeobä wa bä tablamalema, täbä nofi bäyäbobeje. Bita jamö bä nia çai bada läo. Einaja bä amowabö a cuma.

¹¹Ya tä möö fa çonö, ajele bluca dodijiwä ya bä a jililema, bä nö wabamobö lä mlai. Bada tä döcäobä etäcö fa möamoicunö, yaitawä 4 täbä ma cui, bada 24 täbä lä yädäono wei täbä ma cui, öjö täbä çai möamoa mö fedua fa showadaicunö, ajele bä a jililo fe fayooma.

¹²Bä icali a faö ja, abinaja bä cuma. Oweja a wafa ocalo lä jilamou wei, a lä shämono wei a lä cui, öjö a nofi lojode doablamobä a yai. Täbä nowa lä bluca wei täbä ja a dobäbeje a. Öjö a bufi nofi shino yai jaducuwä doablamobä. A nö afa çai waḷojaö tabeje. A nofi dodijidawä çai tabobeje. A wafa çai doblao tamobä. jBäma a nofi dobobä, öjö a yai! Einaja bä cuma.

¹³Ya bä a jililema. Fedu jamö bä lä culadi bä ma cui, bita jamö bä bluca lä cublai bä ma cui, mashita a cojomö jamö bä lä cublai bä ma cui, modu u jamö bä lä cubodi bä ma cui, öjö ya bä a bluca jödödöwä jilia showadalema. Abinaja bä cuma. Bada tä döcäobä etäcö jamö a lä döcäle a ma cui, Oweja a wafa ocalo lä jilamou wei a ma cui, öjö bäma cäcöbö nofi yai dobobä cäcöbö. Wawädowä cäcöbö nofi dodijidawä

tabobeje cäcöbö. Cäcöbö afa doblao tamobä. Cäcöbö nö afa çai walojaö tabeje. Inaja cäcöbö nofi tabou shi walıbeje cäcöbö. Einaja bä cuma.

¹⁴Yaitawä 4 bä lä cui, “ıInaja lä tä cuobä!”, bä cuma. Bada 24 bä lä yädäono wei bä lä cui, mashita jamö bä möfe fa boalunö cäcöbö afa Bada doblao çai tamaje.

Apocalipsis 6

¹Oweja a wafa ocalo lä jilamou wei a nija ya mamou showao däjä, oni si jamö mai 7 cocobä lä sudiono wei, öjönö jaba coco caloblalema. Öjö däjä, yaitawä 4 bä lä cuono wei, ai a wä fama. Yalu a wä nacli faö lä culenaja a wä jilimamou cuoma. —ıA da jabo! —a cuma.

²Ya tä fa mönö, cabayo au ya dalalema. Öjamö a lä döcäono wei a lä cuinö, shälacawä cäcö showaboma. Öjö nija olo a jöbämoquema, a yojobobä. A nö walojaö waiquilanö a wayu juma, a nö yai walojaö dodijio ayaobä.

³Oweja a wafa ocalo lä jilamou wei a lä cuinö, oni si jamö mai 7 cocobä lä sudiono wei, ai a caloblaö çolayoma. 2 coco caloblaö däjä, yaitawä 4 bä lä cuono wei, ai a wä faö nomöjööma. —ıA da jabo! —a cuma.

⁴Einaja a fa cunö, cabayo ai a faa nomöjölöyoma. A wacä mö judäoma. Öjamö a lä döcäono wei a lä cui nija, bita jamö tä nö ulifi wayuböblamabä etä jöbämoquema, täbä bluca lä bälöblai bä shäyobä. ¿Öjö tawä? Sibala bada e bada jöbämoquema.

⁵Oweja a wafa ocalo lä jilamou wei a lä cuinö, mai 3 coco caloblaö lä çolayono wei däjä, yaitawä 4 bä lä cuono wei, ai a wä faö nomöjööma. Ya wä jililema. —ıA da jabo! —a cuma. Ya tä fa mönö, cabayo öshö a wawäa nomöjölöyoma. Öjamö a lä döcäono wei a lä cuinö, jude wabamodima tä yäböboma.

⁶Öjö däjä, yaitawä 4 täbä möamo ja, yanowamö a wä faö lä culenaja ya wä jililema. Abinaja a cuma, cabayo a ja a lä döcäle nija. —Täbä ojadamou fe ma weyaö wei ma cui, jışhima moli a ja, nii jıbä fe lajowä shino nia däamou. Jıbä nowa bluca lä mlai jıbä ma cui, 3 bä jışhima bädawä ja, jıbä fe lajowä nowa nia shino çamamou. Öjö ma cui, dabö dabö ubä mlaö dicoo mlaobä, ubä lä tamou wei fibä walıama dijä. Uba nashiwä toubä çai cuo fe yadiobä, totobä çai walıama dijä —a cuma.

⁷Oweja a wafa ocalo lä jilamou wei a lä cuinö, mai 4 coco caloblaö lä çolayono wei däjä, yaitawä 4 bä lä cuono wei, ai a wä faö nomöjööma. Ya wä jililema. Abinaja a cuma. —ıA da jabo!

⁸Ya tä möö däjä, cabayo ai a wawälöyoma. ¿Öjö tawä? A mömou nö flajawä quilijioma. A lä döcäono wei a lä cui, Nomaö a wafa cuoma. Öjö a nodi jamö a lä nocale a lä cui, Täbä lä nomaö wei täbä cuobä jamö, a wafa jilamaje. Bluca bä lä bälöblai bä nijamö, ai bä walıaböö cuaabä etä jöbämoquema. Ai bä lä cui, shäyou tänö bä mö nia watäblamaböma. Ai bä mö feduwä lä cui, ofi tänö bä nia nomamaböma. Ai bä showawä lä cui, shawala anö bä nia waicamaböma. Ai bä lä cui, yalo bä lä ishau wei bä nija bä nabä nia shömöaböma.

⁹Oweja a wafa ocalo lä jilamou wei a lä cuinö, mai 5 coco caloblaö lä çolayono wei däjä, Yai Bada nija täbä nia lä dodoblamou wei bä maqueblamobä ya täcö wawadowä dalalema. Öjö täcö cotä jamö, cama ai ebä lä shämono wei ya bä bufi dalalema. Yai Bada a wano wäyää nofi jushuaöje ja bä shälemaje cäbä, a wafa wäyää fe yadiomaje cudeenö.

¹⁰Bä ą ıçali faö ja abinaja bä cuma. —Cafä Bada wa shino yai Bada lä ayai, yami wa yaia. Wa lä bejedimou wei wa. ıFei däjä showadawä! Bitä jamö bä yanowamö lä cublai wa bä dobroimi fa jömanö, yamalecö iyäbö nowa da çolä —bä cuma.

¹¹Öjö däjä, camishi labe shuducaje bä ja, bä dobämolayoma. Abinaja bä nowa tamoma. —Bä yanöcöblaa da balöicu. Aifä bä lä cui, camiyä ya wä juamobä bä nia lä shämou wei bä lä cui, bä oimi showawä, cafä wamacö lä taamamono weinaja bä nia shämou mö lä feduo wei bä lä cui.

¹²Oweja a wafa ocalo lä jilamou wei a lä cuinö, mai 6 coco caloblaö lä çolayono wei däjä ya tä fa mönö, ulifi ya bada blösö blösö mou dalalema. Motoca a mö bada öshö judeblaliyoma. Belibo a bada lä loono wei, iyä iyä bä mömou lä culenaja a bada cublaliyoma.

¹³Öjö däjä, judu mösö jamö culanö, shidicali bä bluca blälälaleyoma. Wadoli a bada yacolemou däjä ico bä luwä blälämaö lä cuaaö weinaja showawä.

¹⁴Judu mösö ma cui, oni si cofedou lä ço weinaja mösö fa cublalunö, mösö mladaliyoma. Bei mabä ma cui, täbä ulifi bluca lä jöcoblai täbä ma cui, öjö täbä bluca fa shomilalunö, öjamö täbä dablou mladaliyoma.

¹⁵Öjö däjä, jödödöwä bä lä bälöblai bä fa quililalunö, bä jötäolaliyoma. Bä bälöo lä dodijii bä bada lä cublai bä ma cui, ai bä bada lä blowäjai bä ma cui, wayu bä lä lulubou wejei bä ma cui, bä nö lä madofibö wei bä ma cui, bä lä lojode wei bä ma cui, bä bluca quililaliyoma. Bä nosie juamobä bä lä tabou wejei bä ma cui, bä tabou lä mlajei bä ma cui, öjö lä täbä bluca lä cui, bei mabä jamö bä fa cuicunö mabä lä yalejeblai jamö bä jötäolaliyoma. Bei maca cabä lä cublai jamö ma cui, bä çai lucäolaliyoma.

¹⁶Öjamö bä fa cuolalunö, maa mabä ma cui nija bä ą ıçali fama. —Wamacö fa wäcölönö, ıwamalecö da badädäbalö! Bada tä döcäobä etäcö jamö a lä döcälönö yamalecö dabraö mlaobä. Oweja a wafa ocalo lä jilamou wei, a nö wəlowä lä jushuole a lä cui nija yamacö nowamöobä.

¹⁷Cäcöbö nö wəlowä lä jushuo wei etä wawäblobä, ei tä jalu jamö etä cublou waiquia lä cule. ıTäbä demi feiblou fe yadiobä tä daanö? —bä cuma.

Apocalipsis 7

¹Öjö ya tä möö waiquio däjä, bita a 4 lä şaçoblai jamö, ąjele 4 ya bä ublajawä fe fayoa dalalema. Wadoli 4 bä lä cui bä jamabomaje, ulifi jamö ma cui, modu ubä lä cublai jamö ma cui, tä wadolimou showadao mlaobä. Fii fibä çai yalä yälämou showadao mlaobä.

²Öjö däjä, motoca a lä faö wei jamö, ajele ai ya ösöö dalalema. Yai Bada tä demi shi lä wälile etä madofi onimamodima showaboma. Ajele 4 bä ublajawä fe lä fayoono wei bä nija a wä icalı fama. Öjö bä nija, ulifi a wälıabeje tä li jöbämoa waiquiquema, modu ubä çai.

³Abinaja bä nowa tama. —Bei. Ulifi a ma cui, modu ubä ma cui, fii fibä ma cui, wadoli a ja öjö bä wälıamaö showadao dijejä. Yai Bada bäma a lä bufibou wei, a wä juamobä bä lä cui, öjö yama ebä nia onimaö balöo, cama onimamodima etä madofinö. Bei täbä wäyäcu jamö yama täbä nia oni taö cuaaö balöo—bä nowa tama.

⁴Öjö däjä, bei bä wäyäcu nia lä onimano wejei, 144.000 ya bä afa bluca jililema. Israeli bä ijilubö ebä nija bä 12 yaiablalou lä nodiano wei, öjö lä bä mashi yai li cuoma.

⁵Judawä 12.000 ebä wäyäcu onimamaje, Lubeni 12.000 ebä çai. Cadö 12.000 ebä çai.

⁶Asele 12.000 ebä çai. Nefitali 12.000 ebä çai. Manasesi 12.000 ebä çai.

⁷Simeoni 12.000 ebä çai. Lewi 12.000 ebä çai. Isacala 12.000 ebä çai.

⁸Sabulono 12.000 ebä çai. José 12.000 ebä çai. Bejamino 12.000 ebä çai.

⁹Öjö ya tä daa fa balölalönö, ai ya tä möö çoma. Yanowamö bluca ya täbä çocablou dalalema, bä nö wabamobö lä mlai. Bluca bä bälöblawä lä yaiblai bä mashi coyocomoma. Bluca bä yaiablalou lä nodiaö wei bä çai. Shomi bä bluca lä bälöblai bä çai. Bluca bä caficö a lä bou wejei bä çai. Bada tä döcäobä etäcö mashi jamö bä bluca ublajaoma, Oweja a wäfa ocalo lä jilamou wei a mashi showawä jamö. Camishi labe shuducaje bä ja bä didioma. Lasha si jenabä lä culenaja si jenabä cuwä, si jenabä showabomaje.

¹⁰Bä a ıcalı faö ja, abinaja bä cuma. —ıBämalecö lä jucäaö wei, ei a, Yai Bada bäma a lä bufibou wei, a Bada lä döcäle! ıOweja a wäfa ocalo lä jilamou wei a çai! —bä cuma.

¹¹Öjö bä nija ajele bä fe bluca fayooma. Bada tä döcäobä etäcö ma cui, bada 24 täbä lä yädäo wei täbä ma cui, yaitawä 4 täbä ma cui, öjö bä bluca möamöo däjä, ajele bä ublajou fe fayooma. Bada tä döcäobä etäcö ajede jamö bä möfe fa boalunö, Yai Bada a wäfa Bada doblao tamaje.

¹²Abinaja bä ajele cuma. —ıInaja lä tä cuobä! Yai Bada bäma a lä bufibou wei, ıbäma a nofi shino yai dobobä! ıÖjö bäma a wäfa shino doblao tabä! ıBäma a bufi nofi shino jaducuwä doablabä! ıÖjö nija bamacö bufi afa doblalou çai wäyämöbä! ıBäma a nofi dodijidawä tabobä! ıBäma a nofi lojode çai doablabä! ıÖjö a wäfa nö shino wälojaö tamobä! ıInaja lä tä cuo shi wälibä! Inaja lä tä cuobä —bä ajele cuma.

¹³Öjö däjä, bada 24 bä lä yädäono wei ai a lä cui, camiyä nija a wä fama. Abinaja a cuma. —ıEi wa bä daö cule, camishi shuducaje bä ja bä lä didile? ıWedi jamö bä li cuoma bei bä li? —a cuma.

¹⁴Abinaja ya e cuma. —Bada tä. Cafänö wa bä li daö —ya e cuma. Inaja ya cuu ja wale yömölama. —Fei bä lä cui, yanowamö täbä nö yai bleaaö nö lä quiliano wei däjä, bä demi lä feiblaliyono wei fei cäbä. Oweja a wafa ocalo lä jilamou wei iyäbö ja esibä fa yalulalöjenö, esibä li aublaliyoma.

¹⁵Öjö cudeenö, Yai Bada tä döcäobä täcö mashi jamö bä li cudia lä cule. Cama Yai Bada etä yafi jamö a wä showadi juadiije. Bada tä döcäobä etäcö jamö a lä döcälänö bä çai fa cuonö, bä nia nowamaö shi wälii.

¹⁶Bä nia ofäö çödaaimi. Bä nia çai amishaimi. Öjö bä nija motoca shi nia çai difequio çödaaimi. Yobli tänö täbä si nia fläaö çödaaimi.

¹⁷Bada tä döcäobä etäcö ajede jamö, Oweja a wafa ocalo lä jilamou weinö bä nia nowamöbou. Oweja bä çai lä cuo wejei bänö bä yalo nowamaö lä cuaaö wejeinaja, inaja showawä bä nia taamaö. Bälímiblamodima ubä fe lä jojoblai jamö bä nia lulubou cuaaö. ¿Öjö tawä? Öjö bä lä cui, Yai Bada tänö bä mabuubö nia jödödöwä yäjöblaö —bada a cuma.

Apocalipsis 8

¹Oweja a wafa ocalo lä jilamou wei a lä cuinö, mai 7 coco caloblaö lä çölayono wei däjä, fedu jamö tä mada waiwä nö dedejedaliyoma.

²Öjö däjä, Yai Bada tänö ajele 7 ebä lä ajedemabole ya bä möma. Amowa 7 fibä lä jolamou wei fibä ja bä dobämolayoma.

³Öjö däjä, Yai Bada nija täbä nia lä dodoblamou wei täbä maqueblamobä täcö ajede jamö, ajele ai a icuquema. Acanafu bä tablamobä tä madofi showaboma, olo bä ja tä lä tablamolayono wei tä lä cui. Täbä wäqueshi nö çlèdeli lä uçucamou wei täbä bluca ja, a dobämolayoma, Yai Bada nija cama ebä nö bayeli lä nacao wei bä ç fa doanö, täbä nö lä çlèdeli wei täbä ja bä ç coyocoblamabä. Öjö däjä, täbä nö çlèdeli lä dodoblamou wei täbä maqueblamobä täcö ja, täbä nö çlèdeli nia ucucamama, olo bä ja täcö lä cui ja.

⁴Einaja a cuaama. Ajele a lä cuinö, öjö tä fa dodocunö, Yai Bada tä lä cule jamö täbä wäqueshi nö çlèdeli ösöa showalayoma. Cama ebä nö bayeli nacaobä bä ç çai ösöa coyocoa showalayofälöma.

⁵Öjö däjä, ajele a lä cuinö, acanafu täbä tablamobä tä madofi fa dälänö, Yai Bada nija täbä lä dodoblamou wei täbä maqueblamobä täcö jamö, acanafu bä wacö dälema. Acanafu täbä tablamobä tä madofi ja, wacöbä fe fa lajoblamalönö, bita jamö wacöbä shäyäblaquema. Öjö däjä, yalu a wä faö nö quiliaö showadaoma. Bluca täbä ç çai mashiquiwä jilioma. Madula a çai wacö blada bladama. Ulifi a nö çai bada blösö blösö mou quiliaö showadaoma.

⁶Bei. Amowa 7 fibä lä jolamou wei fibä lä tabono wejei bä ajele lä cuinö, fibä jolabeje fibä colo jodaö showalayomaje.

⁷Ajele jaba a lä cuinö, cama efi jaba jolaö däjä, bita jamö bleyula bei bä bada blälöldou showadalayoma. Öjamö lä cowa wacöbä çai bläläo coyocaö showadaoma, iyä iyä bä çai. Öjö bä wacänö ulifi ai a mashi öshölayoma. Öjamö lä fii fibä çai öshöa showadalayoma. Moimoima a çai liyä öshöo jödödöblaliyoma.

⁸Ajele 2 a lä cuinö, cama efi jolaö nomöjöö däjä, modu bada u jamö jai bei macö bada cuwä, cowa wacö befi çai quemabalema.

⁹Wacö fa quemabalönö, ai u bada mashi iyäblou showalayoma. Öjö u jamö bä bluca lä juu wei bä mö bluca watäblaliyoma. Canawä a jamö bä befi çai lä caläo wejei bä ma cui, öjö lä bä mö bluca watäblou showadalayoma.

¹⁰Öjö däjä ajele 3 a lä cuinö, cama efi jolaö nomöjöö däjä, judu mösö jamö shidicali a wacö befi çai bada quelayodayoma. A fa quelunö, mau ai ubä mashi jamö a quea culayoma, ai ubä mashi lä jojoblai jamö çai.

¹¹Öjö a shidicali lä cui, Maocoli a wäfa shidicali cua. Öjö anö mau ai ubä mashi lä bayucublai ubä çowamiblaliyoma. Ubä fa çowamiblalunö, öjö ubänö bluca bä nomalaliyoma.

¹²Öjö däjä ajele 4 a lä cuinö, cama efi jolaö nomöjööma, motoca a wälidiblobä, a nö shii dedeblou mlaobä. Belibo a ma cui, shidicali bä ma cui, inaja showawä bä wälidiblamalema. Jalu däjä ma cui, didi däjä ma cui, tä shii luaaö jaödao cuaama.

¹³Öjö däjä ya möö fa nonoicunö, mojomö ya wä jililema. Ösö jamö a yälanö abinaja a cuma. —¡Nö bleaabä cätä! ¡Nö bleaabä cätä! ¡Nö bleaabä cätä! Ajele ai bä 3 lä cuinö, amowa fibä jolaöje däjä, bita jamö bä yanowamö lä bälöblai, bejedi lä bä nö nia bleaaö —mojomö a cuma.

Apocalipsis 9

¹Öjö däjä, ajele 5 a lä cuinö, amowa efi jolaö nomöjöö däjä, fedu jamö a shidicali lä quelayono wei ya möma. Öjö a shidicali nija, täca fe jolocoa lä mlabodi yoca caloblamobä etä jöbämoquema.

²Öjö a shidicali lä cuinö, täca fe jolocoa lä mlabodi yoca fa caloblalönö, cowa wäqueshi bä bada ushujuwä tolucublamoma, cowa bada wacö lä didibou wejei jamö bä wäqueshi bada tolulumou lä cuaaö weinaja showawä. Öjö yoca jamö bä wäqueshi lä falayono wei bänö motoca a jöyablaliyoma. Tä mö bluca luwäblaliyoma.

³Öjö däjä, cowa wäqueshi bä jamö söcö söcöma bä fa falönö, yanowamö täbä lä bälöblai jamö bä fa itolalunö bä cublaquema. Sufi bänö täbä nö bleaamaö lä cuaaö wejeinaja täbä nö bleaamaö mö feduobeje etä jöbämoquema.

⁴Öjö bä söcö söcöma lä cui bä wasömamoma, fii defibä wäliaö mlaobeje. Moimoima bä ma cui, cau cau bä ma cui, fii fibä ma cui, öjö täbä bluca wäliaö mlaobeje bä wasömamoma. Yai Bada etä madofinö, yanowamö bei bä wäyacu onimamou lä mlai bä nö nia shino yai bleaamamaje.

- ⁵Belibo 5 a lublou mlao dǎjä bǎ nō nia ma bleaamano wejei ma cui, bǎ nia shāmaō cadidionimije. Bǎ nō lä bleaano wei, sufi bǎnō bǎ si dicaōje dǎjä bǎ nō bleaaō lä culenaja bǎ nō nia bleaaō cuoma.
- ⁶Öjö tä cublou dǎjä, bǎ nō ninili bleaaō fe fa balojoonō, “Ya nomaō showadaobǎ”, bǎ nofi nia ma tamamou wei cui bǎ nia nomabloimi. Bǎ bufi mlao showadaobǎ tä nia ma bufijaō wejei ma cui bǎ bufi nia mlao showadaoimi.
- ⁷Cabayo bǎ çai wayu jubeje jamō bǎ jøyablaō lä cuaaō wejeinaja, inaja showawǎ bǎ söcō söcōma mömou cuoma. Madofi bǎ liyǎjäwǎ yojobomaje, olo bǎ lä culenaja. Yanowamō täbǎ mofecō lä culenaja bǎ mofecō cuo mö feduoma.
- ⁸Suwǎ bǎ feta uçu lä culenaja bǎ feta uçu çai cuoma. Öla bǎ nacō lä culenaja, inaja showawǎ bǎ nacō cuoma.
- ⁹Bǎ çai sisioma. Wayu bǎnō shibǎ jifuwǎ lä läbou wejeinaja bǎ sisicō cuoma. Bǎ yǎō dǎjä, bǎ majecō ǎ naclǎaō fe balojooma. Bǎ ishobǎ jamō, cabayo bǎ nija bǎ lälāamodima shaimabouje dǎjä, bǎ ǎ naclǎaō lä cuaaō weinaja showawǎ.
- ¹⁰Öjö tawǎ? Sufi bǎ shina lä culenaja bǎ shina cublawǎ, täbǎ si dicabeje. Belibo 5 a lublou showao mlao dǎjä bǎ si nia lä dicaō wejei, bei bǎ shinanō bǎ nō nia li bleaamaōje.
- ¹¹Tǎca fe jolocoa lä mlabodi jamō tä fecula lä läo wei a lä cuinō, söcō söcōma bǎ nosiemaō. Öjö Waicalewǎ a wǎfa lä cule, a nofi badabouje. Ebleo bǎ caficō ǎ ja, Abadono a wǎfa çai cua. Clesiateli caficō ǎ ja, Aboliono a wǎfa çai cua.
- ¹²Bǎ nō nia jaba lä bleaamano wei, öjö tä cuo balöoma. Bǎ nō bleaamaō çobǎ, bolacabō tä nia taō çoma.
- ¹³Öjö dǎjä, ǎjele 6 a lä cuinō, amowa efi jolaō ço dǎjä, ai ya wǎ jililema. Yai Bada nija täbǎ dodoblamobǎ täcō jamō a culanō a wǎ bǎdoma, olo bǎ ja täcō lä cui täcō jamō. Jai yalo yōlacō cuwǎ 4 täbǎ lä cublai jamō a culanō a wǎ fa bǎdalunō,
- ¹⁴abinaja amowa fi lä jolano wei a ǎjele nowa tama. —Bei. Euflade u bada jamō, ǎjele 4 bǎ lä oçale bǎ da jujeblalō —a nowa tama.
- ¹⁵Inaja a cuu ja, öjö ǎjele 4 bǎ lä cui bǎ jujeblamolayoma. Yai Bada tänō bǎ jamabou balöo fa bufinō, yacumō yanowamō täbǎ bluca lä bälöblai bǎ mashi waicabeje etǎ yai cublou fa shalililonō, bǎ jujeblamaō majölayoma.
- ¹⁶Öjö dǎjä, wayu ya täbǎ dalalema. Cabayo bǎ jamō wayu bluca fe balojowǎ bǎ befi çai lälāama. Bǎ wabamou doblonomi. Bǎ lä fejeleo wei ya bǎ ǎ jililema.
- ¹⁷Bǎ befi çai lä lälāano wei, bei balöcō nowamöobǎ boo shicō jifuwǎ läbomaje. Abinaja cabayo bǎ cuwǎ ya bǎ dalalema. Bǎ wacǎ mö judāoma, cowa wacō lä culenaja showawǎ. Maa ai mabǎ wai baushi shi dēlelewǎ lä culenaja bǎ shi çai dēleleoma. Bǎ çai flǎlajaoma, cowa yaitawǎ nacli wacöbǎ lä culenaja showawǎ. Öla bǎ fe lä culenaja bǎ fe cuo mö feduoma. Bei bǎ caficō jamō cowa wacöbǎ fabloma, wǎqueshi bǎ çai bluca, cowa yaitawǎ nacli wacöbǎ çai.

¹⁸Cabayo bä caficö jamö öjö bä 3 wayu lä fablono wei bä lä cuinö, yanowamö täbä bluca lä bälöblai bä mashi waicamaje. Cowa wacöbä ma cuinö, waqushi bä ma cuinö, cowa yaitawä nacli wacöbä ma cuinö bä nö bluca bleaama.

¹⁹Cabayo bä caficö wayunö, bei bä shina çai wayunö bä nö malä blemalaleno wejei. Bei bä shina jamö jai olu bä fe cuwä bä fe bluca cublamoma, bä si wädöbeje.

²⁰Öjö ma cui, öjö 3 bä wayunö bä yanowamö lä feiblaliyono wei bä lä cui, bä nomaö lä mlaono wei bä lä cui, bä bufi mö yabajadonomi. Nö idubö täbä lä bufiblamou wei täbä joyanomije. Bä möfe bolanö täbä afa bada doblao taö showao fe yadiomaje. Olo bä ja ai bä tablamaje, blada bä ja ai, duo shibä ja ai, maa mabä ja ai, fii fibä ja ai. Öjö bä lä tablamolayono wei bä lä cuinö täbä möimi ma cujei, täbä a jiliaimi ma cujei, bä çai cama juimi ma cui, bä bufiblaö fe yadiomaje. Fecula bä çai lä bufiblano wejei tä ma cui ja, bä bufi çai lädonomi dodijiwä.

²¹Täbä bufi mö yabajadou mlai ja, bä shino shäablayou fe yadio showaoma. Fecula bä nija bä çai wafäblyou fe yadio showaoma. Täbä nofi çai jushublalou fe yadio showaoma. Shomi täbä madofibö çai lämaö fe yadio showaomaje.

Apocalipsis 10

¹Öjö däjä, ajele ai ya lojode dalalema. Öläjashi a ja a didilanö, fedu jamö a culanö a itolayoma. Bei feduböcö jamö jedu cäcö shi motoleoma. Motoca a mömou shi dowäjäwä lä culenaja mofecö cuoma. Bei matakö lä cui, jai cowa wacöbä comadiwä cuoma.

²Bei imicönö oni si wai caloboma. Jayu boco jamö mata lä cui, modu u bada jamö mamicö quequema. Ai mata lä cui, ulifi jamö mamicö quea mö feduquema.

³Öjamö a culanö, öla a wä nö lä quiliaö weinaja çali a comöma. A comöö däjä, yalu 7 bä a nocalayoma.

⁴Yalu 7 bä a faö waiquio däjä, ya tä a nia oniama ma cui, fedu jamö ya wä jilema. Abinaja a cuma. —Yalu wa bä a lä jilileno wei bä a da joyalö. Öjö tä a onia dijä —a cuma.

⁵Öjö däjä, ajele ya lä möno wei jayu boco yalejedaliyoma.

⁶Boco fa yalejedalunö abinaja a cuma. —Ya wä nö wäo cadidia lä cule. Tä demi cua shi lä wälile tä malä cule. Judu mösö tablalema, öjamö täbä bluca lä culadi täbä çai. Bitä a çai taa mö fedublalema, öjamö täbä bluca lä cublai täbä çai. Modu u çai bada tablalema, öjamö täbä bluca lä cubodi täbä çai. Fei däjä a nö nia dadiomi.

⁷Ajele jödödö anö amowa 7 fi jolaö däjä, cama a wäno wäyälwä bä nija Yai Bada tänö a wäfa wäyäö lä balöono wei tä nia bejedi cublou showadao. Yai Bada tänö tä lä jöyabile tä nia wawäblou showadao, cama a wä juamobä ebä nija a lä cuno weinaja showawä.

⁸Öjö dǎjä, fedu jamö ya wǎ lä jilileno wei a wǎ faö çoma. Abinaja wale nowa tama. —Modu u jamö, ulifi jamö ajele a ublaa lä lelequele nija wa fa icuicunö, oni si lä calobole si da dälö —wale nowa tama.

⁹Öjö cudeenö, ajele a nija ya fa icuicunö ya si wai oni nacalema. Abinaja wale nowa tama. —Si da dälä. Si waa da showadaalö. Öjö si oninö wa busi nia çowamiblou. Öjö ma cui bei wa caficönö wa si waö dǎjä, buu ubä cledediwä lä culenaja wa caficö nia cledediblou balöo —wale nowa tama.

¹⁰Öjö dǎjä, ajele imicö ja ya si oni fa dädalönö ya si walema. Buu ubä cledediwä lä culenaja ya caficö cublaliyoma ma cui, ya si fa sufalönö ya busi çowamiblaliyoma.

¹¹Abinaja ya nowa tamamoma. —Yai Bada wa tä ʼano wäyää çobä. Shomi bä bluca lä bälöblai bä nia lä taamaö wei wa tä ʼafa wäyää. Bluca bä bälöblawä lä yaiblai bä ma cui, bluca bä caficö ʼä lä bou wejei bä ma cui, bada bluca bä bälöblawä lä dodijii bä ma cui, öjö bä nia bluca lä taamaö wei wa tä ʼafa nia wäyää.

Apocalipsis 11

¹Öjö dǎjä, jai shälacawä a juloco cuwä a ja wale dobälema, täbä labe lä wabaö wejei täbä lä culenaja. Abinaja ya nowa tamamoma. —Bei. Ei wabamodima ya lä jöböale tänö, iba yafi a labe da waba. Camiyä nija täbä nia lä dodoblamou wei bä maqueblamobä täcö çai. Öjamö camiyä nija bä möfe bolanö wale ʼafa Bada doblao lä tayoluu wejei, bä çai bluca da mö.

²Öjö ma cui tä yafi sibo lä jicoloblai wa tä nia wabaimi. Öjö tä da daacö, öjamö judio bä lä mlai bä bälöo läobä ya tä noshi malä öjödabole. Belibo 42 a lublou showaa mlai ja, iba a shabono lä yaile jamö öjö bä nia cuo läo.

³Camiyä wale ʼafa wäyädiböbä ya cöbä nia lämabou. Ya cöbä nö nia wälojomabou. Täbä nö wajäwä öjööamobä, camishi ʼaloqui cäcö öshö lä yabou wejei cäcö ja cäcöbö didilanö, belibo 42 a lublou showaa mlai ja wale wano nia taböö —a cuma.

⁴Bitä jamö Bada a yai lä nosiemou wei a lä cui, öjö a wǎ juamobä cäcöbö li. Cowa wacöbä shi cublamobä täcöbä lä cuono wei cäcöbönö, öjö cäcöbö yai jömamoma. Oliba bolacabö ficöbä çai lä cuono wei ficönö, inaja showawä.

⁵Cäcöbö famimabeje cäcöbö nabä icuoje dǎjä, bei cäcöbö caficö jamö cowa wacöbä fablou, cäcöbö nofi lä wälibou wejei bä mö watäblamobä. Cäcöbö famimaö lä bufio wejei bä lä cui, inaja bä taamamobä bä li, bä shämobä.

⁶Yai Bada a wano wäyäböbä cäcöbö läo showao dǎjä, cäcöbö nö quiliaö dodijioä cäcöbö nö wälojomabou. Judu mösö wejemaboböö dao, maa a quei mlaobä. Mau ubä çai iyäamaböö dao. Yanowamö täbä lä bälöblai, jödödöwä tä wayu shomitawänö bä nö çai bleaamaböö dao. Inaja täbä taamaböö bufi doblao ja, bä taamaböö showadaobä cäcöbö.

⁷Yai Bada etä ʔ wäyäböö jödödöblou däjä, yalo waiteli a nia ishous. Täca fe jolocoa lä mlabodi jamö a cuoma a fa fabonö, cäcöbö nabä fa quealunö, öjö a nö nia shino yai wəlojaö ayao. Cäcöbö nia shäö.

⁸“Ei bä shino yai lojode”, bä nofi lä tabolajei bä shabonobö jamö, öjamö cäcöbö nia nomawä blaaö. Fii balitama defi jamö cama Bada e lä shälenu wejei jamö showawä. Sodoma öjö a wəfa shabono yädämabou ʔaloaöje, Ejido a wəfa çai.

⁹¿Öjö tawä? Öjamö cäcöbö nomawä blabou showaoje däjä,

³ tä mö fa dödölönö, ai tä mö jalua fa çolunö, motoca a ʔololoblou ço ma cui cäcöbö nia nomawä mödii buoje. Bä mamö lä showale bä nija, bluca bä shomi lä bälöblai bä nia mashi coyocomou. Bluca bä yaiablalou lä nodiaö wei bä çai. Bluca bä caficö ʔ lä bou wejei bä çai. Bluca bä bälöblawä lä yaiblai bä çai. Cäcöbö nomawä didiaö mlaobeje bä ʔ nia lämou.

¹⁰Cäcöbö shälei ja, bita jamö täbä lä bälöblai bä bufi nia bluca doblalou. Bä shi nia jaliblalou. Bä nia dobäyou. Yai Bada a wəno wäyälwä cäcöbö lä cuinö, bä nö bleaamaböma cudeenö bä bufi nia yai doblalou.

¹¹¿Öjö tawä? Öjö ma cui bolacabö tä mö fa dödölönö, ai tä mö jalu çowä ja motoca a ʔololoblou ço däjä, Yai Bada tä föshöacönö cäcöbö demidamaö çolayoma. Cäcöbö ubladou çoma. Öjö däjä cäcöbö lä möno wejei, bä yai quilia fe balojolaliyoma.

¹²Öjö däjä fedu jamö a wə icali ʔilibölema. —Cäcöbö da jabo. Äyämö cäcöbö da ösöima —a cuma. Öjö däjä cäcöbö nofi lä wəlibono wejei bä mamö mötale ja, cäcöbö ösölayoma, öläjashi a bada jamö.

¹³Cäcöbö ösölayono wei ja, ulifi a bada blösö blösomou nö quiliaö nodiblou showadalayoma. A shabono bada wəlidiblou fa jälönö, ai bä yafi bluca blälälaliyoma. Yanowamö 7.000 bä shäblamolayoma. Bä lä feiblaliyono wei bä quilia fa dodijilalunö, Yai Bada tä fedu jamö lä culadi a wəfa doblao wäyämaje.

¹⁴¿Öjö tawä? Yai Bada tänö täbä nö nia lä beblalamano wei, öjö 2 tä li cuoma. Täbä nö bleaamaö çobä, moli tä nia taö çoma.

¹⁵Öjö däjä ajele 7 a lä cuinö, amowa fi jolaö fa çonö, fedu jamö bluca bä ʔ icali ʔilioma. Abinaja bä cuma. —Yai Bada bäma a nofi lä Badabole a lä cui, yanowamö täbä nijamö a dodijidawä yai bälöobä etä cublaliyo lä cufe. A shömabä a lä yaileno wei sho cäcöbö yai nosiemou shi wəlibä —bä cuma.

¹⁶Öjö däjä Yai Bada tä ajede jamö, 24 bä bada döcäo lä yädäono wei bä lä cui, Yai Bada tä cotä jamö bä möfe fa boalunö a wəfa Bada doblao tamaje. Bada bä döcäobä täbä ja bä döcäo lä yädäono wei, öjö bä cuoma.

¹⁷Abinaja bä cuma. —Bada wa lä bufiblamou wei, wa shino lojode lä ayai wa lä cui nija yamacö bufi ʔfa doblalou wäyämöbä yamacö ʔ. Jaba däjä wa cuo fa showaonö, wa cua lä showale. Cafä wa nö yai lä wəlojaö wei wa lojode fa damolalunö, fei däjä cafä wa yai Bada läobä wa cuquema. Öjö cudeenö, yamacö bufi doblalou.

¹⁸Bä bälöblawä lä yaiblai bä wəyoamou ma bäle, cafä wa nö wəlowä lä jushuo wei tä yai wawäblaliyoma. Täbä bluca lä nomablono wei, cafänö wa bä jömabä tä fei dājä cublaliyoma. Afä wa bä çai dobäbä. Wa nosie juamobä wa wəno lä wäyāno wejei bä lä cui, wa bä nia dobäö. Wa nö quili lä tano wejei bä çai. Bä əfa lojode lä wäyāno wejei bä ma cui, bä əfa lojode wäyāno lä mlajei bä ma cui, inaja showawä afä wa bä nia bluca dobäö cuaaö. Bita jamö täbä mö bluca lä watāano wejei bä lä cui, fei dājä cafänö wa bä mö nia watäblaö —bä cuma.

¹⁹Öjö dājä, fedu jamö Yai Bada etä yafi yoca fa caloblalönö, cama etä yafi ʷeshi jamö Yai Bada a wəno oni lä didile defi ca damolaliyoma. Madula a çai wacö blada bladamoma. Täbä ə bluca çai mashiquiwä j̄lioma. Yəlu a wə çai faö nö quiliama. Ulifi a çai bada blösö blösömoma. Bleyula bä çai nö bada blälölou nö quiliama.

Apocalipsis 12

¹Öjö dājä, tä nia lä cublou wei tä jömabä, judu möso jamö ai tä nö bada quilijiwä bädaladayoma. Suwä a wawälayoma. Motoca a ja a didioma. Belibo a jamö mamicö döcäoma. Shidicali 12 bä yojoboma.

²Suwä shöbönabö a cuoma. Bä ijilubö e tablaö bufio yalo, ıçali a şilalamoma.

³Öjö dājä, ai tä nö quilijiwä damoa nomöjöa çolaliyoma. ¿Öjö tawä? Yaitawä täcö bada wacä wawälayoma. 7 febä cuoma, 10 bei yəlabä çai. Bei febä jamö, bada täbänö bä lä yojobou wejei täbä wai 7 yojoblamoma.

⁴Bei cäcö shinanö, judu mösö jamö bä shidicali lä culadi bä mashi fa yashishiblalönö, bita jamö bä blälämalalema, bei cäcö shinanö. Öjö dājä, suwä a ninimobä jamö cäcö icuquema, bä ijilubö e tablaö dājä a sufaö noca showadaobä.

⁵Öjö ma cui, bä ijilubö wəlo e fa tablalönö, Yai Bada tänö a jucälema. A lä döcäo wei täcö jamö a ajedelema. Öjö a ijilu lä cui, bluca bä bälöblawä lä yaiblai bä nosiemabä a cuoma. A wə nia lojodoama. Duo shibä judenö, jaboca bä ləçashiblamaö si lä ijejeinaja bä nia taamama.

⁶Öjö dājä, ulifi bloque jamö a suwä doculayoma, a nofi yashuobä, Yai Bada tänö tä ulifi nofi tabou lä waiquiono wei jamö. Belibo 42 a lublou showao mlao dājä, öjamö a nia bayeliblamoma.

⁷Öjö dājä fedu jamö bä ishodayoma. Miqueo a wəfa əjele bada lä culenö, cama ebä əjele çai fa cuonö, yaitawä täcö nabä quequemaje. Yaitawä cama täcönö bä çai lä cuono wei bä yai sho, bä çai ishousö mö feduoma.

⁸Bä ishousö mö feduoma ma cui bä nö fa blemalalöjenö, fedu jamö bä cuobä etä cuo majöonomi.

⁹Öjö dājä Yaitawä täcö bada shäyäbalemaje, täcö cuo lä balöono wei täcö lä cui. Fecula bada täcö əfa jilou. Sadanasi täcö əfa çai jilou. Jödödöwä bä lä bälöblai bä lä mölamaö wei täcö. Cama täcö ma cui, cama ebä ma cui, bita jamö öjö bä bluca shäyäbalemaje.

10 Öjö dájä fedu jamö ai ya wə bada jililema. A wə icali faö ja, abinaja a cuma. — Yaçumö Yai Bada tänö cama ebä nia yai lä jucäaö wei etä cublaliyoma. Cama etä lojodenö a nia bälöo dodijio. A shömabä a lä yaileno wei a nia Bada lämabou. Camiyä ai bamacö afa showadi lä tadino wei a Sadanasi lä cui, a malä shäyäbaleno wei. Yai Bada bäma a lä bufibou wei a lä cui nija, jalu dájä ma cui, didi dájä ma cui, showadi bä afa dabloimi wäyädima.

11 Öjö tawä? Oweja a wəfa ocalo lä jilamou wei iyäbönö, fecula bada a nö bleaamamaje, bejedi tä a lä wäyänö wejei tä a çainö. Bä shämobä tä ma cui ja bä quilino malä mlai.

12 Fedu jamö wamacö bluca lä culadi, bä bufi da doblalo, öjö lä —a cuma—. Öjö ma cui, bita jamö wamacö lä cublai, modu ubä jamö wamacö bluca lä cublai, wamacö nö bleaabä cätä. Cafä wamacö nija fecula bada a jushuo çai itolayou lä cufe. Täbä yabäcabä etä nö nia dedejoimi waiquiwä cudeenö, a nö li wəlowä jushuo —a cuma.

13 Bita jamö yaitawä täcö shäyämou fa damolalunö, bä ijilubö wəlo a lä tablaleno wei a nabä suwä cadidou showadaoma.

14 Öjö ma cui, ulifi bloque jamö a suwä yäfalöbä, mojomö majecö bada ja, a dobämolayoma, yaitawä täcö ja a docubä. A nia lä bayeliblamono wei jamö, belibo 42 a lublou showao mlao dájä, a nofi nia yashuo balöoma.

15 Suwä a docufälöbä jamö, öjö yaitawä täcö lä cuinö, mau bada u lä culenaja u joblalema, a nia fa bacayuafälönö.

16 Öjö ma cui mashita anö a suwä bayelibläö lälayoma. Mashita a caficö fa leleicunö, yaitawä täcönö mau u lä joblaleno wei u sufaa mö balema.

17 Öjö dájä, suwä nija täcö nö wəlowä fa jushudalunö, bä ijilubö ai ebä nija a ishous mö juma, Yai Bada tänö tä tamaö lä buffi wei tä a nofi lä cadidibou wejei bä lä cui nija. Jesucristo a wəfa lä wäyäo wejei bä nija çai.

18 Modu u casö jamö täcö ublaaliyoma.

Apocalipsis 13

1 Modu u jamö yalo ya waiteli faö dalalema. Bei yəlabä 10 cuoma, bei febä 7. Bada täbänö täbä lä yojobou wejei täbä lä cui, bei yəlabä jamö 10 täbä wai cublamoma. Bei bä fe jamö, oni oni ebä cublamoma, Yai Bada tä nö lä waibläo wejei täbä a oni.

2 Yalo ya waiteli lä dalaleno wei a lä cui, quıdanali bä lä culenaja a cuoma. Bei mamicö lä cui, däbä bä mamicö lä culenaja mamicö cuoma. Öla bä caficö lä culenaja caficö cuo mö feduoma. Öjö dájä yaitawä täcö lä cuinö a yädämalema. A lojode cublou mö feduobä etä jöbäquema. Cama etäcö jamö täcö döcälänö, täcö nosiemou lojode lä culenaja a cublou mö feduobä, a dobälema.

3 Öjö yalo waiteli ai fe ja, dusi bada ya etä bada dalalema. Jai a nö nomaa cadidia showadalayobö etä mömou cuoma ma cui, a jaloa çoa fe fa yadilönö, bita jamö bä bluca lä bälöblai, öjö nija bä bufi fa möaanö, cama nija bä bufi cadidioma.

⁴Yalo waiteli a nö wəlojomaboma yalo, yaitawä täcö nija bä möfe bolanö, täcö ʔafa bada doblao tamaje. Yalo waiteli a ma cui, öjö nija bä möfe bolanö, a wəfa bada doblao ʔai taö mö feduoje ja, abinaja bä cuma. —Cafä yalo waiteli wa lä culenaja, ai a cua bädaami. Cafä nija bä nö nia lä wəlojaö wei bä cuami —bä cuma.

⁵Öjö däjä yalo waiteli a wə fabä etä jöbämoquema. A wə faö ja, cama a nofi doo fa ayaonö Yai Bada tä nö waiblama. ¿Öjö tawä? Belibo 42 a lublou showaa mlai ja, a nosiemobä etä jöbämoquema.

⁶Yalo waiteli a wə faö ja, Yai Bada tä wafäma. A nö ʔai waiblama, fedu jamö cama ebä lä culadi bä ʔai.

⁷Yai Bada ebä nabä queobä a ʔai dobämolayoma, bä nö bleaamabä etä ʔai. Bluca bä yaiablalou lä nodiaö wei bä nija a bada läobä etä ʔai jöbämoquema, shomi bä bluca lä bälöblai bä nija ʔai. Bluca bä caficö ʔ lä bou wejei bä nija ʔai. Bluca bä bälöblawä lä yaiblai bä nija ʔai.

⁸¿Öjö tawä? Bitä jamö bä yanowamö bluca lä cublai bä lä cui, öjö nija bä möfe bolanö a wəfa nia bada doblao taöje. Bä nia bəlimi lä cudio wei, Yai Bada tänö bä ʔafa lä onibole si ja bä ʔafa lä cule, öjö bä lä cui bä nö bayeli nia shino nacaomi ayao. Ulifi a tablamou showao mlao däjä, öjö bä ʔafa bluca tabou showadaoma. Öjö si lä cui, Oweja a wəfa ocalo lä jilamou wei, öjö esi li oni, a lä shämono wei a lä cui.

⁹Bä yömöcacö lä walalai bä yömöca dao dodijibä.

¹⁰A ʔocama öböbobeje a waiquiwä ja, a nia ʔocama öböbouje. Sibala namo mö feduduwä anö a shämobä a waiquiwä ja, sibalano a nia shämou. ¿Öjö tawä? Yai Bada ebä bejedimolanö ebä nö wəlojaö fe yadiobä bä li.

¹¹Öjö däjä ya tä fa mönö, mashita jamö yalo ai ya waiteli faö dalalema. Öjö a lä cui bolacabö yəlacö cuoma, oweja ijilubö yəlacö wai lä culenaja showawä. Yaitawä tä nö quiliabä, tä ʔ faö nö lä cuobö weinaja a wə faö cuoma.

¹²¿Öjö tawä? Yalo waiteli a jaba lä wawälayono wei jamö a culanö, a wə bayelibläö. Jaba a lä cui a wə jilimamou blaucou lä culenaja, öjö a wə ʔai jiliaö blaucaö mö feduaje. Bitä jamö bä yanowamö bluca lä bälöblai, öjönö bä nosiemaö. Bä möfe bolanö, yalo a waiteli jaba lä cui a wəfa bada doblao tabeje bä nosiemaö, a bada jaloa fe lä yadilayono wei a lä cui.

¹³Öjönö tä nö lä quilijii tä wawämaö daö fe balojowä. Fedu jamö wacö quemabä tä ma cui, yanowamö täbä mamö bluca showao däjä tä taö.

¹⁴A lojodoablalobä a dobämolayoma cudeenö, yalo waiteli a jaba lä cuono wei jamö a culanö, tä nö lä quilijii tä bluca wawämaö. Öjö tänö, bitä jamö bä yanowamö lä bälöblai bä mölamaö. Yalo a waiteli jaba lä wawälayono wei a nö idubö tablabeje bä nosiemaö, sibala a namo mö feduduwänö a fa shämolunö, a demia ʔa fe lä yadilayono wei a lä cui.

¹⁵Öjö däjä yalo a waiteli faö lä ʔonono wei a lä cui, cama föshöacönö a nö idubö demidamabä etä jöbämoquema, yalo waiteli a jaba lä cuono wei a nö idubö lä cui. A

wa nõ idubö famabä etä çai jöbämoa showadaquema. Öjö a wa nõ idubö ja, yalo waiteli a jaba lä cuono wei a wafa bada doblao taö lä mlajei bä lä cui, bä shämaö bufibä a wa nõ idubö famama, öjö a nõ idubö ja bä möfe boo lä mlai bä lä cui.

¹⁶Yalo a waiteli wawäo lä çono wei a lä cui, abinaja a çai cuaaö. Yanowamö täbä bluca oniblamaö bufii. Bä lä lojode wei bä ma cui, bä lojode lä mlai bä ma cui, bä oniblamaö. Bä lä madofibö wei bä ma cui, bä lä jöli wei bä ma cui, bä nosie juamobä bä lä tabou wejei bä ma cui, bä tabou lä mlajei bä ma cui, inaja showawä. Jayu boco jamö bä imicö oniblamaö dao. Bei bä wäyacu çai oniblamaö dao.

¹⁷Bä oniblamou lä mlai bä lä cui, blada bä ja täbä nia çai madofi nomöjöamaimi. Madofi bä ma cui ja, blada bä nia çai däamaimi. ¿Öjö tawä? Bä nia lä oniblamou wei, yalo a waiteli jaba lä wawälayono wei bei a wafa oni tamou dao. Bei a wafa oni nowa lä wabamou wei tä çai número tamou dao.

¹⁸¿Öjö tawä? Wa bufi jaducuo mlao däjä wale a nia jiliaö doblaimi. A bufi lä dao wei a lä cui a bufi dayäobä, öjö lä, a wafa oni nowa lä wabamou wei tä número ja, a bufi jaducubä. Öjö tä oni lä cuinö, yanowamö tä jömaö malä cui. 666 etä número cua.

Apocalipsis 14

¹Öjö däjä Siono cäcö jamö ya tä fa mönö, Oweja a wafa ocalo lä jilamou wei ya ublaa dalalema. Cama 144.000 ebä çai cuoma. Öjö ebä lä cuinö, bei bä wäyacu jamö cama a wafa oni tabomaje, bä Föö e afa çai oni showawä.

²Fedu jamö ai ya wa çai bada jililema. Öjö a wa lä cui, bola bä a bada jilimou nacli lä culenaja a wa jilimamou cuoma. Yalu a wa çai bada nacli lä culenaja showawä. Ya wa lä jilileno wei, amowa bei fibä nata lä jubamou wei bä a lä culenaja a wa cuoma.

³¿Öjö tawä? Bada tä döcäobä etäcö mashi jamö bä culanö, amowa dude tä a taöje, yaitawä 4 täbä fe lä fayoono wei jamö. Bada 24 ebä çai döcäo yädäo lä ajedeono wei jamö. ¿Öjö tawä? Bitä jamö bä lä cublai bä nija, Yai Bada 144.000 ebä nowa lä çomaqueno wei bä lä cuinö, öjö bänö tä a li amowa shilo taö daö ayaoje.

⁴Öjö bä lä cui, suwä bä nija bä shamiano lä mlai öjö bei bä. Bä jubaö dao malä mlajei. Oweja a wafa ocalo lä jilamou wei a lä cui, a juu ma bädao wei jamö ma cui ebä yauaö. Bluca bä lä bälöblai bä nijamö bä jaba nowa lä çowamamono wei, öjö bä li. Yai Bada tänö bä nofi ibabou. Oweja a wafa ocalo lä jilamou wei a ma cuinö bä nofi çai ibabou. Nii bä jaba lä lalou wei, Yai Bada tänö bä nofi lä ibabou weinaja showawä.

⁵Bä caficö a jolemou lä mlai, öjö bei bä. Bä afa tamobä etä cua malä mlai.

⁶Öjö däjä ösö jamö ajele ai ya yäo dalalema. Bitä jamö täbä jödödöwä lä bälöblai bä yömölabä, tä a lä dodijidai tä a çai juma, täbä lä balimiblamaö wei tä a showawä lä cui. ¿Öjö tawä? Bluca täbä yaiablalou lä nodiaö wei bä ma cui, bluca täbä caficö a lä bou wejei bä ma cui, bluca täbä shomi lä bälöblai bä ma cui, öjö bluca täbä bälöblawä lä yaiblai bä nia jödödöwä yömölaö cuaama.

7A wə ɨcali faö ja, abinaja ajele a cuma. —Yai Bada tä nö quili da taje. A wəfa Bada lojode çai da taje. Täbä bluca lä bälöblai täbä jömabä, etä malä cublalufe. Wamacö möfe fa boalunö a wəfa Bada doblao da taje. Judu mösö ma cui, bita a ma cui, modu ubä ma cui, ubä fe lä jojoblai ubä ma cui, öjö täbä bluca tablalema —a cuma.

8Öjö a nodi jamö ai a ajele wawäblou jälayoma. Öjö a ajele wawäblou lä jälayono wei a lä cui, abinaja a cuma. —;Bä waicoma! ;Bä waicoma! Babiloniateli bä afa lojode lä wäyänö wejei bä waicoma. Cama bä nofi lä jushublalou wei tänö, bluca bä bälöblawä lä yaibläö bä lä cui bä yaclämalemaje, uba nashiwä toubänö täbä shi wəlimaö lä cuaaö wejeinaja showawä —a cuma.

9-10Öjö a nodi jamö, ai a ajele wawäblou çölayoma. Öjö ajele 3 a lä cui, a wə ɨcali faö ja, abinaja a cuma. —Yalo a waiteli jaba ma cui nija, öjö a nö idubö ma cui nija, öjö cäcöbö nija bä möfe bolanö, cäcöbö afa bada doblao taö dicooje ja, Yai Bada tänö öjö bä nö nia bleaamaö. Cama etä oninö bä wäyäcu çai oniblamou dicoo ja, bä imicö çai oniblamou dicoo ja, inaja showawä bä nö nia yai bleaamaö. Uba nashiwä toubä fe lajobläö lä cuaaö wejeinaja, Yai Bada tä nö wəlowä lä jushuo wei tä ma cui, inaja showawä tä fe lajoblamaö lä cuimadi. A bufi nö asimobimi waiquiwä cudeenö, cama nashiwä e toubä mö jude ma cui, bä fe nia coamaö fe yadio. Cowa wacöbä ma cui ja, cowa yaitawä nacli wacöbä ma cui ja, bä nö nia yai bleaamaö. Ajele bä lä yaile jamö bä nia inaja taamaö, Oweja a wəfa ocalo lä jilamou wei a lä cule jamö showawä.

11Bä nö bleaabä jamö, öjö bä wəqueshi nia tolucaudio shi wəlii. Bä yanöcöblou balöa mlai ja, showadi bä nö nia shino bleadii. Yalo a waiteli jaba ma cui nija, a nö idubö ma cui nija, öjö cäcöbö nija bä nö bayeli nacaobä bä möfe lä boo wei, inaja bä nia taamaö, öjö etä afa oninö bä çai lä oniblamou wei —a cuma.

12¿Öjö tawä? Yai Bada ebä lä cui, bä nö wəlojaö fe yadiobä, öjö lä. Öjö bä lä cuinö, Yai Bada tänö tä tamaö lä bufi wei tä a nofi cadidibouje. Jesús a nofi mölabou fe yadioje.

13Öjö däjä, fedu jamö ai ya wə çai bada jililema. Abinaja wale nowa tama. —Ei ya wa lä cui, tä a da onicö. Bada tä Jesucristo nija bä yädäo yalo bä shäöje ja, fei däjä bä bufi nia yai doblalou —wale nowa tama. Yai Bada tä a Bufi faö ja, abinaja a cuma. —Bä bufi doblalobä lä. Bejedi lä. Bä nö nia bleaaö çödaaimi. Bä lä dodijaö wei bä nö nia öjöböamou malä showaodayou wei —a cuma.

14Öjö däjä ya tä möö çöma. ¿Öjö tawä? Öläjashi au ya fa dalalönö, jai yanowamö a wəlo cuwä, öjamö ya döcäa dalalema. Olo a liyäjäwä yojoboma. Bei imicönö sibala iyodowä a namo showaboma.

15Öjö däjä Yai Bada etä yafi jamö ajele ai ya faö dalalema. Öläjashi a jamö a lä döcäono wei nija, a wə ɨcali falayoma. Abinaja a nowa tama. —Mija a çai sibala quea da showadaicu. Nii bä tamou lä culenaja wa täbä tabä tä cublou waiquia lä cule. Bita jamö täbä lä cublai, wa bä fei däjä tabä cäbä —a nowa tama.

¹⁶Inaja a nowa tama yalo, öljashi jamö a lä döcäono wei a lä cuinö, bita jamö a çai sibala quea showadaquema. Bita jamö täbä lä bälöblai bä nia lä tano wei bä taö showadaoma, nii bä lä tamou weinaja showawä.

¹⁷Öjö däjä fedu jamö, Yai Bada etä yafi jamö, ai ya ajele faö daa çolalema. Nii bä taöje ja bä nofi sibala lä yaibou wejei a bada namo tabou mö feduoma.

¹⁸Öjö däjä ai a ajele wawälayoma. Yai Bada nija täbä lä dodoblamou wei bä maqueblamobä täcö ajede jamö culanö a falayoma. Öjamö cowa wacö lä nowamano wei a ajele cuoma. Sibala iyodowä a namo lä tabono wei a nija a wä çali fama. Abinaja e cuma. —Bita jamö, mija a çai sibala quea da showadaicu, uba totobä lä cule jamö. Uba bä wacä lä yaloloi, bä bäyäö da showadao. Bä bäyämamobä bä wacä malä waiquii —e cuma.

¹⁹Inaja a nowa tama cudeenö, bita jamö a çai sibala quea showadaquema. Sibala e fa yalejedalönö bä manödaö cuaaö showaodama. Bä nia lä calucaö wejei jamö bä löblaama. ¿Öjö tawä? Yai Bada tä nö wəlowä lä jushuo wei a waitelimou bufiobä jamö bä löblaama.

²⁰Shabono a sibo jamö bä uba fa löcönö bä calucamoma. Bä fa calucamonö, iyä iyä bä bada fablou nö quiliama. Bä fa caläfälönö, yanowamö a fe yaläjäwä nö lä wädöobö weinaja, bä iyä iyä fe wädöblaliyoma. Mau u caläö blajaö lä culenaja, iyä iyä bä blajaa culayoma.

Apocalipsis 15

¹Öjö däjä tä nia lä cublou wei, judu mösö jamö tä nö lä quilijii ya tä daa çolalema. Tä nö yai lojode quiliaö dodijioma. Ajele 7 ya bä dalalema, yanowamö täbä nö nia bleaamaö lä çono wejei. Wayu wayu 7 bä showabomaje. Öjö däjä, “Inaja lä waiquiwä”, Yai Bada a nia cudoma. Öjö 7 bä wayunö täbä nö bleaamaö fa jödödöblälöjenö, a nö wəlowä lä jushuo wei etä nia mladou showadaoma.

²Öjö däjä, jai modu u cuwä ya tä si bada flacajawä blaa dalalema. Tä mömou walalaoma. Jai cowa wacöbä coyocowä tä mömou çai cuoma. Öjö modu u lä walalaono wei u casö jamö, yanowamö ya bä ublajaa dalalema. Yai Bada amowä e fibä showabomaje, bei fibä nata lä jubamou wei fibä lä cui. Yalo a waiteli jaba lä cui a nö çai idubö lä cule, öjö nija bä nö wəlojaö lä ayaono wei bä li cuoma, bei a wəfa número onibono lä mlajei.

³Yai Bada a nosie juamobä a Moisesi lä cuinö, öjönö tä a amowa taö lä balöono wei tä a taö çomaje, Oweja a wəfa ocalo lä jilamou wei tä a çai lä tano wei tä a lä cui. Abinaja bä amowabö a cuma. Cafä Yai Bada wa Bada lä cuinö, wa nö yai lä wəlojaö wei wa lä cuinö, wa tä lä taö wei tä nö bluca lojode quilijiwä. Bä bälöjou lä yaiblai bä nija wa Bada läo shi lä wəlii wei wa lä cui, showadi wa dodijaö. Showadi wa çai bejedimou.

⁴Bada tä. Bluca täbä nija wa wəfa nö quili tamobä wa. Wa wəfa yai lojode tamobä wa. Cafä yami wa yaia malä ayale. Wa lä bejedimou wei tä damolaliyoma yalo, cafä nija

bä möfe bolanö, bluca bä bälöblawä lä yaiblai bänö wa wafa nia Bada doblao tayoluuje. Einaja bä amowabö a cuma.

⁵Öjö ya tä daa fa balölalönö, ai ya tä möö çoma. Fedu jamö Yai Bada ya etä yano dalalema. Yano yai nowamaö lä dodijio wejei ya e yano çai caloa dalalema.

⁶Yai Bada etä yano yai nowamaö lä dodijio wejei jamö bä culanö, ajele 7 bä lä cuinö, wayu wayu 7 bä çai falayomaje. Camishi shuducaje cäcö ja bä didioma, cäcö au yai lä dodijidai cäcö ja. Ai cäcö jalebomaje. Olo bä mömou flälajawä lä culenaja cäcö cuoma.

⁷Öjö däjä Yai Bada etäbä yaitawä 4 lä cuono wei ai a lä cuinö, öjö ajele 7 bä nija, 7 toubä nashiwä befi çai fe lajowä jöbaaquema. Toubä lä didiono wei, olo bä ja täbä cuoma. Öjö toubä nashiwä lä cuinö, Yai Bada tä nö walowä lä jushuo wei tä jömamoma, tä cudia shi lä wälile.

⁸Öjö tawä? Yai Bada etä yano yai nowamaö lä dodijio wejei jamö, wäqueshi a bada cublaliyoma. Cama a lojodenö a shi çai fa cualunö, wäqueshi a bada sublenö a yano comablaliyoma. Öjö cudeenö ajele 7 bä lä cuinö, 7 bä nö nia lä bleamano wejei tä jödödblou showao mlao däjä, öjö yano jamö ai täbä lucäo doblonomi.

Apocalipsis 16

¹Öjö däjä, yano yai nowamaö lä dodijio wejei yano jamö, ai ya wä bada jililema. İcali a wä faö ja, abinaja ajele 7 bä lä cui bä nowa tama. —Bei. Bä da alufälö. Yai Bada tä nö walowä lä jushuo wei tä jömamobä toubä 7 lä cui, bita jamö toubä da löaboduje —bä nowa tama.

²Inaja bä nowa tama cudeenö, ajele jaba a lä cuinö, ulifi jamö e toubä çai fa alunö e toubä löblalema. E toubä fa löblalönö, yalo waiteli etä oninö täbä lä oniblamono wei bä lä cui, bä nö bleaaö fe balojooma, öjö a nö idubö nija bä möfe bolanö a wafa bada doblao lä tano wejei bä lä cui. Bä nö walacasibö nö jitali falaliyoma.

³Ajele 2 a lä cuinö, modu u ja cama e toubä li löa mö fa fedubalönö, ubä bluca iyä blaucuolaliyoma. Nomawä bä iyäbö lä culenaja ubä fa cublalunö, modu u jamö bä bluca lä juno wei bä bluca nomalaliyoma.

⁴Ajele 3 a lä cuinö, mau ubä jamö cama e toubä löa mö fedubalema, mau ubä fe lä jobjolai jamö çai. Öjö ubä ma cui ubä bluca çai iyäolaliyoma.

⁵Öjö däjä mau ubä lä nowamaö wei a ajele lä cui, Yai Bada nija a wä fama. Ya wä jililema. Abinaja a cuma. —Cafä yami wa lä yaile wa lä cui, wa bä nö lä bleamafe tä ja wa bejedimou. Jaba däjä wa cuo fa showaonö wa cua lä showale wa.

⁶Afä bä lä cui bä nö iyä blemalalemaje. Cafä wa wano wäyälwä bä nö iyä çai blemalalemaje. Öjö cudeenö, fei däjä iyä iyä bä ja, wa bä fe coamaö nomöjöö. Inaja wa bä taamabä bä li waiquiwä —a cuma.

⁷Öjö däjä, Yai Bada nija täbä lä dodoblamou wei täbä maqueblamobä täcö jamö, ai ya wä jililema. Abinaja a cuma. —Awei. Cafä Yai Bada wa Bada lä cui, wa nö yai lä

wałojaö wei wa lä cui, wa bä nö lä bleaamafe tä ja wa bejedimou. Wa cadidou showadao —a cuma.

⁸Öjö dāja ajele 4 a lä cuinö, motoca a ja e toubä löquema. Toubä fa löcönö, yobli yobli tänö täbä si öshöbä, motoca a nija etä jöbömoquema.

⁹Bä si öshöblou yalo, Yai Bada tä wafäblamaje, cama a lojodenö bä nö bleaama yalo. ¿Öjö tawä? Bä doblou lä mlai tä ja bä bufi mö yabajadonomi. Yai Bada a wafa çai doblao wäyänomije.

¹⁰Öjö dāja ajele 5 a lä cuinö, yalo waiteli a döcäobä etäcö jamö e toubä löquema. Toubä fa löcönö, yalo waiteli anö cama ebä çai lä cuono wei jamö tä mö bada dödblaliyoma. ¿Öjö tawä? Bä nö ninili bleaaö fe balojoa ja, cama bä aca wädöobloma.

¹¹Bä nö ninili bleaaö yalo, Yai Bada tä fedu jamö lä culadi tä wafäblamaje, bä walacasi wayuo showaoma cudeenö. Bä doblou lä mlai tä ja, bä bufi mö çai yabajadonomi.

¹²Ajele 6 a lä cuinö, Euflade u bada jamö e toubä löbalema. Toubä fa löbalönö u wejedu showalayoma, öjö u wanoca nojoli jamö bä wayu çai juimabeje, motoca a lä faö wei jamö bä lä bälöle bä bada lä cuinö.

¹³Öjö dāja ya tä fa mönö, yaitawä täcö caficö jamö, fecula wälidiwä ya faö dalalema. Yalo a jaba waiteli lä cui, öjö caficö jamö ai. Yalo waiteli ai a lä cui, öjö caficö jamö ai. ¿Öjö tawä? Öjönö, yalo waiteli jaba lä cui a wano shino wäyama yalo, a wano jole jole wäyälwä a wafa jilamoma. Öjö bä caficö ja fecula wälidiwä bä lä fano wei bä lä cui, yoyo bä mömou wälidiwä lä culenaja bä cuoma.

¹⁴Fecula bada ebä malä cuono wei. ¿Öjö tawä? Fecula bada a mayo dablamabeje, tä nö lä quilijii tä çai bluca wawämamaje. Öjö bä fecula lä cuinö, bada jödödöwä bä lä bälöblai bä çablaö cuaamaje. Yai Bada tä nö shino lä walojole a lä cuinö, täbä yanowamö yai jömaö lä bufio wei tä mö jalu dāja bä shäyobä.

¹⁵Abinaja Jesús a malä cuno wei. —Bei. Shomi bä madofibö lä lämaö wejei bä jatoblou lä culenaja, inaja showawä camiyä ya nia cublou. ¿Öjö tawä? Shinoco bä dablamou mlaobä, bä nia lä didio wei bä camishi ajedebolajenö bä laa lä showale bä lä cui, öjö bä bufi nia shino doblalou, wale nö lä dabou wejei bä lä cui —a cuma.

¹⁶¿Öjö tawä? Öjö bä fecula 3 lä cuinö, bada bä fa çölöjenö, bä wayu yododomaquemaje. Bä wayu lä yododoblaqueno wejei tä ulifi lä cui, ebleo cäficö a ja, Amajedono tä afa jilamou.

¹⁷Öjö dāja ajele jödödö a lä cuinö, toubä däa fa ösöjödälönö toubä löblalema. Toubä fa löblälönö, fedu jamö Yai Bada etä yano yai nowamaö lä dodijio wejei jamö ya wä icalı jılılema, Bada tä döcäobä etäcö ajede jamö. Abinaja a cuma. —Öjö cä lä waiquiwä —a cuma.

¹⁸Madula a wacö blada bladamous showadaoma. Täbä a bluca çai mashiquiwä jılıloma. Yału a wä çai faö nö quiliaö mö feduoma. Ulifi a çai bada blösö blösö mou nö quiliaö

showadaoma. ¿Öjö tawä? Yedu ja yanowamö täbä ma bälöono wei ma cui, inaja a ulifi bada blösö blösömou nö lä quiliano weinaja, moli ma cui tä çai jaba dablamou cuo bädaonomi.

¹⁹Babiloniateli bä afa lojode lä wäyāno wejei bä shabonobö jamö, ulifi a bada fa blösö blösömolunö täcabä bada yacläoquema. Täcabä bada iclacaobä jamö, 3 bä shabonobö shelelea cublaliyoma. Ai täbä bälöblawä lä yaiblai täbä shabonobö bada çai wäcäcälaliyoma. ¿Öjö tawä? Yai Bada tänö Babiloniateli bä nowa tabou showaoma. Tä nö wəlowä lä jushudou wei tä lä cui tä coa jödödöamalema, uba nashiwä toubä jödödöblamaö fe lä yadio wejeinaja showadawä.

²⁰Ulifi a blösö blösömou nö lä quiliano wei tänö, täbä ulifi bluca lä jöçoblai täbä mlao showadaolaliyoma. Bei mabä bläläa fa showadaamalälönö, mabä çai bada dablamou çödaanomi.

²¹Bleyula bä bada ma cui, judu mösö jamö culanö bä çai bada shäyājaö nö quiliadayoma. Yanowamö a jude lä culenaja bä jude cuwä, bä bada shäyājaö nö quiliama. Öjö bä bleyula nö quiliwänö täbä nö bleaaö fe fa balojoonö, Yai Bada a wafäblaö çomaje.

Apocalipsis 17

¹Öjö dāja, 7 toubä befi çai lä däbono wejei bä ajele ai a lä cuinö, abinaja wale nowa tayoluma. —Jabo. A showadi lä dodoo wei a suwä da mö, Nofi Jushublalodimi a wəfa bada shabono lä yädämabole a lä cui. Mau ubä lä bayucube tä möamo ja bä shabonobö blaa. Öjamö bä lä bälöle bä afa lojode wäyāöje. ¿Öjö tawä? Yai Bada tänö bä nö lä bleaamaö wei wa tä nia möö.

²Öjö bä nija, bada bä bluca lä bälöblai bä joleblaloma. Uba nashiwä toubänö täbä shi wəlimaö lä cuaaö wejeinaja, bä lä joleblalono wei tänö yanowamö täbä shi bluca wəli cuwä —wale nowa tama.

³Öjö dāja Yai Bada tä Bufinö wale lojodobou showao dāja, ulifi bloque a jamö wale bäläquema. Yalo waiteli wacä a jamö, suwä ya döcäa dalalema. Yai Bada tä nö lä waiblaö wejei tä a oninö, a yalo waiteli onio nö mlaoma. Bei febä 7 cuoma, bei yəlabä 10.

⁴Wacä ushujuwä cäcö ja a suwä didioma, wacä mö jude cäcö çai ja. Olo bänö a baushioma, maa mabä baushi nowa wai lä bluca wei mabä çainö. Dobä bä nowa wai au lä bluca wei bä çainö. Uba nashiwä toubä fe çai lajowä däboma, olo bä ja tä lä cui tä ja. Öjö toubä lä cuinö, a suwä doblou lä mlai etä jömamoma, Yai Bada tänö tä tamaö nofi lä wəlibou wei etä lä cui. A showadi lä joleblalou wei etä showawä lä cui.

⁵Suwä wäyācu ja tä a oni lä cuono wei, abinaja etä a oni cuu yacläoma. “Babiloniateli bä lä cui öjö ya, ya lä lojode wei. Bä showadi suwä lä dodoo wei bä lä cui, camiyä nija bä balalayoma. Bitä jamö bä nofi lä jushublalou wei bä lä cui, inaja camiyä ya jaba li fa cuaanö bä li cuaaö nodiablalou”, tä a oni cuma.

⁶Öjö ya suwä möö ja, ya shi wäli dalalema. Yai Bada ebä iyäbönö a shi wälima, Jesucristo a nofi mölabou fe lä yadiono wejei bä lä shäalaleno wejei bä iyäbönö. Ya suwä möö däjä ya bufi çai shädayaimoma ma cui,

⁷abinaja äjele a lä cuinö wale nowa tama. —¿Wedi tabä bei wa bufi li shädayaimou cule? Öjö suwä a lä cui nija wa bufi moyawäobä, ya etä ʘ nia wawämaö. A lä döcäo wei a yalo waiteli ma cui nija ya etä ʘ nia çai wawämaö mö feduo, bei febä 7 lä cule, bei yölabä 10 çai.

⁸Yalo wa waiteli lä dalalufe, a demi cuoma ma cui a nomalayoma. A mö nia yai lä watäaö wei jamö a jubä, täca fe jolocoa lä mlabodi jamö a nia faö çoo. ¿Öjö tawä? A ma cuono wei ma cui, fei däjä a cuami nomöjowä. A cua ma mlai a nia wawäa çolayou. Öjö cudeenö bita jamö bä yanowamö lä cublai bä bufi nia shädayaimou, bälimi bä cudiobä Yai Bada tänö bä ʘfa lä onibole si ja, bä ʘfa oni cua lä mlai. Ulifi a tablamou showao mlao däjä, bä ʘfa oni cuo showadao lä mlaono wei bä lä cui —wale nowa tama.

⁹Abinaja camiyä nija äjele a cuo çoma. —Wa bufi jaducua mlalanö wale ʘ nia jiliaö möblaimi. Öjö yalo waiteli 7 febä lä cuinö, jefu 7 bä jömamou. Nofi jushublalodimi a suwä lä döcäo wei bä jefu.

¹⁰Öjö 7 febä showawä lä cuinö, bada 7 bä çai bada jömamou. 5 bä bada läo balöoma ma cui, fei däjä bä cuami. 6 a lä cui a läa lä cule. Ai a lä cui, 7 a nia bada läo lä nomöjoo wei, a wawäbloimi showawä. Öjö 7 a lä cui a läquei däjä, a nia läo nö dedeaimi.

¹¹Ai a nia çai bada cuo, 8 a lä cui. Yalo a waiteli demi lä cuono wei a lä cui, a lä nomalayono wei a showawä lä cui, öjö 8 a nia cuo. Öjö ma cui, öjö 7 bä bada lä cui bä nija a çai coyocoo. A mö nia yai lä watäaö wei jamö, öjö a juu —a cuma.

¹²Abinaja a äjele cuma. —Yalo waiteli 10 wa yölabä lä möno wei yölabänö, shomi 10 bä nia bada läblamou mö lä feduo wei bä jömamou. Bä lämaboimi showaweje. Öjö ma cui, yalo a waiteli sho bä nia bada läo. Bä läo däjä bä nö nia bada dedebloimi.

¹³Yalo yami a waiteli bada yai läo ayaobä, öjö bä bufi nia bada shaliliblou. Öjö a shino bada nosiemou fa ayaonö, a wä nia juaöje.

¹⁴Oweja a wäfa ocalo lä jilamou wei a nabä nia queo ma cujei, öjö a lä cuinö bä nö nia shino bleaamaö ayao. Öjö a shino Bada lojode malä ayai. A nö shino lä wälojaö wei, öjö a Bada. Oweja a wäfa ocalo lä jilamou weinö bä çai lä juu wei bä lä cui, Yai Bada tänö bä lä nacano wei öjö lä cäbä. Bä yailema. Öjö bä bejedimou —a äjele cuma.

¹⁵Abinaja äjelenö wale nowa çai taö showaoma. —Mau ubä lä bayucube wa tä lä möno wei ya tä ʘ nia wäaö. A suwä lä dodoo wei a lä cui, öjö a lä döcäono wei jamö ubä lä bayucube ubänö, bluca täbä lä bälöblai täbä jömamou. Shomi täbä lä bälöblai täbä ma cui, bluca bä bälöblawä lä yaiblai bä ma cui, bä caticö ʘ bluca lä bou wejei bä ma cui, öjö bä li jömamou.

¹⁶¿Öjö tawä? Shomi bä bada jömamobä, yalo waiteli wa yölabä lä möno wei ya tä a nia wääö. Öjö bä yölabä lä cuinö, yalo waiteli a çai lä cuinö, suwä wa lä möno wei a nofi nia wälibouje, a showadi lä dodoo wei a suwä lä cui. Ebä madofi bluca nia lämaöje. Shinoco a nia tablamaöje. Yajibä nia waöje. Cowa wacöbänö a mö nia watäamaöje.

¹⁷Yai Bada tänö bä bufi nia taamaö, camanö tä wawämaö bufi lä doblao wei etä cublobä. Camanö bä bufi taamaö cudeenö, cama bä a fabä bä waiquiwä ma cui, yalo waiteli a bada nosiemou ayaobä bä bufi nia shaliliblou. Yai Bada tänö tä nia jowa lä taö wei tä jödödöblou showao mlao däjä, yalo waiteli a nosie nia juaöje.

¹⁸¿Öjö tawä? —a cuma—. Öjö wa suwä lä möno wei a lä cuinö, bä afa yai lojode lä wäyää wejei bä shabonobö jömamou. Bitä jamö bä bada lä bälöblai, öjö bä nija bä bluca nosiemamou —wale nowa tama.

Apocalipsis 18

¹Öjö ya suwä daa fa balölalönö, fedu jamö culanö ai ya tä ajele itou daa çölälema. Öjö a wä yai jilimamobä a cuoma. Cama ajele a shinö, bita a bada wacacabliiyoma.

²A wä çali faö ja, abinaja a cuma. —¡Bä waicoma! ¡Bä waicoma! Babiloniateli bä afa lojode lä wäyää wejei bä waicoma. Öjö bä yafibö lä wäliolaliyono wei jamö, fecula bä bälöjou jaa lä cule. Yai bluca täbä wäliwä lä cublai täbä juadii jaa. Öjamö bä yalo shami lä yää wei bä bécabö çai tamou, bä yai lä wäliidi.

³Babiloniateli bä nofi beshili lä jushublalou wei tänö, bluca bä bälöblawä lä yaiblai bä malä wäliidibaliyono wei. Bitä jamö bä bada lä bälöblai, öjö bä nija bä bluca joleblalodima. Madofi täbä ja Babiloniateli bä bufi shino yaimoma cudeenö, madofi bä lä nomöjöaö wejei bä lä bälöblai bä nö çai bluca bladaböaliyoma —a cuma.

⁴Öjö däjä fedu jamö ai ya wä jililema. Abinaja a cuma. —Öjamö iba wamacö lä cule bä da falalu. Bä doblou mlaobä jamö wamacö coyocoo mlaobä. Ya bä nö bleaamabä jamö, çafä bamacö nö bleaamaö yädäo mlaobä.

⁵Täbä wäliwä bluca lä tamou wei täbä yaiblou fa cunoja, fedu jamö täbä fe nö malä wädöbledayobö wei. ¿Öjö tawä? Bä doblou lä mlai ya tä nofi bluca çai jaducubou —a cuma.

⁶A wä faö ço ja, abinaja a cuma. —Cama bänö täbä lä taamano wejeinaja, inaja showawä bä taamaö mö da feduoje. Bä lä cuaano weinaja bädao mlai, wama tä nowa yai bolacadabä. Ai täbä nija cama uba nashiwä e toubä lä coamano wejei wama tä nö yuaö ja, ubä yai nashiwä lä dodijii toubä ja, bä fe coamaö da nomöjöje.

⁷“Camiyä ya yai”, bä bufi cuolanö bä nofi shino doamoma. Madofi täbä ja bä bufi fa yaimonö, täbä lä bufi wejei, öjö lä täbä däablaö showadaomaje. Öjö cudeenö cama bä befi tao fe lä balojoono weinaja, bä nö çai bleaaö cuo nomöjöobä etä çai da jöbäcöje. Bä mö çai öcöö nomöjöobä. Abinaja cama bä bufi malä cuu wei. “Ya bä yai nosiemabä ya. Ya nö yamili beblalobä yami. Ya öcöö mlaicätä”, bä bufi cama cuu.

⁸Inaja Babiloniateli bä bufi li cuu cudeenö, yedu bä nomablobä etä nia wayu cublou, bä mö öcöbä. Bä nia çai ofälalou. Cowa wacöbänö bä nia çai öshölaliyo. ¿Öjö tawä? Yai Bada tä Bada lä cui, bä dobroimi jömabä a showawä lä cui, öjö a nö shino malä walojaö wei —a cuma.

⁹Bitä jamö bä bada lä bälöblai bänö, Babiloniateli bä nija bä lä joleblalono wei bä lä cuinö bä nomöa ni bouje. Madofi täbä ja Babiloniateli bä bufi fa yaimonö, täbä lä bufii wejei täbä däblaö lä showadaono wejeinaja, cama bä ma cui bä çai cuaaö mö feduo showaoma. Bä shabonobö lä öshöö wei tä wäqueshi dabraöje däjä bä nia öcöö.

¹⁰Babiloniateli bä nö bleaamaö fe lä balojoo weinaja bä taamamou fa quilinö, bä ublaa blajalanö bä nö ojode nia taöje. Abinaja bä nia cuu. —¿Shädai! Babiloniateli wamacö äfa lojode da wäyäblejei, wamacö shabonobö wälioblou lä cule. ¿Wamacö nö äfa walojaö da wäyäblejei! ¿Shädai! Wamacö lä cuaano wei tä nowa ja, yedu Yai Bada tänö wamacö nö bleaamaö fe balojoa lä cule —bä nia cuu.

¹¹¿Öjö tawä? Madofi bä showadi lä nomöjöö wejei, bä bitä jamö lä bälöblai bä ma cui, öjö bä nia çai öcöö. Cama bä madofibö lä bälamamou wei bä nö doabimi çowä yaloje, bä nomöa nia bouje.

¹²Olo bä ma cui, blada bä ma cui, maa mabä baushi nowa wai lä bluca wei mabä ma cui, etäbä nia doaö çadaaimije. Dobä bä nowa au lä bluca wei ebä nia çai doaö çadaaimije. Camishi shuducaje au bä ma cui, wacä ushujuwä bä ma cui, wacä mö jude bä ma cui, öjö bä nia doaö çadaaimije. Fii fibä nö lä clëdeli wei fibä läçashi ma cui, jai yalo bä yolacö cuwä ja täbä lä tablaö wejei täbä ma cui, etäbä nia çai doaö çadaaimije. Fii fibä nowa lä bluca wei fibä ja täbä madofi lä tablaö wejei täbä ma cui, duo shibä ja täbä lä tablaö wejei täbä ma cui, duo jude shibä ja täbä lä tablaö wejei täbä ma cui, maa liyäjäwä mabä ja täbä lä tablaö wejei täbä ma cui, etäbä nia çai doaö çadaaimije.

¹³Täbä lä jölöcamou wei toubä bluca nö clëdeli lä daböjii e toubä nia çai doaö çadaaimije. Täbä wäqueshi nö liyoli uçucamabeje täbä ma cui, fii defi shüu nö lä clëdeli wei shüubä ma cui, etäbä nia çai doaö çadaaimije. Uba nashiwä toubä ma cui, dabö dabö ubä ma cui, nii löshi mobä ma cui, si ujudidiwä jibä ma cui, öjö etäbä bluca nia doaö çadaaimije. Baca bä ma cui, oweja bä ma cui, cabayo bä ma cui, bä befi çai läläabä täbä madofi ma cui, etäbä nia çai doaö çadaaimije. Täbä nosie juamobä täbä yanowamö showadi lä nomöjöö wejei täbä ma cui, täbä nia yanowamö çai doaö çadaaimije.

¹⁴Madofi bä showadi lä nomöjöö wejei bä lä bälöblai bänö, Babiloniateli bä bufijalajenö abinaja bä nia cuu. —¿Shädai! Wama täbä bluca lä bufijano wei wama täbä nia dabraö çadaaimi. Wamacö dodijobä täbä ma cui, wamacö baushimobä täbä ma cui, wama täbä nia tabou çadaaimi. Wama täbä nia dabraö çadaaimi —bä nia cuu.

¹⁵Öjö täbä bluca lä nomöjööano wejei bä lä cui, Babiloniateli bä nija bä blada lä däblaano wejei bä lä cui, öjö bä nia öcöö. ¿Öjö tawä? Babiloniateli bä nö lä bleaamano weinaja bä taamamou fa quilinö, blajai jamö bä ublalanö, wadowä bä nomöa nia bouje.

16Abinaja bä nia cuu. —;Shädayai! Babiloniateli bä ʾafa lojode lä wäyāno wejei bä fei dājā cuami. Camishi shuducaje au bä ja bä didioma. Wacä ushujuwä bä çai ja, wacä mö jude bä çai ja. ;Shädayai! Olo bä ja bä baushimoma. Maa mabä baushi nowa wai lä bluca wei mabä çai ja. Dobä bä nowa au lä bluca wei bä çai ja.

17Öjö täbä nowa lä bluca wei täbä lä cui, yedu täbä mö jödödöwä watäblamoä showadalayoma —bä nia cuu. Canawä bä çai bada lä cadidamaö wejei bä bluca ma cui, bä lä juwäbou wejei bä çai bluca ma cui, öjamö bä befi çai showadi lä caläo wei bä çai bluca ma cui, canawä bä jamö bä madofibö lä bälamou wei bä çai bluca ma cui, öjö bä blucanö bä blajawä ublalanö tä nia mööje.

18Babiloniateli bä shabonobö lä öshöo wei bä wäqueshi dablaöje ja, bä bufi wälidilanö abinaja bä nia cuu. —Ei täbä ʾafa lojode lä wäyāno wejei täbä lä culenaja, ¿wedi jamö ai täbä lojode li cuwä mö feduwä? Täbä ai cuami waiquiwä —bä nia cuu.

19Bä bufi nö bleaaö öjöböamobä, bä öcölanö bä fe çai nia libubö cuo. Bä nomöä bolajenö abinaja bä nia cuu. —;Shädayai! Babiloniateli bä ʾafa lojode lä wäyāno wejei bä fei dājā cuami. Modu u jamö cama ebä canawä lä cuono wei bä bluca lä cublai, Babiloniateli bä bladabö ja bä nö madofibölaliyoma ma cui, bä cuami nomöjowä. ;Shädayai! Yedu täbä mö bluca watäa showadaalema —bä nia cuu.

20Fedu jamö wamacö lä culadi bä bufi da doblalo. Yai Bada wama ecö ma cui, Jesucristonö wamacö lä shömöleno wei wamacö ma cui, Yai Bada a wāno wäyālewä wamacö ma cui, bä bufi yai da doblalo. Babiloniateli bänö wamacö lä taamano wejei tä nowa ja, Yai Bada tänö wamacö nö yulema.

21Öjö dājā ajele ai a lojodenö, maa ma bada fa maolönö, modu u jamö ma bada quemabalema. Ma queamalanö abinaja a cuma. —Babiloniateli bä ʾafa lojode lä wäyāo wejei bä lä cui, inaja showawä bä nia taamamou. Yai Bada a waitelimou ja, icali bä nia shäyāo. Bä nia dablamoü çödaaimi.

22Öjamö amowa fibä nata lä jubaö wejei bä ʾa nia jilio çödaaimi. Amowa bä ʾa lä daö wejei täbä ʾa çai mlai. Jai bulinama usibä wai cuwä fibä lä jolaö wejei bä ʾa çai mlai. Amowa bada fibä lä jolamou wei fibä ʾa çai mlai. Täbä madofi dodijidablaö lä daö wejei bä lä cui, öjamö bä nia dablou çödaaimi. Nii mobä lä washicaö wei tä ʾa ma cui, tä ʾa çai nia jilio çömi.

23Öjamö cowa wacöbä shi cublamobä täbä ja, wacöbä nia yämabou çödaaimije. Täbä doayobä jamö täbä nofi lä çöcamoaö wejei täbä ʾa çai nia jilio çödaaimi. ¿Öjö tawä? Babiloniateli bänö madofi bä showadi lä nomöjöano wejei bä lä cui, öjö bä shino yai lojodoo ayaoma cudeenö bä nö nia bleaaö majöo. Cama täbä lä feculamono wei tänö, bluca täbä bälöblawä lä yaiblai bä mölamaö dicoomaje yalo bä nö nia bleaaö majöo.

24Babiloniateli bänö Yai Bada a wāno wäyālewä bä shälemaje yalo, Yai Bada ai ebä çai shälemaje yalo, öjö bä nö nia yuaö. Bitä jamö täbä bluca lä shäleno wejei bä ma cui, öjö Babiloniateli bä mayo showawä.

Apocalipsis 19

- ¹Öjö ajele a wə faö fa balöönö, fedu jamö ai ya täbä a icalı faö jililema. Jai bluca täbä çocamolayoma dejemi täbä a bada jilimamou cuoma. Abinaja täbä cuma. —ıYai Bada a nofi da doablaje! ıBämalecö lä jucäaö wei öjö a, Yai Bada bäma a lä bufibou wei a lä cui! ıÖjö a wəfa shino doblao tamobä! ıÖjö a nö shino wəlojaö ayawä!
- ²Täbä lä taamaö wei tä ja, a bejedimou. A wə cadidou showadao. A showadi suwä lä dodoono wei a lä cui a dobroimi jömöa waiquiquema, Babiloniateli bä afa lojode lä wäyänö wejei bä lä cui. Bluca bä lä bälöblai bä wəlidiblamalemaje, bä showadi lä joleblalono wei tänö. Yai Bada a wə juamobä ebä lä shäleno wejei bä lä cui, öjö bä nija bä iyäbö nö yua waiquilema —bä cuma.
- ³Öjö däjä bä a icalı faö çoma. Abinaja bä cuma. —ıYai Bada tä nofi da doaje! Bä nö bleaabä jamö, bä wəqueshi nia tolucublamou shi wəlii —bä cuma.
- ⁴Öjö däjä bada 24 bä lä cuinö, yaitawä 4 bä çai lä cuinö, Yai Bada a döcäobä etäcö cotä jamö bä möfe bolanö, a lä döcäle a wəfa Bada doblao tamaje. Abinaja bä cuma. —Inaja lä tä cuobä. ıCafä wa nofi yai doamobä! —bä cuma.
- ⁵Öjö däjä, Bada a döcäobä etäcö jamö a wə bada jilioma. Abinaja a cuma. —Yai Bada etä a juamobä wamacö bluca lä cuinö, bäma tä lä bufibou wei a nofi yai da doablaje. Wama a nö quili lä taö wei wamacönö, wamacö afa lojode ma wäyäö wejei ma cui, wamacö afa lojode wäyäö ma mlajei ma cui, a nofi yai da doablaje —a cuma.
- ⁶Öjö däjä, ai ya bä a icalı faö jililema. Jai bluca täbä çocamolayoma dejemi täbä a bada jilimamou cuoma, bola bä a bada nacli lä culenaja showawä. Yalu a wə icalı faö nö lä quiliaö weinaja showawä. Abinaja bä cuma. —Bei. ıYai Bada tä nofi da doablaje! Bada bäma tä lä bufibou wei, a nö yai lä wəlojaö wei a lä cui, öjö a yai Bada läa ayaa.
- ⁷Bämacö bufi da doblalo. “ıFei däjä yai!”, bämacö da cu. Bäma a wəfa doblao da ta. Oweja a wəfa ocalo lä jilamou wei a lä cuinö, bä suwäbö e däabä tä ajedou malä waiquile. Bä feyalobö nija a moco cuobä a baushiblaö lä cuaaö wejeinaja, bä suwäbö e taamamou waiquia.
- ⁸Camishi shuducaje cäcö ja a didiobä etä jöbämoquema, cäcö au yai lä dodijidai cäcö lä cui —bä cuma. Öjö cäcö lä dodijidai cäcönö, Yai Bada ebä lä dodijaö wei tä jömmamou.
- ⁹Camiyä nija abinaja ajele a cuu nomöjööma. —Ei wale a da onicö. Yai Bada ya wəno wäyäö cadidia lä cule. Tä a bejedi. Oweja a wəfa ocalo lä jilamou wei a lä cuinö, bä suwäbö e däabä jamö täbä nia iyaö çai çocamou. Cäcöbö nofi çocamoabeje jamö bä lä nacaö wei bä lä cui, bä bufi nia yai doblalou —a cuma.
- ¹⁰Öjö däjä, öjö ya wəfa Bada doblao tabä, ajele bei a cotä jamö ya möfe boblaquema ma cui, wale wasölema. —Inaja dicoo mlai —a cuma—. Camiyä bämacö bluca. Jesucristonö tä a lä wawämano wei wama tä a nofi lä cadidibole wamacö lä cuinö, Yai Bada wama a wə juaö lä cuaaö weinaja ya çai cuaaö mö lä feduo wei cä ya. Wa möfe bolanö, Yai Bada wa tä afa nia shino yai Bada doblao taö —a cuma. Jesucristonö tä a

lä wäyāno wei tā ʔ bejedi lä cuinö täbä nö malä wəlojoblamaö wei, Yai Bada etä ʔ wäyābeje.

11 ʔÖjö dājä ya mamō showao dājä, fedu jamö judu mösö caloblaliyoma. ʔÖjö tawä? Mösö fa caloblalunö, cabayo au ya dalalema. Öja a lä döcäono wei a lä cui, Tä ʔfa bejedi wäyāö lä shalilio wei, bei a wəfa cua. Täbä dobroimi jömaö ja a wə cadidou showadao. A bejedimolanö a ishou.

12 ʔÖjö tawä? Bei mamocu lä cui, jai cowa wacö lä culenaja mamocu cuwä. Bada täbänö täbä lä yojobou wejei täbä wai bluca ja, a fe yojoo. Cama a wəfa oni ma tamoqueno wei ma cui, cama a wəfa shino damou ayawä. Ai täbä nija a wəfa damamoimi.

13 Camishi labe cäcö lä iyāmalaleno wei cäcö ja, a didia. Yai Bada bei tā ʔ, bei a wəfa jilaöje.

14 ʔÖjö tawä? Fedu jamö bä wayu jubä bä lä culadi, cabayo au bä ja, öjö nija bä befi çai läläa nocaquema. Camishi shuducaje bä ja bä didioma, bä au yai lä dodijidai bä ja.

15 Täbä wayu çai lä juu wei a lä cuinö, sibala namo mö feduduwä a çai bada waejemabou. Öjö a namonö, bä bälöblawä lä yaiblai bä nö nia bluca bleaamaö. Bä nosiemaö ja a wə nia lojodoaö. Duo shibä judenö jaboca bä läcashiblou si lä ijejeinaja bä nia taamaö. Yai Bada tä nö lä wəlojale a lä cui, a nö wəlowä lä jushuo wei a waitelimou bufiobä jamö bä lä löblaaö wejei bä lä cui, öjönö bä nia calucaö.

16 A lä didile ecö labe jamö a wəfa oni cua, bei wacu jamö çai. Abinaja tä ʔ oni cuu. “A nö shino lä wəlojaö wei a Bada. A shino Bada lojode lä ayai.” Einaja tä ʔ cuu.

17 Öjö dājä, motoca a jamö ʔjele ya ublaa dalalema. Ösö jamö bä yalo lä lelaadayou wei bä nija a wə icali faö ja, abinaja a cuma. — ʔBä da jaboje! Fei dājä Yai Bada tänö wamacö nia yai iyamaö.

18 Bada bä lä läo wei wama bä ʔajibä wabä. Bä wayu çai lä juu wejei bä ʔajibä çai. Wayu bä yai lä lojode wei bä ʔajibä çai. Cabayo bä ma cui, öjamö bä befi çai lä läläaö wei bä ma cui, öjö bä ʔajibä çai. Bä nosie juamobä bä yanowamö lä tabou wejei bä ma cui, bä tabou lä mlajei bä ma cui, bluca bä lä cublai wama bä ʔajibä wabä. Bä ʔfa lojode wäyāö lä mlajei bä ma cui, bä ʔfa lojode lä wäyāmou wei bä ma cui, öjö bä çai —a cuma.

19 Yalo waiteli a lä cui ya çai dalalema. Bitā jamö bä bada lä cublai bä çai. Cama wayu ebä çai yododoomaje. ʔÖjö tawä? Cabayo a ja a lä döcäo wei a ma cui, cama wayu ebä ma cui, öjö bä nabä bluca queobeje bä yododooma.

20 Cabayo a ja a lä döcäo wei a lä cuinö, yalo a waiteli juwälema. A wəno jole jole wäyälwä a çai, yalo waiteli a lä cule jamö a culanö, a nö lä quiliano wei a lä cui. Öjö a lojode nia fa dablamanö, tä nö lä quilijii tä bluca wawämama. A nö lä quiliano wei tänö, yalo waiteli a wəfa oni ja täbä lä oniblamono wei bä mölamama, cama a nö idubö ja bä möfe bolanö, a wəfa bada doblao lä tano wejei bä lä cui. Öjö cäcöbö fa

juwälönö, cowa wacö ca jamö cäcöbö demi quemabefälöma, cowa yaitawä nacli wacöbä lä waole jamö.

²¹Cabayo a ja a lä döcäo wei e sibalanö, ai bä bluca shäalalema, sibala namo mö feduduwä a bada lä waejemabout wei a showawänö. Öjö däjä, yalo bä ösö jamö lä lelaadaya wei bä lä cui, öjö bä yajibä ja bä bluca bädölaliyoma.

Apocalipsis 20

¹Öjö däjä fedu jamö ajele ya itou dalalema. Täca fe jolocoa lä mlabodi yoca caloblamobä tä showaboma, boo shicö cofibö çai, täbä lä ocaö wejei täcö bada.

²⁻³Yaitawä täcö lä cui täcö bada juwäa showadaalema, täcö cuo lä balöono wei täcö lä cui. Fecula Bada täcö afa cua. Sadanasi täcö afa çai jilamou. Täcö fa juwälönö täcö ocaquema. Täca nö lä quilijibodi jamö täcö quea fa showadamabafälönö, yoca cofiböquema. Yoca caloblaö mlaobeje, etä çai taa mö feduquema. ¿Öjö tawä? Lasha 1.000 a lalou jaöo mlao däjä, täbä bälöblawä lä yaiblai bä mölamaö jaödao ço mlao, öjamö täcö nia didibou balöoma. Lasha 1.000 a lalou ço däjä, a jujeblamobä etä nia cuo ma cui, a nö nia dedejeblamaimi.

⁴Öjö däjä bada bä döcäobä ya täbä dalalema, bä bada lä döcäono wei bä çai, yanowamö täbä jömabeje bä lä lämabono wei bä lä cui. Öjö bä bada lä cui, Yai Bada ebä fe lä bafedimano wejei öjö bä bufi cuoma. Yai Bada a wano wäyää nofi jushuaöje ja bä shälemaje, Jesús a wafa wäyää fe yadiomaje cudeenö. Öjö bä lä cui, yalo waiteli a ma cui nija, öjö a nö idubo ma cui nija, bä möfe boonomi. Cäcöbö afa bada doblao çai tanomije. Öjö a wafa oni lä cui ja bei bä wäyacu oniblamonomi. Bei bä imicö ma cui ja, inaja showawä. ¿Öjö tawä? Bä demia çolayoma, lasha 1.000 a lalou jaöo mlao däjä Cristo sho bä bada läo balöobä.

⁵Yai Bada tänö bä demi nia jaba jocädamaö lä ço wei, öjö lä tä li cuoma. Ai bä bluca lä nomablono wei bä lä cui, lasha 1.000 a lalou däjä, öjö bä nia demi shino jocädamaö nomöjöoma.

⁶¿Öjö tawä? Yai Bada tänö bä jaba demi jocädamaö lä ço wei, bä bufi nia yai doblalou. Yai Bada nija bä nia yaio. Täbä nomablou lä ço wei däjä öjö bä nia nomaimi. Yai Bada nija bä nia ojodamou ajedeo, Cristo nija çai, täbä nofi báyäbobeje. Lasha 1.000 a lalou showao mlao däjä, Cristo a Bada läobä jamö bä nia läo mö feduo.

⁷Lasha 1.000 a lalou däjä, Sadanasi a lä oçabodi jamö a fa cushäblalönö a nia famaö ço.

⁸¿Öjö tawä? Bluca bä bälöblawä lä yaiblai bä mölamaö çobä, a nia faö çoimaö. Öjö täbä bluca bälöblawä lä yaiblamou wei bä afa jilamou ja, “Coco, Macoco sho cäcöbö”, bä cuu. Öjö bä nia lä ishous wei jamö täbä nia bluca yododoblamaö. Bä nia lä ishous wei, comi bä nia cuo. Modu u casö jamö mlaca mlaca bä nö wabamobö lä mlainaja bä nia cublou.

⁹¿Öjö tawä? Jödödöwä tä ulifi jamö bä culanö bä wayu blacäo fe fa fayoolalunö, Yai Bada ebä lä bälöblaono wei ebä fe fayobomaje. Yai Bada tänö a shabono yai lä

nofimale a çai. Öjō ma cui, fedu jamō culanō cowa wacōbā fa blälāmalōnō bā mō bluca watāblalema.

¹⁰Bā lä mölamano wei a fecula bada lä cui, cowa wacō ca jamō a quemabalema, cowa yaitawā nacli wacōbā lä waole jamō. Yalo a waiteli lä cui, öjō a wāno jole jole wāyālewā a çai lä cui, öjamō cācōbö cuo waiquio dājā fecula bada a quea nomōjōmabalema, bā nō bluca bleaabā. Öjamō bā yanōcōblou balōa mlai ja bā nō nia bleaamaō shi wālii.

¹¹Öjō dājā Bada tā dōcāobā ya tēcō bada au dalalema, a lä dōcāono wei a çai. A lä dōcāono wei a bādou dājā, bita a ma cui, judu mōsō ma cui, tābā bluca mladou showalayoma. Tābā dāblamou çōdaanomi.

¹²Bā lä nomano wei bā demi jocādou fa çolonō, öjō ya bā çai dalalema. Bā āfa lojode lä wāyāmamono wei bā ma cui, bā āfa lojode wāyāmamono lä mlai bā ma cui, Bada tā dōcāobā etēcō ajede jamō bā bluca ublajao toujuoma. ¿Öjō tawā? Bā lä cuaaō wei bā ā lä onibole sibā caloblalemaje. Bālimi bā nia lä cuo wei bā āfa lä onibole si çai. Öjō dājā, cama bā lä cuaano wei tā oni fa mōnō, bā bluca lä nomano wei bā jōmōa showadaquema.

¹³¿Öjō tawā? Modu u jamō bā lä nomano wei bā ma cui, Yai Bada nija bā icuquema. Ai bā çai bluca nomaō mō lä feduono wei bā çai. Bā lä nomaō wei bā cuobā jamō, bā jödödōwā bluca lä cuono wei bā demi jocādou fa çolonō, Yai Bada nija bā bluca icuquema. Bā demi culanō bā lä cuaano wei tā oni fa mōnō, bā bluca jōmaō showadaoma.

¹⁴Öjō dājā Nomaō tā lä cui, cowa wacō ca jamō tā quemabalema. Bā lä nomaō wei bā cuobā jamō tā ma cui, inaja showawā tā tablalema. Tābā nomablou lä çō wei, öjō bei tā waiquiwā, cowa wacō ca jamō tābā lä queblaamaō wei tā lä cui.

¹⁵Bālimi bā nia lä cudio wei bā āfa lä onibole si ja, bā āfa oni cua lä mlai bā lä cui, cowa wacō ca jamō bā çai bluca quemabalema.

Apocalipsis 21

¹Öjō dājā, judu dude ya mōsō dalalema, bita dude a çai. Jaba mōsō lä cuono wei, bita a çai jaba lä cuono wei, cācōbö malā mladaliyono wei. Modu u ma cui, u cuonomi nomōjōwā.

²Jelusale dude ya tā shabono çai itou dalalema, Yai Bada etā shabono lä yaile a lä cui. Yai Bada tā lä cule jamō a cuoma a itolayoma. Bā feyalobō nija a moco cuobā a baushiblaō lä cuaaō wejeinaja a shabono baushi fa tablamolunō, inaja a cuoma.

³Bada tā dōcāobā etēcō jamō a culanō, ai tā a çcali falayoma. Abinaja ya cuo jililema. —¿Öjō tawā? Fei dājā, yanowamō tābā nijamō Yai Bada tā nia bälōo. Öjō bā nijamō a fa bälōalunō, cama ebā nia cublou cadidio. Cama Yai Bada tā showawānō bā nia çai cuo.

⁴Yai Bada tänö öjö bä mabuubö nia bluca yajöblaö. Bä nia nomaö çödaaimi. Täbä nomöa nia boimije. Bä nia çai öcöimi. Bä nia çai ninio çödaaimi. Inaja tä bluca cuo lä balöono wei tä malä mladaliyono wei —a cuma.

⁵Bada tä döcäobä etäcö jamö a lä döcäono wei, abinaja a cuma. —¿Öjö tawä? Fei däjä dude ya täbä bluca tablamaö —a cuma. Abinaja a çai cuma. —Ei wale a da onicö. Tä a nofi mölabobeje tä a. Tä a bejedi —a cuma.

⁶Abinaja wale nowa çai tama. —Bei tawä. ;Inaja lä waiquiwä! Camiyä jaba ya, jödödö ya çai. Camiyä ya lä cuinö täbä jaba bluca cublaliyoma. Camiyä ya showawänö täbä jödödöwä waicou. Bä lä amishaö wei bä lä cui, no mlai ja ya bä amishi nia çöamaö. Baḷimiblamodima u fe lä jojole u ja, ya bä nia dobäö.

⁷Bä nö walojaö lä ayao wei bä lä cui, dodijidawä bä cuobä ya bä nia dobäö. Cama bä nija ya nia bufiblamou. Ya bä nofi nia ijiluaö.

⁸Inaja öjö ya bä nia ma taamaö wei ma cui, ai bä lä cui ya bä nö nia bleaamaö ayao. Wale a juaö lä quilii wejei bä ma cui, wale nofi mölabou fe yadio lä mlajei bä ma cui, bä shami nö lä quilii bä ma cui, täbä lä shäö wejei bä ma cui, bä lä joleblalou wei bä ma cui, fecula bä nija täbä nabä lä shömaö wejei bä ma cui, nö idubö täbä lä bufiblaö wejei bä ma cui, bä caficö a lä jolemou wei bä çai bluca ma cui, cowa wacö ca jamö bä queamabä bä li waiquiwä, cowa yaitawä nacli wacöbä lä waole jamö. Täbä nia nomablou lä çöo wei, öjö bei tä waiquiwä —wale nowa tama.

⁹Öjö däjä 7 toubä befi çai lä däbono wejei bä ajele ai a lä cui a waloquema, wayu wayu 7 täbänö bä nö nia bleaamaö fa jödödöojenö, bä nia waicou lä showadaono wei bä ai a lä cui. Camiyä nija a wä faö ja abinaja a cuma. —Jabo. Oweja a wäfa ocalo lä jilamou wei a lä cuinö, a suwä nia lä dääö wei wa möbä —a cuma.

¹⁰Öjö däjä Yai Bada tä Bufinö wale lojodobolanö, bei macö ösöwä jamö wale bälacudunö. Öjamö ya fa bälacudunö, camiyä nija Jelusale a shabono dude damalalema, Yai Bada etä shabono lä yaile. Yai Bada tä lä cule jamö a cuoma ya itou dalalema.

¹¹Yai Bada tä shjinö a bada shabono wacacaoma. Maa au mabä baushi nowa wai lä bluca wei mabä shji faö lä culenaja showawä. A shabono mömou walalaoma.

¹²Ala nabä bada ösöwä fe fayooma. Bä fablaabä, 12 yocabä lä cule jamö ajele 12 bä läoma. Bei yocabä lä cuono wei jamö, Israeli bä ijilubö 12 ebä nija bä yaiablalou lä nodiablalono wei ebä afa oni cublamoma.

¹³¿Öjö tawä? Motoca a faö lä cuaaö wei tä mashi jamö, 3 yocabä cuoma. A lä queo wei tä mashi jamö 3 çödaawä. A faö lä mlai jamö 3 çai. A queo lä mlai jamö 3 çowä.

¹⁴Ala nabä fe bada lä fayoono wei nabä colo ja, maa 12 mabä bada bäfätäoma. Öjö colo 12 mabä jamö, Jesucristonö bä lä shömöleno wei bei bä afa oni cublamoma, Oweja a wäfa ocalo lä jilamou wei a lä cuinö.

15Wale a lä wayomano wei a ajele lä cuinö, jai shälacawä a ju loco cuwä tä showaboma, täbä labe lä wabaö wejei tä lä cui. Olo bä ja tä cuoma. Jelusale tä shabono labe wababä tä showaboma, öjamö yocabä lä cublai yocabä çai, ala nabä çai.

16¿Öjö tawä? A shabono blaucuwä lä culenaja a shabono fe wädöblamou cuwä. Jai shälacawä a ju loco cuwä tä lä däbono wei tänö, a shabono wabaö showadaoma. A shabono labao fe balojooma. Tä labe lä culenaja, tä blaucuwä cuo mö feduoma. Inaja showawä a ösöwä cuo mö feduo showaoma. ¿Öjö tawä? Tä wabaö däjä tä fe bluca usucuoma.

17Ala nabä ma cui, ajele anö nabä ösöwä wabaö nomöjööma, showadi täbä wabaö lä cuaaö wejeinaja showawä. Nabä ösöwä fe balojooma.

18Ala nabä lä cui, maa au mabä baushi nowa wai lä bluca wei mabä ja, nabä ala tablamoma. Shabono a yai lä cui, olo bä shino ja a fa cuonö, a mömou walalaoma.

19Ala nabä fe bada lä fayoono wei nabä colo ja, maa mabä baushi nowa wai lä bluca wei mabä blucanö, maa **12** mabä bada lä bäfätäono wei mabä baushioma. Jaba ma lä cui, mabä lä au wei mabänö ma baushioma. Ai ma nomöjöwä lä cui, mabä shi lä delelei mabänö ma baushioma. Ai ma majöwä lä cui, mabä lä liyä wei mabänö ma baushioma. Ai ma çowä lä cui, mabä liyä mö lä jude wei mabänö ma baushioma.

20Ai ma nomöjöwä lä cui, mabä oni lä liyäjäi mabänö ma baushioma. Ai ma majöwä lä cui, mabä lä wacäjei mabänö ma baushioma. Ai ma çowä lä cui, mabä lä flälajai mabänö ma baushioma. Ai ma nomöjöwä lä cui, mabä shi lä delelei ai mabänö ma baushio mö feduoma. Ai ma majöwä lä cui, mabä lä fläle wei mabänö ma baushioma. Ai ma çowa lä cui, mabä flälajawä lä fejeleshi wei mabänö ma baushioma. Ai ma nomöjöwä lä cui, mabä wacä lä fejeleshi wei mabänö ma baushioma. Jödödö ma lä cui, mabä ushujuwä mö lä jude wei mabänö ma baushioma. ¿Öjö tawä? Colo mabä lä cui, **12** mabä cuoma.

21Bei yocabä lä joleono wei yocabä **12** lä cui, dobä bä nowa au lä bluca wei bä ja, yocabä tablamoma. Dobä moli bä bada showawä ja, yocabä comadiwä cublamoma. Bä lä jublaaö wei bei yobä lä cui, olo bä shino ja yobä fa cuonö, yobä mömou walalaoma.

22Öjö a shabono ja, Yai Bada nija bä nö bayeli nacaobä ya yafi dablanomi. Öjamö Bada tä lä bufiblamou weinö bä çai cua malä waiquile, tä shino lojode lä ayai. Oweja a wafa ocalo lä jilamou wei a ma cuinö, öjönö bä çai malä cule.

23Öjamö bä lä bälöle bänö, motoca a nia bufijaimije. Belibo a ma cui, inaja showawä. Yai Bada tä shinö tä bluca wacacamabou malä waiquii. Oweja a wafa ocalo lä jilamou wei a lä cui, cowa wacöbä shi cublamobä tä lä culenaja a çai cua malä waiquii.

24Jelusale jamö tä shi wacacawänö, bluca bä bälöblawä lä yaiblai bä ulifibö nia çai wacacao mö feduo. Bitä jamö bä bada lä cublai bänö, Jelusale jamö cama madofi ebä nowa lä bluca wei bä çai nia walooje.

²⁵Bei yocabä lä joleblou wei yocabä fe nia laomi. Tä mö jaluö däjä yocabä fe lao malä mlai. Öjamö tä mö nia çai dödöomi.

²⁶Bä bälöblawä lä yaiblai bä lä cuinö, öjamö etäbä madofi bluca lä dodijidai bä nia çai juuje, etäbä madofi nowa lä bluca wei täbä çai.

²⁷Öjö ma cui, öjamö tä lä shami wei tä nia lucäimi. Yai Bada tänö tä nofi taö lä wəlibou wei tä lä taö wejei bä lä cui, bä nia çai faimi. Bä lä jolemou wei çai mlai. Bəlimi bä nia lä cudio wei, Oweja a wəfa ocalo lä jilamou wei esi oni ja bä əfa oni lä cule, öjö bä nia shino faö ayao.

Apocalipsis 22

¹Öjö däjä əjele a lä cuinö, camiyä nija bəlimiblamamodima u damalalema. U mömou walalawä dodijidaoma. Yai Bada tä döcäobä etäcö cotä jamö culanö u fa falönö u caläma, Oweja a wəfa ocalo lä jilamou wei a çai lä döcäo wei jamö.

²Öjö tä shabono ja bä lä jublaaö wei yo bada möamo jamö u caläma. Ai u mashi casö jamö, ai u mashi mö feduwä jamö, bəlimiblamamodima fibä ublaoma. Belibo a loo lä çole däjä ma cui, ai a loo lä çole jamö ma cui, ai a ja ma cui, showadi bä nii lalou nosi blacäcodima. Öjö fi jenabänö, bluca bä bälöblawä lä yaiblai bä jalomamobä jenabä li cuoma.

³Yai Bada tänö tä nofi lä wəlibou wei, öjamö tä nia cuo çadaimi. Öjamö Yai Bada a nia döcäo, cama Bada etäcö jamö. Oweja a wəfa ocalo lä jilamou wei a ma cui, öjamö a çai nia döcäo. Yai Bada etä ə juamobä bä lä cui, bä möfe bolanö showadi a wəfa nia Bada doblao taöje.

⁴Yai Bada mofecö nia dabraö wawädooje. Bei bä wəyäcu ja, Yai Bada bei a wəfa nia oni cublamou.

⁵Tä mö nia çai dödöo çadaimi. Motoca a nia bufijaimije. Cowa wacöbä shi cublamobä täbä ma cui, täbä nia çai bufijaimije. Bada tä lä bufiblamou wei a lä cuinö tä nia malä wacacamabou wei. Cama ebä lä cui, bä nia bada lämabou shi wəlii.

⁶Abinaja camiyä nija a çai cuma. —Ei wa tä ə bluca lä jililäfe tä ə nofi mölabobeje tä ə. Tä ə bluca bejedi. Bada tä lä cuinö, a wə lä juaö wejei ebä moyawämabä etä əjele shömöledayoma, cama a Bufinö a wəno wəyäləwä bä nö lä wəlojomabou wei a showawä lä cuinö. Tä nia lä cublou wei, tä nö dedejebrou mlai ja tä nia wawäblou.

⁷Öjö tawä? Tä nö dedejebrou mlai ja ya nia juu ço —a cuma. Tä nia lä cublou wei, ei si jamö tä ə bluca oni cua. Öjö tä ə oni nofi lä jaducubou wejei bä lä cui, bä bufi nia yai doblalou.

⁸Öjö tawä? Ei ya tä ə lä jilileno wei, ya tä bluca çai lä möno wei ya lä cui, öjö ei camiyä Juan cä ya. Ya tä ə lä jilileno wei däjä, ya tä bluca çai lä möno wei däjä, wale lä yömölano wei a əjele cotä jamö ya möfe fa boicunö ya wəfa nia doblao tama ma cui

⁹wale wasölema. Abinaja wale nowa talema. —¡Inaja dicoo mlai! Cafä wa ma cui, Yai Bada a wano wäyäléwä ai bä mö feduwä ma cui, ei tä a nofi lä cadidibolajei bä çai bluca ma cui, öjö camiyä bamacö bluca. Yai Bada wama a wä juaö lä cuaaö weinaja ya cuaaö mö lä fedule ya. Yai Bada nija wa möfe bolanö, öjö wa wafa Bada nia shino yai doblao taö —wale nowa tama.

¹⁰Abinaja wale nowa çai tama. —Tä nia lä cublou wei, ei Yai Bada wa tä ano lä onibole tä a nofi mojudumabo dijä. Tä cublou malä ajedei.

¹¹¿Öjö tawä? Wälidiwä tä taö bufi doblao lä waiquio wejei bä lä cuinö tä wälidiwä tabeje. Bä shamiaö bufi doblao lä waiquio wei bä lä cui bä shamiabä. ¿Öjö tawä? Bä yai lä dodijaö wei bä lä cui bä cadidou showaobä. Yai Bada ebä lä yaile bä lä cui, wälidiwä tä ja bä wasöo showaobä.

¹²¿Öjö tawä? —Jesús a cuma—. Tä nö dedei showao mlao däjä ya nia juu çö. Ya täbä dobäbä, ya täbä çai nia juu. Bä lä cuano wei tä nowa ja, bluca ya bä nia dobäö.

¹³Camiyä jaba ya, jödödö ya çai. Camiyä ya lä cuinö täbä jaba bluca cublaliyoma. Camiyä ya showawänö täbä jödödöwä waicou —a cuma.

¹⁴Bä camishibö lä yaluu wejei bä lä cui, bä aublou cudeenö bä bufi nia yai doblalou. Inaja bä cuaaö yalo, Jelusale a shabono dude jamö bä li fablaabä bä li, bei yocabä lä cublai jamö. Bälimiblamodima fibä ja bä iyabä.

¹⁵Sibo jamö ai bä nia cuo. Bä shamiaö bufi lä doblao wei bä nia siboo, fecula bä nija täbä nabä lä shömaö wejei bä çai. Bä lä joleblalou wei bä çai. Täbä lä shäö wejei bä çai. Nö idubö täbä lä bufiblaö wejei bä çai. Bä jolemou bufi lä doblao wei bä çai, bä showadi lä jolemou wei.

¹⁶Abinaja Jesús a cuma. —Camiyä Jesús ya lä cuinö, iba wamacö lä yododoblai wamacö nija, iba ajele ya shömölema, wamacö yömölamobä. David nodiwä bä nija a nia Bada lä bädonno wei ei ya, jai fii fi nasöcö ja ya nia cabudu faö lä çono wei ya lä cui. Shidicali a faö lä fenablao wei a no dabou lä cuaaö wejeinaja wale nö çai dabomaje —a cuma.

¹⁷Yai Bada tä Bufi a faö. Oweja a wafa ocalo lä jilamou wei bä suwäbö e a çai faö. Abinaja cäcöbö cuu. —¡Bä da jabo! —cäcöbö cuu. Ei wama tä a lä jilile wamacö ma cui, wamacö a çai fabä. —¡Bä da jabo! —wamacö cubä. Bä lä amishaö wei bä lä cui bä juimabä, öjö lä. Bä lä bufio wei bä lä cuinö, no mlai ja bälimiblamodima u coayolubeje.

¹⁸Tä nia lä cublou wei, ei ya tä a lä onibole wama tä a lä jiliaö wei wamacö lä cui, bamacö nowa taö lä cule. Ei Yai Bada ya wano lä onibole jamö, ai a lä cuinö shomi tä a yädäamaö dicoo ja, Yai Bada tänö öjö a nö nia bleaamaö. Ei tä a oni jamö, wayu wayu 7 ya bä afa lä wayoano wei täbä ja, a nö nia bleaamaö.

¹⁹Ei Yai Bada ya wano lä onibole jamö, ai a lä cuinö ai tä a joyaö dicoo ja, Yai Bada tänö cama etä nia çai joyaö mö feduo. Bälimiblamodima fi ja a nia lä iyano wei tä lä cui, ei tä a oni jamö ya tä afa lä wayoano wei, Yai Bada tänö öjö etä nia joyaö. Tä

shabono lä yaile jamö a nia lä bälöono wei tä lä cui, ya tä ɤfa ɕai lä wäyāno wei, öjö etä nia ɕai joyaö.

²⁰Abinaja Jesús a cuma, ei täbä ɤ bluca lä wawämale a lä cui. —Ya nia juu ɕo jaödao —a cuma. —Awei, Bada tä Jesús —ya e cuma. —Wa juu ɕobä lä. ¡Inaja lä tä cuobä!

²¹Bei. Bada tä Jesús lä cuinö Yai Bada ebä nofi bluca ojodabobä. Inaja lä tä cuobä.

Esclarecimento

Trata-se de iniciativa particular, com os seguintes objetivos: (i) colaborar para divulgação dos diversos textos bíblicos disponíveis, e, (ii) facilitar o acesso a esses textos, inclusive por meio de download.

Todo esforço em tornar a Palavra de Deus acessível a todos, em quaisquer localidades e falantes das mais diversas línguas, precisa ser um objetivo de todos os que são guiados pelo Espírito Santo. Ele inspirou o profeta Jeremias a dizer “não ensinará jamais cada um ao seu próximo, nem cada um ao seu irmão, dizendo: Conhece ao SENHOR, porque todos me conhecerão, desde o menor até ao maior deles, diz o SENHOR” (Jer. 31:34).

Jesus, também, falou assim: “e será pregado este evangelho do reino por todo o mundo, para testemunho a todas as nações” (Mat. 24:14).

Muitas organizações foram constituídas com o propósito de fazer a Bíblia disponível nas diversas línguas. Não é uma tarefa simples. Anos de trabalho, dedicação e entrega são necessários para esta tão extraordinária missão.

O texto deste trabalho está disponível na internet, em páginas eletrônicas de organizações que produzem ou divulgam bíblias, sem acréscimos de notas ou comentários. Assim, reconhecendo e respeitando os direitos que possuem sobre seus trabalhos, incumbe a todos os que amam a Palavra de Deus, o esforço em contribuir para amplificar sua divulgação.

Se possível, faça download do texto, para que sejamos, também, guardiões da Bíblia, e, com isso, preservando-a para as futuras gerações.

Divulga a Palavra de Deus, ela mostra o Caminho e permite a todos, que se conheça Sua vontade, em todos os lugares e épocas.

Marcel da Glória Pereira
2021, Vitória/ES - Brasil